


Iwaperite tajorentsi ikenkithatakoetziri

awinkatharite Jesokirishito: owakirari

inimotakiri tajorentsi



New Testament in Ashéninka Pajonal (PE:cjo:Ashéninka
Pajonal)

Iwaperite tajorentsi ikenkithatakoetziri awinkatharite Jesokirishito: owakirari inimotakiri tajorentsi

New Testament in Ashéninka Pajonal (PE:cjo:Ashéninka Pajonal)

copyright © 2008 Wycliffe Bible Translators, Inc.

Language: Ashéninka Pajonal

Translation by: Wycliffe Bible Translators, Inc.

Ashéninka Pajonal [cjo], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ashéninka Pajonal

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022

97defb47-361b-545a-898b-173aeaa61806

Contents

MATEEYO	1
MARIKOSHI	81
ROOKASHI	126
JOWA	204
RANTAYITAKIRINI	260
OROOMAJATZI	326
1 KORINTOJATZI	355
2 KORINTOJATZI	383
KARAASHIÝAJATZI	403
EJEESOJATZI	415
JIRIPOSHIJATZI	426
KOROJAASHIJATZI	434
1 TEJAWOONIKAJATZI	442
2 TEJAWOONIKAJATZI	448
1 TEMOTEEYO	451
2 TEMOTEEYO	460
TEETO	466
JIRIMOOJI	470
IJORIYOTZINKARITE	472
JANTYAAKO	496
1 PEETERO	506
2 PEETERO	515
1 JOWA	521
2 JOWA	529
3 JOWA	531
JOORASHI	533
ROÑAAGAYITAKIRINI	536

MATEEYO ROJANKINATAKOTAKIRI JESOKIRISHITO, TSIKA IKANTA ROWAWIJAAKOTANTZI

*Iwaeropaeni ichariniiteni Jesoshi
(Rk. 3.23-38)*

¹ Paerani ijeekawitani Jesokirishito jaka kipatsikika. Tekirani ijeekini jaka, ijeekini itakaantaworini ichariniiteni Iraviiirini eejatzi Awaraamani. Iroñaaka nojankinateeyemironi iwaeropaeni riraga ichariniiteni riraga Jesokirishito.

² Eenironi ijeekini paerani rirori Awaraama, iinani otzimiri itomini iitachari Ijaaka. Itomini irira rirotaki Jakoowo. Itomipaenini rirotaki Joraa eejatzi rirentzipaeni. ³ Itomini riraga Joraa rirotaki riraga Paareshi eejatzi Shaari. Rinironi irirapaeni owaero Tamaara. Itomini riraga Paareshi iwaero Eshiroomo. Itomini irira rirotaki Araami. ⁴ Itomini irira rirotaki Aminagaawa. Irira rirotaki ashitaririni Naashoni. Itomini riraga Naashoni rirotaki Sharimoo. ⁵ Riraga Sharimoo rirotaki ashitaririni Woosho. Rinironi rootaki Raawa: rootaki paashinijatotatsiri atziri. Itomini riraga Woosho iwaero Oweeri. Rinironi rootaki Roota: rootaki paashinijatotatsiri atziri eejatzi. Itomini riraga Oweeri rirotaki Isayii. ⁶ Itomini irira rirotaki Iraviiiri, riraga jewawentziririni joriyyopaenini paerani. Ari ikaataki irinta shiram-paripaenini 14.

Roojatzti ikoñaatapaaki itomini riraga Iraviiiri iitachari Sharamoo. Rinironi rowaga iinani Oriiyashi tekira ikami. ⁷ Itomini rirori Sharamoo riraga Rorowaama. Itomini irira rirotaki Awiiyashi. Itomini riraga Awiiyashi rirotaki Aasha. ⁸ Itomini irira rirotaki Joshepaata. Itomini riraga Joshepata iwaero Joraama. Itomini irira rirotaki Oshiiyashi. ⁹ Itomini riraga Oshiiyashi rirotaki Jotaama. Itomini irira rirotaki Akaashi. Itomini riraga Akaashi iwaero Eshikiyashi. ¹⁰ Irira rirotaki ashitaririni Manasheeshi. Itomini irira rirotaki Amoo. Itomini riraga Amoo rirotaki Joshiyyashi. ¹¹ Riraga Joshiyyashi rirotaki ashitaririni Jekoniiyashi, eejatzi rirentzipaeni. Ari ikaataki jaka eejatzi paashini shiramparipaenini 14. Ijeekantari riraga Jekoniiyashi eejatzi rirentzipaeni ipokapaaki joraaropaeni poñaachari inteenanta kipatsi iitachari Wawiroomiya. Ranaakotakiri joraaro joriyyopaenii roojatzti ragaeyakirini osheki irirapaeni roojotakiri raanakiri inampikinta rantawaetenirii. Raanakiri maawaeni joriyyopaenini janta inampikinta.

¹² Roojatzti ikoñaatapaaki itomini riraga Jekoniiyashi iitachari Jaratyeeri. Itomini rirotaki iwaero Jorowaweeri. ¹³ Itomini riraga Jorowaweeri rirotaki Awyoori. Irira rirotaki ashitaririni Eryakiimi. Itomini irira iwaero Ajooro. ¹⁴ Itomini riraga Ajooro rirotaki Sherooko. Itomini irira iwaero Akiimi. Ro itomini irira rirotaki Eryooro. ¹⁵ Irira rirotaki ashitaririni Eryaari. Itomini irira iwaero Mataa. Itomini riraga Mataa rirotaki Jakoowo. ¹⁶ Riraga Jakoowo rirotaki ashitaririni Josee. Irira ikashiyakawo rayero Mariyya, rowaga riniro Jesoshi, iitachari eejatzi Rotyaantanewo Tajorentsi. ¹⁷ Ari ikaataki maawaeni rirori shiramparipaenini eejatzi 14.

Ikoñaatapaaki Jesokirishito

¹⁸ Iroñaaka nokamantemti tsikarika ikanta ikoñaatantapaakari paerani Jesokirishito. Rinirontapaakyawo irira rowaga tsinani oetachari Mariyya.

Eejatzi ikashiyakawo rayero Josee, omaanta tekiraata imatziro, tekiraata rayiro. Roojatzi omotzitashitaka, tema otajonkapaakiro Ishire Tajorentsi omotzitakaaapaakiro. ¹⁹ Riraga Josee tema iñaakirowa omotzitaki; roojatzi ikenkithashiryaaantawitaka, ikantzi: “Tee okameethatzi iroka tsinani. Tema oshinetakari paashini shirampari. Iroñaaka eero nayiro”. Omaanta irira ikameethatataki, rootaki ikowantakari ikamintheero. Tee ikoyi rowashiwentayero. Ikenkithashiryaaawitaka: “Eero nokantziri atziripaeni ishirontawentawokari. Apaniroeni nokamantathatero, nokantero: ‘Eero nayimi’”. ²⁰ Omaanta eenirorika ikenkithashiryaaawitaka, imaanaki roojatzi romapokapaakiri ronampiri Tajorentsi romishimpyaakiri, ikantapaakiri:

—Josee, tema eeroka icharineetenipero Iraviiirini. Eero pikenkithashiryaaakotowo pookero Mariiya. Tekatsi oshinetaya paashini shirampari. Omotzitakirira tema otajonkakitziro Ishire Tajorentsi, rootaki ikoñaatantyaari. ²¹ Aririka otzimaki otomi, piiteri Jesoshi.* Rowawijaakoteri anteeyirorini kaari kameethatatsi, rootaki piitantlyaariri iwaero Jesoshi.

—Jee, aritaki.

Roojatzi ipiyanaka riraga ronampiri Tajorentsi.

²² Roojatzi otzimantakariri otomi omonkaatantyaari rojankinatakotzitakarini paerani kamanantzirorini iñaani Tajorentsi iitachari Iseeyashini. Rootaki Ishire Tajorentsi ojankinataakaikiriri. Ajaa, iroka ikantziri: ²³ “Inja omotzitashitanakya apaani kaari shinetaariri shirampari, otzimeri otomi, iiteeteri Emanoeri”. Okantakotziri Emanoeri: “Itsipatakae Tajorentsi”. Rootaki iroka ikantakiriri rirori ronampiri Tajorentsi.

²⁴ Ipiriinanantanaka Josee, ikemijantaperotanakiro ikantakiriri ronampiri Tajorentsi. Riyaatashitakiro Mariiya, ikantakiro:

—Aritaki iinja naaperotemi. Omaanta iroñaaka thame nopankoki.

²⁵ Omaanta tekira imatziro Josee rowaga Mariiya, roojatzi otzimantakari otomi. Ikoñaatantapaakari, riraga Josee iitakiri itominthori Jesoshi. Roojatzikya raantaperotanakawo.

2

Apaanipaeni yotakotziriri ompokiropaeni rareetakitarri Jesoshi

¹ Ikoñaatapaaki Jesoshi janta nampsiki owaero Weri. Ojeeki Weri janta Joreeyaki. Ikoñaatantapaakari eeniro ijeekee Erooreshi Jerojareeki. Irinta-paeni kaari joriyyotatsiri, omaanta ipinkathariwenteeyakirini maawaeni joreeyajatzi. Roojatzi rareetapaenta apaanipaeni yotanitzinkaripaeni poñaachari paashinikinta kipatsi, ipoñaaka janta inteenanta. Ikinapaaki ryowapiintzinta oorya. Riyotapiintawitari ompokiropaeni iitarikamakya.

² Ipokantapaentari janta rojampitapaakiri jerojareejatzi, ikantapaakiri:

—¿Tee pilñiiri tsika ijekakika riraga jewaperowenterini ijoriyyotzinkaritepaeni, riraga owakira koñaateentsiri? Janta nonampikinta noñaawakiri ikontetapaaki jenoki ompokiro, rootaki niyotantanakari koñaatapaaki. Nopokantapaakari iroñaaka, nopinkathateri, noki-moshirewenteri.

³ Ikemantawakariri riraga pinkathari Erooreshi, tee inimotanakiri, ikenkithashiryaaanaka: “Tee nokoyi paashini jewawenantatsini, naaka apaniroeni”. Eejatzi maawaeni jerojareejatzi ikemantawakariri, ikenkithashireeyananakan. ⁴ Roojatzi ikaemakaantakiri riraga Erooreshi maawaeni jewatatsiripaeni ñaanakowenantatsiripaeni janta Tajorentsipankoki. Eejatzi ikaemakaantakiri maawaeni jewatakayitziririni

* ^{1:21} Okantzi Jesoshi apaanteki aari: Owawijaakotantatsini.

iyotaantzirori Iwaperite Tajorentsi. Rojampitawakiri maawaeni, ikantawakiri:

—¿Oetaka okantziri Iwaperite Tajorentsi? ¿Tsika ikoñaatekapa Rotyaantanewo Tajorentsi?

5 Ikantanakiri:

—Ari okantzii: ikoñaate janta Weriki jaka Joreeyakika. Tema paerani aritaki rojankinatakotzitakarini kamanantzirori iñaani Tajorentsi iitachari Mikiiyashini, ikantaki: **6** “Janta Joreeyaki ari ojeeki nampichaaniki oetachari Weri. Tee ikemakotawitawo maawaeni atziri omaanta anaakotero maawaeni nampsitsi antawo Joreeyaki ikemakotero maawaeni atziri. Rooma ikoñaatzimoteri jeekatsiri janta Jewatatsini, ikempoyeeyerini maawaeni joriyopaaeni”.

7 Riraga Erooreshi imanakiro maawaeni okaatzi ikemawakiri, ikaemakaanteeyakirini riraga yotakopiintawitariri ompokiropaeni. Ipokantapakari, ikantawakiri:

—¿Tsika okaatzika piñaantakariri ompokiro ikontetapaaki piyotantakari ikoñaatapaaki jewatatsini?

8 Ikemawakiri ikamantapaakiri, roojatzi rotyaantawakiri ikantawitawakiri:

—Kameetha piyaate Weriki paminakiteri tsikarika ijekakaperotzi eentsi. Aririka piñaapaakiri pipokaate jaka pikamantaaten, kameetha nareetakityaari naari nopinkathatantakityaariri nokimoshirewenteri eejatzi.

—Jee, ari.

9-10 Ikemantapaakariri ikantawakiriri, rowaganaka riraga yotakotziriri ompokiropaeni. Roojatzi janta niyanki awotsi iñaawaatziiri eejatzi ompokirojenokira iñaakiri chapinki janta ipoñaakanta. Iñaantawaariri ikimoshireperotanaki. Reewatanakiri apatziro rowakanakiri janta ijekakinta eenchaaniki; ari ikatziyapaaka janta jenoki ipankokira. **11** Roojatzi rareetantapaaka janta, ikyapaaka pankotsiki, iñaapaakiri Jesoshi, eejatzi riniro. Rotziwerowashitapaakari, riwethatantapaakari, eejatzi ipinkathatapaakiri ikimoshirewentapaakiri. Roojatzi itaaparyantapaakawo itsiwoote, raakiro inowikuyaakiro iraata oorotatsiri kameethaperotatsiri, pinaperotachari. Eejatzi raakiro apite kajankaritatsiri eejatzi kameethatatsiri. Roojatzi ipashitantapaakari Jesoshi. **12** Roojatzi imaapaaki. Imishiwaetakaakiri Tajorentsi. Ikantakiri:

—Eero pipiyanaa janta Erooreshi.

Ikemawakiri roojatzi ikinapithatantanaari paashiniki awotsi, ryaatapipathateeri iipatsiteki.

Josee ishiyapithatakari Erooreshi

13 Roojatzi ipiyeeyanaani inampiki rirori yotakotziriri ompokiropaeni, roojatzi rapiitakiro Josee romishimpyaantakariri ronampiri Tajorentsi, ikantapaakiri:

—¡Pipiriute! Ikwaki pinkathari riraga Erooreshi rowamaakaanteri eentsi. Paanakiri janta Ejiipitoki, eejatzi pitsipatanakyaawo piina. Ari pijiekapaaki janta, eero pipiyaa. Paata nokantemi pipiyee.

—Jee, aritaki.

14 Roojatzi ipiriintanaka ikantanaka ryaatapithatanakiri niyankipaetenitstieniri. Ishiyakaapithatanakari eentsi janta Ejiipitoki, itsipatanakawo iina. **15** Ijeekawitapaaka janta, ijeki, ijeki, ojamanitanaki janta, roojatzi ikamanaki riraga Erooreshini. Riraga Tajorentsi ikamantakiri Josee roojatzi ipiyantari iipatsiteki. Rootaki omonkaatantakawori rojankinatakotzitakarini paerani kamanantzirorini iñaani Tajorentsi iitachari Oseeyashini. Rirotaki Awinkatharite jankinatakayiriri. Rojankinatzi:

"Ikantakini Tajorentsi: 'Ijeekawitakya notyomi janta Ejiipitoki, roojatzi nokamanteeri ipiyee'".

Ikijanaka Erooreshi

¹⁶ Rootaki riytantanakari riraga Erooreshi teera ipiyaa yotakotziriri ompokiropaeni, ikantaki:

—Irintapaeni ramatawitakinakya.

Ikijanaka roojatzi rotyaantanakiri joraaropaeni, ikantakiri:

—Piyaate janta Weriki, eejatzi piyaate janta paashinipaenikira pankotsikira okaakini. Powamaakiteriroña eentsipaeni janta. Pitchonkeri maawaeni shirampari owakira yowatsiri roojatzi irintapaeni monkaateenchari apite rojarentsite, powamaakiteriroña maawaeni.

—Jee, ari.

Rootaki ikanantakawori iroka, rooma ikantziri chapinki riraganki yotakotziriri ompokiropaeni ikantzi tekira imonkaatziro Jesoshi rojarentsite apite. Ikenkithashiryaawitaka iita eeniro ijeeki Jesoshi Weriki.

¹⁷ Ari omonkaataka iroka rojankinatzitakarini paerani kamanantzirori iñaani Tajorentsi iitachari Jeremiiyashini. Rojankinatakotakironi paashini nampitsi okaakini Weri, ikantzi:

¹⁸ "Inja ikemakoetero janta Ramaaki ari iraakoeyakarini ramaajatopaeni otomipaeni, osheki okoetyagaeyakirini. Rowaga ojawaenini Rakeeri eejatzi tsinanipaeni iraakotyaa otomipaeni eero okaatzimotziro iraakotyaa. Rootaki iraanteeyakaririni okoetyagaeyanakirini rowamagaetakiri otomipaeni, maawaeni".

Ipiyanaa Josee Najareeteki

¹⁹ Tee ojamanitzi ikamantakari Eroreshini, eeniro ijeeki riraga Josee janta Ejiipitoki. Roojatzi romishimpyaantaari ronampiri Tajorentsi, ikantapaeri:

²⁰ —Iroñaaka okameethatzi pipiyeerakya janta piipatsiteki, tema kamaki kowawitachari rowamayerimu Jesoshi.

²¹ Ikemawakirira roojatzi ipiyantaa iipatsiteki oetachari Ishirayeeri. Riyyatawitanaka Weriki raanakiri eentsi eejatzi itsipatanakawo iina.

²² Omaanta niyanki awotsi ikemakotakiri Arekiraawo, itomini Eroreshini, iroñaaka ipinkatharitzi ipoyaatakari ashitaririni. Ari ithaawanak rirori Josee, tee ikoyi riyaatanee janta. Roojatzi rapiitakiro romishimpyaagaeri ronampiri Tajorentsi, ikantapaakiri:

—Eero piyaatzi pinampiki paerani, riraga Arekiraawo rowamaakaantawakirkari eentsi.

Rootaki riyaatantanakari iroñaaka janta Karireeyaki. ²³ Ikanta rareeta-paaka janta ijeekapaaki nampitsiki tsikarika ijeekawita paerani oetachari Najareete, aritaki rantaritapaaki Jesoshi janta. Rootaki omonkaatantanakari iroñaaka ikantakirini kamanantzirorini iñaani Tajorentsi paerani, ikantzi: "Ipoñaakya riraga Rotyaantanewo Tajorentsi Najareeteki".

3

Riraga Jowa kaawoshitakotantsiri Tajorentsi ikamanantapiintzi janta okaankiityeenta

(Mr. 1.1-8; Rk. 3.1-9, 15-17; Jowa 1.19-28)

¹ Ikanta riyaataki Jowa, riraga kaawoshitakotziriri Tajorentsi janta Joreeyaki okaankiityeenta. Aritaki ritanakawo ikenkithatakapointeyakirini atziripaeni. ² Ikantapiinteeeyirini:

—Pikenkithashiryaawakyaata, eero pikimitaa paerani. Pipakagaero kaari kameethatatsi panteeyakirini. Pameenteeyari Tajorentsi iroñaaka. Rooteentsi reewawentem, eejatzi raminakowiritantem.

³ Paerani ikenkithatakotzitakarini Jowa riraga kamanantzirorini iñaani Tajorentsi itachari Isseeyashini. Iroka rojankinatakotzitakaririni, ikantzi: “Eenitatsi iinja atziri kenkithatakayerini atziripaeni janta okaankiityeenta, ikanteri: ‘Paamayarirapa Awinkatharite, pikameethatanaki pineshi-ronkatawakaeya’”.

⁴ Eejatzi Jowa, tee ikithaatawo kithaarentsi kameethari. Omaanta ikithaatawo ontyaantsi iwitzl kameeyo. Eejatzi ishirikathakitar mashitsimashi ikimitakari riraga Iriiyashi kamanantzirori iñaani Tajorentsi. Rowapiintari kimitariri tsitsiri.* Eejatzi ithotziri iyaa pitsi eenitatsirika.

⁵ Ipokashitapaakiri maawaeni jerojareejatz. Eejatzi ikemijantapaakiri maawaeni joreeyajatz. Eejatzi maawaeni jeekatsiri okaakini iñaa oetachari Joriraani, eejatzi ipokashitapaakiri ikemijantapaakiri. ⁶ Ikantapaakiri kemaperotapaakiriri:

—Niyotzi eenitatsi kaari kameethatatsi nantziri. Nokowaperotzi ineshirronkaperotena Tajorentsi rowawijaakotena.

Roojatz ikaawoshitakotantawakariri Tajorentsi riraga Jowa iñaakira oetachari Joriraani.

⁷ Eejatzi ipokaeyawitakan warijeeyopaeni eejatzi saroseeyopaeni. Ikwawitaka ikaawoshitakotawakirim rirori eejatzi.

Omaanta ikijathatawakiri Jowa ikantawakiri:

—;Erokateeyakini maankipaeni! Pikimiteeyakaarini kamaripaeni. Tema pitheeyawaetashita eejatzi pamatawitashitari maawaeni. Tee okameethatzi pantziri. Tee pikowaeyawitan piyate paamariki kaari tsiwakanitatsini, rootaki pikowantawitakari pikaawoshitakotaarimi Tajorentsi. Eero pikenkithashiryaashiwit eero rowashironkaemi Tajorentsi tema pikaawoshitakotashitatyaari. ⁸ Pikowakirika nokaawoshitakotawakimiri Tajorentsi pityaawo pikenkithashireeya pijeekeanteyari kameetha, pookaero kaari kameethatatsi pantapiinteyakirini niyotantyaari tee pikimita paerani. ⁹ Eero pikantawaetashita:

“Nocharinetakari Awaraamani, rootaki niyotantakari aritaki nawijakote”. Pamatawitashitaka eero ka apaniroeni. Tee paapatziyaperotari. Ikwakirikami riraga Tajorentsi, imatero ipeyeromi atziri iroka mapika oshenkateeyaaarinimi Awaraamani, aritaki rantakiromi. ¹⁰ Maawaeni inchato kaari kithokitatsi tema ari atowakiro apiyotero atagaeyeroni paamariki. Eejatzi eerori pikimiteeyakawoni inchato kaari kithokitatsi. Kyaaryoowa rookimikari eerori Tajorentsi paamariki kaari tsiwakanitatsini. ¹¹ Niyotakiririka rookaero atziri kaari kameethatatsi rantziri, nokaawoshitakotawakiri Tajorentsi iñaakira. Omaanta kaakitaki impaeta-paakinani, riraga Rotyaantanewo Tajorentsi. Ranaakotakina, tema riro-taki jewaperowenantatsiri. Aritaki ikithaatakaapaakaero Ishire Tajorentsi maawaeni aapatziyakariri amitakontyaari. ¹² Owiitakirorika arooso aakiro otzinkayitakiro. Rowaga otaki ataakiro paamariki. Rooma rowaga owatha otetakiro akempoyaantapiintaworiki. Eejatzi ikimiteri riraga impaetakinari. Tema rinashityaari atziripaeni. Retakotyaari aapatziy-eyakaririni ijekimotantyaari janta okameethatzinta omaantaky kaari kameethatatsi rookaerini paamariki kaari tsiwakanitatsini.

*Jesoshi ikaawoshitakotakari Tajorentsi
(Mr. 1.9-11; Rk. 3.21-22)*

* ^{3:4} Janta Ishirayeeri rowari riraga oshiyariri tsitsiri.

¹³ Ikantaka ipoñaanaka Karireeyaki Jesoshi, riyaataki iñaaki oetachari Joriraani. Riyaatashitakiri Jowa ikaawoshitakotantawakyaariri Tajorentsni.

¹⁴ omaanta tee ikowawita riraga Jowa. Ikantawitawakari:

—Eero nokaawoshitakotzimiri Tajorentsi eerori. Rooma eeroka kaawoshitakotanakinarinikya Tajorentsi naari. ¿litaka pikowantari nokaawoshitakotawakimiri eeroka? Rooma eerokataki pinkatharitatsiri.

¹⁵ Ikantapaakiri:

—Rootaki okameethatantari iroñaaka pikaawoshitakotenari Tajorentsi naaka amonkaatantyaawori ikowakaakaeri.

Roojatzi ikantawakiri:

—Jee ari, pipokeeta jaka.

¹⁶ Roojatzi ikaawoshitakotantawakari rirori. Roojatzi ishitowaataneera iñaaki, iñaawakitziiro Ishire Tajorentsi opoñaaka jenokinta Tajorentsikinta ayitashitapaaakari okimiwitapaaakari jamomo ookantapaakari. ¹⁷ Roojatzi ikemayitawakirini Tajorentsi janta jenokinta, ikantanaki:

—Riotaki notyomi nonintashireperotanewo. Osheki niweshiryaawentakari.

4

Ikowawitaka iwinkatharite kamaari rantakayerimi Jesoshi kaari kameethatatsi

(Mr. 1.12-13; Rk. 4.1-13)

¹ Roojatzi riyaataki Jesoshi tekatsinta atziri ipanko: okaankiityeenta janta. Tema iyaatakaakiri Ishire Tajorentsi. Rootaki iyaatakaantakariri iñaanantyaariri iwinkatharite kamaaripaeni.* Ikowawitaka irira rantakayerimi Jesoshi kaari kameethatatsi ranaakotantyaaririm. ² Eeniro ijekapaaki riraga Jesoshi janta okaataki 40 kiteziri tee rowa, ayimaperotakiri itashe. ³ Roojatzi ipokashitapaaakiri riraga iwinkatharite kamaaripaeni. Iñaantawitapaaakiri, ikantawitapaaakari:

—Eerokarkira Itomipero Tajorentsi, pipeyero mapika opeyanakya owanawontsi poyaari.

⁴ Omaanta ikantawakiri:

—Eero nantziro. Okantzi Iwaperite Tajorentsi: “Tee apatziro akoyiro owanawontsi ashintsiwathatantyaari, inta kowaperotachari akemijantaperotero maawaeni ikowakaakaeri Tajorentsi ashintsitantyaari ashireki”.

⁵ Roojatzi raanakiri janta Jerojareeki ikatziyakaakari janta okaapankata-paakinta Tajorentsipankoki.

⁶ Iroñaaka ikantawitanakari:

—Eerokarkira Itomi Tajorentsi, pomyaanakyaatya jaawiki, ñaa, eero pikamapaaki. Pikenkithashireerota okaatzi okantzimiri Iwaperite Tajorentsi: “Ari rotyaantakimiri Tajorentsi ronampiripaeni ikempoyeemi. Ari raawakimi rakokira eero pikagaantapaaka jaawikinta mapiki”. Ñaakiro, ¿litaka pithaawantakari?

⁷ Rapiitziri ikantawakiri:

—Eero nomyaa. ¿litaka noñaanantyaariri Pawa? Eejatzi paashini okantzi Iwaperite: “Tee okameethatzi añaantawityaari riraga Tajorentsi, rowashironkaekari”.

⁸ Roojatzi riweyaantanakari raanakiri antawoki ochempi. Roñaagakiri Jesoshi maawaeni kipatsipaeni rashì jewawenantatsiripaeni, iñaakiro

* ^{4:1} Riraga iwinkatharite kamaari ronampiri naawita Tajorentsi paeraniperoroña, omaanta ipiyathatantakaririni paerani riraga Tajorentsi rootaki rookantakariri rirori jaka jaawiki.

maawaeni nampitsi owaneenkataka ejatzi maawaeni rowaagawo jeekayitatsirini,⁹ ikantawitanakari:

—Naapatziyakagaeyemirini maawaeni jeekatsiri kipatsikipaeni, aririka pipinkathatena naaka.

¹⁰ Omaanta ikantanakiri:

—Eero naapatziyimi. Piyaatekyia inteenanta, kamaari, eerokakya Jatanaashi. Rooma okantzi Iwaperite Tajorentsi: “Pipinkathateri Awinkatharite, tema rirotaki Tajorentsi. Apatzirokyia irira paapatziyari, pipinkathateri, eejatzi pikimoshirewenteri”.

¹¹ Roojatzi ryaatantanaka inteenanta riraga iwinkatharite kamaaripaeni. Rimpaaetaki ipokapaaki ronampiripaeni Tajorentsi, ramitakotapaakiri, ipa-paakiri rowanawo.

Ritanakawo Jesoshi riyotaantzti Karireeyaki (Mr. 1.14-20; Rk. 4.14-15; 5.1-11; 6.17-19)

¹² Ikantaka ikemawaki riraga Jesoshi ragaetakiri Jowa romonkyaan-teetakariri omonkyagamentotsiki. Roojatzi ipiyantanaa Karireeyaki, areetapaa inampiki Najareeteki. ¹³ Roojatzi roshirinkantakawo ipanko, ryaatanaki Kaperinawooki ari ijeekapae. Rootaki Kaperinawootsiri Karireeyawero ojeeki ochereeteki antawo inkaare. Ijeekaki shaporoonijatzi eejatzi nejatariijatzi janta paerani. ¹⁴ Awijantakari iroka omonkaatantyaari rojakinatakotzitakaririni paerani riraga Iseeyashini:

¹⁵ “Ijeeki shaporoonijatzi eejatzi nejatariijatzi janta ochereetekinta inkaareki intatsikeronta Joriraaniki, janta Karireeyaki. Ijeekaeyininta kaari yotziri Tajorentsi.

¹⁶ Okimitzimotawitakari eeniro otsitenitzi, okimiwitaka tee riyotawitarini riroriipaenai Tajorentsi. Riyaatantyaarimi paamarikinta omaanta iroñaka eero. Okimitzimotantyaariri okitejitakotapaakiri, okimiwitaa riyotakaakiri riraga Tajorentsi. Riraga iyotziriri rirori eero riyaatzi paamariki”.

¹⁷ Aripaete Jesoshi ikenkithatakaanakiri maawaeni atziri janta, ikanteeyakirini:

—Pikenkithashiryaawakyaaata, eero pikimita paerani inta pipakaero kaari kameethatatsi pantziri. Pameentyaari iroñaka Tajorentsi. Rooteentsi kameetha ipinkathariwenantemiri.

Riyooyakiri Jesoshi apaanipaeni riyotaanewo eejatzi riyotaakiri atziri-paeni

¹⁸ Ikinanaki janta ochereetekira rowaga inkaare iitachari Karireeya. Ikinanaki iñaapaakitziri riraga Shimo iiteetziri eejatzi Peetero, eejatzi rirentzi riraga Antereeshi. Irira apite ishiryaatapiintzi shima. ¹⁹ Ikanta Jesoshi ikaemapaaakiri, ikantapaakiri:

—¿Eeroka shiryaawaetapiintatsiri? Pipoke, thame poyaatanakina aritaki niyotaakimi paapatziyakaapiintyaari atziripaeni Pawa Tajorentsi.

²⁰ Roojatzi rookantanakawo ishiryaamento royaatanakiri riyotaantyaariri. ²¹ Ro ijanthaneentawitanaka iñaapaakitziri Jantyaako eejatzi rirentzi Jowa, rirotaki itomi apite Sewereeeyo. Ijeekaki ipitoki ishirikawaetzi ishiryaamento. Itsipatari ashitariri. Ikaemapaaakiri ikantapaakiri:

—Thame poyaatanakina.

²² Roojatzi royaatantanakariri. Rookanakiri ashitariri ijeekanaki janta ipitoki.

²³ Ikanta ikinakinawaetzi ikenkithatakaantzi riraga Jesoshi. Ithotyeyakironi maawaeni Karireeyaki. Janta ikenkithatakaakiri maawaeni atziri nampitsikipaeni ojeekira pankotsi ipiyotantapiintarira joriiyopaeen. Ikamantapaakiri atziripaeni tsikarika ikanta Tajorentsi reewawenanteeyerini maawaeni. Ejatzti retsiyatakoeyawakirini maawaeni mantsiyatzinkaripaeni paashinijatopaeni matakiriri mantsiyarentsitayitsirinipaeni. ²⁴ Riraga jeekaeyatsirini inteenanta janta Shiiyaki ithotyaanaka ike-makoeyakirini Jesoshi. Roojatzti ramanteeyanakaririni maawaeni mantsiyari, kyaantariri kamaari, kijopookitatsiri, katsiwaetatsiri, maawaeni. Retsiyatokotawaeri Jesoshi maawaeni. ²⁵ Royaatananakiri osheki karireeyajatzti, tekaaporishijatzti, jerojareejatzti, joreeyajatzti eejatzti poñaaneenchari intatsikeronta Joriraaniki. Royaatananakiri maawaeni.

5

*Ikenkithawaetzi riraga Jesoshi janta tonkaariki; ikantziri atziri iki-moshiretanteeyaaari
(Rk. 6.20-23)*

¹ Paashiniki kitejiriki iñaawakiri piyotawentari ikaataki oshekini atziri. Rootaki itonkaantanakari eechonkiini tyonkaarikiini. Ari ijekapaaiki jaga. Roojatzti ipokanaki ryotaanewopaeni okaakini, eejatzti ipiyotawentapaakari riraga atziripaeni. ² Roojatzti ryotagaeyawakirini, ikantawakiri:

—Aririka pikowaperote pikimityaari Tajorentsi rootaki reentsitetan-temiri, pikemijantena iroñaaka.

³ —Eerokarika yotakotachari tee pikameethatzi, aritaki riweshiryakaakimi riraga Tajorentsi, kameetha ipinkathariwen-takimi.

⁴ Eerokarika owashiretzinkari, aritaki riweshiryakaakimi Tajorentsi roemoshirenkakimi.

⁵ Eerokarika maerishiretatsiri aritaki riweshiryakaakimi Tajorentsi ineshironkatakimi reentsitetakimi.

⁶ Eerokarika kowaperotzirori ikoyiri Tajorentsi, aritaki riweshiryakaakimi irira ramitakotakimi.

⁷ Eerokarika neshironkatantaniri maawaeni atziri, aritaki riweshiryakaakimi Tajorentsi tema ari ineshironkaperotakimi eeroka.

⁸ Eerokarika kameethatzinkari pajankaneki, aritaki riweshiryakaakimi Tajorentsi aritaki piñagaeri.

⁹ Eerokarika omaeryaantatsiri paashinipaeni atziri ijeki kameetha, aritaki riweshiryakaakimi riraga Tajorentsi. Rootaki kameetha ikananteemiri: “Eerokataki reentsite Tajorentsi”.

¹⁰ Eerokarika antaperotzirori kameethaperotatsiri, rootaki ikijantemiri atziripaeni, aritaki riweshiryakaakimi Tajorentsi. Rooma reentsite-takimi eejatzti piyotzi reewawentakimi.

¹¹ Riyotakirorika atziri paapatziyakina, rootaki ikantzimatantemiri, rowashironkaantemiri, eejatzti itheeyakotantemiri, itheenkemi, omaanta eero pikantashiryaa, eero. Aritaki riweshiryakaakimi riraga Tajorentsi. ¹² Omaanta pikantyaani piweshiryaperotanakya, rooma ipinataperotawaemi iinja riraga Tajorentsi janta okameethaperotzinta. Eero pimaejantziri: tema paerani ikijeetakirini rirori kamanantzirorini iñaani Tajorentsi eejatzti.

Roshiyakaawentakiro Jesoshi tziwi eejatzti ootamentotsi

¹³ Eekiro riyaatatyee Jesoshi riyotaaperoteri, ikanteri:

—¡Pamine sha! Noshiyakaawentemiro tziwi. Tema aaka akatyokapiintziri iwatha tziwiki, eero ishitztanta. Rooma teerika okatyotzi okaanteekaata. Tema ari ookakiro, tekatsi koyeroni. Ari poshiyeeyawitakawoni eerkapaeni tziwi: eerokateeyakini iyotagaeyakiririni atziri tsika ikantya ikameethatantyaari. ¹⁴ Ejatzti ari pikimiwitakawo eeroka oorentamentotsi. Pikenkithashiryakoterota. Aririka ojeeki nampitsi tsikarika otonkagaetya, eero omara maawaeni iñeetawakiro otamorekanakyaarika tsiteniriki. Tee otzika temo ojeekinta tonkaariki. Ejatzti pikimiteeyawitakawoni, eerokapaeni iyotagaeyiririni maawaeni atziripaeni: eero pimaniro piyotayitziririni, inta kameetha piyotaantayiteroni kameethatayitatsirini. ¹⁵ Ejatzti, okimitaka aririka poonthoteri pootamento pipankoki, eero pitankimotakotziri kantziriki, inta powakiri janta jeñkiinira ootaperotantyaari okoñeetye maawaeni pankotsiki pikini paminawaete. ¹⁶ Ari pikimiwitawo iroka eerokapaeni iroñaaka, apatziro pantero maawaeni kameethatatsiri, riyotantyaari pinampijatzipaeni paapatziyapiintari Tajorentsi, ikimoshiretantlyaari rioripaeni, ikanantyaari: "Osheki ikameethaperotzi Pawa Tajorentsi".

Ikenkithatakotziro riraga Jesoshi Iwaperite Tajorentsi okameethatzi

¹⁷ Ejatzti riraga Jesoshi ikantziri atziripaeni:

—Eero piitakaashiwitawo nopokantari jakapo nopaakayemiro paapatziyawo rojankinarini Moeseeshi, eero. Ejatzti eero piitashiwitakawo nokantemi tee okameethatzi oetarika rojankinatakiro kamanantayitzirorini iñaani Tajorentsi paerani, eero. Omaanta nopokantari niyotaaperoeyemironi ikantaperoeyakirini, piyoperotantyaari kameetha oetarika okantakotziri. ¹⁸ Othonkyaarika kipatsi ejatzti jenoki inta eero othonkimaeta rojankinarini Moeseeshi ejatzti kamanantayitzirorini iñaani Tajorentsi. Kyaaryo omonkaatyawo maawaeni ikantakirini paerani. ¹⁹ Eerorka pikemijantaperotziro kaminagaantsi, ejatzti eerorka piyoteeri paashinipaeni atziri ikemijantaperotziro roori, temo pijekashita janta ipinkatharitzinta Tajorentsi. Omaanta aririka pikemijantaperotero maawaeni rojankinateeyinirini, ejatzti aririka piyotagaeyerini paashini atziri ikemijantaperoyerona, ari pipinkathariwenantapae janta ipinkatharitzinta riraga Tajorentsi. ²⁰ ¿Piitakaashiwitakawoma ikameethataki irintapaeni iyotaantawitawori Iwaperite Tajorentsi ejatzti riraga warijeeyopaeni? Iroñaaka nokantemi: tee imonkaatziro ikowakaawitariri Tajorentsi. Eerorka panaakotziri pikameethaperote, eero piyatza eerori janta ipinkatharitzinta.

Ikenkithatakotakiro Jesoshi kijaantsi (Rk. 12.57-59)

²¹ Ejatzti ikantzi riraga Jesoshi:

—Piyotakiro ikantziri achariniitenipaeni paerani: "Eero powamayiri paashini atziri. Ninkarika owamaantatsiri ejatzti rirori rowamagaeteri".

²² Omaanta nokantemi naaka: eero pikijiri paashinipaeni: rowashironkaemikari Tajorentsi. Ejatzti eero pikantziri atziri: "Tee piyotzi. Tee añiilo piipatha". Pikantakiririka ayotaki temo pikijakiri rootaki okameethatantari rowamaakaanantemiri pinkatharipaeni. Ejatzti okimita aririka pikaweyeri atziri pikanteri: "Eeroka majontzi", temo pikijakiri rootaki okameethatantari rotyaantemri Tajorentsi paamarikinta kaari tsiwakanitatsini. ²³ Pamine, piyatantzyaari janta Tajorentsipankoki pikanteri riraga Tajorentsi ipayekotemiro kaari kameethatatsi pantziri, rootaki pipashitantariri pipira riyotantyaari rirori kyaaryo pookakiro kaari kameethatatsi pantakiro, omaanta eenirorika

ikijawentzimiri paashini atziri,²⁴ pityaawo piyaatashiteri riraga kijakimiri pikanteri: "Pipeyakotenawo okaatz i nantziri, eero napiltziro kaari kameethatatsi. Eero amaerineentawakaana. Pineshironkatena, kameetha aakameethatawakagaeya". Pipeyakontawakagaeyaawoni, pipiyanaki iroñaaakakya Tajorentsipankoki, roojatz i pipashitantaapakaayaari Tajorentsi oetarika pikowashityaari pipashityaariri.²⁵ Eenitatsirika kijakimiri ikowaki raanakimi janta pinkathariki ikantakotantemiri, eero pikijiri inta pishintsite pikanteri: "Eero akijawakaa, thame aakameethatawakagaeya". Aririka rareetakaapaakimi pinkathariki, ikanteri joraaro: "Paanakiri irika", roojatz i romonkyakaantawakimi janta omonkyaaagamentotsiki.²⁶ Rooma eerrika pipaperotziri maawaeni pireewitziriri, eerowa roeyowitzimi roojatz i pipinatanteeyariri.

Ikanteeyakirini Jesoshi: "Kyaaryoowa, pishirontawokari tsinani kaari payi"

²⁷ Eejatzi ikantziri:

—Piyotakiro ikantziri achariniiteni paerani: "Eero pishirontzimotawo piina paashini tsinani, eero pishirontzimotari piimi paashini shirampari".²⁸ Nokamantemi naaka: "Aririka piñaawenashireeyaaawo tsinani eejatzi pikenkithashiryaaakotyaaaworika pishirontyaawo, ari eenitatsi pantani, kimitaka piñaathatzimotakawo piina".²⁹ Noshiyakaawentemiro: aririka antakayemiro poki kaari kameethatatsi, pikithokireero, pookero. Tema tee pikoyi iyaatakayemi paamariki kaari tsiwakanitatsini. Tema okameethatzi piyaatashiteeya kashetaakini poki janta jenokinta.³⁰ Aririka antakayemiro pako kaari kameethatatsi, pithatyeero pako pookero. Tema tee pikoyi iyaatakayemi paamariki kaari tsiwakanitatsini. Tema okameethatzi piyaaponthotziitashiteya janta jenokinta. Ñaakiro, tee okameethaperotzi papiitapiintero kaari kameethatatsi.³¹ Eejatzi ikantzini riraga achariniiteni paerani: "Aririka pikowaki pookaero piina, pojankinateniro paperi pookanteeyaaawori, ari okaatapaaki".³² Omaanta nokantemi naaka: "Eerowa pookaero piina. Aririka pookaero piina eejatzi pagauerika paashini, tema piñaathatzimotaawo piinaperoni. Agaerika eejatzi paashini oemi piina, eeniro antani: oñaaathatzimotaari oemiperoni. Eejatzi riraga agaeroni, eeniro rantani. Omaanta apatziro okameethawita pookaero aririka oñaaathatzimotakimirikira paashini shirampari".

Eero pamatawitziri paashinipaeni

³³ Eekiro riyaatatz i kantziri riraga Jesoshi:

—Piyoteeyakini okantziri Iwaperite Tajorentsi, rootaki ikantzirini yotaantatsirini: "Eero pitheeya, eero pikantawaetashita". Eejatzi ikantakini: "Aririka pikante: 'Riyotaki Awinkatharite ari nomonkaatemiro maawaeni nokantakimiri. Namatawitakimirika ari rowashironkaakina'. Pikanterorika: 'Riyotzi Awinkatharite aritaki nomonkaatakimiro maawaen i nokantakimiri', ari okameethatzi pimonkaataperotero okaatz i pikantakiri". Rootaki okantakiri rojankinatakirini paerani riraga Moeseshini.³⁴ Omaanta nokantemi naari: eero pitheeyawaeta. Aririka pothataakiro pikantziri, ¿itaka pikowantyaari pikante: "Riyotakiro Awinkatharite nothataakiro nokantzimiri"? Okameethataki pimonkaataperotero maawaeni pikantakiri. Eero eejatzi pikantashita oetarika. Apaanipaeni ikantashita: "Tee notheeya. Ñaakiro, okantani eeniro jenokinta, eejatzi okantani nothataakiro nokantziri", omaanta ikantashita. Nokantemi eero pikimitari irinta; rooma Tajorentsi rirotaki jeekatsiri jenokinta. Riyotzi pothataakirorika pikantziri. Eenitatsi

paashini ikantashita: "Okantani ojeeki jenokinta jeekamentotsi rashi Tajorentsi eejatzi nokimita naari, nokantani kameetha noñaaawaetzi", omaanta ikantashita. Nokantemni naaka: tema tee okameethatzpi kikantawaetashitya oetarikapaenai tema riyotzitakimiro Tajorentsi okaatzpi kikantakiri. ³⁵ Eejatzi apaanipaeni ikantashita: "Tee notheeya. Ñaakiro, okantani eeniro kipatsi, eejatzi nokantani nothataakiro nokantziri", omaanta ikantashita. Nokantemni naaka eero pikimitari irinta, rooma Tajorentsi rirotaki ashitawori kipatsi. Ikantakowentziri maawaeni. Riyotzi pothataakirorika pikantziri. Eejatzi paashinipaeni ikantashita: "Tee notheeya. Ñaakiro, okantani eeniro ojeeki Jerojaree, eejatzi nokantani nothataakiro nokantziri", omaanta ikantashita. Eejatzi nokantemni naaka, eero oshiyari irinta; rooma Tajorentsi rirotaki otyaantziriri jewawenantsatsiri ijekantari janta. ³⁶ Eejatzi eero pikimitari paashinipaeni kantatsiri: "Tee notheeya. Ñaakiro, kyaaryo eenitatsi noeto, eejatzi kyaaryo tee notheeya". Eero poshekiiro pikantziri. Eero pimatziro pitajonkero pikitamaatakaantyaawori piishi. ³⁷ Eero pitheeya. Kyaaryoorika pantero oetarikapaenai, kameetha pikante: "Jee, nantakiro". Eerorika pikoyi pantero, pikante: "Eero nantziro". Monkaataka. Tee okameethatzpi poshekeero piñaani pamatawitanntyaaariri paashinipaeni. Rowashironkaemikari Tajorentsi.

Eero pipiyatari kijawitemini

(Rk. 6.29-30)

³⁸ Eekiro ryaatatza ikanteeyakirini riraga Jesoshi:

—Eejatzi ikantakini achariniiteni paerani: "Aririka pikithokiriiteri roki paashini atziri eejatzi ipiyatempi ikithokiriütemiro pashi poki. Aririka pitzinkeryaakoteri raeki paashini atziri, kameetha ipiyatempi eejatzi itzinkeryaakotemi pashi paeki". ³⁹ Omaanta nokantemni naaka: eero pipiyatari kijakimiri omaanta aririka ipajawootemi rakokira, pishinetayaara jantakironta ipajawootemi eejatzi, eero pipiyatari. ⁴⁰ Aririka atziri raakaantempi pinkathariki okaatzi pireewitziriri raapithatemirorka piithaari, pipawakiri eejatzi paashini pipewiryaaaktarira, eero pikijiri omaanta pineshironkatawakiri. ⁴¹ Aririka romperateetemi payeniri rowaagawo apaani kiroometero powawijaaneenteniri apaani paashini kiroometero eejatzi. Eero pikijashita inta pineshironkateri. ⁴² Ikowakotemirika owashironkaachari koetyeemotziriri, pipawakiri. Eejatzi aririka ikantemni: "Pipashitawakinawo iroka eejatzi noepiyeemi oshenkina iinja", ari pipashitawakyaari, eero pithañaapithatari.

Ikantzi riraga Jesoshi: "Pineshironkateri kijakimiri"

(Rk. 6.27-36)

⁴³ Eekiro ryaatatza ikantziri Jesoshi:

—Eejatzi ikantaki achariniiteni paerani: "Pineshironkateri neshironkatzimiri eerori. Omaantakya kijakimiri, pikijaperoteri rirori". ⁴⁴ Omaanta nokantemni naaka: pineshironkaperoteri kijawitakimiri, owashironkaawitakimiri, maawaeni. Pamanakotaari, pikanteri Tajorentsi ineshironkateri maawaeni rirori. ⁴⁵ Rootaki ikowakaakiriri Tajorentsi maawaeni aapatziyariripaeni reentsitetayitakarini. Rirotaki wetsilkakiriri oorya: rooryaakoteeyakirini maawaeni atziri, aapatziyariri eejatzi kaari aapatziyari. Eejatzi rowariyaakiniri inkani kameetha oshookantari maawaeni owanawontsi. Eejatzi rowawo maawaeni atziri: riraga aapatziyariri eejatzi kaari aapatziyari, eejatzi kaari yotziri Tajorentsi, maawaeni rowawo.

Rootaki ayotantawori ineshironkatziri Tajorentsi maawaeni riraga aap-
atziyariri eejatzi riraga kaari yotziri. Eejatzi eerori rootaki pineshironka-
teeyantyaaririni maawaeni.⁴⁶ Apatzirorka pineshironkatawakiri neshi-
ronkatzimiri eerori, eero ijeekakayimi Tajorentsi jenokinta. Rioma riyotzi
theenkantatsiri eejatzi ineshironkatawakiri neshironkatziriri. Omaanta
panaakoteri eerori, pineshironkateeyirini maawaeni.⁴⁷ Apatzirorka
piwethatashityaari wethatzimiri, eero piyaatzi pijeeki janta jenokinta.
Rioma riyotzi maawaeni kaari yotziri Tajorentsi riwethatari wethatariri
rirori. Panaakoteri: piwethateeyarini maawaeni.⁴⁸ Pikameethaperotanaki,
pikimitakotaari Piri jenokinta, riroma osheki ikameethaperotaki irira.

6

Riyotaakae riraga Jesoshi tsika akantya aneshironkatante

¹ Eejatzi ikanteeyakirini Jesoshi:

—Paamawentyaawo, pipankinatakotarikari Tajorentsi iñaantemiri
atziri rootaki iñaaperotantemiri pikameethatzi eeroka. Aririka
pantero iroka tekatsi okantya ipinatemi rirori iinja.² Aririka
pipashityaari owashironkaenkari koetyeemotariri, eero pithotyero
pikamantziri paashinipaeni. Eero pikimitari riraga oshiyakaawaerintzi
raapatziyarimi Tajorentsi. Aririka iperi irira owashironkaenkari
oetarika, ikamanantayitaririni atziripaeni maawaeni atziripaeni janta nampitsiki.
Ikamanantayitaririni atziripaeni iñaaperotantyaariri ikameethatzi. Aririka
iñaaperotawityaari atziri, monkaataka; omaanta eerowa iñaaperotziri
riraga Tajorentsi, tekatsi riweshiryaawenantyaari.³⁻⁴ Eero pikimitari
riraga oshiyakaawaetawitachari raapatziyarimi Tajorentsi. Rootaki,
aririka pineshironkateri owashironkaenkari, pimaniro, roojatzi
riweshiryaawenantemiri Tajorentsi. Rooma riyotakiro irira oetarika
pantziniriri, roojatzi okimitakya, aritaki ramitakotakimi eenitatsirika
koetyeemotemini.

Riyotagaeyakaeni Jesoshi tsika akanterori akenkithatakayeri Tajorentsi (Rk. 11.2-4)

⁵ Eejatzi ikantzi Jesoshi:

—Aririka pikenkithatakayeri Tajorentsi, eero pikimitari os-
hiyakaawaetawitachari raapatziyarimi rirori. Ikwaperotziro ikatziya
ikénkithatakayeri janta pankotsi ipiyotantapiintarira joriiyopaeni eejatzi
janta niyanki nampitsi iñaantyaariri atziripaeni, rootaki iñaaperotantyaariri
ikameethatzi. Kyaaryo nokantemiri iroka: monkaataka. Iñaaperotantariri
atziripaeni, omaanta tee iñaaperotziri Tajorentsi ikameethatzi.

⁶ Aririka pikenkithatakayeri Tajorentsi, piyaate apaniroeni pipankoki,
pashtakotanakya inthomaenta roojatzi pikenkithatakayeri ashitzimiri
riraga Tajorentsi. Riro ñeemini apaniroeni pijeekekira ari iñaaperotemi
pikameethatzi, riweshiryaawenantemiri.⁷ Aririka pikenkithatakakiri,
eero poshekiiro ñagantsi osheki rootaki ikemijanantemirimi. Rootaki rametari
rirori kaari yotziri Tajorentsi.⁸ Kyaaryoowa, pikimitarikari riroripaeni.
Riyoperotziro Tajorentsi maawaeni koetyeemotakimiri. Tekirani pikanteri,
riyotzitakawo.⁹ Aririka pikenkithatakayeri Tajorentsi, ari pikimiteero
eeroka iroka:

“Pawa, niyotzi pijeeki jenokinta eejatzi jaawikika eejatzi pikemijan-
teeyanani.

Osheki pikameethaperotaki.

¹⁰ Kameethapero pipinkathawenteeyanani.

Nokowaki nantemiro kipatsikika pikowakaakinari, nokimityaari rantziri ponampiripaeni janta jenokinta. Rooma imatakimiro maawaeni pikowakaakiriri.

¹¹ Maawaeni kitejiri pamitakoeyenani nantawaete, eero okoetyeemotan-tana noyaari.

¹² Niyotzi eenitatsi kaari kameethatatsi nantziri, omaanta eero pikijawen-tanawo, inta pipeyakotenawo. Rooma nopeyakotziniri antakaana-wori naari oetarikapaeni, tee nokijiri.

¹³ Eero pishinetziri kamaari rantakayenawo kaari kameethatatsi.

Pikanteetatyeyaaani peewawenteeyenani.

Ashi powantyaawo pitajonkawentena.

Eejatzi naari, ashi nowantyaawo noñaaperotemi.

Rootaki nokantakimiri, ari okaatzi".

¹⁴ Eejatzi ikantzi riraga Jesoshi:

—Aririka pipeyakoteniri kijakimiri, ejatzi ipeyakotzitemiro Piri jenok-inta eeroka kaari kameethatatsi pantziri.

¹⁵ Omaanta eerrika pipeyakoteeniri maawaeni rantakaawitakimiri, eero ipeyakotzimiro riraga ashitzimiri jenokinta okaatzi kaari kameethatatsi pantakiri.

Riyotaakiri Jesoshi riyotaanewo tsika ikantya itzitawentyaari Tajorentsi

¹⁶ Eejatzi ikanteeyakirini:

—Aririka pitzitawentyaari Tajorentsi pikenkithatakanakyaariri irira, eero piyotakaakiri paashinipaeni. Eero pikimitari riraga oshiyakaawaetawitachari raapatziyarimi rirori. Aririka itzitawentyaarimi Tajorentsi, rowashirepootashitaka riyotantyaari maawaeni itzitawentawo. Roojatzi atziripaeni ikenkithatakotziri ikameethaperotzi omaanta kyaaryo tee riweshiryaaawentari riraga Tajorentsi. ¹⁷ Eero pikimitari riroripaeni. Aririka pitzitakotaari Tajorentsi kameetha pikishitya eejatzi kameetha pikantya pikiwapootya poshepoootya, ¹⁸ eero riyotantzimi riraga atziri pitzitawentatyaaari Tajorentsi omaanta apaniroeni yotemini Tajorentsi rirotaki weshiryaaawentemini eejatzi ñaaperotemini pikameethatzi. Rootaki riweshiryaaantemiri iinja.

¹⁹ Eejatzi ikantzi:

—Eero pikenkithashiryaaapiintziro pipiyotero poweragawo jaka jaawikika: opathaagaantzikari eejatzi rapeyagaanteetzitzimirokari eejatzi ikoshiteetzimikari. ²⁰ Omaanta pikantya pikenkithashiryaaakopiintyaari Tajorentsi eejatzi pantero ikowakaakimiri rootaki ñaaperotantemiri pikameethatzi. ²¹ Ñaakiro, aririka pikowaki pipiyotero poweragawo jaka kipatsikika rootaki pipeyakotantapiinttariri Tajorentsi, omaanta aririka pikowaki piweshiryaaakayaari rirori pikenkithashiryaaakopiintyaari.

Poki okimiwitakari oorentamentotsi

(Rk. 11.33-36)

²² Eenitatsi poki paminantari kitejiriki. Okimitaka eenitatsi oorentamentotsi pitsiwootapiinrantari tsiteniriki piñaantyaawori. Aririka okameethataki oki, kameetha paminawaetantyaari. ²³ Omaanta eerrika okameethatzi poki, eero piñiilo, kimitaka tsiteniriki. Eejatzi okimitaka, aririka pikenkithashiryaaapiintero kaari kameethatatsi, eero piyotziri Tajorentsi, eero piñiilo, kimitaka tsiteniriki.

Eejatzi ikantzi riraga Jesoshi: "Aririka pantawaewentya eerori, tekatsi pikantya panteniri Tajorentsi ikowakaakimiri"
(Rk. 16.13)

24 Eekiro ryaatatyee ikantakiri:

—Tekatsi pikantya pithamaeteniri apite piwaatorote. Aririka pithamaeteniri apite, pikenkithashiryaaakotakiri apaani kameetha rirori, pineshironkateri, omaanta pikenkithashiryaaakoteri paashini tee ikameethatzi, pitheenkiri. Eejatzsi okimitakya aririka panteniri Tajorentsi ikowakaakimiri, pikenkithashiryaaakopiinteri kameetha irinta, pinintaperotantyaariri, eero pikoyi pipiyotero powaagawo osheki. Omaanta aririka pikowaki pipiyotero osheki powaagawo, aritaki pantawaetawentero eeroka paantyaawori, eero pikowae paapatziyari riraga Tajorentsi. Eero pimatziro papitetziri piwaatorote.

*Pikenkithashiryero Tajorentsi ikoyiri
(Rk. 12.22-31)*

25 Eejatzsi ikantziri:

—Ari nokantemi: eero pikenkithashiryaaakotashitapiintawo oetarika-paeni poyaari, pimiri, pikithaatapiintyaari, oetarikapaeni. ¿Rootakima pijkeekantari powapiintyaawo? Tee rootaki pijkeekanta, inta rootaki pijkeekantari pikenkithashiryerri Tajorentsi riraga wetsikakimiri, eejatzsi pipinkathateri. ¿Rootakima piwatha otzimantari powaneenkatantyaawori? Tee rootaki otzimantari. Omaanta eeniro pijkeekantari piyoteri Tajorentsi piweshiryaaakayaari rootaki okameethatantari panteniri ikowakaakimiri. ²⁶ Paminerri riraga tsimeripaeni jenokiweri. Tee ipankiwaetzi, tee rowiitzi, eejatzsi tee rantzi ipanko ojeekantari rowanawo. Omaanta maawaeni kitejiri eenitatsi royaari: tema ramitakotziri rirori Tajorentsi. Maawaeni kitejiri ineshironkatziri, tema eeroka osheki inintaperotakimi, rootaki ipantakimirori eejatzsi.

²⁷ Aririka pikenkithashiryaaapiintero ¿arima pimatakiro pojanthaya apaniroeni? Eero. Patsipetashita pikenkithashiryaaakotashita. ²⁸ ¿Itaka pikenkithashiryaaapiinantawori piithaari, oetarika pikithaatyaari? Paminerri oteyakipaeni ampee, tee okenkithashiryaaapiintziro irona: “¿Oetarikapaeni nokithaatyaawo?” Tee okirikawaetzi, eejatzsi tee ontyaawaetzi, ²⁹ omaanta osheki owaneenkataka. Pamine, paerani osheki rowaneenkawaetani riraga jewawenantatsiri iiteetziri Sharamooni, ojeekini oshekini rowaagawo, omaanta tee ikimitaperotawo oteyakipaeni, osheki owaneenkaperotaka irowapaeni. ³⁰ Rioma rirotaki Tajorentsi owaneenkatzirori oteyakipaeni inchashi, omaanta intsipaete okamateyatzsi, intsipaete opariteyatzsi, eejatzsi rootakoetziro. Rooma eerori, pijkeekini. Rioma ineshironkaperotzimi eeroka rootaki piyotantaperotari itzimakayemiro oetarika koetyeemotzimiri kameethatatsiri. Pameentyaari, eero pitheenkiri, aritaki itzimimotakaakimiro riraga Tajorentsi.

³¹ Rootaki eero pikenkithashiryaaakotapiinantashitawo oetarika, eero pikantzi: “¿Itaka noyaari? ¿Oetaka nomiriteri? ¿Oetaka nokithaatyaari?”

³² Ikowakowaeyironiroña irokapaeni riraga kaari yotziri Tajorentsi. Eero pikimitari irirapaeni. Rioma riyotzimi riraga piri jenokinta, riyotziro koetyeemotakimiri. ³³ Rootakikya pikantyaani pityaawo pipinkathatantyaaririni Tajorentsi eejatzsi pikanteri rowameethashiretemi, roojatzikya ramitakotemi eenitatsi koetyeemotakimiri. ³⁴ Rootaki eero pikenkithashiryaaakopiintawo inkaamani oetarika panteri. Rooma tekatsirika tzimimotzimiri, omaanta ramitakotemi riweshiryaaakayemi riraga Tajorentsi inkaamani, eejatzsi maawaeni kitejiri riweshiryaaakayemi.

7

*Eero pikantzimatzi paashinipaeni
(Rk. 6.37-42)*

¹ Eejatzi ikantzi riraga Jesoshi:

—Eero pikantakotashitari paashini atziri. Aririka pikantakotashityaari, ikantzimikari Tajorentsii: “Pantakiro eerori kaari kameethatatsi”.

² Aririka pikijeri paashinipaeni, aritaki ikijawaemi eerori Tajorentsii. Eejatzi okimitaka, aririka pineshironkateri paashinipaeni, ari ineshironkatawaemi rirori. ³ Eenitsirsrika kaari kameethatatsi pantziri, tee okameethatatsi pikanteri paashini atziri eerori: “Eenitsi kaari kameethatatsi pantziri”. Noshiyakaawentemiro iroka: aririka otyaakyaaatamini antawo inchapanki pokikira, ḡarima piñiitakiri ityaakyaaawo owaanini inchapetoki rokikira paashini atziri? ⁴ Ñaakiro, tee okameethatatsi pikanteri: “Ajaakya, nagaemiro pityaakyaaawo pokikira”.

⁵ ¡Poshiyakaawaetashita paapatziyarimi Tajorentsii! ¡Pamatawitantashita! Pikowawitaka pikimitakotaarimi kameethaperotzinkari. Ñaakiro, pityaakyaaawo pookero eerori antawowa inchapanki konompyaatoteencharira roojatzi pikokichaataanteeyaaari ari pimatero pageniri ityaakiro paashinira atziri. Eejatzi okimitaka pikowakirika pikanteri pisheninka ipakayero kaari kameethatatsi rantziri, pityaawo pipakayero pantziri eerori roojatzi pimatero pikanteri. ⁶ Tee pipapiintziri otsizi kameethaperotatsiri iwatha. Eejatzi tee pipapiintziri chaancho poreryaanikitatsiri mapi pinaperotachari royaawo, tee ikoyi royaawo. Tema ratsikawitawakawo eejatzi ikijakotaawo rowitsintakiro mapi. Eejatzi okimitaka kameetharoña oetarika okantziri Iwaperite Tajorentsii. Kameetha pikenkithatakayeri paashinipaeni atziri okantziri. Omaanta aririka ikijantemiro, tee ikoyi ikemijantemii, eero poñaashirenkiri inta piyotaapiinteri koyirori.

*Pamaniri Tajorentsi oetarika, ari ipakimi
(Rk. 11.9-13; 6.31)*

⁷ Eejatzi ikantzi riraga Jesoshi:

—Aririka pikanteri atziri ipawakimiro oetarika pikowakowateri, aritaki piñaakiro. Aririka pareetya pankotsiki, pikantapaakiri jeekatsiri: “Pashitareenawo”, roojatzi rashitaryaantakimiro. Ari okimitaka iroka, pikanteririka Tajorentsi pikoyiri, aritaki imatakimiro oetarika kameethatatsiri pikowakowatziri. ⁸ Aritaki ramitakotakiri maawaeni amaniriri. Eejatzi kowakowatakotziriri rirori koetyeemotariri, aritaki imatakiro. Aririka pikenkithatakapiinteri, ari ikemijantemii, imatemiro oetarika kameethatatsiri pikanteriri. ⁹ Pamine, aririka ikantemi pitomi: “Pawa, pipena kaniri noyaari”, ḡarima pipashitawakaari mapi? ¹⁰ Eejatzi ikantemirika: “Pipawakina shima noyaari”, ḡarima pipashitawakaari maanki?

¹¹ Ñaakiro, tee pikameethaperotzi omaanta piyotzi pineshironkapiinteri peentsitepaeni. Owanaaperotaka riraga Piri jeekatsiri jenokinta osheki ikameethaperotaki. Tema riyoperotziro ineshironkaperotziri maawaeni kenkitthatakakiriri.

¹² Eejatzi ikantaki riraga Jesoshi:

—Pikowakirika raakameethateeyimini paashini atziri eejatzi pikimitzyaari eerori kameetha paakameethateri raakameethatantemirikya eerori. Tema rootaki okantakirini rojankinarini Moeseeshi eejatzi rojankinatakiro kamanantayitzirorini iñaani Tajorentsii.

*Ikenkithatakotziro Jesoshi apite awotsi
(Rk. 13.24)*

¹³ Eejatzi ikenkithatakotakiro riraga Jesoshi tsikarika akantya akyaantyaaari janta jenokinta roshiyakaawentakiro awotsi, ikantzi:

—Pikowakirika pikye ijeekeen Tajorentsii, pikinantapaakyaaawo okaamanchakitziini awotsi, pikyaantapaakyaaawo okaatzini omoo. Eenitatsi paashini awotsi jaawokipetatziri. Tee opomeentsita ikinanteetyaawo roori; eenitatsi oshekiini kinantawori, eejatzi janta ikyanteetyaawo antawo omoo. Omaanta maawaeni kinayitaneentsini janta eero rareeta jenokinta inta ikemaaatsitapiintyaawo paamari kaari tsiwakanitatsini. Osheki kyaantawori. ¹⁴ Omaanta rowaga paashini awotsi okaamanchakitziini osheki opomeentsitaka ikinanteetyaawo. Eenitatsi apaanipaeni kinantawori, omaanta kameetha rareetyaawo rirori okaatzini omoo ikyantapaakyaaari Tajorentsikinta, eero rapiiteero ikamae.

*Ikenkithatakotziri Jesoshi amatawitantatsiri
(Rk. 6.43-46)*

¹⁵ Eejatzi ikantzi riraga Jesoshi:

—Kyaaryoowa, ramatawitzimikari oshiyaaawitariripaeni iyotaantzirori Iwaperite Tajorentsii. Kyaaryoowa, piitakaashitarikari maawaeni iyotaantatsiri ryotaatziumi Iwaperite Tajorentsii kameetha. Kyaaryo ryotaawitzimi apaanipaeni, tee ryotaaperotzimiro kyaaryooperotatsiri. ¹⁶ Paminaperoteri rantayitzirini, riraga iyotaantzirori, rootaki piyotantyaarir ikameethatzirika. Pamine, ¿okithokitziroma oowa kitochee? Teewee. ¿Okithokitziroma iyeera* kawana? Teewee. Tee omatziro. Eejatzi ikimita riraga amatawitantatsiri, tekatsi ikantya rantero ikowaperotziri Tajorentsii. ¹⁷ Inchato kameethari okithokitziro okithoki kameethari, ari athotero. Omaanta teerika okameethatzitachi inchato, tee okithokitziro okithoki kameethari. ¹⁸ Rowaga inchato kameethari, tekatsi okantya okithokitero okithoki kaari kameethatatsi. Eejatzi kaari kameethatatsi inchato, tekatsi okantya okithokitero kameethatatsiri okithoki. ¹⁹ Tema achekapiintziro chochoki kaari kithokitsini, oejapiintziro paamariki. ²⁰ Eejatzi okimitaka, potsikanataperotyaari maawaeni kowatsiri ryoteemi. Piyote okameethatzirika rantziri, ari kameetha eejatzi ryotaantziro Iwaperite Tajorentsii. Rooma teerika okameethatzitachi rantziri, eejatzi tee okameethatzitachi ryotaantziri.

*Ikenkithatakotziri Jesoshi yotakoperoteeriri
(Rk. 13.25-27)*

²¹ Eejatzi ikantzi riraga Jesoshi:

—Eeniro ñaaawaetashitachari osheki ikantashita: “Eeroka Nowinkatharite, osheki nopinkathatzimi”. Omaanta eero riyaateeyini irira janta notsi patyaari jenokinta, inta jataperotatsini janta maawaeni riraga antaperotzinirir Pawa ikowakaakiriri.

²² Aririka nopinkatharentsiperotanaki nopiyoteeyerini maawaeni atziri nokantakowenantyaariri. Eenitatsi oshekiini atziri kantashitenani: “Nowinkatharite, osheki nokenkithatakotzimi. Nokantziri kyaanttariri kamaari: ‘Pameentyaari Jesoshi pawijakotanteeyaari’. Eejatzi nokantziri atziripaeni: ‘Riotaki Jesoshi matakaanawori notajonkantzi’”. ²³ Omaanta nokanteri irirapaeni: “Tee niyotzimi, tee reentsitetzimi Pawa. Piyaate inteenanta, osheki pantziro kaari kameethatatsi. Tee nokoyi pijeekimotena jaka”.

* ^{7:16} Iyeeratasiri rootaki chochoki, oshiyawo komashiki. Ithoetziro, pocharini. Tee antawoperotzi.

Atziri owetsikirori pankotsi kijopathariki kipatsi eejatzi owetsikirori im-panekiki

(Rk. 6.47-49)

²⁴ Pamine, aririka paapatziyawo maawaeni okaatzi nokantzimiri eejatzi aririka pantakinawo maawaeni nokowakaakimiri, okameethataki, eeroka yotaniri, pikimitakotakari atziri wetsikirori ipanko okijopathatzira kipatsi. ²⁵ Roojatzi opariyantapaaka inkani, oonkanaka. Opokawitapaaka antawo tampyaa otatsinkawitapaakawo, omaanta tee ataananakiro. Rootaki kaari ataantawo, tema riwetsikakitziro okijopathaperotzira kipatsi. ²⁶ Eejatzi okimitya eerori, eerorika pikenkithashireero maawaeni okaatzika nokantakimiri eejatzi eerorika pantanawo maawaeni nokowakaawitzimiri, tee okameethatz. Eeroka kimitariri kaari yotatsi. Pikimitakotyaari wetsikirori ipanko janta impanekiiteki ochereeteki iñaa. ²⁷ Okanta opariyapaaki inkani, oonkanaka. Opokapaaki antawo tampyaa otatsinkanakiro pankotsi, aanakiro iñaa. Ñaakiro, ratsipetashitakawo riraga wetsikawitawori. Eero petsipetashitawo eerori pikemijantana, omaanta pantaperotero kameetha nokowakaakimiri.

²⁸ Rootaki ikanteeyakiririni piyotawenteeeyakaririni janta tonkaariki. Ari rotsikanateeyanakarini maawaeni, ikantzi:

²⁹ —Osheki riyotanitzi irira, ikenkithatakaakae kimitaaka pinkathari, kameetha ryotaakae; tee ikimitari riraga iyotaantawitawori rojankinarini Moeseeshi.

8

Retsiyatakotakiri Jesoshi patheenkari

(Mr. 1.40-45; Rk. 5.12-16)

¹ Ithonkapakiro riraga Jesoshi riyotagaeyakirini atziri janta tonkaariki. Roojatzi roerinkantapaa, eejatzi royaateeyakirini oshekini atziri. ² Roojatzi ipokashitapakiri apaani shirampari patheenkari, itonkiyotawakari rotziwerowashitapakari, ikantapaakiri:

—Nowinkatharite, tema eenitatsi pitajorenka, pikowakirika petsiyatakotena, niyotzi aritaki pimatakiro.

³ Roojatzi rowaankantawakawo rako rirori, ipampitawakiri ikantziri:

—Jee, nokowaki. Petsiyatakotanee iroñaaka.

Intsipaete opeyanaka ipathaawo. ⁴ Roojatzi ikantziri:

—Erowa pikamantziri paashinipaeni netsiyatakotakaakimi, inta pantero ikantzitarini paerani Moeseeshini: piyaatashiteri riraga ñaanakowenantsiri Tajorentsipankokinta pikanteri irira: “Paerani nopathaawitani, omaanta iroñaaka, etsiyatakotaana. Paminena tee añaagero iroñaaka, nopathaaawo”. Aririka raminawakimi, roojatzi pipantapaakyaaari pitsimerite jenokiweri itaantyaanariri Tajorentsi, riyoteeyantyaarini atziripaeni etsiyakotatakimi.

Roojatzi ryaatantanaka.

Riraga Jesoshi retsiyatakotakiri ronampiri kapitaano

(Rk. 7.1-10)

⁵ Ikantaka itharyaanaka Jesoshi, eejatzi riraga oyaateeyakiririni, roojatzi rareetanteeyapaakani Kaperinawooki. Itonkiyotawakari apaani iwinkatharite oshekini joraaro. Kaari riro joriyyo. ⁶ Ikantapaakiri:

—Nowinkatharite, eenitatsi nonampiri janta nopankokinta, tee imatziro ishewata, eejatzi osheki ikatsitaki; katsitaperotanaki. Nokowaki petsiyatakotakayeri.

⁷ Roojatzi ikantawakiri:

—Aritaki niyaate netsiyatakotakayemiri.

⁸ Omaanta ikantanakiri:

—Osheki nopolinkathatzimi. Tee nokameethatzi naari; tee naaka joriyo, eero notsipatapaakimi janta nopankoki. Apatzirorika pikante etsiyatakotanee rirori, niyotaki aritaki etsiyatakotanaki. Patsipetawokari piyaate nopankoki, osheki pipinkathariwenantzi.⁹ Eejatzi naari eenitatsi kantanari oetarika nanteri, eejatzi nokimitzita naari nojoraarote eenitatsi nomperateeyakarini. Nokanteririka apaani joraaro: “Piyaate”, ari ryaatanakiri. Nokanteririka paashini: “Pipoke”, ari ipokanaki. Eejatzi nokimitziri nonampiri rirori, aririka nokanteri: “Iroka panteri”, ari rantakiro.

¹⁰ Ikanta ikemantawakariri, ari rotsikanatanakari, roojatzi ipithokashitantanakira oyaateeyakiririni, ikantanakiri:

—Kyaaryootaki iroka nokantemiri, maawaeni jaka anampipathakika tekatsi apaani noñaaneente kimitakotaarini irika paashinijatzitsiri atziri: osheki rameentaperotakari Tajorents. ¹¹ Linja janta ipinkatharitzinta, aritaki ipiyoteeyaani oshekini paashinijatzitsirtsiri atziri ipoñaayitapaakyani paashinipaenikinta kipatsi. Itsipatapaeyaari Awaraama, Ijaaka, Jakoowo, riweshiryawaanya maawaeni janta. ¹² Omaanta oshekini joriyo jeekatsinimi janta, aritaki ikenkithashiry irirapaeni: “Naaka joriyo, rootaki niyaatantyaari jenokinta”, omaanta eero ryaatzzi, tee raapatziyaperotari Tajorents. Ikowakaawitakari itsipatyaarimi janta ipankokinta, omaanta osheki itheenkakiri, rootaki rotyaanantyaariri janta otsitenikaakiperotzikinta. Tema ijeeki janta paamariki kaari tsiwakanitatsins. Janta riraaperotanakya eejatzi ratsikaekiteeyanakyaani, tyakiririri. Osheki rowashironkaanakya janta, osheki ikemaatsityaawo paamari owatsinka. ¹³ Roojatzi ikantawakiri riraga iwinkatharite joraaro:

—Kameetha iroñaaka piyaate pipankoki. Paapatziyaperotakina, rootaki retsiyatakotantaneeyari ponampiri.

Intsipaete retsiyatakotanee.

Jesoshi retsiyatakotakiro riyote Peetero

(Mr. 1.29-34; Rk. 4.38-41)

¹⁴ Ryaatanakiri iroñaaka riraga Jesoshi ipankoki Peetero. Ikyaanta-paakari iñaapaakitziiro riyote omantsiyataki, omaryaaka omaamentokira, ojaawamerikitzi. ¹⁵ Ipampitapaakiro akokira, roojatzi awijakotantanaa ojaawamerikiwitaga etsiyatakoperotanee. Roojatzi opiriinantanaka mantsiyawitachari opantawakari rowanawo.

¹⁶ Okantaka otsitenitanaki, ramaetaapakiri oshekini kyaantakariri kamaari. Roojatzi ikenkithatakantawakari roojatzi rowawijaaktotantawakariri. Eejatzi retsiyatakotawakiri oshekini mantsiyatzinkari. ¹⁷ Tema imonkaatakiro riraga Jesoshi maawaeni ikenkithatakotzitakaririni paerani Iseyashini. Ikantakotzitakaririni:

“Linja retsiyatakoteri Rotyaantanewo Tajorents oshekini mantsiyatzinkari, eejatzi osheki ineshironkateeyirini”.

Kowawitachari oyaaterinimi Jesoshi

(Rk. 9.57-62)

¹⁸ Paashiniki kitejiri iñaantakariri riraga Jesoshi oshekiniroña piyotawenteeyakiririni, ari ikantanakiri ryotaanewopaeni:

—Thame aate intatsikeronta inkaare.

¹⁹ Ikanta ipokashitapaakiri iyotaantzirori Iwaperite Tajorents, ikanta-paakiri:

—Iyotaanari, nokowaki naari noyaatemi tsikarika piyaate.

²⁰ Rakanakiri Jesoshi, ikantanakiri:

—Riraga piratsi eenitatsi imoo imaantari. Eejatzi ikimita riraga tsimerijenokiweri, eenitatsi rookantari, imaantari. Kyaaryo naaka poñacharijenokinta, nokoñaatapaaki jaka kipatsikika, omaanta tekatsi naaka nopankonomaantyari. Patsipetashitawokari poyaaten, powashironkaakari.

21 Ikantapaaki paashini riyotaanewo:

—Nowinkatharite, nokowawitaka noyaatemimi omaanta tekiraata ikamipawa. Ikamakirika nokitatanakiri roojatzikya noyaatantanakimi kijokironowanakimi.

22 Omaanta ikantawakiri:

—Poyaatanakina. Paata ikitateri ikaateeyinira kaari yotziri Tajorentsi, eejatzi ikaateeyinira theenkantatsiri.

Romaerintakiro riraga Jesoshi antawo tampyaa

(Mr. 4.35-41; Rk. 8.22-25)

23 Roojatzi rotetantanaka riraga Jesoshi pitotsiki, itsipatanakari riyotaanewopaeni. Ikwaki imontyeero inkaare. **24** Roojatzi imaanaki rirori pitotsiki. Niyankaani omapokashitapaakari riyotaanewopaeni antawo tampyaa, omaetonkaapaaki otetaagapaaka. **25** Roojatzi ryaatashitantanakari riyotaanewo, ikaakapaakiri, ikantapaakiri:

—¡Nowinkatharite! ¡Aritaki pimaaki! ¡Rooteentsi apiinkiwee! ¡Powawi-jaakotena, eejatzi eerori, powawijaakotya!

26 Roojatzi ipiriintanaka, ikantawakiri:

—¿Itaka pithaawantari? ¿Itaka kaari pameentaperotantana?

Roojatzi ichereemotantakawo tampyaa eejatzi otamakaari. Ikantakiro:

—¡Pimaerite!

Roojatzi okaatantanaka tampyaa, eejatzi omaeritzitanaa iñaa: teeñaawaero otamakaari. **27** Ari rotsikanateeyanakarini riroripaeni, roojatzi ikantawakaaka:

—¿Tsikama iityaarakira atziritatsiri irika? Pamineritya okemijanan-takariri tampyaa eejatzi omaetonkaa: romaeryaantakawori.

Rowawijaakotakiri kyaantariri kamaari

(Mr. 5.1-20; Rk. 8.26-39)

28 Ikantaka Jesoshi rareetapaaka intatsikeronta, raatakotapaaka janta. Tema owaero rowaga kipatsi Karaara. Ikanta apite atziri kyaantariri kamaariipaeni, ipoñaaka kaminkarimashiki, itonkiyotawakari riraga Jesoshi. Riraga kyaantariri kamaari osheki ikijakaakari iyamaaritepaeni, rootaki ithaawanantakariri atziripaeni. Tee ikinantanaawo awotsi ikinapiintaw-itaga. **29** Roojatzi icheraacheraatakaantakari kamaariipaeni, ikantziri:

—¿Itaka poñaashirenkantanari, Jesoshi? Niyatikimi, eeroka Itomi Tajorentsiper. ¿Rootakima pipokashitantanari powashironkaen? Tekiraataga omonkaata kitejiri powashironkaantenari.

30 Ari ipiyotziteeyakan chaanchopaei janta, osheki rowawaeteeyani.

31 Ikantaka kamaari ikantakiri riraga Jesoshi:

—Aririka pookakagaenari irika nokyaantawitarika, pishinetena niyaatashiteri chaancho nokyaantapaeyaari irirapaeni.

32 Roojatzi ikantawakiri:

—Piyaate, pikyaantapaakyaari irinta.

Roojatzi ryaatantanaka ishirinkashitanakari chaancho, roojatzi ishiyanaka maawaeni impeetaki, ipiinkapaaki inkaareki, motoririri, motoririri. Itsitsiyeyapaakini iñakira, motoririri. **33** Ikantaka shentawitariri chaancho ishiyanaka, tema ithaawanakitzi rootaki ryaatantanakari ojeekinta nampitsi ikamantapaakiri maawaeni atziri otaka awijimotakiriri eejatzi ikamantakotapaakiri kyaantawitariri

kamaari awijakotee. ³⁴ Roojatzi ikijaka maawaeni jeekatsiri janta, eejatzi ithaawantari rootaki ipokashitantapaakari ikantapaakiri riraga Jesoshi:
—¡Thame piyaate! ¡Tee nokoyi pipokimotena jaka nonampikika!

9

Retsiyatakotakiri Jesoshi kijopookitatsiri (Mr. 2.1-12; Rk. 5.17-26)

¹ Roojatzi rotetantanaa riraga Jesoshi pitotsiki, ikaateeyaneerini riyanewopaeni. Ipiyanaka inampiperokinta intatsikeronta inkaare.

² Roojatzi ramaetapaakiniri rirori apaani kijopookitatsiri, ramakotakiri imaaumentoki. Riyotaki riraga Jesoshi osheki raapatziyari riraga amiriri, rootaki ikanantawakariri riraga kijopookitatsiri:

—Piweshiryaanakya, niyompari, tema ari nopeyakotakaemiro kaari kameethatatsi pantawitari, aritaki nowawijaakoteemi.

³ Ikanta apaanipaeni iyotaantzirori Iwaperite Tajorentsi ikemawakiri. Roojatzi ikantawakagaeyantanakarini:

—Irika shiramparika iitajorentsitsashityaami. Itheenkakiri Tajorentsi.

⁴ Riyotakiri irirapaeni Jesoshi oeta ikenkithashiryaari rajankaneki, rootaki ikanantantanakari:

—¿Itaka pitheenkantanari? ¿Itaka pikijashiryaantanari? ⁵ Aririka nokanteri irika: “Iroñaaka netsiyatakoteemi, pipiriintee, panashiteeya”, tema ari potsikanatanakyaari. Eerorika imatziro ipiriinta, ari pishirontawentanakina naaka. Omaanta kameetha pikantanaki tekatsi shirampari materoni rowawijaakoteri atziri kaari kameethatatsi rantziri. Kameetha pikantzi. Tema piitashiwitaka nokantashitari: “Nowawijaakotemi, eero nokijawentzimiro kaari kameethatatsi pantziri”. ⁶ Nokowaki piyote tee nokantawaetashita. Naaka poñaachari jenokinta, nokoñaatapaaki jaka kipatsikika. Ikantakina paeraniperoroña Pawa janta: “Powawijaakoteni antzirori kaari kameethatatsi eero akijantari paata”. Nokowaki iroñaaka piyote eenitatsi notajorenka, rootaki nomatantariri nokamintheeri antzirori kaari kameethatatsi, nowawijaakoeyerini.

Rootaki ikanantakariri kijopookitatsiri:

—Pikatziyanaki, paaneero pimaamento, piyaatee pipankoki.

⁷ Roojatzi ipiriintantanaka riraga kijopookiri katziyanaa, jatanee ipankoki. ⁸ Iñaantawakariri maawaeni piyoteenchari oetarika awijaneentsiri, rotsikanatawakari, thaawanaki, ikanteeyanakini:

—Tema ikameethatzi Tajorentsi, imatakaakiri irika retsiyatakotakaakiri mantsiyatzinkari.

Ikantana Jesoshi: “Mateeyo, poyaatena” (Mr. 2.13-17; Rk. 5.27-32)

⁹ Roojatzi rowaaganaka riraga Jesoshi roojatzi nojeekakinta naari. Naaka Mateeyo. Iñaapaakina jaka pankotsikika nopiyotayitzinrininta iyorikitepaeni atziri eekiro noperi pinkatharitatsiri Oroomaki. Ikantapaakina:

—Thame poyaatanakina.

Roojatzi nokatziyantanaka noyaatanakiri. ¹⁰ Roojatzi naanakiri janta nopankoki nokantziri: “Thame nakiyotemi”. Eejatzi naanakiri ryotaanewopaeni. Eejatzi nakiyotawakiri. Eejatzi nokaemakiri riraga notsipatayitarini nopiyoteeyinirini oroomajatzti iyorikite, eejatzi nokaemakiri paashinipaeni antzirori kaari kameethatatsi. Ari nokaateeyakirini maawaeni; nowaeyakan. ¹¹ Ikantaka iñaakinaga ipokashiteeyakinani warijeeypaeni, ikaemapaakiri apaani ryotaanewo Jesoshi, ikantziri:

—¿Litaka rantziri riraga iyoteemiri? Rakiyoteeyakirini piyotziriri iyorikite oroomajatz, eejatzi ikaateeyakirini paashini kaari kameethatzinkari. Tee omaeethatz iroka.

12 Omaanta ikemakiri riraga Jesoshi, rootaki ikanantanakariri:

—Riraga kaari mantsiyatatsini tee ikoyi aawinantsiria raawinteri intakya mantsiyatatsiri rirotaki kowatsiri. Okimitaka iroka, riraga kenkithashiryaawitachari ikameethatz, tee ikoyi ipokashitena nowawijaakotantyaariri inta apatziro riraga iyotakotachari eeniro rantani rirotaki pokashitanari nowawijaakotanteeyaaariri. **13** Thame piyaate piyotakoeyawakironi iroka okantakotziri Iwaperite Tajorentsi, okantzi: “Tee apatziro nokoyi powamaashitapiintenari powishate inta eejatzi nokowakaaperotakimiri paapatziyaperotena. Eejatzi nokowakaaperotakimiri kameetha pineshironkaperoteri maawaeni”. Tee apatziro nopolashitziri nowawijaakoteri riraga kameethatzinkari omaantakya nopolashitaperotzi riraga kaari kameethatatsi, ryotanteeyariri Tajorentsi.

Rootaki ikantziriri riraga Jesoshi wariejeyopaeni.

*Rojampitanteetari Jesoshi tzitawentaantsi
(Mr. 2.18-22; Rk. 5.33-39)*

14 Roojatzi ipokaeyapaakini riyotaanewo Jowa kaawoshitakotziriri Tajorentsi ikantapaakiri riraga Jesoshi:

—Pamine, notzitawentapiintari Tajorentsi, eejatzi ikimitaka riraga war-ijeyopaeni; omaantakya pashi piyotaanewopaeni tee itzitawentapiinteyarini riori, inta rowapiinteyani maawaeni kitejiri. ¿Litakaky?

15 Ikantawakiri:

—Piyotaki rametakawo riraga aatsiri iina ikaemiri inampijatzipaeni rowakaakari riweshiryaawentakawo roori. Eero retakotanakawo kaemakaantziripaaeni. Omaanta aririka raapithateetaneeri inteenanta, roojatzikya retakotanakyaari, eero rowa. Eejatzi nokimity naari paata, aririka niyaate. Niyaaterika roojatzi retakoeyantanakyaani riori niyotaanewopaeni, eejatzi itzitawenteeyanakyaarini Tajorentsi tema retakoeyanakityaanani. Rooma eeniroka nojeeki jaka, eero itzitawentari Pawa, tema riweshiryaawentana. **16** Tee pimaejantziri iyotaantatsiri, tee. Eejatzi eenitatsirkia pimaathapooki antyashipawo rooteentsi oshipaaye, aririka powawatatero owakirari maathaantsi, roojatzi aririka pikiwero aminthantanaka owakirari, eero omonkaatanawo, roojatzi otzijagaantanakya antyashipawotsari, patsipetashitakawo powawatatziro. Eejatzi okimitakya, patsipetashityaawo paapatziyawo maawaeni okaatzi iyoteetakimiri. Okameethatz i pipakayero paashini paapatziyawitarira roojatzi kameethatanaki paapatziyana naari.

17 Rapiitakiro Jesoshi roshiyakaawenteniri okaatzi riyotaakiriri, ikantzi:

—Piyotzi aakapaeni joriyyopaeni shirikiriri imashi piratsi apiyaatantyaa-wori awishooawaantsi oowa. Omaanta eero apiitantarri apiyaatantari awishooawaantsi oowa owakirari inthomaenta itaworimashi inta apiyaatantya owakira mashiri. Apiitantlyaaririka tema ari ijagaanaki. Okimitaka iroka, oetarika niyotagaemiri naari eejatzi owakirari. Tee okameethatz pipiy-tero ikemijantakayimiri paashini iyotaantsi. Pipakayero pikemijantziro ikantawitzimiri irintapaeni roojatzi kameethatanaki paapatziyena naari.

Rootaki ikantakiriri riraga Jesoshi.

*Riraga Jesoshi retsiyatakotakiro jokaawitawori iraa eejatzi rañaakagaero
eejatzi kamaawiteenchari
(Mr. 5.21-43; Rk. 8.40-56)*

¹⁸ Roojatzi ipokashitantapaakari jewawentzirori ipiyotapiinteeyaninta joriiyopaeni, rotziwerowashitapaakari ipinkathatantapaakari riraga Jesoshi, ikantapaakiri:

—Kamaki nishintyo, nokowaki piyaatakite nopankoki pipampitakitenawo roojatzi añaantaneeyaari eejatzi. ¹⁹ Roojatzi ikatziyantanaka Jesoshi royaatanakiri janta, nokaateeyanakirini naaka maawaeni riyotaanewo. ²⁰⁻²¹ Ari janta niyanki awotsi oyaatapaakiri Jesoshi apaani tsinani, okaataki 12 ojarentsite owashironkaaka, omantsiyataki, ari okantatyaaani ojokaatziro iraa. Okanta okenkithashiryaka, okantzi: “Aririka nopampitzitakiri iithaari Jesoshi aritaki netsiyatakotanee”. Roojatzi okinashitantapaakari itapiiki, opampitzitapaakiri opatziyakiki iithaari. ²² Roojatzi ipithokanaka iñaawakiro, roojatzi ikantawakiro:

—Piweshiryaanakya, choeni, pameentakina, rootaki petsiyatakotantaari. Aripaete etsiyatakotanee.

²³ Roojatzi nowaaganaka areeteeypaakinani ipankoki jewatatsiri. Noñaapaakiri jonkatakoeyawitaworini kamaentsiri eejatzi oshekini atziri iraakoeyawitaworini icheragaeyakini riraaka. ²⁴ Roojatzi ikanantapaakari riraga Jesoshi:

—Thame piyaatanee. Tee okami irowa piraakowitzakarira, omaashita.

Roojatzi ishirontawentakari injii, injii, injii. ²⁵ Roojatzi riyowantanaka nekokironta roojatzi ikyantapaaka riraga Jesoshi. Roerikawakotapaakiro roojatzi opiriintantanaka añaanee. ²⁶ Othotyaanaka ikemakoetawakiri Jesoshi janta maawaeni nampitsikipaeni.

Raminakaakiri apite kaari kokichaatatsini

²⁷ Roojatzi nowagaagayanakani, tema royaatakiri Jesoshi apite kaari kokichaatatsini ichereemotakiri, ikantakiri:

—Tema eeroka icharineeten iIraviiрини. Rotyaantakimi Tajorentsi rootaki nokowantari pineshironkatena.

²⁸ Roojatzi nokyaanteeypaakani eejatzi riraga kaari kokichaatatsini ipokashitapaakiri rirori roojatzi ikanantawakari:

—¿Pikenkithashiryaakama aritaki nomatakiro nokokichaatakagaemi?

Ikantawakiri:

—Jee, Nowinkatharite, niyotzi aritaki pimatakina pikokichaatakagaena.

²⁹ Roojatzi ipampitantakari rokiki, ikantanakiri:

—Paapatziyakina rootaki netsiyatakantaneemiri.

³⁰ Roojatzi raminantanaa. Ikantakiri rirori:

—Eerowa pikamantziri paashinipaeni: “Ikokichaatakagaana Jesoshi”.

³¹ Omaanta riyaatantanakari ikantakiri maawaeni iñaapaakiri:

—Ikokichaatakagaana Awinkatharite. ³² Nokantaka riyaateeyakaawitanakinanira riraga Jesoshi, roojatzi noonthaantawakiri atziri ramakiri kyaanttariri kamaari. Tee imateeya iñaawaete. ³³ Roojatzi rookantawakanri Jesoshi riraga majontzitakaawitakariri, roojatzi iñaawaetantanaa. Ari rotsikanateeyawakariniroña maawaeni ñawakiriri, ikantawakaaka:

—Pamine, paerani tee añaapiintziro kimitaworka iroka jaka aepatsitekika.

³⁴ Omaanta ikanteeyakini riraga warijeeypaeni:

—Irika shiramparitsirika ramitakotakitziri iwinkatharite kamaaripaeni. Rootaki imatantariri rookakiniri ikaateeyinira ikamaaritzi rotyaantziri.

Osheki ineshironkatziri riraga Jesoshi atziripaeni, ikowaki raapatziyari

³⁵ Osheki ikinakinayitanakini riraga Jesoshi ithotyaakiro maawaeni nampitsipaeni, riyotaantaki janta pankotsi ipiyotantapiintarira joriyyopaeni. Ikenkithatakotapiintziri Tajorentsi, tsika ikanta ipinkathariwenantzi. Eejatzi retsiyatakotakaakiri maawaeni mantsiyaripaeni, tekatsi pomeentsitzimotyaarini. ³⁶ Ikanta iñaawakirira oshekini atziri ipiyotawentakari, osheki retakoeeyakarini. Ikantzi:

—Osheki rowashironkagaeyakanri irirapaeni, tekatsi iyotaantatsiri riyotaaperoteri oetarika okantaperotziri Iwaperite Tajorentsi. Ikimiwitari owisha riraga kaari ishenteetzi, rootaki rowashironkagaeyantakarini.

³⁷ Roojatzi ikanteeyanani:

—Okimitakawo iroka oshekitziranki okithoki pankiwaerontsi. Omaanta tekatsipero antawaetsatsini owiiteroni okithoki. Eejatzi okimitaka roori eenitatis iroñaa osheki atziri kowawitachari raapatziyaperotyaarimi riraga Tajorentsi omaanta tekatsi osheki aapatziyakagaeyaaaririni. ³⁸ Pamaneri Awinkatharite Pawa Tajorentsi rotyaanantyaariri oshekini kenkithatakayerrini anampijatzi, raapatziyanteeyaririni.

10

Riyoyaakiri Jesoshi 12 riyotaanewopaeni

(Mr. 3.13-19; Rk. 6.12-16)

¹ Roojatzi ikaemaeyanakinani Jesoshi maawaeni nokaateeyinira 12 riyotaanewo. Imatakagaeyakinawoni nowawijaakoteri kyaantawitariri kamaari nookiniri iyamaarite. Eejatzi netsiyatakotantayitaaririni omatayitzirini paashinijatopaeni mantsiyarentsi.

² Iroka nowaeropaenika naakapaeni rotyaantanewo: Shimo, (riraga iiteetziri eejatzi Peetero), eejatzi rirentzi Antereeshi; Jantyaako, (riraga itomi Sewereeyo), eejatzi rirentzi Jowa; ³ Jiripi eejatzi Waritoromee; Tomashi eejatzi naaka, nowaero Mateeyo (riraga piyotawitanariri paerani iyorikite oroomajatzi); Jantyaako (riraga itomi Arijeeeyo); Tareeyo; ⁴ Shimo, (riraga kathaaperotzinkari antayitzirorini oetarikapaeni); eejatzi riraga Joorashi (riraga karyootejatzi), rirotaki akaanteririni iinja Jesoshi).

Rotyaanteeyantenarini Jesoshi nokenkithateeyeni eejatzi retsiyatakoeyerini mantsiyatayitatsirini

(Mr. 6.7-13; Rk. 9.1-6)

⁵ Rotyaanteeyantenarini riraga Jesoshi, omaanta rityaawo eenitatsi iroka ikantawakinari:

—Eerowa piyatashitziri riraga kaari joriyyotatsi, eejatzi riraga jamaaryajatzi. ⁶ Intakyä piyatashiteri maawaeni ajoriyyotzinkarite. Nokimitakaantakiri owisha, riraga kaari ishenteetzi. ⁷ Tsikarika pikineeyanakini pikenkithatakayeri atziripaeni. Pikanteri: “Rooteentsi ipinkathariwentse Tajorentsi”. ⁸ Petsiyatakotakayeri mantsiyatzzinkari, pañaaagagaeri kamatsiri, petsiyatakotakayeri patheenkar, eejatzi powawijaakoteri kyaantawitariri kamaari. Osheki ineshironkatakimi Tajorentsi ramitakotashitakimi eerori, omaanta tee ikowantzimotzimiro. Eejatzi pikimitzitya eerori, pineshironkateri paashinipaeni pamitakoteri. Eero pikowantzimotari. ⁹ Eero paanaki piyorikite, ¹⁰ piwoorijate, paashini pimaatha, paashini pijapatote, paashini pikotzi, oetarika paashinipaeni: piyatashitanakya. Ninkarika pineshironkatakiri okameethatzi ineshironkatemi eerori ipashitemi koetyeemoyitakimirini. ¹¹ Aririka pareetapaakya nampitsiki pikowakowatapaakiri apaani atziri kameethatatsiri rajankaneki. Aririka raakameethatawakimi, ari piukeekapaaki janta, roojatzi paata powaagantaneeya paashiniki nampitsi.

¹² Aririka pareetapaakya, piwethatapaakyaari ashitawori inampi.
¹³ Aririka raakameethatawakimi irinta, pikanteri Tajorentsi: "Pawa, pineshironkaperoteri". Omaanta teerika raakameethatawakimi, eero pikantziri rirori ijeekakaeri kameetha. ¹⁴ Eerorika raakameethatawakimi jeekatsiripaeni janta nampsitsiki, eejatzi eerorika raapatziyeeyawakimini, ari powaaganakya. Eejatzi potekakontatanakya piitzikira riyotantyari eero pipiyashitari eejatzi. Pikanteeyanakirini: "Iroñaaka tee paapatziyana, ari rowashironkaemi Tajorentsi iinja". ¹⁵ Kyaaryootaki iroka nokantemiri: aririka othonkaeya iinja kipatsi, ikantakowenanteeyaaririni Tajorentsi maawaeni atziri, roojatzi rowashironkaantakyaari maawaeni joroomajatzini eejatzi maawaeni komoorajatzini, rooma oshekini ranteeyakironira kaari kameethatatsi. Omaanta riraga kaari aapatziyeeyawakimini rivotaki iinja kemaatsitaperotyaa woni osheki katsiri. Tema rowashironkaaperotantakyaariri riraga Tajorentsi rioripaeni.

¹⁶ Pamine, notyaantatzii mira iroñaaka pikenkithatakotena janta maawaeni anampijatzikinta, omaanta nokimitakaantawitakimi eeroka owisha pojatekantyaari koweenkatatsiri. Kyaaryoowa, rowashironkaemikari theenkantatsiri. Rootaki nokowantakimiri pikenkithashiryaa perotyaa kameetha eejatzi piyothaniperote kameetha. Pikimitakotyari maanki. Osheki ikenkithashiryaa perota aririka raminaminate royaari; omaanta eejatzi kameetha paakameethatante pikimitakotyari jamomo. Tee riyotzi ikijanita paashinipaeni, kameetha ijeeki. Ari pikimitakotyari eerori: pijeeki kameetha eero powashironkaeri paashinipaeni.

Rootaki ikantawakinari riraga Jesoshi.

Inja ikijemikya oshekini atziri".

(Mr. 13.9-13; Rk. 21.12-19)

¹⁷ Ikanteeyakinani riraga Jesoshi:

—Kyaaryoowa, rowashironkayitziminikari atziri. Aritaki raaneemi janta riyotaawakaakanta jewatatsiripaeni rowashironkaantemiri. Eejatzi raaneemi janta pankotsiki ipiyotantapiintarira joriyyo ipajapajaapiintemii.

¹⁸ Riyotakimirika paapatziyakina, raaneemi atziripaeni janta ijeekinta jewaperowenantsiripaenita paashinijatzitatsiri atziri, roojatzi eeroka pikenkithatakagaayerini riyoteeyantanakyaarini atziripaeni. ¹⁹ Aririka raakaantakimi eero pikantashiryaa shita: "¿Oetaka nokantapaakiriri?" Tema naaka yotakaakimiri oetarika pikantapaakiriri. ²⁰ Eero piyotashita eerori pikenkithatakayeri, omaanta Ishire Tajorentsi iyotaaperotemini pikenkithatakayeri. ²¹ Inja osheki ari ikijaperowentakinani atziripaeni. Apaani aririka raakaanteri rirentzi, ari rowamagaetakiri; paashini raakaanteri itomi, eejatzi paashinipaeni raakaantayiterini ashitariri.

²² Paapatziyakina, rootaki ikijantemiri atziripaeni, omaanta eero pipakaero paapatziyana. Roojatzirika pikantyaani kijokiro poyena paapatziyena, aritaki nowawijaakotakimi kameetha pijeekimotantenari janta jenokinta.

²³ Aririka ikijimi jeekatsiripaeni nampsitsiki, ari pishyanaki, pitharyaanaki paashiniki nampsitsiki. Kyaaryo, tekira pithotziiro maawaeni nampsitsi jika Ishirayeeriki, tekira piyotagaeri maawaeni, roojatzi nopiyantapaaya naari. Tema naaka poñaachari jenokinta, nokoñaatapaaki jika kipatsikika.

²⁴⁻²⁵ Osheki ikijanakina iroñaaka atziripaeni. Paapatziyakina rootaki ikijantemiri eerori. Pamine, aririka imonkaawityaari riyotaanewo iyoteeriri riyote ari kameetha, omaanta eero imatziro ranaakotziri. Eejatzi aririka imonkaawityaari onampirentsi riraga omperatariri ari kameetha, omaanta eero imatziro ranaakotziri. Osheki ikijakina, iitashitakina naaka

Wereshewoo riraga iwinkatharite kamaaripaeni. Iinja rowanaaperotemi eeroka osheki ikipaperotanakimi.

↓Ninka athaawantyaarika?
(Rk. 12.2-9)

²⁶ Omaanta eero pithaawanteyearini. Inja ari piyotakiro maawaeni kaari piyotziri iroñaaka. Tema ari piyotakiri ninkarika kijakiriri Tajorentsi eejatzi ninkarika kijakimiri eerokapaeni aapatziyanari naari. Piyotero oetaka rantayitakirini eejatzi tsika ikanteeteri rowashironkagaeteri. Iroñaaka tee riyotzi irirapaeni nopinkatharitaki, omaanta iinja riyoperoeyeni maawaeni; iñawakinaka nopinkathariperotapaaki naari, eejatzi pikaatenaa erori. ²⁷ Apaniroeni nokamtakimi eerori iroñaaka, omaanta tekira riyotzi theenkantatsiri, nomanawitakawo. Inja nokowaki pikamanteri maawaeni riyotantyaari irirapaeni. ²⁸ Imatawityaawo rirori theenkantatsiri rowamaemi omaanta eero pithaawantari. Tekatsi ikantemti rotyaantemti paamari kaari tsiwakanitatsini. Omaanta riraga Tajorentsi pipinkathaperoteri; ikowakirika irira imatero rowamaemi eejatzi rotyaantemti janta paamari kaari tsiwakanitatsini. Rirotaki pithaawantyaari irira. ²⁹ Pamine, tee ipinaperowita tsimeri iryaanini, riraga jenokiweripaeni, omaanta teerika ikowakayiri Tajorentsi ikame, eero ikami. Eejatzi riyotzi tsikarika okaate ikamantyaari apaani. Eejatzi okimitakya eerori, eerrika ikowakayimi pikame, eerokya ishinetziri atziri rowamaemi. ³⁰ Riyotziro tsikarika okaatzi piishi, tema eejatzi riyotziro maawaeni okaatzi awijjomotemini. ³¹ Ñaakiro, osheki panaakotziri tsimeripaeni jenokiweri, osheki ikenkithashiryaaakimi riraga Tajorentsi. Iroñaaka eero pithaawantari. Ikantzimattemirika atziri, omaanta eero pithaawantari.

³² Pikanteririka atziri: “Naapatziyari Jesoshi”, eejatzi naari nokimitzityaawo janta jenokinta nokanteri Pawa: “Raapatziyakina rirori, nosheninkatakari”. ³³ Omaanta pikanteririka atziri: “Tee naapatziyari Jesoshi”, eejatzi nokimitzityaawo naari janta jenokinta nokanteri Pawa: “Tee raapatziyana rirori, tee niyotziri naari”.

³⁴ Eejatzi ikantana riraga Jesoshi:

—Eero piitakaashita nopokakika jaka ari raakameethatawaka-gaeyanakyaani atziri. Tee rootaki nopokanta raakameethatawakaanteyearini inta ikjawakaeyantyaarini. ³⁵⁻³⁶ Aririka raapatziyena apaani shirampari omaanta rirentzi fee raapatziyana. Rootaki ikijawakaantari. Ikimitaaganki shirampari aririka raapatziyena naaka tema ari ikijawakiri ashitariri. Tsinani aririka aapatziyena roori ari okijawakiro iniro; eejatzi okijitanakyaawo ewatyero rowaga ayiro kaari aapatziyana. ³⁷ Rooma okameethatzi pinintaperoteri piri eejatzi piniro, omaanta nokowaki kameethapero pinintashireperotena naari. Eerorika pinintaperotana, eero noñaaperotzimi eerori pikameethatzi. Eejatzi, okameethatzi pinintashireteri pitomi eejatzi pishinto, omaanta nokowaki kameethapero pinintashireperotena naari. Eerorika pinintashireperotana, eero noñaaperotzimi eerori pikameethatzi. ³⁸ Nokowaki pikyaaryoowentenawo maawaeni nokowakaakimiri. Aririka ikijanteetemiro, omaanta nokowaki eekiro piyaatatyye pikyaaryoowentenawo oetarika nokowakaakimiri. Eerorika pikyaaryoowentanawo maawaeni, eero noñaaperotzimi naari pikameethaperotzi. ³⁹ Aririka pikaminthaaperotya eerori apaniroeni iroñaaka, ari powashironkaaperotanakya iinja. Omaanta paapatziyaperotenarika iroñaaka, omawitya rowashironkawitemi atziri, tema eero patsipetashitawo paapatziyana; aritaki iinja

pañaagae janta okameethaperotzinta. ⁴⁰ Piyaatantari, ninkarika aakameethatemini eero ka, tema raakameethatzikina naari ejatzi. Ejatzi maawaeni aapatziyanari, tema rirotaki aapatziyaa Pawa, riraga otyaantakinari. ⁴¹ Maawaeni aririka raapatziyari ejatzi raakameethateri kamanantayitzirorini iñaani Tajorentsi imonkaatawakaantyari iñaaperotawakirii rirori. Tema ari ipinatakiri iinja. Ejatzi okimitaka maawaeni aririka raakameethateri kameethatzinkari riraga aapatziyanari ejatzi ikimitakari, imonkaatawakaatyia iñaaperotawakirii riraga Tajorentsi ikameethatzii. Ejatzi ipinatzityaari iinja. ⁴² Ninkarika pantashitachari atziri oetarika omawitya apatziro tajokira iñaa tema rirotaki aapatziyanari nonintanewo, kyaaryootaki nokantzimiri: "Eero patsipetashitawo panteri, ari ipinatakimi Pawa iinja".

11

¹ Rootaki ikanteeyanarini riraga Jesoshi, ari okaatapaaki ryotaakinari. Roojatzi niyaateeyanakini. Ejatzi rowaaganaka Jesoshi janta paashinipaenikinta nampitsi, ryotaakiri jeekatsiripaeni, ikenkithatakaakiri. Niyaatanaki naaka apitepaeni, ejatzi paashinipaeni riyaateeyanakini apitepaeni ryotaanewopaeni, nokaateeyini 12.

Rotyaantakiri Jowa ryotaanewo iñeri Jesoshi (Rk. 7.18-35)

² Riraga Jowa kaawoshitakowentziriri Tajorentsi ijeekaki iroñaaka omonkyaaagamentotsiki. Ikantaka ikemakotakiro rantakiri Jesoshi, riraga iiteetziri Rotyaantanewo Tajorentsi, rootaki rotyaanantakari apite ryotaanewo raminakiteri Jesoshi. ³ Ikantawakiri:

—Piyaatashitakiririka Jesoshi pojampitapaakiri: “¿Eerokama Rotyaantanewo Tajorentsi naamagaeyakarini? ¿Eenitatsima paashini naamagaeyarini?”

⁴ Roojatzi ipokantapaaka rirori apite rareetapaakari Jesoshi. Rojampitan-tapaakari, ikantawakiri:

—Iroñaaka pipiyane, pikamantapaeri Jowa okaatzi maawaeni pikemakinari ejatzi maawaeni piñaakotakinari. ⁵ Pikamantapaeri naminakagaeyakirini riraga kaari kokichaawitacharini, nokatziyatziyatakagaeyakarini riraga kijopookiwitacharipaeni, netsiyatakotakagaeyakirini riraga pathaatcharipaeni, nokemakagaeyakirini riraga kaari kemawitachanipaeni, ejatzi nopiriintayitaneerini kamawiteencharipaeni. Niyotakagaeyakirini owashironkaawitacharipaeni tsika ikantya rowawijaakotanteeyaariri riraga Tajorentsi. ⁶ Riwershinyaakaanakimi maawaeni kaari theenkanari naaka. Rootaki pikantapaeriri Jowa.

⁷ Roojatzi ipiyantanaa janta riraga apite, ikanantapaariri riraga Jowa okaatzira iñaakotakiriri janta.

Riraga Jesoshi iñaaperotziri riraga Jowa kaawoshitantatsiri ikameethatzi (Rk. 7.24-30)

Omaanta eeniro ijeekaki riraga Jesoshi ikenkithatakagaeyakirini piyotawentakaripaeni, ikantanakiri:

—Paerani piyaatapiintzi janta tekatsinta atziri ipanko pikemijantapiintziri Jowa. ¿Itaka piyaatashiteeyantakitaririni? ¿Rootakima piyaatashitantariri pikemijanteri ñaawaetashitachari? Teejee.

⁸ ¿Piyaatashitakitariri piñaakitzirima atziri kithaatachari kameetha? Teejee. Riraga kithaatawori iithaari kameethatatsiri ijeekaeyini janta ipankoki jewawenantsatsiri. ⁹ Ajaatya, pikamantena: ¿Itaka piyaatashitakitziri? ¿Riroma piitziri kamanantzirori iñaani Tajorentsi

piyaatashitantakitariri? Tema kyaaryo ikamantziro, omaanta ranaakoper-
oeaykirini paashinipaeni kamanantayitzirorini iñaani Tajorentsi.
¹⁰ Ikenkithatakotzitakarini paerani Tajorentsi, ikantztakinani: "Notyomi,
notyaanteri iinja jewatemini ikenkithatakapaakiri joriyopaeni, ikanteri:
'Pikenkithashireeyaanitya, okameethatzpi jeeki kameetha, paamayari
Awinkatharite, kaakitaki' ". Rivotaki riraga Jowa kaawoshitakotziriri
Tajorentsi rojankinatakotziteetakariri paerani. ¹¹ Kyaaryo nokamantemiri,
tema oshekini naawita kamanantatsiri omaanta tekatsi kimityaarini
Jowa riraga kaawoshitakotziriri Tajorentsi. Tema ranaakoeyakirini
maawaeni paashinipaeni riyoperotakiri Tajorentsi. Omaanta riraga
atziri kaariroña yoperotatsi omaanta iñaakiririka Jesoshi itajonkantzi
rootaki ranaakoperotantanakariri iroñaaka Jowa; tema iñaakiri tsika ikanta
Tajorentsi reewanenantzimatzi. ¹² Paerani ikenkithatakotanani naari
riraga Jowa kaawoshitakontatsiri Tajorentsi, eejatzi raapatziyakawo
osheki atziri okaatz ikenkithatakotanari. Iroñaaka nokenkithatakotziri
Tajorentsi piyotanteeyakarini. Eejatzi paapatziyakaanteeyaririni. ¹³ Tema
paeraninki ikenkithatakotanani maawaeni kamanantayitzirorini iñaani
Tajorentsi, riyotanteeyaworini maawaeni nopokarika iinja. Eejatzi
ikimitani Moeseeshini ikenkithatakotana. Maawaeni ikantzini: "Aritaki
ipokaki Rotyaantanewo Tajorentsi, omaanta rityaawo ipoke kimiwityaarini
Iriiyashini, eentsikiro rimpetaapaaki Rotyaantanewo Tajorentsi". ¹⁴ Aririka
paapatziyawo nokantzimiri, rivotaki irira kimiwitariri Iriiyashini
ipokapaaki. Tema reewatakina Jowa. ¹⁵ Iroñaaka pikemaperotakina
pikempitakira.

Rootaki ikanteeyiririni maawaeni piyotawentari.

¹⁶ Eejatzi ikanteeyiririni riraga Jesoshi:

—Tee piyotzi iitarika pikoyiri pikemijanteri. Pikimitakari eentsipaeni
jeekatsiri awotsiki, kantziriri paashinipaeni: ¹⁷ "Nojonkawaetantawitari
omaanta tee inimotakimi, tee piweshiryaanaka. Niraawitanaka, omaanta
tee piraaga. Tee nomatziro niweshiryaa kayemi". ¹⁸ Naakiro, pikowawita
ranteeyeronomi pinampijatzi oetarika pikowakaawitakariri. Piñaawitakari
Jowa rametakawo tee rowa kameethatatsiri eejatzi rametakawo tee rirapi-
intziro shinchaaripaeni ikenkithashiryaa katorati Tajorentsi. Roojatzi pikant-
tashitari: "Oo, eenitasi iyamaarite pinkakaakiriri, rootaki kaari rowap-
erottanta eejatzi kaari rirantawo shinchaari". ¹⁹ Naaka poñaachari janta
jenokinta, nokoñaatapaaki jaka kipatsikika. Nowa maawaeni eejatzi niriro
shinchaari. Roojatzi pikantzimatakina: "Pamine sha, irinta owashitachari,
shinkitachari. Itsipaminthatakari ayitakaeriri ayorikite eejatzi paashini-
paeni kaari kameethatzinkari". Omaanta nokantemi piyotzi Tajorentsi ari
okameethataki maawaeni ikowakaakinari; eejatzi maawaeni aapatziya-
nari, riyotaki okameethataki ikowakaakinari Pawa.

Rootaki ikantziriri.

*Jesoshi ikantakotziri jeekatsiri nampitsikipaeni tsikarika itajonkantzi os-
heki Tema tee raapatziyari.*

(Rk. 10.13-16)

²⁰ Roojatzi riraga Jesoshi ikantakotziri jeekatsiri nampitsipaeni tsikarika
itajonkantzi osheki. Iñaawitawakari osheki rioripaeni omaanta tee
ikenkithashiryaa, tee ikoyi ipakaero kaari kameethatatsi rantziri: tema
itheenkakiri riraga Tajorentsi. Rootaki ikananteeyaririni:

²¹ —Ashironkaamatsitemiini eerokapaeni korashiinijatzi, eejatzi
eeroka wetheerajatzi. Powashironkaanakya maawaeni. Osheki
piñaawitawakina notajonkantzi, omaanta tee pikenkithashiryaaawaka, tee
paapatziyana. Iñaawakinami notajonkantzi riraga tziirojatzini paerani,

eejatzi riraga shiroojatzini, ari ikenkithashiryaanakyaami, ipakaakiromi kaari kameethatatsi rantzirini paerani, raapatziyenami. ²² Inja aririka ikantakowenteri maawaeni Pawa, rowashironkayeri riraga tzirojatzini eejatzi riraga shiroojatzini, osheki tee ikameethatzini. Omaata rowashironkaaperotemiroña eerori. Tema piñaakotawitakinawo nota-jonkantzi omaanta tee paapatziyana. ²³ Eejatzi eerori kaperinawoojatzni, piitashiwitakawo piyotakiri Tajorentsi piyaatantyaari jenokinta, omaanta pitheenkawaetana, rootaki piyaatantyaari owashironkagaantsikinta, ari pikemaatsityaaworoña paamari jaawiki. Iñaawakiromi riraga joroomajatzini maawaeni piñaawakiri eerori, ari ikenkithashiryaanakyaami, eero ithonkirim paerani Tajorentsi, roojatzi okantyaani iroñaaaka inampi. ²⁴ Inja eejatzi rowashironkayerini riraga Tajorentsi joroomajatzini, tee rameentari riraga Tajorentsi, omaanta rowashironkaaperotemiroña eerori kaperinawoojatzni, tee paapatziyana, omawitya piñaawitakinaga notajonkantzi.

Rootaki ikantziriri riraga Jesoshi.

*Pipokashiteena naaka, ari piñeero nomakoryaakaayiteemini
(Rk. 10.21-22)*

²⁵ Paashini kitejiri ikenkithatakaakiri riraga Jesoshi Iriri, ikantziri: —Noñaaperotzimi, Pawa, eeroka jewaperowentziriri maawaeni janta jenokinta eejatzi jaka kipatsikika. Eenitatsi kantashitacharipaeni ikantashita: “Niyoperotzi naari”, omaanta pimanapithateeyakirini piyotantari. Ariwee. Omaanta piyotakaanteeyakirini paashinipaeni, riraga atziri kimitariri eentsipaeni: tema irirapaeni kaari kantakaaperotachari inta raap-atzieeyimini. ²⁶ Pineshironkateeyakirini irirapaeni, pikowakaakiri riyote. Ariwee, pantziro pikoyiri.

²⁷ Rootaki ikantziriri ashitariri, roojatzi ikananteeyakaririni piyotawen-teeyaririni:

—Riotaki Pawa iyotakaakinari maawaeni, eejatzi ryoyaakina nopinkathariwenante maawaeni. Tekatsi paashini atziri yotakoperotziriri Itomi: apatziro Pawa riori ryoperotana. Eejatzi tekatsi yotakoperotziriri riraga Pawa, apatziro naari niyoperotakotziri. Eejatzi ryotziri riori, riraga atziri niyoyaakiri niyotakaantyaariri. ²⁸ Eeroka maawaeni, aririka patsipetyaawo kameethatanakimi, aririka powashironkaeya, pameentena pikantena, aritaki nowawijaakotakimi niweshiryaaokayemi.

²⁹ Paapatziyena pikowakirika niyoteemi; tema naaka amatsinkakayemini eejatzi osheki noneshironkatantz. Eero nopolmeentsitawentzimi. Aririka paapatziyena, niweshiryaaokayemi. ³⁰ Pikowakirika naakarika piwinkatharite, eero nowashironkaantzimi, inta namitakotapiintemi. Pikowakirika naakarika piwinkatharite, eero opomeentsitzimotantzimi paapatziyena, tema nokimoshiryaaakimi.

12

*Ikenkithatakakiri Jesoshi kitejiri amakoryaanteetari
(Mr. 2.23-28; Rk. 6.1-5)*

¹ Paashiniki saawaro noyaateeyakirini Jesoshi janta pankiwaerentsi-mashikinta, maawaeni nokaateeyakirini ryotaanewopaeni. Rooteentsi ojampate teriiko. Eejatzi ayimateeyakinanı notashe janta, rootaki notz-impejanteeyanakaworini nowaeyakawoni. ² Iñaawakina warijeeypaeni, roojatzi ikanantakari Jesoshi:

—Pamineriita piyotaanewopaeni. Iroñaka kitejitalsiri kaari antawaetan-tapiinta; iroñaka tee okameethatzsi rowiitantlyaawori; tee ikemijantaper-otziri okaatzi ikantziri Tajorentsi.

³ Rakanakiri:

—Tema tee piñaananeentziro Iwaperite Tajorentsi okenkithatakotakirini Iraviirini. Ayimatantawitakarini paerani itashe, eejatzi ayimatantaw-teeeyakaririni itashe maawaeni oyaatziriri. ⁴ Roojatzi ikyantaapaka okaankiitzi ipankomawoki Tajorentsi. Eenitatsi jewatatsiri janta, riraga ñaanakowenantatsiri. Ari ikantapaakiri: “Ayimatakina notashe”. Eeniropojeekekaki paa janta rashii Tajorentsi. Tee ishineteetziro royaawo maawaeni joriyyopaeni, apatziro riraga ñaanakowenantsirsipaeni rirotaki oyaawoni. Omaanta tee ikoyi rowashironkayeeri, rootaki ipantawakariri Iraviirini, eejatzi tsipataririopaeni. Rowaeyakawoni. Iroñaka tee pikantzi: “Tee okameethatzsi rantzirini Iraviirini”. ¿ilitaka pikanantari: “Tee okameethatzsi iroka rantziri piyotaanewopaeni?” ⁵ Eejatzi piyotakiro rojankinatakirini paerani Moeseeshi: “Okaate 6 kitejiri pantawaete omaanta apaani kitejiri eero pantawaetantawo”. Maawaeni saawaroki tee antawaetapiintzi aaka-paeni. Omaanta maawaeni saawaroki riyatapiintzi ñaanakowenantatsiri rantawaetapiintzi janta Tajorentsipankoki. Tee pikantari, tema inimotakimi rantziri. ⁶ Kyaaryo iroka nokantemiri: okaatzi niyotaantziri naari anaakoperotakiro oetarikapaeni riyotagaetziriri atziri janta Tajorentsipankoki. ⁷ Ñaakiro, rojankinateetakini paerani: “Ikantzri Tajorentsi: “Tee nokoyi apatziro powamashitapiintenari pipira, inta nokowkaap-erotakimiri paapatziyaperotena; nokowaki pineshironkatante kameetha maawaeni atziri’”. Piyotakoperotakirorikami iroka ikantziri Tajorentsi, tema eeromi pikantarimi irika owiitakirorika teriiko: “Tema eenitatsi kaari kameethatatsi pantziri”. ⁸ Nopoñaaka naaka jenokinta, nokoñaatapaaki jaka kipatsikika: tema naaka kantatsini oetarika anteri saawaroki.

Rootaki ikantziri Jesoshi.

Itharyeeyanakanji Jesoshi ipiyotapiinanta joriyyopaeni retsiyatatakotakiri atziri kijopookitatsiri rako
(Mr. 3:1-6; Rk. 6:6-11)

⁹ Ikanta itharyaakagaeyanakinani riraga Jesoshi roojatzi ikyakaanteeyapaakinani pankotsiki apiyotantapiintarira aaka joriyyopaeni. ¹⁰ Eenitatsi janta warijeeyopaeni eejatzi eenitatsi atziri kijopookitatsiri rako. Riraga warijeeyopaeni ikantawakiri riraga Jesoshi:

—¿Okameethatzima petsiyatakoteri atziri kitejitalsiriki kaari rantawaetantapiinteetari?

Ikowaki retsiyatatakoteri Jesoshi atziri kitejiriki kaari rantawaetantapiinteetari, rootaki ikantakotashitantakariri jewayitsiriniki ikante: “Rantawaetzi Jesoshi kitejitalsiriki kaari rantawaetanteetari, tee ikameethatzzi irika”. ¹¹ Rakanaki:

—Pamine, aririka ipariye powishate omookira kitejitalsiriki kaari rantawaetanteetari, ¿eeroma pagatziri pariyawiteenchari omooki?

¹² Tema ranaakotziri atziri owisha, ikameethaperotaki. Okameethatzzi aneshironkateri atziri kitejitalsiriki kaari rantawaetanteetari.

¹³ Roojatzi ikanantawakari riraga kijopookitatsiri rako:

—Powankaero pako.

Roojatzi rowankantanakawo, kameethatanee rako, omonkaatanaawo paashini rako. ¹⁴ Ikanta warijeeyopaeni ikijeyanakanji, riyatanakirajaryagaeyanakarini, ikantzi:

—¿Tsika akanterika owamaakaanantyaariri Jesoshi?

*Rowaga Iwaperite Tajorentsi okenkithatakotzitakari Jesoshi
(Mr. 3.7-12; Rk. 6.17-19)*

¹⁵ Riyotakotanaka riraga Jesoshi ikowatzi warijeeypaeni rowamaakaanteri, rootaki ishitwapithatantanakariri, rowaagakaantanakinari, royaateyakinani osheki atziri. Ikanta Jesoshi retsiyatatakotakiri oshekini mantsiyatzinkari, maawaeni pokashitziriri. ¹⁶ Roojatzi ikanteeyantakaririni:

—Eerowa pikamantziri paashinipaeni: “Retsiyatakotakaakina Jesoshi”.

¹⁷ Imonkaatakiro Jesoshi maawaeni rojankinatakotzitakarini paerani Iseeyashi. Ikantztakarini Tajorentsi:

¹⁸ “¡Pamine sha! Irika notyaantanewoka. Nokowakaakiri rantenawo maawaeni oetarika nokowakaakiriri. Osheki nonintaperotziri, osheki noñaaperotziri ikameethatzi. Notyaantenirinoshire, okithaatkayaari, amitakopiinteri. Ikanteri paashinijatzitsirsitziri, raapatziyeena, nookirikari paamariki kaari tsiwakanitatsini, rowaga kitejitzitsiri iinja nokantakowenterini maawaeni atziri ikameethatzirika.

¹⁹ Eero ipiyawaantetanta, eero ishuntsitziro ipaante. Eero akemiri icherayi.

²⁰ Eero rowashironkaeri owashiretachari. Eero ramatawitziri kowatsiri riyyotena. Ikantyaani ineshironkatante, roojatzi kitejitzitsiri iinja nokantakowenantyaaririni maawaeni atziri. ²¹ Rirotaki owawijaakoteerini paashinijatzitsirsitziri, tekatsi paashini owawijaakoteerini”. Rootaki maawaeni aapatziyariri raamaantakariri rirori.

Rootaki ikantakirini Tajorentsi paerani.

*Riraga warijeeypaeni ikantzimateeyakironi Ishire Tajorentsi
(Mr. 3.20-30; Rk. 11.14-23)*

²² Ikanta ramaetakiniri Jesoshi kyaanttariri kamaari. Tee imateeeya ifnee, eejatzi tee ifñaawaetzi. Roojatzi rowawijaakotantawakari: ifñaakagaeri eejatzi ifñaawaetakagaeri. ²³ Ari rotsikanateeyanakarini maawaeni ñaakoeyakiririni ikantawakaayanakan:

—¿Rirotakima irika Owawijaakotanteentsirika aamagaeyakarini riraga icharineeteni Iraviirini?

²⁴ Omaanta riraga warijeeypaeni ikantawakaaka:

—Rirotaki Wereshewoo, riraga iwinkatharite kamaaripaeni amitakotakiriri imatantakariri rotyaantakiri iyamaarite.

²⁵ Omaanta Jesoshi ryotakotakiri okaatzi ikenkithashireeyakirini rootaki ikanantakariri:

—Aririkami romanatawakaeyaami atziripaeni kipatskitzirika tema ari ithonkawakagaeyakaanimi. Eejatzi okimita riraga jeekatsiripaeni nampitsiki aririka rantawakaakya, rinteenaryaawakaeyanakyaanimi eero kijokiro rowawakaanami rookawakaanakya, itsiparyaawakaanakya.

²⁶ Pamine, aririkami ramitakotenami Jatanaashi notyaanteri iyamaarite, tema ari ithonkaeyawakaakyaanimi. ²⁷ Eejatzi pikantzi eeroka rirotaki Wereshewoo riorikami amitakotenanimi notyaantziriki kamaari, nojampitemi eerori, ¿rirojatzima eejatzi kamaari amitakotziriri pisheninkapaeni eerori rotyaantaririki kamaari? Kaariwee. Pojampiteri piyotaanewopaeni riro kantemini okaatzika pikantakiri kameethatakirika.

²⁸ Omaanta rootakirika Ishire Tajorentsi amitakotenari notyaanantakariri kamaari, tema rootaki piyotantyaarimi monkaataka kitezjiri ikowantawitari Tajorentsi ipinkathariwenteeyeminimi pajankaneki. ²⁹ Eenitatsirika kowatsiri ikoshiteri shintsiperotatsiri, rooma rityaawo roteyiri, shepik, ranaakoteri roojoteri. Impaetzti ikoshiteri rowaagawo, eero imatziro ipiyatawakari ashitawitawori rowaagawo. Eejatzi ikimitaka, Jatanaashi

ikimiwitakari shintsitsatsiri, omaanta otajonkakina roori Ishire Tajorentsi, nanaakotziri rirori, nomatantawori notyaanteri iyamaarite.³⁰ Riraga kaari aapatziyana rirotaki kijantanariri. Eejatzi okimiwitwa iroka maawaeni kaari amitakotana niyotaakoteri Tajorentsi, ari riyotaakiri atziri kaari raapatziyantyaari rirori.³¹⁻³² Eejatzi ikantakiri Jesoshi riraga warijeeyopaeni:

—Rootaki nokamantemiri: “Kyaaryoowa, pitheenkimatzirokarira Ishire Tajorentsi. Riraga Tajorentsi ineshironkatziri maawaeni kaari kameethatawitaticha, eejatzi maawaeni kantzimatawitariri eero ikijantari rantziri aririka raapatziyeevari. Eejatzi ineshironkatziri Pawa maawaeni kantzimatawitanari. Omaanta eero ineshironkatziri riraga kantzimatakirori Ishire. Eero ineshironkatziri iroñaaka eejatzi iinja, inta rowashironkaeri kameetha”.³³ Rooma inchato kameethari okithokitanaki kameetha okithoki. Rooma teerika okameethatzi inchato, tee okithokitziro okithoki kameethari. Piñeerorika okithoki okameethataki piyotanakiro roori owaato kameethataki. Eejatzi nokimita naari, aririka nantero kameethatatsiri, tema kameethatakina, omaanta aririkami nanteromi kaari kameethatatsi eero nokameethatzimi. Iñaanteeri atziri okaatzi antziri riyotanteeri akameethatzirika, rooma teerika akameethatzzi.³⁴ Amatawitantaniri eerori maawaeni, poshiyakari maanki. Osheki pitheeya. Tektsi pikantya piyotaante kameetha. Tee okameethatzzi pikenkithashiryaaari pajankaneki, rootaki kaari okameethatanta pikantziri.³⁵ Riraga kameethatatsiri atziri ikenkithashiryapiintawo kameethatatsiri, rootaki okameethatantari rantziri. Rooma riraga kaari kameethatzinkari ikenkithashiryapiintawo rantero kaari kameethatatsi, rootaki kaari okameethatanta rantziri.³⁶ Pamine, oetarika pikantziri jaka jaawikika riyotaki Tajorentsi. Iinja kitejittatsiri othonkantapaakyaaarini kipatsi, arimache ikantakowenteeyemini: ikenkithashiryakayemiro maawaeni tee okameethatzzi pikantziri iroñaaka.³⁷ Okameethatzirika pikantziri, aritaki iñaaperotemi pikameethatzhi, omaanta teerika okameethatzzi pikantzzi, ikantemi: “Eenitatsi kaari kameethatatsi pantziri, tema tee paapatziyana kameetha. Rootaki piyatantyaari paamariki kaari tsiwakanifatsini, osheki pikemaatsityaawo”.

Rootaki ikantakiriri riraga Jesoshi warijeeyopaeni.

Riraga theenkantsiri ikowakowitzakari Jesoshi itajonkantemi (Rk. 11.29-32)

³⁸ Roojatzi ikanantawitanakari warijeeyopaeni eejatzi iyotaantayitzirori-in Iwaperite Tajorentsi:

—Iyotaanari, nokowaki noñeemi pitajonkero oetarikapaeni, niyotan-temiri eero karika riraga Owawijaakofantatsiri.

³⁹ Ikantawakiri riraga Jesoshi:

—Tee pikameethateeyini, osheki pitheenkakiri Tajorentsi, rootaki pikantawitakinari. Eero noñaayimiro notajonkantzi. Omaanta apatziro nokenkithashiryakagaaemiri rantakiri paeraniperoroña Jonaashini riraga kamanantzirorini iñaani Tajorentsi. Pikenkithashiryakotatyeyeromi tema ari paapatziyakinami.⁴⁰ Paerani iniyakirini antari omani, okaataki 3 kitejiri ijekkaki isheetomawokinta inthomaenta. Eejatzi nokimitya naari paata, okaate 3 kitejiri nojeeki inthomaenta omooki kipatsi.⁴¹ Aririka ipiriinte niniweejatzi ikantakowenteeyakimironi oetarika pantziri. Iinja Tajorentsi, ikantemi: “Eenitatsi kaari kameethatatsi pantakiri eerori”. Paerani riraga niniweejatzini raapatziyawakarini Jonaashi ikenkithatakatantariri Tajorentsi. Iroñaaka eero, piñeeyawitakinani

naari. Tema osheki nanaakoperotakirini riraga Jonaashini, omaanta tee paapatziyawakina. ⁴² Kyaaryo ikantakoeyemini eerori iinja riraga Tajorentsi: "Eenitatsi panteeyakirini kaari kameethatatsi". Paerani iwinkathawoteni sheewajatzinipaeni okemakotantakaririni Sharamoo riyothanitzi osheki, rootaki opokashitantanakariri okemijanteri. Atsipewentakari oponaanaka inteea. Omaanta naaka nanaakoperotakirini rirori. Piñeeyawitakinani omaanta tee paapatziyeeyanani. ⁴³ Eejatzi noshiyakaawentemiro: aririka apaani atziri rookaeri kamaari ikinanaki janta opiryaaapathatzinta ikowakowatzi tsika imakoryaantyaari. Omaanta tee iñi imakoryaantyaari. ⁴⁴ Roojatzi ikantzi: "Nopiyeta nopoñaakanta ishireki shirampari". Roojatzi ipiyantaa, iñapaatziiri shirampari ikimiwitakawo pankotsi pishiityaaka tekatsi jeekantyaarini. Tema tee raapatziyaperotari Tajorentsi. Rootaki ikyaanantapaariri kamaari. ⁴⁵ Roojatzi riyaatantanaka raakitziri paashini kamaari, ikaatziz 7. Maperori osheki tee ikameethatzi. Ikantakiri: "Thame aate ajeekaeyini nojeechia chapinki". Irrika atzirika paerani rowashironkaawitakan eechonkiini. Omaanta iroñaaka rapiiteerira imaperotakiri, osheki rowashironkaaperotanakya. Eejatzi pikimiteeyakani eerori iroñaaka tee pikameethatzi, rootaki osheki powashironkaanteeyaaarini iinja.

Rootaki ikanteeyakiririni riraga Jesoshi.

Irira Jesoshi isheninkatakari maawaeni aapatziyariri

(Mr. 3.31-35; Rk. 8.19-21)

⁴⁶ Eeniros ikenkithawaetakagaeyananani riraga Jesoshi naakapaeni maawaeni piyotawentakariri, okantaka riniro areetapaaka eejatzi rirentzipaeni, ikatziyeeyapaakan janta inkokironta. Tema okowaki okenkithatakayeri. ⁴⁷ Eenitatsi kamantakiriri:

—Areetapaaka pino eejatzi pirentzipaeni, okowapaakimi. Okowaki okenkithawaetakaemi.

⁴⁸ Omaanta ikantawakiri:

—¿Ninkama nanatatsiri? ¿Ninkama yeeyitatsiripaeni?

⁴⁹ Roojatzi rookotanteeyanakarini riyotaanewopaeni ikantanakiri:

—Irrika niyotaanewopaeni, sha, nokashiyakaakari rirotaki yeeyipaeni, eejatzi noñaakiro kimitaka nana. ⁵⁰ Rirotaki nonampijatziperoeyakarini maawaeni antziniriri Pawa jenokinta ikowakaakiriri; rirotaki nokanteyirini yeeyi, choeni, eejatzi nana.

13

Roshiyakaawentakiri irira Jesoshi pankiwaetatsiri

(Mr. 4.1-20; Rk. 8.4-8)

¹ Roojatzi riwayantana riraga Jesoshi pankotsiki jataki inkaareki. Ari ijeekapaaki. ² Eejatzi ipiyotawentakari oshekini atziri. Iñapaakiro rirori pitotsi othataka othapyaakiinira, roojatzi rotetantapaaka, ijeekapaaki. Ari ikatziyeeyapaakan piyotawentaripaeni impanekiiteki. ³ Roojatzi osheki ikenkithatakagaeyakinani. Roshiyakaawentakinari pankiwaetatsiri, ikantzi:

—Riyaatzi pankiwaetatsiri rookayitzironi okithoki teriiko rowaneki.

⁴ Pariyagaantapaentsiri apaanipaeni okithoki awotsiki ikantaka konthawo ipokapaaki rowapaakawo. ⁵ Paashini apaanipaeni okithoki opariyagaantapaaki mapipookiki. Tekatsiperowa kipatsi: eechonkiini janta. Intsipaete oshookawitanaka. Eejatzi intspiaete antawotapaaki.

⁶ Ishintsiityaapaaki oorya intspiaete ojampiyanaki. Roojatzi okamantaka, tema tekatsi osheki oparitha. ⁷ Paashini okithoki pariyapaentsiri

kitocheemashiki. Oshookawitanaka pankirentsi anaanakiro kitochee roojatzsi okamantanaka. ⁸ Paashinipaeni okithoki opariyapaaki kipatsiperoki kameethari. Oshookanaki, okithokitanaki. Apaanipaeni okithokitanaki okaatzi 30. Paashinipaeni okithokitanaki okaatzi 60. Eejatzi paashinipaeni okithokiperotanaki okaatzi 100. ⁹ Eenitatsirika pikempita pikemantari, aritaki powakemptityawaawo nokantakimiri.

*Riyotakiri Jesoshi riyotaanewopaeni roshiyakaawentziniriri
(Mr. 4.10-12; Rk. 8.9-10)*

¹⁰ Notsipatanakari paashinipaeni riyotaanewo nojampitapaakiri riraga Jesoshi:

—¿litaka poshiyakaawenantakariri paashinipaeni? Tee imateeyironi riyotakotziro oeta pikantawitariri.

¹¹ Ikantawakina:

—Ishinetzimi Tajorentsi piyotakotero kaari riyotzi paashinipaeni. Ikwaki piyote tsika ikanta rirori ipinkathariwenantzi. Omaanta tee ikoyi riraga paashinipaeni riyotakotero tsika ikanta reewawenantzi. ¹² Eenirorika yowitachari ikoyirika riyoperote, aritaki niyotakaaperotakiri. Omaantakya paashinipaeni kaari kowatsini riyote, rootaki kaari riyotantyaa. Eero niyoteeri eejatzi ari nopeyapithatakiri riyowitari eechonkiini. ¹³ Rootaki noshiyakaawenantakanariri riroripaeni, rooma tee ikoyi riyote. Ramineeyawityaani omaanta riyotakoeyironi iñeeyawitakarini. Ikemaeyawityaani nokantziri omaanta tee riyotakotawakiro nokantawitariri. ¹⁴ Omaanta imonkaatapaakiro ikenkithatakotzitakarini paerani Iseyashi, ikantakotzitakarini:

“Pikemaeyawityaani omaanta eero piyotakotawakiro okantakotziri. Pamineeyawityaani omaanta eero pikenkithashiryaakoeyawoni piñeeyawitakarini. ¹⁵ Tee pikoyi piyote, rootaki kaari pikenkithashiryaantawaka. Tee pikoyi pikemi, rootaki piwitantawakawori pikempita. Tee pikoyi paminaperote, rootaki pimachookantawakari. Aririkami pikowakimi piyotemi aritaki pikemawakiromi, eejatzi piñaakimi eejatzi piyotakotenami pajánkanekira. Rooma tee pikoyi paapatziyana nowawijaakotantemiri”.

Rootaki ikenkithatakotakiririni paerani Iseyashi. ¹⁶ Omaanta eerori amineeyeemini, pikokichaantawo poki rootaki paapatziyantakinari, tema rootaki pikimoshireeyantarini. ¹⁷ Kyaaryo, ikowaeyawitakani paerani maawaeni kamanantayitzirorini iñaani Tajorentsi eejatzi maawaeni kameethatzinkarini iñeeyeronomi iroka piñaakirika iroñaaka eerokapae. Ikowaeyawitakani ikemaeyenanimi okimitaka iroñaaka eeroka pikemanari. Omaanta tee iñeeyanan, tee ikemaeyanan.

Rootaki ikanteeyakinanri Jesoshi.

*Riraga Jesoshi riyotagaeyakirini riyotaanewo oetarika kantakotachari
(Mr. 4.13-20; Rk. 8.11-15)*

¹⁸ Roojatzsi ikanteeyantakinanri riraga Jesoshi:

—Iroñaaka niyotagaeyemironi oeta okantakotziri noshiyakaawentakimiri inkaaganki. ¹⁹ Arimachee nokantapiintziri paashinipaeni tsika ikanta Tajorentsi reewawenantzi, omaanta teerika ikemiro rirori, ikimiwitawo awotsi tsikarika opariyagaantapaaki apaanipaeni okithoki. Ikanta ipokapaaki konthawo rowapaakawo okithoki awotsiki, ari oshiyawori ipoki kamaari raapithatakiri rajankaneki ikenkithashiryaawitawakawo nokantziri. ²⁰⁻²¹ Rooma mapipooki opariyapaakira paashini okithoki oshiyakaawentakiri atziri kemawitawakawori noñaani ariwitanaka

owakirani ikimoshirewentanakiro. Omaanta tekiraata riyotakoperotziro kameetha noñaani opomeentsitzimotakari oetarikapaen, ikijaneentayitanakirini atziripaeni roojatzi ipakaantanaawo raapatziyawitawo noñaani. ²² Kitochemashiki opariyantapaakari paashini okithoki oshiyakaawentakiri atziri kemawitawakawori noñaani omaanta osheki ikenkithashiryaaperotakawo oetarikapaeni jeekatsiri jika kipatsiki ejatzsi riweshiryaawentashitakawo rowaagawo. Rootaki kaari ikenkithashiryaantawo nokantawitariri. Tee raapatziyana kameetha. ²³ Kipatsipatha kameethari opariyantapaakari paashinipaen okithoki oshiyakaawentakiri atziri kemaperotawakirori noñaani raaperotawakiro kameetha okaatzsi okantziri. Raapatziyaperotanakawo. Raapatziyakaanakari paashinipaen atziri oshekiperotanaki iroñaaka iyemijantzinkaritepaeni. Apanipaeni raapatziyakaakari 30 atziri, paashinipaen raapatziyakaakari 60, ejatzsi paashinipaen raapatziyakaakari 100.

Rootaki ikantakinari.

Roshiyakaaventziriri Jesoshi teriikopero ejatzsi oshiyawitawori teriiko

²⁴ Ejatzsi paashini roshiyakaawentakina riraga Jesoshi, ikantzi:

—Aritaki ikantari Tajorentsi ipinkathariwenantzi, reentsitetari atziripaen. Ikimitakari pankitzirori okithoki teriiko. Riyoshiiwitakawo ipankitakiro kameethari okithoki. ²⁵ Ikantaka tsiteniriki imaanaki, ejatzsi ratziritepaeni. Ikantaka ipokapaaki kijapaakiriri ramakiro okithoki oshiyawitawori teriiko omaanta kaari owaetawo. Ipankitapaakiniri janta rowanekinta, itsipataapaakiro teriiko. Roojatzi ryaatantanaa ithonkanakirowa ipankitanakiniri. ²⁶ Okanta oshookanaki teriiko, okithokitanaki. Ejatzsi oshookitanaka roori oshiyawitawori teriiko. Ari ojatzinkanakawo. ²⁷ Iñaawakiro ratziritepaeni oshookanaki, roojatzi ryaatashitantanakari ashitawori irinta, ikantapaakiri: “Tema otsiyakotanaki okithokipaen rooperori pipankitakiri janta powaneki. Omaanta ¿jitatkaya oshookantateetanakari oshiyawitawori teriiko?”

²⁸ Ikantawakir: “Rirotakirika pankitakirori kijanari”. Roojatzi ikantapaakiri: “¿Pikowakima niyaate iroñaaka nothokakitero oshiyawitawori teriiko?” ²⁹ Ikantanakir: “Eero. Aririka pithokawitakyaawo ari pithokakotakiro roori teriikopero”. ³⁰ Ari okaantawakaata. Otsipatawakyaawoota oshooki. Injakra aminawakiroo ojampatawakiita owiitantlyaawori. Roojatzikya nokanteeyemini: “Pithokero oshiyaaawitawori teriiko, otayaata janta paamariki. Eekiro pimpaetanakiro powiitanakiro teriikopero. Pikempoyeenawo janta nokempoyaapiintzironta”.

Rootaki roshiyakaawentakinari riraga Jesoshi.

Roshiyakaawentakinawo irira Jesoshi okithoki moshitaaja

(Mr. 4.30-32; Rk. 13.18-19)

³¹ Ejatzsi paashini roshiyakaawenteeyakinawoni riraga Jesoshi, ikantzi:

—Aritaki ikanta Tajorentsi ipinkathariwenantzi, roshiyawitakawo okithoki moshitaaja* ipankiitziri owantsiki. ³² Okaatzini okithoki naawita omaanta oshookanakirika, antawotanaki. Anaakotanakiro paashinipaen pankirentsi aritaki raampeyantayakyaawoni tsimeripaen jenokiweripaen ejatzsi ari imaaashitantakyaawo. Kimitaka iroka iroñaaka eenitatisi apaanipaeri aapatzianari ipinkathatziri Tajorentsi. Omaanta eekiro, eekiro ayotakaeri paashinipaen raapatziyari rirori roojatzi iinja ari roshekitero aapatzianari.

* **13:31** Iroka moshitaaja rootaki okithoki owaanini pankirentsi, shoochartsiri inampiki paashinijatz-itatsiri atziri.

*Roshiyakaawentakiro irira Jesoshi tapirokawori paa
(Rk. 13.20-21)*

³³ Eejatzi paashini roshiyakaawentanari, ikantzi:

—Aritaki ikantari riraga Tajorentsi reewawenantz i eekiro eekiro ryoteeri maawaeni ikowakaakiriri. Roshiyakawo tsinani owetsikiro paa. Aakiro osheki opane teriiko, eejatzi otsipataakiro eechonkiini tapirokawori eejatzi eechonkiini iñaa. Roojatzi otapirokantanarya maawaeni. ³⁴ Aritaki ikantapiintatyaa roshiyakaawentapiinteyakinirini maawaeni piyotawentakariri. Tee riyoataaperoneentziri kameetha iñaa, inta roshiyakaawentashitanari iñaa. ³⁵ Imonkaatakiro rojankinatzitakarini paerani kamanantzirorini iñaa Tajorentsi:

“Ikantzi riraga Tajorentsi: ‘Osheki noshiyakaawenteeyenirini atziripaeni nokamanteeyerini kaari riyoateeyawityaani rirori paerani, tema omanimotawitakari’”.

Oeta okantakotzi oshiyawitawori teriiko eejatzi teriikopero

³⁶ Roojatzi riwethatantanaari riraga Jesoshi piyotawentakiripaeni.

Roojatzi riyaatantanaa rirori janta pankotsiki. Naaka maawaeni riyoataanewo noyaatanakiri. Nokantziri:

—Piyotaaperetenawo poshiyakaawentakiniriri maawaeni piyotawentzimiri inkaaganki. ¿Oetaka oshiyakawori oshiyawitawori teriiko ipankiitziri teriikomashiki?

³⁷ Ikantanakina:

—Arimache nopoñaanaka naaka jenokinta, natziriperotapaaki jaka kipatsikika. Naaka kimiwitawori ipankiitziri teriiko kameethari. Naapatziyakagaeyakarini atziripaeni raapatziyari Tajorentsi. ³⁸ Rowaga owantsitsiri rootaki kantakotachari maawaeni kipatsika ajeekantarika. Rowaga teriikopero oshiyakaawentakir maawaeni reentsite Tajorentsi.

Omaanta oshiyawitawori teriiko oshiyakaawentakir oyaatziriri iwinkatharite kamaari. ³⁹ Riraga kijantatsiri pankitakirori oshiyawitawori teriiko rirotaki iwinkatharite kamaariipaeni. Rowaga owiitachari okithoki oshiyakaawentakiro kipatsi othonkaeyarika iinja, ikantakowenantyaariri Tajorentsi maawaeni atziri okaatzi rantziri. Riraga owiitzirori pankiwaerentsi okantakotziri ronampiripaeni Tajorentsi. ⁴⁰ Ñaakiro, ipiyotakaantakiro oshiyawitawori teriiko itaantyaawori. Ari okimitya iinja areetapaakya nokantakowenantyaariri atziri okaatzi rantziri.

⁴¹ Notyaanteeyirini oshekini nonampiripaeni, ipiyotantyaaririni maawaeni kaari kameethatzinkari, eejatzi maawaeni antakayiriri paashini atziri kaari kameethatssi, ⁴² roojatzi nookakaanterini janta paamarikinta kaari tsiwakanitsini. Osheki rowashironkagaeyarika janta, osheki ikemaatsityaawo paamari. ⁴³ Ikimoshiretakaaoperoteri Pawa maawaeni kameethatzinkari, rajankaneke, irirapaeni ari ishipakiryaaanaki ikimitanakyaari oorya; itsipatyaari rirori janta ipankoperokinta. Powakempitaperotawakyaaworika nokantakimirika ari paaawakiro.

Ikenkithatakotziri Jesoshi koriki imaneetziri

⁴⁴ Aritaki ikantari riraga Tajorentsi ipinkathariwenantzi, reentsitetyaarika atziripaeni. Ikenkithatakotziri shirampari ñaakiriri oshekini koriki imaneetziri kipatsikira. Osheki ikowakotakiri rootaki ikenkithashiryaantananakari: “Namananteroota kipatsi naakotantyaariri koriki”. Ityaawentakotaneeri jatanaki ipimanteeyakironi rashitayitarini ramantanakotantyaariri kipatsi ijeebakira koriki. Roojatzi ramantanakawo kipatsi. Ikenkithashiryaantananakari osheki iyorikite riraga amantanakiriorira.

Roshiyakaawentakiro Jesoshi poreryaanikitatsiri mapi

⁴⁵ Eejatzi ikantari riraga Tajorentsi reewawenantzi, reentsitetari kowatsiri raapatziyaari. Irintakya ikimitakari kowatsiri ramanantero poreryaanikitatsiri mapi kitamaari, pinaperotachari.

⁴⁶ Iñaawakiro apaani okameethaperotaki, opinaperotaka. Ikowapero-takiro, rootaki ipimanantawori maawaeni tzimimotziriri raantariri koriki. Roojatzti ithonkakirici iyorkite ramananantakawori rowaga poreryaanikitatsiri mapi kitamaari, pinaperotachari.

Ikenithatakotziro irira Jesoshi tsikarika ikanta shiryaatatsiri

⁴⁷ Rapiitakiro riraga Jesoshi roshiyakaawentakinari tsika ikantari Tajorentsi reewawenante, ikantakina:

—Aririka reewawenante riraga Tajorentsi, ari ikimitari shiryaatatsiri, rowiinkakiro ishiryaamento niyankaani inkaareki roojatzti inoshikakotakiri raaki osheki shima inashitzinkaripaeni rotetakiri pitotsikira. ⁴⁸ Ojamanitanaki aririka rieekitanaki pitotsikira roojatzti ipokanta othaphyaakiini. Riyoyaawaetapaaki kameethatatsiri rotetakiri kantziriki. Riraga kaari kameethatatsiri rookayitakirini. ⁴⁹ Aritaki okimiteeya iinja aririka nopalae jika kipatsikika notyaanterikya nonampiripaeni, ipokapaaki jika jaawikika riyoyaayitapaakirini ikaatzi kameethatzzinkari rajanganeki, omaanta riraga kaari kameethatatsi rajanganeki, rinashitapaakyaari rirori ⁵⁰ rookaeyirini janta paamarikinta kaari tsiwanikitatsini. Ari riraakoeyaani eejatzi ratsikaekitya antawaete rirori: ikemaatsiteeyawoni katsiri. ⁵¹ ¿Pikemaperotakiroma nokantakimir?

Nokanteeyakirini:

—Jee, nokemakimi.

⁵² Roojatzti ikanteeyanan:

—Aririka ikemijantena riraga iyotaantzirori Iwaperite Tajorentsi, riyotanakiro osheki. Tema iroñaka riyotziro maawaeni rojankinateet-zirini paerani, eejatzi raapatziyanarika, riyotziro owakiratatsiri niyoteeriri iroñaka. Riyotanakiro tsikarika ikantari riraga Tajorentsi reewawenantzi. Okimitaka, riyotziri koetyeemotziriri ratziritepaeni irintapaeni ashaagan-tachari kameethari, roojatzti ipantariri apaanipaeni itaworitatsiri rowaa-gawo eejatzi apaanipaeni owakiratatsiri rowaagawo, oetarika koetyeemotari. Eejatzi okimitaka iroñaka eerori, kameetha piyotagaeri paashini-paeni itakaantaworini Iwaperiteki Tajorentsi eejatzi piyoteetyaari owaki-rari niyotaakimirika iroñaka.

Ipiyanaa Jesoshi Najareeteki

(Mr. 6.1-6; Rk. 4.16-30)

⁵³ Ari okaatapaaki roshiyakaawentakinari riraga Jesoshi, thonkapaaka, roojatzti riyaatantanaa.

⁵⁴ Iroñaka ipiyanaa riraga Jesoshi janta iipatsiteki ipoñakanta. Noy-aateeyanakirini naaka. Roojatzti ryotaantapaakari janta pankotsiki ipiyotantapiintarira joriiyopaeni. Ari rotsikanateeyanakarini maawaeni kemawkiriri, ikanteeyanakini:

—¿Itakacya iyotaakiriri riyothanitantakari? ¿Ninkakya matakaakiririka itajonkantzi? ⁵⁵ Tema rirotaki itomini riraga wetsikirori jeekamentotsipaeni. Paminerotya rinirowa Mariyya. Pamineritya rirentzipaeni Jantyaako, Josee, Shimo eejatzi Joorashi. ⁵⁶ Eejatzi akaateeyakironi rit-siropaeni jika. ¿Tsika opoñaka maawaeni iroka riyothanitantari?

⁵⁷ Rootaki itheenkantakariri riraga Jesoshi, ikantzimatzi, rootaki ikanantakariri irira:

—Atziripaen iñeeririka paashinijatzi kamanantzirori Iwaperite Tajorentsi kameetha raapatziyaperotawakaari. Riroma rirorika jeekariko inampiki ikamanantawityaworika Iwaperite Tajorentsi eero ikowaperotzi raapatziyaperotaari, inta itheenkiri rirori.

⁵⁸ Osheki itheenkayakirini ikaateeyini ijeki. Tee raapatziyaperoeayarini rootaki kaari osheki itajonkananta janta.

14

Riraga Erooreshi rowamaakaantakiri Jowa. Roojatzi iitakaawitakari Jesoshi rirotaki Jowani piriintachari
(Mr. 6.14-29; Rk. 3.19-20; 9.7-9)

¹ Apaani kitejiri ikemakotawakiri Jesoshi riraga Erooreshi. Tema irira rirotaki pinkathariwentziriri maawaeni karireeyajatzi iroñaaka. ² Ikemakotantawakariri, ikanteeyanakirini ronampiripaen: “Aamaaka rirotaki Jesoshitsirsri riraga Jowa kaawoshitakotziriri Tajorentsi. Nowamaakaantawitakari omaanta aamaaka piriintarika añagae eejatzi, rootaki imatantakawori itajonkantapae iroñaaka”.

³⁻⁴ Chapinki riraga Erooreshi raapithatakiri rirentzi Jiripi iina, oetachari Eroriyashi. Roojatzi ikanantakari riraga Jowa kaawoshitakontatsrisri Tajorentsi:

—Tee okameethatzi okaatzi pantakiri. Rootaki raakaanantanakariri Jowa romonkyakaantakiri omonkyagamentotsiki. Roojatzi roojotakaantakiri karenathaki. ⁵ Chapinki ikowawitaka rowamaakaanterimi, omaanta ithaawantakari atziripaen. Osheki raapatziyeyakarini Jowa, tema ikenkithashiryakotziri rirotaki kamanantzirori iñaani Tajorentsi rootaki ikenkithashiryaaantakanari riraga Erooreshi: “Aririka nowamaakaantakiri ari ikijkawentakaryaari atziripaen”. Rootaki ithaawantakari rowamaakaanterimi chapinki. ⁶ Roojatzi omonkaatantaka kitejitsatsiri paeran ikoñaatantapaakari riraga Erooreshi. Ipiyotawentari oshekini inampijatzi ikimoshirewentziri, ishinkitawaeta. Eejatzi okantaka opirantakotziri ishinto Eroriyashi, osheki iñaawenaperotakawo, ⁷ rootaki ikanantakawori:

—Oetarika pikowakotenari, aritaki nopakimiro. Riyotzi Tajorentsi, eero namatawitzimi.

Roojatzi iyaatashitantanakawori ojampitantawori iniro. ⁸ Okantawakiro ishinto:

—Pikanteri rowamaakaanteri riraga Jowa.

Roojatzi okanantakariri roori:

—Nokowaki powamaakaanteri riraga Jowa, pipakotenawo piratoki ii toni, iyotantyaari nana kyaaryo kamaperotaki.

⁹ Roojatzi rowashiretantanaka rirori tee ikowawita rowamaakaanterimi omaanta inkaaganki ikemaeyawakirini maawaeni atziripaen okaatzi ikantakiri. Teksti ikantaneeya roepiyaneero. ¹⁰ Rootaki ithatyakaanantanakariri ii toki riraga Jowa. ¹¹ Roojatzi ramanteetakawo ii toni thatyaaka. Aawakiro, roojatzi aantanakanawori iniro. ¹² Ikantaka riraga riyotaanewoni roojatzi ipokantapaaka raanakiro iwatha ikitatakiro. Roojatzi iyaatashitantanakari riraga Jesoshi ikamantapaakiri:

—Rowamagaetakiriraka Jova.

¹³ Ikemantawakari rirori kamaki irira, roojatzi riyaatantanaka apaniroeni janta tekatsinta atziri. Itsipateeyanakinani.

Rowakaakari Jesoshi 5000 shirampari
(Mr. 6.30-44; Rk. 9.10-17; Jowa 6.1-14)

Itenteeyanakinani, rootaki nokinantakoeyanakarini pitotsi. Omaanta ikemakotakiri oshekini atziri, ipoñeeyanakanai nampitsikipaeni, ikinanaki onomateeteeki iñaa, royaatakina.¹⁴ Roojatzi naatakoeyantapaakan, notonkagaeyanakin kipatsiki. Eejatzi noñaapaakiri oshekini oyaakiriri Jesoshi. Osheki retakoshiryaapaakari irira maawaen, retsiyatakoeyakirini mantsiyatinkaripaeni.¹⁵ Tsiteniityaaki oorya. Nokaateeyakirini paashini riyoatanewo Jesoshi, nokanteeyawitakarini:

—Pamine, tekatsi atziri ipanko jaka, rooteentsi otsitenite. Potyaanteri atziripaeni riyaateeyini pankotsikipaeni ramananteeta royaari.

¹⁶ Ikantawakina:

—Eero. ¿litala ratsipetashitanyaari riyaate? Piperi eerori royaari.

¹⁷ Nokantanakiri:

—O, tekatsi noperiri. Paminetya sha, tee oshekitzi paa okaatzia apawakooni. Eejatzi mereto ikaatzi apite.

¹⁸ Ikantawakina:

—Pamakinawo maawaen, eejatzi mereto.

Roojatzi nopantakari.¹⁹ Ari ikanteeyanakirini maawaen:

—Píjeeki jaawiki katawomashiki.

Jeekaeyanakin. Roojatzi raantakawo paa eejatzi mereto. Raminanaki jenokinta, ikantanakiri Ashitariri:

—Ariwee, Pawa, pipakinawo iroka nowanawo noyaari.

Ari ikagaakiro paapaeni, shimapaaeni, ipaeyakinarini maawaen. Eekiro nopenakiri paashinipaeni atziri. Roojatzi nowaeyakawoni maawaen.

²⁰ Ari rowaeyakawoni maawaen piyotawentakaripaeni, reshitankiro owanawontsi. Roojatzi nopyotayiteeroni tzimagaantapaentsiri niyeekitakiro kantzirikira okaatzi 12.²¹ Naamaashita ikaateeyakini riraga owaeyakaworini shirampari 5.000, eejatzi tsinanipaeni eejatzi eentsipaeni.

Irira Jesoshi ranashaatapaawo inkaareki, tee itsitsiyi

(Mr. 6.45-52; Jowa 6.15-21)

²² Roojatzi rotyaanteeyakinani riraga Jesoshi, ikanteeyakinani:

—Niyotaanewopaeni, potetanakya pitotsiki, peewatena intatsikeronta.

Roojatzi eejatzi rotyaantakiri maawaen piyotawentakariri, ikantakiri rirori:

—Piyaaterapa janta pipankokipaeni.

—Jee, ari.

²³ Roojatzi itonkaantanaka tonkaariki apaniroeni, ikenkithatakaeri Ashitariri. Otsitenitantanaka, eeniro ijeki apaniroeni janta.

²⁴ Nokanteeyanakanai nokinakoeyanakin niyanksyaani inkaareki. Roojatzi antawo omaetonkaaki, eejatzi oepiyapiyatakotakina antawo tampyaa.

²⁵ Okantaka rootzimateentsi okitejite, noñagaatziiri Jesoshi ranashaatapaawo iñaa. Tee itsitsiyi. Eejatzi tee niyotawaeri.²⁶ Tema rominthaagapaakina, nokaemaeyantanakanai:

—¡Eeeee! ¡Kaakitaki peyariwee!

Osheki nothaawantaperotawakari.²⁷ Omaanta ikanteeyapaakinani:

—Naakakya pokatsiri, piweshiryaawentawakina, eero pithaawan-tashitana.

²⁸ Roojatzi ikanantanakari Peetero:

—Eerokarika Nowinkatharite pikaelmena nanashaatyata naari iñaki, niyaatashitemiita pikatziyakaga eerori.

²⁹ Ari ikantakiri:

—Pipokanaki.

Roojatzi imitaanaki inkaareki, ranashaatantawitanakawo, ryaatemi janta Jesoshiki. ³⁰ Omaanta roojatzi ikenkithashiryaanakiro tampyaa, ee-jatzi ithaawanaki, itsitsiyimawitanaka. Ikaemanaki:

—Nowinkatharite, paawaena.

³¹ Roojatzi rakotashitawakiri, rakathawakotawaeri. Ikantanakiri:

—Eechonkiini paapatziyana. ¿litaka kaari pameentaperotantana?

³² Roojatzi rotetantapaa pitotsiki, notsipateeyanaarini, roojatzi kaatanee tampyaa. ³³ Osheki nopinkatheeyanakirini, nokanteeyanakirini:

—Kyaaryootaki, eeroka Itomi Tajorentsipero.

Retsiyatakotakaakiri maawaeni mantsiyatzinkari janta

(Mr. 6.53-56)

³⁴ Roojatzi nomontyaanteeyanaawoni, naatakoeyapaani intatsikeronta. Tema nareeteeyapaakan janta Jenejareeteki. ³⁵ Ikantaka jeekayitatsirini riyoaweraira areetapaa Jesoshi roojatzi ikamantawakaanteeyanakan maawaeni ikaateeyinira ijeekaeyini. Ramaeyakirini maawaeni mantsiyatzinkaripaeni. ³⁶ Royiikiiyakirini ipampitziteeyakirini imaatha. Ikantaka roojatzi ipampitziteeyantakarini imaatha opatzyaakikira. Etsiyatakoyaneeni maawaeni okaatzi owawijaakotzitakiriri imaatha.

15

Owaariperotzirori ashire

(Mr. 7.1-23)

¹ Paashini kitejiri ipokashitapaakiri riraga Jesoshi apaanipaeni warijeyo ee-jatzi iyotaantzirori Iwaperite Tajorents. Ipoñeeyakan Jerojareeki, ikantapakiri:

² —Tema aakaeyakini joriiyo. Ameteeyakawoni rootzimateentsirika oyaa itakyaawo akiwero ako, roojatzi owantanakya. Tema tee akimitari kaari yotziri Tajorents rootaki ryotaakaerini itakaantaworini paerani. ¿litakakya kaari imonkaatantawo piyotaanewopaeni? Tee okameethatzi rowashitya, tekiraata ikiwawakota.

³ Ikantawakiri:

—¿litakakya kaari pimonkaatantawo eeroripaeni ikaminaawitzimirira Tajorents? Osheki pimonkaatashitakawo ikantashitayitarini itakaantaworinipaeni rootaki kaari paapatziyaperotantawo ikaminaawitzimirira.

⁴ Tema ikantziri Moeseeshini: “Pipinkathateri piri eejatzi piniro”. Eejatzi ikantzi: “Riraga Tajorents ikantakotziri akawaantetziriri ashitariri eejatzi riniro: ‘Okameethatzi rowamagaeteri’ ”. ⁵ Omaanta eerokapaeni pikanteeyakirini atziri: “Pimatero pikanteri ashitzimiripaeni: ‘Eero nomatziro namitakotzimi, nopemi koriki tzimimowitanarika namitakotan-temirimi, irika nashi koriki: tema nokashiyakaatziri Tajorents noperi’ ”.

⁶ Ñaakiro, pantashiteeyakawoni eerori pikowakaeyakarini, tee panteeeyironi ikowawitari rirori. Pookaeyanakironi Iwaperite Tajorents panantyaawori okimitaka ranteeeyakirini picchariniipaeni paerani. Tee pishinetziri atziri ramitakotziri ashitariri eejatzi riniro. ⁷ ¡Amatawitantaniripaeni! Poshiyakaawaetashita paapatziyakari rirori, omaanta tee paapatziyari. Kyaaryo ikenkithatakotziteeyakimirini paerani Isseeyashi. Iroka rojankinatzitakarini:

⁸ Ikantzi Tajorents: “Iraka atzirika ikantashiteeyakinan ipaanteki: ‘Nopinkathatzimi’, omaanta rajankanekira tee raapatziyaperotana, okimitzimotakina inteenia ijeekaeyakini.

⁹ Ratsipetashitakawo ipiyotawentashitana, tee riyotaantziro nokaminaanttariri, inta riyotaantashitawo ikantayitzirini ichariniitenipaeni paerani".

¹⁰ Roojatzi ikaemantakari riraga Jesoshi piyotawentariripaeni. Ikaem-anakiri ikanteeyawakirini:

—Pikemaperoeyenani, piyotawakiro nokamantemiri: ¹¹ okaatzi powayitarini, tee iñaakotzimiro Tajorentsi owaariperotero pishire. Omaantakya okaatzi piñaawaetziri kaariperotatsiri eejatzi okaatzi pikenkithashiryayatarini rootaki owaariperotzirori pishire.

¹² Nokantanaka niyaatashiiyakirini riraga Jesoshi, naakapaeni riyotaanewo, nokanteeyapaakirini:

—¿Piyotakima eeroka ikijantakimiro warijeeyopaeni pikantakiriri inkaaganki?

¹³ Rakanakina:

—Okimitaka atziri inothokero maawaeni kaari ipankitzi, arimache iinja rowashironkayeri riraga Pawa jenokinta maawaeni atziri kaari reentsite-tari. ¹⁴ Eero pikenkithashiryakotapiintawo ikantziri riroripaeni. Tee ikoyi riyoteri ikowakiri rirori. Ikimitakari kaari kokichaatatsi. Noshiyakaawen-temiri: rakathateririka kaari kokichaatatsi paashini kaari kokichaatatsi, eenitatsirika omoo janta, tema aritaki ipariyeeyakini irira apite omooki. Okimiwitaka iroka, riraga warijeeyopaeni riyotaakiri paashini atziri kim-itariri kaari kokichaatatsi. Tema tee ikoyi riyoteri oetarika ikowakaakiriri Tajorentsi. Tema kimitaka kaari kokichaatatsi, tee riyotziri rirori. Rootaki iinja irira rowashironkaantyaariri.

¹⁵ Ikantziri riraga Peetero:

—Tee nokemimi. Piyoteenawo oetaka okantaperotziri: "Oetarika oy-aari, tekatsi okantero owaariperotero ashire. Omaanta oetarika ak-enkithashiryaaari, rootaki owaariperoteeni".

¹⁶ Ikantawakiri:

—Eejatzi eeroka, ¿tema pikemaperotana? ¹⁷ ¿Tema piyotzi oetarika oyaari iyaatzi asheetoki roojatzi ashitaneeuyaawo? Tekatsi okantziro ashire. ¹⁸ Maawaeni pikenkithashiryaaari opoña pajankaneki rootaki piñaawaetantawori. Piñaawaeterorika kaari kameethatatsi tema rootaki owaariperotzirori pishire. Omaanta owaariperotziro pishire okaatzi piñaawaetayitzirini pipaanteki kaari kameethatatsi eejatzi okaatzi pikenkithashiryayitarini. Rooma pajankaneki tee pikameethatatsi.

¹⁹ Rooma piyotziro tee pikameethatzirika pajankaneki ari pantziro kaari kameethatatsiri, powamaantzi, pishirontzimotawo tsinani kaari piña, paapithatziri paashini atziri iina, maenari piñaathatawo tsinani kaari payi, pikoshitzu, pitheeya, pikantzimatzi paashini atziri. ²⁰ Rootaki eeroka powaariperotantawori. Omaanta teerika pikiwawakota rootentsirika poya, tekatsi okantero pishire. Eero ikijantzimiro Tajorentsi.

²¹ Roojatzi jatanaki rirori Jesoshi, naaka, maawaeni.

Rowawijaakotziro Jesoshi ishinto kanaanajato (Mr. 7.24-30)

Riyaatakanakina riraga Jesoshi janta Tziiroki eejatzi Shirooki. ²² Opokashitapaakiri janta kanaanajato, rowaga kaari joriyyotatsi. Okantapaakiri:

—Nowinkatharite, rooma eeroka ichariniiteni jewatatsirini riraga Iraviri. Nokowaki pineshironkatena, eejatzi nishintyo pineshironkatero. Ikyaatapaakawo kamaari, shiyashiyataka.

²³ Omaanta imaeitanaki, tee rakawakiro. Nokantawitari naari:

—Pikantero iyaateeta, atama oñaashirenkakae. Tema osheki okaemakae-mataki.

²⁴ Roojatzi ikantzi:

—Rootaki rotyaanantakinari Pawa, apatziro nowawijaakoteri nojoriyy-otzinkaritepaeni. Rirotaki kimitariri owishapaeni kaari ishenteetzi.

²⁵ Omaanta otziwerowashitapaakari, apiitakiri okantakiri:

—Nowinkatharite, pineshironkatena.

²⁶ Ikantawakiro, roshiyakaawentakiro:

—Tee okameethatzzi aapithateri atomi owanawontsi apantyaariri ot-sitzite. Eeroka kaari joriyyotsatsi. ¿litaka noneshironkatantemiri?

²⁷ Tee okantzimoneentanakyaawo ikantawitakaworira, inta okantziri:

—Kyaaryo, Nowinkatharite, kameetha iroka pikantanarika. Omaanta, riraga otsitzite rowawo opetokeeriki pariyayitatsirini jaawiki royaarika ashitariri rotsitzite.

²⁸ Ikantawakiro:

—Tsinani, kameetha paapatziyaperotakina. Aritaki nomatakimiro pikowakotakinarika.

Aripaete awijakotanee ishinto. ²⁹ Roojatzi riyaatantanaa riraga Jesoshi, eejatzi maawaeni nokaateeyaneerini.

Retsiyatakotakiri irira Jesoshi oshekini mantsiyatzinkari

(Mr. 7.31-37)

Ikinakaanakina riraga Jesoshi janta othapyaakiini inkaare janta Karireeyaki. Itonkaakaanakina tonkaariki, ijeekakaapaakina janta.

³⁰ Ipokashiteeyakirini osheki atziri ramakiri osheki mantsiyari: aashetawitachari, kamampowaakiwitachari, majontziwitacharipaeni, thatyapontowitacharipaeni, eejatzi paashinipaeni mantsiyawitachari roojeekaeyakirini iitzikeroki rirori. Retsiyatakaoeyakirini maawaeni.

³¹ Roojatzi rotsikanatantanakari atziri iñaakirira aashetawitacharini anashitaa kameetha, riraga kaari kokichaawitachani kokichaate, majontziwitachari ñawaetanee, kaari shewawitachani rako shewatanaa eejatzi paashinipaeni mantsiyari etsiyatakotee. Ari rotsikanateeyakarini tee riyotzi oeta ikanteeyanakirini roojatzi iñaaperoeyantanakarini riraga Tajorentsi. Ikanteeyanakini:

—Tema ikameethaperotaki Tajorentsi riraga pinkathariwentziriri maawaeni joriyyopaeni.

Rowakaakari Jesoshi 4000 atziri

(Mr. 8.1-10)

³² Roojatzi ikaemaeyantakinani riraga Jesoshi naakapaeni maawaeni riyotaanewo. Ikanteeyakinani:

—Osheki netakoeyakarini maawaeni piyotawentanari, tema okaataki kitejiri 3 itsipateeyakinani jaka. Tektsi roya. Tasheyamoonthataki. Tee nokoyi notyaantashiteeyaaari inampiki tekirarika rowa. Rooma notyaantashiteeyaririka, ari ishipetatanaki awotsiki. Eero imatziro rareeta inampiki.

³³ Nokantapaakiri:

—Pamine, tektsi atziri ipanko jaka. ¿Tsika ayenirika owanawontsi aperriri? Oshekini ikaateeyiniroña.

³⁴ Ikantawakina:

—¿Tsika okaatzika owanawontsi jeekaentsiri?

Nokantanakiri:

—Okaataki 7 paa, eejatzi mereto apaanipaeni.

³⁵ Roojatzi ikanantawakariri riraga piyotawentariri:

—Pijeekaeyini maawaeni katawomashiki.

³⁶ Jeekaeyanakini. Roojatzi raantakawo paa eejatzi mereto. Ikantziri ashitariri:

—Ariwee Pawa, eenitatsi noyaari.

Roojatzi ikagaantakawo paa eejatzi mereto. Ipakinawo eejatzi maawaeni riyotaanewo. Naawakiro, noshirinkakiniri rirori piyotawentakariripaeni. Itajonkakiniri oshekitanaki paa, roshekitanaki eejatzi mereto. ³⁷ Nowaeyakawoni, kemaeyanakinani maawaeni. Roojatzi nopyiyoteeyakironi tzimagaantapaentsiri niyekiteero kantzirkira, okaatzi 7. ³⁸ Tee ayoperotzi tsika ikaatzi maawaeni owaenchari. Owaka osheki tsinani eejatzi eentsipaeni. Omaanta aamaashitya 4.000 shirampari owaenchari. ³⁹ Roojatzi rotyaanantaari, ikantakiri:

—Piyaateerakya iroñaaka pipankokipaeni.

Roojatzi ryaatantanaa. Noteteeyantanakanani pitotsiki, montyaakotanakina janta Makataaki.

16

*Ikowawitaka warijeeypaeni iñeerimi irira Jesoshi itajonkantemi
(Mr. 8.11-13; Rk. 12.54-56)*

¹ Ikanta ipokashiteeyapaakirini warijeeypaeni eejatzi saroseeyopaeni ikowaeyawitakanri rantakaantyaaririmii riraga Jesoshi kaari kameethatatsi ikijantanaakyaaririmii. Ikantawitapaakari:

—Nokowaki noñeemimi pitajonkante, niyotantanakyaari kyaaryo pipoñaaka jenokinta.

² Rakanakiri rirori:

—Pamine, aririka itsiteniityaanaki oorya piñaakirorika okiraaway-eetyaanaki, tema pikantanaki: “Paminetya jenoki kiraawayeetyaaki. Eero opariyi inkani”. ³ Omaanta, amaetyaakakya piñaakirorika aaninkaki, ari pikantanaki: “Rooteentsi opariye inkani. Paminetya aaninkakinta”. Amatawitanitaniri, piyotakoeeyakironi opariyerika inkani. Omaanta tee piyotakotzimaetawo maawaeni okaatzi piñeeyawitakarini jaka kipatsikika.

⁴ Tee pikameethateeyini, osheki pitheenakiri riraga Tajorentsi. Iroka tee okameethatzi. Pikowawita piñeena notajonkante, omaanta eero noñaayimiro. Apatziro iinja, piñaakironi roshiyakaawentakinarini paeran Jonaashini.

Rootaki ikantakiriri riraga Jesoshi, roojatzi ryaatantanaa.

*Roshiyacaantziniri Jesoshi tapiyakaawori paa
(Mr. 8.14-21)*

⁵ Rareetakaayapaakinani intatsikeronta inkaare irira. Tema nopeyakotanakiro paa: tee naanakiro. ⁶ Ikanteeyakinani rirori:

—Paamayaawowa rowaga tapiyakaawori paa rashii warijeeypaeni eejatzi rashii saroseeyopaeni.

⁷ Roojatzi nokantawakaeyantanakani:

—¿Itaka ikanantakaeri: “Paamayaawowa tapiyakaawori paa rashii warijeeypaeni eejatzi rashii saroseeyopaeni”? Rooma ikanantakaeri teera amaneero paa. Aamashitya rootakirika ikanantakaeri.

⁸ Ikantaka riyotakotakina oetarika nokantawakaakari, rootaki ikanantanakinari:

—¿Tekirama tameentaperotana? ¿Itaka pikanantari: “Tektsi paa”?

⁹ ¿Tekirama piyotana? ¿Tema pikenkithashiryawakiro chapinki okaatakotawitakagaanki paa apawakooni, omaanta ikemaeyakawoni

osheki atziri rowantakawori? Ikaatakiranki 5.000 shirampari okaatzi tzimagaantapaentsiri 12 kantziriki yeekitapaatsiri.

—Jee. Kyaaryo.

¹⁰ ¿Tema pikenkithashiryaaawakiro kaatatsiranki paa 7, eejatzi nowakaakari 4.000 shirampari omaanta ikemaeyakawoni maawaenii eejatzi tzimagaantapaentsiri poteteero kantziriki okaatzi yeekitatsiri 7?

—Kyaaritaamakya.

¹¹ Ikantanakina:

—¿litaka kaari piyotantawakawo nokanantawitakimirri: “Paamayawowa tapyakaawori paa rashii riraga warijeyopaeni eejatzi riraga saroseeyopaeni? Tee ro nokantakoperote rowaga paa pipeyakotanakirri inkaaganki”.

¹² Roojatzi niyotakotantakawo oeta okantakotziri ikenkithatakotakirri tee ro ikenkithatakoperotzi tapyakawori paa omaanta ikenkithatakotziri maawaenii riyotantayitzirini warijeyopaeni eejatzi saroseeyopaeni. Tema riyotaashitakari kaari rooperotatsiri. Tee ikoyi riraga Jesoshi ramatawitan-tenawo riroripaenii okaatzi riyotaantayitzirini.

Peetero ikantziri riraga Jesoshi: “Eeroka Owawijaakotantatsini”

(*Mr. 8.27-30; Rk. 9.18-21*)

¹³ Roojatzi niyateeyantanakanai intatsikeronta Joriraani paashiniki Sesareeyaa rowaga nampitsi riwetsikakaantapaakiri Jiripi riraga pinkathari. Ari nokinakitzi janta. Roojatzi ikanteeyananakinani riraga Jesoshi:

—Nopoñaaka naaka jenokinta natziriperotapaaki jáka jaawikika. ¿Oetaka ikenkithashiryaaakoeyanarini naaka atziripaeni? ¿Tsikama iitakinaka naaka?

¹⁴ Nokantawakiri:

—Ikantzi apaanipaeni: “Jesoshi rirotaki Jowani, riraga kaawoshitakowitariri Tajorentsi, piriintaa”. Ikantzi paashinipaeni: “Irira rirotaki Iriiyashini, riraga kamanantzirorini iñaani Tajorentsi, añaagaatsiri”. Ikantziri paashinipaeni: “Jesoshi rirotaki Jeremiiyashini, añaagaatsiri”. Eejatzi paashinipaeni ikantzi: “Rirotaki paashini kamanantzirorini iñaani Tajorentsi, piriintaachari”.

¹⁵ Roojatzi ikanteeyantanakinani:

—Eerokapaeni, ¿oetaka pikenkithashiryaaakoeyanarini naaka?

¹⁶ Riraga Shimo, iiteetziri eejatzi Peetero ikantawakiri:

—Eerokataki riraga Rotyaantanewo Tajorentsi naamaakari. Eeroka Itomi Tajorentsi, riraga Anaaperotatsiri.

¹⁷ Ikantziri:

—Piweshiryaaawaetya, Shimo itomi Jonaashi. Riyotaakimiro iroka riraga Tajorentsi. Tee riro yoteemironi atziri. ¹⁸ Noetzimi Peetero, tema okantziri piwaero apaanteki aari: mapi. Tema paapatziyana naaka riraga Rotyaantanewo Tajorentsi. Rootaki nokowakaantakimirri piyoteeri atziri iroka niyotagaeyakimirri eerori. Paapatziyakaakari osheki atziri. Rowashironkaawitakimirrika iwinkatharite maawaenii kamaari omaanta eero imatziro ranaakotemi. ¹⁹ Niyoteemi oetarika ranteeyerini atziri riyaatanteeyaaari Tajorentsikinta jenokinta. Eerorika paapatziyakagaeyaarinii atziri jika kipatsikika, eero riyaatzi jenokinta; omaanta maawaenii atziri paapatziyakagaeyakinarini rirotaki jeekaeyatsini iinja janta jenokinta. ²⁰ Roojatzi ikanteeyantanakinani:

—Eerowa pathawayitawo pikamanantawaetzi, pikante: “Jesoshi rirotaki Rotyaantanewo Tajorentsi, riraga Owawijaakotantatsini”.

Irira Jesoshi ikamantzitakari ikame

(*Mr. 8.31-9.1; Rk. 9.22-27*)

²¹ Aripaete ritanakawo ikamanteeyananani ikame. Ikanteeyananani:

—Rooteentsi niyaate janta Jerojareeki. Osheki rowashironkayena janta riraga aataperoteenchari, riraga jewawentayitzirini ñaanakowenantatsiri Tajorentsí, eejatzí riraga iyotaantayitzirorini Iwaperite Tajorentsí, maawaeni. Aritaki okantyaari rowamagaetená, omaanta okaate kitejiri 3, ari nōpīriintanee nañagae.

²² Tee inimotziri Peetero okaatzi ikantakiriri. Rootaki raantanakariri eekitziroeni jaga ikantapaakiri:

—Nowinkatharite, ¡tee okameethatzi pikantakirika! ¡Eero powashironka! ¡Eero pikami!

²³ Roojatzi ipithokashitantanakari riori, ikantanakiri:

—¿Litaka pikanantakari? Pikimitakari Jatanaashi, riraga iwinkatharite kamaarpaeni. ¿Litaka pookakaantanawori? Pikantakirika pikenkithashiryaashitakawo ikenkithashiryaaari atziri; tee piyotziro ikowakaakinari Tajorentsí. Eero pookakaanawo ikowakaakinari Pawa. Nomonkaateniriita.

²⁴ Roojatzi ikanteeyananani:

—Pikowaperotzirika paapatziyaperotena, okameethatzi pikyaary-owentenawo oetarika nokowakaakinimi naari, eero pantashitawo pikowakaari eerori. Pipomeentsiwentena: aririka rowashironkaawitemi, omaanta eekiro piyaatanakitye paapatziyaperotanakina. Tema iroka kimitaka pinatanakitziilo piyoroshite. ²⁵ Riraga kowawitachari ikaminthayaami ari rowashironkaantyaari iinja Tajorentsí, omaanta riraga kemaatsitawentenani, iñeenaroña janta Tajorentsikinta. ²⁶ Omawitya pipiyotaperotawityaaworika osheki owaagawontsi jika kipatsikika, omaanta pipeyakotakirika Tajorentsí, eero piyatzi jenokinta ijekinta riori. Tema patsipetashiteeyawitakawoni maawaeni pashiteeyawitakarini. Ñaakiro, tektsi pikantya pipinateri Tajorentsí ijekakaantemiri janta inampikinta. ²⁷ Nopoñaaka naari jenokinta, nokofaatapaaki kipatsikika. Eejatzí niyaatawitaaty jenokinta. Tema eejatzí nōpiyaaite iinja jika, notsipatapaakyaaari nonampiripaeni, nōpinkathariperotapaaki, nokimitapaakyaaari Ashitanari. Roojatzi nokantakowenatapaakyaaari maawaeni atziri okaatzi rantayitzirini. ²⁸ Kyaaryo, iroka nokantzimirika, eenitatsi apaanipaeni iroñaaka pikaateeyakinika jika, eerotzitarika pikami, ari piñaawaena nōpinkathariperotapaaki.

Rootaki ikantakinari Jesoshi.

17

Ishipakiriimotakiri Jesoshi 3 ryotaanewo

(Mr. 9.2-13; Rk. 9.28-36)

¹ Ikanta itsipatakina naaka maawaeni ryotaanewo, nomaaki 6.

Roojatzi rookanakina, raanakiri apatziro Peetero, Jantyaako eejatzí Jowa, riraga rirentzi Jantyaako, raanakiri janta antawoki tonkaari. ² Roojatzi ishipakiriimotantanakari. Iñaawakiri ishipakiryaaapootanaki ikimitanakari oorya, eejatzí iithaari okitamaaperotanakiroña. ³ Romapokapaakiria Moe-seeshi, eejatzí Iriiyashi, rirotaki kamanantzirorini iñaani Tajorentsí paerani. Ikenkithatakapaakiria Jesoshi. ⁴ Roojatzi riraga Peetero, ikantziri:

—Nowinkatharite, kameethatka apokaeyakinika jika noñaantakimiri. Pikowakirika, niwetsikemi pankoshintsi 3: apaani pashi, apaani rashii Moe-seeshi, eejatzí paashini rashii Iriiyashi.

⁵ Eenirowa iñaaawaetzi omapokapaaka menkori, otzikaapaakiri maawaeni, osheki oshipakiryaappaaki roori. Ari ijeekaki Tajorentsi menkoriki iñaawaetanaki, ikantzi:

—Irika rirotaki notyomi nonintaperotanewo, osheki niweshiryaaawentaperotakari. Pikemijanteri.

⁶ Ikemantawakaworira riraga riyotaanewopaeni ikantziri rirori, ithaawantanakari osheki, itankimotapithatanakari. ⁷ Omaanta ipokashitapaakiri Jesoshi, ipampitapaakiri. Ikanteeeyakirini:

—Pikatziyanee, eero pithaawantari.

⁸ Roojatzi raminawitanaa tekatsitanee, apaniroeni Jesoshi. ⁹ Roojatzi roerinkantanaa. Ari niyanki awotsi ikantakiri:

—Ererwa pikamantakotzitana piñaakinaka iroñaaka. Omaanta naaka riraga atziriperotapaentsiri nokamawitakya arika ejatzti nañagae, aripaeterakya pikamanteeyanakirini paashinipaeni atziri okaatzika piñaawakiri iroñaaka.

¹⁰ Roojatzi ikanteeeyantakarini riroripaeni:

—Riraga iyotaantzirori Iwaperite Tajorentsi ikanteeyini: “Riotaki itapaakyaaawoni ipoke Iriiyashini, eentsikiro rimpetaapaki ipokapaaki rirori Rotyaantanewō Tajorentsi”. ¿Itakakya ikanantawaetakari iroka?

¹¹ Rakanakiri:

—Kyaaryo okaatzi ikantakirini: “Riotaki itapaakyaaawoni ipoke riraga Iriiyashi, rowameethateeyapaakirini maawaeni”. ¹² Omaanta nokaman temi: kyaaryo ipokapaentzi Iriiyashini omaanta tee riyotawakiri atziripaeni, osheki rowashironkashiteeyawakarini. Ejatzti ikimitawakina naari inja, osheki rowashironkaeyawakinani.

¹³ Roojatzi niyotakoperoeyantanakawoni ikenkithatakotaziiri Jowani, riraga kaawoshitakotziriri Tajorentsi.

Rowawijaakotziri riraga Jesoshi ewonkiri kokikokitatsiri (Mr. 9.14-29; Rk. 9.37-43)

¹⁴ Roojatzi rareeteeyantapaanani rookaeyanakinanira chapinki. Osheki atziri oyaakiriri. Roojatzi ipokashitapaakiri Jesoshi apaani shirampari. Rotziwerowashitapaakari, ikantapaakiri:

¹⁵ —Nowinkatharite, pineshironkateri notyomi. Osheki ikamanapiintzi, osheki rashironkaapiinta. Ipariyapiintzi itaapiinta paamarikira, pokiree; ejatzti ipiinkaatapiintzi iñaakira, chomoog. ¹⁶ Naawitanakanari piyotaanewo, nokantawitapaakari: “Powawijaakotenari notyomi”, omaanta tee imatziri.

¹⁷ Rakanakiri rirori Jesoshi:

—¡Atziri theenkantatsiri! ¿Tekiraatama piyotzi? ¿Tsika okaateka notsi patemi piyotantyaari imatakaantemirori Tajorentsi petsiyatakotante? Osheki pitheenakakina.

Roojatzi ikantawakiri ashitariri:

—Pamakinari jaka pitomi.

¹⁸ Roojatzi ikantakiri Jesoshi kamaari:

—Eero poñaashirenkiri rirori, inta pookaneeri. Roojatzi rawijakotantanaa riraga eentsi. ¹⁹ Roojatzi nojampitantapaakari:

—¿Itakakya kaari nomatantawo nowawijaakoteri naari?

²⁰ Ikanteeyanakinani:

—Ñaakiro, okantakaakimira tee paapatziyaperotawo okaatzi nokantawitakimiri rootaki kaari pimatantawo powawijaakoteri. Kyaaryo, aririkami paapatziyaperotakyaawo nokantzimiri, tema aritaki pimatakiro tonkaari pikanterorika: “Pishirinke janta”. Roojatzi oshirinkantanayka

janta. Ņaakiro, tekatsi pomeentsitzimotemini tameentaperotyaaworika nokantzimiri.²¹ Pookantyaariri kamaari kimitakaaririka aakiriri eentsika okameethatzi pityaawo pamaneri osheki Tajorentsii ejatzti pitzitakotyari irira.

Roojatzti itharyaanaka rirori Jesoshi, itsipatanakina naaka maawaeni riyoataanewo.

*Rapiiteeniri ejatzti Jesoshi ikanteeri ikame
(Mr. 9.30-32; Rk. 9.43-45)*

²²⁻²³ Apaani kitejiri janta Karireeyaki, rapiitaana riraga Jesoshi ikanteeyaanani naaka maawaeni riyoataanewo, ikantzi:

—Nopoñaanaka naari janta jenokinta natziriperotapaaki jaka. Rooteentsi ragaeten, rowamagaeten, naari. Okaate kitejiri 3 ipiriintaneena Pawa nañagae.

Nokemantawakari, nowashireeyanakan. Roojatzti notharyaanteeyanakan.

Ipinatakiro Jesoshi riwetsikantayitaworini Tajorentsipanko

²⁴ Roojatzti ryaatakagaeyantanakinani riraga Jesoshi janta Kaperinawooki, areeteeyapaakinani. Eniro ijeki janta riraga piyotzirir koriki rowameethatanteetyaawori Tajorentsipanko. Ikanta ipokashitapaakiri Peetero rioripaeni, ikantapaakiri:

—¿Ipinatapiintzirima riraga iyoteemiri rowameethatanteetyaawori Tajorentsipanko?

²⁵ Rakanakiri rirori:

—Jee, ipinatziro.

Roojatzti ipianaka pankotsiki ijekinta Jesoshi. Ipiyanaka, ikyappaaki, ikowawitaka rirori Peetero rojampiterimi aririka ipakiri koriki rowameethatanteetyaawori Tajorentsipanko. Omaanta ryotaki riraga Jesoshi ikenkithashiryaaakari Peetero rootaki rathawaakotantanakariri, ikantanakiri:

—Shimo, ¿oetaka pikenkithashiryari eerori? Riraga jewawenantatsiri, ¿tsika itzimika ikowakotapiintziri iyorkite? ¿Ikowakotzirima inampijatzipero? ¿Rioma ikowakotziri paashinijatzitsiripaeni atziri?

²⁶ Ikantawakiri:

—Rioma ikowakotziri paashinijatzipaeninta atziri.

Roojatzti ikantanakiri rirori:

—Kyaaryo, tekatsi ikowakotziri inampijatzipero. Ejatzti okimitaka naari, tekatsi ikowakotena Pawa, tema nosheninkatakari.²⁷ Omaanta tee nokoyi eeniro ikijawentenari riraga kempoiiriri koriki. Piyaate iroñaaaka pakachaatakite inkaarekinta. Aririka paaki shima, poerikeri, paminawaantteri ipaanteki, aritaki piñuitakiri koriki. Roojatzti paaneeri kempoiirirkinta koriki, pipapaakiri. Rirotaki apinatakari aaka.

18

*Ikenkithatakotakiri Jesoshi jewawenantatsini paata janta jenokinta
(Mr. 9.33-37; Rk. 9.46-48)*

¹ Ojamanineentansi nopolashitapaakiri riraga Jesoshi, naaka maawaeni ryotaanewopaeni, nokantapaakiri:

—Maawaeni naaka piyotaanewo, nokowaki pikantena ¿ninkama jewaperoterinika atziripaeni janta ipinkathariperotzinta Tajorentsi?² Roojatzti ikaemantakari eentsi, ikatziyakaakari niyanki,³ ikanteeyawakinani:

—Kyaaryo nokamantemiri pikenkithashiryagaeyaari tameentari Tajorentsi, ejatzti pipakaero pajagaaga. Nokowaki pikimitakotyari

irika eentsika, paapatziyaperotena. Eerorika paapatziyaperotana, eero pimatziro piyaate janta ipinkatharitzinta Tajorentsi. ⁴ Irika eentsika tee ikantakaaperota, tee itheenkana inta raapatziyaperotana. Maawaeni kimitakotyaarini irira rirotaki tsipateeyeenarini neewawenantzi. ⁵ Aririka pineshironkateri aapatzianari, kimitaririka irika eentsi, eejatzi pikimitzitakina naari: pinintashiretakina. ⁶ Omaanta aririka pantakayeri eentsi aapatzianari kaari kameethatatsi, ari rowashironkaaperotakimi eerori Tajorentsi. Okameethawitami pityawomii pikamemi eero pantakaantarikya kaari kameethatatsi aapatzianari, rootaki kaari nowashironkaantemimi.

Ikantziri Jesoshi: "Pantzirokari kaari kameethatatsi"
(Mr. 9.42-48; Rk. 17.1-2)

⁷ Ikantziri eejatzi:

—Netakotari maawaeni atziri. Kyaaryo, tee ikowawita ranteromi kaari kameethatatsi, omaanta rantakagaetakiri. Arimache rowashironkaaperotakirikya Tajorentsi iinja irintapaeni antakaakiriri.

⁸ Noshiyakaawentemiro antakayemirorika pako kaari kameethatatsi pichekero, pookero. Eejatzi pikimitzityawa roori piitzi antakayemirorika kaari kameethatatsi. Piyaatyoookatashiteya janta jenokinta rooma otzimawityaarika apite pako eejatzi apite piitzi iyaatakaashitzimikari janta paamariki kaari tsiwakanitatsini. ⁹ Eejatzi poki, aririka aminakayemiro kaari inimotziri Tajorentsi pikithokireero, pookero. Kashetaakini pikyaapaee janta jenokinta. Rooma otzimaawityaarika apite poki iyaatakaashiteemikari paamariki kaari tsiwakanitatsini.

¹⁰ Eejatzi ikantzi riraga Jesoshi:

—Eero pimanintziri kimitakariri irika eentsika aapatzianari. Eenitatsi ronampiri Tajorentsi kempoyaakowentapiinteeyakiririni maawaeni riroripaeni. Eejatzi eerori pikimityaari, pikantani pikempoyaawenteri eentsipaeni. ¹¹ Nopoñaanaka naaka jenokinta, natziritapaaki. Nopokashiteeyakirini jatatsimimi paamariki kaari tsiwakanitatsini, nowawiaakoteeyerini.

Roshiyakaawentziri Jesoshi owisha peyeenchari
(Rk. 15.3-7)

¹² Noshiyakaawentemiro eejatzi. Eenitatsirika ashitachari 100 rowishate, ipeyakyaarika apaani, ḡtsika ikantanakyaarika? Tema ari rookanakiri riraga jeekagaantaneentsiri 99 rowishate keshiiki jataki iroñaaika ikowakowataateri riraga peyeenchari. ¹³ Omaanta iñagaeririka eejatzi, ḡrioma riweshiryawentyaari riraga piyoteenchari kaari peyachani? Kaari. Omaanta riweshiryawentyaari riraga peyawiteenchari. ¹⁴ Ikimitakaga riraga ashitariri rowishate tee ikoyi ipeya apaani, eejatzi ikimita riraga Pawa jeekatsiri jenokinta, tee ikowakaaneentziri ipeya apaani atziri aapatzianari.

Tsika akantya apeyakotawakaantyuawori antzimotakimirori kaari kameethatatsi
(Rk. 17.3)

¹⁵ Eejatzi ikantakina Jesoshi:

—Aririka rantzimotakimiro piyemijantzinkarite kaari kameethatatsi okameethatzi piyatashiteri pikenkithatakayeri apaniroeni. Omaanta eero pikijiri; eero pikamtziri paashinipaeni. Aririka ikemijantem iñetheemi eeroka eejatzi Tajorentsi pipeyakoteniri okaatzi rantzimotakimirri roojatzi pineshironkatanteeyaa, aritaki pineshironkatawagaea

paakameethatawakagaeya, eejatzi ineshironkatzyaari rirori.¹⁶ Omaanta eerrika ikemijantawakimi, apawo piyaatashiteri. Iroñaaka paaneeri paashini apaani eerrika apite piyemijantzinkarite. Paaneeri ikenkithatakayeri, riyatantyaari rirori kyaaryo pikantziri, eejatzi riyatantyaari kyaaryo pikowaki pineshironkateri.¹⁷ Eerrika ikemijantawakimi, pipiyoteri maawaeni piyemijantzinkarite jaga, pikanteri maawaeni ikantawakayaari rirori. Eerrika ikemijanteeyawakirini okaatzi ikantawitakariri, rootaki piyatantyaari ikimitakari kaari yotziri Tajorentsii, eejatzi paashini antzirori kaari kameethatatsi. Iroñaaka pikimitakayaari kaari yotziri Tajorentsii, riraga antzirori kaari kameethatatsi, eero pikantakotziri aapatziyariri Tajorentsii.

¹⁸ Kyaaryootaki iroka nokantemiri: eeroka, riraga aapatziyaperotanari, oetarika pithaañari kipatsiki, ari ithaañayawo Pawa jenokinta; eejatzi oetarika pishinetziriri kameethatatsiri eejatzi ikanteri Tajorentsii ishinetziri. Pikanteririka eenitatsi kaari kameethatatsi rantziri, eejatzi ikanteri rirori. Pikanteririka tee añiiro kaari kameethatatsi rantziri, eejatzi ikimitya riraga Tajorentsii.¹⁹ Eejatzi nokantemiri, aririka eerokapaeni pikanteri Pawa jenokinta ramitakotemi oetarikapaeni, omawitya pikaaeterika apite, aritaki ikemijantakimi, ramitakotakimi.²⁰ Tsikarika pipiyotawentena aririka apite aapatziyanari, eerrika 3, aririka osheki, eejatzi naari nokaatemi. Eejatzi ari iyotakayemi Ishire Tajorentsii oetarika kameetha pikanteriri Tajorentsii.

Rootaki ikantakiri Jesoshi.

Pineshironkatante atziri

²¹ Ikantaka Peetero, ryaatashitakiri Jesoshi, rojampitapaakiri, ikantakiri: —Nowinkatharite, ¿tsika okaateka noneshironkatapiinteri riraga kijapiintanari nopeyakopiinteniri? ¿Arima okaate 7 nopeyakopiinteniri?

²² Ikantawakiri:

—Pikanteetatyeyaaani pineshironkateri, pipeyakoteniri rantziri. Eero pipiyatakotari kijapiintzimiri.²³ Noshiyakaawentemiro tsika ikanta Tajorentsii ineshironkatziri aapatziyariri. Ikimitakari pinkathari rireewiteetziri ronampiripaeni. Tema iroñaaka ikowakiri irira ipinateeri ireewitakiriri.²⁴ Ikaemakiri apaani ireewitziriri oshekiperi koriki. Ikantawitawaari: “Pipinatawaena pireewitanaga”.

²⁵ Ikantawakiri: “Tekatsi naye nopinateemiri”. Roojatzi ikanantakari paashini ronampiripaeni: “Paanakiri irika pipimanteri, eejatzi iina, itomipaeni, rowaagawo, maawaeni, roojatzi ipinatanteena koriki rireewitaanaga”.²⁶ Ikanta riraga ireewitziriri rotziwerowashitanakari ipinkathatanakiri, ikantanakiri: “Eero pipimantana poyaawentawakyaata aritaki nopinateemi”.²⁷ Roojatzi osheki retakotatari iwaatorote, ishinetziri riyowanee, ikantawakiri: “Aritaama, monkaataka pireewitana, eero nokowakotaneemi”.²⁸ Ikanta ireewitantawitacharira ryaawitanaaga. Ari janta niyanki awotsi itonkiyotawakari ireewitziriri rirori. Tee rireewiperotziri osheki: inta eechonkiini. Roojatzi roerikakentsitakari ikentsiki, ikantakiri: “Intsipaete pipinatena pireewitana”.²⁹ Roojatzi rotziwerowashitanakari, ikantawitakari: “Poyaakowentawakyaata, aritaki nopinateemi iinja maawaeni nireewitzimiri”.³⁰ Omaanta tee ikoyi ineshironkateri eejatzi royaakowentya omaanta romonkyaagakan-tashitakari ikantakiri: “Pipinatenarika maawaeni pireewitanaga, roojatzi noemishitowakaananteemi”.³¹ Ikantaka iñaakowenantakariri paashinipaeni ratzirite riraga iwaatorote, okantzimoneentanakari roojatzi ryaatashitantanakari iwaatorote, ikantapaakiri: “Noñaateekiri iriranki petakotaariranki eerori. Teera retakontantateeta rirorita inta

romonkyaaagakaantateekiri ireewitawitariri rirori eechonkiini". ³² Roojatzi ikaemakaanantakari riraga iwaatorote, ikantawakiri: "Ñaakiro, pikantakina inkaaganki: 'Eero pipimantana', rootaki noneshironkaperotantakimiri, nokanantawitakimiri: 'Iroñaaka eero pipinataana pireewiwitanaga'. Omaanta eeroka, tee pikameethatzi. Tee pineshironkatziri riraga ireewitawitzimiri eerori eechonkiini. ³³ Tema okameethawita pineshironkaterimi eerori ireewitzimiri eechonkiini. Nokimitakimira naari noneshironkatakimi: tee nowashironkaemi". ³⁴ Roojatzi ikjijantaperotanaka iwaatorote romonkyaaagakaantakiri, ikantakiri: "Nokowaki iroñaaka pipinatena maawaeni pireewitanaga; pipinatenarika maawaeni roojatzi noemishitowakaananteemi".

³⁵ Ikaatakaapaakawo Jesoshi, roojatzi ikanantanaka:

—Okimitaka iroka noshiyakaawenteeyakinirini, eejatzi ikimitemi iinja eerori Ashitanari jeekatsiri jenokinta, eerorika pineshironkatziri atziri, eerorika kyaaryoopero pipeyakotziniri oetarikapaeni rantzimotzimiri, ari rowashironkaaperotakimi Pawa iinja, eero ipeyakotzimiro eerori pantani.

19

Eero pookiro piina

(Mr. 10.1-12; Rk. 16.18)

¹ Ithonkantanakawori ryotaantzi riraga Jesoshi, ishitowakaanakina Karireeyaki, jatanakina iroñaaka janta intatsikeronta Joriraani janta okaak-intawo Joreeya. ² Eejatzi royaatanakiri oshekini paashinipaeni atziri. Eejatzi rirori retsiyatatakotawakiri maawaeni mantsiyatzzinkari.

³ Eejatzi ipokashitapaakiri warijeeypaeni. Ikowawitaka ikompitakayaarimi, rootaki ikanantawitapaakariri:

—¿Tsikama okantzika Iwaperite Tajorentsi? ¿Okameethatzima ninkarika kowashitachari rookero iina?

⁴ Ikantawakiri:

—Tema piñaanatapiintawitawo okantziri Iwaperite Tajorentsi. Paerani riwetsikakiri Tajorentse shirampari eejatzi tsinani. ⁵⁻⁶ Eejatzi ikantzi: "Aririka rayero shirampari iina, rinteenaryaanakiri ashitariri eejatzi riniro, omaanta tee nokowakayiri rookero iina, eero. Inta nokowaki kijokiro rowanakiro irowa. Rinashitawitani paerani shirampari eejatzi tsinani, omaanta aririka raaki iina, kimitanaa apaani ikantaka, kijokiro rowawakaanakya". Ifñaakiri Tajorentsi apaani ikantaka; eero iroñaaka rookakagaeri atziri.

⁷ Roojatzi rojampitanakiri, ikantakiri:

—¿Itakakya ishinetantariri riraga Moeseeshi shirampari rookero iina? Tema ikamineeri shiramparipaeni: "Tekirarika pookiro piina pityaawo pojankinateniro paperi pikantero iroñaaka ookawakaatyeyya. Roojatzi pimatanteeyawo pookaero piina".

⁸ Ikantawakiri:

—Tema pilkijoshiretakitzi pajankaneki rootaki ishinetantakimiri. Omaanta tee ikoyiro Tajorentsi. ⁹ Nokantemi naari, aririka pookero piina roojatzi paye paashini, aritaki panteero kaari kameethatatsi. Tema pishirontzimotakawo piina paashini tsinani. Apatziro aririka oshirontyari paashini shirampari, okameethawita pokeromi.

¹⁰ Eejatzi nokanteeyanakirini naaka ryotaanewopaeni:

—¿Kyaaryootaki pikantakinari? ¿Aririka naaki noena eero nomatziro nookero? Okameethatzi eero nayi noena.

¹¹ Ikantawakina:

—Kyaaryo iroka pikantziri. Jee, apaanipaeni atziri tekatsirika iina imaterorika riweshtyaaanakya, omaanta kaari maawaeni atziri.¹² Eenitatsi apaanipaeni kaari matachani rayi iina, tema ashi royo ikoñaatantakari ipiryakitzi, rootaki kaari imatantawo itsipatantyaaawori tsinani, rootaki kaari raanta iina. Eenitatsi apaanipaeni rayiteetziri iyatharekitho, rootaki kaari raanta iina. Eenitatsi paashini kaari kowatsini raye. Ikowakiri ijekashitya ikyaaryooowenteniri Tajorentsi oetarikapaeni ikowakiri ranteniriri. Eerorika pikoyi pishirontyaawo tsinani tekatsirika piina, omaanta pimatero piweshtyaaanakya, aritaki kameetha eero payi piina.

Jesoshi ramanakotakari eentsipaeni
(*Mr. 10.13-16; Rk. 18.15-17*)

¹³ Eejatzi ramaetakiniri riraga Jesoshi eentsipaeni. Ikantapaakiri ashitariri:

—Pineeronkawakiri neentsitepaeni, pamaneri Tajorentsi ineshironkaternari.

Nokantawiteeyawakarini:

—Eero pashiiriiri Awinkatharite.

¹⁴ Omaanta ikantana irira:

—Eero pikatziyakaari. Pishinetenari ipokashitenataa eentsipaeni. Riyotzi irira rameentana. Maawaeni aapatziyanari, ikimityaari irika eentsipaeni rameentana, tema ari reentsitetakyaari Tajorentsi.

¹⁵ Roojatzi ipampitantawakari iitokira maawaeni, ikantziri Tajorentsi:

—Pawa, nokowaki pineshironkateri irika eentsipaenika.

Roojatzi ryaatantanaka riraga Jesoshi, itsipateeyanaanani maawaeni ryotaanewo.

Ikenkithawaetakaakiri riraga Jesoshi ashaagantzinkari
(*Mr. 10.17-31; Rk. 18.15-17*)

¹⁶ Paashini kitezjiri ipokashitapaakiri shirampari, ikantapaakiri:

—Iyotaantsirsni kameethari. Pikamantena, *¿iitaka kameethatatsiri* nanteri iroñaka naari jika nojeekanteeyaripa janta jenokinta? Nokanteeta-paatyeyyaani.

¹⁷ Ikantawakiri:

—*¿iitaka pikanantanari: “Kameethari”?* Tekatsi kameethatzinkari, apatziro ikameethatzi Tajorentsi. Omaanta pikowakirika piyaate jenokinta, pantero maawaeni ikaminaakimiri Tajorentsi rojankinatakirini Moeseeshi.

¹⁸ Rakanakiri ikantanakiri:

—*¿Tsika okantyaaka nanteri?*

Ikantawakiri Jesoshi:

—Eero powamaeri atziri, eero pishirontawo tsinani kaari payi, eero pikoshitzi, eero pitheeyakotari paashinipaeni,¹⁹ pipinkathateri piri eejatzi piniro. Pineshironkateri paashinipaeni atziri: pikimitzaaga eerori oshepi pineshironkateri, ari pikimitzityaari paashinipaeni atziri pineshironkateri.

²⁰ Ikantanaki:

—Nomonkaatakiro maawaeni iroka eenironi neentsitapaakini roojatzi iroñaka. *¿Oetaka paashini nanteri?*

²¹ Rakanakiri:

—Pikowakirika pikameethaperotantaneeyaaari pithotyeero maawaeni iroka, piyaate pipimanero maawaeni tzimimotzimiri, piperi owashironkaenkari, rootakirakya kaari pikenkithashiryaaantaneeyawo pipiyotaneero powaagawo, inta pikenkithashiryaaantaneeyaaari Tajorentsi, roojatzi pipiyashitanteena, thamerakya poyaataneena naari.

²² Ikanta rirori ikemantawakari osheki rowashiretanaka. Riyotakotanaka osheki rowaagawo, tee ikowaki ipimantero. ²³ Roojatzi ikanantanakina Jesoshi:

—Kyaaryo nokantzi, osheki opomeentsitzimotari ashaagantzinkari ikowaki Tajorentsi ipinkathariwenante. ²⁴ Napiitemiro noshiyakaawentemiro: riraga kameeyo opomeentsitzimotakari roshinthateri imooki kithapi. Rowanaaperotaka riraga ashaagantzinkari opomeentsitzimotap-erotakari rirori ikowaki Tajorentsi ipinkathariwenteri.

²⁵ Nokemaeyantawakaaworini ikantakinari Jesoshi, ari notsikan-teeyanakarini. Roojatzi nojampitantanakari:

—¿Ninkama awijakotatsinika?

²⁶ Roojatzi ramineeyakinani maawaeni, ikanteeyakinani:

—Riraga atziri eero imatziro rowawijaakotya apaniroeni, omaanta Tajorentsi aritaki imatakiro rowawijaakoteri atziri. Kaari imatawita atziri omaanta rirori imatziro oetarika pomeentsiwitachari.

²⁷ Ikantanakiri Peetero:

—Pamine Nowinkatharite, nookaeyanakironi naaka maawaeni tzimimo-teeyawitanarinii, noyaateeyantanakimirini. ¿Oetaka nayeri iinja owinawo?

²⁸ Ikanteeyawakinani:

—Kyaaryo iroka nokamanteyemirini, “Nopoñaaka naaka jenokinta, natziriperotapaaki kipatsikika, iinja ari otzimae owakirari kipatsi. Naaka nojeeki iinja janta nowinkatharimentoki, nopinkatharitaperote. Eejatzi eeroripaeni pitsipateeyenani pipinkathariteeyeni. Okaate 12 piwinkatharimentopaeni pijeeakteeyarini eerori. Pipinkatharienteeyerini maawaeni joriyyopaeni. ²⁹ Maawaeni ikaatzi ookayitanakirorini ipankopaaeni, rirentzi-paeni, ritsiropaeni, iririopaeni, riniropaeni, reentsitepaeni, iinapaeni, iipatsitepaeni royaatantenari, eero ratsipetashiteeyawoni. Riraga Tajorentsi ari roepiyayiteenirini rookaeyawitanakarini. Rookanakirika apaani roepiyayi-teenirini Tajorentsi osheki. Eejatzi ikanteetatyeeyaani itsipateeyenani janta rañaaperoeyapaeni jenokinta. ³⁰ Eenitatsi iroñaaka osheki pinkatharitatsiri jaka kipatsiki, omaanta eero ipinkathariteeyini maawaeni janta jenokinta: rooma aamashitya apaanipaeni pinkatharitagaantatsini. Eejatzi eenitatsi iroñaaka osheki owashironkaenkariapaeni, omaanta iinja janta jenokinta ipinkatharitagaantapae rirori”.

20

Antawaeteeyatsirini janta oowamashiki

¹ Eekiro ryaatatyye ikamantziri riraga Jesoshi:

—Noshiyakaawentemiro tsikarika ikanta Tajorentsi ipinkathari-wenzanti. Ikitakari ashitawori roowamashite. Ryaatanaki irira amaetyaaka janta nampitsiki raminerri owiitziniriri roowate. ² Iñaappaakiri apaanipaeni kowatsiri rowiiteniri, ikantapaakiri: “Aririka pamitakotena iroñaaka, aririka itziroryaanaki oorya, aritaki nopolatakimi apaani koriki, riraga iitachari tenaaryo”.* Ikantawakiri: “Ari kameetha”. Roojatzi ikanantanakari: “Piyaate iroñaaka powiitenawo”. Roojatzi ryaatatantanaka rowiitziro. ³ Roojatzi ijenokiityaantapaaka oorya, ryaatanaki janta raminerri owiitziniriri roowate. Iñaappaakitziri janta apaanipaeni jeekashitachari kaari antawaetatsi. ⁴ Ikantapaakiri: “¿Tee pikowaeyini eerori powiitenaa noowate? Aritaki nopolatakimi kameetha”. Rakanakiri: “Jee, aritaki nowiitakimiro”. Roojatzi ryaatatantanaka rowiiteniri.

* **20:2** Tenaaryo rirotaki ikithoki koriki monkaatachari antawaerontsi apaani kitejiri.

⁵ Tampatsika oorya ryaatanaki eejatzi janta ramine paashini owiitakoterini roowate. Ragaatzi paashini rotyaantakiri rantawaete. Eejatzi tsiteniitya amitakoterini piyanaa raminaatzi paashini amitakoterini. Iñaakitzi apaanipaeni kaari owiitatsi; rotyaantakiri rantawaete eejatzi. ⁶ Tsiteniityaaperotanaki, riweyaantapanaatawo raminapanaaatzi paashini, roojatzi iñaantapaaaka jeekashitzinkari tekatsi rante. Roojatzi ikanantapaakari: “¿litaka pithotyaakotziri jaka, tekatsima pantawaero?” ⁷ Rakanakiri: “Tekatsi antawaetakaenani”. Roojatzi ikanantanakari: “Thame pamitakotena, powiitakotena noowate. Aritaki nopolitakimi kameetha”. Jafanaki.

⁸ Rootzimateentsi itziroriimate oorya, roojatzi ikanantanaka ashitawori roowamashite. Ikantakiri jewatakaantzirori antawaerontsi: “Pikaemeri antawaeteeyatsirini pipinatelyerini. Pitanakyaaari pipinateri riraga impaetaperotapaentsiri rantawaetzti roojatzi pithonkanteeyaaari pipinateri maawaeni irirapaeni roojatzi ikaatzi antawaeteentsiri amaetyaaka”. ⁹ Roojatzi ipokantapaaka riraga impaetapaentsiri rowiitziro. Eechonkiini rantawaetaki irirapaeni omaanta ipinatawakiri maawaeni apaani tenaaryo. ¹⁰ Roojatzikya ipokantapaaka rirori itakawori rantawaetapaaki amaetyaaka. Iitakaashiwitaka ari ipinataperoetakiri osheki omaanta ipinatawakiri tenaaryo eejatzi. ¹¹ Iñaatziiri raawakirira iyorikite roojatzi ikiñaanikowenantanakariri owiitakaakiriri, ¹² ikantanakiri: “¿litaka nomonkaatantakariri owakira pokapaentsiri rantawaetzti? Pipinatakina okaatzira pipinatakiriri rirori. Tema naaka nantawaetaki amaetyaaka roojatzi tsiteniiti tenaaryo eejatzi osheki natsipetakari ijaawanka oorya. Okameethawita pipinaperotenami oshekyaajeen koriki”. ¹³ Ikantawakiri: “Niyompari, tee namatawitzimi; nopolitakimi kameetha. Eejatzi tema nokantakimi amaetyaaka: ‘Nopinatemi apaani tenaaryo’. Eejatzi pakakina: ‘Jee, aritaki, kameethataki’. ¹⁴ Irika piyorkiteka paanakiri, piyaate pipankoki. Nopantakariri irika impaetapaentsiri rantawaetzti ikaatzira nopakimiri eerori. Aritaki nokowakaawo naari rootaki nopantakariri. ¹⁵ Tema okameethatzi nopashitakari noorikite. ¿litaka kaari pikowakaantana noneshironkateri? Rootaki ikantakiriri riraga ashitawori roowamashite. ¹⁶ Ñaakiro, riraga Tajorentsi iñaaperoeyakirini aapatziyakariri osheki ojarentsi ikameethataki; eejatzi iñaaperoeyakirini riraga aapatziyakariri iroñaaaka ikameethatzi. Tema imonkaatawakaeyakanai maawaeni, rowawijaakoeyakirini, omawitya raapatziyari osheki ojarentsi, rooma eechonkiinirika”.

Rootaki ikantziri riraga Jesoshi, roojatzi itharyaakaanakina.

Rapiitana Jesoshi ikamanteeyakinani rowamaeteri (Mr. 10.32-34; Rk. 18.31-34)

¹⁷ Ikantaka Jesoshi itonkaakagaeyakinani janta Jerojareeki. Ari niyanki awotsi roojatzi riyoshiutanakina naakapaeni riyotaanewopero 12 ragaeyanakinani intyañaampiini. Ikamanteeyakinani:

¹⁸ —Iroñaaaka piyoteeyakini atonkagaeyatseeni janta Jerojareeki. Nopoñaaaka naaka jenokinta, natziriperotapaaki jaka, omaanta rooteentsi omonkaatya raanteetenari ragaeyenani jewawentayitziririni ñaanakowenantsirii eejatzi iyotaantayitzirorini Iwaperite Tajorentsi. Ikanteeyenani: “Osheki tee pikameethaperotzi, rootaki pikamantyaari”.

¹⁹ Roojatzi raantena janta kaari yotziri Tajorentsi ikantapaakiri: “Irika Jesoshi payeri, powamaeri”. Ari ishirontawenteeyawakinani rirori. Ipajapajaatawakina, ikentakotakaantawakina inchapankeki ikanteetzirii koroshi, roojatzi nokamantaka. Okaatapaakirika kitejiri 3 roojatzi ipiriinanteena Pawa añaagaana eejatzi.

Rootaki ikanteeyakinanini.

*Iyaatashitakiri Jesoshi iina Sewereeyo
(Mr. 10.35-45)*

²⁰ Roojatzi opokashitantapaakari riraga Jesoshi iina Sewereeyo. Otsipataapaakari otomi apite, iitachari Jantyaako eejatzi Jowa, riraga apite riyoitaanewo, otziwerowashitapaakari, okantapaakiri:

—Nokowaki pineshironkatena.

²¹ Ikantawakiro:

—¿Oetaka pikoyiri?

Okantziri:

—Aririka iinja pipinkatharitaperotapae nokowakaakiri apiteka notyomi itsipatemi: apaani jeekatsini pakoperoki, paashini pampateki. Ikaatemi itsipateeyemini pipinkathariteeyini.

²² Rakanakiro Jesoshi:

—Tee piyotzi oetarika pikowakotanari. Pamine, rooteentsi nokemaatsityaawo osheki katsiri naari. Rooma patsipetashitakawo eerori teerika imatziro ikimaitana naaka nokemaatsityaawoka osheki katsiri.

Ikantanakiri otomipaeni:

—Aritaki nomatakimiro naari.

²³ Roojatzi ikanantakari:

—Kyaaryo aritaki pikemaatsiteeyakyaawoni, omaanta naaka eero nomatziro nokantzimi ninkarika jeekimotenani iinja nakoperoki, nampateki; apatziro yotatsiri Pawa jeekatsiri jenokinta ninkarika ikashiyakayitakarini paerani jeekatsini.

²⁴ Nokemaeyantakaworini naaka ryotaanewopaeni iroka ikantakiri roojatzi nokijanteeyanakarini riraga Jantyaako eejatzi Jowa. Nokijanteeyanakaririni ikowaeyawitakityaani ipinkathariteeyenimi. ²⁵ Roojatzi ikaemanteyakinani Jesoshi naakapaeni ryotaanewo, ikanteeyakinani:

—Piyoteeyakini eureka riraga iwinkatharitepaeni kaari yotziri Tajorentsi rameteeyawoni romperateeyarini isheninkapaeni. ²⁶⁻²⁷ Omaanta eerkapaeni eero pikimitakoeyarini. Eero pomperatanteeyani eerori. Pikowakirika peewawenante, pamitakoeyerini kameetha atziripaeni: petakotyaari, eero pomperatashifeeyarini. Panteniri kameetha maawaeni oetarika ikowakoeyemirini. ²⁸ Pikimitakotena naaka. Tee ro nopokantyari naaka jaka kipatsikika nomperatayitapaakimini, inta nopokantari jaka namitakoeyemini, noneshironkateeyemini, nokamawenteeyemini nopolawenanteeyemirorini kaari kameethatatsi pantziri eerkapaeni maawaeni pawijakotanteeyaari, eero rowashironkaanteemi Tajorentsi.

*Retsiyatakotakaakiri riraga Jesoshi kaari kokichaatatsi apite
(Mr. 10.46-52; Rk. 18.35-43)*

²⁹ Rookaeyakaanaanawoni Jesoshi nampitsi owaero Jerikoo. Ikinneeyanakini janta awotsiki itonkaakaantyaariri Jerojareeki. Royaateeyakirini osheki atziri. ³⁰ Eeniro ijeekaki jaga othapikira awotsi irira kaari kokichaatatsi ikaatzi apite. Ikamanteetakiri:

—Kaakitaki Jesoshi.

Roojatzi ikaemantawakari, ikantziri:

—¡Pineshironkatena! ¡Rooma eureka icharineeteni Iraviirini!

³¹ Roojatzi ikijathatakiri piyotaneenchari, ikanteeyawakirini:

—¡Pimaerite!

Eekiro ikaematziiri, ishntsithatakiri ikaemakiri:

—Nowinkatharite, pineshironkatena. Rooma eureka naamagaeyakarini, eerkatakai icharineeteni Iraviirini.

³² Ikatziyapaaka riraga Jesoshi, ikantapaakiri:

—¿Oetaka pikoyiri namitakotemiri?

³³ Ikantawakiri:

—Nowinkatharite, nokoyi pikokichaatakagaena.

³⁴ Roojatzi ineshironkatapaakiri, ipampyaakitapaakiri rokikira. Ko-kichaatanee, roojatzi royaatantakari osheki riweshtiryaawentanakari.

21

*Rareetya riraga Jesoshi Jerojareeki, ikyakotakari ewankari wooro
(Mr. 11.1-11; Rk. 19.28-40; Jowa 12.12-19)*

¹ Rootzimatapaentsi nareetya Jerojareeki, ari nareetapaakyaawo Wete-jajee jeekatsiri janta tonkaariki owaero Oriiwomashi. Roojatzi rotyaanantakari riraga Jesoshi apite riyotaanewo, ² ikantakiri:

—Thame peewate jaga nampsitsiki, aririka piñaappaakiri wooro tsinani oth-atakotaka otsipatakari otomi ewonkiri poojoryaakotapaakiri. Pamakinari jaka. ³ Aririka ikanteetawakimi: “¿litaka poojoryaakotantawori?” pikanteri: “Ikowatziro Awinkatharite”. Ari roepiyemiri intsipaete. Roojatzi ikanantanakimi: “Paanakiniri”.

⁴ Ranantakawori iroka, imonkaatziro rojankinatakotzitakaririni paerani kamanantzirorini iñaani Tajorentsi iitachari Jakariiyashi. Ikantzitakanai:

⁵ “Pikanteeyerini jeekaetsirini janta Jerojareeki: ‘Paamayari iinja Pi-winkatharite, kaakitaki. Osheki ikameethaperotaki. Tee riyotzi ikantakaaperota, ikyakotapaakyaari ewonkiri wooro’”.

⁶ Roojatzi riyaatanaki riyotaanewo apite iñaappaakitziro wooro tsinani otsipatari otomi ewonkiri, roojoryaakotapaakiro, ramakiniri. ⁷ Ramakiri apite. Nowankitakiniri imitzikaakira kithaarentsi, roojatzi ikyakotantakari Jesoshi. ⁸ Osheki atziri kinantanakawori janta awotsiki iñaawakiri, eejatzi iñaaperoeyawakirini maawaeni: ishitashitaantakiri* awotsiki imaathaapaeni ikinapaakirapa wooro. Paashinipaeni ichoonkayitakironi kompiroshi ishitashitakiri awotsiki ikinapaakinta wooro. ⁹ Osheki atziri jewateeyakiririni awotsikira. Osheki paashini impaeteentsiri eejatzi. Osheki ikimoshirewen-teyanakirini. Roojatzi ikaemaeyanakini, ikanteeyanakini:

—¡Paminerri irika, rirotaki icharineetenri Iraviiirini aamagaeyakarini!
¡Thame apinkathateeyerini! ¡Rotyaantakiri Awinkatharite! ¡Thame añaaperoeyerini! ¡Tema iñaaperotakiri riraga Tajorentsi, tema ikameethaperotzi!

¹⁰ Roojatzi rareetakaantapaakina Jerojareeki. Ikemakoeyawakirini maawaeni jerojareejatzi, rojampitawakagaeyanakani:

—¿Ninkama irika pokapaentsirika?

¹¹ Rakaeyapaakirini paashinipaeni pokaentsiri:

—Riotaki Jesoshi, riraga kamanantzirorini iñaani Tajorentsi jeekaw-itachari paerani Najareeteki, rowaga nampsitsi janta Karireeyaki.

*Rookaeyakirini Jesoshi pimantayitatsirini janta Tajorentsipankoki
(Mr. 11.15-19; Rk. 19.45-48; Jowa 2.13-22)*

¹² Ikantaka Jesoshi ikyakaaapaakina janta Tajorentsipankoki. Iñaappaakitziri janta inthomaenta osheki amanantsirii eejatzi pimantatsiri, rootaki opoñaantanakari rookaeyapaakirini maawaeni irirapaeni. Tema rotatsinkitawaetapaakiri maawaeni imjeejate riraga kaampiyawakaayitanaririni iyorkite. Eejatzi ikimitzitakari rirori

* ^{21:8} Rootaki rameteeyarini rirori joriyyopaeni ishitashitaantayitzirini pinkathari imaathaaki ipokerika.

pimantatsiri jamomo rotatsinkitayitapaakirini maawaeni imeejatepaeni.

¹³ Roojatzi ikanteeyanakirini:

—Okantzi Iwaperite Tajorentsi: “Ikantzi Tajorentsi: ‘Iroka Tajorentsi-pankoka okameethatzhi pikenkithatakapapiinteeyenani, omaanta eeroaka-paeni pikoshitashiteyakarini atziri pokaeyawitacharini jika Tajorentsi-pankokika’”. Tee okameethatzhi iroka panteeeyakirini.

¹⁴ Eejatzi janta ipokashitapaakiri oshekini kaari kokichaatatsi, eejatzi kijopookitatsiripaeni. Retsiyatakoeyawakirini. ¹⁵ Riraga jewawentayitziririni ñaanakowenantatsiripaeni eejatzi riraga iyotaantayitzirorini Iwaperite Tajorentsi iñaakirira okaatzi rantakiri. Eejatzi ikemakiri osheki eentsipaeni ikaemaeyakini:

—¡Osheki okameethaperotaki rantayitakirini Jesoshi! ¡Thame ññaaperoeyerini! ¡Tema rirotaki icharineeteni Iraviiрини!

Omaanta tee inimotanakiri riraga jewawentayitziririni ñaanakowenantatsiripaeni iroka iñaakiri eejatzi ikemakiri. Rootaki ikitantaperotanakari osheki. ¹⁶ Roojatzi ipokashiiyantapaakarini Jesoshi, ikantapaakiri:

—¿Pikemaeyakirini inkaaganki ikantakimiri riraga eentsipaeni? Tee okameethatzhi iroka ikantakimirika. Tee okameethatzhi ipinkathateeeyemini.

Rakanakiri:

—Jee, nokemaeyakirini. Tekirama piñaanatziro Iwaperite Tajorentsi kantakotzirori: “Iñaaperoeyerini eentsipaeni owawijaotantatsiri iinja”.

¹⁷ Roojatzi ryaateeyakaantanakinani janta Wetaaniyaki. Ari nomaapaaki.

Rowamaakiro Jesoshi iyeera

(Mr. 11.12-14, 20-26)

¹⁸ Okitejitanaki ipiyeeyakaanakinani janta Jerojareeki. Ari niyanki awotsi itasheyapaaki Jesoshi. ¹⁹ Iñaapakiro awotsinampiki chochoki iitachari iy-eera, oshiyawitawo potooki. Ikwawitapaaka ithotemi okithoki, omaanta tekatsi; apatziro iyotashitaka oshi. Teera iñaapakiro okithoki roojatzi ikantanankawo:

—Eero iroñaaka papiitero pikithokite ithotanteemiri atziri.

Okantaka rowaga iyeera jampiyashitanaki intsipaete.

²⁰ Inkaamani aririka rawijakagaeyanakinawoni rowaga iyeera, noñaaawakirowa ojampishitanaki intsipaete roojatzi no-kenkithashiryaakoeyanakironi. Rojampiteetakiri riraga Jesoshi:

—¿Tsika okantanakaka ojampirkashitantanakari intsipaete rowaga iy-eara?

²¹ Ikantawakina:

—Kyaaryo, aririka eekiro piyatatyte pameentaperotyaari Tajorentsi, aritaki imatakaakimiro pantero kimitaworika piñaakirika iroñaaka. Eejatzi pikanteririka Tajorentsi: “Poshirinkero iroka tonkaari janta inkaarekinta, aritaki imatakaakimiro”. ²² Pameentaperotyaaririka, aririka pamaneri, aritaki imatakaakimiro oetarikapaeni pikowakoteriri.

Roojatzi itharyaakagaeyanakinani Jerojareeki.

Ikanteetakiri Jesoshi: “¿Ninkama otyaantzimiri?”

(Mr. 11.27-33; Rk. 20.1-8)

²³ Ikantaka Jesoshi ipiyakagaeyakinani Tajorentispankoki, ikyaki riyo-taantapaaki. Roojatzi ipokashitantapaakariri riraga jewawentayitziririni ñaanakowenantatsiri eejatzi riraga aataperoteenchari, ikantapaakiri:

—¿Ninkama otyaantaperotzimirika piyotaantariri joriyyopaeni eejatzi pet-siyatakoeyantakaririni? ¿Ninkama otyaantzimiri pookantapaakariri pi-mantatsiri chapinki?

24 Ikantawakiri:

—Eejatzi naari, nojampitemi apaani. Aririka pakawakina, aritaki nokamantanakimi ninkarika otyaantakinari. **25** ¿Ninkama otyaantakinari Jowa ikaawoshitakotantariri Tajorentsi joriyyopaenii? ¿Rirotakima Tajorentsi otyaantziriri? ¿Atzirima otyaantziriri?

Roojatzi ikantathatawakagaeyantanakanani:

—Akanteririka: “Tajorentsi otyaantakinari”, ikantanakaekari: “¿Itaka kaari paapatziyantarikya?” **26** Omaanta akantakiririka: “Atziri otyaantakinari”, ikijanakaekari atziripaeni. Tema maawaenii iitashitari Tajorentsi otyaantakinari Jowa riyotaanantari.

27 Roojatzi ikantapaakiri:

—Tee niyotzi ninkarika otyaantziriri.

Rakanakiri rirori:

—Eejatzi nokimitzitaka naari, eero nokamantzimi ninkarika otyaantakinari nanantawori piñaakotakinari.

Roshiyakaawentakiniri riraga ñaanakowenantsiri ashitachari apite itomi

28 Eejatzi ikanteeyakirini riraga Jesoshi:

—Noshiyakaawentemiri ashitachari itomi apite; ¿iitaka pikenkithashiryakotakariri eeroka? Ikantakiri itawori ikoñaadzi: “Notyomi, piyate iroñaka pantawaete janta noowamashiteki”.

29 Rakanakiri, ikantawakiri: “Eerowa niyaatzi”. Ikantaka paata ikenkithashiryanaa, roojatzi riyaatantaa rantawaetzi. **30** Eejatzi ikantziri paashini itomi: “Notyomi, piyate iroñaka, pantawaete janta noowamashiteki”. Ikantanakiri: “Ari, pawa, niyaate”. Omaanta tee riyatzi. **31** Ari, iroñaka nojampitemi: ¿Ninka kemijantaperotziririka ashitariri ikowakaakiriri?

Ikantakiri:

—Irinta itakawori ikoñaatapaaki, jatatsiri rantawaetzi.

Ikantakiri:

—Kyaaryo iroka nokantemirika: ranaakoeyemini riraga piyotziriri koriki ipantyaariri oroomajatzii eejatzi rowaga tsinani ñaathapiinteyawitaririni shirampari kaari oemi. Tema raapatziyakina rootaki imatantakawori Tajorentsi reewawentakiri rajankaneki. **32** Pamine, paerani ipokawitapaentaga riraga Jowani kaawoshitantsiri jaga riyoteeyawitapaakimini tsika pikantya pijekanteeyari kameetha; omaanta eerokapaeni tee pikowaeyini paapatziyeyawakyaarini. Omaanta aapatziyeyawakaririni riraga piyotziriri koriki ipantyaariri oroomajatzii eejatzi rowaga tsinani ñaathawitaririni shiramparipaeni kaari oemi. Piñeeyawitakarini raapatziyeyakawoni okaatzi riyotaakiriri Jowa rootaki ikameethatantarri. Omaanta eerokapaeni tee pikenkithashiryaañeenta, tee paapatziyimaetawakari Jowani.

Roshiyakaawentakiri Jesoshi aminirori oowamashi

(*Mr. 12.1-12; Rk. 20.9-19*)

33 Iroka paashini roshiyakaawenteeyakiniririni riraga jewateeyatsirini ñaanakowenantsiri eejatzi riraga iyotaantayitzirorini Iwaperite Tajorentsi. Ikantakiri:

—Pikemaeyawakinani paashini nokantemiri. Eenitatsi apaani pankitzirori roowamashite. Eejatzi rotantotakotakiro maawaenii othapiki. Eejatzi riwetsikashitakiro tsikarika rawishoowero oowa rowantyaawori owaaga. Riwetsikakiro eejatzi pankotsi jenokitatsiri, ijeekashitanyaawori aminawiritanteroni oowamashi. Roojatzi riraga ashitawori roowamashite ikantanakiri antawaetziniripaei: “Iroñaka

paminenawo noowamashite eejatzi pithamaetakotenawowa. Iinja pipashitena kashetani". Rakaeyanakirini: "Jee, aritaki, nomatakimiro". Roojatzi ryaatantanana rirori paashiniki kipatsi. ³⁴ Ojamanitakotanaki roojatzi omonkaatantapaaka irakanaki oowapaeni. Roojatzi rotyaanantawitaka ronampiripaeni ashitawori roowate, ikantawitawakari: "Piyaate iroñaka janta pikanteri riraga aminanawori noowamashite ipakaantawakina nashi naari". Roojatzi ryaateeyawitanakani, areeteeyapaakani janta. ³⁵ Iñaawakiririka riraga aminayitzirorini oowamashi, rompojawakiri apaani, tok; eejatzi paashini rowamaawakiri, shemi; omaanta paashini rompojantawakari mapiki, shemi. ³⁶ Ikanta riraga ashitawori roowamashite eekiro rotyaanantakanitz ronampiripaeni. Ikantaka aminiroira oowamashi ithonkawakiri, rowamaakiri ikimitaakirira paashini jewatapaentsiri. ³⁷ Roojatzi ikenkithashiryaaanaka ashitawori roowamashite ikantzi: "Iroñaka notyaanteri notyomi. Aamaaka eero rowamaawakiri irira. Rirotaama ipinkathatawakiri". Roojatzi rotyaanantawitanakari itomi. ³⁸ Ikantaka iñaawakirira roojatzi ikantawakaantanaka: "Kaakitakira riraga itomi ashitawori roowamashite. Aririka ikamaki paata ashitariri, rirotaki poyaateeyaaarini iriri; tema rirotaki ashiteeyawoni. Iroñaka thame owamaawakiri. Aakoteeroota aaka roowamashite". ³⁹ Roojatzi roerikawakiri shepik, raanakiri janta othapiki, rowamaakiri, shemi. ⁴⁰ ¿Oetaka pikenkithashiryaaari eeroka? ¿Ipokaeria ashitawori roowamashite tsika ikanteeyapaakirinika riraga antawaateeyawitanairirini roowamashiteki?

⁴¹ Rakaeyanakirini:

—Ari rowamaeeyapaakirini maawaeni, roojatzi raminanteeya paashini riropotatsiri amineenirini eejatzi pakaantapiintenirini irakapaeeteneerika rotyaansteenir rirori rashityaari.

⁴² Roojatzi ikantawakiri rirori Jesoshi:

—Tekirama piñiro okantziri Iwaperite Tajorentsi:

"Itheenkakiro mapi riraga wetsikirori pankotsi, omaanta iñaaperotakiro Tajorentsi okameethatz: tema okijotakaakiro maawaeni pankotsi. Rooma ikameethataki Awinkatharite, tema otsikanatakaworoña maawaeni rantziri".

⁴³ Rootaki nokanantakimiri: eero piñeyirini Tajorentsi eerori ipinkathariwenteeyeminimi. Omaantakya reewawenteeyerini paashinijatzitatsiri atziri: riraga pinkathataperoeyakiririni eejatzi aapatziyaperoeyakirin. ⁴⁴ Naaka oshiyakawori rowaga mapi: tema nokenkithatakotziro kameethaperotatsiri. Ninkarika kaari aapatziyawakyaawoni kyaaryoperotatsiri, aritaki rowashironkaakya: riyaate janta ikemaatsityawonta, ashi rowaero.

⁴⁵ Riraga jewawentayitziririni ñaanakowenantirsipaeni eejatzi riraga war-ijeeyopaení ikemaeyantawakworini roshiyakaawentayitakinirini Jesoshi roojatzi riyotakoeantawakwoni rirotaki irirapaeni roshiyakaawenteeeyakirini. Tema tee raapatziyari rirori. ⁴⁶ Ikowaeyawitanakani raakaanterimi Jesoshi omaanta ithaawanteeyakarini atziripaeni. Riyotaki atziripaeni riraga Jesoshi rirotaki kenkithatakotziriri Tajorentsi, rootaki kaari raantari.

¹ Rapiitakiniri eejatzi Jesoshi roshiyakaawentakiniri piyotawen-teyakaririni, ikanteeyakirini:

² —Noshiyakaawentemiro tsika ikanta Tajorentsi ipinkathariwenantzi. Ikkimitakari riraga pinkathari. Eenitatsi itomi owakira aatsiri iina. Ikantaka riraga ashitariri ikowaki riweshiryaaawentyaari itomi, rootaki ikaemakaanteeeyakirini inampijatzi rakiyoteri rowakayaari.

³ Rotyaantakiri apaanipaeni ronampiri romiñaawitakitari atziripaeni ipokeeta rowaeaani, omaanta tee ikowaeyini ipoke. ⁴ Rapiitakiri

rotyaantawitanakari paashini ronampiripaeni, ikantawitakari: "Piyaataate pikamantaateriita riraga ikamantakitzirira inkaaganki itawitakitariri: 'Pojataki kaniri eejatzi iwatha, oyiitaka maawaeni'. Thame powakitya". ⁵ Omaanta riraga romiñaawitakitari tee ikowaeyini ipoke.

Jateeeyakini tsikarikapaeni: ryaatzti apaani janta rowaneki, paashini ikinanaki riyomparita. ⁶ Omaanta paashinipaeni ragaeyawakirini

rotyaantawitakari, ranteetawakiri pok, pok; ipajapajaateeyakirini osheki rowashironkaeyakirini roojatzi rowamaantakari. ⁷ Ari ikemaki riraga jewatatsiri, antawo ikijanaka. Roojatzi rotyaanantananakari

joraaropaeni ryaate rowamaeri owamaantatsiripaeni. Riraga joraaropaeni ithonkakitziri maawaeni, eejatzi ipankopaeni rootakiro maawaeni. ⁸ Roojatzi ikanantanakari paashinipaeni ronampiri. "Mataka maawaeni owanawontsi oyiitaka. Omaanta riori ikanteeyawitakitarini inkaaganki: 'Tee ikameethatzi', tekatsi okantya ipokanteeyaaarini, rooma tee ikameethatzi. ⁹ Piyaatanaki iroñaaka janta awotsikipaeni antawopetatziki, pomíñaanakiri maawaeni piñaanakirira. Pikanteri:

"Thame nakiyotemi kaniri: rooma aaki notyomi iina' ". ¹⁰ Ikantaka ronampiripaeni jateeyanakini, ramayitapaakirini ikaatzi iñaayitakitzirini

janta, kameethatzinkaripaeni eejatzi kaari kameethatzinkaripaeni. Rareetakagaeyakarini ipaeyapaakirini kithaarentsi rooperor.

¹¹ Roojatzi ikyaatapaaka riori jewawenantatsiri riwethatantawakari pokayiteentsirinipaeni, raminapaaki jaga; roojatzi iñaapakiri apaani shirampari kaari kithaattacha kameetha. ¹² Itonkiyotapaakari,

ikantapaakir: "Niyompari, nopawitanakimi inkaaganki kithaarentsi kameethari pikithaawentyaarimi notyomi oemoshiryaaantyaariri. ¿Itaka kaari pikithaatantawo?" Omaanta imaeeritashitaka. ¹³ Roojatzi riraga

pinkathari ikanantanakari ronampiripaeni: "Payeri irika poojoteri rakoki eejatzi iitziki, pookeri inteea otsiteniperotzinta rowaga paamariki kaari tsiwakanitatsini, ashi royero riori janta, riraya eejatzi ratsikaekitya tyakiririri, osheki ikemaatsityaawo".

¹⁴ Ñaakiro, eejatzi ikimiwitaka Tajorentsi, ikaemakaantawitakari maawaeni atziri rawijakotanteeyaaarimi, omaanta eero roshekitzi kyaatsini, apatziro apaanipaeni owawijaakotaachani.

Riyotaakiri Jesoshi warijeyopaeni ranteniri pinkathari ikowakaeriri (Mr. 12.13-17; Rk. 20.20-26)

¹⁵ Ikanta ikijejeranakani riraga warijeyopaeni roojatzi ishitowantanaa ikenkithataawakagaeyakani, ikanteeyini:

—¿Tsika akanterika Jesoshi akompitakaantyaariri, akijakaantyaariri?

¹⁶ Roojatzi rotyaanteeeyantakarini irirapaeni riyotaanewopopaeni itsipateeyakarini riraga oyaateeyiririni Erooreshi. Ipokashitakiri Jesoshi, ikantakiri:

—Iyotaantatsiri, niyotzi piñaawaetziro rooperotatsiri: tee pitheeya. Eejatzi kameetha piyotaantziro Iwaperite Tajorentsi eejatzi eero pikemijantap-erotziri atziripaeni oetarika ikantawitemiri rirorika pinkathari kaaririka

pinkathari. Eekiro piñaawaetatziro kameethatatsiri. ¹⁷ Iroñaka pikantena oetarika pikenkithashiryaari. ¿Okameethatzima aperi pinkathari, riraga Seesari ayorikite? Tema irira kaari joriyo. ¿Terikama okameethatzzi?

¹⁸ Riraga Jesoshi riyyotakotakiri ikowaeyawitakan ramatawiterimi ikom-pitakaantyaaririmi. Rootaki ikanantanakariri:

—¡Erokerapaeni oshiyakaawaetashitachari paapatziyarimi Tajorentsi! ¿Itaka pamatawitanenarimi? ¹⁹ Poñaayenari koriki pipapiintziriri oroomajatz.

Roojatzzi ramantakanari apaani ikithoki koriki iitachari tenaaryo.

²⁰ Roojatzzi ikanantawakari:

—¿Ninkama ashitawori ipoo owakoteencharika? ¿Tsikama itzimika ashita-wori iwaero jankinateencharika?

²¹ Rakanakiri:

—Kaarima riraga Seesari.

Roojatzzi ikanantanakari:

—Panteniri irinta ikowakaakimir; eejatzi pantzityaanari riraga Tajorentsi ikowakaakimir.

²² Ikemaeyantawakaworini maawaeni iroka, ari rotsikanateeyanakarini, tekatsi paashini ikantaneeriri. Roojatzzi rookantanaari: jateeyaneeni.

Ikamantakiri Jesoshi saroseeyopaeni “Kyaryo, apiriintee eejatzi”

(Mr. 12.18-27; Rk. 20.27-40)

²³ Roojatzzi ipokapaaki saroseeyopaeni. Iitashiwitakawo eero apiriinta ñagae eejatzi, eero aatzi jenokinta. Ipokashitapaakiri, ikantapaakiri riraga Jesoshi:

²⁴ —Iyotaantatsiri, ikantzini Moeseeshi: “Eenitatsirika shirampari iina, omaanta tekatsirika itomi, aririka ikamaki, okameethatzzi ragaero iinani rirentzi itzimakaanteeyaaawori otomi. Itzimapaakirika otomi kimiwitanaka rirotaki ashityaarini rirentzini itomi”. ²⁵ Paerani eenitatsi atziri ikaateeyini 6 rirentzi. Itanakawori rantaritzi raawitaka iina, omaanta tee itzimakaero eentsite. Ikamashitaka. Ikantaka paashini rirentzi roojatzzi raantawitaawo rirori. ²⁶ Eejatzi rirori tee itzimakaero eentsite. Ikamashitaka rirori. Eejatzi ikimiteeyakani maawaeni rirentzipaeni, aawitawori iinani rirentzini. Tee itzimakagaeyironi eentsite. Ikamashiteeyakani maawaeni. ²⁷ Impaete okamae roori. ²⁸ Aririka ipiriinteeeyaneeni iinja, ¿ninkama iinanteeeyaaawoni? Tema iinanteeeyakawonika paerani maawaeni.

²⁹ Roojatzzi ikanantanakari rirori:

—Osheki pikompitakawo. Tee pikemaperotziro okantziri Iwaperite Tajorentsi, eejatzi tee piyotakoperotziri itajorentsiperotaki. ³⁰ Aririka ipiriinteeeyaneeni rañagae eejatzi, tektsi agaeroni iinja. Maawaeni piri-intaachini eero ragae iinapaeni. Omaanta ikimitakoeyaarin ronampiripaeni Tajorentsi jenokinta. ³¹ Riraga kamaawitachari ari ipiriintee iinja, tema piñaanatziro ikantziri Tajorentsi iwaperiteki: ³² “Naaka Tajorentsi, raapatziyanewo Awaraama, Ijaaka, Jakoowo”. Ñaakiro, tee ikantzi: “Raap-atziyawitanaga paerani”. Omaanta eeniro afi ishire janta jenokinta, roojatzzi ikanta raapatziyari iroñaka rootaki ipinkathariwenantarirai Tajorentsi.

³³ Ikemantawakawori iroka riraga piyotawenteeyakaririni ari imaeri-ianakini, rotsikanateeyanakarini, ikanteeyanakini:

—Kameetha ryotaantzi Jesoshi.

Ikamantziri Jesoshi oetaka okowakaaperoteeri Iwaperite Tajorentsi

(Mr. 12.28-34)

³⁴ Ikemaeyantakaririni warijeeyopaeni kameetha rakakiri riraga Jesoshi saroseeyopaeni, romaeryaakiri ipiyoteeyakani ipokashiteeyapaakirini rirori. ³⁵ Ikompitakayaarimi warijeeyopaeni. Ikaatziri apaani iyotaantzirori Iwaperite Tajorentsi, riyoperotziro okantziri. Ikantawitapakaari:

³⁶ —Iyotaanari, eenitatsi osheki iyotaakaeri Iwaperite Tajorentsi: ¿tsika otzimika kameethaperotatsiri kaminagaantsi akemijantaperoteri?

³⁷ Ikantawakiri rirori:

—Rootaki iroka kameethaperotatsiri: “Pinintashireperoteriroña kameetha Tajorentsi, riraga Awinkatharite. Pikyaaryoowentero pinintashireperoteri maawaeni pajankaneki, eejatzi maawaeni pishireki, eejatzi pikantyaani pikenkithashiryaaipiintyaari”. ³⁸ Rootaki anaakotantaperotatsiri maawaeni kaminagaantsi Iwaperiteki Tajorentsi. ³⁹ Eenitatsi paashini, kimitawori: “Okimita osheki pinintaperotaka eerori, pikimiteerira paashinipaeni atziri, pinintaperoteri maawaeni”. ⁴⁰ Aririka pantero iroka, aritaki pimonkaatero maawaeni rojankinatzirini paerani Moeseeshi, eejatzi rojankinatzirini riraga kamanantayitzirorini iñaani Tajorentsi.

¿Ninkama iriri Jesokirishito?

(Mr. 12.35-37; Rk. 20.41-44)

⁴¹ Enirowa ipiyoteeyakani warijeeyopaeni, ⁴² rojampiteeyakirini Jesoshi:

—¿litaka pikenkithashiryaakoktziriri Rotyaantanewo Tajorentsi, riraga Owawijaakotantatsini? ¿Ninka tomintaririka?

Ikanteeyananakirini:

—Riotaki icharineeteni Iraviri.

⁴³⁻⁴⁴ Ikantakiri:

—Paerani ojankinatakaakirini Ishire Tajorentsi Iravirini, ikanantariri Rotyaantanewo Tajorentsi: “Nowinkatharite”. Rooma piyotziro Iwaperite Tajorentsi okantzi: “Riraga Pawa Tajorentsi ikantakiri Nowinkatharite: ‘Pijekimotena nakoperoki, pitsipatena eewawenteri atziripaeni. Pijkeekanaki roojatzi nothonkantakaari maawaeni kijakimiri’”. ¿litakaya ikanantariri riraga Iravirini paerani: “Nowinkatharite”? ⁴⁵ Tema ikenkithatakotzitarini Iravirini Rotyaantanewo Tajorentsi, ikantziri: “Nowinkatharite”. ¿Tsika ikantyaari Iravirini ipinkathateeri icharineeteni impaetatsiri ijeki? Rooma ametakawo apinkathatziri jewateeri.

⁴⁶ Imaeritashiteeyananakani maawaeni. Tekatsi akaneentsini eechonkiini. Eejatzi paashiniki kitejiri tee rapiiteeri rojampitaneeeri: ithaawantanakari rapiiterimi rojampiterimi eejatzi.

23

Ikantzi Jesoshi: “Eero poshiyakotari iyotaantawitawori Iwaperite Tajorentsi eejatzi warijeeyopaeni”

(Mr. 12.38-40; Rk. 11.37-54; 20.45-47)

¹ Ikanteeyakirini riraga Jesoshi piyotawenteeyakaririni eejatzi naaka maawaeni ryotaanewo:

² —Irira iyotaantzirori Iwaperite Tajorentsi eejatzi irira warijeeyopaeni rirotaki poyaatariri Moeseeshini ryotaantzirori Iwaperite Tajorentsi.

³ Okameethatzi pikemijantaperotero oetarikapaeni ikantzimiri omaanta eerokya pantziro rantziri. Ikantawitzimi: “Ari pikantya, kameetha pijeki”, omaanta tee ijeki rirori kameetha. ⁴ Osheki opomeentsitzimotzimi pantero maawaeni ryotagaeayakimirini, omaanta

tee riyoteemi maawaeni okaatzi okantziri Iwaperite Tajorentsi, eejatzi tee ipomeentsiwenzimaetawo rantero rirori oetarika ikantawitakimiri. ⁵ Rantashitawo oetarikapaenii piñaantaanyaariri, piñaaperotantyaariri ikameethatzi. Tema romaaawakotakawo eechonkiini Iwaperite Tajorentsi rakoki eejatzi roojoyinatakotzitakawo ipankaki, pikanantyaari kameetha raapatziyaperotakari Tajorentsi. Eejatzi rowaneentashitaka ikithaashitdziitakawo ikantakaaperotashitaka. ⁶ Aririka rowaeyani, ikowaperotzi itsipatapiintyaari jewatatsiri. Eejatzi ikimitzitaka janta pankotsiki ipiyotantapiintarira joriiyopaenii ikowaperotaki itsipatapiintyaari jewatatsiri janta. ⁷ Ikantakaaperotashitaka rootaki ikowantakari kameetha piwethateeyaaarini janta aririka pitonkiyotaari, eejatzi ikowaki pikanteeyerini: "Iyotaanari". ⁸ Omaanta eeroka, eerokya pikimitakotari. Eero pikowanaki ikanteetemi paashinipaenii: "Iyotaanari" iñaaoperotantemiri. Maawaeni eerokapaenii pimonnaatwakagaeyakanii: eeroktaki yeeyipaenii. Apatziro Rotyaantfanewo Tajorentsi rirotaki pikanteri: "Iyotaanari". Okameethatzi apatziro piñaaperoteri irira. ⁹ Jaka kipatsikika, eero pikantashitari paashinipaenii atziri: "Pawa". Omaanta apatziro pikante Pawa riraga jeeekatsiri janta jenokinta, eejatzi piripero eejatzi pirithori jaka kipatsiki. Tekatsi paashini pikanteri. ¹⁰ Eejatzi eero pishinetziri ikanteetashiyitzimini: "Neewatzinkarite". Eenitatsi peewatzinkarite papintzite apaani, naaka riraga Rotyaantanewo Tajorentsi. ¹¹ Pikowakirika peewawenante, pityaawo pamitakotapiinteri paashinipaenii, pineshironkateeyerini. ¹² Aririka pikante: "Naaka Neewawentemii, osheki nokameethatanaki", aritaki ipashiwentakagaeyakimini Tajorentsi. Aririka pikante: "Tee nomatziro apaniroeni, Pawa Tajorentsi, pamitakotenari", roojatzii ramitakotemi, imatakayemiro, kameetha peewawenantyaariri atziri. Rootaki ikanteeyanarini rirori.

Ashironkaamatsitemiini iyotaantzirori Iwaperite Tajorentsi eejatzi warijeyopaenii

¹³ Roojatzi ikantakiri Jesoshi iyotaantayitzirorini Iwaperite Tajorentsi eejatzi warijeyopaenii:

—¡Ashironkaamatsitemiini! Poshiyakaawaetashita paapatziyari Tajorentsi, omaanta osheki pamatawitakiri atziripaenii. Kaari rooperiori piyotaakirikari oetarika ikowakaawitariri Tajorentsi riyooteeririmii. Ashironkaamatsitemiini iinja powashironkaeyaani osheki. Eero paapatziyari Tajorentsi ipinkatharitakaantemiri pajankaneki, eejatzi eero pishinetziri paashinipaenii atziri raapatziyari ipinkatharitakaantyaariri rajankaneki. ¹⁴ Eeroka oshiyakaawaerintzi pikoyi paapatziyaarimi Tajorentsi. Osheki netakotakimi rooma paata ari powashironkaaperoeyakaani. Osheki paapithatakiro opankopaenii kamaentsiripaenii oemi. Tema osheki pojanthaashitawo pamanaawaetashitari Tajorentsi. Omaanta tee paapatziyawo iñaaani, rootaki rowashironkaantaperotemiri osheki iinja. ¹⁵ Eeroka poshiyakaawaetashita paapatziyarimi Tajorentsi. ¡Ashironkaamatsitemiini! Pamatawitantaki osheki rootaki powashironkaanteeyaaarini iinja. Piyaate tsikarika piyotaantawityaaririni paashinijatzitatsiri atziri ipeyanteeyari joriiyo roshiyantemirimii eerori rootaki riyaatanteeyaaarini rirori janta paamariki kaari tsiwakanitatsini. ¹⁶ Osheki rowashironkaaperoeyemini Tajorentsi. Pikimitakoeyakarini kaari kokichaatatsini ikathatziri paashini kaari kokichaatatsini. Rooma tee piyotziri Tajorentsi rootaki kaari pimatantawo piyoteeri kameetha paashinipaenii atziri.

Pikantashita: "Aririka akante: 'Tema ojeeki Tajorentsipanko jaga, piyotantyaari eero namatawitzimi', pikenkithashiryaashita okameethatzi pamatawitante. Omaanta aririka pikante: 'Tema ijeeki oorotatsiri pinatachari osheki janta Tajorentsipankokinta, piyotantyaari tee namatawitzimi', tema kyaaryoopero piñaawaetziro kameethatatsiri. Kaari pamatawitantz'i". Teemaeta piyotziri Tajorentsi oetarika ikowakaakimiri. ¹⁷ ¡Eeroka majontzi! Osheki piñaawaetashitaka. ¿Oetaka kameethaperotatsiri? ¿Oorama kameethaperotatsiri? ¿Tajorentsipankoma kameethaperotatsiri? Tema rashī Tajorentsi Tajorentsipanko. Rootaki Tajorentsipanko kameethatakanakiriri ooro ojeekakira. ¹⁸ Eejatzi tee okameethatzi pikantashita: "Aririka akante: 'Tema ari ojeekaki aritaari ataantapiintanariri Tajorentsipankoma apira, piyotantyaari eero namatawitzimi', aritaki ayotzi kameetha amatawitante. Omaanta aririka akante: 'Tema ari eenitatsi apira owamaakiniri Tajorentsi ataakiniri janta aritaariki, piyotantyaari eero namatawitzimi', ari piyotzi eero amatawitantziroña. ¹⁹ ¡Eeroka kaari kokichaagantzi! ¿Itaka kameethaperotatsiri? ¿Riotakima pipira? ¿Rootakima aritaari pitaantanariri Tajorentsi pipira kameethatatsiri? Tema rashī Tajorentsi aritaari rootaki ikameethatakanakawori pipira pitaakiniri Tajorentsi". ²⁰⁻²² Paminetya, osheki pikantzi: "Tema eenitatsi aritaari ataantapiintanariri Tajorentsi apira", "Tema eenitatsi Tajorentsipankoma", "Tema eenitatsi jenokinta", oetarikapaeni. Tee okameethatziroña pikantashitawo, tema piitashiwitaka okameethatzi pamatawitantz'i. ¿Piitashitam tee ijeeki Tajorentsi? Tema ijeeki, eejatzi ari rowashironkaawentakimiro maawaeni pamatawitantzira. ²³ ¡Ashironkaamatsitemiini eerokapaeni warijeeyopaeni eejatzi iyotaantziroripaeni Iwaperite Tajorentsi! Poshiyakaawaetashita paapatziyari Tajorentsi, aritaki rowashironkaaperoeyakimini Tajorentsi iinja. Pamine, eenitatsi eechonkiini panteeyawitakarini. Paakirika piyorikite 10, apaani pipakiri Tajorentsi. Paakirorika piwankiri 10 meentashi, koraanteroshi, eejatzi tsirikana 10, apaani maawaeni irowa pipakiriri Tajorentsi. Rootaki panteeyawitakarini eechonkiini; omaanta eenitatsi kameethaperotatsiri ikowakaaperotawitakimiri Tajorentsi, omaanta iroka tee pantziro. Ikowakaawitakimiri kameetha pijkeki, eejatzi pineshironkateeyerini paashinipaeni atziri, eejatzi pikyaaryooventeniri okaatzi ikowakaakimiri rirori. Maawaeni iroka roowitaka kameethaperotawitachari panteeyerinimi. Eekirokya impaetanaki pipashityaari apaani oshi, maawaeni paakiri.

²⁴ ¡Tee piyoteeyini! Pikyaaryooventawitakawo kaari ikowakaaperotzimi Tajorentsi. Omaanta tee pikenkithashiryaaperotzimaetawo rowaga ikowakaaperowitakimiri. ²⁵ ¡Ashironkaamatsitemiini eerokapaeni! Poshiyakaawaetashita paapatziyarimi Tajorentsi, omaanta ari pashironkaperoteeyaaani iinja. Pamine, pameteeyawitawoni pikwiayironi pimirimento eejatzi piwiratote otapiikira, omaanta tee pikwiamaetawo inthomaenta. Rootaki oshitzinatfantayitakarini rooma tee pikwiyo. Eejatzi pikimiwitakawo eerori pimirimento. Ñaakiro, osheki pikwiwayitzironi pakopaeni, pikameethatantyaarimi, omaanta tee paapatziyari Tajorentsi pikameethatantyaarimi. Tema eejatzi piñaawenashiryagaero oetarika pashitantawori apatziro eeroka, osheki paapithatatziri okaatzi rashitari paashinipaeni. ²⁶ ¡Eeroka warijeeyopaeni kaari kokichaatatsi: tee piyotziroña pantero kameethaperotatsiri! Aririkami pityaawomi pikameethatanakimi pajankanekei, roojatzimi okameethatzimi iñaaperotantemirimi Tajorentsi, eejatzi atziripaeni. ²⁷ Ashironkaamatsitemiini eerokapaeni iyotaantawitawori Iwaperite

Tajorentsi eejatzi warijeeypaeni. Osheki pamatawitantaki rootaki rowashironkaanteyemirini osheki iinja. Pikimiwitakawo omoo impeeta romonkyaatapiinteeitaraki kaminkari. Kameetha owaneenkwitaka jeñokiini kitamaawitaka omaanta janta inthomaenta shitzitanaki. Tema yeekitaki itonkipaeni kaminkari.²⁸ Ari pikimitzimotakari atziri pikameethatemi, iñaaperoeyantawitakimirini riroripaeni okaatzti pantziri. Omaanta tee pikameethatzimaeta pajankaneki, osheki pamatawitantzi eejatzi osheki pantapiintakiro kaari kameethatatsi. Tema pitheeyashita.²⁹⁻³⁰ Ashironkaamatsitemiini eerokapaeni oshiyakaawaerintzi paapatziyari Tajorentsi: osheki powashironkaaperoeyaami iinja. Iroñaka pimoontashiyitakirini kaminkari powantyaanariri itonkipaeni. Eejatzi poshirinkantayiteyaaririni itakaantaworini kamaentsiri paerani, riraga rowamaayitakirini pichariniiiteni riraga kamanantayitzirorini iñaani Tajorentsi. Powaneenkayitakironi rowaga tonkitsipankopaeni kameetha. Pikitayitantaririni kameethatzinkaripaeni rajankaneki eejatzi pikantayitzini: “Aririkami nokoñaatztakyaami paerani ikoñaatantakari nochariniiteni, eero nokempiyarimi naari nowamaeri rirori, riraga rowamaakirini nochariniiteni”.³¹ Tema pikantakotashita eeroka apaniroeni aririka pikanteeyeni: “Nochariniiteni riraga owamaakiririni kamanantayitzirorini iñaani Tajorentsi”. Pikantashita: “Eero nakawentziri riroripaeni”. Pamatawintoshita eeroka apaniroeni.³² Eejatzi eerori iroñaka pikimitakoeyakarini. Eerokateeyakini owamaantatsiri. Aritaki pimonkaatakiro ritakarini rantakiri pichariniiiteni.³³ ¡Komiteeyakimini maankipaeni! ¡Tee pikameethaperoyeyini! ¡Piitashitama eero rotyaantzimi Tajorentsi paamarikinta kaari tsíwakanitatsini?

Ikanteeyakirini Jesoshi: “Rowashironkagaeyakimini Tajorentsi”

³⁴ Eekiro ryaatatyye ikanteeyirini riraga Jesoshi:

—Notyaantemiri iinja paashinipaeni kamanantayiterorini iñaani Tajorentsi, rirotaki iyothaniperotatsiri eejatzi iyotaantatsiri. Notyaantemiri ryoteemi kameethaperotatsiri. Niyotakotakimi eero paapatziyawakari, inta powamaagaantashiteeyawakyaarini apaanipaeni eejatzi apaanipaeni pikentakotakaantawakiri, riraga paashinipaeni pipajapajaatakanawakiri janta pankotsiki pipiyotantapiintarira eejatzi paashinipaeni pikijagaantawakiri tsikarika ikinayitakini.³⁵ Eenitatsi kaari kameethatatsiri pantakiri eerori, rooma inimotakimi eerori ikameeta maawaeni kameethatzinkari: ritanakawo rowamaakiri riraga Aweerini eejatzi ikantanaka paashinipaeni maawaeni riro oweyaantapaakawori riraga Jakariiyashi, riraga itomini Perekiiyashini. Rowamagaeyakirini pichariniiiteni janta Tajorentsipankoki okaakiniki aritaari. Aririkami pikoñaatztakyaami eeroka, arimache pakawentakirim eerori. Ashi moyiro powamaantzi.³⁶ Kyaaryootaki iroka nokantemiri. Ari pimonkaatakiro paata iroka nokantakimiri. Ashi moyiro powashironkaeri paashinipaeni atziri kameethari. Rootaki ikanantemiri Tajorentsi: “Eenitatsi pantani”.³⁷ ¡Ashironkaamatsitemiini jerojareejatzipaeni! Eerokapaeni powamaakiri rotyaantane newopaeni Tajorentsi: tema pompojantakari mapi kamanantayitzirorini iñaani Tajorentsi. Okimitziriranki tyaapa ojatewirinikitziri iyeerikini eejatzi nokimiwitaka naari, osheki netakoeyawitakimini. Nokowaperowitaka nowawijaakoeyemini omaanta eerokapaeni tee pikowaeyini namitakoeylemimi.³⁸ ¡Pamine sha! ¡Iroka pinampika! Eero roojatzi okanteetatyeyaaani ojeeki. Tekatsi jeekatsini iinja.³⁹ Eero papitaana piñagaana. Apatziro piñagaena iinja, pikanteerika:

“Kameethaperotaki Jesoshi, rirotaki Awinkatharite, riraga Rotyaantanewo Tajorentsii”. Osheki pikimoshirewenteeyanakinani.

Rootaki ikantakiriri riraga Jesoshi.

24

Iinja ishekiroryagaeteero Tajorentsipanko (Mr. 13.1-2; Rk. 21.5-6)

¹ Roojatzi riraga Jesoshi riowyantanaa Tajorentsipankoki roowiteenchami riyaate. Nopokashiteeyapaakirini naakapaeni riyotaanewo naminakagaeyapaakirini notsikanateeyapaakawoni maawaeni Tajorentsipanko. ² Roojatzi ikanteeyantanakarini:

—Piñaakiro maawaeni iroka pankotsika. Piñaawitakawoka iroka pankotsi iroñaaka. Iinja eero piñaagaero eejatzi. Ari ishekiroryagaeteero maawaeni okaatzti piñaawitakarika.

Tsika okantyaaka rootzimateentsirika ipokae Jesoshi (Mr. 13.3-23; Rk. 21.7-24)

³ Roojatzi niyaateeyanakini tonkaariki oetachari Oriiwomashi, notonkaanaki, tonka, tonka. Areeteeyapaakinani tonkaariki, ari imakoryaapaaki Jesoshi, roojatzi niyaatashitapaakiri nokantapaakiri:

—Pikamanteeyenani: ¿tsika okaateka ishekiroryaanteetyaawori irona pankotsipaeninta? ¿litaka iyotakayenani iinja tsika okaateka pipokantyaari, othonkanteeeyari kipatsi?

⁴ Ikantanakiri riraga Jesoshi:

—Kyaaryoowa, ramatawiteetzimikari iinja. ⁵ Eenitatsi oshekini pokatsinipa kantapaentsini: “Naaka Rotyaantanewo Tajorentsii”. Kyaaryoowa, ramatawitatshitzimikari riori. ⁶ Pikemakopiinteeyeroni omanantaantsi. Pikemaeyerini atziri ikanteeyeni: “Romanatawakaeyatyani paashinikipaeni nampitsi eejatzi paashiniki kipatsipaeni”. Omaanta eero pithaayi. Aritaki okantyaari romanatawakagaeyaani. Omaanta tekira omonkaatyta maawaeni nokantakimir, okaatzti nopokanteeeyari. Tekira othonkanteeeyari kipatsi. ⁷ Atziri jeekatsiri paashinikipaeni kipatsi ari ikijawakayitanakyaani jeekatsiri paashini kipatsi, romanatawakagaeyani. Itashyeeyanakini, tekatsi ragae rowaeyaarini. Opokaeyeni antawo mantsiyarentsi. Omoyekapiintya kipatsi, othonkayiteroni tsikarikapaeni omoyekya. ⁸ Omaanta tekiraata omaperota ikemaatsitaperotyaawo katsiri.

⁹ Eekiro riyaatatyee ikamantawakina:

—Riyotakimirika atziri paapatziyakina, rowashironkaeyemini ikemaatsitakagayemironi osheki katsiri, rowamaakaantemi, ikijeeyemini maawaeni atziri. ¹⁰ Osheki atziri piyakoteeyaworini ranteero kaari kameethatatsi, roojatzi rookanteeyawo raapatziyari Tajorentsii. Ikijayitanakirini paashinipaeni kemijantzinkari raakaantayitanakirini. ¹¹ Iinja osheki pokatsini theeyashitachani ikantapaakai:

—Naaka iyotaantzirori Iwaperite Tajorentsii. Tema ramatawiteeyashitakarini osheki aapatziyawitakariri Tajorentsii. ¹² Eekiro riyaatanakityee atziri rantaperotanakiro kaari kameethatatsi rootaki rookantanakyaawori inintashiretawakagaeyani eejatzi ipeyakontanakyaariri Tajorentsii. ¹³ Omaanta ninkarika kijokiro owaperotenani ikanteetatyaaani raapatziyana rirotaki nowawijaakoteeyerini. ¹⁴ Piyaatakayero noñaaani eerokapaeni maawaeni aapatziyanari. Piyaate maawaeniki kipatsi, pikanteri maawaeni atziri nokowaki

nowawijaakoteri. Omonkaatapaakyaarika maawaeni iroka, roojatzikya monkaatantapaakyaarika maawaeni nokantzitakimiri.

¹⁵ Eekiro ryaataatyee ikamanteeyanani:

—Paerani rojankinatzini Intañeeri, riraga kamanantzirorini iñaani Tajorentsi, ikantzini: “Aritaki ipokaki iinja jaga Tajorentsipankonakiki osheki kaari kameethatatsini, reewanaperoeyashiteeyakawoni okaatzjeekayitatsirini jaga maawaeni”. Tema piyotziro iroka nokenkithatakotziri. Aririka piñaakiripa atziri rantapaakirorika okaatzji rojankinatzitakarini riraga Intañeeri rootaki piyotantanakyaari irika nokamantakotziri.

¹⁶ Roojatzi pijeekirika Joreeyaki, pishintsite pishiyeyyanakini tonkaari.

¹⁷ Aririka pijeeki inkokironta, eero pikyaapanaaatzi inthomaeki pipankoki paantapanaatyaaawori powaagawo, inta pishiyaperotanaki. ¹⁸ Eejatzi aririka pijeeki owantsiki, eero pipiyashitapanaatwo paashini piithaari.

¹⁹ Ashironkaamatsiteroeni paata tsinani motzitatsiri eejatzi thotatsiri eentsite eero omatziro oshiyaperota kameetha. ²⁰ Kaakitaki iinja pishiyapithathyaa omaanta pamaneri Tajorentsi okantya eero pishiyanta inknipataetki, eejatzi eero pishiyanta kitejiriki pimakoryaantapiintari.

²¹ Eejatzi ikantzi riraga Jesoshi:

—Osheki piñeero iinja opomeentsitzimoteeyemini. Pashironkaaperotanakyaaroña, panaakoteri maawaeni itakaantaworini atziri paerani pashironkaeya. Eejatzi eero iñiilo maawaeni impaetatsiri ijeki okimitaka iroka. ²² Arirkami ojamanitemi rowashironkaeyemimimi, ari pithonkaeyakaanimi, omaanta riraga Tajorentsi ikaminthaakiri maawaeni aapatziyariri riyyoyeeyakirini, rootaki kaari ojamanitanya rowashironkaemi. ²³ Eejatzi iitarika kantakimini: “Areetapaaka Rotyaantanewo Tajorentsi riraga Owawijaakotantatsiri; pamineri irika”. Paashini kantatsini: “Irinta areetapaaka janta”. Omaanta eero paapatziyari. ²⁴ Kaakitaki iinja osheki amatawitantatsiri ikantapaaki: “Naaka Jesokirishito riraga owawijaakotantatsiri”. Omaanta kaari. Paashinipaeni ikante: “Naaka iyotaantzirori Iwaperite Tajorentsi”. Ramatawitantayitapaakyaaaririni atziripaeni tema itajorentsijeempiyaashitapaakyaa.

Eejatzi aritaki ikowakowawitakya tsika ikantya ramatawitantyaaririmi riyyoaaperotayitakirini Tajorentsi. ²⁵ Ñakiro, nokamtztakimiro tsikarika okantyaari iinja. ²⁶ Rootaki piyotantyaari aririka ikanteetemi: “[Pamine] Irinta Jesokirishito janta okaankiteronkuutziinta”. Eero patsipetawo piyaatzi. Eejatzi ikanteetemirika: “Irika jaka Jesokirishito inthomaekika pankotsi. Eero pakiri”. ²⁷ Kyaaryo, nopoñaka naaka jenokinta, natziriperotapaaki kipatsikika. Eejatzi nopyiee paata janta jenokinta. Tema romapokimi tariito rookathathyaarika, tyaaooo, ithotyaapaentziro janta jenokinta. Ari nokimiteeya iinja naari aririka nopalae: nomapokaeyapaemini omaanta ari piñeyawaenani maawaeni. ²⁸ Tsikarika ijeki kaminkari, eejatzi rewoteenkatzita riroripaeni tzijo. Eejatzi okimitaka, tsikarika ijeki kemijantawitanari, eejatzi tsikarika ijeki kaari yotana, rootaki ipokashitantyaariri oshekini amatawiterini.

Aritaki okantyaari iinja ipokanteeyaaarini Jesoshi

(Mr. 13.24-37; Rk. 21.25-36; 17.25-36; 12.41-48)

²⁹ Eekiro ryaataatyee ikantzi riraga Jesoshi:

—Ari osheki opomeentsitzimoeyanakyaarini atziri, maawaeni: osheki rowashironkagaeyanakyaaniroña. Roojatzi intsipaete itsiwakanaki oorya, eejatzi riraga Kashiri, eejatzi ipariyanaki ompokiro maawaeni: tema shewatanaka maawaeni jenokijatzi. ³⁰ Roojatzi nokontetantapaakyaa janta

jenoki. Roojatzi retakotanteeyanakaani maawaeni theenkaeyanarini. Ari ifeeyawaenani maawaeni atziri nokinapae menkoriki nopolinkatharitaperotapaaki, noshipakiryaaperotapaaki. ³¹ Itziwootanakiri nonampiri tziwoorentsi. Maawaeni nonampiri ipokaeyapaakini ipiyoteeyerini maawaeni aapatziyanari. Maawaeni ikaatzni niyoyeeyakirini. Ithotyeeyerini ipiyoteeyerini riroripaeni maawaeni paashinikipaeni kipatsi.

³² Paashini ikamantteeyanarini riraga Jesoshi:

—Iroñaaka noshiyakaawentemiro iyera. Pikemijantena. Rooteentsirika oshookaempekitanaki, eejatzi oshitanee, ari piyotanaki rooteentsi okithokitee. ³³ Eejatzi okimitakya, aririka piñaawakiro iroka nokantzitakimirika piyotantyaari rooteentsi nopolake. ³⁴ Eerorka pikamita, aritaki piñaawakiro maawaeni iroka nokantzitakimirika. ³⁵ Othonkaeya jenokitatopaeni eejatzi kipatsi omaanta noñaani eero othonka. Omonkaataperoteeya kameetha maawaeni nokantakimirka. ³⁶ Omaanta tekatsi yotatsini tsikarika okaate; tee riyyotzi ronampiri Pawa, eejatzi naari tee niyyotzi. Apatziro Pawa apaniroeni yotatsiri. ³⁷⁻³⁹ Paerani eenironi ijekinki riraga Noe, rowapiinteeeyani atziripaeni, ishinkiteeyani, raapiinteeeyani iina, maawaeni. Tee ikenkithashiryaaaktanawa ikañtawitakariri Noeni: “Kaakitaki oonkawo”. Roojatzi iinja rotetantanaka riraga Noeni ipitoki, rashitakotanaka, jaae tok. Omapokapaakiri antawo inkaani, oonkanaka. Ithonkaeyakan, maawaeni theenkakiriri, itsitsiyeyakini. Eejatzi ikimitakya iinja maawaeni theenkaeyanarini, aririka omonkaatapaakya nopolanteyari, eero ikenkithashireeyani nomapokaeyapaakirini. Rootaki nowashironkaanteeyapaakyaaririni, eero nowawijaakotapaeri. ⁴⁰ Roojatzi itsipatatakayaarika apite shirampari thamaetsiri janta owantsiki, apatzirorika apaani rirotaki aapatziyanari. Tema rirotaki irira naaneeri notsipatanakyaari, omaanta paashini, eero naaneeri. ⁴¹ Okimitakya, eenitatsi apite tsinani tonkayitzirorini shinki, apatzirorika apaani aapatziyanari tema rootaki irowa naaneeri notsipatanakyaawo, omaanta paashini eero naaneeri.

⁴² Rootaki paamagaeyantanarini, pikenkithashiryaaapiintena. Tee piyotzi tsika okaateka nopolantyaari. Nomapokapaakimikari. ⁴³ Okimitaka riraga ashitawori ipanko ikoshiteetziri. Riyoteemi rooteentsi ipoke koshitantsini, ikakitemi, eero ishinetzirim ikooshiteri, inta roepiyawaerimi. ⁴⁴ Eejatzi naari, paamagaeyantanarini, nomapokaemikari. Paapatziyaperooteena, tee piyotzi tsika okaateka nopolantyaari. ⁴⁵ Pikimityaari onampirentsiri kameethari, ikyaryooowentziniri maawaeni ikantziriri iwaatorote. Ikanteririka irira: “Eero ka wetsikapiinterorini rowanawo notyompi, pipapiinteri kameetha”. Tema imonkaatakiniri. ⁴⁶⁻⁴⁷ Aririka infeeri kameetha riwetsikapiintziro rowanawo, ari ikanteri: “Kameetha pantziro nokowakaakimiri. Iroñaaka eero ka kempoyeenawoni maawaeni tzimimotanari. Kameetha nopolatemi, niyyotzi eero pamatawitana”. Tema ari ikimoshiryaanaki ronampiri. ⁴⁸ Omaanta eenitatsirika paashini ronampiri, kaari aapatziyarini riraga iwaatorote. Ikantashitya irinta: “Iroñaaka jatanaki nowaatorote, eero ipiyita”. ⁴⁹ Roojatzi irinta kaari aapatziyariri ikijiri paashinipaeni onampirentsiri, ikapojapiintziri, ishinkitapiinta. ⁵⁰ Roojatzi romapokapaakiri riraga iwaatorote, tee raamayari riraga kaari aapatziyarini. ⁵¹ Roojatzi rowashironkaapaakiri, rotyaanteri janta intenantia, itsipatantyaariri amatawitantatsiri. Roojatzi janta riraaperotanakya eejatzi osheki ikemaatsityaawo katsiri. Eero pikimitari eero, inta irintakya pikimityaari riraga aapatziyaperotariri iwaatorote.

Rootaki ikantziriri riraga Jesoshi.

25

Roshiyakaawentakiro 10 ewankawo

¹ Eekiro ryaatatyee ikamanteeyakinani riraga Jesoshi:

—Iroñaka noshiyakaawentemiro tsika ikanta Tajorentsi reewawenantzi. Enitatsi ewankawo 10, kowatsiri aminakowentero rayi iina apaani shirampari. Okanta otsitenitanaki roojatzi aantayitakan oorentamento ootanakyaaari iinja aririka ipokaki. ² Okaataki ewankawo iyoperotaneentsiri apawakooni eejatzi okaataki kaari yotsatsini apawakooni. ³ Aawiteeyanakawoni irowa ootamento, omaanta tee ayiro oyeenka oriwo ootantyaari roori. ⁴ Omaanta roori yotsatsiri, aakotanakiro oyeenka oriwo ootantyaari awotsikira. ⁵ Ikantaka rojamaritaki aatsini iina, tekiraata ipokeeta. Agaeyakironi owochokini, roojatzi omaanteeyanakanai maawaeni. ⁶ Okantaka niyankipaeteki tsiteniri, okemataatzti kaemaantsi: “Kaakitaki aatsini iina, piyaate paminawakiri”. ⁷ Roojatzi opiriinteyantawitanakanai maawaeni, owetsikawitanakari ootamento. ⁸ Okantawitakawo kaari yotsatsini: “Pipena naari eechonkiini pashi oyeenka oriwo rooteentsi nothaatakotya nashi naari”. ⁹ Akanakiro rowaga yotanitzinkawo: “Eero nopimi. Iyotaka nashi naari. Tekatsi nopenmiri eerori. Nopakimirika tekatsi nootaneeya naari. Piyaate pamananantapaentya eerori ipimantapiinanta”. ¹⁰ Roojatzi iyaatantanaka amananantapaenta. Aritaki areefzimatapaaka riraga aatsini iina kyaanaki janta ithomaenta pankotsiki. Itsipaeyanakawoni wetsikaenchari inkaaganki. Ashitakotanaka pankotsiki, tog. ¹¹ Roojatzi opiyawitapaaka kaari kenkithashiryaaacha, okantawitapakari: “Pashitareenawo naaka jaga”. ¹² Omaanta ikantawakiro: “Tee niyotzimi, ninkarika. Tee nokoyi pipokashitena jaka”. ¹³ Pikenkithashiryaaakoperotawakiro iroka noshiyakaawentakimirika. Okimitakaga yotaniperotatsiri aamaaperotakari aatsiri iina, eejatzi pikimitya eerori: paamayena tee piyotzi tsikarika okaatzti nopokanteeyaaari. Yotaniperotatsiri kijokiro owakotziro oyeenka oriwo. Eejatzi pikimitya eerori, kijokiro powanakiro Ishire Tajorentsi.

Roshiyakaawentakiri Jesoshi atziripaeni ipaetakiri koriki roshekeeri (Rk. 19.11-27)

¹⁴ Eekiro ikantatzi riraga Jesoshi:

—Eejatzi noshiyakaawentemiro paashini tsika ikanta Tajorentsi ipinkathariwenantzi. Kimitaka ryaatziranki ashaagantachari paashinikinta nampitsi. Ritakawo ikaemaeyakirini ronampiri maawaeni, ikanteeyakirini: “Nokowaki poshekeenari noorikite”. ¹⁵ Roojatzi ipantakari apaani ronampiri koriki 5.000. Ikantakiri: “Ajaa, poshekeenarira noorikite”. Rakanakiri: “Jee, aritaki”. Eejatzi paashini ipakiri rirori: ipakiri ikaatzi 2.000, osheki ipinataka. Ikantakiri: “Ajaa, poshekeenarira”. Rakanakiri: “Jee, aritaki”. Eejatzi paashini ipawitakari rirori ikaatzi 1.000. Ikowawitaka roshekeenirimi. Eejatzi ipinataka rirori osheki. Riro ipaperoetakiri osheki yotaniperotatsiri. Omaanta riraga yotsatsiri eechonkiini tee ipaperoetziri osheki. Ipaeyakirini maawaeni roojatzi ryaatantanaka ashitariri iyorkite paashiniki nampitsi. ¹⁶ Riraga aaperoteentsiri koriki 5.000 ryaatanaki, roshekyaaperotantyaanariri iyorkite iwaatorote. Ikantaka riyomparitaka; roojatzi raantaka paashini koriki 5.000. ¹⁷ Eejatzi riyomparitaka rirori agaentsiri 2.000. Eejatzi roshekitakiniri: raaki rirori paashini 2.000. ¹⁸ Omaanta riraga aawiteenchari 1.000 raanakiri rotetashitanakari omooki kipatsi.

¹⁹ Ojamanitakotaki iwaatorote. Ikantaka iinja roojatzi ipiyantapaa ipankoki. Ikantapaakiri: "Iroñaaka pamaenari maawaeni noorikite. Nokoyi niyote tsika ikaataki". ²⁰ Roojatzi ipokantapaaka ipaetanakirira paerani 5.000, ikantapaakiri iwaatorote: "Irika piyorikite pipanakinaranki eejatzi irika paashinika piyorikite 5.000 rirotaki naakiri niyomparitantakari". ²¹ Roojatzi ikanantawakari iwaatorote: "Kameethatak! Pimataperotakiro nokowakaakimiri. Pikyaaryoowentakiro eechonkiini piyomparitaka rootaki iroñaaka nopantemiri paashini osheki. Eeroka aminakaanteroni. Iroñaaka pipokanaki jaka, pikye pitsipatena akimoshireeyeni". ²² Roojatzi ipokantapaaka riraga ipaetanakirira paerani 2.000, ikantapaakiri iwaatorote: "Ajaa, irika piyorikiteka pipakinari. Niyomparitaka osheki, noshekyaantakimiriri. Naakimini paashini 2.000". ²³ Ikantawakiri iwaatorote: "Kameethatak, pimatakinawo nokowakaakimiri. Pikyaaryoowentakiro eejatzi piyomparitaka, rootaki nopantemiri paashini osheki. Eeroka aminakaanteroni. Iroñaaka pikyee jaka pitsipatena akimoshireeyeni". ²⁴⁻²⁵ Rimpautapaaki riraga aawiteenchari 1.000, ikantawitapaakari: "Niyotakimi eeroka, tee pimeshironkatantzi, osheki nothaawantakimi. Noetakaamintheetzi noshekyaakimiririka piyorikite, ari paapithateenarimi maawaeni, rootaki kaari niyomparitanta. Rootaki nokitatantakariri piyorikite inthomaeki kipatsi. Irika piyorikiteka, pagaeri". ²⁶ Roojatzi ikantawakiri: "Tee okameethatzি pantziri, osheki piperataka. Piywitaka nokowawitaka naari roshekitanakimi noorikite. ²⁷ ¿litaka kaari pipantari riraga kempoyaapiintziriri koriki? Ari pipakirimi iriranki, ipinatawaenami, apawo naantakyaarimi. Eejatzi ipitawaenarimi maawaeni nashipero naari". ²⁸ Roojatzi ikantawakiri riraga paashini ronampiri: "Paapithateri noorikite, piperi riraga oshekyaakinariri iroñaaka 10.000. ²⁹ Nopaperoteri osheki riraga ashaagantaperotachari, omaanta riraga kaari ashaagantaperowitacha otzimimowityaaririka eechonkiini aritaki naapithatakiri tekatsi jeekmotaneerini. ³⁰ Iroñaaka irika paanakiri janta pookeri otsiteniperotzinta rowaga paamariki kaari tsiwakanitatsini, tee ikameethatzি. Nokowaki ikaateri maawaeni riraga riraaperotya eejatzi kemaatsitakawori katsiri. Janta riraawaetyaanta, ratsikaekityaanta. Tyakiririri, tyakiririri".

Inja Jesoshi ikantakowenterini maawaeni atziri

³¹ Ikamanteeyananri riraga Jesoshi:

—Naaka poñaachari jenokinta, nokoñaatapaaki jaka kipatsikika. Rooteentsi niyaatanee, roojatzi ari nopye, notsipatyaari maawaeni nonampiri. Nopokantyaari, arimache nopinkatharentsitaapaaki, notsipatapaakyaari maawaeni nonampiri. Nopinkatharentsiperotapaaki, ipinkathaperoyawakinanri maawaeni jeekatsiri. ³² Nopiyoteeyapaakirini iinja maawaeni atziri, poñeyapaencharini paashinikipaeni kipatsi. Nokimitakotaari ashitachari ipirapaenri rinashityaaririka: rinashitakari owisha, rinashitzitakariri riraga kaawira, maawaeni. Eejatzi nokimitakaantapaakiri iinja naari maawaeni atziri: ninashityaari aapatziyakinari, eejatzi ninashityaari riraga theenkanari. ³³ Nokanteeyerini maawaeni aapatziyagnarri: "Pipoke jaka nakoperokika". Eejatzi nokanteeyerini paashinipaeni: "Pipoke eerori jaka nampatekika". ³⁴ Roojatzi nokanteeyantakyaarini maawaeni nakoperokitziri: "Pipokaeyanakini maawaeni eerokapaeni ikimoshiretakaaperotemi osheki Pawa. Paerani riwetsikitakimironi pijekantyaari janta inampikinta. Iroñaaka piyaate pitsipatyaari. Kameetha ipinkathariwenteeyemini. ³⁵ Ayimawitakinani notashe, pipawakinani noyaari. Ayimawitakinani nomiri, pipawakinani nomiri. Tee

piyowitanani omaanta pineshironkatantakinanini janta pipankokipaeni.

³⁶ Tekatsiwitani noethaari, roojatzi pipakinawo. Nomantsiyawitani, roojatzi pipokashitakina pineshironkatakiana. Romonkyagaagetaakinani omonkyagaagamentotsiki roojatzi pipokashitanakina pineshironkatakinanini".

³⁷ Ari pikaateeyerini maawaeni paashini kameethatzinkari rajanganeki pikanteeyinipa: "Nowinkatharite, tsika okaatzika ayimatantawitakimiri pitashe nopantakimiri powanawo. Tee nokenkithashiryaaneero. ¿Tsika okaatzika ayimatantawitakimiri pimiri, nopantakimiri? ³⁸ ¿Tsika okaatzika noneshironkatantakimiri noemaakimi nopankoki? ¿Tsika okaatzika nopantakimiri piithaari? ³⁹ ¿Tsika okaatzika noñaantakimiri pimantsiyatzi niyaatashitantakimiri noneshironkatantakimiri?" ¿Tsika okaatzika omonkyagaagetakimini nareetantakitzimiri? ⁴⁰ Roojatzi nokanantanakyari: "Kyaaryo nokantemi: 'Pineshironkatakiririka apaani aapatzianari eejatzi pikimitzitakina naari, pineshironkatakina' ". ⁴¹ Roojatzi nokanteeyantakyarini maawaeni katziyeenchari nampateki: "Piyaateeyeni iroñaaka janta paamarikinta kaari tsiwakanitatsini, pikemaatsityawo paamari riwetsikakiri paerani Tajorentsi. Riwetsikashitziriri iwinkatharite kamaariipaeni eejatzi maawaeni ikaatzi oyaatziriri. Iroñaaka ari pikaateri pitsipatyari janta, osheki powashironkaaperoeuyaani.

⁴² Paerani ayimatakina notashe, omaanta tee pipawakina noyaari. Ayimatakina nomiri, omaanta tee pipawakina. ⁴³ Niyaatashitawitzimini noñeemi, omaanta tee pineshironkatakawina, tee poejeekawakina pipankoki. Tekatsini noethari, omaanta tee pipawakina nokithaatyari. Nomantsiyatzini eejatzi romonkeetakina omonkyagaagamentotsiki, omaanta tee pipokashitana pareetena". ⁴⁴ Roojatzi ikanteeyantakaninani eejatzi: "Nowinkatharite, ¿tsikapatenika okaatzi noñaantakimiri pushironkaawaetaka kaari noneshironkatantzimi?" ⁴⁵ Roojatzi nokanteri: "Kyaaryo, tee pineshironkatziri irintapaeni aapatzianari, rootaki kaari pineshironkatantana naari". ⁴⁶ Rowashironkaeyerini riraga Tajorentsi janta paamari kaari tsiwakanitatsini. Ikanteetatyeyaaani ashi royiro ijeki janta; omaantaky riraga kameethatzinkari ijekaeeyini rirori janta jenokinta, ikanteetatyeyaaani rañaaperotapae.

26

Ikenkithawaetakaawaka joriyyopaeni: "¿Tsikarika akanteri Jesoshi owa-maakaanantyaariri?"

(Mr. 14.1-2; Rk. 22.1-2; Jowa 11.45-53)

¹ Ithonkantakawori riraga Jesoshi ikamanteeyakinanai maawaeni iroka, ari ikanteeyanani naaka maawaeni riyotaanewo:

² —Piyoteeyakini rooteentsi areetya kitejiri akenkithashiryaakotapi-inantariri rawijantakarini paerani ronampiri Tajorentsi janta Ejipitoki. Okaataki apite kitejiri areetantyaari. Roojatzi raakaananteetenari iken-takoetena.

³ Roojatzi ipiyotaka riraga jewayitziririni ñaanakowenantatsiripaeni ee-jatzi riraga aataperoteenchari. Ipiyotaka janta ipankoki iwinkathariteki ñaanakowenantatsiripaeni. Iwaero irira rirotaki Kaejashi. ⁴ Rajaryaakari Jesoshi rowamaakaanteri:

—¿Tsika akanterika Jesoshi aantyaariri eejatzi owamaakaanantyaariri? Omaanta tee akoyi ryote atziripaeni, ikijakowentarikari.

⁵ Ikantanaki paashinipaeni:

—Pamine, rooteentsi areetya kitejiri rawijantanakarini paerani ronam-piri Tajorentsi Ejiipitoki, rooteentsi ikimoshireeyanakini atziri maawaeni. Eero amatziri aaneeri rirori iroñaka, ikjakowentarikari maawaeni atziri.

*Ojeetantakari Jesoshi wetaaniyajato kajankaari
(Mr. 14.3-9; Jowa 12.1-8)*

⁶ Ikantaka riraga Jesoshi itharyaanaka roojatzi rareetantapaaka Wetaaniyaki. Itsipateeyakinani naakapaeni maawaeni riyotaanewo. Nareeteeyapaakan i pankoki Shimo, riraga pathaawitacharini paerani. ⁷ Nowaeyapaakan, roojatzi opokashitapaakiri roori tsinani, amakotakiro kajankaari poteeryaki kameethari. Oshekini owinawo iroka kajankaari. Roojatzi ojeetapaakiri iitoki Jesoshi. ⁸ Noñeeyawakironi irowa, nokijeeyanakironi, nokantzi:

—¿Itaka apaataantawori? ⁹ Opimanteromi kajankaari, aantyaatami os-hekini koriki, oneshironkaterimi oshekini owashironkaenkari.

¹⁰ Ikantanaki Jesoshi:

—¿Itaka pikantawenantawori iroka tsinanika? Kameethataki okaatzi antakirika. ¹¹ Rooma riraga owashironkaenkari paen ikannteetatyeyaa ni itsipateeyemini jaka pineshironkatapiinantlyaariri, omaanta naaka eero nokanteetatyeyaa ni nojeekimoteeyimini naari. ¹² Iyotakotakina iroka tsinanika rooteentsi nokame, rootaki ojeetantakinari. ¹³ Kyaaryo iroka nokamantemirika, tsikarika ikenkithatakoteetero noñaani, aririka othotyaanakya maawaeni kipatsiki eejatzi ikenkithatakotzityaawo iroka tsinanika okaatzi antakiri ikenkithashiryaa kotaantapiinteetyaawori roori oneshironkatakina.

*Ikantziri Joorashi ñaanakowenantsiri: "Namitakotemi payeri Jesoshi"
(Mr. 14.10-11; Rk. 22.3-6)*

¹⁴ Ikantaka riyaatashitakiri Joorashi karyootejatzi riraga jewatayitzirini ñaanakowenantsiri ikenkithatakaeri. Rirowitaka naawita riyotaanewo Jesoshi.

¹⁵ Ikantapaakiri:

—Aririka nokamantem tsika pikanteriri Jesoshi paantyaariri, ¿iitaka pip-inatenari?

Ikantawakiri:

—Nopinatem koriki ikaate 30 ikithoki riwetsikaetziri piraata.

Roojatzi ipantawakari. ¹⁶ Roojatzi ipiyantapaa riraga Joorashi. Aripaete raminaperotziri riyatantyaari tsika ikanteriri raakaanantyaariri.

*Riweyaantakaanaari rowakaanaari riyotaanewo Jesoshi
(Mr. 14.12-25; Rk. 22.7-23; Jowa 13.21-30; 1 Ko. 11.23-26)*

¹⁷ Monkaatapaaka kitejiri nowaeyawoni paa kaari tapiyacha. Roojatzi riyaatashitantakari apaanipaeni riyotaanewo riraga Jesoshi, ikantapaakiri:

—¿Tsika pikoyika nowojantemiro owaeyaarini akenkithashiryaa-wori rawijantanakarini ronampiri Tajorentsi janta Ejiipitoki paerani?

¹⁸ Ikantawakiri:

—Piyaate Jerojareekinta, pikantapaakiri shirampari piñaapaakirinta janta: “Ari ikantzi iyotaantatsiri: ‘Rooteentsi nomonkaatero maawaeni ikowakaakinari Pawa. Nokoyi noya pipankoki, notsipateeyarinai maawaeni niyotaanewo’”.

¹⁹ Roojatzi riyaatantanaka, imonkaatakiro maawaeni okaatzi ikantakiriri riwetsikaeyapaakini royaari. ²⁰ Otsitenitantanakari, itsipateeyakinani Jesoshi naakapaeni riyotaanewo, riyaateeyapaakini janta rakiyoteeyakinani

maawaeni janta. ²¹ Eenirowa nowaeyanakanani maawaeni, roojatzi ikan-teeyantanakinani rirori Jesoshi:

—Kyaaryo nokantemi: iroñaaka jaka pikaatzika, eenitatsi aakaantenani.

²² Roojatzi osheki nowashiretanteeyanakanani, ikanteeyanakini apaani-paeni:

—¿Naakama, Nowinkatharite, aakaantemini?

Eejatzi paashinipaeni ikantziri:

—¿Nowinkatharite, naakama aakaantemini?

²³ Ikanteeyanakinani:

—Riotaki irika ochaantakotakinari iroñaaka nowiratoteki riotaki aakaantenani. ²⁴ Okenkithatakotzitakinani Iwaperite Tajorentsi paerani, aritaki nomonkaatakiro maawaeni okenkithatakotanari. Omaanta osheki rowashironkaaperotanakya riraga aakaantenani. Eero ikoñaatzimi paerani irira, eeromi rowashironkashitarimi Tajorentsi.

²⁵ Roojatzi rojampitantari Joorashi rirori:

—¿Naakama, iyotaanari, aakaantemini?

Ikantawakiri:

—Jee, eerokakya.

Riyotaakae riraga Jesoshi owawentyaari eejatzi amiriwenteri

(Mr. 14.22-35; Rk. 22.19-20; 1 Ko. 11.23-26)

²⁶ Rooteentsi nothonkimatero noya, raakiro riraga Jesoshi paa, ipaasonki-wentakawo. Roojatzi ikagaakiro, ipaeyakinani naakapaeni, ikantana:

—Ajaa, payero, poyaawo. Okimitaka nokagaakimiro paa, tema naakataki oshiyakaawenteenchari, paata nokamawenteeyemini.

²⁷ Roojatzi raakotantakawo awishoowaantsi oowa pajoki, ipaasonkiwentakawo. Ipakoteeyakinani, ikanteeyakinani:

—Ajaa, pimiriteeyeni maawaeni. ²⁸ Rooma iroka oshiyawitawo nira. Paata aririka nokamawentakimi, napaatawentemni nira, ineshironkatan-temiri Tajorentsi. Aririka pameentena, eero ikenkithashireero kaari kameethatatsi pantziri. Owakirari inimotaakina iroka nokantakimiri, piy-otantyaari tsikarika pikantya pawijakotanteeyari eerori eejatzi maawaeni atziri. ²⁹ Iroñaaka eero napiitziro nomiritziro awishoowaantsi oowa. Inja aririka napiitero nomiritero, aritaki nokaateeyemini amiritero owakirat-siri awishoowaantsi oowa janta Tajorentsikinta.

Ikantana Jesoshi: "Iroka tsiteniri, ari pookaeyanakinani"

(Mr. 14.26-31; Rk. 22.31-34; Jowa 13.36-38)

³⁰ Nomampaawenteeyakarini Tajorentsi, roojatzi riyaatakaanteeyanakinani janta tonkaariki oetachari Oriiwomashi, notonkaaneentanaki maawaeni. ³¹ Roojatzi ikanteeyanani riraga Jesoshi:

—Iroka tsitenirika, aritaki pookaeyanakinani eerokapaeni, maawaeni. Rooma paeraniperoroña ikantakotzitana Tajorentsi Iwaperiteki ikantzini: “Noshineteririka rowamaeri riraga kempoyiiriri rowishatepaeni, ishiyeeyanakaani, rotspareeyawakaanakaani”. Iroka rojankinatziro Jakariiyashi riraga kamanantzirorini iñaani Tajorentsi paeraniperoroña. ³² Omaanta aririka nopiriintatee nañagae, neewataneemi janta Karireeyaki, ari piñeena janta.

³³ Roojatzi ikantziri Peetero:

—Aririka rookemi irikapaeni maawaeni, omaanta naari, eero nookimi.

³⁴ Ikantawakiri:

—Kyaaryo, iroka tsitenirika, tekirarika iñee tyaapa, ari okaate 3 pikante: “Tee niyotziri Jesoshi”.

³⁵ Ikantawitari:

—Aririka notsipatemi akame, omaanta eero nokantzi: “Tee niyotziri Jesoshi”.

Eejatzi nokanteeyawitakani maawaeni.

*Ramani Jesoshi Iriri janta Jethemaniiki
(Mr. 14.32-42; Rk. 22.39-46)*

³⁶ Ikantaka rareetakagaeyapaakinani riraga Jesoshi janta oriiwomashiki owaero Jethemaniiki, ojeeki janta tonkaari owaero Oriiwomashi. Ikan-teeyapaakinanri rirori:

—Pijekawakiita jaka. Niyaatakiteeta janta nokenkithatakaakiteriita Pawa.

³⁷ Raanakiri riraga Peetero, eejatzi itomi Sewereeyo apite. Osheki retakotanaka riraga Jesoshi, antawo ikenkithashiryaanakiro okaatzsi awijimoterini. ³⁸ Roojatzi ikantziri:

—Osheki netakotanakaroña. Pijekawakiita jaka, pikakiterapa.

³⁹ Roojatzi ijanthawitanaka eechonkiini, romaryaapaaka tankimota-paaka kipatsiki, ikenkithatakaakiri Ashitariri, ikantziri:

—Pawa, tee nokowawita nokemaatsityaawomi katsiri, omaanta eero nantashitawo nokowawitari naari, inta nantemiro pikowakaakinari eerori.

⁴⁰ Roojatzi ipiyashitapaari riyotaanewo 3, iñaapaatziiri imagaeyakini maawaeni. Ikantapaakiri riraga Peetero:

—Tema pamaweneentziro piwochokini, ¿tee pimatziro pikakineentzi eechonkiini? ⁴¹ Pikakite, pamaneri Tajorentsi ramitakotantemiri eero panantawo kaari kameethatatsi. Kyaaryo, pikowawitaka pantaperoteromi maawaeni nokowakaakimirri, omaanta tee pimatziro.

⁴² Ikantaka rapiitakiro ipiyanaaka jaga, ikantziri:

—Pawa, pikowakaaperotakinaworika nokemaatsityaawo katsiri, kameethatataki. Aritaki nomatakiro, nomonkaatero maawaeni pikowakaakinari.

⁴³ Ari ipiyapaa iñaapaeri riyotaanewo 3 imagaeyakini. Osheki ay-imaperotakiri iwochokini. ⁴⁴ Roojatzi riweyaantapaentawo ipiyanaaka, ikenkithatakaayiri Iriri. Roojatziita rapiitapae ikantakiriri inkaaganki.

⁴⁵ Roojatzi ipiyashitakari riraga riyotaanewo, ikantapaakiri:

—¿Pimaatzsi? Iroñaaka monkaatapaaka. Iroñaaka ikantakowentenakya kaari kameethatzinkari, iroñaaka raaneena. ⁴⁶ Pipiriinte, thame aate. ¡Pamine sha! Kaakitapaaki irinta aakaantenani.

*Roerikaetakiri riraga Jesoshi
(Mr. 14.43-50; Rk. 22.47-53; Jowa 18.2-11)*

⁴⁷ Iroñaaka ipokashitantaapakari Joorashi, riraga riyotaanewo naawita Jesoshi. Ipokashitantaapakari, reewatapakiri rirori oshekini atziri. Maawaeni ramaeyakironi antawo rowejamento eejatzi ipajamento wetsikachari inchato. Ipoñaanaka janta jewatayitatsirini ñaanakowenantatsiripaeniki eejatzi aataperoteenchari. ⁴⁸ Ari, ikamantanakiri inkaaganki riraga Joorashi irrapaen:

—Nonintapootapaakiri Jesoshi, piyotantyaariri. Riotaki paerikapaakiri eerori.

⁴⁹ Roojatzi ipokashitantaapakari, ikantapaakiri:

—¿Eeniromi, iyotaanari?

Roojatzi inintapootapaakiri.

⁵⁰ Ikantawakiri rirori Jesoshi:

—Notsipatanewo, ¿ittaka pipokashitziri jaka? Pantero iroñaaka.

Roojatzi ipokashitantaapakari maawaeni roerikapaakiri, shepik.

⁵¹ Roojatzi inojokiryaa kiro paashini riyotaanewo Jesoshi rashii

rowejamento. Ikowawitaka ichekawakirimi iitoki riraga ronampiri iwinkatharite ñaanakowenantatsirini, omaanta apatziro ichekawitawakari ikempita.⁵² Ikantziri riraga Jesoshi:

—Powaero powejamento ipiyatzimikari. Rooma ichekaetawakiri rirotaki chekantapiintatsiri.⁵³ Rooma piyotzi nokowakirikami, nokanterimi Pawa, roojatzi rotyaantenarimi oshekiniroña ronampiri ikijakowentenami.⁵⁴ Omaanta ikijakowentenarikami, rowawijaakotenarikami, eero nomonkaatzioromi okantakotanarini Iwaperite Tajorentsi.

⁵⁵ Roojatzi ikanteeyawakirini riraga maawaeni pokashitapaakiriri:

—¿Itaka pamantawori powejamentopaeni eejatzi pipajamentopaeni kim-itaka naaka koshintzi? Piñaapiintana maawaeni kitejiri janta Tajorentsipankoki, niyotaapiintziri atziri, tee payitanakya chapinki.⁵⁶ Omaanta rootaki paantanari iroñaaka omonkaatantyaari rojankinatakotzitanarini riraga kamanantayitzirorini iñaani Tajorentsi Iwaperiteki.

Roojatzi nothaawantanaka naaka ryotaanewopaeni, noshiyanaka maawaeni.

Riraga jewatatsiripaeni ikantakowenantariri Jesoshi

(Mr. 14.53-65; Rk. 22.54, 63-71; Jowa 18.12-14, 19-24)

⁵⁷ Ari, ragaetanakiri riraga Jesoshi janta ipankoki Kaejashi, riraga iwinkatharite ñaanakowenantatsiripaeni Tajorentsipankoki. Ipiyotakanta janta riraga iyoantaizirori Iwaperite Tajorentsi eejatzi aataperoteenchari.⁵⁸ Roojatzi rimpetaanaki Peetero janta inteenaneente roojatzi rareetantyaari ipankoki Kaejashi riraga iwinkatharite ñaanakowenantatsiri. Ikyapaaki otaamapetaataga mapi, ijekapaaki okaankiityeera. Itsipatapaakari waariryapaeni.⁵⁹ Roojatzi riraga iwinkatharite ñaanakowenantatsiri, riraga paashini jewawentayitziririni irirapaeni eejatzi paashinipaeni jewatayitziririni ikowanaki atziri itheeyakotashityaarini Jesoshi rootaki, ari rowamaakaananteetyaariri rirori.⁶⁰ Roojatzi eenitatisi oshekini theeyakotawitakariri, omaanta tekatsi ikanteri rowamaakaanantyaariri. Roojatzi ipokapaaki paashini apite theeyakotapaakariri,⁶¹ ikantapaaki:

—Ikantzi irika: “Noshekiroreero Tajorentsipanko; okaate kitejiri 3 aritaki nowetsikaero”.

⁶² Ikatziyanaka iwinkatharite ñaanakowenantatsiri, ikantanakiri:

—¿Tekatsima pikanteri eerori? ¿Oetaka pikantziriri iroka ikantakotzimiri?

⁶³ Omaanta imaeritashitaka riraga Jesoshi. Rapiitakiri rirori ikantanakiri:

—Tema iñaakimi Tajorentsi, riraga Añaaperotatsiri. Pikantaperotena: ¿eerokama Itomi Tajorentsi riraga Rotyaantanewo?

⁶⁴ Ikantziri:

—Naakataki. Naaka poñaachari jenokinta, natziritapaaki jaka kipatsikika. Inja piñeenani nojeeki rakoperokí Tajorentsipero, eejatzi iinja piñaawakinani nokinapaakini menkoriki, nopyapae jaka kipatsikika.

⁶⁵ Roojatzi ikijantanakari rirori maawaeni, rootaki itzijagaakotantanaka iithaariki. Ikantziri:

—¿Pikemakirikya ikantziri? Tee okameethatziroña, iitajorentsitakimiwee. ¿Itakama akowantari paashini kantakoterini?⁶⁶ ¿Itaka pikenkithashireeyirini eerori? ¿Tsikamaakanterika?

Ikanteeyirini:

—Enitatisi rantani. Okameethatzzi ikame.

⁶⁷ Roojatzi ipokapaaki rirori maawaeni reewapootakiri ipookira. Eejatzi ikapojoyatikirini. Rontajawootakiri tak, tak, tak.⁶⁸ Ikantziri:

—Rotyaantanewo Tajorentsi, pikantena: ¿ninka kapojakimirika?

Ikantzi Peetero: "Tee niyotziri Jesoshi"
(Mr. 14.66-72; Rk. 22.55-62; Jowa 18.15-18, 25-27)

⁶⁹ Riraga Peetero eenirokya ijeeki janta inkokironta. Oñaawakiri onam-pirentsi okantawakiri:

—Eeroka tsipatariri Jesoshi, riraga karireeyajatzi.

⁷⁰ Rakanakiro:

—Tee niyotziri oetarika pikantanari.

⁷¹ Roojatzi rawijanaki janta ikyaaawitapaakaga, eenitatsi paashini onam-pirentsi oñaawakiri roori, okantziri:

—Pamine sha, irika tsipatariri Jesoshi, riraga najareetejatzi.

⁷² Ikantanakiro:

—Tee niyotziri irika pikantakinari. Teerika okyaaryootaki iroka nokantakimiri, nokowaki rowashironkayenaata Tajorentsi.

⁷³ Ro ojamaniwitanaka eechonkiini, ipokapaaki paashini ñaawakiriri, ikantapaakiri:

—Kyaaryo, eerokakya tsipatariri. Nokemakiro piñaawaetaki, eerokakya karireeyajatzi.

⁷⁴ Ikantanakiri:

—Teewee, tee niyotzirikya irika shirampari pikantakiri. Riyotzi Tajorentsi kyaaryo nokantakimiri. Teerika okameethatzi nokantakimiri, nokowaki rowashironkayenaata Tajorentsi.

Roojatzi iñaantanaka tyaapa. ⁷⁵ Roojatzi ikenkithashiryaaawakiro ikantziriri Jesoshi: "Tekiraata iñee tyaapa, okaate 3 pikante: 'Tee niyotziri Jesoshi' ". Roojatzi riyowanaki, riraapaaka jmmm, jmmm.

27

Ragaetanakiri Jesoshi janta Peraatoki
(Mr. 15.1; Rk. 23.1-2; Jowa 18.28-32)

¹ Owakira okitejitanaki, ikenkithawaetakaawaka riraga jewatayitziririni ñaanakowenantsiri ejatzi aataperoteenchari ikantawakaaka:

—¿Tsikama akanterika iroñaaka Jesoshi owamaakaanantyaariri?

² Roojatzi roojotakiri, raanakiri janta ijeekinta pinkathari iitachari Per-aato. Irinta kaari joriyyo inta rirotaki oroomajatzi.

Ishirikashitaka rirori Joorashi
(Ran. 1.18-19)

³ Ipoñaashitanaka Joorashi riraga aakaantakiriri Jesoshi riyotaki rowamaakaantashityaari irinta, omaanta tekatsi rantawita kaari kameethatatsi. Riyotakotanaka, osheki ikenkithashiryaaanaka, roojatzi ipiyantanaka Tajorentsipankoki roepiyapaeniri 30 ikithoki koriki ipinawitakariri chapinki raakaanantakariri. Raminapaakiri jewawentayitziririni ñaanakowenantsirsipaenii ejatzi aataperoteenchari.

⁴ —Ajaa, piyorikite. Tee okameethatzi iroka nantakiri: tema naakaantashitakari Jesoshi. Tekatsi rantawita: ikamashitya iroñaaka.

Omaanta ikanteeyawakirini intatapaeni:

—Omawitya, eerokaritya.

⁵ Roojatzi rookanakiri iyorikite, romanatanakiri, patareei, janta Tajorentsipankoki, ishiyanaka roojatzi ishirikantapaaka. ⁶ Ari, riraga jewawentziriri ñaanakowenantsiri ragaatziri koriki, ikantzi:

—Tee okameethatzi jaka akempoyeeri irika korikika. Rooma rirotaki apinatakiriri Jesoshi raakaanantyaariri.

⁷ Roojatzi ikenkithataawaka:

—¿Tsikama akanterika korikika?

Ikantzi:

—Thame amanantero kipatsi akitatantyaariri kamatsiri riraga poñaachari paashiniki kipatsipaeni.

Rootaki ramanantanakawori kipatsi oetachari ragaetapiintziri kipatsi kowitzipitha.⁸ Paerani roojatzi iroñaaka iiteetziro rowaga kipatsi: “Iwinawo Jesoshi raakaanantakariri”.⁹ Imonkaatakiro rojankinatzitakarini paerani Jeremiiyashi:

“Raaneeri 30 ikithoki koriki riwetsikanteetariri iraata oetachari piraata.

Riotaki iwinawo raakaanantyaariri Rotyaantanewo Tajorentsi. Eero roshekitzi koriki ipinatantawityaariri.

10 Riotaki ramananantyaawori kipatsi janta ragaetapiintziri kowitzipitha.
Riotaki Awinkatharite kanterini ramanantero kipatsi”.

Peraato rojampitziri Jesoshi

(Mr. 15.2-5; Rk. 23.3-5; Jowa 18.33-38)

11 Ari, ragaetanakiri riraga Jesoshi janta ijeekinta pinkathari iitachari Peraato, ikatziyimotapaakari. Ikantawakiri irira:

—¿Eerokama iwinkatharite joriiyopaeni?

Ikantapaakiri:

—Jee, naakakya.

12 Roojatzi ikijakiri riraga jewawentayitziririni ñaanakowenantatsiripaeni eejatzi riraga aataperoteenchari ithawetakotakiri, omaanta imaeritashitaka rirori, tektsi ikantzi.¹³ Ikantawakiri riraga Peraato:

—¿Tema pikemakiri ikantakotzimiri? ¿litaka kaari pikananta eerori?

14 Tektsi ikantzi Jesoshi, tee rakiri. Roojatzi rotsikanatanakariroña riraga ikenkithashiryaaanaka.

15 Ari maawaeni ojarentsi, aririka omonkaataka kitejitalsiri rawijantanakarini paerani ronampiri Tajorentsi Ejiipitoki, riraga Peraato ikantapi-intawakiri maawaeni jeekatsiri:

—Eeniro ijeeki oshekini pinampijatzi janta omonkyaaagamentotsiki. ¿Pikowakima noemishitowaemiri apaani omonkyaaagaarewo?

Rootaki ikantapiintziri maawaeni ojarentsi roemishitowapiintziri omonkyaaagaarewo, ninkarika ikoyiri joriiyopaeni.¹⁶ Eeniro ijeeki omonkyaaagamentotsiki shirampari ikemakotakiri joriiyopaeni, iitachari Warawaashi.¹⁷ Roojatzi iroñaaka kitejiri ipiyotaka oshekini atziri, rootaki ikanantawakariri:

—Piyotzi nametakawo noemishitowaemiri apaani jeekatsiri omonkyaaagamentotsiki. ¿Ninkama pikowakiri noemishitowaemiri iroñaaka? ¿Riotakima Warawaashi? Teerika pikoyiri irira, ¿riotakima pikowaki irika Jesoshika, riraga plitzi Rotaantanevo Tajorentsi?

18 Riraga Peraato riyotakotziri jewatatsiripaeni joriiyopaeni osheki iki-jashitari riraga Jesoshi; tema tee ikowakayaari riraga joriiyopaeni royaateri rirori raapatziyari. Rirowitaka ikanterimi maawaeni joriiyo: “Nokowaki poemishitowaenari riraga Jesoshi”.¹⁹ Ejatzi inkaaganki otyaantakiri iina riraga Peraato kantziriri: “Okantzi piina: ‘Eero powamaakaantziri riraganki, ikameethaperotaki. Nomishitawakiri inkaaganki, osheki no-kenkithashiryaaotawakiri’”. Rootaki kaari ikowantawita rowamaakaanterimi.²⁰ Omaanta riraga jewatayitziririni ñaanakowenantatsiripaeni eejatzi aataperoteenchari ikantziri riraga atziripaeni:

—Pikanteri: “Poemishitowaeri Warawaashi. Riraga Jesoshi, pikentako-takaanteri”.

21 Roojatzi rapiitawakiri, ikantawakiri riraga Peraato:

—Pamine shá, ikaataki apite. ¿Ninkama pikowakiri noemishitowaemiri?

Ikantzi maawaeni:

—¡Warawaashi!

22 Ikantawakiri:

—¿Tsika akanterika irika Jesoshika, riraga ii teetziri Rotyaantanewo Tajorentsi?

Ikantakiri maawaeni:

—¡Pikentakotakaanteri!

23 Ikantawitari riori:

—¿Itama rantakiri nokentakotakaanantyaariri?

Eekiro ikaemapaakitzi:

—¡Pikentakotakaanteri! ¡Pikentakotakaanteri!

24 Osheki ikijanaka maawaeni. Riyotanaki riraga Peraato ratsipetashitaka rojampitawitakari. Ikanantakariri riraga ronampiri:

—Pamakotenawoota iñaa.

Ramakotakiniri, roojatzi ikiwawakotaka rako riyotantyaari atziri tee ikowawita rowamaakaanteri riraga Jesoshi. Tee ikowawita, roojatzi ikantawakiri:

—Kaari naari kowatsini nowamaakaanteri, kaari. Pikowakirika eerori, eero kama cheetaka kentakotakaanterini.

25 Ikantakiri:

—Nokowaperotaki, rooma naakakya kantakimiri. Kameetha ikijenaata naari Tajorentsi, eejatzi kameetha ikijeri maawaeni notyomi nashi.

26 Roojatzi roemishitowakiri riraga Warawaashi. Roemishitowakiri, ikantawakiri riraga joraaro:

—Paaneeri Jesoshi, powajankiteri, roojatzi pikentakoteri.

Riragajoraaropaeni raanakiri ishirontawentakari Jesoshi

(Mr. 15.16-20; Jowa 19.1-3)

27 Ikantaka joraaropaeni raanakiri irira janta ipankokira pinkathar-entsi, roojatzi ikaemapaakiri paashinipaeni joraaro. **28** Roojatzi raatonkoryaakiri iithaari. Ikithaatziri paashini kithaarentsi kityonkamawoneentatsiri. **29** Roojatzi riwetsikantakanari amantheerentsi kitcheetatsiri ramanteetakaakiri. Eejatzi ipakiri kotzitsi, ikantziri:

—Poerikiro pikotzi.

Riraga jewawenantatsiri paerani rametakawo ikithaatapiintawo kityonkari, ramanteetawo ramanteeri pinaperotachari, eejatzi roerikapiintziro ikotzi pinatachari. Roojatzi rotziwerowashitapaakari, roshiyakaawaetashitaka ipinkathajeempiyaakari, ikantziri:

—Eeroka, nowinkatharite. ¿Peewatanakimi, peewawenterimi maawaeni joriyyopaeini?

Ishirontawentakari:

—Injii, injii, injii.

30 Reewapootakiri maawaeni. Roojatzi raapithatanakiri ikotzi. Rompo-jantanakari iitokira. **31** Osheki ishirontawentanakari injii, injii, injii. Roojatzi raatonkoryaagaeri kityonkamawoneentatsiri, ikithaatakagaari iithaari pero, roojatzi raantanakari ikentakotantyaariri.

Ikentakotakiri Jesoshi koroshiki

(Mr. 15.21-41; Rk. 23.26-49; Jowa 19.17-30)

32 Ikanta raanakiri joraaro riraga Jesoshi koroshiki. Romperatakari irira raaneero antawo inchato oetachari koroshi. Osheki otenatz, ipomeentsiperotawo raaneero. Janta awotsiki itonkiyotawakari shireenejatzi iitachari Shimo. Romperatakari joraaro ikantziri:

—Ajaa, koroshi, paaneeniri irika.

Roojatzi itsipatanakari, raanakiniri koroshi. ³³ Roojatzi rareetapaaka maawaeni tonkaariki oetachari Koorkota. Ari aetziro aari apaanteki: iitonakintsi. ³⁴ Areetapaaka, ipawiteetapaakari riraga Jesoshi awishoowaantsi oowa otsipatakawo kepishiyanto. Ikemijantawitawakawo, tee ikoyi rirero. ³⁵ Roojatzi ikentakotakiri joraaropaeni koroshiki. Roojatzi rowatzikakotakiri. Eejatzi iñaathawaetaka irirapaeni riyotantyaari ninkarika aakironipa iithaari. ³⁶ Roojatzi ijekantanaka jaga, raminakowenteri riraga Jesoshi. Ro ijekantanakari, raminakowenteriita, rowawijaakotzirkari paashini atziri. ³⁷ Eejatzi inkaaganki rojankinatakoetakiro owaanini inchakotaki: "Irika rirotaki Jesoshi iwinkatharite joriipyopaeni". Roojatzi ikentakoetakiro jeñokiiniki iitoki Jesoshi. ³⁸ Eejatzi ikentakotakiri apite koshitantatsiri; apaani rowatzikakotakiri rakoperoki riraga Jesoshi, eejatzi paashini rowatzikakotakiri rampateki. ³⁹ Eenitatsi oshekini atziri awijayitatsirini awotsiki ininatakiri riraga Jesoshi. Rotekayinatapaaka irinta. Ishirontawentapaakari, injii, injii, injii. ⁴⁰ Ikantapaakiri:

—Pishekiroreeromi Tajorentsipanko, okaate kitejiri 3, piwetsikaeromi. Ajaatyta, powawijaakotya eeroka. Eerokarika Itomi Tajorentsi, ari payiite jaawiki.

⁴¹ Eejatzi ikimitaka riraga jewatayitziririni ñaanakowenantatsiri eejatzi riraga iyotaantayitzirorini Iwaperite Tajorentsi, eejatzi riraga warijeey-opaeni, eejatzi riraga aataperoteencharipaeni ishirontawentakari. Ikantzi:

⁴² —Rowawijaakotakiri apaanipaeni anampijatzi, omaanta iroñaaka tee imatziro rowawijaakotya rirori. Thame aminawakiriita, rirotakirika awinkatharite kimitaka pikantzi, kameetha rayiite jaawiki iroñaaka. Rayiterika jaawikika, ari aapatzianyakaari aaka. Injii, injii, injii. ⁴³ Tema ipinkathawitarira Tajorentsi rirori: rowawijaakoteriita iroñaaka. Aamaashitya aritaki rowawijaakoterimi itomi, rooma ikantzi: "Naakakya Itomi Tajorentsi". Injii, injii.

⁴⁴ Eejatzi ikimitaka riraga koshintzi ikentakoteetakiri, ishirontzitaka rirori.

Ikamaki Jesoshi

(Mr. 15.33-41; Rk. 23.44-49; Jowa 19.28-30)

⁴⁵ Ikaataki oorya tampatsika, omapokapaaka otsitenitanaki maawaeni kipatsi, roojatzi shaawiteni. ⁴⁶ Rooteentsi okitejitanee, antawo ikaemanaki Jesoshi, ikantzi:

—Erii, Erii, ¿raama jawaatani?

Rootaki akantziri apaanteki: "Notajorentsite, Notajorentsite, ¿iitaka pookantanari?"

⁴⁷ Ikemantawakariri riraga jeekaneentsiri, ikantzi:

—Pikemiri, ikaemiri Iriiyashi.

⁴⁸ Roojatzi ishiyanaka atziri, rowiinkakiro piyonkashinkanari awishoowaantsi oowa kepishaari. Rojataakiro chekopikira rowaankakotanakiniri riraga Jesoshi, rajookawakiromi. ⁴⁹ Omaanta ikantziri paashinipaeni:

—Eero pantziro. Thame aminawakiriita aririka ipokashitapaakiririka Iriiyashi rowawijaakoteriita. Injii, injii.

⁵⁰ Roojatzi rapiitziro ikaemi. Antawo ikaemi. Roojatzi ikamantanaka.

⁵¹ Ikamantaka Jesoshi, omapokanaka otzijagaanaka antawoni otzikaakiro janta Tajorentsipankoki inthomaenta. Tontari ironta, otzikaakiro omookira. Omapokanaka itanakajenoki otzijagaanaka owaag, roojatzi jaawiki, apitemankitanaka. Eejatzi omoyekanaka kipatsi, moye, moye. Okotaanaki antawo mapi maawaeni. ⁵² Eejatzi rashitaryaakotanaka ijekira

kaminkari, ipiriintanaka oshekini aapatziyariri Tajorentsi. ⁵³ Rimpaetaki ipiriintanaa Jesoshi, ryaateeyanakini Jerojareeki. Iñeeyawakirini oshekini atziri.

⁵⁴ Eejatzi riraga omperatariri joraaro eejatzi joraaropaeni riraga kem-poyaakiriri riraga Jesoshi iñaawakiro omoyeka kipatsi eejatzi iñaawakiri riraga piriintayitaneecharini, iñaawakiro otsitenitanaki, maawaeni. Roojatzi ithaawantanakariroña, ikantzi:

—Kyaaryo, rirotaki Itomi Tajorentsi.

⁵⁵ Eejatzi jaga, eeniro oshekini tsinani aminawaetawakiri riraga Jesoshi. Rootaki oyaawaetanakirini, opoñeyakan Karireeyaki. Kijokiro owapiintanakirini, oneshironkatzirini, opapiintzirini rowanawo. ⁵⁶ Okaatakiro Mariiya rowaga makaraarajato; paashini Mariiya rowaga riniro Jantyaako eejatzi Josee; eejatzi paashini rowaga riniro Jantyaako eejatzi Jowa, rirojatzi itomi Sewereeyo apite. Roojatzi ofñaawakiri rirori, ikamanaki.

Romonkeetakiri Jesoshi omooki

(*Mr. 15.42-47; Rk. 23.50-56; Jowa 19.38-42*)

⁵⁷ Rooteentsi otsitenityaanaki. Eeniro ryaatanakni apaani riyotaanewoni Jesoshi iitachari Josee. Ipoñaaka irinta Arimateeyaki; rirotaki ashagantzinkari. ⁵⁸ Ryaatashitanakiri riraga Peraato, ikantapaakiri:

—Kamaki Jesoshi. Nokowaki pishinetena naaneeri nomonkeeri omooki janta, riwetsikaetzinirinta kamatsiri.

—Jee, ari.

Roojatzi ikaemiri joraaro, ikantawakiri:

—Pishineteri irika raaneeri.

⁵⁹ Roojatzi ryaatakti rirori Josee, raakitziri, raanakiri, roojatzi rapineetaktotanakiri tokoyakira kitetatsiri. ⁶⁰ Roojatzi romonkyaanakiri omooki, rowaga owakira imokaetziro mapi impeetaki. Ipineero, rotzitakiro antawo mapi omookira, rashitakontakariri. Roojatzi ryaatapithatantanaari. ⁶¹ Enitatisi eejatzi janta Mariiya, rowaga makaraarajato, eejatzi ojameto otsipatakawo. Opokaki, roojatzi ojeekaki okaakinira omoo. Amiankovenantawakariri rirori romonkyaanakiri.

Riyaataki joraaro ishentawitakawo omoo romonkyagaetakirira Jesoshini

⁶² Rawijantanakawo kitejiri ikentakotantariri Jesoshi oetachari Kitejitsatni rawijantanakarini Ronampiri Tajorentsi paerani Ejiipitoki. Okitejitanaki ryaatashitapaakiri jewatayitziririni ñaanakovenantatsiri eejatzi warijeeyopaeni janta Peraatoki. ⁶³ Ikantapaakiri:

—Nowinkatharite, nokemawakiri ikantzi chapinki riraga amatawitantatsiri: “Nokame, roojatzi okaate kitejiri 3, ari nopiriintanee nañagae”. ⁶⁴ Nokowaki potyaanteri joraaro iroñaaka ishentaperotero omoo janta romonkyagaetakirinta. Raminaperotero roojatzi omonkaatantyaari kitejiri 3. Riyaatashitzirkari ryotaanewoni raanakirikari, roojatzi ikantzirkarri atziripaeni: “Piriintanaa Jesoshi, rañagae”. Paerani osheki ramatawitantzini irinta Jesoshini, omaanta aririka raaneeri ryotaanewo rirori, ramatawitaperotzirkari irintapaeni anampijatzi, ikantzirkarri: “Piriintanaa Jesoshi añaagae”.

⁶⁵ Ikantawakiri rirori Peraato:

—¡Aja, joraaropaeni! Paanakiri janta raminaperoteroota omoo.

⁶⁶ Roojatzi ryaatantanaka, rashitakoperotakiri, roojatzi ishenteeyakironi riraga joraaro.

28

Ipiriintanaka irira Jesoshi

¹ Awijananaki kitejiri imakoryaantari, iroñaaka otominkotapaaki. Eeniro otsitenineentzi, opiyaka janta Mariiya makaraarajato, eejatzi otsipatakawo ojameto. Iyaatantari aminashityaawo omoo omonkyagaetakirinta riraga Jesoshini. ² Omapokanaka antawo omoyekanaka kipatsi rareetapaakaga ronampiri Awinkatharite, poñaañeenchari jenokinta. Ipokantapaakari ipinaapithatapaakiri mapi, roojatzi ijeekantapaakawo. ³ Osheki ishipakiryappaaki. Ikinitakawo räämorenkiranki tarilo osheki ishipakiryaaiki. Kita-maaperori iithaari. ⁴ Oshekironña ithaawantawakari rirori maawaeni jo-raaro. Tee imatziro ishewata, kimiwitaka kamanaki. ⁵ Roojatzi opokapaaki tsinanipaeni, othaawantapaakari eejatzi, omaanta ikantziro rirori:

—Eero pithaayi eerori. Niyotaki pipokashitawitari paminerri Jesoshi, riraga ikentakoteetakiri. ⁶ Tee añiiri iroñaaka, piriinta, añagae. Rooma ikantakiminikya paerani, monkaataka. Paminerotya romaryanteetawitakaririka, tekatsi. ⁷ Iroñaaka intsipaete piyaaate pikanteriita maawaeni ryotaanewo: “Ipiriintanakiri Tajorentsi Awinkatharite, añagae eejatzi. Reewa-temi Karireeyaki. Iroñaaka piyaaate eeroka, aritaki piñeeri janta”. Rootaki nopolantari nokantemi.

⁸ Roojatzi owaperotanakiroroña, eejatzi osheki okimoshiretanakiroña; iyaatanaki oshiyashitanakina naakapaeni ryotaanewo okantena. ⁹ Niyanki romapokapaakiro riraga Jesoshi, riwethatapaakawo, ikantziro:

—¿Eeroka?

Roojatzi iyotawakiri, iyaatashitapaakiri, otziwerowashitapaakari, roojatzi oerikapaakiri iitzikira. Osheki opinkathatapaakiri. ¹⁰ Roojatzi ikantawakiro:

—Eero pithaayi. Piyaateeyini iroñaaka, pikanteri maawaeni niyotaanewo riyaate janta Karireeyaki. Aritaki iñaapaakina janta.

—Jee, ari.

Ikantaki joraaropaeni: “Ikoshiteetakiri Jesoshini”

¹¹ Rootaki opokashitantanari okantapaakina, eejatzi irinta joraaropaeni riraga aminawitawori omoo ipiyanakawo nampitsikinta riyaatashitanakiri jewatayitziririni ñaanakowenantsiri ikamantapaakiri maawaeni oetarika awijaneentsiri. Ikemawakiri rirori. ¹² Roojatzi ipiyoteyakirini jewatayitziririni joriyyopaeni eejatzi aataperoteencharipaeni ryotaawakaaka, ikanteeeyakin:

—¿Iroñaaka tsika akantyaaka amanakotantyaariri?

Roojatzi ikaemakaantakiri maawaeni joraaropaeni, ikantawakiri:

—Ajaa, koriki, osheki nopolantemi. ¹³ Rootaki pikantyaariri atziripaeni: “Ragaetaatziri Jesoshini, rooma nomaanakitzi eechonkiini niyankiiteni tsiteniri. Okimitaka ipokapaaki ryotaanewopaeni Jesoshini raapaentziri”.

¹⁴ Aririka ikemakowentawakimi pinkathari, aritaki niyaataki naari janta nokamantakowentemi eero rowajankitantzimi.

¹⁵ Roojatzi raakiri koriki ipinatelyakirini jewatayitziririni joriyyopaeni, riyaatanaki itheeyawaetaka, imonkaatakilo maawaeni ikamantakiri. Rootaki ikantakiri maawaeni joriyyopaeni roojatzi iroñaaka, tee ryotzi kyaaryooporlerika rañagae Jesoshi.

Iñeeyeerini Jesoshi janta Karireeyaki

¹⁶ Paashini kitejiri niyaatanaki naaka ryotaanewopaeni Jesoshi 11 tonkaariki janta Karireeyaki ikenkithatakotakiri chapinki Jesoshi tekira ikamini. Tekatsi itsipatanewoni iroñaaka Joorashini, rooma kamaki.

17 Iñaaanteeyapaakaririni, ipinkathaperotapaakiri, ikimoshirewentakiri. Omaanta apaanipaeni ikantashiretzi:

—¿Riotakima Jesoshi?

18 Roojatzsi Jesoshi romapokapaakina ikanteeeyapaakinani maawaenii:

—Iroñaaka Pawa iitakina itzinkami jenokinta eejatzi kipatsika. **19** Rootaki notyaanantemiri piyaate maawaeniki nampitsi, piyoteeri maawaenii atziri raapatziyena, eekiro riyaatatyee rameentena, pithotyeeyanakironi maawaenii kipatsi. Aririka raapatziyakimi atziri riyotanakirorika naaka owawijaakotakiriri, kameetha pikaawoshitakoteniri Tajorentsi. Rootaki ikowakaakiriri Pawa, eejatzi nokowakagaeyakiririni naari, eejatzi okowakagaeyakiririni Ishire Tajorentsi. **20** Eejatzi pikamanteeyerini maawaenii imonkaatero maawaenii kameethatatsiri nokamantakimiri eerori. Naari kijokiro nowanakimi, nokempoyeemi, eejatzi maawaenii aapatziyanari; roojatzsi nopyanteyari nopyinkatharitantaapakaari kipatsikika.

Ari okaatzi.

Naaka jankinatzirori:

Mateeyo

MARIKOSHI ROJANKINATAKOTAKIRI JESOKIRISHITO, TSIKA IKANTA ROWAWIJAAKOTANTZI

*Rantayitzirini Jowa kaawoshitakotantziriri Tajorentsi
(Mt. 3.1-12; Rk. 3.1-18; Jowa 1.19-28)*

¹ Iroñaaka nokamantemiro kameethatatsiri. Nokamantemi rowawi-jaakotantzi Jesokirishito. Tema rirotaki Itomi Tajorentsi. ² Paerani enironi ijeekini kamanantziorini iñaaani Tajorentsi iitachari Iseeyashi. Rojankinatakotzitakarini Tajorentsi ikantziriri itomi: “Pikemina, notyomi. Notyaanteri kenkithatakotemini, reewatananakimi. Tema ari ikanteri maawaeni atziri: ‘Paamayarirapa Awinkatharite, pikameethashiretanaki’. ³ Eenitatsi iinja atziri kenkithatakayerini atziripaeni janta okaanki-ityeenteri, ikanteri: ‘Paamayarirapa Awinkatharite. Pikameethatanaki iñaaoperotantapaakimiri pikameethatzi. Aririka pikameethatanaki pikim-ityawo awotsi kameethatatsiri ikinantapaaalyaari Jewaperowenatatsiri: powameethatero iñaaoperanteeapaakyaaworini’ ”. ⁴ Aritaki monkaata-paaka ikantzitakarini paerani Iseeyashini, Jowa riraga kaawoshitakotziriri Tajorentsi ijeekaki janta tekatsinta atziri ipanko, ikimitakiro rojank-inatakotzitakaririni Iseeyashi paeraniperoroña. Ikantakiri maawaeni pokashitziriri:

—Pikenkithashiryagaeyakya, eero pikimita paerani. Aririka pookaperotero pantawitari, aritaki nokaawoshitakotakimiri Tajorentsi, roojatzi riyoteeyantanakanayaani atziri ikamintthaaperotatzimmi rirori, eero ikenkithashiryaaakoteemiro pantayiwitakarini.

⁵ Ikanta ipokashitapaakiri maawaeni jeekatsiri kipatsiki owaero Joreeya, eejatzi maawaeni jerojareejatzi, ikantapaaakiri:

—Eenitatsi kaari kameethatatsi nantziri. Nokowaki nawijakote, tema naapatziyaperotari Tajorentsi.

Roojatzi ikaawoshitakotawakiniri riraga Jowa maawaeni romitsitsiyaakotawakiri iñaaakira iitachari Joriraani. ⁶ Tee ikithaatawo Jowa kameethatatsiri, inta ikithaatawo ontyagaantsi iwitzu kameeyo. Ishirikathakitakari mashitsimashi. Rowapiintari kimitariri tsitsiri. Eejatzi ithotziri eechonkiini iyaa pitsi. ⁷ Ikenkithatakaapiintziri maawaeni atziri ikantapiintziri:

—Kaakitaki impaetakinari, riraga Rotyaantanewo Tajorentsi; tema ranaakotakina, ipinkathariperotzi irinta. Osheki noñaakoweenkatziri irira, omaanta naaka tee noñaakoweenkata. ⁸ Nokaawoshitakotzimiri Tajorentsi iñaaaki, omaanta riraga impaetakinari ikithaatakaapaakaero Ishire, amitakotanteeri.

Jowa ikaawoshitakotawakiniri Tajorentsi Jesoshi, eejatzi Jatanaashi iñaaantawitakari

(Mt. 3.13-17, 4.1-11; Rk. 3.21-22, 4.1-13)

⁹ Paashini kitejiri rareetapaaka Jesoshi janta ijeekinta Jowa. Ipoñaaka Najareeteki, jeekatsiri kipatsi iitachari Karireeyaki. Riraga Jowa ikaawoshitakotawakiniri Tajorentsi rirori iñaaakira iitachari Joriraani. ¹⁰ Eenirowa othavyaaki iñaa, raminanaki jenokinta, roojatzi omapokapaaka iñaaawakiro Ishire Tajorentsi, ayiitashitapaakiri Jesoshi, oshiyapaakari jamomo. ¹¹ Ikematziiri Tajorentsi ikantziri:

—Eeroka notyomi nonintashireperotzimi. Osheki nokimoshirewentaperotakimi.

¹² Roojatzi aanakiri Ishire Tajorentsi tekatsinta atziri ipanko, okaankiityyenta. ¹³ Ijeekaki janta okaataki 40 kitejiri. Riraga Jatanaashi ipokashiwitakari iñaantawitapaakari, ikoyi rantakayerimi kaari kameethatatsi. Eejatzi tekatsi atziri itsipatyaaari janta, omaanta rojatekaakar koweenkayatisirini piratsi, omaanta ineshironkatakiri ronampiripaeni Tajorentsi, ipakiri rowanawo.

*Ritantanakawori Jesoshi riyyoyaakiri riyyotaanewopaeni
(Mt. 4.12-22; Rk. 4.13-15)*

¹⁴ Paashini kitejiri ragaetanakiri riraga Jowa omonkyaaagamentotsiki janta Jerojareeki. Roojatzi ipiyanaka Jesoshi Karireeyaki. Ikamanteeyakirini atziripaeni tsikarika ikanta Tajorentsi rowawijaakotantzi.

¹⁵ Ikanteeyakirini:

—Rooteentsi ipinkathariwentayiteeni Tajorentsi. Pikenkithashiryagaeya, pookaero panteeyirini eero pikimita paerani: tee pikameethawitani. Omaanta paapatziyeyaaarini Tajorentsi, pawijakotanteeyayarini.

¹⁶ Paashini kitejiri ikinanaki Jesoshi ochereeteki inkaare jeekatsiri Karireeyaki. Iñaapaakiri Shimo, eejatzi rirentzi Antereeshi. Ishiryaatzi inkaareki: aritaki ikantapiinta, ishiryaatapiintziri shima. ¹⁷ Ikanta Jesoshi ikaemapaakiri, ikantapaakiri:

—Pipoke, thame poyaatanakina aritaki niyotaakimi paapatziyakaapi-intyaaari atziripaeni Pawa Tajorentsi.

¹⁸ Roojatzi rookantanakawo ishiryaamento, royaatanakiri riyyotaantyaariri. ¹⁹ Ro ijanthawitanaka eechonkiini, iñaapaakiri Jantyaako itsipatari rirentzi Jowa. Rirotaki itomipaeni Sewereeyo. Ari ijeekaeyini ipotki ishirikiro ishiryaamento. ²⁰ Ikantapaaka Jesoshi, ikaemakotzitapaakari, ikantziri:

—Thame poyaatanakina.

Roojatzi royaatanteeeyakarini rirori iroñaaaka. Intsipaete rookanakiri iriri ipotki, itsipatayitanakarini ikaatzi amitakotayitziririni ishiryaatzi. Ikantzi:

—Jatakinagapa, pawa. Noyaatatyeeri Jesoshi.

—Jee, piyaate.

*Ikyappaaki Jesoshi ipiyoteeyantarini joriyyopaeni
(Rk. 4.31-37)*

²¹ Roojatzi rareetapaa Jesoshi Kaperinawooki, ikaateeyirini riyyotaanewopaeni. Rootaki saawaro, kitejitsatsiri imakoreeyantarini joriyyopaeni, ikyappaaki pankotsiki ipiyotantapiintarira irira. Riyotaapaakiri atziri. ²² Riraga atziripaeni, rotsikanateeyananakarini, ikantawakagaeyananakani:

—Piñaakiri, kameetha riyyotaantaperotaki, riyoperotzi irira. Tee ikimitari riraga iyotaapiinteeyawiteerorini Iwaperite Tajorentsi: tee riyoperotzi irirapaeni.

²³ Eenitatsi janta shirampari kyaantariri kamaari. Ikaemakotawakiri Jesoshi, ikantawakiri:

²⁴ —Niyotakimi: eeroka riraga Jesoshi najareetejatzi, eejatzi eeroka Ito-mipero Tajorentsi riraga kameethaperotatsiri. ¿litaka pipokashitantanar? ¿Areetakama pithonkaeyantendarin?

²⁵ Iñaashintsithatakiri rirori kamaari:

—¡Pimaeritewe! Pishitowntaneeyayari irira shiramparira.

²⁶ Ari rompetawathatakaakari shirampari, ishintsitanaki ikaemanaki, roojatzsi rookantanaari kamaari. ²⁷ Eejatzsi rotsikanateeyakarini atziripaeni maawaeni. Rojampitawakaanaka:

—¿Píñaaikiroma imatakiri rantakiri? Owakira akemakiro iroka riyotaakaeri. Eejatzsi imatakiri kamaari, rotyaantakiri: ithaawantaperotakari, jatanera.

²⁸ Roojatzsi intsipaete ikenkithatakotanteeyakarini maawaeni karireeyajatzi.

Retsiyatakotakiro Jesoshi riyote Peetero

(Mt. 8.14-15; Rk. 4.38-39)

²⁹ Ipoñagaeyaani pankotsiki ipiyotapiinanta joriyyopaeni ryaateeyanakini ipankoki Shimo, eejatzsi Antereeshi. Royaateeyanakirini Jantyaako eejatzsi Jowa.

³⁰ Ikamanteetawakiri Jesoshi:

—Ojaawamerikitatzi riyote Shimo. Eeniro jaga omaamentoki omaryaaka.

³¹ Ari ryaatashitanakiro, ikathawakotapaakiro, piriintanaka. Roojatzsi opeyantanaa ojaawamerikitzira, roojatzsi opaeyantakarini rowanawo.

Ro saawaro retsiyatatakayitantakaririni Jesoshi mantsiyaripaeni

(Mt. 8.16-17; Rk. 4.40-41)

³² Rooteentsi itziroee oorya, ramayitakinirini Jesoshi maawaeni mantsiyari, eejatzsi maawaeni kyaantariri kamaari. ³³ Maawaeni nampsitiwi ipiyoteeyapaakani omooki pankotsi. ³⁴ Ijeekaeyapaakini maawaeni mantsiyari, inashitachari imantsiyaripaeni. Retsiyatakoeyeerini. Eejatzsi ikantakiria kamaariipaeni:

—Pookaeyaneerini riraga pikyaantanewo, eejatzsi pimaeriteeyeni.

Riraga kamaariipaeni, riyoteeyakirini Jesoshi rirotaki Tajorentsi, rootaki kaari ikowakaantari kamaariipaeni ikamanteri atziri.

Ikenkithatakaeri Jesoshi Iriri

(Mt. 4.23; Rk. 4.42-44)

³⁵ Rootzimateentsi okitejite, ipiriintanaka Jesoshi. Ryaatanaki janta tekatsi jeekatsini, ikenkithatakaeri Iriri. ³⁶ Ikowakowateeri Shimo eejatzsi ikaateeyinira itsipateeyarinia. ³⁷ Ifñaantapaariri, ikantapaakiri:

—Ikowakowaeyakimini maawaeni atziri.

³⁸ Ari ikantawakiri rirori:

—Ari ikantawakaata. Thame aate paashinikipaeni nampsitsi. Aritaki janta nokenkithatakagaeyerini paashinipaeni atziri, rootaki nopokantakari kipatsikika.

³⁹ Ikinakinayitanakini, ithotyaagaeyanakironi nampsipsipaeni janta Karireeyaki. Ikenkithatakaapiintakiri atziri janta pankotsiki ipiyotantapiintarira joriyyopaeni, rowawijaakoeyakirini maawaeni kyaantariri kamaari.

Retsiyatakotakiri Jesoshi patheenkari

(Mt. 8.1-4; Rk. 5.12-16)

⁴⁰ Paashini kitejiri ryaatashitakiri patheenkari Jesoshiki. Patheenkari tee imatziro itsipatari paashini atziri. Tee oshinetziri Iwaperite Tajorentsi. Ari ryaatashitakiri rirori, rotziwerowashitapaakari ipinkathatantapaakariri, ikantapaakiri:

—Tema eeroka pinkathari, pikaminthayena. Eenitatsi pitajorenka: pikoyirika petsiyatakoteena, ari pimatakiro.

⁴¹ Osheki retakotaperotawakari. Ari rakotashitawakiri, ipampitawakiri. Ikantawakiri:

—Jee, nokoyi: aritaki petsiyatakotee.

⁴² Roojatzi opeyantanaa iwathaawo, etsiyatakotanee. ⁴³ Rotyaanteeri, ikantaperotakiri:

⁴⁴ —Nokantemi: eerowa pikamantayitzirini paashini atziri, inta piyaatashiteri ūaanakowenantsiri, poňagaagaeyaari etsiyatakoteemi, roojatzi ishineteemi pipiyashiteri atziripaeni. Pimonkaatero ikantzirini Moeseeshi: powamaeniri Tajorentsi pipira riyotantyaari atziripaeni etsiyatakoteemi.

⁴⁵ Ari ryaatananika, omaanta ikamantakotayitakironi, maawaenii awijimotayitakiririni. Riyotakoeyakirini atziri Jesoshi, rootaki kaari ryaatantanaka nampitsiki. Ijeekakitzi janta okaankiityenta. Ipokashiiyakirini atziri poňaayitacharini paashinipaeniki nampitsi.

2

Retsiyatakotakiri Jesoshi kijopookitatsiri (Mt. 9.1-8; Rk. 5.17-26)

¹ Paashini kitejiri ipiyanaa Jesoshi Kaperinawooki. Ikemakoeyeerini areetapaaka rirori ijeekapaaki pankotsimentsiki. ² Ipyoteeyakani osheki atziri, yeekitaki pankotsiki. Tekatsi ikinapaaki paashini atziri rotzikaa-paakiro omoo. Íkenkithatakagaeyakirini Jesoshi iňaani Tajorentsi. ³ Ari inatakotapaakiri kijopookitatsiri. Ikaatzi ⁴ amiriri. ⁴ Tekatsi ikantya rontsirokyaari Jesoshi, rotzikaakiri atziripaeni. Roojatzi rateetakaantantanakari jenoki pankotsi. Imoontapaakiro kameetha, apatziro rothataakotakiri ijeekakira Jesoshi. Royiitakotakiri imaamentoki. ⁵ Riyotawakiri Jesoshi rameenteeyakarini riraga ⁴ amakiriri, rootaki ikanantakariri riraga kijopookitatsiri:

—Niyompari, ari nopeyakotakaemiro kaari kameethatatsi pantawitari, aritaki nowawijaakoteemi.

⁶ Eeniro jaga ijeekaki iyotaantzirori Iwaperite Tajorentsi. ⁷ Íkenkithashireeyakani rajankaneki rirori:

—¿Itaka ikantashiwaetantari irika? Iitajorentsitashitaka. ¿Tsika ikanterika rowawijaakotantyaariri? Tema apatziro rowawijaakotantzi riraga Tajorentsi.

⁸ Riyoshiryakotakiri Jesoshi ikenkithashiryaaari, ikantziri:

—¿Itaka pikenkithashiryaaantari? ⁹ ¿Itaka pomeentsitaperotachani? ¿Opomeentsitama nokanteri irika kijopookitzinkari: “Eero nowashironkaemi, inta nowawijaakoteemi”? ¿Opomeentsitaperotama nokanteri irika kijopookitzinkari: “Pikatziyanee, paaneero pimaamento, pikatziyatziyawaetaaneeya”? Eerorika imatziro, tema aritaki pishirontawentakina. ¹⁰ Nokowaki piyoteeyeni eenitatis notajorenka nowawijaakotantyaariri.

¹¹ Rootaki ikantakiriri kijopookitatsiri:
—Nokantzimi, pikatziyanaki, paaneero pimaamento, piyaatee pipankoki.

¹² Roojatzi ikatziyantanka, raaneero imaamento, ishitowanee. Iňeyawaerini ijoriyyotzinkaritepaeni, ari rotsikanateeyanakarini. Ikanteyyanakini:

—Tema ikameethaperotzi Tajorentsi, tee aňiilo paerani kimitawori iroka.

Riyoyaakiri Jesoshi Rewii (Mt. 9.9-17; Rk. 5.27-39)

¹³ Paashini kitejiri piyanaa Jesoshi othapyaaki inkaare. Ipiyotashiteeyapaarini eejatzi osheki atziri, riyotagaeyerini. ¹⁴ Roojatzi rowaaganaa ejatzi. Iňaapakiri Rewii, riraga itomi Arijeyeo, ijeeki pankotsiki ipiyotapiintziri

koriki: ipiyotapiinteeeyinirini oroomajatzi. Riraga joriyopaeni roonakari piyotapiintziriri koriki. Omaanta ikantapaakiri riraga Jesoshi:

—Thame poyaatanakina.

—Jee, thametaatyama.

Ari ikatziyanaka, royaatanakiri. ¹⁵⁻¹⁶ Ari riyaateeyanakini ipankoki Rewii. Rowakagaeyapaakarini osheki oyaateeyiririni Jesoshi, riyotaanewopaeni, osheki piyotapiintziriri koriki, maawaeni. Eejatzi rakiyoteeyakirini osheki paashinipaeni kaari kameethatzinkaripaeni. Rareeteeyapaakan iyotaantziori Iwaperite Tajorentsi, rirotaki warijeeyo. Ifñaakotapaakiri Jesoshi ikempiyeeyakarini rakiyoteeyiririni kaari kameethatzinkaripaeni. Rojampitapaakiri riyotaanewopaeni:

—¿litaka itsipateeyantaririni irikapaeni, rowaeyani? Tee ikameethateeyini.

¹⁷ Ari ikemawakiri rirori Jesoshi, ikantziri:

—Riraga kaari mantsiyatatsini tee ikoyi aawinantsiri raawinteri, intakya mantsiyatatsiri rirotaki kowatsiri. Tee ro nopolantya nokaemeri kenkithashiryaachari kameethatatsiri, inta riraga kaari kameethatatsi.

Riraga riyotaanewo Jesoshi tee itzitapiintya

¹⁸ Icantaka itziteeyani riyotaanewopaeni Jowa eejatzi riyotaanewopaeni warijeeyo. Apaanipaeni atziri ipokashitziri Jesoshi, ikantapaakiri:

—Iroñaka itziteeyani riyotaanewopaeni Jowa, eejatzi ikimiteeyani riyotaanewopaeni warijeeyo. ¿litaka kaari itzitanta piyotaanewopaeni eorori?

¹⁹ Ari ikantawakiri Jesoshi:

—Okimitaka aririka raye shirampari iina, ikaemaeyerini isheninka ikimoshirewenteeyerini. Rareetapaakyaarika, ¿arima itziteeyapaakyaaani rirori? Eero. Tema riweshiryaaawentapaakyaaari. Ñaakiro, iroñaka nokaateeyirini naari niyotaanewopaeni: ¿litaka notzitakaantyaariri?

²⁰ Omaanta aririka rookaeyaneerini isheninka aatsiri iina, aripaetekya itziteeyanakyaani. Eejatzi iinja naari, nookaeyaneerini niyotaanewopaeni, rowashiretakoeyanakinani, roojatzi itziteeyantanakyaani. ²¹ Tee pimaejantziri iyotaantatsiri, tee. Eejatzi eenitatsirika pimaathapooki antyashipawo rooteentsi oshipaaye, aririka powawatatero owakirari maathaantsi, roojatzi aririka pikiweri aminthantanaka owakirari, eero omonkaagaakitanaa, roojatzi otzijagaantanakya antyashipawotatsiri, patsipetashitawo powawatatziro. Eejatzi okimitakya, patsipefashityaawo paapatziyawo maawaeni okaatzi iyoteetakimiri. Kameetha pipakaakiro paashini paapatziyawitariri roojatzi kameethatanaki paapatziyena naari. ²² Napiitakiro noshiyakaawentemiro okaatzi niyoteemiri. Piyotzi aakapaenri joriyopaeni awetsikri imashi piratsi apiyaatantyaawori awishoowaantsi oowa. Omaanta eero apiiitantari apiyaatantari awishoowaantsi oowa owakirira inthomaenta itaworimashi inta apiyaatantya owakira mashiri. Apiiantyaaririka tema ari ijagaanaki. Okimitaka iroka, oetarika niyotagaemiri naari eejatzi owakirari. Tee okameethatzi pipiyotero ikemijantakayimiri paashini iyotaantsi. Pipakayero pikemijantziro ikantawitzimiri irintapaeni roojatzi kameethatanaki paapatziyena naari.

Ikantawakaawentakawo saawaro

(Mt. 12.1-8; Rk. 6.1-5)

²³ Paashini saawaro ikinanaki Jesoshi pankirentsimashiki, itsipateeyarini riyotaanewopaeni. Ari niyanki rowiitanaki riyotaanewo okithoki teriko, itayaakiro otaki, rowaeyawoni okithoki.

²⁴ Ari ikantziri warijeeyo:

—¿litaka rowiitantawori okithoki, itayaawaetantakawo iroka kitejirika amakoryaantari? Tee okameethatzi. ¿litaka ranantawori?

²⁵ Rakanakiri Jesoshi:

—¿Tema tee pikenkithashiryaaneentziro Iwaperite Tajorentsi kenkithatakotziriri paerani Iraviirini, riraga jewawenantatsiri maawaeni joriyyopaeni? Tekatsi raye royaari, ayimatakiri itashe, eejatzi itsipateeyarini. ²⁶ Eeniro janta ipankomawoki Tajorentsi paa riwetsikaetziniriri irira: tee ishineteeyerini rowaeyaawoni maawaeni atziri, apatziro rowaeyaawoni ñaanakowenantatsiripaeni. Omaanta ayimawitakari itashe Iraviirini. Riyaatashitakiri Awyataari, riraga iwinkatharite ñaanakowenantatsiripaeni, ikantziri: “Notasheyeeyakini. Tekatsi nowaeyaarini”. Ari ipawakiri paa: “Eenitasi iroka, powapaea”. Ari rowakawo, eejatzi rowakagaeyakarini itsipateeyarini. Kaari riroripaeni ñaanakowenantatsiri, omaanta tee ikoyi Tajorentsi rowashironkagaeyerini. ²⁷ Pamine, riraga Tajorentsi riwetsikakiniriri atziri kitejiri imakoreeyantyaarini. Tee ro riwetsikantyaanariri atziri iñaapinkathatero kitejiri. ²⁸ Nopoñaaka naaka jenokinta, natziriperotapaaki jika kipatsiki: tema naaka kantatsini oetarika anteri saawaroki.

3

Riraga Jesoshi retsiyatatakotziri kijopookitatsiri rakoki

(Mt. 12.9-14; Rk. 6.6-11)

¹ Riraga Jesoshi ryaatanee eejatzi pankotsiki ipiyotantapiintari joriyyopaeni. Aritaki ijekiri jaga: shirampari kijopookitatsiri rakoki. ² Raminashiiyawakarini atziri riraga iijanewo, joreririri: ikowaki ryote aririka retsiyatatakoteeri saawaroki. Tee ishineteetziro retsiyatatakoteetziri atziri saawaroki. Ikowaeyakini riroripaeni ikantakooyerini: “Tee okameethatzi iroka rantakiri Jesoshi”. ³ Riraga Jesoshi ikantziri kijopookitatsiri rako:

—Pikatziyee, pipoke jaka niyanki.

Roojatzi ryaatantanaka niyanki, ikatziyantapaaka.

⁴ Roojatzi rojampiteeyakirini maawaeni amineentsiri:

—¿Kameethama aneshironkateri atziri kitejiriki amakoreeyantarini? ¿Arima owashironkayeri? ¿Okameethatzima owawijaakoteri? Teerikama, ¿pikowakima owamaeyerini?

Omaanta imaeriiyanakini. ⁵ Ikkjanaka Jesoshi, ramineeyanakirini, eejatzi retakoeyanakarini riroripaeni. Tema ikijoshiryaanakitzi rajankaneki tee ikamintaanteeyini atziri. Ikantziri shirampari:

—Powaankaero pako.

Ari rakotanee, roojatzi retsiyatatakotantanaa. ⁶ Ishitowaeyanakini warijeeyopaeni, ryaatashiiyanakirini itsipamintharipaeni Erooreshi. Ikantawakagaeyakani:

—¿Tsikatyakaanterika Jesoshi, owamaantyaariri?

Retsiyatakantzi Jesoshi janta inkaareki

(Mt. 4.24-25; 12.15-21; Rk. 6.17-19)

⁷ Riraga Jesoshi eejatzi riyotaanewopaeni ryaatapitheeyanakirini warijeeyopaenii inkaareki ijekapaaki apanairoeni, omaanta royaateeyanakirini osheki karireeyajatzi, eejatzi joreeyajatzi, ⁸ jerojareejatzi, iroomyajatzi, jeekatsiri intatsikeronta iñaaki Joriraani, maawaeni jeekatsiripaeni Tziiroki, Shirooki, maawaeni. Ikemakoeeyakirini itajonkantzi, rootaki ryaatashiyantakaririni osheki atziri. ⁹ Ikantziri riyotaanewo:

—Pamakinawoota pitotsi, notetawakyaata: rawitsineeyapaakinanikari atziri. Rooteentsimi rowamayenami.

¹⁰ Ikanta Jesoshi rotetantakawo pitotsi ari ikenkithatakagaeyakirini atziripaeni kipatsiki, roojatzi rayiitantapaaka eejatzi kipatsiki. Osheki retsiyatkoeyawakirini mantsiyatzzinkaripaeni. Riraga paashini mantsiyari rinteenaryayitakirini atziripaeni, ikowaki ipampitantapaeyaariri Jesoshi awijakotanee imantsiyari. ¹¹ Riraga atziri kyaantariri kamaari rotziwerowashitapaakari ipinkatheeeyakirini. Icheraanaki iñaawaetakaakiri ikantziri:

—Jesoshi, eerokataki Itomi Tajorentsi.

¹² Ikantaperotziri Jesoshi:

—Pimaerite, eero pikamantakotana.

Riyoyaakiri Jesoshi riyotaanewoperotyaaari

(Mt. 5:1; 10:1-4; Rk. 6:12-16)

¹³ Paashini kitejiri itonkaanaki Jesoshi tonkaariki. Ikaemakaantakiri ikaatzi riyoyaakiri, ari ipokashiteeyakirini. ¹⁴ Riyoyagaeyakirini 12 shi rampari, itsipaperoeyaaarni. Inja iiteri rotyaantanewo, tema rotyaanteeyerini ikenkithatakagaeyerini maawaeni atziripaeni iñaani Pawa Tajorentsi.

¹⁵ Eejatzi ipakiri itajorenka, rookakaakowiritanantyaariri kamaariipaeni atziri.

¹⁶ Rirotaki riyoyaakiri riyotaanewo 12. Riyoyaakiri Shimo (iitakiri Peetero), ¹⁷ eejatzi Jantyaako itsipatakari rirentzi Jowa, (rirotaki itomipaeni Sewereeyo. Iitakiri riroripaeni iroñaaka Wowaneerejeshi). (Akantziri aaka apaanteki: “Oshiyawori oñaawaepookitzi”).* ¹⁸ Eejatzi riyoyaakiri Antereeshi, Jiripi, Waritoromee, Mateeyo, Tomashi, Jantyaako (itomira Arijeeyo), Tareeyo, paashini Shimo (riraga kathaaperotzinkari antayitzirorini oetarikapaenii). ¹⁹ Eejatzi riyoyaakiri Joorashi (riraga karyootejatzti, aakaanterini inja Jesoshi).

Itakaawitakari ikyaatantakari kamaari Jesoshi

(Mt. 12:24-32)

²⁰ Roojatzi ipiyanaa Jesoshi pankotsinentsiki. Ipiyoteeyaani eejatzi osheki atziri. Tekatsi ikantya rowaea eejatzi riyotaanewo. ²¹ Ikemakotakiri Jesoshi isheninkapero, ryaatashitawitaari raaneerimi ipankoperoki. Ikantawakanaka:

—Osheki ishinkiwentaka Jesoshi, tee iñaakota, thame aaneeri.

²² Ipokashitapaakiri eejatzi jerojareejatzipaeni, iyotaantzirori rojankinarini Moeseeshi. Ikantashitapaakari:

—Rirotaki Wereshewoo kyaantapaakariri ishireki Jesoshi. Tema rirotaki iwinkatharite maawaeni kamaari: rirotaki amitakotziriri rirori rotyaantziri iyamaarite, rootaki imatantakariri.

²³ Ikaemaeyawakirini Jesoshi, roshyaakaawenteeyawakirini:

—¿Kyaaryooma ikyaatantapaakina iwinkatharite kamaari? Pamine: ¿tsika ikantyaaka Jatanaashi rookaeya rirojatzi? Eero imatziro. ²⁴ Okimitaka aririka ikijawakagaeyani jeekatsiri nampsitsiki, rookawakagaeyaaarinika, ¿arima ijeekeayaneeni kameetha? Eero. ²⁵ Eejatzi okimitaka aririka ikijawakagaeyani jeekatsiri pankotsiki, ¿arima kijokiro rowawakaaneeya? Eero. ²⁶ Eejatzi ikimitaka, aririka Jatanaashi ikijerimi iyamaaritzinkarite, rookawakagaeyanimi, eeromi ijekimi, inta aritaki ithonkawakaeyakyaanimi. Rootaki. ²⁷ Eejatzi ikimita rirori koshitantatsiri: ithaawantari

* ^{3:17} Oshiyawori oñaawaepookitzi okantakotziri: “shintsziniriri rantawaetziniri Jesoshi rootaki itantakariri”.

shintsiperotatsiri ikyAAPankoteri ikoshitantlyaariri rowaagawo. Aririka ipokashiteri, reewatapaakiri roerikapaakiri, roojotapaakiri shintsitsatsiri, roojatzikya raantakyaawo oetarikapaeni rowayitzirini ipankoki.

²⁸ Kyaaryootaki iroka nokamantaperotemiri: ineshironkateeyirini Tajorentsi maawaeni antzirori kaari kameethatatsi. Tema ipeyakoteniri okaatzi rantziri. Eejatzi, aririka ikantzimateeyawityaarini, ineshironkateeri eejatzi. ²⁹ Omaanta eero ineshironkateeri riraga kantzimatzipori Ishire Tajorentsi: ikanteetatyeeyaani ijeki rirori paamariki kaari tsiwakanitatsini. Eerowa rawijakotee.

³⁰ Rootaki ikantakiriri Jesoshi. Ñaakiro, ikantashiiyawitakani inkaaganki: "Riotaki iwinkatharite kamaari amitakotziriri Jesoshi". Tema rootaki Ishire Tajorentsi amitakotziriri, kaari iwinkatharite kamaari.

Ikamtziri Jesoshi ninka isheninkatakari

(Mt. 12.46-50; Rk. 8.19-21)

³¹⁻³² Ikantaka ijeki Jesoshi pankotsiki, ijekimoeypaakirini areeteeypaakirini. Roojatzi areetapaaka riniro, otsipateeyypaakarini rirentzi-paeni eejatzi ritsiropaeni. Okatziyapaaka inkokironta, okantziri oftaapaakiri: —Pikantenari notyomi.

Ari ikyaashitankiriri, ikantapaakiri:

—Areetapaaka piniro, parentzipaeni, eejatzi pitsiropaeni. Ojeekapaaki inkokironta, okowapaakimi.

³³ Rakawakiri:

—¿Ninka nanatatsiri? ¿Ninka yeeyitatsiripaeni?

³⁴ Roojatzi rookotantanakari jeekimoeyakiririni. Ikantanaki:

—Iroka nanaka. Irika yeeyika. ³⁵ Ninkarika antapiintzirori ikowakaeriri Tajorentsi: riroteeyakini yeeyi, choeni, nana. Nosheninkateeyakarini maawaeni aapatziyeeyanarini.

4

Roshiyakaawentziro Jesoshi inashitacharipaeni kipatsi

(Mt. 13.1-23; Rk. 8.4-15)

¹ Paashini kitejiri, rapiitakiri Jesoshi riyotagaeri janta othapyaakiinta inkaare. Ari ipiyotawentapaakari oshekini atziri. Ikanta Jesoshi iñaawakirira roshekitapaaki atziri, rotetanaka pitotsiki, rotatsinkakiro eechonkiini niyanyaani inkaare, ijekanaki iroñaka rirori. Tema oshekyantzi atziri ikatziyashitakari othapyaaki. ² Ari riyotaayitakirini oetarikapaeni, eejatzi roshiyakaawentayitakironi okaatzi ikenkithatakotayitzirini. Ikantakiri iroñaka:

³ —¡Pikemena! Riyaatanaki pankiwaetatsiri janta rowaneki rookakitero okithoki teriiko. ⁴ Ari rookakitapaakiro okithoki teriiko. Eenitatsi apaanipaeni ookakitapaenchari awotsiki. Ikanta ipokapaeni jenokiweripaeni, rowapaakawo okaatzi rookakitawitakari irika shirampari janta awotsiki.

⁵ Eenitatsi paashini pariyapaentsiri okithoki janta mapipookiki, tee oshenkaawitapaaka, intsipae oshookawitanaka. ⁶ Ari ijenokitapaaki oorya, roojatzi ojampiyashitantanaka. Tee oparithaperotzi, rootaki okamantanakari. ⁷ Oparyapaaki paashini okithoki kitcheemashiki. Okanta oshookawitanaka, okimotatawitanaka. Omaanta anaanakiro oshookanaki kitchee rootaki kaari okithokitananaka. ⁸ Paashinipaeni okithoki oparyapaaki kipatsiperoki kameethari. Oshookanaki, okithokitanaki. Apanipaeni okithokitanaki okaatzi 30. Paashinipaeni okithokitanaki okaatzi 60. Eejatzi paashinipaeni okithokiperotanaki okaatzi 100. ⁹ Pikoyirika piyotakotero okaatzi nokenkithatakakimiri paapatziyena iroñaka.

¹⁰ Jateeyaneeni atziripaeni ikaatzi piyotawentakariri Jesoshi, eniro itsipateeyanaarini Jesoshi apaanipaeni aapatziyariri eejatzi riyotaanewopaen, ryaatee pankotsiki. Ikanta rojampiteeyakirini riori, ikanteeyakirini:

—Iyotaantatsiri, ḡoetaka poshiyakaawentakiri inkaaganki okaatzi pikenkithatakiri?

¹¹ Ikantakiri Jesoshi:

—Pamine, iroñaaka nokamantemiro eerori kaari piyotawita: aritaki piyotakiro tsika ikantari Pawa reewawenantzi. Riroma paashinipaeni atziri, eerowa nokantziri riori inta noshiyakaawentashitayitaanarini.

¹² Irintapaeni atziri rirotaki aminawitachari, tee iñeemaetawo okaatzi nantziri. Eejatzi rirotaki kemijantawitanari, teemaeta ikemathatziro oetarika nokantawitakariri. Rootaki kaari rookantawo okaatzi rantayitzirinira kaari kameethatatsi, eero ipeyakotzimaetanari Pawa rantziri.

¹³ Eejatzi ikantakiri:

—¿Tema pikemathatawakiro eeroka okaatzi noshiyakaawentakiri inkaaganki? Aririka napiitakimiro noshiyakaawentayitemironi, eerowa piyotakotawakiro eejatzi.

¹⁴ Riraga pankwaetatsiri okithoki rirotaki oshiyakariri iyotaantzirori iñaani Tajorentsi. Rowaga okithoki oshiyakawo iñaani. ¹⁵ Rowaga awotsi opariyantapaakari apaanipaeni okithoki oshiyakari atziri kemawitawakawori iñaani Tajorentsi, omaanta riraga Jatanaashi ipokapaaki imanimotakaapaakiri: tee raapatziyanaana. ¹⁶ Eejatzi iroka pariyapaentsiri mapipookiki, rootaki oshiyakaawentachari apaanipaeni atziri kemawitawakawori iñaani Pawa, intsipaete iroñaaka ikomoshirewentawitanakawo. ¹⁷ Pankirents okaatzi kaari tzimperotatsi oparitha, intsipaete okamanaki. Iroka roshiyakawo riraga atziri ikemijantawitaka roojatzi rowashironkagaetakiri, aririka ikijeetakiri. Rootaki intsipaete rookantanaawori ikemijantawita. ¹⁸ Rowaga kipatsi kitcheemashiteentsiri oshiyakaawentziri kemathatawitawakawori iñaani Pawa Tajorentsi, ¹⁹ omaanta ikenkithashiryaaapiintziro jeekayitatsirini jaka kipatsikika, ikomoshirewenteeyironi rashitayitarini. Eekiro ikowanakitzi rashaagawotya, oetarikapaeni, rootaki rookantaaawori ikemijantawita. ²⁰ Omaanta iroka kameethari kipatsi oshiyakaawentziri kemaperotawakirori iñaani Tajorentsi. Aritaki raapatziyaperotakawo, eejatzi raapatziyakaaperotakari paashinipaeni atziri. Apaani raapatziyakaakari 30, paashini raapatziyakaakari 60, paashinipaeni raapatziyaperotakaakari 100.

Roshiyakaawentakiniri Jesoshi ootamentotsi (Rk. 8.16-18)

²¹ Eekiro riyaatatzi ikantakiri Jesoshi:

—Akowakirika ootakotya ḡarima owakiri ootamentotsi kowitziki inthomaenta? ḡArima amanakiri ootamentotsi? ¡Eero! Tema akowatzi oyeri ootamentotsi jeñokiini okoñeetyaantyaari aminanteeyaaarini maawaeni.

²² Okimitaka iroka iinja okoñaatanaki maawaeni amanayitawitarini iroñaaka riyoteeyanakironi maawaeni okaatzi anteeyakirini. ²³ Pikoyirika piyotero kameetha, ari pikemaperotawakiro iroka nokamantakimiri.

²⁴ Paashini ikantakiri eejatzi:

—Pikenkithashireeyawo iroka pikemakiri. Aririka eechonkiini paaptziyawakuyaawo nokamantzimiri, ari eechonkiini piyotawakiro. Aririka osheki paapatziyaperotawakuyaawo, ari osheki piyotawakiro, niyotaaperotakimiri. ²⁵ Riraga aapatziyawakawori niyotaakiriri, eekiro niyaatatyé

niyotaaperoteri. Riraga kaari aapatziyawakawori nokamantawitakariri, eero riyotzi oetarika, tema ipeyatokatiro eechonkiini riyowitari.

Roshiyakaawentziniri Jesoshi okithoki shookatsiri

26 Eejatzzi ikantzi:

—Tema ipinkathariwenteeyakaeni Tajorentsi. Roshiyakari atziri jatatsiri rowaneki ipankitziro okithoki. **27** Imaapiintzi tsiteniriki, ikakitapiintzi kitejiriki. Shitowathowanakan iwkiri, okimotatanaki. Tee riyotakotzimaetawo tsika okanta oshookantakari. **28** Oshookaki kipatsiki: eewatanaki othowaki, roojatzi owaatantanaka, roojatzi owathatantanaka. **29** Aririka ojampatanaki okithoki, ichekakoetero, tema monkaatapaaka rowiitan-teetyawori.

Roshiyakaawentziniri moshitaja

(Mt. 13.31-32; Rk. 13.18-19)

30 Eejatzzi ikantzi Jesoshi:

—¿Tsika nokantemirorka noshiyakaawentemiroka tsika ikanta Tajorentsi ipinkathariwenantz? ¿Tsika akanteroka akenkithatakotantyaawori? **31** Oshiyakawo okithoki moshitaja. Omaanta rowaga okithoki, tee okimitawo paashinipaeni kithokitsiripaeni: okaerikitziini kameetha. **32** Aririka apankitero, oshookanaki. Okimotatanaki, anaayitanakironi paashinipaeni pankirentsityatitsirini. Antawotayitanakini owaempipaeni, aritaki raampeyakaawo shiwankitayatitsirini.

33 Aritaki ikantapiinta Jesoshi, roshiyakaawentapiintziniri atziri riyotaantyaariri iñaani Tajorentsi. Aririka eechonkiini ikemakiro, ari eechonkiini riyotakiri: oshekirkira ikemawakiro, ari osheki riyotakiri. **34** Riyotaantariri tema roshiyakaawentapiintziniri. Omaantakya riyotaanewo, ithotyaagaeyakinirini riyotaaperoeyakirini.

Romaerintakiro riraga Jesoshi tampyaa

(Mt. 8.23-27; Rk. 8.22-25)

35 Itziroryaanaki oorya, ikantziri Jesoshi riyotaanewopaeni:

—Thame amontyaanee intatsikeronta inkaare.

36 Roojatzi riyaatapithatantanakari ikaatzi piyotawentakariri.

Ari ijekaki Jesoshi rirori pitotsiki. Roteteeyapaakani riyotaanewopaeni roojatzi imontyaakotantanaka. Eejatzzi imontyaakotanaka apaanipaeni atziri ikaatzi piyotawenteeyakaririni, ikinakoeyanakini paashiniki pitotsi.

37 Imontyaakomintheeyani ari omapokashitakari niyankaayaan inkaare antawo tampyaa. Antawo otamakaari, otetaatapaaka pitotsiki roowiteenchami itsitsiyakotemi. **38** Omaanta imaatzti Jesoshi rirori janta opataki pitotsi, rotziitotaka. Ikaemanakir iroñaka riyotaanewo, ikantziri:

—¡Iyotaanari! ¡Aritaki pimaaki! ¡Rooteentsi apiinke!

39 Ari ikaakakiri Jesoshi, ipiriintanaka, ikaemakotakiro tampyaa, ikantziro:

—¡Aritaki pitampyaataki!

Ikantziro eejatzzi inkaare:

—¡Pimaerite!

Okanta iroñaka tampyaa awijanaki, maeritanee inkaare. **40** Roojatzi ipithokashitantanakari Jesoshi ikantanakiri riyotaanewopaeni:

—¿Itaka pitahaawantari? ¿Tekirama pameentaperotana naaka?

41 Tema antawo ithaawaeyanakini riyotaanewopaeni, tekatsi ikanteeyanakini. Okanta ojamaniiyaaki, rojampitawakagaa, ikantawakaeyani:

—¿Ninkama irika, romaeryaantakawori tampyaa, eejatzi romaeryaan-takawori inkaare? ¿Riotakima Tajorentsi?

5

*Rookakaakowentakiri Jesoshi shirampari ikyaatashiretarikamaari
(Mt. 8.28-34; Rk. 8.26-39)*

¹⁻² Rareetakaakari Jesoshi intatsikeronta inkaare, ari rareetaka-aa-paakari iipatsiteki karaarajatz. Ro raatakoeyapaakan kipatsiki. Intsipaete iñaawakiri Jesoshi shirampari kyaantashiretariri kamaari. Ishiyashitawakari Jesoshi ipoñaaka janta kitataarewontsimashiki, ³ ari ijeeckawaetz riori. Tema tekatsi aaweerini oojoterini karenathakira.

⁴ Okantawitaka roojotantawitapiinteteetariri kijothari rakoki, eejatzi iitziki, omaanta itzimpejaköpiintayitakini. Tekatsi monkaatzityaarini ishintsini.

⁵ Ikantatyaaani, riyaatapiintzi tonkaariki. Ikaemakaematapiintzi, itowae-tapiinta mapikipaeni. Tema ishinkiwentakaakari iyamaarite.

⁶ Riraga shirampari ifiuitawakarira inteeena ipokaki Jesoshi, ishiyashitakari rareetapaakari, rotziwerowashitapaakari, ipinkathatapaakiri.

⁷⁻⁸ Ikanta Jesoshi, iñaawakirira shirampari ikyaatashiretariri kamaari, icheraakotawakiri, ikantziri:

—jKamaari, pookaneeri shiramparira!

Irika shirampari, antawo icheraanaki ikantakaakarira iyamaarite, ikan-tanaki:

—¿Itaka poñaashirenkantanari? Eeroka Jesoshi, itomi Tajorentsipero. Nokantemi iroñaaka eero powashironkaana.

⁹ Roojatzi Jesoshi rojampitakiri irika kamaari, ikantakiri:

—¿Tsika piitaka?

Rakanakiri kamaari, ikantzi:

—Nowaero Oshekyantzi. Rootaki noetantari, tema osheki nokanta nojeeekantari irika shirampari. ¹⁰ Teera nokoyi potyaantena naakapaeni paashiniki kipatsi.

¹¹ Ari ijeekaki eejatzi janta oshekyantzi chaancho tonkaariki, ikaatzi 2.000, rowawaeteeyani. ¹² Ikantanaki kamaari, ikantziri Jesoshi:

—Ari nokoyi potyaantena janta chaanchoki, nojeekeeyapaakyaarini inthomaenta.

¹³ Ari ishinetakiri. Rookaeyaneerini shirampari, ishirinkashiteeyanakarini chaancho, ikyanteeyapaakarini. Roojatzi ishiyeeyanakani riraga chaanchopaeni impeetaki, ari ithonkaeyakani: ipiinkaeyapaakini inkaareki pooo, pooo, pooo.

¹⁴ Ikanta irikapaeni shentzirirchaancho, iñaakirowa okaatzi awijeentsiri, antawo ithaawayanakini iroñaaka. Shiyeyanakani, ikantapaakiri ikaatzi jeekaeyatsirinipaeni okaakinira. Intsipaete antetanaka ñaagantsi. Pokaeyanakini atziripaeni ramineriiitarakirira awijimotakiriri chaancho.

¹⁵ Riyaatashiteetakiri Jesoshi, iñeetapaakiri riraga shirampari ijeeckantawitari kamaariipaeni. Ijeekaki ikithaataawo iithaari, kameethatanee. Tema iñeetapaakirira, antawo ithaawayanteyapaakarini. ¹⁶ Ikanta irikapaeni

ñaakiriri inkaaganki Jesoshi okaatzi rantakiri, ikanteeyawakirini paashinipaeni atziri owakira pokapaentsiri okaatzi awijeentsiri inkaaganki. Ari okaatzi ikantawakiriri tsika ikanta iñaakiri ipiinkantakari chaanchopaeni. ¹⁷ Ikanta ikemaeyawakinira atziripaeni, ikanteeyakirini:

—Jesoshi, iroñaaka tee nokoyi pipokimotena nonampiki, pipiyanaki.

¹⁸ Ikanta ikemawakira Jesoshi, roojatzi rotetanaa pitotsiki. Ikantaw-itawaari iroñaaka irika shirampari rookakiniri iyamaaritepaeni, ikantziri:

—Jesoshi, nokoyi noyaataneemi.

¹⁹ Rakanakiri Jesoshi, ikantanakiri:

—Eero poyaatana, piyaate pinampiki tsikarika ijeeki pinampijatzipaeni. Pikantapaeri maawaen iokaatzira awijimotakimiri. Pikantapaeri eejatzi: "Ineshironkatakina Nowinkatharite".

²⁰ Ikemawakirira irika shirampari, roojatzi riyaatanee janta inampiki. Ikantakiri inampijatzeejatzi riyaataki maawaen paashininki nampsiti janta iipatsiteki oetachari Tekaaporishi. Ikantapaeri osheki atziri okaatzi awiji-motakiriri.

Ikanta ikemaeyawaerini ikenkithawaetapae, osheki itzimaetyaashi-iyankani.

Retsiyatakotziro Jesoshi jokaatzirori iraa

(Mt. 9.18-26; Rk. 8.40-56)

²¹ Ikantanaka imontyaanaka Jesoshi intatsikeronta inkaare. Ipiyoeyakan-inta osheki atziri janta othanyaakiini. ²² Rareetapaaka shirampari iwaero Jaero, riraga jewatakaayitziririni ijoriyyotzinkaritepaeni janta pankotsiki ipiyotantapiintarira. Ifñaapaakiri, rotziwerowashitapaakari Jesoshi ri-wethatantapaakariri Jesoshi. ²³ Ikantaperotapaakiri:

—Rooteentsi okame nishintyo. Pipoke pipampitakitero awijakotantaneeyaari roori, eero okamanta.

²⁴ Ari royaatanakiri, roojatzi royaatayitanakirini osheki piyotawentari, rawitsinaawakaanaka. ²⁵ Ari okaataki tsinani jokaatzirori iraa, okaatako-taki 12 ojarentsi. ²⁶ Osheki raawinteeetawitakawo, thonkapaaka oorikite omaanta eekiro iyaatatz ojokaatziro iraa. ²⁷⁻²⁸ Okemaki ikantakoeyirini Je-soshi: "Osheki retsiyatakotantzi". Ojatekanakari oyaateeyiririni okinapaaki itapiiki. Okenkithashiryaanaka: "Aririka nopampitziteri imaatha, aritaki netsiyatakottee".

Ari opampitzitawakiri imaatha, kaatakotanee ojokaatziro iraa.

²⁹ Okemawakitya tsinkaririri, awijakotanee. ³⁰ Eejatzi rirori intsipaete ikemashitawakawo itajorenka. Ari ipithokashitanakari oyaatziriri, ikantziri:

—¿Ninkama pampitzitakinawori nomaatha?

³¹ Rakanakiri ryotaanewo, ikantanakiri:

—Tema piñiiri roshekitaki oyaatayitzimirini. Rawitsinaayitakimini. Eekiro pikantatzi: "¿Ninkama pampitzitanawori nomaatha?"

³² Raminaminayitanakini ikoyi ifneeri pampitzitakiriri imaatha. ³³ Roori tsinani, osheki othaawanaki ompetatanaka, tonki, tonki, tonki. Iyotaki awijakotanaki. Otziwerowashitapaakari, oñaaperotantariri. Othotyaakiro okantaperotakiri maawaen. ³⁴ Ikantziro:

—Tsinani, pameentakina, rootaki petsiyatakotantaari. Iroñaaka piyaate, pikimoshiree. Tema etsiyatakottee.

³⁵ Tekiraata ithonkiromi ikenkithawaetakayiro, ipokaeyapaakini ronam-piripaeni riraga Jaero. Ikantapaakiri:

—Kamanaki pishinto. ¿litaka poñaashirenkantariri irika iyotaantatsiri?

³⁶ Ikemawakiro Jesoshi iroka ikantapaakiriri. Ikantziri:

—Jaero, eero pikantashiryaashita, inta pameentena naaka.

³⁷ Tekatsi ishinete oyaatanakirini, inta ishinetakiri riraga Peetero, Jantyaako itsipatanakari rirentzi Jowa. ³⁸ Roojatzi rareeteeyapaakani ipankoki Jaero. Ifñaapaakiri atziripaeni: ikaemaeyakini, rowashire-takoeyakawoni, riraakoeyakawoni. ³⁹ Ikyappaaki, ikantapaakiri:

—¿litaka pikaelmakotantawori? ¿litaka piraakotayitantaworini? Tee okamaperotzi ewankawo, omaashita.

⁴⁰ Ishirontawenteeyawakarini, roojatzi roemishitowaeyapaakirini. Raanakiri iri eejatzi iniro, eejatzi Riyotaanewopaeni, ikyashita-paakiro janta omaryaakanta ewankawonta kamawiteencharira.

⁴¹ Roerikawakotapaakiro. Ikantziro rashii paanteki:

—Tarita komi.

(Akantziri aaka apaanteki: "Ewankawo, pañaagae".) ⁴² Roojatzi añaantanaa, opiriintanaa, sherok, anashitanaa. Okaataki ojarentsite 12, rootaki omatantaari anashiwaeta. Rotsikanateeyanakawoni osheninkapaeni.

⁴³ Ikantaperotziri rirori:

—Eerowa pikamantayitzirini atziri okaatzi piñaakiri nantakiri. Ari iroñaka piperowananawo.

6

Riyaataki Jesoshi Najareeteki (Mt. 13.53-58; Rk. 4.16-30)

¹ Roojatzi riyaatantanaa Jesoshi, areetapaa inampiki rirori. Royaateey-erini Riyotaanewo. ²⁻³ Roojatzi kitejiri imakoryaantapiintari, Riyotaantapae janta pankotsiki ipiyotantapiintarira joriyopaeni. Rotsikanatawakari osheki kemawakiriri. Itheenkayakirini Jesoshi, ikanteeyini:

—Tema rirotaki asheninkapero aari. ¿Tsika ipoñaakaakawoka iroka Riyotaantziri? ¿Tsika ikantakari itajonkantayitaktarini? ¿Karima irika wetsikapiintzirori jeekamentotsi? Rirotaki otomi Mariiya, tema rirotaki rirentzipaeni Jantyaako, Josee, Joorashi, eejatzi Shimo. Eejatzi ritsiropaeni, tema ojeekimoteeyakaeni jaka.

⁴ Ikantzi Jesoshi:

—Iñaaperoeyakirini atziri kamanantzirorini iñaani Tajorentsii. Omaanta rirorika kamanantawityaawoni inampijatzi osheki itheenkirri.

⁵ Kyaaryo inampiweri itheenkayakirini riraga Jesoshi, rootaki kaari itajonkantapiinanta janta inampiperoki. Apatziro ipampitayitzirini apaanipaeni mantsiyatinkari, retsiyatatakotayitzirini. ⁶ Omaanta tee raapatziyeyarini inampijatzi, rootaki rotsikanatantanakari riraga Jesoshi, ikenkithashiryaka: "¿Litaka kaari raapatziyeyantanani?"

Rantayitzirini Riyotaanewopaeni Jesoshi (Mt. 10.1-15; Rk. 9.1-6)

Ikinakinayitanakini Jesoshi nampsikipaeni, Riyotaantayitanakini.

⁷ Eejatzi Riyoyaakiri Riyotaanewo 12. Imatakaakiri rowawijaakotantyaariri kyaantawitariripaeni kamaari. Roojatzi rotyaanteeyakirini; itsipatawakaanteeyanakarini, apitepaeni riyaatayitanakini nampsikipaeni.

⁸ Ikantaperotawakiri:

—Aririka piyaatanaki, tekatsikya paanaki. Eero payi poyaari, eero payiro pithaae. Eejatzi eero payi piyorikite. Omaantakya paanaki pikotzi. ⁹ Eejatzi pijapatotanakya, omaanta eero paanaki paashini pimaatha.

¹⁰ Eejatzi ikantawakiri:

—Tsikarika pijekapaaki, aritaki pijekaarakotapaaki, roojatzi piyaatanakya paashiniki nampsitsi. ¹¹ Eeririka raakameethateeeyawakimini janta nampsikiki, eejatzi eeririka ikemijanteeyawakimini, ari pishirinkanaki potekakontatanakya piizikira Riyotantyaari eero pipiyashitari eejatzi. Omaanta ari rowashironkaakiripa Tajorentsii inija.

¹² Ari riyaateeyanakini Riyotaanewopaeni. Ikamanteeyakirini atziri-paeni:

—Pikenkithashiryagaeya, eero pantapiintziro eejatzi kaari kameethatatsi, inta pookaero.

¹³ Rowawijaakoeyakirini osheki kyaantawitariri kamaari. Ijeetantayitakarini oyeenka oriwo osheki mantsiyaripaeni, retsiyatakoeyakirini.

*Riraga Erooreshi rowamaakaantakiri Jowa kaawoshitantatsiri.
(Mt. 14.1-12; Rk. 9.7-9)*

¹⁴ Osheki kemakaoeyiririni Jesoshi, rootaki ikemakotantakariri eejatzi pinkathari iitachari Erooreshi. Ikantayitzini atziripaeni:

—Riotaki Jowa kaawoshitantatsiri, kamawiteenchari: piriintanaa. Rootaki ipiriinrantari itajorentsitzira.

¹⁵ Eenitatsi paashini kantayitawitacharini:

—Riotakirika Iriiyashini: piriintaachari.

Paashini kantayitatsirini eejatzi:

—Riotaki kamanantzirorini iñaani Tajorentsi. Roshiyaari kamanantayitzirorini iñaani Tajorentsi paeran.

¹⁶ Ikemakotantariri riraga Jesoshi, ikantzi Erooreshi:

—Riotateeekityaami Jowa. Nochekakaantawitakari ikentsiki omaanta piriintanaa eejatzi.

¹⁷⁻¹⁹ Ari paerani Erooreshi raapithatakiri rirentzi iina. Iita rirentzi Jiripi, ro iinantawitarini, Eroriyashi.

Riraga Jowa ikantapiintawitakari Erooreshi:

—Tee okameethatzi paapithateri parentzi iina.

Okijanakiri Eroriyashi, okowaperotaki owamaakaanteri, omaanta tee ikoyi riraga oemi. Osheki oñaashirenkapintakiri, rootaki raakaanantakariri Jowa, romonkyaakaantakiri omonkyaaagamentotsiki.

²⁰ Ipinkathatawitakari riraga Jowa, riyoñziri ikameethaperotzi, raapatziyaperotari Tajorentsi. Rootaki kaari ikowanta rowamaakaanteri. Tema ithaawakaawitattyari Jowa, ikenkithatakapiintziri. Raapatziyawitawo ikantziriri Jowa, omaanta tee riyoñzi tsika ikanty. ²¹ Monkaataka kitejiri ikonaatantakari paerani Erooreshi. Rowakagaeyakarini osheki inashitayitacharini jewatatsiripaeni karireeyajatzi. Rootaki kitejiri owamaakaanantakyariri rowaga Eroriyashi Jowa. ²² Okyaapaaki ishinto roori janta rowaeyaninta opirantakotapaakiri. Iñaaperotawakiro kameetha riraga Erooreshi eejatzi itsipateeyarini. Ikantziro ewankawo:

—Pikowakotena iitarika pikoyiri. Aritaki nopakimi. ²³ Iñaakina Tajorentsi, riyoñzi eero namatawitzimi. Oetarikapaeni pikowakotakinari, aritaki nopakimi. Pikowakirika nopagaantem noepatsite, aritaki nopakimi kashetanai.

²⁴ Shitowanee roori, ojampitapaakiro iniro:

—¿Oetaka nokowakoteriri?

Akawakiro roori:

—Ro pikowakoteriri iito Jowa kaawoshitakotziriri Tajorentsi.

²⁵ Intsipaete opiyashitanaari pinkathari. Okowakotapaakiri, okantziri:

—Nokoyi iroñzaaka pipakotenawo piratoki iito riraga Jowa.

²⁶ Osheki rowashiretanaka. Tema aritaki ikantakiro inkaaganki: “Eero namatawitzimi”. Eejatzi ikemaeyawakirini maawaeni itsipateeyakarini. Tee iroñzaaka ikowae ramatawitero. ²⁷ Ari rotyaantakiri owamaantatsiri, ikantawakiri:

—Pamakinawo iito Jowa.

Ari riyaatanaki janta romonkyaakirinta, ichekapaakiri ikentsiki.

²⁸ Ramakotakiro piratoki iito, ipapaakiro ewankawo. Roori, owaakiniro iniro. ²⁹ Ikemakotakirika riyoñtaanewoni Jowa, ari riyaatashiiyakirini. Raaneero iwatha ikitatero.

*Rowakaakari irira Jesoshi osheki atziri
(Mt. 14.13-21; Rk. 9.10-17; Jowa 6.1-15)*

³⁰ Paashini kitejiri ipiyayitaani riraga rotyaanawo Jesoshi. Ikanteeyapaakirini maawaeni rantayitakirini. Eejatzi ikantakoeyapaeroni maawaeni ryotaanteeyakirini. ³¹ Osheki atziri piyotawenteeyapaakaririni Jesoshi. Apaanipaeni jatayiteeni, eekiro ipokatzia paashini, rootaki kaari imatanta rowaeaani rirori eejatzi ryotaanawo. Ikanteeyakirini irirapaeni:

—Thame ayowaeyanakini, aate janta tekatsinta atziri amakoryaawakiita eechonkiini.

³² Roojatzi riyaateeyanakini, ikinakotanaki pitotsiki. ³³ Omaanta ineeyawakirini oshekini atziri, ryoteeyanakirini tsikarika riyaate. Ipoñaayitanakanani ipankokipaeni, ishiyashitanakari, ishirethapyaatanakawo othapyaakini. Ranaakoeyakirini rirori, royaapaakiri. ³⁴ Imitaanaki riraga Jesoshi eejatzi ryotaanewopaeni, inaaapakiri osheki oyaakiriri. Roojatzi osheki retakoshiryaaperotapaakari roshiyakaantapaakiri owisha kaari ishenteetzi. Osheki ryotagaeyapaakirini oetarikapaeni. ³⁵ Roojatzi itsiteniityaanaki oorya. Ipokashitapaakiri ryotaanewopaeni, ikantapaakiri:

—Iroñaaka ajeekaki jaka tekatsi pankotsi, tekatsi owanawontsi. Eejatzi itsiteniityaanaki oorya. ³⁶ Okameethatzi potyaanteeyerini atziri riyaateeta owantsiki, nampitsikipaeni. Ramanantapaente rowanawo.

³⁷ Rakanakiri Jesoshi, ikantziri riraga ryotaanewopaeni:

—Piperiita eero ka owanawontsi.

Ikantawakiri riroripaeni:

—¿Pikoyima niyatae namanantakite owakagaeyaaririni atziripaeni? Osheki opinata: eero imonkaata koriki.

³⁸ Ikantawakiri:

—¿Tzikama okaatzika owanawontsi? Piyaate, paminakitero.

Ari inaakitziro, ikantapaeri:

—Apatziro apawakooni okaatzi paa, eejatzi apite mereto.

³⁹ Ikantawakiri:

—Poejeeakiri atziripaeni jaga katawomashiki. Pipiyoteeyerini, eejatzi pinashiteeyakaarini.

⁴⁰ Ari ipiyoteeyakirini, ijeekaeyanakini. Apaanipaeni piyoteenchari ikaatzi 100 atziri, rinashitaka paashinipaeni piyoteenchari ikaateeyini 50. Enitatisi osheki paashinipaeni piyoteenchari. ⁴¹ Ari raakiro riraga Jesoshi paa eejatzi mereto, raminanaki jenokinta, ikantziri Iriri:

—Ariwee, Pawa, eerokatakai pakinawori iroka noyaarika.

Ikagaakiro paa. Ipayitakirini ryotaanewopaeni roshirinkakiniri piyoteenchari. Eejatzi mereto, royiitakiniri maawaeni atziri, ⁴² ari rowaeyakani. Ikemaeyanakani, tee ithonkanakiro owanawontsi.

⁴³ Raayiteeroni tzimagaantapaentsiri, riyeekiteeyironi kantziriki okaatzi 12. ⁴⁴ Ikaateeyini owaenchari 5.000 shirampari, eejatzi tsinanipaeni, eejatzi entsipaeni.

Ranashaatawo irira Jesoshi inkaare

⁴⁵ Roojatzi rotyaanakiri riraga Jesoshi ryotaanawo, ikantziri:

—Thame potetanakya pitotsiki. Peewateeyenani intatsikeronta inkaareki, janta Wetheeraki: notyaanteeyeriniita ipankokipaeni irika piyoteenchari.

—Jee, ari.

⁴⁶ Ikanta riyaatanaki atziripaeni roojatzi riyaatanaki riraga Jesoshi tonkaariki, ikenkithatakayiri Tajorents ⁴⁷ Tsiteniriki eekiro

oepiyakotziri tampyaa. Ari iniyankitakotanaki inkaareki riyotaanewo, omaanta eeniro ijeekaki rirori apaniroeni tonkaariki. ⁴⁸ Ikanta iñaakiri riyotaanewo, ikomakomateeyawitanawonni riyotakiri makaoempekitapaaki. Ari ryaatashitanakiri rirori. Ranashaatanakawo inkaare, tee itsitsiyi. Roowiteenchami rawijanakirimi ⁴⁹ roojatzti iñeyantawaarini, ranashaataapakawo inkaare. Iiteyawitawakarini peyari. Ari ikaemaeyanakini:

—¡Eeeee! ¡Kaakitaki peyariwee!

⁵⁰ Ari iñeyawakirini maawaeni. Ithaawaeyanakini. Intsipaete iñaanatapaakiri rirori:

—Piweshireeyanakyaani. Naaka pokatsi. Eero pithaawantana.

⁵¹ Rotetapaaka pitotsiki itsipateeyapaakarini roojatzti opeyantanaa tampyaa. Riwershiraawentari eejatzi osheki rotsikanateeyanakarini. ⁵² Iñeyawitakarini inkaaganki itajonkiro paa omaanta tekira ikenkithashiryaakoperotari irira rivotaki Tajorentsi. Tema eeniro okijotzimoneentakiri rajankane.

Rantayitzirini Jesoshi janta Jenejareeteki

⁵³ Imontyaantanakawori, rareeteeyapaakani Jenejareeteki. Raatakoeya-paakani. ⁵⁴ Rayiiteeyapaakini, intspaeete ryoteeyawakirini atziri.

⁵⁵ Ishiyashiteeyawakarini. Ramakoeyakinirini mantsiyatzzinkaripaeni ishitashiki, janta ijeekapaakira Jesoshi, aritaki janta raakotanakiniri.

⁵⁶ Ikinakinayitzini owaaninikipaeni nampitsi, nampitsikipaeni antawo, eejatzi owantsikipaeni. Tsikarika ikinayitzini Jesoshi ipiyotayitakinirini mantsiyaripaeni. Royiitakinirini niyanki nampitsiki, ikanteeyawakirini:

—Pishineteenawo nopampitzitawakimiro opatziyakiki pithaari.

Ari rawijakoeyaneeni maawaeni pampitzitawakiriri iithaari.

7

Rameteeyarini joriyopaeni (Mt. 15.1-9)

¹ Ikanta ipokapaaki warijeeyopaeni, eejatzi apaanipaeni iyotaantzirori Iwaperite Tajorentsi, ipoñaka Jerojareeki. Ipiyotawentapaakari Jesoshi.

² Iñagaeyapaerini riyotaanewo, rowaeyani tee ikiwawakota: tema tee ikiteshiretzi. Ikantereeyini: “Aririka oyaa, ityaawo akiwawakotya akameethashiretantyaari”. ³ Riraga warijeeyo rameteeyawoni rootzimateentsirika roya ikiwawakoperota. Tema rameteeyawoni maawaeni joriyopaeni. Rooma eerorika ikiwawakota eero royiita. Imonkaatayitzironi riyotaantapiintzirini itakaantaworini. ⁴ Aririka ipoñagaeya janta nampitsiki niyanki, eerorika ikiwawakoperotapaa eero rowa paa. Eejatzi imonkaatashitayitakawoni osheki oetarika riyotaayitziririni atziripaeni. Ikiwapiinteeeyironi iwajoni, iwachakate, iyotsironakite; maawaeni. ⁵ Ari rojampiteeyapaakirini Jesoshi:

—¿Itaka kaari imonkaatantawo piyotaanewo riyotaantayitzirini itakaantaworini? Irika iroñaka owaencharika tee ikiwawakota ipeyakotakiro okantziri kaminagaantsi: eeniro rantani. ⁶ Ikantanakiri Jesoshi:

—Osheki pamatawitayitzini, tema poshiyakaawaetashita paapatziyari Tajorentsi. Aritaki ikamantakotzikimini paerani Iseeyashi. Rojankinatakini, ikantzi: “Irika atzirika ikantawaetashiteeyakinani: ‘Nopinkathatzimi’, omaanta rajankanekira tee raapatziyaperotana, okimitzimotakina intena ijeekaeyakini.” ⁷ Ratsipetashitakawo

rotziwerowashitana; roshiyakaawaetashita iñaaperotana. Ramaatawitatishayitakarini ijoriyyotzinkaritepaeni: ikantawitari iroka riyotaawitariri kimiwitaka rootaki Iwaperite Tajorentsi". Kyaaryootaki iroka ikantitzakarini Isee yashi.

8 Eejatzi ikantziri Jesoshi:

—Pookanakiro ikaminaawitzimiri Tajorentsi, inta paaptzizashitanakawo riyotaanteeyirini atziri. ⁹ Aritaki pitheenkakiro ikaminaawitzimiri Tajorentsi, inta pikowashitaka pimonkaatero riyotaantayitzirini itakaantaworini. ¹⁰ Tema ikantziri Moeseeshini: "Otzimaty pipinkathateri piri eejatzi piniro". Eejatzi ikantzi: "Riraga Tajorentsi ikantakotziri akawaantetziriri ashitariri eejatzi riniro: 'Okameethatzi rowamagaeteri' ". ¹¹ Omaanta pikantashitapiinteyawitarini atziri: "Aririka pikashiyakayeri Tajorentsi piyorkite, ari pipaperoteri. Rashironkaawaetyaarika piri, piniro, pikanteri: 'Eero nomatziro nopenmiri koriki: irika koriwaka, tema nokashiyakaakiri Tajorentsi noorikite noperiri' ". ¹² Aritaki iroñaka tee pishinetziri ajoriiyotzinkaritepaeni retakotaneeyaaari iriri, riniro. ¹³ Pikowakaakiri raapatziyawo piyotaapiintziriri, omaanta piyotaakiri itheenkakiro ikantziri Tajorentsi. Aritaki pikantapiintari: pookakaayitzirini ajoriiyotzinkaritepaeni raapatziyawowa Iwaperite Tajorentsi.

***Ikamantakotziro Jesoshi owaariperotzirori ashire
(Mt. 15.10-20)***

14 Rapiitakiro ikaemaeri riraga Jesoshi piyoteeyeencharini ikanteeyirini:

—Pikemaperoyenani maawaeni. Nokoyi pikemaperotena nokantemiri. ¹⁵ Okameethatzi owaeyaawoni oetarikapaeni, eero añauro antani: tekatsi okantero owanawontsi ashire. Omaanta aririka pikenkithashiryaa kotaawo kaari kameethatatsi, eejatzi piñaawaeterorika kaari kameethatatsi, rootaki owaariperoteroni pishire. ¹⁶ Eerokapaeni kemayitakirorini okaati nokantakimiri, pikenkithashiryaa kotaawo.

17 Ithonkakiro riyotaakiri eejatzi rookaneeri piyotawenttariri, roojatzi ikyapae pankotsiki Jesoshi eejatzi riyotaanewopaeni. Rojampitapaeri irira:

—¿Oetaka poshiyakaawentziniriri inkaaganki?

18 Ikantawakiri:

—Eejatzi eeroka, ¿tee pikemawakina inkaaganki? Oetarikapaeni owayityaarini okameethatzi, eero añauro antani. Tema piyotawakiro. ¹⁹ Rooma eero omatziro owaariperotziro ashire, inta iyaataki asheetoki, roojatzi ashitaneeyawori.

Rootaki riyotaayitziririni okameethataki oetarika rowaetari. ²⁰ Eejatzi ikantziri:

—Omaanta pikenkithashireerorika kaari kameethatatsi, eenitatsi pantani. ²¹ Rooma pikenkithashiryaa kaworka pajankaneki pantero kaari kameethatatsi, rootaki panantyaawori maawaeni: pishirontyaawo tsinani kaari payi, pishirontyaari shirampari kaari payi, pikoshite, powamaante, ²² osheki pikowaperotero oetarikapaeni rashitayitarini paashinipaeni atziri, pantero kaariperoripaeni, pamatawitanteri, piñaathatanya, piñaawenawaetya pikowaperote pikimityaari ashaagantzinkari, pikantzmateri atziri, pikantakaaperotya, tee piyoteeyironi pantero kameetha. ²³ Kyaaryo, pikenkithashiryaaawo pantero kaari kameethatatsi, rootaki panantawori: rootaki powariperotantakari.

*Retsiyatakoteero Jesoshi ishinto shirojeniishiyajato
(Mt. 15.21-28)*

²⁴ Roojatzi riyaatanee Jesoshi Tziiroki. Ijeekapaaki pankotsinentsiki, tee ikowawita Riyoteeterimi. Omaanta tekatsi ikantya imanapithatyaa atziri. ²⁵ Ojeeki janta tsinani, ikyaaantawitakawo ishinto kamaari. Oke-makotawakiri roori Jesoshi, iyaatashitanakiri, otziwerowashitapaakari.

²⁶ Kaari joriiyo, oponaaka Shirojeniishiyaki. Okantapaakiri:
—Ikyaaantakawo nishintyo kamaari, petsiyatakoteenawo.

²⁷ Roshiyakaawentashitanawo, ikantawakiro:

—Nitawakyaaariita nojoriiyotzinkarite netakotyaa. Tee okameethatziaapithateeri rowanawo eentsite aperi otsitzi.

²⁸ Rooriakanakiri:

—Jee, kyaaryo. Ari ijekita rirori otsitzi otapinaki raperotayitzironi rowanawopetokipaeni eentsite.

²⁹ Ikantaneero:

—Jee, kameetha; kyaaryo pikantakiri. Kameetha piyaatee iroñaaka, awijakotanee pishinto.

³⁰ Opiyanaaga opankoki. Ofnaapaero ishinto, omaryaaka omaamentoki, awijakotanee, tema yowanee owamaarite.

Riraga Jesoshi retsiyatatakotziri matakempitatsirini

³¹ Roojatzi rowaagakaantanaari Jesoshi riyotaanewo, ikinanee Shirooki, roojatzi kirinkanta Joriraaniki, roojatzi rareetapaa inkaareki owaero Karireeya. Ikinanaki ochereeteki intatsikeronta Karireeya janta Tekaa-porishiki. ³² Ramaetapaakiniri shirampari amashitzinkari inthomaenta ikempita, kaari kematsi eejatzi imajontzitzi. Ikantapaakiri amiriri:

—Pipampitawakiri, petsiyatakoteeri.

³³ Riraga Jesoshi rookaneeri piyotawenttariri, apaniroeni itsipatanakari matakempitari. Romonkyakiniri rakoempeki ikempitaki. Reewatakiro rakoempeki, ipampitakiri ineniki. ³⁴ Raminanaki jenokinta, ikenkithatakaakiri Tajorentsi roojatzi ikantziri ipaante rashii:

—jEpeta!

Akantziri aari añaanekii: “Piwitaryaaneeyaa”. ³⁵ Iwitaryaanaa ikemantari. Opeyanaa imajontziwita, kameetheenkatanee iñaawaetanee.

³⁶ Rapiitapiintawitari ikantziri:

—Eerowa pikamantakotana.

Omaanta tee ikemijantaperotziri, eekiro ikamantakotanakitziri.

³⁷ Eekiro rotsikanateeyanakityaarini Jesoshi. Ikanteeyini atziripaeni:

—¿litakaya? Okameethaperotantari rantayitzirini. Imataperotakiro Jesoshi maawaeni rantayitzirini. Kemanee amashitzinkari inthomaenta ikempita, eejatzi riraga majontziwitachari, iñaawaetakagaeri.

8

*Rapiiteero Jesoshi roshekyagaero paa
(Mt. 15.32-38)*

¹ Paashini kitezjiri ipiyoteeyakanii eejatzi osheki atziri, tekatsi rowaeyaarini. Riraga Jesoshi ikaemiri riyotaanewo, ikantawakiri:

² —Netakoeyakarini irikapaeni. Ro netakoeyantakaririni 3 kitezjiri itsipateeyakinani, tee rowa. ³ Agaeyakirini itashe. Eenitatisi apaanipaeni poñeenchari inteeena: aririka notyaanteeyawiteeyarini iroñaaka ipankoki, ari ishipetawathatanakirii niyanki awotsiki.

⁴ Rakanakirii riraga riyotaanewo:

—¿Tsika akantyaaka akemakagaeyantyaaririni paa? Jaka tekatsi atziri jeekatsini.

5 Rojampitakiri:

—¿Tsika okaatzika jeekaentsiri paa?

Ikantzi:

—Okaatz 7.

6 Ikanteeyakirini piyotawenteeyaririni:

—Pijeekaeyeni katawomashiki.

Raakiro paa, ipaasonkitziri Iriri. Ikagaakiro, ipaeyakinani naaka riyotaanewopaeni, noshirinkaeyakinirini piyoteenchari. **7** Eenitatsi ejatzi mereto apaanipaeni. Ipaasonkiwentakiri eejatzi. Roojatzi ikantziri riraga riyotaanewo:

—Pipaeyerini ejatzi mereto.

8 Roojatzi nowaeyakan, nokemaeyanakan. Naayiteeroni tzimagaantapaentsiri, nowaero kantziriki. Okaatz yeekeitaatsiri 7. **9** Ikaateeyini owaenchari 4.000 shirampari. Roojatzi rotyaanteeyeerini:

—Piyaateeeyeeni pipankokipaeni.

Ikowawita warijeyo iñeerimi Jesoshi itajonkantayitzini

(Mt. 15.39–16.4; Rk. 12.54–56)

10 Itsipateeyanaarini riyotaanewo, roteteeyanaani pitotsiki. Niyaateeyaneeni janta Tarimanootaki. **11** Ari ipokapaaki warijeyopaeni. Ikijathata-paakiri, ikantziri:

—Ajaatya, pitajonkantayiteni niyotantemiri eerokatakirkia Tajorentsi, roojatzikya aririka nomatero naapatziyemi.

12 Osheki okantzimoneentanakari Jesoshi. Ikantzi:

—¿Itaka ikowaeyantarini maawaeni atziri noñaayeri notajonkante? Kyaaryootaki iroka nokamantaperotemiri, eero noñaayimiro notajonkantayiteni.

13 Roojatzi ryaatakaantanaari riyotaanewo, rotetanaa ejatzi pitotsiki. Riyaataanee, imontyaanaa intatsikeronta.

Ikantziri Jesoshi: "Ramatawitzimikari warijeyo"

(Mt. 16.5–12)

14 Ipeyakoeyanakironi riyotaanewo raanakiromi rowanawo pitotsiki, inta apaan paa raanaki. **15** Ikantziri Jesoshi:

—Paamawentyaawo tapiyakaawori paa, rashitari warijeyopaeni, ejatzi rashitari Erooreshi.

16 Roojatzi ikantawakaanaka, ikanteeyini:

—Tekatsi paa ashi, rootaki ikanantakaeri: “Paamawentyaawo tapiyakaawori paa”.

17 Riyotakotakiri Jesoshi ikenkithashiryaaari, ikantziri:

—¿Itaka pikantawakaantari: “Tekatsi paa ashi”? ¿Itaka kaari pikemaperotanta? ¿Itaka kaari piyotanta? ¿Pikijoshiryakitzi pajankaneki?

18 Otzimawita pok, ¿itaka kaari piñaanta? Otzimawita pikemantari, ¿itaka kaari pikemanta? ¿Itaka kaari pikenkithashiryantaawo

19 noshekyaantakawori paa? Okaatwita apawakooni paa, ikaatzzi owakawori 5.000 shirampari. Ari paglero tzimagaantapaentsiri. ¿Tsikama okaatz yeekeitaatsiri kantziriki?

Ikanteeyawakirini:

—Okaatz 12.

20 Ikantziri Jesoshi:

—Eejatzi paashini, okaatz paa 7, ikaatz eejatzi owakawori 4.000. Pagaero ejatzi tzimagaantapaentsiri. ¿Tsika okaatzika kantziri piyeekitakiri?

Ikanteeyirini:

—Okaatzi 7.

²¹ Ikantziri:

—^cTekirama iroñaaaka piyotawakiro? Tee ro nokenkithatakoteri paa inkaaganki, omaanta nokenkithatakotzi riyotaantziri warijeeyo eejatz Erooreshi.

Retsiyatakoteeri Jesoshi kaari kokichaatatsini

²² Ikantaka rareeteeyanakan Wetheeraki. Ramaetapaakiniri Jesoshi kaari kokichaatatsini. Ikantapaakiri amiriri:

—Pipampitawakiri ikokichaatantaneeyaari.

²³ Ari ikathathanakiri kaari kokichaatatsini, raanakiri othonkapaakanta nampitsi. Reewakitapaakiri rokiki, ipampitakiri rokiki. Rojampitakiri:

—¿Kokichaateemi?

²⁴ Raminanee, ikantzi:

—Jee, kokichaawitaana noñaawitaari shiramparipaeninta, omaanta tee ikoñaaataperotzi, ikimitzimotashitakina inchatopaeni ranashiteeyani.

²⁵ Rapiiteeri eejatz, ipampiteeri rokiki. Roojatz ikokichaaperotanee, etsiyatakotaperotanee. Raminanee, koñaaperotanee maawaeni. ²⁶ Ikantziri Jesoshi:

—Eerowa pikinanee nampitsiki pikamantzirikari atziri oetarika awijimotakimiri. Apatziroky powaneero pipankoki.

Riraga Peetero riytakotziri Jesoshi rivotaki Rotyaantanewo Tajorentsi

(Mt. 16.13-20; Rk. 9.18-21)

²⁷ Ikantaka rowaaganaa Jesoshi, itsipatanaari riyotaanewopaeni. Riyaateeyanakini janta Sesareeyaki riwetsikakaantakiri Jiripi. Niyankitanaki awotsiki, rojampitayitakirini riyotaanewo:

—¿Itaka Ikenkithashiryaaaktanari atziripaeni? ¿Ninkama naaka?

²⁸ Rakanakiri, ikantanakiri:

—Apaanipaeni aamaayiteencharini eeroka Jowani kaawoshitakotziriri Tajorentsi. Irira paashinipaeni raamaakimi eeroka riraga kamanantzirorini iñaani Tajorentsi iwaero Iriiyashi. Paashinipaeni ikantzi eeroka inashitachari kamanantzirorini iñaani Tajorentsi piriintaachari.

²⁹ Rojampiteeyakirini:

—Eerokakya, ¿itaka pikenkithashiryaaakoeyanarini?

Rakanakiri Peetero, ikantakiri:

—Eerokataki naamagaeyakarini paerani: eeroka Rotyaantanewo Tajorentsi.

³⁰ Roojatz ikanantanakari:

—Eerowa iroñaaaka pikamantakoperotztanaata, pikante: “Jesoshi rivotaki Rotyaantanewo Tajorentsi, riraga Ówawijaakotantsini”.

Ikanteeyirini Jesoshi: “Nokemaatsitawenteeyemini”

(Mt. 16.21-23; Rk. 9.22)

³¹ Roojatz riraga Jesoshi riytagaeri eejatz:

—Naaka poñaachari jenokinta, nokonaatapaaki jaka kipatsikika. Iinja osheki nokemaatsitawenteeyemini. Kyaaryo, itheenakakina aataperoteenchari atziri, eejatz jewatayitziririni ñaanakowenantatsiri, eejatz iyotaantzirori Iwaperite Tajorentsi: itheenkaeyenani, rootaki rowamaakaanantenari iinja. Nokamawitakya, omaanta okaate 3 kitejiri, roojatz nopsisinanteey.

³² Aritaki ikantaperoeyawitakarini. Riraga Peetero raanakiri inteeeneeni, ikantakiri:

—¿Itaka pikanantawori iroka? Tee okameethatzi pikame.

³³ Roojatzi ipithokashiiyakarini Jesoshi riyotaanewopaeni, ramineeyanakirini. Roojatzi ishntsithatakiri Peetero, ikantziri:

—Pikimitakari Jatanaashi. Piyaate. Eeroka pikenkithashiryaashitakawo ikenkithashiryaaati atziripaeni. Tee piyotziro ikowakaakinari Tajorentsi.

Tsika akantyaaka aakapaeni oyaatantyaariri Jesoshi

(Mt. 16.24-28; Rk. 9.23-27)

³⁴ Roojatzi ikaemakiri Jesoshi piyoteencharipaeni eejatzi riyotaanewopaeni. Ikantakiri:

—Aririka pikowaki poyaateeyenani, eero pantziro kaari kameethatatsi pikowashitayitarini eorori. Poyaateeyanakinani, pikyaaryooowenteeyenawoni maawaeni nokowakaakimiri: omawitya aririka pikamakotena.

³⁵ Tekirarika piwetsika pikamakotena, patsipetashita pijeeki, ari piyaataki paamariki kaari tsiwakanitatsini. Omaanta aririka piwetsikakya pikamakotena, eejatzi aririka paapatziyakaayitenarini paashinipaeni atziri eero patsipetashitawo: pikanteetatyeeyaani pañe janta jenokinta. ³⁶ Aririka pashiteeyawoni maawaeni jeekayitatsirini jaka kipatsiki, omaanta piyaate paamariki kaari tsiwakanitatsini, tema patsipetashitakawo pashitayityawoni oetarikapaeni. ³⁷ Ñaakiro, tekatsi pikantya pipinateri Tajorentsi ijeekakaantemiri janta inampikinta. ³⁸ Tema naaka poñaachari jenokinta, natziritaaki jaka kipatsikika. Eejatzi nopyianee janta. Roojatzi iinja nopyantteya eejatzi jaka kipatsikika notsipatapaakyaari maawaeni ronampiri Pawa riraga kameethatatsiripaeni, notajorentsiperotapaaki: nokimityaari Pawa. Rootaki okameethatanteeyaaari pikenkithashireeyaa: aririka pipashiwentzimotakaakyaari kaariperotatsiri naaka iroñaaka, eejatzi aririka pipashiwentakayaawo noñaani, ari iinja nopyashiwentakaapaemi eeroka aririka nopyiee.

9

¹ —Kyaaryootaki iroka nokamantaperotemiri. Pamine, akaateeyakini iroñaaka jaka. Eerotzitarika pikamiteeyani, aritaki piñaawaena nopyinkathariperotapaaki, notajorentsitapaaki.

Irira Jesoshi ipaashinitzimotanakiri riyotaanewo

(Mt. 17.1-13; Rk. 9.28-36)

² Awijanaki 6 kitejiri. Raanakiri Jesoshi riraga Peetero, Jantyaako, eejatzi Jowa, reewatanakiri janta antawo tonkaari. Ari ijeekapaaki irirapaeni. Ipaashinitanaki Jesoshi, ipaashinitzimotanakiri oyaatziriri.

³ Oshipakiryaanaki imatha okitamaamawoperotanaki osheki. Jaka kipatsiki tee añiilo kitamaari kimityawoni iroka. ⁴ Romapokapaakiri ikoñaatzimotapaakiri Iriiyashini eejatzi Moeseeshini, ikenkithatakapaaakiri Jesoshi. ⁵ Iñaawaetashiwaetanaka Peetero:

—Iyotaanari, tema okameethataperotzi pamakinaka jaka noñaantakimiri. Iroñaaka nokowaki niwetsikaeyenimi 3 pankoshintsipaeni: apaani pashi, apaani rashii Moeseeshi, eejatzi paashini rashii rirori Iriiyashi.

⁶ Ithaawaperotayitanakini osheki, rootaki kaari riyotanta Peetero iitarika ikanterimi. ⁷ Oztikaapaakiri menkori. Omapokanaka iñaani Tajorentsi menkoriki, ikantakiri:

—Riotaki notyomi nonintaperotziri, paapatziyaperotyaari.

⁸ Intsipaete raminawitanaari riyotaanewo, tekatsi riroripaeni, inta apaniroeni Jesoshi. ⁹ Roojatzi ipiyantteeyanaani, roerinkaeyanaani. Ikan-taperotziri Jesoshi:

—Eerowa pikantakotzirokyo iroka piñaakiri iroñaaaka. Aririka piñaakina nañagae eejatzi, ari pikenkithatakotero okaatzi piñaakina. Naaka poñaachari jenokinta nokoñaatapaaki jaka kipatsiki.

¹⁰ Ari ikemaeyawitakarini, roojatzi rojampitawakaantanaka iitaka iroka ikantziri Jesoshi: “Nañagae eejatzi”. ¹¹ Roojatzi ikanteeyantakarini rirori-paeni:

—Riraga iyotaantzirori Iwaperite Tajorentsi ikanteeyini: “Riotaki itapaakyawoni ipoke Iriiyashini, eentsikiro rimpetaapaaki ipokapaaki rirori Rotaantanewo Tajorentsi”. ¿litakayka ikanantawaetakari iroka?

¹² Riraga Jesoshi rakanakiri, ikantanakiri:

—Kyaaryo ikanteetzi: “Riro itapaakyawoni ipoke Iriiyashini, rowameethateeyapaakirini maaawaeni”. Tema naaka rojankinatakotzitakarini paerani: “Osheki ikemaatsityaawo, eejatzi osheki itheenkaetawakiri”. ¿litaka rojankinatantawori iroka? ¹³ Iroñaaaka nokantemi: aritaki ipokapaentzi paerani paashini Iriiyashini. Iktamatinthatziri atziri osheki rowashironkaakiri, imonkaatakiro rojankinatakotziteetakaririni paerani. Eejatzi ikimitena naari.

Retsiyatakotziri Jesoshi kyaantariri kamaari (Mt. 17.14-21; Rk. 9.37-43)

¹⁴ Roojatzi ipiyanteeyanaani janta ijekaeyakininta ryotaanewopaeni paashini. Iñeeyapaakirini itsipateeyapaakarini osheki piyotawentakariri. Ijeeki iyotaantzirori Iwaperite Tajorentsi, iñaanatziri ipiyapiyawaanteeyakarini riraga ryotaanewopaeni Jesoshi. ¹⁵ Ari iñeyawakirini Jesoshi ipokae, rotsikanataperotawakari. Ishiyashiteeyanakarini, riwethateeyawakarini. ¹⁶ Rojampitapaakiri:

—¿litaka piñaanatawakaanteeyarini?

¹⁷ Rakanakiri apaani shirampari, ikantzi:

—Iyotaanari, namakimiri notyomi. Ikyaatkarri kamaari, romajontzi-itakinari. ¹⁸ Aririka ishinkiwentakaapaeyaari, rowariyaakiri kipatsiki, ishimoretakaanakiri, ratsikaekitakaanakari, ikinopookitakaanakiri. Nokantawitari piyotaanewo: “Petsiyatakoteeri”. Teewee, tee imatziro.

¹⁹ Rakanakiri Jesoshi:

—Atziri theenkantanari. Tee paapatziyimaetana. ¿Tsika okaateka piyoteeyantyaarini? Niyotaapiintawitakimiri, omaanta tee paapatziyeyawakawoni. Intsipaete, pamakinaritya pitomi.

²⁰ Ari ramakiniri. Riraga kamaari, iñaapaakiri Jesoshi. Rapitziwitakaanakari eentsi, ipariyakaanakiri kipatsiki, pok. Ipinaapinaatakaanakari, ishinkanawatzitakaanakiri ipaanteki. ²¹ Riraga Jesoshi rojampitakiri iriri eentsi:

—¿Tsika okaatzika itantanakariri?

Rakanakiri:

—Eeniro reentsitapaaki. ²² Osheki itaakaapiintari paamariki, eejatzi ipi-inkakayitapiintakirini iñaaaki. Ikwawita rowamaerimi. Pitajonkantzirika, pineshironkateena, petsiyatakoteenari.

²³ Ikantziri Jesoshi:

—¿litaka pikantanarri: “Pitajonkantzirika”? Pameentanarika, aritaki imatakimiro eeroka Tajorentsi oetarikapaeni.

²⁴ Ishintsitanaki ikantziri iriri eentsi:

—Nameentawitzimi. Teerikama nameentaperotzimi, pamitakotena nameentaperotantemiri.

²⁵ Riraga Jesoshi iñaawakiri ishiyashiteeyapaakarini osheki atziri. Ishintsithatakiri kamaari, ikantziri:

—Eerokataki kamaari. Pimajontzitakaantzi, eejatzi pamashikempi-tatakaantzi. Iroñaaka nokantaperotemi: “Pipakagaeri, eero pipiyantari eejatzi”.

²⁶ Riraga kamaari ikaemakaanakiri eentsi, rapitziwitakaanakari roojatzi rookaneeri. Riraga eentsi ikimiwitakari kamatsiri. Osheki kantayitatsirini: —Kamaperotaki.

²⁷ Omaanta ikathawakoteeri Jesoshi, ipiriinteerि, ikatziyanaa rirori, sherok. ²⁸ Roojatzi ikyagaeyapaeni pankotsiki. Riyoteeyanakanri riyotaanewo, rojampiteeyirini:

—¿litakanya kaari nomatantawo naari netsiyatakoteri?

²⁹ Rakanakiri:

—Osheki ishintsitzi riraga kamaari, rootaki kaari pimatantari pet-siyatakoteeri riraga shinkiwentawitachari. Eejatzi maawaeni kimiteeyaririni, eero pimateeyirini apaniroeni. Apatzirorika pitzitawentyaari Tajorentsi eejatzi pamanaperoteri, ari ramitakotakimi rirori powawijaakoteri kyaantawitariri kamaari.

Rapiitakiri Jesoshi riyotaanewo, ikantakiri: “Aritaki nokame”

(Mt. 17.22-23; Rk. 9.44-45)

³⁰⁻³¹ Roojatzi rowaaganaka Jesoshi eejatzi riyotaanewopaeni janta, ikinnee Karireeyaki. Ari ikowaki rirori riyoteeri riyotaanewopaeni apaniroeni, rootaki imantanakanri ryaatayitaneeni. Ikantanakiri irirapaeni:

—Naaka poñaachari jenokinta, nokoñaatapaaki jaka kipatsikika: rooteentsi raakaanteetena. Rayena atziri rowamaena. Ari nokamaperotawitakya, ari okaate 3 kitejiri, eejatzi nañagae.

³² Omaanta tee riyoteeyawakironi ikantawitakariri. Ithaawan-teeyanakanri rojampiterimi oetarika ikantawitariri.

Tsika akantyaaka apinkathariwenante iinja

(Mt. 18.1-5; Rk. 9.46-48)

³³ Ikantaka rareeteeyapaakani Kaperinawooki, ijekaeyapaakini pankotsiki. Rojampitziri Jesoshi riyotaanewo:

—¿litaka pikantawakaari awotsiki?

³⁴ Imaeriteeyanakini rirori, ipashiwenteeyanakanri; rooma ikantawakaanaka janta awotsiki, ikantzi:

—Iroñaaka akaateeyinika, ¿ninkama anagaenika apinkatharite?

³⁵ Roojatzi ijekantapaakawo Jesoshi jeekamentotsi. Ikaemakiri riyotaanewo, ikantziri:

—Aririka pikoye pipinkathariwenante, petakoeyaarinii maawaeni atziri, eejatzi pamitakoyerini, pineshironkaoyerini.

³⁶ Ramakiniri apaani eentsi. Rojatekapakainiri niyanki, rawithak-itawakiri. Ikantziri:

³⁷ —Aririka pineshironkateri aapatziyanari, kimitaririka irika eentsi, eejatzi pikimitzitakina naari: pinintashiretakina naari. Eejatzi okimitaka, aririka pinintashiretena, tee apatziro naaka pinintashireperotena, omaantakya eejatzi Pawa otyaatakinari.

Rowawijaakontanzi paashini aapatziyariri Jesoshi

(Mt. 10.42; Rk. 9.49-50)

³⁸ Roojatzi riraga Jowa ikantanakiri:

—Iyotaanari, noñeeyakirini shirampari, ikantzi: “Naapatziyakari Jesoshi, rootaki nookantakariri kamaari”. Tee iroñaaka akaateeyerini rirori jaka, rootaki nothañaakotantariri.

³⁹ Ikantziri Jesoshi:

—Eero pithañaakotari. Tema naaka nomatakaakiri itajonkantzi. Irira tee ikijeeyeeni, tema rantakinawo nokowakaakiriri. ⁴⁰ Ninkarika kaari kijaneenteeni rirotaki atsipateeyarini. ⁴¹ Aririka riyotawakimi atziri eeroka aapatziyanari, rootaki ikamintaantawakimiri ipawakimi pimiri, omawitya aririka okaate eechonkiini, aritaki ipinatakiri Pawa. Kyaaryootaki iroka nokamtazimiri.

*Koweenkatsiri antakirorika kaari kameethatatsi
(Mt. 18.6-9; Rk. 17.1-2)*

⁴² Eejatzi irika eentsi, aapatziyanari: aririka pantakayeri kaari kameethatatsi, aritaki rowashironkaaperotakimi Tajorentsi. Okameethatawitami pikamityaami paerani, eero pantakaantarikya kaari kameethatatsi aapatziyanari; rootaki kaari nowashironkaantemimi. ⁴³ Eenitatsi iroka noshiyakaawentemiri: iroñaaka piyotantyaari tee okameethatziroña pantero kaari kameethatatsi. Aririka antakayemiro pako kaari kameethatatsi, pithatyero. Aritaki okameethatziri piyaaponthotziitashitya jenokinta, okantyaata janta pañaantaperotapaeyaari. Tee okameethatziroña otzime apite pako eerorika pithatyero, rootaki piyaatantyaari paamariki kaari tsiwakanitatsini. Tema okanteetatyeyanaani amoreki. ⁴⁴ Eero janta ikami chowitsi, eejatzi eero otsiwakanitzi paamari roori. ⁴⁵ Eejatzi aririka antakayemiro piitzi kaari kameethatatsi, pithatyero. Aritaki okameethatziri piyaaponthotziitashitya jenokinta, okantyaata janta pañaantaperotapaeyaari. Tee okameethatziri eenitatsi apite piitzi: eerorika pithatyero, rootaki piyaatantyaari paamariki kaari tsiwakanitatsini. ⁴⁶ Eero janta ikami chowitsi. Eejatzi eero otsiwakanitzi paamari roori. ⁴⁷ Eejatzi aririka aminakayemiro poki kaari inimotziri Tajorentsi, pikithokireero, pookero. Ari okameethatziri kashetaakini pikyaapae janta ipinkatharitzinta Tajorentsi. Rooma otzimaawityaarika apite poki: iyaatakaashiteemikari paamariki kaari tsiwakanitatsini. ⁴⁸ Eero janta ikami chowitsi. Eejatzi eero otsiwakanitzi paamari roori. ⁴⁹ Eeroka aapatziyeyakinarini, rootaki ikjanteeyantemirini kaari aapatziyeyyanarini. Aririka paapatziyeyenan, ari piñeero opomeentsitzimotemi. ⁵⁰ Okameethatziri tziwi. Omaanta aririka opeyanakya owatyorite, tekatsi okantya okatyotanee eejatzi. Ari pikimitya eerori: pikempoyeero iñaani Tajorentsi pajankaneki paakameethatawakaanteeyaarini. Tema okameethatziri: pikantyaani paakameethatawakagaeyaani, maawaeni. Tema pikimitakotakawo tziwi.

10

*Riyotaakiri Jesoshi atziri: "Eero pookaero piina"
(Mt. 19.1-12; Rk. 16.18)*

¹ Ikanaka rowaaganaa Jesoshi, ikinakaaneeri riyotaanewopaeni Joreeyaki. Eejatzi riyaatee intatsikeronta Joriraani. Ipiyotawentapaari eejatzi osheki atziri, riyotagaeyapaerini. Tema aritaki rameteeyawoni riyotaantapiintzi.

² Ipokashitapaakiri warijeeypaeni. Ikowawita ikompitakayaarimi Jesoshi, rootaki rojampitanteeyapaakaririni:

—¿Tsikama okantzika Iwaperite Tajorentsi? ¿Oshinetama rookaero shirampari iina?

³ Rakanakiri riraga Jesoshi:

—¿Oetakama rojankinatakirini Moeseeshi pikemijantaperotantyaawori?

⁴ Rakaayanakirini rirori:

—Rojankinarini Moeseeshi oshinetziri atziri rookaero iina. Tema okantzi: “Aririka pikoyi pookaero piina, pityaawo, pojankinateniro paperi pikanteero: ‘Iroñaka nookaemi’. Roojatzikya pimatantyaawo pookaero”.

5 Ikantanakiri Jesoshi:

—Tee ikowakaantziro Tajorentsi pookaero piina, omaanta eerokapaeni tee añiiro pikenkithashiryaaantari, rootaki rojankinatantakimiori Moeseeshi paerani iroka. **6** Paeraniperoroña ritantakawori riwetsikantaki Tajorentsi, riwetsikakiri shirampari eejatzi tsinani. **7** Rootaki rotsiparyaantyaariri shirampari iriri, eejatzi riniro, kijokiro rowantanakyaawori iina. **8** Rinashitawitani paerani shirampari eejatzi tsinani. Omaanta aririka raaki iina kimitanaa apaani ikantaka: kijokiro rowawakaanakya. **9** Iñaakiri Tajorentsi apaani ikantaka; eero iroñaka rookakagaeri atziri.

10 Roojatzu ijeekantapaa pankotsiki. Rojampitapaeri eejatzi ryotaanewo:

—¿Tsika okantaka iroka pikantakiri?

11 Ikantziri:

—Ninkarika ookeroni iina aririka ragae paashini tsinani, tema iñaaathatzimotaawo iinaperoni. **12** Eejatzi okimitya roori tsinani, aririka ookaeri oemii, agaerika paashini shirampari, tema oñaathatzimotaari oemiperoni.

Riraga Jesoshi iñaaperotziri eentsipaeni

(Mt. 19.13-15; Rk. 18.15-17)

13 Ikanta ramaetapaakiniri eentsipaeni, ikantapaakiri Jesoshi:

—Pipampiteri eejatzi pikanteri Tajorentsi kameetha ijeekakagaeyerini irika eentsipaeni.

Omaanta ikantawakiri ryotaanewopaeni:

—Eero pamiri eentsipaeni jaka, rocheempitarirkari iyotaanari.

14 Tee inimotanakiri Jesoshi rantakiri. Ikantanakiri:

—Pishinetenari ipokashitenataa eentsipaeni. Eerowa pikatziyakari. Piñeyakirini irikapaeni eentsika, tee itheengaeyanan, inta rameenteeyakanani. Tema reewawenteeyirini Tajorentsi maawaeni kimiteeyayaririni rirori.

15 Kyaayootaki iroka nokamantaperotzimiri, irika eentsipaeni rameenteeyakarini Tajorentsi. Riroma riraga kaari oshiyarini eentsi, riraga kaari ameentari Tajorentsi, eero imatziri reentsitetari.

16 Inataperoeyawakirini eentsi, rowaeyakinirini rako iitoki. Ikan-teeyirini:

—Kameetha ineshironkatemi Tajorentsi.

Ikenkithawaetakayiri Jesoshi ashaagantzinkari

(Mt. 19.16-26; Rk. 18.18-27)

17 Ikanta riyaatee Jesoshi, ikinanee awotsiki. Ishiyapaaka apaani shiram-pari, rotziwerowashitapaakari. Ikantziri:

—Iyotaantatsiri kameethari. ¿Oetakama nanteri nañaantyaari, nokantee-tatyeyeaani?

18 Ikantziri:

—¿Litaka pikantanari: “Kameethari”? Tekatsi kameethatatsini, inta apatziro Tajorentsi ikameethatzi. **19** Piyomacheetawo iroka ikaminagae-takiriri Moeseeshini: “Eero powamaantzi. Eero pishirontawo kaari piina. Eero pikoshitzi. Eero pitheeyakotari atziri. Eero pamatawitantzi payitantlyaariri rashitayitarini paashini atziri. Pipinkathateri piri eejatzi piniro”.

20 Ikantanakiri rirori:

—Pamine, eenironi newankaritapaakini, nothotyaakiro maawaeni iroka-paeni, roojatzi iroñaaka.

²¹ Riraga Jesoshi, raminanakiri, inintashireperotakiri. Ikantakiri:

—Eenitatsi apaani kaari pantzi. Piyaate iroñaaka pipimantayiteroni maawaeni pashaagawo. Pipashiteeyaaarini kaari tzimatsi rashaagawo, rooma eeniro kashiyakaaperotakimiry Tajorentsi kaari thonkanitachani jenokinta. Roojatzi poyaatananakina.

²² Ikemawakirira ikantakiriri, ookantzimotapaakari rajankaneki rowashiretakotanakawo. Ro rowashiretantanakari tema oshekini tzimimotziriri rowaagawo. Roeyomaetanaka, riyaatanee. ²³ Ari ipithokashitanakari Jesoshi riyotaanewo, ikantziri:

—Riraga ashaagantzinkari opomeentsitzimotari ikowaki Tajorentsi ipinkathariwenteri.

²⁴ Ikemanteeyawakaririni riyotaanewo, rotsikanatanakari. Rapiiteeri eejatzji Jesoshi, ikantziri:

—Notyomipaeni, kyaaryo opomeentsitzimotari atziri ikowaki Tajorentsi ipinkathariwenteri aririka rameentyaawo rowaagawo.

²⁵ Noshiyakaawentemiri kameeyo. Tema opomeentsitaka roshinthateri kameeyo imooki kithapi. Omaanta pomeentsiperotachari ashaagantzinkari ikowaki Tajorentsi ipinkathariwenteri.

²⁶ Tema osheki iroñaaka rotsikanateeyanakarini rirori. Ikantawakaanaka:

—¿Ninkama iroñaaka awijakotaatsini? Pomeentsritaani.

²⁷ Raminanakiri Jesoshi, ikantziri:

—Eero imatashitawo atziri rowawijaakoteeya rirori, omaanta rirotaki Tajorentsi materini rowawijaakoteeri. Tekatsi pomeentsitzimotaarini rirori.

Tajorentsi ipinateeyerini maawaeni oyaateeyiririni Jesokirishito (Mt. 19.27-30; Rk. 18.28-30)

²⁸ Roojatzi Peetero ikantanakiri rirori:

—Omaantakya naaka, nookayitakironi maawaeni, oetarika nashiteeyawitarini, noyaatanakimi eerori.

²⁹ Ikantzi Jesoshi:

—Kyaaryootaki iroka nokantemiri. Aririka pikowaki poyaatanakina, eero patsipetashitawo pookayiteroni pinampi, pirentziapaeni, pitsiropaeni, piniro, piina, piri, peentsitepaeni, powanepaeni. Eejatzji aririka pikowaki pikamanantero noñaani raapattiyanteenari atziri, eero patsipetashitawo.

³⁰ Kyaaryo, ikijawentemiro paapatziyana opomeentsitzimotawitemi, omaanta eero patsipetashitawo. Aririka pookanakiro apaani oetarika, ipaemi Tajorentsi 100: pipankopaeni, pirentziapaeni, pitsiropaeni, piniropaeni, peentsitepaeni, powanepaeni, maawaeni. Aritaki iinja otzimimoteeyeeemini osheki janta pañaaperoeyapaeninta, pikanteetatyeyaaani. ³¹ Eenitatsi iroñaaka osheki pinkatharitatsiri jaka kipatsikika, omaanta eero ipinkathariteeyini maawaeni janta jenokinta: rooma aamashitya apaanipaeni pinkatharitagaantatsini. Eejatzji eenitatsi iroñaaka osheki owashironkaenkaripaeni, omaanta iinja janta jenokinta ipinkatharitagaantapae rirori.

Rapiiteeniri eejatzji Jesoshi: “Aritaki nokamaki paata”

(Mt. 20.17-19; Rk. 18.31-34)

³²⁻³³ Ikanta ikineeyanakini awotsiki, rooteentsi rareeteeyaaani Jerojareeki, reewatanaki Jesoshi. Rotsikanatanakari oyaateeyiririni, eejatzji ithaawaeyanakini. Ari ipiyotziri eejatzji riraga 12 riyotaanewo, ikantziri:

—Pikemijantena. Iroñaaka piyoteeyakini atonkagaeyatyee ni janta Jero-jareeki. Tema naaka poñaachari jenokinta, nokoñaatapaaki jaka kipatsikika. Rooteentsi omonkaaty raanteetenari ragaeyenani jewatayitziririni fiāanakowenantatsiri eejatzi iyotaantayitzirorini Iwaperite Tajorentsí, rowamaakaantakina. Raakaanteena eejatzi, raantenari kaari yotziri Tajorentsí.
³⁴ Ishirontawenteeyakinani, reewapootena, ipajapajaatena, rowamaena. Okaatapaaki 3 kitejiri, roojatzi nōpiriinantaneeya.

*Ikantziri Jesoshi tsika ikantyaari ipinkatharitanyaari
(Mt. 20.20-28)*

³⁵ Ipokashitakiri okaakini Jantyaako, eejatzi Jowa, riraga itomipaeni Sew-reeeyo. Ikantziri:

—Iyotaanari. Nokowaki pishinetenawo iitarika nokowakotemiri.

³⁶ Ikantawakiri Jesoshi:

—¿Itaka pikoyiri noshinetemiri?

³⁷ Ikantziri:

—Inja pipinkatharitaperote, pishinetena nojeekimotemi pakoperoki. Iraka yeeyika ijeekimotemi pampateki, nokimiteeyemini eerori pipinkatharitizi.

³⁸ Ikantziri Jesoshi:

—Tee piyotzi iitarika pikantakinari. Pamine, osheki nokemaatsityaawo naari, ¿arima pimatakiro osheki pikemaatsityaawo eerori?*

³⁹ Ikantaki ryotaanewo:

—Jee, ari nomatakiro.

Ikantawakiri:

—Inja piñeero pikemaatsityaari. ⁴⁰ Omaanta tekatsi nokantya noshinetempi pijeeki nakoperoki, eejatzi nampateki. Inta kantatsine Pawa ninkarika jeekimotenani: ryotzitakarini paerani riraga jeekimotenani.

⁴¹ Ikemaeyantakaworini riraga paashinipaeni ryotaanewo iroka ikantakiri, ikijanteeyanakarini riraga Jantyaako eejatzi Jowa. Nokijanteeyanakaririni ikowaeyawitakityaani ipinkathariteeyenimi.
⁴² Ikanteeyirini Jesoshi:

—Pipokaeyeni. Piyotzi ijeeki iwinkatharitepaeni kaari yotziri Tajorentsí. Romperatayitakarini atziripaeni rirori. Eejatzi riraga jewatatsiripaeni, romperateeyakarini isheninkapaeni. ⁴³ Eero pikimitari eeroripaeni. Omaantakya aririka pikowaki pipinkathariwenteeyerini atziri, petakoeyaarinai maawaeni pitsipateeyarinai. ⁴⁴ Eejatzi aririka pikowaki peewawanente, otzimatye petakoeyaarinai maawaeni. ⁴⁵ Naaka poñaachari jenokinta, nokoñaatapaaki jaka kipatsikika. Tee ro nōpokantyaari nomperateemi eerokapaeni, intakya nōpokantari namitakoeyemini, eejatzi nōkamawenteyemini eerokapaeni atziri nōpinawenantemirori kaari kameethatatsi pantziri, nowawijaakotantemiri.

*Retsiyatakotziri Jesoshi Waritemeeyo
(Mt. 20.29-34; Rk. 18.35-43)*

⁴⁶ Ikanta rareetaka Jesoshi janta nampitsiki owaero Jerikoo. Rowaaganaa eejatzi, itsipateeyanakarini ryotaanewopaeni eejatzi osheki piyoteenchari. Ari ijeekaetzini awotsinampiki shirampari iitachari Waritemeeyo, rirotaki itomi Temeeyo. Kaari kokichaatatsi Waritemeeyo, inethaakopiintziri atziri ipashityaari koriki. ⁴⁷ Ikemakotawakiri kaakitaki Jesoshi, riraga najareete-jatzi. Owakira ikemakotawakiri, ikaemawakiri, ikantziri:

* ^{10:38} Riraga Jesoshi roshiyakaawentashitawo aririka ikemaatsitakyaawopa katsiri kimitaka rirakitziro kepishaaperotatsiri, eerorika kimitaka ikaawoshiwentakityaawo oetarika pomeentsiperotachari.

—¡Jesoshi! Tema eeroka icharineeten Iraiviiri, pineshironkatapaena naari.

⁴⁸ Osheki atziri ishintisitheeyakirini:

—¡Pimaerite!

Eekiro ikaemaperotanakitzi, ikantzi:

—¡Jesoshi! ¡charineeten Iraiviiri! ¡Pineshironkataneena!

⁴⁹ Ikatziyapaaka Jesoshi, ikantzi:

—Pikaemeri.

Ikaemaetziri kaari kokichaatatsi, ikanteetziri:

—Piweshiryaaanakya, pikatziyanee. Ikaemimi irinta.

⁵⁰ Roojatzi rookantanakawo ipewiryaaakotari, ikatziyanaka, sherok.

Riyaatashtanankiri Jesoshi. ⁵¹ Ikantawakiri:

—¿Itaka pikowakotanari? ¿Tsika nokantemika?

Rakanakiri riraga kaari kokichaatatsi.

—Pawa, nokowaki naminee.

⁵² Ikantziri Jesoshi:

—Iroñaaka piyaatee. Pameentakina, rootaki petsiyatakotaari.

Roojatzi ikokichaatantanaa, royaatanakiri rirori.

11

Riyaatanaki Jesoshi Jerojareeki, iñaaperotawakiri atziripaeni

(Mt. 21.1-11, 14-17; Rk. 19.28-40; Jowa 12.12-19)

¹ Paashini kitejiri rareetzimataapaakari Jesoshi Jerojareeki eejatzzi Wetejajeeki, okaakiniki Wetaaniyaki: itonkaanakiro tonkaari oetachari Oriiwomashi. Riraga Jesoshi rotyaantakiri riyotaanewo apite, ² ikantakiri: —Piyaate janta nampitsiki. Aririka pareetakya janta piñaapaakiri apaani wooro ewankari, tekira ikyakotaa. Eeniro ithatakotaka; pithataryaaakotashitapaakyaari pamakinari. ³ Aririka ikanteetawakimi: “¿Itaka pithataryaaakotantariri wooro?” pikantanakiri: “Ikaemakaantziri Awinkatharite. Iinja roepiyeemiri”. Aritaki ishinetawakimiri iwoorote.

⁴ Roojatzi ryaatanaki riyotaanewo. Iñaapaakiri wooro janta awotsiki. Ithatakotaka okaakini ashitakontsi pankotsi. Ithataryaakotapaakiri.

⁵ Eeniro ijeki atziripaeni, rojampitawakiri:

—¿Oetaka pantziri? ¿Itaka pithataryaaakotantariri wooro?

⁶ Rakanakiri, ikantziri okaatzi ikantawakiriri inkaaganki Jesoshi. Ari ishinetawakiriri iroñaaka raanakiri wooro. ⁷ Ari ikathatakotanakiniri Jesoshi. Rowankitakiniri imitzikaaki iithaariipaeni, roojatzi ikyakotantanakari rirori. ⁸ Ari ranashitakaanakari awotsiki, iñaaperoyawakirini maawaeni atziri, romaankaeyakironi kithaarentsipaeni awotsiki. Paashinipaeni ichekakiro oshi kompiroshi, eejatzi rowakiniri awotsiki. ⁹ Riraga jewateeyakiririni eejatzi impaeteeyatsirini, ikaemaeyanakini:

—¡Irirkatapaaki owawijaakoteeni! ¡Thame añaaperotawakiri! ¡Rirotaki rotyaantakaeniri Tajorentsi! ¹⁰ Paerani Iraiviirini ipinkathariwentzirini nojori-iyotzinkarite: omaanta iroñaaka, ipinkathariwentakae irika añaawakirika. Rirotaki icharineetenipero Iraiviirini. Thame añaaperoteri Tajorentsi jenokijatz.

¹¹ Roojatzi rareeteeyapaakanji Jerojareeki, ikyappaaki Tajorentsipankoki. Ithotyaapakiro raminayitapaakironi. Ari itsiteniityaanaki oorya. Roojatzi ishitowantanakari, ipiyanaka Wetaaniyaki. Itsipateeyanakarini 12 riyotaanewo.

Iñaakiro Jesoshi iyeera kaari tzimatsi okithoki

(Mt. 21.18-19)

¹² Ari okitejitanaki eejatzi rookaneero Wetaaniya, riyaaate Jerojareeki. Ari niyanki awotsi aawitakari itashe Jesoshi. ¹³ Iñaakiro inteeena inchato iitachari iyeera. Otzimawita oshi. Ari riyaatashitziro, ikowawitapaakawo okithoki. Tee iñiiro, inta apatziro oshi. Tekiraata iyopaeleta okithokitanteeyaa.

¹⁴ Ikantanakiro Jesoshi:

—Tekatsi owaeyaawoni pikithoki iinja.

Ikemakiri riyotaanewopaeni.

*Riraga Jesoshi rookaeyakirini Tajorentsipankoki pimantayitawitacharini
(Mt. 21.12-17; Rk. 19.45-48; Jowa 2.13-22)*

¹⁵ Roojatzi rareeteeyaanii eejatzi Jerojareeki. IkyAAPAE Tajorentsipankoki. Rookaeyapaakirini maawaeni pimanteyawitacharini eejatzi maawaeni amananteeyawitacharini. Rotatsinkitayitapaakirini imeejatepaeni riraga pimantayitatsirini iyorikite. Eejatzi rotatsinkitayitapaakirini ijeekamen-topaeni pimanteyawitaririni jamomo. ¹⁶ Ithañaanakawo ipimantero owaagawontsi janta Tajorentsipankoki. ¹⁷ Ari riyotaantaki, ikanteevirini:

—Paerani rojankinateetzironi Iwaperite Tajorentsi, ikantzini: “Ikantzi Tajorentsi: ‘Iroka Tajorentsipankoka okameethatzi pikenkithatakapiainteeyenani eerokapaeni maawaeni inashitzinkaripaeni atziri, omaanta eerokapaeni pikoshitashiteeyakarini atziri pokaeyawitacharini jika Tajorentsipankokika’”. Tee okameethatzi iroka panteeyakirini.

¹⁸ Ari ikemaeyawakirini maawaeni riraga piyotawenttariri, rootaki rotsikanateeyantanakaririni. Eejatzi ikemakotakiri jewatayitziririni ñaanakownenatsiripaeni, iyotaantzirori Iwaperite Tajorentsi, maawaeni. Ikanteevyawitakan:

—¿Tsika akanterika Jesoshi owamaantyaariri?

Omaanta tekatsi ikanteri, ithaawanteeeyakarini. Tema ipinkatheeeyakirini atziri Jesoshi. ¹⁹ Itziroryaanaki oorya, ari rookaneero Jesoshi nampitsi.

*Iñeyakironi rowaga iyeera, okamanaki
(Mt. 21.20-22)*

²⁰ Okitejitanaki eejatzi, ipiyanaa Jesoshi eejatzi riyotaanewopaeni janta Jerojareeki. Ikineetaneero iyeera. Iñaapaakiro, okamanaki, roojatzi janta oparithaki. ²¹ Ikenkithashiryakiro Peetero ikantanakiri Jesoshi chapinki. Ikantziri:

—Iyotaanari, paminero iyeeraka powamayimatakiri chapinki. Kamanaki.

²² Rakanakiri Jesoshi:

—Pameentyaari Tajorentsi. ²³ Kyaaryootaki iroka nokamanteyemirini. Aririka pikanteri Tajorentsi: “Poshirinkero otzishinta, pookero janta inkaareki”, eerrika pitheenkashireti, inta piyotaperotaki roshirinkero, aritaki imatakimiro. ²⁴ Rootaki nokamanantzimirori iroka: aririka pikenkithatakayeri Tajorentsi, oetarika pikanteriri, pikenkithashiry: “Aritaki imatakinao nokantakiriri”. Pameentaperotyaaririka, aritaki imatakimiro. ²⁵ Aririka pikenkithatakayeri Tajorentsi, aririka eekiro piyatatyee pikijiri paashini atziri ari pityaawo piyatae pikaminthayeri irira: oetarikapaeni rantzimotakimiri eero pameñaawo pikijiri inta pipeyakoteniri. Roojatzi eerori, eero ikijimi Pawa Tajorentsi pantayitzirini eerori, inta ipeyakotemiro. ²⁶ Eerrika pipeyakotziniri atziri, kijakimiri, eero ipeyakotzimiro eerori Tajorentsi.

*Ikantawentawakaakawo itajorenka Jesoshi
(Mt. 21.23-27; Rk. 20.1-8)*

²⁷ Ipiyakagaeyaarini eejatzi Jerojareeki, ikatziyatziyawaeta janta Tajorentsipankoki. Riraga jewawentayitziririni ūnaanakowenantatsiripaeni, iyotaantziroriipaeni rojakininarin Moeseshi, eejatzi aataperoteenchari ipokashiteeyakirini. ²⁸ Ikanteeyapaakiri:

—¿Ninka iyotaakimiriorika pipinkatharitantar pimatayitantaworini pantayitzirini? ¿Ninkama iitakimirika pinkathari, pantantyaawori iroka?

²⁹ Ikantawakiri Jesoshi:

—Iroñaka apaani nojampiteeyemini eerori. Aririka pakakina eerori, roojatzi nokamanantemiri naaka ninkarika otyaantakinari. ³⁰ Riraga Jowa ikaawoshitakotayitzinirini Tajorentsi atziri. ¿Ninkama otyaantziriri ikaawoshitakotayitzinirini? ¿Rioma Tajorentsi otyaantziriri? Teerikama, ūrioma atziri otyaantziriri? Pakenaty.

³¹ Ari ikantawakaanaka ūnaanakowenantatsiripaeni:

—Aririka akanteri: “Riotaki Tajorentsi otyaantziriri”, ikanteekari: “¿Itaka kaari paapatziyantari Jowa?” ³² Eejatzi eero akantziri: “Riotaki atziri otyaantziriri”. Ikitanakaekari maawaeni atziri.

Naakiro, riraga ūnaanakowenantatsiri ithaawanteeeyakarini atziripaeni; maawaeni irira ūnaaperoeyakirini kameetha Jowa, ikanteeyini: “Tēma irira Tajorentsi otyaantziriri Jowa ikamanantzi ūnaani”. ³³ Rootaki ikanantariri ūnaanakowenantatsiripaeni:

—Tee niyotzi ninkarika otyaantziriri.

Ikantzi Jesoshi:

—Eejatzi naari, eero nokantzimi ninkarika otyaantanari nopinkatharitanti nomatantawori iroka.

12

*Roshiyakaawentziniri Jesoshi pankitzirori oowamashi
(Mt. 21.33-46; Rk. 20.9-19)*

¹ Roojatzi roshiyakaawentziniri Jesoshi iroka, ikantziri:

—Ipakitziro shirampari roowamashite. Eejatzi rotantotakotakiro maawaeni othapiki. Eejatzi riwetsikashitakiro tsikarika rawishoowero oowa rowantyaawori owaaga. Riwetsikakiro eejatzi pankochaaniki ijeekantyaari jenoki raminakowenantyaawori maawaeni. Roojatzi ikantziri thamaetakoteroni: “Paminawiritantenawo maawaeni: ūinja pipashitenā kashetani”. Roojatzi riyaatantanaka paashiniki kipatsi.

² Ojamanitapaentzi iraakanaki okithoki oowa. Ari riraga ashitawori rotyaantawitari ronampiri apaani, raagaantakitemi oowa. ³ Tee ipawakiri, omaanta raawakiri, shepik; ipajatashitawakari, tak, tak, tak. Roepiyawaeri, tektsi raanaki. ⁴ Ari rotyaantawitaka eejatzi paashini ronampiri. Rompojawakiri iitoki, pok, pok, rowashironkaawakiri.

⁵ Rotyaantawitaka paashini eejatzi. Rowamaawakiri, shemi. Eejatzi rotyaantawitakari osheki paashinipaeni: apaanipaeni ipajapajaatawakiri; irira paashinipaeni rowamaawakiri. ⁶ Apatziro apaani yotapaencha itomi rirori, inintaperotziri. Ikenkithashiryaaanaka rirori: “Rirorika notyomi irira ipinkathatawakiri”. Rotyaantawitakari rirori. ⁷ Omaanta ikantawakaanaka thamaetakotzirori: “Kaakitakira itomi ashitawori, aririka ikamaki iriri, rirotaki irika ashitaperoteeyaaconi. Thame owamaawakiri, roojatzikya aakotanteeyaawo aaka roowamashite”. ⁸ Ari raawakiri, rowamaawakiri, shemi. Rookakiri othapikinta oowamashi. ⁹ ¿Itaka pikenkithashireeyarini? ¿Tsika ikanterika ashitawori rowamaashite? Tema ari ipokaki irira, ithonkapaaakiri ratziritepaeni. Paashini raminee aminawiritantenirini.

¹⁰⁻¹¹ Tema piñaanatziro Iwaperite Tajorentsi, tsikarika okantakotana

naaka, noshiyakawo mapi. Okantzi: "Riraga wetsikaeyiorini pankotsi itheenkakiro apaani mapi ikantzi: 'Tee okameethatzi', omaanta iinja rowaga mapi itheenkawitakari, iñaakiro riraga Tajorentsi okameethatzi, tema rirotaki yoyaakirori kijotakaaperoteroni pankotsi. Tema rootaki otsikanatanantanakawori aakapaenii".

¹² Riyotakoeyawakironi ikantakiri Jesoshi, rirotaki roshiyakaawentakiri irirapaenii. Rootaki ikowaeyantawitakarini ragaeyanakirinimi, omaanta ithaawanteyakarini riraga piyotawenteeyakaririni. Rootaki rookaeyan-tanaarini, riyaateeyaneeni.

Kameethama apinateri iwinkatharite oroomajatz

(Mt. 22.15-22; Rk. 20.20-26)

¹³ Rotyaanteetziri warijeeyopaenii eejatzi oyaatziriri Eroreshi. Ikowaw-itaka ikompitakayaarimi Jesoshi. ¹⁴ Rareetapaaka, ikantapaakiri:

—Iyotaantatsiri, niyoteeyakimini eerokataki kameethatatsiri. Tee okantzimoneentzimi oetarikapaenii ikantayitzirini atziri, tee pithaawantari. Kameetha piyotaantziro ikowakagaeyeerini Tajorentsi. ¿Okameethatzima akaa joriyyopaeni noperi iwinkatharite oroomajatzii koriki? ¿Teerikama okameethatzii? ¿Noperima? ¿Eeroma nopiri?

¹⁵ Riyotakotakiri Jesoshi, ikowashita ramatawiterimi irika jampitakiriri. Ikantziri:

—¿litaka pikowantakari pikompitakayenami? Pamakinari koriki, poñaayenari.

¹⁶ Ari apaani ramakiniri. Rojampiteeyirini:

—¿Ninkama oshiyakaawentachari ipooka? ¿Ninkama ashitawori iwaero jankinateencharika?

Rakaeyanakirini rirori, ikantziri:

—Irira ashitawori Seesari, riraga iwinkatharite oroomajatzii.

¹⁷ Ikantziri:

—Panteniri pinkathari ikowakaemiri, eejatzi panteniri Tajorentsi ikowakaemiri rirori.

Rotsikanateeyanakarini riraga jampiteeyiririni.

Rojampitakowenteetziro aririka rañaagae kamayiteentsiri

(Mt. 22.23-33; Rk. 20.27-40)

¹⁸ Ikantapiintzi saroseeyo: "Eero ipiriintaa kamatsiri". Ari ipokashitziri rirori Jesoshi, rojampitapaakiri:

¹⁹ —Iyotaantatsiri, ikantzini Moeseeshi: "Eenitatsirika shirampari iina, omaanta tekatsirika itomi, aririka ikamaki, okameethatzi ragaero iinanii rentzi itzimakaanteeyawori otomi. Itzimapaakirika otomi kimiwitawanaka rirotaki ashityaarini rirentzini itomi". ²⁰ Ari. Eeniro shirampari rirentzi 6. Raawita iina, roojatzi ikamaki. Tekira itzimakayiro otomi. ²¹ Raawitaawo rirentzini apitetapaentsiri. Ikamaki rirori, eejatzi tee itzimakayiro otomi. Eejatzi ikimitaa rirori riraga tres-tapaentsiri. ²² Eejatzi rirori ikimiteeyakanii maawaeni rirentzini. Tekatsi tzimakayeroni otomi. Roojatzi okamantaka roori tsinani. ²³ Iinja aririka ipiriinteeyaneeenii kamaeyeentsirini, ¿ninkama agaeronii? Tema iinanteeyawitawoni maawaeni.

²⁴ Ikantziri Jesoshi:

—Tee piyotziro Iwaperite Tajorentsi, eejatzi tee piyotakotziri Tajorentsi, itajorentsiperotaki, tema rootaki pikompitantakawori iroka.

²⁵ Ikamaeyakini. Iinja ipiriinteeyaneeenii eejatzi. Omaanta eero ragae eejatzi iina. Eero itzimae aakagaerini eejatzi. Aritaki roshiyapaeyaari ronampiri Tajorentsi jeekatsiri jenokinta. ²⁶ Iroñaaka nokamantemi: aritaki ipiriinteeyaneeenii kamatsiripaenii. Tema piñaanatakiro rojankinarini

Moeseeshi. Okenkithatakotziro inchashimpoki, oponthowitaka omaanta tee othonka. Janta ikemakiro paeran Moeseeshi ikantzirri Tajorentsi: "Naaka Tajorentsi, ikantani ipinkatheeeyakinani Awaraama, Ijaaka, eejatzi Jakoovo". ²⁷ Ñaakiro, eeniro rañi riroripaeni ishireki, roojatzi ikantani raapatziyari Tajorentsi. Rootaki pikompitantakawori pikenkithashiryaashitaka kamaki. Ñaakiro, eero athonkaperoyaani. Osheki pikompitaperotakawo eerori.

*Ikenkithatakotziro ikowakaaperotakaeri Tajorentsi
(Mt. 22.34-40)*

²⁸ Eniro jaga apaani iyotaantzirori Iwaperite Tajorentsi. Tema ikemakiri rirori. Riyotawakiri Jesoshi kameetha riyotaakiri saroseeyopaeni. Roojatzi rontsirokantapaakari rojampitapaakiri:

—¿litaka ikowakaaperoteeri Tajorentsi?

²⁹ Rakanakiri Jesoshi:

—Tema rojankinatakaeniro Moeseeshi paerani ikowakaaperoteeri Tajorentsi. Enenitatsi iroka rojankinatzirini: "Nojoriyyotzinkaritepaeni, pikemijanteeyenani. Riraga Tajorentsi, rirotaki Awinkatharite, apaniroeni ipinkatharitzi irira. ³⁰ Oshekiperi pinintashireperoteri, maawaeni pajanganekki, pikantyaani. Eejatzi pikenkithashiryaapiinteri". ³¹ Eekiro rojankinatatzinii kaminagaantsi, ikantziri: "Pikimita eeroka osheki pininta apaniroeni, eejatzi pikimiteeyerini maawaeni atziri osheki pinintaperoyerini". Rootaki ikowakaaperoyakaerini.

³² Ikantanakiri iyotaantzirori Iwaperite Tajorentsi:

—Jee, aritaki. Kyaaryootaperotaki iroka pikantakiri. Apaniroeni ikanta Tajorentsi, tekatsi paashini. ³³ Okameethataperotzi anintashireperoteri maawaeni ajanganekki, akenkithashiryaapiinteri. Eejatzi akimita akaa antia, eejatzi akimiteri maawaeni akaateeyinira, anintaperoyerini rirori. Rootaki ikowakaaperotakaeri Tajorentsi. Tee ro ikowaperote atayeniri tsimeripaeni.

³⁴ Ikemakiri Jesoshi, kameetha ikantakiri, ikantziri:

—Rooteentsi pipinkathateri Tajorentsi, ipinkathariwenantemiri rirori. Roojatzi ithawantanka atziripaeni rojampitanerimi eejatzi.

*Ikenkithatakotaa rirojatzi Rotyaantanewo Tajorentsi
(Mt. 22.41–23.7; Rk. 20.41-47)*

³⁵ Riyotaantzi Jesoshi janta Tajorentsipankoki:

—Ikantzi iyotaantzirori Iwaperite Tajorentsi: "Riraga Rotyaantanewo Tajorentsi, icharineeteni Iraviiri". ¿litaka ikanantari? ³⁶ Tema ro Ishire Tajorentsi jankinatakaeririni Iraviiri. Rojankinatakironi iroka: "Riraga Tajorentsi ikantziri Nowinkatharite: 'Pijeeki jaka nakoperoki, pikaatena apinkathariteeyeni. Aritaki nowashironkagaeyerini maawaeni kijeyyawitakimirini' ". ³⁷ Tema ikenkithatakotzitarini Iraviiri Rotyaantanewo Tajorentsi, ikantziri: "Nowinkatharite". ¿Tsika ikantyaari Iraviirin ipinkathateer icharineeteni impataatsiri ijeeki?

Ari ikemaeyawakirini, ikimoshireeyanakini osheki piyotawentakariri. Ikanantakari iroka riytakaakiri atziri riyote riraga Rotyaantanewo Tajorentsi kaari apatziro icharineni Iraviiri omaanta eejatzi rirotaki itajorentsite paeraniperoroña tekira ipokapaaki kipatsiki. ³⁸ Eejatzi ikantziri:

—Paamayaarira iyotaanteeyawitaworini Iwaperite Tajorentsi. Ikowashita rowaneenkatty, ikantakaaperotyaawo iithaari, ikinakinathanthanatziitakayero. Ikowaki ifñaaperotashityaari atziri jaga nampitsiki. ³⁹ Eejatzi aririka riyaatapiinte janta pankotsiki ipiyotantapiinttarira

joriyyopaeni, riyoapiintziro jeekamentotsi kameethaperotatsiri. Eejatzi aririka ipiyoteeyani atziri rowaeyani ikowaki rirori rojatekapaeya niyanki itsipatanteeyaaririni pinkatharipaeni. ⁴⁰ Rowashironkayiro kamatsiri oemi raapithatapiintziro maawaeni tzimimotawitawori. Rojamanitziro ikenkithatakayiri Tajorentsi, wero, wero. Osheki ramatawitantzi, omaanta iinja rookeri Tajorentsi paamariki kaari tsiwakanitatsini.

*Rowaga ashironkaenkawo opakiri Tajorentsi maawaeni oorikite
(Rk. 21.1-4)*

⁴¹ Ari ijekaki Jesoshi, imontetakawo rotetantapiantariri korikika riwetsikantyaawori kameetha Tajorentsipanko. Raminamintatziri osheki pokatsiripaeni, rotetziri iyorkite roteteeyapiintzinirira. Ipoki osheki ashaagantzinkari, rotetapaaki oshekiperio iyorkite. ⁴² Opokapaaki roori kamatsiri oemi ashironkaenkawo. Otetapaakiri roori apimerontakite oorikyaanikite, tee ipinaperowitya irika. ⁴³⁻⁴⁴ Ikaemiri ryotaanewo, ikantziri:

—Kyaaryootaki iroka nokamantemiri: eechonkiini otetawitaka iroka ashironkaenkawo, omaanta iñaaperotakiro Tajorentsi okameethatzi. Tema opakiri maawaeni tzimimotawitakawori: tekatsi iroñaaka amanananantaneeyaowanawo. Omaanta riraga ashaagantzinkari, osheki roteteeyawitakani, omaanta tee iñaaperotziri Tajorentsi ikameethatzi: tema oshekini iyorkite ikempoyaashitarri.

13

*Iinja ishekiryagaetero Tajorentsipanko
(Mt. 24.1-2; Rk. 21.5-6)*

¹ Roojatzi ishitowakaantanakari Jesoshi Tajorentsipankoki. Ikantziri apaani ryotaanewo:

—Iyotaanari. Paminero mapika riwetsikanteetawori Tajorentsipanko kameethatagi.

² Ikantziri Jesoshi:

—Piñaakiro tsika okantari iroka mapipanko. Antawo naawita, omaanta iinja ishekiryagaetero, ookayitanakaani jantapaeni mapi. Othonkaperotanakya pankotsi.

*Iñeeteri aririka othonkimateeyaa
(Mt. 24.3; Rk. 21.7)*

³ Roojatzi rareetapaaka tonkaariki owaero Oriiwomashi. Imontenampitapaakawo Tajorentsipanko. Riyaatakaneeantakirijantyaajeeni Jesoshi, Peetero, Jantyaako, Jowa eejatzi Antereeshi. Ari ijekapaaki.

⁴ Rojampitapaakiri:

—Pikamanteeeyenani. ⁵ Tsika okaateka ishekiryayaanteetyaawori maawaeni Tajorentsipankonta? Arima iinja omonkaatapaeyaarika ishekiryayaantyaawori, ⁶ tsika nokantyaaka niyotantyaari?

*Iinja rashironkagaeyani atziri
(Mt. 24.4-8; Rk. 21.8-11)*

⁵ Ikantziri Jesoshi:

—Kyaaryooowa, ramatawiteetzimikari. ⁶ Eenitatsi osheki pokatsini, ikante: “Naaka Rotyaantanewo Tajorentsi”. Ramatawitapaakiri osheki atziri. ⁷ Aririka pikemakoteri romanatawakaaka atziri, eejatzi pikemiri paashini kantatsini: “Romanatawakagaeyaanitza”. Omaanta eero pitthaayi. Aritaki okantyaari iinja, romanatawakapaentya, omaanta teki-raata omonkaata nopinkatharitanta paeayaari. ⁸ Riraga atziri jeekatsiri

paashinijatoki kipatsi romanatapiintanakiri atziripaeni jeekayitatsirini paashinikipaeni kipatsi. Eejatzi apaani jewawenantatsiri ragaeyanakirini inampijatzipaeni romanatakayaani. Omoyekapiintayanakyaani kipatsi, eejatzi itasheyapiinteyyanakini osheki atziripaeni. Eekiro riyaatatyee ike-maatsiteeyaaawoni oetarikapaeni, rashironkaaperoeyanakyaani.

Ikantziri Jesoshi: "Ikijeeyapiinterini aapatziyanari"

(Mt. 24.9-14; Rk. 21.12-19)

⁹ Eejatzi ikantakiri Jesoshi:

—Paamawentya eerokapaeni. Paapatziyakina rootaki raanteetemiri iyotaawakaenchariki ikantakowentemi. Aririka piyaate janta pankotsiki ipiyotantapiintarira joriyopaeni, aritaki ipajapapeetawakimi, tak, tak, tak. Raanakimi janta ijekinta jewawenantatsiri, eejatzi janta ijekinta pinkathariperotatsiri. Aririka rayemi, roojatzi pikemijantakayeri riori, rawiakotanteeyaa. ¹⁰ Okameethatzi rityawaao ikemakoeeyenani maawaeni atziri jeekatsiri kipatsiki nowawijaakontzi, roojatzi nopolkanteeyaanopinkathariperotapaaki. ¹¹ Aririka ragaetanakimi janta, aririka ikantakowentemiri, eero pikenkithashirya: “¿Oetaka nokanteriri?” Aritaki iyotaakimi Ishire Tajorents oetarika pikanteriri. Rootaki ñaawaetakaemini, tee eeroka ñaawaetashitachani apaniroeni. ¹² Inja apaani shirampari kaari aapatziyana raakaanteri rirentzi aapatziyanari, rowamaakaanantyaariri. Paashini raakaanteri itomi aapatziyanari. Eejatzi paashini atziri ikijanakiri ashitariri, rowamaakaanteri. ¹³ Paapatziyakina, rootaki ikijanteetemiri maawaeni. Kyaaryo, opomeentsitzimoeyemini, omaanta aririka pikantyaani tameentaperotena, aritaki nowawijaako-teemi.

Inja opomeentsitaperotanakya janta Joreeyaki

(Mt. 24.15-20; Rk. 21.20-23)

¹⁴ Eejatzi ikantziri Jesoshi:

—Aririka piñaanatero rojankinarini Intañeeri, piyotawakiro ikantzirini: rashironkagaeyanakyaani atziri. Ikantzi eejatzi eenitatsi Tajorentsipankoki oonariri Tajorents, rootaki maawaeni atziri rookantanakawori Tajorentsipankoki. Aririka pijeki Joreeyaki, eejatzi piñeeririka riraganki, pithaakyaate, pishiyeeyanakini janta tonkaari. ¹⁵ Aririka pijeki pankotsiki inkokironta, eero pikyaapanaatzi paantayitapanaatyaa-worini oetarikapaeni, inta pishiyanki. ¹⁶ Eejatzi piyaaterika owantsiki, eero pipiyapanata paapanaatero piithaari. ¹⁷ Aririka omonkaatapaakya maawaeni iroka, ooo, osheki ashironkayitanakyaani motzitayitatsirini, eejatzi ashironkaakya thotayiriri eentsite: opomeentsitzimoeyaaawoni os-hiye. ¹⁸ Pamaneri Tajorents areetya iroka owashironkagaantsika ojarentsipaeteki kameetha pishiyaperoeyantananakyaarin eero opariyi inkani raawakimikari kijeeyemirini.

Raamawentakagaeyakarini Jesoshi ikantziri: "Ramatawitzimikari"

(Mt. 24.21-26; Rk. 17.22-24, 21.22-24)

¹⁹ Eenitatsi eejatzi ikantziri Jesoshi:

—Aritaki inja rashironkaaperoeyanakyaani osheki atziri. Paerani tee añaapiintzironi kimityaawoni iroka, eejatzi riraga maawaeni itakaantaworini, tee iñiironi. Eejatzi maawaeni impaetayitatsini, inja eero iñiilo eejatzi kimityaawoni iroka. ²⁰ Tee ishinetsiro Tajorents ojamanite iroka owashironkagaantsi: rooma aririkami ishineteromi, ari ithonkawakaeyakyaanimi. Rooma romaerintakiro, tema ikamintheeyakaeni aakapaeni aapatziyeyearirini, riraga riyoayitakirini riori. ²¹ Aririka ikamanteetemi: “Pamine, irira rotyaantanewo

Tajorentsi”, eero paapatziyari. Eejatzi aririka ikanteete: “Irira”, eero paapatziyaperotari, itheeyashita. ²² Ipokapaaki amatawitantatsini, ikantapaaki: “Naaka Jesokirishito, naaka kamanantzirorini iñaani Tajorentsi”. Itajorentsijeempiyaashitapaakya, ikoyi paapatziyawakyaaari, rantayitemironi kaari piñaapiintzi. Ikowawita ramatawiterimi aapatziyeyaririni Tajorentsi, omaanta tekatsi ikanteri. ²³ Paamawentya. Neewatzitakimiro nokamantaperoeyakimironi maawaeni.

*Riraga Jesoshi ikamantakota ipiyanteeyaaari
(Mt. 24.29-31; Rk. 21.25-28)*

²⁴ Eejatzi ikantziri:

—Aririka ipakaakiro ikijawakagaeyani, roojatzikya itsiteniityaantanakya oorya, eero ikimitanaa ikimitaaka iroñaka. Eejatzi eero ikifamashitanee kashiri. ²⁵ Eejatzi ipariyagaantanaki ompokiropaeni, ipoñaaakya jenoki, ishewashewatashitanakya paashinipaeni. ²⁶ Naaka poñaachari jenokinta, nokoñaatapaaki jaka kipatsikika: iinja iñeyawaenani atziri nokinapae menkoriki. Notajorentsiperotapaaki, nopinkatharitapaaki. ²⁷ Eejatzi notyaanteeyerini nonampiripaeni ipiyoteeyerini maawaeni aapatziyeyanarini. Ipoñayitanakyaani maawaeni kipatsikipaeni.

*Roshiyakaawentziniri Jesoshi iyeera
(Mt. 24.32-35; Rk. 21.29-33)*

²⁸ Eekiro ryaatatyyee ikantziri:

—Eenitatsi iroka piyotantyaawori oshiyakaawentaantsika iyeera. Owakirarika oshookaempikitane, aririka otzimanee oshi, piyotaki rootaatsi ojarentsatee. ²⁹ Eejatzi, okimita, aririka piñeyawakironi maawaeni iroka nokamantayitakimiri, piyotanaki okaakitapaana, rooteentsi nopokashitaatemi. ³⁰ Kyaaryootaki iroka nokamantzimiri. Tekira pikamaeyeni eerokapaeni, omonkaatapaakya maawaeni iroka nokamantzimiri. ³¹ Aritaki othonkaeya maawaeni kipatsi eejatzi ithonkaeya maawaeni jenokijatzi: kashiri, oorya, ompokiropaeni, maawaeni. Omaanta noñaani, eero othonkanita.

*Aamagaeyaari Jesoshi: tee ayoteeyini tsikarika okaate ipokanteeyaaari
(Mt. 24.36-51; Rk. 21.34-36)*

³² Eenitatsi eejatzi ikantziri riraga Jesoshi:

—Tekatsi yotsatsini tsikarika okaate kitejiri eejatzi tsikarika ikaate oorya; tee riyotzi ronampiri Pawa, eejatzi naari tee niyotzi. Apatziro Pawa yotsatsiri. ³³ Paamawentya, eejatzi paamagaeyenani. Tee piyotzi tsika okaate nopokanteeyaaari. ³⁴ Noshiyakaawentemiri atziri, jatatsiri inteenia. Aririka rookanakiro ipanko, ikanteeyanakirini maawaeni ronampiripaeni iitarika ranteeeyeniririni. Eejatzi rirori riraga jeekakaeyiniriri ipanko ikantanakiri rirori: “Paamagaenaga”. ³⁵ Rootaki nokanteeyantzimiri: paamagaeyenani eerori. Tee piyotzi tsika okaate nopokanteeyaaari: aririka itziroryaanee oorya, aririka niyankiite tsiteniri, aririka iñee tyaapa, aririka okitejiityaanaki nopalcae. ³⁶ Kyaaryoowa, paamaaperoeyenani. Aririka nopalcae, nomapokapaeikari. Noñaapaemikari, maashiretakimi. ³⁷ Iroka nokantzimrika, rootaki nokanteeyakiririni maawaeni atziri. Paamaaperoeyenani, maawaeni.

14

*Ikowaeyakini joriiyopaeni raakaanteri Jesoshi
(Mt. 26.1-5; Rk. 22.1-2; Jowa 11.45-57)*

¹ Okaatapaaki apite kitejiri omonkaatantyaari kitejitsatsiri rawijantari ronampiri Tajorentsi janta Ejiipitoki paerani. Iroka kitejiri tee rowapi-intawo tapiyachar paa, inta kaari tapiyacha. Ari ikowaki jewatayitziririni ūnaanakowenantatsiri eejatzi iyotaantzirori Iwaperite Tajorentsi tsika ikanteriri ramatawiteri Jesoshi raantyaariri. Aritaki ikowaperotawita rowamaerimi Jesoshi. ² Ikantzi:

—Eero aantari kitejiri rawijantarini ronampiri Tajorentsi: ikijakowentee-yarinikari atziripaeni.

*Apaa ni tsinani ojeetziri Jesoshi kajankaari
(Mt. 26.6-13; Jowa 12.1-8)*

³ Ikantaka Jesoshi ijekkaki Wetaaniyaki, janta ipankoki Shimo pathaawitacharini. Osheki owaeyacharini janta. Opokapaaki tsinani, amakotapaakiro kajankaari. Iyoshaaka owaa naariwo osheki owinawo. Okameethaperotzi ojeekantari, ro riwetsikaetziri mapi iitachari arawaashitoro. Okagaakotapaakiniri, ojeetantapaakari iitoki. ⁴ Ijeekaeyini apaanipaeni kijaperoeyakirorini. Ikantawakaanaka rirori:

—¿litaka iroñaaaka eewanatantakawori iroka kajankaarika? ⁵ Arimi opimanteromi, aantakyaawomi osheki koriki, roojatzikya opayiterinimi ashironkayitacharini.

Tee inimoeyanakirini okaatzi antakiri, ⁶ omaanta ikantziri Jesoshi:

—Eero pithañaaaktawo. ¿litaka pikijantawori? Okameethaperotzi ojetakina. ⁷ Aritaki ikantani ikaatzimikya osheki ashironkaenkar. Aririkai pikowaki petakotyaari, aritaki pimatakiro pipakiri. Omaanta naaka, eero nokantani notsipateeyemini. Eero oshekitzi kitejiri pineshironkatantanakinaru jakakipatsiki. ⁸ Tee omatayitzironi oetarakapaeni, omaanta ojeetakina naaka. Tema ajeetapiintziri kamatsiri, omaanta tee riyyotakotya. Omaanta iroka tsinanika itakina ojeetakina, eeniroka nañi. Iyotakina nokame paata. ⁹ Kyaaryootaki iroka nokamantemiri: tsikarika ikamananteeyeroni atziri noñaani, eejatzi ikamantakoetero iroka tsinanika oetarika antakiri, ikenkithashiryaaakoeyantyaaworini.

*Ikenkithashiryaaaka Joorashi raakaanteri Jesoshi
(Mt. 26.14-16; Rk. 22.3-6)*

¹⁰ Eeniro irira Joorashi karyootejatzi, rivotaki riyyotaanewo naawita Jesoshi. Ikantanaka riyaatanaki apaniroeni janta ijekinta jewatayitziririni ūnaanakowenantatsiri, ikantakotziri Jesoshi raakaanantyaariri. ¹¹ Ari ikemaeyawakirini riroripaeni ikantapaakiriri, ikimoshireeyanakini, ikantawakiri: “Kameethatāki: osheki nopolatemi koriki iroñaaaka”.

Roojatzi ikenkithashiryaaanaka Joorashi: “¿Tsika nokanterika naakaanantyaariri Jesoshi? ¿Tsika okaateka?”

Rotyaanantakariri riraga Jesoshi riyyotaanewopaeni ramine tsika rowaeyaani

(Mt. 26.17-19; Rk. 22.7-13)

¹² Monkaatapaaka kitejiri rowaeyantaworini paa kaari tapiyacha. Eejatzi rowamaakiri owisha rowaeyaarinī kitejiriki ikenkithashiryaaapiintziro rawijantariri ronampiri Tajorentsi paerani. Ikanta riyyotaanewo rojampitziri Jesoshi:

—¿Tsika pikoyika nowojanteri owisha?

¹³ Ari rotyaantziri riyyotaanewo apite, ikantziri:

—Piyaate Jerojareeki. Aritaki pitonkiyotawakaari shirampari, aatsiri iñaa chomoki. Poyaatanakiri rirori. ¹⁴ Tsikarika janta ikyapae, aritaki piñaapaakiri ashitawori ipanki; rirotaki piñaanatapaakiri. Pikanta-paakiri: “Ikantzi iyotaantatsiri: ‘Tsikama nojeekantapaakyaari nowakaantapaeyaari niyotaanewopaeni owisha?’ ” ¹⁵ Roojatzi roñaagantawakimiro janta jenoki oshitanenokotanta antwo. Ari piwetsikero janta owanawontsi.

¹⁶ Roojatzi ryaatanaki ryotaanewo janta, ifñaapaakiro iroka ikantakiriri, roojatzi rowojantapaakiro rowanawo.

*Ikantakotakiri Jesoshi aakaanterini
(Mt. 26.20-25; Rk. 22.21-23; Jowa 13.18-30)*

¹⁷ Roojatzi itsiteniityaanaki oorya. Rareetapaaka rirori Jesoshi, itsipateeyapaakarini ryotaanewopaeni. ¹⁸ Ijeekaeyapaakini, rowaeya-paakani, ikantziri Jesoshi:

—Kyaaryootaki iroka nokamantemiri. Apaani akiyotanari iroñaaka riro-taki aakaantenani paata.

¹⁹ Rowashireeyanakanri riraga ryotaanewopaeni, ikantaki apaanipaeni:
—¿Naakama aakaantemini?

Eejatzi paashini:

—¿Naakama?

Eejatzi paashinipaeni rojampiteeyanakirini.

²⁰ Ikantzi Jesoshi:

—Tema rirotaki aakaantenani ochaantakotakinarika iroñaaka nowajoneki. ²¹ Naaka poñaachari jenokinta, nokoñaatapaaki jika kipatsikika. Rooteentsi nokame. Aritaki omonkaatayka rojankinatakotziteetakinari. Omaanta ari rowashironkaakya riraga aakaantenani. Eerorikami ikoñaatzimi rirori, eeromi raakaantanami, eejatzi eeromi ikemaatsitawomi katsiri.

*Roshiyakaawenteeyakaeroni Jesoshi ikamawentakae aaka
(Mt. 26.26-29; Rk. 22.14-20; Jowa 13.21-30; 1 Ko. 11.23-26)*

²² Eeniro rowaeyakanri, raakiro Jesoshi paa. Ipaasonkitziri Iriri Tajorents, ikagaakiro, ipaeyakirini ryotaanewo. Ikantziri:

—Powaeyawoni iroka paa, oshiyakaawentzirori nowatha. Tema naaka kamawenteeyakimirini.

²³ Eejatzi raakiro pajoki awishoowaantsi oowa. Ipaasonkitakiri Tajorents, ipakoeyakirini, rireeyawakironi. ²⁴ Ikanteeyakirini:

—Iroka oshiyakaawentzirori niraa. Napaatawenteri osheki atziri. Aririka nokamawentemi, piyoteeyakironi kyaaryo ikantakimiri Tajorents, rowawa-jiakoeyemini. ²⁵ Kyaaryootaki nokanteeyimirini. Eero iroñaaka napiiteero jika kipatsiki nireero awishoowaantsi oowa. Aririka nojeekapae janta ipinkatharitzinta Tajorents, ari nirapaero eejatzi.

*Ikanteeyirini Jesoshi ryotaanewo: “Inja pookaeyaneenani”
(Mt. 26.30-35; Rk. 22.31-39; Jowa 13.31-38)*

²⁶ Ari ithonkakiro rowaka, romampaawenteeyanakarini Tajorents, roojatzi ryaatanteeyakanri janta tonkaariki, oetachari Oriiwomashi.

²⁷ Ikanteeyakirini Jesoshi:

—Inja pookaeyaneenani. Aritaki rojankinatakotziteetakimini: “Rowa-magaeteri riraga shentziriri owisha, roojatzi ikinashiwaetanayka rowishate”. ²⁸ Omaanta, iinja nopiriinteeri ka nañaaga neewateeyanakimini janta Karireeyaki, ari piñeena.

²⁹ Ikantziri Peetero:

—Aririka rookaeyemini maawaeni paashini, inta naaka, eero nookimi.

30 Ikantawakiri rirori:

—Kyaaryootaki iroka nokantemiri: iroñaaka tsiteniriki, tekiraatarika rapiitakirooto iñi tyapa, osheki pithawanaki. Okaate 3 pikante: “Tee niyotziri Jesoshi”.

31 Omaanta ikantaperotzi Peetero:

—Eero nookimi. Atsipatawakagaeyaniroña akamaeyeni, eero nokantzi: “Tee niyotziri”.

Eejatzi imonkaatawakaaka ikanteeyakirini maawaeni paashinipaeni.

Ikenkithatakaeri Jesoshi Iriri janta Jethemaniiki

(Mt. 26.36-46; Rk. 22.39-46)

32 Roojatzi rareeteeyapaakan janta Jethemaniiki. Ikanteeyirini riyotaanewo:

—Pijeekaeyawakiniita jaka, nokenkithatakaawakiriita Pawa.

33 Rirotakikya raanakiri Peetero, Jantyaako, eejatzi Jowa. Areetzimota-paakari ikenkithashiryaanaka, eejatzi osheki rowashiretanaka. **34** Ikantziri: “Osheki netakotanaka. Pijeekawakiita jaka, pikakiterapa.

35-36 Ari ishirinkaneentanaka eechonkiini jaga. Rotziwerowanaka kipatsiki, ikenkithatakaeri Iriri. Ikantziri:

—Pawa, eeroka matzirori maawaeni oetarikapaeni. Nokowawitaka powawijaakotenami iroka nokemaatsityaari, omaanta eero nantziro nokowawitari nanteri naari, inta nokowaki nantemiro pikowakaakinari eerori.

37 Roojatzi ipiyanaa jaga ijekakira riyotaanewo. Ifñaapaatziiiri, imagaeyakini. Ikantapaakiri Peetero:

—Shimo, ¿maakimima? ¿Eeroma pamawetziro pikakite eechonkiini?

38 Pikakite. Pamaneri Tajorentsi okantyaatakya aririka ikowaki iwinkatharite kamaari rantakayitemironi kaari kameethatatsi, eerokya panantawo. Kyaaryo pikowaperowitaka pantenirimi Tajorentsi ikowakaakimiri, omaanta tee pimatziro.

39 Ipiyanaka eejatzi, ikenkithatakaapaeri Iriri roojatzi ikanteeri ikan-takiriri inkaaganki. **40** Ipiyapaa, iñeeyapaerini magaeyakini eejatzi. Osheki agaeyakirini iwochokini. Osheki ipashiwenteeyakani, tee riyotzi oetarika ikanteeyirini. **41** Ipiyapiyataka riraga Jesoshi, okaatzi 3 ipiyanaaka. Roojatzi ipiyantapaaka ikantapaakiri:

—Eekiroma pimaatzi. Iroñaaka monkaatapaaka, rooteentsi ikentakotakaanteeten: rooteentsi rayena kaari aapatziyanari. **42** Iroñaaka pipiriinte, thame aate. Oo, okaakitapaaki aakaantenani.

Ragaeyakirini Jesoshi

(Mt. 26.47-56; Rk. 22.47-53; Jowa 18.2-12)

43 Eeniro ifñaawaetzi Jesoshi, ipokapaaki riraga Joorashi, rirowitaka riyotaanewo. Itsipateeyapaakarini iroñaaka osheki atziri. Ramaeya-paakironi ichekamentopaeni eejatzi rompojamentopaeni wetsikachari in-chato. Rioteeyakini rotyaantanewo jewatayitziririni ñaanakowenantatsiri, riraga rotyaantanewo iyotaantzirori Iwaperite Tajorentsi, riraga aataperoteenchari. **44** Ikantziteeyakarini riraga Joorashi irirapaeni:

—Iroñaaka nokamantaperotemi piyotantapaakyaariri Jesoshi: piñaakinarika nothowootapaakiri, rirotaki poerikapaakiri. Paanakiri.

45 Ari ipokapaaki rokaakintapaakari. Ikantapaakiri:

—Iyotaanari.

Ithowootapaakiri.

46 Roerikaeyapaakirini, shepik, ishirikaperotapaakiriroña ragaeyanakirini. 47 Apaani riyotaanewo raanakiro ichekamento. Ithatziitakiri ikempita ronampiri iwinkatharite ñaanakowenantsiri, thatzik.

48 Ikanta Jesoshi iñaakiri okaatzi rantakiri riyotaanewo, ikantziri:

—¿Eero! Okanteekaata, poyaankaero pichekamento, ipiyatzimikari. Tema piyotzi maawaeni antawakaantawori ijawirite eejatzi rowamaanteetakari jawiri. ¿Tee piyotzi nokowakirikami, nokanterimi Ashitanari rotyaante-narimi oshekinipero ronampiri piyakowentenanimi?

Roojatzi ipampitakiri ikempita, retsiyatatakotakiri.

Ari ikanteeyawakirini Jesoshi:

—¿Naakama koshintzi? ¿Itaka pamashitantanari pichekamento eejatzi pompojamentopaeni? Paashitanakina, eero noshiyapithatzimi. 49 Aritaki maawaeni kitejiri notsipateeyawitzimini janta Tajorentsipankoki, niyotaantzimiri. Pikoyirika payena, paanakina. Iroñaaka omonkaataka okantz-itakarini Iwaperite Tajorentsi.

50 Riraga riyotaanewopaeni rookaeyanakirini, shiyeyananakani maawaeni. 51 Apaanikya ewankari oyaatawitanakariri Jesoshi. Tee ikithaatananakya, omaanta rapineetashitakawo iwashikawo. Roerikaetawitawakari, 52 ithañaanaka rirori, rookanakiro iwashikawo, ishiyamerikitanaka.

Ikanteeyini jewatatsiripaeni: “Okameethazi ikame Jesoshi”

(Mt. 26.57-68; Rk. 22.54-65; Jowa 18.12-14, 19-24)

53 Ari ragaeyanakirini Jesoshi iwinkathariteki ñaanakowenantsiri. Ipiyotawenteeyapaakarini maawaeni jewatayitziririni ñaanakowenantsiri, aataperoteenchari eejatzi iyotaantzirori Iwaperite Tajorentsi. 54 Riraga Peetero royaatakowentawitanakari Jesoshi, omaanta rookaneentanakiri inteenanta, roojatzi rareetantapaaka janta ipankoki iwinkatharite ñaanakowenantsiri. Tee ikyapaaki rirori pankotsiki; ijeekimotapaakiri onampirentsipaeni rakitsitapaakawo paamari.

55 Ari inthomaenta ipiyotawentakari Jesoshi riraga jewatayitziririni jori-iyopaeni. Rojampiteeyirini atziri:

—¿Piñaakotakirima rantziri Jesoshi kaari kameethatatsi nowamaakaanantyaariri?

Omaanta tektsi iñaakoteri. 56 Ipokapaaki osheki theeyakotakariri, tee omonkaatawaka ikantayitakirini. 57 Apanipaeni katziyanenecha, itheeyakotashitakari, ikantzi:

58 —Nokemaeyakirini Jesoshi ikantzi: “Iinja noshekireero Tajorentsipanko iroka riwetsikani atziri. Ari okaate 3 kitejiri niwetsikae naaka paashini Tajorentsipanko, kaari riwetsiki rirori atziri”.

59 Omaanta tee omonkaatawakanya ikantayitawitakarini. 60 Ikatziyanaka niyanki riraga iwinkatharite ñaanakowenantsiri. Rojampitakiri Jesoshi, ikantakiri:

—¿Itaka kaari pakantana? ¿Oetaka iroka ikantakotayitakimirini irika?

61 Omaanta imaeritaki, tee raki. Rapiitakiri riraga iwinkatharite ñaanakowenantsiri:

—¿Eerokama Rotyaantanewo Tajorentsi naamagaeyarini, riraga Itomi Tajorentsi noñaaperotziri?

62 Rakanakiri:

—Naaka. Kyaaryo pikantakiri. Iinja piñeena nojeeki janta rakoper-oki Pawa Tajorentsi, nokaateeyirini neewawanenteeyapaeni. Eejatzi piñaawaena nokinantapaeyaawo janta menkori, aririka nopiyee paata.

63 Riraga iwinkatharite ñaanakowenantatsiri ikijanaka. Ikenkithashiryaakotanakari Jesoshi ikantzimatakiri Tajorentsi, rootaki itzijagaantanakawori iithaari. Ikantanaki:

—¿Iroñaaaka iitaka akowantyaari paashini kantakoterini?

64 Pikemaeyawakirini iroñaaaka okaatzti ikantakiri, tema itheenkakiri Tajorentsi. ¿Tsika pikanteeyinika eeroka?

Ikanteeyanakini:

—Kyaaryo, eenitatsi rantani. Okameethatzi ikame.

65 Eenitatsi apaanipaeni eewatayitziririni. Roojatzi ipashikapootakiri, eejatzi ikapojaootakiri. Ikantziri:

—Pikamantena iroñaaaka ninkarika kapojapootakimirri.

Eejatzi riraga waariryapaeni ipajapooteeyakirini.

Ikantzi Peetero: "Tee niyotziri Jesoshi"

(Mt. 26.69-75; Rk. 22.55-62; Jowa 18.15-29)

66 Eeniro ijeki rirori Peetero janta inkokironta pankotsiki rakitsita. Opokapaaki apaani ronampiri iwinkatharite ñaanakowenantatsiri.

67 Ofñaapaakiri Peetero, rakitsita paamariki. Otsikanatapaakari, joreririri, okantapaakiri:

—Eeroka tsipatariri riraga Jesoshi najareetejatzi.

68 Ithaawanaki, ikantanaki:

—Tee, tee niyotzi oetarika pikantziri. Tee nokemimi eejatzi.

Roojatzi riyaatanaki ashitakontsiki shiirkoki. Iñaanaki tyaapa. **69** Apiiteeri oñaagaeri onampirentsi. Okanteevirini maawaeni okaateeyakinira:

—Riotaki irika tsipatariri Jesoshi.

70 Eejatzi rapiiteero Peetero, ikantzi:

—Tee niyotziri.

Ari ojamanitapaentzi eechonkiini. Roojatzi ikantziri irikapaeni katziyati-teencharini:

—Kyaaryooperotaki. Eerokataki tsipatariri Jesoshi, eerokataki karireeyajatzi.

71 Ikantaperotanaki:

—Tee niyotziri riraga shirampari pikantakinari. Riyotzi Tajorentsi kyaaryo nokantaki: notheeyakyarika, nokowaki rowashironkayenaata Tajorentsi.

72 Rapiitakiro iñaanaki tyaapa. Ikenkithashiryaaneero Peetero ikantakiriri Jesoshi: “Tekiraatarika rapiitanakiroota iñaanaki tyaapa, okaate 3 pikante: ‘Tee niyotziri Jesoshi’”. Ari rowashiretanaka Peetero, roojatzi riraantanaka, jmmm, jmmm.

15

Ragaeyanakirini Jesoshi Peraato

(Mt. 27.1-26; Rk. 22.66-23.5; Jowa 18.28-40)

1 Rooteentsi okitejiyyaanaki, rapiitakiro ipiyotawenteeyarini Jesoshi riraga jewatayitziririni ñaanakowenantatsiri paeni, eejatzi aataperoteenchari eejatzi iyotaantzirori Iwaperite Tajorentsi. Ikantakowenteeyakirini Jesoshi. Roojatzi roojoteeyakirini irira, raanakiri janta, ipapaakiri Peraato.

2 Rojampitawakiri:

—¿Eerokama iwinkatharite joriiyopaeni?

Riraga Jesoshi rakanakiri:

—Pikantakiri eeroka kyaaryoopero.

3 Ikanteeyini jewatayitziririni ñaanakowenantatsiri:

—Osheki rantayitakirini irika, tee ikameethatzi.

⁴ Rapiiteeri Peraato, rojampitziri:

—¿litaka kaari pakanta? Pikemawakiri osheki kantakotashiteyakimirini.

⁵ Tee raki Jesoshi. Riraga Peraato tee riyyotzi oetarika ikenkithashireeyarini. ⁶ Ari eenitatsi rametari: maawaeni ojarentsi, aririka omonkaata-paeya kitejitsirsiri rawijantakariri ronampiri Tajorentsi achariniitiensipero Ejipitaki. Roeyowapiintziri omonkyaaagaarewo apaani ikowaka-gaeyirini atziripaeni. ⁷ Eeniros iroñaaka rashitakotaka janta atziripaeni kowayitawitacharini rookerimi pinkathari: iwaero apaani Warawaashi rirotaki owamaantaneri. ⁸ Ari ryaatashiiyakirini riraga piyoteenchari, ikanteeyapaakirini Peraato:

—Nokoyi panteeyenawoni iroka pametari: poeyowaenari apaani pomonkyaaaganewo.

⁹ Rakawakiri Peraato, ikantawakiri:

—¿Riroma pikowakiri noeyoyemiri riraga Jesoshi piwinkatharite?

¹⁰ Riyotaki Peraato osheki iñaaperoeyirini atziripaeni Jesoshi, rootaki iki-jeeeyantanakaririni ñaanakowenantatsiripaeni raakaanantakariri. ¹¹ Ari riraga jewatayitzirini ñaanakowenantatsiri ikenkithayitanakini, ikanteeyakirini atziripaeni:

—Pikante: “Kaari Jesoshi”. Pikanteeyirini: “Riraga poeyowaeri Warawaashi”.

¹² Rapiiteeri eejatzi Peraato, ikantziri:

—¿Tsikama nokanterika iroñaaka irika pipinkatheeeyawitakarini?

¹³ Ikaemaeyanakini paashinipaeni:

—Pikentakotakaanteri koroshiki.

¹⁴ Rojampitziri:

—¿litaka rantakiri nokentakotakaanantyaariri?

Eekiro rapiitanaatzirri ikaemaeyanakini:

—¡Pikentakotakaanteri, pikentakotakaanteri!

¹⁵ Ikowanaki Peraato ikimoshiretakagaeyeerini riraga atziripaeni, rootaki roemishitowantaariri Warawaashi. Omaanta Jesoshi ipajatakaantakiri, roojatzi raakaantakiri ikentakotakaantakiri.

Ishirontawenteeyakarini riraga Jesoshi

(Mt. 27.27-31)

¹⁶ Roojatzi irira joraaropaeni raanakiri Jesoshi inthomaenta ipankoki Peraato, ari okaankiityaaneentzi eechonkiini. Owaeronta rowaga pankotsi peretooryo. Riraga joraaropaeni ikaemaeyakirini maawaeni paashinipaeni. ¹⁷⁻¹⁸ Itheenkayakirini, ishirontawenteeyakarini, ikantziri:

—¿Eerokatakima iwinkatharite joriyyopaeni? Iroñaaka naari noñaaperotemi.

Ari ikanteetakiriri iroñaaka Jesoshi, tema rantaminthatakiri rootaki roshiyakaa wenantakariri apaani jewawenantatsiri. Raatonkoryaaagae-takiri Jesoshi, ikithaa teetakiri kityonkamawoneentatsiri. Ragaetakiniri kitochee, riwetsika etakiniri ikimitakaanteetakiniri amantheerentsi roojatzi ramantheetakaantakari.

¹⁹ Rotziwerowashitakari, iñaaperojeempiyakari, roojatzi rompojantakari chonkopishitonki iitoki eejatzi reewapooteeyakirini. ²⁰ Ari osheki rantaminthatakiri, roojatzi reshitapaakiri. Roojatzi raatonkoryaaakiri ikithaa wita takariri kityonkamawoneentatsiri, ikithaa teeri iithaaripero ririori. Roojatzi raantanakari ikentakoteetantyaariri antawokotaki koroshi.

Ikentakoteetantakariri riraga Jesoshi

(Mt. 27.32-44)

²¹ Roojatzi joraaropaeni raanakiri Jesoshi. Niyanki awotsi iñaakiri shi-rampari iwaero Shimo rirotaki iriri Arejaantero eejatzi Roojo. Owakira

ijeekapaaki Jerojareeki ipoñaakawo paashiniki nampitsi iitachari Shireene. Romperatawakari iroñaaka, ikantakiri:

—Pinatanakiniri Jesoshi iroka koroshi.

Ikanta Shimo inatanakiro, raanakiro.

²² Ari ragaeayanakirini Jesoshi janta tonkaariki oetanta Koorikota. Rootaki iitantawori tonkaari oshiyakawo iitnaki atziri. ²³ Ari ipakowitzakari kepishaari, eero ikemaatsiperotantawo katsiri, inta tee rirawakiro Jesoshi. ²⁴ Roojatzi ikentakoteetakiri Jesoshi rakokira eejatzi iitzikira, rowatzikakoteetakiri kipatsiki. Ikanta irikapaeni joraaro, raakiro iithaari. Roojatzi rookayitzironi mapyaaniki. Ro riyotantyaari ninkarika ayeroni iithaari. Eejatzi rapiitakiro riyotakoeyeroni mapi roojatzi raantanakyaawo maawaen ikaatzi ikithaayitarini rirori.

²⁵ Jenokiityaapaaki oorya, ikentakoteetantakariri. ²⁶ Roojatzi raaki paashini inchakota owaanini, rojankinateetakiro jankinarentsi okantzi: "Riotaki jewawenziriri joriyyopaeni". Rootaki rojankinatantakawori, riyo teetantyaari iitarika rowamaanteetakariri. Ikentakoetakiniri jeñokiini ipatziitoki Jesoshi.

²⁷ Iroñaaka eeniro ikaatzi apite koshintzi ikentakoteetakiri eejatzi, ari itsipatakari Jesoshi. Apaani rowatzikakoteetakiniri rakoperoki, irira paashini rowatzikakoeatkiniri rampateki. ²⁸ Rootaki omonkaatantakari jankinarentsi Iwaperiteki Tajorentsi kantatsiri: "Ikimitakaanteetyaari kaari kameethatatsi". ²⁹ Ari rawijayitzini iroñaaka osheki atziri, osheki itheenkimawaetakiri Jesoshi, osheki ishirontawentari, ikanteyirini:

—¡Oo! Eeroka shekiroreeronimi Tajorentsipanko, ro awijawitakya 3 kitejiri ari piwetsikaeromi eejatzi. ³⁰ ¿Arima pitajonkantashiwaeta? Intsipaete, pitajonkakowentya eeroka: payiitee iroñaaka ikentakoeatkimira koroshiki.

³¹ Roojatzi ipokantapaaka eejatzi irikapaeni jewatayitziririni ñaanakowenantatsiripaeni eejatzi iyotaantawitawori Iwaperite Tajorentsi. Ishirontawenteeyakarini, ikantawakaeyananaki:

—Paminerri irikakya, rirowitaka owawijaakotziriri paashini atziri, tee imatziro rowawijaakotya rirori. ³² Eerokawitaka Rotyaantanewo Tajorentsi, jewawenantawitariri ajoriyyotzinkaritepaeni. Aminamatsitawakiriita aririka rayiitee koroshiki. Aririka añaakiri, thame aapatziyari.

Eejatzi ikimitakari rirori tsipatakari Jesoshi ikentakotaka, itheenkakiri eejatzi.

Ikamanaki Jesoshi

(Mt. 27.50-56; Rk. 23.45-49; Jowa 19.30-37)

³³ Ikaataki oorya tampatsika, omapokashitapaaka otsitenitanaki maawaen ikipatsi. Tee añaaneeri oorya. Okaatzi ojamanitapaentzi 3 oora. Roojatzi rooryaantanaa. ³⁴ Roojatzi ikaemantanaka antawo Jesoshi ikantzi ipaanteki rashí:

—Eroe, Eroe, ¿raama jawaatani?

Rootaki akantziri aka apaanteki: "Notajorentsite, Notajorentsite, ¿iitaka pookantanari?"

³⁵ Ikemantawakariri apaanipaeni jeekaneentsiri ikantzi:

—Pikemiri, ikaemiri Iriiyashi.

³⁶ Ari ishiyanaka atziri, rowiinkapaakiniri kepishaatatsiri piyonakashinkanari. Rojataakiniri jawookiikira. Ipawitari ratsimiyawakiromi. Ikantziri katziyayiteencharinipaeni jaga:

—Ari ikantawakaata: aminawakiriita aririka ipokashitapaakiri Iriiyashi rayiitashitapakiri.

³⁷ Antawopero ikaemanaki Jesoshi, kamanaki.

³⁸ Eenitatsi janta Tajorentsipankoki antawo tokoya, tontarini, ashitako omooki. Itanakawo jenoki, otzjagaanaki waaaag, roojatzi jaawiki. Thatzii. Apitemankitanaka.

³⁹ Eniro imontetakari itzinkami joraaro. Iñaawakiri tsika ikantanakari Jesoshi ikamantanakari. Roojatzi ikanantanaka:

—Kyaaryoopero: riropotaki irika shirampari Itomi Tajorentsi.

⁴⁰ Eniro apaanipaeni tsinani ojeeki inteenapaeni aminayitzini. Okaateeyakironi Mariiya makaraarajato, eejatzi ojameto, Mariiya rootaki riniro Jantyaako eejatzi paashini Josee. Jantyaako impaerintzi ikonaatzi. Eejatzi okaateeyironi Jaromee. ⁴¹ Eniro ijekawitani janta Kaireeyaki oyaa-teeyirini maawaeni irokapaeni tsinani amitakotziriri. Iroñaka ojeeki jaka osheki paashinipaeni tsinani. Itonkaantanakari Jesoshi janta Jerojareeki, oyateeyanakirini.

Itaka ikantakiriri Jesoshini

(Mt. 27.57-61; Rk. 23.50-56; Jowa 19.38-42)

⁴² Itsiteniityaanaki oorya. Ro kitejitalsini inkaamani imakoryaanteeyarini, tema iroñaka riwetsikaeyironi oetarika ashi inkaamani. ⁴³ Eniro Josee, riraga poñachari Arimateeyaki. Aritaki ikaateeyirini riraga iyotaawakagaeyacharini. Iñaaperoteeyirini atziripaeni rirori. Raamaari Tajorentsii rirori ikowaki reewawenteri. Iroñaka ishirampariperotanaki Josee, riyaatashitanakiri Peraato, ikantapaakiri:

—Nokoyi pishinetenari naaneeri Jesoshini. ⁴⁴ Itzimaetyaashitanaka riraga Peraato. Ikenkithashiryaanaka: ¿Okyaa yootzitanakyaama, intsipaete ikamanaki Jesoshi? Ari ikaemakaantakiri iwinkatharite joraaro. Ro-jampitawakiri:

—¿Kyaaryooma? ¿Kamaperotanakima Jesoshi?

⁴⁵ Ikantziri:

—Jee, kamaperotaki.

Roojatzi rotyaanantakari Josee royiitakoteeri jaawikira Jesoshini.

⁴⁶ Ramanantaki Josee tokoya. Royiitakiri Jesoshini rapineetakotakiri. Romaryaakiri omooki, janta imoonteetzironta impeeta. Ipinaashitakiri antawo mapi omooki. ⁴⁷ Oñaakoperotakiri Mariiya makaraarajato tsika rowakiri. Otsipatowo ojameto, rowaga riniro paashini Josee.

16

Ipiriintanaka Jesoshi

¹ Awijanaki kitejiri imakoryaanteeyarini. Roojatzi amananantanakari tsinani kajankapaneri, otzirittanteeyaririmpi Jesoshini. Ro owaeropaeni roori tzirerinimi Mariiya makaraarajato, eejatzi roori okaatziro ojameto riniro Jantyaako, eejatzi roori Jaromee. ² Ari okitejityaanaki iyaatzi janta omooki rotetawitakarinta Jesoshini. Rootaki tominko iyaatantakari. Ari ijenkitapaaaki oorya, roojatzi areetantapaka. ³ Okantawakaeyanakani:

—¿Ninka pinagaenironika rowaga mapi ashitantarri? Antawoni, eero aawiros aaka.

⁴ Aminapaaki, oñaapaakiro rowaga mapi antawo, pinaanaka ashitaryaanaka. ⁵ Okyaapaaki omooki janta rowawitakarinta. Tee oñaapaeri Jesoshini, omaanta írra oñaapaaki apaani shirampari jaga. Ikithaatawo kithaarentsi kitamaaripero. Otsinkashiryaanakiro irowapaeni oñaapaakirira ijeeki.

⁶ Ikantawakiro:

—Eero pithaayi. Riro paminawitari riraga Jesoshi najareetejatzi, riraga ikentakoetakiri. Piriintanaa, tee añaagaeri jaka. Jatee. Paminerotya rowawitakarika. ⁷ Piyaatee iroñaaaka pikamantapaeri Peetero eejatzsi paashini riyo-taanewopaeni. Pikantapaakiri: “Reewatanakimi janta Karireeyaki, aritaki piñaapaeri janta. Tema aritaki ikamantzitakimini paerani”.

⁸ Ari intsipaeet iyowanee, oshiyanaaka. Ompetatanaka, osheki otsinkashiryaanakiro. Othaawanaki, rootaki kaari okamanantari atziri otokiyotakari janta awotsiki.

*Oñaagaeri Mariiya Jesoshi
(Jowa 20.11-18)*

⁹ Rootaki ipiriinantaari Jesoshi tominko. Ro ritaperotaari roñaagaawo Mariyya makaraajato. Rootaki paerani ikyaatantawitakawo 7 kamaari, omaanta retsiyatakotakironi. ¹⁰ Roojatzikya iyaatantanaka roori okaman-tapaakiri riraga itsipateeyawitarini Jesoshi. Roojatzsi rowashiretakoeyaw-itarini, eejatzi eeniro riraakoeyawitarini. ¹¹ Roojatzsi okamantawitapaakari:

—Piriintanaa Jesoshi, noñaagaeri.

Tee raapatziyawakawo.

*Inaakiri apite ryotaanewo Jesoshi
(Rk. 24.12-35)*

¹² Roojatzsi ipaashinipootanaki ipookira Jesoshi, roñaagapaari apite ryotanewoni ranashiiyani janta awotsiki. ¹³ Ari ipiyanaa irika ñaakiriri, ika-mantapaakiri paashinipaeni. Eejatzi ikimitawakiri, tee raapatziyawakari.

*Ikenkithatakagaeyirini Jesoshi maawaeni ryotaanewo
(Mt. 28.16-20; Rk. 24.36-49; Jowa 20.19-23)*

¹⁴ Ari rowaeyani ryotaanewopaeni, ikaateeyini 11. Roojatzsi roñaagaeyantapaaririni Jesoshi. Ikanteeyapaakirini:

—Tema nokamantzitakimini ari nopersiintee: ¿itaka kaari paapatziyan-tana? Tema tee afiilo pikenkithashiryaantari. ¿itaka kaari paapatziyantari ñaakinari inkaaganki? ¹⁵ Piyaateeyeni pithotyaanakiro maawaeni kipatsi. Pikamantteeyerini maawaeni atziri tsika ikanteeya rawijakotanteeyaa-ri rirori. ¹⁶ Ninkarika aapatziyawakyaawoni rowaga pikamantakiriri, roo-jatzsi raapatziyawakyaari Tajorentsi ari ikaawoshitawentanakyaari irira tema aritaki rawijkotee. Rooma riraga kaari aapatziyawakyaawoni ari rowashironkaaperoteri Tajorentsi rirori. ¹⁷ Tsikarika piyaateeyeni, ita-jonkakowentemi Tajorentsi, riyoteeyantyaarini atziri kyaaryootaki iroka pikantakiriri. Nomatakayemiro petsiyatakantyaaariri kyantaririi kamaari. Piyotayiteroni paashinipaeni ñaagantsi pikenkithatakotantenari. ¹⁸ Aririka poerikawityaari maanki, aririka ratsikawitemi, omaanta eero rowamaemi. Eejatzi, aririka piraakowityaawo piyantatsiri, eero owa-maemi. Eejatzi, aririka pipampiteri mantsiyatatsiri eejatzi pikantakowen-teri, ari rawijkoyeeyeni.

*Ithonkapaaakiro Marikoshi rojankinari
(Rk. 24.50-53)*

¹⁹ Rootaki ikanteeyakiririni Awinkatharite Jesoshi, roojatzsi roenokantanaa jenokinta, ijeekapae janta rakoperoki Tajorentsi, ikaatapaeri ipinkatharitapae rirori. ²⁰ Ari riyaateeyanakini ryotaanewopaeni. Ikinakinayitanakini, ikamanantayitanakini tsikarika ikinayitanakini. Kijokiro rowakiri Awinkatharite, ramitakoeyirini. Eejatzi itajonkantayitakini, riyoteeyantakarini atziripaeni kyaaryooperotaki ikamantteeyakiririni. Aritaki okantakerotari.

Ari okaatzi.
Naaka jankinatzirori:

Marikoshi

ROOKASHI ROJANKINATAKOTAKIRI JESOKIRISHITO, TSIKA IKANTA ROWAWIJAAKOTANTZI

¹⁻⁴ Naaka Rookashi nokoyi niwethatemi eeroka Teyoojiro tsikarika pikanta pijeeiki. Iroñaaka nokoyi nokenkithatakoteri Jesokirishito. Ikaateeyakini osheki jankinatakoeyakirini, ikamantakotayitakironi okaatzsi rantayitakirini. Iñeeyakirini, eejatzi ikemakoeyakirini, rootaki rojankinatakotantariri. Noñaanatakiro naari okaatzsi rojankinatakiri, eejatzi nojampitakowentayitakironi rantayitakirini niyotakoperotantakawori, nothotyaakiro maawaeni. Iroñaaka nokamantemiro naari, nokowaki piyoperotero kameetha rantayitzirini Jesoshi, rootaki nojankinatantakimirori piyoperotantyaaworini kyaaryo rooperori okaatzsi ryotagaetakimiri.

Irira Kawiriyeeri ikamantziri Jakariiyashi itzime itomi

⁵ Paerani, ipinkatharitantari Erooreshi janta Joreeyaki, eenitatsi eejatzi ñaanakowenantsirsri Tajorentsri iitachari Jakariiyashi. Rirotaki icharineeteni Awiiyashini: aririka areetapaeya kitejiri rantawaetantyaanariri Tajorentsri janta Tajorentsipankoki ikaateeyiriru isheninkathoripaeni rashì rirori rràga icharineetenipaeni Awiiyashini. Owaero iina Erijaweeda, rirotaki ojariitepaenin Aawooni eejatzi. ⁶ Riraga Jakariiyashi rirotaki aapatziyariri Tajorentsri, eejatzi iina rootaki aapatziyariri. Ikantani rantayitakironi okaatzsi ikaminaakiriri rirori, rootaki riyyoteeyantakaririni atziri ikameethataki. Tekatsi okantya ikantakowenantyaariri. ⁷ Omaanta tee itzimi reentsite: amashithakitakity iina, eejatzi imonkaatawakagaeyakaní rantyashipariteeyakini.

⁸ Okantaka omonkaatapaaka kitejiri rantawaetakaanteeyaririni isheninkathoripaeni, eejatzi riraga Jakariiyashi. ⁹ Rameteeyawoni riyyaapiintzi apaani ñaanakowenantsirsri rotyaanteri inthomaenta Tajorentsipankoki itaantyaanariri Awinkatharite kajankapaneri. Ikanteeyakirini isheninkathori rirori:

—Iroñaaka eeroka niyoyaakimi piyaate inthomaenta janta, pitayeniri Awinkatharite kajankapaneri.

¹⁰ Ikanta ikyaanaki inthomaenta, omaanta paashini piyoteeyeencharini oyaakiriri inkokironta, ikenkithatakagaeyirini riraga Tajorentsri.* ¹¹ Janta inthomaenta, romapokakiri ronampiri Awinkatharite, ikatziyimotapaakari rakoperoki okaakini aritaari itaakirowa kajankapaneri. ¹² Ifiaantawakariri rotsikanatanakari, tee riyotzi oeta ikantanakiri, eejatzi osheki ithawanaki.

¹³ Omaanta ikantakiri:

—Jakariiyashi, eero pithaayi. Eenitatsi pamanakotakiriri Tajorentsri; tema ikemakimi, rootaki otzimantyaari iinja piina pitomi. Piiteri Jowa. ¹⁴ Osheki pikimoshirewenteri, eejatzi ikimoshirewenteeyerini osheki atziri aririka ikoñaatapaaki. ¹⁵ Eejatzi ifiaaperoteri Tajorentsri ikameethataki. Eero ririro awishoowaantsi oowa eejatzi inashitachari shinchaari. Ojeekantyaari Ishire Tajorentsri rajankanekiria; tekiraata okoñaatziri riniro roojatzi ojeekantzitari. ¹⁶ Osheki raapatziyakagaeyaarini pijoriyyotzinkaritepaeni, ipinkathateeyantyaaririni Tajorentsri, tema rirotaki irira Awinkatharite maawaeni.

* ^{1:10} Rameteeyawoni itaakirorika kajankapaneri, ramaneeyani.

¹⁷ Ikimityaari Iriiyashini, osheki iyotaakiri Ishire Tajorents, eejatzi os-hintsitakaakir. Reewatakira Awinkatharite, ikamanteeyerini isheninka-paeni raamagaayarin rirori, eejatzi inintaperooyerini reentsitepaeni. Riyotagaeyerini rirori raapatziyanteeyaarir Tajorents, ikimityaari riraga itakaantaworini raapatziyarini. Riyotagaeyerini theenkantatsiri kameetha raapatziyaari rirori.

¹⁸ Ikantakiri Jakariiyashi:

—¿Tsika nokantyaaka niyoperotantyaari kyaaryootakirika iroka pikantakinari? Antyashiparitakina, eejatzi noena, antyashipawotaki roori.

¹⁹ Rakanakiri:

—Naaka Kawiriyeeri, kijokiro noyiri Tajorents. Rirotaki otyaantakinari nokamanantzimirorika iroka kameethatatsiri. ²⁰ Aritaki omonkaataky iroka nokamantkimiri, omaanta tee paapatziyawo nokantawitakimiroka, pitheenakina. Iroñaaaka pimajontzite, eero piñaawaetanee roojatzi paata ikoñaatantaky pitomi.

²¹ Eeniyo janta inkokironta piyoteeyeencharini royaawitaari Jakariiyashi, ikanteeyakini:

—Ojamanitateekityaami ipeyaka. ¿litaka kaari ishitowantaa?

²² Roojatzi iñaawaeri ishitowapae, tee imataneeya iñaawaetanee, omaanta rookorookotashiwaetaka. Roojatzi riyoteeyantanakani, ikanteeyanakini:

—Eenitatisi iñaakir janta inthomaenta. Tee iñaawaetaantsiperotanee.

²³ Okaatzi 7 kitejiri rantawaetaki Tajorentsipankoki. Roojatzi ipiyanaa ipankoki rirori. ²⁴ Roojatzi omotzitaktaka iina, okempoyaaka opankoki. Ikaatzi 5 kashiri tee oshitowae. ²⁵ Okantzi:

—Paeran tee itzimawityaani notyomi, rootaki nopashiwenantakari, omaanta iroñaaaka eero napiiteero nopashiwentaa. Ineshironkatakina Awinkatharite, tema ikameethaperotaki.

Irira Kawiriyeeri ikamantziro Mariiya itzimaki otomi

²⁶ Okaatakokati 6 owashirite omotzitakari Erijaweeera. Roojatzi rotyaanantakari eejatzi riraga Tajorents, Kawiriyeeri:

—Pyaate Najareeteki: jeekatsiri Karireeyaki. ²⁷ Pareetakityaawo tsinani owaero Mariiya, okashiyakari ayeri Josee, riraga icharineeteni Iraviiri. Omaanta tekira oshinetari shirampari.

²⁸ Ikantaka riyaatashitakiro riraga Kawiriyeeri. Romapokapaakiro ikantapaakiro:

—¿Eeniromi, Mariiya? Nopokantari nokamantemi: piweshiryaaanakya. Osheki inintashireperotakimi Tajorents, kijokiro rowakimi. Panaakotakiro maawaeni tsinani ikamintaaperotzimi rirori.

²⁹ Omaanta othaawantawakari, okenkithashiryaaanaka: “¿litaka ikanantnari?”

³⁰ Ikantapaakiro:

—Eero pithawantana. Kyaaryo, ikamintaaperotakimi riraga Tajorents. ³¹ Rooteentsi pimotzite. Iinja pitzimeri pitomi, piiteri Jesoshi.

³² Ipinkathariperote. Riyoteeyakirini atziri rirotaki Itomi Tajorents, riraga jeekatsiri jenokinta. Tema rirotaki Awinkatharite. Paeran

riraga Iraviirini ipinkathariwentawitarini ijoriyyotzinkariteni. ³³ Iinja ipinkatharite rirori eejatzi. Tema ikantziri Tajorents itomi: “Notyomi, eerosa pipinkathariwenteeyeririni maawaeni, pikanteetatyeyaaani”. Aritaki ikantyaari ipinkathariwenante, eero ipakagaero.

³⁴ Okantawakiri:

—¿Tsika nokantyaaka itzimantyaari notyomi? Tekatsikya noemi.

³⁵ Rakanakiro:

—Irowa tzimakayemini Ishire Tajorentsi. Rootaki tajonkawentemini. Inja ikantakoeteri pitomi: “Ikameethaperotaki, tee afiiro kaari kameethatatsi rantziri. Rirotaki Itomi Tajorentsi”. ³⁶ Eejatzi nokamantemi: antyashipawoperowitaka roori pinatsito Erijaweera, tema ikanteetziro roori tee iyotziri otzimeri eentsite, omaanta okaatakotaki 6 owashirite iroñaa omotzitaki. Inja otzimeri otomi. ³⁷ Ñaakiro, tekatsi pomeentsitzimotaarini Tajorentsi, imateeyironi oetarika ikoyiri.

³⁸ Okantanakiri:

—Tema rirotaki Nowinkatharite. Inimotakina oetarika ikowakaakinari. Ikowakaakinarika itzimashitya notyomi, ari kameethataki.

Roojatzi ipiyantanaka riraga ronampiri Tajorentsi.

Jataki Mariiya areetyaawo Erijaweera

³⁹ Awijanaki apaanipaeni kitejiri roojatzi iyaatantanaka rowaga Mariiya Joreeyaki. Oshintsitanaki iyaatanaki otonkaanaki tonkaariki.

⁴⁰ Areetapaaka janta ipankoki riraga Jakariiyashi. Ofñaapaakiro Erijaweera, okantapaakiro:

—¿Eeniromi?

⁴¹ Rowaga Erijaweera okemantawakawori Mariiya okaemapaaki, okematziiri ishewatanaka eentsite omotzikira, mitzi. Eejatzi okyaantapaakawo Ishire Tajorentsi iyotaaperotakiro, ⁴² roojatzi ocheraantanaka, okantziro:

—Tema ineshironkatakimi Tajorentsi, eejatzi ikimiteeyironi maawaeni tsinani; omaanta eeroka, panaakoeyakinan: ineshironkaperotakimiri rirori. Tema eejatzi inaaperotziri peentsite ikameethatzi. ⁴³ Eroka ashityaarini Awinkatharite. ¿Itaka pikenkithashiryaantanari pareetantanari?

⁴⁴ Pamine, nokemantawakimiri piwethatapaakina, ikimoshiryaanaki neentsite, ishewatanaka nomotziki, mitzi. ⁴⁵ Paapatziyaperotawakawo maawaeni ikamantakimiri Awinkatharite, rootaki ineshironkatantakimiri.

⁴⁶ Okantzi Mariiya:

—Tema ikameethaperotaki Awinkatharite, ⁴⁷ rirotaki Atajorentsite eejatzi owawijaakoeyeerini. Osheki nokimoshirewentakiri. ⁴⁸ ¿Itaka ineshironkatantakinari naari? Naaka ashironkaenkawo, tekatsi niyotzi naari. Omaanta iroñaa aripaete ikimoshirewentena maawaeni atziri. ⁴⁹ Osheki itajonkakowentakina, tema itajorentsiperotaki, ikameethaperotaki. ⁵⁰ Ikantatyeyaaani ineshironkaeyakirini maawaeni pinkatheeyiririni. ⁵¹ Osheki itajonkantayitakini. Ithonkaeyeroni okaatzti ikenkithashiryaari maawaeni kantakaaperotzinkari. ⁵² Imateeyakirini pinkatharitawitachari rookakaakiri ipinkathariwenantawita. Omaantakya ashironkaenkari ipeyakiri pinkathari. ⁵³ Kimitaka ipakiri osheki oetarika riraga koetyeemotakiri, ari rotyaantakiro Ishire iyoteeri atziri kowatsiri ryoyeri Tajorentsi eejatzi raapatziyantyaariri. Omaanta riraga kenkithashiryaakotawori tekatsi koetyeemotyaarini, eero rotyaantziniri Ishire ryotaantyaari. Eero rowawijaakotziri. ⁵⁴ Ikantani riraga Tajorentsi ramitakoeyakirini ajoriiyotzinkarite, tee ipeyakotee aari inta ineshironkaeyakaeni. ⁵⁵ Aritaki rantakiro maawaeni ikantakiriri itakaantaworini paerani: Awaraama eejatzi maawaeni icharineeten ikannteetatyeyaaani.

Rootaki okantakirori rowaga Mariiya. ⁵⁶ Ojeekakitzi 3 kashiri, roojatzi opiyantanaa onampiki.

Ikoñaatapaaki Jowa kaawoshitantatsiri

57 Monkaatapaaka kitejiri okoñaawaanitanyaariri Erijaweeera. Tema koñaatapaaki otomi. 58 Ikemakoeyakironi osheninkapaeni, ikimoshirewenteeyanakironi. Ikanteeyanakini:
—Tema ineshironkaperotakiro Awinkatharite.

59 Ari okataki imaakotaki 7, roojatzsi okitejitanaki omonkaataka itotonatantyaariri ishiramparitarira. Rameteeyawoni joriiyopaeni iitakotaari jewatatsiri itomi ikoñaatapaaki iwaero iriri, rootaki ikananteeyarini isheninka:

—Tema iitya Jakariiyashi, iitakotaari iriri.

60 Omaanta okantzi riniro:

—Eero iita Jakariiyashi, omaanta iitya Jowa.

61 Ikanteeyanakironi:

—¿ilitarikya pikowantari piiteri Jowa? Tee añiiri pisheninka iitachani Jowa.

62 Roojatzsi rookorookotantanakariri rojampitantakari riraga Jakariiyashi:
—¿Oetaka pikoyiri eeroka?

63 Rookotanakiniri paperi, rojankinatakiniiri: "Aritaki iitya Jowa". Ari rotsikanateeyanakarini riroripaeni. 64 Roojatzsi imapokashitanaa riraga Jakariiyashi ifñaawaetanee eejatzsi, ikantzi:
—Tema ikameethaperotaki Tajorentsi.

65 Roojatzsi rotsikanateeyantanakarini maawaeni isheninka. Ikemakoeyakirini maawaeni jeekatsiripaeni tonkaarikipaeni: rowaga jeekatsiri Joreeyaki. 66 Ikenkithashireeyanakan rajankaneki maawaeni kemakoeyakiririni ikantzi: "¿Tsikama ikantatyaarika riraga eentsi? ¿Oetakama ranteri paata? Tema ineshironkaperotakiro Awinkatharite itajonkawentakiri".

67 Roojatzsi rowaga Ishire Tajorentsi iyotaakiri riraga Jakariiyashi, ikanantakwori iroka:

68 —Tema ikameethaperotaki Awinkatharite, rirotaki tajonkawenteeyakaerini. Ipokashiteeyakaeni ikamawenanteeyeerini ipinawenanteeyeerorini kaari kameethatatsi antziri rowawijaakoeyanteerini.

69 Paerani Iraviiirini rantakiniri Tajorentsi ikowakaakiriri. Iroñaaka rotyaantakiri Tajorentsi icharineeteni Iraviiirini, itajorentsitaki, rowawijaakotante. 70 Tema paeraniperoroña riraga kamanantayitzirorini iñaani Tajorentsi, riraga kameethaperotsiri, ikantakirini atziripaeni: "Ikantzimi Tajorentsi: 71 Notyaantemiri owawijaakoeyemirini, eenitatsirika kijeeyemirini, oonawaetzimiri, aritaki rowawijaakoeyakimini". 72 Tema noneshironkateeyakirini ichariniiteni Awaraama, maawaeni. Eero nopeyakotziro nokashiyakagaeyakarini. 73 Paerani nokantaperotakiri picchariniiteni Awaraama: 74 "Inja nowawijaakoeyeyerini piccharineetenipaeni, nokijakowenteeyaaarini kijeeyawitakaririni, eero ithaaawyini aapatziyeeyenarini. 75 Ninkarika aapatziyenani rirotaki nashipaeeni. Nowameethateeyerini, nokantyaani noñaaperoeyerini ikameethatz'i ". Rootaki ikantakiriri Tajorentsi itakaantaworini.

76 Iroñaaka notyomi, nokantemi: "Iiteetemi: 'Eerokataki kamanantzirori iñaani Tajorentsi jenokijatz'i ". Tema ari pikamanteeyeerini atziri okameethatzi ijeki kameetha, raamagaeyaarini Awinkatharite. 77-78 Piyotagaeyerini atziripaeni riyoteeyantyaarini tsika ikantya rawijakotanteeyaaari. Pikamanteeyeerini ikaminthaaperoeyakirini Tajorentsi, eero ikenkithashiriiro eejatzsi kaari kameethatatsi rantayitzirini. Aririka riyowapaaki oorya, eero otsitenitanee, inta okitejitanaki. Eejatzsi okimitakya, aririka ipoñaakya Awinkatharite jenokinta, ayoperoeyanakini

⁷⁹ rowawijaakoeyeerini maawaeni aapatziyariri riraga kaari yotawitariri Tajorentsi, riraga thaawantawitawori ikame. Riyotakagaeyapaakirini tsika ikantyaari iñaaperotantyaariri Tajorentsi ikameethatzi.

Rootaki ikantakirini Jakariiyashi.

⁸⁰ Okanta awijaki osheki ojarentsi, antaritanaki Jowa, osheki raapatziyakirai Tajorentsi. Roojatzi ryaatantaka apaniroeni tekatsinta atziri ipanko, roojatzi paata ikenkithatataapiinteeeyakirini atziripaeni.

2

Ikoñaatapaaki Jesoshi

¹ Eenitatis oroomajatzi iwaero Seesari Awoshito, rirotaki pinkathari-wentzirori maawaeni kipatsipaeni. Owakira ikoñaatantakari Jowa, otomi Erijaweeera, ikaminaakiri Seesari:

—Nokowaki rojankinatakoeyaani maawaeni atziripaeni, niyotantyaari tsikarika ikaatzi.

² Irira Shiriiño rirotaki jewawentziriri shiiryajatzi, rojankinataantee-takawori iwaeropaeni atziri. ³ Rootaki ryaateeyantanakarini maawaeni atziri janta nampitsikinta tsikarika ikoñaatapaaki ichariniiteni paerani, rojankinatakotakaanty iwaeropaeni. ⁴ Eeniropi ijeekaki riraga Josee janta Najareeteki. Rirotaki icharineeteni Iraviiri riraga pinkatharitawitacharini. Aritaki inampitawoni irira Weriki, ojeeki janta Joreeyaki. Rootaki ryaatantanakari Josee janta, rojankinatakotakaanty. ⁵ Itsipatanakawo Mariiya rowaga ikashiyakarira rayero. Tekira oshinetari shirampari, omaanta omotzitashitaka rooteentsi otzimeri otomi. ⁶ Rareetapaaka rirori janta Weriki roojatzi okemantakari ratsikaneentakiro thowiwiwiwi. ⁷ Ikwakowawitapaaka rirori pankotsi imaantapaakyaarimi omaanta ithotyaakowitapaakawo ijeekantapaakyaarimi, inta iñaapaaki apaani ipanko piratsi. Aritaki okoñaatakirai otomi jewatatsiri itzimi. Oponatakiri, owakiri jaga royiitantapiinteeantanaranirri piratsi rowanawo.

⁸ Tsitenitanaka, eeniro ijeekayitzini shentziriri rowishate janta keshiki. Tee imayı, ikakiwentziri rowishate. ⁹ Romapokapaakirai Awinkatharite, ishipakiryaakoeyapaakirini, kimitaka okitejite, eejatzi iñagaeyawakirini ronampiri Awinkatharite. Ithaawantawakari oshekiperi, ikantaka rompeteeyanakanı, tonki, tonki. ¹⁰ Roojatzi ikantapaakirai:

—Eero pithawantana, eenitatis nokamantemiri okameethaperotaki. Osheki pikimoshirewentero, eejatzi osheki ikimoshirewentero maawaeni atziri. ¹¹ Owakira ikoñaatapaaki Weriki owawijaakotemini: rirotaki Awinkatharite riraga Rotyaantanewo Tajorentsi. ¹² Piyaate janta ipankoki piratsi, paminakiteri rirori owakira koñaatapaentsiri. Piñaapaakirai iponataka janta romaryaka royiitantapiinteeantanaranirri piratsi rowanawo. Nokamtakimiro iroka iroñaaka piyotantyaari kyaaryo tee namatawitzimi.

¹³ Roojatzi romapokantapaakariri, jenoki oshekini ronampiri Tajorentsi iñaaperoeyapaakirini, ikanteeyapaakini:

¹⁴ —Rooma ikameethaperotaki Tajorentsi, nopinkathateeyirini janta jenokinta. Eejatzi jaka kipatsikika ijeekakagaeyerini kameetha maawaeni antzirori ikoyiri Tajorentsi riraga pinkathatziriri. ¹⁵ Roojatzi ipiyeeyantanaani maawaeni jenokinta, roojatzi ikantawakaeyanakanı rirori shentziriri rowishate:

—Ikamantakae ronampiri Tajorentsi koñaatapaaki Weriki owawijaakoteni. Thametya aminakiteri.

¹⁶ Roojatzi ishintsiperotantanakari ryaatanaki, iñaapaakitziri janta ipankokinta piratsi. Iñaapaakirai Josee, eejatzi rowaga Mariiya, omaryaakirai

otomi royiitantapiinteetanariri piratsi rowanawo. ¹⁷ Iñaantapaakariri, roojatzi ikamanteeyantapaakarini jeekatsiripaeni jaga okaatz ikanakiriri ronampiri Tajorentsi. ¹⁸ Ikantaka maawaeni kemakiriri ikantawakaanaka: —¿Pikemakiro ikantziri? ¿Oetaka ikantziri?

¹⁹ Omaanta roori Mariiya osheki okenkithashiryaanakawo ikanteeyakiririni, okenkithashiryaakopiintakawo ajankaneki.

²⁰ Roojatzi ipieeyeyantanaani riori shentziriri rowishate keshiki. Ikomoshirewenteeyanakirini Tajorentsi ikanteeyanakini:

—Tema ikameethataki Tajorentsi. Okameethataki maawaeni roñaagakaeri eejatzi maawaeni ikantakaeri. ¡Kameethari Tajorentsi!

Itotonateetakiri Jesoshi

²¹ Okaataki 7 imaaakotaki Jesoshi roojatzi kitejittsiri 8 itotonatantee-takariri ishiramparitarira. Eejatzi iitakiri iwaero Jesoshi: imonkaatakiro ikantzitakawori Mariiya chapinki ronampiri Tajorentsi.

Ragaetanakiri Jesoshi tajorentsipankoki

²²⁻²⁴ Paerani rojankinataakirini Awinkatharite Moeseeshi: “Aririka okofñaawaanite tsinani otomi, okempoyeeya opankoki okaate 40 kitejiri: eero iyaatziza apiyoteeyaninta apinkathaperotzirinta Tajorentsi. Omonkaatakyaarika 40 kitejiri, okameethatzi iyaate Tajorentsipankoki aanaeri ñaanakowenantsiriki apite jamomo eerorika apite jampakitzi”. Eenitati paashini rojankinatziniri okantzi: “Rirorika shirampari riraga jewatatsiri otzimiri tsinani, ikowakaakiri Awinkatharite raapatziyaperotyari, ranaakoteri impaetatsini ikoñaatzi”.

Ari ikaatakotaki 40 kitejiri itzimantakari Jesoshi, roojatzi ryaateeyan-tanaani Jerojareeki: Josee, Mariiya, eejatzi kijokiro owanakiri eentsite. Imonkaateeyakironi maawaeni rojankinatzirini Moeseeshi iroka okyaan-tapiinteeyaaari Mariiya Tajorentsipankoki. Eejatzi okantakiri Tajorentsi:

—Irika notyomika, nokowaki rantaperotemiro oetarika pikowakaakiriri.

²⁵ Ari ijeeki janta Jerojareeki shirampari iitachari Shimyo. Rirotaki aapatziyaperotariri Tajorentsi, kameetha ijeeki, raapatziyaperotawo roori Ishire. Eejatzi raamaari Rotyaantanewo Tajorentsi: riraga weshiryaaakagaeyaaarini maawaeni joriyyopaeni. ²⁶ Okamantakiri Ishire Tajorentsi: “Eerotzitarika pikami, ari piñaawakiri Rotyaantanewo Tajorentsi”. ²⁷ Roojatzi otyaanantakari Ishire Tajorentsi riori janta Tajorentsipankoki; eekiro rimpaeataaki Josee, Mariiya, othomaakiri Jesoshi. ²⁸ Riraga Shimyo iñaawakirira Jesoshi, ryaatashitakiri ithomaawakiri; roojatzi ikanantakari Tajorentsi:

—Nowinkatharite, tema pikameethaperotaki, ²⁹⁻³⁰ noñaakiri owawijaako-teenani, riraga pikantakinari noyeeri. Iroñaaka monkaataka, tekatsi noyaanee eejatzi. Nokimoshiretaki, wetsikakina nokame.

³¹ Kyaaryo, potyaantakiri rowawijaakoeyerini maawaeni atziri: ³² rirotaki rirotakagaeyerini paashinijatzitsiri atziri, riweshiryaawen-teeyaaarini maawaeni joriyyopaeni aapatziyeyemirini.

³³ Roojatzi raminantanaka Josee, eejatzi Mariiya, rotsikanatanakari riori; ikenkithashiryaakoperotanakawo ikantakiri. ³⁴⁻³⁵ Eekiro ikan-teeyanakirini:

—Nokowaki ineshironkaeyemini Tajorentsi.

Eejatzi ikantakiro rinriowa eentsi:

—Pamine, iinja osheki piraakotyaari pitomi: ipokantakari jaka ayoteeyantyaarini tsika akantya awijakoeeyanteeyaaarini omaanta ikaate osheki atziri theenkayeyeririni: rowashironk-agaeaayaani riroripaeni. Omaantakya paashini atziripaeni,

riweshiryaaawentaperooyaarini pitomi. Apaani theenkaeyeririni, paashini weshiryaaawenteeyaaririni, okoñaatzimotantyaariri ikenkithashireeyarini.

Rootaki ikantakirori Shimiyo.

³⁶⁻³⁷ Ari ojeeki eejatzi Tajorentsipankoki tsinani oetachari Aana: ojekantawo pankotsi imaantapiintari atziripaeni aapatziyaperotariri Tajorentsi jaga okaankiutzi Tajorentsipankoki. Tema roori rootaki kamanantakotatsiri, osheki okamantapiintakiri osheninka iñaani Tajorentsi. Irini iita Janoeri: rirotaki isheninkani Asheeri. Antyashipawoperotaki Aana: okaataki ojarentsite 84. Eejatzi roori ayitaka oemi eenironi ewankawotapaaki. Okaatzsi otsipatavitakari oemi 7 ojarentsi, tekiraata otsipaperotyaariitami roojatzi ikamapithatantakawo. Rootaki ojeekantakari iroñaaaka ipankoki Tajorentsi. Otzitawentari rirori, eejatzi okantani: kitejiriki, tsiteniriki amanapiintari Tajorentsi; osheki opinkathatakiri. Tee okenkithashiryaaoperotaawo owayitarini. ³⁸ Okanta iyaatashitakiri Jesoshi roori. Okantakiri Tajorentsi:

—Ariwee, noñaakiri naari.

Roojatzi okanteeyakirini osheninkathoripaeni:

—Eeniropa irika, rirotaki owawijaakooyeririni atziripaeni: maawaeni aamagaeyaririni.

³⁹ Imonkaatakiro Josee eejatzi Mariiya maawaeni rojankinatakirini Moe-seeshi: tema rirotaki ojankinatakaakiriri Awinkatharite. Roojatzi ipiyanteyanaani Najareetekei: jeekatsiri Karireeyaki.

Rewankaritapaakinijesoshi, ipiyanaa eejatzi Tajorentsipankoki

⁴⁰ Ikanta ikimotatanaki Jesoshi, eekiro riyaatatzi ithaamentanakitya eejatzi riyothanitaki ikenkithashiryaaoperota kameetha, eejatzi eekiro ikimitakotanakityaari Tajorentsi. Eejatzi irira osheki inintaperotakiri rirori.

⁴¹ Rametapiinteeyawoni maawaeni ojarentsi riyaatapiintzi riraga Josee eejatzi rowaga Mariiya janta Jerojareeki, aririka omonkaatapaeya kitejatatsiri iitachari Rawijantakarini Ronampiri Tajorentsi joriyyopaeni janta Ejipitoki.

⁴² Ari iroñaaaka okaataki rojarentsite riraga Jesoshi 12. Rapiitantaawori riyaatee eejatzi janta Jerojareeki. Itsipatanakawo riniro, ashitariri eejatzi paashinipaeni inampijatzi. ⁴³ Ryaatanaki ikimoshirewentero rantakiri Tajorentsi. Rojamanitakitzi apaanipaeni kitejiri ikimoshirewentanakiri janta, roojatzi ipiyeyawitaani riraga Josee eejatzi Mariiya itsipatvitanaari inampijatzi. Tee ryotzi jeekanakira riraga Jesoshi Jerojareeki. ⁴⁴ Apaani kitejiri ikinanaki Josee eejatzi iina. Raamaashitawitakari itsipatanakari Jesoshi paashinipaeni inampijatzi. Tsitenini raminaminawitakari roojatzi otsitenitantanaka. Ikowakowawitanakari ikaateyeenira ipokae, ⁴⁵ omaanta tee iñagaeri. Roojatzi ipiyantana janta raminaminatziri. ⁴⁶ Okaataki kitejiri 3 roojatzi iñaantapaari rirori Tajorentsipankoki: ikaateeyirini iyotaantayitsirini. Ikemijantziri irintapaeni ryotaantzi eejatzi rojampitayitakirini rirori oetarakapaeni. ⁴⁷ Ari rotsikanatakari maawaeni kemakiriri, ikantzi:

—¿Pikemawakirii ewankarik? ¡Riyothaniperotzi! Kameetha rakawakiri ikantziriri iyotaantatsiri, tee ikompitawo.

⁴⁸ Ari rotsikanatapaakari Josee, eejatzi iina. Okantakiri irowa:

—Notyomi, ¿tsika pijeekekakika? Pamine, nokowakowawitakimi nokaatziri pirithori. Osheki nokoetyaakimi.

⁴⁹ Rakanakiro:

—¿Litaka pikowakowatantanari? Tema piyotzi nokowaperotaki nokemijantaperotero ikoyiri Pawapero. Rootaki nojeekantari jaka.

⁵⁰ Omaanta tee riyatotawakiri riroripaeni ikantawitakariri. ⁵¹ Roojatzti rriraga Jesoshi royaatantanaawo, roerinkanaka ipiyeyanaani Najareeteki. Ipiyanaaga ikantani ikemijantaperotapiintziri maawaeni okaatzi ikantziriri rriraga Josee eejatzi riniro. Tekatsi rante: tee iperanita, tee ipiyathanita. Omaanta roori Mariiya osheki okenkithashiryaakawo ajankaneki maawaeni iroka oñaakiri eejatzi okemakiri. ⁵² Eekiro, eekiro, ryaatanakitzi ryiothaniperotanakitzi, oemonkanaka kameetha. Eejatzi Tajorentsi iñaaperotakiri rirori Itomi ikameethatz, eejatzi maawaeni atziripaeni iñaakiri ikameethatz.

3

*Ritantakawori Jowa ikenkithatz
(Mt. 3.1-6; Mr. 1.1-6; Jowa 1.19-28)*

¹ Iroñaaka okaatzi 15 ojarentsi ipinkathariwenteeyakirini maawaeni jeeKayitatsirini kipatsikipaeni rriraga oroomajatz iwaero Teweeryo Seesari. Ari rotyaantakiri rriraga Poonshyo Peraato ipinkathariwentziri joreeyajatzi. Eejatzi rotyaantakiri rriraga Erooreshi ipinkathariwentziri rriraga karireeyajatzi; omaanta rirentzi Erooreshi, iwaero Jiripi, ipinkathariwentziri rriraga itooryajatzi eejatzi tarakoniitejatz. Eejatzi rriraga Rijañashi ipinkathariwentziri awireeñajatzi. ² Eejatzi iroñaaka ipinkathariwenteeyirini ñaanakowenantatsiripaeni Aanashi eejatzi Kaejashi. Roojatzti ijekantapaaka Jowa, itomi Jakariiyashi, janta okaankiyeenta. Ikantakiri Tajorentsi:

—Nokowaki iroñaaka pikenkithatakaeri atziripaeni, eenitatsi nokowakiri pikamantteeyeririni.

³ Ikanta ikinakinayitanakini rirori othapyakiini iñaa iitachari Joriraani, ikanteeyakirini atziripaeni:

—Pikenkithashiryaagaeya, eero pikimitagaa paerani, pookaero kaari kameethatatsi panteyakirini, roojatz ikanmintheeyantemirini Tajorentsi: eero ikenkithashiryaakoteemiro pantawitarini. Roojatz nokaawoshitakanteeeyakimirini Tajorentsi riyatantyaari atziri awijakoteemi.

⁴ Paerani ikenkithatakotzitakarini Jowa rriraga kamanantzirorini iñaa Tajorentsi iitachari Iseeiyashi. Iroka rojankinatakotzitakaririni, ikantzi: “Eenitatsi iinja atziri kenkithatakayerini atziripaeni janta okaankiyeenta, ikanteri: ‘Paamayarirapa Awinkatharite. Pikameethatanaki iñaaperotantapaakimiri pikameethatz. Aririka pikameethatanaki pikimityaawo awotsi kameethatatsiri ikinantapaakyaaari Jewaperowenantatsiri: powameethatero iñaaperotanteeyapaakyaworini.

⁵ Pikiyagaanteero opompaetopaeni, pityaakiyiteroni otenkanaapaeni, powameethatero maawaeni. Eejatzi powameethatero awotsi tzipitayitatsirini, otampsikatantyaari kameetha, okameethapankaatanee. Noshiyakaawentashitakawo iroka. ⁶ Roojatzikya maawaeni atziripaeni iñeyantawakyaarini owawijaakoeyeririni, rriraga Rotyaantanewo Tajorentsi”.

*Ikantayitziririni Jowa atzri
(Mt. 3.7-12; Mr. 1.7-8; Jowa 1.19-28)*

⁷ Ikantaka ipokashiteeyawitakarini osheki atziri ikowawitaka ikaawoshitakoeayaarini Tajorentsi. Omaanta rriraga Jowa eenitatsi ikanteeyawakiririni:

—Eerokateeyakini maankipaeni: pikimiteeyakarini kamaaripaeni. Tema osheki pamatawitanteeyini, eejatzi pitheeyawaetashita. Tee okameethatzi pantziri. Tee pikowaeyawitani piyaae paamariki kaari tsiwakanitatsini, rootaki pikowantawitakari pikaawoshitakotyaarimi Tajorentsi. ⁸ Pikowakirika nokaawoshitakotawakimiri Tajorentsi, pityaawo pikenkithashireeya, pijeekeanteeyaari kameetha, pookaero kaari kameethatatsi pantapiinteeeyakirimi niyotantyaari tee pikimiwitaa paerani. Eero pikantawaetashita: “Nosheninkatakari Awaraamani, rootaki niyotantakari aritaki nawijakotee”. Pamatawitashitaka eero ka apaniroeni. Ikowakirkami riraga Tajorentsi, imatero ipeyiromi atziri iroka mapika, osheninkatanteeyaaaririmi riori aritaki rantakiromi. Omaanta eerokapaeni eerokawitaka icharineetenii Awaraama, eerorika paapatziyari riori patsipetashitakawo pisheninkawitakari: rooma pajankanelekira kimitakimi mapi: pikijotzira. ⁹ Maawaeni inchato kaari kithokitatsi tema ari atowaeyakironi apiyoteeyeroni atagaeyeroni paamariki. Eejatzi eerori pikimiteeyakawoni inchato kaari kithokitatsi. Kyaaryoowa rookimikari eerori Tajorentsi paamariki kaari tsiwakanitatsini.

¹⁰ Rojampiteeyakirini riraga atziripaeni:

—¿Itaka pikoyiri nanteeyerini?

¹¹ Rakanakiri:

—Otzimirika apite piithaari, pipagaanteri ashironkaenkari apaani. Otzimimotzimirika osheki powanawo, pipagaanteri eejatzi ashironkaenkari. Pikaminthaantapiinte.

¹² Eejatzi ipokashitakiri Jowa aayitziririni koriki: rayiniri riraga oroomajatzi, osheki ramatawitzirí eejatzi atziripaeni. Tema raagaantzitapiintakiri. Ipokashiiyakirini ikowaki ikaawoshitakoeyawakirini Tajorentsi, rojampita-paakiri:

—¿Otarika nanteri naari piyotantenari kyaaryo naapatziyakari riori?

¹³ Ikantawakiri:

—Eero powanaashitawo eero ka apaniroeni paashitzitantlyaariri iyorikite atziri, omaanta pimonkaataperotero kameetha ikantakimiri oroomajatzi.

¹⁴ Eejatzi ipokashiiyakirini apaanipaeni joraaro, rojampitakiri:

—¿Oetaka nanteri naari?

Ikantawakiri:

—Eero pikijashitari atziri pikowantyaari pomintaahayeri paapi-thatantyaariri iyorikite, eejatzi eero pikowantari payitantyaariri iyorikite. Pikimoshirewenteri ipinatzimirira piwinkatharite, eero pikoyi ipaetemi paashini.

¹⁵ Ikanta raamagaeyarini Jesokirishito, iitashiteeyawitani rooteentsi rareetya. Ikenkithashiryaakoeyirini ikantzi: “¿Riotakima Jowa Rotyaantanewo Tajorentsi?” ¹⁶ Omaanta ikanteeyakirini Jowa:

—Nokaawoshitakoejakimiri Tajorentsi iñaaki: kaari pomeentsitachani. Iinja ipokapaakirika Awinkatharite, osheki nopinkathaperotakiri, rooma naaka tee nonomkaatari naari. Rotyaanteeyeeni riori Ishire Tajorentsi ojeekantakanimi pajankaneki, owameethateeyemini. ¹⁷ Iinja rinashitakagaeyaarini irira kameethatatsiri eejatzi kaari kameethatatsi. Akimitzirowanki aari anashitawo okithoki pankirentsii, kitekiyiteentsirini eejatzi anashitakawo roori jampipentakitsiri. Akempoyeero okithoki, inta atayero jampipentakiri. Eejatzi ikimiteeyeeni riori impaetakinari, riraga Rotyaantanewo Tajorentsi: ikaminttheeyerini aapatziyeyearirini, irira iñaaperotakiri ikameethatzi. Omaanta riraga theenkiriripaeni ari rowashironkagaeyakirini. Tema iñaaperotakiri tee ikameethatzi.

*Romonkyaagakaantakiri Erooreshi Jowa omonkyagamentotsiki
(Mt. 14.3; Mr. 1.14; 6.17)*

¹⁸ Aritaki ikenkithatakapaintziri Jowa: ikamantapiinteeeyakirini atziri tsika ikanteeeyaa ikameethatanteeyaari, ejatzti ikamantziri tsika ikanteeeyaa rawijakotanteeyaarini.

¹⁹⁻²⁰ Ejatzti ikantakiri riraga Erooreshi:

—Tee okameethatzi pantayitzirini. Paapithatakiri pirentzi iina rowaga Eroriiyashi. Eeniro osheki paashini kaari kameethatatsi pantayitzirini.

Roojatzti ikijanakiri Erooreshi. Ipinkathariwenteeyirini karireeyajatzti, rootaki imatantakawori raakaantakiri Jowa, shepik, romonkyaagakan-takiri. Eekiro ryaatatatzti rantaperotanakiro kaari kameethatatsi.

*Riraga Jesoshi ikaawoshitawentakari Tajorentsi
(Mt. 3.13-17; Mr. 1.8-11)*

²¹⁻²² Tekirani romonkyaagakaanteetziri Jowa, ejatzti tekirani ikenkithatakotakiri Tajorentsi riraga Jesoshi, tema riraga Jowa ikaawoshitawenteyakarini Tajorentsi osheki atziri. Ejatzti riraga Jesoshi ikaawoshitawentakari ashitariri, roojatzti ikenkithatakanakariri irira. Omapokapaaka ayiitashitapaakiri Ishire Tajorentsi, opoñaaka jenokinta. Oshiyawitapaakari jamomo. Ejatzti ikemaeyawakironi ikantakiriri Tajorentsi:

—Eeroka notyomi nonintashireperotzimi. Osheki nokimoshirewen-takimi.

*Rojankinatziro iwaeropaeni ichariniitenipaeni paerani Jesoshi
(Mt. 1.1-17)*

²³ Okaataki rojarentsite Jesoshi 30, ritantanakawori ikenkithatakagaeyirini ijoriiyotzinkaritepaeni. Omawitya ikenkithashiryaka maawaeni atziri rirotaki itomi Josee, rirotaki itominthori, riraga jewatatsiri ikoñaatzi. Eekiro rimpetaapaaki reentsiteperopaei Josee.

Iriri riraga Josee iwaero Erii.

²⁴ Iriri riraga Erii iwaero Mataani.

Iriri riraga Mataani iwaero Rewii.

Iriri riraga Rewii iwaero Meeriki.

Iriri riraga Meeriki iwaero Jaanani.

Iriri riraga Jaanani iwaero Josee.

²⁵ Iriri riraga Josee iwaero Matateyashi.

Iriri riraga Matateyashi iwaero Amooshi.

Iriri riraga Amooshi iwaero Nawooni.

Iriri riraga Nawooni iwaero Eeshiri.

Iriri riraga Eeshiri iwaero Nagae.

²⁶ Iriri riraga Nagae iwaero Maatari.

Iriri riraga Maatari iwaero Matateyashi.

Iriri riraga Matateyashi iwaero Shemee.

Iriri riraga Shemee iwaero Joseeki.

Iriri riraga Joseeki iwaero Joraan.

²⁷ Iriri riraga Joraan iwaero Jowanaani.

Iriri riraga Jowanaani iwaero Reeja.

Iriri riraga Reeja iwaero Jorowaweeri.

Iriri riraga Jorowaweeri iwaero Jaratyerei.

Iriri riraga Jaratyerei iwaero Neeri.

²⁸ Iriri riraga Neeri iwaero Meeriki.

Iriri riraga Meeriki iwaero Ariitzi.

Iriri riraga Ariitzi iwaero Kojaami.

Iriri riraga Kojaami iwaero Eremoraami.

- Iriri riraga Eremoraami iwaero Eere.
²⁹ Iriri riraga Eere iwaero Joshoe.
 Iriri riraga Joshoe iwaero Eriyeshaari.
 Iriri riraga Eriyeshaari iwaero Joriimi.
 Iriri riraga Joriimi iwaero Mataa.
 Iriri riraga Mataaa iwaero Rewii.
³⁰ Iriri riraga Rewii iwaero Shimiyo.
 Iriri riraga Shimiyo iwaero Joraa.
 Iriri riraga Joraa iwaero Josee.
 Iriri riraga Josee iwaero Jonaani.
 Iriri riraga Jonaani iwaero Eryakiimi.
³¹ Iriri riraga Eryakiimi iwaero Mereeya.
 Iriri riraga Mereeya iwaero Maenaani.
 Iriri riraga Maenaani iwaero Mataata.
 Iriri riraga Mataata iwaero Nataani.
³² Iriri riraga Nataani iwaero Iraviiri.
 Iriri riraga Iraviiri iwaero Isayii.
 Iriri riraga Isayii iwaero Oweeri.
 Iriri riraga Oweeri iwaero Woosho.
 Iriri riraga Woosho iwaero Sharimoo.
 Iriri riraga Sharimoo iwaero Naashoni.
³³ Iriri riraga Naashoni iwaero Aminagaawa.
 Iriri riraga Aminagaawa iwaero Araami.
 Iriri riraga Araami iwaero Aarani.
 Iriri riraga Aarani iwaero Eshiromi.
 Iriri riraga Eshiromi iwaero Paareshi.
 Iriri riraga Paareshi iwaero Joraa.
³⁴ Iriri riraga Joraa iwaero Jakoowo.
 Iriri riraga Jakoowo iwaero Ijaaka.
 Iriri riraga Ijaaka iwaero Awaraama.
 Iriri riraga Awaraama iwaero Taree.
 Iriri riraga Taree iwaero Nakoori.
³⁵ Iriri riraga Nakoori iwaero Sherooko.
 Iriri riraga Sherooko iwaero Ragaawo.
 Iriri riraga Ragaawo iwaero Pereeki.
 Iriri riraga Pereeki iwaero Eeweri.
 Iriri riraga Eeweri iwaero Jaari.
³⁶ Iriri riraga Jaari iwaero Kaenaani.
 Iriri riraga Kaenaani iwaero Aratajaari.
 Iriri riraga Aratajaari iwaero Sheeme.
 Iriri riraga Sheeme iwaero Noe.
 Iriri riraga Noe iwaero Rameeki.
³⁷ Iriri riraga Rameeki iwaero Matojareeni.
 Iriri riraga Matojareeni iwaero Enoko.
 Iriri riraga Enoko iwaero Jareeri.
 Iriri riraga Jareeri iwaero Maarareeri.
 Iriri riraga Maarareeri iwaero Kaenaani.
³⁸ Iriri riraga Kaenaani iwaero Enooshi.
 Iriri riraga Enooshi iwaero Seete.
 Iriri riraga Seete iwaero Araani.
 Paerani riwetsikantakariri Tajorentsi riraga Araani.

4

*Jatanaashi ikowawita rantakayerimi Jesoshi kaari kameethatatsi
(Mt. 4.1-11; Mr. 1.12-13)*

1 Ikanta Jesoshi itonkaantanaari tema ipoñaakaga Joriraanikira. Ikkithaatotakawo Ishire Tajorentsi, aanakiri janta okaankiityeenta.

2 Okaatz 40 kitejiri ijeekaki janta, tee rowaneenta eechonkiini: aaperotakiri itashe. Ikanta ryaatashitakiri Jatanaashi riraga iwinkatharite kamaariipaeni iñaantari, ikowawitaka rantakayerimi kaari kameethatatsi.

3 Ikantawitapaakir:

—Eerokarika Itomipero Tajorentsi, ajaaty: pitajonkero iroka mapika, opeyanakya paa, poyaari.

4 Rakanakiri Jesoshi:

—Eero nantziro. Okantzi Iwaperite Tajorentsi: “Tee apatziro akoyiro owanawo ashintsiwathantyaaari, inta kowaperotacha akemijantaperotero maawaeni ikowakaakaeri Tajorentsi ashintsitantlyaaari ashireki”.

5 Roojatzi raanakiri antawoki ochemp, rookotapaakiniri maawaeni kipatsi, **6** ikantakiri:

—Pikowakirika nokanteeyerini maawaeni jeekatsiripaeni ipinkathateeyemini, raakameethateeyemini. Aritaki nomatakiro noperi ninkarika nokoyiri. Tema naaka pinkathariwenteeyiririni maawaeni, **7** aririka nokanteri ipinkathateeyemini eerori, aritaki ipinkathateeyakimini. Apatzirokyo nokowaki potziwerowashitena, pipinkathatena naari.

8 Rakanakiri:

—Rooma okantzi Iwaperite Tajorentsi: “Pipinkathateri Awinkatharite, tema rirotaki Tajorentsi. Apatzirokyo irira paapatziyari, piñaaperoteri, ee-jatzi pikimoshirewenteri”.

9 Roojatzi raantanakari janta Jerojareeki, okaapankatapaakinta Tajorentsipankoki, jantoo jenoki. Ikantapaakiri:

—Eerokarika Itomi Tajorentsi, ajaaty: pomyaanakyaaty jaawiki, eero pikamantapaaka. **10** Pikenkithashireeroti okaatz okantzimir Iwaperite Tajorentsi: “Ari rotyaantakimir Tajorentsi ronampiripaeni, ikempoyeemi”.

11 Eeniropojatzi paashini rojankinatzirini: “Aritaki raawakimi rakokira, eero pikagaantapaaka jaawiki mapiki”. Ñaakiro, ¿iitaka pithaawantakari?

12 Rakanakiri:

—Eero nomyaa. ¿litaka noñaanantyaari Pawa? Rooma eenitatsi paashini okantzi Iwaperite Tajorentsi: “Tee okameethatzi añaantawityaaari Tajorentsi: rowashironkaemikari”.

13 Ikanta iwinkatharite kamaari teera imatziro rantakayiri Jesoshi kaari kameethatatsi, roojatzi rookantanaari. Omaanta iinja rapiiteeri.

Ipiyanaa Jesoshi Karireeyaki

(Mt. 4.12-17; Mr. 1.14-15)

14 Roojatzi ipiyantanaa Jesoshi Karireeyaki, osheki omatakaakiri Ishire Tajorentsi: tema okithaatakaakari roori. Tee ojamanitzi ikemakoeyakirini maawaeni jeekatsiripaeni janta. **15** Riyotaantapiintaki pankotsiki ipiyotan-tapiintarira joriyyopaeni. Ikanteeyanakini:

—Tema ikameethataperotaki Jesoshi; tema kameetha riyotagaeyakaeni.

Rareetapaa Jesoshi Najareeteki

(Mt. 13.53-58; Mr. 6.1-6)

16 Roojatzi ryaatantanaa Jesoshi Najareeteki, rootaki inampi rantaritakira paerani. Ikantanaka saawaroki ryaatanaki janta pankotsiki ipiyotan-tapiintarira joriyyopaeni, tema rametapiinteeyawoni ryaatz

saawaroki. Inthomaenta ikatziyapaaka, iñaanateniri atziripaeni Iwaperite Tajorentsi. ¹⁷ Ipaetawakiri rojankinarini Iseeyashi. Rapineeryaakiro, raminakiro iñaanateniriri. Okantzi: ¹⁸ “Okithaatakaapaakina Ishire Avinkatharite, otyaantakina nokamanteri maawaeni ashironkaayitacharini tsika ikantyaari rawijakotanteeyaari. Nokamanteri maawaeni romperatanewopaaeni kamaari noemishitowaeyeerini. Noñaakagaeri eejatzi kaari kokichaatatsi. Eejatzi nopakaakowenteeri maawaeni rowashironkagaetziri. ¹⁹ Eejatzi nokamanteejerini atziri rooteentsi notajonkakowenteri”.

²⁰ Roojatzi rapineetantawo Iwaperite Tajorentsi, roepiyeeniri ipaeri, roojatzi ijekantanaa. Ari rotsikanateeyanakarini joreririri. ²¹ Ikanteejakirini: —Kyaaryo iroñaaka nomonkaatakiro iroka noñaanatakimirika, naaka okenkithatakotzi.

²² Ikanta iñaaperoeyawitakarini kameetha Jesoshi, eejatzi iñaaperoeyakironi okaatzti ikantakiriri. Roojatzi rojampitawakaeyakan:

—¿Kaarima itomiranki Josee?

²³ Ikantakiri:

—¿Pitheenkatyanama? Naamaashita pikantenami: “Ajaaty, powawijaakoteritya pinampijatzipero eerori. Nokemakotakimi pitajonkantaki janta Kaperinawooki, iroñaakakyapitajonkantetya eejatzi jaka anampikika”.

²⁴ Omaanta nokamantemi pameteeyaaawoni eerokapaeni pitheenkaeyirini pisheninkapero: tee piyotzi pipinkathatziri riori, omaantakya paashinijatzi rirotaki pikoyiri pipinkathateri. ²⁵⁻²⁶ Kyaaryo iroka nokamantemiri: paerani eenironi ijekini Iriiyashini, piyoteeyakini tee opariyini inkani. Tema paerani osheki ojarentsitakini. Okaatzi 3 ojarentsi eejatzi 6 kashiri, tee opariyanee inkani. Itasheyeyanakini maawaeni jeekatsiripaeni kipatsiki. Eejatzi ojeeki osheki kamayiteentsirini oemii jaka, omaanta rotyaantakiri Tajorentsi Iriiyashi paashininki kipatsi owaero Jeniishiya. Rotyaantziri riyaatashitero kamatsiri oemini jeekatsiri janta Jareepetaki, okaakintawo Shiroo. Itajonkawentapiintakiniro owanawo. Omaanta jeekatsiri jaka inampiki, tee itajonkawentziniro. ²⁷ Eejatzi, paerani ijekantakari Eriseeyoni riraga kamanantzirorini iñaani Tajorentsi, ijekini jaka osheki patheenkarai, omaanta tekatsi retsiyatakote. Apatziro retsiyatakotakiri shiiryajatziiitchari Naamaani. Tema raapatziyari Tajorentsi.

²⁸ Ikemaeyantawakarini piyoteeyeencharini, ikijeeypaperotanakan.

²⁹ Roojatzi ikatziyeyantanakan, ragaeyakirini, shepik. Raanakiri janta othapiiteki nampitsi, ojeekinta impeeta. Rotatsinkantyaaririm, ³⁰ omaanta tee imatziri, tee iñaawakiri tsikarika ikinanawo.

Ipiyanaa Jesoshi Kaperinawooki

(Mr. 1.21-28)

³¹ Ari ipiyanaa Jesoshi Kaperinawooki karireeyawero. Saawaroki ryota-gaeayakirini atziri. ³² Riraga atziripaeni rotsikanateeyanakarini, ikantawagaeyanakan:

—Tema okameethatakri iroka ryotaakaera. Ikimiwitakari pinkathari: rooma ryotaaperotakae kameetha.

³³ Ari ijekaki pankotsiki janta ipiyotantapiintarira joriyyopaeni shiram-pari kyaantariri kamaari. Icherayimotawakiri, ikaemakotawakiri:

³⁴ —Eeroka Jesoshi poñaachari Najareeteki. Niyotakimi: eeroka Itomipero Tajorentsi riraga kameethaperotatsiri. ¿litaka pipokashitantanari? ¿Pikowawitama pookena janta otsiteniperotzinta?

³⁵ Iñaashintsithatakri Jesoshi, ikantakiri:

—¡Pimaerite! Pishitowantaneeyari irira shiramparira.

Roojatzi rotyaantanakari shirampari kipatsiki, teree, roojatzi rookantanaari. Tekatsi ikantanakiri shirampari, rioperotanee.

³⁶ Rotsikanateeyanakarini eejatzi ikanteeyanakini:

—Piñaakir: apatziro iñaanatakiri kamaari, roojatzi ishitowantanaka. Osheki ipinkatharentsitaki, osheki itajonkantzi.

³⁷ Ikanta ikemakoeyakirini Jesoshi maawaeni jeekatsiripaeni jaga.

Retsiyatakotakiro Jesoshi riyote Peetero

(Mt. 8.14-15; Mr. 1.29-31)

³⁸ Roojatzi ishitowantana Jesoshi pankotsiki ipiyotantapiintarira joriyy-opaeni ryaatanaki ipankoki Shimo. Ikanteetawakiri:

—Omantsiyatzaa riyote Shimo, osheki ojaawamerikitaki. Petsiyatako-teero.

³⁹ Roeyotashitapaakawo, ikantapaakiro:

—Ari opeyaneeya pijaawamerikiri, petsiyatakotanee.

Roojatzi opeyantanaa, tekatsitanee; okatziyanaka, opaeyawakirini rowanawo.

RetsiyatakotayatKirini paashinipaeni atziri

(Mt. 8.16-17; Mr. 1.32-34)

⁴⁰ Ikanta itziryaanee oorya. Ramaetapaakiniri Jesoshi osheki mantsiyari inashitachari imantsiyarentsite. Ipampiteeyawakirini, retsiyatkoeyawakirini. ⁴¹ Eejatzi rowawijaakoyitakirini osheki kyantaariri kamaari. Riraga kamaariipaeni riyotawakirira Jesoshi rirotaki Rotaantanevo Tajorentsi rootaki ikaemaeyantanakan, ikanteeyini:

—Eeroka Itomi Tajorentsi.

Omaanta riraga Jesoshi ro romaeryaantakariri, tema ikantanakitziiri:

—Pimaerite, eero pikamantakotana.

Roojatzi rookantanaari rirori atziripaeni.

Rowaaganaa Jesoshi paashinikipaeni nampsiti

(Mt. 4.23-24; Mr. 1.35-39)

⁴² Okantaka okitejitanaki ryaatanaki Jesoshi janta tekatsinta jeekatsini. Omaanta ikowakowaeyanakirini atziripaeni. Iñaantaariri, ikanteeyawita-paarini:

—Eero piyaatee, pijeeki jaka Kaperinawooki.

⁴³ Omaanta ikantanakiri Jesoshi:

—Eero nojeeki. Nokowaki nokamanteri paashinipaeni atziri ipinkathari-wenteeyerini Tajorentsi, tema okameethatzi riyoteeyeroni riroripaeni. Rootaki rotyaanantakinari Pawa.

⁴⁴ Ikantaka ikinakinayitanakini Jesoshi janta Karireeyaki, ikenkithataka-gaeyakirini atziri janta pankotsikipaeni ipiyotantapiintarira joriyyopaeni.

5

Riraga Shimo ishryaataki osheki shima

(Mt. 4.18-22; Mr. 1.16-20)

¹ Paashini kitejiri ikenkithatzi Jesoshi janta othapyaaki inkaare iitachari Jenejareete. Iiteetziro eejatzi Karireeya. Itsitachonchoeteeyapaakani atziripaeni, ikowaeyakini ikemero iñaani Tajorentsi. ² Ikanta Jesoshi iñaakiro apite pitotsi janta othapyaaki. Tekatsi otetantyaawoni: riraga shiryaatatsiri iki-watziiro ishryaamento iñaaki. ³ Rotetaka Jesoshi ipitoki Shimo, ikantakiri:

—Shimo, potyaantero eechonkiini niyanyaani pitotsi.

Ari ijeekakotaki, ryotagaeyakirini piyotencharipaeni othapyaakininta.

⁴ Ithonkantakawori ryotagaeyakirini, ikantakiri Shimo:

—Piyaate janta ojaanaatakinta, pishiryaate.

⁵ Rakanakiri:

—Iyotaanari, nokitejitatokowitaka noshiryaatzi inkaaganki, tekatsi naaneente eechonkiiniroña. Iroñaaakaka pikantakinaka, aritaki niyaataki noshiryaataa ejatzti.

⁶ Ikantaka ishiryaataatzi: raaperotaki osheki shima monki, monki. Yeekitaki ishiryaamentoki, rooteentsi otzijagaanakimi. ⁷ Ikaemawakotakiri iyempiyaminthari jeekatsiri paashiniki pitotsi ikantziri: “Pipoke pamitakoteeyenani”.

Roojatzi ipokakotanteeyapaakani, rotetakotakiri terori, terori; yeekitapaaki apite pitotsiki, roowiteenchami otsitsiyankimi. ⁸⁻¹⁰ Ikaatzi osheki shima raaki, antawo ikenkithashiryaakotanakawo okaatzika iñaakir; Peetero eejatzti ikimiteeyakan iyempiyaminthari: riraga Jantyaako eejatzti Jowa. Rirotaki itomi Sewereeyo. Itsipatapiintari Shimo ishiryaatapiintziri shima. Rotziwerowashitanakari Peetero Jesoshi, ikantanakiri:

—Nowinkatharite, potsipareena. Tee nokameethaperotzi naaka, eero pitsipatana.

Rakanakiri Jesoshi:

—Eero pithaawantana. Eenitatsi nokamantemiri: eerokataki shiryaawitariri shima, omaanta iroñaa ka eero pishiryaataneeri shima, inta paapatziyakaapiinteeyaarini atziripaeni Tajorentsi.

¹¹ Ikanta raatakoeyapaani, roojatzi rookaeyantanakawoni ipitopaeni, ishiryaamentopaeni, maawaeni. Royaateeyanakirini Jesoshi.

Retsiyatakteeri Jesoshi patheenkari

(Mt. 8.1-4; Mr. 1.40-45)

¹² Paashiniki kitejiri janta nampitsiki ari ijeki Jesoshi roojatzi ipokantapaaka shirampari pathaaperotatsiri: othonkakiri ipathaawo. Iñaantapaakariri Jesoshi, rotziwerowashitapaakari, ikantziri:

—Nowinkatharite, tema eeniro pitajorenka: pikowakirika petsiyatakotena, aritaki pimatakiro.

¹³ Roojatzi rowaankantawakawo rako rirori, ipampitawakiri. Ikantziri:

—Nokowaki. Petsiyatakote.

Intsipaete opeyanaka ipathaawo. ¹⁴ Roojatzi ikantanakiri:

—Eerowa pikamantakotana. Apatziro piyaatanaki janta ñaanakowenantsiriki, poñiaagapaeyaari riyotantyari etsiyatakoteemi. Pimonkaatero ikantakirini Moeseeshi: “Paanakiniri ñaanakowenantsiripi pipira itayeniri Tajorentsi riyoteeyantyaarini atziripaeni etsiyatakoteemi”.

¹⁵ Omaanta eekiro ryaatatayee ikamantakoeyakirini Jesoshi. Oshekiniroña atziri ryaatashiteeyawitakarini raapatziyarimi, eejatzti osheki ikowaeyawitani retsiyatatakantyaaririmi. ¹⁶ Omaanta ryaatanaki rirori janta tekatsinta atziri ipanko, ikenkithatakayeri Iriri.

Retsiyatakteeri Jesoshi kijopookitatsiri

(Mt. 9.1-8; Mr. 2.1-12)

¹⁷ Paashini kitejiri ryotaantee Jesoshi pankotsiki. Ari ijekayitakini okaakini warijeeyopaeni eejatzti iyotaantzirori Iwaperite Tajorentsi: ipoñayitanakani osheki nampitskipaeni, janta Karireeyaki, Joreeyaki, eejatzti poñayitaneecharini Jerojareeki. Tema eenitatsi itajorenka Awinkatharite imatantawori retsiyatatakantzi. ¹⁸ Okaakitapaaki shiramparipaeni, ramakoeyakirini kijopookitatsiri. Ikowaeyawitakani raanakirimi janta ijekakinta Jesoshi, omaanta tekatsi ikinakaanakiri, rotzikagaeyakirini atziripaeni. ¹⁹ Tekatsi ikini ikyappaaki, rootaki rateetakaantanakariri opatzitoki pankotsi. Rothataakotakiri imoontakiro

ijeekakira Jesoshi, roojatzi royiitakotakiri kijopookitatsiri. ²⁰ Riyotawakiri amakiriripaeni raapatziyeeyakarini, rootaki ikanantawakariri:

—Niyompari, ari nopeyakotemiro kaari kameethatatsi pantawitari, aritaki nowawijaakotemi.

²¹ Ikantaka ikenkithashireeyanakan i warijeeyopaeni eejatzi iyotaantzirori Iwaperite Tajorentsii: “Tee okameethatzi iroka: itajorentsitsashitaka. Apaniroeni Tajorentsii rowawijaakotantzi”.

²² Omaanta riyotakotakiri Jesoshi ikenkithashireeyayarini riroripaeni, roojatzi ikanantanakari:

—¿litaka pikenkithashiryaaantari pajankaneki: “Itajorentsitsashitaka”?

²³ Aririka nokanteri irika: “Netsiyatakoteemi iroñaaka, pikatziyatziyawae-tanaki”, tema ari potsikanatanakaari. Eerorika imatziro ipiriinta, ari pishirontawentanakina naaka. Omaanta ari kameetha pikantanaki tekatsi shirampari materoni rowawijaakoteri atziri kaari kameethatatsi rantziri. Kameetha pikante. Tema piitashiwitaka nokantashitari: “Nowawijaakotemi, eero nokijawentzimiro kaari kameethatatsi pantziri”.

²⁴ Nopoñaaka naaka jenokinta, nokoñaatapaaki jaka kipatsikika. Nokowaki piyoteeyeni eenitatsi notajorenka, eejatzi nomatakiro nokamintheeri antzirori kaari kameethatatsi, nowawijaakooyerini.

Roojatzi ikanantanakari kijopookitatsiri:

—Iroñaaka nokantemi: pikatziyanaki, paaneero pimaamento, piyaatee pipankoki.

²⁵ Iñeeyawakirini ikatziyanaa, raaneero imaamento, jatanee ipankoki. Ikantanaki:

—Ariwee, tema ikameethaperotaki Tajorentsii.

²⁶ Ari rotsikanateeeyanakarini atziripaeni, ikanteeyanakini:

—Tema ikameethaperotaki Tajorentsii, ipinkatharitaperotzi. Tee añaapiintziro iroka añaakirika iroñaaka.

Royaatanakiri Rewii Jesoshi, tema rirotaki piyotawitanariri pinkathari iyorikite

(Mt. 9.9-13; Mr. 2.13-17)

²⁷ Roojatzi ishitowantanaa Jesoshi, roojatzi iñaantapaakari Rewii, riraga piyotayitziniriri atziri iyorikite, ipantyaariri pinkathari. Ijeeki janta pankotsiki ipiyotapiintzirira koriki, rojankinatapiintzinta. Ikantapaakiri:

—Thame poyaatanakina.

²⁸ Ipakaanakiro rojankinatakotayitzirini koriki, rookanakiro maawaeni, ikatziyanaka, royaatanakiri Jesoshi. ²⁹ Riraga Rewii raanakiri irira ee-jatzi ryotaanewo janta ipankoki. Roojatzi ikaemakaantakiri paashinipaeni piyotziniriri pinkathari iyorikite, eejatzi paashinipaeni atziri, rowakagaeyakarini. ³⁰ Ipokapaaki warijeeyopaeni eejatzi riraga iyotaantzirori Iwaperite Tajorentsii ikiñaanikowentakiri rrirori: ikantakiri ryotaanewo:

—Pamineritya Jesoshi: itsipateeyakarini piyotziriri iyorikite oroomajatzi, rowaeyani, imiriyyini. Eeniropo eejatzi paashinipaeni kaari kameethatatsini. Tee okameethatatsi itsipateeyaaarini rowakagaeyaaarini.

³¹ Ikantawakiri riraga Jesoshi:

—Riraga kaari mantsiyatatsiri tee ikoyi aawinantsatsiri raawinteri. Intakya mantsiyatatsiri rirotaki kowatsiri. ³² Tee riro nopolashitziri kameethatzinkari omaantakya nopolashitziri riraga kaari kameethatatsi, ryotanteeyariri Tajorentsii eejatzi raapatziyari.

Rootaki ikantziriri rrirori warijeeyopaeni.

Rojampitakiri ñaanakowenantsatsiri: “¿litaka kaari itzitanta piyotaanewo?”

(Mt. 9.14-17; Mr. 2.18-22)

³³ Ikantakiri warijeeeyopaeni Jesoshi:

—Pamine, itzitapiinta riyotaanewo Jowa, eejatzi ikenkithatakaapiintziri Tajorentsi: eejatzi ikimiteeyakarini riyotaanewo warijeeyo. Omaanta ri-raga piyotaanewopaeni pashi tee itzitawo; inta rowapiinteeyani, rirapiinteeeyini.

³⁴ Rakanakiri:

—Aririka raye shirampari iina, ikaemaeyerini isheninkapaeni ikimoshirewenteeyantyaaririni. Aririka rareeteeyakyaani, ¿arima itziteeyapaakyaani? Eero. Eejatzi naari, nokaateeyirini iroñaaka niyotaanewopaeni: ¿litaka notzitakaantyaariri? ³⁵ Rooma rookaeyaneerini isheninka aatsiri iina, roojatzikya itziteeyantanakyaani. Eejatzi nokimiwitaka naari: aririka iinja nokame, ari rowashiretakoeyanakinani niyotaanewo, roojatzikya itziteeyantanakyaawoni rirori.

³⁶ Eejatzi roshiyakaawentziri iroka; ikantziri: “Eejatzi, eenitalsirika atziri iithaari owakirari, eero itzijagaero owawatawo eechonkiini rowawatatanntyawori antyashipawopooki imaatha. Aririka powawatatero, eero omonkaatawakaana. Eejatzi pikiwerorika aminthamawotanakyaarika owakirari, eejatzi eekiro iyaatanakitye oshipaanaki itaworipooki. ³⁷⁻³⁸ Tema apyaaganantawo owakirari pyaarentsi imashiki owakirari, roojatzi ashirikakotantakyaawo eero apaantanta. Aririka oshimowanaki oshinchaatanakirika, otapiyaperotakiri imashi. Riroriка owakirari, eero ipejakotzi, eejatzi eero apaata oowaa. Roorikami apyaaganantyawompi pyaarentsi itawori imashi, tema itapiyamootzitanakirika itonkanaki: pooo. Tziaanaki, eejatzi apaatanakya pyaarentsi. ³⁹ Tema aririka ireeyeroni itaworyaateentsiri pyaarentsi, eero akoyiro irero owakirari”.

6

Ikantawakaanteeyakawoni kitejittatsiri saawaro

(Mt. 12.1-9; Mr. 2.23-28)

¹ Apaani saawaro, ikinanaki Jesoshi teriikomashiki, itsipatanakari riyotaanewopaeni. Irirapaeni ithatyayitakini apaanipaeni okithoki teriiko, ramirokakitatiro, okaankikitanaki okithoki, rowaeyakawoni. ² Iñeeyakirini warijeeypaeni, ikantakiri:

—Tee okameethatzi iroka pantziri. Tema iroka saawaro, kitejittatsiri amakoreeyantarini, eero atayaantawo iroñaaka. ¿litaka panantakawori?

³⁻⁴ Rakanakiri Jesoshi:

—Tema tee piñaananeentziro rojankinatakoteetakiririni Iraviri. Aantakariri itasheni eejatzi itsipateeyarini. Eenitalsi janta ipankomawoki Tajorentsi paa riwetsikaetziniriri irira. Apaniroeni rowaeyawoni ñaanakowenantatsiripaeni, tee oshinetziri Iwaperite Tajorentsi paashinipaeni royaawo. Omaanta rashironkaantawitakari, aantawitakariri itashe Iraviri, rootaki ipantakariri paa riraga iwinkatharite ñaanakowenantatsiri, eejatzi ipaeyakirini maawaeni oyaateeyiririni. Ñaakiro, tema tee ikowakayiru rowashironkaeya itasheyi. ⁵ Nopoñaaka jenokinta, nopokapaaki jika kipatsikika, nokoñaatapaaki: tema naaka kantatsini oetarika anteri saawaroki.

Retsiyatakotakiri kijopookiwakori

(Mt. 12.9-14; Mr. 3.1-6)

⁶ Paashini saawaro ryaatanee janta pankotsiki ipiyotantapiintarira jori-iyopaeni, ikyappaaki riyotaantapaaki irirapaeni. Ari ijekaki janta shirampari kijopookitsiri rakopero. ⁷ Rotsikanaperotakari iyotaantzirori

Iwaperite Tajorentsi eejatzi warijeeyopaeni, ikowaki riyoteri aririka retsiyatatakotante saawaroki, ikantakotantyaariri iwinkathariteki: "Noñaakiri Jesoshi rantakiro kaari kameethatatsi".⁸ Omaanta riyotakiri Jesoshi ikenkithashireeyakarini. Ikantanakiri kijopookiri rako:

—Pipoke, pikatziyapae jaka niyankika.

Roojatzi ikatziyantanaka, riyaatashitakiri.⁹ Ikanteeyakirini rirori:

—Iroñaaka nojampiteeyemini. ¿Oetaka kameethatatsiri anteeyerini saawaroki? ¿Kameetharinima akaminthayeri atziri? Teerika okameethatzi, ¿pikowatziiima owashironkaeri? ¿Kameetharinima owawijaakoteri atziri? Teerikama okameethatzi, ¿pikowatziiima owamaeri?

¹⁰ Ramineeyakirini Jesoshi, imaeeriyakini. Roojatzi ikanantanakari:

—Powaankaero pako.

Roojatzi rowaankantanakawo, kameethatanee rako.¹¹ Omaanta ikijaper-oeyanakan iñaanakowenantsirsipaeni. Ikantawakaeyanakan:

—¿Tsika akanterika owamaakaanantyaariri?

Riyoantakariri Jesoshi riyotaanewopaeni

(Mt. 10.1-4; Mr. 3.13-19)

¹² Paashini kitejiri riyaataki Jesoshi tonkaariki, ikenkithatakaantyaariri Iriri. Ari ikitejitakotakaakiri ikenkithatakayiri.¹³ Ikaemaeyakirini oyaateeyakiririni, riyoanteeeyakaririni¹⁴⁻¹⁶ 12 riyotaanewopero. Ikowaki rotyaanteri iinja ikenkithatakantyaawori iñaani Tajorentsi, rootaki iitantariri rotyaantanewo Jesoshi. Iroka iwaeropaeni: Shimo (eejatzi iitziri Jesoshi Peetero), Antereeshi (riraga rirentzi Shimo), Jantyaako, Jowa, Jiripi, Waritoromee, Mateeyo, Tomashi, Jantyaako (riraga itomi Arijeeeyo), Shimo (riraga kathaaperotzinckari antayitzirorini oetarikapaeni), Joorashi (riraga rirentzi Jantyaako) eejatzi Joorashi karyootejatzhi (riraga akaanterini iinja Jesoshi). Rootaki iwaeropaeni riyotaanewo riyoakiri Jesoshi.

¹⁷ Roojatzi roerinkapaa janta okameethapatheeteeyenta. Ipiyotakanta osheki riyotaanewopaeni, eejatzi osheki paashinipaeni atziri: ipoñeyakani Joreeyaki, Jerojareeki, Tziiroki, eejatzi Shirooki. Ojeeki Tziiro eejatzi Shiroo intenea, janta othapyaaki antaworoña inkaare. Riyaatashiiyakirini Jesoshi ikemijanteeyawakirini, eejatzi ikowaeyakini retsiyatakoeyeni maawaeni mantsiyariipaeni.¹⁸ Rowawijaakoeyakirini kyaanttariripaeni kamaari.¹⁹ Ikowaeyakini maawaeni ipampiteeyapaakirini, itajonkakowenantyaariri retsiyatatakotantaneeyaari imantsiyatakira.

Ikenkithatakotakiriri Jesoshi kimoshireteeyatsirini

(Mr. 5.1-12)

²⁰ Riraga Jesoshi ramineeyanakirini riyotaanewopaeni, ikantakiri:

—Aririka pashironkaawitakya iroñaaka, pikimoshirete: aritaki ipinkathariwenteeyemini Tajorentsi.²¹ Aririka pikoyi pantero oetarika ikowaakimirri irira, pikimoshirete: aritaki ramitakotakimi pantero. Aririka powashiretawitakya iroñaaka, pikimoshirete: aritaki ikimoshiryaaakagaemi rirori iinja.²² Aririka ikijeyemini atziripaeni panantawori okaatzi ikowaakimirri Tajorentsi, eerorika ikowaeyimini itsipateeyimini, imaninteeyeminirika ikantemi: "Tee pikameethatzi". Eejatzi ikijanteeeyemironirika paapatzianaka, omaanta ikimoshiryaaakayemi Pawa. Tema nopoñaaka naaka jenokinta, nokoñaatapaaki jaka kipatsikika.²³ Aririka ikijeyemini, pikimoshireperote, pikanteeyeni: "Kameethawee". Tema aritaki kameetha ipinaperotemi Pawa jenokinta. Kyaaryo riraga itakaantaworini ikijeyakirini riraga kamanantayitzirorini iñaani Tajorentsi paeraniperoroña.

Ikenkithatakotakiri Jesoshi ashironkaachani iinja

²⁴ Eenitatsi paashini eejatzi ikantakiriri Jesoshi:

—Omaanta riraga ashaagantachari, ikimoshirewentziro rowaagawo iroñaaka: monkaataka, rowashironkaeya rirori iinja. ²⁵ Eejatzi rowashironkaeyani iinja riraga kimoshirewenteeyawitaworini iroñaaka rowanawopaeni, tema ari iñaakiro iinja itashe.

Rowashironkaya iinja shironteeyacharini iroñaaka: iinja rowashire-teeyanakyaani eejatzi riragaeyaani. ²⁶ Aririka iroñaaka iñaaperoeyemini maawaeni atziri, iinja osheki pashironkaeya: tema riraga itakaantaworini paerani iñaaperoeyashitarini riraga amatawiteeyiririni.

Ikowaki Jesoshi anintaperoteri kijayiteerini

(Mt. 5.38-48; 7.12)

²⁷ Eejatzi ikanteeyakirini riraga Jesoshi:

—Pikemijanteeyawakinani nokantemiri: pinintaperoteri eeroka kijeeylimirini, pikaminthayeri. ²⁸ Pamaneri Tajorentsi ramitakooyerini maawaeni kantzimateeyakimirini, eejatzi maawaeni kijeeylimirini.

²⁹ Aririka ipajawootemi, pishineteeyaari ipajawootemi eejatzi jakakiroka. Aririka raapithatemiro pipewiryaakogo, piperi paashini piithaari eejatzi. ³⁰ Aririka ramanakotemiro oetarikapaeni, piperi. Aririka raapithatemiro powaagawo, eero pikowakoteeri eejatzi. ³¹ Aririka pikowaki ikaminthayemi paashinipäeni, eejatzi eerori pikaminthayeri irirapaeni.

³² Apatzirorika pinintaperotashiteeyarini maawaeni nintaperoyimirini eerori, tema monkaataka okaatzika pantakiri: tekatsi ikantya ipinatemiri Tajorentsi. Tema riyotzitari riraga kaari aapatziyariri rirori inintaperoyakirini riraga nintaperoyiririni rirori. ³³ Eejatzi okimitaka roori: apatzirorika pineshironkatashityaari neshironkapiintzimiri eerori, tema eejatzi monkaataka okaatzika pantakiri. ¿Itaka pikoyiri ipinatemiri Tajorentsi? Eejatzi riraga kaari aapatziyari Tajorentsi ikamintheeyirini kammintheeyiririni rirori. ³⁴ Aririka pikowaki roepiyeemi pipakiriri atziri, tema monkaataka: ¿pikenkithashiryaakama ipaemi eejatzi Tajorentsi? Tema eejatzi ipakiriri riraga kaari aapatziyari irira oetarikapaeni, eejatzi ikowaki roepiyeeniri okaatzti ipawitariri. ³⁵ Rootak nakanantakimiri pineshironkaeyerini eeroka kijeeyakimirini, pikamintaante, pipashitayitaarini ashironkaenkari: eero pikenkithashirya aririka imatero roepiyeemi. Aririka pantero iroka, aritaki ipinataperotakimi Tajorentsi kameetha, eejatzi itomintaperoeyemini. Tema kameetha ipinkathariwenantzi rirori janta jenokinta. Kyaaryo ikamintheeyakirini piyaathateeyawitaririni, riraga kaari kameethateeyatsini. ³⁶ Ineshironkataperotantzi Tajorentsi: eejatzi pikimitakoeyaarinii eerori pineshironkatante.

Eero pikantawentziri paashinipaeni

(Mt. 7.1-6)

³⁷ Eekiro ryaatatyye ikantakiri Jesoshi:

—Eero pikantakowentashitari atziri, eejatzi eero pikantahitari: “Eeniro rantani”, ikantzimikari Tajorentsi: “Eeniro pantani eerori”. Eero pikijawentziri atziri rantayitzirini inta pikaminthayeri: panterorika iroka eero ikijawentzimiro riraga Tajorentsi pantayitzirini eerori, inta ikaminthayemi.

³⁸ Aririka pipayiterini ashironkaenkari koetyeemotayitaririni, eejatzi ikimiteemi rirori Tajorentsi: ipayitemironi maawaeni koetyeemotayitakimirini eerori. Noshiyakaawentemiro: tee ithañaaneentawo ipaperotemi; inta

kameetha rotenakero, ipatzitakotero, rowintaaperotero, ranonkayitakaaneentakawo ipashitemiri. Omaanta aririka eechonkiini pikaminthaante, eejatzi eechonkiini ikaminthayemi eerori. Aririka pikaminthaantaperote osheki, eejatzi osheki ikaminthaa peroetemi eerori.

39 Roojatzi roshiyakaawentakiniriri Jesoshi, ikantakiri:

—¿Arima imatakiro kaari kokichaatatsi rakathateri ikaateeyinira paashini kaari kokichaatatsi itentawakaya? Eero imatziro: eenitatsirika omoo jaga, tema ari ipariyeeyakini. **40** Apaani riyotaanewo tee ranaakotziri iyoteeriri riyoperote. Omaanta aririka ithonkakiro rishitooryataperotaki, aritaki ikimitakotanakyaari iyoteeriri. **41** ¿litaka pikijawenantariri pisheninka rantayitzirini? Piyotakotawakyaata eerori aamaashitya erokarika maperotakirori kaari kameethatatsi, eeniro osheki pantani. Okimitaka pikantawitakaririra pisheninka: “Otyaakyataakimi opaneki kipatsi”, omaanta eerori, eeniro tyaakyataakimi antawo inchapanki, konompyaatoteencharira pokiki. **42** Okameethatzima pikantaki: “Ajaaty, nosheninka, nagaemiro pityaakyawo”. Tema piyotakotya eenitatsi inchapanki otzikaakimiri eerori pokikira. ¿Tsika pikantyaaka paanteeyaanariri ityaakyawo pisheninka? ¡Pamatawitantaki! Pikowawitaka pikimitakotyaarimi kameethaperotzinkari. Ñaakiro, pityaawo pookiro eerori antawowa inchapanki konompyaatoteencharira pokikira, roojatzi paminaperotaneerika, ari pamitakoteri pagueniri ityaakyawawa pisheninka rokikira riori.

Inchato kameethari eejatzi inchato kaari kameethatatsi

(Mt. 7.17-20)

43 Eenitatsi paashini roshiyakaawentakiniriri Jesoshi, ikantakiri:

—Aririka okameethate inchato, eejatzi okimitzitaka okithoki roori okameethataki. Rooma teerika okameethatzi inchato, eejatzi okimitzitaka okithoki roori tee okameethatzi. **44** Aririka añaero okithoki inchato ayotzi tsika okantari inchato roori. Tema rootaki ayoteeyantaworini inchato rooperori, aririka okameethate okithoki. Aririka pikowaki pithechochoki, ¿arima piyaatagi janta kawanaki? Eero piyaatzi, tema piyotakiro tee okithokitawo komashiki kawana; eejatzi okimitzita tsikontochee eero okithokitziro oowa. **45** Aririka akenkithashireero kameethatatsiri, akenkithatayiteroni kameethatayitatsiri. Aririka akenkithashireero kaari kameethatatsi, akenkithatakotayiteroni kaari kameethatatsi. Tema añaawaetantakityawo akenkithashiryaayitarini.

Owatzikantakari apite pankotsi inashitachari kipatsi

(Mt. 7.21-29)

46 Eekiro riyaatatyee ikantakiri Jesoshi:

—¿litaka pikantashiwaetantanari: “Nowinkatharite”? Tee pikemijantaperotana. **47** Iroñaka noshiyakaawentemiri tsika ikantari aapatziyanari. Ikemawakiro noñaani, ikemijantaperotanakiro: ranteeyakironi maawaeni nokantakiriri. **48** Ikimitakarini atziri wetsikirori ipanko. Ikiyashiperotakiro inthomaenta, royaankakiro tzinkamintsipanke ityaakitakotakiro kameetha, kijoperotanaki. Okantaka opariyaperotaki inkani roojatzi amaanitapaaaka iñaa. Otatsinkawitapaakawo antawo amaani, omaanta tee aawiyiro: rooma kijoperotaki kameetha tzinkamintsipanke. **49** Omaanta riraga kaari kemijantaperotanari ikimitakari shirampari wetsikawitachari ipanko, tee ikiyashiperotziro inthomaenta, eejatzi tee ityaakitakoperotziro kameetha. Okantaka osheki amaanitapaaaki iñaa roojatzi otyaanakawo ipanko ayitanakiri, tee añagaero.

Rootaki ikanteeeyakiririni Jesoshi.

7

*Retsiyatakotakiri Jesoshi ronampiri kapitaano
(Mt. 8.5-13)*

¹ Eejatzi ipiyanaa Jesoshi janta Kaperinawooki. ² Janta nampsiki ari ijeeki kapitaano. Rirotaki oroomajatz, kaari joriyo. Ikantaka imantsiyataki ronampiri, roowiteencha ikamemi. Riraga kapitaano osheki intaperotziri ronampiri. ³ Ikemakotakiri Jesoshi itajonkantaki, roojatzi rotyaanantakariri aataperoteenchari joriyopaeni ikantakiri:

—Pikamtakiteri Jesoshi ipokanakiita jaka retsiyatatakitenari nonampiri.

⁴⁻⁵ Ikantaka rareeteyapaakarini, ikantaperoeyapaakirini:

—Piyaatashiteri. Ikameethaperotzi riraga kapitaanonta, osheki ininteevakaeni aaka joriyopaeni. Riwetsikakaantakaeniro pankotsi apiyotan-tapiintyaari. Okameethatzzi petsiyatakoteniri ronampiri.

⁶⁻⁷ Roojatzi royaateeyanakirini. Okaakitapaaki inampi, itonkiyotawakari paashini rotyaanantane wo kapitaano. Iкамантапааки, ikantziri:

—Eenitatsi iroka ikantakiri nowapitaanote: “Nopinkathataperotakimi, rootaki kaari niyaatanta notonkiyotemi. Rooma naaka tee nokameethatz, rootaki kaari nokowanta pipoke nopankokika. Niyotaki pikowakirika pet-siyatakoteri nonampiri, aritaki retsiyatakote. ⁸ Eejatzi naari eenitatsi kantaner oetarika nanteri, eejatzi nokimitzita naari nojorarote enitatsi nomperateeyakarini. Nokanteririka joraaro: ‘Piyaate’, ari riyaatanaki. Nokanteririka: ‘Pipoke’, ari ipokanaki. Eejatzi nokimitziri nonampiri riori, aririka nokanteri: ‘Iroka panteri’, ari rantakiro”.

⁹ Ikemantawakawori Jesoshi okaatzi ikantakaantawakiriri, ari rotsikanatanakari. Roojatzi ipithokashiteeyantananakarini oyaateeyakiririni, ikanteeyanakirini:

—¿Pikemakiroma iroka ikantakirika riraga oroomajatz? Tektsi noñe no-joriyotzinkarite apaani kimitakotaarini riori: osheki rameentakina.

¹⁰ Roojatzi ipiyanteeyanaani rotyaanantane wo kapitaano ipankoki. Iñaapaatzii ronampiri, etsiyatakotanee.

Rowañagaeri Jesoshi kamawiteenchari janta Nayikinta

¹¹ Paashini kitejiri riyaatanaki riraga Jesoshi janta Nayiki, itsipateeyakarini ronampiripaeni eejatzi osheki paashini oyaateeyiririni.

¹² Rokaakinteevapaakawoni nampsitsi, roonthaakowentakari inatakoetapaakiri kaminkari, ikitateeterimi. Rinirowa kamaki roori oemi, eejatzi apintzite otomi tekatsi paashini. Oyaatakowentakiri otomini, etsipateeyarin osheki onampijatzi. ¹³ Iñaantawakawori Awinkatharite, osheki retakotawakawo, ikantawakiro:

—Eero piraakotari pitomi.

¹⁴ Riyaatashitakiro kajo inatakotanteetakiriri, ipampitapaakiro. Ikatziyakaapaakari natakotziriri. Ikantakiri Jesoshi kamaentsiri:

—Ewankari, pipiriintee.

¹⁵ Roojatzi ipiriinantanaa, ikotyaatanaka; ñaawaetanee. Roojatzi ikanantawo riniro:

—Irika pitomika añaanee.

¹⁶ Rotsikanateeyanakawoni atziripaeni iñaanteeyawakawoni, ithaawaeyanakini, ikanteeyanakini:

—Tema ikameethaperotaki Tajorentsi. Rotyaantakaeniri kamanantzirori-ni iñaani. Kyaaryo, itajonkawentakae, ikaminthagaeyirini aapatziyee-yaririni.

¹⁷ Roojatzi ikemakoeyantakaririni maawaeni joreeyajatzi, eejatzi oth-otyaanaka ñaagantsi paashinikipaeni nampitsi.

*Irira Jowa Kaawoshitantatsiri rotyaantakiri riyotaanewo Jesoshiki
(Mt. 11.2-6)*

¹⁸ Ikanta ikemakotakiri riraga Jesoshi riyotaanewopaeni Jowa, riraga kaawoshitakotziniriri Tajorentsi. Riyaatashiiyakirini, ikamantapaakiri rantay-itakirini rirori. Riraga Jowa, ikaemakiri riyotaanewo apite. ¹⁹ Roojatzi rotyaantakiri Awinkathariteki, ikantawakiri:

—Piyaatakite Jesoshiki, pojampitakiteri pikantteri: “¿Eerokama Rotyaantanewo Tajorentsi naamagaeyakarini? ¿Eeniroma paashini naamagaeyaarini?”

²⁰ Ikanta rareeteeyapaakarini rirori, ikantapaakirii:

—Rotyaantakina riraga Jowa, ikantana: “Pojampitakiteri Jesoshi: ¿Eerokama Rotyaantanewo Tajorentsi naamagaeyakarini? ¿Eeniroma paashini naamagaeyaarini?”

²¹ Omaanta tee rakawakiri rirori, inta rantzi retsiyatakotayitzirini os-heki mantsiyatayitatsirini, eejatzi rowawijaakotayitakirini osheki kyaantariri kamaari rajankaneki. Eejatzi raminakaayiteerini osheki kaari kochiataatsini. ²² Roojatzi ikantakiri rirorpaaeni:

—Iroñaaka pipiyanee pikamantapaeri Jowa okaatzira pikemakinari eejatzi piñaakotakinari nantziri. Pikamantapaeri naminakagaeyakirini riraga kaari kokichaawitacharini, nokatiyatizyatagaeyakarini riraga kijopookiwitacharipaeni, netsiyatakotagaeyakirini riraga pathaawitacharipaeni, nokemakagaeyakirini riraga amashitachari inthomaenta ikempita eejatzi nopiriintayitanerini kamawiteencharipaeni. Eejatzi niyotakagaeyakirini owashironkaawitacharipaeni tsika ikantya rowawijaakotanteeyaariri riraga Tajorentsi. ²³ Riweshiryakaakanakimi maawaeni kaari theenkanari naaka.

*Irira Jesoshi ikantzi: “Ikameethaperotaki Jowa”
(Mt. 11.7-15)*

²⁴ Ikanta ipiyeeyanaani riraga rotyaantanewo Jowa, omaanta eeniro ijekanaki Jesoshi ikenkithatakagaeyanakirini piyotawentakariri. Ikenkithatakotakanakiri riraga Jowa, ikanteeyanakirini:

—Paerani piyaatapiintzi janta tekatsinta atziri ipanko pikemijantapiintziri rirori. ¿Itaka piyaatashiteeyantakitaririni? ¿Rootakima piyaatashitantariri pikemijanteri ñaawaetashitachari? Tee iñaawaetashitashira.

²⁵ ¿Itaka piyaatashitantariperotariri piñeeri? ¿Piyaatashitantakitariri piñaakitzirima atziri kithaatawori owaneenkatachari kithaarentsi pinaperotachari? Teewee. Pamine, riraga kithaatawori owaneenkatachari isheninkatakari pinkathari, riweshiryawentawo rowaagawo jeekatsiri ipankoki pinkathari. Omaanta riraga Jowa tee ikimitakotari rirori.

²⁶ Ajaaty, pikamantena: ¿itaka piyaatashitakitziri? ¿Riroma piitziri kamanantzirori iñaani Tajorentsi piyaatashitantakitariri? Tema kyaaryo ikamanantziro, omaanta ranaakoperoyakirini paashinipaeni kamanantzirori iñaani Tajorentsi. ²⁷ Tema piyoteeyironi riraga Tajorentsi ikenkithatakotzitakarini rirori Iwaperiteki paerani, ikantzitakinari: “Notyomi, notyaanteri iinja jewatemini ikenkithatakapaakiri joriiyopaeni, ikanteri: ‘Pikenkithashireeyaani, pijeeki kameetha, eero pantziro paashini kaari kameethatatsi, paamayari Awinkatharite, kaakitaki’”. Kyaaryo, rirotaki riraga Jowa Kaawoshitantatsiri ojankinatakotziteetakariri paerani.

²⁸ Tema ranaakoeeyakirini irira maawaeni paashinipaeni kamanantatsiri: imatakiro maawaeni ikowakaakiriri Tajorentsi, rootaki iñaaperotantakariri

irira ikameethatzi. Omaanta iñaaperotaperotakiri kameetha Tajorentsi maawaeni ipinkathariwentaperoyeyirini.

*Ñaanakowenantsatsi itheenkaeyakirini Jowa eejatzi Jesoshi
(Mt. 11.16-19)*

²⁹ Ikanta ikameayakirini osheki atziri ikantakiriri Jesoshi. Ikemantakiriri, ikanteeyanakin:

—Kyaaryo, tema ikameethaperotaki Tajorentsi.

Eejatzi ikaateeyakirini kemaeyakiririni riraga piyotayitziririni iyorikite eekiro iperi oroomajatz, tema ikaawoshitakotayitawakinirini Tajorentsi Jowa chapinki. ³⁰ Omaantakya riraga warijeeyopaeni eejatzi riraga iyotaantayitzirorini Iwaperite Tajorentsi tee ikowaeyini ranteniri riori ikowakaawitariri: tema tee riyaatashitziri Jowa ikaawoshitakotantyaariri riori. Eejatzi tee inimotziri ikantawitariri Jesoshi. ³¹ Ikantzi eejatzi:

—¿litaka noshiyakaawenteniriri irikapaeni kaari raapatziyantana? Tee ikoyi ikenkithashiryaaenteeny. ¿litaka ikimitakari? ³² Irira noshiyakaawenteeyerini eentsi, ñaathawaeeteyacharini pankotsiki okaankiityeera. Ipoñaanaka apaani ikantanakiri: “Apaniroeni nojonkawaetawita omaanta tee poyaatana, tee pomampaawaeta. Nowashiretakotawitari kamaentsiri, omaanta eeroka tee pitsipateeyanani powashiretakoeyaarini”. ³³ Ñaakiro, riraga Jowa itzitapiintaka, tee ririro kachaja eejatzi paashini shinchaari, eekiro pikanteeyatzin: “Enitatsi iyamaarite pinkakaakiriri, rootaki kaari rowaperotanta, eejatzi kaari rirantawo shinchaari”. ³⁴ Omaanta naaka nopoñaaka janta jenokinta, nokoñaatapaaki jak akipatsikika, roojatzi nowapiintawita eejatzi nirapiintawita. Omaanta eekiro pikanteeyatzin: “Irinta owaagatzinkari, shinkitzinkari. Itsipatapiinteeeyakarini piyotapiintziniriri oroomajatz iyorikite, eejatzi itsipatapiinteeeyakarini paashinipaeni kaari kameethatatsi”. ³⁵ Omaanta nokantemi: “Riyotzi Tajorentsi ari okameethataki maawaeni ikowakaakinari; eejatzi maawaeni aapatzianari, riyotaki okameethataki ikowakaakinari Pawa”.

Riyaataki Jesoshi ipankoki Shimo riraga warijeeyo rakiyoteri

³⁶ Ikanta apaani warijeeyo iwaero Shimo, ikantakiri Jesoshi:

—Pipoke nopankoki, owaeyaani.

Rakanakiri:

—Jee, kaakitakina.

Ikanta riyaateeyanakin, ijekapaaki jeekamentotsiki. ³⁷ Ari ojeeki tsinani jak aampsitsiki antapiintawitawori kaari kameethatatsi. Oke-makotakiri Jesoshi, rowatya jaga ipankokinta warijeeyo, iyaatashitakiri ofñaakiteri. Aakotanakiniri kajankaari. Ro aakotantanakanari mapi kitamaari imokaetziri. ³⁸ Ojeekimotapaakiri okaakini iitziki Jesoshi. Iraaperotapaaka, opitenkantakari oyaaki iitzikira, oshetantanaari oeshi. Roojatzi othoyitzitanakiri iitzi, eejatzi ojeetantakari kajankaari iitziki. ³⁹ Iñaantawakawori riraga warijeeyo, ikenkithashiryaaanaka: “Riotakima Rotyaantanewo Tajorentsi, ari riyotawakiromi iroka tsinanika opampitakiri, eejatzi eeromi ishinetawomi opampiterimi iitziki”. Tema osheki antapiintziro kaari kameethatatsi. ⁴⁰ Omaanta riyotakiri Jesoshi okaatzi ikenkithashiryaaakari, ikantakiri:

—Shimo, eenitatsi nokantemiri.

Rakanakiri:

—Ajaatya, iyotaanari, pikantenatya.

⁴¹ —Noshiyakaawentemiri. Eenitatsi shirampari ikaatzi apite ireewitziriri. Apaani rireewitziri 500 tenaaryo, paashini rireewitziri 50 tenaaryo. ⁴² Irika apiteka atziri ireewitantatsiri tee imatziro ipinakowenteeyaa ireewitantatsiri. Ikantaka riraga rireewiteetziri ifñaakirira tee imatziro ipinateeri, rootaki ikantanakariri: “Iroñaaaka nokoyi netakotemi, eero pipinataana pireewiwitanaga, ikaanteekaata. Apaani rireewitawitakari ee-chonkiini, omaanta riraga paashini rireewitaperotawitakari. Pikantena: ¿ninka inintaperoetanakirika ashitariri iyorikite?”

⁴³ Rakanakiri:

—Naamaashitya riraga ireewitaperotawitakari, tema rirotaki ikamintaahaperotakiri kameetha.

Ikantanakiri:

—Kyaaryo okaatzi pikantakinari.

⁴⁴ Roojatzu raminantanakawo Jesoshi tsinani, ikantziri Shimo:

—Ñaakiro, inkaaganki nokyaapaaki jaka pipankokika, omaanta tee paakameethatawakina: tema tee pipawákina ifñaa nokiwantappaakyaworimi noetzi. Omaanta tsinanika, okiwantapaakinawo oyaaki noetziki, eejatzi oshetantakinawo oeshi. ⁴⁵ Piwethatantanari, tee pithowootana, omaanta roori, onintanintaatakiro noetzi. ⁴⁶ Tee pijeetantanawo noetki iyeenka, omaanta iroka, ojeetantakinawo noetziki kajankaari. ⁴⁷ Pamine, eeniro antayitawitakarini osheki kaari kameethatatsi omaanta nokaminthaakiro, eero nokenkithashiryaa koteero antayitzirini: tema rootaki onintaperotantakinari. Aririka nokaminthayeri antayitawitaworini eechonkiini, eechonkiini inintashiretakina rirori. Omaanta nokaminthaaperoteririka osheki eejatzi inintaperotzitena osheki rirori.

⁴⁸ Roojatzu ikantawakiro tsinani:

—Eeniro pantayitawitakarini, omaanta eero nokijantzimiro, eero no-kenkithashiryaa koteemiro eejatzi.

⁴⁹ Eeniro ijeekaeyakini owaeyeencharini, rojampitawakagaeyanakan:

—¿Tsikama iitätyaarika irika, ipeyakotakaantakanawori antzirori kaari kameethatatsi?

⁵⁰ Omaanta Jesoshi eekiro riyaatatzu ikantziro roori:

—Pameentakina, rootaki pawijakontaaari. Piyaatee kameetha, pi-weshiryaa perotaneeya.

8

Oyaateeyakirini Jesoshi tsinani amitakopiinteyeyiririni

¹ Roojatzu Jesoshi ikinakinayitanakini nampitsikipaeni. Ikenkithatakagaeyakirini atziri, ikamanteeyakirini:

—Rooteentsi ipinkathariwenteeyemini Tajorentsi.

Kijokiro rowakiri riyotaanewopaeni, ikaatzira 12, ² eejatzi oyaateeyakirini tsinanipaeni. Tema apaanipaeni roori ikyaatantawitakawo kamaari, eejatzi paashinipaeni omantsiyatashitawitaka omaanta retsiyatatakoeeyeroni Jesoshi. Owaero apaani tsinani Mariyya makaraarajato. Ikaatawita kamaari jeekantawitawori 7. ³ Eejatzi paashini oyaatziriri, owaero Jowaana, iina Kooja. Riraga Kooja, rirotaki amitakotziriri pinkathari Erooreshi. Eejatzi oyaatakiri Sosaana, eejatzi paashinipaeni tsinani. Iroka tsinanipaeni amitakopiinteyeyakirini Jesoshi, opapiinteyeyakirini koetyeemotakariri.

Roshiyakaawentziniri ookakitzirori okithoki teriiko (Mt. 13.1-23; Mr. 4.1-20)

⁴ Ipiyotawenteeyakarini Jesoshi oshekini atziri, roojatzi roshiyakaawenteeyakinirini ookayitzirorini okithoki teriiko, ikanteeyakirini:

⁵ —Riyaataki shirampari rookakitziro okithoki teriiko owantsiki. Apaanipaeni pariyapaentsiri awotsiki: raatzikayitakironi anashitayitacharini, ikanta ipokaeyapaakini konthwawopaeni rowaeyapaakawoni, ithonkaapaakiro pariyapaentsiri. ⁶ Paashinipaeni pariyapaentsiri mapimashiki. Oparithawitanaka eechonkiini, omaanta tee ashepathatakoperotzi, rootaki ojampishitantanakari, intsiapete okamaeyanakini. ⁷ Paashini okithoki opariyapaaki kitocheemashiki: oshookawitanaka, omaanta anaanakiro kitocheepaeni, rootaki okamantanakari. ⁸ Omaanta paashini opariyapaaki kameethariki kipatsi: oshookanaki kameetha, okithokitaperotanaki osheki.

Rootaki roshiyakaawenteeyakinirini. Roojatzi ishintsithatanakiro ipaante, ikanteeyanakirini:

—Eenitatisrika pikempita pikemantari, powayemptaperotyaawo iroka nokantakimirika.

⁹ Rojampieeyakirini riyotaanewopaeni:

—¿Oetaka kantakotachari poshiyakaawentziri inkaaganki?

¹⁰ Rakanakiri:

—Eerokatagi aapatziyariri Tajorentsi, rootaki ikowakaantakimiri irira piyoteeyeroni eeroka kaari riyoteeyini paashinipaeni atziri kaari aapatziyariri. Eeroka niyotakaakimi tsika ikanta Pawa ipinkathariwenteeyakimini. Omaanta noshiyakaawenteeyakinirini paashinipaeni: ramineeyawityaani irirapaeni, omaanta eero riyotakoperotzi oetarika iñaawityaari; ikemaeyawityaani, omaanta eero riyotakotziro ikemaeyawitakarini.

¹¹ Rootaki iroka noshiyakaawentzimiri: rowaga okithoki oshiyakaawentzirori iñaani Tajorentsi. ¹² Iroka awotsi opariyantawitapaakari okithoki oshiyakaawentziri kemaeyawitawakaworini iñaani Tajorentsi: ipokapaaki kamaari, rookakagaeri ikenkithashiryaaaptintziro iñaani Tajorentsi. Tee ikowakayiri raapatziyari eejatzri rawijakote. ¹³ Rowaga mapipookiteentsiri opariyantawitapaakari okithoki, oshiyakaawentakiri atziri weshiryaaawentawitanakawori iñaani Tajorentsi, inimotawitakari. Omaanta tee ikyaaryooowentziro: aririka opomeentsitzimotakari raapatziyari, roojatzi rookantaneeyawo. ¹⁴ Iroka kitocheemashi opariyantawitapaakari, oshiyakaawentakiri kemaeyawitakaworini iñaani Tajorentsi, omaanta ikenkithashiryaaaptintziro rantapiintziri, iweshiryaaawentawo owaagawontsipaeni, eejatzri ikowaki ikimoshirewentshityawo oetarikapaeni kaari kameethatatsi. Ratsipetashitakawo ikemawitawo iñaani Tajorentsi: tee raapatziyawo kameetha, tee rantaperotziniri riori ikowakaawitariri. ¹⁵ Omaanta iroka okameethatzi kipatsi oshiyakaawentziri atziri kemaperotawakirori iñaani Tajorentsi. Ikyaaryooowentaperotanakiro kameetha raapatziyaperotanakawo, ikameethashiryaanaki rajankaneki. Rriotaki antaperotzirori maawaeni ikowakaakiriri Tajorentsi. Tema riyotaakiri paashinipaeni iñaani Tajorentsi.

Roshiyakaawentakiniri Jesoshi ootamentotsi (Mr. 4.21-25)

¹⁶ Eenitatis paashini roshiyakaawentakiniriri Jesoshi riyotaanewo, ikanteeyakirini:

—Aririka oonthoteri ootamentotsi amineeyantyaarini, ¿arima ataapataktakiri kantziriki? ¿Arima amanakiri tsikarika? Okameethatzi owakoteri jeñokiini okoñaatantyaari oetarikapaeni. Rootaki imatantapaakyawori kyaapaentsirsira iñaapaakiro oetarikapaeni jeekatsiri inthomaenta.

¹⁷ Okimitaka iroka iinja okoñaatanaki maawaeni amanayitawitarini iroñaaka

riyoteeyanakironi maawaeni okaatzi anteeyakirini. ¹⁸ Paamayawowa okameethatzi pikemaperoyawakinani piyoteeyanteeyarini. Eechonkiini piyotaki iroñaaka, omaanta aririka pikemaperotena, nothotyeeyemironi niyotakaaperoeyemini. Aririka piifakaashiwita piyotzi, eero pimatziro paapatziyawo niyotaawitakimirika, eejatzi ari pipeyakotakiro okaatzi piyotawitari eechonkiini: tekatsi piyotzimaetaneeya.

*Riyaatashiteeyakirini isheninkapero Jesoshi iñeeri
(Mt. 12.46-50; Mr. 3.31-35)*

¹⁹ Okantaka iyaatashitananakari Jesoshi riniro, otsipateeyanakarini rirentzipaeni. Rareeteeyapaakanı pankotsiki janta ijeekakinta riori, omaanta tekatsi ikantapaakya rontsirokaeyapaakyaarini: rookagaeyakirini oshekipaeni atziri. ²⁰ Ikamanteetakiri Jesoshi:

—Okowapaakimi piniro, eejatzi parentzipaeni. Ojeekapaaki janta inkokironta.

²¹ Omaanta rakanakiri:

—Ninirontakawo maawaeni aapatziyaperoeyakaririni Tajorentsi, maawaeni antaperotziniriri ikowakaakirori. Eejatzi maawaeni aapatziyariri riroteeyakini yeeyipaeni, choenipaeni.

*Romaerintakiro Jesoshi tampyaa eejatzi omoetonkaari inkaare
(Mt. 8.23-27; Mr. 4.35-41)*

²² Paashini kitejiri rotetanaka Jesoshi pitotsiki, itsipateeyakarini riyotaanewopaeni. Ikantakiri:

—Thame amontyagaeyaneeni intatsikeronta inkaare.

²³ Ikantaka riyaatakoeyawitanakani, aakotanakiri tampyaa. Jatakotaki niyankaani, ari janta opatoki pitotsi imaanaki Jesoshi. Roojatzı omapokaeyakirini antawo tampyaa, otetaatapaakawo iñaa pitotsiki, rooteentsi itsitsiyakoeyenimi. ²⁴ Roojatzı ikaakantanakari ryotaanewopaeni ikantakiri:

—¡lyotaanari! ¡Pipiriñte! ¡Rooteentsiwee atsitsiyakoteeyeni!

Ari itzinaanaka, roojatzı rojantzikaantakawo tampyaa, ipeyeero omoetonkaari: opeyaperotanaa kameetha. ²⁵ Ikantziri ryotaanewo:

—¿litaka kaari pameenteeyantanani?

Ithaawanteeyanakarini, eejatzi rotsikanateeyanakarini. Ikantawaka-gaeyanakani:

—¿Ninkama irika? Omaerintakirori tampyaa, eejatzi omoetonkaari: ipeyerero. Tee añaapiintziri kimityaarini irika.

*Rookaeniri Jesoshi atziri iyamaarite
(Mt. 8.28-34; Mr. 5.1-20)*

²⁶ Ipoñaanaka Jesoshi Karireeyaki, roojatzı rareetapaaka intatsikeronta: janta Karaarakı. ²⁷ Raatakotapaaka, rayiiteeyapaakini kipatsiki. Iñaappaakiri atziri kyaantawitariri kamaari: ojamanitaki ijeekamerikitzı tee ikithataawo iithaari. Tee ijeeki pankotsiki, inta ikinakinamerikitzı janta kaminkarimashiki. ²⁸ Iñaantawakariri Jesoshi, rotziwerowashitawakari, roojatzı icheraakaantanakari iyamaarite ipaantekira shirampari, ikantakiri:

—¿litaka poñaashirenkantanari? Niyotawakimi: eerokataki Itomi Tajorentsipero jeekatsiri jenokinta. Eero powashironkaana.

²⁹ Rootaki ikaemantanakari, ithaawantawakari Jesoshi, ryotaki kamaari rotyaantatyeeri. Riraga shirampari ojamanitaki ijeekantakari kamaari, ikinakaapiintziri tsikarikapaeni. Roojotapiinteeawitari rakoki eejatzi iitziki karenathaki, omaanta osheki ishaintsitakaakiri kamaari, ithatyaaakiro karenatha roojotanteetayitaririni. Aririka ithayaanakiro, ishiyakaanakari kamaari janta teenta ijeeki atziri. ³⁰ Rojampitakiri Jesoshi:

—¿Oetaka piwaero?

Rakanakiri:

—Nowaero Oshekyaantzi.

Rootaki iitantakari Oshekyaantzi ijekantakari inthomaenta oshekini kamaari. ³¹⁻³² Ari ijeki janta tyonkaarikiini osheki chaancho rowaeyani. Riraga kamaari ikanteeyakirini Jesoshi:

—Eero potyaanteeyanani jaawikinta otsitenikaakitzinta inta nokowaki potyaanteeyenani janta chaanchoki, nokyaantapaakyaari rirori.

Ikantanakiri:

—Piyaateeyeni.

³³ Roojatzi rookaeyantanaarini shirampari, ishirinkashitanakari chaanchopaenii, roojatzi ishiyeeyantanakanii riroripaenii ipariyeyanakini impeetaki, ipiinkaeyapaakini inkaareki, motoririri, motoririri. Tsitsiyeyapaakini maawaenii.

³⁴ Riraga shentawitariri chaancho iñaantawakariri, ishiyeeyanakani janta nampitsiki ikamantteyerini isheninka eejatzii jeekaeyatsirini owantsiki.

³⁵ Roojatzi ipokaeyantanakanii atziri raminerii riraga kyaantawitakariri kamaari, oetarika awijimotakiriri. Iñaapaatzii, tekatsitanee, tee ishinkiwentanaa, ijekae kameetha Jesoshiki. Ikithaataawo imaatha, kenkithashiryaaperotanaa kameetha iroñaaka. Ithaawanteeypaakarini.

³⁶ Riraga ñaaperotakiriri ikamantteeyawakirini maawaenii inampijatzi okaatzii rantakiri Jesoshi, ithotyaawakiniri. ³⁷ Osheki ithaawaeyanakini maawaenii nampitawori jaga. Rotyaanteeyeerini Jesoshi, ikantziri:

—Piyaatee, eero pipokae eejatzii.

³⁸ Omaantakya riraga kyaantawitakariri kamaari ikantawitakari Jesoshi:

—Nokowaki noyaataneemi.

Omaanta ikantziri:

³⁹ —Eero poyaatana. Aritaki pijekki, piyaatee pipankoki. Pikamantteeyapaerini pinampijatzipaenii ikaminthaakimiri Tajorentsi.

Roojatzi riyaatantanaa, ikinakinayitanakini nampitsiki, ikamantteyakirini inampijatzipaenii:

—Piñaakina: osheki ikaminthagaana Jesoshi.

Retsiyatakoteero Jesoshi ojokaatzirori iraa eejatzi ipiriinteero rishinto Jaero

(Mt. 9.18-26; Mr. 5.21-43)

⁴⁰ Roojatzi ipiyantanaa Jesoshi, imontyaanaawo inkaare. Royagaeyakirini osheki atziri, raakameethateeyawaerini. ⁴¹⁻⁴² Itonkiyotawakari shirampari iitachari Jaero: rirotaki jewataktakatsiri janta pankotsiki ipiyotantapiintarira joriyopaaenii. Rotziwerowashitapaakari iitziki Jesoshi ipinkathattan-tapaakariri, ikantapaakiri:

—Thame nopankoki, rooteentsi okame nishintyo.

Apinto rishinto, okaataki ojarentsite 12. Roojatzi royaatanakiri, rawitsinagaeyanakirini oyaateeyanakirinii. ⁴³ Oyaatanakiri eejatzi tsinani ojokaatzirori iraa, okaatakotaki 12 ojarentsite ojokaataki. Osheki raaw-intawitakawo; othonkakiri oorikite aawintakaanantari. Omaanta tekatsi materoni etsiyatakoteroni. ⁴⁴ Okinashitapaakiri itapiiki opampitzitakiri iithaari okaatapaakira, roojatzi opeyantanaa iraa. ⁴⁵ Roojatzi ikantanakiri Jesoshi:

—¿Ninka pampitzitakinawori noethaari?

Ikanteeyanakini paashinipaenii:

—Tee nopampitzimiro piithaari.

Roojatzi ikantanakiri Peetero:

—Iyotaanari, pamine, ikaateeyini atziri osheki rinkiteeyakimini, rawitsineeyakimini. Eekiro pikantanakitzi: “¿Ninka pampitzitakinawori noethaari?”

⁴⁶ Omaanta royiikiitakari rirori:

—Eenitatsi pampitzitakinawori. Okamantakina notajorenka: eenitatsi notajonkakowenteri.

⁴⁷ Iyotanaki tsinani tekatsi okantya omanapithateri opampitzitakirira iithaari. Ompetatanaka, iyaatashitanakiri, otziwerowashitapaakari, okan-tapaakiri:

—Naakataki antzitakimirori piithaari, rootaki netsiyatakotaari no-jokaawitawoni niraa.

Ikemaeyawakironi maawaeni atziripaeni. ⁴⁸ Ikantakiro Jesoshi:

—Tsinani, pameentakina, rootaki petsiyatakotaari. Piyaatanee kameetha pipankoki, pikimoshiretanee.

⁴⁹ Enirowa ikenkithawetaakayiro tsinani, areetapaaka paashini ikaa-teeyinira ijeeki Jaero ikamantapaakiri:

—Kamanaki pishinto. Eero poñaashirenkantari iroñaaka iyotaantatsiri riyaate apankoki.

⁵⁰ Ikemawakiri Jesoshi, roojatzi ikanantanakari:

—Eero pikantashiryaa. Aririka pameentena, ari añaagae pishinto.

⁵¹ Ari rareeteeyapaakani pankotsiki. Ikantzi Jesoshi:

—Eero eeroka, pikyeeyapaeni: intaky rirori kyaatsini Peetero, Jowa, Jantyaako, iri, eejatzi iniro, ari ikaate.

⁵² Enirop riraakoeyakawoni osheninkapaeni, rowashiretakoeyakawoni. Ikanteeyakirini Jesoshi:

—Eero piraakoeyawoni: tee okamaperotzi, inta omaatzsi.

⁵³ Ishirontawenteeyanakarini, tema riyoteeyakini kamaperotaki.

⁵⁴ Roojatzi roerikawakotapaakiro, ishintsithatapaakiro ipaante, ikantzi:

—Ewankawo, pipiriintanee!

⁵⁵ Roojatzi opiriinantanaa. Ikantakiro iniro:

—Piperio owanawo oyaata.

⁵⁶ Ashitaanitachari ari rotsikanatanakari ikantanaki:

—Pamine! jlmatakiro ipiriintziro kaminkawo!

Omaanta ikantakiri Jesoshi:

—Eerowa pikamantakowaetana iroñaaka okaatzika piñaakiri.

9

*Rotyaantakiri Jesoshi ryotaanewo ikenkithatakagaeyerini atziri
(Mt. 9.35-38; 10.5-15; Mr. 6.7-13)*

¹ Ipiyoteeyakirini Jesoshi ryotaanewo 12, imatakagaeyerini itajorenkaki, itajonkakowenantyaariri paashinipaeni, ikanteeyakirini:

—Nokowaki pookakaakowenteeyerini atziri kyaantawitariri iyamaarite, pimateri pookeri maawaeni kamaaripaeni, eejatzi petsiyatakoeyerini maawaeni mantsiyatayitatsirini. ² Iroñaaka piyaateeyeni. Pikinakinayitanakini, pikamanteeyerini atziri: “Rooteentsi ipinkathariwenteeyemini Tajorentsi”. Eejatzi petsiyatakotayiterini mantsiyatayitatsirinipaeni. ³ Nokantemi, tekatsi paanaki: eero payi paashini pimaatha, pikotzi, pithaate, powanawo, piyorkite, pipewiryaakogo, apatziro pikithaatkarika. ⁴ Ninkarika aakameethatawakimini ari pijeekapaaki. ⁵ Eerorika raakameethateeyawakimini jeekatsiripaeni, powaaganakya, eejatzi potekakontatanakya piitzikira ryotantyari eero

piipyashitari eejatzi. Pikanteeyanakirini: "Iroñaaka tee pikemijantana, ari rowashironkaemi Tajorentsi iinja".

⁶ Roojatzi riyaatanteeyanakani, ikinayitanakini nampitsikipaeni. Ikanmanteeeyakirini atziri tsika ikanteeyaka rawijjakotanteeuyaari. Eejatzi retsiyatatakotayiteerini mantsiyatayitatsirini.

*Riraga Erooreshi ikowaki iñneeri Jesoshi
(Mt. 14.1-12; Mr. 6.14-29)*

⁷ Ikanta riraga pinkathari Erooreshi ikemakotakiri rantayitakirini Jesoshi, itajonkantayitakini. Tee riyotzi oetarika ikenkithashireeyaari. Ikanteetayitzini: "Irira Jesoshitsatsiri rirotaki Jowani: piriintaachari". ⁸ Ikantayitzini paashinipaeni: "Roñaagantapaa eejatzi Iriiyashi". Paashini kantayitatsirini: "Piriintaa paashini kamanantzirorini iñnaani Tajorentsi". ⁹ Omaanta ikantzi Erooreshi:

—Nothatyaakaantakiri Jowani: kamataaki. Omaanta, ¿ninka irika ake-makoeyakirini itajonkakowenteeyakirini atziripaeni? Nokowaki noñeeri.

*Ikaatzi 5.000 shirampari ipakiri Jesoshi rowanawo
(Mt. 14.13-23; Mr. 6.30-46; Jowa 6.1-15)*

¹⁰ Ikanta ipiyeeyanaani rotyaantanewo Jesoshi, ikamanteeyapaerini rantayitakirini. Rothatagaeyaneerini ragaeyaneerini riyotaanewopaeni janta Wetheeraki. ¹¹ Omaanta riyoteeyakini atziri jatanaki, roojatzi royaateeyantanakarini. Riraga Jesoshi riwethateeeyawakarini riyotagaeyakirini tsika ikanta Tajorentsi ipinkathariwenteeyakirini. Eejatzi retsiyatakoeyakirini mantsiyaripaeni. ¹² Okantaka otsiteniityaanaki, ipokashitapaakiri riyotaanewopaeni, ikanteeyapaakirini:

—Paminerotya, kaankiityaaki jaka. Potaanteeyerini atziri iroñaaka nampitsikipaeni: raminantyaari imagaeyantyaarini eejatzi rowaeyantyaarini.

¹³ Omaanta ikantawakiri:

—Pipaeyerini eeroka rowaeyaarini.

Ikantanaki:

—Tekatsi nopaeyeririni. Pamine, okaataki jaka paa apawakooni, eejatzi apite mereto. ¿Pikowakima niyaateeyeni namanantakiteniri rowaeyaarini maawaeni irikapaeni? Eenitatsi oshekini atziri.

¹⁴ Aamaashitya ikaateeyini shirampari 5.000 ipiyoteeyakani. Ikantziri Jesoshi:

—Poejeekaeyerini maawaeni: pinashitayityaarini ikaatayiteni 50 piyotachani, eejatzi paashinipaeni ikaate 50. Eejatzi ikimiteeyakyaani maawaeni.

¹⁵ Ari ikanteeyakirini, roejeekaeyakirini. ¹⁶ Roojatzi roerikantakawo Jesoshi paa, eejatzi mereto. Raminanakijenokinta, ikantziri Iriri: "Ariwee, Pawa, pipakinawo nowanawo". Roojatzi ipantakari riyotaanewo, ikantakiri:

—Ajaa, poshirinkeniri riraga piyoteeyeencharinira.

¹⁷ Rowaeyakani maawaeni, ikemaeyapaakani. Roojatzi raantayitaawoni tzimagaantapaentsiri, roteteero kantziriki. Okaatzi riyeekiteeri 12.

*Ikantziri Peetero: "Eerokataki Jesoshi riraga Rotyaantanewo Tajorentsi"
(Mt. 16.13-23; Mr. 8.27-33)*

¹⁸ Paashini kitejiri ryaatanakani apaniroeni Jesoshi ikenkithatakaeri Iriri. Riyoshiitanakiri raanakiri riyotaanewoperopaeni 12. Roojatzi rojampitan-takari:

—¿litaka ikenkithashiryakoperotanari ajoriyyotzinkaritepaeni? ¿Tsikama noetaperotaka naari?

19 Rakanakiri:

—Ikantayitzini apaanipaeni: “Rirojatzii Jowani kaawoshitantzitacharini, piriintaacha”. Irira paashini ikantzi: “Rirojatzii Iriiyashini, oñaagantapaacha eejatzi”. Irira paashini ikantzi: “Rirojatzii paashini kamanantzirorini iñaani Tajorentsi, piriintaachari”.

20 Roojatzii rojampitanakari rirori ikantanakiri:

—Omaanta eero ka, tsika pikanteeyinika?

Rakanakiri Peetero:

—Eerokataki Rotyaantane wo Tajorentsi naamagaeyakarini.

21 Omaanta ikantaperoeyirini:

—Eerowa pathawayitawo pikamanantawaetzi, pikante: “Jesoshi rirotaki Rotyaantane wo Tajorentsi, riraga Owawijaakotantatsini”.

22 Kyaaryo, nopoñaanaka jenokinta, nokonaatapaaki jaka kipatsikika omaanta osheki nokemaatsitya paata. Itheenkauenyanan aataperoteenchari, jewatayitziririni, ñaanakowenantatsiripaeni, iyotaantzirori Iwaperite Tajorentsi, maawaeni. Ikanteeyenani: “Kaari irira Jesokirishito”. Rowamaakaantena, okaate kitejiri 3, nopersiintanee eejatzi.

*Ikantzi Jesoshi: “Poyaataperoeyanakinani: eero piperawenteeyawoni”
(Mt. 16.22-28; Mr. 8.32-38)*

23 Roojatzii ikanteeyantakarini Jesoshi maawaeni:

—Pikowaeyakinirika poyaataperoeyanakinani, otzimatye pookaperoeyanakironi oetarikapaeni inimoteeyawitzimirini eero kapapaeni pantziri, inta maawaeni kitejiriki pipomeentsiwenteeyaaawoni nokowakagaeyakimirini naari, omawitya rowamaanteetemiro, omawitya ikijanteetemiro. **24** Aririka pantawaeta wentashitya eero ka iroñaaka, eero piyotaperotziri Tajorentsi, eejatzi eero piyekimoteeri iinja. Rooma aririka pinintaperotena naari, eejatzi pipomeentsiwentayitenawoni nokowakagaeyimirini naaka, eero patsipetashitawo, inta piweshiryaa wentyaari iroñaaka Tajorentsi, eejatzi piyekimotapaeri iinja. **25** Omawitya piyotaperotawityaaworka osheki owaagawontsi jaka kipatsiki, omaanta pipeyakotakiririka Tajorentsi, eero piyatzi jenokinta ijeekinta rirori. Tema patsipetashiteeyawitakawoni maawaeni pashiteeyawitakarini. Ñaakiro, tekatsi pikantya pipinateri Tajorentsi ijeekakaantemiri janta inampikinta.

26 Tema naaka poñaachari jenokinta, natziritapaaki jaka kipatsikika. Eejatzi nopersiyanee janta. Roojatzii iinja nopersianteeyaa eejatzi jaka kipatsikika, notajorentsiperotapaaki: nokimityaari Pawa eejatzi maawaeni ronampiri, riraga kameethaperotatsiripaeni. Rootaki okameethatanteeyaaari pikenkithashireeyaaani: aririka pipashiwentakayena naaka iroñaaka, eejatzi aririka pipashiwentakayaawo noñaani, ari iinja nopashiwentakaapaemi eero ka aririka nopersiye. **27** Omaanta kyaaryo iroka nokamantemiri, eero namatawitzimi: eerorika pikamita, piñaayitawakironi tsika ikanta Tajorentsi ipinkathariwenantzi.

*Ipaashinitzimotakiri Jesoshi ryotaanewo
(Mt. 17.18; Mr. 9.28)*

28 Rootzimateentsi awijanaki apaani tominko riyaatantakari Jesoshi tonkaariki, ikenkithatakayiri Iriri. Raanakiri Peetero, Jantyaako, eejatzi Jowa. **29** Eenirowa ikenkithatakakiri Iriri, ari omapokashitapaaka ipaashinipootanaki, eejatzi oshipakiryaaperotanaki iithaari, ochookyakiri riraga amineeyakiririni. **30** Romapokashitapaakari eejatzi apite shirampari, ikenkithatakakapaakiri Jesoshi. Riraga ayiitapaentsiri rirotaki Moeseeshini eejatzi Iriiyashini; **31** tee ikimitee akimiteeyanika aaka, ikameethaperotaki: ikimiteeyakarini jenokijatzi. Ikenkithatakawakagaeyakan 3:

ikenkithatakotakiro ikame iinja Jesoshi janta Jerojareeki. ³² Osheki ipochokyaayitawitanaka Peetero eejatzsi itsipateeyarini, omaanta tee imagaeyini. Ramineeyakirini Jesoshi, ishipakiryaki, ikimitanakawo kitejiri. Eejatzsi ramineeyakirini riraga itsipateeyakarini. ³³ Rooteentsi ipiyanee riraga apiteteentsiri, ikantziri Peetero:

—Iyotaanari, kameethataki pamakinaka jaka, noñeeeyakimini. Iroñaaka nokowaki niwetsikemi 3 pankoshintsi: apaani pashi, apaani rashii rirori Moeseeshi, eejatzsi apaani rashii rirori Iriiyashi.

Ikanta Peetero iñaawaetashitana, tee ikenkithashireeya oetarika iñaawaeteri. ³⁴ Omapokashitapaakari eenirowa ikenkithawaeteeyini menkori, otzikagaeyapaakirini, roojatzsi ithaawaeyantanakan. ³⁵ Roojatzsi ikemaeyakirini Tajorentsii, iñaawaetaki menkorikira, ikantanaki:

—Riotaki irika notyomi nonintaperotanewo: pikemijanteeyawakirini.

³⁶ Roojatzsi ramineeyantawitanakaarini: tekatsi iñaanee, apatziro Jesoshi apaniroeni ikatziya. Ikanta imaneeyakironi okaatzsi iñaakiri, ojamanitakotaki, tee ikamantawaetzsi. Paatakya ikamantakoteripa okaatzsi iñaakiri.

Retsiyatakoteeri Jesoshi eentsi ikyaatawitakari kamaari

(Mt. 17.14-21; Mr. 9.14-29)

³⁷ Okitejitanaki, roerinkaeyanakan, itonkiyoteeyawakarini osheki atziri.

³⁸ Ikantawakiri apaani:

—Iyotaanari, pikaminthaaneenari notyomi napintzite, tekatsi paashini.

³⁹ Rowariyaapiintziri kamaari, ikaemakaapiintziri. Rompetatakaapiintari, ishimoretakaapiintari. Rowashironkaapiintakiri: tee rotsiparyaanentari. ⁴⁰ Nokantawitakari piyotaanewopaeni retsiyatakoterimi, omaanta tee imatziri.

⁴¹ Rakanakirji Jesoshi:

—Eero imatziri: tema ari pikaateeyini pitheenkanteeyini, rootaki kaari imatantari kamaari; tema pikenkithashiryaaente. Osheki neshiwentakimi notsipatakimi niyotagaeyawitakimironi iñaani Tajorentsii. ¿Tekiraatama piyotakoperoeyironi itajorenka Tajorentsii? Pamakinari pitomi jaka.

⁴² Rootaki iniyankitakaawitapaakari itomi, romapokashitana kamaari iparyakaakiri kipatsiki, tereei, rompetatakaakari tonki, tonki. Roojatzsi rotyaanantaari Jesoshi kamaari, rowawijaakoteeri eentsi. Ikanteeri Iriri:

—Iraka pitomi: awijakotee iroñaaka.

⁴³ Rotsikanateeyanakanarini kameetha maawaeni atziripaeni, ikantawaka-gaeyanakan:

—Tema itajorentsiperotaki kameetha Tajorentsii.

Rapiiteero Jesoshi ikamantakota ikame iinja

(Mt. 17.21-23; Mr. 9.29-32)

Eenirowa rotsikanateeyakarini, ikanteeyakirini Jesoshi riyotaanewo:

⁴⁴ —Pikenkithashiryaaoperero iroka nokamantemirika. Eero pipveyakotziro. Nopoñaaka naaka janta jenokinta, nokoñaatapaaki jika kipatsikika, omaanta iinja aritaki raakaanteetakina.

⁴⁵ Omaanta tee riyoteeyawakironi ikantawitakariri. Tee ishinetziri Tajorentsii riyotakoeyawakironi. Ithaawanteeyakarini rojampiterimi oetarika ikantawitariri.

Ikantziri Jesoshi riyotaanewo tsika ikantyari ipinkatharitanteeyarini

(Mt. 18.1-5; Mr. 9.33-37)

⁴⁶ Roojatzsi ikantawakagaeyanakanri riyotaanewopaeni Jesoshi, raama-gaeyakanri, ikantzi:

—Jaka akaateeyinika: ¿ninka anaakotantaatsini ipinkatharitee? ¿Naakama pipinkathateeeyeni?

⁴⁷ Riyotakotakiri Jesoshi oetaka ikenkithashireeyakarini. Ikaemakiri eentsi:

—Pipokanaki jaka okaakini.

⁴⁸ Roojatzi ikanteeyantanakarini riyotaanewopaeni:

—Paminerri irika eentsi, aapatziyanaari. Aririka petakotyaari irika eentsika, eejatzi petakotakina naari. Aririka petakotakina naari, eejatzi petakotakari otyaantakinari. Aririka petakotyaari paashinipaeni atziri, aritaki pipinkatharitaki iinja.

Retsiyatakotantaki paashini aapatziyariri Jesoshi

(Mr. 9.38-40)

⁴⁹ Roojatzi ikanantakari Jowa:

—Iyotaanari, chapinki noñaakiri shirampari janta rowawijaakotayitakirini kyaantawitariri kamaari. Ikamantawitakina raapatziyimi, rootaki imatantariori rowawijaakotziri. Omaanta tee kijokiro rowaeyeeni akaa rootaki nookakaantakariri rowawijaakoteri kyaantawitariri kamaari.

⁵⁰ Rakanakiri Jesoshi, ikantziri:

—Eero pithaaakotari. Irira tee ikijeeyeeni, tema rantakinawo nokowakaakiriri. Rootaki atsipateeyantakaririni.

Riraga jamaaryajatzi tee raakameethatziri Jesoshi

⁵¹ Rooteentsi areetya kitejiri ryaatee Jesoshi jenokinta. Apatziro ipoñaanaka ryaatanaki Jerojareeki. ⁵² Rotyaantakiri riyotaanewo, ikanantakiri:

—Thame pityaawo janta Jamaaryaki, pamine ajeekanteeeyapaakyarini.

⁵³ Ikanta ryaatawitanaka, omaanta riyoteeyakirini jamaaryajatzi ryaatatyre Jesoshi janta Jerojareeki, rootaki kaari ishinetantawakari roojeekawakiri inampiki. Roojatzi ipiyantanaa, ikamantapaeri Jesoshi, ikantziri:

—Eero ishinetee amaye inampiki.

⁵⁴ Ikemantawakari Jantyaako eejatzi Jowa, ikantakiri:

—Nowinkatharite, ¿pikowakima nokanteri Tajorentsi itagaeyerini maawaeni jamaaryajatzi? Nokimityaari Iriiyashini paerani: itaakaantakirini joraropaeni kijeyakiririni.

⁵⁵ Rookathatanakiri Jesoshi, ikantanakiri:

—Tee okameethatzi akjeri. Tee piyoteeyini eeroka tsika pikantakari: tee pikameethashiretti. ⁵⁶ Naaka poñaachari jenokinta, natziritapaaki jaka kipatsikika. Tee ro nopolantya nowamaayiterini atziri, inta nopolantari nowawijaakoeyerini.

Roojatzi rowagaeyantanaani paashiniki nampsitsi.

Riraga kowatsiri oyaateeyeririnimi Jesoshi

(Mt. 8.18-22)

⁵⁷ Ikanta ikineeyanakini awotsiki, itonkiyotawakari shirampari, ikantawakiri Jesoshi:

—Nowinkatharite, nokowaki noyaataperotanakimi, tsikarika piyaate.

⁵⁸ Ikantanakiri:

—Naaka poñaachari janta jenokinta nokoñaatapaaki jaka kipatsikika nowawijaakotanyaariri atziri. Pikemijantawakiro iroka nokamantemiri: riraga otsitziniro eenitatsi imoo imaapiinrantari, riraga jenokiweripaeni eenitatsi imaashi; omaanta naaka, tekatsi nopanko nomaantyaari.

⁵⁹ Roojatzi ikantakiri paashini atziri:

—Poyaatanakina eero ka.

Rakanakiri ikantzi:

—Nowinkatharite, nokowawitaka, omaanta ikamawakiita pawa. Aririka nokitatanakiri roojatziky noyaatantanakimi.

⁶⁰ Rakanakiri Jesoshi:

—Eeniro ikaateeyini theenkantatsiripaeni, rirotaki kitaterini aririka ika-maki. Omaantakya eero ka, thame poyaatena pikamanteeyeriniita atziri tsika ikanta Tajorentsi ipinkathariwenanteeyerini.

⁶¹ Ikantziri paashini shirampari:

—Aritaki, nowinkatharite, noyaataperotanakimi: omaanta niteeya-paentyaariniita niwethateeyapaentyaariniita nosheninkapaeni.

⁶² Omaanta rakanakiri Jesoshi:

—Pithapaterorika kipatsi pipankiwaetantyaari piwankiri, eero pam-naminawaetzi tsikarikapaeni, eero otzipitzipiwaetantanaka pithapatakiri. Eejatzi okimitaka roori: pikowakirika ipinkathariwentem Tajorentsi, poy-aataperotena, eero pikenkithashiryapiintziro panteero eejatzi pantapi-intawitarini paerani.

10

Rotyaantakiri Jesoshi 72 kenkitatkaanteeyatsirini

¹ Roojatzi rotyaanteeyakirini Awinkatharite osheki riyotaanewopaeni reewateeyanakini, ikaateeyini 72. Ikantawakiri:

—Piyaateeyini nampsikipaeni nokanteeeyakimirini, apite pikantawakaayitanakyaani. Eekiro nampaeteemi iinja naari. ² Okimitaaka pankirentsi oshekiterika okithoki tekatsiperorika owiiteroni apaatanakya okithoki rooma tee roshekitzi owiiteroni. Eejatzi okimitaka iroñaa ka eeniro oshekiperio atziri kaari apatziyana. Pamanapiinteri Awinkatharite rotyaanteeyantyaaririni osheki amitakotemini pikenkithatakagaeyerini atziri, riyaatanteeyaaarini rirori jenokinta. ³ Pamine, osheki opomeentsitzimoyemini, osheki rowashironkaeyemini theenkantatsiri: pikimityaari owisha, rojatekakari manitzipaeni. Iroñakakya, piyaateeyini pikenkithateeyeni. ⁴ Eero paanaki pithaate, piyorikite, pijapatote. Aririka pitonkiyotawakyaari atziri niyanki, eero pikatziyakaari pikenkithawaetakayiri, omaanta pawijanakiri: apatziro powaanakiro janta nokantakiminta. ⁵ Tsikarika pijkeekapaaki, pikanteri Tajorentsi ramitakoteri ashitawori ipanko raapatziyantenari ijeekantyaari kameetha.

⁶ Aririka raapatziyena, ari rawijakotee, ijeekantyaari kameetha. Rooma eerorika raapatziyana tee patsipetashitawo pikenkithatakayiri iñaani Tajorentsi: tema pantakiniri iroka nokantakimiri. ⁷ Tsikarika janta pijkeekapaaki, aritaki pijkeekaeyapaakini. Eero pikinakinayitzini pankotsikipaeni. Poyaawo oetarika ipawakimiri, eejatzi pирero, maawaeni. Okameethatzia ipawakimi oetarikapaeni koetyeemotakimiri: riraga atziri antawaetatsiri ikameethatzia ipineeteri. ⁸ Tsikarika pareetapaakya, aririka raakameethatakawimi, powapaakyaawo oetarika ipawakimiri.

⁹ Eenitatsirika mantsiyariipaeni, petsiyatakoeyerini. Pikamanteeyerini maawaeni: “Rooteentsi ipinkathariwenteyemini Tajorentsi”. ¹⁰ Omaanta eerorika raakameethatakawimi paashinipaeni atziri, pikanteeyanakirini: ¹¹ “Pikemaeyawakinani: ikowawita Tajorentsi ipinkathariwentemimi, omaanta tee pikoyi. Tee paakameethateeyawakinani, eejatzi okimitaka, tee paakameethatakawiri Tajorentsi. Iroñaa pashironkagaeyaani”.

¹² Rootaki nokowakirika pikamanteriri. Ñaakiro, paerani riraga joroomajatzini imaninteeyakirini Tajorentsi rootaki ithonkanteeyakaririni. Omaanta

eerorika raapatziyeyawakimini atziri iroñaaka, ari iinja ranaakotaperoteri joroomajatzni ikemaatsitaperoteeyawoni osheki.

*Ikenkithatakotakirijesoshi piyattheeyakaririni
(Mt. 11.20-24)*

¹³ Eejatzi ikantzi Jesoshi:

—Ashironkaamatsiterini korashiinijatzi eejatzi wetheerajatzi: osheki iñaaakoeyawitakinawoni notajonkantapiintaki, omaanta tee raapatziyeyawakinani. Rirorikami ñeeyakinanimi tziirojatzi eejatzi shiroojatzi, tema ari ikenkithashireeyaneeyaanimi, rookaeyeeronimi kaari kameethatatsi ranteeyirini. ¹⁴ Kyaaryootaki rowashironkaeyakirini Tajorentsi iinja tziirojatzi eejatzi shiroojatzi, rowashironkagaeyerini, omaanta rowashironkaaperooyerini osheki korashiinijatzi eejatzi wetheerajatzi. ¹⁵ Eejatzi ikenkithashireeyawitakaní kaperinawoojatzi riyaateyenimi janta jenokinta, omaanta eero riyaateeyini inta riyaateyeni janta paamariki jeekatsiri inthomaenta kipatsi ikemaatsityawo. ¹⁶ Niyotaanewo, pikemaeyenani. Aririka raapatziyeyawakimini atziripaeni, eejatzi naari raapatziyeyakinani. Aririka itheenkayawakimini eerori, eejatzi ikimitzitakina naari itheenkayakinani. Eejatzi okimitaka, aririka itheenkayenani naari, tema itheenkayelerini eejatzi riraga otyaantakinari. Iroñaakakya, piyaateeyeni.

Ari ikantteeyakani.

Piyeeyapaani ryotaanewo Jesoshi kaatatsiri 70

¹⁷ Ikantaka ipiyeeyapaani rotyaantanewopaeni Jesoshi, ikimoshireeyapaakini. Ikamanteeypaakirini:

—Nowinkatharite, riytakina kamaari naapatziyakimi, ikemijantaperotakina. Nomatakirikya notyaanteeyakirini.

¹⁸ Rakanakiri:

—Kyaaryo riraga Jatanaashi ipinkathariwentawitakari iyamaaritzinkarite, omaanta noñeyakimini pimateeyakirini potyaantakiri kamaari eerori: iroñaaka niyotaki eero ipinkatharitaperotzi Jatanaashi, tema ramitakotakimi Tajorentsi panaakotantakariri kamaaripaeni. ¹⁹ Iroñaaka osheki notajonkawentakimi: okimiwitaka aririka paatzikawityaari maanki, eero rowamaemi; eejatzi riraga kitoniro, tekatsi ikantemi. Eejatzi ikjawitemi riraga iwinkatharite kamaari, omaanta tekatsi ikantemi, tema notajonkakowentakimi. ²⁰ Kyaaryo potyaantayitakirini kamaari, omaanta eero piweshiryawentawo iroka, inta pikimoshirewentaperooyeroni piyaateeyeni jenokinta, tema rojankinateetakiro piwaero janta.

*IkimoshireperotakiJesoshi
(Mt. 11.25-27; 13.16-17)*

²¹ Roojatzi riraga Jesoshi okimoshiretakaaperotakiri Ishire Tajorentsi, ikantziri Iriri:

—Pawa, osheki pikameethatagi. Pipinkathariwenteeyirini maawaeni jenokijatzi eejatzi maawaeni kipatsijatzi. Eeniwitacha atziri iyotawitachari, riytayitawitawoni oetarikapaeni, omaanta pimanapithatakiri piñaani: tee riyoteeyironi tsika ikantyaari rawijakotanteeyaaari. Omaantakya piyotaaperoeyakirini riraga kaari iyoperowitachari: itheenkayawitakarini ijoriyyotzinkarite omaanta pikowakaaperoeyakirini rirori ryote.

²² Roojatzi ikantteeyakirini piyotawenteeyakaririni:

—Riotaki Pawa matakaakinawori maawaeni. Apaniroeni ryoperotana Pawa, tekatsi paashini iyoperotenani. Eejatzi nokimita naari,

apaniroeni niyoperotziri, tekatsi paashini iyoperoterini: omaantakya nñikarika nokowakaakari noñaayeri, rirotaki yoterini Pawa ejatzti.

²³ Ipitokashitanakari rirori ryotaanewopaeni, apaniroeni irira ikanteeyakinini:

—Piñeeyakinani eeroka nomatakiro kaari iñaapiinteeeyini paashinipaeni atziri. Okameethatzzi pikimoshirewentena, eejatzi ikimoshirewentena paashini ñaaayanaranini. ²⁴ Ikowaeyawitakan paerani riraga kamanantziroriñi iñaani Tajorentsi iñeenami notajonkantayiteni, omaanta tee iñaana notajonkantayitzini. Eejatzi ikowaeyawitani iñeenami riragapaeni pinkathartayitawitacharini. Eejatzi ikowaeyawitani ikemaeyenanimi, omaanta tee ikemaeyanan. Intakya eerokapaeni piñeeyakinani, pikemaeyakinani.

Ikowaperotzi Tajorentsi anintashirereperoteri, eejatzi anintashirereperoteri maawaeni atziri

(Mt. 22.34-40; Mr. 12.28-34)

²⁵ Paashini kitejiri ipokashitakiri iyotaantzirori Iwaperite Tajorentsi rowaga rojankinarini Moeseeshi. Ikowawitaka ikompitakayaarimi Jesoshi, ikantawitapaakari:

—Iyotaanari, ¿tsika nokantyaaka nojeekantyaari jenokinta, nokanteetatyeyaaani?

²⁶ Ikantawakiri:

—¿Oetaka okantziri rojankinarini Moeseeshi? ¿Oetaka okantzimiri?

²⁷ Rakanakiri:

—Okantana: “Okameethatzzi anintashirereperoteriroña Tajorentsi maawaeni ajankaneki. Rirotaki Awinkatharite. Eejatzi kameetha akyaaryoowenteri aapatzyaari. Eejatzi kameetha akenkithashiryaaoperoyaari tema ikameethaperotaki. Eejatzi paashini ikowaki Tajorentsi: akimitaaka anintaa aaka, eejatzi akimiteri paashinipaeni atziri, anintaperoteriroña”.

²⁸ Ikantanakiri:

—Kyaaryooperotaki iroka pikantakirika. Aririka pimonkaatero iroka eerori, aritaki pijekae jenokinta pikanteetatyeyaaani.

Ikantakotzirijamaaryajatzi, neshironkatziririjoriyo

²⁹ Omaanta riraga iyoperowitawori rojankinarini Moeseeshi tee inintashirereperotziri maawaeni atziri, rooma ikowawita imaniromi. Rootaki rojampitanakariri Jesoshi:

—¿Ninkama atziri nonintaperooyerini?

³⁰ Ikantawakiri:

—Noshiyakaawentemiro. Ikinanaki apaani joriyyo awotsiki. Ipoñaanaka Jerojareeki roerinkawitanaka taapiki rareetantyaami nampitsiki iitachari Jerikoo. Ikantaka niyanki awotsi romapokapaakiri apaanipaeni koshintzi roerikapaakiri, shepix. Roojatzi raatonkoryaapaakiri, raapithatapaakiri iithaari, osheki ipajapajaatakiri tag, tag, tag. Roojatzi rookamerikanakiri awotsiki, rawijanakiri. Rooteentsi ikamemi riraga owashironkaenkari.

³¹ Ikantapaaka ikinapaaki awotsiki ñaanakowenantatsiri, riroritaka joriyyo eejatzi. Ñaaawitapaakari rirori rowashironkagaetakiri, roshinampitapithatanakiri, tee retakotanakari. ³² Eejatzi ikimitaka irira paashini shirampari riraga icharineeteni Rewiini. Tema maawaeni irirapaeni ramitakotziri ñaanakowenantatsiri janta Tajorentsipankoki. Ikinapaaki awotsiki, ñaaawitapaakari rirori, eejatzi roshinampitapithatanakiri, tee retakotanakari rirori eejatzi. ³³ Omaanta ikinapaaki paashinijatzitatsiri atziri rirotaki jamaaryajatzi, roonanewo joriyyopaeni. Ikinapaaki iñaapaakitziiri rirori, roojatzi retakotantapaakari. ³⁴ Riyaatashitapaakiri raawintapaakiri, eejatzi roojotakotapaakiri rompojeetakirira. Eejatzi eeniro ramakiri iwooro

riraga jamaaryajatzi. Roojatzi raakiri rirori rowankitakiri iwooroteki, raanakiri janta ojeekinta pankotsi. Eejatzi janta kameetha inintashireperotanakiri raawintapaakiri. ³⁵ Okitejitanaki ikowaki riraga jamaaryajatzi ryaate. Ikantanakiri ashitawori ipanko: "Ajaa, irika korikika. Nokowaki pikamintheeri irika shirampari. Tekirarika imonkaata koriki, paata nopolinatapaemi paashini aririka nopyiee". ³⁶ Ari ikaataki 3 ūnakiriri owashironkaenkari awotsiki. ¿Ninka atziri nintaperotakiriri?

Rootaki rojampitakiriri riraga Jesoshi iyoperowitawori rojankinarini Moeseeshi. ³⁷ Rakanakiri:

—Tema rirotaki riraga etakotakariri.

Ikantanakiri riraga Jesoshi:

—Eejatzi eerori, pikimityaari: pinintashireperoteri maawaeni atziri.

Jesoshi rareeteeyapaawoni Maarita eejatzi Mariya

³⁸ Ari ikinanaki awotsiki Jesoshi, itsipateeyarini riyotaanewopaeni. Ra-reeeteeyapaakawoni owaanini nampitsi.

Roojatzi janta ofiaantawaari tsinani owaero Maarita, okantawakiri:

—Thame pijekaeyeni nopankoki.

³⁹ Otsipatapo irento janta opankoki owaero Mariya. Ojeekimotakiri Awinkatharite iitziki, okemijantawakiri, riyotaapaakirori. ⁴⁰ Rowaga Maarita, oshintswaetawakiniri onkotsitayitzinirini rowanawopaeni. Roojatzi iyaatashitakiri, okantapaakiri:

—Nowinkatharite, pamine, apaniroeni nonkotsitayitzimironi poyaari. Rooma rowaga eentyo, tee amitakotana. Potyaantero amitakotenaata jaka.

⁴¹ Rakanakiro:

—Maarita, osheki pikenkithashiryaperotakawo eeroka ponkotsiwaete owanawontsi, eejatzi powameethayiteroni oetarikapaeni. Osheki pikenkithashiryaaakawo. Okameethatawita maawaeni iroka, ⁴² omaanta eenitatsi apaani kameethaperotatsiri: rootaki iyoyagaananantakari pirento roori, tekatsi kantawenteroni.

11

Riyotayiri Jesoshi riyotaanewo tsika ikantya ramaneri Tajorentsi (Mt. 6.9-15; 7.7-11)

¹ Paashiniki kitejiri ryaataki Jesoshi ikenkithatakayeri Ashitariri. Ithonkatapaakiro ikenkithatakayiri Iriri, roojatzi ikantapaakiri apaani riyotaanewo:

—Nowinkatharite, paerani riraga Jowani riyotaakiri riyotaanewopaeni tsika ikantya ikenkithatakayeri Tajorentsi. Eejatzi eeroka iroñaaaka nokowaki piyoteena naari tsika nokantya namaneri.

² Ikantawakiri:

—Aririka pikenkithatakayeri, ari pikimitero iroka pikanteri:
Pawa, jeekatsiri jenokinta,
osheki pikameethaperotaki, nokowaki pipinkathariwenteeyenani,
maawaeni.

Okameethatzhi nanteeyemironi maawaeni
pikowakaakinari: nokoyi nokimityaari
ponampiripaeni jenokijatzinta ranteeylimironi maawaeni pikowakaakiriri.

³ Pamatokena maawaeni kitejiriki
eero okoetyeemotantana noyaari.

⁴ Eero pikijawentanawo kaari kameethatatsi nantziri inta
pikaminthayena: tema naari nokamintheeyirini maawaeni
atziri. Eero pishinetziri kamaari rantakayenawo

kaari kameethatatsi.

Pikowakotaperoteri Tajorentsi koetyeemotzimiri, aritaki imatakimiro

⁵ Eejatzi ikantakiri Jesoshi:

—Pamine, niyotaanewopaeni, noshiyakaawentemiro. Aririka piyaatashiteri pitsipaminthari tsiteniriki pinetheeri rowanawo. Pikantapaakiri: ⁶ “Tekatsi nopawakiriri niyompari owakira rareetapaaka. Nokoyi pipawakina nowakayaariri”. ⁷ Aamashitya ari ikantawakimimi: “Eero poñaashirenkana, osheki nowochokino. Maawitakina naaka, eejatzi neentsitepaeni, maawaeni. Ashitaka ashitakontsi. Tekatsi nokantya nopiriinte nopantemirori poyaari”. ⁸ Naakiro, pitsipaminthari powawitari. Tee ikowawita ipiriinte ipantemirori poyaari. Omaanta eekirowa poñaashirenkiri roojatzi ipiriinantanakya, ipawakimiro poyaari pikowakotakiriri. Rooma tee ikoyi poñaashirenkapiinteri. ⁹ Eejatzi okimita, aririka pamanapiinteri Tajorentsi, ari ramitakotapiintakimi ipakimi koetyeemotzimiri. Pikowakotapiinteri aritaki piñaakiro koetyeemotzimiri. Pikenkithatakapipiinteri aritaki ikemakimi, imatakayemiro kameethatatsiri. ¹⁰ Kyaaryo, maawaeni amanapiintziriri Tajorentsi ari ramitakotakiri iñaantyaawori koetyeemotariri. Maawaeni kowakowapiintatsiri riyotaapiinteri iñaantyaawori koetyeemotariri. Maawaeni kenkithatakapipiintziriri ari ikemakiri kameetha imatantyaawori kameethatatsiri.

¹¹ Naakiro, ikowakotemirika pitomi owanawontsi royaari, ḡarima pi-pawakiri mapi? Ikowakotemirika shima royaari, ḡarima pipawakiri maanki? ¹² Aririka ikowakotemi iithoki tyaapa, ḡarima pipawakiri kitoniro? Eero pipawakiri, inta pipaperotawakiri kameethatatsiri royaari. ¹³ Naakiro, tee pikameethawitya eerokapaeni, omaanta piyotzi pineshironkatziri peentsitepaeni. Rooma irintapaeni Ashitakaerijenokinta riyotaperotzi rirori ineshironkaperotee aakapaeni. Aririka pikowakoperoteri, rotyaantemiro Ishire amitakotemini.

Ikanteetziri riraga Jesoshi rirotaki kamaari

(Mt. 12.22-32, 12.43-45; Mr. 3.20-30)

¹⁴ Paashini kitejiri iñaakiri Jesoshi shirampari imajontzitakaakiri kamaari, ikyaaantawitakari rajanganekki. Itajonkakowenteeri Jesoshi, rowawijaakoteeri, roojatzi iñaawaetantanaa eejatzi. Rotsikanateeyanakarini maawaeni neeyakiririni. ¹⁵ Omaanta ikantayitzini apaanipaeni:

—Ramtakotashitakari Jesoshi Wereshewoo: riraga iwinkatharite kamaari, rootaki imatantawori rowawijaakoteeri imajontzitakaakirira kamaari.

¹⁶ Ijeekaki paashini theenkiriri Jesoshi, ikantziri:

—Ajaaty, pitajonkante, niyotantemiri kyaaryorika pipoñaaka jenokinta.

¹⁷ Omaanta ryotakiri rirori ikenkithashireeyakarini. Ikantziri:

—Aririka romanatawakagaeyaani atziri, tema aritaki ithonkawaka-gaeyakaani. Eejatzi aririka ikijawakagaeyaani asheninka, tema ari itsipareeyawakaanakyaani. ¹⁸⁻¹⁹ Eejatzi okimita, aririka ikijeeyerinimi Jatanaashi iyamaaritzinkarite, ḡtsika ikantyaari ipinkathariwenantyaariri? Eerori pikanteeyakini irofiaaka: “Riotaki Wereshewoo amitakotziriri Jesoshi rowawijaakotantariri imajontzitakaeri kamaari”. Rirorika amitakotenanimi nowawijaakotziri imajontzitakaeri kamaari, ḡninka amitakotziriri pisheninkapaeni rowawijaakotantariri atziri kyaantawitakariri

kamaari? ¿Rirojatzima pisheninka eerori kamaari? ²⁰ Omaanta imatakaakinawo Tajorentsi nowawijaakotantakariri imajontzitakaeri kamaari, piyoteeyantyaarini iroñaka kijokiro rowaeyakimini riraga Tajorentsi, ikowaki ipinkathariwenteeyemini.

²¹ Paashini roshiyakaawentakiniriri Jesoshi, ikantaki:

—Pamine, eenitatsirika shirampari shintsitsatsiri ithatyamento, ichekopite, maawaeni, tema ishentaperotziro ipanko. Eero ishinetziro ikoshiteeteri rowaagawo. ²² Omaanta ipokapaakirika anaakotapaakirini shintsitaperotatsiri, eero imatziro rotsinampaawakiri rirori oetarika ranantapaakyaariri. Tema ari raapithatapaakiri rowamaamentopaeni. Roojatzti ikoshitantanakyaari rowaagawo, ipaeyanakirini isheninkapaeni rirori. ²³ Ikijectyakina maawaeni kaari inimoteeyirini nantero, rootaki rantawakaantakanakari osheki atziri kaari raapatziyantaneena.

Ipiyawo eejatzi kamaari

²⁴ Aririka ipakagaeri atziri kamaari, okameethatzi ipinkanakiri: rapiiteerikari eejatzi. Ókimitaka iroka: ikinakinayitakini riraga kamaari janta ochempiki, ikowakowawita tsika ijekantyaari. Omaanta teerika iñee ijekantyaari, roojatzti ikenkithashiryaantanaawori ipoñaanakanta, ikante: “Nopiyaneeta janta nopoñaakanta”. ²⁵ Aririka ipiyapae, iñaapaeri shirampari kimitaka pankotsi, opishitaka eejatzi kameetha okaankiityaaki. ²⁶ Roojatzti ryaatantaka ikaemeri paashinipaeni iyamaaritzinkarite, ikaatzti 7. Maperori tee ikameethatzi rioripaeni. Ñaakiro, iroka pankotsi roshiyakawo kyaantawitariri kamaari. Aririka rapiiteeri ikyanteeyari, roojatzti imaperotanteeyaa eero ijekanee kameetha.

Ikantzi Jesoshi: “Ikimoshireeyakini maawaeni aapatziyanari”

²⁷ Ijeekaeyakini janta osheki kemaeyakiririni Jesoshi. Ocheraanaki apaani tsinani, okantzi:

—Tema ikimoshirewentakimi piniro koñaatakimir!

²⁸ Omaanta ikantawakiro:

—Jee, kyaaryo, omaanta ikimoshireperoeyakini maawaeni kemaeyirorini iñaani Tajorentsi, eejatzi raapatziyeyari.

Ikowakotziri theenkantaniri Jesoshi itajonkante (Mt. 12.38-42; Mr. 8.12)

²⁹ Eekiro ipiyotawenteeyatyhaarini Jesoshi paashinipaeni atziri. Roojatztri yotagaeyantakarini, ikantziri:

—Tee pikameethateeyini. Pikowaeyawitani piñeeyenanimi notajonkan-teemi eejatzi, omaanta eero notajonkantzi. Apatziro pikenkithashireeyaa Jonaashini piyotantyaari: ³⁰ paerani iniyakiri antari omani. Okaatzti 3 imaakoktaki inthomaenta, roojatzti ishitowantanaa ipaanteki, ryaatantanaka riyoteeri niniweejatzti. Tema rotyaatkiri Tajorentsi. Ari nokimiteeyaa iinja naari piyoteeyantyaarini rotyaatkina Tajorentsi: tema nopoñaaka janta jenokinta natziritapaaki jaka kipatsiki. ³¹ Eejatzi rowaga iwinkathawotenii sheewajatzti, oponaaka inteeena kameetha, paashiniki kipatsi. Paerani oponaaka inteeena okemijanantariri Sharamooni. Okowaki riyotakaaperotero riyotaantziri. Pamine, nanaakoperotakiri naaka Sharamooni niyotzi, omaanta eeroka pitheenkaeyakinani. Iinja, aririka ipiyoteeyerini Tajorentsi maawaeni kamatsiripaeni, ikantteeyemini: “Eenitatsi pantani: pitheenakiri Notyaantanewo. Rooma roori rowaga iwinkathawotenii sheewajatzti, tema riro aapatziyakaakaworini okaatzti ryotaakirori Sharamooni”. ³² Eejatzi ikimitaka riraga niniweejatzini: raapatziyakari Jonaashini. Ikenkithashireeyanaani, ipakagaeyeeroni kaari kameethatatsi

ranteeyawitarini. Nanaakotziri naaka Jonaashini, omaanta eeroka tee paapatziyeyanani. Iinja ikantem i Tajorentsi: "Raapatziyakarini niniweetjatzi Jonaashini: omaanta eeroka, ¿iitaka kaari paapatziyantari Notyaantanewo?"

*Ikenkithatakotziro Jesoshi ootamentotsi
(Mt. 5.15; 6.22-23)*

³³ Eejatz i kanteeyakirini Jesoshi:

—Aririka poonthoteri ootamentotsi, ¿arima pimanakiri tsikarika? ¿Arima potetakiri kantziriki? Tema powapiintziri jeñokiini ijekapiintzira, pikoñaatakotantyaari. ³⁴ Iroka oki okimitawito ootamentotsi ashi awatha. Okameethazirika oki, ari añeyakironi oetarikapaeni. Omaanta teerika okameethatzi, eero añiiro oetarikapaeni, okimitaka akinaki tsiteniriki, tee ayoteeyini tsikarika akinaki. Eejatz i okimita aririka akenkithashireero kameethatatsiri ari antero kameethatatsiri. Omaanta akenkithashireerorika kaari kameethatatsi rootaki anantyaawori kaari kameethatatsi. ³⁵⁻³⁶ Okameethatzi piyotakotya eeroka paapatziyaperotakaririka Tajorentsi. Pimonkaaterorika iroka, ari piyoperotanaki iroñaaka eero pitheenkimatantee. Tema pikimitakotakari ootamentotsi ootaperotachari.

Rootaki ikanteeyakiririni Jesoshi.

*Ashironkaamatsitemiini ari rowashironkagaeyeemini Tajorentsi iinja
(Mt. 23.1-36; Mr. 12.38-40; Rk. 20.45-47)*

³⁷ Roojatz i kantanakiri warijeeyo Jesoshi:

—Thame aate nopankoki, oya.

Roojatz royaatantanakari, rowakaapaakari. ³⁸ Tee ikiwawakota Jesoshi, rootaki rotsikanatantanakariri kameetha warijeeyo. ³⁹ Ikantanakiri rirori: "Eerokapaeni pikenkithashiryaa kopiinteeeyironi okaatzi piñaayitzirini. Omaanta tee pikenkithashiryaa kopiinteeeyironi oetarika jeekayitatsirini pajankaneki. Pametawo pikiwiyo pako, piwatha, piithaari, maawaeni. Omaanta tee pookimaetawo kaari kameethatatsi jeekatsiri pajankaneekira. Pikimitakari atziri kiwawitawori iwajoni ikiwashitakawo jeñokiini, omaanta inthomaekira eeniro ojeeki owanawontsi opathayitakawoni. Omaanta tee pithonkiro pikiwiyo. ⁴⁰ Tee pikenkithashiryaa neenta. ¿Apaziroma riwetsikakiro Tajorentsi pako? Tema eejatz i riwetsikiro pikenkithashiryaa antari. ⁴¹ Pipashitayitawitarini ashironkaenkari koety-eemowitariri, omaanta tee pikaminthaaperotziri, patsiwakashitakawo pipakiri. Omaanta aririka pikaminthaaperoteri paashinipaeni atziri, tema ari pikameethataki. ⁴² Pashironkagaeyani eerokapaeni. Kyaaryo pipagaantapiintawitari Tajorentsi eechonkiini pashi meenta, koraantero, kachaarkishi, omaanta tekira omonkaata ikowakayimiri Tajorentsi. Eeniro pantawitakari kameetha, eejatz i eeniro kaari pantzi. Tee pinintashireperotziri irira eejatz i tee pikaminthaaperotziri paashinipaeni atziri. Okameethatzi piperi Tajorentsi eechonkiini piwankiri, omaanta eero pipeyakotziro pinintashireperoteri eejatz i pantaperoteniri ikowakaakimiri. ⁴³ ¡Ashironkaamatsitemiini eerokapaeni! Aririka ipiyoteeyaa ari aoriiyotzinkarite ifñaaperotantyaari Tajorentsi, pikowaeyini ipinkathateeyemini eeroka eejatz i. Aririka pikinayitanakini pankotsikipaeni, pikowaki kameetha raakameethateeyaperotemini atziripaeni. ⁴⁴ Kyaaryo, rowashironkagaeyeemini Tajorentsi. Pikimitakari kaminkari kitatachari kipatsiki, imanaka; tekatsi yotatsini ari ikineeyini atziripaeni, tee riyoteeyini rootentsimi raatzikakoterimi kaminkari

pathagaentsiri. Eejatzi pikimitaka eerori, pimanayitawitonka kaari kameethatatsi pantayitzirini".

Rootaki ikantakirini Jesoshi warijeeyopaeni. ⁴⁵ Roojatzi ikanantanaka iyotaantzirori rojankinarini Moeseeshi:

—Iyotaantatsiri, okaatzika pikantakiri eejatzi naaripaeni pikijakaakina.

⁴⁶ Rakanakiri Jesoshi:

—Jee, eejatzi eerori rowashironkagaeyemini Tajorentsi. Osheki powanaayitakinirini atziripaeni pikowakaaperotakiri imonkaatero, omaanta tee imatziro. Eejatzi pikimitaka eerori: tee pimonkaateeyironi. Eejatzi tee petakotari riroripaeni. ⁴⁷ Kyaaryo, pashironkagaeyaani. Pimonkaateeyakarini pichariniiiteni rowamagaeyakirini kamanantayitzirorini iñaani Tajorentsi. ⁴⁸ Tema riytakotakina naaka irirapaeni. Eejatzi eerokapaeni owamaantatsiri. Tee pikoyi eeroka paapatziyena. Ari pitzimitakyaarikami paerani eerori, ari powamagaeyakirinimi eerori eejatzi riraga kamanantatsirini. ⁴⁹ Riyotakoeyakimini Tajorentsi, ikantzimi: "Notyaanteniri atziri kenkithatakayerini, omaanta rowamaayitawakirini apaaniapaeni, irira paashinipaeni ikijawakiri, ikemaatsitakaawakyari". ⁵⁰ Eenitatsi panteeyakirini maawaeni: pashi powaeyironi powamaantzi. Riraga itakaantaworini powamagaeyerinimi, roojatzi pikanta iroñaaka eerori pikowaki powamagaeyerini aapatziyeyakaririni Tajorentsi. ⁵¹ Pisheninkateeyakarini owamaakiririni Aweeri. Eejatzi pisheninkateeyakirini owamaakiririni riraga Jakariiyashi: rowamagaetakiri rirori janta Tajorentsipankoki. Eniro panteeyakirini maawaeni, rootaki rowashironkaawentemiri Tajorentsi. ⁵² Pashironkagaeyani eerokapaeni. Piyotaantawitawo rojankinarini Moeseeshi, omaanta pashironkagaeyaani: tema pamatawiteeyakirini ajoriyyotzinkaritepaeni. Tee pikowaeyini piyotakoteri Tajorentsi eerokapaeni, eejatzi tee pikowakagaeyirini ryoteeyerini riroripaeni ryoteri irira.

⁵³ Rootaki ikanteeyakiririni maawaeni, roojatzi ishitowantanaa. Iki-jeeyanakirini riraga warijeeyopaeni eejatzi riraga iyotaantzirori Iwaperite Tajorentsi, eejatzi eekiro rōñaashirenkanakitziri, rojampijampitañakiri oetarikapaeni, ⁵⁴ ikowaeyawitakan ikompitakayaarimi, ipoñaakaantyaariri, raakaanantyaariri.

12

Paamagaeyaawoni warijeeyo ranteeyirini (Mt. 10.28-33, 12.32, 10.19-20)

¹ Ipiyotawenteeyakarini Jesoshi oshekiperoroña atziri, rawitsinaawakagaeyakani. Roojatzi ikanantakari ryotaanewopaeni:

—Paamayaarira warijeeyopaeni, ramatawiteeyiminikari. Roshiyakaawaetashita raapatziyari Tajorentsi, omaanta osheki ramatawantantzi. ² Iiteeyawitakan tektsi yotatsini ramatawiteeyawitakarini, omaanta iinja aritaki ryotakoeyerini maawaeni atziri rashì rowaeyironi ramatawantantzi. ³ Eejatzi eeroripaeni, oetarika pomanawitari pikantziri iroñaaka, ari ikemakoeyeemini iinja. Oetarika pikamantathatantawitariri apaani atziri janta pipankoki, ari itacheronkawaantetanaki ikaemanaki janta ipiyoteeyaninta atziripaeni.

¿Ninka athaawantaperotyari?

⁴ Iroñaaka, notsipaminthari, nokamantemi: eero pithaawantari riraga atziri kowatsiri rowamaemi. Aririka rowamaemi, omaanta apatziro rowa-maawityaawo piwatha, omaanta eero rowamaero pishire. ⁵ Omaanta

riraga Tajorentsi pithaaawantyaari: ikowakirika, rowamaemi ari imatakiro. Omaanta eejatz i kowakirika rotyaantem paamariki kaari tsikanitatisini, ari imatakiro. Rirotakikya pithaaawantya rotyaantzimikari paamariki.

⁶ ¿Ipinaperotama iyaanini shiwankitzinkari? Tee ipinaperota, omaanta riyoteeyirini Tajorentsi: tee ipeyakoeyirini apaani. ⁷ Eejatzi okimitaka, riyoperoyakimini eerori: riyotziro eejatzi tsika okaatzi piishipaeni. Ikempoyeeyakirini shiwankitzinkari iyaanini, tema eerokapaeni ikempoyaaperoeyakimini. Eero pikantashiryaashita, omaanta piweshiryaaawentyaari Tajorentsi. ⁸ Eejatzi piyoteeyakironi iroka nokantemiri: eero pipashiwentakaana, aririka pikamanteeyerini paashinipaeni atziri paapatziyakina, aritaki nokamantakiri Pawa eejatzi ronampiripaeni janta jenokinta pisheninkatakina. Tema naaka poñaachari jenokinta, nokoñaatapaaki jaka kipatsikika. ⁹ Omaanta pipashiwentakayenarika jaka kipatsiki, eejatzi eerori nopashiwentakayemi naari janta jenokinta iinja. ¹⁰ Aririka ikantzimatena atziri, ari imatero Tajorentsi ikaminthayeri, aririka raapatziyeeena iinja, eero ikenkithashireero ranteeyirini. Omaanta aririka ikantzimateyeroni Ishire Tajorentsi, eero ikaminthayimaetari Tajorentsi. Tema tee ikoyi rirori raapatziyena. ¹¹ Aririka ragaetemi janta pankotsiki ipiyotantapi-intarira joriyyopaeni, eejatzi janta kantakowenantatsiriki, eejatzi janta jewatatsiriki, eero pithaaawanteyearini. Eero pikenkithashiryaashitapiintawo: “¿litaka nokanteriri?” ¹² Aririka ragaetemi, ro iyoteemini Ishire Tajorentsi oetarika pikanteriri.

Kyaaryoowa, piñaawenaperotawokari osheki owaagawontsi

¹³ Roojatzi ikantakiri apaani shirampari Jesoshi:

—Iyotaanari, ipanakirini pawani yeevika maawaeni tzimimoeyawitaririni. Tektsi ipena naari. Pikanteri yeeyi ipagaanteena naari rowaagawo.

¹⁴ Rakanakiri:

—Eero nokantziri. ¿Naakama kantakowenantatsiri, nokanantyaariri pirenti?

¹⁵ Roojatzi ikantteeyirini maawaeni piyotawenteeyakaririni:

—Kyaaryoowa: piñaawenaperotawokari rashitayitarini paashinipaeni, eero oweshiryaaaperotakayimi.

¹⁶ Roojatzi roshiyakaawenantakanari, ikantziri:

—Eenitatsi iipatsite ashaagantzinkari. Osheki onintzi pankirentsi kameetha oshookayitanakini iwankiripaeni. ¹⁷ Monkaatapaaka rowiitantlyaawori okithokipaeni, ikempoyaantyaaworimi opankokipaeni roori, omaanta iroñaaka yikitapaaki. Tee omonkaatapaakawo paashini. ¹⁸ Ikenkithashiryaaka ikantziri: “¿Tsika nokanteroka? Tektsi nowantyaawori maawaeni. Jaa, niyotaki iroñaaka tsika nokantero: noshiryaakaantero pankochaanikira, nantakaantee antawopero pankotsi nowantyaawori maawaeni nowankiripaeni, eejatzi maawaeni nowaagawo. ¹⁹ Oshekitaki iroñaaka maawaeni, tektsi koetyeemoteenani. Ojamani okantya, eerooota othonkitaa nowanawo; iroñaaka nomakoree osheki ojarentsi, eero nantawaetzitaa. Iroñaaka nowapiintya, noshinkitapiintya, niweshiryaaawentyaawo maawaeni tzimimotanari”. Rootaki ikenkithashiryaakari ashaagantzinkari. ²⁰ Omaanta ikantziri Tajorentsi: “Tee piyotakota. Iroñaaka tsiteniriki pikame, roojatzi ¿ninkarika ashiteeyawoni maawaeni tzimimoeyawitzimirini?” ²¹ Ñaakiro, tee riyotzi maawaeni kowawitachari roshekeero rowaagawo jaka kipatsiki. Okameethawita ijekimi kameetha ijekanteeyaarimi iinja janta jenokinta. Tema rootaki ikowakiri Tajorentsi.

*Pikanteri Tajorentsi ikempoyaawentemi
(Mt. 6.25-34)*

²² Eejatzi ikantakiri Jesoshi riyotaanewo:

—Eero pikenkithashiryaakoperotapiintawo tsika paye poyaari eejatzi pikithaatyaari. ²³ Tema rirotaki Tajorentsi owañaakimiri. ¿Opomeentsitzotarima iroñaaka ipemi poyaari eejatzi pikithaatyaari? ²⁴ Pikenkithashiryaakotaari tsika ikantari tsimeri jenokiweripaeni: tee ipankitaanta eejatzi tee ikempoyaanta rowanawo pankotsiki, omaanta ipapiintziri Tajorentsi royaari. Pamine, ikempoyaawenteeeyakirini irira tsimeripaeni jenokiweri tema eejatzi eerori ari ikimitemi. ²⁵ ¿ilitaka patsipetashitawori pikenkithashiryaapiintawo oetarikapaeni? ¿Piitzima aririka pikenkithashiryaapiintawo eekiro piyaatatayee pantaripenthakiitanaki? Eerotaatyaaami. Eejatzi ¿arima pimatotakiro pojanthayero pañaantari? Eero pimatziro. ²⁶ Ñaakiro, patsipetashitakawo pikenkithashiryaapiintawo. Tektsi paye. ²⁷ Pikenkithashiryaakotaawo tsika okanta oteyakipaeni. Tee othamaetaanta, eejatzi tee ontyaanta oethaari, omaanta okameethaperotaki. Paerani osheki rowaneenkatanai Sharamooni, omaanta tee ikimiperotawo oteyakipaeni: anaakotakiri, okameethaperotaki irowa. ²⁸ Ñaakiro, rowaneenkatakiro Tajorentsi oteyakipaeni inchashi. Eechonkiini ojeekawita, omaanta intsipaete ojampiyanee. Omaanta eerokapaeni ojamani pijeeki: tema piyotzi ikenkithashiryaaperotakimi eerori. ¿ilitakakya pitheenkantakariri?

²⁹ Eero pikenkithashiryaapiintawo oetarika poyaari, eejatzi oetarika pireri: ikemakayemi Tajorentsi. ³⁰ Tema rootaki rantapiinteeeyirini kaari yotziri Tajorentsi ikenkithashiryaapiintawo oetarika rowapiinteeyaarini. Omaanta eeroka, riyotzitakimiro Pawa Tajorentsi maawaeni koetyeemotakimiri. ³¹ Eerokapaeni pityaawo pikenkithashiryaakoperoteri Tajorentsi eejatzi pipinkathafaperoteri irira, aritaki ipakimiro maawaeni koetyeemotakimiri. ³² Niyotaanewo, osheki inintaperotakimi Pawa Tajorentsi: ikowaperotaki ipinkathariwenteeyemini, ikaminthaaoperoyemini. ³³ Pipimantero pashtayitarini, pipayiterini ashironkaenkari owinawo. Aritaki ipinatakimi Tajorentsi janta jenokinta. Ojeekaperote powaagawo janta: eero opathagae, eero opitsitee, eero ikoshiteeteemi, eero rapeyero kaero. ³⁴ Aririka ojeeki powaagawo jaka kipatsiki, osheki pikenkithashiryaakiro jeekayitatsirini kipatsikika. Omaanta aririka ojeeki powaagawo janta jenokinta, aritaki pikenkithashiryaakopiintakiri Tajorentsi.

*Piwetsikaeyaani, tee piyotzi tsika okaate ipokashiteeyemini Tajorentsi
(Mt. 24.45-51; 25.1-13; Mr. 13.33-35)*

³⁵⁻³⁶ Eekiro ryaatatzti ikanteeyakirini Jesoshi riyotaanewo:

—Paamagaeyaarini piwinkatharite, piwetsikashireeyaani. Piimitakotaari riraga ronampiri ashitawori ipanko. Ryaatati riraga ashitawori iñeeri isheninka raye iina. Raamagaeyaarini ronampiripaeni janta ipankoki. Aririka rareetapaeya ikowapae rashityaawaeniri, eejatzi ikowapae iñaapaero owetsikayitakan kameetha. Aririka otsitenitanee, ikowaki oorentya ipanko. Eejatzi ikowaki ikakite ronampiripaeni, ramitakotantawaeyaariri onampitariri. ³⁷ Aririka iñaapaeri riwetsikaeyakan, ikimoshireeyanakini maawaeni. Riraga ashitawori ipanko ijeekakagaeyerini maawaeni ronampiripaeni, rowakagaeyapaeyaarini. ³⁸ Omawitya tee riyoteeyawityaan tsika okaatzti ipokanteeyaaari: aririka niyanki tsiteniri, rooma rootzimateentsirika okitejite. Omaanta roojatzi iñeeyapaerini ronampiri riwetsikaeyakan

maawaeni, ari ikimoshireeyanakini irirapaeni. ³⁹ Piyotakoteeyakironi iroka nokamantemiri: aririkami riyotemi ashitawori ipanko rooteentsi ipoke tsiteniriki koshitantsiri, tema aritaki ikakitakimi, eero imatziromi ikoshiterimi. Omaanta tee riyotzi tsikarika okaate ipokantyaari koshintzi. ⁴⁰ Eejatzi nokimitawitari koshintzi, tee nokamantzimi tsikarika okaate nopokanteeyari. Paerani nopoñaaka jenokinta, nokoñaatapaaki jika kipatsikika. Iinja nopiaate eejatzi. Pikenkithashireeyenani, paamagaeyeenani: nomapokapaaemikari.

Onampirentsi kyaaryoowentzirori ikanteetziriri eejatzi kaari kyaary-oowenteroni

⁴¹ Ikanta rojampitakiri Peetero:

—Nowinkatharite, ḡapatziroma poshiyakaawenteeyanawoni naakapaeni kameetha? Ejatzima rirori, ḡpikowakima poshiyakaawenteeyerini maawaeni atziri kameetha?

⁴² Rakanakiri:

—Nokenkithatakagaeyatziirini maawaeni kyaaryoowentzirori nokowakagaeyakiririni. Ikimitaka iwaatorote atziripaeni, ikowakaakiri apaani ronampiri ikyaaaryoowenteniri rowakaapiintyaari paashinipaeni ronampiri-paeni. Roojatzi ryaatantaka iwaatorote tsikarika. ⁴³ Aririka rowakaapi-intakaari kameetha, ipokaerika iwaatorote, riweshiryaaawentapaakyari.

⁴⁴ Ikantapaakiri: "Kameetha pimonkaatakinawo. Iroñaaka eero ka amineeyenaworini maawaeni tzimimotanari". ⁴⁵ Omaanta, ikantateyerimi riraga ratzirite: "Eero ipokita nowaatorote". Apatziro ipoñaanaka ikijakijaatanakiri onampirentsipaeni, ipajapajaatakiri: shirampari, tsinani, maawaeni. Iperataka osheki, ishinkishinkitashitaka. Omaanta tee imonkaatziniri ikowakaawitanakariri iwaatorote retakotyaarimi paashinipaeni. ⁴⁶ Paashiniki kitejiri ipokae iwaatorote, romapokapaeri. Rowajankitaapaakiri ronampiri, ikimitakaanteri paashinipaeni kaari monkaateroni ikantawitanakariri. ⁴⁷ Ņaakiro, riyyotawitakawo ronampiri ikowakaayitawitakaririni iwaatorote, omaanta tee ikemijantaperotziri, tema rootaki ipajatakanantyaariri, tema osheki ipajapajaatakaperoteri. ⁴⁸ Omaanta eero rowajankitaaperotziri kaari yotzinkari. Tekirarika riyyoteeri iwaatorote oetaka kameethatatsiri ranteri eero ipajatashitaki osheki. Omaantaka riraga yoperowiteenchari rivotaki ipajeeteri kameetha.

*Iinja osheki ikijawakaawenteeyenani atziripaeni
(Mt. 10.34-36)*

⁴⁹ Eejatzi ikantzi Jesoshi:

—Atayerorika owantsi, taanaka maawaeni. Okimiwitaka iroka, nopoñakika jika kipatsikika nokenkithatakagaeyakirini maawaeni atziri iñaani Pawa, eejatzi nokamawenteri. Apaanipaeni raapatziyawakawo omaanta paashinipaeni tee raapatziyawo inta ikijashitawakina roojatzi rowamaantakinapa iinja. Nokowakaawitakari ranteromi ironaaka.

⁵⁰ Osheki nokenkithashiryaaakotaka ironaaka: rooteentsi nokemaatsiper-tyaawo katsiri. ⁵¹ ḡPiitashiteeyawitanima nopoñashiteeyakirini atziri nomaerinteeeyerini, kameetha raakameethatawakaantyaari? Teewee, omaanta ikijawakaanteeyenani. ⁵² Apaani pankotsi ijekantyaaworika apawakooni atziri, riraga 3 ipoñaashitanakyaari ikijanakiri riraga paashini apitera. Riraga apitera ipiyatatakotzitanakyaari rirori. ⁵³ Apaani atziri ikijanakiri itomi, eejatzi itomi ipiyatztanakyaari iriri. Tsinani okijanakiro ishinto, eejatzi rowaga ishinto opiyaatzitanakyaawo iniro. Tsinani okijitanakawo ewatyereo opiyatakotzitanakyaawo ayiilo.

*Pikenkithashireeya piyotantyaari riyoteemiro Tajorentsi
(Mt. 16:1-4; Mr. 8:11-13)*

⁵⁴ Roojatzi ikanteeyirini piyotawenteeyaririni:

—Aririka piñaakiro antawo tampyaa amakiro menkori otsitenipi thatanaki, pikanteeyini: “Kaakitaki inkaniwee”. Tema piyoteeyakini opariyatye inkani. ⁵⁵ Aririka piñaakiro opiteyaryaanaki piyogo, pikanteeyeni: “Rooteentsi oniyankite ojarentsite”. Tema eejatzti piyoteeyakini. ⁵⁶ ¡Amatawitantaniri! Piyotakoeyawitawoni tsikarika okantya jenoki, eejatzti kipatsi. Tema piyoteeyakini opariyatyeerika inkani. Omaanta tee pikowaeyini piyoteeyeni opomeentsitzimoteeyemini iinja. ⁵⁷ ¿Litaka kaari pikantakotantari okaatzi kyaaryooperotatsiri? ⁵⁸ Aririka raakaanantemiri atziri koriki pireewitziriri, aririka raanakimi kantakotantsiriki. Tekiraatarika rareetakayemi, piwetsikaeri pikanteri: “Eero pikijana, ari nopinateeme iinja”. Rooma eerorika pikantziri rootaki romonkyaagakaanantemiri omonkyaaagamentotsiki. ⁵⁹ Aririka romonkyaakimi, ipinatakaperoetakimiri maawaeni koriki okaatzi pireewitziriri. Eerorika pipiri, eero roemishitowiteemi.

13

Pookaero kaari kameethatatsi pantapiunteeyirini

¹ Roojatzi ipokaki paashini atziripaeni, ikamantapaakiri Jesoshi:

—Riyaateeyawitakan karireeyajatzi paeni janta Jerojareekir rowamaaenirimi Tajorentsi ipira. Riraga kaaripero Peraato rowamaakaanteeyakirini karireeyajatzi paeni janta okaankiitziira ipankoki Tajorentsi, tsikarika rowamaapiintzinirinta ipirapaeni. Ari rowamaakiri itsipatakari eejatzti ipirapaeni. Riraa atziri otsipateeyanakawoni rashira ipira.

² Rakanakiri Jesoshi:

—¿Piitakaakirima riraga karireeyajatzi rirotaki antaperoeyakirorini kaari kameethatatsi ishinetantakariri Tajorentsi rowamaakaanantakariri Per-aato? ³ Nokamantem: tee ro ikamantari. Omaanta eerokapaeni, kyaaryoowa: eerorika pikenkithashiryaa, eejatzti eerorika pookaero kaari kameethatatsi pantapiunteeyirini, aritaki pikimiteeyakarini riroripaeni pithonkakya. ⁴ Eejatzti paerani otziroryaantakari antawo mapipanko janta Shiroeki, atsinakaeyakirini 18 shirampari, ikamaeyakini. ¿Litaka ikamaeyantakarini? ¿Rantaperotakitziiroma kaari kameethatatsi ikamaeyantakarini? ⁵ Nokantzimi: “Tee”. Tema ikimiteeyakarini maawaeni paashini atziri. Eejatzti nokantzimi eerori, pikimityaari riroripaeni eeromi pikenkithashireeyaani, pookaero kaari kameethatatsi pantapiunteeyirini. Eerorika pantziro iroka eerokapaeni, aritaki rotyaantakimi paamariki kaari tsiwakanitatsini.

Rowaga iyeera kaari kithokitatsini

⁶ Roojatzi roshiyakaawenteeeyantakanarini iroka, ikantzi:

—Ipankitakiro atziri iyeera janta roowamashiteki. Ojamanitaki ojeekaki, tee okithokitzi. Riyaatapiintawita raminee okithoki, rowiitemi: omaanta tee okithokitzi. ⁷ Roojatzi ikantziri riraga thamaetziniriri: “Pamine, okaataki 3 ojarentsi nopolakiintawitaka nowiitemi okithokipaeni, omaanta tee okithokitzi maeta eechonkiini. Aminashita okatziya. Pichekero, nopalikitetea oetarakapaeni kameethatatsiri”. ⁸ Rakanakiri thamaetziniriri: “Ari okantawakaata iroñaaaka iroka ojarentsika. Noshewatawakiroota kipatsi amethopanetantanakyaaari, eejatzti nowapiinteniro itziya pipira, kameetha otzimantyaari okithoki. ⁹ Rooma okithokitakirika paashini ojarentsi,

tema kameetha eerokya achekiro. Rooma eerorika okithokitzi, roojatzi nochekantakyaawo".

Retsiyatakotakiro saawaroki Jesoshi kyaantawitawori kamaari

¹⁰ Paashiniki saawaro riyotaantaki Jesoshi janta pankotsiki ipiyotantapi-intarira joriiyopaeni. ¹¹ Eenitatsi janta pankotsiki apaani tsinani kyaantawitawori paerani kamaari itsiyajoemitzifakaakiro. Okaatakotaki 18 ojarentsi otsiyajoemitziwitaka, ashi owakiro otsiyajoemitzitaki: tekatsi okanteeyaa otampatsikatanteeyaaari. ¹² Iñaantakawori Jesoshi, ikaemakiro:

—Pipokanaki, iroñaka netsiyatakoteemi.

¹³ Ipampitawakiro, roojatzi awijakotantanaa. Kameethatanee, okatziyanaa. Okantanaki:

—Retsiyatakotaana Tajorentsi, tema ikameethaperotaki.

¹⁴ Riraga jewawentzirori janta pankotsiki ipiyotantapi-intarira joriiyopaeni ikijanakiri Jesoshi. Ikanteeyanakirini piyoteeyeencharini:

—Okameethatzti antawaateeyeni 6 kitejiri, omaanta aririka mononkaata-paakya kitejiri 7 okameethatzzi amakoryaaperoeyanakini. Eero antawaetzimaetantawo. Aririka pikowaki petsiyatakoeyeeni, pipoke paashiniki kitejiri, eerokya pipoki saawaroki.

¹⁵ Ipiyawaantetanakari Awinkatharite, ikantanakiri:

—¡Amatawitananiril! Osheki pamatawitantashitaka. Tema pantawae-teeyini eeroka saawaroki. Pamine, aririka imiritaki piwaakate saawaroki, tema ari pithatakoryaakoteri paanakiri janta ojeekinta iñaa. Ejatzi pikimitziri piwoorote, maawaeni. Kyaaryo, pineshironkateeyirini pipirapaeni saawaroki. ¹⁶ Omaanta kaari pipira iroka tsinanika, inta pijoriiyotzinkawote. Paeranitaki ikyantawitakawo kamaari kimitaka othatakotaka roori: tema okameethatakí akaminthayero saawaroki, etsiyatakoteero.

¹⁷ Ikemantawakawori iroka, ipashiwenteeyanakanmaawaeni kijeyakiririni Jesoshi. Omaanta riroripaeni paashini atziri riweshiryaawenteeyanakarini Jesoshi, ikanteeyanakini:

—Okameethateeyakini rantayitakirini Jesoshi.

*Jesoshi roshiyakaawentziro moshitaaja eejatzi tapiyakaawori paa
(Mt. 13.31-34; Mr. 4.30-32)*

¹⁸ Roojatzi ikantzi Jesoshi:

—¿Piyoteeyinima tsika ikanta Tajorentsi ipinkathariwenantzi? ¿Tsika nokanteroka noshiyakaawenantemirori? ¹⁹ Oshiyakawo okithoki moshitaaja ipankitziri shirampari rowaneki. Oshookanaki, okimotatanaki, os-hiyawitakawo inchato. Rookantapiintakawo tsimeri jenokiweri imakoryaantapiintawo owaempekikipaeni.

²⁰ Rapiitakiro, ikantzi:

—¿Tsika nokanteroka noshiyakaawenantemirori tsika ikanta Tajorentsi ipinkathariwenantzi? ²¹ Okimitakawo tsinani aakiro tapiyakaawori paa eechonkiini. Otsipataakiro osheki terikopane otapiyantanakari. Oshineyakaanakiro maawaeni, roojatzi antawotantanaka. Ejatzi ikimita riraga atziri. Eenitatsirika apaani antzirori kaari kameethatatsi, rantakagaeyerini paashinipaeni atziri rantero kaari kameethatatsi.

*Pipomeentsiwentyaawo pareetantyaari jenokinta
(Mt. 7.13-14, 21-23)*

²² Ikanaka ikinakinayitakini Jesoshi nampitsikipaeni, riyotaantayitzini. Roshiretakawo riyaate Jerojareeki. ²³ Rojampitakiri apaani:

—Nowinkatharite, ¿tsika ikaateeyinika awijakoeyaatsini? ¿Arima ikaateapaanipaeni?

Rakanakiri:

²⁴ —Noshiyakaawentemiro. Okimiwitakawo okaatzini omoo akyantaayaari jenokinta. Enitatsi osheki kowawitachani riyaatemi jenokinta, omaanta eero imatziro rareeta. Pipomeentsiwentyaawo pareetantyaari janta. ²⁵ Eejatzi okimiwitakawo rantziri ashitawori ipango. Ijeekaki inthomaenta riori, rashitakotaka, riyaawitakiro ashitakontsi. Roojatzi pipokaeyantawitakyaani eerokapaeni, pikantawitapaakyaari: "Nowinkatharite, pashitareenawo, nokyaantyaari". Omaanta ikantawakimi: "Tee niyoteeyimini tsikarika pipoñaa". ²⁶ Roojatzi pikanteeyawitanakyaarini: "Paerani pitsipateeyakinani nonampiki owaeyakan, eejatzi piyotagaeyakinani". ²⁷ Aritaki ikantemi: "Tee niyotzimi. Piyaatee, pipiyanees tsikarika pipoñaaaka. Osheki pantayitzironi kaari kameethatatsi. Tee pikameethatzi". ²⁸ Piñaantakariri Awaraama, Ijaaka, Jakoovo, maawaeni riraga kamanantzirorini iñaani Tajorentsi ijeekaki jenokinta, omaanta eerokapaeni, roepiyawaemi Tajorentsi, eero pimateeyironi pikyaapae. Roojatzi osheki powashiretaperotanakya, piraaperotanakya eejatzi patsikaekiteeyanakyaani, tyakiririri. ²⁹ Ipoñeeyapaakyaani aapatziyariri Tajorentsi intatsikeronta, jakakiroka, katonko, kirinka, maawaeni kipatskipaeni. Ijeekaeyapaakini janta ipinkatharentsitzinta riori. ³⁰ Rareetaperoteeya riraga pitheenkaeyakirini. Omaanta riraga pipinkathateeyawitakarini eero rareeteeyaaani riori: ashi rowaeyeroni ijeekaeyanakini jaka.

Riraaneentakotawo Jesoshi Jerojaree (Mt. 23.37-39)

³¹ Roojatzi ipokantaka apaanipaeni warijeeyo. Ikantapaakiri Jesoshi: —Piyaate paashiniki kipatsi. Íkowaki Erooreshi rowamaakaantemi.

³² Rakanakiri:

—Pikamantakiteri riraga amatawitatantsiri: "Ikantzi Jesoshi: 'Eero noshiya. Nokantyaani nowawijaakooyeriniita kyaantawitariri kamaari eejatzi mantsiyaripaeni: iroñaaka, inkaamani, eejatzi paashini kitejiri. Roojatzi nomonkaatakiro maawaeni' ". Rootaki pikanteriri. ³³ Rootaki nokinakinayitantlyaariini iroñaaka, inkaamani, eejatzi paashiniki kitejiri. Eejatzi okameethatzi nokame Jerojareeki: tema janta aritaki ikamapiintzi kamanantayitzirorini iñaani Tajorentsi.

³⁴ Eejatzi ikantakiri Jesoshi:

—Riraga jerojareejatzi osheki rowamaayitakirini kamanantzirorini iñaani Tajorentsi. Roshemyaapiinteeeyakirini mapiki paashinipaeni rotyaantanewo Tajorentsi. Okimitziriranki tyaapa ojatewirinikitziri iryaanipaeni, eejatzi nokimiwitaka naaka osheki nokowawitaka noipyoteeyerinimi jerojareejatzi: naapatziyakagaeyaarinimi iñaani Tajorentsi omaanta tee ikowaeyini. ³⁵ Pamine, tekatsi amitakoterini iroñaaka, rookaeyirini Tajorentsi, ikantzi: "Ari ikantakaata". Eero iñagaana eejatzi iroñaaka. Iinja, aririka noipyee, ari iñaawaena, eejatzi ikanteeyeeni: "Tema ikameethaperotaki Rotyantanewo Tajorentsi".

14

Retsiyatakoteeri saawaroki Jesoshi aawayinkaripaeni

¹ Paashiniki saawaro ryaatanaki Jesoshi janta ipankoki jewatakagaeyiririni warijeeyopaeni rowakayaari. Paashini warijeeyopaeni inetapitakiri Jesoshi, ikowakowataki tsika ikantya ipoñakaantyaariri ikantakowenantyaariri. ² Ijeeki janta apaani mantsiyari, ari inewootakiri

riraga Jesoshi. Tema aawaayitakini maawaeni iwatha. ³ Rojampitziri riraga iyotaantziroripaeni Iwaperite Tajorentsi eejatzi warijeeyopaeni:

—¿Oameethatzima etsiyatakoteri mantsiyaripaeni kitejiriki amakoreeyatarini?

⁴ Omaanta ari imaeriteeyanakini, tee rakaneentzi eechonkiini. Ipoñaanaka Jesoshi ikathatakiri mantsiyari, retsiyatatakoteeri, roojatzi rotyaanantaari ipankoki. ⁵ Roojatzi ikanantakari riraga aminaperoeyakiririni:

—Tema pantawaateeyini eerokapaeni saawaroki. Aririka ipariyaki piwaakate omooki, tema ari pagaaeri eejatzi.

⁶ Eejatzi imaeriiyanakini.

Eero pikantakaaperoeyani

⁷ Ikanta rotsikanateeyakarini Jesoshi riraga owaeyacharini riyo yagaeyakironi rooperori jeekamentotsi. Ikowaki ijekimoteri okaakini riraga pinkathari iñaaperotantyaarimi. Roojatzi roshiyakaawenteeyakirini Jesoshi:

⁸ —Aririka rakiyotemi pijoriiyotzinkarite, eero pijee kantashitawo jeekamentotsi ijekakerotzira pinkathari. Ari aamaashitya, rareetapaakyaarika paashini owakotyaarini pinkathariperotatsiri,

⁹ roshirinkimikari paashiniki jeekamentotsi riraga kaemakaantakimiri, ikantzimikari: “Eero pijee ki jaka. Ijeekapaakiita rirori pinkathariperotatsiri”. Roojeekaemikari janta othapiki, tema ari pipashiwentanakya. ¹⁰ Omaantakya okameethatzि pijee kapaaki janta othapiki. Roojatzi aririka iñaakimi riraga kaemakaantzimiri, roojatzi ikanantakimi: “Pipokanaki jaka, niyompari, pijee kimo teri okaakini pinkathari”. Ifagaeyemini maawaeni owaeyeencharini itsipateeyakimini pinkathari.

¹¹ Pikantakaaperotashityaarika eeroka apaniroeni pikowaki iñaaperotanteemiri, ari ipashiwentakaakimi Tajorentsi: tekatsi iñaaperotaneemini. Omaanta riraga kaari kantakaaperotachani riroti iñaaperoteri Tajorentsi kameetha, itsipatantyaariri ipinkathari wenante.

Ikenkithatakotakiri Jesoshi kaemakaantawitariri atziri rowakagaea yaarinimi

(Mt. 22.2-14)

¹² Eejatzi ikantakiri Jesoshi riraga kaemakaantakiriri roya:

—Aririka pikaemakaanteri atziri powakaanteeyaaaririni, eero pikaemapi-inteeyirini pisheninkaperopaeni eejatzi riraga ashaagantzinkaripaeni. Aririka powakaakyari, ari rirori ipiyateemi, rowakagaemi iinja.

¹³ Omaanta okameethaperotzi pikaemakaantaperoterira riraga kaari ashaagantayitachani, riraga kijopookitatsiri, riraga kaari kokichaatatsi, maawaeni. ¹⁴ Rooma paata rirori tekatsi ikanteemi ipiyateemi rowakagaeyeemini. Omaanta iinja ipiriinteeyeerini Tajorentsi maawaeni aapatziyeyayarini. Roojatzi ipinaperoteemi rirori Tajorentsi. Eero patsipetashitawo pikaminthaantzi.

¹⁵ Ikemantakariri apaani owaenchari, ikantanaki:

—Tema okameethaperotaki ajeekae janta ipinkatharitzinta Tajorentsi.

¹⁶ Ikantawakiri Jesoshi:

—Ikimitaka apaani shirampari ronkotsitakaantakiro osheki owawontsi, roojatzi ikaemakaantakiri osheki atziri roya. ¹⁷ Onkotsiteeyakani maawaeni. Roojatzi rotyaatakiri ronampiri: “Piyaate, pikamanteeyerini: ‘Monkaataka, onkotsiteeyakani maawaeni, pipoke iroñaaaka’”. ¹⁸ Omaanta tee ikowaeyini riyaateeyeni. Ikantzi apaani: “Owakira namanantakotaki

noepatsite. Niyaate iroñaka naminakitero, kameethatakirika. Pikaman-teeri: ‘Eero ipoki rirori’ ”. ¹⁹ Ikantzi paashini: “Owakira namanan-takiri 10 waaka. Nokowaki naminakitero kameethatakirika. Pikamanta-paeri: ‘Eero ipoki rirori roya’ ”. ²⁰ Ikantziri paashini: “Owakira naaki noena. Tekatsi nokantya niyaate”. ²¹ Ikantaka ipiyanaa riraga ronampiri rotyaantawitari. Ikamantapaeri: “Ikanteeeyini: ‘Eero niyaatzi nowa’ ”. Roojatzi ikijantanaka riraga iwaatorote, ikantanakiri ronampiri: “Ikan-takaata nosheninkapaeni. Iroñaka piyaate janta pankotsikipaeni nampitsi, pikinayitanakini pikowakowayitakiterini riraga kaari ashaágantachani, ri-raga kijopookitatsiri, riraga aashetatzinkari, riraga kaari kokichaatatsi, maawaeni”. Roojatzi riyaatantanaka, ikaemaeyakitzirini, pokaeyapaakini. ²² Ikantaka rareetapaa eejatzi, ikantapaeri iwaatorote: “Niyaatakitzi, nokamanteeeyakirini. Areeteeyapaakani, omaanta tekiraata imonkaata”. ²³ Ikantakiri eejatzi: “Piyaatakite eejatzi janta, pikinayitanakini awot-sikipaeni, pikaemaeyakiterini paashinipaeni ipokanakiita, nokowatzi riy-eikitaperoeyapaakyawoni nopanko. ²⁴ Omaanta riraga nosheninka nitawitakari nokaemakaantawitakari, eero roymaetawo iroka nonkotsi-takaantawitakanarri”.

Rootaki ikenkithatakagaeyiririni Jesoshi janta ipankoki warijeeyo.

*Pipomeentsiwentaperoteniri Jesoshi ikowakagaeyakimirini
(Mt. 5.13; 10.37-39; Mr. 9.50)*

²⁵ Ikantaka paashiniki kitejiri ikinanaki Jesoshi awotsiki eejatzi roya-teeyanakirini osheki atziri. Ipitokashiteeyakarini, ikanteeeyakirini:

²⁶ —Niyotaki pininteeeyirini piripaeni, piniropaeni, piinapaeni, pitomipaeni, pirentzipaeni, pitsiropaeni, maawaeni. Eejatzi eero ka ninteeeyachani apaniroeni. Omaanta pikowaeyakinirika poyaateeyenani, okameethatzi naaka pinintaperoeyenani kameetha. Eerorika pinintaperotana, tekatsi pikantya pipeyeyea niyotaanewo. ²⁷ Eejatzi eerorika pipomeentsiwentaperotanawo nokowakagaeyakimirini, eejatzi eerorika poyaataperotana, tekatsi pikantya pipeyeyea niyotaanewo. Pikenkithashireeyaani tsikarika pikantyaari. ²⁸ Okimitaka aririka ikowaki rantakaantero shirampari ipanko, rityaawo rojampiteri riraga wetsikenirini tsika okaate opinatya. Roojatzi raminantakyaari iyorkite monkaatakarika. ²⁹ Eerorika ritawo raminiri tsika ikaatzi iyorkite imonkaatyaarika, aamaashitya aririka ikompitakyaawo. Apatzirorika imonkaatakawo otzinkamipankepaeni ari ikaatapaaki iyorkite rootaki kaari imatantawo ithonkakaantero. Roojatzi ishirontawentyaari atziri.

³⁰ Ikanteeeyeni: “Paminerri, riwetsikakaantawitaka ipanko, omaanta tee ithonkakaantziro. Tee itzimaperotzi iyorkite, injii, injii”. ³¹ Eejatzi riraga pinkathari, aririka ikemakotakiri paashini pinkathari rotyaantakiri 20.000 joraaro rowayiritantyaariri. Aririka ikaate ijoraaroete 10.000, tee riyoperotzi okameethatzirika romanatawakiri riraga pokatsini. Tema rityaawo ikaemaeyerin isheninkapaeni ikenkithawaetakagaeyerini riyotantyaari okameethatzirika romanatya roepiyantyaariri riraga pokashiterini.

³² Aririka ikanteeeyakini isheninka: “Ari ranaakoeyakaeni, oshekiperotaki. Eero amatziro apiyatari”. Ikanteeyanakini: “Tekira rareeteeyaani, thame otyaante apaanipaeni asheninka rojampiteri oetarika ikowakoteeri eerokya rowayiritantee”. ³³ Eejatzi pikimitya eeroripaeni: aririka pikowaki poyaatena, pityaawo pikenkithashireeya tsika okanteeyarini maawaeni tzimimoeylimirini. Pikenkithashiryaaperoeyakyaarinika: roojatzi pookaeyeeroni, poyaataperoeyanakinani naari. ³⁴⁻³⁵ Nokowaki riraga aapatziyanari riyoteeri paashinipaeni atziri ijeekae kameetha,

rooma eerorika riyoteeri, tee imatziro rantero nokowakaayitawitakaririni, ratsipetashitakawo ijeki. Ikimikitakawo tziwi kaari katyotatsini: tema tee okameethatzi, ookapiintziro. Pikenkithashiryaaoperotyaaawori. nokanteeyakimirini piyotakoperotyaaawori.

Rootaki ikanteeyakiririni Jesoshi oyaateeyiririni.

15

Ikenkithatakotakiri Jesoshi riraga owisha peyachari (Mt. 18.10-14; Jowa 10.1-18)

¹ Ijeekaeyini janta osheki joriiyo piyotziriri iyorikite ijoriyyotzinkarite eekiro ipiri riraga oroomajatzi. Ikaateeyakiririni paashinipaeni antapiintzirori kaari kameethatatsi. Ikemijantapiinteeeyakiririni Jesoshi ikenkithatzi. ² Ikiñaanikowenteeyakiririni riraga warijeeyopaeni eejatzi riraga iyotaantzirori Iwaperite Tajorentsni:

—Tee okameethatzi iroka rantakirika Jesoshi: itsipatapiinteeeyakarini kaari kameethatayitatsini, rowaeyani.

³ Roojatzi roshiyakaawenantanakanari iroka Jesoshi, ikantakiri:

⁴ —Pamine, ikaaterika powishate 100, ipeyakyaarika apaani, tema ari pookanakiri riraga 99 janta keshiiki, roojatzi piyatantanakya janta teenta ijeki atziri, pikowakowataateri peyeenchari. Pikowakowateeririka roojatzi piñaanteeyaaari. ⁵ Aririka piñaapaeri, tema osheki pikimoshirewentaapae. Tema ari pamaeri pinateeri, powapaera janta ijekaeyininta paashinipaeni owisha. ⁶ Eejatzi, aririka pareetapaeya pinampiki, tema ari pikaemaeyapaakirini pisheninka, pikireeyerini: “Thame akimoshireeyeni: ipewawitaka nowishate, noñaagaeri eejatzi”. ⁷ Eejatzi ikimita rirori Tajorentsni. Aririka ikenkithashiryagaeya apaani antzirori kaari kameethatatsi, rookaerorika rantziri, iroñaaka Tajorentsni ikanteri maawaeni jeekatsiripaeni jenokinta: “Thame akimoshirewenteeyerini”. Tema tee riro ikantakotziri riraga paashinipaeni kameethateeyatsirini.

Ikenkithatakotakiri Jesoshi koriki peyachari

⁸ Eenitatsi paashini ikantakiriri Jesoshi:

—Paashini eejatzi noshiyakaawentemiro: eenitatsi tsinani oorikite, ikaatzi ikithoki 10. Aririka ipeyakyaa apaani, okowakowayiteerini. Aririka otsitenitanaki, oonthoteri ootamento, oñaantyaari, eejatzi opishitaperotero pankotsi aminayiteerini otyaakitakiririka kipatsi. Okanta okowakowateeri roojatzi oñaanteeyaaari. ⁹ Aririka oñaagaeri, okaemaeyerini osheninkapaeni, okanteri: “Thame pitsipateeyenani, akimoshireeyini. Noñagaeri eejatzi noorikite peywiteenchari”. ¹⁰ Eejatzi nokamanteeyemini: eejatzi ikimitaka riraga Tajorentsni. Aririka ikenkithashiryagaeya apaani antzirori kaari kameethatatsi rookaerorika rantayitzirini, kimoshiretanaki Tajorentsni, eejatzi ronampiripaeni.

Ikenkithatakotakiri Jesoshi apaani ewankari shiyapithatariri Iriri

¹¹ Paashini eejatzi roshiyakaawentakiniriri Jesoshi, ikantzi:

—Eenitatsi shirampari ikaatzi itomi apite. ¹² Riraga impaetatsiri ikoñaatzi ikantakiri Iriri: “Pawa, nokowaki pipena iroñaaka kashetani powaagawo eejatzi piyorkite pipanakinari paata aririka pikamae”. Roojatzi ipakiri.

¹³ Paashini kitejiri ipimantanakiro rowaagawo ipawitakariri Iriri. Roojatzi ryaatananaki intena, paashiniki kipatsi, raanakiro maawaeni jeekimotziriri. Janta ryaatakinta, tee ijeekapaaki kameetha, rootaki rapaatantakawori maawaeni rowaagawo eejatzi iyorikite. ¹⁴ Roojatzi

ithonkatakotantapaaka, tekatsi jeekimotaneerini, eejatzi tee añaagaero rowaeyaarini. Osheki rashironkaawaetaka ewankarika, aaperotakiri itashe. ¹⁵ Rootaki ikinakinatantanakari ramini antawaerontsi. Ari iñaapaakiri ashitachari osheki ichaanchote. Ikantapaakiri: “¿Pikowakima nantawaetemi?” Ikantawakiri: “Jee, nokowaki paminenari nochaanchote”. ¹⁶ Ikantaka raminawitanari ichaanchote, ipapiintziri rowanawo: rowaga oshiyawitawori otaki intsipa. Omaanta riraga ewankari tekatsi perini rowanawo, ikowawitaka rakiyoterimi chaancho, omaanta riraga ashitariri tee ishinetziri. ¹⁷ Roojatzi ikenkithashiryaanaka ikantzi: “Janta pawakinta ikaateeyini osheki ratzirite. Eeniro rowaeyerini maawaeni. Ikemapiinteyani kameetha, eejatzi otzimagaantzi owanawontsi. Omaanta naaka jaka aaperotakina notashe, rooteentsi nokame. ¹⁸ Iroñaka nopiyee janta pawaki, nokantapaeri: ‘Pawa, tema nopiyathatakimi tee nokemijantaperotziro okaatzi pikantawitakinari, eejatzi tee naapatziyari riraga Tajorentsi. Eenitsati nantzimotakimiri. ¹⁹ Eero iroñaka pitomintaana inta pikimitakayeena ponampiri, naaka thamaeteemironi powanipaeni’”. ²⁰ Roojatzi ipiyanta, ikinanee awotsiki. Ikantanaa, rootaatsi rareeteeyaa ipankoki iriri. Ikanta irira iñiitawaari janta inteenaa, ikinapae. Osheki ikimoshiretanee, retakoshiryaawaaari. Ishiyashitawaari, rawithakitawaeri, ithowootawaeri, ikaminthaaoperotawaeri. ²¹ Roojatzi ikanantapaari itomi: “Pawa, tema nopiyathatakimi tee nokemijantaperotziro pikantawitakinari eejatzi nopiyathatakari Tajorentsi. Eeniro osheki nantani. Tee okameethatzi pitominteena iroñaka, inta pikimitena ponampiri”. ²² Omaanta iriri ikaemakiri ronampiripaeni, ikanteeyirini: “Pishintsiteeyini paakitero kithaarentsi kameethari, pikithaateri notyomika. Eejatzi paakiteniri aniiyo, poyaankeniri rakoki. Paakiteniri ijapatote, pijapatotapaeri. ²³ Eejatzi paakiteniri waaka ewonkiri, tzimaperotatsiri iyeenka, powamayeniri. Thame maawaeni akimoshirewentawaeri notyomi, owaeyaani maawaeni. ²⁴ Noetakaawitaka eero noñaagaeri, ikimitzimotakina kamawitaka. Omaanta iroñaka kimitaka añaagae eejatzi, noñaagaeri. Ipeyawitaka, iroñaka ipokae, añaayiteerini eejatzi”. Osheki ikimoshireeyanakini rowakagaeyakarini. ²⁵ Eeniro paashini itomi, riraga jewataneentsiri rantaritzi, ikantanakawo, riyaatzi ithamaetzi janta owantsiki: tee iñawaera rirentzi rareetantapaari rirori. Ikanta ipokae, rokaakintapaowo pankotsi, ikemapaatziiri ijonkateeyini eejatzi iwaerateeyini. ²⁶ Ikaemapaakiri apaani onampirentsri, rojampitakiri: “¿Oetaka piwaeratawenteeyirini?” ²⁷ Rakanakiri: “Areetapaa parentzi. Rowamaakaantawakiniri piri waaka ewonkiri riraga wathantzi, rowakagaeyakarini maawaeni atziri. Osheki riweshiryaawentawaari parentzi ipokae, kameetha rareeta tekatsioyerini”. ²⁸ Roojatzi ikijantanaka rirentzi, tee ikoyi ikyapae pankotsiki. Riyowanaki iriri, ikantawitawaari: “Pipokanaki, notyomi, pikyaapae. Piweshiryaawentawaeyaari parentzi”. ²⁹ Omaanta rakanakiri itomi: “Eerowa, pawa, nokoyi nokantemi. Paerani nantakimiro oetarikapaeni pikaminaakinari, tee nopiyathaneentzimi eechonkiini. Omaanta tekatsi pipaneentena naaka eechonkiini nowakaayityaaririni notsipamintharipaeni. Tee pipaneentana apaani chiiwo. ³⁰ Inta riro pikowateekikya yeeyira piperi, riyafapithawitakimi inteenaa ithonkitakimiri piyorikite; ipinayitakirorini tsinanipaeni imayempitziro. Iroñaka ipiyapaaga powamaakiniri waaka wathantzi”. ³¹ Rakanakiri iriri, ikantanakiri: “Notyomi, akantatyaaani kijokiro owawakaa. Eerokataki ashiteeyaawoni maawaeni owaagawontsika aririka nokamae. ³² Omaanta

okameethaperotzi aweshiryaaawentawaeyaari pirentzi. Okimiwitaka ikamaki, aetakawitaka eero añaagaeri eejatzti. Iroñaaka kimitaka añaagae eejatzti añaagaeyerini. Ipeyawitaka, iroñaaka añaagaeri eejatzti. Thame aweshiryaaawenteeyaaarini.

Okimitaka iroka, ari ikimitee Tajorentsi aari inintaperotakae, ajeekimoteririka kameetha eejatzti eerorika ajeekimotziri kameetha”.

16

Ikenkithatakotakiri Jesoshi amatawitziriri iwaatorote

¹ Ejatzti ikantakiri Jesoshi riyotaanewo:

—Eenitatsi eejatzti ashaagantzinkari apaani kempoyaawitanariri iyorikite, maawaeni. Roojatzi ikamananteetakari ashaagantzinkari: “Ikoshitakimira riraga kempoyaawitzimiriri piyorkite”. ² Roojatzi ikaemakiri, rojampitakiri: “¿Kyaaryooma iroka ikanteetakinari? ¿Pikoshitakina noorikite? ¿Litaka pikoshitantanari? Iroñaaka poepiyeenari maawaeni noorikite, nokowaki pojankinatenawo iwaeropaeni maawaeni ireewitanari. Iroñaaka eero noshinetaneemiri eejatzti noorikite”.

³ Ikantaka ikenkithashiryaanaka rirori: “Eero iroñaaka ishinetanaana nowaatorote nokempoyagaeniri iyorikite. ¿Tsika nokantyaaka iroñaaka? Tee noshintsiwathatzi nothamaetantyaari. Ejatzti nopashiwentaka nonethaakoteri atziri ipashitena koriki. ⁴ ¡Jaaa! Niyotaki iroñaaka oetaka nanteri. Iroñaaka nokaminthagaeyerini maawaeni ireewiteeyiririni nowaatorote, raakameethatanteeyenarin naari janta ipankoki: eero ishinetantana nowashironkaawaetya”. ⁵ Ikanta ikaemaeyakirini maawaeni ireewiteeyiririni iwaatorote. Rojampitakiri riraga jewatapaentsiri ipokapaaki, ikantziri: “¿Tsika ikaatzika pireewitziriri nowaatorote?”

⁶ Rakanakiri: “Nireewitziri osheki oyeenka oriwo. Okaatzi nireewitziriri yeekitachani 100 wiroo owaanini”. Ikantawakiri: “Jee, kyaaryo. Eeniro iroka paperi ojankinataka pireewitziriri. Payero paperika, pojankinateniri paashini, pikante: ‘Nireewitzimi 50 wiroo owaanini yeekitatsini oyeenka oriwo’. Amatawiterita nowaatorote”. Rakanakiri ireewitziriri “Jee, kameethataki”. ⁷ Roojatzi ishitowanee jewatapaentsiri, ipokapaaki paashini. Rojampitawakiri: “¿Tsika okaatzika pireewitziri nowaatorote?” Rakanakiri: “Osheki nireewitziri teriuko, okaatzi yeekitatsini koshitaariki 100”. Roojatzi ikantanakiri: “Eeniro paperika pojankinatakiniriri paerani nowaatorote. Kyaaryo, ari okaatzi pireewitziri 100. Thame amatawiterita. Pookaero iroka paperika; pojankinateniri paashini, pikanteri: ‘Ari okaatzi nireewitzimi 80 koshitaari, yeekitatsini teriiko’”. Roojatzi rojankinatakiniri. ⁸ Ikanta riraga iwaatorote riyotantanaka ramatawitakiri. Ikantanaki: “Tee okameethatzi ramatawitakina, omaanta osheki riyothanitzi tsika ikantya rayero koetyeemotakariri”. Kyaaryo riraga theenkantsisri riyothanitzi ikenkithashireeya tsika ikantya rantero kaari kameethatatsi. Ari ikimityaami rirori riraga aapatziyariri Tajorentsi ikenkithashiryaaperotyaawomi rantero okaatzi kameethatatsisri ikoyiri Tajorentsi. ⁹ Iroñaaka nokamantteeyemini: eenitatsirika piyorkite, pikaminthagaeyerini paashinipaeni, pipaeyerini koetyeemotariri rirori. Ari ipinaperoteemi eerori Tajorentsi iinja. Aririka pikamaeyakini, ari pookanakiro tzimimoeyimirini, omaanta raakameethateeyawaemini rirori janta jenokinta. Tema eenitatsi janta pjeekantyaari kaari thonkanitachani. ¹⁰ Eerorika pikoshitzii eechonkiini eero eejatzti pikoshitzii osheki. Omaanta pikoshiterika eechonkiini, eejatzti aritaki pikoshitaki osheki. ¹¹ Aririka pikoshitayiteni oetarikapaeni, riyotaki

Tajorentsi tee paapatziyari rirori: eejatzi eero isheninkatzimi, eero pimatziro piñiiro inampi. ¹² Eerorika pamitakotantari atziri piyorikite itajonkawentawitakimiri Tajorentsi, ñtsika ikantyaaka ipinatantawaemiri iinja jantajenokinta? ¹³ Eero pimatziro pantawaetziniri kameetha enitatsirika piwaatorote apite. Omaanta apaani pinintaperotanaki, inta paashini poonanakyaari. Piweshiryaaawentyaari apaani, omaanta riraga paashini, eero piweshiryaaawentari. Eejatzi okimita iroka, aririka pikenkithashiryaakopintyaaari koriki, eero pimatziro poyaataperotziri kameetha Tajorentsi.

Riraga Jesoshi riyotaakiri warijeeyopaeni ikowakaakiriri Tajorentsi

¹⁴ Ikanta ikemaeyantawakaririni warijeeyopaeni ikantakiriri Jesoshi, roojatzi ishirontawenteeyantanakaririni. Ikowaperotakiita rashaagantya osheki, rootaki ishirontawenantanakariri Jesoshi. ¹⁵ Roojatzi ikanantakari:

—Pikowaeyawitakanii teeyemini atziri pikameethateeyakini, omaanta riyoteeyakimini Tajorentsi. Iñaaperoeyawitakimini atziri, omaanta riyotaki Tajorentsi tee pikameethateeyini pajankaneki. ¹⁶ Paerani okameethatzini paapatziyakawoni rojankinarini Moeseshi eejatzi riraga kamanantayitzirorini iñaani Tajorentsi. Omaanta areetapaaka iroñaa Jowa, riraga kaawoshitakotziriri Tajorentsi. Paashini iroñaa ikowakagaeyakimiri Tajorentsi. Riraga Jowa ritanakawo ikamanteeyakimini kameethatatsiri: rooteentsi ipinkathariwenteeyemini rirori. Ikowaperoyawitakanii atziri iñeeri. ¹⁷ Inja opeyaneeya kipatsi eejatzi jenoki, omaanta eero opeyaa roori rojankinarini Moeseshi: ikowaki Tajorentsi pikantyaani pikemijantero piyotantyaari pijkeekii kameetha. ¹⁸ Tema okantzi: “Eero piñaathatzimotawo piina paashini tsinani”. Aririka pookaero piinapero pagaarika paashini tsinani, piñaathatzimotakawo piinaperoni. Eejatzi tee okameethatzipayero tsinani ookiriri oemii.

Ashaagantzinkari eejatzi Raajawo (Mt. 19.1-12; Mr. 10.1-12)

¹⁹ Ikanta ikanteeyakirini Jesoshi:

—Eeniwitachashirampari ashaagantzinkari, osheki iithaari kameethamawotatsiri, osheki rowaneenkataka. Maawaeni kitejiriki rowakagaeyakarini isheninka owanawontsi pinaperotachari. ²⁰ Enitatsi eejatzi ashironkaaperotachari iitachari Raajawo. Ojonkayitakini ijoepaeni opathaakayitakirini. Ari ijeekapiintawita janta ikyapiintzinta riraga ashaagantzinkari ipankoki. ²¹ Osheki rowashironkaawaetaka, aaperotakiri itashe. Ikowawita raperotayiteronimi rowanawo rowariyaayitzirini ashaagantzinkari jaawiki. Eejatzi riraga otsizipaeni ithoyitapaakirini ipathaawokipaeni. ²² Roojatzi ikamaki rirori. Riyaatashitakiri ronampiripaeni Tajorentsi, rawaeri, roojatzi raantanaari janta ijeekinta Awaraamani. Okameetheeteenta osheki. Eejatzi ikamaki riraga ashaagantzinkari. Ikitateetakiri kipatsiki. ²³ Osheki rashironkaaperotaka iroñaa riraga ashaagantwichatarini janta jaawiki paamariki, osheki ikemaatsitakawo. Raminanaki janta ijeekinta Awaraama, iñaataatzii eejatzi riraga Raajawo. ²⁴ Ikaemakotakiri: “Pawa Awaraama, petakotena. Pikanteri riraga Raajawo rowiinkeroota rakoempeki iñaaki, ipokeeta jaka ipitenkaatenaata nopaanteki iña. Oshekiperonashironkaaka jaka paamariki”. ²⁵ Omaanta ikantakiri Awaraama: “Notyomi, pikenkithashireeya tsika pikanta paerani pijkeekini kipatsiki. Kameetha pijkeekawitani, omaantakya riraga Raajawoka osheki rashironkaawitakanii. Tema iroñaa kameetha ijeekapae rirori jaka, rooma eeroka osheki pikemaatsitakawo janta. ²⁶ Eejatzi pijkeekakotaki intatsikeronta impeeta,

tekatsi ikinashitemi Raajawo. Eejatzi eerori, tekatsi pikinashiteri pipokantyaari jaka".²⁷ Roojatzi ikanantakari: "Eerorika pimatziro pikaminthayena, nokowaki potyaanteeri Raajawo kipatsiki: janta ipankoki pawani.²⁸ Ijeekinta janta yeeyipaeni, ikaatzi apawakooni. Nokowaki ikamantapaeri, ipokikari riori jaka. Paminena naari iroñaaka, osheki nokemaatsitakawo jaka".²⁹ Roojatzi ikantziri Awaraama: "Enitatsi rojankinarini Moeseeshi eejatzi rojankinarini paashini kamanantayitzirorini iñaaani Tajorentsi. Rootaki raapatziyeeayaarini".³⁰ Ikanta rakanakiri: "Jee, eeniro naawita. Omaanta aririka iñagaeri kamaentsiri ipiriinteeya, aritaki ikenkithashireeyaneeyaani, rookaero kaari kameethatatsi ranteeeyirini".³¹ Ikantanakiri Awaraama: "Teerika raapatziyawo Iwaperite Tajorentsi, eero eejatzi raapatziyari kaminkari ipiriintawiteeyarika".

17

Eero pantakaeri atziri kaari kameethatatsi (Mt. 18.6-7; Mr. 9.42; Mt. 18.21-22)

¹ Ikanteeyakirini Jesoshi riyotaanewopaeni:

—Nokamantemi: ikantyaani eenitatsi atziri antakagaeyeririni paashinipaeni atziri kaari kameethatatsi. Omaanta rowashironkagaeyeririni Tajorentsi riraga antakayiriri paashinipaeni kaari kameethatatsi.² Aritaki rowashironkaaperoeyeririni antakagaeyiririni eentsipaeni kaari kameethatatsi. Okameethawitami riteetyaarimi roojoteetenirimpi mapi antawo ikentsiki rowiinkaeterimi. Rowiinkaetatyeyeririkami tekatsi antakaaneerinimi eentsi kaari kameethatatsi.³ Kyaaryoowa, pantakaerikari atziri kaari kameethatatsi.

Eejatzi ikantakiri:

—Aririka piñaakotakiri pisheninka rantero kaari kameethatatsi, pikenkithatakayeri. Aririka rookaero rantziri, pikaminthayeri, paakameethateeri.⁴ Aririka ikijemti atziri, ikoshitemirika, ikantzimatemirika, oetarika. Omaanta aririka ikanteetemi: "Tee okameethatzi nantzimotakimiri, osheki nowashiretakota, eero napiiteero, pikaminthagaena pipeyakotenawo nantzimotakimiri", ari nokowaki pikaminthayeri. Aririka osheki rapiteero rantzimoteemiro, eejatzi osheki ikantemi: "Pikaminthayena pipeyakotenawo nantakiri". Tema nokowakaakimi eejatzi osheki pikaminthayeri: eero pikijawentziri.

Pameentaperotakaeri Jesoshi (Mt. 21.22; Mr. 11.22-26)

⁵ Riraga rotyaanewopaeni ikantakiri Awinkatharite:

—Nameentawitzimi, omaanta nokowaperotaki piyoteena nameentaperotantemiri.

⁶ Rakanakiri:

—Pameentenarikami eechonkiini, pikowakirikami, pikanteri Tajorentsi iponchakireero inchatowa, rowiinkero janta inkaareki. Tema ari imatakimiromi, rowiinkaatemiro.

Rantayiterini omperatatsiri

⁷ Eejatzi ikanteeyakirini Jesoshi:

—Okimitaka eenitatsi shirampari ratzirite. Ithamaetapiintziniri eejatzi raminapiintziniri ipira. Aririka ipokae ratzirite pankotsiki, ¿iitaka ikantawaeriri iwaatorote? ¿Arima ikantawaeriri: "Pipoke, pijkeekapae, powapaeya"? Eero ikantziri.⁸ Tema ikantashitawaeyaari iwaatorote: "Iroñaaka ponkotsiwentapaena noyaari; eejatzi nomiriteri,

pamakinawo. Aririka nokemapaakya, ari powanakya eerori". ⁹ Eejatzti tee ikantziri: "Ariwee, pantakinawo"; tema rametakawo apatziro rantawaetaipiintziniri iwaatorote. ¹⁰ Eejatzzi eeroripaeni, okameethatzi pantapiinteeeyinirini maawaeni ikowakaagayakimirini Tajorentsi. Roojatzti okameethatzi pikante: "Apatziro nantakiniri ikowakaakinari. ¿ilitaka nokantakaaperotantyaari? Tekatsi okantya Tajorentsi ipinatantenari".

Retsiyatakoeyakirini Jesoshi 10 patheenkari

¹¹ Ikanta rowaaganaa Jesoshi, ikinayitanakini okaakini oweyaantawonta Jamaaryaki eejatzzi Karireeyaki. Roshiretakawo rareetya Jerojareeki. ¹² Roojatzti rareetapaaka paashiniki nampsiti, iñeeyawakirini patheenkaripaeni, ikaateeyini 10. Ikatziyeeyakan eekitziroeni jaga.

¹³ Ikaamakoeyawakirini:

—Jesoshi, eroka nopinkathateeyirini, petakoeyenani, petsiyatakoeyenani.

¹⁴ Iñaantakariri riraga Jesoshi, ikanteeyakirini:

—Piyaateeyeni janta ijekinta ñaanakowenantatsiri, poñaagapaeyaari.

Ari ikemijantaperoeyakirini, riyaateeyanakini. Janta niyanki awotsi ari retsiyatakoeyaneeni. ¹⁵ Iñeeyantawaani etsiyatakoeyaneeni, ipiyanaa apaani janta Jesoshiki. Icheraaperotaki, ikantzi:

—Tema ikameethatki Tajorentsi, retsiyatatakotakina.

¹⁶ Rotziwerowashitapaakari Jesoshi, roeyotashitaperotakari, ipinkathata-perotakiri, ipaasonkitaperotapaakiri. ¡lpoñaa irika shirampari Jamaaryaki!

¹⁷ Roojatzti ikantakiri Jesoshi:

—Tema ikaateeyini netsiyatakoeyakirini 10. ¿Tsikama paashinipaeni?

¹⁸ Apatziro irika paashinijatzitsatsiri atziri ipiyashitapanataana, ipaasonkitakina, eejatzzi iñaaperotakiri Tajorentsi. Rioma ashenkaperoperaeni naawita, tee ipiyapanaataa ipaasonkitantyaariri rirori.

¹⁹ Roojatzti ikantziri otziwerowashitakariri:

—Iroñaaka pikatziyee, okameethatzi piyaatee. Pameentakari Tajorentsi, rootaki pawijkotantaari.

Tsika ikantari Tajorentsi ipinkathariwenantzi

(Mt. 24.23-28, 36-41)

²⁰ Riraga warijeeyopaeni rojampiteeyakirini Jesoshi, ikantziri:

—¿Tsika okaate ipoke Tajorentsi ipinkathariwenteeyanteerini?

Rakanakiri:

—Aririka ipinkathariwenante Tajorentsi, omaanta eero piñaaperotziri.

²¹ Eero pimatziro pikante: "Eeniro jaka", eejatzzi: "Eeniro janta". Kyaaryo, eero ikofiaataperotzi: okameethatki pipinkathashireeyerini maawaeni.

²² Eejatzti ikanteeyakirini riyotaanewopaeni:

—Tema naaka poñaachari jenokinta, nokoñaatapaaki jaka kipatsikika, omaanta eero nokantatyeeyaani kijokiro nowaeyeemini. Inja pikowaeyawitaneeyaani piñagaenami eejatzzi, omaanta eero piñagaana.

²³ Eejatzti aririka ikanteetemi: "Piyapaa Jesoshi, ari ijekapaaki janta". Paashini ikanteetemi: "Ari ijekapaaki jaga". Omaanta kaarima naaka. Eero patsipetashitawo piyaatashitana. ²⁴ Aririka omonkaataperotapaakya nopolanteyeyari, ari piyotaperotawaena. Okimitaaganki aririka aamorenkiranki maawaeni jenoki morek, morek, eejatzzi nokimitapaeya naari aririka nopyiee eero nomanapaa, eero pikompitawaana.

²⁵ Omaanta nityaawo nokemaatsitayitaawoni osheki katsiri, eejatzzi itheenkaeyenani atziripaeni. ²⁶ Ikimitaka paerani ijekantakari Noeni tema maawaeni paashinipaeni atziri itheenkaeyakirini Tajorentsi,

eejatzi rantakiro osheki kaari kameethatatsi. Eejatzi ikimiteeya iinja atziripaeni aririka nopyiee naari riraga atziriperotapaentsiri, osheki itheenkaeyeenan rirori.²⁷ Rowapiinteeyan paerani, rirapiinteeyini, raapiinteeyironi iinapaeni, raakaayitakironi rishintopäni oemi, paashini oetarikapaeni. Ari ikanteeyani, roojatzi rotetantanaka Noe ipitoki. Roojatzi opokapaaki antawo inkani, oonkanaka maawaeni kipatsi. Ikamaeyanakini maawaeni theenkantatsiri.²⁸ Eejatzi ikimiteeyakan iisheninka riraga Roote, jeekaeyatsirini Joroomaki: rowapiinteeyan, rirapiinteeyini, ikinayitanakini riyomparityitanakani, ipankitayitzironi rowayitarinipaeni, riwetsikayitzironi ipankopaeni.²⁹ Omaanta ishitowantanakari Roote, rotyaatkiro Tajorentsii osheki paamari poñaachari jenokinta, itagaeyakirini maawaeni jorooomajatzini. Theenkayatsirini rootaki ithonkanteeyakirini Tajorentsii maawaeni, thoperee.³⁰ Aritaki okantasyari aririka nopyiee. Ijeeki osheki theenkantatsirini, eero ikenkithashiryaaari Tajorentsii.

³¹ Pamine, aririka omonkaatapaakya nopolkanteeyaaari, pijeekerika okaankiityeera pankotsi, eero pikyaapanatazi pankotsiki paantapanaatyawori powaagawo. Eejatzi, pantawaeterika powaneki, eero pipiyapanaata pipankoki paantapanaatyawori powaagawo.³² Kyaaryoowa pikimitawokari iinani Roote, pipithokakari eerori pitapiiki.³³ Ninkarika kaari kowatsini ratsipewentena naaka omawitya ikamawentena eero ryaatzi janta ijeekinta Tajorentsii. Omaanta kowatsiri ratsipewentena naaka omawitya ikamawentena naari, ikanteetayyeaani ijeekimotena jenokinta.³⁴ Aririka nopolkae, eenitsirika apite atziri imayi imaamentoki. Apaani aapatziyanari rootaki naantaneeyariri notsipatanakyaari, omaanta paashini, eero naaneeri.³⁵ Otsipatawakayaarika apite tsinani otoonkiro shinki. Apatziro apaani aapatziyanari rootaki naantaneeyawori notsipatanakyaawo, omaanta paashini, eero naaneero.³⁶ Itsipatawakayaarika apite shirampari janta owantsiki, ithamaetzi. Apatziro apaani aapatziyanari rootaki naantaneeyariri notsipatanakyaari, omaanta paashini, eero naaneeri.

³⁷ Ikemaeyantakaririni riyotaanewopaeni, rojampitanakiri:

—Nowinkatharite, ¿tsikama oñaganteeyaaaka iinja iroka pikantakinari?

Rakanakiri:

—Tsikarika ijeeki kaminkari, aritaki ipiyotawenteeyari tzijopaeni. Oshiyakaawentachari tzijo, tema iinja maawaeni aapatziyeeyanarini naaka aritaki ipiyotawenteeyenani.

18

Jesoshi ikenkithatakotakiri kantakotantatsiri kaari kameethatatsi

¹ Paashiniki kitejiri roshiyakaawenteeyakinirini eejatzi Jesoshi riyotaanewo. Ikowaki riyoteeri ikenkifhatakapiinteri Tajorentsii, ikyaryooowenteeyeroni, eero ipakagaero.² Ikanteeyakirini:

—Eenitatsi janta nampitsiki riraga kantakotantatsiri, kaari pinkathatziri Tajorentsii. Eejatzi tee riyotzi ikaminthayeri atziripaeni.³ Ari ojeeki janta nampitsiki apaani tsinani, kamaentsiri oemi. Iyaatashitapiintawitari riraga kantakotantatsiri, okantapiintawitari: “Pamitakotena, tee okameethatzi ikijapiintena riraga paashini shirampari”.⁴ Tee ikowawita riraganki ramitakoteromi, omaanta ikenkithashiryaanaka, ikantzi: “Tee nopolkathawitari Tajorentsii, eejatzi tee nokoyi nokaminthayeri paashinipaeni atziri”.⁵ Omaanta osheki ashiiryaakina iroka tsinanika. Namitakoteroota, eerokya opokashitantananaana, eero ashiiryaanaana eejatzi”.

6 Ikantanaki Awinkatharite:

—Pamine, tee ikameethatzi riraga kantakotantsiri nokenkithatakotakirika, omaanta ramitakotakiro iroka tsinani oñaashirenkapintaanziriri. **7** Omaantakya riraga Tajorents, ikameethaperotaki. Aririka ikantyaani ramanapiinteri aapatzianari ikenkithatakapainteri rirori, tema aritaki ramitakotakiri. **8** Kyaaryootaki iroka nokamantemiri: intsipaete ramitakoeyerini Tajorents maawaeni kenkithatakagaeyeririni. Omaanta aririka nopiyee jaka kipatsikika ḡarima roojatzni noñeeeyapaemini pikantyaani pameenteeyenani, pikenkithatakagaeyeririni Tajorents?

Jesoshi ikenkithatakotakiri warijeeyo eejatzi piyotziniriri oroomajatzi korki

9 Paashini eejatzi roshiyakaawentakiri Jesoshi. Ikenkithatakotziri riraga kantakaaperotzinkari, riraga theenkaeyiririni paashinipaeni atziri. Ikantziri:

10 —Riyaataki apite shirampari Tajorentsipankoki ikenkithatakayeri Tajorents. Apaani rirotaki warijeeyo, omaanta paashini piyotziniriri iyorikite joriiyopaeni eekiro iperikya oroomajatzi. **11** Ikantaka ikatziyapaaka riraga warijeeyo, ikantawitapaakari: “Tajorents, ariwee, osheki nokameethataki naaka. Tekatsi nante, tee nokimitari riraga koshitantatsiri, riraga amatawitantatsiri, shirontayitaworini osheki tsinani. Eejatzi tee nokimitari irika ayitziriri atziri iyorikite. **12** Nametakawo maawaeni tominko notzitapiinta apite kitejiri, eejatzi nopagaantapiintayitzimironi maawaeni naayitzirini. Naakirika **10** oetaraki, apaani nopakimi”. **13** Omaanta riraga piyotapiintziniriri oroomajatzi iyorikite ikatziyanenteapaaka inteedna. Tee ikantakaaperota rirori, omaanta osheki ipashiwentakaakawo rantayitzirini, rootaki kaari raminanta jenokinta, apatziro rompojashipaneetaka. Ikantz: “Tajorents, pineshironkatena naari, tee nokameethaperotzi, eeniro osheki nantani”. **14** Nokamantemiri, oshekini naawita rantani riraga shirampari, omaanta ikamintaakiri Tajorents. Aririka ipiyee ipankoki riyotanaki iñaaperotakiri rirori ikameethatzi. Omaantakya riraga warijeeyo, tee ikimitari. Eero iñaaperotziri riraga Tajorents kantakaaperotachari. Omaanta riraga kaari kantakaaperotachani ipeyeeri pinkathariwenantatsini.

Ikowaki Jesoshi ipokashiteeyerini eentsipaeni

(Mt. 19.13-15; Mr. 10.13-16)

15 Okantaka tsinaniipaeni amaeyakinirini Jesoshi eentsipaeni, okowaki ipampiteeyerini eejatzi ikanteri Tajorents ramitakotantyaariri. Omaanta inaantawakawori riyotaanewo, ithañaakowitakawo eero amiri eentsitepaeni: tee ikowakaawityaari ipokashiteri. **16** Omaanta ikaemiri Jesoshi eentsipaeni, ikantakiri riyotaanewo:

—Pishinetenari ipokashitenataa eentsipaeni. Eerowa pikatziyakari. Nokowaki ipokashiteena. Piñeyakirini irikapaeni eentsika: tee itheenkaeyanan, inta rameenteeyakinani. Tema reewawenteeeyirini Tajorents maawaeni kimiteeyaririni rirori. **17** Eejatzi, kyaaryootaki iroka nokamantemiri: maawaeni kaari oshiyarini eentsi riraga aapatzianari kameetha, eero imatziri reentsitetari Tajorents.

Ewankari ashaagantzinkari

(Mt. 19.16-30; Mr. 10.17-31)

18 Paashini kitejiri riyaatashitakiri Jesoshi apaani iwinkatharite joriyyo. Ikantapaakiri:

—Iyotaanari kameethari. Pikamantena: ¿oetakama nanteri nañaantyaari, nokanteetatyeyaaani?

¹⁹ Ikantawakiri Jesoshi:

—¿litaka pikantanari: “Kameethari”? Tekatsi kameethatatsini, inta appatziro Tajorentsi ikameethatzi. ²⁰ Piyotakoeyironi maawaeni ikaminaakaeri Tajorentsi: “Eero piñaathatzimotawo piina paashini tsinani, eero powamaantzi, eero pikoshitzi, eero pitheeyakotari paashini atziri, pipinkathateri piri eejatzti piniro”.

²¹ Rakanakiri:

—Tema maawaeni iroka nomonkaatakiro: eenironi newankaritapaakini, roojatzti iroñaaka.

²² Ikemantawakawori iroka, ikantanakiri Jesoshi:

—Eenitatsi apaani koetyeemotakimir eejatzti: pipimanteyeroni maawaeni tzimimotayitzimirini, pipaeyerini ashironkaenkari owinawo. Aririka pimatakiro iroka, ojeeke osheki tzimimoeyeemirini janta jenokinta. Pipimantakirorika powaagawo, pipokanaki poyaataperotanakina.

²³ Ikemantawakawori iroka, osheki rowashiretanaka. Rooma ashagantzkirkapero, tee ikoyi ipimantero rowaagawo, omaanta rompetakawo.

²⁴ Iñaakirira Jesoshi rowashiretanaka, roojatzti ikantaki:

—Opomeentsitzimotakari ashaagantzinkari ikowaki Tajorentsi ipinkathariwenteri. ²⁵ Napiitemiro noshiyakaawentemiro: tema opomeentsitzimotakari riraga kameeyo roshinthateri imooki kithapi. Omaanta ashaagantzinkari opomeentsitzimotaperotyaa ri ikowaki Tajorentsi ipinkathariwenteri.

²⁶ Ikanta rojampitanakiri riraga kemawakiriri:

—¿Arima? ¿Pomeentsitakama? ¿Ninkama materoni awijakotaatsini?

²⁷ Rakanakiri Jesoshi:

—Iroka kaari imatapiintzi atziri, omaanta imatakiro Tajorentsi rirori.

²⁸ Roojatzti ikantakiri Peetero:

—Iyotaanari, nookaeyakironi maawaeni tzimimoeyanarini noyaateeyantakimirini iroñaaka.

²⁹ Rakanakiri:

—Kyaaryootaki iroka nokamantemiri: tee patsipetashitawo. Aririka pookaeyeroni pipankopaeni, piinapaeni, parentzaeni, pitsiropaeni, piripaeni, piniropaeni, pitomipaeni, pishintopaeni: omaanta rootaki pookaeyantyaaririni pikowaperotaki ipinkathariwenteri Tajorentsi, eero patsipetashitawo. ³⁰ Aritaki ipinatakimi Tajorentsi iroñaaka jika kipatsikika, eejatzti ipinatawaemi iinja janta jenokinta: pikanteetatyeyaaani pañaaperotapae janta.

Rapiiteero Jesoshi ikamantakota rowamagaeteri

(Mt. 20.17-19; Mr. 10.32-34)

³¹ Riyoshiiteeyanakirini roojatzti ikaemantakari Jesoshi ryotaanewo 12, ikantakiri:

—Pamine, iroñaaka aateeyeni Jerojareeki. Eenitatsi rojankinatakotzitakinarini paerani riraga kamanantayitzirorini iñaani Tajorentsi. Naaka poñaachari jenokinta, nokoñaatapaaki jika kipatsikika. Iroñaaka janta Jerojareeki ari omonkaatya maawaeni rojankinatakotzitakinarini.

³² Raakaantena ashinkaa aari, rayena kaari yotziri Tajorentsi. Ishirontawenteeyenani, rowashironkagaeyenani, reewapootayitenani,

³³ ipajapajaatenaa, rowamaena. Okaatapaakirika 3 kitejiri, nopiriintanee eejatzti.

³⁴ Omaanta tee riyotakoeyawakironi oetarika ikanteeyawitakaririni, ikompiteeyawakawoni.

*Raminakagaeri Jesoshi kaari ñaantatsi
(Mt. 20.29-34; Mr. 10.46-52)*

³⁵ Ikantanaka Jesoshi, ikinanaki awotsiki, rootzimateentsi rareetya nampitsiki iitachari Jerikoo. Ari ijeeki janta awotsinampiki shirampari kaari ñaantatsi, inethaakotapiintziri koriki awijayitatsirini.

³⁶ Ikemantawakari rirori ipokaeyapaakini osheki atziri, rojampitakiri paashini atziri:

—¿Ninka pokatsiripaeni?

³⁷ Rakanakiri:

—Kaakitaki Jesoshi, riraga Najareetejatz, royaateeyakirini osheki atziri. Ari ikinapaakawo jaka.

³⁸ Roojatzi ikaemakotantawakari:

—Jesoshi, eero ka icharineeten Iraviirini. ¡Pamitakaajeetenaty naaka!

³⁹ Ikanteeyanakirini jewateeyiririni Jesoshi:

—¡Pimaerite!

Omaanta, eekiro ikaemanakitzi:

—¡Jesoshi! ¡Pamitakaajeetenaty!

⁴⁰ Roojatzi ikatziyantapaaka Jesoshi, ikantanaki:

—Pamakinari.

Ikanta ramaetakiri. Roojatzi rojampitawakiri:

⁴¹ —¿Itaka pikoyiri?

Rakanakiri:

—Nowinkatharite, nokowaki noñaantee naari.

⁴² Ikantanakiri:

—Aritaki piñaantee iroñaaka. Pameentakina, rootaki petsiyatakotaari.

⁴³ Arripaete iroñaaka iñaantanee. Roojatzi royaatantanakari Jesoshi, ikantanaki:

—Iñaakagaana Tajorentsi, tema ikameethataki.

Eejatzi ikimiteeyakarini maawaeni ñeeyakiririni, ikanteeyakini:

—Tema ikameethataki Tajorentsi.

19

Iñaakiri Jakeeyo Jesoshi

¹ Roojatzi ikinanaki riraga Jesoshi janta nampitsikinta iitachari Jerikoo.

² Ari ijeeki janta ashaagantzinkari iitachari Jakeeyo. Rirotaki riraga jewatakayitziririni maawaeni piyotapiintziniriri oroomajatz iyorikite ijoriyyotzinkaritepaeni. ³ Ikowawita rirori Jakeeyo iñeerimi riraga Jesoshi, omaanta tee rantaripenthakitzi: ikaamokokitziini. Oshekini atziri rotzikaakiri rootaki kaari imatanta iñeeri rirori. ⁴ Roojatzi ishiyantanaka, ranaanakiri maawaeni atziri reewatanaki janta awotsiki. ⁵ Roojatzi rateetantapaakawo inchato janta othapiki ikinanakinta paata Jesoshi. Rateetapaakiro inchato roojatzi raminakotawakiri riraga Jesoshi ikinapaaki jaawiki. Rareetantapaakariri, raminapaaki jenoki, roojatzi iñaantapaakari, ikantapaakiri:

—Jakeeyo, intsipaete pojoonki. Ari noshiretakawo iroñaaka pipankoki.

⁶ Roojatzi intsipaete rojoonkanaka, ikantawakiri:

—Jee, thameeta nopankoki.

Osheki ikimoshirewentawakiri riraga Jakeeyo. ⁷ Omaanta ikijanaka amineeyakiririni, ikantzi:

—Irira teera ikameethatzi. ¿litarikya riyaatashitantariri Jesoshi janta ipankokinta?

⁸ Niyanki awotsi riraga Jakeeyo raapatziyari Jesoshi, roojatzi ikantakiri:

—Nowinkatharite, iroñaaka nopagaanteeyerini owashironkaenkari kashetan tzmimotanari. Eenitatsirika atziri namatawitakiri nokoshitakiri, noepieeniri maawaeni, eejatzi nopaeri paashini osheki. Okaatzirika apaani nokoshitakiri, nopaeri 4.

⁹⁻¹⁰ Roojatzi ikantawakiri:

—Iroñaaka kiteziri pawijakotaki. Iroñaaka pikimiperotari achariniiteni paerani Awaraamani, paapatziyakari Tajorentsi. Naaka poñaachari jenokinta nokoñaatapaaki jaka kipatsikika. Rootaki nopoñaantari jenokinta: naminaminatziri owashironkaenkari, riraga kaari yoperotziriri Tajorentsi, nokowaki nowawiaakoteri maawaeni.

*Jesoshi ikenkithatakotziri pinkathari pakiriri ronampiripaeni koriki
(Mt. 25.14-30)*

¹¹ Ikemaeyakironi atziripaeni ikantakiri Jesoshi. Eejatzi ryoyoteeyakini rooteentsi rareetya Jerojareeki. Iitashiteeyakani rooteentsi ipoke Tajorentsi ipinkathariwenante jaka kipatsiki, ¹² roojatzi roshiyakaawenantakanariri iroka, ikantziri:

—Ijeeki apaani shirampari, pinkatharitawitachari. Tema ikaemakaantakiri paashini pinkathari janta paashiniki kipatsi. Ikantaka riyatanaki, ipeyawakiri pinkatharipero ipinkathariwenantyaariri inampijatzipaeni.

¹³ Ikanta rootzimateentsi ryaate, ikaemakiri ronampiripaeni ikaatzi 10, ipaeyanakirini osheki koriki. Ikantakiri: “Irika korikika, osheki iwinawo. Nokowaki piyompariteeyantyaarini. Aririka nopyiee, naminapaeri tsika ikaatzi koriki paakiri”. ¹⁴ Ikantaka riyatanaki iitantlyaariri pinkathari. Omaanta tee ikowaeyirini inampijatzipaeni ipinkatharite, osheki ikijeeeyakirini. Rotyaanteeyawitakanri apaanipaeni inampijatziri, ikantawitari riraga paashini pinkathari: “Tee nokowakagaeyirini ipinkathariwenteeyenani riraganki, tee ikameethatzi”. ¹⁵ Omaanta iitawakiri pinkathari, roojatzi ipiyantanaa ipinkathariwenantyaariri. Ikaemakaanteeyakirini ronampiripaeni: riraga ipaeyawitanakarini iyorikite. Rojampiteeyakirini: “¿Poshekyaaakinarima noorikite?” ¹⁶ Ari ikantapaakiri riraga jewatatsiri: “Pamine, iroñaaka noshekyaaoperotakiri piyorikite. Apaani pipakinari, noshekyaaoperotakiri, iroñaaka naaki 10”. ¹⁷ Ari ikantanakiri pinkathari: “Kameethatakimi. Osheki piyotaki. Pikyaaryoowentakinawo eechonkiini okaatzi nokantakimiri. Iroñaaka noetemi pinkathariwenteroni osheki nampitsi, okaate 10. Pikyaaryoowentenawo pipinkathariwentero”. ¹⁸ Ikantaka ipokapaaiki paashini, ikantapaakiri: “Irika piyorikiteka. Pipakinari apaani, iroñaaka naaki apawakooni”. ¹⁹ Eejatzi ikantawakiri: “Iroñaaka pipinkathariwentero eero ka apawakooni nampitsi”. ²⁰ Roojatzi ipokantapaaka paashini, ikantapaakiri: “Nowinkatharite, eeniro piyorikiteka pipawitakinari chapinki. Nokempoyaakimiri nowaañorateki. ²¹ Osheki nothaawantakimi, niyotaki osheki pipinkatharitaki. Paapithatziri paashinipaeni rashitayitarini, eejatzi payitantziro okithoki kaari pipankitzi”. ²² Roojatzi ikanantanakari: “Tee pikameethatzi, tee pantanawo nokowakaawitakimiri. Pikantawitana: ‘Osheki pipinkatharitzi, paapithatziri paashinipaeni rashitayitawitarini, paayitzironi okithoki kaari pipankitzi’. Piyotawitakaga, rootaki nokijantakimiri iroñaaka. ²³ ¿lita kaari powantanari noorikite waankoki? Powakirimi janta, ari roshekyaanakyaami iroñaaka noorikite”.

²⁴ Roojatzi ikanantanakari riraga katziyayiteencharini: “Paapithateri

noorikite. Piperi riraga agaentsiri 10". ²⁵ Ikanteeyawitanakarini: "Nowinkatharite, eenitatsi oshekini iyorikite iroñaaaka. ¿litakakya pipashitantyaariri paashini eejatzi?" ²⁶ Rakanakiri: "Nokamantemi, itzimerika ashaagantachani, nopaeri paashini eejatzi. Omaanta riraga kaari ashaagantacha, naapithateeri rowaga tzimimotawitariri eechonkiini. ²⁷ Eejatzi riraga kijakinari kaari kowakaawitenani nowinkatharite, pamaeyakinarini, naminakoeyemiriniita powamaeyerini".

Rootaki ikenkithatakagaeyakiririni Jesoshi atziripaeni.

*Rareetapaa Jesoshi Jerojareeki
(Mt. 21.1-11; Mr. 11.1-11; Jowa 12.12-19)*

²⁸ Roojatzi rowaaganaka eejatzi Jesoshi, riyaaate Jerojareeki. ²⁹ Rootapaentsi rareetyaawo nampitsi iitachari Wetejajee eejatzi Wetaaniya. Ari ojeeki janta tonkaari iitachari Oriiwomashi. Roojatzi rotyaanantaka riyotaanewo apite, ³⁰ ikantakiri:

—Piyaate janta nampitsiki, ari piñaappaakiri wooro ithatakotaka janta. Tekira ikyakoetari. Pithataryaakotapaakiri, pamakinari. ³¹ Aririka rojampiteetemi: "¿litaka pithataryaakotantariri?" Pikanteri: "Ikowakiri Awinkatharite".

³² Roojatzi ryaateeyantanakani apite, iñaappaakitziiri ikantakiriri Jesoshi. ³³ Ikanta ithataryaakotapaakiri. Roojatzi rojampitantanakari ashitariri:

—¿litaka pithataryaakotantariri nowoorote?

³⁴ Rakanakiri:

—Ikowakiri Awinkatharite.

—Ari, paanakiniri.

³⁵ Roojatzi raantanakari janta Jesoshiki. Rowankitakiniri imitzikaaki iithaaripaeni ijekantyaari Jesoshi, roojatzi ikyakotantakari.

³⁶ Ikanta rowaagakotanaka janta awotsiki, ishitashiteeyakinirini atziripaeni iithaaripaeni awotsiki, ranashitantanakyaari wooro. ³⁷ Ari ritanakawo iroñaaaka roerinkakotanaka. Royaateeyanakirini osheki aapatzieeyakiririni, iweshiryaaawenteeyanakarini, ikaemaeyanakini. Ikanteeyanakini:

³⁸ —Tema ikameethataki Tajorentsi. Añeeyakirini itajonkawentapiinteyakaeni. Ikameethataki Awinkatharite rotyaanantakaeniri Tajorentsi. Kameetha ijekaeyakini maawaeni jenokijatzi, iñaaperoyakirini Tajorentsi.

³⁹ Ari ijekitaka riraga warijeyopaaeni, ikaateeyakirini atziripaeni. Ikantawitakari Jesoshi:

—Iyotaantattsiri, pojantzikaagayerini riraga oyaateeyimirini.

⁴⁰ Rakanakiri:

—¿litaka nojantzikaantyaariri? Okameethataki ranteeeyakirini. Ijantzikaeyanakinirikami irikapaeni, tema ari iñaawaetakaakiromi Tajorentsi mapipaenika ofñaaperotantenerimi.

⁴¹ Ikanta rokaakiteeyapaakawoni, iroñaaaka raminakotapaakiro Jerojaree. Riraakoeyapaakarini Jesoshi jeekatsiripaeni, ⁴² ikantzi:

—Nokowawitaka nojeekekagaeyeminimi kameetha, omaanta tee pikowaeyini. Pitheenkayakinani, iroñaaaka eero piñagaana nopinkathari-wenteeeyemini. ⁴³ Iinja ipoke powayiritepaeni rotzikaperoyapakimini, itapoteeyapakimini joraaropaeni, eero ishineteeyimini tsikarika pikini pishiyantyaari. Romanateeyapakimini, ⁴⁴ ijoweyaperoeyapakironi pipanko kameetha. Rowamaagaantapaakimi. Nopokashiteeyawitakimini, nopinkathariwenteeeyemini, omaanta tee pipinkathateeyawakinani, inta pitheenkayawakinani. Rootaki awijatsini iinja maawaeni iroka.

*Romishitowiri Jesoshi pimantayitatsirini tajorentsipankoki
(Mt. 21.12-17; Mr. 11.15-19; Jowa 2.13-22)*

⁴⁵ Rareetantapaakari Jesoshi Tajorentsipankoki iñeeypaakirini pimantayitatsirini eejatzi amanantayitatsirini. Roojatzi rookatheeeyantapaakarini rookaikiri inkokironta. Ithonkaeyakirini maawaeni, ⁴⁶ ikantakiri:

—Tema rojankinatziteetakawo Iwaperiteki Tajorentsi: “Ikantzi Tajorentsi: Iroka Nopankoka okameethatz piakenkithatakapiiinteyenani eerokapaeni maawaeni atziri”, rootaki niwetsikakaanantawori”. Omaanta iroñaaka eerokapaeni pikoshitashiteeyakarini atziripaeni pokaeyawitacharini nopankoki.

⁴⁷ Ikantapiintatyaaani maawaeni kiteziri riyaatapiintzi Tajorentsipankoki, riyotaantapiintaki. Omaanta ikiyeeyanakirini riraga jewatayitziririni ñaanakowenantsiripaeni, riraga iyotaantzirori rojankinarin Moeseshi, eejatzi riraga pinkathariwenteeyiririni jeekatsiripaeni. Rojampitawaka-gae yakani:

—¿Tsika akanterika Jesoshi, owamaakaanantyaariri?

⁴⁸ Omaanta tee riyoteeyini tsika ikanteriri, tema eeniro osheki atziri piyotawenteeeyakaririni, ikemijantziri okaatzi ikantziriri.

20

*Rojampitziri Jesoshi: “¿Ninka otyaantakimir?”
(Mt. 21.23-27; Mr. 11.27-33)*

¹ Apaani kiteziri ijeekaki Jesoshi janta Tajorentsipankoki riyotagaeyakirini atziripaeni, ikamantakiri tsika ikanteeyaaarini rawijakotanteeyarini. Ikantaka ipokaeyapaa kini riraga jewatayitatsirini ñaanakowenantsiripaeni, riraga iyotaantzirori Iwaperite Tajorentsi, riraga aataperoteenchari, maawaeni. ² Ikanteeyapaa kiri:

—Pikamanteeyenani ninka owakimirika pinkathari: ¿ninka otyaantakimirika pantayitantaworini iroka?

³ Rakanakiri:

—Eejatzi naari, eenitatsi nojampiteeyemirini. Pikamanteeyenani:

⁴ ¿Ninkama otyaantakiriri Jowa ikaawoshitakotantariri Tajorentsi? ¿Rioma Tajorentsi otyaantakiriri? Kaarima, ¿rioma otyaantziriri atziri?

⁵ Tee rakaeyirini, inta ikantawakagaeyanakan:

—¿Itaka akanteriri? Akanteririka: “Riotaki Tajorentsi otyaantakiriri”, ikanteekari: “¿Itaka kaari paapatziyantari?” ⁶ Eejatzi akantawitakyaaririka: “Riraga atziripaeni otyaantakiriri”, tema ari ikijeeyanakaeni atziripaeni. Rompojanteerokari mapi. Tema rirori ikenkithashiryaakoperotziri Jowa riotaki kamanantzirori ñaaani Tajorentsi.

⁷ Rootaki ikananteeyanakaririni:

—Tee niyoteeyini ninkarika otyaantakiriri Jowa.

⁸ Roojatzi ikanantaka rirori Jesoshi:

—Eejatzi naari, eero nokamantzimi ninkarika otyaantakinari.

*Jesoshi ikenkithatakotakiri riraga pankitzirori oowa
(Mt. 21.33-44; Mr. 12.1-11)*

⁹ Roojatzi ikenkithatakagaeyakirini Jesoshi atziri, roshiyakaawenteeyakinirini, ikantakiri:

—Eenitatsi atziri pankitzirori oowamashi. Roojatzi ikanantakari ratzirite: “Paminawiritantenawo, iinja aririka okithokitanaki, paye eerori kashetani okithoki, kashetani pipena naari”. Ikanteeyanakirini: “Ari, kameetha”. Roojatzi riyaatantanaka ashitawori paashiniki

kipatsi, ipeyaka ojamani janta. ¹⁰ Okanta omonkaatapaaka rowiitakiro okithoki. Riraga ashitawori roowate rotyaantakiri riraga ronampiri, ikantakiri: "Piyaatakite janta ojeekinta noowate, pikowakotakiteri riraga aminanawori rotyaanantawakina kashetani". Ikantaka jatawitanaka omaanta ikiyejawakirini, ipajapajaatawakiri, roepiyawakiri. Tekatsi ipawakiri. ¹¹ Roojatzsi rotyaanantawitakari paashini ronampiri, omaanta ikaweyawaetawakiri, ipajapajaatawakiri, roepiyawakiri. Tekatsi ipawakiri. ¹² Roojatzsi rotyaanantawitakari paashini eejatzi, omaanta eejatzi ipajatawakiri, tak, tak, osheki riywakaakiri riraa. Roepiyawakiri eejatzi. ¹³ Ikenkithashiryaaka iroñaaka riraga ashitawori, ikantzi: "¿litaka nanteri iroñaaka? Aamaashitya rirorika notyaanteri iroñaaka notyomi nonintaperotziri. Aririka iñeeyawakirini irira, aamaashitya rirorika ipinkathatawakiri". Roojatzsi rotyaanantawitakari rirori. ¹⁴ Iñaanteeyawakirini, ikantawakagaeyanakan: "Pamineritya itomi ashitawori iipatsite. Aririka ikamaki irira, tema rirotaki aakoteroni. Thame owamaawakiri, agaeroota iinja aaka kipatsi". ¹⁵ Roojatzsi roerikantawakari, shepik. Ragaeyanakirini janta okaatapaaki iipatsite, rowamagaeyakirini, shemi.

Rootaki ikenkithatakagaeyakirini Jesoshi. Ikanteeyakirini:

—Oetaka pikenkithashiryaari ikanteriri riraga ashitawori iipatsite.

¹⁶ Tema ari riyaatakite rirori, ikijaperoeyakiteri thamaetawitanariri rowani, eejatzi rowamaakiteri. Roojatzsi raminanteeyaa paashini thamaeteenirini.

Ari ikanteeyanakirini kemaeyawakiririn:

—Tema eero imatziro ranteeyeroni iroka, eero ishinetziri Tajorentsi.

¹⁷ Ramineeyakirini Jesoshi, ikantziri:

—¿Piitakaawitakama eero imatziro? ¿Oetakama otzimantakari Iwaperite Tajorentsi? Tema okantzi: "Riraga wetsikaeyirorini pankotsi itheenkakiro apaani mapi, ikantzi: 'Tee okameethatzi', omaanta iinja rowaga mapi itheenkawitakari, iñaakiro riraga Tajorentsi okameethatzi, tema rirotaki iyoyaakirori iroka mapi kijotakaaperoteroni pankotsi. Tema rootaki ot-sikanatantanakawori aakapaeni". ¹⁸ Noshiyakawentemiri atziri aririka ipariyaki antawoki mapi tema ari ikagaapokitaapaki. Eejatzi aririka opariyaki antawo mapi ari atsinakapaakiri, opithoryaapaakiri. Kimitaka iroka, ninkarika kaari aapatziyana naaka eero rawijkote, eejatzi aririka nokantakoteri kaari aapatziyana aritaki notyaanteeyakirini paamari kaari tsiwakanitatsini.

Riyoteeri Jesoshi atziri ikemijantaperoteri ikantziri pinkathari eejatzi ikantziri Tajorentsi

(Mt. 21.45-46; 22.15-22; Mr. 12.12-17)

¹⁹ Riraga jewatayitziririni ñaanakowenantsiripaeni, eejatzi riraga iyotaantazirori Iwaperite Tajorentsi ikowaeyawitakani ragaeyerinimi iroñaaka Jesoshi, tema riyotakoeyawakani rirotaki roshiyakaawenteeyakirini. Omaanta tee imatziro rayiri, ithaawanteeyakarini atziripaeni, ikantzi: "Eero ayiri, ikijakotanakarikari atziripaeni". ²⁰ Roojatzsi rotyaanantakari ñaanakowenantsiri atziri, ikantakiri:

—Iroñaaka piyaate pamatawiteri riraga Jesoshi. Pikimitakaantapaakyari kyaaryo pikowaperotaki paapatziyari; omaanta, pikompitakaeyari iñaani. Aririka ikompatanakyaawo ikanteri, intspiaete pipokanaki pikamantena. Roojatzsi aatashitantakaryaari pinkathari, akamanteri ikantakiri.

²¹ Ikantaka riyaatashitanakiri Jesoshi, ikantapaakiri:

—Iyotaanari, niyoteeyakini kyaaryooperotaki maawaeni pikantakinari eejatzi maawaeni piyotaakinari. Tee paminashitari atziri ipooki piyotantyaariri ikameethatzirika, inta paminaperotzi rajankani ikenkithashiryantaari. Eejatzi kameetha piyotagaeyakinawoni ikowakagaeyakinarini Tajorentsi.²² Iroñaaka pikamantena: ¿okameethatzima apaeyerini riraga iwinkatharite oroomajatzi ayorikite ikowakotakaer? ¿Eeroma apiri?

²³ Ikanta riraga Jesoshi riyotakotakirini ikowaeyawitani ramatawiterimi. Ikantziri:

—¿lítakaya pikowantari pikompitakayenawo noñaani? ²⁴ Poñaayenari ikithoki piyorikite. ¿Ninka roshiyapootakarika irika korikikika? ¿Ninka ashitawori iwaero jankinateencharika?

Rakanakiri:

—Rootaki ipoo iwinkatharite oroomajatzi, riraga Seesari, eejatzi ojankinataka iwaero.

²⁵ Roojatzi ikanantanakari Jesoshi:

—Okameethatzni panteniri irinta ikowakaakimiri, eejatzi pantzityaanari Tajorentsi ikowakaakimiri.

²⁶ Tekatsi ikanteeyaani ikompitakayaari iñaani Jesoshi, kameetha riyoataantaperotaki. Rotsikanateeyanakarini riraga amatawiterinimi, rootaki imaeeriteeyantanakarini. Tekatsi ikantaneeri eejatzi.

Rojampitakoventeetziro arrika rañagae kamayitatsirini

(Mt. 22.23-33; Mr. 12.18-27)

²⁷ Roojatzi ryaatashitantakari Saroseeyo Jesoshi. Ikenkithashireeyani riraga Saroseeyo, ikantzi: “Eero ipiriinteeyaaani riraga kaminkripaeni, eero ryaateeyini jenokinta”. Rareetapaakaga, ikantapaakiri:

²⁸ —Iyotaantsirsi, ikantzini Moeseeshi: “Eenitatsirika shirampari iina, omaanta tekatsirika itomi, aririka ikamaki, okameethatzni ragaero iinani rirentzi itzimakaanteeyawori otomi. Itzimapaakirika otomi kimiwitanaka rirotaki ashityaarini rirentzini itomi” ²⁹ Aamashitya eeniro shirampari ikaatzi rirentzi 6 impaetatsiri. Riraga itawitanakawori raawitaka iina, ikamashitaka. Tee itzimi itomi. ³⁰ Roojatzi raantawitaawo rirori rirentzini. Eejatzi tee itzimakayiro itomi, roojatzi ikamantaka rirori. ³¹ Eejatzi ikimitaka paashini rirentzini. Raawitaawo tsinani, ikamashitaka eejatzi rirori. Eejatzi ikimitteeyakani maawaeni rirentzini. Tekatsi tzimakayeroni otomi. ³² Ro impaeteentsi roori tsinani, okamaki. ³³ Iroñaaka pikamantena: kyaaryorika ipiriinteeyaneeni maawaeni kamaeyawiteencharini, ¿ninka iinanteeeyawonii iroka tsinani? Tema ikaateeyawitani aawitawori⁷.

³⁴ Ikanta ikantawakiri Jesoshi:

—Kyaaryo, jaka kipatsiki rameteeyakawoni shirampari rayi iina. Eejatzi tsinanipaeni ameteeyawoni aysi oemii. ³⁵ Ari ipiriinteeyeerini Tajorentsi maawaeni atziri iñaaperotziri, omaanta janta jenokinta eero ragae iina. Eejatzi tsinani, eero agae oemii. ³⁶ Eejatzi eero janta ikamae eejatzi, ikimitteeyapaayaarini maawaeni ronampiripaeni Tajorentsi, jeekimoeyiririni: tee ikamaeyini rirori. Ikantani rañagaeeyini. Eejatzi itomintaperoeyeyarini maawaeni atziri riraga ipiriinteeyeerini. ³⁷ Paerani riyotzitakani Moeseeshi ipiriinteeyaneeni kamayitatsirini. Ikenkithatakotantawori inchashimpoki amorekawitachari, ikenkithatakotakiri eejatzi Awinkatharite. Ikantzini: “Raapatziyana Awaraama. Eejatzi Ijaaka raapatziyana, eejatzi Jakoowo”. ³⁸ Naakiro, tee ikantzi: “Raapatziyawitakinani Awaraamanii”. Añaatsi iroñaaka Awaraama eejatzi paashinipaeni, rootaki ikanantakari: “Raapatziyana”.

³⁹ Roojatzi ikantayitantakarini apaanipaeni iyotaantzirori Iwaperite Tajorentsii:

—Iyotaanari, kameethataki iroka pikantakiri.

⁴⁰ Ithaawanteeyakarini rojampiteeyaneerinimi eejatzti.

Jesokirishito rivotaki icharineeten Iraaviiri

(Mt. 22.41-46; Mr. 12.35-37)

⁴¹ Paashini eejatzti ikantakiri Jesoshi:

—¿iitaka pikanteeyantarini: “Rivotaki Rotyaantanewo Tajorentsii icharineeten Iraaviiri”? ⁴² Tema paerani romampaawenttarini Iraaviiri Tajorentsii, rojankinatakiro iroka: “Riraga Tajorentsii, ikantakiri Nowinkatharite: ‘Notyomi, pijeeki jaka nakoperoki, pikaatena apinkathariteeyeni, ⁴³ roojatzi ipinkathateeyantemirini maawaeni kijeeyawitakimirini’ ”. ⁴⁴ ¿Riroma Jesokirishito icharineeten Iraaviiri? Rirorika icharineeteni ¿iitaka ikanantaririkya paerani: “Nowinkatharite”? Tee pameteeyawitawoni pipinkathateeyirini impaatsatsi ijeki.

Paamayaarira iyotaantawitawori Iwaperite Tajorentsii

(Mt. 23.1-36; Mr. 12.38-40; Rk. 11.37-54)

⁴⁵ Maawaeni atziri ikemaeyakirini Jesoshi, riyotagaeyakirini ryotaanewopaeni, ikantakiri:

⁴⁶ —Paamayaarira riraga iyotaanteeyawitaworini Iwaperite Tajorentsii. Osheki ikowaki ikinakinathanthanati. Eejatzti ikowaki kameetha raakameethateeyawakirini atziri janta nampsitsiki. Eejatzti janta pankotsiki apiyotantapiintarira, ikowaki ijeekimotapiinteri pinkatharipaeni. Eejatzti aririka ipiyoteeyani atziri rowaeyani, ikowaki kijokiro rowapiinteri pinkatharipaeni. Eero pikimitari riroripaeni. ⁴⁷ Kimiperowitzaka ikameethatz. Rojamanitziro ikenkithatakayeri Tajorentsii. Ikowaeyawitakanira atziri raapatziyaperotakayaarimi Tajorentsii. Omaanta osheki ramatawitapiintakiro kamatsiri oemi, ikoshitashitakawoni tzimimotzirori. Kyaaryootaki iroka nokamantemiri: rowashironkaaperoeyerini osheki Tajorentsii paamariki iiija.

21

Ikenkithatakotziro Jesoshi tsinani ashironkaenkawo

(Mr. 12.41-44)

¹ Ari ijeekaki Jesoshi janta Tajorentsipankoki. Raminayitawakirini ashaagantzinkari otetziriri iyorikite janta rotetantapiintaririra. ² Eejatzti iñaakiro irowa kamaentsiri oemi owashironkaenkawo. Otetapaakiri roori apimerontakite oorikyaanikite, kaari pinatacha. ³ Icantzi:

—Kyaaryo iroka nokamantemiri: pitheenkitzirkari irika amakiri iroka kamaentsiri oemi. Omaanta osheki iñaaperotzitakiro Tajorentsii irika amakirika, anaakotakiri ramaeyawitakarini riraga ashaagantzinkari. ⁴ Osheki iwinawo ramawitakari rirori, omaanta eeniro ikempoyaagaantanaki tzimagaantapaentsiri rivotaki ramakiri rirori. Rooma iroka, amanakiri maawaeni tzimimotawitawori, tee añagaeri tzimagaantanaatsini, tekatsi aantaneyo oyaari.

Inja ishekiryagyaeeteero Tajorentsipanko

(Mt. 24.1-3; Mr. 13.1-4)

⁵ Ikenkithataawakaeyakanri ryotaanewopaeni, ikanteeyini:

—Tema okameethaperotaki Tajorentsipankoka. Eejatzti maawaeni mapipaeni riwetsikantakawori, okameethateeyakini, eejatzti maawaeni rowaeneenkatantakawori janta otantoki.

Ikemanteeeyakaririni, ikantziri Jesoshi:

⁶ —Inja ishekiryagaeteero maawaeni iroka piñaaperoeyirini iroñaaka. Rookaeteero mapipaenika inteea.

Oeta awijatsini inja rootzimataatsirika ipokae Jesoshi

⁷ Roojatzi rojampiteeyakirini:

—¿Tsika okaateka omonkaatantyaari iroka pikantakinari? ¿Tsika nokantyaaka niyotantyaari rooteentsi omonkaatyá?

⁸ Ikantakiri:

—Kyaaryoowa, ramatawiteetzimikari. Ipoke osheki atziri ikantapaaki-miní: “Naaka Jesokirishito”. Paashini kantapaentsini: “Rotyaantakina Jesokirishito nokamantemi rooteentsi ipokae”. Omaanta eero paapatziyari.

⁹ Pikematyeeri atziri ikante romanatakagaeyatyáani atziripaeni, eejatzi rookaeyerini iwinkatharitepaeni. Omaanta eero pithaawaeyini. Aritaki okantyaari ikijawakaapiinteeyaani, omaanta tekira omonkaata nopolkan-teeyári.

¹⁰ Eejatzi eenitatsi paashini ikantakiri:

—Riraga atziripaeni romanaterini inashitapaeni atziri. Eejatzi riraga jewawenantatsiri paashiniki kipatsi ragaeyanakirini inampijatzipaeni romanatakayaari romanateeyirini riraga jeekatsiripaeni paashiniki kipatsi.

¹¹ Eejatzi osheki otzimayitanakini antawo omoyeka jaka kipatsiki. Agaey-erini atziripaeni itashe, osheki ikamaeyanakini; eejatzi omateeyirini mantsiyarentsi atziripaeni, ikamagaantayiteni rirori. Eejatzi okimitzitanakya janta jenokinta ari piñaawakiro kaari piñaapiinteeeyini, osheki pithaawanteeyanakyawoni.

Jesoshi ikantakiri riyotaanewo: “Inja ikijeeeyemini atziri”

(Mt. 24.9-22; Mr. 13.9-20)

¹² Eejatzi ikanteeyakirini:

—Omaanta reewateetemi ikijeetemi: tema paapatziyakina. Ragaeyanakimini theenkantatsiri janta pankotsiki ipiyotantapiintarira joriyyopaeni, eejatzi romonkyaa'yitemini omonkyaa'gamentotsiki. Ragaeyanakimini eejatzi janta pinkatharipaeniki, ikijatheeyemini, ikantemi: “¿Itaka paapatziyantariri Jesoshi?” ¹³ Omaanta eero pithaawantari riraga kijawitemini, inta pikamanteeyerini tsikarika nokanta nowawijaakoeyakimini. ¹⁴ Eero pikenkithashirya: “Aririka ragaetena, ¿oetaka nokanteriri?” ¹⁵ Aririka ragaetakimi niyotagaeyemini naaka oetarika pikanteriri. Eero imatantzimi riraga kijemini ipiyawaantetemi, ikantemi: “Pikompitashitawo”. ¹⁶ Nokamantemi: tee apatziro raakaantemi paashinijatzi atziri eejatzi raakaantzitemi piripaeni, piniropaeni, parentzipaeni, pitsiropaeni, pisheninkapaeni, maawaeni. Rowamaagaantem. ¹⁷ Tema riyoteeyakiminirika atziri paapatziyakina, rootaki roonaperotantemiri. ¹⁸⁻¹⁹ Omaanta aririka kijokiro poyena eejatzi pikyaaryooowentawo maawaeni nokanteeyakimirini, ari nokempoyaaperoeyakimini. Eejatzi piyaaperoeyanteeyaarini janta jenokinta pikanteetatyáani pijekaperoeyapaeni. Eero imateeyironi riraga kijeeyawitakimirini rookakagaeyemironi piyaateeyini janta jenokinta.

²⁰ Eejatzi ikantaki Jesoshi:

—Aririka piñagaeyawakirini joraaro rinkiteeyapaakironi Jerojaree, ari piyoteeyanakini rooteentsi ithonkaeyeeroni pinampi. ²¹ Roojatzi okameethatzi ishiyeeyanakini tonkaariki maawaeni jeekaeyatsirini nampitsiki. Eejatzi maawaeni jeekatsirini Joreeyaki, ishiyeeyanakini.

Eejatzi riraga jatayitatsirini owantsikipaeni, eero ipiyapanata nampitsiki. ²² Aritaki omonkaatakyaa maawaen iroka rojankinatziteetakarini paerani: "Rowajankitaperoeyerini Tajorentsi maawaen theenkayakiririni". ²³ Aririka omonkaatapaakya maawaen iroka, oo, osheki ashironkayitanakyaani motzitayitatsirini, eejatzi ashironkaakya thotaayitziririni eentsite: opomeentsitzimoeyaawoni oshiye. Osheki ikemaatsitayitanakyaawoni riraga jeekatsiripaeni. Osheki rowashironkagaeyerini Tajorentsi. ²⁴ Romanateeyerini osheki atziri, ikamagaantayitanakini. Paashinipaeni roojotayiterini, ragaetanakiri paashinikipaeni kipatsi. Ijeekapaaki kaari yotziripaeni Tajorentsi ojamani Jerojareeki, roojatzi ikananteeyea Tajorentsi: "Aritapaaki, monkaatapaaka".

Ikenkithatakotaa Jesoshi, tsika okantyaa aririka ipiye

(Mt. 24.23-31; Mr. 13.21-27)

²⁵ Eekiro ryaatatayee ikantziri Jesoshi:

—Piñeyawakirini ipaashininiteeyanakini jenokijatzi: riraga oorya, kashiri, ompokiropaeni, maawaen. Piñeero kaari piñaapiinteeeyini. Eejatzi jaka kipatsiki ithaawaeyanakini maawaen atziri, ikemaeyawakironi opoematanaaki antaworoña inkaare, mooo. Eejatzi iñaawakiro antaworoña otamakaari. Ramineeyanakironi, joreririri. ²⁶ Eero riyoteeyini atziri tsikarika ikanteeyanakyaani, rootaki ithaawaperoeyantanakyaarini. Ishevatayitanakyaani ompokiro. ²⁷ Roojatzi piñeyantawakinani, nopyiee ee-jatzi. Tema nopoñaaka paerani jenokinta, nokoñaatantapaentari jaka kipatsiki. Aririka nopyiee eejatzi, nokinapae menkoriki, notajorentsitaropataaki, nopinkatharitaperopataaki. ²⁸ Aririka piñagaeyawakironi iroka nokanteyakimirini, piweshireeyanakyaani, pamineeyawakinani: rooteentsi nowawijaakotaperoeyemini, tema nagaeyaatatyemini naaneemi jenokinta.

Ikantakota Jesoshi aririka ipokaatee iinja

(Mt. 24.32-35; Mr. 13.28-32)

²⁹ Roojatzi roshiyakaawenantakanari iroka, ikantakiri:

—Paminero iyeera tsika okantari. Kaaririka iyeera, eejatzi paashini inchato paminero. ³⁰ Aririka eereshitanee oshi, piyoteeyanakironi rootzimataatsi ojarentsitanee. ³¹ Eejatzi okimitaka, aririka piñaakiro omonkaatakyaa maawaen nokamantzitakimirika, piyoteeyanakini rooteentsi ipinkathariwentaperoeyemini Tajorentsi. ³² Aririka piñagaeyawakironi itanakya iroka nokamantakimiriki, ari eerotzitarika pikamita, aritaki piñagaeyakironi omonkaatakyaa maawaen. ³³ Aritaki othonkaaya maawaen kipatsi eejatzi ithonkaaya maawaen jenokijatzi: kashiri, oorya, ompokiropaeni, maawaen. Omaanta noñaani, eero othonkanita.

Ikantzi Jesoshi: "Paamaperooyeenani kameetha".

(Mt. 24.36-44; Mr. 13.33-37)

³⁴ Eejatzi ikantakiri:

—Paamaaperooyenani: nomapokapaemikari nokantakowenantemiri. Kyaaryoowa pikenkithashiryaakotawokari kaari kameethatatsi pajankaneki. Pishinkiteeyanikari. Pikenkithashiryaapiintzirokari jeekayatsirini jaka kipatsiki. ³⁵ Aritaki nomapokapaakiri maawaen jeekatsiripaeni kipatsiki. Nowashironkagaeyerini maawaen kaari aamaawenteeyachani. ³⁶ Eekiro piyaatatayee paamawentya. Eejatzi pamaneri Tajorentsi ramitakotemi kameetha pareeteeyanteeyaaarini jenokinta, eerokya pikemaatsitantawo maawaen iroka nokamantakimiriki.

³⁷ Maawaeni kitejiriki riyotaantaki Jesoshi janta Tajorentsipankoki. Maawaeni tsiteniniki ryaatapiintzi janta tonkaariki iiteetziri Oriiwomashi.
³⁸ Eejatzi maawaeni kitejiriki ryaatapiinteyakini atziripaeni Tajorentsipankoki ikemijanteeyirini.

22

*Ikamantawakaeta raakaanteeteri Jesoshi
(Mt. 26.1-5, 14-16; Mr. 14.1-2, 10-11; Jowa 11.45-53)*

¹ Rooteentsi areetya kitejittatsiri rowantapiinteyaworini paa kaari tapiyacha. Tema ikenkithashiryaakopiintawo joriiyopaeni paerani rawijeevantakaworini ronampiri Tajorentsi ipankopaaeni janta Ejiipitoki. ² Rowameethatawakagaeyakanri riraga jewatayitziririni ūnaanakowenantatsiripaeni eejatzi riraga iyotaanteeyirorini Iwaperite Tajorentsi ikantzi:

—¿Tsika akanterikakya Jesoshi owamaantyaariri? Aamaashitya ari iki-jakotanakyaaari atziripaeni.

³ Ikantaka riraga Jatanaashi ikyaatapaakari Joorashi karyootejatz, riraga riyotaanewo naawita Jesoshi: riyotaakiri raakaanteri iwinkatharite.

⁴ Ari riyaatashitakiri riraga jewatayitziririni ūnaanakowenantatsiripaeni eejatzi waairryaa aashi Tajorentsipanko, ikantapaakiri:

—Namitakotemi paakaanantyaariri Jesoshi.

⁵ Ikemantawakariri, ikimoshireeyanakini, ikanteeyawakirini:

—Ari, kameetha. Ari nopolatakimi koriki iroñaaaka.

⁶ Ikantakiri:

—Ari, kameethataki. Iroñaaaka naminaperoteri, roojatzi nokamantemi tsika pikantyaari pimanakaantyaariri payeri eerokya ūnaakowenantawakari atziripaeni.

*Awinkatharite rowakaakari riyotaanewopaeni
(Mt. 26.17-19; Mr. 14.12-16)*

⁷ Areetapaaka kitejittatsiri rowantapiinteyaworini paa kaari tapiyacha eejatzi rowamaapiinantariri owisha, ikimitzirira ichariniitenipaeni paerani janta Ejiipitoki. ⁸ Riraga Jesoshi rotyaatankiri Peetero eejatzi Jowa, ikantawakiri:

—Thamee peewate powojantero owanawontsi owaeyaarini, akenkithashireeyantyaaworini rawijantanakari paerani owamaantatsiri.

⁹ Rojampitanakiri:

—¿Tsika pikowakiroka nowojantero?

¹⁰ Rakanakiri:

—Aririka pareetakya nampsitsiki, piñapaakiri shirampari raakotaneero ūnaa. Poyaatanakiri janta pankotsiki, tsikarika ikyaatapae. ¹¹ Pikantapaakiri riraga ashitarori ipango: “Ikantzi Awinkatharite: ¿Tsika nowakayaarika niyotaanewopaeni?” ” ¹² Roñayimiro janta oshitamenkotakanta jenoki. Owetsikaeyakanri ajeekaeyantyaarini. Ari powojanteeyapaakini owaeyaarini.

¹³ Roojatzi riyateeyanakini, iñapaakiro ikantakiriri Jesoshi. Ronkotsiteeyapaakirini royaari, ikenkithashiryaakotantyaariri ronampiri Tajorents rawijantanakariri ichariniitenipaeni paerani janta Ejiipitoki.

*Jesoshi riyotagaeyakirini riyotaanewo rowawentapiintyaari paa
(Mt. 26.20-29; Mr. 14.17-25; Jowa 13.18-30; 1 Ko. 11.23-26)*

¹⁴ Rareeteeyapaakani Jesoshi eejatzi rotyaatantaneewopaeni rowaeyapaakani. ¹⁵ Ikanteeeyakirini Jesoshi:

—Osheki nokoyitakani nowakagaeyaneemini iroka owanawontsika eniroka nañi, akenkithashiryaantyaawori rowawijaakotantaki Tajorentsi paerani. ¹⁶ Nokamantemi, naapatziyaperotakari Tajorentsi rootaki nokamantyaari. Eero napiiteero nowawo iroka eejatzi jaka kipatsikika. Kyaaryo, rooteentsi nokame, nomonkaatero maawaeni rojankinatzitakarini riraga kamanantayitzirorinipaeni eejatzi paashini jankinatayitakirorini Iwaperite Tajorentsi paerani. Nomonkaatero maawaeni roojatzi nowapaeyaawo tsikarika ipinkathariwenante Tajorentsi.

¹⁷ Ikanta raakotakiro pajoki, ipaasonkitakiri Iriri, roojatzi ikantzi:

—Paakoeyawakironi iroka, pireeyeroni. ¹⁸ Nokamantemi: eero napiiteero nireero awishoowaantsi oowa jaka kipatsikika. Omaantakya nirapaero eejatzi janta ipinkatharitzinta Tajorentsi.

¹⁹ Roojatzi raakiro paa, ipaasonkitakiri Iriri. Ikagaakiro, ipaeyakirini ryotaanewo, ikantziri:

—Iroka paaka, powaeaawoni. Naaka kamawenteeeyemirini. Nokowaki powapiintyaawo paa pikenkithashiryaakotapiinantenari nokamawenteeeyakimini.

²⁰ Rowaeyakani maawaeni. Roojatzi ipakoeyakirini awishoowaantsi oowa. Ikanteeyakirini:

—Aririka pirero iroka, nokowaki piyoteeyeni oñaaganteroni owakirari imotawakaantsi. Tema rootaki niraa apaatawenteeeyemirini, nokamawenteeeyemini nowawijaakoeyantemirini.

²¹ Roojatzi ikanteeyakirini:

—Eenitatsi akaateeyakinika iroñaaka owaeyakani riraga akaantenani owamaakaantenani. ²² Naaka riraga atziriperotapaentsiri nokamawenteeyerini maawaeni atziri rootaki ikowakinari Pawa Tajorentsi, omaanta ashironkaamatsiterini riraga akaantenani.

²³ Ikemanteeyawakaririni, rojampitawakagaeyanakan:

—¿Ninkama aakaanterini?

Riyotagaeyakirini Jesoshi ryotaanewo tsika ikantyaari ipinkathari-tanyaari

(Mr. 10.42-45)

²⁴ Roojatzi ikantawakaanteeyakarini ryotaanewopaeni:

—¿Ninka iinja jewatakaaperoeyantatsirini? ¿Ninka anaakotantaperotsini ipinkatharitaperote?

²⁵ Ikantanakiri Jesoshi:

—Rameteeyawoni riraga jewatatsiripaeni kaari yotziri Tajorentsi ipinkathateeyakirini iwinkatharitepaeni. Ikantashiteeyakani: “Retakoeyakarini atziripaeni”, omaanta eeniro romperataperotapiinteeyarini.

²⁶ Omaanta eerokapaeni, eero pikimitakoeyarini. Aririka pikowaki pipinkathariwenante, eero pikantakaaperota, inta pamitakotapiinteri kameetha paashinipaeni. ²⁷ ¿Ninka ipinkathataperotziri atziri? ¿Riragama wetsikapiintziniriri rowanawo? Kaari. Tema riro ipinkathateetziri riraga omperateeyaririni ronampiripaeni. Omaanta naaka tee nomperateeyimini, inta netakoeyakimini. ²⁸ Kijokiro powaeyakinani paerani roojatzi iroñaaka, piyoteeyakini opomeentsitzimotapiinteeyakaeni. ²⁹ Rootaki nakanantzimiri iroñaaka eerori pipinkathariwenante, ikimitaakina Pawa ikowakaakinawo nopinkathariwenante. ³⁰ Pitsipatapiinteeyenani owapiinteeyaani eejatzi irapiinteeyenani janta nopinkatharitapaenta, eejatzi apinkathariwenteeyerini maawaeni joriiyopaeni.

*Jesoshi ikenkithatakotakiri Peetero rookeri
(Mt. 26.31-33; Mr. 14.27-31; Jowa 13.36-38)*

³¹ Eejatzi ikantakiri Awinkatharite:

—Shimo, pikemina, riraga Jatanaashi ikantakiri Tajorentsi ikowaki iñaantemi, rirotantyaari paapatziyaperotakinarika. Kyaaryoowa, ikowaki rantakayemiro kaari kameethatatsi. ³² Omaanta nokantakiri Tajorentsi ramitakotemi eerokya pookaperotantawo paapatziyana. Iinja, aririka pithawetakotya oetarika pantakiri, eejatzi pookero ari poyaatena ee-jatzi, pikenkithashiryaa kagaeyeerini maawaeni piyemijantzinkarite, paapatziyakaaperoeyantyaaririni.

³³ Rakanakiri Shimo:

—Tema eeroaka Nowinkatharite, kijokiro nowanakimi; aririka romonkeetemi, eero nookimi. Romonkeetenata naari. Aririka rowamagaetemi, nospitapero tanakimi. Rowamagaetenaata naari.

³⁴ Ikantakiri:

—Nokamantemi: iroñaaaka tsitenirikika, tekiraata iñee tyaapa, okaate 3 pikante: “Tee niyotziri Jesoshi”.

Thaato eejatzi jawiri

³⁵ Roojatzi ikanteeyantakarini Jesoshi riyo taanewopaenii:

—Paerani notyaanteeyakimini pikenkithatakagaeye yantaririni atziripaeni. Nokanteeyawakimini: “Eero payi pithaate, piyorikite, eejatzi paashini pi-ithaari”. Iroñaaaka nojampiteeyemini: “¿Pashironkagaeyakanima? ¿Eenitatsima koetyeemoeyakimirini?”

Raanakirini:

—Tekatsi koetyeemotenani.

³⁶ Roojatzi ikanteeyananakirini:

—Iroñaaaka nokanteeyemini: eenitatsirika pithaate, paanakiro. Eenitatsirika piyorikite, paanakiri. Tekatsirika pijawirite, pipi-mantero pipewiryakotari pamananantyaawori apaani pijawirite. ³⁷ Aritaki omonkaatakyä rojankinatakotakinarini paerani Iseyashi: “Rowamagaeteri, ikimitakaanteetyaari owamaantzinkari”. Kyaaryo, othotyaaperotakya kameetha maawaeni rojankinatakotzitakinari paerani riraga kamanantzirorini iñaani Tajorentsi.

³⁸ Roojatzi ikanteeyirini:

—Eenitatsi iroka, Nowinkatharite: apite okaatzi nojawirite.

Rakanakiri:

—Ari, monkaataka.

Janta Jethemaniiki ikenkithatakayiri Jesoshi Iriri

(Mt. 26.36-46; Mr. 14.32-42)

³⁹ Roojatzi ishitowanaki Jesoshi, riyaatanee eejatzi janta riyaatapiintzinta: janta tonkaariki iitachari Oriiwomashi. Itsipateeyananakarini riyo taanewopaenii. ⁴⁰ Rareeteeyapaakani, ikanteeyapaakirini:

—Iroñaaaka pamaneeyaarini Tajorentsi ramitakoeyantemirini: pantzirokari kaari kameethatatsi.

⁴¹ Roojatzi rowaaganaka Jesoshi apaniroeni eekitziroeni jaga. Rotzi-werowapaaka, ikenkithatakeraerii Iriri, ikantziri:

⁴² —Pawa, pikowakirika, powawijaakotenawo iroka nokemaatsitakyaari. Omaanta eero pantziro nokowakiri naari, inta pantero pikowakaakinari eerori.

⁴³ Roojatzi ipokapaaki apaani ronampiri Tajorentsi, ramitakotapaakiri Jesoshi, ishintsitantakari. ⁴⁴ Osheki ikemaatsitakawo, eekiro ikenkithatakaperotanakitzii Iriri. Antawo ikemawakiro imajawitanaki,

tema otsipatanakawo iyaaki riraa roojatzi othaatantanaka, pitek, pitek. ⁴⁵ Ithonkanakiro ikenkithatakaeri Iriri, riyataanee janta ijekaeaeyakininta riyotaanewopaeni, ifeeyapaatzirini magaeyakini. Rooma osheki rowashireeyananakani inkaaganki, rootaki imaantanakari.

⁴⁶ Ikanteeeyapaerini:

—¿litaka pimagaeyantakarini? Pipiriinteeyaneeni. Pamaneeyaarini Tajorentsi ramitakotemi eerokya panantawo kaari kameethatatsi.

Ragaetakiri Jesoshi

(Mt. 26.47-56; Mr. 14.43-50; Jowa 18.2-11)

⁴⁷ Eenirowa ikenkithatakagaeyawitarini Jesoshi riyotaanewo, areeteeyapaakani osheki atziri, reeweeyapaakirini Joorashi. Rirowitaka riyotaanewo Jesoshi, omaanta iroñaaka ikowaki raakaanteeri. Ipokashita paakiri riori, ithowootapaakiri. ⁴⁸ Ikantawakiri:

—Ro pithowootantanari, paakaananteenari. Tema piyotaki naaka riraga atziriperotapaentsiri riraga poñeenchari jenokinta.

⁴⁹ Ikanta iñaakowentawakirira okaatzi awijimotakiriri Jesoshi. Rojampiteeyirini:

—Nowinkatharite, ¿pikowakima nochekiri?

⁵⁰ Rootaki ichekaetakiri ikempitapero apaani ronampiri riraga iwinkatharite ñaanakowenantatsiri, thatzik. ⁵¹ Ikantakiri Jesoshi:

—Ari okantakaata, eero pikoshekari.

Roojatzi roepiyeeniri ikempita, rowithagaeniri. ⁵² Irira itsipateeyapaakarini Joorashi riraga jewatayiririni ñaanakowenantatsiripaeni, eejatzi riraga jewatakaantsiri janta ipankokinta Tajorentsi, eejatzi aataperoteenchari. Ikantawakiri Jesoshi:

—¿litaka pamashitananari pichekamentopaeni eejatzi pompojamentopaeni? ¿Naakama koshintzi? ⁵³ Tema notsipatapiinteeyawitzimini janta Tajorentsipankoki, omaanta tee pikoshekaeyanani. Omaantakya iroñaaka monkaätaka paantakinari: rooma ipinkathariwenteeyakimini iwinkatharite kamaari.

Ikantzi Peetero: "Tee niyotziri Jesoshi"

(Mt. 26.57-75; Mr. 14.53-72; Jowa 18.15-27)

⁵⁴ Roojatzi roteyanteetakari Jesoshi, shepik. Ragaeyanakirini janta ipankoki iwinkatharite ñaanakowenantatsiri. Ikantaka rimpaetanaki Peetero itapiiki Jesoshi. ⁵⁵ Janta pankotsiki, okaankiyeera, ari roeshita paamari. Ijeekaeyapaakini, rakitsiteeyapaakani riraga agaeyakiririni Jesoshi. Ari itsipateeyapaakarini Peetero. ⁵⁶ Roojatzi opokapaaki ronampiri ñaanakowenantatsiri. Okatziyapaaka, aminapaakiri Peetero, joreririri. Roojatzi okantanaki:

—Eejatzi irika rirotaki oyaatziriri Jesoshi.

⁵⁷ Ikantawakiro:

—Tee niyotziri riori.

⁵⁸ Roojatzi paashini aminakiriri, ikantakiri:

—Tema eeroka oyaatziriri Jesoshi.

Ikantakiri:

—Teewee. Tee noyaatziri.

⁵⁹ Ari ojamanitapaentzi, roojatzi ikantaki paashini:

—Kyaaryo, rirotaki oyaatakiriri irika shirampari, tema ejatzi ipoñaaka Karireeyaki.

⁶⁰ Ikantanakiri riraga Peetero:

—Tee niyotzi oetarika pikantakinari.

Roojatzi iñaantanaka tyaapa, anterekoo. ⁶¹ Riraga Jesoshi ipithokashitanakari Peetero, raminanakiri. Roojatzi ikenkithashiryaaantanakawo ikantzitakariri inkaaganki: “Tekiraatarika iñee tyaapa, okaate 3 pikante: ‘Tee niyotziri Jesoshi’ ”. ⁶² Ari ishitowanaki Peetero, riraaperotanaka, jmmm, jmmm. Osheki retakoperotanaka.

Ishirontawenteeyakarini Jesoshi
(Mt. 26.67-68; Mr. 14.65)

⁶³ Riraga shenteeyakiririni Jesoshi ishirontawenteeyakarini, eejatzi ipajapajaatakiri, tak, tak. ⁶⁴ Roojatzi ipashikapootantakari eejatzi ipajapootakiri, ikantakiri:

—Pikamantenaata ninka pajapootakimiri. Injii, injii.

⁶⁵ Osheki rowashironkaeyakirini, tema itheenakiri, ishirontawenteeyakarini.

Ipiyotaventeetari Jesoshi
(Mt. 26.59-66; Mr. 14.55-64; Jowa 18.19-24)

⁶⁶ Okantaka okitejitanaki ipiyoteeyani riraga aataperoteenchari, riraga jewatayitziririni ñaanakowenantsirsipaeni, riraga iyotaantzirori Iwaperite Tajorentsi, maawaeni. Ragaeyananakirini Jesoshi janta ikantakowentapiinteevirininta atziri. ⁶⁷ Rojampiteeyakirini:

—Pikamantenaata: ¿eerokama Rotyaantanewo Tajorentsi naama-gaeyakarini?

Rakanakiri:

—Nokantemirikami: “Jee, naaka Jesokirishito”, eero paapatziyawo nokantemiri. ⁶⁸ Eejatzi, nojampitemirikami oetarikapaeni, eero pakana.

⁶⁹ Omaanta nokantemi iroñaaka riraga atziriperotapaentsiri ijekimota-paerita Pawa rakoperoki, notsipatapaeyaariita notajorentsitaperotapae.

⁷⁰ Rojampiteeyakirini:

—¿Eerokama Itomi Tajorentsi?

Rakanakiri:

—Jee, naaka.

⁷¹ Roojatzi ikanteeyananakini:

—¿Itaka akowantyaari paashini kamantakoterini? Tema akemaeyakirini aaka ipaanteperoki, iitajorentsitsashitaka. Eenitatsi rantani.

23

Raanakiri Jesoshi janta Peraatoki
(Mt. 27.1-14; Mr. 15.1-5; Jowa 18.28-38)

¹ Riyaateeyananakini maawaeni, raanakiri Jesoshi janta Peraatoki. Rirotaki oroomajatzi, pinkathariwenteeyiririni joriiyopaeni. ² Ikantapaakiri:

—Eenitatsi rantakiri irika. Ramatawiteeyakirini nojoriyy-otzinkaritepaeni, ikanteeyawitakarini: “Eero pipiri pinkathari piyorikite”. Eejatzi ikantapiintzi: “Naaka Rotyaantanewo Tajorentsi, naaka jewawentzimiri”.

³ Rojampitakiri Peraato:

—¿Kyaaryoma? ¿Eerokama iwinkatharite joriiyo?

Rakanakiri:

—Jee, naaka.

⁴ Roojatzi rirori ikanteeyawakirini:

—Tee añiilo rantani irika.

⁵ Omaanta eekiro ikanteeyananakitziini:

—Ikijakagaeyakarini atziripaeni, ikanteeyakirini: “Thame ookeri awinkatharite”. Ritanakawo janta Karireeyaki, iroñaaka ikinakinayitzin jakা Joreeyakini, ramatawiteeyakirini maawaeni.

Raanakiri Jesoshi janta Erooreshiki

⁶ Ikemantakawori Peraato ikanteeyakiririni, rojampitakiri:

—¿Riotakima karireeyajatz irika?

⁷ Rakanakiri:

—Jee, riotaki.

Ikantawakiri:

—Paanakiri janta Erooreshiki. Riotaki pinkathariwenteeyiririni karireeyajatz. Ari ijekaki iroñaaka jaka Jerojareeki. Ipokaki chapinki.

⁸ Ikanta ragaeyaneerini janta. Iñaantawakariri Erooreshi, ikimoshiryaanaki. Osheki ikemakotzitapiintari, itajonkantayitakini, rootaki ikowantawitakariri iñeeri. Ikowawita iñeerimi itajonkantayitenimi.

⁹ Osheki rojampitayitawitakarini oetarikapaeni, omaanta tee rakiri Jesoshi.

¹⁰ Osheki rapiitapiintakiniri riraga amakiriri, ikantzi:

—Tee ikameethatzi. Eeniro rantani.

¹¹ Roojatz ishirontawenanteyakaririni Jesoshi riraga Erooreshi eejatz maawaeni joraaropaeni. Tema ikithaatakaakari kameethari kithaarentsi, ikimitakaantawitakari pinkathari, ishirontawenteeyantyaaririni. Roojatz rotyaanantaari eejatz janta Peraatoki. ¹² Aripaete raakameethatawakagaa Erooreshi eejatz Peraato. Omawitya paerani ikijawakaawita.

Rowamaakaantakiri Peraato Jesoshi

(Mt. 27.15-26; Mr. 15.6-15; Jowa 18.39-19.16)

¹³ Roojatz ipiyoteeyantakarini Peraato riraga jewatayitziririni ñaanakowenantsiripaeni, pinkatharipaeni, eejatz osheki atziripaeni.

¹⁴ Ari ikanteeyakirini:

—Pamine, inkaaganki pamawitakinari irika, pikanteeyawitakinani riyotagaeyakirini atziri rookaeyenani naari, eejatz rirori nowinkatharitzinkaritepaeni. Piñeyakinan nojampitakiri oetarikapaeni, omaanta noñaaperotakiri ikameethatatz: tee añiilo rantani. ¹⁵ Eejatz rirori Erooreshi, iñaaperotakiri kameethatatsi, rootaki roepiyantakinariri jaka. Ñaakiro, tekatsi rante nowamaakaanantyaariri. ¹⁶ Iroñaaka nopajatakaantashitawakyaari, roojatz noeyowaanteeyari.

¹⁷ Rametapiinteyawoni rirori maawaeni ojarentsi aririka omonkaatapaeya iroka kiteziri ikimoshiryaanteyyarini roeyowapiintzi apaani omonkyagaarewo. ¹⁸ Omaanta maawaeni piyotawentakariri Jesoshi ikaemaeyanakini:

—Powamaakaanteri irika, omaanta riraga Warawaashi poeyowaeri.

¹⁹ Paerani irika ikanteeyakirini atziri janta Jerojareeki: “Thame ookeri riraga pinkathari”. Eejatz rowamayitzirini atziri, rootaki romonkyaantetariri omonkyagamentotsiki. ²⁰ Ikowawita Peraato roeyowaerimi Jesoshi, rootaki ikowantawitakari rojantzikaerimi atziripaeni. ²¹ Omaanta eekiro ikaemaeyanakitziini riroripaeni:

—¡Pikentakotakaanteri! ¡Pikentakotakaanteri!

²² Rapiitawitaari eejatz Peraato:

—¿Itaka nokentakotakaanantyaariri? ¿Itaka rantakiri? Nojampiteeyawitakimini, omaanta tee pikamantaperotana opoñaantyaari nowamaakaanantyaariri. Nopajatakaantashitawakyaari, roojatz nockaanteeyari.

²³ Eekiro ikaemaeyanakitziini:

—¡Pikentakotakaanteri! ¡Pikentakotakaanteri!
 Eekiro ikantanankitzi, roojatzi rakakaantakari Peraato, ²⁴ Ikantziri:
 —Ari nomineeyakironi iroka pikowakagaeyakinarini.
²⁵ Roeyowakaanteeri Warawaashi, riraga piyathatachari eejatzi owa-maantatsiri, eejatzi ikanteeyakirini:
 —Paanakiritya Jesoshika, pantero oetarika pikoyiri pantakaeriri.

Ragaeyanakirini ikentakotantyaari.
(Mt. 27.31-32; Mr. 15.21-23; Jowa 19.16-17)

²⁶ Ari ragaeyanakirini Jesoshi janta ikentakoterinta, ikinanaki awotsiki. Itonkiyoteeyawakarini shireeneejatzi iitachari Shimo. Ipoñaanaka owantsiki. Ari romperatatakari joraaro inatanakiniri Jesoshi koroshi, rowaga ikentakotantyaarira. Royaatapaeri itapiiki Jesoshi. ²⁷ Royaateeyanakirini osheki atziri. Eenitatsi eejatzi osheki tsinani ocheragaeyakini iraakoeyakarini. Osheki owashiretakoeeyakarini. ²⁸ Omaanta raminanakiro Jesoshi, ikanteeyanakirini:

—Jerojareejatopaeni, eero piraakoeyanani, inta eeroka iraakoeyeen-chani, eejatzi piraakoeyaaarini peentsitepaeni. ²⁹ Iinja opomeentsitzimoyemini, pashironkagaeyanakyaani. Iinja ikanteete: “Okimoshiretanaki kaari tzimatsi otomi”. ³⁰ Eejatzi ikowaeyawitanakyaani atziripaeni opariyashiteeyerinimi impeeta atsinakantyaariri eero rañaantana. ³¹ Pamine, tekatsi nanten naaka, omaanta rowashironkaawaetashitena. Tema iinja rashironkaaperoeyani osheki maawaeni antzirori kaari kameethatatsi.

³² Eejatzi ragaetanakiri apite koshitantatsiri, itsipatantakariri rirori Jesoshi, ikentakoetakiri.

Ikentakotakiri Jesoshi koroshiki
(Mt. 27.33-38; Mr. 15.22-32; Jowa 19.18-24)

³³ Rareetakaanteeyapaakaririni janta tonkaariki iiteetziri Iitonakintsi ikentakoeyapaakirini koroshiki, tyag, tyag. Omaanta apaani koshintzi ikentakoetakiri rirori paashiniki koroshi janta rakoperokira Jesoshi. Irira paashini ikentakoetakiri jakakiroka rampateki. ³⁴ Roojatzi ikenkithataantakariri Jesoshi Iriri:

—Pawa, pikaminthayeri irikapaeni, eero powajankitawenziri rowamaakinaka. Tee riywaaetzi rirori oetarika rantziri.

Riraga joraaropaeni ikowaeyakini ragaeyeroni iithaarini Jesoshi. Ikantawakagaeyakan:

—Thame ookero mapyaaniki ayoteeyantyaarini ninkarika ayeroni iithaarini.

Ikantanaki paashini:

—Jee, thame.

³⁵ Ipyotawenteeyakarini janta osheki atziri, amineeyiririni, eejatzi riraga pinkatharipaeni. Ishirontawenteeyakarini Jesoshi, injii, injii; ikantzi:

—Rowawijaakotawitakari paashinipaeni, ajaatya aminawakiriita aririka iroñaaka imateeeya rirori rowawijaakoteeya. Riroperotakirika Jesokirishito, riraga Rotyaantanewo Tajorentsi, ari imateeeya rowawijaakoteeya.

³⁶ Eejatzi riraga joraaropaeni, ishirontawenteeyakarini. Riyaatashitakiri, iperimi awishooawaantsi oowa kepishaari. ³⁷ Ikantakiri:

—Eerokarika iwinkatharite joriyyo, ajaatya powawijaakoteeya iroñaaka: injii, injii.

³⁸ Eeniro ikentakoteetakiro janta koroshiki jankinarentsi owaetakiniri jeñokiini ipatziiotki Jesoshi. Ojankinataka iñaaniki kireeshiyajatzi, eejatzi

iñaaniki oroomajatzi, eejatzi iñaaniki joriyo. Ojankinataka, okantzi: "Irika rirotaki jewawentziriri joriyyopaeni".

*Ikenkithatakaakiri Jesoshi koshitantsiri ikentakoetakirira
(Mt. 27.39-53; Mr. 15.33-38; Jowa 19.28-30)*

39 Aapaani koshintzi kentakoteencharira rampateki Jesoshi ishirontawen-takari riori ikantakiri:

—Eerokarika Rotaantaanewo Tajorentsi, powawijaakotya eejatzi powaw-ijaakotzitena naari.

40 Omaanta ikjathathanakiri paashini koshintzi, ikantakiri:

—Pimaerite! ¿Tema pithawantari Tajorentsi? Eejatzi eeroka rooteentsi pikame. **41** Eeniropantziri aaka, tee akameethatzti rootaki akamantyaari, omaantakya irika tekatsi rante ikamashitakya. Tee ikimitakotee aaka.

42 Roojatzi ikanantanakari:

—Jesoshi, aririka pareeteeya janta Tajorentsikinta pikenkithashiryaa-paena naari, powawijaakotena.

43 Rakanakiri:

—Kyaaryo nokantemiri: iroñaaka kitejirika pitsipatapaakina janta okameethaperotzinta. **44-45** Ikaataki oorya tampatsika. Omapokashitanaka otsiteniakaakiperotapaaki maawaeni kipatsi. Tee añaaneri oorya. Okaatzi ojamanitaki 3 oorapaeni. Roojatzi ooryaantanaa eejatzi. Tema eejatzi eenitatsi janta Tajorentsipankoki otzikayirori niyanki. Okantaka omapokashitanaka otzijagaanaki, waaag, thatzik; apitemankitanaka.

46 Roojatzi ikaemanaki Jesoshi, ikantanaki:

—Pawa, iroñaaka nokame. Eeroka pikempoyagaena.

Roojatzi ikantanaka.

*Rowashireteeyanakani maawaeni ñaakiriri Jesoshi ikamaki
(Mt. 27.54-56; Mr. 15.39-41)*

47 Iñaantawakariri iyapitaanote joraaropaeni, ikantanaki:

—Tema ikameethataki Tajorentsi. Kyaaryo ikameethaperotzini irika shi-ramparini. Tekatsi rantani.

48 Eejatzi riraga amineeyiririni, ikenkithashireeyanakani maawaeni. Ipiyeeyanaani inampiki, osheki rowashireteeyanakani. **49** Omaantakya riraga yotakiriri Jesoshi, ikatziyeeyakani jantyaajeeni, ramineeyanakini. Okaateeyakirini iroka tsinanipaeni poñaachari Karireeyaki, tsipatapaakariri chapinki Jesoshi.

*Romonkyaagaetakiri Jesoshi omooki
(Mt. 27.57-61; Mr. 15.42-47; Jowa 19.38-42)*

50-51 Ari ijeki janta kameethari shirampari, iitachari Josee, arimateeyajatzi. Ojeeki Arimateeya janta Joreeyaki. Ari ikaatziri Josee riraga paashinipaeni ikaatzira ipinkathariteeyini joriyyopaeni, rowameethatawakaeyani, omaanta tee ikowawita riori ikentakotakaan-terimi Jesoshi. Ipinkathatziri riraga Tajorentsi, raamagaeyakarini ipokae ipinkathariwenteeyerini maawaeni atziri. **52** Ikanta ryaataki riori Peraatoki, ikantapaakiri:

—Nokowaki pishinetenari Jesoshini, naaneeri.

Ikantawakiri:

—Kameethataki, ari paaneeri.

53 Roojatzi royiitakontari, rapineetakotakiri tokoyaki, kameethama-wotatsiri. Raanakiri janta ojeekinta mapi, rowaga owakira imokaetzi,

romonkyapaakiri inthomaenta. Tekiraata rowanteetawo kaminkari, rirotaki omapokapaakirori Jesoshi. ⁵⁴ Tema rootaki weereneshi ikamantakari Jesoshi. Riwetsikaeyakironi atziri oetarikapaeni, tema rooteentsi saawaro imakoryaantapiintari. ⁵⁵ Rowaga tsinanipaeni oyaatakowenteeyakirini Jesoshini, aminakoeyakirini ragaeyanakirini omooki, janta royaankakoeeyakirini inthomaenta. ⁵⁶ Roojatzi opiyanteeyanaani janta opankoki. Owetsikapaa kajankaari eejatzi paashini kajankaatasiri. Areetantapaakari saawaro omakoryagaeyakini, omonkaatziro ikaminaantziri Tajorentsi.

24

Ipiriintanaa Jesoshi

(Mt. 28.1-10; Mr. 16.1-8; Jowa 20.1-10)

¹ Otominkotapaaki, okanta tsinanipaeni iyaataki amaetyaaka janta rookaetatzirinta Jesoshi. Aanakiro kajankaari owetsikakiri. Oyaatanakiro paashinipaeni tsinani. ² Areetapaaka rowaetakirira chapinki omooki antawo mapi, ratsinakakotanteetakariri omooki. Areetantawitapaakawori oñaapaatziro ashitaryaanaka mapi. ³ Okyaashitawitapaakari Jesoshini omooki, omaanta tee oñaapaeri Awinkatharite. ⁴ Tee iyoteeyanakini oetarika okenkithashiryaaanakyaari. Roojatzi romapokantapaakawo apite shirampari, ikatziyimotapaakawo okaakini. Oshipakiryaamawotaki iithaari. ⁵ Osheki othaawantawakari, oeyomaetanaka roojatzi kipatsiki. Rojampitapaakiro:

—¿Itaka paminantariri añaatsiri jaka? Jaka rookaetziri kaminkari. ⁶ Tee añaageri Jesoshi jaka, tema tzinaanaa. Pikenkithashireero ikamantztakimirini janta Karireyaki. ⁷ Tema ikantzi: “Naaka poñaachari janta jenokinta, nokoñaatapaaki jaka kipatsikika. Iinja rayena kaari aapatziyana, ikentakotena koroshiki. Okaate 3 kitejiri ari nopiriintanee eejatzi”.

Monkaataka iroñaaka.

⁸ Roojatzi okenkithashiryaaantanaawo ikamantzitakaworini rirori. ⁹ Opiyanaa okamantapaakiri riyotaanewopaeni eejatzi paashinipaeni aapatziyariri. ¹⁰ Owaero iroka tsinanipaeni: Mariya rowaga makaraarajato, Jowaana, Mariyya riniro Jantyaako, eejatzi paashinipaeni tsinani. Tema okantawitakari rotyaanantaneo Jesoshi iroka. ¹¹ Omaanta tee raapatziyawo riraga riyotaanewopaeni Jesoshi iroka okamantawitapaakariri, itakaashiteeyakanı okantawaetashita. ¹² Omaanta riraga Peetero ishiyanaka janta omooki rowaeyawitakarininta chapinki Jesoshi. Raminapaakiro inthomaenta, ifñaapaakiro tokoya iponatantawitakariri. Roojatzi ipiyanaa pankotsiki, osheki ikenkithashiryaaotanaka.

Janta awotsiki ifñaawakiri riyotaanewo Jesoshi

(Mr. 16.12-13)

¹³ Ikanta ryaatanaki apite riyotaanewo Jesoshi janta nampitsiki owaero Emawooshi. Ipoñaaka Jerojareeki, okaatzi ojamanitzi ¹⁴ kiroometero rareetantyaari nampitsikinta. ¹⁵ Ikinanaki, ikenkithatakaawakaanaka. Ikenkithatakotziri awijimotakiriri Jesoshi, eejatzi maawaeni okaatzi rantakiri. ¹⁶ Ranashita ikenkithatakaawaka, roojatzi itsipatantapaakari riraga Jesoshi, kijokiro rowanakirijanta awotsiki. ¹⁷ Ifñaawitawakiri, omaanta tee ishinetziri Tajorentsi riyotawakiri. ¹⁸ Ikantapaakiri:

—Inkaaganki pikinantapaakari awotsiki, ¿itaka piñaanatawakaantari? ¿ilitaka powashiretantakari?

¹⁸ Ikanta apaani iitachari Kerejowashi, rakanakiri:

—Riyoteeyakini maawaeni jerojareejatzi okaatzi awijeentsiri. ¿Apatzirona pikantakaakawo eeroka tee piyotzi oeta awijeentsiri?

¹⁹ Ikantanakiri:

—¿Iitakaky?

Ikantawakiri:

—¿Tema pikemakotziri Jesoshini, riraga Najareetejatzi? Ikenkithatakaapi-inteeyanawoni ikoyiri Tajorentsi eejatzi osheki itajonkantapiintzi. Iñaaperotziri irira eejatzi iñaaperotziri maawaeni atziri ikameethatzi.

²⁰ Raakiri riraga jewawentziripena ñaanakowenantatsiripaeni eejatzi awinkatharitepaeni. Ikanteeyakini tee ikameethatzi, ikentakotakantaantakiri kamaki. ²¹ Noetashitawitaka irira rirotaki owawijaakoeyenarinimi aakapaeni maawaeni joriiyopaeni, pinkathariwenteeyenarinimi.

Omaanta iroñaaaka okaataki 3 kitejiri ikamantakari. ²² Jataki tsinanipaeni inkaaganki amaetyaaka janta rowawiitakarinta Jesoshi. Opiyantapaakari,

²³ okamantapaakina: “Tee noñagaeri Jesoshini, tektsi. Omaantakya noñaapaakiri ronampiripaeni Tajorentsi, ikantawakina: ‘Piriintanaa, añaagae Jesoshi’”. Rootaki okantapaakinari. ²⁴ Roojatzi ishiyantanaka apaanipaeni ryotaanewo Jesoshi janta, raminakitziro rowawiitakarinta iñaapaakiro okaatzi okantakinari, omaantakya Jesoshini, tee iñiiri.

²⁵ Roojatzi ikantakiri:

—Tee añiilo piyotantari, pitheenkakiro ikantziri riraga kamanantayitzirorini iñaani Tajorentsi. Tee paapatziyawo. ²⁶ Tema ikantztitakanirityaawo riraga Rotyaantane newo Tajorentsi ikemaatsityaawo osheki katsiri, roojatzikya ipinkathariperotanaki.

²⁷ Roojatzi ryotaantakoperotanaka rirori apaniroeni Iwaperite Tajorentsi, ithotyaanakiro maawaeni kenkithatakotziriri rirori. Ritanakari rojankinarini Moeseeshi, rimpetaekiro ryotaakiri rojankinarini paashinipaeni kamanantayitzirorini iñaani Tajorentsi.

²⁸ Rareeteeyantapaakarini nampitsiki, rooteentsi rawijanakimi riraga Jesoshi, ²⁹ omaanta ikanteeyawakirini paashinipaeni:

—Eero piyatziita, pijekanakiita nopankoki. Tsiteniityaaki, rooteentsi otsitenite.

Roojatzi ryiaaatantapaenta ipankoki. ³⁰ Roojatzi itsipateeyantapaakarini rowa. Raapaakiro paa riraga Jesoshi, ipaasonkitakiri Tajorentsi, roojatzi ipantakari maawaeni. ³¹ Okantaka opokimotapaakiri ikenkithashiryaanaka, ryotataatziiri Jesoshi. Roojatzi ipeyimotantanaari eejatzi, tee iñaawaeri. ³² Ikantawakaanaka:

—Rootawetsikya rookantzimotakaakinawo kameetha najankaneki ikenkithawaetakaantapaakaeri janta awotsiki. Ryotaantakaerori okantakotziri Iwaperite Tajorentsi. Tema osheki akimoshirewentaperotakiro okaatzi ikantakaeri.

³³ Roojatzi ipiyantanaa Jerojareeki. Iñaapaatziri janta riraga 11 ryotaanewo Jesoshi, itsipatakari paashinipaeni aapatziyariri, ipiyoteeyakani.

³⁴ Ikantawakiri maawaeni jeekatsiri janta:

—Kyaaryoroña piriintaperotanaa Awinkatharite añaagae. Iñaawakiri Shimo.

³⁵ Roojatzi ikanantapaakari riraga apite:

—Eejatzi naari, noñaagaeri janta awotsikinta, kameethapero ryotaakina omaanta tee niyotzitawitari, omanimoshiryaakina janta nopankoki ikaantakawori paa, ipantakinawori, ariapeete niyotanakiri.

*Iñeyeyerini riyotaanewo Jesoshi
(Mt. 28.16-20; Mr. 16.14-18; Jowa 20.19-23)*

³⁶ Eeniro ipiyoteeyakani pankotsiki ikenkithatakaawakagaeyani, roojatzi romapokantapaakari Jesoshi, ikatziyimoeyapaakarini niyanki. Ikanta-paeri:

—Pikimoshireeyanakini, maawaeni.

³⁷ Rotsikanateeyanakarini, tee riyoteeyawakirini, iitashiteeyaw-itawakarini kamaari. Ithaawanteeyakarini. ³⁸ Rojampitapaakiri:

—¿Litaka pithaanantanarini? ¿Litaka pitheenkaeyantanarini pajanganek?

³⁹ Pamineeyeroni nako eejatzi noetzi ikyaanantanakinaga kiraawo. Naaka pokaatsiri. Ajaaty, pipampiteeyenani piyoteeyantenerini. Piñaakina, een-itatisi nowatha eejatzi notonki. Tee naaka kamaari. Riroma kamaari tekatsi iwatha eejatzi itonki.

⁴⁰ Roojatzi roñaaganteeeyakarini rako eejatzi iitzi. ⁴¹ Omaanta eeniro itheenkaneentayitzini, tee raapatziyaperotari rirotaki piriintaacha. Ikimoshireeyawitakani jeñokiini iwathakira omaanta jaga rajankaneki eeniro ikantashireeyini: “Kyaaryo, rirotakiroña ari aamaashitya kaaririka”. Rootaki ikanantanakariri:

—¿Eenitatsima oyaari?

⁴² Ari ipakiri shima tashirentsi. ⁴³ Raawakiri, roymotakari. Ari ramineeyakirini, joreririri.

*Ari riweyaakiro Jesoshi riyotagaeyakirini riyotaanewo
(Ran. 1.4-8)*

⁴⁴ Roojatzi ikanteeyantakarini:

—Tema chapinki nokamantzitakimi: “Osheki nokemaatsityaawo, rowamaagaeten. Otzimatye omonkaaty maawaeni rojankinatakotzitakinarini Moeseeshi, eejatzi riraga kamanantayitzirorini iñaani Tajorentsi, eejatzi riraga mampaawaetawenteeyaririni irira”. Iroñaaka monkaataka.

⁴⁵ Roojatzi riyotaaperoeyantakaririni okantayitzirini Iwaperite Tajorentsi, ⁴⁶ ikanteeyakirini:

—Tema okantzi Iwaperite Tajorentsi: “Aritaki ikamaki Rotyaantanewo Tajorentsi, okaate 3 kiteziri ari ipiriintanee eejatzi. ⁴⁷ Ikenkithatakoteeteri maawaeni kipatsikipaeni, ritanyakaaawo jaka Jerojareeki: ike-makoeyakirini maawaeni atziri. Ikamanteeeyerini irirapaeni: ‘Pikenkithashireeyanakaani, pookaeyeroni kaari kameethatatsi panteeeyirini. Pameentyaari Tajorentsi rowawijaakotantemiri’”. ⁴⁸ Ari piñagaeyakironi iroñaaka monkaataka rojankinatakotziteetakinarini paerani. ⁴⁹ Iroñaaka notyaantemiro ikashiyakaakimiri Pawa: opokashitemi Ishire, okithaatkayemi. Omaanta pijekawakiita jaka nampitsikika roojatzi opokawakiita. Ari omatakagaeyemini panteeeyantyaaworini oetarikapaeni ikowakagaeyemirini Pawa.

*Roenokanaa Jesoshi jenokinta
(Mr. 16.19-20; Ran. 1.9-12)*

⁵⁰ Paashini kiteziri ragaeyantanakarini riraga Jesoshi riyotaanewopaeni janta Wetaaniyaki. Ari janta niyanki, rowankanakiro rako Jesoshi, ikenkithatakakiru Iriri, ikantziri:

—Pawa, irika niyotaanewopaenika: pitajonkawenteeyerini, piweshiryaakagaeyaarini.

⁵¹ Ikantzirika iroka, eekiro roenokanaa jenokinta, peyanaa.

⁵² Osheki ipinkathateeeyakirini, roojatzi ipiyanteeyanaani Jerojareeki,

ikimoshireeyanakini osheki. 53 Riyaatapiintaki janta Tajorentsipankoki,
ikantapiinteeyakini:

—Tema ikameethataki Tajorentsi.

Ari okaatzi.

Naaka jankinatzirori:

Rookashi

JOWA ROJANKINATAKOTAKIRI JESOKIRISHITO, TSIKA IKANTARI ROWAWIJAAKOTANTZI

¹ Iroñaaaka naaka Jowa nojankinatakoteri irira apintzitatsiri rirotaki iyoperotakotaaneeriri Tajorentsi. Naaka riyotaanewo Jesoshi.

Tekirani riwetsikironi kipatsi, eeniro ijeeki riraga iyoperotakotaaneeriri Tajorentsi. Itsipatarini irira Pawa Tajorentsi. Eejatzi rirotaki Tajorentsi. ² Ikempiyakarini paeraniperoroña ashitariri. ³ Riraga iyoperotakotaaneeriri Tajorentsi rirotaki wetsikirori maawaeni, oetarika-paeni añaayitzirini. Tekatsi paashini wetsikeroni oetarika. Tekatsimi irira, eeromi riwetsikaeyeronimi okaatzi añaayitzirini, ari tekatsi tzimashitachanimi. ⁴ Rirotaki owañagaeyakaerini eejatzi roshiyakawo kitejitakotakagaeyerini: tema riyoperotakaakae tsika ikantari Tajorentsi. ⁵ Paerani tee ayoteeyawitarini rirori, okimitzimotakae ajeekakitzi tsiteniriki; roojatzi ipokantapaakari riraga iyoperotakotaaneeriri Pawa Tajorentsi. Iroñaaaka okimitzimotakae akitejitatkoeyakini. Tema kameetha riyoperotakotaakeri rirori aakapaeni. Iroñaaaka riraga theenkiriri rirori okimitzimotari eekiro riyaatatyye ijeeki tsiteniriki; omaanta tee imatziro rantakagaero apitanuyaawori ajeeki tsiteniriki.

⁶ Riraga Pawa Tajorentsi rotyaantakiri shirampari iitachari Jowa.

⁷ Ikwanteeri rirori maawaeni aaka aapatziyaperotaari riraga iyoperotakotaaneeriri Tajorentsi. Rootaki rotyaanantariri riraga Jowa ikantakotayitapaakirini irira. Ari ikinanaki riraga Jowa ikantakotayitapaakirini rirori. ⁸ Kaari irira rirotaki iyoperotakotaaneeriri Tajorentsi, inta riraga Tajorentsi rotyaantakaeri rirori ikantakotantapaakyariri irira impaetatsini.

⁹ Ari impaetzi ipokantapaakari riraga iyoperotakotaaneeriri Tajorentsi jaka kipatsiki. Roojatzi riyoperotakaantanaakaeriri Tajorentsi aakapaeni jeekatsirika kipatsikika. ¹⁰ Ari ijeekimotapaakiri atziripaeni kipatsikika. Tema riwetsikantakawori kipatsi paeraniperoroña omaanta tee riyoteeyawakirini atziri rirotaki wetsikaeyakirorini. ¹¹ Ipokawitapaaka rashiki iipatsiteki: ipokawitapaaka ijoriuyotzinkarite, omaanta tee ipinkathawakiri. ¹² Omaanta reentsitetari Tajorentsi apaanipaeni atziri. Ninkarika aapatziyakariri riraga iyoperotakotaaneeriri Tajorentsi, riraga ameentari, tema reentsitetakari riraga Tajorentsi. ¹³ Eero reentsitetee akowashitari aaka, eejatzi tee ro akoñaatashitee reentsitetee Tajorentsi inta ikowashitanaka irira reentsitetakae.

¹⁴ Riraga iyoperotakotaaneeriri Tajorentsi ipokapaaki jaka kipatsiki ikoñaatapaaki atziri. Itantakari Jesoshi. Riraga Pawa Tajorentsi rotyaantakiri jaka. Ijeekimoeyapaakaeni aakapaeni itsipatakae. Noñaayitawakirini irira rapintzite Itomi Pawa Tajorentsi ishipakiryaaaki. Ikimiperotakari Iriri; rirotaki kyaaryooperotatsiri, eejatzi ineshironkaperotakae aaka.

¹⁵ Ikanta riraga Jowa riyotaakotakiri riraga Jesoshi ikantakotakiri irira rirotaki iyoperotakotaaneeriri Tajorentsi. Ikantayitakirini riraga atziri:

—Irika Jesoshi nokamantakotakiri chapinki. “Ranaakotena riraga impaetatsini. Tekirani nokoñaatzini naari, eenironi ijeeki rirori itsipatari Ashitariri Tajorentsi”.

¹⁶ Irira Jesoshi ashi royiro intintaperotantzi rootaki ineshironkaperotanteeri aaka. Eekiro ryaatatzia ineshironkaperotakae. ¹⁷ Paeraniperoroña riraga Tajorentsi rojankinatakaeriri Moeseeshini. Rojankinatziro oetarika ikowakiri anantyaawori aaka ajeekantyaari kameetha. Ejazti rojankinatakotziri riraga Jesokirishito ineshironkaperotakae. Iroñaa ka ipokapi irira tema rirotaki kyaaryooperotatsiri, neshironkaperotantatsiri. ¹⁸ Tekatsi atziri ñeerini Tajorentsi, omaanta riraga Jesoshi Itomi rapintzite iñiiri. Ikimitari Iriri, rooma kijokiro royiri. Tema itsipatawakaaka. Apintzi irira iyoperotakotaaneeriri riraga Tajorentsi.

Riraga Jowa ikantakotakiri Jesoshi

¹⁹ Nityaawo nokantakoteri riraga Jowa okaatzi ikantakotakiri riraga Jesoshi. Riraga jewatatsiripaenai joriiyopaenai jeekatsiri janta Jeroareeki rotyaantakiri apaanipaenai ñaanakowenantatsiri Jowaki rojampikowentakaantakiri irira. Ejazti rotyaantakiri apaanipaenai amitakontantsiri ñaanakowenantatsiri itsipatakari: tema rirotaki icharineetenai Rewiini. Rojampitapaakiri, ikantapaaakiri:

—¿ilitaka pikaawoshitakontariri Tajorentsi atziri? ¿Ninkamika? ¿Eerokama Rotyaantanewo Tajorentsi naamagaeyawitakarini?

²⁰ Ikantaperotawakirikya:

—Kaari naaka.

²¹ Rapiitakiri:

—¿Kyaaryo? ¿Eerokama Iriiyashini?

—Kaarina.

—¿Eerokama riraga kamanantzirori iñaa Tajorentsi naamagaeyakarini?

—Kaarina.

²² Rapiitakiri:

—¿Ninkamika? ¿ilitaka nokantapaeriri otyaantakinari? ¿ilitaka pantziri?

²³ Ikantawakiri:

—Naaka ikenkithatakotzini paeraniperoroña Iseeyashi riraga kamanantzirorini iñaa Tajorentsi. Rooma rojankinatzini:

“Inja ipokae kaematsini, ikenkithatapiinte janta tekatsinta atziri ipango, ikante: ‘Pikenkithashireeyakya, paapatziyari Awinkatharite, rowameethatantemiri. Rootaki ipokantyaari riyoteemiro pijekatyari kameetha. Ipokantyaaripa’.”

²⁴ Irira pokaentsiri riraga ojampitantatsiri rirotaki warijeeyopaeni.*

²⁵ Ikantapaakiri:

—¿Kyaaryo? ¿Kaarimima Rotyaantanewo Tajorentsi? ¿Kaarimima Iriiyashini?

¿Kaarimima riraga kamanantzirorini iñaa Tajorentsi naamagaeyakarini ipokae? ¿ilitaka pikaawoshitakontawakariri Tajorentsi riraga atziriipaeni?

²⁶ Ikantawakiri:

—Tema naaka nokaawoshitakotantawakariri Tajorentsi apatziro iñaa. Enitatsi iroñaa ka paashini shirampari kaari piyotzi eeroñakapaenai itsipatakae: tema rirotaki riraga Rotyaantanewo Tajorentsi. ²⁷ Rirotaki impae-tanari, tema rirotaki jewaperotatsiri. Osheki noñakoweenkaperotziri irira. Tee noñakoweenkaperota naari.

²⁸ Aritaki ikantapiinta riraga Jowa janta Wetaaniyakinta, intatsikeronta Joriraaniki. Janta ikaawoshitakotapiintarinta Tajorentsi atziriipaeni iñaa.

Rapiitakiri riraga Jowa ikenkithatakotakiri Jesoshi

²⁹ Okitejitanaki raminanaki riraga Jowa iñawakiri Jesoshi ipokapaaki. Ikantziri atziriipaenika:

* ^{1:24} Warijeeyo rirotaki jewatatsiri piyotapiintantsiki joriiyopaeni.

—¡Pamine sha! Irikatapaaki Jesoshi riraga Rotyaantanewo Tajorentsi. Iwaero ejatzti rowishate Tajorentsi. Ikamawentee paata aaka maawaeni atziri, iñaaperotanteeri Ashitariri akameethatz. Raapithateero aakapaeni oetarika kaari kameethatatsi antziri. Oshiyantyaariri rowamagaetantyaariri owisha iñaaperotanteeri riraga Tajorentsi aaka maawaeni joriyyo akameethatz. ³⁰ Rirotaki irira nokenkithatakotakir chapinki nakanantakariri: “Ranaakotakina impaetapaenani, rirotaki jewaperotatsiri. Osheki noñaakoweenkaperotakiri irira. Tee noñaakoweenkata naari. Tekirani nokoñaatzini naaka, eenironi ijeeki irira itsipatakari Pawa Tajorentsi”. ³¹ Paerani tee niyowitarini rirotaki Rotyaantanewo Tajorentsi, omaanta ironaaka niyoperotziri. Ejatzti ikowaki riraga Tajorentsi riyoteri maawaeni ikaateeyinira nojoriyyotzinkarite. Rootaki nopokantakari naaka nokaawoshitakotawakiri maawaeni nojoriyyotzinkarite nookotantyaariri riori.

³²⁻³³ Roojatzi ikanantanakari:

—Tee niyotawitarini naaka. Omaanta rotyaanantakinari riraga Tajorentsi, ikantakina: “Pikaawoshitapiintawakiri atziri iñaaki, piyoteeri maawaeni riroripaeni ikenkithashiryaaokotena. Jinja piñaawakiro ayitapaaki Noshire. Ninkarika ookantapaakyaari rirotaki riraga kithaatotakotawakori atziripaeni Noshire”. Ari impaetzti noñaawakiro oshawiinkapaaki Ishire Tajorentsi. Opoñaaka jenokinta, ookantapaakari Jesoshi. Oshiyaaawitapaakari jamomo.

³⁴ Kyaaryo noñaaperotakiro. Rootaki nokantakotantakariri: “Rirotaki Itomi Tajorentsi”.

Atziri ikamantakotziri Jesoshi rirotaki Rotyaantanewo Tajorentsi

³⁵ Okitejitanaki rapiitakiro ikatziya riraga Jowa jaga itsipatana naaka riyotaanewo apite. ³⁶ Raminakiri riraga Jesoshi ikatziyatziyawaetaty a janta awotsiki. Ikantzi riraga Jowa:

—¡Sha! Paminerri irinta. Rirotaki Rowishate Tajorentsi; riraga Rotyaantanewo. Rotyaanantariri ikamawenteeyerini maawaeni atziri, rowawiajakotanteeri. Roshiyakari owisha rowamaapiintziri ñaanakowenantatsiri iñaaperotanteeri Tajorentsi aakapaeni joriyyo akameethatz.

³⁷ Nokemantawakiriri riraga Jowa naaka riyotanewo apite, rootaki noyaatantanakariri riraga Jesoshi. ³⁸ Ipitokashitakina irira iñaakina noyaatkarira. Ikantakina:

—¿litaka pikoyiri?

Nokantawakiri:

—Tekatsi. Iyotaantatsiri, ¿tsika pijeeekika?

³⁹ Ikantawakina:

—Thame poyaatanakina noñaayemiro.

Roojatzi noyaatantanakariri riori, noñaapaakiro pankotsi ashinentsi ijeekantari. Ari jenokitapaaki oorya. Noñaapaakiro pankotsi, nojeekimota-paakiri maawaeni kitejiri. ⁴⁰ Iwaero paashini areetapaenchari Antereeshi rirotaki rirentzi Shimo iieteri paata Peetero.†

⁴¹⁻⁴² Tsitenini oorya ryaatanaki Antereeshi raminakiteri rirentzi. Iñaantapaakiriri irira, ikantapaakiri:

—Noñaakiriri Rotyaantanewo Tajorentsi. Thame poyaatanakina, piñaapaeri.

—Jee, thame.

Ari rareetapaakari Jesoshiki. Raminawakiri, ikantawakiri:

† ^{1:40} Okantzi: “Jinjia iiteetemi Sheejashi okantakotzi Peetero”. Tema akantziri aari apaanteki Sheejashi ejatzti Peetero: mapitsatsi. Sheejashi rootaki ñagaantsi ipaanteki ewereeyojatz. Peetero rootaki ñagaantsi ipaanteki kireeshiyajatz.

—Rooma eeroka Shimo, itomi Jonaashi. Iinja ii teetemi: Peetero.

⁴³⁻⁴⁴ Okitejitanaki riraga Jesoshi ikoyi ipiyanee ipankokinta janta paashiniki kipatsi. Oeta kipatsi Karireeya. Naakapaeni riyotaanewopaeni itsipatakina. Omaanta tekirani riyaateni janta, riraga Peetero raminakitziri jagā riyompari Jiripi. Romiñaakiteri. Jiripi, Peetero eejatzi Antereeshi ipoñaaka Wetheeraki: itsipatawakaaka janta. Wetheera rootaki nampitsi jEEKATSIRI janta Karireeyaki. Raminakitziri, ari iñaakiri rirori, ikantziri:

—Thame paminerri Rotyaantanewo Tajorentsi.

—Jee, thame.

Iñaantawakari Jesoshi riraga Jiripi ikantawakiri:

—Thame poyaatananakina.

Roojatzi royaatantanakari. Ari jateeyanakini maawaeni.

⁴⁵ Ari yowapaakina maawaeni janta okaakini Kanaa, paashini nampitsi jEEKATSIRI Karireeyaki. Ari irira Jiripi riyaatakitzi ipankoki riyompari Nata-neeri. Iñaapakiri ikantapaakiri:

—Noñaakirikya riraganki, rojankinatakotzitakarini paeraniperoroña Moe-seeshi. Eejatzi kamanantayitzirorini iñaani Tajorentsi rojankinatzitakoe-yarini rirori. Rirotaki Jesoshi, itomini Josee najareetejatzi.

⁴⁶ Ikantawakiri:

—Tee ikameethatzi maawaeni najareetejatzi. ¿Kyaaryooperoma ikameethatzi rirori?

Rakanakiri Jiripi:

—Thame paminakiteri, piyotantyaariri ikameethatzirika.

Ari riyaatananakina.

⁴⁷ Ari rokaakinteeeyapaakarini riraga Jesoshi iñaawakiri ipokapaaki, ikantziri tsipatayitakaririni:

—Pamineriroña riraga Nataneeri. Rirotaki joriyyopero kimiperotariri itakaantawori paerani Ishirayeerini: ikameethataki, tee riyotzi ramatawittantzi.

⁴⁸ Rojampitapaakiri Nataneeri, ikantapaakiri:

—¿Tsika pikantakaka piyotantawakinari nokameethatzi?

Ikantawakiri:

—Noñaakimi janta pontsiritawo iyeera, tekira ikenkithatakaemi Jiripi.

⁴⁹ Rakapaakiri riraga Nataneeri:

—Tema eeroka Itomi Tajorentsi: pithotyaakiro maawaeni, piyotayitzirini. Eerokataki jewawentziriri joriyyopaeni.

⁵⁰ Ikantawakiri:

—Pamine, inkaaganki nokantakimi: “Noñaakimi pontsiritawo iyeera”. ¿Rootakima paapatzyantakinari? Ari piñeena iinja nota jontakantaperotanaki osheki, impaetzikya paapatzyantaperotenari. ⁵¹ Kyaaryootaki iroka nokantemiri. Aritaki piñaakiro iinja jenokiperonta inthomagenta. Piñaakir ronam-piripaeni Tajorentsi rayiitashitenia ipiyaneero eejatzi. Ikanantari nopo-kantari jaka kipatsiki niyoperotakotakaeriri riraga Tajorentsi maawaeni atziri. Tema naaka poñaachari jenokinta, nokoñaataki jaka kipatsikika.

2

Ritanakawo Jesoshi itajonkantawori iña

¹⁻² Okaatzi nomaaki apite. Okitejitanaki aritaki ikimoshireeyini maawaeni kanaajatzi. Ojeeki nampitsi owaero Kanaa kipatsi owaero Karireeya. Ikimoshirewenteeyakirini riroripaeni apaani shirampari

owakira rayirowa iina. Tema romiñaakiri oshekini atziri rakiyoteri.* Eeniro ikaateeyinira kanaajatzi, eejatzi roori riniro Jesoshi, eejatzi notsipateeyakarini naaka, Jesoshi, eejatzi paashinipaeni riyotaanewo, maawaeni. ³ Ari rowaeyakan maawaeni atziri eejatzi imiritaki awishoowaantsi oowa, rootaki iwyaaritayitarini joriiyopaeni rirori. Rooteentsi ithaatzimatero, rootaki okanantariri rowaga riniro Jesoshi:

—Tekatsi paashini awishoowaantsi oowa: ¿tema aritaki pimatakiro pamitakoteri?

⁴ Ikantawakiro:

—Nana, ¿jíitaka pikantanantari? Tekiraata omonkaata notajonkante.

⁵ Omaanta okantziri roori onampirentsipaeni jaga:

—Pikemijantaperoterira oetarika romperatemiri.

⁶ Eeniro jaga chomoo antawopero† okaatzi 6. Riwetsikaetziro mapi. Rootaki ojeekantari iñaa ikiwantapiintari joriiyopaeni ikiwawakowentari Tajorentsi. Omaanta iroñaaka thaataka. ⁷ Ikantziri rirori maawaeni onampirentsi:

—Piyeekitero iñaa chomookipaenira.

Ari riyeekiteeyakironi maawaeni. ⁸ Roojatzi ikanantanakari:

—Pikitero iroñaaka paakotanakiniri omperatzimiri, pimpaete paakotanakiniri maawaeni atziri.

Ari raakotanakiniri. ⁹ Ikemijantawakiro riraga omperatariri, tema opeyanaka awishoowaantsi oowa. Tee riyyotzi omperatariri onampirentsi tsikarika opoñaaka iroka, omaanta riyyotaki onampirentsi, iyeekitzirori chomokira iñaa. Roojatzi riraga omperatantachari ikaemantakariri aatsiri iina. ¹⁰ Ikantziri:

—Tema rootaki itapiintari kameethari awishoowaantsi oowa aperi atziri. Aririka ashinkitawitanakyaani apokashitapaero majankaari. Aritaki okantari ameteeyarini. Eerokaritya eeroka kempoyaakirori rowaga kameethari. Owakira iroñaaka pamakaantakiro.

Ari maawaeni ririro.

¹¹ Ari janta Kanaa jeekatsiri Karireeyaki, ritakawo Jesoshi itajonkantaki. Roñaagakinawo ishintsinka. Noñaakiri naaka eejatzi paashini riyotaanewo, roojatzi ameenantanakariri maawaeni.

¹² Roojatzi noerinkanteeyanakarini Kaperinawooki. Itsipatanakina Jesoshi naaka, riniro, rirentziipaeni, rirojatzi paashinipaeni riyotanewo. Ari nokaateeyanakirini maawaeni. Nomagaeyanakini janta apaanipaeni tsiteniriki.

Iroñaaka nokantakoteri riraga Jesoshi roemishitowaeyakirini Tajorentsi-panko pimantatsiripaeni

¹³ Rootzimateentsi kitejiri nokimoshiryantapiintari naakapaeni joriyyo owaero Kitejittatsiri rawijantariri ronampiri Tajorentsi. Nokenkithashiryakotawo kitejiri paeraniperoroña rawijantakarini irira ipankokipaeni nochariniiteni janta Ejípitoki.

Rootaki oshekini atziri itonkaantanakari Jerojareeki tonka, tonka, tonka, ipinkathatantariri riraga Tajorentsi. Ari itonkaanaki riraga Jesoshi janta. Nokaatanakiri paashinipaeni riyotanewo noyaatanakirini. ¹⁴ Nokyaakaapaakiri Tajorentspankoki noñaapaakiri janta pimantatsiri waaka, owisha, jamomo, maawaeni. Eejatzi ijeebakki jaga kaampiyayitziririni atziri iyorikitepaeni. ¹⁵ Ari iñaakiro riraga

* 2:1-2 Naakapaeni joriyyopaeni nametapiintawo iroka. Aririka atziri raye iina, ari romifeeri oshekini atziri rakiyoteri. Ikmoshireeyakini maawaeni. † 2:6 Apaani okaate yeekitatsini 80 riitero iñaa.

Jesoshi shiwithapaeni riwetsikashitakiri pajamentotsi ipajatantyaariri waaka. Roojatzti romishitowanteeyakaririni owisha, waaka, maawaeni. Ipitamenkakotakiri imeejatekipaeni kaampiyayitziririni iyorikitepaeni, rojokitakiri iyorikite. ¹⁶ Ikanteeeyirini pimantsatsiri jamomo:

—Pagaeyananakirini irika. Eero pipimantawaetzi jaka nopinkathatapintzirika Pawa.

¹⁷ Roojatzti nokenkithashiryaantanakawo rojankinatakotziteetakirini irira Jesoshi paeraniperoroña Iwaperiteki Tajorents: “Naamaakotzitakari, Pawa, iroka Tajorentsipankoka; rootaki rowamaanteetenari iinja”.

¹⁸ Ikantanakiri jewatatsiripaeni joriyyopaeni:

—¿litaka panantawori iroka? ¿litaka poñaayenari niyotantemiri eerokarika rotyaantzi irira Tajorents?

¹⁹ Ikantawakiri:

—Pishekiroreero iroka Tajorentsipankoka ari okaate 3 kitejiri napiiteero notzinagaero. ²⁰ Roojatzzi ikijathatantanakari riraga jewatatsiripaeni joriyyo:

—Okaatzi oshekini ojarentsi riwetsikanteetakawori iroka Tajorentsipankoka. ¿Arima okaate 3 kitejiri piwetsikanteeyaaawori eerori? Eerowa pimatziro.

²¹ Ñaakiro, rirojatzzi oshiyakaawentachari. Rioma rivotaki oshiyakaawentachari iwatha Tajorentsipankoka, rooma kijokiro royiri Ashitariri. ²² Ikamantakari, okaataki 3 kitejiri ipiriinantanaari. Roojatzzi, aritaki nokenkithashireeyananakironi iroka oshiyakaawentachari. Eejatzi niyotanakiro okenkithatakotakirini paerani Iwaperite Tajorents monkaataka iroñaaka maawaeni okenkithatakotakiri.

²³ Areetapaaka Kitejitatsiri rawijantari ronampiri Tajorents nokimoshiryaantari maawaeni naaka joriyyojatzzi. Ijeekapaaki riraga Jesoshi Jerojareeki, osheki itajonkantayitapaakin. Iñayitakirini atziri, rootaki raapatziyeeyantakirini. ²⁴ Omaanta Riyotzi rirori iitaka ikenkithashiryaari maawaeni atziri, rootaki raamaantanakari: “Ragatanakinakari”. ²⁵ Riyotakiri riraga atziri iitaka ikenkithashireeyarini. Riyotashitaka, tekatsi kamanterini.

3

Ikenkithawaetakaakiri Jesoshi Nikoreemo

¹ Eeniros Shirampari jewatziriri joriyyopaeni iwaero Nikoreemo. Rivotaki warijeeyo. ² Ikanta riraga Nikoreemo ipokashitakiri Jesoshi tsiteniriki, ikantapaakir:

—Iyotaanari, niyotakimi pipooñaaka Tajorentsiki. Rootaki pipokantakari, piyoteeyapaenani. Eeromi itsipatzimimi Tajorents eeromi pitajonkantzimi. Rootaki nokowantari piyoteena naari.

³ Ikantawakiri riraga Jesoshi:

—Kyaaryooperotaki iroka nokantemiri: riraga kaari apiitaachani ikoñaatee, eero reentsitetari Tajorents, eejatzi eero imatziri iñiiri irira, itsipatantyaariri jenokinta.

⁴ Ikantapaakiri riraga Nikoreemo:

—Aririka antyashiparitaki, ¿tsika akantyaaka apiiteero akoñaatanteeyaari? ¿Arima amateero apiyaneero omotziki anironi apiitero akoñaatantapaeyaari?

⁵ Ikantawakiri:

—Kyaaryootaki iroka nokantemiri: maawaeni kaari apiitaachani ikoñaatee eero reentsitetari Tajorents. Omaanta aririka rityaawo okoñaateri riniro eejatzi impaetzti apawo otzimirli Ishire Tajorents, aritaki

rashitakyaari riraga Tajorentsi eejatzi raminakowiritantakiri. ⁶ Tsinani aririka oeyoyeeri otomi, ikimitari ashitariri, ikame. Eejatzi okimiwitaka Ishire Tajorentsi, aririka otzimeri atziri ikimityaari Tajorentsi, eero ikami, inta ikantyaani ijeeki itsipatyaaari Tajorentsi. ⁷ Aririka nokantemi: "Papiiteeya pikoñaatee", eero pitzimaetyaashitanaka. ⁸ Tsikarika okoyi otampyaataki tampyaa, pikemawakiro opoematapaaki, moo. Omaanta tee piyotzi tsikarika okinapaaki eejatzi tee piyotzi tsikarika iyaate. Eejatzi ikimiwitawo maawaeni otzimantari Ishire Tajorentsi.

⁹ Ikantapaakiri riraga Nikoreemo:

—¿Oetaka poshiyakaawentanari?

¹⁰ Ikantawakiri:

—¿Kairimima eerori iyotaayitzirini maawaeni ajoriiyotzinkarite? ¿Itaka kaari piyontantawakawo iroka nokantzimiri? ¹¹ Kyaaryooperotaki iroka nokantemiri: nokantakotziri iitarika niyotziri eejatzi noñaayitzirini omaanta tee paapatziyawo nokantayitawitzimiri. ¹² Iroñaaka nokenkithatakowitzimiro ineetziri jaka kipatsikika, omaanta tee paapatziyawo. Aririka nokenkithatakotemiro oetarika ikoyiri riraga Tajorentsi, jarima paapatziyakina? ¹³ Tektsi atziri jatatsini jenokinta eejatzi ipiye jaka kipatsikika ikantemi oetarika ikoyiri Tajorentsi. Omaanta naaka nopoñaaka jenokinta nokoñaatapaaki kipatsikika. Aririka nokenkithatakofero jenokinta, niyotakiro oeta nokantziri. ¹⁴ Paeraniperoroña riyaatantakari acharini-iteni paerani janta tekatsinta atziri ipanko, ratsikayitawakirini oshekini maanki. Icamayitakini osheki. Ari ikantakiri riraga Tajorentsi Moeseeshini: "Piwtetsikeri oshiyaarini maanki powatzikakoteri inchapankeki. Raminayiterinirika atziripaeni ari retsiyatatakotanee, eero ikami". Aritaki imatakiri Moeseeshini. Retsiyatakotantariri osheki atziri. Ikimiwitaka ikantana riraga Tajorentsi: "Rowamagaetemi eerori rowamayemi atziri, rowatzikakotemi inchapankeki. ¹⁵ Pikamawenteri atziri powawijaakoteri maawaeni aapatziyemini".

Rootaki ikantziriri Jesoshi riraga Nikoreemo. Ithonkapaakiro ikenkithatakakaakiri.

¹⁶ Inintashireperotanteeriroña riraga Tajorentsi aakapaeni maawaeni atziri kipatsikika, rootaki rotyaanantakariri Itomi rapintzite jaka kipatsikika. Ninkarika aapatziyeeyaaririni rirori, eero riyatza paamariki kaari tsiwakanitatsini, inta ikanteteatyeyaaani ijeeki jenokinta itsipatapaeyaari Tajorentsi. ¹⁷ Tee ro rotyaanantariri Tajorentsi riraga Itomi jaka rowashironkae aakapaeni atziri, inta rotyaanantakaariri rowawijaakotee. ¹⁸ Eero ikantakowenteeyirini Pawa Tajorentsi maawaeni aapatziyariri Jesoshi. Omaanta ikantakowenanteeyakaririni rirori maawaeni kaari aapatziyariri, rootaki rowashironkaantyaariri iinja. ¹⁹ Ro rowashironkaantyaariri theenkaeyiririni riraga Jesoshi. Omaanta Irira ipokaki rirori riyotaanteeri aaka tsikarika ikantari riraga Tajorentsi eejatzi riyotaanteeri ajeeki kameetha. Noshiyakaawentemiri: okimiwitaka ikitejitakotakiri atziri jaka kipatsiki tema iñaakiro maawaeni oetarika ranteeeyirini. Omaanta riraga kaari aapatziyari rantapiinteeyironi kaari kameethatatsi, tee ikoyiro riyotero iroka riyotaawitakariri; inta okimiwitaka inintaperotziro tsiteniriki irirapaeni. Tee ikoyi ijeeki kitejiriki, ikantzi: "Ifleeterokari riraga Tajorentsi antziri aaka, rowashironkaanteerokari".

²⁰ Maawaeni antzirori kaari kameethatatsi ikijakiri Jesoshi. Tee ikoyi ipokashiteri: riyotaki roñoawontzitzirikari kaari kameethatatsi rantziri, rootaki kaari ipokashitantarri raapatziyantyaariri. ²¹ Omaanta antzirori kyaaryooperotatsiri, rirotaki pokashitziriri riraga Jesoshi. Roñaagayitzirini kameethatatsiri rantziri. Riroma rirotaki Tajorentsi antakayiriri

kameethatayitatsirini, rootaki kaari ipashiwenanta rirori ipokashitziri. Kimiwitaka ijeekaki kitejiriki imatziro iñiiri maawaeni atziri eejatzi Tajorentsi.

Jowa riraga kaawoshitakotantatsiri rapiitziro ikantakotziri Jesoshi

²² Inja riyaatakaanakina riraga Jesoshi Joreeyaki. Nojeekapaaaki janta, nokaawoshitakotantapaakari Tajorentsi atziri. ²³ Eejatzi riraga Jowa ikaawoshitakotawakiri Tajorentsi atziri jaga Aenookira okaakintawo Jariimi; tema oshekitapaaki iñaa jaga. Riyaatasitanakiri oshekini atziri ikaawoshitakotawakiniri riraga Tajorentsi. ²⁴⁻²⁵ Tekiraata romonkyaagaetziri riraga Jowa. Riyotaanewopaeni rashì ipiyawaantetakari paashini joriyo. Ro ipiyapiyawaantetawakagaeyani, ikantzi tsika akanteeyanakaanyaanika akiteshiretateeyaarini. ²⁶ Roojatzi riroripaeni ipokashitantapaakariri riraga Jowa ikantapaakiri:

—Iyotaanari, ikaawoshitakotawakiri Tajorentsi riraganki pitsipatari-ranki chapinki jantakironta Joriraaniki. Riraganki pikantakotakiri riro-taki Rotyaantanewo Tajorentsi. Rootaki riyaatasitanfanakariri maawaeni atziri, tema iroñaaka rookanakae aaka. ¿Itakakya?

²⁷ Ikantawakiri:

—Tekatsi amatashiteeyani aaka apaniroeni, inta Tajorentsi jenokijatzi matakagaeroni maawaeni kameethatatsiri. ²⁸ Pikemakina erokapaeni nokantakimi chapinki: “Karina naaka riraga Rotyaantanewo Tajorentsi. Omaanta rotyaantakina riraga Tajorentsi neewatanakiri rirori”. ²⁹ Noshiyakaawentemiro. Irira owakira aatsiri iina, aaperotzirori. Ikomoshirewentakiro iina. Rootaki riraga isheninkathoripaeni ikomoshirewenantyaariri. Iroñaaka nokimiwitari riraga kimoshirewentziriri aatsiri iina. ³⁰ Kyaaryo chapinki osheki atziri ipokashitapiintana ikemakotziri Rotyaantanewo Tajorentsi; omaanta iroñaaka rookanakina, riyaatasitakiri ipinkathaperotziri rirori. Naaka tee: eero iroñaaka ipinkathatanaana. ³¹ Riragakya poñaachari jenokinta reewaperowenteeyirini maawaeni. Naaka kipatsijatzi, nomonkaateeyarini maawaeni jeekatsiripaeni kipatsikika, tee apinkatharieeyini ikimitaaga rirori. Tema apatziro akenkithawaetakotashitawo iroka añaayitzirini jaka kipatsikika. ³² Omaanta riraga poñaachari jenokinta ikamantakotziro oetarikapaeni iñaaayitzirini eejatzi ikemayitzirini janta. Omaanta tekatsi osheki aapatziyaperotawakayaawoni ikantakiri. ³³ Omaanta maawaeni aapatziyawakawori okaatzi ikantziri riyotzi kyaaryooperotaki maawaeni ikantziriri Tajorentsi. ³⁴ Rirotaki Tajorentsi otyaantziriri riraga Jesoshi, iroñaaka ryotaantapaakiro iyenkithari. Riraga Tajorentsi tee ithañaawo Ishire, inta ikithatzitakari Itomi Ishireki. ³⁵ Riraga Pawa jenokijatzi inintaperotziri Itomi, eejatzi rotyaantakaeri reewaperowenteeyeeni aakapaeni maawaeni atziri. ³⁶ Maawaeni aapatziyariri Itomi Tajorentsi ikanteetatyeyaaani rañe jenokinta. Omaanta eero riyaatzti jenokinta riraga kaari aapatziyari rirori, tema ikanteetatyeyaaani ikijantyaari Tajorentsi.

4

Rookaneero Jesoshi Joreeyea

¹⁻³ Riraga warijeeyopaeni ikemakotakiri Jesoshi. Ikanteeyirini atziri:

—Riraga Jesoshi ranaakotziri Jowa ryotaantzi. Osheki raapatziyakaakari atziripaeni, osheki ikaawoshitakotawakari Tajorentsi.

Omaanta tee ikaawoshitakotari Tajorentsi riraga Jesoshi inta naakapaeni ryotaanewo kaawoshiteenchari. Riyotaki Awinkatharite ikemakotakiri

riraga warijeeyopaeni oetarika rantziri. Rootaki rookakaantanaanawori Joreeya ipiyakaantanaanari Karireeyaki.

Ikenkithatakaakiro Jesoshi jamaaryajato

⁴⁻⁵ Ikinakaanaana Jesoshi Jamaaryaki naakapaeni. Rareetakaapaentana okaakini nampitsi iitachari Shikaari. Rootaki fiipatsiteni Jakoowoni paera-niperoroña: iroka ipakiriri itomini Joseeni. ⁶ Eenitatsi jaga iiyakotanewo iñaa Jakoowoni. Makotapaaki riraga Jesoshi, rooma nopoñaaka maawaeni inteea. Ijeekimotashitapaakwo okaakini roori imakoryaantapaaka. Tema tsiteniityaapaaki oorya. ⁷⁻⁸ Notsipatakari naaka paashinipaeni riyotaanewo niyatapaentzi jaga nampitsiki namanantapaentzi nowanawo. Roojatzi opokantapaaka tsinani jamaaryajato okitaatz iñaa. Ikantawakiro riori:

—Pipakotena nomiri.

⁹ Okantziri:

—¿Kaarimima joriyyo? ¿Litaka pikowakotantanari iñaa? Naaka jamaaryajato.

Tema tee raakameethateeyirini joriyyopaeni jamaaryajatzi. Rootaki okanantakariri: “¿Litaka pikowakotantanari iñaa?”

¹⁰ Ikantawakiro riraga Jesoshi:

—Tee piyotzi oetarika ikowakaakimirri riraga Tajorentsi nomatemiri. Eejatzi tee piyotzi naari ninkarika. Nokantakimi: “Pipakotena nomiri”. Omaanta piyotakinarikami naari, pikantakinami eerori: “Eerokakya pipenaata nomiri”. Roojatzi nopashitantemirorimi iñaa owañaantatsiri.

¹¹ Okantakiri:

—Tekatsi pikitaatantyaari. Inthomaeperonta ojeeki iñaa kiteyaapero-tatsiri. ¿Ninka payenirika iroka iñaa owañaantatsiri? ¹² ¿Panaakotakirika achariniíteni riraga Jakoowoni kiyashitzirori iroka iiyakotanewoni? Imiritzirini iñaaaka imiriteeyironi maawaeni rirori itomipaeni eejatzi maawaeni ipira. Roojatzi iroñaaka nomiriteeyirini naaka. Okameethataki iñaa: ¿pikenkithashiryaka pipena iñaa anaakotzirorini iroka okameethatz?

¹³ Ikantawakiro:

—Ninkarika miriteeyirorini iroka iñaa ari rapiitero maawaeni ikemaero imiri. ¹⁴ Omaanta ninkarika miritakironi iñaa nopiriri naaka, eero rapiitziro imiritee. Rowaga iñaa noperiri okimita iyowaatapaakitzi ishireki, rootaki owañaakiriri. Ikantyaani ijeekimotapaakina.

¹⁵ Okemakiri. Tee iytoti ikantakotziro roori Ishire Tajorentsi. Okenkithashireeya ikantakotziro iñaa. Okantakiri:

—Pipenawokya iroñaaka iroka iñaa pikantakinari, eerokya nomiritanta-naa. Eero natsipetaawo nopokaate jika nokitaatanee iñaa.

¹⁶ Ikantanakiro rirori:

—Pityaawo piyaaate pikaemakitenari piimi.

¹⁷ Okantawakiri:

—Tekatsi noemi.

Ikantanakiro:

—Kyaaryootaki pikantakinari: “Tekatsi noemi”. ¹⁸ Ikaataki piimi paaw-itakari apawakooni. Irira pitsipatashitari iroñaaka kaari piimi. Kyaaryo pikantakina.

¹⁹ Okantawakiri:

—Kyaaryo eerokakya kamanantayitzirorini iñaa Tajorentsi: apaani iroñaaka nojampitemi. ²⁰ Jaka tonkaariki ipinkathapiinteeeyirini riraga Tajorentsi maawaeni nochariniiyenipaeni. Eerokapaeni joriyyopaeni pikantzi kameetha apinkathateri Jerojareeki. ¿Oetaka kameethatatsiri?

21 Ikantawakiro:

—Pikemijantero iroka nokantemiri iroñaaka. Paata eero pikenkithashiriiro tsikarika pipinkathateri riraga Tajorentsi. Atsipetashita akenkithashiryaashitawo tsikarika apinkathateri inta okameethaperotzi akenkithashireeri ninka apinkathateri. ²² Eerokapaeni jamaaryajatzee piyotziri irira pipinkathawitari. Naakapaeni joriiyo, niyotziri naaka ninka naapatziyeyearini. Riraga owawijaakotantsini rirotaki joriiyotatsini paata. ²³ Monkaatapaaka pipinkathaperoteri riraga Pawa: pikoyirika, ari amitakoeyemini maawaeni Ishire Tajorentsi, iyoteemiro kyaaryooperotatsiri. Rootaki ikoyiri Tajorentsi. ²⁴ Tekatsi iwatha riraga Pawa Tajorentsi. Riraga kowatsiri raapatziyaari irira, okameethatzikemijantaperotero Ishire okaatzi iyotayeririki kyaaryootatsiri.

25 Okantanakiri:

—Niyotaki ipokae Rotyaantanewo Tajorentsi, riraga iiteetziri Kirishito. Rareetapaakaerika riyotakaapaakae oetarikapaeni.

26 Ikantawakiro:

—Naaka riraga Rotyaantanewo Tajorentsi.

²⁷ Rootaki ikantakirori riraga Jesoshi rowaga tsinani. Roojatzi naaka, nokaatakiri paashinipaeni riyotaanewo nareetapaa. Noñaapaakiri. Omaanta tee nojampitapaeri: “¿litaka pikantzirori tsinani? ¿litaka pikenkithatakaantawori?” Naminashitapaakari.

²⁸ Naminashitapaakari, ookanakiro oowitzite opiyanaka onampiki. Okantapaakiri onampiweri:

—Thame poyaatanakina maawaeni. ²⁹ Noñaayemiri shirampari kantakinari maawaeni oetarika nantayitzirini. Riromachee Rotyaantanewo Tajorentsi.

Ikemijanantawori okaatzi okantakiri, ³⁰ roojatzi royaatantanakawomaawaeni raminakiteri riraga Jesoshi.

³¹ Rootaki tekira opiya roori iiyakotanewoki, nokantawitanakari Jesoshi:

—Iyotaanari, poya.

32 Ikantawakina:

—Eenitatisi nowari nashi naari kaari piyotzi eeroka.

³³ Roojatzi nokantawakaantanaka:

—¿Ramaactakinirima rowanawo?

34 Ikantanakina:

—Nantziniri otyaantakinari ikowakaakinari okimitzimotakina nowaka, oshintsitakaakina eejatzi iweshiryakaakina. ³⁵ Rooma pikantawakaawita eerokapaeni tekira omonkaata 4 kashiri ari agaeyantyaaworini opiyotapiintaga, pankirentsi. Piitashiwitaka aririka pareetakya janta Karireeyaki roojatzi piyoteeri atziri oetarika ikantziriri Tajorentsi. Omaanta nokantememi: paminerri oshekini atziri pokatsini jaka. ¿Piñaakiri? Kithaatawori kitamaari. Ikoyiri maawaeni riyoteri Tajorentsi. Piyotaantyaariri oetarika ikoyiri rirori raapatziyantyaariri. ³⁶ Aririka piyotaakiri atziri roojatzikya raapatziyari riraga Tajorentsi, ari nokimoshiryaa kayem. Okimiwitaa aririka powiiteniri piwaatorote ipinatem. Piyotaashitari eejatzi ikemijantana roojatzi eero ikami inta ikanteetapaatyeyaaani ijeeki jenokinta Tajorentsi. Rootaki iinja maawaeni rityaawo yotaakotziriri Tajorentsi eejatzi maawaeni impaetatsiri riyotaakotanakiri rirori apiyowentyaari riraga Tajorentsi akimoshireeyantyaarini, maawaeni. ³⁷ Kyaaryootaki iroka ikantapiinteetziri: “Irira pankitakirori eero rowiitziro inta paashini owiiteroni”. ³⁸ Notyaanteyemini piyotagaeyeririni atziri oetarika

ranteri reentsitetanteeyakaririni riraga Tajorents. Naari eejatzi paashinipaeni atziri niyotaakiri eechonkiini, iroñaaaka thame pithonkaeri piyoteeri eero ka. ³⁹ Aririka okantakotapaakiri riraga Jesoshi rowaga tsinani, raapatziyanakari oshekini onampiweri. Tema okantziri: "Noñaayemiri shirampari kantakinari maawaeni oetarika nantayitzirini". Rootaki royaatantawori jaga. Rareetanteeyakaririni maawaeni.

⁴⁰ Ipokashitantakari ikantapaakiri:

—Pijeekimotanakinaata.

Ari ijeekakaanakina apite kitejiri janta, ⁴¹ nokenkithatakanakiri iri-rapaeni Jesoshi eejatzi naaka maawaeni riyotaanewo. Raapatziyaper-otanakari osheki riraga shikaarijatz. ⁴² Ikanteeyakironi riraga shikaarijatz rowaga tsinani:

—Naapatziyakawo eechonkiini pikantakinari omaanta iroñaaakaya nokemaperotakiri irira Jesoshi, rootaki niyoteeyantakarini kyaaryokyka oetarika pikantakinari. Rirotaki Owawijaakotantatsiri maawaeni jeekatsiri kipatsiki riraga aapatziyariri. Rirotaki irinta Rotyaantanewo Tajorents.

⁴³ Ari apite imaaki Jesoshi janta. Okitejitanaki tee ikoyi ikijanakiri riraga jewatatsiripaeni joriyopaeni rootaki ryaatantanakari. Ipiyanee iipatsiteki Karireeyaki. Noyaatanakiri naakapaeni riyotaanewo. ⁴⁴ Riyaatantari omaanta riyotzi tee raapatziyaperotari osheki atziri janta. Rirotaki Jesoshi kantapiintatsiri: "Tee raapatziyari atziri kamanantzirorini iñaani Tajorents iipatsiteki inta itheenkapiintziri inampijatzi".

⁴⁵ Omaanta aririka nareetapaeya maawaeni naakapaeni Karireeyaki, raakameethawakiri riraga Jesoshi maawaeni karireeyajatz. Riyaatakitzi oshekini irirapaeni chapinki janta Jerojareeki, ikimoshireeyini maawaeni. Aritaki janta iñaayitakironi rantziri Jesoshi. Rootaki iroñaaaka raakameethatantakariri maawaeni.

Jesoshi retsiyatakotziri itomi jewatatsiri

⁴⁶ Rapiitakiro ryaatanee riraga Jesoshi Kanaaki: rowaga karireyawero. Janta chapinki ipeyakiro iñaav avishoowaantsi oowa.

Eeniro ijeeki Kaperinawooki jewatatsiri, imantsiyataki itomi.

⁴⁷ Ikemakotawakiri riraga Jesoshi poñaachari Joreeyaki, areetapaa Karireeyaki. Ari ryaatashitanakiri, ikantapaakiri:

—Rooteentsi ikame notyomi. Thame petsiyatakotakitenari.

⁴⁸ Ikantakiri riraga Jesoshi atziripaeni:

—Eerorika notajonkantayitzini, ¿arima paapatziyeeyakinani? Aritaki pikanteeyarini eeroka, pitheenkaeyanan.

⁴⁹ Rapiitziri ikantapaakiri:

—¡Nowinkatharite! ¡ntisipaete, pipoke nopankoki! ¡lkamikari notyomi!

⁵⁰ Ikantawakiri:

—Pipiyye iroñaaaka. Eero ikami pitomi, aritaki retsiyatakote.

Ikemijantaperotanakiri piyanaa. ⁵¹ Niyanki awotsi itonkiyotawakari ron-ampiripaeni, ikantapaakiri:

—Etsiyatakotee pitomi.

⁵² Roojatzi rojampitantapaakari, ikantapaakiri:

—¿Tsika ikaatakika oorya retsiyatakotantakari?

Ikantakiri:

—Chapinki, itziroryaanaki oorya, aritaki awijanaki ijaawamerikitzi.

⁵³ Ikenkithashiryaanakiro aritaki ikaatakai oorya ikanantakariri Jesoshi: "Eero ikami pitomi". Rootaki rameenantanakariri Jesoshi. Eejatzi ikimi-iyakan riraga isheninka maawaeni, rameentakari rirori. ⁵⁴ Iroñaaaka apite itajonkantaki riraga Jesoshi janta Karireeyaki ipoñaanakanta Joreeyaki.

5

Retsiyatakotziri mantsiyatinkari janta inkaareki

¹ Iroñaka monkaatapaaka paashini kitejiri nokimoshiryaaantanaari maawaeni joriyyopaeni. Tema ipiyotakiri oshekyaantzi atziri janta Jerojareeki, ipinkathatantyaariri Tajorentsi. Eejatzi itonkaanaki riraga Jesoshi janta tonka, tonka.

² Eenitatsi oshirikota riwetsikaetziro mapi inkinagaakitakiro maawaeni pankotsi janta rowakinta Jerojareekinta. Eejatzi eenitatsi ashitakontsipaeni. Apaani owaero ipaanteki ewereeyo, rashitako owisha. Ari inthomaenta oshirikota okaakini rashitako owisha eenitatsi inkaare iitachari Wetheshita. Eejatzi eenitatsi janta kaapa apawakooni. ³ Rootaki janta romaryaanteeyarini mantsiyari osheki. Ipiyoteeyanira mantsiyaperotatsiripaeni: riraga kaari kokichaatatsi, kijopookitsiri, matharitonki, maawaeni. Royeeyironi iñaa omaemañaatyatya. ⁴ Aririka omaemañaatyatya iñaa nokantapiintzi naakapaeni joriyyo: "Ipokapaaki inkaareki ronampiri Tajorentsi, imaemañaatakaakawo iñaa, chomok, chomok. Roojatzi ninkarika ityaawoni itsitsiyaatantyaawo ari retsiyatatakote.

Ari oshekini mantsiyatinkari janta royeeyeroni omaemañaatyatya iñaa.

⁵ Eenitatsi jaga shirampari okaatzi 38 rowawijaakiri rojarentsite imantsiyatki. ⁶ Ari ikatziyatziyawaetashita riraga Jesoshi janta iñaaapaakiri irira mantsiyatinkari romaryaaka. Riyotakotapaakiri aritaki okaataki rojarentsite osheki imaryaaka jaka. Ikantziri:

—¿Pikoyi petsiyatakotee?

⁷ Ikantawakiri:

—Jee. Omaanta tekatsi tsitsiyakayenani aririka omaemañaatyatya iñaa. Naaka tee nomatziro notsitsiye apaniroeni: tema rootaki ranaakotantanari paashini, itakawori itsitsiyaki rirori.

⁸ Ikantapaakiri:

—Pipiriintee, paaneero pishitashi, piyaate pipankoki.

⁹ Roojatzi etsiyatakotanaki. Ipiriintanaa raaneero ishitashi ipankoki.

Rootaki kitejittatsiri nomakoryaantapiintari naakapaeni maawaeni joriyyo. ¹⁰ Rootaki ikanteyantakaririni riraga jewatatsiripaeni joriyyopaeni okaatzi iñaaakiri rirori:

—Rootaki iroñaka kitejittatsiri amakoryaantapiintari. Tee oshineta aa-neero iroñaka ashitashi. ¿litaka paantanakawori pashi?

¹¹ Ikantawakiri:

—Riraga etsiyatakotakanari rirotaki kantanari: "Paaneero pishitashi, piyaatee pipankoki".

¹² Roojatzi ikanantanakari:

—¿Ninka kantakimirika iroka?

¹³ Tee rirotzi rirori ninkarika etsiyatakotziriri. Eenitatsi jaga osheki atziri, ipeyimotanakari riraga Jesoshi. ¹⁴ Iinja irira Jesoshi raminaminatakiri riraga etsiyatakotziriri, eejatzi iñaaakiri janta Tajorentsipankoki. Ikantziri:

—Ñakiro. Eeroka etsiyatakoteemi. Eero pantapiintziro eejatzi kaari kameethatatsi. Apiitaneemikari pimantsiyate, pikamaekari.

—Jee. Aritaki.

¹⁵ Roojatzi riyaatantanaka shirampari. Ikantapaakiri riraga jewatatsiri-paeni joriyyopaeni:

—Riotaki etsiyatakotakaakinari Jesoshi.

¹⁶ Rootaki ikijantanakariri irirapaeni jewatatsiripaeni joriyyo riraga Jesoshi. Ikowantakari rowamagaeterimi rirori tema retsiyatatakantakari

kitejitsatsiriki nomakoryaantapiintari maawaeni naaka joriiyopaeni. Ari ikantziri piyotawentari:

—¿litaka pikanantari kitejitsatsiriki amakoryaantapiintari?

¹⁷ Rootaki ikantawakiriri:

—Roojatzi ikantani Pawa rantziro kameethatatsiri. Eejatzi nokimitari naaka. ¿litaka nopalakaantyaaworikya nantziro kameethatatsiri kitejitsatsiriki amakoryaantapiintari?

¹⁸ Eekiro ryaatatatzti ikowaperotziroña rowamaeriroña riraga Jesoshi. Tee apatziro iñaañiki ranantashitawo kitejitsatsiriki nomakoryaantapiintari; inta eejatzi ikemakiri riraga Jesoshi ikantzi: “Pawa nashi rirotaki Tajorentsi”. Roojatzi ikanantanaka riroripaeni jewatatsiri joriiyopaeni:

—Litajorentsitsatashitaka, tee ikameethatzi.

¹⁹ Ikantawakiri riraga Jesoshi:

—Kyaaryootaki iroka nokantemiri. Tee nantashitawo naaka apaniroeni inta nomonkaatakiro oetarika noñaakotziriri rantziri Pawa. ²⁰ Irira inintaperotana naaka Itomi riyotaakinawo maawaeni nantziri. Iinja imatakayena nanaakotero nantakiniririka shiramparika, tema nota-jonkaperotantyaariri oetarikapaeni, rootaki potsikanaperotantanakinari osheki. ²¹ Rooma ipiriunteeri Pawa kaminkari rowañaakiri. Eejatzi nokimityaari naaka, nowañaanakiri ninkarika nokowakaari. ²² Eero ikantakowentziri Pawa atziri ikameethatzirika, eero: inta rootaki rotyaanantakinari naaka nokantakowenantyaariri. ²³ Ikowakiri Pawa maawaeni atziri iñaañokenkateri rirori. Eejatzi ikowakaakina iñaañaperotena naari maawaeni atziri nokameethaperotzi. Riraga kaari ñaaperotanaa naaka nokameethatzika, tee iñaañaperotzi Pawa rirori ikameethatzi. Tema rirotaki Pawa otyaatakinari. ²⁴ Kyaaryootaki iroka nokantemiri. Maawaeni kemirori nokantziri, aririka raapatziyakyaaari otyaantanari, aritaki ikantyaani ijekantakyyaari janta jenokinta notsipatyaaari naaka. Eero ikantakowentziri Pawa. Ikamawitaka, omaanta ari rapiiteeya rañaagae. ²⁵ Kyaaryootaki iroka nokantemiri. Iroñaaka riraga kaari aapatziyari ikemaeyawaeroni noñaani: tema naaka Itomi Tajorentsi. Ikanteetatyeyaaani rañagäyeni maawaeni aapatziyawori noñaani. Aritakikya iroñaaka omonkaatakyra raapatziyeyantenerini. ²⁶ Irira Pawa ashi royiroya rañi eejatzi rowañaakiri atziri. Naaka nomonkaataki. ²⁷ Tema nopoñaaka jenokinta natziritapaaki jaka kipatsikika. Ro rotyaanantinari nokantakowenteri maawaeni atziri ikameethatzirika.

²⁸ Eero potsikanatana. Iinja ikemaeyenani maawaeni riraga kaminkari okaatzti nokantziri. ²⁹ Aritaki ipiriintanakiri antzirori kameethatatsiri, rañeeyanakini ijeki jenokinta ijekira Tajorentsi. Eejatzi riraga eekiro ryaatatayee antzirori kaari kameethatatsi ipiriintawitanakyaapa omaanta ikantakowenantyaariripa riraga Tajorentsi maawaeni: rotyaanteri paamariki kaari tsiwakanitatsini. ³⁰ Tektsi nokantya nantashityaawo. Nokantakowenantyaaririka atziri ikameethatakirkira nomonkaatakiro ikantanari Pawa. Kyaaryoopero nokantakowenantariri. Tee nantashitawo oetarika nokoyiri naari inta nanteniri Pawa otyaatakinari ikowakaakinari irira.

³¹ Eejatzi ikantziri Jesoshi:

—Aririka naaka kantakotachanimi apaniroeni, pikantemi: “Tee kyaaryoopero ikantzi”. ³² Omaanta eenitatsi paashini kantakotanari, riraga Pawa. Niyoñti kyaaryootaki ikantakotanari irira. ³³ Omaanta eerkapaeni, potyaantayitakirimi riraga Jowa, pojampitakaantakiri. Eejatzi

irira ari ikantakoperotakiro kyaaryooperotatsiri, ikantakimi: "Rirotaki Jesoshi Owawijaakotantatsiri, rirotaki Itomi Tajorentsi".³⁴ Tekatsi okantya ikamantakotena atziri: "Ikameethatzi Jesoshi", omaanta nokowaki eeroja pawijakote, rootaki nokanantzimiori iroka.³⁵ Riraga Jowa roshiyawitaro ootamentotsi amorekaperotatsiri. Piñaawakiri okoñeetyaapaaki rash: rooma osheki riyotakaakimi. Pikimoshirewentawitawakari eechonkiini.³⁶ Enitatsi eejatzi paashini riyotakaakimiri, rowaga anaakotziriri Jowa, piyoperotantenari. Iroñaka nothoyaaneeniri Pawa otyaantakinari maawaeni okaatzi ikantakinari. Oetarika nantayitzirini naari, iyotakaakimiri rotyaantakina Pawa.³⁷ Eejatzi ikamantakotakina naaka Pawa riraga otyaantakinari. Omaanta tee pikemijantaneentziri oetarika ikantziri, eejatzi tee piñaaneentziri tsika ikantari.³⁸ Eejatzi tee paapatziyana naaka Rotyaantanewo, rootaki kaari paapatziyantawo ikantziri rirori.³⁹ Piñaanapiintawitakawo Iwaperite Tajorentsi, rootaki pikenkithashiryaantari pawijakotantari, pikantatyeyaaani pañaanaki. Omaanta rootaki roori kantakotanari naaka.⁴⁰ Omaanta tee pikoyi tameentena naaka nowañaantemiri.⁴¹ Omawitakya pikantashita piñaaperotana, tee tameentana.⁴² Niyotzimi naaka, tee pinintaperotziri Tajorentsi pajankanekira.⁴³ Rotyaantana Pawa, rootaki nopolikantakari. Omaanta tee piñaaperotana eerokapaei. Aririka ipokashitemi paashini atziri kaari rotyaantanewo Pawa, iñaaperota apaniroeni, rirotakikya piñaaperotawakirikya.⁴⁴ Eejatzi eeroja ñaaperotawakaachari. Aritaki pikantari. Omaanta tee pikoyi iñaaperotemi rapintzite Tajorentsi pikameethatantyaari. ¿Tsika pikantyaaka paapatziyaperotantyaariri eeroja? Eero pimatziro.⁴⁵ Eero pikenkithashiryaashita naaka thawetakotemini Pawaki: "Eeniro, Pawa, irikapaeni rantziro kaari kameethatatsi". Enitatsi paashini thawetakotemini: rirotaki riraga Moeseeshini, ikanteri irira Pawa: "Tee raapatziyawo irokapaeni rowaga pojankinatakaakinari". ¿Piitakaa ari rowawijaakoteemi? Eerowa.⁴⁶ Arimi paapatziyaperotyaarimi riraga Moeseeshini, ari paapatziyaperotakinami naari. Tema rojankinatakotzitakina rirori paerani.⁴⁷ Niyotakimi tee paapatziyawo rojankinarini Moeseeshi. ¿Arima paapatziyakyaawo nokantzimiri naari? Eerowa.

Rootaki ikantziriri Jesoshi riraga jewatatsiripaeni joriiyopaeni.

6

Roshekyaakiro paa eejatzi mereto roshekyaakiri

¹ Paashini kitejiri riraga Jesoshi imontyaakaanakinawo inkaare naakapaeni maawaeni riyotaanewo. Noetziro inkaare Karireeya naakapaeni joriyo. Omaanta iitziro Teweeryashi riraga paashinijatzitatsiri atziri.² Imontyaakaanakinawo inkaare, royaatakiri oshekyaantzi atziri. Iñaakotantakariri maawaeni itajonkantzi. Itajonkawentakiri mantsiyatzinkari.³ Itonkaakaanakina tonkaariki. Ijeekakaapaakina janta.⁴ Rooteentsi omonkaatyta Kitejitsatsiri rawijantari ronampiri Tajorentsi. Rootaki nokimoshiryaantanaakyaari naakapaeni joriyo.⁵ Ijeekakaapaakina riraga Jesoshi, raminanaki. Iñaawakiri oshekini atziri pokashitakiriri. Ikantziri Jiripi:

—¿Tsika amananteeka rowawaytaaarini atziripaeni?

⁶ Ro ikantashitantariri, ikowaki iñaantyaari riraga Jiripi. Omaanta riyotaki oetarika ranteri.⁷ Ari ikantawakiri:

—Taanitya. Aririka amanantawityaawo oshekini, aririka ikaate 200 tenaaryo, tekira omonkaata owanawontsi royaari atziripaeni. Itasheni. Aaka tekatsi osheki koriki. Eero amatziro amanantziro osheki owana-wontsi.

⁸ Ari eenitatsi janta paashini riyotaanewo, riraga Antereeshi. Rirotaki rirentzi Peetero. Ikantziri rirori:

⁹ Iyotaanari, eenitatsi jaka apaani ewankari ipaani apawakooni. Eenitatsi eejatzi mereto apite. Omaanta notheenkakiri: eero riyomaatari, eenitatsi oshekini atziri.*

¹⁰ Eenitatsi jaga oshekini katawomashi, roojatzi ikanantawakari riraga Jesoshi:

—Aritaki poejeekaeyerini maawaeni atziri katawomashikira. Ikaatki 5.000 shirampari jeekaeyeentsirini. Eejatzi tsinanipaeni eejatzi eentsipaeni ijeekaeyini: maawaeni. ¹¹ Roojatzi raantakawo rirori paa eejatzi raantakari mereto. Roojatzi raminanaki jenokinta ikantziri Ashitariri:

—Ariwee, Pawa, eenitatsi nowanawo.

Ari ikagaakiro paa eejatzi ikagaakiri mereto, ipakiri riyotaanewopaeni, eekiro rowawijeeniri maawaeni atziri ijeekira. Rowaeyani atziripaeni maawaeni ikoyiri. ¹² Ikemaeyantapaakarini maawaeni ikantana riraga Jesoshi naakapaeni riyotaanewo:

—Pagaatero maawaeni tzimagaantapaentsiri, tee nokoyi eewanatyawo.

¹³ Ikemaeyakawoni iroka paa apawakooni. Nagaatziro tzimagaantapentsiri. Notetakiro kantzirkipaeni: niyeekitakiro okaati 12.

¹⁴ Iñeeyakirini itajonkakiro paa, roojatzi ikanteeyantanakarini:

—Riroperotaki irika kamanantzirorini iñaani Tajorentsi akemakotziri, aamagaeyarini paerani.

¹⁵ Riyotawakiri Jesoshi ipokashiiyerinimi owaeyeencharini raanakirim iiterimi jewawenantatsini. Roojatzi ipeyapithatantanakari. Riyaatanaki riraga Jesoshi tonkaariki apaniroeni.

Riraga Jesoshi ranashaatawo inkaare

¹⁶⁻¹⁷ Itziroriimatanaki oorya noerinkaeyanakan naaka maawaeni riyotaanewo inkaareki, noyeri riraga Jesoshi janta. Tsitenitapaaki, omaanta tekira ipoki. Roojatzi notetantanaka pitotsiki nomontyaantyaawori intatsikeronta janta Kaperinawooki. ¹⁸ Opokapaaki antawo tamppaya mooo, mooo, omaemañaata inkaare, rootaki amantapaakawori antawo otamakaari. ¹⁹ Aritaki nokomakomatakiro niyanki. Inteena kipatsi, aamaashitya ari okaatzi 5 kiroometero aririkapa 6 nareetantakyaari. Eekiro nokomaeyawitakanri. Roojatzi noñaantawakari riraga Jesoshi ranashaatawo inkaare; rokaakintapaakina. Tee itsitsiyi: kimiwitapaaka rootaki ranashitantapaakari kipatsi. Nothaawaperotanaki maawaeni.

²⁰ Omaanta ikantapaakina irira:

—Naakataki, eero pithawantana.

²¹ Roojatzi nokimoshiretantanaa naawakiri notetawakiri pitotsiki. Intsi-paete naatakoeyapaakani othapyaakiini janta niyatenta.

Rirotaki Jesoshi oshiyawori owanawontsi añaakaakiriri aapatziyariri

²² Okitejitanaki riraga atziripaeni eeniro ijeekanaki intatsikeronta inkaare raminaminawitanakari Jesoshi. Ikantawakaaka:

—¿Tsika ijeekika riraga Jesoshi? Chapinki rotetaa pitotsiki riyotaanewopaeni riyaatanaki. Tee rotetaka riraga Jesoshi. Kaari paashini pitotsi. ¿Tsikarika ijeekaki rirori?

* ^{6:9} Joriyyojatzi rowaka paa maawaeni kitejiri okimitaganki aari owawo kaniri.

²³ Iroñaaka rareetawitapaaka oshekini teweeryashijatzi, ikinakotapaaki ipitoki. Raatakoeyapaakan iokaakini nowawaeteeyakaninta paa chapinki. Ikowawitapaakari ikantzi:

—¿Tsikama Jesoshi? ¿Tsikama riyotaanewo?

²⁴ Tee iñeeyapaerini; eejatzi naakapaeni, tee iñeeyapaanani. Roojatzi rote-tantanaa atziri ipotokipaeni riyaatakotanaki Kaperinawooki, ikowanteeyapaakaririni riraga Jesoshi.

²⁵ Aritaki iñeeyapaakirini. Ikantapaakiri:

—Iyotaanari, naminamineeyakimini. ¿Tsika pikantaka pareetantapaari jaka?

²⁶ Ikantawakiri:

—¿Iitarikya pikowantanari? Kyaaryootaki iroka nokantemiri: tee ro pikowantanana pipinkathatena, inta pikowantanana nowakayemi kimitaka nantakiri chapinki. ²⁷ Iroka oyaarika ari othonkanakya. Eero patsipewentashitawo, inta naaka patsipewentaperotya; naaka materoni nowañaaperotemi rootaki pañaaperotantapaakyarini janta jenokinta pikantyaani. Nopoñaaka jenokinta, rotyaantakina Pawa jika kipatsikika, natziritapaaki rootaki nowañeeyantakimirini.

²⁸ Rojampitakiri:

—¿Tsikama nokantyaaka nanantyaawori ikowakaakinari Tajorentsi?

²⁹ Ikantawakiri:

—Paapatziyeeyenani naaka Rotyaantanewo: rootaki ikowakaemiri Pawa.

³⁰ Roojatz rojampiteeyantanaarini, ikantaneeri:

—¿Oetaka poñaayenari naapatziyantemiri? Aririka noñaakimi pitajonkante, aritaki niyotaki kyaaryoopero pikantakinari. ³¹ Paeraniperoroña riraga achariniitenipaeni rowaeyakawoni manaa janta tekatsinta atziri ipanko. Okantzi Iwaperite Tajorentsi: “Ipaetakiri rowanawo rowaeyantaworini. Opoñaaka jenokinta”. Tema riro Moeseeshini paeyakiririni, rootaki riyoteeyantakyaarini achariniitenipaeni paerani okameethatzi royaateri maawaeni.

³² Ikantawakiri riraga Jesoshi:

—Kyaaryootaki nokantemiri. Tee riro Moeseeshini piriri rowaeyarini poñeenchari jenokinta, inta riraga Pawa pawitakariri. Iroñaaka ikowawita ipemi paashini powaeyaari kameethaperotatsiri, poñaachari jenokinta.

³³ Rowaga paa poñaachari Tajorentsi jenokinta rootaki owañiiriri maawaeni atziri.

³⁴ Rootaki ikantakiri Jesoshi. Rirotaki kantakotacha apaniroeni. Omaanta tee ikemaperotziri atziri. Ikantziri:

—Aritaki pikanta, Nowinkatharite, pikantyaani pipapiintenawo rowaga noyari pikantakotakinari.

³⁵ Ikantawakiri rirori:

—Naaka Rotyaantanewo Tajorentsi. Naaka oshiyawori paa owañaantatsiri. Naaka owañaakiriri atziri. Aririka poyaatanakina eero ayimi pitashe eejatzi paapatziyaranika eero pimiritanee. ³⁶ Aritaki nokanteeyawitakinini. Piñeyawitakinani notajonkantzi omaanta tekira paapatziyana. ³⁷ Ikantanari riraga Pawa: “Pikempoyeeyinarini maawaeni ameentakinari”. Riyoteeyakirini ipokashiteeyananakinani raapatziyanteeyanakinarini. Riraga pokashitapaenani, eero noepiyawakiri. ³⁸ Tee ro nayiitantapaari nanantyaawori nokowashitari naari, inta nantero ikowakaakinari otyaantakinari. Rootaki nayiitantapaakari. ³⁹ Irintapaeni nokempoyaakiniri irira Pawa, eero nopeyakotzi apaani. Nopiriinteevirini

irirapaeni iwatha omonkaatantapaeya kitejiri othonkantapaeyaari kipatsi. Rootaki ikowakaakinariraga Pawa otyaantakinari. ⁴⁰ Maawaeni atziri ñeenani aririka raapatziyena, ari ikanteetatyeyaaani ijeekimotakiri Tajorentsi jenokinta. Nopiriinteyerini iinja, othonkantapaeyaari kipatsi. Rootaki ikowakaakinari Pawa otyaantakinari.

⁴¹ Roojatziki ikiñaanikowenantanakari riraga jewatatsiripaeni joriyyopaeni. Tema ikemakiri ikantaki: "Naaka oshiyawori owanawontsi, poñaachari jenokinta", rootaki ikiñaanikowenantanakari. ⁴² Ikanteeeyini:

—Ayotziri rirori. Tema rirotaki Jesoshi, itomi Josee. Ayotziri iriri, rirotaki Joseeni. Eejatziri ayotziro riniro. ¿Itaka ikanantari: "Nopoñaaka jenokinta"? Ikantashitaka.

⁴³ Riyotzi riraga Jesoshi oetarika ikantawakaakari. Ikantziri:

—Eero pikiñaanikowentana. ⁴⁴ Eeromi ikoyimi Pawa otyaantakinari, tektsi pokashitenanimi raapatziyantenerimi. Omaanta riraga aapatziyani rirotañi noperororona kamanantayitzirorini iñaani Tajorentsí: "Tajorentsí riyotagaeyakirini maawaeni". Maawaeni aapatziyakawori ikantziri rirori, riyotawakirorika, aritaki rameentakina nowawijaakotantyaariri. ⁴⁵ Nopoñaaka jenokinta, rootaki noñaantariri Pawa. Tektsi paashini ñeerini. ⁴⁶ Kyaaryootaki iroka nokantemiri, riraga aapatziyanari ikantyaani ijeeki iroñaaka eejatziri iinja jenokinta janta Tajorentsí.

⁴⁸ Iroka ikanteeeyirini eejatziri:

—Naaka oshiyawori owanawontsi owañaakiriri atziri. Kyaaryo naaka owañeerini rirori. ⁴⁹ Rañaawitanaka pichariniitjenipaeni paeraniperorona rowaeyawitakawoni manaa janta tektsinta atziri ipanko. Omaanta ari ikamaki janta. ⁵⁰ Omaanta naaka tee nokimitawo iroka. Tee nomatziri noshinetziri aapatziyakinari ryaate paamariki kaari tsiwakanitatsini. ⁵¹ Naaka oshiyawori owanawontsi owañaakiriri atziri, nopoñaaka jenokinta. Ninkarika oyaawoni iroka owanawontsi ikanteetatyeyaaani rañagaeyeeni jenokinta. Noperi maawaeni jeekatsiri kipatsikika rañeyantyaarini: tema rootaki nowatha.

⁵² Roojatziki ikantawakaeyantanakarini riraga jewatatsiripaeni joriyyopaeni. Ikanteeeyini:

—Tee nokemaperotziri. ¿Tsika ikantyaaka ipanteerori Jesoshi iwatha aari owantyaawori?

⁵³ Ikantawakiri rirori:

—Kyaaryootaki iroka nokantemiri, rooma nopoñaaka jenokinta, natziritapaaki jaka. Eerorika powowo nowatha, eejatziri eerorika piro nira aero pañi. Jee, noshiyakaawentemi nowatha eejatziri nira. Kyaaryo nokantzimi eejatziri, eerorika paapatziyawo nokamawenteri atziri iñaaperotantariri riraga Tajorentsí, eero pikantani pijeeki jenokinta. ⁵⁴ Maawaeni oyaawoni nowatha, eejatziri ireroni nira, ikanteetatyeyaaani rañee omaanta eerorika pikenkithashiryakotana nokamawentakimi eejatziri eerorika pikowakaana nowawijaakotemi eero nopiriintzimi iinja omonkaatapaakyaarika kitejiri nokantakotantyaariri maawaeni atziri. ⁵⁵ Nowatha rootaki owanawontsiper. Nira rootaki imiritaperoetziri. ⁵⁶ Ninkarika oyaawoni nowatha eejatziri miriteroni nira roojatziri ikantya, kijokiro rowana. Eejatziri nokimitya naaka, kijokiro noyeri. ⁵⁷ Añaatsiri rirotaki Pawa otyaantakinari: rirotaki owañaakinari naari. Eejatziri ikimiteeyaaani rirori oyaawoni nowatha, nowañeeyerini maawaeni. ⁵⁸ Rootaki iroka owanawontsi ayitapaeantsiri

jenokinta. Tee okimitawo rowaga rowaeyarini achariniiteni paeraniperoña. Irira ikamaki okaankiityeenta. Intakya nowañaakiri maawaeni aapatzianari. Riraga oyaawoni owanawontsika nokantakimiri ikanteetayeyaaani rañgaayeni rirori jenokinta.

⁵⁹ Aritaki ryotagaeyakiririni Jesoshi piyotapiintaantsiki rashii joriyyopaeeni, janta Kaperinawooki. Tema osheki roshiyakaawentakaero iwatha eejatzi riraa.

Ikantakotakiro tsika ikantyaani ijekantyaari atziri

⁶⁰ Oshekini kemaeyawitawakaworini ryotagaeyawitakaririni, roojatzi ikantananka:

—Opomeentsitzimotakae antero iroka ikantakaerika aaka, eero amatziro aapatziyawo.

⁶¹ Riyotashitaka riraga Jesoshi ikijimawaetakiri riraga iyotagaeyawitakaririni. Ikantanakiri:

—¿Terika okameethatzimotzimi iroka nokantakimirika? ⁶² Paerani nopoñaaka naari jenokinta, natziritapaaki jaka kipatsikika. Iinja pifeeyawakinani nopyyanee jenokinta. ¿Roojatzi iitaka piñenkithashireeyatarini?

Ikantziro iroka ikenkithashiryaaakotziri ikame, ipiriintanee, eejatzi ipiye Iririki.

⁶³ Ishire Tajorentsi rootaki owañagaeyeririni maawaeni jeekaeyatsirini jenokinta. Eero ijekaeyini maawaeni atziri. Iroka nokamantakimiri oshiyawitawo Ishire Tajorentsi: aririka paapatziyaawo, ari owañaakimi jenokinta. ⁶⁴ Niyotakoeyimini: eenitatsi pikaateeyinika kaari aapatziyana.

Paerani ryotzitari riraga Jesoshi ninka kaari aapatziyaarini. Eejatzi ryotzitakari aakaanterini iinja. ⁶⁵ Eekiro riyaatatzi ikantanakiri:

—Niyotaki tee paapatziyeyananani maawaeni, rootaki nokanantakimiri inkaaganki: “Eeromi ikowakaerimi Pawa, tekatsi materoni pokashitenanimi naaka”.

⁶⁶ Rootaki rookantanakariri osheki riraga aapatzyaaririm. Aripaete tee royaateeyaneerini. ⁶⁷ Roojatzi riraga Jesoshi ikanteeyanakinani 12 ryotaanewo:

—¿Arima pookaeyanakinani eeroka eejatzi?

⁶⁸ Rakanakiri Peetero:

—Nowinkatharite, eerorika noyaatzimi eeroka, ¿ninkakya noyaatanakirika? Ikantyaani rañneyayanakini jenokinta maawaeni aapatziyeyakaworini pikantakirika. ⁶⁹ Naapatziyeyimini, niyoteeyanakinimi; eeroka Rotyaantanevo Tajorentsi, pikameethaperotaki.

⁷⁰ Ikantanakiri:

—Rooma eeroka niyoyagaeyakimini. Pikaatzi jaka 12, omaanta apaani pikatzika, rirotaki oyaatziriri iwinkatharite kamaari.

⁷¹ Ikenkithatakotakiri Joorashi karyootejatzi, itomi riraga Shimo. Eeniropitsipawitana maawaeni. Omaanta rirotaki aakaanterini riraga Jesoshi iinja.

Iroka ikantayitziririni karireeyajatzi eejatzi jerojareejatzi

¹ Roojatzi ikinakinatakanakina riraga Jesoshi Karireeyaki. Ikowawita riraga jewatatsiripaeni joriyyopaeeni rowamaerimi, rootaki kaari ikowantari rirori riyaate Joreeyaki. ² Rooteentsi napiitero nokimoshireeyantyaarini

naaka joriiyopaeni. Rooteentsi maawaeni atziri ryaate Jerojareeki riwetsikaeyeroni pankoshintsi ijekantyaari 7 kitejiri, ikenkithashireeyantyaworini ikineeyanakini ichariniitenipaeni paerani janta tekatsinta atziri ipango. ³ Rirentziipaeni riraga Jesoshi ikantziri:

—Piyaate iroñaaka Joreeyaki. Poñaagapaeri piyotaanewopaeni janta oetarika pantziri. Tema pitajonkawenteeri osheki atziri. ⁴ Pikowakirika riyoteeyemini maawaeni atziripaeni pikinakinayitanakini ifeeyantemirini. Eero pimaniro oetarika pantayiterini. Aririka pitajonkantayiteni, poñaayaari maawaeni atziri.

⁵ Tee raapatziyari rirentziipaeni rirori, ⁶ rootaki ikanantakariri rirori:

—Tekiraata omonkaatyat kiteziri niyaatakaantyaariri osheki atziri janta Jerojareeki. Omaanta eerokapaeni piyaate oetarika kiteziri pikoyiri. ⁷ Tekatsi ikantya maawaeni atziri ikijemi eeroka, pikimiiyarini. Inta naaka roonakina osheki. Nokananteeyakaririni: “Tee okameethatzi iroka pantayitzirini”, rootaki ikijantanakinari. ⁸ Pitonkagaeyanakiniaa eeroka Jerojareeki. Tekiraata niyaatziita, tekira omonkaatyat kiteziri notonkaakaantyaariri osheki atziri.

⁹ Aritaki ikantawakiri. Ari ijekanaki Karireeyaki. ¹⁰ Omaanta rirentziipaeni rirotaki jateentsiri Joreeyaki, itonkaanaki tonka, tonka. Ikimoshire-tapaaki. Rimpetaanaki riraga Jesoshi itonkaakaanakina. Omaanta tee roñaagantapaperoña: tee ikoyi iñaaityawakirini oshekini atziri. ¹¹ Janta Jerojareeki ikanta riraga jewatatsiripaeni joriiyopaeni raminaminawitakari riraga Jesoshi. Ikowantawitakari rayerimi. Ikanteeyini:

—¿Tsika riraganki Jesoshi?

¹² Piyoteenchari janta ikamantawakaaka rirori. Apaanipaeni ikantzi:

—Rirotaki kameethari.

Apaanipaeni paashini ikantzi:

—Tee ikameethatzi, irira osheki ramatawitziri atziri.

¹³ Omaanta ithawantakari atziripaeni riraga jewatatsiripaeni joriiyopaeni, rootaki imanakotantakawori ikantakotziriri rirori.

Riyotaantaki Jesoshi janta Tajorentsipankoki

¹⁴ Tee roñaagantapaparoña riraga Jesoshi, imaaki 3. Okitejitanaki itonkaanaki irira Tajorentsipankoki. Riyotaantapapaki. ¹⁵ Rotsikanatakari riraga jewatatsiripaeni joriiyopaeni rirori. Ikantawakaaka:

—Tee ayotaatzili aaka. ¿Itaka riyotantayitaworini oetarikapaeni?

¹⁶ Ikantawakiri:

—Tee naaka yotashitawori iroka niyotaakimirika, inta riyotakaanawo riraga otyaantakinari. ¹⁷ Pikowaperoterika panteniri ikowakaakimirri riraga Tajorentsi, aritaki piyotanakiro. Piyotanaki rotyaantanarika rirori. Piyotanaki noñaawaetashitarika. ¹⁸ Ikowantari ikimoshiryaaashitakaakari atziri riraga ñaawaetashitarachi, ikantakotziro okaatzira ikoyiri. Aririka itheeyashifa, ikowanakiri riraga atziri ikantakoteri: “Kameetharini irika ñaawaetashitarachi”. Omaanta eenitatsirika kantakanantatsiri ikowanakiri otyaantziriri ikantakoteri: “Kameetharini otyaantakiriri”. Tema riyotaantaki kyaaryooperotatsiri, tee itheeyashita. ¹⁹ Rooma rootaki ikantzimiri Moeseeshini paeraniperoroña: “Iroka pantayiterini. Rootaki ikowanakiri Tajorentsi”. Omaanta tekatsi jaka mataperoteroni iroka ikantakimirri. ¿Ititarika pajaryaantanari naaka powamaena?

²⁰ Ikantawakiri maawaeni piyoteenchari:

—Ikyaantashitakimi kamaari. ¿Ninka ajareemini rowamaemi?

²¹ Aritaki ikemiri riraga Jesoshi omaanta tee ikantawakiri. Inta ikantziri riraga jewatatsiripaeni joriiyopaeni:

—Eerokapaeni pikoyi powamaena. Apaani notajonkantaki saawaroki, rootaki pikowantari powamaena. ²² Omaanta ikantakimirri riraga Moeseshini Iwaperiteki Tajorentsi: "Pitonotateri pitomi aririka ikaatakotapaaki 8 kitejiri". Omaantakya kaari Moeseshini kantaperotatsini, intakya riraga icharinii teni paerani. Rootaki iroñaaka pitotonatantariri pitomi pitothowapiinta eejatzi saawaroki rowaga kitejitsiris amakoryaantari. ²³ Pitotonatantapiintawo kitejitsiris amakoryaantapiintari, pimonkaatantawori rojankinatziri Moeseshini Iwaperiteki Tajorentsi. Rootaki kitejitsiris amakoryaantapiintari netsiyatakofantariri riraga shirampari. Omaanta eekiro piyaatatzi pikijashitattyana. ¿litarika? ²⁴ Aririka paminapooteri pisheninka, eero pikantashita: "Kameetharini irinta. Riraga paashini pikante tee ikameethatzi". Pityaari piyoperoteri, roojatzikya piyotanaki oetarika pikenkithatakoteriri. Eejatzi okimitya pikenkithashiryaaoperoteri nokantzimirri piyoperotantenari.

Ipoñaaka Rotyaantanewo Tajorentsi jenoki

²⁵ Roojatzi ikanantawakaaka jerojareejatzi apaanipaeni:

—¿Kaarima irika ikowaetziri rowamagaeteri? ²⁶ Paminerri iroñaaka, riyotaantayitzini jaka tee imaniro. Tektsi kanterini: "Pimaerite". ¿Raamaatyaaarima maawaeni jewatatsiri ryoperotaki irika Rotyaantanewo Tajorentsi? ²⁷ Omaanta ayotakotakiri aaka tsikarika ipoñaaka irika Jesoshi. Irira karireeyajatzi. Ipokaperotapaerika riraga Rotyaantanewo Tajorentsi, tektsi yotakoterini tsikarika ipoña rirori. ¿Paamaakama irinta rirotaki Rotyaantanewo Tajorentsi?

²⁸ Eekiro riyaatatzi ryotaantzi riraga Jesoshi Tajorentsipankoki, ikantzi:

—¿Pikenkithashireya piyotenami? ¿Piyotzima tsikarika nopoñaakari? Tee piyoperotzi. Tee nopolashita, eenitatsi otyaatankinari: rioperotatsiri. Kaari piyotziri eeroka, ²⁹ inta naaka niyotziri naari. Riraga otyaatankinari rirotaki nopoñi motanakari jenokinta.

³⁰ Roojatzi ikowantaperotawitakari rayerimi. Omaanta tektsi ayerini. Tekiraata omonkaatyra raanteetyaariri.

Rooteentsi riyaatee Jesoshi

³¹ Osheki piyotantyaariri raapatziyakari. Ikantayitzini:

—¿Aririka ipokapaaki riraga Rotyaantanewo Tajorentsi, ranaakotapaeri riraganki itajonkantapae? Eerowee.

³² Riraga warijeeyopaeni ikemaeyawakirini atziri ikenkithatakotakiri riraga Jesoshi. Ari maawaeni ikitjanakiri. Rootaki irirapaeni eejatzi jewatatsiripaeni ñaanakowenantsirri rotyaanantakariri waairryaapaeni raantyaaririm. ³³ Rootaki ikanantananakariri riraga Jesoshi atziri:

—Iroñaaka notsipatanakimi. Rooteentsi nopyianee otyaatankinarikinta.

³⁴ Pikowakowawitakitenarika omaanta eero piñaana. Tsikarika nojeeki eero pimatziro piyaate eerori.

³⁵⁻³⁶ Ikantawakaaka riraga jewatatsiripaeni joriiyopaeni:

—¿litarika ikanantari? ¿Tsikama riyaafeka irika shirampari eero añairi? ¿Tsikama riyaateka kaari amatantyaawo aate aaka? Arima riyaate riraga atziri jeekayitatsiris paashinikipaeni kipatsiki. ¿Arima ryotaapaeri atziri janta?

Ikashiyakari rotyaanteniri roori Ishire Tajorentsi

³⁷ Rowaga riweyaantanakawo kitejiri niweshiryaaawenteeeyantyaaririni Tajorentsi rootaki kameethaperotatsiri kitejiri. Ishitowantapaakari oorya maawaeni naaka nopyotantakari janta Tajorentsipankoki, nopyinkathatariri riraga Tajorentsi, eejatzi nokimoshireperotaki. Tema ikatziyashita

riraga Jesoshi janta. Romapokashitanakawo itacheronkawaantetanaki, ikantanaki:

—¡Maawaeni ninkarika miritatsiri ishireki ipokashitenata imiritapaeta!
38 Ari otzimantakyaari rajankaneki aapatziyanari iñaa owañaantatsiri oshitowantapaakyaari. Rootaki okantakotziri Iwaperite Tajorentsi iroka iñaa nokantakimirika imiritapaeta.

39 Ro roshiyakaawentakiri iñaatatsiri rowaga Ishire Tajorentsi, rootaki iinja kithatakayaarini maawaeni aapatziyariri Jesoshi. Omaanta teki-raata ijenokanaa riraga Jesoshi rootaki tekira opokashitantari roori Ishire Tajorentsi aapatziyariri.

40 Eenitatsi oshekini piyoteeyeencharini jaga ikemawakiri ikantakiriri rirori, roojatzi ikanantanaka apaanipaeni:

—Riroperotaki irika kamanantzirorini iñaani Tajorentsi aamaantakariri maawaeni.

41 Paashini kantayitatsirini:

—Riotaki Rotyaantanewo Tajorentsi.

Paashini kantatsiri:

—¿Arima ipoñeyani riraga Rotyaantanewo Tajorentsi Karireeyaki? Tee-wee. **42** Rooma okantzi Iwaperite Tajorentsi: “Rotyaantanewo Tajorentsi riotaki icharineeteni Iraviirini. Ipoñaaky Weriki, janta ijekawitani irira paerani”.

43 Roojatzi ipiyapiyawaantetakotantakariri maawaeni riraga Jesoshi.

44 Eenitatsi apaanipaeni kowawiteenchari ragaerimi, omaanta tee imatziro.

45 Ipiyeyanakanri maawaeni waariryapaena. Rareeteeyapaakarini riraga jewatatsiripaeni ñaanakowenantsiri eejatzi warijeeyopaeni. Ikantawakiri:

—¿litakajaga kaari pamantanari jaka? Nokantawitzimi inkaaganki: “Pamakinari”.

46 Rakapaakiri:

—Kameetha iñawaetai irinta shiramparinta. Kameetha riyotaantzi, tekatsi paashini kimityaarini. Tee ikantziro oetarika kaari kameethatatsi.

47 Ikantawakiri:

—Ramatawitashitakimi eerokapaeni eejatzi. **48** ¿Naapatziyakari naaka-paeni jewatatsiri? Kaari naapatziyari. ¿Raapatziyakaririka warijeeyopaeni? Kaari. **49** Omaanta intapaaeni atzirinta tee riyojeempiyawa Iwaperite Tajorentsi. Tee okameethatzi iñaperotziri riraganki. Rowashironkaeri Tajorentsi maawaeni irinta iinja.

50 Eenitatsi jaga Nikoreemo, pokashitakiriri riraga Jesoshi chapinki tsiteniriki. Itsipatawakaeya iwarijeeyotzinkarite, ikantanakiri:

51 “¿Pikantakotashitarí: ‘Tee ikameethatzi Jesoshi?’” Eeromi okantakae rojankinarini Moeseeshi okameethatzi ityaawo akemijanteri ikantakiri, ee-jatzi okameethatzi ityaawo ayotero kameetha oetarika rantakiri.

52 Ikantawakiri:

—Tema eeroka eejatzi pikimiwitari karireeyajatzi riraga kaari iyotziriri. Paminaminayiteroni Iwaperite Tajorentsi piyotantyaari tee ipoña Karireeyaki riraga Rotyaantanewo Tajorentsi.

53 Roojatzi riyaatanee maawaeni ipankokipaeni.

¹ Omaanta irira Jesoshi ryaatakaanakina tonkaariki, iitachari Oriiwomashi. Ari nomaaki janta. ² Okitejitzimataki ipiyakaapaakina Tajorentsipankoki. Oshekyantzi atziri ryaatashitanakiri. Ijeekapaaki riraga Jesoshi, riyotaantapaariri. ³ Ramaeyapaakinirini apaani tsinani iñeetakiro oshirontakari shirampari kaari oemii. Riraga amirori rirotaki iyotaantziroripaeni Iwaperite Tajorentsi, eejatzi warijeeyopaeni. Rojatekakiro niyanki.

⁴ Ikantapaakiri:

—Iyotaantatsiri, iñeetakiro tsinanika oshirontakari shirampari kaari oemii.

⁵ Paerani rojankinatzini Moeseseshi okameethatzi rompojanteetyaawo mapi tsinani oshirontakari kaari oemii. ¿Tsika pikantzika eerori?

⁶ Iñaantawitari, ikowaeyawitani ikompitakayaarimi, rootaki ikananteeyawitaririni. Omaanta apatziro roeyotanaka Jesoshi, rojankinatantanakawo rakoempeki kipatsiki. ⁷ Rapiitawitanakari riroripaenii:

—¿Itaka pikantziri?

Ikatziyanaka irira. Ikantawakiri:

—Enitatsirika pikaatzika iroñaaka kaari antziro kaari kameethatatsi, rityaawo rompojero mapiki, ari roojatzi pompojero maawaeni.

⁸ Rapiitziro roeyotanaka, eejatzi rojankinatanee kipatsiki. ⁹ Omaanta ikemantawori iroka, maawaeni thawetakotzirori ryaatanee. Ritanaawo riraga aatayiteencharini, rimpetaanaki riraga maawaeni ewankaripaeni ryaatanee. Roojatzi ijeekanaki riraga Jesoshi, eejatzi roori tsinani, roojatzi okatzia jaga. Eejatzi nojeekanaki naakapaeni riyotanewo eejatzi paashini atziri. ¹⁰ Ikatziyanaa riraga Jesoshi. Tekatsi iñaaki thawetakotzirori, inta eenitatis tsinani. Ikantziro:

—¿Tsika iroñaaka riraganki thawetakotakimirranki? ¿Tekatsima thawetaktomironi pantziri?

¹¹ Okantanakiri roori:

—Tee noñaawaeri, nowinkatharite, jateeyaneeni.

Roojatzi ikanantawakawo:

—Eejatzi naari, eero nokantakowentzimiro pantakiri. Piyaatanee iroñaaka, eero papiitziro panteero kaari kameethatatsi.

Tajorentsi rirotaki kantakotziriri Jesoshi

¹² Impaetzti rapiitantawori iñaanataneeri Jesoshi atziri ikantanakiri:

—Naaka oshiyaworiranki ootamentotsiranki koñeetyaakayeroni maawaeni kipatsipaeni. Tema niyoperotakotzirori riraga Pawa Tajorentsi eejatzi niyoperotakotzimiro tsika ikanta. Eejatzi nokantakotzimiro oetaka kyaaryooperotatsiri. Ninkarika aapatziyakinari eero rantapiintziro kaari kameethatatsi, tema kimitakotaka ijeekaki kitejiriki ikimitaaga riraga Tajorentsi.

¹³ Roojatzi ikanantanakari warijeeyopaeni:

—Tema pikantakotashita eero ka apaniroeni. Nokemimi omaanta tee nomatziro naapatziyemi, eerorika tekatsi apite ikantana. Tema tee niyotzi kyaaryooperorika okaatzi pikantziri.

¹⁴ Ikantawakiri:

—Jee, naaka kantakotacha. Omaanta kyaaryooperotaki nokantakiri. Ro oameethatantakari niyotzi naaka tsikarika nopoñaakari. Eejatzi niyotzi tsika niyaatee. Omaanta eero ka tee piyotzi tsikarika nopoñaanakari. Eejatzi tee piyotzi tsikarika niyaatee. ¹⁵ Pikimitakari oshekini paashini atziri. Tee piyotana omaanta pikantakowentashitakina maawaeni. Pikenithashiryashahtita: “Irika shirampari ikimita maawaeni paashini shirampari”. Omaanta naaka tee nokantakowentzimi iroñaaka. ¹⁶ Omaanta

nokantakowentemimi pikameethatzirika iroñaaka, kyaaryootaki nokantakowentemimi. Niyotakimi; eejatzi kijokiro royena Pawa riraga otyaantakinari, riyotakimi eejatzi. Nokaataki apite niyoperoeyemini.
¹⁷ Rooma okantzi Iwaperite Tajorentsi rowaga piñaanatapiintziri: "Apiterika ikaate kantakoterini atziri ari ayoperotanaki kyaaryooperotaki ikanteri".
¹⁸ Ari nokantakota naaka, eejatzi ikantakotana Pawa riraga otyaantakinari; apite nokanta.

¹⁹ Ikantanakiri riraga warijeeyo:

—¿Tsika iroñaaka piri?

Ikantawakiri riraga Jesoshi:

—Tee piyotana. Tee piyotziri Pawa eejatzi. Aririka piyotakinami eeroka, piyotakirimpi riraga Pawa eejatzi.

²⁰ Rootaki ikantakiriri maawaeni Jesoshi janta Tajorentsipankoki. Ijekanaki okaakini janta ipapiintzirinta Tajorentsi koriki. Ikowawitaka riraga warijeeyopaeni ragaeterimi riraga Jesoshi omaanta tekira omonkaata ikamántyaari maawaeni ikowakaakiriri Ashitariri, rootaki kaari imatanteetari ragaeteri.

²¹ Eekiro riyaatatziri riraga Jesoshi ikantanaki:

—Rootzimateentsi nyaatee. Pikowakowawitanakinami maawaeni piñaanakinami omaanta eero piñaana. Eero pimatziro piyaate nyaateenta naari. Tema roojatzi pikantyaani pantapiintero kaari kameethatatsi roojatzi pikamantakya, rootaki piyatantyaari paamariki kaari tsiwakanitatsini.

²² Ikantawakaaka riraga jewatatsiripaeni joriyyopaeni:

—Pikenkithashireeya ishinetaty. Pikemakiriroña ikanantari: "Rooteentsi nyaatee, eero pimatziro piyaate nyaateenta naari".

²³ Ikantanakiri riraga Jesoshi:

—Eeroka jeekatsiri kipatsikika omaanta naaka nopoñaaka jenokinta. Jaka kipatsikika rootaki pijekantari eerokapaeni. Tee nojeekaperotzi naaka kipatsikika.
²⁴ Rootaki nokantakimiri inkaaganki: "Tema roojatzi pikantyaani pantapiintero kaari kameethatatsi roojatzi pikamantakya". Eerrika paapatziyawo nokantakimiri, aritaki piyataki paamariki kaari tsiwakanitatsini.

²⁵ Rojampitakiri, ikantakiri:

—¿Ninkamika?

Ikantawakiri:

—Tema nokantaperowitakimi. ²⁶ Eenitatsi osheki nokantemirimi; eenitatsi eejatzi pantayitzirini nokantakowentemirimi. Omaanta riroperotaki otyaantakinari, eenitatsi ikantakinari irira: rootaki iroka nokamanteriri atziripaeni.

²⁷ Tee riyoitziri riraga jewatatsiripaeni joriyyopaeni rirotaki ikenkithatakotakiri Ashitariri, riraga Pawa Tajorentsi. ²⁸ Roojatzi ikantziri riraga Jesoshi:

—Aririka powatzikakotakina paata koroshiki, aritaki piyotanakina eerokapaeni. Piyotena nopoñaanaka jenokinta, natziritapaaki jaka kipatsikika. Eejatzi ari piyotanakina tekatsi nantawitya naari. Nokantziro iroka riyotaakinari Pawa otyaantakinari, ²⁹ kijokiro rowanakina rirori. Tema nantziniri naari oetarika ikowakaakinari irira, rootaki kaari rookantana.

³⁰ Eenirosa ikanteeyakiririni iroka, ari osheki atziri raapatziyimawitakari.

³¹ Roojatzi Jesoshi ikanantanakari riroripaeni:

—Aririka paapatziyaperotanakyaawo nokantzimiri, tema eeroka niyotaanewopaeni.³² Aritaki piyotakoperotanakina naaka riraga kyaaryoperotatsiri. Rootaki nookakaakowenantakimiri. Eero omperateeteeemi paashini.

³³ Ikantawakiri riroripaeni:

—Naaka icharineetenipaeni Awaraamani. Tekatsi omperatenani paerani roojatzi iroñaaka. ¿litakajaga pikanantanari: “Pookakaakowenantakinari”?

³⁴ Rakakiri rirori:

—Kyaaryooperotaki iroka nokantemiri. Eenitatsi omperatariri maawaeni antzirori kaari kameethatatsi. Rowaga kaari kameethatatsi rantapiintziri, oshiyawitari omperatariri.³⁵ Riraga omperarentsi eero ikantani ijekaperote ipankoki omperatariri. Omaantakya riraga itomi ashitawori ipanko ikantani ijekaperote irira.³⁶ Naaka Itomi Tajorentsi. Aririka nookakaakowentakimi, eero rapiiteemi romperateeemi.

³⁷ Niyoperotakimi maawaeni, eerokatawitaka icharineetenipaeni Awaraamani. Omaanta tee paapatziyawo nokantzimiri. Rootaki pajaryaantanari powamaena.³⁸ Naaka nokamtzimiro okaatzi ikantakinari Pawa nashi eejatzi roñaagakinawo janta notsipatarinta. Omaanta eeroka ikantzimi pirintakari pashi rootaki pantapiintziri erokapaeni okaatzi ikowakaakimiri.

³⁹ Ikantawakiri:

—Naakapaeni joriyyopero, naaka icharineetenipaeni Awaraamani.

Ikantziri riraga Jesoshi:

—Kaari. Eerokami maawaenimi icharineeteniperopaenimi Awaraamani aritaki pikimitanakyaarimi. Raapatziyanani paerani rirori, piccharineetenitakyaarinimi, pikimityaarimi eeroripaeni, paapatziyakinami.⁴⁰ Naaka kantawitawori kyaaryootatsiri nokemiri Tajorentsi. Omaanta pajareeyanani powamaena. Tee pikimitani riraga Awaraamani, tee. Ikimoshiryaantakari rirori raapatziyakawo oetaka ikantziri riraga Tajorentsi.⁴¹ Omaanta pantapiintziro eeroka rantziri piriperotari.

Roojatzi ikanantanakari irirapaeni:

—¿Paashinika ashitanari? Apaani nirintari naakapaeni. Rirotaki Tajorentsi.

⁴² Ikantakiri riraga Jesoshi maawaeni:

—Rirorikami pirintyaarimi Tajorentsi aritaki pinintaperotakinami naaka. Tee nopalashita; aritaki nopoñaakari riroriki, rirotaki otyaantakinari.⁴³ ¿litaka kaari piyotantawakawori nokantzimiri? Tema tee pikoyi paapatziyawo okaatzi nokantzimiri, rootaki kaari pimatantawo paapatziyawo.⁴⁴ Rirotaki Jatanaashi pirintakari eerokapaeni. Rootaki pikowantakari pantapiintziniri ikowakayimiri. Owamaantatsirini paerani: irira rirotaki oñaagantzirori rowamaantzi. Tee ikenkithashireeyawo kyaaryootayitatsirini, rootaki kaari ikameethatanta. Theeyachari irira, rootaki itheeyantayitaarini atziri.⁴⁵ Omaanta naaka nokamtzimiro kyaaryooperotatsiri, omaanta tee paapatziyana; tema poyaatatziri riraga Jatanaashi.⁴⁶ ¿Eenitatsi jika ñaakinari naari nantziro kaari kameethatatsi? Teejee. Rooma okameethatirkira nokantakimiri, ¿itaka kaari paapatziyantana?⁴⁷ Maawaeni itomintari Tajorentsi, rirotaki aapatziyawori ikantziri. Tee itomintzimi eerokapaeni. Rootaki kaari paapatziyantawo ikantziri rirori.

⁴⁸ Roojatzi ikantawakiri riraga jewatatsiripaeni joriyyoperaeni:

—Kyaaryootaki nokantakimiri. Eerokataki jamaaryajatzi, eejatzi ithawirentsitakaashitakimi kamaari.

⁴⁹ Ikantawakiri rirori:

—Tee nothawirentsitzi: noppinkathatziri Pawa. Omaanta eeroka tee pipinkathatana; pitheenkakina eeroka. ⁵⁰ Tee nokowashita iñaaperotena atziri; inta Pawa kowaentsiri iñaaperotena maawaeni atziri. Eejatzi rirotaki kantakowenterini maawaeni theenkanari ikameethatzirika. ⁵¹ Kyaaryootaki iroka nokantemiri: raapatziyaperotawakyaaworika nokantziriri, eero ikamaperotzi.

⁵² Roojatzi ikanantanakari riraga jewatatsiripaeni joriyyopaeni:

—Iroñaakaroña niyoperotakimi pithawirentsitaki. Kamaki Awaraamani. Eejatzi kamanantayitzirorini iñaani Tajorentsi, kamaki riroripaeni. Omaanta pikantzi eerori: “Eero ikami aapatziyaworini nokantziri”. ⁵³ Kamaki achariniiteni paerani Awaraamani. Kamaki riroripaeni kamanantayitzirorini iñaani Tajorentsi. ¿Piitashiwitama panaakotziri riraga Awaraamani? ¿Piitashiwitama panaakotziri maawaeni paejatzitieni peewaperotaki eeroka?

⁵⁴ Ikantawakiri Jesoshi:

—Aririka nokantashityaami neewawenenantzi, rooma natsipetyawomi. Pawa, riraga pikantziri eerori: “Notajorentsite”, rirotaki jewatakakinari.

⁵⁵ Tee piyotziri eeroka rirori, omaanta niyotziri naaka. Aririka nokantakimi: “Tee niyotziri”, aritaki nokimitemimi eerori, notheeyakyamni naaka. Rooma niyotziri riraga Pawa. Nomonkaateniri okaatzi ikantanari. ⁵⁶ Achariniiteni paerani riraga Awaraamani, riyotakotakina rootaki ikimoshiryantaakari. Riyotzi inja nopoke jaka kipatsiki, natziritapaaki. Iñaakina roojatzi ikimoshireperotantanaka eejatzi.

⁵⁷ Ikantziri riraga jewatatsiripaeni joriyyopaeni:

—Tekiraata pantyashiparitzimaneenteeta. ¿Piñiirma Awaraamani? Tee-wee.

⁵⁸ Ikantawakiri rirori:

—Kyaaryootaki iroka nokantemiri. Tekirani ikoñaatzini riraga Awaraamani, eenirona nojeeki naari. Jee, noñaanakiri.

⁵⁹ Roojatzi ramantawitanakawori mapi riraga jewatatsiripaeni, rompojerimi riraga Jesoshi. Omaanta romanapithatanakari irira Tajorentsi-pankoki, raminaminawitapaakari janta. Tee iñiiri. Tema shitowanaki rirori.

9

Retsiyatakotakiri Jesoshi kamampowaakitatsiri

¹ Inja ikinakaanakina janta riraga Jesoshi. Noñaapaakiri shirampari kamampowaakitatsiri. Aritaki ikantapaaka owakira ikoñaatapaaki.

² Nokaatziri ryotaanepaeni nojampiteeyirini, nokanteeyirini:

—Iyotaanari, ¿iitaka ikoñaatantakari kamampowaakitatsiri? ¿Rooma rantayitzironi kaari kameethatatsi ashitariri ikamampowaakitantakari itomi? ¿Aririka irika antakirori kaari kameethatatsi ikamampowaakitantakari?

³ Ikantawakiri:

—Tekatsi rantzi, ikamampowaakitashitaka. Eejatzi ashitariri, tekatsi rantzi. Ro ikamampowaakitantakari irika itajonkakowenantakyaariri riraga Tajorentsi. Ikwakaakiri maawaeni atziri ryotanaki kyaaryo itajorentsitaki. ⁴ Iroñaakaroña okameethatzzi antero oetarika ikowakiri Tajorentsi. Rotyaananantanari nokimitantari irira, notajonkakowenantakyaariri irika. Kaari nojamanitzi. Aririka ojamanitaki aaka aririka

itziroryaanaki oorya eero amatziro antero oetarika. ⁵ Eenirona nojeeekika jaka kipatsikika, naaka iyotakotakaakiriri Tajorentsi maawaeni atziri.

⁶ Ikanantakariri iroka, reewatantanakawori kipatsi, ijampowathatakiro, roojatzi itziryaakitantakari rokikira kamampowaakitsiri. ⁷ Ikantakiriri Jesoshi irira:

—Piyaate janta Shiroeki, pikiwaakitakitya.

Rootaki Shiroe* inkaare. Roojatzi riyaatantanaka, ikiwaakitapaaka. Ipiya, aminanee. ⁸ Eenitasi jaga inampiweri, eejatzi riraga ñaapiintziriri inethaantapiintzi koriki. Ikanteeyanakin:

—¿Kaarima irika riraganki jeekapiintatsiri nethaantapiintatsiri koriki?

⁹ Apaanipaeni kantayitatsirini:

—Riotaki.

Paashini kantayitatsini:

—Kaari irira. Roshiyashitari.

Ikantawakiri rirori:

—Naakataki.

¹⁰ Rojampitakiri:

—¿Tsika ikanteetakimika pikokichaatantaari?

¹¹ Ikantawakiri rirori:

—Riraga shiramparinta iitachari Jesoshi reewatakiro kipatsi, ijampowathatakiro, itziryaakitantakinawo nokikira. Ikantakina: “Piyaate Shiroeki, pikiwaakitakitya”. Niyaatanaki, nokiwapaaka, roojatzi nokokichaatantanaa.

¹² Roojatzi ikanantanakari:

—¿Tsikaroña irira?

Ikantawakiri:

Tsikarika, taanitya.

¹³⁻¹⁴ Rootaki kitejiri nomakoryaantapiintari naakapaeni joriyyo itziryaakitantariri riraga Jesoshi kamampowaakitawitachari ikokichaatakaantaariri. Roojatzi raanteetanakanariri warijeeyopaeni.

¹⁵ Rojampitawakiri ikantawakiri:

—¿Oetaka raashitakimiri pikokichaatantaari?

Ikantziri:

—Itziryaakitantakinawo jampowatha nokiki, roojatzi niyaatantanakari nokiwaakitakita. Iroñaaka kokichaataana.

¹⁶ Roojatzi ikanantanaka warijeeyo apaanipaeni:

—Riraga shirampari rantawaetantawo kitejiri amakoryaantapiintari. Teetsikya ipoñaaka Tajorentsiki.

Paashini kantayitatsini:

—Rirorikami antzirori kaari kameethatatsi, eero imatziromi itajonkantayitenimi. Tema ipiyapiyawantetawakaanteeeyakarini, anik, anik, anik.

¹⁷ Rapiitanakiri ikantanakiri:

—¿litaka piitzirika eerori riraga kokichaatakaakimiri?

Ikantawakiri:

—Noetziri naaka rirotaki kamanantzirori iñaani Tajorentsii.

¹⁸ Riraga jewatatsiripaeni joriyyopaeni tee raapatziyari: iitakaashitawitaka tee ikamampowaakitzi. Ikaemakaantakiri ashitariri eejatzi riniro

¹⁹ rojampitawakiri, ikantawakiri:

—¿Riotaki irika pitomi pikantziriranki: “Ikoñaatapaaki kamampowaakitat-siri”? ¿litaka iroñaaka ikokichaatantaari?

²⁰ Rakapaakiri:

* ^{9:7} Akantziro aari apaanteki Shiroe: Rotyaantziri.

—Jee, rirotaki notyomi. Noñaaperotziri ashi royo ikoñaatakotapaakiro ikamampowaakitapaaki. ²¹ Omaanta tee noñiiri tsikarika ikantaari iko-kichaataantaari, tee niyotzi naaka. Ejatzti tee niyotzi ninkarika kokichaataakakiriri. Tee reentsitanee iroñaaka. Pojampiteri irira.

Rootaki ikantzirri ashitariri riraga warijeeyopaeni. Ari jatanee.

²² Riraga ashitariri ithaawanteeyakarini riraga jewatatsiripaeni joriyyopaeni, tema riyotaki aritaki ipiyowenteeyakarini riraga Jesoshi. Ikan-teeyitakani: “Eenitatsirika kantatsini: ‘Rirotaki Jesoshi Rotyaantanevo Tajorentsi’, eero ishinetziri irira atsipatyaaari akemjanteeeyini”. Rootaki ithaawanteeyanakarini ashitariri, ²³ rootaki ikanantanakariri: “Tee reentsitanee iroñaaka notyomi. Pojampiteri irira”.

²⁴ Roojatzi rapiitakiri rirori ikaemakaantakiri riraga kamampowaakiwitachari. Ikantawakiri:

—Piñaaperoteri Tajorentsi. Irinta shirampari niyoteeyirini rirori antzirori kaari kameethatatsi.

²⁵ Ikantapaakiri riraga kamampowaakiwitachari:

—Rirorikama antzirori kaari kameethatatsi, tee niyotzi naaka. Apatziro niyotakikya, nokamampowaakitawitani paerani, iroñaaka kokichaataana.

²⁶ Rapiitakiri ikantawakiri:

—¿Tsika ikantapaakimika ikokichaatakaanteemiri?

²⁷ Rakapaakiri:

—Rootaki nokantawitakimiri inkaaganki omaanta tee paap-atziyawakowo. ¿Litaka pikowantari papiitero pikemiro? ¿Pikowaeyanakinirika eero ka paapatziyari rirori?

²⁸ Roojatzi ikijathatantanakariri ikantanakiri:

—Eerokatajaantaki eerori riyotaanewo. Omaanta naakapaeni riyotaanewopaeni Moeseeshini. ²⁹ Niyoteeyini ikenkithatakaakirini Tajorentsi riraga Moeseshi paeraniperoroña. Rooma riroriranki shirampari tee niyoteeyirini tsikarika ipoñaakari irira.

³⁰ Ikantawakiri:

—¡Kyaaritaamakya! Rootaki notsikanatantakimiri. Tee piyotziri eerori tsikarika ipoñaakari, omaanta rirotaki kokichaatakaakinari.

³¹ Ayotakoeyirini Tajorentsi, tee ikemijantziri antayitzirorini kaari kameethatatsi. Omaanta riraga pinkathaperoteriri Tajorentsi, antzirori ikowakaakiriri, rootaki ikemapiintantariri riraga Tajorentsi. ³² Tee akemakotapiintziri kokichaatakayerini koñaatapaentsiri kamampowaakittatsiri. Omaanta naaka nokoñaatapaaki nokamampowaakitapaaki, tema retsiyatatakotaana rirori. ³³ Eeromi ipoñaami Tajorentsiki tekatsimi matenanimi etsiyatakootenani.

³⁴ Ikantzirri riroripaeni:

—Paerani pikoñaatantapaakari tee pikameethatapaaki. ¿Arima pikowaki iroñaaka piyoteeyinani? ¡Jantzikoeni! ¡Intsipaete piyaate jaga!

Rootaki rookantakariri Tajorentsipankoki.

³⁵ Ikemakotakiri riraga Jesoshi rookaeyakirini warijeeyopaeni riraga kamampowaakiwitachari. Roojatzi raminakitziri, ikantapaakiri:

—¿Paapatziyarima Itomi Tajorentsi?

³⁶ Ari ikantawakiri:

—¿Tsika ijekakika, naapatziyakari?

³⁷ Ikantapaakiri:

—Naakataki. Piñaakinaroña, nokenkithatakaakimi iroñaaka.

³⁸ Ikantawakiri:

—Naapatziyawakimi, Nowinkatharite. Eeroka rioperori.

39 Ikantapaakiri:

—Rootaki nopolakantakari kipatsikika, nokantakotantyaariri maawaeni atziri tsika ikanteeyani. Tema noñaakimi eeroka, eerokawitaka kamam-powaakitsiri omaanta iroñaaka nokokichaatakagaem. Niyotaakotakimiri Tajorentsi. Tema paapatziyana rootaki iinja piñaantyaariri irira. Kimitaka iroka nopolakapaaki jaka niyotaakoteeriri Tajorentsi maawaeni atziri. Riraga aapatziyeeyanarini aritaki riyotaakiri paashini atziri iñeeri iinja. Omaanta riraga kaari aapatziyeeyanarini inta ikenkithashiryawita ryoterimi Tajorentsi, tema tee riyotzimaetari eejatzi eero iñiiri iinja. Iitashiwitaka riyotziri iroñaaka. Omaanta roshiyashitakari kamampowaakitsirtsir tee riyoperotziri irira.

40 Riraga warijeeyopaeni itsipateeyakarini, ikemaeyawakironi ikantakirir. Roojatzi ikanteeyantanakanai apaanipaeni:

—Iroka poshiyakaawentakiri kamampowaakitsiri, ñteetsikya pikenkithashiryaaowitana naaka kamampowaakiwitachari?

41 Rakapaakiri rirori:

—Pikamampowaakitzira, eero ojeeki kaari kameethatatsi pantziri; omaanta pikanteeyawitani: “Namineeyini”, rootaki ojeekantari pantani.

10

Riraga Jesoshi ikenkithatakotziri ashitariri rowishate

1 Eekiro riyaatatzirri riyotaantzi riraga Jesoshi, ikantanakiri:

—Kyaaryootaki iroka nokantemiri. Rooma tsiteniniki romonkyaapi-intziri ashitariri rowishate ishiirikoteki. Eenitatsi apaani omoo eejatzi ashitako kameetha. Romonkyaantariri ikempoyaantari tsiteniriki. Ninkarika pokatsini eerorika ikyapaaki omooki inta rateetashitapaakya raantyaariri owisha, irira rirotaki koshintzi. Ikoyi ikoshite. ²⁻³ Eenitatsirika atziri shentziniriri ashitako, aririka ipokapaaki ashitariri, ari rashitaryaawakiniri ishineteri ikyaanaki. Aririka ikyaaashitapaakiri, ikaemapaaakiri rowishate iwaeropaeni, ari ipokashiteri maawaeni, eero ithawantawakari ashitariri. Roojatzi raanakiri janta paashitomashiki, ⁴ reewatanakiri. Ari riyowaantetziri iñaani, rootaki royaateeyantaririni. ⁵ Aririka ikaemawityaari kaari iñaapiintzi rowishate, eero riyowaantetawakiri ipaante. Eero royaatziri inta ishiyaapithatanakyaari maawaeni.

6 Rootaki roshiyakaawentawitanariri riraga Jesoshi omaanta tee riyotakoteeyironi oetarika roshiyakaawentziniriri. ⁷⁻⁹ Ikanteeyanakirini eejatzi:

—Kyaaryootaki iroka nokantemiri. Naaka oshiyawori ashitakontsi ikyapiintzira owisha. Tema kimitaka iroka, aririka pikowaperotaki piyoteeri Tajorentsi paapatziyakinarika naari. Maawaeni eeroka jewatatsiri joriyyopaeni jaka kaari aapatziyanari kimitakimi koshintzi. Kaari piyotaakoperotakiriri Tajorentsi atziri. Omaanta naaka iyoperotziriri riraga Pawa. Ninkarika aapatziyenani naaka nowañaakiri ikantyaani nojeekakayeri eejatzi nopolakaperotaki oetarika owañeerini. ¹⁰ Ipokashitziri koshintzi ikoshite owisha, rowamaeri. Eerokapaeni jewatatsiri pikimiwitakari: rooma tee pikameethatzi. Tee piyotaakotantaperotziri Tajorentsi atziri, rootaki aririka ikame irira, tee riyoperotanakiri Tajorentsi. Rootaki kaari iñaaperotantariri rirori ikameethatzi. Tema rootaki kaari nomatantawo nojeekakayeri naaka eejatzi Pawa. Omaanta naaka nopolakiki nowañaantakariri kameetha. ¹¹ Naaka oshiyariri riraga shentziriri rowishate kameethari.

Tema naaka ashitariri kameethari aapatziyaperotanari rootaki nokowan-takari nokamawenteri.¹² Tee nokimitari shentziniriri owisha ipinatziri ashitariri. Irira kaari ashitariri owisha. Aririka iñaawakiri riori ipoka-paaki manitz, ithaawantanakari ishiyaapithatanakari; rookanakiri owishapaeni. Roojatzi raantapaakyaaarika riraga manitz apaanipaeni owisha, rowamayitapaakirini. Maawaeni paashinipaeni owisha itsiparyaayitanakani.¹³ Aritaki ikantari riori. Tee ikenkithashiryaauperotziri owisha, inta ikenkithashiryaaashitakari koriki ipineeteriri, rootaki ishiyaapithatantanakariri. Pikimitaka eerokapaeni jewatatsiripaeni pookanakiri irika kamampowaakiwitachari, tee pamitakotziri kameetha.¹⁴⁻¹⁵ Tema naaka oshiyariri riraga shentziriri rowishate kameethari. Kyaaryo naaka ashitariri kameethari riraga aapatziyanari. Tema maawaeni irirapaeni nokashiyeeyirini nosheninka. Kimitaka niyotziri Pawa eejatzi riyotakina naaka, tema niyotziri rioripaeni, eejatzi naaka riyotzitana. Eejatzi nokamawenteri.¹⁶ Eenitatisi eejatzi paashinijatzitatsiri atziri kaari joriyyot-siri. Nokowakiri maawaeni irira eejatzi ikemantenari oetarika nokantziri, niyotaakotantariri Pawa Tajorentsi roojatzi raapatziyanteena. Aririka raapatziyena ari nokashiyeeri nosheninka. Tema nokashiyeeri nosheninka maawaeni aapatziyanari, joriyyotatsiri eejatzi paashinijatzitatsiri atziri.

¹⁷ Eejatzi ikantzi Jesoshi:

—Nokowashitarí naaka nokamawenteri atziripaeni, rootaki nokamawenantaayariri iinja eejatzi nopiriintanee. Rootaki inintaperotantanari Pawa.¹⁸ Tekatsi matashityaawonimi rowamaenami, inta nokowaperotaki nokamawenteri maawaeni atziri rootaki nomatantyaawori. Nomatero nokamawenteri atziri, eejatzi nomatero nopiriinte: rootaki ikowakaakinari Pawa.

Ari riyaatakaanakina naakapaeni.

¹⁹ Aritaki okantari ikantakiriri riraga Jesoshi. Roojatzi ipiyapiyawaante-tanteeyapaakaririni maawaeni jewatatsiripaeni joriyyopaeni.²⁰ Eenitatisi osheki kantayitatsirini:

—Ikyaatashitakari kamaari. ¿Itaka pikemijanantariri?

²¹ Ikantzi paashinipaeni:

—Tee ikyaatari kamaari, tema kameetha riyotaantzi. Kaari irinta kamaari: tema ineshironkatakiri kamampowaakitatsiri, rootaki ikokichaataakaantariri.

Rapiitziro ikantzi Jesoshi: “Naaka monkaatakariri Tajorentsi”

²² Okanta okyaawontsitapaaki. Monkaatapaaka kitejiri no-kenkithashiryaaantawori rowameethatanteetawori Tajorentspango paerani. Ipyakaakina Jesoshi Jerojareeki.

²³ Ari ikatzyatziyawaeta riori janta owitheenkayitani otzinkamipaeni pankotsi, noetziro pankotsi Rashi Sharamooni. Tema rootaki ikaapanomatantakawori rinkinagaakitero okaatzira.²⁴ Ipiyowentapaakari os-heki jewatatsiripaeni joriyyopaeni, rojatekapaakiri Jesoshi. Ikantapaakiri:

—Paerani pimanapithatakinawo. Pikantaperotena iroñaaka: ¿eeroka Rotyaantanewo Tajorentsi poemishitowaeri oroomajatz?

²⁵ Ikantawakiri:

—Aritaki nokanteeyawitakimini; omaanta tee paapatziyawakina. Oetarika nantayitakirini, rirotaki Pawa otyaantakinari matakaakinawori. Iroka nantayitakirini, rootaki riyotakaemirini naaka Rotyaantanewo Tajorentsi.²⁶ Aritaki nokantakimi: tee ro kaari pikowanteyani pikemijantena, inta kaari pimatantawo pikemijantana.²⁷ Riraga aapatziyanari ikemiro nokantziri. Niyotziri maawaeni eejatzi

irirapaeni royaatana. ²⁸ Aritaki naaka nowañaakiri maawaeni. Tema roojatzi ikantyaani nojeekekakiri naaka. Eero ryaatzi paamariki kaari tsiwakanitatsini. Nokempoyaaperotakiri, okimitzimotawitana noerikawakotakiri. Tekatsi aapithatenarini. ²⁹ Riraga Pawa pakinariri ikantakina: “Pikempoyeenari irirapaeni”. Ranaakotakiri maawaeni itajonkantaperotzi, tekatsi aapithaterini eejatzi Pawa rakoki.

³⁰ Nomonkaataperotakari Pawa, eejatzi naaka imonkaatakina.

³¹ Roojatzi maawaeni riraga jewatatsiripaeni joriiyopaeni ramawitanaka mapi rompojantyaaririmi. ³² Omaanta ikantanakiri rirori:

—Rirotaki Pawa tajonkakaakinari. Osheki noñaagayitakimironi. ¿litakama nantakiri pikowantari pompojantenari mapiki?

³³ Ikantawakiri:

—Tee ro nompojantemiri mapiki pantziowa kameethatatsiri. Eeroka shi-rampari, omaanta piiujorentsitashitaka, rootaki nompojantemiri mapiki.

³⁴ Ikantanakiri rirori:

—Tema rojankinatakaantakiniri Tajorentsi atziri Iwaperiteki rirori, okantzi: “Nokanteeyemini eeroka maawaeni tajorentsitsatsiri”. ³⁵ Riraga ojankinatzirorini Iwaperite Tajorentsi ikantziri: “Tajorentsitsatsiri”. Tekatsi akantero inashitakayaawo Iwaperite Tajorentsi. ³⁶ Ikowakaakina Pawa, rootaki rotyaanantakinari jakä kipatsikika. Inkaaganki nokantakimi: “Naaka Itomi Tajorentsi”. ¿litaka iroñaaka pikanantanari: “Piitajorentsitsashitaka”? Itajonkantaki Pawa. ³⁷ Eerorika nokimitari irira eero paapatziyana. ³⁸ Omaanta nokimitaririka, paapatziyeeyanan. Eerorika pikoyi paapatziyashitana naari, okameethatzi paapatziyakotenawo nantziri. Paapatziyawo, roojatzi piyotantyaari ikimitana Pawa. Eejatzi naari nokimitari irira. Piyoperotawakiro.

³⁹ Rapiitziri ikowaperoeyawitanakani rayerimi, omaanta ipeyimotanakari Jesoshi.

⁴⁰ Ari imontyaakaanakinawo naaka riraga Jesoshi Joriraaniki. Riyaatakanakina janta intatsikeronta tsikarika paerani Jowani ikaawoshitantzi. Aritaki ijekakaapaakina janta apite kashiri. ⁴¹ Osheki pokashitanakiriri eejatzi. Ikanteeyawakaapaakani:

—Tee itajonkantzi Jowani omaanta kyaaryootaki maawaeni ikantakotakiriri Jesoshika.

⁴² Osheki aapatziyayitawakaririni riraga Jesoshi janta.

11

Ipiriüntanakiri Jesoshi Raajawo

¹ Ijeeki Wetaanyaki shirampari iwaero Raajawo, imantsiyataki. Ojeeki eejatzi ipankoki ritsiropaeni: rowaga Mariiya, eejatzi rowaga Maarita.

² Chapinki ojeetziri Mariiya Awinkatharite iitziki. Ro ojeetantari kajankaari. Oshetantari oeshi eejatzi. Tema mantsiyataki iyaariri, ³ rootaki otyaanantakariri kanterini Jesoshi. Inteenanta ryaatashitakiri. Ifñaantapaakariri ikantapaakiriri:

—Nowinkatharite, riraga Raajawo pinintaperotziri, mantsiyataki. Thame aate.

⁴ Ikemantawakiriri Jesoshi ikantawakiri:

—Imantsiyatawakirirata omaanta eero ikamaperotzi. Ro imantsiyatantakari, ikowaki Pawa Tajorentsi maawaeni atziri ipinkathatena naari eejatzi ipinkathatzityaari irira.

⁵ Jesoshi inintaperotziro roori Maarita, irento, eejatzi iyaariri. ⁶ Ari ikemakotzitakari imantsiyatki, tee riyatzaa intsipaete, ijekanaki apite kitejiri. ⁷ Roojatzi ikanantanakina maawaeni:

—Thame apiyeeyanakini eejatzi Joreeyaki.

⁸ Nokantanakiri naari:

—Iyotaanari, chapinki janta ari rompojakimimi mapiki riraga joreeyajatzi. ¿Eekiroma pipiyashitanaateeri janta? Eero aatzi: rowamaemikari.

⁹⁻¹⁰ Riyotantari Jesoshi oetarika ikenkithashireeyari Pawa Tajorentsi eejatzi oetaka ikowakaanari naari, ikantana maawaeni:

—Tema eeniro okaatzi 12 oorapaeni apaani kitejiri akatziyatziyawae-tantyaari eero antziwatanta. Eejatzi eenitatsi 12 oorapaeni tsiteniri akatziyatziyawae-tantyaaworika aritaki antziwatanya. Okimiwitakawo iroka, tekiraata omonkaata kitejiri rowamaena. Aritaki amatapiro akatziyatziyawae-tantyaari eero. Eero rowamagaetana iroñaaka, eero. Pawa ikowakaakae aate aaka. Aririka aapatziyaperotyaari riraga Tajorentsi, eero imatziro paashini atziri ipakaakagaero aapatziyakarira.

¹¹ Aritaki ikantakinari. Roojatzi ikanantanari:

—Imaashitaka^{*} Raajawo. Niyaate iroñaaka nokaakapaeri rirori.

¹² Nokantanakiri:

—Maaperotakirika, Nowinkatharite, aritaki retsiyatakotanee.

¹³ Omaanta ikenkithatakowitakari Raajawo, ikamaki. Naaka, noetakashitawitaka ro ikantanari: “Imaashita, imakoryaantari”. ¹⁴ Roojatzi ikantaperotantanakinari:

—Kamaperotakiroña Raajawoni. ¹⁵ Kameethaperotaki tee noñiiri naaka ikamimotena, pimatantyaawori paapatziyaperoeyanakinani, rootaki noki-moshiryaaantanakari. Thame anueeyakiterini maawaeni.

¹⁶ Riraga Tomashi iieteziri Tsipantzi, ikanteeyananan:

—Thame ateeyanakini maawaeni, rowamagaete aaka.

¹⁷ Roojatzi niyaatantanaka.

Nomagaeyakini niyanki awotsi. Okitejitanaki roojatzi nowaagantanaka. Tsitenini rootzimateentsi nareetya inampiki Raajawoni. Ikanteetawakina ikaatakotaki 4 kitejiri omonkyaaaganteetantakariri Raajawoni omooki impeetaki. ¹⁸ Rowaga Wetaaniya okaakintawo Jerojaree, aamaashitya okaatzi 3 kiroometero. ¹⁹ Ipoñaaka Jerojareeki osheki joreeyajatzi pokashitzirori Maarita eejatzi Mariiya. Eejatzi itsipatawo wetaaniyajatzi. Ikantapaakiro:

—Eero petakotashitarri piyaaririni.

²⁰ Ari ritakawo apaani shirampari, kamanteroni Maarita:

—Kaakitakira Jesoshi.

Ookanakiro opanko, jatanaki otonkiyotawakari. Omaanta Mariiya, eeniro ojeekanaki pankotsiki.

²¹ Okantawakiri rowaga Maarita:

—Aririkami pijekimi jaka, Nowinkatharite, eeromi ikamimi aarinini.

²² Niyotaki iroñaaka oetarika pikanteriri riraga Tajorentsi aritaki ipakimi okaatzi pikowakoteriri.

²³ Ikantapaakiro:

—Aritaki rapiiteero rañaagae piyaaririni.

²⁴ Okantawakiri:

—Jee, aririka omonkaatapaakya kitejiri ipiriinanteeyariri Tajorentsi maawaeni kamayitatsirini, aritaki ipiriintanee rirori aarinini. Niyotakiro iroka.

* ^{11:11} Ikantzirorika joriiyopaeni imaashitaka omatero okantakotziri apite inashita. 1. Irira imaaki 2. Ikamaperotakitzi.

25-26 Ikantapaakiro:

—Naaka añaakagaerini maawaeni kamawiteenchari, eejatzi nowañagaeri riraga piyaaririni eejatzi. Ikamawitakyaarika aapatziyanari ari rapiiteero rañaagae eejatzi. Eero noshinetziri apaani atziri aapatziyanari itsipatyari Jatanaashi janta paamariki kaari tsiwakanitatsini. ¿Paapatziyawoma iroka nokantakimirkira?

27 Okantawakiri:

—Jee, Nowinkatharite, niyotakimi eerokataki riraga Itomi Tajorentsi riraga Rotyaantanewo naamaakari.

28 Ari, piyaate pikaemiro pirento.

Roojatzti opiyanaaka, okantziro rowaga Mariiya. Okamantathatapaakiro:

—Areetapaaka Iyotagaeri, ikaemakaantapaakimi.

29 Okantziro:

—Jee, ari.

Intsipaete okatziyanaka, iyaatashitanakiri Jesoshi. **30** Tekiraata rareetya rirori pankotsiki. Eeniro ijeki janta otonkiyotakitarinta Maarita. Ari royiilo janta Mariiya. **31** Ari iñaakiro roori iyaatzi maawaeni tsipata-woripaeni pankotsiki ari roemoshirenkaatziiro, roojatzti royaatantanakawo maawaeni. Iitawitaka ari iyaate apiitero iraakotyaari iyaaririni janta omookinta. **32** Ari oñaapaakiri Jesoshi, iyaatashitziri otziwerowashitapaakari owethatari. Okantapaakiri:

—Poemoshirenkapena, Nowinkatharite. Aririkami pijekimi jaka, eero ikamimi aarinini.

33 Iñaawakiro riraga Jesoshi irayimotapaakari, eejatzi riragaeyakanji joriiyopaeni riraga tsipatayitaworini. Roojatzti ikantashiretanaki rirori, rowashiretanaka. **34** Ikantanaki:

—¿Tsika powakirika?

Okantawakiri:

—Janta, Nowinkatharite, nowakiri omooki. Thame paminakitero.

35 Ari riraapaaka riraga Jesoshi. **36** Rootaki ikanantanakari joreeyajatzi:

—Piñaakiri, osheki inintashiretawitarini.

37 Eenitatisi apaanipaeni kantaneentsiri:

—¿Kaarima irika kokichaatakagaeriri kamampowaaktitsiri? Eenirorikami jaka, ¿arima retsiyatatakoterimi eejatzi Raajawoni, eero ikamimi?

38 Rapiitziro ikantashireperotanaki rirori. Rokaakiwitapaakawo omoo imoontashitanteetakariri kaminkari impeetaki. Rashitakotanteetakari mapi. **39** Ikantapaaki riraga Jesoshi:

—Pipinoyaakoteri mapikika.

Okantawakiri rowaga Maarita:

—Eero, Nowinkatharite, ikaatakotaki imaakotaki 4 kitejiri ikamantakari. Shitzitanaki.

40 Ikantanakiro:

—Eero pikantzi: “Eero”. Tema nokantakimi: “Paapatziyakinarika aritaki piñaakiro itajonkante Tajorentsi”.

41 Roojatzti ipinoyaanteetakawo mapi. Raminanaki riraga Jesoshi jenoki, ikantanaki:

—Ariwee, Pawa, niyotaki pikemakina. **42** Niyotaki pikanta pikemapiintana. Eenitatisi osheki katziyimotanari jaka. Nokowaki riyote maawaeni potyaantakina, rootaki nokenkithataantzimiri.

43 Roojatzti ikaemaperotantanaka:

—Raajawo, pipiriintee, pipokae.

⁴⁴ Roojatzzi riyowantanaka kamawiteenchari. Chapinki roojotanteetawakariri tokoyatha: rakoki, iitziki, maawaeni. Ipashikapootanteetawakariri paaño. Iroñaaka ikantziri Jesoshi:

—Poojoryaakoteeri, potyaanteri ryaatee.

⁴⁵ Riraga joreeyajatzzi, rirotaki tsipateeyakaworini Mariiya, iñaakoeyakirini Jesoshi ipiriintakaagaari Raajawo rowañaagaeri.

Rajaryagaeyakarini rowamaeri Jesoshi

Tema oshekini riraga jewatatsiri raapatziyeeyanakarini Jesoshi. ⁴⁶ Paashinipaeni riraga jewatatsiri iñaakiri eejatzzi ikijanaka. Roojatzzi ryaatashitakiri warijeeyopaeni, ikantakotapaakiri riraga Jesoshi, okaatzzi rantakiri. ⁴⁷ Ari ikantakoeyakitzirini riraga warijeeyopaeni. Tema ikaemakaanteeeyakirini riraga 70 jewawentziriri joriiyopaeni. Ikantawakaayakaní:

—¿Tsika akanterika? Riraganki shirampari osheki itajonkantapi-intaki. ⁴⁸ Aririka ashinetanakiri eekiro ryaatzzi itajonkantzi, ari raapatziyeeyanakyaarini maawaeni atziri, ipokashiteekari oroomajatzzi, ishekirowakoteekari Tajorentsipankoki. Eejatzzi ithonkaekari aaka, maawaeni.

⁴⁹ Itsipatari Kaejashi riroripaeni janta. Iroñaaka ojarentsi rirotaki irira iwinkatharite ñaanakowenantsirsipaeni. Ikantanaki rirori:

—Tekatsi piyote eerori. ⁵⁰ Tee pikenkithashiryakya. Pamineeyini: okameethazimoeyeminiita ikameeta apaani shirampari rowawi-jaakoeyanteerine aakapaeni, eero athonkantra maawaeni aakapaeni.

⁵¹ Tee ikantashitari iroka. Rooma rirotaki iwinkatharite maawaeni ñaanakowenantsiri. Riyotaakiri Tajorentsi, rootaki ikantakotztantakariri ikamawenteeyerini riraga Jesoshi maawaeni joriiyopaeni. ⁵²⁻⁵³ Tee apatziro ikamawenteeeyirini joriiyopaeni, inta ikamawenteri maawaeni atziri reentsitetantyaariri Tajorentsi maawaeni aapatziyariri rirori. Inashiteeyawitani, ijekaeyini maawaeni nampitsikipaeni inteenaki omaanta ikamawenteri ipiyoeyantyaaririni maawaeni. Aripaete riraga jewatatsirsipaeni joriiyopaeni rajaryagaeyakarini riraga Jesoshi, rowamaeri. ⁵⁴ Rootaki kaari iroñaaka ikinapiinantananakira irira janta roshekizinta joreeyajatzipaeni, tee roñaagapaari. Riyaatakanakina paashiniki kipatsi. Ari ijekakaapaakina nampitsiki oetachari Ejeryeemi othapikinta janta tekatsi atziri ipanko.

⁵⁵ Rootzimateentsi omonkaatyta Kitejitalsiri Rawijantariri Ronampiri Tajorentsi janta Ejiipitoki ikimoshireeyantyaarini maawaeni nojoriyyotzinkarite. Iroñaaka itonkaanaki maawaeni Jerojareeki rowameethatantanakyaariri, ipinkathatantyaariri Tajorentsi. Riyaateyanakina jeekatsiri tsikarikapaeni, ⁵⁶ tema raminaminawitapaakari Jesoshi. Ikyappaaki maawaeni Tajorentsipankoki ipinkathateri Tajorentsi, ikantawakaapaaka:

—¿Oetaka pikenkithashiryari eeroka, arima ipokaki Jesoshi?

—Aamashitya aririka.

⁵⁷ Tema aritaki ikantakaantakae aaka maawaeni atziri riraga warijeeyopaeni eejatzzi jewatatsirsipaeni ñaanakowenantsirsipaeni:

—Aririka piñaakiri Jesoshi, pipoke pikamantakitenia intsipaete.

Tema ikowaeyanakini raakaanteri.

¹ Tekiraata 6 kitejiri omonkaatantyaari nokimoshirewenantyaawori Kite-jitatsirri Rawijantariri Ronampiri Tajorentsi janta Ejiipitoki. Rareetakaaneena riraga Jesoshi Wetaaniyaki janta ijeekinta riraga Raajawo kamaw-iteenchari: riraga rowañagaeri Jesoshi. Tema itsipateeyakawoni rit-siropaeni, rowaga Maarita eejatzti rowaga Mariyya. ² Ari riwetsikaetakiro owanawontsi iñaaperotantyaariri Jesoshi. Tema eejatzti ikaateeyirini Raajawo, naaka riyotaanewopaeni eejatzti paashinipaeni atziri. Rakiyoteeyirini maawaenii. Maarita rowaga ritsiro riraga Raajawo rootaki kitantatsirini okitziri atziripaeni. ³ Irente Mariyya amapaakiniri Jesoshi kajankapithari yoshaachari naariwo, kameethaperotatsiri. Pinaperotachari. Otziripi-thatantakari iitziki, roojatzi oshetantanakari oeshi. Kajankaenkatanakai maawaenii pankotsiki. ⁴ Ari eenitatsi jaga Joorashi karyootejatzti rirow-itaka riyotaanewo. Riyotaki riraga Jesoshi rirotaki aakaanterini iinja. Ikantawakiro:

⁵ —¿litaka kaari pipimanantawo kajankapitharika? Pinaperowitachari osheki koriki. Apayitanakiririnimi riraga ashironkaenkaripaeni. Omaanta peewanatashitakawo owinawo maawaenii.

⁶ Ikantashita: tee ineshironkatziri ashironkaenkari. Ikempoyaawitanari noorikite maawaenii, omaanta rirotaki ayitanariri eechonkiini noorikite. Tema eejatzti ikowaki eechonkiini owinawo kajankapithari, rootaki iki-jakontawori tee opiri owinawo. ⁷ Ikantziri Jesoshi:

—Okantyaata. Iyotaki nokame, rootaki otziripithatantanari* tekiraata nokame. ⁸ Ikantyaani ikaatemikya maawaenii owashironkaenkari, ari pimatero pineshironkatapiinteeyerini. Omaanta naaka eero nokantani nokaatiemi maawaenii kitejiri. Eero oshekitzi kitejiri pineshironkatanta-nakinari jaka kipatsiki.

⁹ Osheki joreeyajatzipaeni kemakoeyawakiririni riraga Jesoshi eenitatsi janta, rootaki riyaatashitantanakari maawaenii. Eejatzti riyaatashitanakiri maawaenii ikoyi iñaantyaariri Raajawo, riraga kamawiteenchari ipiriintapaakiri rirori. ¹⁰ Rajaryagaeyakarini maawaenii jewatayitatsirini Tajorentsipankoki: tema ikowanaki rowamaeri eejatzti Raajawo. ¹¹ Osheki joreeyajatzipaeni ñaakoeyakiririni riraga Jesoshi rowañakiri Raajawo, rootaki iroñaaka osheki jewatatsiri joriiyopaeni raapatziyeeyantanakaririni riraga Jesoshi, eejatzti rotsipariutanakari paashinipaeni jewatatsiri riraga kowatsiri rowamaerimi.

Riraga jerojareejatzti iñaaperotziri Jesoshi

¹² Okitejitanaki oshekini pokaentsiri ikimoshireeyini maawaenii. Ike-makoejakirini riraga Jesoshi ari ipoki Jerojareeki. ¹³ Ari ragaeyanakironi oshipaeni kompirosi eejatzti paashinipaeni oshiyawori raanakiro janta awotski itonkiyoteeyawakarininta Jesoshi. Itacheronkawaanteteeyini:

—¡sha! ¡lrika owawijaakotantsini! ¡lkameethaperotzil! ¡Riotaki Rotyaantanevo Tajorents! ¡Riotaki irika reewawenteeyirini nojoriiyotzinkaritepaeni!

¹⁴ Iñaapaakiri Jesoshi apaani wooro tekiraata ikyakotari atziri. Riotaki omapokaantapaakariri ikyakotapaakari rirori. Rootaki imonkaatantakawori jakinarentsi Iwaperiteki Tajorents. Okantziri:

¹⁵ “Maawaenii jeekatsiri Jerojareeki, eero pithaayi, pokapaaki jewawen-temini ikyakotapaakari wooraani tekira ikyakoetari”.

* ^{12:7} Rametari joriiyopaeni ijeeantyaari kajankaari kaminkari eejatzti itziripithatantyaari kajankapithari eejatzti ityaakitanyaari panetatsiri tokoyamaashiki iponatantyaaririra kaminkari tekiraata ikitata. Roojatzi raantanakyaari ikitateri.

¹⁶ Omaanta tee niyotzi naaka maawaeni riyotaanewo imonkaatziro rojankinateetziro paerani Iwaperiteki Tajorents. Aritaki ikamawentee riraga Jesoshi, ipiriintaka eejatzi ryaataanee Jenokinta, ari okanta no-kenkithashiryaa kotsiro maawaeni noñaakiri atziri rantakiri rirori. Rootaki nokanantari: "Kyaaryo ari okanta. Imonkaatakiro rirori oetaka rojankinateetziri Iwaperiteki Tajorents". ¹⁷ Ari chapinki ikaemiri Raajawo: "Pishitowae", ari shitowanee. Kamaperotawiteenchari, omaanta rapiitziro rañee: noakaati osheki ñaakoeyiririni, roojatzi nokantakoeyakironi iroka noñeeyakirini. ¹⁸ Ari ikemakotakiri riraga Jesoshi maawaeni atziri itajonkantzi rirori, rootaki ryaatashiteeyantakaririni itonkiyotawakari maawaeni. ¹⁹ Roojatzi ikanantawakaantanaka warijeeyopaeni:

—Naakiro. Maawaeni atziri royaatziri rirori. ¡Tee okameethatzi! ¿Oetakaty anteri? Tekira amatziri apakaeri rirori.

Riraga jewatatsiripaeni joriyyopaeni eekiro ryaatatz ioperatanaka royaateri rirori.

Paashinijatzitatsiri atziri ikoyi iñeeri riraga Jesoshi

²⁰ Itonkaanaki Jerojareeki osheki atziri ikimoshiretantlyaari, eejatzi ipinkathatantyaariri Tajorents. Ikaatziri kireeshiyajatzi owakira peyacha joriyyo. ²¹ Ryaatashiteeyapaakirini irirapaeni riraga Jiripi, rirotaki wetheerajatzi. Ojeeki Wetheera Karireeyaki. Ikantapaakiri:

—Yeeyi, nokoyi noñeeri Jesoshi.

²² Jiripi ryaatashitanakiri ikantakiri Antereeshi. Roojatzi ryaatantanaka apite eejatzi riroripaeni ikanantyaariri riraga Jesoshi.

²³ Ikantawakiri irira:

—Eerokataki paashinijatzitatsiri atziri omaanta pikoyi piyotena naaka. Kameetharini. Okameethatawita maawaeni atziri maawaeni kipatsiki raapatziyenami naaka. Tema rooteentsi nokamawentem eerokapaen maawaeni atziri. ²⁴ Kyaaryootaki iroka nokantemiri. Aririka omanakitero teriko mapipookiki, eerorika oparyapaaki kipatsiki, eero oshooki roojatzi okantya: apaani okithoki ojeekanaki. Omaanta tziroryapaapentsiri kipatsiki, kimiwitaka kamaki okithoki oshookantari owakirari owaatha, roojatzi okithokitantanakya osheki. ²⁵ Eenitatsi atziripaeni kempoyaayiwitacharini, tee ikoyi rowashironkaya, omaanta ratsipetashitakawo ikempoyaaka, tema rootaki ryaatantyaari paamariki kaari tsiwakanitatsini. Omaanta kaari kempoyaacha inta rantakiniri Tajorents ikowakaakiriri omawitya ikemaatsiwenntyari kipatsikika, tema roojatzi ikantyaani rañaapae jantajenokinta nojeekekayeri kameetha. ²⁶ Maawaeni kowatsiri rantenawo nokowakaakiriri, okameethatzi royaatenata; tema ikaatenas tsikarika nojeeki naari. Eejatzi iñaakiri Pawa ikameethatzi rirori. ²⁷ Iroñaaka nokenkithashiryaaanaka. ¿Oetaka nokanteriri Pawa? ¿Nokanteririka: "Pawa, rooteentsi rowashironkayena atziri, powawijaakotena"? Eero nokantziri. Tema ro noshintsitashitantakawori nopolantakari kipatsiki nokemaatsityaawo eejatzi nokamawenteri maawaeni atziri. ²⁸ Roojatzi ikenkithatakaantakariri Ashitariri. Ikantziri:

—Pawa, nokowaki ipinkathateeyeminiita atziripaeni, iñaaperoyeminiita pikameethatzi.

Roojatzi nokemaeyantakaririni Pawa jantajenokinta, ikantzi:

—Tema poñaagakotakityaanari notajorenka eeroka, rootaki iñaaperotantakinari atziripaeni nokameethatzi. Ilinja papiitero poñaagakaanteroni notajorenka eeroka, rootaki iñaaperotantenari osheki atziri.

²⁹ Ari ikemaeyawitawakarini katziyeyawiteencharini, inta tee riyoper-
otawakiro. Ikantagaantashitanaka:

—Oñaawaepookitatzi.

Paashini kantayiteentsini:

—Iñaanatatziri ronampiri Tajorentsi.

³⁰ Ikantziri riraga Jesoshi:

—Tee naaka opokashitzi ñagantsi iyotaantenari: inta eeroka
riyotakagaeyawitakimini Tajorentsi otyaantakinari. ³¹ Iroñaakaroña
ikantakowenteri maawaeni theenkantsiri, ikantziri: “Eeniro pantziro
kaari kameethatatsi, aritaki nowashironkaemi”. Iroñaaka ejatzi
rookakaakiri Pawa riraga iwinkatharite maawaeni kamaariipaeni
ejatzi maawaeni kaari aapatziyana. ³² Rooteentsi rowamagaetena
rowatzikakoetenä koroshiki roojatzikya nokenkithashiryaaakaakari
maawaeni atziri, ipokashiteeyenani, ikoyi nowawijaakoteri rioripaeni.

³³ Rootaki ikantakiri riraga Jesoshi. Ikamantzitakari tsika ikantyaaka
ikamantyaaka iinja.

³⁴ Ikantawakiri atziri:

—Iyotagae Iwaperite Tajorentsi: “Roojatzi ikanteetatyeyaanri Rotyaan-
tanewo Tajorentsi rañe”. ¿litaka pikantziri? ¿litaka pikanantawori eeroka:
“Ari rowamagaetakiri atziritapaentsirika”? ¿Ninkakya irika kamatsineka?

³⁵ Rakanakiri:

—Notsipatemi naaka riraga iyotakoperotakaaneeriri Tajorentsi paashini
echeonkiini. Paapatziyena iroñaaka. Eerorika paapatziyana eero piy-
otziri riraga Tajorentsi. Rootaki piyatantyaari paamariki kaari tsiwakan-
itatsini. ³⁶ Rootaki paapatziyantanari imatantyaawori reentsitetemi. Roo-
jatzi ojeekantapaalkini pajankaneki noñaani.

Roojatzi ryaatantanaka imanapithatanakari.

Kaari raapatziyantari jewatatsiripaeni joriyyopaeni

³⁷ Iñaawitakari osheki atziri itajonkantayitakini riraga Jesoshi omaanta
tee raapatziyeyawakarini. ³⁸ Imonkaatakiro rojankinatakotzakaririni
paerani Iseyashi riraga kamanantayitzirorini iñaani Tajorentsi, ikantzi:
“Nowinkatharite, eero roshekiperotzi aapatziyawakimini rowaga akaman-
teriri. Iñaawitemi pitajonkante. Omaanta eero raapatziyimi”.

³⁹ Rootaki kaari imatantyaawo raapatziyari Jesoshi. Tema ikantztakani
eejatzi:

⁴⁰ “Riraga Tajorentsi tee ishinetziri riyoperoteri kimitaka tee iñiiri rokiki
riraga kaari aapatziyariri Jesoshi ejatzi tee ishinetziri riyotakay-
eri rajankaneki kimitaka tee ikenkithashiryaa rajankaneki. Ikantziri
Tajorentsi: ‘Ineekari. Riyotzikari. Rameentanakari. Nowawi-
jaakotzirkari’.”

Rootaki kaari imatantawo maawaeni kaari aapatziyariri Jesoshi
ikenkithashiryaa. ⁴¹ Paerani iñaakiri riraga Iseyashi ishipakiryaaki
Awinkatharite, impaetzti ikenkithatakotziri. ⁴² Ejatzi osheki
jewatatsiripaeni joriyyopaeni raapatziyawitanakari Jesoshi. Omaanta
ithawawantari warijeeyopaeni, rootaki kaari ikanantari inampiyatzi:
“Naapatziyakari Jesoshi”. Ikenkithashiryaa: “Ikijantanarikari naapatziyari
irira, eero ishinetanaana notsipataneeyaari atziri janta piyotaantsiki
nopinkathateri Tajorentsi”. ⁴³ Riraga warijeeyopaeni ikowapiintzi
iñaaperoyerini atziripaeni ikameethatzi, tee ikenkithashiryaa koperotari
Tajorentsi iñaaperoteririka irirapaeni ikameethatzi.

Kameetha aapatziyari riraga Jesoshi

⁴⁴ Roojatzi itacheronkawaantetantanaka riraga Jesoshi:

—Maawaeni aapatziyanari, tee apatziro naaka raapatziyaperotana, inta eejatzi raapatziyitari otyaantakinari. ⁴⁵ Maawaeni ūaapiintakinari, iñaapiintzityaari eejatzi otyaantakinari. ⁴⁶ Tema nopolapaaki jakakipatsiki, nokimitapaakari ootamentotsi niyotakotakaantyaariri riraga Tajorentsi maawaeni atziri eero eekiro riyaatatyee ijeekanaki tsiteniriki; omaanta imatziro raapatziyana, eero rantapiintanakiro kaari kameethatssi, inta imonkaatakiro ikowakaakiriri Tajorentsi. ⁴⁷ Omaanta ninkarika kemayitawitakaworini nokantziri: eerorika ikemijantaperotziro, eero nokantakowentziri naaka. Tee ro nopolantari kipatsikika nokantakowentayiterini atziri, inta nopolantari nowawijaakoteri. ⁴⁸ Maawaeni theenkakinari kaari aapatziyawori noyenkithari, eenitatsi okantakowenteri iinja. Iroka noyenkithari nokantawitakari: iinja omonkaatapaakyaarikaroña oth-onkantyaari kipatsi, ari okantakowenteri theenkakinari okaatzti nokantziri. ⁴⁹ Tee noñawaetaashita. Pawa otyaantakinari, rirotaki kantanari: “Rootaki irokakya piñaawaetaapaeri. Irokakya pikantapaeriri”. ⁵⁰ Riraga aapatziyawori kaminagaantsi rashii Pawa okaatzika nokamantakiriri, ari owañaanakiriri ikanteetatyeyaaani ijeki jenokinta. Tema nomonkaatakiro maawaeni okaatzti ikantakinari Pawa.

13

Jesoshi riyotagaeyakinawoni tsiteniriki tekiraata ikami

¹ Rooteentsi nokimoshirewenteeyanakironi Kitejitatsiri Rawijantari Ronampiri Tajorentsi janta Ejiipitoki. Aritaki riyotaki riraga Jesoshi omonkaataka rookantanaawori kipatsika, ipiyantanaari Ashitaririki. Ikantateeyaaani ineshironkaeyakaensi maawaeni rashiteeyakaensi kipatsijatzika. Iroñaaaka ineshironkaperotee, tee ithaawanaki ikamawentee.

² Ari nowaeyani maawaeni notsipatakari Joorashi karyootejatzti, riraga itomi Shimo. Ikenkithashiryakaakari rajankaneki riraga iwinkatharite kamaaripaeni riraga Joorashi raakaantawityaarini Jesoshi iinja. ³ Riraga Jesoshi riyotaki Iriri iitakiri jewawenteroni maawaeni oetarikapaeni kipatsikika eejatzi jenokinta. Rirotaki eejatzi ipoñaka Tajorentsiki, rooteentsi ipiyashitaneeri eejatzi. ⁴ Ari rowakagaeyakinani irira Jesoshi, roojatzi ikatziyanaka. Raatonkoryaanakawo iithaari. Rapineethakitanakawo roshewootantari. ⁵ Roojatzi ijantakawo iñaa tajokira antawo, ikiwanteeeyakinawoni noetzipaeni: nashi naari eejatzi paashinipaeni riyotaanewo. Ro roshetantakinawori noetzi roshewootantari. ⁶ Roowiteenchami ikiwayitzapaakirimi riraga Peetero, ikantziri:

—Rooma eerokataki Nowinkatharite, tee okameethatssi pikiwenawo noetzi naari, inta okameethattemi nokiwemiromi piitzi eeroka.

⁷ Ikantawakiri:

—Tee piyotakotziro iroñaaaka iroka nantakimiri. Aritaki piyotakiro iinja.

⁸ Ikantziri rirori:

—Eerokya pikiwanawokya noetzikya.

Ikantawakiri:

—Eerorikakya nokiwimiro piitzi, eero akimitawakaa iinja.

⁹ Roojatzi ikanantakariri rirori:

—Nowinkatharite, eero apatziro pikiwenawo noetzipaeni, inta eejatzi pikienawo nako, nopo, maawaeni. Nokoyi akimitawakayaaroña.

¹⁰ Ikantawakiri:

—Eero rapiitziro ikiwakya kaawoshiteenchari. Rapiitziro ikiwiro apaniroeni iitziki. Kiteteeyawitakimini eerokapaeni inta apaani kaari kitetarsi.

¹¹ Riyotakiri Joorashi rirotaki aakaanterini. Rootaki ikanantakari: “Apaani kaari kitetarsi”. ¹² Ithonkaeyakinani ikiwaeyakinawoni noetzi maawaeni. Roojatzi ikithaatantaawo iithaari. Eejatzi ijekimoteeyakinani, ikantana:

—¿Piyoteeyakinima iroñaaka iitaka nanantayitaworini irokapaeni? ¹³ Rooma pikantapiinteeyanani: “Iyotaantatsiri”, eejatzi “Nowinkatharite”. Kyaaryootaki iroka pikantakinari. Naaka iyotagaeyimirini. Okameethatzi pipinkathatena. ¹⁴ Naaka piwinkatharite, omaanta nokiwakimiro piihti namitakotantzimiri nokimitakari ponampiri. Ari poshiyakotenawo naaka: pamitakoperotawakaya. ¹⁵ Noñaagakimiro inkaaganki tsika pikantya eroka. Aritaki iroñaaka pikimitawakagaeyanakaani. ¹⁶ Kyaaryootaki iroka nokantemiri. Ronampiri tee ranaakotziri omperatariri. Eejatzi riraga rotyaantanewo eero ranaakotziri otyaantakiriri. ¹⁷ Iroñaaka piyotakiro iroka niyotaakimiri, tema rootaki pikimoshiretanyari pimonkaatakirorika nokowakaemiri nokimoshiryaaakaantemiri. ¹⁸ Eeniro iroñaaka apaani nokantakoperoteri, tee maawaeni nokenkithatakotzimi. Niyyogaeyakinimi maawaeni, tema niyoteeyakinimi. Eenitatsi Iwaperite Tajorentsi tekiraajeeni omonkaatyata, okantzi: “Riraga owakotakinari nopaani, rirotaki piyankashitenani”. ¹⁹ Aritaki nokanteeyakimini tekiraata ragaeten. Piyontari omonkaataka okaatzi nokantakimiri, aritaki paapatziyakotena naaka riraga Rotyaantanewo Tajorentsi riraga Owawijaakontatsiri. ²⁰ Kyaaryootaki iroka nokantemiri. Aririka raakameethateetawakirri notyaantanewo, eejatzi naari, raakameethatena. Aririka raakameethatawakina naari eejatzi ikimiteri riraga otyaantakinari raakameethateri.

Ikantzi Jesoshi: “Rooteentsi raakaanteetena”

²¹ Roojatzi rowashiretantanaka Jesoshi, ikamanteeyanan:

—Kyaaryootaki iroka nokantemiri. Eenitatsi jaka aakaantenani.

²² Ari naminawakaanaka naaka maawaeni ryotaanewo, tee niyotzi ninkarika kantakotakinari. ²³ Naaka ryotaanewo inintaperotana Jesoshi, eenirona naari notziintanakari ichopineeki noñaanatantakari.

²⁴ Rookotakina Peetero, ikantana:

—Pojampiteri. ¿Ninka ikenkithatakotzirika?

²⁵ Roojatzi apawo notziitaperotantanakariri ichopineeki riraga Jesoshi. Nokantakiri:

—Nowinkatharite, ¿ninka aakaanteminika?

²⁶ Ikantakina:

—Aririka nochaantero paa, irika nopakiri, rirotaki aakaantenani.

Roojatzi rochaanantanakawo paa, ipakiri Joorashi itomi Shimo karyoote-jatzi. Ari rawakiro. ²⁷ Roojatzi ikenkithashiryaaakaantakariri iwinkatharite kamaaripaeni Joorashi raakaanteri rirori. Riraga Jesoshi riyotzi oetaka ikenkithashiryaaari rirori. Ikantanakiri:

—Oetarika pikenkithashireeyirini pantero, pimateroota intsipaete.

²⁸⁻³⁰ Raantawakawori rowaga paa, rowakawo, roojatzi riyaatantanaka raakaanantyaariri. Rirotaki kempoyaakinari noorikite maawaeni. Naakapaeni owaeyeencharini jaga tee niyotawakiro ikantakiriri: “Pimateroota intsipaete”. Riyaatantanakari, raamaanaka apaanipaeni ikantziri Jesoshi: “Pamanante oyaari akimoshirewenantyaawori Rawijantari Ronampiri Tajorentsi”. Paashini raamaaka ikanteri:

“Piyaate pipashitayityaarini ashironkaenkari”. Niyankitaki tsiteniri ipiyashitanakari.

Ikamantakina naakapaeni riyotaanewo riyaateeta

³¹ Roojatzi ikamantanakina Jesoshi:

—Nopoñaanaka naari jenokinta, natziritapaaki jaka kipatsiki. Rooteentsi kijashitanari raantaneenari. Roojatzi nokamawenteri maawaeni atziri, nopersirinantaneeyareyari, nopyiantari jenokinta. Tema nokamawenantaariri aapatziyeeyanarinii ipinkathateeeyanteenarinii naari ejatzi Pawa ikanteri: “Tajorentsi riroperori. Rotyaantakaeri Itomi riraga Jesoshi ikamawentee aari”. ³² Ejatzi ikimitya Pawa, riyotakagaeyerini atziri ipinkathateeeyinani naari. Eejatzi ikantakotenari riorori: “Riotaki notyomi. Rantakiro kameetha maawaeni nokowakaantakariri rantero”. Iroñaaka imatero: eero ijamanenteawo. ³³ Iroñaaka, niyotaanewopaeni, rooteentsi nookanteeeyaneemirini. Pikowakowaperotana omaanta okimitaka nokantakiri jewatatsiripaeni joriiyopaeni chapinki, eejatzi iroñaaka nokanteeyemini eerokapaeni: “Nopyiantari janta, omaanta eero pimatziroota eerori piyaateeta, tekira”. ³⁴ Paashini nokamineeyemirini iroñaaka: “Pineshironkatawakaeyanikya maawaeni. Nokimitaka naaka noneshironkaeyimini, eejatzi pikimitawakaeyani eeroka, pineshironkatawakaeyanikya. ³⁵ Aririka pineshironkatawakagaeyanikya, aritaki ryotakoeyakimini eeroka maawaeni atziri: eerokapaeni niyotaanewopero”.

Ikante Peetero: “Tee niyotziri Jesoshi”

³⁶ Ikantzi riraga Peetero:

—¿Tsika piyaateka, Nowinkatharite?

Ikantakiri:

—Janta niyaatee, eero pimatziroota poyaatanakina iroñaaka. Iinja aritaki poyaatanakina.

³⁷ Ikantziri riorori:

—Nowinkatharite, ¿iitarikya kaari nomatantyaawo noyaatemi iroñaaka? Omawitya rowamagaeteerika, aritaki okanta.

³⁸ Ikantawakiri:

—¿Arima pantero? Kyaaryootaki iroka nokantemi. Tekirani iñiini tyaaa, pikante: “Tee niyotziri Jesoshi”. Okaate 3 pikante.

14

Raanakiri Jesoshi aapatziyariri Pawaki

¹ Eejatzi ikanteeyanakinani Jesoshi:

—Eero pikenkithashiryashipiintawo inta pameentyaari Tajorentsi. Eejatzi naari, pameentena. ² Janta inampiki Pawa eenitatsi oshekini pankotsipaeni. Eero oshekitzimi, ari nokantemimi: “Tee oshekitzi”. Niyaate janta niwetsikaeyapaemini pipanko, pijekanteeyapaeyaarini eeroka iinja. ³ Aririka nomatemiro pijekantyaari, ari napiitaatero nopyashiyyakitemini nagaeyaatemini. Aritaki notsipatapaakimi nojeeekinta naari. ⁴ Piyotzi tsikarika niyaatee. Piyotzi eejatzi tsikarika nokinanaki.

⁵ Ikantziri riraga Tomashi:

—Tee niyotzi naaka tsikarika piyaatee. ¿Tsika niyotantyaari tsikarika pikinee?

⁶ Ikantakiri:

—Tema naaka oñaayemironi pikinantanakyaari pareetantyaari Pawaki, eejatzi naaka yotaapiinteeyakimironi kyaaryooperotatsiri,

naaka añaakagaeyakimirini pikanteetatyeyaaani. Tekatsi pikantya piyaatashiteri Pawa, inta naaka aaneemini.⁷ Piyoteeyantakinanimi naaka piyoteeyakirinimi Pawa eejatzi. Paata pífeena nokamawenteri maawaeni atziri ikimitaaka ikantanari Pawa roojatzi piyoperoteri tsika ikantari rirori.

⁸ Ikantziri riraga Jiripi:

—Nowinkatharite, poñaagaeyenarini Piri; ari okaatapaaki, eero napiita-neemi nojampikowentaneeri.

⁹ Ikantakiri:

—Paerani notsipateeyakimini. ¿Tekirama piyotana? Maawaeni ñaakinari, kimitaka iñaakiri Pawa rirori. ¿Itaka pikantanari iroñaaka: “Poñaayenari píri”?¹⁰ ¿Tekirama piyotzimate nokimitari Pawa? Eejatzi ikimitana rirori. Tee nokantashita. Ikimitana irira, rirotaki matakaanawori notajonkantzi.¹¹ Tema nokantzimi nokimitari irira. Eejatzi ikimitana naari. Paap-atziyawo iroka nokantakimiri. Eerorika pikoyi paapatziyashitana, ari piñaaperoyeranini notajonkantaki, tema rootakikya paapatziyantanakinari.

Aririka ryaatanee Jesoshi, osheki imateniri aapatziyariri

¹² Eejatzi ikanteeyanakinani riraga Jesoshi:

—Rootaki kyaaryootaki nokamantemiri. Maawaeni aapatziyenani ikimitteeyanani, eeniroka nantziro naaka eejatzi ikimitya rirori rantapteroteri. Tema niyotaakiri atziri rootaki raapatziyantakinari apaanipaeni. Ari niyaateeta Pawaki, eejatzi opoki rowaga Ishire Tajorentsi amitakotemini. Roojatzi pikamanantyaari atziri maawaeni nokantakimiri naaka, rootaki raapatziyantayitenarini oshekini.¹³ Aririka paapatziyankina, aritaki nomatakimiro oetarika pikowakoteriri riraga Pawa. Iroka nokantemiro ikanantyaari maawaeni atziri iñaaperoteri Pawa.¹⁴ Paapatziyaperotakinarika, pimatero pinetheena Naaka oetarikapaeni, aritaki nomatakimiro pikantenari.¹⁵ Pinintaperotanarika, pikemijantaperoyeranini oetarika nokaminagaeyemirini.¹⁶ Naaka amanerini Pawa rotyanteeyemironi paashini Amitakoeyemirini. Aritaki imatakimiro. Roojatzi okantyaani otsipateeyemini roori:¹⁷ rootaki rowaga Ishire Tajorentsi iyotayemironi maawaeni kyaaryootakotsirsini Tajorentsi. Omaanta tee riyoteeyironi irowa kaari aapatziyanari, rootaki kaari opokashiteeyantairini otsipateeyarini. Omaanta aritaki kijokiro owanteeyakimirini eerori. Rootaki piyoteeyantakaworini eeroka.¹⁸ Nopiyaneerika Pawaki, eero nookimi apaniroeni, ari nopiyashiiyemini Noshireki.¹⁹ Rooteentsi niyaate. Eero rapiitana iñeeyanakinani kaari aapatziyanari, inta pífeeyenani eeroka. Ashi noyiro nañi, rootaki pañaanteeyanakarini eerori: pikantyaani pijeeki jenokinta.²⁰ Aririka nopiriintanee, aritaki piyoteeyanakini nokimitari Pawa. Tema eejatzi pikimiteeyenani eeroka, eejatzi nokimiteeyimini naari: akimitawakaeyani.²¹ Maawaeni yotawakirori nokaminakiriri, ikemijantaperotakirorika eejatzi, rirotaki nintashireperotanari. Pawa aritaki inintashireperotakiri nintashireperotanari. Eejatzi naari aritaki nonintashiretakiri rirori. Niyotakaaperoteri tsika nokanta.

²² Eenitatsi janta paashini Joorashi, kaari karyootejatzi. Rojampitziri irira, ikantziri:

—Nowinkatharite, piyotakaaperotakina naaka tsika pikantari. ¿Itaka kaari piyotakaantari kaari aapatziyemini tsikarika pikantari?

²³ Ikantakiri:

—Pinintaperotana eeroka omaanta tee inintaperotana riraga kaari aapatzianari. Pinintaperotanarika, pikemijantaperotero nokantzimiri, roojatzi inintaperotantemiri riraga Pawa. Roojatzi nopolashiyakimini pishireki, kijokiro nowantemiri Naaka eejatzi Pawa.²⁴ Omaanta kaari nintashiretanari, eero ikemijantaperotziro nokantziri. Iroka nokantakimirika, kaari nashi nokantzimiri naari, inta ikantziri otyaantakinari.²⁵ Eenironaka notsipateeyimini, aritaki nokamantzitakimiro omaanta tekiraata pikemaperotana.²⁶ Riyotzi Pawa paapatziyakina, rootaki rotyaanantemirori amitakotantsiri roori Ishire Tajorentsi. Iyotakaemiro oetarikapaeni. Okenkithashiryaaakaapaakimiro maawaeni nokantzimiri. Rootaki kenkithashiryaaakaayemironi eerokapaeni maawaeni nokantakimir.

²⁷ Eekiro ryaatatyye ikantanakina riraga Jesoshi:

—Rooteentsi niyaate. Nokimoshiryaanaki naaka tee nowashiretakota. Nokowaki pikimitena pikimoshireeyanakinna eeroka: tema naaka pikimoshirewente. Eero imatziro atziri roemoshirenkemi. Omaanta naaka oemoshirenkemini. Aririka eekiro piyaatatyye pikenkithashiryaaakotena naaka aritaki nojeekekagaeyakimini kameetha.²⁸ Aritaki pikemakiro nokanteeyakimirini rooteentsi niyaate, eejatzi nopyiee. Aririka pinintaperotena kameetha pikimoshirewentena niyaate Pawakinta. Aritaki riraga Pawa ranaakotakina.²⁹ Iroñaaka nokamantzitakimiro tekirani niyaatee. Aririka piyotaki omonkaataka nokamantakimir, paapatziyaperoeyantnarini.³⁰ Eechonkiini napiitzimi nokenkithataakaakimi. Awotsikitapaaki jewatatsiri maawaeni kaari aapatzianari: rirotaki iwinkatharite kamaari-paeni. Tekatsi ikantya rirori reewawentene naaka.³¹ Omaanta noshinetari rowamaena oyaatziriri rash. Irira Pawa ikowakaakinari nokamawenteri maawaeni atziri. Rootaki nokantarirri riyoteeyantanakaworini atziri nonintaperotziro riraga Pawa, eejatzi nantapiintziniri oetakarika ikowakaakinari. Pikatzianaki. Thame aatee.

15

Riraga Jesoshi rirojatzi oshiyakaawentacha owaatotha oowa

¹ Ikantawitanaana riraga Jesoshi inta eekiro ryaatatzi riyotaana. Iroka paashini roshiyakaawentakinari irira:

—Naaka kimitawori owaatotha oowa. Eeroka kimitawori otha. Rirotaki Pawa thamaetakotzirori.² Aririka otha kaari kithokitapaentsiri riraga thamaetakotzirori ipejayitzironi, eejatzi rookiro. Omaanta rowaga kithokitatsiri rowameethatakotakiro okithokiperotantanakyaari. Kimitaka iroka, Pawa rantakimiro eerokapaeni aapatzianari. Raapatziyaperotakaantemiri, ikameethatakaperoetakimi.³ Iroka niyotagaeyakimirini, rootaki owameethashireeyakimirini Ishire.⁴ Kijokiro powaeyenani. Aritaki naari kijokiro nowaeyemini. Otha oowa aririka ochewaryaanaki, eero omataa okithokite, rooma ari okamae. Aritaki pikimitaeyaworini eerori. Erorikeri kijokiro powaeyenani, eero pimatziro piyoteeyerini kameetha paashini atziri raapatziyantenari.⁵ Naaka kimitawori owaatotha. Eerokapaeni pikimitawo othapaeni. Maawaeni kijokiro oyenani rirotaki mateeyanakirorini oetarika nokowakaakiriri. Tema kijokiro noyeri naari. Omaanta aririka pintareeyanakinani, eero pantzimaetawo nokowakaakimiri. Rootaki okameethatantari kijokiro powanakina naaka.⁶ Riraga kaari kijokiro owana, ari ikimitakaanteetakyaari otha oowa ipejeetero, thatzik. Roojatzi aririka ojampishitanaki, rookaetero paamariki, pok, otaya, tzinini.⁷ Roojatzirika kijokiro powaeyanakinani eejatzi aririka paapatziyaperotyaawo

nokantzimiri, pikantena oetarika pikowayitzirini: aritaki nomatakimiro.
⁸ Aririka pimatayitakironi oetarika nokowakayemiri, riyoperotemi maawaeni atziri eerokaperotaki niyotaanewopaeni. Aritaki iñaaperoteri atziri riraga Tajorentsi ikameethatzi.

Riraga Jesoshi isheninkatakari maawaeni riyotaanewo

⁹ Iroka eejatzi ikanteeyanarini riraga Jesoshi:

—Kimitaka inintashiretana Pawa osheki, eejatzi naaka nokomiteeyimini, nonintashireeyimini osheki. Kijokiro poyena, rootaki anintaperotawaka-gaeyantyaarini osheki. ¹⁰ Pikemijantaperoterorika nokaminagaeyimirini, aritaki nokantanakimiri nonintapereroeyanakimini naaka. Nokemijanta-perotziro ikantakinari riraga Pawa, roojatzi ikantani inintaperotakina. ¹¹ Ashi noyiro nokimoshiryaaanki naari. Ro nokamanantzimirori iroka pikimoshirewenantyaawori eeroka. Nokowaki pikimoshireperotanaki maawaeni. ¹² Iroka nokaminaantemiri: tema nonintashireeyimini naaka. Rootaki nokaminaantakimiri: pikimitaaga eerori, pinintaperotawaka-gaeyani. ¹³ Riraga neshironkaperotziriri atziri, ikamawentakiririka, riro-taki nintashireperotziriri kameetha. ¹⁴ Aririka pimateeyakironi nokan-takimiri, eerokaperotaki notsipamintharipero. ¹⁵ Eero noeteeyakimini iroñaaka nonampiri, tee riyotzi onampirentsi oetarika rantziri onampi-tariri. Omaanta niyotakagaeyakimini okaatzi ikamantakinari riraga Pawa, rootaki atsipaminthawakaantaperotakari iroñaaka. ¹⁶ Tee eerokapaeni yoyeenani; inta naaka yoyayitakimiri eerokapaeni. Notyaantakimi panantyaawori oetarika nokowanakaayitemirini. Eero patsipatetwo oetarika pantaytenarini. Pikemijantaperotenarika, aritaki imataakaivimiro riraga Pawa oetarika pikanteriri. ¹⁷ Napiitanakimiro iroka nokaminagaeyakimini: pinintawakagaeyani maawaeni.

Theenkantsiri roonakari Jesoshi eejatzi aapatziyariri

¹⁸⁻¹⁹ Eekiro riyaatatzsi ikantakina Jesoshi:

—Riraga kaari aapatziyanari ineshironkatakawakaaka. Aririkami pikim-tyarimi eeroka, aritaki ineshironkatakimimi eeroka. Omaanta tee pikim-itari. Niyooyeeyakimini maawaeni, rootaki roonantakimiri. Kyaaryo, roon-antakimiri riraga kaari aapatziyanari, omaanta nokowanaki piyoperote ritawo roonana naari. ²⁰ Pikenkithashiryaakiro nokantakimiri chapinki: “Riraga ronampiri tee ranaakotziri onampitariri”. Aritaki ikijakina. Eejatzi ikimitemi eeroka, ikijeeeyemini. Tee ikemijantaperotziro nokanteeyaw-itakaririni. Eejatzi eeroka, eero ikemijantapereroeyimini pikamanteeyaw-itayaririni eerokapaeni. ²¹ Rirotaki Tajorentsi otyaantakinari. Omaanta tee riyotziri maawani rirori, rootaki ikijantemiri. Tema piyotaakow-itakinari riroripaeni. Rootaki ranantawori iroka. ²² Ari nopokashitaw-itakari, nokenkithataawitakari. Eeromi nopokashitzirimi eero eenitatis-mi iroñaaka rantani. Omaanta iroñaaka tekatsi okantya irirapaeni ikan-tero: “Tee niyotziro nantziro kaari kameethatatsi”. ²³ Riraga oonakinari roonakari Pawa rirori. ²⁴ Eero eeniromi rantani, eeromi iñaawitakina notajonkawentzimotakirimi. Nomataytakironi kaari imatayitzini atziri. Omaanta iñaawitakina notajonkantzi, eekiro roonatyaaana. Eejatzi rooni-takari riraga Pawa. ²⁵ Aritaki ikantari maawaeni. Tema monkaatapaaka iroka rojankinakotziteetakaririni rirori Iwaperiteki Tajorentsi: “Roonashi-itana maawaeni, tekatsi nantawitya”. ²⁶ Ari notyaantakimiro eerokapaeni Amitakotemini, rowaga Ishire Tajorentsi. Opoñaakya Pawaki, kameetha iyotaapaemiro kyaaryooperotatsiri. Aririka opokapaaki okantakotapaak-inna naaka. ²⁷ Eejatzi eerori, okameethatzi pikantakotakina naari eejatzi.

Tema eeroka tsipatapiintakinari paerani nitantakawori niyotaakotakiriri atziripaeni.

16

¹ Eekiro ryaatatzi ikantana riraga Jesoshi:

—Nokoyi eero pipakaero paapatziyana, rootaki nokanantzimiori maawaeni iroka. ² Paata pikowaeyawityaani pikaaterimi ajoriyyotzinkarite janta piyotapiintaantsiki inta roepiyawakimi. Rowamaemi eejatzi. Aritaki riraga kijakimiri ikenkithashireeya rantziniri Tajorentsi ikowakaakiriri. ³ Tee riyyotziri riraga Pawa, eejatzi naaka, tee riyyotana, rootaki ranantemirori iroka. ⁴ Aririka omonkaatakyia iroka nokantakimiri, aritaki pikenkithashiryaanakiro nokantakimikya rootaki iroñaaka nokanantzimiori. Paerani notsipatzimini, rootaki kaari nokanantzimini, omaanta rooteentsi niyaatee, rootaki nokanantaperotakimiri.

Opoke Ishire Tajorentsi

⁵ Ikantanakina riraga Jesoshi:

—Iroñaaka niyaate otyaantakinari. Omaanta tee pojampitana: “*¿Tsika piyaateka?*” ⁶ Iroñaakaroña nokantakimi, rootaki petakoperotantanakari maawaeni pajankaneki. ⁷ Kyaaryooperotaki iroka nokantakimiro. Okameethatzimotzimi niyaatee. Eerorika niyaatee eero opokashitzimi Amitakoperotemini rowaga Ishire Tajorentsi. Aririka niyaatanaki, aritaki notyaanteeyapaakimironi Noshire. ⁸ Areetapaakimirika, ari oñaanashiretapaakiri maawaeni kaari aapatziyani okanteri: “Eeroka antayitzirorini kaari kameethatatsi”. Oñaanashiretapaakiri maawaeni ikamawenterira Jesoshi iñaaperotantariri Tajorentsi ikameethatzi, eejatzi rowameethatantyaariri. Eejatzi oñaanashiretapaakiri maawaeni tsika ikantyaari Tajorentsi ikantakowenantyaariri maawaeni kaari aapatziyani. ⁹ Tema tee raapatziyana rootaki rowashironkaawentyaari iinja kaari kameethatatsi. Eejatzi rowaga Ishire Tajorentsi okanteri: “*¿Litaka kaari aapatziyantari Jesoshi?*” ¹⁰ Maawaeni kaari aapatziyani tee riyyotakoperotziri Pawa Tajorentsi iñaaperotakotantanari naaka. Omaanta aririka opokapaaki rowaga Ishire Tajorentsi oñaanashiretapaakiri maawaeni atziri nokamawenteri eejatzi nopiyanteeyari Pawaki, rootaki raapatziyanteneririka iñaaperoteri rirori ikameethatzi. ¹¹ Eejatzi opokashitantapaakari Ishire Tajorentsi iyotakagaeyapaerini maawaeni theenkantatsiri ari ikantakotanteri Tajorentsi, rowashironkagaeyerini. Tema rirotaki rirori rowashironkagaeyerini Jatanaashi riraga iwinkatharite kamaariipaeni, eejatzi rirotaki jewatatsiri maawaeni theenkakinari jaka kipatsiki. ¹² Tekira eeniro osheki nokamantemirimi omaanta eero pimatziro piyoteeyawakironi iroñaaka. ¹³ Kyaaryooperotaki maawaeni iyoteemiri Ishire Tajorentsi. Aririka opokapaaki, iyotakaapaemiro maawaeni kyaaryootatsiri. Eero iyotaashita apanairoeni. Oetarika okemakinari naaka niyotaantziri aritaki iyotaapaemi maawaeni. Iyoteemi oetarika awijatsini iinja. ¹⁴ Aawakironi noyenkithari roojatzti iyotaantawakimi eeroka, tema apatziro okamantemiro maawaeni iroka noyenkithari. Tema ari oñaaperoteena. Tema apatziro okamantakotana naaka. ¹⁵ Maawaeni ikantayitanarini Pawa, nokantayitakironi naaka, rootaki nokanantakimiri maawaeni: “Iyotaantemiri rowaga Ishire maawaeni iroka nokantziri”.

¹⁶ Ikantanakina Jesoshi:

—Paata eero piñaana. Paashini paata ari papiitero piñeena.

Ikantakota Jesoshi ikamawentee eejatzi ipiriinantaneeyari omaanta tee nokemaperotziri. ¹⁷ Roojatzi nokantagaantawakaeyakan:

—¿Tsika okantaka iroka ikantakaeri? “Paata eero piñiitana. Paashini paata ari papiitenia piñeena”. Ikantzi eejatzi: “Nyaatee Pawaki”. ¹⁸ ¿Itakakya ikanantari: “Paata”? Tee ayotakotawakiri oetarika ikantakaeri.

¹⁹ Riyotaki Jesoshi nokamantawakaaka. Riyotaki nokowawitari nojampiterimi. Ikantanakina:

—¿Pojampikowentawakaanakawo nokantakimiri? “Paata eero piñaana. Paashini paata papiitenia piñeena”. ²⁰ Kyaaryootaki iroka nokantemiri. Ari piraakotanakina maawaeni, powashiretanakya. Omaanta kimoshirewitachari maawaeni kaari aapatziyanari. Powashirewitakya erokapaeni, omaanta ari papiitero pikimoshiryaanee.

²¹ Aririka omonkaatakyaa oeyowantyaariri otomi tsinani, okemaatsitakari. Ikoñaatantakari eentsite, tee okenkithashiryaanaka okemaatsitakari, inta okimoshirewentziri riraga otomi. ²² Aritaki pikimitakari iroñaaka eerokapaeni, powashiretawitaka nokamantari. Omaanta aritaki nopersiintanee napiitero noñaaneemi. Rootaki pikimoshireeyantanakarini, tektsi owashiretakaaeemini eeroka. ²³ Aririka nopersiintanee, roojatzi piñaantawaena eero pikowanaki pojampitena kyaaryootaki nokantemiri. Paerani nojeeekawitani janta Pawaki roojatzi nopalontakari jakakipatsikika eejatzi nopyiymaetaneeya Pawaki. Kyaaryootaki iroka nokantemiri: aririka paapatziyena, ari ramitakotemi Pawa oetarika pikanteneri. ²⁴ Paerani tekira paapatziyana, pikenkithatakayeyirini Pawa omaanta tee pikenkithatakoeayanani naaka. Iroñaakarofa pamanakotenaata roojatzi ikemantakimiri, ipantemiri okaatzi pikowakotanari pikimoshireeyantanakyaarini kameetha.

²⁵ Eejatzi ikantanakina riraga Jesoshi:

—Ari noshiyaakaawentapiintzimironi oetarika, omaanta paata eero napiitziro noshiyaakaawenteemiro. Inta okameethatzi nokamantakoperoteri Pawa, eero nomanapithatzimiro. ²⁶⁻²⁷ Inja eero pikenkithashiryaapikantena naaka: “Nowinkatharite, pamaneri Pawa nokoyi ramitakotena”. Eeroka nintashiretakinari. Paapatziyena kyaaryo nopoñaaka Pawaki, rootaki inintaperotantakimiri irira Pawa. Ari ineshironkaperoeyakimini, rootaki ramitakantemiri koetyeemotzimiri maawaeni. ²⁸ Nojeeekawitani rioriki, roojatzi nopalontakari kipatsikika. Iroñaaka nookaneero kipatsika, nopyiashitaneeeri Pawa.

²⁹ Nokantziri naakapaeni:

—Iroñaakarofa pikamantaperotakinawo. Tee poshiyakaawentanawo. ³⁰ Ari tekirani nokantzimini, piyotzi oetaka nokenkithashiryaakari. Iroñaaka niyoteeyakini maawaeni pithotyaakiro piyotziro maawaeni, rootaki nokimoshiryaantakari piponaa Tajorentsiki. Tektsi iroñaaka nojampiteemiri.

³¹ Ikantawakiri Jesoshi:

—¿Kyaaryooma paapatziyaperotakina iroñaaka? ³² Rooteentsi nokemaatsitantlyaawori, ari nominthaagakaantakimi, piyaatanaki eeroka pinampikipaeni. Pookaeyanakinani apaniroeni. Aritaki rootzimateentsi omonkaatapaakyaaaroña. Inta tee naaka apaniroeni, kijokiro rowana riraga Pawa. ³³ Ro nokamanantzimiori iroka piweshiryaaantyaari. Aritaki piweshiryaaawentakina. Jaka kipatsikika rowashironkaetemi, omaanta piweshireeyanakaanikya. Nanaakotakiri maawaeni jeekatsiri kipatsikika, noppinkathariperotzi naaka, notsipatemi.

17

Jesoshi ikenkithatakayeri Iriri

¹ Ari okaatapaaki maawaeni ikanteeyakinanini Jesoshi, roojatzi raminantanaka jenokinta, ramanantanakari Iriri, ikantakiri:

—Pawa, monkaatapaaka kitejiri nokamantyaari. Rooma naaka Pitomi. Paerani akashiyeeyakawoni nokamashiteri atziripaeni, pipiriinantaanari nokamawitakaga rootaki piñaaperotantariri maawaeni atziri ikameethatz raapatziyantenari naaka eejatzi nowañaakiri ikantyaani ijeki jenokinta atsipatawakaantyaari aaka. Iroñaaka pamitakotena nomonkaatapaakiro maawaeni nokemaatsiwenantyaariri. Ari nowañaakiri maawaeni aapatziyanari ipinkathatanteeyemirini eeroaka. ² Tema ari piitakina riraga pinkathariwenantsirii maawaeni jeekatsirika kipatsiki, rootaki nomatantawori nañaakagaeyeerini maawaeni piyoyagaeyakinanini nashityaari. Ro piyoyaantakariri ikanteetatyeyaaani rañagaeyeeni itsipateeyeeni. ³ Eeroaka Tajorentsi apintzi. Kameetha riyoteeyemini atziri maawaeni. Eejatzi kameetha riyote naaka potyaantanewo: tema naaka Jesokirishito. Maawaeni ryoperotena ikanteetatyeyaaani rañee jenokinta. ⁴ Jaka kipatsikika nantakimiro maawaeni pikowakaakinari, rootaki nopinkathatatakaantakimiriri atziripaeni. ⁵ Paerani, Pawa, tekiran awetsikironi kipatsi, pitsipatanani janta jenokinta apinkathariiyini. Iroñaaka papitero pikimitakagaena eejatzi akaate apinkathariiyeni.

⁶ Ari eekiro riyaatatzii ikantziri Ashitariri:

—Irika atziripaeni kipatsijatzi maawaeni pashitakari. Pikantakina: “Pikempoyaanakinari”. Ari niyotakaakiri maawaeni tsikarika pikantari. Raapatziyaperotawakawo maawaeni piyoyaakiri. ⁷ Iroñaaka riyoteeyanakinimi eeroaka itaperotawori piyotagaeyanakinanii maawaeni okaatzi niyotaageyakiririni. ⁸ Maawaeni piyotaakinari, nokamtakiri niyotaanewopaeni, niyotaaperotakiri maawaeni. Raapatziyakawo rajankaneki. Rootaki riytakotantakinawori kyaaryo nopoñaakanta jenokinta eejatzi eeroaka otyaatakinari. ⁹⁻¹⁰ Namanakoeyakarinika irikapaeni. Tee namanakoeyarini irirapaeni kaari aapatziyanari inta apatziro irika nokempoyaakimiri. Tema eeroaka ashitariri maawaeni irika, eejatzi pashitakaakinari naari maawaeni. Tema ashiteeyanakarini maawaeni, rirotaki ashi. Raapatziyana maawaeni, rootaki ipinkathatantanari. ¹¹ Eero eekiro niyaatatyye nojeekani kipatsikika, omaanta irikakya jeekaneentsini maawaeni jaka, omaantakya naakakya piyashitaneemini. Pawa, eeroaka rioperori. Tema eekiro piyaatatzii pitajonkantzi. Iroñaaka eeroaka aminaneerini pitajorenkaki, ikimitanteeri. Nokowaki imonkaatawakaya ikimitakae aaka amonkaatawakaaka. ¹² Notsipatanteeyakaririni maawaeni, tema pimatakaakina, rootaki nomatariri nokempoyaantakariri. Naminakowentakiri maawaeni; tektsi ashironkaachani, inta apaani rashironkaeya riraga Joorashi, rirotaki jatatsini paamariki kaari tsiwakanitatsini. Aritaki omonkaatakyia okantakotzirini jankinatacharini Piwaperite paerani. ¹³⁻¹⁴ Niyotaakiri riropipaeni pikantanari, rootaki iroñaaka ikijantanakariri maawaeni kaari aapatziyanari. Ro ikijantanakariri, tee ikimitarikya. Ikimitana naari riraga niyotaanewopaeni nashi, tee nokimitari naari kaari aapatziyanari. Iroñaaka nopyashitaneemi. Tekiraata eenirona nojeeki kipatsikika, nokantziri riropipaeni maawaeni piñaani, ro nokimoshireperotakaantyaariri maawaeni, ikimitenaata naari nokimoshiretzi. ¹⁵ Tee namanatzizimi: “Paapithateri kipatsiki”, inta apatziro nokantzimi: “Pikempoyeeri eero imatantari iwinkatharite kamaari rantakayeerii oetarikapaei”.

¹⁶ Irikapaeni tee ikimitari theenkantatsiri, ikimitaakina naaka: tee nokimitari theenkantatsiri. ¹⁷ Pinashityaari riroripaeni, piyotakagaeyerini kyaaryooperotatsiri, ikyaaryoowentemiro maawaeni pikowakagaeyiririni. Piñaani rootaki kyaaryooperotatsiri. ¹⁸ Potyaantakina niyaatashitantariri atziripaeni nokenkithatakagaeyirini. Eejatzi naari nokimitakari notyaanteeyerini ryaatashitantyaari atziri maawaeni kipatsiki ikenkithatakagaeyerini. ¹⁹ Nokyaaryoowentemiro maawaeni pikowakaakinari; tema nokamawenteri riroripaeni, riyoteeyantyaaworini ikyaaryoowenanteeyemirorini oetarika pikowakaakiriri.

²⁰ Iroka eejatzi ikantziriri Jesoshi Ashitariri:

—Tee riro namanakotari apatziro ayotaanewoka jaka; inta eejatzi namanakotari maawaeni riraga raapatziyakagaeyaari: riraga aapatziyeyeanarini iinja. ²¹ Nokowakikya ikimitawakaanakyaaroña maawaeni. Tema akimitawakaaka, Pawa, atsipatawakaaka aaka. Eejatzi nokowaki ikimitee aaka maawaeni riraga aapatziyanari, roojatzi riyotantyaawori atziri kyaaryo potyaantaperotakina. ²² Pitajonkakowentakina nokimitantakimiri eerori, eejatzi notajonkakowentakirini maawaeni rirori ikimitawakaantyari. Imonkaateeyakaeni aaka, akimitawakaaka. ²³ Ikimitana naari. Nokimitzimi eerori. Rootaki ikimitawakaaperotantyaari maawaeni aapatziyanari, roojatzi riyotantyaari maawaeni atziri potyaantakina, eejatzi pimonkaatakagaeyakinanini naaka eejatzi riraga aapatziyanari, pinintaperoeyanani. ²⁴ Tekirani ojeekini kipatsi, tema pinintaperotanani, rootaki piitantakinari naari, nopinkathariwenteri atziri. Iroñaaka, Pawa, nokowaki itsipateeyenani iñaantenari nopinkathaperotanaki. Tema pikantana: “Pikempoyeeyenarini maawaeni”, aritaki nomatakimiro. ²⁵ Pikameethaperotaki, Pawa. Tee riytzimi maawaeni kaari aapatziyanari, omaanta niyotzimi naari. Eejatzi riyoteeyakimini irikapaeni potyaantakinari, ²⁶ niyotakagaeyakinirini tsikarika pikantari eerori. Aritaki napiitakiniri niyotakaaperoteri, pinintaperotantariri, pikimitakaantenari naari pinintashireperotana. Eejatzi ikimiteeyakinanini maawaeni. Ari okaatzi.

Rootaki ikantziriri Jesoshi Ashitariri.

18

Raantanakariri Jesoshi

¹ Ipakaanakiro Jesoshi ikenkithatakaerri Ashitariri roojatzi ryaatakanantanakina: Jesoshi, eejatzi naaka maawaeni riyotaanewo. Noerinkanaka nomontyaanakawo piryajanteneri iitachari Sherooni. Notonkaanaki roojatzi nareetantapaaka Oriiwomashiki. Nokyaapaaki. ² Aritaki janta ryaatakaapiintanakina Jesoshi, rootaki riyotantari riraga Joorashi, riraga aakaanterinira. ³⁻⁵ Riraga jewatayitatsirini ūaanakowenantsiri Tajorentsipankoki eejatzi warijeeyopaeni rotyaantawakiri joraaropaeni eejatzi waarijyapaeni. Reewatapaakiri riraga Joorashi. Ramapaaki ootamentotsipaeni, oorenantyaariipaeni, rompojamentopaeni eejatzi; ipokashitapaakiri riraga Jesoshi maawaeni. Riyotaki irira iifaka ikanteriri. Riyaatanaki itonkiyotawakari, ikantawakiri:

—¿Ninka paminirika?

Rakapaakiri:

—Riraga Jesoshi najareetejatzi.

Ikantawakiri:

—Naakataki.

⁶ Ikanantawakariri riraga Jesoshi: "Naakataki", roojatzi ipiyantanakawo itapiiki. Ityaapaaki maawaeni kipatsiki, teree. ⁷ Rapiitawakiri:

—¿Ninka pikowaperotzirika?

Ikantawakiri:

—Riraga Jesoshi najareetejatz.

⁸ Ikantziri:

—Tema nokantakimi: "Naaka Jesoshi". Naakarikakya pikoyi, pishineteri riyaateeta irikapaen notsipatakari.

⁹ Omonkaatantapaakawori ikantakiriri Jesoshi Ashitariri: "Irika pikantakinari: 'Pikempoyeenari', tekatsi ashironkaachani". ¹⁰ Roojatzi Peetero inojakiryaantanakawo ichekamento. Ithatziitawakiri ronampiri Iwinkatharite ñaanakowenantatsiripaeni, omaanta ithatziitashitawakari ikempita rakojanorikitzirika. Iwaero onampirentsi Maariko. ¹¹ Roojatzi ikanantariri riraga Jesoshi riori:

—Poepiyero pichekamento poyaankaero. Rootaki ikowakaakinari Pawa ragaetenokemaatsitawenantyaariri atziri. Eero nothañaapithatari.

Raanakiri Jesoshi joraaro Aanashiki

¹² Roojatzi ragaeyantakarini riraga Jesoshi. Rirotaki agaeyanakiririni joraaropaeni, iwinkatharite joraaropaeni, waariyapaena. Roojatzi roojotantanakari. ¹³ Ritapaentawo raanakiniri Aanashiki. Rirotaki rikonkiri Kaejashi riraga iwinkatharite ñaanakowenantatsiri iroñaaka. ¹⁴ Irika rirotaki kantakiriri jewatatsiripaeni joriyyopaeni: "Okameethatzimotzimi ikameeta shiramparinta apaani, rowawijaakotantyaariri maawaeni atziripaeni eero rowamaeri oroomajazti".

Peetero imanakotashitakari Jesoshi

¹⁵ Peetero rirotaki oyaatakowentawitanakariri riraga Jesoshi, notsipatari naaka. Riraga iwinkatharite ñaanakowenantatsiripaeni Riyotana naaka rootaki ishinetantanari naaka nokyantapaaka niyankiiteki ipankoki, notsipatapaakari riraga Jesoshi. ¹⁶ Omaanta riraga Peetero ikatziyapaaka ashitakontsikira jantakirowa. Niyowanee inkokironta, nokantapaakiro shentzirori ashitakontsi:

—Pishineteri irira ikye.

Okantana:

—Jee, ari.

Roojatzi ikyakaantapaakinari riraga Peetero. ¹⁷ Rowaga onampirentsi okantawakiri:

—¿Kaarimima eerori riyotaanewo Jesoshi?

Ikantziro:

—Kaarina.

¹⁸ Okatsinkaetyaaki. Roeshitaka paamari onampirentsipaeni, eejatzi waariyapaeni. Rakitsiyyakan osheki paamariki. Eejatzi riraga Peetero itsipatapaakari maawaeni rakitsiyyapaakan.

Riraga Kaejashi rojampitakiri Jesoshi

¹⁹ Riraga iwinkatharite ñaanakowenantatsiripaeni rojampitakiri Jesoshi, ikantakiri:

—¿Ninka yotaapiintzirika? ¿Oetaka piyotaapiintziriri maawaeni?

²⁰ Ikantawakiri riori:

—Ikemakina maawaeni atziri niyotaantziri. Niyotaantapiintzi janta ipiyotapiintanta joriyyopaeni. Eejatzi niyotaantapiintzi jaga Tajorentsipankoki. Tekatsi nomanapithatzi atziri. ²¹ ¿Litaka pojampitantanari naari? Pojampiteri irirapaeni kemakinari oetarika nokantakiriri. Riyotakiro riroripaeni.

²² Roojatzi ipajapootantanakariri apaani waariryaa katziyeenchari jaga. Ikantziri:

—¿Arima apiyathatakyari iwinkatharite ñaanakowenantatsiri?

²³ Ikantawakiri:

—Terika kyaaryooperotatsiri nokantakiriri, piyotakayenawo. Rooma okyaaryootzirika nokantakiriri, ¿üitaka pipajapootantanakinari?

²⁴ Rootaki riraga Aanashi rotyaanantakariri waariryaa raaneeri Jesoshi oojoteencharira janta Kaejashiki.

Rapiütziri Peetero imanakotashitakari Jesoshi

²⁵ Riraga Peetero eekiro rakitsitatya. Roojatzi ikananteetakariri:

—Tema eeroka riyoataanewo Jesoshi.

Roojatzi imanakotashita, ikantanaki:

—Kaari naaka.

²⁶ Itsipatari maawaeni janta paamariki apaani ronampiri Kaejashi. Rirotaki isheninka riraga ithatyakempitawitakari riraga Peetero. Ikantziri:

—Eerokama noñaakiri oriowomashiki itsipatzimi Jesoshi.

²⁷ Rapiitakiro Peetero imanakotaka. Roojatzi iñaantanaka tyaapa.

Raanakiri Jesoshi Peraatoki

²⁸ Okitejiityaanaki rookanakiro maawaeni ipanko Kaejashi. Raanakiri Jesoshi ipankoki Peraato, riraga oroomajatzti rirotaki jewawentziriri joriyyo. Kaari joriyyo, rootaki kaari ikowanta joriyyopaeni ikyAAPAE ipankoki. Ikantziri riraga jewatatsiri joriyyo:

—Rooteentsi owawentakotyari Tajorentsi aaka akenkithatakoteeri paeraniperoroña aririka rawijanakiri joriyyopaeni ronampiri Tajorentsi janta Ejipiitoki. Aririka aate inthomaenta ipankoki Peraato eero amatziro oya aaka, eero iñaaperotee aaka Tajorentsi akameethatzsi.

²⁹ Roojatzi riyowashitantanakariri Peraato. Ikantawakiri riraga amaeyakiririnira:

—¿litaka rantakiri irika shiramparika pamantakinari?

³⁰ Ikantapaakiri rirori:

—Eenitatsi rantayitzirini. Eeromi rantziromi kaari kameethatatsi, eero namimirimi.

³¹ Roojatzi ikanantawitakari Peraato:

—Paaneeri eerori. Tema ojeeki jankinarentsi pashi yotayimiri powashironkaantyaariri. Pimateri eerori powashironkaeri.

Ikantapaakiri rirori:

—Tee ishineteetanari nowamaeri.

³² Rootaki ikantakiriri omonkaatantakari ikantzitakari Jesoshi. Tema ikantzitani: “Ari ikentakoteeten koroshiki”. ³³ Roojatzi ipiyantanaa Perato ipankoki. Ikaemakaanteeri Jesoshi. Ikantziri:

—¿Eerokama jewawentziriri joriyyopaeni?

³⁴ Ikantawakiri Jesoshi:

—¿Piyowitakinaka? ¿litaka pojampitanari? ¿Eenitatsima paashini kaman-takimiri?

³⁵ Rakanakiri:

—¿Naakama iroñaaka joriyyo? Rirotaki atziri amakimiri jika, riraga jewatayitsirini ñaanakowenantatsiri. ¿litaka pantakiri ikijantakimiri maawaeni?

³⁶ Ikantawakiri riraga Jesoshi:

—Tee nopinkathariwenantzi jika kipatsiki. Nopinkathariwenanterikami jika, aritaki ikijakowentakinami maawaeni nonampiri: eeromi ishinetzirimi rirori riraga joriyyopaeni ramakinami. Omaanta tee jika nopinkathariwenantzi.

37 Roojatzi ikanantakari:

—¿Kyaaryoomaa? ¿Eerokama jewaperotatsiri?

Jee, naaka jewaperotatsiri. Kyaaryo pikantakina. Nokantziri maawaeni atzirri kyaaryooperotatsiri. Rootaki natziritantapaakari, rootaki nopalantakari kipatsikika. Maawaeni riraga iyotanakirori kyaaryooperotatsiri, rirotaki maawaeni aapatzianari.

38 Ikantziri riraga Peraato:

—¿Oetaka iroka pikantziri: “kyaaryooperotatsiri”?

Roojatzi riyowashitantaari írira riraga joriyopaeni, ikantakiri maawaeni:

—Nojampitawitakimi inkaaganki, tee pikantana iitaka rantaperotakiri nowamaantyaariri.

Riraga Peraato ikowawitaka ipakayerimi Jesoshi

39 Eekiro ryaatatodzi ikantzi:

—Aririka omonkaatapaeya Kitejitalsiri Rawijantariri Ronampiri Tajorentsi, noeyowapiintzimiri apaani romonkeetziri. Tema aritaki okantari ameteeyarini. ¿Pikoyima noeyowaemiri jewaperotzimiri?

40 Roojatzi ikaemantanaka maawaeni:

—Eero poeyowaanari irira, inta poeyowaenari riraga Warawaashi.

Tema írira rirotaki koshintzi.

19

1 Roojatzi raakaanantakariri Peraato riraga Jesoshi, ipajatakaantakiri.

2 Riraga joraaro itapotayitakinirini ramantheeri kitchoee okimiwitakawo tsikontochee. Ramantheetakaakariri. Ikithaatakiri kityonkamawori.

3 Ipokashitapiintakiri maawaeni riraga joraaro iñaathawaetashtihir ipinkathatziri, ikantajeempiyaashitapaakari:

—Eeroka jewawentziriri joriyio nopalnathatemi. Injii, injii, injii.

Roojatzi ipajawootantapaakari rakoki. **4** Rapiitziro riyowashitaneeri Peraato jewatatsiripaeni joriyopaeni. Ikantziri:

—Riotaki irika, napiitrimiri namaemiri. Nojampitawitakimi, omaanta tekatsi pikanteeyinani niyotantyaari iitaka pikijantakariri. Namakaananatariri pamineri eerokapaeni nopaljataakariri. Omaanta tee niyotzi iitakarya nowamaakaanantyaariri.

5 Riyowanee Jesoshi rirori. Ramantheetakawo okimiwitakawo tsikontochee, ikithaatakawo kityonkamawori. Ikanteeyirini Peraato:

—Riotaki irika. Ñaakiri, nopaljataakariri.

6 Raminawakiri jewatayitatsirini ñaanakowenantatsiripaeni eejatzi waairiyapaensi. Ikaemanaki:

—¡Pikentakotakaanteri koroshiki! ¡Pikentakotakaanteri koroshiki!

Ikantziri Peraato:

—Pagaeyanakirini eeroka, pikentakotakaanteri. Nojampitawitakari, tekatsi nokemakotziri rantzi iitakarya nowamaakaanantyaariri.

7 Ikantawakiri jewatatsiri Tajorentsipankoki:

—Eenitatsi Iwaperite Tajorentsi iyotaanari okameethatzu ikame iitajorentsishita. Tema ikantzi rirori: “Naaka Itomi Tajorentsi”, rootaki okameethantakari ikame.

Rapiittakiri riraga Peraato rojampitakiri Jesoshi

8 Ikemantawakariri Peraato ikanteeyakiririni eekiro ryaatatzi ithaawap-erotanaki. **9** Ipiyakaanaari, ikyaanee ipankoki eejatzi Jesoshi. Ikantapaeri riraga Peraato:

—¿Tsika piponaaaka eeroka? ¿Ninkami eeroka?

Tee rakanakiri rirori.

¹⁰ Roojatzi ikanantanakari:

—¿litaka kaari pakantana? Naaka jewatatsiri atziriki. Nokowakirika, ari nomatero nookakaakowentemi. Ejatzsi okimitaka, nokowakirika, nomatero nokentakotakaantem koroshiki. Tema piyotakiro.

¹¹ Ikantawakiri Jesoshi:

—Eromi ishinetzimimi Tajorentsi, tekatsu pikantenami. Riraga amakaantakinari jaka, rirotaki antaperotakirori kaari kameethatatsi.

¹² Roojatzi ikowantawitanaka Peraato ipakaerimi. Omaanta rapiitziro ikaemanaki jewatatsiripaeni joriyyopaeni:

—¡Aririka pipakaeri irira, tee pitsipaminthatari Seesari! Irika riraga kantashitachari: “Naaka jewatatsiri”. Tema rirotaki kijakiriri peewatzinkarite riraga Seesari janta Oroomaki.

Ikentakotakaantakiri riraga Jesoshi

¹³ Ikemantakari Peraato ikanteeyakiririni riyowakaaneeri Jesoshi. Janta riwetsikaetzironta, oenokamentotsi iwetsikaetziri mapi. Janta eenitatsi jeekamentotsi ijekapiintzira Peraato ikantakowenantapiintzirira atziri. Nokantziro naaka maawaeni joriyyo: “Kawaata”.^{*} ¹⁴ Okitejitanaki Kitejatatsiri Rawijantariri Ronampiri Tajorentsi janta Ejiipitoki. Roojatzi ikanteyantakarini Peraato:

—Rirotaki irika jewatatsiri pashi eerori.

¹⁵ Omaanta ikaemaeyanakini riroripaeni:

—¡Payer! ¡Paanakiri janta! ¡Pikentakotakaanteri koroshiki!

Rojampitziri ikantziri:

—¿Nokentakotakaanteri piwinkatharite?

Ikantawakiri riroripaeni:

—Tee nopinkatharitakaayiri, omaanta apaniroeni Seesari nopinkathari-takaayiri.

¹⁶ Roojatzi ikantakiri joraaropaeni:

—Paaneeri pikentakoteri.

Roojatzi raantanakari.

Ikentakotakaantakiri Jesoshi janta koroshiki

¹⁷ Roojatzi raashitantanaka Jesoshi koroshi. Rookanakiro pankotsipaeni riyowakotantanaki owtiehenkapaataga inkokironta antawopaeni mapi, rareetantapaakawo tonkaariki oetachari litonakintsiki. Iltziro rowaga tonkaari joriyyopaeni: “Korikota”. ¹⁸ Aritaki ikentakotakiri koroshiki. Itsipatakari apite shirampari. Ikentakotakiri riroripaeni paashini koroshiki apite. Rowamagaetakiri Jesoshi rojatekaetakiri niyanki. Apaani rowamagaetakiri rakoperoki Jesoshi, riraga paashini rampateki. ¹⁹ Peraato rojankinataantaki kantatsiri: “Jesoshi najareetejatzsi, rirotaki jewawentziriri joriyyopaeni”. Ipatakotakaantakiro koroshiki. ²⁰ Okaakintawo nampitsi aritaki ikentakotakiri Jesoshi. Osheki jewatatsiri joriyyopaeni ñaanatakirori rojankinatziri. Ojankinawatitaka ipaante joriyyo, eejatzsi oroomajatzsi eejatzsi ipaanteki kireeshiyajatzsi. ²¹ Riraga jewatayitatsirini ñaanakowenantatsiri joriyyopaeni ikantziri Peraato:

—Tee okameethatzi pojankinatziro: “Rirotaki jewawentziriri joriyyopaeni”, inta pojankinate: “Irira kantashitachari: pinkathariwentziriri joriyyo”.

²² Ikantawakiri Peraato:

* ^{19:13} Ikantziro rirori ipaanteki arameeyojatzi Kawaata: opatziiito pankotsi.

—Aritaki, nomatakiro: nojankinataakaantakiro. Eero ninashitawo nojankinari.

²³ Ari ikentakotakiri joraaro. Ari ikaatzi 4 joraaro: itakariri rayitakiri ipashikari iitoki, paashini ishintonomashite, paashini ijapatote, paashini iithara eejatzzi. Omaanta ipewiryaakotari, tee oshirika inta ontyaaajaampanatashita maawaeni. ²⁴ Rootaki ikanantawakagaeyakarini:

—Eero atzijagaero. Thame añaathawaetawentyaawo ninkarika ayiterini.

Aritaki ikantari joraaro. Imonkaatakiro kantatsiri Iwaperiteki Tajorentsi, ikantzi: "Ipawakaayitawoni noethaarini. Ipankinatzitenawo nopewiryaakotari". ²⁵ Rowaga riniro Jesoshi okatziyapaaka okaakini ikentakotakaga. Otsipatawo irentopero, roojatzi owaero Mariiya. Rootaki iina Kerejowashi. Eeniro jaga eejatzzi Mariiya makaraarajato. Eejatzzi naaka nokatzia okaakini. ²⁶ Iñaanakiro Jesoshi riniro, eejatzzi iñaakina naari. Ikantziro:

—Nana, ajaa, irikakya Jowa rirotaki pitomintanakyaari.

²⁷ Ikantanakina:

—Ajaa, rootaki pinironteeeyari pitsipataperoteeyawo.

Roojatzi naantanaawo nopankoki noshenantawori. Ro ikanantanari tema inintashireperotakina. ²⁸ Riyotanaki Jesoshi aritaki monkaataka maawaeni. Roojatzi ikanantanaka:

—Nomiritaatyami.

Ro ikanantari imonkaatakiro okantziri Iwaperite Tajorentsi. ²⁹ Eenitatsi jaga chomokira yikitaki kepishaari. Ijashiteetakiniri piyonkashinkanrikira. Rojataakiniri jawokiikira. Ipakotakiri ipaantekira riraga Jesoshi.

³⁰ Ratsimiyawakiromi roojatzi ikanantanaka:

—Aritaki iroñaka, nomonkaatakiro ikowakaakinari Pawa.

Roojatzi roeyotantanaka, ikamanaki.

Rojataakiri Jesoshi

³¹ Iroñaka riwetsikawenteeyironi joriyo kitejiri nomakoryaantapiintari. Itziroriimatanakirika oorya, rooteentsi areetya saawaro rootaki kitejitsirii nomakoryaantapiintari. Tee ikowaeyini joriyyopaenii riraga kentakoeyeencharini rowawijeero koroshiki, rootaki ikanteeyantakaririni Peraato:

—Pikagaakaantero iporipaeni, roojatzi pojataakaanantanakyaariri, ikamanyaari intsipaete.

³² Roojatzi riyaatashitanteeyanakaririni joraaro, ikagaaporitakiri iporikira riraga tsipatakakiriri riraga Jesoshi. Eejatzzi ikagaaporitayiteetakarini paashinipaeni. ³³ Apatziro rowashiwitapaaaki Jesoshi, ikagaerimi iporikira: omaanta iñaapaakitziri kamaki, rootaki kaari ikagaantari iporiki.

³⁴ Omaanta apaani joraaro rojataapaakiri imerikiki. Iyowaatanaki riraa tyonkinininini. Eejatzzi iñaay iyowaatanaki. ³⁵ Naaka ñaakotakiriri, iroñaka naaka kantakotakiriri paapatziyantyaariri Jesoshi. Niyotzi kyaaryo nokantzimiri. ³⁶ Aritaki ikanteetakiriri, eejatzzi omonkaataka Iwaperite Tajorentsi kantatsirini: "Eero ikagaayiteetzirini itonki apaani". ³⁷ Eenitatsi paashini jankinarentsi Iwaperiteki Tajorentsi okantzi: "Aritaki ramineeteri Rotyaantanewo Tajorentsi, riraga rojatagaetakiri".

Romonkeetakiri Jesoshi omookira

³⁸ Eeniro janta ijekaki koroshiki Josee arimateeyajatzi. Riyotaanewo Jesoshi naawita, omaanta imanakiro. Ro imanantakawori ithaawan-takari jewatatsiripaeni joriyyopaeni. Omaanta ishirampariwentanakiririyaatashitakiri riraga Peraato ikantapaakiri:

—Pishinetayenari Jesoshini, naaneeriita.

Ikantawakiri:

—Paaneeri.

Roojatzti riyaatantanaka ragaateri. ³⁹ Itsipatanakari riraga Nikoreemo. Rirotaki jatashitiriri paerani Jesoshi tsiteniriki. Raakotanakiniri itziriantyaariri. Imaemañaatziro owaa inchato owaero miira, eejatzi opame inchato owaero aaroe. Aamaashita okaatzi otenatzi 30 kiiro. ⁴⁰ Ragaetaatziri Jesoshini. Ro tokoyatha rapineetakontakariri, itsipatakiro kajankari. Rootaki rametari joriiyopaeni aririka riwetsikeri kamatsiri. ⁴¹ Ojeekinta pankirentsii okaakini ikentakoeyakirininta koroshiki. Janta pankirentsiki ojeekinta rowanteetyaariri, owakirarika imokaetzirika. ⁴² Rooteentsi itzioryaanaki oorya, omonkaatantyaari kitejiri amakoryaantapiintari. Ihaakiro Josee okaakinitaki omoo. Rootaki rowantakariri Jesoshini janta. Ari ipinaashitanakiri mapi omooki. Ipiyanaa maawaenii pankotsiki.

20

Okowawitari Mariiya Jesoshini

¹ Otominkotapaaki. Rooteentsi okitejitzimate iyaatakaakiro Mariiya makaraarajato janta omooki rowawiitakarinta Jesoshini. Oñaapaakiro oukanaka mapi rashitakotantawitakariri. ² Oñaapaakiro inthomaenta omooki. Tee öniiri Jesoshini. Tektsi. Oshiyakaanakawo roori. Ari areetapaka pankotsiki tsikarika nojeeki naaka eejatzi Peetero, okamantapaakina:

—Tektsi Jesoshini omooki. Tema ragaetaneeri. Tee ayotzi tsikarika owaetakiri.

³ Okamantapaakina, niyaatantanakari naaka eejatzi Peetero. Niyaatanaki rowawiteetakarinta. ⁴ Noshiyanaka apite, omaanta nanaakotakiri Peetero. ⁵ Niyowapaaki noeyotapaaka naminantapaakari inthomaenta. Noñiiro tokoyatha oukanaka omooki, omaanta tee nokyaapae. Tektsi iwatha Jesoshini. ⁶ Rimpaetapaaki ipokapaaki riraga Peetero. Rirotaki kyaapaentsiri inthomaenta. Roojatzti iñaapaakiro tokoyatha. ⁷ Eejatzi rowaga paaño opashikantawitakariri iitoki, tee otsipatowo tokoyatha. Apitziwita ookashitanaka roori. ⁸ Ari nokyaanaki naaka, noñaakiro, roojatzti niyotantanakari piriintanaa Jesoshi. ⁹ Tekiraata nokenkithashireeyironi Iwaperite Tajorentsi kantatsiri: “Ikamakirika Rotyaantanewo Tajorentsi, aritaki ipiriintanee”. ¹⁰ Noñaapaakiro, nopyianaka nopankoki.

Aminawakiri Mariiya Jesoshi

(Mr. 16.9-11)

¹¹ Omaanta Mariiya makaraarajato opiya omooki eejatzi katziyeencharira inkokiroeni, iraakotakari riraga Jesoshini. Oeyotanaka, aminanaki inthomaenta. ¹² Oñaakiri apite ronampiri Tajorentsi, ikithaatawo kitamaari. Ijeekaki rowawiteetakarinta Jesoshini. Ijeekaki apaani iitokira rowawiitakarira Jesoshini, paashini iitziki.

¹³ Ikantziro:

—Tsinani, ¿iitaka piraantari?

Okantawakiri irowa:

—Ragaetanakiri Nowinkathariteni. Tee niyotzi tsikarika rowaetakiri.

¹⁴ Roojatzti opithokaantanaka. Oñaamacheetawakari riraga Jesoshi ikatziyapaaka, omaanta tee iyotawakiri.

¹⁵ Ikantziro:

—Tsinani, ¿iitaka piraantari? ¿Ninka pikoyirika?

Oetakaashiwitakari irira rivotaki thamaetakotzirori pankirentsipaeni. Okantziri:

—¿Eerokama aanakiriri Nowinkathariteni? Pikamantenaata tsikarika powakiri. Aritaki naakiteri naari.

¹⁶ Ikantziro:

—Mariiya.

Opithokanaka, okantawakiri:

—¡Iyotaanari!

¹⁷ Okimoshiryaantari okenkithashireeya ipiyaka. Oerikawakiri. Roojatzia withakitantawakariri. Ikantziro:

—Pipankaena, eero poteyaana. Tekiraata noenokana Pawaki. Iroñaaka nokowaki piyaatashiteri maawaeni aapatziyani, pikamantapaakiri maawaeni rooteentsi noenokaeya Pawaki. Tema rivotaki Tajorentsii. Tema rirojatzii Piri eeroka, piyotziri rivotaki Tajorentsii, rootaki pipinkathatantariri.

¹⁸ Roojatzzi opokashitantaanari naaka, eejatzi paashini riyotaanewopaeni, okamantapaakina maawaeni:

—Noñagaerikya Awinkatharite.

Eejatzi okamantapaakina okaatzi ikantayitakirorini rirori.

Ritapaakari Jesoshi, roñaagaeyarini riyotaanewo

¹⁹ Itsiteniityaanaki oorya, nopyioteeyakanii, nokaatakiri paashini riyotaanewo. Nothaawantari jewawentziriripaeni joriyyopaeni, riraga owa-maakaantakiririni Jesoshini, rootaki noyaawitantakawori ashitakontsi. Romapokashitapaakina riraga Jesoshi ikatziyapaaka niyanki. Ikantapaakina maawaeni:

—Pikimoshireeyanakini maawaeni.

²⁰ Roojatzzi roñaagantapaakinawori maawaeni rako eejatzi imerikiki. Noñaawakiri maawaeni rivotaki Nowinkatharite, roojatzzi nokimoshiryaantanaka maawaeni. ²¹ Rapiitakina:

—Pikimoshireeyanakini maawaeni. Rivotaki paerani otyaatankinari Pawa, eejatzi eerori iroñaaka nokimitemi eeroka, notyaantemii.

²² Roojatzzi itajonkantanakina maawaeni, joo. Ikantzi:

—Pagaero Ishire Tajorentsii, kijokiro owaeyanakimini maawaeni.

²³ Piñaakiri atziri raapatziyaperotakina, roojatzzi pikantanyaariri: “Ikamintheemi Tajorentsii eerori, eero ikijawentzimiro pantayitzirini”. Rootaki ikamintaaperotantyaariri Pawa riraga pikantziri. Pikanteririka paashini atziri: “Tee paapatziyari Jesoshi, rootaki ikijawenantemirori Tajorentsii”, aritaki paata ikijawentakimiro.

Ikanteeyakirini Tomashi: “Noñeeeyakirinika Awinkatharite”

²⁴ Ipokashitanteeyakinarini, tee añiiri Tomashi, riraga ii teetziri Tsipantzi: apaani peyeenchari. ²⁵ Ipokantapaakari irira, nokamanantawakari:

—Noñeeeyakirinika Awinkatharite.

Omaanta ikantana:

—¿Kyaaryo? Tee naapatziyawo. Nokoyi noñero rako, tsikarika ikyaaki kiraawo, nokoyi nomonkeero nakoempeki. Eejatzi nokoyi nomonkeero nako imerikiki. Eerrika nomonkiiro, eero naapatziyawo.

Rapiitakiri iñeeeyakirini riyotaanewo riraga Jesoshi

²⁶ Awijanaki apaani tominko, ari napiiitziro nopyioteeyanakanii pankotsiki, itsipatakina maawaeni riraga Tomashi. Oshekini nothaawantakari maawaeni kijanakinari, rootaki napiitantakawori

noyaawitantakawori ashitakontsi. Rapiitapaakina romapokapaakina riraga Jesoshi, ikatziyashitapaaka niyanki. Ikantapaakina maawaeni:

—Pikimoshiryaanakyaaroña maawaeni.

²⁷ Roojatzi ikanantapaakari riraga Tomashi:

—Paminero nako. Pakote, pomonkeero pakoempeki jaka. Pakote, eejatzi pomonkeero pako nomerikikika. Eero pitheenkana, inta paapatziyena.

²⁸ Roojatzi ikanantawakari riraga Tomashi:

—Eerokaperotaki Nowinkatharite, eerokaperotaki Notajorentsire.

²⁹ Ikantapaakiri:

—Iroñaaka piñaakina, rootaki paapatziyantakinari. Eenitatsi kaari ñaanari, omaanta raapatziyeyakinani: nokimoshireperotakaanakiri maawaeni irikapaeni.

³⁰ Oshekini itajonkantayitakini riraga Jesoshi. Naaka maawaeni riyo-taaanewo, noñeeyakirini, omaanta tee nojankinatziro maawaeni jaka. ³¹ Ro nojankinatantakawori iroka paapatziyantyaariri maawaeni riraga Jesoshi rirotaki Rotyaantanewo Tajorentsire, riraga Itomi. Aririka paapatziyakyaari, aritaki rowañaakimi pikantyaani ijekakaayemi rirori.

21

Rapiitziri Riyotaanewo 7 iñakiri Jesoshi janta Karireeyaki

¹ Nokanta nopyieeyanaani naakapaeni ryotaanewo janta Karireeyaki. Roojatzi rapiitana roñaagapaana riraga Jesoshi, eejatzi paashinipaeni ryotaanewo. Noñeeyawaerini othaphyaakiini inkaareki Teweeryashiki. Iitziro eejatzi Inkaare Karireeya. Aritaki okantakari. ² Nopiyoteeyakani, naaka itomi apite Sewereeyo. Nokaateeyirini Peetero, eejatzi riraga Tomashi. Itsipatana Nataneeri, riraga karireeyajatzi poñaachari Kanaaki. Eejatzi eenitatsi apite paashini ryotaanewo Jesoshi. Nopiyotaka maawaeni. ³ Ikantana Peetero:

—Niyaate noshiryaate.

Nokanteeyanakirini:

—Eejatzi naari.

Ari niyaateeyanakini. Noteteeyapaakanai maawaeni pitotsiki. Noshiryaatawitaka, roojatzi nokitejitakotantaka. Tekatsi nayi.

⁴ Okitejitanaki ikatziyapaaka riraga Jesoshi othaphyaakiini. Tee niyoteeyawakirini.

⁵ Ikantapaakina:

—Notsipaminthari, ¿Paaki shima?

Nokantawakiri:

—Tekatsi.

⁶ Ikantakina:

—Apawo pishiryaate pakoperoki, aritaki paaki.

Ari noshiryaatanaki maawaeni. Naaki oshekiniroña shima, tee naawyaa-kotziri notetakoteri nopitoki. ⁷ Naaka nokantziri Peetero:

—Jaa, rirotakimakya Awinkatharite.

Ari ikithaatanakawo rirori iithaari. Ipiinkashitanakiri ramaatanaki othaphyaakiinira raatapaaka. ⁸ Nimpetaetakotape naakapaeni, nonoshikakotziri shima. Okaakitapae othaphyaakiini, aamaashitaka okaatz 100 meetero.

⁹ Nomitaanaki maawaeni omerikyaataki othaphyaakiiniki. Noñaapaaki paamari, itashitziri shima. Eenitatsi eejatzi paa. ¹⁰ Ikantawakina:

—Pamagaantakinari iroñaaka shima pishiryaatakirira.

¹¹ Rapiitziro rotetapaa Peetero pitotsikira inoshikaatakotapaakiri shima ishiryaa-tamentoki kipatsiki. Yeekiperotaki antaripaeni shima,

ikaatzi 153. Oshekiperoroña omaanta tee opejanaki noshiryaatamento.

¹²⁻¹³ Ikantawakina:

—Ajaa, poya.

Ikagaakinawo paa eejatzi ikagaakinari shima. Nowaeyakarini maawaeni. Nothaawantakarī nokanterimi: “¿Ninkamika”? Maawaeni niyotawakiri rirotaki Awinkatharite. ¹⁴ Ikamaki chapinki Jesoshi, ipiriintanaa. Rootaki roñaagaana eejatzi maawaeni riyotaanewo. Iroñaaka okaatzi 3 roñaagaana naakapaeni.

Riraga Jesoshi ikenkithatakaakiri Peetero

¹⁵ Nowaeyakaní maawaeni. Roojatzi rojampitaktari Jesoshi riraga Shimo, iitziri Peetero:

—Peetero, ¿panaakotakiri irikapaeni, pintashireperotana eeroka?

Ikantawakiri rirori:

—Eeroka, Nowinkatharite, yotatsiri nonintzimi.

Ikantanakiri:

—Piyoteeri riraga aapatzianari: tema ari roshiyakyaari nashi nowishaanite.

¹⁶ Rapiitakiri, ikantawakiri:

—¿Pinintashiretana?

Rapiitawakiri ikantawakiri:

—Jee, Nowinkatharite, eeroka yotatsiri nonintashiretzimirika.

Ikantziri:

—Pikempoyeenari maawaeni ameenteeeyakinari.

¹⁷ Rapiitziro rojampitziri, tres-tapaentsiri. Ikantziri:

—¿Pineshironkatanama?

Roojatzi rowashirewaetantanaka Peetero. Tema ro rowashiretantakari okaatzi 3 rojampitziri Jesoshi okimitaka chapinki riraga Peetero imanakotashitaka okaatzi 3. Ikantawakiri:

—Eerokanya, Nowinkatharite, yotzirorikya maawaenikya. Piyotana eeroka nonintashiriimirkia eechonkiini.

Ikantziri:

—Pikempoyeeri kameetharini maawaeni aapatzianari. Tema roshiyawitaari nowishate. Piyotakoperotakina. ¹⁸ Kyaaryootaki iroka nokantemiri: paerani, eeniro pewankariwaetzini, pikithaatapiintawoni piithaari. Piyaatapiintayitzini tsikarika pikoyiri piyaate: tekatsi atziri kantemini: “Eero piyaatzi”. Omaanta aririka pantyashipariperotapaaki, pakote pakoki, roojoteetemi, ikithaatemi paashinipaeni. Raanakimi janta tsikarika tee pikowawita piyaate.

¹⁹ Aritaki ikantakiri. Riyotaakiri tsika ikantyaari rowamagaetantyaariri Peetero iinja. Aririka iñeeteri ikamaki, riyotanaki maawaenī iñaaperotakiri Tajorentsi ikameethatzhi. Roojatzi ikanantanakyaari:

—Thame, poyaatanakina.

²⁰ Ipitohkanaka Peetero. Iñaakina noyaatanakiri, rooma naaka riyotaanewo Jesoshi inintaperotziri. Chapinki nowakagaeyantakaririni Jesoshi, naaka ojampitakiriri: “Nowinkatharite, ¿ninka aakaanteminika?”

²¹ Iñaantakinari Peetero, rookotana, eejatzi ikantziri Jesoshi:

—Nowinkatharite, ¿tsika ikanteeterika iinja riraganki?

²² Ikantawakiri:

—Nokoyirika ijeekanakiita jaka roojatzi nopyanteeyaari, eero pikenkithashiryakotari. Omaanta eeroka poyaatenaata.

²³ Rowagaeyakinirini maawaeni paashinipaeni aapatziyariri Jesoshi okaatzi ikantziriri irira. Itashiwitaka irira eero nökami. Omaanta

tee ikantzi Jesoshi: "Eero ikami Jowa". Inta ikantawitari: "Nokoyirika ijekanakiita jaka roojatzi nopyantakyaari, eero pikenkithashiryaakotari".

²⁴ Naakapero riyotaanewo riraga Jesoshi, jankinatzirori iroka. Noñiiro maawaeni. Niyoteeyakini kyaaryooperotaki maawaeni iroka nojankinatakiri. ²⁵ Teera nothotziiro nojankinatziro maawaeni rantayitakirini Jesoshi. Arimi ojankinatayitakotyaami maawaeni, rantayitakirini, naamaashitya ari iyekitakiromi maawaeni kipatsi iñaanamentopaeni.

Ari okaatti.

Naaka jankinatzirori:

Jowa

RANTAYITAKIRINI ROTYAANTANEWO JESOSHI

Rookashi rapiiteeniri rojankinatakiniri Teyoojiro

¹ Nokoyi niwethatemi, nonintanewo Teyoojiro. ¿Tekatsima oyemini? Naaka kameetha. Paerani nitantakawori nojankinatantakimirori, niyotaantakimirori osheki rantayitzirini Jesoshi. Eejatzi niyotaantakimirori osheki riyotaantayitzirini. ²⁻³ Ari iñaashitzimaetakawo ikamakira, ari rañaagae, roojatzi roñaagantapaakariri riyotaanewopaeni. Osheki iñaakotapiinteyirini rantapaaakiri riori, rootaki riyoperotantariri rañaagae. Okaatzi 40 kitejiri roñaagapiinantariri. Ikenkithatakotziri tsikarika ikanta Tajorentsi reewawenantzzi. Rotyaantanakiri riyotaanewopaeni riyooteeri paashini atziri oetarika ikowakaakiriri ranteri. Ro kantziriri Ishire Tajorentsi. Roojatzi riraga Tajorentsi raaneeri Itomi jenokinta, roojatzi noweyaantakawori nokenkithatakotakirri paerani. Iroñaaka eekiro niyaatatzi nowaayemiro nokantemi rantzirri riraga rotyaantanewopaeni Jesoshi, riraga otyaantanakiriri paerani.

⁴ Apaani kitejiri, tekira riyaatee jenokinta, ikaatakagaeyakirini Jesoshi eejatzi riyotaanewopaeni ikantaperotakiri riraga Jesoshi:

—Eero pookanakiro Jerojareeki, nokowaki poyaawakiroota ikashiyakaakimiro Ashitanari, rowaga pikemakinari chapinki nokantzitakimiriroña. ⁵ Riraga Jowani ikaawoshitakotzimiri Tajorentsi iñaaki, riyotantakari atziri paapatziyari Tajorentsi. Omaanta eero ojamanitzi opokashitemi Ishire Tajorentsi, okithaatakaapaakimi, riyotantyaari atziri kyaaryo pikemijantaperotakina naari.

Roenokantanakari Jesoshi jenokinta

⁶ Paashini kitejiri ipiyotawenteeyakarini Jesoshi riyotaanewopaeni eejatzi paashinipaeni aapatziyariri janta tonkaariki owaero Oriiwomashi. Rojampiteeyirini. Ikantziri apaani:

—Nowinkatharite, aaka isheninkani riraga achariniiteni Ishireeyeerini. Paerani ijeekawitani jewawenantsiripaeni achariniitenipaeni; omaanta iroñaakaroña tekatsi. ¿Arima iroñaaka pikanteri paashini reewawenteeyenani? Osheki nokowaki.

⁷ Ikantawakiri:

—Tee ikowakayimi Ashitanari piyotero tsikarika okaate. Ojamanitatzirika rooma tsikarika okaate. Apatziro Ashitanarikya apaniroeni kantatsini. ⁸ Iinja itajonkawenteeyeminiita eejatzi opokashiteeyemini Ishire. Omatakayemi, rootaki nokowakaakimiri pikenkithatakotena jaga Jerojareeki, eejatzi pithotyaanakiro Joreeyaki pikenkithatakotena. Eejatzi pikenkithatakotena janta Jamaaryaki, eejatzi pithotyaanakiro maawaeni paashinipaenikinta kipatsikinta, pikenkithatakotena. Tsikarika piyaate nokowaki pikenkithatakotena.

⁹ Rootaki ikantanakiriri Jesoshi. Ari ramineeyawakirini maawaeni, roojatzi roenokantana jenoki, ipeymotanakari menkoriki. ¹⁰ Ari ramineeyanakirini jenoki joreririri, jatanaki. Ari romapokapaakiri apite ronampiri Tajorentsi, ikatziyimoeyapaakarini. Ikimitapaakari shirampari; kitamaamawori imaatha. ¹¹ Ikantapaakiri:

—¿Eeniromi, karireeyajatzi? ¿Litaka eekiro paminanta jenoki? Piñaawakiri riraga Jesoshi roenokanaka jenokinta. Eejatzi ipiye paata. Aririka ipiye, ikimitapaeya iroñaaka riyaatantanaari.

¹² Roojatzi roerinkantanaa taapiki, ipiyeyanaani Jerojareeki riraga rotyaanawo Jesoshi kimitaka apaani kiroometero. Okaakini Jerojaree, tee inteenaperotzi.

¹³ Ari rareeteeyapaakani, rateeteeyapaakini oshitamenkota jenoki. Janta imaaipiinteeeyininta riraga Peetero, eejatzi Jowa, Jantyaako, Antereeshi, Jiripi, Tomashi, Waritoromee, Mateeyo, Jantyaako (riraga itomi Arijeeyo), Shimo (riraga kathaaperotzinkari antayitzirorini oetarikapaeni), eejatzi Joorashi (riraga itomi paashini Jantyaako), imaaipiinteeeyini maawaeni. ¹⁴ Ari rapiitapiinteeeyironi ipiyoteeyani eejatzi ikenkithatakagaeyirini Tajorents. Itsipateeyarini rirentzi paeni Jesoshi, eejatzi riniro rowaga Mariiya, eejatzi paashinipaeni tsinani. Aritaki ikantani ikenkithatakapiinteeeyirini Tajorents.

Riyoayitantakaririni Mateeyashi poyaatariri Joorashini

¹⁵ Ari paashini kitejiri ikatziyanaka riraga Peetero ikatziyimoteeyanakarini iyemijantzinkaritepaeni. Aamashitya ikaateeyini 120.

¹⁶ Ikantzi:

—Nojoriiyotzinkaritepaeni, okameethatzi amonkaatero okantzirini Iwaperite Tajorents. Paerani iyoteerini Ishire Tajorents Iraviiirini ikenkithatakotantaririni Joorashini: riraga jewateeyakiririni agaeyakiririni Jesoshi. ¹⁷ Aritaki akaateeyawitariniroña. Paerani itsipateeyawiteeni rantawaetaakaawitakina. ¹⁸ Omaanta raakaantashitaari Awinkatharite, ipinatashiteetawitakari koriki. Raawitakari, roojatzi roepiyeeniri, rirotaki koriki ramananteetakawori kipatsi. Roojatzi irira ishirikantanaka, shirik; ithatanaka. Roojatzi ithatyakotantanaka, thatzik; ipityaankanaka; roojatzi ikotaantapaaka imotziki, waag, iyowapaaki isheeto. ¹⁹ Riyoteeyakiririni maawaeni jerojareejatzi. Rootaki itanteetawori kipatsi ramananteetziri Asheererama. Akantziro apaanteki aaka: "Iwinawoni Jesoshi rowamaanteetawitakariri". ²⁰ Aritaki paerani rojankinateetzironi mampaantsi kantatsiri: "Okaankipokotanaki ipankoni aakaanterini Awinkatharite, tekatsi jeekantzityaarin". Eejatzi okantzini mampaantsi: "Okameethatzi eeniro poyaatyaaarini kenkithatakaaantatsini". ²¹⁻²² Iroñaaka thame akanteri paashini: "Pipoyaatyaa Joorashini": tema rootaki ikowakaakaeri Tajorents. Rirotaki akanteri tsipatapiinteeyeerini paerani: ñaaperotziriri Jowani ikaawoshitantzini, eejatzi ñaapiintziriri Jesoshi. Akowaki ñaakiriri rañaagae eejatzi ryaataanee jenokinta: akanteri ikaateeyeeni akenkithatakaoeyerini Jesoshi. ¿Ninka akanterika iroñaaka ipoyaatyaa? ²³ Ari ikantzi paashini:

—Rirorika irika Josee Warajawaashi, iiteetziri eejatzi Jooshito. Teerika irira, rirorika irika Mateeyashika. Ari ikaemiri apite:

—Pipokanaki jaka niyanki. ²⁴⁻²⁵ Roojatzi ikenkithatakera Tajorents, ikantziri:

—Nowinkatharite, eerokakya iyotzirori tsika ikanteeyarini maawaeni atziri rajankaneki. Eeniro irika apite. Piyotakayenari ninkarika pikowakayaari eeroka poyaatyaaarini Joorashini. Tekatsi ikanta iroñaaka rirori ikenkithatee eejatzi ranantee: tema kamaki rirori, jataki janta paamariki kaari tsiwakanitatsini.

²⁶ Roojatzi iñaathawaetaka, tema riyoyaakiri Mateeyashi. Ari ikaatawitani chapinki rotyaanawo Jesoshi 11. Iroñaaka ikaateeyeeni eejatzi 12.

¹ Ari iroñaka omonkaatapaaka kitejiri iiteetziro: "Pentekoshiteshi". Ari ipiyoteeyakani Jerojareeki maawaeni aapatziyariri Jesoshi.

² Omakashitapaakari, ikemawakiro oshiyaaawitawori antawo tampyaa, opoematapaaki, moo. Opoñaanaka jenokinta, othotaapaakiro pankotsi ijekaeyantarini. ³ Eejatzi okoñaatzimotashitapaakari oshiyaaawitakawori paamari, otsiparyagaeyapaakani ojeekanteeyapaakarini iitokipaeni maawaeni jeekaentsiri. ⁴ Okithaatkagaeyapaakarini Ishire Tajorentsi. Roojatzi iñaawaetantanakawo inashitachari paantentsipaeni tekatsi iyoteerini, imateeyakironi rowaga oñaawaetaapaakiri Ishire Tajorentsi.

⁵ Ari ijeki janta Jerojareeki joriiyopaeni, aapatziyaperotawori rojankinarini Moeseshi, ipoñaayitanakanai paashinipaeni kipatsiki, tsikarika.

⁶ Ikemanteyawakaririni iñaawaeteeyanakirini, rootaki ipiyotawentapaakari osheki atziri. Ikemaeyapaakironi ipaantepero. Tee riyotakotapaeri. ⁷ Rotsikanatakari, ikenkithashireeyapaakani rojampitawakagaeyapaakani:

—Tema maawaeni riraga ñawaetaentsirika rirotaki karireeyajatzi.

⁸ ¿Tsika akantaka akemanteyanakaworini maawaeni apaantepero paen?

⁹ Iroñaka akaateeyakirini paaratyajatzi, meryaajatzi, eraamajatzi. Eejatzi eenitatisi jeekatsiri Mesopotaamiyaki, Joreeyaki, Kaparooshiyaki, Poontoki, Aashiyaki, ¹⁰ Jirijiyyaki, Pampiriyaki, Ejijipitoki. Eejatzi akaateeyakirini poñaayiteencharini okaakintapae Shireeneki, janta kipatsiki owaero Riiwaya. Eejatzi eenitatisi areetantachari poñaayitachari Oroomaki joriiyopaeni eejatzi peyeenchari joriiyo. ¹¹ Akaateeyakini joriiyoperotatsiri eejatzi peyaachari joriiyo. Akaateeyirini kireeshiyajatzi eejatzi araawyajatzi. Akemaperoeyakironi ashi apaantepero omawitya inashita atziri rashia ipaantepaeni ikemayitzironi. ¹² Ari rotsikanateeyanakarini oshekantzi atziri, tee riyotakotziri. Rojampitawakagaeyananakanai:

—¿Tsika akantaka akemantawori apaantepero?

¹³ Omaanta paashinipaeni, ishirontawenteeyanakarini, ikantzi:

—Ishinkiteeyakani irinta, injii, injii.

¹⁴ Ari eeniro janta riraga Peetero, ikaateeyirini paashinipaeni rotyaan-tanewo Jesoshi. Itacheronkawaantetanaki ikantanakiri:

—Nojoriyyotzinkaritepaeni, maawaeni eeroka jeekatsiripaeni jaka Jerojareeki, piyoteeyawakironi iroka nokantemiri, pikemijanteeyawakinani. ¹⁵ Piitashiteeyawitakarini ishinkiteeyakani irikapaeni. Omaanta tee ishinkiteeyani. Jaka aepatsiteki tema ishinkitapiinteeyani atziri tsiteniriki, omaanta kitejiriki eero ishinkita. Tema iroñaka tekira ijenokitapaaki oorya. Tekira omonkaata ishinkitapiinteeta, ¹⁶ omaanta iroka pikemakiri ikantakotziri kamanantzirorini iñaani Tajorentsiperi iitachari Joeri paerani, tema rojankinatzitakawoni oetarika ikantziri Tajorentsi. ¹⁷ Ikantzi Tajorentsi: "Inja inñeero maawaeni atziri notyaanteniri Noshire. Okamantakaayiterini noñaani pitomipaeni, pishintopaeni. Riraga ewankaripaeni niyotakaeri oetarikapaeni rajankaneki. Eejatzi Ishire Tajorentsi oñaagayitakirini antyashiparipaeni oetarikapaeni, kimiwitaka imishiwaetatzti. ¹⁸ Eejatzi maawaeni aapatzienan shiramparipaeni, tsinanipaeni, notyaanteniri Noshire, ikenkithatakotantenari. ¹⁹ Ari nomatero iinja kaari piñaapiintzi jenoki eejatzi jaka kipatsikika: potsikanatanakyaawo. Aritaki piñeeyeroni iinja riraani oshekini kamaentsiri, eejatzi piñaawakiro otagaeyanakyaani pankotsipaeni: oshekiperi okachaaperotanaki. ²⁰ Nityaawo noetsiwakanakirii oorya; eejatzi riraga kashiri, ikityonkatanaki, roshianakyaawo iraantsi. Roojatzi omonkaatapaaky kitejiri rareetantapaakyari

Piwinkatharite reewatawenteri maawaeni atziri. Osheki imatapaakiro, ikantakoeyantyaaririni irira. ²¹ Omaanta rowawijaakoeyirini maawaeni atziri ikantzi: 'Nowinkatharite, powawijaakotena'”.

Rootaki rojankinatzirini Joeri.

²² Eekiro ikantzi Peetero:

—Nojoriyyotzinkarite, pikemijantawakiro iroka nokantemiri, nokenkithatakoteri Jesoshi, riraga najareetejatzzi. Itajonkantayitzini, imatayitakirini kaari añaapiintzi. Eejatzzi imatayitakironi oetarikapaeni, ayotantariri itajorentsiperotaki. Tema piñaapiinteeyakirini eerori, piyotakiriroña. Tema rirotaki Tajorentsi matakaakiriri. ²³ Paerani aritaki rirotakotzitarini irira, ikantztani: "Aritaki okantyaari, ipimanteeteri riraga Jesoshi". Rerotaki atziri kaari kameethatatsi owamaakiriri, omaanta erokapaeni pikentakotakaanteeyakirini, powamaakaanteeyakirini.

²⁴ Ari osheki ikemaatsitayitakawoni, ikamaperowitaka. Omaanta rowañaagaeri eejatzzi Tajorentsi, tee ikowakayiri eekiro ikamaperotaty.

²⁵ Tema rojankinatzitakawoni paeraniperoroña Iraviiri iñaani Jesoshi:

"Niyotaki kijokiro rowakina Ashitanari, ijeekaki nakoperoki ramitakotapi-intakina, kaari nothaawantya. ²⁶⁻²⁷ Osheki nokimoshirewentakiri, rootaki nakanantariri: 'Pawa, osheki niweshiryaaaka. Niyotaki eero pookana janta jaawikinta. Eejatzzi eero pishinetana nopathayi paata, tema piñaaperotana nokameethatzi. Niyotaki pimatakaakinawo iroka pikantakinari. ²⁸ Piyotakaakinawo nokantyaani nañaaperotanaki, kijokiro owawakaeya, nokantyaani niweshiryaaawentanakimi'".

Rootaki iñaani Jesoshi rojankinatzirini Iraviiri.

²⁹ Eekiro rowaaganakitziiro Peetero:

—Iroñaaka, nojoriyyotzinkarite, piyotaperotziro nokamantaperotemi ika-maki achariniiteni riraga Iraviirini, ikitataka. Eenitatsira iroñaaka ikitatakanta. ³⁰ Kamanantzirori rinawitani. Riyotaperotzironi ikantaperotzirori Tajorentsi: "Kyaaryootaki iroka nokamantaperotemiri, eero namatawitzimi. Inja reewawenante pijoariyyotzinkariperote, poyaatemini". ³¹ Ñaakiro, tekiranu ipiriintaani Rotyaantanewo Tajorentsi, omaanta rirotakotzitakarini Iraviri. Tema rojankinatzitakan: "Ikante Rotyaantanewo Tajorentsi: 'Pawa, niyotaki eero pookana janta jaawiki, eejatzzi eero pishinetana nopathayhe'".

³² Rerotaki Jesoshi piriinteeriri Tajorentsi. Aritaki noñeyakirini naari, iroñaaka nokamantaperotakimiro. ³³ Aritaki raawaeri janta rakoperoki, ikaatantapaakariri reewawenantzi. Eejatzzi okithaataakaakari Jesoshi Ishire Tajorentsi, rowaga ikashiyakaakiriri Iriri. Iroñaakakya, rotyaanteeyakina-wonni naari jaka: rootaki piñaanteeyakinarini eejatzzi pikemaeyantakinari. ³⁴⁻³⁵ Pamine, tee riro kenkithatakotachani riraga Iraviiri paerani, inta ikenkithatakotziri Rotyaantanewo Tajorentsi. Tee roenokaeya irira Iraviiri jenokinta inta riraga Rotyaantanewo Tajorentsi. Tema rojankinatzitani rirori paerani: "Irira Pawa Tajorentsi rirotaki kantziriri Awinkatharite riraga Rotyaantanewo Tajorentsi: 'Pijeekapae jaka nakoperoki, pikaatenia ewawenante roojatzi iñaaperoeyantemirini paata maawaeni kijeeyawitzimirini'".

³⁶ Eekiro ikamantanakiri Peetero:

—Tema aakateeyakini icharineeteni Ishireeyeerini. Kameetha riyo-peroyeroni maawaeni ajoriiyyotzinkarite iroka nokantakimiri: pikentakotakaantawitakari Jesoshi, omaanta ipiriinteeri Tajorentsi, kyaaryo ipeyawaeri eejatzzi Jewawenantatsiri, eejatzzi Rotyaantanewo, kimitaka ikashiyakaakiriri achariniiteni paerani.

³⁷ Ikemanteeyawakaworini iroka, osheki ikenkithashiryaaperor-oeyanakan. Riyotakoperotanaka kyaaryo rantziro kaari kameethatatsi. Rojampiteeyirini Peetero eejatzi paashinipaeni rotyaantanewo:

—Nojoriyotzinkarite, etsika nokanteeyaanika aritakima ikaminthagaena Tajorentsi?

³⁸ Rakanakiri:

—Pikenkithashiryaaagaeyakya, eero pikimitaaga paerani. Kameetha paapatziyari Jesokirishito eejatzi pikaawoshitakowentyaari Tajorentsi riyatantyaari atziri paapatziyari Jesoshi. Rootaki ikaminthaaanteeyemirini Tajorentsi, eero rapilteemiro ikenkithashiryaaotzimiroroña eejatzi kaari kameethatatsi panteeyawitakarini. Rootaki okithaatakaantakimiri Ishire rotyaantzimiri. ³⁹ Rootaki ikashiyakagaeyakimiri eerori; eejatzi ikashiyakagaeyakirini rirori pisheninkatanakyaarini inja, eejatzi maawaeni atziri jeekayitatsirini paashinipaeni kipatsiki. Rootaki ikashiyakagaeyakaerini maawaeni; rootaki ikowakagaeyakaeri Awinkatharite, aririka aapatziyeeyaarini.

⁴⁰ Osheki paashini ikamantaperoeyiririni, ikowaki raapatziyakaaper-otyaari. Eejatzi iroka ikantakiriri:

—Pookero kaari kameethatatsiri pantziri ari rowawijaakoteemi Tajorentsi. Rootaki eero rowashironkaantzimi paata.

⁴¹ Ari ikemaperotakiro oetarika ikantakiri riraga Peetero, raapatziyawakawo ari ikaawoshitawentakari Tajorentsi, aamashitya ikaateeyakini 3.000. ⁴² Ikantatyeyaaani ikemijantaperoeyirini iroka riyotagaeyiririni. Ikantatyeyaaani kameetha ikimitawaka-gaeyakani: itsipatawakagaeyakani rakiyotawakaeyani owanawontsi, ikenkithashireeyantakaririni riraga kamawenteeyakiririni, eejatzi ramanapiinteyirini Tajorentsi.

Ijeeki kameetha riraga aapatziyariri Jesoshi

⁴³ Riraga rotyaantanewo Jesoshi rantapiintakiniri atziripaeni kaari ñaapiinteyirorini eejatzi imatayitakironi oetarika riyatantanakariri kyaaryo itsipatari Tajorentsi. Osheki rotsikanatanakari maawaeni atziri, ikantzi:

—Imatakaakiri Tajorentsi aapatziyariri Jesoshi. ⁴⁴ Ari ikim-itawakaeyakani irirapaeni. Tee ithaawakaeyawoni oetarikapaeni, omaanta ipawakaapiinta tzimimotayitziririni, oetarikapaeni. ⁴⁵ Ipimanteyironi rowaagawo eejatzi ipatsite. Ipaginaanteeyakirini iyorikite maawaeni aapatziyariri Jesoshi koetyeemotziriri. ⁴⁶ Maawaeni kitejiri ryaatapiinteyini janta Tajorentsipankoki. Eejatzi rakiyotawakaeyakani owanawontsi ipankopipaeni rirori, ikenkithashiryaaantariri kamawenteeyakaerini. Aririka rowaeyani, ikimoshireperoeyini, eejatzi kameetha ipashitawakaeyakani. ⁴⁷ Ikanteeeyini:

—Kameetharini Tajorentsi.

Eejatzi riraga maawaeni jeekatsiripaeni ineeeyakirini rirori ikameethatzi. Ikantatyeyaaani maawaeni kitejiri raapatziyaperotanakyaari paashini-paeni atziri, roshekitaaperoeyakirini Awinkatharite.

3

Ikenkithatakaantzi Peetero janta Tajorentsipankoki

¹ Paashini kitejiri, shaawiyyaaki oorya, itonkaanaki Peetero eejatzi Jowa janta Tajorentsipankoki oetotziikinta tonkaari. Maawaeni kitejiri shaawiyyaaki oorya ryaatapiintzi joriyopaeni janta ramanantapiintariri Tajorentsi. ² Eeniro ijeekaki janta apaani shirampari kijopookitatsiri. Aritaki ikantzitapaaka paerani owakira ikoñaatapaaki. Ari maawaeni kitejiri

ramaetapiintziri omooki Tajorentsipanko iiheetziro: "Kameethari omoo". Aritaki rowaetapiintziri omooki inethaanntyaarir iyorikite kyaayitatsirini.

³ Riraga Peetero eejatzi Jowa roowiteencha ikyeeyapaenimi Tajorentsipankoki, omaanta iñaawakiri rirori ikantawitawakari:

—Pikaminthayena, nojoriiyotzinkarite, pipena koriki.

⁴ Ari ramineeyapaakirini Jowa, Peetero, ikantziri:

—Paminenatya.

⁵ Raminaperotawitawakari, iitashiwitaka ari ipakirimi oetarika.

⁶ Omaanta ikantanakiri:

—Tekatsi noorikite, omaanta nokowaki nokaminthayemi. Nokanteri Jesokirishito, riraga najareetejatz ikatziyatziyatagaemi rirori. Iroñaaka pipiriinte, pikatziyatziyawaete.

⁷ Roerikakiri rakoperoki, ikatziyakiri. Intsipaete retsiyatakote, ishinstitanaki iitziki. ⁸ Ishintsitzi ikatziyanaka, sherok. Ikatziyaperotanaka, ikatziyatziyawaetanaka. Itsipatanakari, ikyaanaki Tajorentsipankoki. Ijapojapotanaka, ikantanaki:

—Kameetharini Tajorentsi. ⁹ Iñaeyawakirini maawaeni atziri: ranaashitanaka. Ikemaeyawakirini ikantanaki:

—Kameetharini Tajorentsi. ¹⁰ Ari riyoteeyawakirini, rirotaki irika jeekawitacharini omooki, nethapiinantawitachari koriki. Iñaeyakirini retsiyatakote, rootaki rotsikanatantanakari. Tee riyotakotziri.

¹¹ Ari roerikaperotanakiri Peetero eejatzi Jowa. Eenirop ikatziya janta ipiyotapiinteyantaririra: ro ikaapanomatakanziro iiheetziro rashii Sharamoo, rirotaki wetsikakaantzirori paerani. Roojatzi ishiyashitantapaakari maawaeni atziri, rotsikanatapaakari. ¹² Iñaawakiri Peefero, ikantawakiri ijoriyyotzinkaritepaeni:

—¿litarikya potsikanatantanari? ¿litaka paminanteeyanarin, joreririri? Eero piitashitana naaka Tajorentsi nanashitakaantaariri irika kijopookiwitachari. Eero eejatzi piitashitana naapatziyaperotakari nomatantaaariri.

¹³⁻¹⁴ Irira Tajorentsi rirotaki etsiyatakoteeriri. Paerani raapatziyapaakari Awaraama, Ijaaka, Jakoowo, eejatzi maawaeni achariniiteni.

Okameethazzi pikimitagaayarini rirori paapatziyeyarini Tajorentsi. Rirotaki ñaaperotaperotziriri Jesoshi ikantzi: "Ñaakiro, ikameethaperotzi Notyomi, rantakinawo maawaeni nokowakaakiriri". Kyaaryo osheki ikameethaperotzi Jesoshi. Rirotaki paakaantakiri. Ro ipankagaerimi Peraato, aritaki pikantakowentakiri: "Tee nokoyi pipankaeri", omaanta pikowakiri ipankaeri owamaantatsiri. Kyaaryo ikamawenteeyerini maawaeni atziri.

¹⁵ Powamaakaantakiri owañaagaeyiririni atziri. Ikamawitapaenta, roojatzi ipiriinantaari Tajorentsi. Noñeyeerini rootaki nokantzimiri. ¹⁶ Eenirop irika shirampari: ikemakotantawakariri Jesoshi, raapatziyaperotakari kameetha, rootaki retsiyatakanteeri. Iraka iroñaaka piñaakiri. Tema piyoteeyirini. Ari raapatziyaperotakari Jesoshi, rootaki itekatsitantaari. Piñaakiri iroñaaka ranashitanaka.

¹⁷ Eejatzi ikanteeyirin Peetero:

—Ari nojoriiyotzinkaritepaeni, iroñaaka niyotaki tee piyotawitarini Jesoshi rirotaki Rotyaantanewo Tajorentsi. Eejatzi riraga jewatatsiripaeni tee riyoteeyawitarini rootaki pikentakotakaanteyantakaririni rirori.

¹⁸ Omaanta irira Tajorentsi ishinetakimi panantakawori maawaeni iroka, pimonkaatantakawori maawaeni rojankinatakaakiri kamanantayitzirorini iñaani paeraniperoroña. Tema maawaeni rojankinatakotzitarini Rotyaantanewo Tajorentsi otzimatyte ikemaatsityaawo.

¹⁹ Pikenkithashireeyanakyaani, eero pikimita paerani,

inta paapatziyeyarinini Jesoshi; roojatzi ikaminthayemi Tajorents; tema rowameethateeyimini, eero ikenkithashiryaakoteemiro ejatzi kaari kameethatatsi pantayitawitarini. Ejatzi itsipateeyantemirini Awinkatharite, riweshiryaakagaeyemini. ²⁰ Ejatzi iinja rotyaantemiri ejatzi Jesoshi, riraga Rotyaantanewo. Tema paeraniperoroña riyoyaakiri rotyaanteri rowawijaakoteri atziripaeni. ²¹ Omaanta iroñaaaka ijekapae janta jenokinta, ikantyaani roojatzi riraga Tajorents rowameethatantayitapaakyaworini maawaeni, oetarikapaeni. Tema rootaki ikantziriniri paeraniperoroña riraga kamanantayitzirorini iñaani Tajorents, riraga rowameethateeyirini rirori: rirotaki ñaawaetakagaeyiririni maawaeni. ²² Ikantzini Moeseeshi: "Riraga Pawa Tajorents rotyaantemiri paashini kamanantzirorini iñaani Tajorents, ikimitena naari rotyaantakina. Rirotaki joriyo ikimitakae aaka. Oetarikapaeni ikamantemiri, paapatziyawakaari. ²³ Omaanta maawaeni kaari aapatziyarinii rirori, ithonkaeyerini Tajorents, eero rapiiteero itsipatari ijoriyyotzinkaritepaeni".

²⁴ Ejatzi rojankinatakotzitawoni paerani Samoeri ejatzi maawaeni kamanantayitzirorini iñaani Tajorents iroka piñaayitakirini iroñaaaka. ²⁵ Aritaki ipokapaaki riraga Rotyaantanewo Tajorents ikashiyakaari rotyaanteeri. Tema ikashiyakaanantakaririni kamanantayitzirorini iñaani Tajorents ejatzi paejatziiteni riraga Awaraama, Ijaaka ejatzi Jakoowo. ²⁶ Rotyaantakiri Tajorents aakaki, reewateeyakaeni riyotagaeyakaeroni. Eeniro panteeyironi kaari kameethatatsi, omaanta ipokashiteeyakimini rowawijaakoeyemini eero pashironkanta; ikowaki riweshiryaakagaeyemini. Rootaki kyaaryo pikenshishiryaanteeyanakyaarini, eero pikimitaga paerani.

4

Riraga yotaawakaencharipaeni ipiyotashitakari Peetero ejatzi Jowa

¹ Eeniro ikenkithatzi Peetero ejatzi Jowa, ikenkithatakayiri atziripaeni. Ari ipokapaaki ñaanakowenantatsiripaeni, ejatzi jewatatsi waairiryapaeni ashi Tajorentsipanko ejatzi saroseeyopaeni. ² Ikijashireeyananakan, ikantawakaanaka:

—¿Oetakama riyotaantariri atziri? Iroka ikamantakiriri: "Ipiriintanee kamatsiripaeni: 'tema piriintanaa Jesoshi'. Tee okameethatzi iroka riyotaanteeyirini.

³ Itsitenitzimatantanaka oorya, ragaeyanakirini, omaanta eeniro jankinarentsi rashii rirori joriyyopaei othañantsita rojampitantyaariri atziri tsiteniriki, rootaki raantanakariri romonkyaagaeyapaakirini omonkyagaagamentotsiki, roojatzi ikitejitakoejakini. ⁴ Omaanta raapatziyaperotawakawo osheki kemaeyawakiririni Peetero, aamashitya ikaateeyakini 5.000 shirampari, aapatziyakariri Jesoshi; ejatzi okaateeyakini roori tsinanipaeni ejatzi eentsipaeni.

⁵ Inkaamani ipiyoteeyani ejatzi janta Jerojareeki jewatatsiripaeni, aataperoteenchari, iyotaantzirori Iwaperite Tajorents. ⁶ Ikaateeyirini Aanashi, riraga iwinkatharite ñaanakowenantatsiripaeni. Ejatzi itsipatari Kaejashi, paashini Jowa, Arejaantero, ejatzi maawaeni isheninka iwinkatharite ñaanakowenantatsiripaeni. ⁷ Ari ikaemakaantakiri Peetero, Jowa ejatzi riraga kijopookiwitachari rojatekakiri niyanki, rojampiteeyakirini:

—¿Ninka matakaakimirori petsiyatakotantariri irika shirampari? ¿Ninka kantakimir? ⁸ Ari iyotaakiri Ishire Tajorents Peetero, omatakaaperotakiri. Ikenkithatakagaeyakirini piyatawenteeyaririni ikantzi:

—Jewatatsiripaeni eejatzi aataperoteencharipaeni. ⁹⁻¹⁰ ¿Pininaneentakina nantakirowa kameethatatsiri? Pojampitakina tsika nokantaka netsiyatakotakaantariri irika kijopookiwitachari. Nokowaki eerokapaeni eejatzi maawaeni atziri piyotawakiro. Rirotaki Jesokirishito riraga najareetejatzi etsiyatakoteeriri. Pikentakotakaantawitakari, omaanta ipiriinteeri Pawa Tajorentsi. Jee, imatakaakina Jesoshi netsiyatakotantariri irika iroñaaka katziyeencharika jaka etsiyatakoperotee. ¹¹ Rirotaki Jesoshi oshiyakaawentachari mapitatsiri pitheenkakiri eerokapaeni wetsikawitawori pankotsi, omaanta iroñaaka ipeyakiro rooperotatsiri mapi pankotsi. Ikimiwita iroka Tajorentsi ipeyakiri Jesoshi riropertatsiri. Eerokateeyakini oshiyakariri wetsikawitawori: pitheenkakiri Jesoshi. ¹² Omaanta tekatsi paashini owawijaakotantsini. Tee ijeeki jaka kipatsikika paashini owawijaakoteeni. Apaniroeni Jesoshi imatziro rowawaakotaa:

¹³ Ikemantawori iroka rotsikanateeyanakarini riraga jewatatsiripaeni. Ari imaeitanaki ikenkithashiryaaakotanakari, iñaakirira tee ithaayi. Roojatzi ikantawakaaka:

—Ñaakiro, tee ithaawanteeyarini riroripaeni. ¿litaka kaari ithaawanta? Eejatzi tee ithotyaaperotziro Iwaperite Tajorentsi, tee niyotayiri naakapaeni, omaanta osheki Riyotzi apaniroeni. ¿Tsika ikantaka Riyotantakari? ¿Arima imatakiro Jesoshi, riraga kijokiro rowawitakari Riyotagaeyirini? ¹⁴ Ari ineeayakirini itsipatakari riraga retsiyatatakoteeri. Tekatsi ikantya ikantakoteri.

¹⁵ Ari rotyaantanakiri:

—Piyowakite janta.

Ari ryowanaki. Roojatzi ikantawakagaeyanakanri rirori jewatatsiripaeni:

¹⁶ ¿Tsika akanterika irintapaeni? Riyotanakiri maawaeni jerojareejatzitajonkantakiri riraga kijopookiwitachari. Tekatsi akante: “Tee imatziro”.

¹⁷ Omaanta tee okameethatzi ikenkithatakagaeyanakirini atziripaeni. Thame akantaperoteriita: “Eerotya iroñaaka pikenkithatakotziri riraga Jesoshi. Aririka papiitero pikenkithatakoteri aritaki nowashironkaakimi”.

¹⁸ Ari rapiiteeri, ikaemaeri. Ikantaperotzi:

—Eerotya iroñaaka pikenkithatakotziri Jesoshi. Aririka papiitero pikenkithatakoteri, aritaki nowashironkaakimi.

¹⁹ Rakanakiri:

—Tema inee Tajorentsi maawaeni aari. Pikantaperotenaty: ¿Kameethama nothotyeero naapatziyemi okaatzi pikantakinari? Tema irira Tajorentsi naapatziyari. ²⁰ Tekatsi nokantya iroñaaka nookaero nokenkithatakotziro iroka noñaaperotakiri, eejatzi iroka nokemaperotakiri.

²¹⁻²² Ari rapiitakiri eejatzi ikantaperowitakari, roojatzi rotyaanantaari. Tekatsi rante rowashironkaantyaariri. Paerani imonkaatakiro 40 rojarentsite kijopookiwitachari. Ari osheki ikenkithashireeyakironi atziri retsiyatatakotziri Jesoshi, ryoteeyantakarini itajorentsitaki. Infeeyakironi atziri iroka imatakaakiri, ikantapiinteeyanakini: “Kameetharini Tajorentsi, osheki imatakagaeyakirini aapatziyakariri Jesoshi”, rootaki kaari rowashironkaantari.

Ramanakiri Tajorentsi riraga aapatziyariri Jesoshi

²³ Ari roeyowaeyanakirini jewatatsiripaeni, roojatzi riyaateeyanakini Peetero eejatzi Jowa aapatziyeyakaririni Jesoshi. Íkamantapaakiri iroka ikantawitakariri riraga jewatatsiripaeni ñaanakowenantatsiri eejatzi aataperoteenchari. ²⁴ Ikemantawakawori iroka, ikenkithatakagaeyakirini Tajorentsi. Ishintsipaantetziro apaani, ikantzi:

—Nowinkatharite, eero ka wetsikirori jenoki, kipatsi, inkaare, maawaeni; eejatzi piwetsikaeyakirini maawaeni tzimanteeyaworini. ²⁵ Eejatzi paerani

piyotaakirini nochariniiteni Iraviiri, riraga aapatziyaperotzimiri. Iyotaakiri pishire, rojakinatantawori iroka:

“²⁶litaka ikijanteeyakarini riraga kaari yotziri Tajorentsi? ²⁷litaka ikenkithashiryaashitantawori joriiyopaeni ranteeeyeroni kaari kameethatatsi? ²⁸Riraga iwinkatharitepaeni atziri jika kipatsiki rajaryagaeyawityaarini Tajorentsipero, eejatzi riraga Rotyaantanewo, ikowaeyawityaani ithonkaeyerinimi”.

²⁷Jaka nampitsikika ipiyoteeyakani rajaryagaeyawitakarini pitomi Jesoshi, riraga piñaaperotziri ikameethaperotatzi. Irira piyoyaaperotakiri, eejatzi potyaantaperotakiri. Ikaateeyini ajaryaanteeyawitacharini Erooreshi, Poonshiyo Peraato, jewatatsiripaeni joriiyopaeni, eejatzi joraaropaeni tema rirotaki paashinijatzitsitari atziri; maawaenai.

²⁸Paerani eeroka pikantaki: “Aritaki okantyaari”. Ari chapinki ithonkakiro imonkaatakiro irikapaeni. ²⁹Iroñaaka, Pawa, piyotakiro iroka ikantaperotawitakina: “Eero pikenkithatakoteeri Jesoshi”. Tema naaka aapatziyaperotakimiri. Pimatatakaaperotena eero nothaawanta nokenkithataperotero piñaani. ³⁰Pitomi Jesoshi rirotaki Nowinkatharite iroñaaka, rootaki nokowantakari imatakaaperotena notajonkakowenante, netsiyatakantyaariri mantsiyaripaeni; nomatapiintero kaari iñaapiinteeeyini, niyotakagaeyerini atziri kyaaryo irira riroperotaki pitomi, eejatzi piñaaperotziri ikameethaperotzi.

³¹Aritaki ramaneeyirini Tajorentsi. Roojatzi omoyekanaka pankotsi ijekaeyantarini. Otajorentsiwenteeyapaakirini Ishire, roojatzi kameetha ikenkithatantawori iñaani Tajorentsi, tee ithawaneentzi.

Raakameethatawakagaeyakaniririraga aapatziyariri Jesoshi

³²Osheki ikaatzi iroñaaka aapatziyariri Jesoshi, kameetha ijekaeyakini, eejatzi imonkaatawakagaeyakan: oetarika ikowaeyirini eejatzi oetarika ikenkithashireeyani. Tee imashithatawakagaeyani, omaanta ipawakagaeyakawoni maawaenai tekatsitzimotakiriri. ³³Rowaga Ishire Tajorentsi imatakaakiri riraga rotyaantanewo Jesoshi, rootaki kameetharini ikananantapiinteri atziripaeni:

—Ikamawentakae Awinkatharite Jesoshi omaanta ipiriintakiri Pawa Tajorentsi, rañaakiri eejatzi iroñaaka.

Eejatzi ikanteeyini atziri:

—Tema ikameethateeyakini aapatziyariri Jesoshi. ³⁴⁻³⁵Riraga ashitaripaeni iipatsite eejatzi ipanko, ipimantagaanteeyini. Iroka opinayitarini, ramaeyakirini rotyaantanewo Jesoshi, ipapaakiri. Roojatzi ipagaantakiriri paashinipaeni rirori koetyeemotariri, kaari rashironkaanteeyantani aapatziyariri paeni Jesoshi.

Nokantakoteri pakiriri eejatzi amatawitantatsiri

³⁶Iroñaaka nokantakoteri aapatziyariri Jesoshi icharineeteni Rewii iitachari Josee. Paashini iitziri riraga rotyaantanewo Jesoshi: Werenawee. Akantzi aaka apaanteki: “Weshiryaaakaantachari”. Rirotaki poñaachari Cheepereki. ³⁷Rashitawitawo kipatsi, omaanta ipimantziro. Raanakiro owinawo, ipapaakiri riraga rotyaantanewo Jesoshi aritaki irirapaeni ipakiri aapatziyariri Jesoshi. Ipakiri atziri tekatsi oetarika royaari. Rootaki maawaenai aapatziyariri Jesoshi iñaaperotziri Werenawee.

5

¹Omaanta eeniro paashini aapatziyariri Jesoshi iwaero Ananiiyashi, ro iina Sajiira. Ipmantakiro iipatsite. ²Tee ikoyi iperi rotyaantanewo Jesoshi maawaenai iyörikite, rootaki ikanantakawori iina:

—Aririka aate aperi koriki, eero akantziri tsika okaatzika ipineetakaeri. Apashitapaakyaari kashetani koriki akimitakaantero rootaki maawaeni ipineetakaeri, rootaki ifñaaperotanteeri aari akameethatzi.

—Jee, aritaki.

Roojatzi ryaatanaki riraga Ananiiyashi apaniroeni, ipapaakiri rotyaan-
tanewo Jesoshi iyorikite. Ikantapaakiri:

—Irika korikika, rootaki maawaeni owinawo noepatsiteni nopimantakiri.

³ Omaanta iyotaakiri Ishire Tajorentsi Peetero:

—Ikowaki ramatawitashitemi. Ipakimi kashetani koriki rashи iipatsite.
Kaari maawaeni.

Rootaki ikanantariri:

—Ananiiyashi, pishinetaakari Jatanaashi itheeyakaakimi. Pikowaw-
itakan pamatawiteromi Ishire Tajorentsi. Pipashitakinari kashetani piy-
orikite. ⁴ Tekirani pipamantero rowaga piipatsiteni rootaki pashi eerori. Ari
pimateromi pamanantero oetarika pikowayitzirini eejatzi piperi ninkarika.
¿litaka pamatawitashitananari? Naaka pamatawiwitakina apaniroeni;
omaanta Tajorentsi eero pimatzi pamatawitziri.

⁵ Ikemantawakariri Ananiiyashi, roojatzi ityaantanaka, pog.
Kamanaki. Ithaawaperoeyanakini osheki maawaeni ñeeyakiririni.

⁶ Roojatzi riwetsikaeyakirini ewankari ikitateri; raanakiri, ikitateri.

⁷ Ojamanitapaentzi eechonkiini, ari okyapaaki iina roori. Tee iyotzi
kamaki oemini. ⁸ Ikantawakiro Peetero:

—¿Kyaaryooma pipakinari maawaeni koriki, rowaga owinawo piipatsiteni
pipimantakiri?

Ariakanakiri:

—Jee, nopakimiru maawaeni.

⁹ Roojatzi ikanantakawo roori:

—¿litaka pikimitantariri piimini, pamatawiteromi Ishire Tajorentsi?
Okaakitapaaki kitatziriri piimini: rirojatzi aanakimini eerori.

¹⁰ Roojatzi otyaantanaka roori, pog, kamanaki. Ikyaaapae riraga ewankari-
paeni, ifñaapaakiro, kamaki. Ari raanakiro, ikitatero roori, otsipatapaari
oemini. ¹¹ Ari ithaawaeyanakini maawaeni riraga aapatziyariri Jesoshi
rowashironkaerikari Tajorentsi, eejatzi ithaawaeyanakini maawaeni ke-
makoeyakiririni. Ikenkithashireeyawoni: “Tee okameethatzi namatawi-
tante. Rowashironkaanakari naari Tajorentsi”.

Retsiyatakotakirioshekiatziri

¹²⁻¹⁴ Ari ipiyoteeyakanı maawaeni aapatziyariri Jesoshi janta
kaapanomarentsiki iiteetziro rashı Sharamoo. Eejatzi eekiro ryaatatzı
roshekiperotanaki aapatziyariri Awinkatharite. Osheki ikaateeyini
shirampari eejatzi tsinani. Osheki ifñaaperoyakirini atziripaeni riraga
aapatziyariri Jesoshi, ikanteeyini:

—Ikameethatperoeyini aapatziyariripaeni Jesoshi.

Omaanta riraga kaari aapatziyariri irira ithaawakaanteyakaririni itsi-
pateeyakanim.

Osheki itajonkawenantzi riraga rotyaannewo Jesoshi. Osheki
omataakaakirı Ishire Tajorentsi. ¹⁵⁻¹⁶ Rootaki rowapiinantakariri atziripaeni
mantsiyaripaeni janta awotsiki: romaryaayitzirini shitashintsiki,
okantyaata aririka rawijanaki Peetero, ipampitanakiri, eerorka
ipampitanakiri aririka ramparyaatawakaari rootaki retsiyatatakantyaari.
Eejatzi ipiyotashiteeyakanı osheki atziri, poñaachari nampsitsikipaeni janta
othapikiyitapaakini Jerojaree. Ramayitakinirini mantsiyaripaeni, eejatzi
kyaatantariri kamaari. Retsiyatakoe耶erini maawaeni.

Riraga ñaanakowenantatsiripaeni ikijaperotziri rotyaantanewo Jesoshi

¹⁷ Ari ikijanakiri iwinkatharite ñaanakowenantatsiri, eejatzi paashinipaeni ñaanakowenantatsiri, tema rirotaki saroseeyotatsiri. ¹⁸ Ari raakaantakiri riraga rotyaantanewo Jesoshi, romonkyaagakaantawitakari omonkyaagamentotsiki. ¹⁹ Omaanta niyanki tsiteniri roeyowaeri ronampiri Tajorentsri riragapaeni rotyaantanewo Jesoshi, rashitaryaapaakiniri' ashitakontsi, raanakiri inkokiroeni. ²⁰ Ikantzzi:

—Piyaate janta Tajorentsipankoki, pikatziyapaaki. Pikamantaperoey-erini atziri tsika ikantyaari ijeekanteeyari ikanteetatyeyaaani jenokinta.

²¹ Ikantawakiri:

—Jee, ari nokamanteeyakirini.

Ari owakira okitejitanaki riyatanakki Tajorentsipankoki, riyotaantapaaki.

Eeniro iwinkatharite ñaanakowenantatsiripaeni eejatzi tsipateeyaririni janta paashiniki pankotsi. Tekira riyotakoteri roeyoyiri rotyaantanewo Jesoshi. Roojatzi ikaemakaantakiri maawaeni paashini jewatatsiri joriiyopaeni. Roojatzi ikantziri waariry:

—Piyaate janta pomonkyaagakitzirinta tsitenini chapinki aapatziyariri Jesoshi, pamaeyakinarini.

²² Ari riyatasthitawitakari, tee iñaapaakiri. Roojatzi ipiyantanaka, ikantapaaki:

²³ —Tee añairi. Noñaapaakiro pankotsi, oyaawitaperotaka. Eejatzi eeniro ikatziyawitaka shentawitawori omoopaeni. Roojatzi nashitaryaantawitapaakawo omoo, nokyaawitapaaka; tektsi noñaapaaki inthomaenta.

²⁴ Ikemantawitakariri, ikantawakagaeyananaki:

—¿Tsikarika ikinanakika?

—Taanitya. Eerokaritya.

—¿Tsika akanterika iroñaaka?

—Taanitya.

²⁵ Roojatzi ipokashitantapaakari apaani kamantapaakiriri, ikantapaeri:

—Riragapaeni shirampari pomonkyaagakaantawitakari, katziyeeyapaakani janta Tajorentsipankoki. Riyotagaeyapaakiriri atziri.

²⁶ Roojatzi riyatasthitantanakari iyapitaanote itsipatantanakari waariyapaeni, ragaeyanakirini, omaanta tee ikoshekanakari ithaawantakari atziri; ikantzzi:

—Kameetha aanakiri ikijakowentarikari atziri aapatziyariri Jesoshi, rompojanteerokari mapi aaka.

Rootaki raantanakariri kameetha, tee ikijanakiri. ²⁷ Ari raanakiri, rowapaakiria janta ijeekinta jewatatsiripaeni. Ikantawakiri iwinkatharite ñaanakowenantatsiri:

²⁸ —¿Litaka pikenkithatakan tariri eejatzi atziri? Tema nokaminaawitzimi: “Eero pikenkithatakotaneeri Jesoshi”. Iroñaaka eekiro piyotagaeyirini maawaeni jerojareejatzi. Ro iroka pikantakotakinari: “Irira jewatatsiripaeni owamaakaantakiriri Jesoshi; ikantashita rantashitakawo kaari kameethatatsiri”. Tee okameethatzi pikanteeyakirini. Pimaeriteeyeni, eero pikamanantanee eejatzi.

²⁹ Rakanakiri Peetero, ikantanakiri:

—Omaantakya naapatziyaperotari Tajorentsri. Eero naapatziyimi eero ka aririka pikantena: “Eero pikenkithatakotziri Jesoshi”. Inimotakiri paashinipaeni rotyaantanewo Jesoshi. ³⁰ Eero kaaryootatsi powamaakaantakiri Jesoshi. Pikentakotakaantakiri koroshiki. Omaanta ipiriinteeri

Tajorentsipero. ³¹ Itzinagaeri rakoperoki janta jenokinta. Ipeyeeri Jewap-erowenantsatsiri eejatzi Owawijaakoeyakaerini. Ikowakagaeyakirini ajori-iyotzinkaritepaeni ikenkithashiryaaperotateeeyari eejatzi rookerio rowaga kaari kameethatatsi ranteeyawitakarini aritaki ikaminthagaeysterini, eero ikenkithashiryaakotero eejatzi okaatzia kaari kameethatatsi ranteeyaw-itakarini. ³² Aritaki noñaaperotakiro rantayitakirini Jesoshi, eejatzi niyotaki okithaatakagaeyakarini Ishire Tajorentsi maawaeni aapatziyariri Jesoshi. Rootaki nokenkithatakotapiinantariri rirori. Tekatsi nokantya nomaeerite.

Roojatzi ikanteeyini paashinipaeni rotyaantanewo Jesoshi:

—Kyaaryo iroka ikantziri Peetero.

³³ Ikemanteeyawakaririni, riyotanteeyawakaworini kyaaryo ranteeyakironi kaari kameethatatsi, rootaki ikijanteyananakaririni, ikowaeyawitanakanri rowamaerimi. ³⁴ Omaanta ikatziyanaka apaani jewatatsiri iitachari Kamariyeeri. Rirotaki warijeeyo, eejatzi iyotaantzirori oetarika rojankinatziri Moeseeshi. Maawaeni atziri iñaaperoyirini. Ikantzi:

—Nojoriiyotzinkarite, nokoyi ishitowaeyakiteniita aapatziyariri Jesoshi, eero ikemantawo nokantemiri.

Ari rotyaanteeyakirini inkokironta.

³⁵ Roojatzi ikananteeyakarini:

—Nojoriiyotzinkarite. Kyaaryoowa, paamawentyaaga pantzirikarira aapatziyariri Jesoshi. ³⁶ Pikemina. Nokenkithashiryaakayemiri apite shiram-pari. Nokantakotziri riraga Teyoorashi, rirotaki jeekatsiri paerani, osheki ikantakaaperotani. Ari ipiyotashitawitakari osheki ratzirite, naamaashitya ikaateeyini 400. Omaanta rowamaetakiri, roojatzi rinteenaryaantanakari oyaateeyawitaririni. Ipeyashiteeyanakanri, tekatsi akemakoteeri eejatzi.

³⁷ Eejatzi imawitanakawo rirori iitachari Joorashi, riraga karireeyajatzi. Janta rojankinatakoeyantani, eejatzi reewatawitanakari apaaniipaeni atziri. Eejatzi rirori, rowamagaetawakiri. Rowaaganaka oyaatawitariripaeni, tekatsi akemakoteeri paashini. ³⁸ Rootaki iroñaaka nokamanantzimiri, eero pashiiriiri irikapaeni, ikantakaata. Rirorika otyaantziriri atziri ikenkithatzi, tema eejatzi ipeyaneeya rirori. ³⁹ Rirorika otyaantziriri Tajorentsi, tekatsi pikanteri pomaerinteri. Pikijimatzikari Tajorentsi.

⁴⁰ Ari inimoeyanakirini rirori. Ikaemaeri eejatzi, ipajatakaantakiri. Roojatzi ikantaperotawitari:

—Eero eejatzi pikenkithatakoteeri Jesoshi.

Roojatzi rotyaanantaari. ⁴¹ Ari riyaateeyanakini, ikimoshireeyanakini, ikanteeyini:

—Iñaaperotee Jesoshi akameethatzi, rootaki ishinetantakaeri akemaatiswanteeyakarini.

⁴² Maawaeni kitejiri ryotaantapiintzi janta Tajorentsipankoki, eejatzi pankotsikipaeni. Ikantani: ryotaantapiintzi, ikamanantapiintzi. Ikaman-tapiintziri atziri:

—Jesoshi rirotaki riraga Rotyaantanewo Tajorentsi aamagaeyarini paerani.

6

Riyyaakiri amitakotantatsini

¹ Ari roshekyaatkari aapatziyariri Jesoshi, eejatzi ikijashiryaanaka riraga iyotzirori ipaante kireeshiyajatzi. Ikantawakaanaka:

—Maawaeni kitejiri, aririka ipantawitya owanawontsi, tee ipaperotziro natziritzinkawote ashi aari: iroka kamayiteentsirini oemii. Omaanta ipaperoyirini kameetha iyotzirori ewereeyo, rowaga ipaante joriiyopaeni.

² Ari riraga rotyaantanewo Jesoshi ipiyoteeyakirini maawaeni aapatziyariri Jesoshi. Ikantziri:

—Tee okameethatzi nookanakiro nokenkithatapiintziro iñaani Tajorents, nopolantayitemirorini owanawontsi. ³ Iroñaka, noyemijantzinkaritepaensi, piyoyee ⁷ shirampari, riraga piñaaperotziri ikameethatzi. Piyoyeeri riraga iyothanetatsiri, kemijantaperotzirori Ishire Tajorents. Akanteriita riori rirotaki pantatsini owanawontsi. ⁴ Omaanta naaka, apatziro namaneri Tajorents, eejatzti nokenkithatero iñaani.

⁵ Inimoeyakirini maawaeni iroka ikantakiriri. Riyoyaakiri Eshiteewa, rirotaki aapatziyaperotariri Jesoshi, kemijantaperotzirori Ishire Tajorents. Riyoyaakiri eejatzti Jiripi, Pirookoro, Irikanoori, Temoo, Parimeenashi. Eejatzti riyoyaakiri Nikoraashi, riraga peyeenchari joriyo, poñaachari Antyokiyyaki. Omaanta iroñaka raapatziyaperotari Jesoshi. ⁶ Roojatzti roñaagantapaakari riraga rotyaantanewo Jesoshi. Rowakiniri rako iitoki, roojatzti ramaneeyirini Tajorents: “Pamitakoeyerini irikapaeni pantayitatsirini owanawontsi”.

⁷ Osheki ikaatzi kemaeyakirorini iñaani Tajorents. Eekiro roshekyaaperotanakity aapatziyakariri Jesoshi janta Jerojareeki. Eejatzti oshekiniroña ikaatzi ñaanakowenantsiri ikimitakotanaari aapatziyariri Jesoshi.

Riraga Eshiteewa rirotaki riyoyaanewo Tajorents

⁸ Osheki ramitakoperotakiri Tajorents Eshiteewa. Osheki imatakaakiri Tajorents ikenkithatakaantakariri atziri. Osheki itajonkakaakari Tajorents. Imataperotayitzinirini atziri kaari iñaapiinteyini. Imatakaakiniri oetarikapaeni riyoteeyantakaririni Jesoshi rirotaki Tajorents. ⁹ Eeniro ipiyotapiinteyantarini janta Tajorentsipankoki atziri riraga ipimanteetawitari paerani, omaanta ipakaeri amanantawitariri. Eejatzti janta ipiyotanta shireenejatzti, arejanteriyyajatzti, poñaachari Shiriishiyaki, Aashiyaki. Riyaatashiteeyawitakarini Eshiteewa, ikijattheeyawitakarini eejatzti ipiyapiyawantetakari. ¹⁰ Omaanta osheki riyothanetzi Eshiteewa, tekatsi ikanteeyerini ipiyapiyawantetaper-oeyaarini. Eenitatsi riyotantari kameetha iñaawaetzi, tema iyotaakiri Ishire Tajorents. ¹¹ Ari osheki ikijeeyakirini riraganki, ikantziri paashini isheninkapaeni:

—Pamine, nokowaki pitheeyakotyaari Eshiteewa. Aririka pimateeyeroni nokantakimiri, nopolantemikoriki. Ro iroka pikantakotashityaariri: “Nokemakiri Eshiteewa, itheenkimatatakiri Moeseeshi. Eejatzti ikimitakiri riori Tajorents, ikantzimatatakiri”.

Ikantziri:

—Ari nokamanteeyerini atziripaeni.

¹² Ikemanteeyawakanati atziripaeni, ikijeeyananaki eejatzti aataperoteenchari, iyotaantzirori rojankinarini Moeseeshi, maawaeni. Intsipaete riyaatashiteeyakirini Eshiteewa, raapaenziri, shepik; ragaeyanakirini janta pinkatharipaeniki ikantakotantariri. ¹³ Raanakiri eejatzti riraga theeyachari, ikantapaakiri:

—Aritaki ikantaperotzi Eshiteewa, ikantapiintzi: “Tee okameethatzi Tajorentsipank”. Eejatzti ikimitziro rojankinarini Moeseeshi, itheenkapiintziro. ¹⁴ Nokemakiri, ikantziri: “Riraga Jesoshi, najareetejatzti, ishekiroreero iroka Tajorentsipankoka. Ipaashinitero iroka ametayitakarini eejatzti ipaashinitayiteroni ryotaayitakaerini Moeseeshi”.

¹⁵ Ramineeyakirini maawaeni jeekaentsiripaeni, joreririri. Ishipakiryaapootanaki Eshiteewa, ikimitanakari ronampiri Tajorents.

7

¹ Roojatzti rojampitantakari iwinkatharite ñaanakowenantatsiri riraga Eshiteewa:

—¿Kyaaryooma iroka ikantakiri?

Eshiteewa raakowenta apaniroeni

² Ikantawakiri Eshiteewa:

—Nowinkatharitepaeni maawaeni, teewee nokantzimatzi Pawa Tajorentsi. Pikemena, nojoriyyotzinkaritepaeni. Paeraniperoroña iñaaperotantariri achariniiteni ipinkathatziri Tajorentsi, eejatzi naari iroñaaka nopinkathatziri. Paeraniperoroña ijeekantawitarini janta Mesopotaamiyaki achariniiteni Awaraamani, roñaagapaakari Tajorentsi riraga kameethatatsiri. ³ Ari ikantapaakiri: “Pookanakiro piipatsitee eejatzi pisheninka, piyatae janta paashiniki kipatsi rowaga noñaayemiro”.

⁴ Roojatzti rookantanakawori iipatsitee kareeyajatzi, rareetaka Araanaki. Aritaki janta ikamapaakiri iriri, roojatzti rareetakaakari Tajorentsi jika aepatsitekika. ⁵ Omaanta, tee ipiri iipatsitee, tee ipaneentziri eechonkiini ijeekantyaari. Eejatzi tekiran itzimini itomi. Omaanta ikantzitakarini Tajorentsi: “Paata ikoñaate pitomi eejatzi iinja oshekini impaetatsiri. Noperi irikapaeni iroka kipatsi”. ⁶ Eejatzi ikantakiri Tajorentsi: “Inja riyaate poyaatemi ijeeki iipatsiteki paashinijatzitsiri atziri rowaga Ejiipitoki. Okaate ojarentsi 400 ijeekanaki janta. Riraga ejiipitojatzi rirotaki owashironkaerini pisheninkani iinja, romperataperotakaryaari osheki. ⁷ Roojatzikya nokantakotanteeyerini riraga omperatayitaririni. Omaanta irira pisheninkani, noepiyayiterini jika kipatsikika, ari ipinkathaperotakina jika. ⁸ Nokowaki iroñaaka pitotonayityaani pishiramparitantari ryotantyaari atziri paapatziyaperotakina eejatzi pikenkithashiryaaantyaawori nokantakimiri”. Rootaki ikantakiriri Tajorentsi Awaraama. Ari roojatzti ikoñaatapaaki itomi, riraga Ijaaka. Okaataki kitejiri 8, roojatzti itotonatantakari. Roojatzti ikoñaatapaaki itomi riraga Ijaaka, iitakiri Jakoowo. Itomipaeni riraga Jakoowo ikaateeyakini 12. Tema itotonatakananteeyakirini maawaeni. Tema riroteeyakini achariniiteni. ⁹ Eekiro ikantziri Eshiteewa:

—Ari rantariteeyanakini itomipaeni Jakoowo, ikijeeyakirini apaani rirentzi, iwaero Josee. Ipimanteeyakirini, roojatzti ragaetanakirini Ejiipitoki. Omaanta kijokiro rowakiri Tajorentsi. ¹⁰ Janta rowashironkagaeyawitakarini jeekatsiripaeni, omaanta rowawijaakotakiri rirori Tajorentsi. Ramitakotziri oetarika rantziri rootaki iñaaperotantariri iwinkatharite ejiipitojatzi iiteetziri Jarayoo. Ifñaakiri otzimimotziri ryotantari, rootaki iitantanakariri riraga Josee jewaperotsatsiri. Reeweateeyirini maawaeni ejiipitojatzi, eejatzi isheninka Jarayooni. ¹¹ Impaetzi ari itasheyeyanakini maawaeni ejiipitojatzi eejatzi jika aepatsiteki rowaga Kanaanaki, tsikarika ijeeki Jakoowo, eejatzi itasheyeyanakini atziripaeni. Osheki rowashironkaeyanakan: tekatsi raanakiro rowaeyarini achariniiteni. ¹² Riraga Jakoowo ikemakotakiro ari eenitatsi teriiko janta Ejiipitoki. Ritakari rotyaantakiri itomipaeni, ikantakiri: “Piyaate Ejiipitoki pamanantakite owanawontsi”.

Ari ramanantakitzi roojatzti ipiyantaa. ¹³ Rooteentsi ithonkimateero owanawontsi, eejatzi rapiiteeri rotyaanteeri itomipaeni ikantziri: “Piyaate pamanantakite eejatzi owanawontsi”. Ari ryaateeyanakini eejatzi, roojatzti ineeeyantapaakarini jewatatsiri. Ikantawakiri: “Naaka Josee pipimantakiri paerani”. Eejatzi ikantziri Josee Jarayooni: “Irika rirotaki yeeyiperopaeni naari”. ¹⁴ Roojatzti ikanantakari rirentzi: “Pikantaateri pawa ipokae jika,

eejatzi ikaateeyinira rirori". ¹⁵⁻¹⁶ Roojatzi riyaatantanaka Jakoowo janta Ejiipitoki, ragaeyanakirini isheninkapaeni, ikaateeyini 75. Ari ikamapaaki janta. Roojatzi raaneeri Jakoowoni, ikitatapaeri janta Shekeemiki, ari etari kipatsi ramanantzirini Awaraama. Irira pimantzirori kipatsi itomipaenini Emoori. Ipinatakiri koriki. Eejatzi paata ikimiteeyakarini maawaeni itomipaenii riraga Jakoowoni, ikamaeyakini maawaeni rirori janta Ejiipitoki.

¹⁷ Eekiro ikantziri Eshiteewa:

—Rootaneentsi omonkaatakyu ikantakiririni Tajorentsii Awaraama. Ikaatzi osheki achariniiteni aari, roshekitanaki janta Ejiipitoki.

¹⁸ Impaetzi ipinkathariwenzirii paashini Jarayoo, kaari yotakotziriri Josee. ¹⁹ Ramatawiteeyirini achariniiteni. Ishintsithateeyakirini, ragaeyakirini itomipaenii, rowamayiteeyakirini. ²⁰ Roojatzi ikoñaatantapaaka Moeseeshi. Aritaki ikanta Tajorentsii, iñaakiri rirotaki kameetha eentsi.

Ikaataki 3 kashiri ikempoyaakiri ashtariri janta inthomaenta ipankoki, imanapithatakiri ejipitojatzi. ²¹ Tee imatziri imaneri eejatzi ipankoki, rootatki riwetsikantanakanariri tsiwoonaki, imanakotawitakari othapyaaikiini iñaaki. Okantaka rishinto Jarayoo opokaki roojatzi oñaantakariri. Ari aanakiri okempoyaakaantapaakiri onampiki, okimitakaantananakari rirotaki otomipero. ²² Riyotaaperotakiri ejipitojatzi maawaeni okaatayitzini riyatayitzirini rirori. Kameetha iñaawaetzi. Imaperotziro oetarikapaeni rantayitzirini.

²³ Eekiro riyaatatzii ikantziri Eshiteewa:

—Ari okaatzi rojarentsite Moeseeshi 40, roojatzi riyaatantanakari raaetari ijoriyyotzinkaritepaeni. ²⁴⁻²⁵ Ikenkithashiryaa riraga Moeseeshi ari reewateeyawakirinimi ijoriyyotzinkaritepaeni eejatzi ikenkithashiryaaawitaka ari riyoteeyawakirini rirotaki amitakoeyerini. Ikenkithashiryaaawitaka riyotemi rotyaantakiri Tajorentsii, omaanta tee riyotawakirini rirotaki jewatatsiri. Iñaakowentapaakiri apaani joriyyo, rowashironkaakiri: ipajajaatakiri ejipitojatzi, tak, tak. Ari ikijakowentapaakari Moeseeshi ijoriyyotzinkarite, roojatzi rowamaantapaakari ejipitojatzi. ²⁶ Inkaamani iñaakiri ijoriyyotzinkarite apite, ikijathatawakaanaka. Ikowawita rirori romaeerimi. Ikantziri: "Tema pijoriyyotzinkaritawakaaka. ¿litaka pikijawakaanteeyakarini?" ²⁷ Ari rotatsinkawakiri riraga kijaperoteenchari, ikantziri: "¿Ninkama peyakimiri iroñaka nowinkatharite? ¿Pikowakima pomperatayitenani?" ²⁸ ¿Pikowakima iroñaka powamaena naari, pikimitakaantenami riraganki ejipitojatzi powamaakiri chapinki?" ²⁹ Ikemantawakari ikantakiriri, roojatzi ishyiantanaka Moeseeshi, ithaawanaki. Roojatzi ijeekantapaaka nampitsinentsiki janta iipatsiteki Mariyaani. Raapaaki iina, roojatzi ikoñaatapaki itomi apite.

³⁰ Ari eekiro ikenkithatakagaeyirini Eshiteewa:

—Okaataki 40 ojarentsi ijeekimotziri Moeseeshi rikonkiri. Roojatzi roñaaagantakari ronampiri Tajorentsii, janta amorekimotakiri inchashimpoki, janta okaankiitye tee oshookaperotzi inchashi okaakintawo ochempi owaero Shinayii. ³¹ Raminanakiro, roojatzi rotsikanaperotanakawo ikenkithashiryaa: "Amorekawitaka inchashimpoki, omaanta tee otaaga. ¿litarikya?" Ari riyaatashiteromi, ikowawita raminaperoteromi. Roojatzi ikemantakari Awinkatharite, ³² ikantziri: "Naaka Tajorentsiperi, ikantani iñaaperoeyakinani pijoriyyotzinkariteni paerani: riraga Awaraama, Ijaaka, eejatzi riraga Jakoowo, maawaeni". Jaa, omaanta riraga Moeseeshi ithaawaperotanaki, tee raminanakiro. ³³ Ikantziri eejatzi Tajorentsii: "Piñaaperotena, pijapatoreeya, iroñaka pikatziyantakawo kipatsi nowameethatani, iroka nopaashinitziro". ³⁴ Noñlaakiri janta Ejiipitoki

pijoriiyotzinkarite niyoyaayitakirini, osheki rowashironkagaeyakan. Nokemakiri ikaminthagaeyanakan, iroñaaka nokaminthagaeyirini. Rootaki nopolakshitantariri nopolakowenteri. Iroñaaka notyaantem eero ka janta Ejiipitoki”. ³⁵ Tema paerani itheenkawitakari riraga Moeseeshi, ikantzirini: “¿Ninkama peyakimiri nowinkatharite”? Rirotaki irira rotyaanantakariri Tajorents. Iroñaaka ipeyakiri jewatatsiri eejatzi owawijaakotziriri riraga achariniiteni. Rirotaki otyaantakiriri ronampiri Tajorents paerani iñaakiri janta inchashimpoki. ³⁶ Ragaeyeerini ijoriyyotzinkaritepaen, imatayitakironi kaari iñaapiinteyini eejatzi itajonkakowenantzi. Imatayitakironi itajonkakowenantzi janta Ejiipitoki, janta ocheraaki inkaareki Kityonkari eejatzi janta okaankiitye tekatsinta atziri ipanko. Okaatz 40 ojarentsi imatapiintayitakironi.

³⁷ Eejatzi ikantzi Eshiteewa:

—Rirotaki irika Moeseeshi kantziriri ijoriyyotzinkariteni: “Ikimitakinaka riyoakina Tajorents kamanantzirori iñaani, ari iinja riyoeyeeri paashini ajoriyyotzinkarite kamananterorini iñaani”. ³⁸ Paerani ikinakinatanteeyarini achariniiteni janta tekatsinta atziri ipanko, reewawenteeyakirini riraga Moeseeshi. Janta ochempiki oetachari Shinayii ikenkithatakaeri ronampiri Tajorents. Ikemawakiro Moeseeshi iñaani Tajorents, roojatzi ikamananteeyakaririni maawaeni achariniiteni, riyotaantakariri iñaani. Roojatzi ikamananteeyakaerini iroñaaka aari, rootaki ayotantakariri rirori. ³⁹ Tee notheenkiri naari oetarika riyotayitakaerini Moeseeshi, inta naapatziyaperotakawo maawaeni ikantziri rirori. Omaanta paerani itheenkakiri achariniiteni, tee ikoyi raapatziyari. Ikowaeyawitan ipiyeemi Ejiipitoki. ⁴⁰ Ikantteeyirini Aawooni: “Riraga Moeseeshi rirowitaka agaeyakiteerini janta Ejiipitoki, ramaeyawitakaeni jaka. Omaanta ryaataki chapinki Shinayikki. Iroñaaka tee ayotakotziri iitarika owakiriri kaari ipokantaa. Iroñaaka piwetsikaeyenani paashini atajorentsite, añaaperoter roori”. ⁴¹ Ari riwetsikaeyakironi, roshiyakaantakiri ewankari tooro. Ikoyi ipeyeromi itajorentsite. Rowamagaeyakinironi owisha, ramashiyitakanawoni, ipashiyitakawoni. Ikimoshirewenteeyashitakawoni riwetsikani. ⁴² Ijamashiryaaaneentakari Tajorents, rookanakiri: ishineteeyakirini ikenkithashirya rirotaki Tajorents riraga oorya, kashiri, ompokiropaeni, oetarikapaeni. Tema rootaki rojankinatakotzirini paerani riraga Amooshini. Ro iroka rojankinatzirini: “Nojoriiyotzinkarite, iroka ikantzimiri Tajorents: ‘Icharineeteni Ishirayeeri, janta okaankiitye pijeekaeyawitaninta paerani 40 ojarentsi. Omaanta aririka powamaantapiintanariri piratsi pitaantapiintanariri, ¿kyaryoperoma pipinkathapiintaperotana naari? Tee. Tee pipinkathapiintanta kyaaryoopero naaka, ⁴³ inta piñaaperotapiintakiri irira Marooko piitajorentsitasshitari ipankomawoki. Eejatzi pipinkathashitakari oshiyariri ompokiro iwaero Reneja. Pipinkathashitakari piwetsikaeyirini eerori. Rootaki notyaanantyaariri inteenajatzi riraga ashiiryajatzi ragaeyakitemini raanakimi inampiki, romperateeyemini’”. Rootaki rojankinatzirini paerani Amooshi.

⁴⁴ Eekiro ikantanatz Eshiteewa:

—Ikantakoeayakinani naari nokantzimatashitakwo rootaki nanantakawori kaari kameethatatsiri. Omaanta tee apatziro ijeeki Tajorents pankotsiki wetsikachari mapi. Paeraniperoroña riraga achariniiteni riwetsikaeyakinirini Tajorents ipankomawo janta okaankiitye. Rantziro okimitaaka ikantakiriri Tajorents Moeseeshi. Riroma riyotakaakiri janta ochempiki tsikarika ikantya riwetsikantyaawori. ⁴⁵ Ikamantakari riraga Moeseeshi, rirotaki Joshoe

poyaataariri reewawenteeyaneerini achariniiteni. Rareetantapaakari jaka aepatsitekika rootaki ikashiyakaakaeri Tajorentsi paerani, eejatzri ramaeyakironi ipankomawo. Rareetanteeyawitapaaakarini iñeeyapaakirini paashinijatzitsiri atziri jeekawitachari jaka. Imatakaakiri Tajorentsi joriyyopaei rookakaakiri riroripaeni iipatsite. Rootaki ipakiriri ajoriyotzinkaritepaeni aepatsitepero. Ari iñaaperotziri Tajorentsi ipankomawoki, eejatzri Iraviirini iñaaperotzitakarini rirori janta. ⁴⁶ Riraga Tajorentsi iñaaperotziri Iraviirini ikameethatzi. Ikantawitarini rirori: "Pawa, tema eeroka Tajorentsipero iñaaperotzimini achariniiteni. Iroñaka nokowaki pishinetena niwetsikemiro pijeeckantyaari". ⁴⁷ Omaanta riraga Tajorentsi tee ikowakayiri Iraviirini riwetsikero ipanko, omaanta ikowakaakiri itomi riraga Sharamooni rirotaki wetsikaperoteroni Tajorentsipango. ⁴⁸ Tee apatziro ijeekantawo Tajorentsi riragajenokijatziri oka Tajorentsipango riwetsikaetziniri mapi. Tema ithotyaakiro maawaeni kipatsi: ijeeki tsikarika. Rirotaki matakirori oetarika ikoyiri. Tema rirotaki wetsikakirori maawaeni, oetarikapaeni. Aritaki ikantzita kamanantzirorini iñaani Tajorentsi:

⁴⁹ "Ikantzi Pawa Tajorentsi: 'Noshiyakaawentemiro. Jenokinta okim-itaka nojeeckinta. Rowaga kipatsi oshiyawitakawo shitashintsi naatzikantawo noetzi. ¿Tsika pikantyaaka piwetsikantenari pankotsi nojeeckantyaari? ¿Arima nomonkaatashitakyaawo? ⁵⁰ Tema naaka wetsikaeyakirorini maawaeni jeekatsiripaenii'".

Rootaki ikantziri kamanantzirorini iñaani Tajorentsi.

⁵¹ Nojoriyotzinkaritepaeni, kyaaryo noñaaperotatziri Tajorentsi eejatzri nokemijantziro rojankinarini Moeseeshi omaanta eeroka, tee pikoyi piyote. Poshiyeeyakarinia paashinijatzitsiri atziri: tee pikenkithashireeya. Tee pikemijantaperotziri Tajorentsi. Aritaki pikantatyaaani pipiyathatakawo Ishire. Poshiyakari achariniiteni. ⁵² ¿Eenitatsima kamanantzirorini iñaani Tajorentsi kaari ikijini achariniiteni? Teewee añiiri, tema riyotashitaka kijeeyakiririni maawaeni. Rowamagaeyakirini maawaeni kenkithatakantanawitacharini; riraga kantakiriri: "Inja ipoke kameethataperotatsirini". Tema pokawitaka, rirotaki Jesoshi, omaanta tee piñaaperoeyawakirini eeroka, inta paakaantakiri, powamaakaantakiri. ⁵³ Piyoteeyawitawoni ikaminaantziri Tajorentsi ronampiri ryotaawitariri Moeseeshi, omaanta tee paapatziyaperotawo.

Rootaki ikantziriri Eshiteewa atziri.

⁵⁴ Ari ikemaeyawakironi iroka ikantakiriri, roojatzi ikijanteeyantanakani. Osheki ikijeeyanakirini, ratsikaekitawenteeyanakarini raekiki, tyakiririri. ⁵⁵ Omaanta irira Eshiteewa, riweshiryaaawentashiryaaaperotakawo Ishire Tajorentsi. Raminaperotanaki jenokinta, iñaakiro ishipakiryaani Tajorentsi. Eejatzri iñaakiri Jesoshi ikatziyaka rakoperoki.

⁵⁶ Ikantanaki:

—Jaa, irinta noñaaperotakiri jenokinta, riraga Atziriperotapaentsiri janta rakoperoki Tajorentsi. Rirotaki Jesoshi.

⁵⁷ Ishintsitanaki ikaemaperoeyanakini, rashiteeyanakironi ikempita, ishiyashiyyapaakarini. Ragaeyapaentatziri, shepik. ⁵⁸ Ragaeyanakirini jata oweyaappaakanta nampitsi. Roojatzi rompojanteeyakaririni mapiki. Riraga ompojakiriri, raatonkoryaakiri iithaari, rowankitziro iitziki Sawoori, ikantziri:

—Paminawakinawo noethaari, nompojawakiriita.

Ikantziri:

—Ari.

⁵⁹ Ari rompojampojaatakiri Eshiteewa, roojatzi ramanantanakari Tajorentsi, ikantanakiri:

—Nowinkatharite Jesoshi, paashiretawaenawo noshire.

⁶⁰ Rotziwerowanaka, antawo ikaemanaki, ikantanaki:

—Nowinkatharite, tee okameethatzi iroka ranteeyakirini, omaanta eero pikijawentziro iroka rantakinari inta pipeyakoteniri.

8

¹ Rootaki ikantakiri, roojatzi ikamantanaka. Ikantanaki rirori Sawoori:
—Ariwee, kamaki; īna okaanteekirira.

Riyaatzi aapatziyariri Jesoshi janta Jamaaryaki

Roojatzikya ritantanakawori kijakiriri Eshiteewa ikijeeyakirini maawaeni aapatziyariri Jesoshi janta Jerojareeki. Ithonkagaanteeyanakan, ishiyeeyanakan maawaeni paashinipaeni janta Joreeyaki, eejatzi Jamaaryaki. Inta jeekaneentsiri riraga rotyaantanewopaeni Jesoshi.

² Ari ikitatakiri Eshiteewa. Riro tyakitakotziriri aapatziyariri Jesoshi. Osheki riraakoeyakarini. ³ Omaanta Sawoori, ikowawita ithonkaeyerinimi riraga aapatziyariripaeni Jesoshi. Riyaatashiteeyirini ipankokipaeni, inoshikaeyirini shirampari, tsinani, maawaeni. Romonkyaaagayakirini omomkyaaagamentotsiki.

Raapatziyeyakarini Jesoshi jeekatsiri paashinipaeniki nampitsi

⁴ Riraga shiyeeyaneencharini, ikinakinayitanakini paashinikipaeni nampitsi. Ikenkithateeyakotakirini Jesoshi eejatzi ikenkithateeyakironi īnaani Tajorentsi. ⁵ Riraga Jiripi rareetapaaka nampitsiki, ironta Jamaaryawero. Ikamantakotapaakiri Rotyaantanewo Tajorentsi raamaakari rirotaki Jesoshi. ⁶ Ikemaeyantakaririni, eejatzi īneeyantakaririni itajonkantayitzini, raapatziyaperoeyawakarini atziripaeni.

⁷ Rowawijaakoeyakirini osheki kyaantawitarir kamaari, antawo ikaemaeyanakini riraga kamaaripaeni, roojatzi ishitowantanaka. Retsiyatakoeyakirini osheki kijopookitatsiri, eejatzi paashinipaeni atziri amashitachari iitziki. ⁸ Roojatzi ikimoshireeyantanakani riraga jeekatsiripaeni nampitsikinta.

⁹⁻¹¹ Eenitatsi janta shirampari iitachari Shimo. Paerani osheki ojarentsi isheripiyaritawitaniroña. Tema ramatawitakiri maawaeni jamaaryajatzi, ikenkithashiryakotakiri imatakiromi kaari īnaapiinteyini, roojatzi rotsikanatantakaariri irirapaeni, rootaki ikantakaaperotantakari osheki. īnaaperoeyawitakarini atziri: jewatatsiripaeni, atziritzinkaripaeni, maawaeni. Ikanteeyini:

—Irika Shimo ojeekantakari itajorenka Tajorentsi. Tema rirotaki jewatatsiri. Thame apinkathateri.

¹² Omaanta roojatzi rareetantapaakari Jiripi, ikamantakotakiri Tajorentsi, tsika ikanta reewawenantz. Eejatzi ikamantakotakiri Jesokirishito. Ari ikaawoshitakotakiri Tajorentsi maawaeni aapatziyeyakaririni Jesoshi: shirampari, tsinani, maawaeni. ¹³ Eejatzi ikimiwitaa riraga Shimo ikantzi: “Eejatzi naaka naapatziyari”. Eejatzi ikaawoshitakoteetakiri Tajorentsi. Roojatzi kijokiro rowantanakari Jiripi. īnaakotayitakirini oetarika rantayitakirini, eejatzi itajonkantaperotayitzini. Roojatzi rotsikanaperotanakari īnaakirowa rantayitakirini.

¹⁴ Riraga rotyaantanewo Jesoshi, jeekatsiri Jerojareeki, ikemakoeeyakirini jamaaryajatzi raapatziyeyakawoni rirori īnaani Tajorentsi, roojatzi rotyaanantakariri Peetero eejatzi Jowa janta. ¹⁵⁻¹⁶ Riyaatanaki.

Janta Jamaaryaki tekiraata okithaatakaari Ishire Tajorentsi jamaaryajatz; apatziro ikaawoshitawenteeyakarini Awinkatharite Jesoshi. Rootaki aririka rareetakari riraga Peetero eejatz Jowa ramanantakaari Tajorentsi. Ikantziri: "Pikithaatakaayaari riraga jamaaryajatz Pishire. Tema rootaki matakayerini".¹⁷ Ari rowakiniri rako iitoki riraga jamaaryajatzipaeni, roojatz okithaatakaantakari Ishire Tajorentsi, otajonkakagaeyakirini.¹⁸ Iñaakotakiri riraga Shimo. Riyotanaki aririka rowapaakiniri rako iitoki atziri, okithaatakaakari rowaga Ishire Tajorentsi, roojatz ikanantakari:

¹⁹ —Ajaa, koriki, nokowaki piyoteena notajonkante naari, nokimitemi eerori. Nokowaki aririka noyeniri nako iitoki atziritzinkaripaeni, raashireeyantyaaworini Ishire Tajorentsi.

²⁰ Omaanta ikantanakiri Peetero:

—Itispataantemiri Tajorentsi piyorikite rotyaantem ianta paamariki kaari tsiwakanitatsini. Piitakaashiwitaka eeroka ari pamanantakiro itajorenka Tajorentsi. ²¹ Tektsi pikanty pikimitena: riyyotzimi Tajorentsi tee pikameethashiretzi. ²² Piikenkithashiryagaagaeya, eero pikimita paerani, pookaero kaari kameethatatsi pantayitzirini. Pamaneri Tajorentsi, pikanteri: "Pikaminthagaena: pipeyakotenawo iroka kaari kameethatatsi nantakiri". ²³ Niyotakimi osheki pikantakaaperota, pikowawitaka pimonkaatenami, eejatz ashi poyiro tee pikameethatzi. ²⁴ Rakanakiri Shimo, ikantzi:

—Pikanteriita Tajorentsi ikaminthayena okantyaataky eero niyatanta paamariki kaari tsiwakanitatsini.

²⁵ Riraga Peetero, Jowa, Jiripi ikamantakotakiro iñaani Awinkatharite, ikenkithatakotakiro. Ikinayitanakini osheki nampitskipaeni Jamaaryaki, ikanteeyakirini jeekatsiripaeni:

—Aririka paapatziyeyari Jesoshi, rowawijaakoteemi Tajorentsi, ragaeyanakimini jenokinta.

Roojatz ipiyeeyantaani Jerojareeki.

Raapatziyaperotakari Jesoshi eteyopiyyajatz

²⁶ Ari ikantaki ronampiri Awinkatharite, ikantakiri Jiripi:

—Iroñaka piyaatanaki, pikinanaki janta awotsiki kinachari okaankiitye teenta oshookaperotzi inchashi: rowaga poñaaneenchari Jerojareeki, roojatz areetachari janta nampitsi Kaashaki.

²⁷ Ari riyaatanaki, ikinanaki awotsiki. Itonkiyotawakari shirampari poñaachari Eteyopiyyaki. Rirojatz owinkathatzinkarite Kantaasheshi, riraga kempoyeyinirorini maawaeni oorikite. Rootaki roori iwinkathawote eteyopiyyajatz. Ari chapinki riyaatakitz janta Jerojareeki, ipinkathaperotziri Tajorentsi. ²⁸ Iroñaka ipiyaa, ijekaki ishiyakomentoki, iñaanatziro rojankinarini Iseeyashi, riraga kamanantzirorini iñaani Tajorentsi. ²⁹ Ro Ishire Tajorentsi kantakiriri Jiripi:

—Piyaate janta, pitonkiyotawakyaawo shiyakomentotsinta.

³⁰ Ishiyashitanakari, ikemapaakiri iñaanatziro. Ikantapaakiri:

—¿Pikemaperotakiroma iroka piñaanatzirika?

³¹ Rakanakiri:

—Teewee nokemaperotziro. ¿Tsika nokantyaaka nokemaperotantyaawori? Tektsi iyotayenani. Potetapaeya, pijeekimotapaena jaka.

³² Eenirop iroka okantziri jankinarentsi iñaanatziri:

"Aririka rowamagaeteri owisha, imaeiritashitanaka. Aririka rameeteetziri owishaaniki, imaeiritashita. Eejatz ikimityaari Rotyaantanewo Tajorentsi rirori, imaerite." ³³ Rowashiwentagaeteri, eero

okameethatz i kantakoteetziriri. Roojatzi rowamaantyaari. Eero itzimi itomipaeni".

³⁴ Rojampitziri, ikantziri:

—Pikamantenyta. ¿Ninka ikenkithatakotziri riraga kamanantzirori ini iñaani Tajorents? ¿Rirojatzima kenkithatakotashitacha? ¿Paashinima ikenkithatakotziri?

³⁵ Roojatzi ikamanantanakari Jiripi, ikamantakotziri Jesoshi. Ritakanari okantziri rowaga Itawori Iwaperite Tajorents, riyotaaperotakiri. ³⁶ Eekiro riyaatakaatziiri awotsiki, roojatzi iñaantapaakwo eteyopiiyajatz iña. Ikan-takiri:

—Eeniro iroka iña. ¿Kameetharima nokaawoshitakotyari Tajorents?

³⁷ Rakanakiri:

—Paapatziyaperotakaririka Jesoshi, kameetha pikaawoshitakotyari Tajorents.

Ikantziri:

—Naapatziyaperotakari. Niyoperotaki rivotaki Jesokirishito Itomi Tajorents.

³⁸ Ikanta ikatziyakaapaakwo ishiyakomento. Ari rayiitapaaki, ranashiteeyanakan, itsipatawakaanaka apite, ranashaateeyakawoni iña. Roojatzi ikaawoshitawentakari Tajorents. ³⁹ Ari ishitowanee iñaakira roojatzi Ishire Awinkatharite omapokashitanakari aanakiri Jiripi intenea. Tee iñaawaeri eejatzi riraga itsipatawitari inkaaganki. Apaniroeni riyaatanee rirori, ikimoshireperotanaki. ⁴⁰ Omaanta Jiripi, aanakiri Ishire Tajorents iñaakotashitapaaka nampsikki janta oetanta Ashooto. Ari rareetantapaaka, ikenkithatayitanakini nampsikkipaeni:

—Paapatziyeyaaarini Jesoshi pawijakoeeyantyaarini.

Roojatzi ipiyantanaa janta Sesareeyaki.

9

Ipaashinitantaari Sawoori

¹ Ari ashi royo ikiaperotaka Sawoori. Rajaryaawitakari rowamagaeyerinimi maawaenai aapatziyeyaririni Jesoshi. Roojatzi riyaatashitantakari iwinkatharite ñaanakowenantatsiripaeni ikantziri:

² Nokowaki pojankinateniri riraga aapatziyakaworini rojankinarini Moeseeshi jeekatsiri janta Tamaashikoki, pikanteri: "Pamitakoeyerini Sawoori eejatzi tsipatariri ragaeyerini maawaenai aapatziyariripaeni Jesoshi. Nokowaki ragaeyerini: shirampari, tsinani, maawaenai. Roojatzi roojoteeyerini, ramaeyakirini jaka Jerojareeki".

Ari rojankinatiniri, ipakiri. ³ Roojatzi riyaatantanaka, ikantanaka shok, shok: roowitapaenchami Tamaashikoki. Omapokashitapaakari os-hipakiryapaaki, ikatziyakaga Sawoori: opoñaaka jenokinta. ⁴ Pariyanaki irira kipatsiki, teree, ikematziiro iñaani Jesoshi jenokinta:

—Sawoori, Sawoori: ¿jittaka pikijantanari?

⁵ —¿Ninkamika, Nowinkatharite?

—Naaka Jesoshi, piijani. Pikijakiri maawaenai aapatziyanari rootaki pikijantakinari naari. ⁶ Iroñaaka eero pikijana omaanta pikatziye piyaate, powaaganakya janta Tamaashikoki. Linja ari ikanteetemi oetarika panteri.

⁷ Ari ikatziyeyakan riragapaeni shirampari itsipateeyawitakarini, os-heki imaeeriyananakini. Tema ikemashitakwo paantentsi, omaanta tekatsi iñe. ⁸ Riraga Sawoori, ikatziyanaa. Rokiryaawitanaa, tee imateeyaa ikokichaatee, rootaki ikathatantanakariri, rareetakaakari Tamaashikoki.

⁹ Okaatzi ijekashitaka 3 kitejiri. Tee ikokichaatee, tee rowaeya, tee riree.

10 Ari eeniro janta Tamaashikoki aapatziyariri Jesoshi, iitachari Ananiyashi. Ramparyaatakarai Awinkatharite, ikantapaakiri:

—¡Ananiyyashi!

Ikantawakiri:

—¿Iitaka, Nowinkatharite? Eenirona jaka.

11 **Ikantakiri:**

—Iroñaaka piyaate awotsiki iiteetzirinta Tampatsikari. Pikowakowata-paakiri shirampari iitachari Sawoori, riraga taarishojatzi. Pikowakowata-paakiri janta ipankoki Joorashi. Tsitenishitakotaki. Eeniro rirori ramanana.

12 Koñaatziro iñaaperotakiro, iñaakimi pikyaashitapaakiri, pipampitapaakiri iitoki, iñaanaa etsiyatakotanaki.

13 **Ikantawakiri:**

—Nowinkatharite, osheki nokemakotziri, ikenkithatakoteetziri riraga pikantakinari. Osheki rowashironkaeyirini aapatziyeeeyimirini janta Jero-jareeki, ikantanakirikya. **14** Rooma rotyaantziri jaka riraga jewatayitziririni ñaanakowenantsirsipaeni rirori ragaeyantanakinani maawaeni ameenteey-imirini. Osheki nothaawantaperotakari.

15 **Omaanta ikantakiri riraga Awinkatharite:**

—Piyaate. Rooma rirotaki niyoyaakiri. Rirotaki kenkithatakotanakinani. Ikenkithatakagaeyerini paata joriiyopaeni, kaari joriyyo, jewawentay-itziririni atziri, maawaeni. **16** Eejatzi iinja noñaayeri oetarikapaeni okaate ikemaatsitawentena.

17 Ari ryaatanaki Ananiyyashi, ikyappaaki pankotsiki. Rowaappaakiniri rako iitoki, ikantziri:

—Sawoori, eerokataki noyemijantzinkarite. Rotyaantakina Awinkatharite Jesoshi, riraga ofaagakimiri janta awotsiki pikinapaakinta. Rotyaantana pikokichaatantaneeyari, eejatzi okithaatakaakimi Ishire Tajorentsi.

18 Roojatzi opariyaantanaka rokikira oshiyawitawori ipentaki shima, kokichaataperotanee. Ari ryaatanaki, ikaawoshitakoteetakiri Tajorentsi.

19 Ari rowawaetaka, roojatzi ishintsitantanaa.

Apaanipaeni kitejiri ijeekimotawitanakari aapatziyariri Jesoshi janta Tamaashikoki. **20** Riyaataki riraga Sawoori ipiyotapiintaga joriiyopaeni, ikantapiinteeeyirini:

—Riroperotakiroña Jesoshi Itomi Tajorentsi.

21 Antawo tee riyotakotziri riraga kemaeyawakiririni. Ikanteeyini:

—Tema rirotaki riraga thonkaeyerinimi aapatziyariri Jesoshi janta Jero-jareeki. Tema rootaki ipokashitantawitakariri jaka roojoteeyakiterinimi aapatziyariri Jesoshi, ragaeyanakirinimi janta ñaanakowenantsirsirkinta. Omaanta iroñaaka ikantzi: “Paapatziyaperotaari Jesoshi”.

22 Eekiro ryaatanakitzi Sawoori ikenkithataperotzi, tee ithaawantaneentaari amineeyakiririni. Tee riyotakotziriroña riraga joriyyotatsiri. Riyotakaaperotakiri, ikantzi:

—Riraga Jesoshi, rirotaki Kirishitotatsiri, riraga Rotyaantanewo Tajorentsi.

Riraga Sawoori ishiyapithatakari joriyyopaeni

23 Ari awijanaki osheki kitejiri roojatzi rajaryaanteeyawitakarini joriyyopaeni rowamaerimi riraga Sawoori. **24** Omaanta riyotakotakiri Sawoori rajaryaakari. Maawaeni kitejiriki tsiteniriki ramineeyawitakawoni joriyyopaeni ikyaaantapiintari rowaga Tamaashikoki, ikowaeyawitakanri raawakirimi Sawoori, rowamagaeyerinimi. **25** Omaanta, tsiteniriki itsipatanakari riyotaanewopaeni otantotsiki rowaga inkitzirori

pankotsipaeni; rateetakaanakiri, roojatzi rotetantakari antawoki kantziri, roojatzi royiitaktantaari kantziriki okaankiitiira. Roojatzi ishiyantanaa, tee iñeyawaerini owamagaeyerinimi. ²⁶ Ari rareetapaaka Jerojareeki. Ikwawitaka itsipateeyapaeyaaarinimi aapatziyariri Jesoshi, omaanta ithaawanteyawakarini. Iitakashiwitakari tee raapatziyari Jesoshi.

²⁷ Roojatzi raanakiri Werenawee, intentanakari janta ijeekinta rotyaan-tanewo Jesoshi. Ikamantapaakiri:

—Kyaaryo, ragaeyerinimi Sawoorika ayemijantzinkarite janta Tamaashikoki, omaanta janta awotsiki iñaakiri Awinkatharite Jesoshi, ikenkithatakaakiri. Raapatziyari, roojatzi janta Tamaashikoki ikenkithatakotapiintapaakiri irira, tee ithaawantayitapaakarini theenkantsiri.

²⁸ Ari raakameethateeyakirini aapatziyariri Jesoshi, kameetha ijeeki-motakiri rirori janta Jerojareeki. Ikananti Sawoori, kijo rowaeyakirini ayemijantzinkarite. Kameetha ikenkithatakotaperotziri Awinkatharite.

²⁹ Ikenkithatakagaeyawitakarini joriiyopaeni iyotzirori ipaante kireeshiyajatzi, omaanta ipiyathateeyawakarini; ikowaeyawitanakani rowamaer-im, ³⁰ omaanta riyotakotakiri iyemijantzinkarite, roojatzi raantanakari Sawoori janta Sesareeyaki. Roojatzi rotyaanteeyakirini Taarishoki.

³¹ Kameetha ijeekaeyini aapatziyeevakirinipaeni Jesoshi janta Joreeyaki, Karireeyaki, Jamaaryaki. Eekiro ryaatanakitzi raapatziyeeyanakarini Jesoshi. Rameteeyakawoni iñaaperoeyirini Awinkatharite. Eejatzi osheki iweshiryakaaperoeyakarini Ishire Tajorentsi.

Itajonkantayitzini Peetero janta Riiraki

³² Ari ikinakinayitakini Peetero rareetayitarini aapatziyariripaeni Jesoshi, roojatzi rareetantakari nampitsiki iitachari Riira. Janta ijeeki osheki aapatziyariri Jesoshi. ³³ Iñaapaakiri shirampari iitachari Eneeyashi. Okaatzti ojarentsi 8, imaryaka imaamentokti, ikijopookitaki. ³⁴ Ikanatapaakiri:

—Eneeyashi, rirotaki Jesokirishito etsiyatakoteemini. Pikatziyanee, pi-wetsikaero pimaamento.

Intsipaete ipiriintanaka. ³⁵ Iñeyakirini riirajatzi, eejatzi saronajatzi; roojatzi maawaeni raapatziyeeyantanakarini Awinkatharite Jesoshi.

³⁶ Ojeekawita Joopeki aapatziyariri Jesoshi oetachari Tawiita. Owaero ipaanteki kireeshiyajatzi: Toorikashi. Kameetha iroka antayitzirini: ashi oyiro oneshironkatantayitzini. ³⁷ Omantsiyatanaki, roojatzi okaman-taka. Ari ikiwachempokiteetakiro owathani, roojatzi rowakiro janta shi-tamenkotsiki, janta jeñokiini. ³⁸ Rowaga Riira okaakintawo Joope aritaki ijeeki riraga Peetero. Riraga aapatziyariripaeni Jesoshi, ikemakotakiri rirori eniro ijeeki janta. Rootaki rotyaantanakariri apite shirampari:

—Pishintsite, pikantakiteri Peetero ipokeeta.

Ari ryaataki, ikantaperotapaakiri:

—Intsipaete, poayaatanakina paminakitero tsinani, kamaki.

³⁹ Ari ryaatanakini Peetero, royaatanakiri. Rareetakaakari, raanakiri janta pankotsiki jeñokiini. Otapotheeyawentakawoni maawaeni kamayi-teentsirini oemii, iragaeyakanii. Eeniro oñaapiytakironi ookayitakirini, eejatzi oethaariperopaeni. Okanteeeyakini:

—Tekirani okamini Tawiita, opayitanawoni maawaeni iroka noethaari.

⁴⁰ Ari roemishitowaeyapaakirini maawaeni atziri. Rotziwerowanaka, ikenkithatakaeri Tajorentsi. Ipithokashitanakawo kamaentsiri, ikan-tanakiro:

—Tawiita, pipiriintee.

Roojatzi okiryaantanaa, oñaatziiri Peetero okaakini, roojatzi opiriinan-tanaa. ⁴¹ Ikathawakoteero, ikatziyeero. Ikaemaeyakirini eejatzi aapatziy-eyearirini Jesoshi, eejatzi roori ikaemaeyakironi kamayiteentsirini oemii, maawaeni. Ikyapaaki, ikanteeyawakirini:

—Pamine, añaanee eejatzi.

⁴² Ari ikemakoeyakironi maawaeni joopejatzi. Ikaatzi oshekini aap-atziyayitanakaririni Awinkatharite Jesoshi. ⁴³ Osheki kitejiri ijeki Peetero Joopeki. Ijeeki ipankoki Shimo, riraga wetsikapiintziriri mashitsipaeni.

10

Koroneeryo, riraga kapitaanotatsiri, raapatziyakari Jesoshi

¹ Ari eeniro ijeeki janta Sesareeyaki shirampari iitachari Koroneeryo. Rirotaki iyapitaanote osheki joraaro, poñaayitacharini Itaaryaki. ² Kaari joriyyo omaanta raapatziyaperotari Tajorentsi. Eejatzi ikimitteeyarini maawaeni jeekimotziripaeni. Osheki ikaminthagaeyirini joriyyopaeni owashironkayitacharini. Ikantatyaaani ikenkithatakaeri Tajorentsi. ³ Itsiteniityaanee oorya iñaashitawakari ronampiri Tajorentsi, roñaagaperotapaakari. Rokaakintapaakari, ikantapaakiri:

—Koroneeryo.

⁴ Raminaperotawakiri, joreririri. Oshekini ithaawantaperotanakari. Ikantawakiri:

—¿Itaka, Nowinkatharite?

Ikantanakiri:

—Ikemakimi Tajorentsi pamanapiintakiri, eejatzi iñaakimi pikaminthaakotapiinteyakirini atziripaeni. ⁵ Rootaki ikowantakari iroñaaka potyaante apaaniipaeni shirampari janta Joopeki. Pikaemakaanteri riraga Shimo, iiteetziri eejatzi Peetero. Irira ikamantemi oetaka ikowakaakimiri Tajorentsi. Pikemijantawakiri. ⁶ Irira ijeekimotziri iitachari eejatzi Shimo, riraga wetsikapiintziriri mashitsi. Eenitatsi ipan othapyaakiini antawo inkaare.

⁷ Ari ipiyanaa ronampiri Tajorentsi, riraga kenkithawaetakaakitziriri. Ikaemakiri Koroneeryo ronampiri apite, eejatzi joraaro apaani. Riraga joraaro rirotaki aapatziyaperotariri Tajorentsi. Ikaateeyirini amitakoeyiririni Koroneeryo. ⁸ Ikamanteeyakirini maawaeni iroka ikantakiriri ronampiri Tajorentsi, roojatzi ikantziri:

—Nokowaki piyaateeyeni Joopeki, paminerri riraga Peetero.

Ari riyaateeyanakini. ⁹ Inkaamani, aririka itampsikatapaaki oorya, rokaakinantapaakwo rowaga Joope. Tekiraata rareetapaakari, riraga Peetero eeniro rateetanaki jenoki, ikenkithatakaeri Tajorentsi. ¹⁰ Itasheyawitaka, ikowawita royaami. Eenitatsi wetskiniriri royaari, omaanta tekira othonkiro, ari ramparyataakari. ¹¹ Iñaakiro jenokinta inthomaenta. Ayiitakotapaaki pankotsiki oshiyawitawori tokoya antawo. Roerikakoetakiro janta okaamawotapaakinta. ¹² Rotetayitakan inthomaenta maawaeni inashiyitacharini riraga kaari rowaeta; rirotaki otetayiteenchani chaancho, maankipaeni, jenokiweripaeni, maawaeni.

¹³ Iroñaaka ikemawakiri Tajorentsi, ikantziri:

—Peetero. Ajaa, thame powamaeri, eejatzi poyaari.

14 Ikantawakiri:

—Nowinkatharite, paerani pikantakiri nochariniitenipaeni iitarikapaeni ikameethazi royaari, eejatzi iitarikapaeni kaari royaari. Eejatzi naari, tee nametapiintari noyaari irika kaari rowaetari pikantawitakinarika noyaari iroñaaka.

15 Rapiiteeri:

—Tema naaka Tajorentsi. Nokantzimi naaka: “Kameetharini rirori-paeni”. Ariraka nokowakaakimiri naaka, eero pikantashitari eerori: “Tee ikameethatzi”. **16** Rapiiteeniri paashini:

—Powamaeri, poyaari.

Roojatzi itzinaakotanteetaariri jenokinta.

17 Tee riyotakotawakiro Peetero iroka iñaakirika. Ikenkithashiryaanaka: “¿litaka ikowakaanari Tajorentsi nanteniriri? ¿litakaka ikanantanari”?

Roojatzi rareetantapaaka pankotsiki rotyaantanewo Koroneeryo. Ro-jampitakowentapaakiri:

—¿Tsika ipanko Shimo, riraga wetsikapiintziriri mashitsi?

Ikamanteetawakiri:

—Iroka ipankoka.

18 Ari rojampitakiri atziri inthomaenta:

—¿Arima ijekimotzimi riraga Shimo Peetero?

Rakanakiri:

—Jee, aritaki ijekakki.

19 Eeniyo ikenkithashiryaawo Peetero iñaakiri, ari okantakiri Ishire Tajorentsi:

—Ikantaka rareeteeyapaakani 3 shirampari, kowapaakimiri.

20 Payiitashiteri. Eero pikantashiryaashita, poyaateeyanakirini. Tema naaka amaeeyakiririni.

21 Ari ranaashitashitapaakari, ikantapaakiri:

—Naaka pikoyiri. ¿litaka pipokashitantanari?

22 Ari rakanakiri rirori:

—Rotyaantakina Koroneeryo, riraga kapitaanotatsiri. Rashi royro ikameethatzi, eejatzi iñaaperotziri Tajorentsi. Maawaeni joriyyotatsiri iñaaperoeyirini ikameethatzi. Ikantziri ronampiri Tajorentsi: “Pikaemakaanteri Peetero pipankoki. Pikemijantawakiro iñaani”. Rootaki rotyaananta-nari jaka.

23 Ari ikantawakiri:

—Pikyaapae.

—Ari.

Ineshironkatawakiri roejeekawakiri. Inkaamani royaatanakiri, itsipateeyanakarini apaanipaeni aapatziyariri Jesoshi rirotaki joopejatzti.

24 Apaani imagaeyanakini niyanki, roojatzi rareetantaka janta Sesareeyaki. Royaakiri Koroneeryo janta, ipiyoteeyakirini maawaeni isheninka eejatzi itsipaminthapiinteeyarini. **25** Roojatzi rareetanteeyapaakarini Peetero, riywashitanakiri Koroneeryo riwethatawakari, roojatzi rotziwerowashitawakari iitziki, ipinkathatawakiri. **26** Ari ikatziyakagaari Peetero, ikantziri:

—Pikatziyanee. Tee naaka Tajorentsi, rooma naaka atziri eejatzi, akim-itawakaaka.

27 Ari ikenkithatakaawakaapaaka, ikyapaakira pankotsiki. Iñaapaakiri osheki piyoteenchari, **28** Ikantapaakiri:

—Naaka joriyyo. Piyoteeyini eerori tee ishinetana nojoriyyotzinkarite not-sipateeyaaarini paashinijatzitatsiri atziri. Eejatzi tee ishinetana nareetyaari. Nokenkithashireeyakironi tee ikowakaanawo iroka Tajorentsi. Omaanta iroñaaka riyotaakina Tajorentsi tee okameethatzi nopinkiri paashini atziri, tee okameethatzi nokante: “Tee ikameethatzi”. Niyotaki ishinetakina Tajorentsi notsipatyaari paashinijatzitatsiri atziri. **29** Ari pikaemakaantak-inia, roojatzi nopolantanaka, tee nokijotanaki. Iroñaaka nojampitemi, ¿iitaka pikaemakaantanantarnari?

30 Ikantawakiri Koroneeryo:

—Chapinki tsitenini oorya, ikimitaka iroñaaka, namanakiri Tajorentsi jaka nonpankoki. Noñaakiri ikimiwitapaakari shirampari, ikatziyimotapaakina. Ikithaatawo shipakiryaaatsiri iithaari. **31** Ikantapaakina: “Koroneeryo, ike-makiro Tajorentsi pamanakiriri. Riyotakimi osheki pineshironkatayitzirini ashironkaenkar. **32** Potyaanteri atziri janta Jopeeki, ikaemakiteri Shimo, iiteetziri eejatzji Peetero. Ijeekimotziri paashini Shimo, riraga wetsikiriri mashitsi. Ojeeki ipanko othappyaakiini antawo inkaare”. **33** Intsipaete nokaemakaantakimi, roojatzi pipokantaka. Iroñaaka nokaateeyakirini riraga Tajorentsi jaka. Nokowaeyakini nokemaeyeroni iroka ikowakaakimiri Awinkatharite.

34 Ari iñaawaetanaki Peetero, ikantzi:

—Iroñaaka niyotaperotaki tee rinashitakagaeyeeni Tajorentsi atziri. Ikowakaakiri maawaeni atziri, joriyo eejatzji kaari joriyo raapatziyeeyarini Jesoshi, rootaki reentsitetantariri maawaeni. **35** Tee ikenkithashiryaaakoteero inashitayitanika añaani eejatzzi ametayitarini inashitacharipaeni, omaanta iñaaperoeyakirini ikameethatzi maawaeni pinkathateeeyirini, eejatzji maawaeni antapiintzirori kameethatatsiripaeni. **36** Naaka joriyo. Piyoteeyawakironi iñaani Tajorentsi reewateeyakinani, riyotakagaeyeakinani. Kameethari iroka ikantakinari: “Aririka paapatziyaperoeyarini Jesokirishito, kameetha nojeekekagaeyemini, pikimitawakaanteeyarini”. Rooma rirotaki Awinkatharite maawaeni, **37** piyoteeyakironi. Reewataki Jowani kaawoshitantatsiri ikenkithatakotakiri, ikantzi: “Kameetha pikaawoshitawenteeyarini Tajorentsi”. Roojatzi ikenkithatakotakiri paashinipaeni, itanakawori janta Karireeyaki. Ikamanantakiro iñaani Tajorentsi maawaeni nampsitskipaeni janta Joreeyaki. **38** Ikamanteeyirini atziri tsika ikantakiri Tajorentsi Jesoshi, riraga najareetejatzji, rotyaanantakawori Ishire, eejatzji ipitakari itajorenka; rootaki ikinakinayitantakarini, ranantayitakaworini kameethatayitatsirini. Rowawijaakoeyakirini kyaantariri kamaari. Eejatzji retsiyatakoeyakirini mantsiyaripaeni. Kijokiro royiri Tajorentsi, rootaki imatantakariri. **39** Noñeeeyakirini rantayitzirini janta inampikipaeni nojoriyyotzinkaritepaeni, eejatzji janta Jerojareeki. Noñaakowenteeyakirini rowamaanteetakariri, ikentakotanteetakariri koroshiki. **40** Aritaki okaataki kitejiri 3 ipiriinteeri Tajorentsi, roñaagakinari. **41** Tee roñaagari maawaeni atziri, inta naakapaeni roñaagakari. Riyoyaakina Tajorentsi, rootaki noñaantawaariri. Ikamaperotawitaka, ipiriintanaa eejatzji. Rojojatzi nowakaawaari, eejatzji nirakaawaeri. **42** Rotyaantayitakinani nokenkithatakoteri Jesoshi rirotaki owawijaaktantatsiri. Ikantakina: “Pikamanteeyerini atziri: ‘Ikowakaawaeri Tajorentsi Jesoshi ipiriinteeri maawaeni kamatsiripaeni roojatzi ikantakowenteeyerini maawaeni atziri: añaatsiri eejatzji kamawitachari’”. **43** Tema paerani ikenkithatakotzirini Rotyaantanewo Tajorentsi riraga kamanantayitzirorini iñaani Tajorentsi, ikanteeyini: “Eeniro ranteeyakironi maawaeni atziri kaari kameethatatsi; omaanta aririka raapatzkiyeeyarini Rotyaantanewo Tajorentsi, ikaminthagaeyerini rirori, eero ikijawentziri ranteeyirini, eero rowashironkaawentziniri kaari kameethatatsiri rantawitakari, eero ikenkithashiryaaakoteero eejatzji”.

44 Eeniro ikenkithatzi Peetero, roojatzi opokashitantakari Ishire Tajorentsi. Eejatzji opokashiteeyakirini maawaeni kemaeyawakirorini ikantakiriri. **45** Ari rotsikanateeyakarini riragapaeni joriyo, aapatziyariri Jesoshi: riraga tsipatariri Peetero. Ari riyoteeyanakini rotyaantaperotakiro

Tajorentsi Ishire, okithaatakaakari paashinijatzitsiri atziri. Rootaki rotsikanatantanakariri. ⁴⁶ Ikemaeyawakirini isheninka Koroneeryo iñaawaetantashitakawo paashinipaeni paantentsi, tee riyotagaetziri, eejatzikanteeyini:

—Kameetharini Tajorentsi.

⁴⁷ Ari ikantanaki Peetero:

—Ikimitakae aari, raashireteeyakironi Ishire Tajorentsi. Rooma okameethatzi ikaawoshitakoteeyarini Tajorentsi.

Ikantziri paashinipaeni joriyo:

—Jee, kameethataki.

⁴⁸ Roojatz ikanantariri Peetero isheninka Koroneeryo:

—Pikaawoshitawenteeyarini Jesokirishito, riyoteeyantemirini atziri pifiaaperotakiri.

Ikanteeyanakirini:

—Intsipaete pikaawoshitakotenari Tajorentsi.

Ari imatakini. Rootaki ikantantakariri isheninkapaeni:

—Pijeekimotanakinakya apaanipaeni kitejiri, piyotaaperotanakina paashini.

Ari ijeekanaki.

11

Ikemaeyakini jerojareejatzzi raapatziyakari Jesoshi kaari joriyo

¹ Ikemakoeyakirini riraga rotyaantanewo Jesoshi eejatzi maawaeni aapatziyaripaeni Jesoshi jeekatsiri janta joreeyaki, ikemakoeyakirini Koroneeryo. Ikanteetakiri:

—Raapatziyakari Jesoshi paashinijatzitsiri atziri; riro aapatziyakaakariri Peetero.

² Itonkaantanaari Peetero Jerojareeki, ikenkiimatashiteyawakarini ijori-iyotzinkaritepaeni: aapatziyariri Jesoshi omaanta eeniro ikenkithashiriilo eejatz itotonaty ishiramparitantari. ³ Ikanteeyawakirini:

—Litaka piyaatashitantariri paashinijatzitsiri atziri? Litaka pakiyotatariri rirori? Tee okameethatzi.

⁴ Ithotyaaperotakiniri Peetero, ikantziri:

⁵ Iroñaaka nokamantemi. Janta nojeekekakitzinta Joopeki, nokenkithatkaeri Tajorentsi. Koñaatziro noñaaperotakiro, tema noñaakiro oshiyawitawori tokoya antawomawo. Roerikaetakiro janta okaamawotayitapaakinira, opoñaaka jenokinta, ayiitzimotapaakina.

⁶ Naminaperotawakiro, joreririri: noñaakir kaari owaeyani: chaancho, maanki, jenokiweri, maawaeni. ⁷ Nokemakiri Tajorentsi, ikantakina: "Iroñaaka powamaeri; poyaari". ⁸ Omaanta nokantawitakari: "Nowinkatharite, eero nowari. Tee nametari kaari rowaetari, kaari ikowakagaetana noyaari". ⁹ Rapiitakina, ikantana: "Tema naaka Tajorentsi kantzimiri: 'Kameetharini'. Eero pikantashitari eerori: 'Tee ikameethatzi'". ¹⁰ Aritaki okaatzi 3 rapiitakina. Roojatz itzinagaero jenokinta.

¹¹ Ikanteeyapaakani 3 shirampari rareeteeyapaakani janta pankotsiki nojeekinta. Ipoñaanaka Sesareeyaki, rotyaanteetakinari. ¹² Roojatz okanantakina Ishire Tajorentsi: "Poyaatanakiri, eero pikijotanaki". Ari noyaatanakiri. Ejatzi royaatanakina irikapaeni ayemijantzinkarite, ikaateeyini ⁶. Nokyagaeyapaakini ipankoki riraga kaemakaantakinari.

¹³ Ikenkithatkaawakina, ikamantawakina tsika ikantakari iñaantakariri ronampiri Tajorentsi. Roñaagantapaakariri, ikantziri: "Potyaanteri atziri janta Joopeki. Pikaemakaanteri Shimo: iiteetziri eejatzi Peetero. ¹⁴ Rirotaki

iyotaapaemironi Iwaperite Tajorentsi, pawijkotanteeyaaari. Eejatzi ikimitagaeya rirori maawaeni jeekayitatsirini pipankoki".¹⁵ Nitantakawori nokenkithatakaakiri, roojatzi okithaatakaanteeyakarini Ishire Tajorentsi. Okimiteeyakaenika aari itantakaeri.¹⁶ Nokenkithashiryaaanakiro iñaani Awinkatharite ikantzitakari: "Riraga Jowa ikaawoshitakontariri Tajorentsi iñaaki, rooma naaka ari nokithaatakaakimiro Ishire Tajorentsi".¹⁷ Paerani aapatziyanteeyakaririni Awinkatharite Jesokirishito, tema ikithaatakaakaero Tajorentsi Ishire. Iroñaaka imonkaatanakiniri rirori paashinijatzitsiripaeni atziri. ¿Arima nothañaakyaari? Tema irira rirotaki Tajorentsi.

¹⁸ Ikemaeyantawakaworini iroka, tekatsi ikantaneeri rakaneeri, inta ikanteeyanakini:

—Kameethaperotakiroña Tajorentsi. Rooma ikowakagaeyakirini eejatzi paashinijatzitsiripi atziripaeni ikenkithashiryaaagaeya, raapatziyaperoyearini rirori, ryaatanteeyanakarini janta jenokinta.

Itsiparyayitanakironi janta paashinipaeniki nampitsi

¹⁹ Riraga kijakiriri Eshiteewani, eejatzi ikijeeyanakirini maawaeni aapatziyariri Jesoshi, roojatzi ishiyeeyantanakanpaenikipaenikipatsi: Jeniishiya, Cheepere, Antyokiyya, maawaeni. Janta tee ikenkithatakagaeyirini paashinijatzitsiripi atziri, inta rothataayitzirini ijoriiyotzinkaritepaeni ikenkithatakaayitakirini.²⁰ Eeniro itsipatayitakarini paashinipaenip aapatziyariri Jesoshi, poñaayitaneencharini Cheeperekii, eejatzi Shireeneki. Rareetantayitapaakarini rirori janta Antyokiyyaki, ikenkithatakapaakiri kireeshiyajatzii eejatzi. Ikanteeyirini:

—Paapatziyari Jesokirishito pawijkotanteeyarini.

²¹ Itajonkakowentapiintziri Awinkatharite, ikaatantakari oshekini aapatziyeyawakaririni Jesoshi, ameenteeyaririni Tajorentsi.

²² Ari janta Jerojareeki ikemakoeyakirini riraga aapatziyaripaeni Jesoshi. Rotyaantakiri Werenawee janta Antyokiyyaki.²³ Rareetapaaka rirori, iñaapaakiri ineshironkatziri Tajorentsi antyokiyyajatzii. Ikimoshiryaapaaki, ikanteeyirini:

—Kyaaryooroña, kijokiro powaeyirini riraga Awinkatharite, pikyaryoowenteniri maawaeni ikowakagaeyakimirimi.

²⁴ Kameetharini rirori Werenawee. Kijokiro rowaperotziro Ishire Tajorentsi, ashi royo roapatziyaperotari Awinkatharite. Eejatzi eekiro riyaatzi roshekiteeyanakini aapatziyaripaeni Awinkatharite.

²⁵ Roojatzi rowaagantanaka Werenawee Taarishoki, ikowapaakiri Sawoori. Iñaapaeri, roojatzi royaatantaaariri Antyokiyyaki.²⁶ Janta ikantani ipiyotapiintzirinta aapatziyariri Jesoshi okaatzi apaani ojarentsi. Riyotaapaakiri oshekantzi atziri. Aritaki janta itanakawo iiteetziri aapatziyariri Jesoshi: "Kirishiteyanotatsiri".

²⁷ Roojatzi rareeteeyantapaakani Antyokiyyaki paashinipaenikamanantayitzirorini iñaani Tajorentsi, ipoñaanaka rirori Jerojareeki.²⁸ Eenitatsi apaani iitachari Akaawo. Ikatziyapaaka janta ipiyoteeyaninta, iyotaakiri Ishire Tajorentsi, rootaki ikanantari:

—Inja itasheyeeyanakini atziripaeni janta maawaeni Joreeyaki.

Eenironi ipinkathariwenantzi Kiraaworyo, tema monkaatka ikantzitarini Akaawo.²⁹ Ikanteeyini aapatziyariri Jesoshi:

—Thame akaminthagaeyerini ayemijantzinkaritepaeni janta Joreeyaki, apakaanteri oetarika koetyemotariri.³⁰ Tsikarika okaatayitzini jeekimotayiteerini, aritaki okaate apakaantayiteririni.

Aritaki imatakiro ikantakiri. Ipiyotakiri koriki, ipawakiri Werenawee, eejatzi Sawoori. Ikantakiri:

—Ajaa, irika koriki: pagaeyanakinirini aataperoteenchari aapatziyariri-paeni Jesoshi janta Jerojareeki, ikaminthagaeyantyaaririni ashironkagaey-acharini.

Ari raanakinirini jerojareejatzi, ipapaakiri rirori. Ari rowaagaeyakinirini rirori ashironkagaeyacharini.

12

Erooreshi Akiriipa, rirotaki kijakiriri aapatziyariri Jesoshi

¹ Roojatzi riraga jewaperowenantatsiri Erooreshi, iiteetziri eejatzi Akiriipa, ikijayitakirini apaanipaeni aapatziyariri Jesoshi.

² Rowamaakaantakiri Jantyaako, ro ithatyanteetakariri jawiri, thatzik. Irira rirentzi Jowa. ³ Riyotaki inimoeiyakirini joriyyopaeni, rootaki raakaanantawitakariri Peetero eejatzi. ⁴ Ro raakaanantakariri apaani kitejiriki rowantapiinteetawori paa kaari tapiyacha. Iitashiwitaka aririka omonkaatakyo kitejiri Rawijantari achariniuteni paerani, roñaagaeyerini joriyyopaeni rowamaaeri. Raakiri, roojatzi ipakiri 16 joraaro, shenterini. ⁵ Ari romonkyaagaetakiri. Riraga aapatziyariripaeni Jesoshi ikantatyaaani maawaeni kitejiriki ramanakowentapiinteeyarini, ikantziri: "Powawijaakoteeri Peetero".

⁶ Ari ositenitananki, ro inkaamani roeyowakaanterimi Erooreshi, rowamaakaanantyaaririmi. Ikowawita ramineeyerinimi atziri rowamaakaantakiririka. Ari omonkyaagakaantawitakari Peetero omonkyagamentotsiki, imaanaki; rojatekakiri apite joraaro, imaaiki irira. Roojontakari apite karenatha. Ishentawitakawo ashitakontsi paashinipaeni joraaro. ⁷ Ari romapokashitapaakari janta ronampiri Awinkatharite. Rotzinkapaakiri imerikiki, ikaakapaakiri. Ikantakiri:

—Pishintsite pipirintee.

Roojatzi oshiryaashitantanaka karenatha apaniroeni rakokitzirira, roojontawitakariri. ⁸ Ejatzi ikantziri:

—Pikithaataneeyawo pimaatha, pijapatotaneeya.

Ari ikithaataa, ijapatotetaa. Ejatzi ikanteeri:

—Papineekakotya pijawamento poyaatanakina.

⁹ Ishitowanee, royaatanakiri. Tee riytzti Peetero kyaaryooperotakirika rowawijaakoteeri ronampiri Tajorentsi. Raamashitaka imishiwaetashitaka. ¹⁰ Rawijanakiri shentawitariri apaani, eejatzi paashini rawijanakiri. Rareetakawo ironta ashitakontsi, ironta ikinantapiintari nampsitsiki. Ashitariimotashitanakari. Rawijaneero, rowaaganaka janta awotsiki. Roojatzi rinteenaryaantantanakari ronampiri Tajorentsi. ¹¹ Riyotakotaa Peetero, ikantzi: "Iroñaaka niyoperotaki rotyaantakinari Nowinkatharite ronampiri raakowentakina rowamaenami Erooreshi. Ejatzi ikimitakowentakina, tsikarika ikantenami nosheninkapaeni". ¹² Ikenkithashiryaaanakiro, roojatzi ryaatantaka opankoki Mariiya, riniro Jowa. Iiteetziri eejatzi Marikoshi. Janta ipiyoeyakaninta osheki aapatziyariri Jesoshi, ikenkithatakagaeyirini Tajorentsi. ¹³ Rompojakowitapaakawo Peetero ashitakontsi, rowaga othapikitzirinta: tok, tok. Ari okatziyashitawanakari onampirents oetachari Roore. ¹⁴ Iyowaantetawaeri ipaante Peetero, roojatzi okimoshiryaaantaperotanaka. Omaanta tee ashitaryaanakiniri, omaanta oshiyashitanaka. Okamanteeeyirini kenkithatakagaeyiririni Tajorentsi:

—Pokapae Peetero omookinta.

15 Ikanteeyawakironi:

—Pishinkiwentashitaka.

Eekiro okantanakitzi:

—Kyaaryooperotaki.

Ikantakiro:

—Kaari Peetero, irintakya ronampiri Tajorentsi aminakowentziriri.

16 Eekiro rompojanakitziroroña, tok, tok, roojatzi rashitaryaantaanari.

Ari iñeeyawaerini, rotsikanatakari, ikantawakagaeyanakan:

—¿Tsika ikinapaeka?

17 Ari rakotashitanakiri, ikantziri:

—Pimaerite.

Roojatzi ikamanteeyapaerini tsika ikanteeri Awinkatharite, roeyowaantaariri. Eejatzi ikantziri:

—Pikanteri Jantyaako, eejatzi pikamanteeyerini ayemijantzinkaritepaeni.

Roojatzi ishitowantanaa, riyaatanee imanapithatakari joraaropaeni.

18 Okitejitanaki osheki ikantawakaawenteeyakarini joraaropaeni:

—¿Tsikakya ikantanakaka iroñaaka Peetero?

19 Ikowakowatakaantawitakari Erooreshi, tee iñaagaeri. Rojampiiyawitakarini joraaro shentawitariri:

—¿Tsikaroña ikinaneeka?

Rakanakiri, ikantanakiri:

—Taanitya, tsikarika, tee niyotzi; tee noñaawaeri.

Ari ikjakirka Erooreshi rirori, rowamaakaanteeyakirini, shemi. Ari roojatzi rookaneero rirori Joreeya, rowaaganaa janta Sesareeyaki, roojatzi ijekantapaa.

Ikamantakari Erooreshi

20 Ari ikanta Erooreshi ikoshekawakari poñaachari Tziiroki eejatzi Shirooki ikanta ikenkithashiryagaeyakani ikoshekane wo raakameethateeri, tema ari riyompariteeya. Rotyaanteeyakini jatashterini rirori.

Ikanta jeekapankotzirori rirori rameentaperotanewo, ii tachari Waraashito raakameethatawakiru pokashitakiriri. Ikanteeyapaakirini:

—Pikanteri Erooreshi: “Paakameethateeri tziirojatzi eejatzi shiroojatzi riyomparityaata, eero pithañaawo royaari”.

Ikantziri Waraashito:

—Ari, namitakoeyemini.

21 Ari paashini kitejiri ikaemaeyakirini Erooreshi, raakameethateeyakirini. Rowaneenkatakawo jewawenantatsiri iithaari, ijekaki janta iwinkatharimentoki. Osheki ikantakaaperotaka ikenkithatakagaeyakirini. Ikantziri:

—Eero pikenkithashiryashita. Nopae yemini maawaeni koetyeemotayitakimirini.

22 Roojatzi ikimoshireeyantanakani pokaentsiri, ikanteeyanakini:

—Kaari irira atziri akemaeyakirini, inta apaani tajorentsi. Kameetharini rirori.

23 Ari osheki ikantakaaperotaka Erooreshi, riweshiryaaawentakawo ikanteeyakiririni atziri. Omaanta roonakari Awinkatharite, rotyaantakiri ronampiri ikantakiri:

—Tee iñaaperotana Erooreshi. Piyaate pomantsiyeeri.

Ari riyaataki, roojatzi romantsiyaantakari, ikamantaka, roojatzi rowantakari chowitsi.

²⁴ Omaanta riraga aapatziyariri Jesoshi ikinakaantayitanakawoni iñaani Tajorents. Roshekiperotanaki aapatziyeyawakaworini. ²⁵ Riraga Werenawee, eejatzi Sawoori retakotari aapatziyariri Jesoshi janta Jerojareeki. Roojatzi ipiyantanaa Antyokiiyaki, itsipatanaari Jowa, iiteetziri eejatzi Marikoshi.

13

Riyaatzi Sawoori eejatzi Werenawee janta Cheepereki

¹ Iroñaka janta Antyokiiyaki ikaateeyirini aapatziyariri Jesoshi matakaakiriri Ishire Tajorents: omatakaakiri apaanipaeni kamanantayitzirorin iñaani Tajorents eejatzi paashini apaanipaeni omatakaakiri riyotaakiri atziri Iwaperite Tajorents. Iwaero apaani omatakaanewo Ishire Tajorents rirotaki Werenawee, paashini Shimo (iiteetziri eejatzi Chenkari), paashini Rooshiyo, (riraga shireeneejatzi); paashini Maneemi, (itsipamintharini pinkathari Erooreshi eenironi ikaatzini), paashini Sawoori, (iiteetziri eejatzi Paaworo), maawaeni. ² Ari paashini kitejiri ipiyoteeyani ipinkathatziri Awinkatharite ikenkithatakakiri, itzitawenteeeyakarini Tajorents. Roojatzi okanantakari Ishire Tajorents:

—Pikanteeyerini Werenawee eejatzi Sawoori: “Panteniri Tajorents oetarika ikowakaakimiri”.

³ Ari roojatzi rowakiniri rako iitoki ramanakowentakiri Tajorents, roojatzi ikanantanakariri:

—Piyaate pantero ikowakayimiri Tajorents, naakakya kanterini Tajorents ramitakotemi.

⁴⁻⁵ Ari otyaantakiri Ishire Tajorents, roojatzi ryaatantakari Sereeyoshiyaki janta okaakini inkaare antawo. Raanakiri Jowa Marikoshi ramitakotantyaariri. Ari rotetapaaka pitotsiki. Otyaantakotziri tampyaa, ikinakotanaki Cheepereki, rootaki antawo othampishi. Ojeeki janta nampsiti oetachari Jaramiina: rareetanteeyapaakarini janta, ikenkithatakapaakiro iñaani Tajorents janta ipiyotapiinteeyaninta joriyyopaeni. ⁶ Roojatzi ithotyagaeyananakironi maawaeni nampsitsiki janta Cheepereki, maawaeni. Roojatzi rareeteeyapaakani Paajoshiki. Janta iñaapaakiri sheripyaritatsiri, iitachari Warijesooshi, rirotaki joriyo. Roshiyaarimi kamanantayitzirorin iñaani Tajorents, ikantapiintzi:

—Naaka kenkithatzirori iñaani Tajorents.

Jaa, itheeyashita. ⁷ Itsipatapiintari jewawenantatsiri iitachari Seerijiyo Paaworo. Eeniro riyoperotzi irira. Ikaemakaantakiri Werenawee, eejatzi Sawoori; ikowaki ikemiro iñaani Tajorents. ⁸ Ari ikanta Sawoori ikenkithatakotapaakiri Jesoshi omaanta ithñaawitakari riraga sheripyari; tee ikowakaawitari riraga jewawenantatsiri raapatziyari Jesoshi. ⁹ Ari iyotaaperotakiri Ishire Tajorents Sawoori, iitachari eejatzi Paaworo. Iyotaakotakiri sheripyari, rootaki raminaperotanakiri Paaworo, ¹⁰ ikantanakiri:

—Pamatawitantaperotaki. Teeroñä pikameethatzi; pikimitakari iwinkatharite kamaari. Tee pikoyiro kameethatayitatsirini, inta pikowapero taki pamatawitantayiteni. Pikowaki pamatawiteeyerini maawaeni kowatsiri riyoteri Nowinkatharite. Eerowa pikenkithashiryaaneenta. ¹¹ Iroñaka itajonkemi Nowinkatharite pitsitenishitakote. Ojamanitanaki, eero paminittaa.

Roojatzi itsitenishitakotantanaka, tee ikokichaatanee. Ipampipampitanaki, ikantanaki:

—Teewee nokokichaatz. Pikathataneenawee.

12 Ari iñaawakiri riraga jewawenantatsiri, rootaki rotsikanatantanakari. Roojatzi raapatziyantanakari Jesoshi. Ikantzzi:
—Kameethawee iroka ikamantakotziriri Awinkatharite.

Rowaaganaa kenkithatzirori iñaani Tajorentsi janta Aashiyaki

13 Ipoñaaka Paaworo Paajoshiki, rotetanaka pitotsiki, roteteeyanaani ee-jatzi maawaeni ikaateeyirini. Ikinakotanaki janta Peerijiki, rowaga pampi-iriyakiwer. Riraga Jowa Marikoshi rookanakiri, ipiyanaa rirori Jerojareeki. **14** Roojatzi paashini kitejiri rowagaeyanaani riroripaeni ejatzi. Rareeteeyapaakanji janta paashiniki Antyokiya: rowaga pishiiryawero. Saawaroki ikyeeyapaakini ipiyotapiinteyanira joriyyopaeni, ari ijeekaeya-paakini. **15** Iñaanateetziro eechonkiini rojankinarini Moeseeshi paera-niperoroña, eejatzi eechonkiini rojankinarini kamanantayitzirorini iñaani Tajorentsi paerani. Roojatzi riraga jewawentzirori janta ikantawakiri:

—Nojoriyyotzinkarite, pikowakirika eerori pikemijantakayeri atziri jaka, pikamanteri iroñaaka.

16 Ari ikatziyanaka Paaworo, rakotashitakiri romaeryagaeyakirini. Ikantziri:

—Nojoriyyotzinkarite, pikemijantena. Eejatzi eerokakya maawaeni paashinipaeni atzirika pinkathaperotakiriri Tajorentsi, pikemijanteeyawakinani. **17** Iroñaaka nokenkithatakotemiri Tajorentsi raapatziyari joriyyopaeni. Paerani riyoyaakirini riragapaeni achariniiteni raapatziyari. Impaetzti, ijeekantakari rirori janta Ejiipitoki romperataantawitakaririni, roshekitaawitakarini Tajorentsi. Itajonkakowenteeyirini, roojatzi rowawijaakowenantaari ejiipitojatzi.

18 Okaatzi 40 ojarentsi ikempoyaakirini riraga achariniiteniroña janta okaankiteronkiitzinta ijeekakagaeyawitakarini omaanta osheki itheenkaeyakirini Tajorentsi. **19** Ikowaeyawitakani rareeteeyaanimi Kanaanaki omaanta eenitatsi jeekawitacharini paashinijatzitsirii atziripaeni, otzikaeyawitawakaririni. Rinashitayitanri rirori. Roojatzi itajonkawentziniri Tajorentsi achariniiteniroña. Ithonkaeyakirini okaatzi ipaantepaeni 7. Roojatzi ipakiri achariniiteni iipatsite, ikantziri: “Ajaa, iroka piiptsite, pijeeckaeyantyaarini”. **20** Paerani ikashiyakaakari Tajorentsi Awaraamani ipashityaari icharineeteni iipatsite, omaanta roojatzi ijeeki irirapaeni janta Ejiipitoki. Rimpetaakirini riraga Tajorentsi raantanaariri iipatsiteki. Maawaeni iroka okaatki ojamanitaki 450 ojarentsi. Janta ijeekawitanta, tektsi jewawenantaperoeyeririni, inta riyoyaakirini Tajorentsi kantakotantsirsipaeni ryotakaantyaariri aririka rantziniri oetarika ikowakaakiri. Roojatzi reewatakaantzi riraga kamanantzirorini iñaani Tajorentsi iwaero Samoeri. **21** Roojatzi ikantakiri achariniiteni Tajorentsi: “Nokowaeyakini atziri reewawentaperoeyenani”. Ari riyoyaakinirini noshametzi Sawoori itomi Shishi, reewawenantaririni achariniiteni. Riroteeyakini icharineeteni Irijamiini. Okaatzi 40 ojarentsi reewawenantaki Sawoori, **22** roojatzi ikanantaa Tajorentsi: “Eero reewawenantanee eejatzi Sawoori, tee ikameethatzi, inta reewawenantee Iraviiiri, riraga itomi Isayii. Rivotaki noñaaperotakiri ikameethaperotaki, tema ari rantakinawo maawaeni nokowakayiriri”.

23 Rivotaki icharineeteni Iraviiiri owawijaakotakaeri: iwaero irira Jesoshi. Tema ikantzini Tajorentsi: “Riro icharineeteni Iraviiiri owawijaakoeyeririni atziri”. Monkaataka iroñaaka ikantzitakaririni.

24 Roojatzikya Jowa kaawoshitantsiri ikenkithatakagaeyakiririni maawaeni ajoriiyyotzinkaritepaeni: “Pikenkithashiryagaeyani, eero pikimiteeyaaani paerani, ari nokaawoshitakoeyemirini Tajorentsi, eejatzi rowawijaakoeyemini irira”. Roojatzi ikenkithatapaaki riraga Jesoshi.

²⁵ Eejatzi riraga Jowa rooteentsi ikame, ari ikantzi: “Tee naaka irira pikenkithashireeyawitarini. Tee naaka riraga owawijaakoeyemirini, omaantakya poyaatanari rirotaki Jesoshi owawijaakotemini. Osheki noñaakoweenkatakiri rirori; rooma naaka tee noñaakoweenkata”.

²⁶ Eekiro rowaaganakitziniri Paaworo, ikanteeyakirini:

—Nojoriyyotzinkaritepaeni, tema ashenkateeyakirini Awaraamani, eejatzi eerokapaeni paashinijatzitsiri atziri, thame akimitaperoeyaarini rirori, apinkathaperoeyerini Tajorentsi. Iroñaaka nokanteeyemini: aririka aapatziyeyarini Jesoshi, ari rowawijaakoeyakaeni. ²⁷ Omaanta tee ryoteeyawakirini jerojareejatzi, itheenkaeyawakirini. Eejatzi ikimiteeyakani iwinkatharitepaeni, tee ryoteeyawakirini rirotaki Rotyaantanewo Tajorentsi. Maawaeni saawaro iñaanatapiinteyawitawoni rojankinatayitzirini kamanantayitzirini iñaani Tajorentsi, omaanta tee ikemaperotawakiro, rootaki kaari ryoperoeyantawoni kameetha okenkithatakotziri Jesoshi. Tema okantzi: “Rowamaeteri paata Rotyaantanewo Tajorentsi”. Ari rowamaakaanteeyakirini maawaeni atziri rirori, rooma tee ryotawakiri. ²⁸ Tekatsi rantawitya, rowamaakaantashitakari. Ikantakowentashitakari Peraato riraga jewawentziriri: “Powamaakaanteri”. ²⁹ Monkaateeyakani maawaeni rojankinatakotziteetakaririni: osheki rowashironkaakiri, ikentakoteetakiri koroshiki, ikamaki. Roojatzi paashinipaeni atziri royiitakoteri rowaeri janta omooki impeeta. ³⁰ Ikamaperowitaka, omaanta rowañaagaeri Tajorentsi. ³¹ Ari okaataki osheki kitejiri roñaagayitarini ryotaanewopaeni, riraga tsipateeyapaaririni chapinki Jerojareeki: riraga poñaachari Karireeyaki. Riroteeyakini iroñaaka kamanteyiririni atziri:

—Piriintanaa Jesoshi. Noñaagaeyakirini.

³²⁻³³ Eekiro ikanteeyanakitziirini Paaworo:

—Okameethataki ikanteeyakiririni paerani Tajorentsi achariniiteni. Rojankinatakaakiri paerani ojeekantakari mampaantsi, apiteteenchari. Okantzini: “Ikanteri Tajorentsi Rotyaantanewo paata: ‘Rooma naaka kowashitacha: nopersiinanteemiri nokantaperotanteemiri notyomi’ ”. Iroñaaka nokanteeyemini: imatakiro Tajorentsi ikantakiririni achariniiteni: ipiriinteeri Jesoshi, ayoteeyantakarini rirotaki Rotyaantanewo Tajorentsi. ³⁴ Iroka paashini ikantakiririni Tajorentsi: “Notyomi, nomonkaataperotemiro maawaeni okaatzira nokantayitakiririni Iraviirini: notajonkakowentemi peewaperowenantyaari”. Aritaki okimitakaantzi Iwaperite Tajorentsi: ikamaperotawitaka, ipiriintaneeri Iriri, eero ijeekaperotzi inthomaenta kipatsiki. ³⁵ Tema rootaki iroka rojankinatakiniri paashiniki mampaantsi: “Tajorentsi, niyotaki eero pishinetziri pitomi ipathaye kipatsiki: rooma osheki piñaaperotakiri ikameethaperotzi”. ³⁶ Pikenkithashireeri Iraviirini, paeran imonkaatakiniri Tajorentsi maawaeni ikowakaeriri. Roojatzi ikamantaka rirori. Ikitateetakiri, itsipatagaetakiri isheninkapaeni, roojatzi ipathaaperotantanaka. ³⁷ Omaanta irira Jesoshi ipiriinteeri Tajorentsi, tee ipathaaneentzi rirori. ³⁸⁻³⁹ Iroñaaka, nojoriyyotzinkarite maawaeni, piyoteeyawakironi iroka. Eeniropanteeyakirini kaari kameethatatsiri, omaanta añaatsi iroñaaka Jesoshi, ikaminthagaeyakimini. Tee ikowakayimi piyaateeyeni paamariki kaari tsiwakanitatsini, inta ikowaki rowameethateeyemini, rowawijaakoeyemini. Iroka rojankinarini Moeseeshi, tekatsi okantya owameethateeyemini. ⁴⁰ Kyaaryoowa, pikimitarikari riraga ojankinatzirorini kamanantayitzirorini iñaani Tajorentsi ikantzini:

⁴¹ “Ikantzimi Tajorentsi: ‘Pamine, theenkantatsiri, pikenkithashireeyanakyaani: nothonkaeyiminikari. Iinja piñeeyinani notajonkawenantaperotanaki nomatayiteroni kaari piñaapiinteeeyini. Aririka nokamantawitemi oetarika nanteri, eero pikemijantana’ ”. Rootaki ikantziri kamanantayitzirorini iñaani Tajorentsi. Ari nojoriyyotzinkaritepaeni, iroñaaka paapatziyari Jesoshi, ithonkaeyiminikari Tajorentsi.

Rootaki ikantakiriri Paaworo ijoriiyotzinkaritepaeni.

⁴² Ari ishitowaeyananakinira, roojatzi ikantaperoeyawakirini riraga paashinijatzitsiri atziri:

—Inja paashini saawaro pipokaeyenira eejatzi. Paashini pikenkithatakagaeyenawoni niyotaperotantanakyaari.

⁴³ Ari ryaateeyanakini. Eeniro ikinanaki Paaworo awotsiki, itsipatanakari Werenawee. Royaateeyanakirini osheki aapatziyariri Jesoshi: rirotaki apaanipaeni joriyyopero, paashinipaeni peyachari joriyyo. Ari ikantakiriri Paaworo:

—Eekiro pikemijantaperotapiinteri Jesoshi ineshironkatantemiri Tajorentsi.

⁴⁴ Ari paashini saawaro ipiyoteeyakanmaawaeni antyokiiyajatzi. Ipiyotawentawo ikemijantero Iwaperite Tajorentsi. ⁴⁵ Riraga jewatatsiripaeni joriyyopaeni riraga kaari aapatziyariri Jesoshi iñaakirira piyoteeyeencharini, roojatzi okantzimoneenantanakari. Ikanteeyini:

—Tee okameethatzi iroka ikantziri Paaworo, eejatzi tee ikameethatzi irira. Osheki ramatawitantzi.

⁴⁶ Kameetha rakaperotanakiri Paaworo, eejatzi Werenawee. Tee ithaawashiretanaki, ikantzi:

—Eerokateeyakini nitawitakari nokamanteyawitakimironi iñaani Tajorentsi, omaanta pitheenkawakiro eeroka. Iroñaaka niyotaki tee pikoyi pikanteetatyeyaaani pañaaperotee janta jenokinta. Iroñaaka nyaatashiteri niyotaakiteri irira paashinijatzitsiri atziri, niyotaki raapatziyari Jesoshi rirori. ⁴⁷ Rootaki nyaatashitantlyaariri, rooma rotyaantakina Nowinkatharite ikantana: “Tema eeroka notyaantakiri maawaeni kipatsiki pikantayiterini paashinijatzitsiri atziri, rawijakotanteeyari riroripaeni. Pikenkithatakagaeyerini maawaeni, pithoteeyanakironi maawaeni nampitsipaeni”.

⁴⁸ Ikmanteeyawakaririni riraga kaari joriyyotatsi, ikimoshireeyanakini. Ikanteeyini:

—Kameetharini iñaani Awinkatharite.

Ari ijeeki osheki kaari joriyyotatsi riyoyagaeyakirini Tajorentsi ijeeki jenokinta, ikanteetatyeyaaani: riroteeyakini aapatziyeyakaririni Jesoshi, maawaeni. ⁴⁹ Othotyaayitanakani iñaani Awinkatharite maawaeni nampitsipaeni janta.

⁵⁰ Omaanta irira jewatatsiri joriyyo, osheki ikijeeyanakani. Riyaatashiteeyironi tsinanipaeni aapatziyawitariri Tajorentsi sheninkatakarii aataperoteencharipaeni, eejatzi ryaatashiteeyakirini aataperoteencharipaeni rirori. Ikanteeyirini:

—Thame akijeeyerini riraga Paaworo, eejatzi Werenawee. Tee ikameethatzi.

Roojatzi rotyaanantanakariri:

—Thame piyaaateeyanakini. Eero pipokae paata jaka nonampikika.

⁵¹ Ari rirori, rotekimotanakiri kipatsi iitzikira, pakak, pakak. Ikantziri:

—Iroñaaka piyoteeyakinani eero napiiteero nopyaa. Tee pikowaeyini pikemijante.

Roojatzi ryaatatantanaka Ikooñoki. ⁵² Omaanta ikimoshireperoeyanakini aapatziyariripaeni Jesoshi janta Antyokiiyaki. Kijokiro owaperoeyakirini Ishire Tajorentsi.

14

Rowaaganaa Paaworo janta Ikooñoki

¹ Janta Ikooñoki ikyapaaki Paaworo eejatzi Werenawee janta pankotsiki ipiyoteeyantapiintarinira joriyo, ikenkithatapaaki. Raapatziyeeyawakarini Jesoshi oshekini joriyo, eejatzi kaari joriyyotatsi. ² Riraga joriyyopaeni, kaari aapatziyari Jesoshi, riyotagaeyakirini paashinijatzitsiripaeni atziri, ikiyeeyawakirini aapatziyariripaeni Jesoshi. ³ Ari ojamani ijeekapaaki Paaworo, ikenkithatakotapiintziri Awinkatharite, tee ithawantari atziripaeni. Riraga Awinkatharite, imatakaakiri riraga Paaworo eejatzi Werenawee itajonkantayitzini, imatakaakiri oetarika kaari iñaapiintayitzini. Riyotakaakiri atziri kyaaryooperotaki ineshironkatantaperotaki Tajorentsi. ⁴ Omaanta ikijathatawakagaeyanakan maawaeni ikooñojatzi. Eejatzi inashiyitanakani: apaanipaeni kimitayitanakaririni jewatatsiripaeni joriyo. Rirori paashini kimitayitanakaririni riraga Paaworo eejatzi Werenawee. ⁵ Maawaeni kaari aapatziyariri Jesoshi riraga joriyo, kaari joriyyotatsi, jewatatsiri: ikowaeyawifakani rompojanteeyarinimi mapi Paaworo, eejatzi Werenawee. ⁶ Ari eenitatsi apaani kamantakiriri, rootaki ishiyeeyantanakarini janta Riishitaraki. Roojatzi rowaagantanaka Teeriwiki. Rootaki nampitsipaeni rikawooniyawero. Eejatzi ryaatzti othapikitapaakinta, ⁷ ikamanteeyapaakirini atziri tsika ikantyaari rawijakotanteeeyari.

Riyaatzti Paaworo Riishitaraki

⁸ Janta Riishitaraki ari ijeekaki shirampari amashitachari iitziki. Rootazi ikantztapaaka owakirani ikoñaatapaaki. Tee ranashineenta eechonkini. ⁹ Ikemijantawakiri Paaworo. Ari raminapaakiri irira riyotakotakiri, rameentakari Tajorentsi, rootaki imatantyaariri retsiyatatakantyaariri. ¹⁰ Antawo itacheronkawaantetanaki ikantakiri:

—Pikatziyaperotee.

Roojatzi romyaantanaka rirori, japok, roojatzi ikatziyatziyatantanaka.

¹¹ Oshekiniwee ikaatzi ñaakirori iroka imatakiri Paaworo. Ari iñaawaetanteeyawoni iñaani rikawooniyajatzi, antawo ikanteeyanakini:

—Rayitashitapaakae tajorentsika, ikimitapaakari shirampari.

¹² Riraga Werenawee iitashitari Joopiteri. Riraga Paaworo kenkithataantatsiri, rootaki iitantakariri rirori Merekoryo. ¹³ Janta otsipanampitawo rotantoteetziri nampitsi ari ojeeki roori opanko Joopiteri. Eejatzi riraga ñaanakowenantsiri irira ramaeyakirini tooropaeni, eejatzi oteyaki inchateyaki. Ramayitakinirini janta ikyapiintziro nampitsi, ikaateeyakirini osheki isheninkapaeni. Ikowaeyawitakan rowamaenirimi tooropaeni; iperimi Werenawee eejatzi Paaworo.

¹⁴ Ikemantawakari rirori, itzijagaanakiro imaatha. Ishiyashiteeyanakarini piyotawentari. Ikaemanaki, ikantzi:

¹⁵ —Atziripaeni. ¿Oetaka panteeeyirini? Eejatzi akimitawakagaeyani: aaka atziri. Ro nopolantakari nokamantemiro pookaero kaari kameethatatsiri pantayitzirini. Eero iroñaaka patsipetashitawo piñaaperotashitawo piwetsikayitzirini. Pikenkithashireeyerini Tajorentsipero, riraga ñaaoperotsisi. Rirotaki wetsikaeyirorini jenoki, kipatsi, inkaare,

maawaeni; wetsikaeyirorini eejatzi maawaeni jeekanteeyaworini.

¹⁶ Paerani ishineteeyimini maawaeni kaari joriyyotatsiri oetarika pametayitakarini pantayiterini pikowashitayitakarini eerokapaeni.

¹⁷ Omaanta riwetsikakimiro Tajorentsi riyotakagaeyimirini tsikarika ikana. Ineshironkaperoteeyakimini. Rowariyeeyakimironi inkani. Ikithokitakaapiinawantawori inchatapaoeni. Ikemakaapiintzimiro poyaari. Roemoshirenkapiinteeyimini pajankaneki. Rirotaki irika nokowakaakimirini pipinkathaperoteri; eerokya pipinkathaperotashitana naaka.

¹⁸ Osheki ikamantapiintawitakariroña, omaanta roowitaneecha rowamaashityaanarimi tooro. ¹⁹ Roojatzi ipokantapaaka joriyopaeni, poñaayitacharini Antyokiyyaki eejatzi Ikooñoki. Ramatawitapaakiri osheki atziri, ikantziri:

—Osheki ramatawitantzi Paaworo; pikieri.

Ari rompajanteeyakarini mapiki, iiteeyawitakarini kamaperotaki. Inoshikanakiri, rookakitziri janta othapikitapaakinta nampitsi. ²⁰ Ari riyaatashiteeyakirini aapatziyariri Jesoshi, itapotheetapaakari; roojatzi piriinantanaa. Ipiyeyanaani nampitsiki. Inkaamani rowaaganaa Paaworo Teeriwiki, itsipatanaari Werenawee. ²¹ Ikenkithatakotapaakiri tsika ikantari Tajorentsi rowawijaakotantzi. Ikemijantaperotakaakiri osheki atziri. Roojatzi ipiyantaa Riishitaraki, Ikooñoki, Antyokiyyaki. ²² Eekiro riyaatanakitzi raapatziyakaaperoeyakarini aapatziyariri Jesoshi. Ikantaperotziri:

—Eero pookiro iroka paapatziyaperotakari. Osheki akemaatsitayityawoni oetarikapaeni, roojaatzikya aantateeyaarini janta reewaperotzinta Tajorentsi; omaanta eero akantashiryaa.

²³ Janta ipiyotapiinteeyanira aapatziyariri Jesoshi, riyo yagaeyakirini aataperoteencharipaeni ashi piyotaantsi. Roojatzi itzitawenteeyakarini Tajorentsi ramaneeyirini, ikanteeyirini:

—Iraka aapatziyeeeyakimirini. Paminakowenteeyerini eejatzi pookakaakowenteeyerini.

²⁴ Ari ikinayitanakini paashiniki kipatsipaeni, ritapaakawo Pishiyyaki, roojatzi rareetantapaaka eejatzi Pampiyyaki. ²⁵ Ikamanantziro iñaani Tajorentsi janta nampitsi owaero Peeriji, roojatzi rowaagantanaa janta Ataaryaki. ²⁶ Roojatzi rotetantanaka pitotsiki, ikinakotanee Antyokiyyaki. Aritaki janta rotyaanteetakirinta paerani, ikanteetzirini Tajorentsi: “Iraka, pinashironkateri imatantemirori oetarika pikowakayeriri”. Rooma aritaki imataktiro.

²⁷ Rareetantapaari Antyokiyyaki ipiyoteeyapaakirini aapatziyariripaeni Jesoshi. Ikenkithatakagaeyakirini maawaeni rantakagaeyakiririni Tajorentsi rirori. Eejatzi ikantakiri tsika ikantaari ishineteeyantaaririni paashinijatzitsiria atziripaeni raapatziyeeeyantaaririni rirori Jesoshi. ²⁸ Ari ojamani ijekimotaatziri iyemijantzinkaritepaeni janta.

15

Ipiyoeyakaní aapatziyariri Jesoshi janta Jerojareeki

¹ Ari rareeteeyapaakani Antyokiyyaki joriyyopaeni poñaachari Joreeyaki. Irirapaeni rirotaki aapatziyariri Jesoshi omaanta riyotaapaakiri ayemijantzinkarite, ikantapaakiri:

—Rojankinatzini Moeseeshi: “Pitononayiteroni pishiramparitantari”. Erorika pantziro iroka, eero pawijkotee.

² Ari ipiyathatawakari Paaworo, itsipatari Werenawee. Tee eechonkiini iñaanatatakiri: osheki riyotaawakaeyawitakawoni. Riro ikowakaakari maawaeni aapatziyaripaeni Jesoshi rotyaantakiri Paaworo, Werenawee, eejatzi apaanipaeni paashini. Ikantawakiri:

—Piyaateeyeni Jerojareeki janta ijekinta rotyaantanewo Jesoshi, eejatzi riraga aataperoteencharipaeni aapatziyariri Jesoshi. Pojampitakowenta-paakiri ikantakotziro iroka. ¿Kyaaryoma ikowakagaeyakinani nototona-teeyeroni noshiramparitantari?

³ Ari rotyaanteeyakirini, ikinanaki Jenishiyaki. Rowaganaka, roojatzi Jamaaryaki. Icamantapiintayitzirini aapatziyariri Jesoshi janta:

—Osheki raapatziyeeyarini Jesoshi iroñaaka paashinijatzitatsiri atziri, rookaeyakironi rameteyawitakarini paerani.

Rootaki ikimoshireperotanteeyawakarini maawaeni kemaeyawakiririni.

⁴ Roojatzi rareeteeyapaakanji janta Jerojareeki, raakameetha-teeyawakirini maawaeni aapatziyaripaeni Jesoshi: rotyaantanewo Jesoshi, aataperoteencharipaeni ipiyotantapiinrantari, eejatzi maawaeni aapatziyariri Jesoshi. Ikantapaakiri:

—Niyaatanaki inteenanta oshekiniwee inashitayitacharinipaeni nampitsipaeni. Nokantakotakiri Jesoshi nokantayitakirini paashinijatzitatsiri atziri. Osheki imatakaakina Tajorentsi naapatziyakagaeyakarini paashinijatzitatsiripaeni atziri. Iroñaaka oshekinri rirori rirotaki reentsitepaeni Tajorentsi.

⁵ Omaanta ikatziyayanakanji apaanipaeni warijeeyo, aapatziyariri Jesoshi rirori. Omaanta ikantzi:

—Otzimatyte itotonaty ishiramparitantari paashinijatzitatsiri atziri. Ozimatyte athotyeero rojankinarini Moeseeshi, maawaeni.

⁶ Ari paashini kitejiri ipiyoteeyanaani eejatzi rotyaantanewo Jesoshi, aataperoteencharipaeni ipiyotantapiinantarira, maawaeni. Ikowaeyakini riyo-te oetarika ikanteri Antyokiyyajatzi. ⁷ Osheki iñaawaetantawakagaeyakawoni iroka. Roojatzi ikatziyantanaka Peetero, ikanteeyakirini:

—Noyemijantzinkarite. Paerani riyojaakina Tajorentsi, piyoteeyakironi eerori: tema piñaakoeyakinani. Aritaki riyojaakina nokamanteeyirini paashinijatzitatsiri atziri tsika ikantyaari aapatziyeeyariri Jesoshi, rawijakotanteeyari. ⁸ Tema riro Tajorentsi iyotzirori akenkithashireeyarini ajankaneki. Rirotaki otyaantziniriri paashinijatzitatsiripaeni atziri Ishire, ayoteeyantakarini rawijakoeyeeni. Rooma iroñaaka ikimitaeyakaeni aari. ⁹ Kyaaryo, aritaki amonkaateeyakarini rirori. Tema eejatzi ikantzi Tajorentsi: “Pimonkaatawakagaeyakani”. Raapatziyari Jesoshi paashinijatzitatsiri atziri, rootaki rowameethashiryantariri.

¹⁰ Iroñaaka, ¿pikowakima pikanteri Tajorentsi: “Tee piyotzi”? Eniro iroka pikowakiro pipomeentsitakaaperotyari ayemijantzinkaritepaeni. Akateeyakini joriiyo ameteeyawitakawoni paerani, omaanta tee amaztiro athotyeeyironi, eejatzi maawaeni acharilteni, tee imateeyironi rirori imonkaatero. ¿Tsika ikantyaari paashinijatzitatsiri atziri imatantyaawori? Osheki opomeentsitaka. ¹¹ Ineshironkatake Jesokirishito, rootaki awijakoeyantakarini. Tema maawaeni akemijanteyironi iroka. Eejatzi ikimitagaeya rirori paashinijatzitatsiri atziripaeni.

¹² Imaeriteeyanakini maawaeni piyoteencharipaeni. Ikemijanteyawakirini Werenawee, eejatzi Paaworo. Ikantakiri:

—Imatakaakina Jesoshi notajonkakowentziri paashinijatzitatsiri atziri. Imatakaakina kaari iñaapiinteeyini, rootaki riyoteeyantakarini kyaaryo Jesoshi rirotaki Tajorentsi.

¹³ Ikanta ithonkakiro ikamanantzi. Roojatzi ikantanaki Jantyaako:

¹⁴ —Noyemijantzinkarite, pikemijantena. Ikenkithatakaemi Shimo tsika ikanta Tajorentsi ritantakawori ineshironkateeyakirini paashinijatzitsatsiri atziri. Aritaki riyogaeyakirini ikenkithatakotantakariri. ¹⁵ Omonkaataka iroka rojankinatzitakarini kamanantzirorini Iñaani Tajorentsi iitachari Amooshi. Rojankinatzini:

¹⁶⁻¹⁸ “Ikantzi Awinkatharite: ‘Inja nopyipapae kipatsiki, niwetsikapaero eejatzi inampini Iraviiri ishekiryagaeyawitakarini. Niwetsikaero eejatzi maawaeni pankotsi. Nokowaki rameenteeyenani maawaeni paashinijatzitsatsiri atziri, nokowaki raapatziyeeyenani’. Rootaki ikantziri Awinkatharite, wetsikirori paerani maawaeni jeekatsiri-paenii”.

¹⁹ Rootaki nokantakari naaka tee okameethatzi apomeentsitakayaari riraga paashinijatzitsatsiripaeni atziri. Raapatziyaririka Tajorentsi, monkaataka. ²⁰ Omaanta, thame apakaanteri jankinarentsi. Akamanteri iroka: “Pijeekapithatero riwetsikani atziri iitajorentsitsahitari: amatawita shiteeyiminkari. Eero piñaaminthatziro tsinani kaari payi. Eero powari shirikachari, powakotawokari iwatha rira”. ²¹ Tema maawaeni saawaroki, aririka ipiyotapiinteeyani ajoriyyotzinkaritepaeni, ikantani ithañaaipiintakawo iroka nokantzimiri: tema ithañeeeyakawoni paerani Moeseeshi. Eerorika ranteeeyironi iroka, ari okameethatzi raakameethateeyerini ajoriyyotzinkaritepaeni.

Rootaki ikantakiriri Jantyaako.

²² Ari inimoeyakirini rotyaantanewo Jesoshi, aataperoteenchari eejatzi maawaeni aapatziyariripaeni Jesoshi, ikantzi:

—Kameethataki. Rootaki akamanteriri antyokiiyajatzti.

Ari riyoyeyakirini apite jewawentziriri aapatziyariri Jesoshi: Joorashi Warajawaashi, eejatzi Shiirashi. Ikantakiri:

—Eerokapaeni oyaateeyaneerini Paaworo eejatzi Werenawee janta Antyokiiyaki. Pikamantapaakiri ayemijantzinkaritepaeni nokantakiri eejatzi pipapaeri jankinarentsika.

²³ Iroka okantziri jankinarentsi rojankinatziniri: “Nokoyi niwethatemeti noyemijantzinkarite tsikarika pikanta pijkeeki.

Jaka Jerojareeki nokaateeyirini rotyaantanewo Jesoshi eejatzi aataperoteenchari aapatziyariri Jesoshi. Iroñaaaka nojankinateeyimironi eerokapaeni kaari joriyyotatsi, jeekatsiri janta Antyokiiyaki, Shiiryaki, eejatzi Shiriishiyaki. ²⁴ Nokemakotakiri riraga nokaateeyawitarini: osheki ikenkithatakashiwitakimiro, ikompitakaakimiro. Ikantashiretakaantemiri. Tee naaka otyaanterini.

²⁵ Aritaki inimoteeyakinani maawaeni naari notyaantemiri irika niyyaakirika. Itsipatanakyaari Werenawee, eejatzi Paaworo: irika nonintaperotanewo. ²⁶ Riroteeyakini kaari thaawatsini ikamawenteri Awinkatharite Jesokirishito.

²⁷ Notyaantemiri Joorashi eejatzi Shiirashi. Ikamantaperotemiro rirori, iroka nojankinatzimiri. ²⁸ Ari inimotakiro Ishire Tajorentsi, eejatzi inimotakina naari nokamantemiro iroka. Eero nopomeentsitakaantzimiro, omaanta aapatziro pimatetro iroka.

²⁹ Eero powari riraga rowawiitakanariri riwetsikani atziri. Eero powakotawo riraa iwathakira. Eero powari shirikachari, Aririka powakyaari, osheki ikenkithashiryaanakya joriyyopaeni. Eero piñaaminthatziro tsinani kaari payi. Aririka pimatayitakironi irokapaeni, kameethataki. Ari kameetha pijkeekaeyeni. Ari okaatzi nokantakimiri”.

Rootaki rojankinatziniriri Antyokiiyajatzti.

³⁰ Ari riyaateeyanakini Antyokiiyaki riraga rotyaantanewo, ipiyoteeyapaakirini aapatziyariripaeni Jesoshi, ipapaakiri jankinarentsi.

³¹ Iñaanateyawakironi, roojatzi ikimoshireeyantanakani. ³² Rirotaki kamanantayitzirorini iñaani Tajorentsi riraga Joorashi, eejatzi Shiirashi. Osheki ikenkithataakaapaakiri ikimoshiryaaakaapaakiri, ikemijantakaaperoeypaakirini. ³³ Ojamani ijeekimotakitziri, roojatzi ipiyantaa eejatzi Joorashi. Riwethateeeyanaarini riraga iyemijantzinkaritepaeni, ikantawakiri:

—Kameethakya piyaatee.

Roojatzi ipiyantanaa kameetha janta ijeekinta otyaantakiriri. ³⁴ Omaanta riraga Shiirashi ikowaki ijeekanaki Antyokiiyaki.

Rapiitakiro ikinakinayitanakini Paaworo

³⁵ Roojatzi ijeekantapaaka Paaworo, eejatzi Werenawee. Riyotaantaki, ikamanantanakiro iñaani Awinkatharite. Itsipateeyakarini eejatzi osheki paashinipaeni, ikamananteeyini. ³⁶ Paashini kitejiri ikantzi Paaworo:

—Werenawee. Thame añaagaati eejatzi ayemijantzinkarite janta maawaenai nampitsikipaeni: riraga paerani akamanteeyakitzirini iñaani Awinkatharite. Aminaateriita tsikarika ikanteeyakan.

³⁷ Ikowawita Werenawee raanakirimi eejatzi Jowa. Iiteetziri eejatzi Marikoshi. ³⁸ Omaanta Paaworo, ikantakiri:

—Paerani janta aatantakari Pampiiriway, rookanakae. Tee itsipatanakae janta akenkithatzinta. Eero iroñaaka aaneeri.

³⁹ Tee inimotanakiri, roojatzi rotsiparyaanakari. Riraga Werenawee raanakiri Marikoshi. Rotetanaka pitotsiki, ryaataki Cheepereki.

⁴⁰ Omaantakya Paaworo, raanakiri riraga Shiirashi. Ikanteeyini aapatziyariri Jesoshi:

—Nowinkatharite, pineshironkateeyerini irika, kijokiro powanakiri kameetha.

⁴¹ Ari ikinanaki Shiiryaki, eejatzi Shiriishiyaki. Janta ikemijantakaaperoejakirininta aapatziyakariri Jesoshi.

16

Itsipatanakari Temoteeyo riraga Paaworo eejatzi Shiirashi

¹ Iinja rareetapaaka Teeriwiki, eejatzi Riishitaraki. Ijeekanaki janta aapatziyariri Jesoshi iitachari Temoteeyo. Rootaki rinirontari joriyyo. Rooma irira iriri, kaari joriyyo. Riniro rootaki kemijantzinkawo. ² Ikanteeyini aapatziyariripaeni Jesoshi janta Riishitaraki eejatzi Ikooñoki:

—Ikameethatzi Temoteeyo.

³ Ikowaki Paaworo itsipatanakyaari. Riyotakoeyirini joriyyopaeni iriri rirotaki kaari joriyyo, ikanantariri Temoteeyo:

—Aririka pikowaki poyaatena pitotonaty pishiramparitantari, raakameethatanteeyemirini joriyyo.

Ikantziri:

—Ari.

Ari raanakiri, itothowawentanakari joriyyopaeni, jeekatsiri janta nampitskipaeni. ⁴ Roojatzi ikinantanakari nampitsikipaeni, ryotagaeyakirini maawaenai ikantayitzirini jerojareejatzi: riraga rotyaantanewo Jesoshi eejatzi aataperoteenchari aapatziyariri Jesoshi. Ikantzi:

—Aririka raapatziyakaari Jesoshi paashinijatzitsiripaeni atziri, eero akantziri: “Pipeyeeyani joriyyo”. ⁵ Rootaki raapatziyakaaperotantakariri

kameetha maawaeni aapatziyariri Jesoshi. Maawaeni kitejiripaeni eekiro ryaatatzi roshekiperotanakitzi aapatziyariri Jesoshi.

⁶ Ikinanaki Jiriiyaki, Karaashiyaki. Tema okantzitakari Ishire Tajorentsi: —Eero pikamanantzi janta Aashiyaki.

⁷ Rareetaka Miishiyaki, ari ikowawitaka ryaatemi Witziiniyaki. Omaanta tee oshinetziri Ishire Tajorentsi. ⁸ Ikinanaki Miishiyaki, roojatzi roerinkantanaka Toroowareki: ari noñaawakiriri naari. ⁹ Tsiteniriki imishitakiri Paaworo apaani masherooniyajatzi. Ikatziyimotapaakari, ikantaperota-paakiri:

—Pipoke jaka masherooniyaki, pamitakoeyakitenani.

¹⁰ Roojatzi nokowantanaka tsika nokinantyaari nareetantyaari masherooniyaki. Niyotanaki rotyaantakina Tajorentsi janta nokamanantyaariri jeekatsiripaeni tsika ikanteeyaaarini rawijakoeyanteyaaarini.

Riyaatzi Paaworo Eyoroopaki

¹¹ Janta Toroowareki noteteeyanakani pitotsiki. Aakotanakina tampyaa Jamotowaashiyaki. Inkaamani eejatzi nowaaganaka Neyaaporishiki. ¹² Nowaaganaka eejatzi Jiriposhiki. Rootaki jewataakaantzirori nampitsi Masherooniyawero. Inampitapaawo iroñaa ka poñaachari Oroomaki. Ari nojeekaeyapaakini apaanipaeni kitejiri. ¹³ Ari saawaroki noshitowanee omooki inkinagaakitzirori nampitsi, niyaatanaki janta othapyaakiini iñaa. Naamaapaakari aritaki janta ikenkithatakapiintziri joriiyopaeni Tajorentsi. Nojeekapaaiki, nokenkithatakapaakiro tsinaniaeni piyoteenchari. ¹⁴ Ojeeki apaani kemawakinari oetachari Rirya. Oponaanaka paerani nampitsiki janta Tziyateeraki. Rootaki pinkathatakiriri Tajorentsi. Opimantapiintayitzironi tokoya kityonkaneeronkari. Raapatziyashiryakaakawo Awinkatharite okaatzi okemawakiri ikantayitzirini Paaworo. ¹⁵ Okaawoshitakotakari Tajorentsi, otsipateeyakarini maawaeni jeekatsiripaeni opankoki. Okantaperotakina:

—Piyotaakina nokemijantaperotziri Awinkatharite, piyaateeyeninopankoki, pijekimotakitena.

Ari okowakaakina, rootaki nakanantakari:

—Thametya.

¹⁶ Ari paashini kitejiri niyaateeyanakini janta ikenkithawaetakaapiintete-zirinta Tajorentsi. Otonkiyotawakina onampirentsi, riyotakaero kamaari. Iyotashita, okenkithawaetakotzitawo oetarikapaeni tekiraatarika ofiiero. Rootaki raantayitarini osheki koriki riraga omperatawori. Ikantapiintziri atziri:

—Pikowakirika pikemero, pipinatena.

¹⁷ Ari oyaateeyanakinani. Okaemanaki, okantzi:

—Irika shirampari, riroteeyakini aapatziyariri Tajorentsi, riraga jenokijatzipero. Ikamanteeyemini tsika pikantya pawijakotanteeyari.

¹⁸ Aritaki okantapiintatyaaani maawaeni kitejiriki. Ijamapaakawo Paaworo, ipithokashitanakawo, ikantakiri kamaari:

—Riotaki Jesokirishito nokemijantziri, rootaki nakanantzimiri: pookaneero.

Roojatzi rookantanaawo. ¹⁹ Roojatzi riyotantanaka riraga omperatawori, ikantanaki:

—Tee okameethatz; iroñaa tekatsi akanteeyaa anteeeyari koriki.

Roojatzi raantakari Paaworo eejatzi Shiireshi, shepik. Inoshikanakiri nampsiki, niyanki: janta ijeekinta jewawentziroripaeni nampsitsi.

20 Raanakiri jewawentziroriki ikantapaakiri:

—Ikenkithashiryaa kagaeyakinani maawaeni jeekatsiripaeni jaka anampiki. Tema jorijo rirori. **21** Ikamantakotziro iroka rametayitakarini rirori. Tee oshinetziro iroka, rowaga rojankinatziri oroomajatzhi. Tema aaka ashenkateeyakarini oroomajatzhi. Rootaki kaari okameethatanta akemijantawakiro ikantakaeri, eejatzi tee okameethatzi ametayityaawoni.

22 Ikijejeranakan maawaeni piyoteencharipaeni, roojatzi ikanantari komantaante:

—Paatonkoreeri iithaari Paaworoka, eejatzi Shiireshika; pipajamerikiteri.

23 Osheki ipajaperotakiri, roojatzi romonkyaagantakari omonkyaagamentotsiki. Ikantaperotziri osheki riraga shentziriri:

—Kameethaga pishentaperoteri, ishiyakari.

24 Ikemakiro iroka ikaminaaperotakiriri, romonkyaagaakiri. Eejatzi rawitatantakari inchakota. **25** Niyankipaeteni tsiteniri, ari ramaneeyirini Tajorentsi, romampaawaetawenteeyakarini. Ikemijanteeyirini paashinipaeni romonkyaagayitzirini. **26** Omapokashitanaka omoyekanaka kipatsi, eejatzi omoyekanaka pankotsi, tsikarika maawaeni otzinkampipaeni, moye, moye, moye. Intsipaete ashitareeyanakan ashitakontsipaeni. Roojatzi awitaryaantanaka inchakota, rawitatanteetawitakariri iitzikira.

27 Ipiriintanaka shentziriri. Iñaakiro ashitakontsi, ashitareeyanakan. Itashiwitaka shiyeeyanakan riraga romonkyaaganewopaeni, roojatzi raantanakawo ijawirite, roowiteenchami rowamashitanakyaami rirojatzi.

28 Ari intsipaete ikaemakotanakiri Paaworo:

—Eero powamaashitaa eeroka. Roojatzi nojeekaeyini maawaeni jaka, tee noshiya.

29 Ikantzi shentziriri ikantziri ronampiri:

—Pamakina ootamentotsi.

Ramakiniri, roojatzi ikyaan tanaka rirori janta roojotawitakarinta. Rompetatanaka, rotziweroyimotapaakari Paaworo, eejatzi Shiireshi.

30 Roojatzi raantanari inkokironta. Ikantziri:

—Iyotaantatsiri, ¿tsika nokantyaaka naari nawijkotanteeyarí?

31 Ikantawakiri:

—Paapatziyeyaaarini Nowinkatharite Jesoshi, rowawijaakotanteemiri. Eejatzi ikimitagaeyani maawaeni pisheninka.

32 Riyotaaperotziri iñaani Tajorentsi. Eejatzi isheninkapaeni rirori, ryotagaeyirini. **33** Aritaki tsiteniriki raantanakari riraga shentziriri, ikiwayiteerini iroka raawyaakirira ipajatakiri, roojatzi raawinantaari. Roojatzi ikaawoshitakontantaariria Tajorentsi, ikaateeyakirini maawaeni isheninka. **34** Ari itsipatanakari rateetanaki ipankoki, rowakaapaakari. Raapatziyeeyarini Tajorentsi, rootaki ikimoshireeyantanakarini rirori eejatzi maawaeni isheninka.

35 Ari okitejiityaanaki, riraga jewawentzirori nampsitsi rotyaantziri waariyaa:

—Piyaate omonkyaagamentotsiki, pikantakiteri shentziriri roeyowaeri aapatziyariri Jesoshi.

—Ari riyaataki, ikamantapaakiri shentziriri:

—Potyaanteeyeerini riyaateeta rirori.

36 Roojatzi ikanantakari rirori:

—Ikantaana jewawentzirori nampitsi notyaantaneemi. Iroñaaaka pishitowanee, kameetha piyaatanaki.

³⁷ Omaanta ikantziri Paaworo:

—Tema eenitatsi nowaperite nokimitantariri oroomajatzsi. Tee rojampitakowentena jewawentzirori, tee riyotzi eenirorika nantani. Ipajatatakaantashitakina, eejatzi romonkyaagakaantashitakina. Tema iñeeeyakinani maawaeni jeekatsiripaeni rowashironkaakina: iiteeyawitani eeniro nantani. ¿Arima iroñaaaka romanakiro roeyowakaantashitaana? Eerowa niyaatzi iroñaaaka. Ipokeeta rirori, rirojatzitakya oeyowaatenani riyoteeyantyaarini atziripaeni tekatsi nante.

³⁸ Ari ipiyanaa waairryaa, ikamantapaeri. Riyotantakari jewawentzirori nampitsi eenitatsi Paaworo iwaperite ikimitantariri oroomajatzsi, ari ithaawaeyanakini. ³⁹ Ipokapaaki, kameetha ikenkithatakappaakiri. Roojatzsi roeyowaantapaari:

—Iroñaaaka piyaatea, pookaneero nonampi.

⁴⁰ Ari ishitowanee, ikinanee opankoki Riiry. Iñaapaeri ayemijantzinkaritepaeni, ikantapaakiri:

—Kameethakya pijeekaeyeni.

Roojatzsi rowaagantanaka paashiniki nampitsi.

17

Rareetapaaka Paaworo eejatzi Shiirashi Tejawoonikaki

¹ Ikinakaanakiri Paaworo Ajiporishiki, Aporooñaki, roojatzsi rareetantaka Tejawoonikaki. Ari janta ojeeki ipiyotaantapiintarira Joriyo, ² roojatzsi ikyaatapaaka. Aritaki ikantatayaani rametapiintawo ikenkithatakappaapinteeyirini joriyo. Okaatzi 3 saawaro riyotagaeyirini okantayitzirini Iwaperite Tajorentsi. ³ Ari riyotaaperotapaakiri. Roojatzsi ikantziri:

—Aritaki okantzita Iwaperite Tajorentsi: “Ikemaatsitawakyaawoota riraga Rotyaantanewo Tajorentsi. Aritaki ikamaki, roojatzsi ipiriinantee”. Riro nokamantakotziri Jesoshi, rirotaki Rotyaantanewo Tajorentsi.

⁴ Raapatziyaperotawakari Jesoshi apaanipaeni kemijantziriri, roojatzsi royaateeyantanakaririni Paaworo, eejatzi Shiirashi. Eejatzi ikimiteeyakan osheki kaari joriyyotatsi, pinkathateriri Jesoshi eejatzi royaateeyanakirini Paaworo. Eejatzi okimitaka roori tsinani, isheninkapaeni jewatatsiripaeni. Aapatziyeeyakarini Jesoshi. Rooripaeni osheki, tee apaanipaeni. ⁵ Ari osheki ikijanaka joriyyopaeni, riraga kaari aapatziyarini Jesoshi; ipiyoteeyakirini antapiintziroripaeni kaari kameethatatsi, eejatzi perantzipaeni. Ikjakagaeyakarini jeekatsiripaeni nampitsiki. Riyaateeyanakini ipankoki Jasoo, ikowaeyawitapaakarini Paaworo, eejatzi Shiirashi. Ikowawitaka raanakirimi janta ipiyoteeyakaninta atziri, ikijeeyerinimi. ⁶ Tee iñaapaeri riroripaeni, omaanta inoshikashitanakari Jasoo, eejatzi apaanipaeni aapatziyariri Jesoshi. Raanakiri janta jewatatsiripaeniki nampitsi. Ikaemaeyapaakini:

—Eeniro irika kijakaanteyakiririni maawaeni jeekatsiripaeni maawaeni nampitsiki. Eeniro irika Jasoo aakameethatakawiriri.

⁷ Ikaminaanteyini aapatziyariri Jesoshi, ikantzi: “Eero pimonkaatziniri Seesari ikantzimiri. Eenitatsi paashini jewawenantatsiri, riraga Jesoshi: rirotaki pimonkaateniri rirori”.

⁸ Ikemantawakawori iroka, ikijeeyanakani atziripaeni, eejatzi riraga jewatatsiripaeni nampitsi. ⁹ Ikantanaki Jasoo, eejatzi paashinipaeni:

—Eeniroka koriki: pikempoyaanakinari piyotantenari eero noshiyapitzimiri, tekatsi nante. Oztimerika nantani, ari paaperoteriita noorikite.

Rareetaka Paaworo eejatzi Shiirashi Wereeyaki

¹⁰ Ikanta kemijantzinkaripaeni rotyaanteeri tsiteniriki riraga Paaworo eejatzi Shiirashi, ryaate Wereeyaki. Rareetantapaakari, roojatzi ryaatan-tapaaka ipiyotapiinanta joriyo. ¹¹ Irirapaeni kameethaperoenteentsiri, tee roshiyari riraga tejawoonikajatz. Ikowaperotaki ikemijantero Iwaperite Tajorents. Ifnaanatapintziro maawaeni kitejiriki riyotantyaari kyaaryoopera-orka iroka ikantakiriri. ¹² Oshekini raapatziyeeyarini Jesoshi, joriiyopaeni eejatzi kireeshiyajatz. Aapatziyari tsinanipaeni kaari joriyyotatsi, rootaki isheninkapaeni pinkatharitsiri, maawaeni. Eejatzi raapatziyari Jesoshi shiramparipaeni, tee apaanipaeni inta oshekyaaantzi. ¹³ Ari riyotaantziro Paaworo ifnaani Tajorents janta Wereeyaki. Ikemakotakiri joriyyotatsiri, riraga tejawoonikajatz kaari aapatziyari Jesoshi. Ipokapaaki rirori, iki-jakaapaakari atziri, ikantashiryaaakaakiri. Ikantziri:

—Eero pikemijanteeeyirini Paaworo, inta pikijeyerini irira.

¹⁴ Riraga aapatziyariri Jesoshi intsipaete rotyaantakiri Paaworo janta inkaareki. Omaanta irira jeekaneentsiri Shiirashi, itsipatanakari Temoteeyo. ¹⁵ Eeniro aanakiriri Paaworo janta Ateenashiki. Ikantawaeri:

—Aririka pareeteeya pinampiki, pikaemakaantapaenari Shiirashi eejatzi Temoteeyo ipokanakuuta intsipaete.

Ari ryaatananaki, ikantakaantapaeri.

Rantayitapaakirini Paaworo janta Ateenashiki

¹⁶ Ari royaapaakiri Paaworo janta Ateenashiki. Rirotaki royeeyapaakirini Shiirashi eejatzi Temoteeyo. Ifnaakiro janta nampsiki oshekini riwets-sikashitayitarini iitajorentsitsashitayitarini, roojatzi rowashirentapaaka.

¹⁷ Eejatzi janta osheki riyotagaeyirini joriyyopaeni eejatzi kaari joriyyotatsi: riraga pinkathateeyiririni Tajorents. Osheki riyotaawakagaeyakan. Eejatzi ikimitakaapiintakari maawaeni atziri janta nampsiki niyanki.

¹⁸ Riyotaapaakiri kowapiintatsiri riyote oetarikapaeni, ikaateeyirini riyotaanewopaeni Epekooreyo. Eejatzi ikaateeyirini oyaatzirori oetaka riyotaakiri riraga atziri ikanteetziri eshitoecko. Riraga Paaworo ikamantakotziri Jesoshi ikamawentakae aaka, eejatzi ikantzti:

—Ipiriintee kamatsiripaeni.

Ikantzti apaanipaeni kemawakiriri:

—¿litaka ikantakiri irika ñaawaetashitachari?

Ikantzti paashini:

—Ikamantakotziri paashinijatzi tajorentsitsatsiri.

¹⁹ Roerikakiri, raanakiriri janta ipiyotapiinteeyaninta iiteetziri Arey-oopawo, ikanteeyirini:

—¿Kameethama niyotero iroka pikantakiri? Nokowaeyini niyotero tsika okantakotari iroka. ²⁰ Tee nokemapiintziro iroka pikantakiri. Nokowaeyini niyotero oetaka kantakotachari.

²¹ Aritaki ikantari ateenashijatzi: tee ithamaetzi, inta ikowaki ikemijantashityaari kenkithatakagaeyiririni owakiratatsiri apaanipaeni kaari ikemapiinteeeyini. Eejatzi ikimiteeyani poñaacharipaeni inteeena, ikenkithatakotashitayitawoni oetarikapaeni. ²² Janta ikatziyaka Paaworo niyanki, ikantziri:

—Ateenashijatzi. Niyotakotakimi eerori, ashi poyiro pikemijantapero-teeyawitani. ²³ Janta nokinakinayitzininta noñaayitakironi iroka pikemijantashitayitarini. Eejatzi noñaapaakiro janta powapiintziniri pitajorentsite oetarikapaeni. Eeniro ojankinataka, okantzi: “Apinkathatantyaariri tajorentsitsatsiri kaari iyotakoetti”. Riraga kaari piyotzi eeroka: pikemijantapero tashitari, rirotaki irika nokamantakotziri. ²⁴ Riraga Tajorentsipero,

rirotaki wetsikirori kipatsi. Riwetsikaeyirini maawaeni jeekantawori-paeni. Rirotaki wetsikirori jenokinta eejatzi kipatsi. Tee ijeekantawo rowaga pankotsi riwetsikiri atziri.²⁵ Inta aakakyä, tekatsi akanteri etakotyaäri. Teeroña ikoyiri etakotariri. Tema rirotaki owañaayiteerinipaeni, etakoteeyakaerini rirori. Tema rirotaki pakaerori maawaeni, oetarika-paeni.²⁶ Apaani riwetsikawitaka paerani, rirotaki itakaworini; iroñaaka ashékiteeyanakini, athotyagaeyanakironi maawaeni kipatsipaeni. Rirotaki Tajorentsipero kantatsiri tsikarika ajeekaeyeni aaka maawaeni atziri, eejatzi tsikarika okaate othonkaeyantyaarini; rirotaki kantakaantzirori.²⁷ Ijeekakagaeyakaeni akowantyaari ayoteeyerini, eejatzi añaanteeyaririni iinja. Omaanta tee rinteenatee.²⁸ Rirotaki owañaagaeysakaerini. Rirotaki shewatakayiteerinipaeni. Rirotaki jeekakaayiteerini. Rooma aritaki ikantztiani atziri pashi paerani mampaapiintachari: "Kyaaryo aaka-teeyakini ijeekakaani Tajorentsi".²⁹ Aakateeyakinirika ijeekakaanipaeni Tajorentsi, tee okameethatzpi pikenkithashiryaaakoteri Tajorentsipero roshiyari riwetsikanipaeni atziri: riwetsikaetziri ooro, peraata, mapi, oetarika-paeni. Eejatzi eero roshiyakaawentziri oetarika ikenkithashiryaa atziri.³⁰⁻³¹ Paerani tee riyotawitani achariniiteni, tekatsi ikanteri Tajorentsi ikjawenteri rantayitzirini. Omaanta riyotzi rirori tsika okaate ikan-takowenantyaariri maawaeni atziripaeni. Eenitatsi shirampari iitachari Jesoshi, ikamaperotawitaka. Roojatzi ipiriinantaari Tajorentsi, riyotantee-yaririni maawaeni atziri. Itakiri rirori kantakowenantatsiri. Iinja ipiriin-teeri atziri roojatzi kameetha ikantakowenteri. Rootaki ikananteeyaririni atziri iroñaaka: "Pikenkithashireeyanakyaani, eero pikimta paerani, inta pameenteeyaaarini Tajorentsipero". Aritaki ikantteeyirini maawaeni atziri, tsikarika ijeekakagaeyirini.

Rootaki ikantakiriri Paaworo.

³² Ikemanteeyawakaririni ikantzi: "Ari ipiriintanee kamawiteenchari", eenitatsi apaanipaeni shirontawentanakariri; omaanta ikantanakiri paashinipaeni:

—Inja papiiteenawo iroka eejatzi.

Roojatzi riyaatantanaa Paaworo.³³⁻³⁴ Ijeekagaantanaki aap-aztiywakariri Jesoshi, roojatzi royaatantanakari rirori. Iita apaani aapatziyariri Jesoshi Ironiishiyo: rirotaki jewatatsiri janta nampitsiki, ikaateeyirini ipinkathariiyyini riyotaawakagaeyakan. Eejatzi okemijantzi tsinani oetachari Taamarishi. Ikaatziri eejatzi paashinipaeni aapatziyariri Jesoshi.

18

Riyotaantzi Paaworo janta Korintoki

¹ Roojatzi rookanakiro Paaworo Ateenashi, rowaaganan janta Korintoki.² Janta iñaapaakiri joriiyotatsiri iitachari Akiirishi. Poontojatzi rinawita, ipoñaanaka iroñaaka Itaaryaki. Owakira rareetapaaka. Itsipatapaakawo iina, Pirishiira. Ro ipokantakari, riraga jewawenantatsiri iitachari Kiraaworyo ikijeeyakirini joriiyo jeekaeyawitacharini Oroomaki, rotyaanteeyakirini:

—Piyaateeyeni paashiniki kipatsi, eero pijeeckaeyini jaka.

Ari ijeekaeyapaakini Korintoki. Roojatzi rareetantapaaka Paaworo, ijeekimotapaakiri.³ Eejatzi ikimitawakagaeyakan, riyoteeyini rantziro kaawirawitzipango riwetsikaetziro kaawirawitzi. Rootaki ijeekimotantaapaakariri, itsipatawakaapaaka janta riwetsikaeyironi.⁴ Maawaeni sawaroki ryotaawakagaeyakawoni janta ipiyotaapiintanta joriiyopana. Raapatziyakaaperoeyakarini joriiyotatsiri, kaari joriiyotatsi eejatzi.⁵ Ari

ipoñaanaka masherooniyaki Shiireshi eejatzi Temoteeyo, rareetantapaaka jaka. Iñaapaakiri Paaworo, ikenkithatakaakiri rirori. Ikamantapiintawitakari joriyyotatsiri:

—Rirotaki Jesoshi riraga Rotyaantanewo Tajorentsi aamagaeyarini paerani.

⁶ Omaanta ipiyathateeyawakarini joriyyo eejatzi ikantzimaeyakirini, rootaki rotekimotantanaariri iithaari Paaworo riyoteeyantyaarini rootaki riyaatee. Ikantanakiri:

—Eerokataki jatashtachani janta paamariki kaari tsiwakanitatsini: tee añiilo nantani nashi naari, tema nokamantawitakimi. Iroñaakaroña niyaatashiteri irira paashinijatzitatsiri atziri, nokenkithatakagaeyerini.

⁷ Ari ishitowanaki janta, ikinanakiro ipankoki Jooshito: rirotaki pinkatheriri Tajorentsi. Itsipanampitawo pankotsi ipiyotantapiintarira. ⁸ Riraga Kiriishipo rirotaki, jewawentzirori janta ipiyotaantapiintari joriyyopae. Kameetha raapatziyari Awinkatharite. Eejatzi ikimitteeyakan maawaeni jeeekatsiripaeni ipankoki, raapatziyeeyarini Jesoshi. Eejatzi ikimitagaantaka osheki korintojatz. Ikemawakiro iñaani Tajorentsi raapatziyaperotawakawo roojatzi ikaawoshitakotanteeyakarini Tajorentsi. ⁹ Ari paashini tsiteniriki kimitaka imishiwaetatz Paaworo iñaashitakari riraga Awinkatharite, ikemakiri ikantziri:

—Eero pithaayi. Eekiro piyatatyee pikamanante, eero pimaeritzi. ¹⁰ Kijokiro nowakimi. Jaka nampsiki, tema ikaatzi osheki aapatzianari. Tekatsi ikanteetemi rowashironkaetemi.

¹¹ Roojatzi ijekantanaka apaani ojarentsi, okyaawontsitapaaki eejatzi. Riyotagaeyakirini korintojatz iñaani Tajorentsi.

¹² Ipinkathariwenantzi iroñaaka Kariyooni akaayajatz. Roojatzi joriyyopae iki jantanakari Paaworo. Raanakiri janta ijekinta iyotaawakaenchari. ¹³ Ikantapaakiri:

—Irika shirampari, ikantajeempiyaakari atziri: “Paapatziyaperoeyaarini Tajorentsi”, omaanta ikinakaashitakawo iñaani Tajorentsi.

¹⁴ Roowitaneechami iñaawaetanakimi Paaworo, ari riraga Kariyooni ikantziri joriyyotatsiri:

—Eeroka joriyyotatsiripaeni, pashiiryakinani. Aririkami ranteromi irika kaari kameethatatsi, aririkami rowamaantemi, aritakimikya okameethatemi pamakirimi jaka naakaki. ¹⁵ Iroñaaka pikantawakaawentakawo iroka riyotaantziri. Pikantawakaawentashitakawo iwaeropaeni. Pikantawakaawentakawo Iwaperite Tajorentsi. Eerokaritya. Osheki pashiiryakinani: eero pipokashitana. ¹⁶ Piyaateeyaneeni.

Ari riyaateeyaneeni. ¹⁷ Riraga kireeshiyajatz raagaeyakirini Sooshiteshi, shepik; ipajeeeyakirini, tak, tak. Riraga pajatakiriri rirotaki jewawentzirori janta ipiyoteeyantarinti joriyyopae. Iñaakotawitakari Kariyooni ipajeeeyakirini, omaanta tekatsi otzikaakotanakyaarini, tekatsi ikanteeyerini.

¹⁸ Osheki kitejiri ijekankanaki Paaworo, roojatzi ipiyanta, rookaneeri ayemijantzinkaritepaeni. Rotetapaaka pitotsiki, aakotanakiri tampyaa Shiireshi, ikantanaka, jakiririri. Itsipatanakawo Pirishiira eejatzi oemi, Akiirishi. Eeniro ikashiyakaakiriri Paaworo Tajorentsi, rootaki rametantawori iishi maawaeni janta Shinkereeyaki. ¹⁹ Rareeteeyantapaakarini Ejeesoki. Riyaatantanaari Paaworo, ari rookaneeri itsipatarini. Omaanta tekirani riyaateeni apaniroeni riyaatapanatzi ipiyotapiinanta joriyyo, ikenkithatakaapaakiri. ²⁰ Ikanteyawitawakarini:

—Ojamanitanakiita pijekankanaki, piyotagaeyanakinaniita.

Omaanta tee ikoyi rirori. ²¹ Ikantanakiri:

—Osheki nothaankitee iroñaaka; omaanta aririka ikowakaakina Tajorentsi, nopyiee iinja.

Roojatzi rotetantanaa eejatzi pitotsiki, aakotanakiri tampyaa, ikantanaka eejatzi jakiririri. ²² Rareetapaaka Sesareeyaki, roojatzi rowaagantanaka Jerojareeki, rareetapaakari ayemijantzinkaritepaeni jaga. Roojatzi rowaaganaa eejatzi Antyokiiyaki, ipoñaanakanta paerani.

Ikinayitakini Paaworo tres-tapaentsiri

²³ Ojamani ijekanaki Paaworo Antyokiiyaki. Ari rapiiteero eejatzi. Ikinakinayitanakini Karaashiyaki, eejatzi Jiriiyyaki. Riyotaaperoeyakirini maawaeni aapatziyariri Jesoshi.

²⁴ Rareetaka Ejeesoki joriyo iitachari Apooro, rirotaki arejanteriiyajatzi. Kameetha ikenkithatapiintzi, rirotantaperotziro Iwaperite Tajorentsi. ²⁵ Ikamanteetziri tsika ikantani Jowani, eejatzi tsika okantari maawaeni ikenkithatakotzirini Jesoshi, omaanta tekira ikemakoperotziro maawaeni rantayitzirini rirori. Ithotyaaperotakiro riyotaantziro maawaeni riyotayitawitarini. ²⁶ Ari ikenkithatakotaperotziro janta pankotsiki ipiyoteeyatarinira. Tee ithaayi, kameetha ikenkithatzi. Ikemantawakari Akiirishi, eejatzi Pirishiira, ikantziri Apooro:

—Nokowaki nokenkithatakayemi eechonkiini.

Ikantzi:

—Ajaatya.

Ari eechonkiini ithotyaakiniri, riyotagaeyakirini tsika ikantari Jesoshi, eejatzi tsika akanteeyarini aatanteeyarini janta Tajorentsiki.

²⁷ Roojatzi ikantziri Apooro aapatziyariripaeni Jesoshi:

—Nokowaki niyaate iroñaaka Akaayaki, niyotagaeyerini jeekayitatsirini janta.

Ari ikanteeyawakirini:

—Kameethataki piyaate, piyotagaeyerini kameetha. Ajaa, jankinarentsi pagayaenakinirini.

Iroka rojankinatawakiniriri iyemijantzinkarite janta: “Paakameethateeyawakiriniroña Apooro, pikemijanteeyawakirini”.

Ari paerani ineshironkatzikari Tajorentsi akaayajatzi, rootaki raapatziyanteeyakaririni Jesoshi. Iroñaaka, rareetantakari Apooro, osheki retakoeyapaakarini. ²⁸ Riyotaaperotakiri riyotaperotantaari. Ikemaeyakirini atziri riyotaantaperotziro Iwaperite Tajorentsi, ikantzi:

—Rirotaki Jesoshi okenkithatakotziri Iwaperite Tajorentsi, rirotaki irira Rotyaantanewo Tajorentsi.

19

Riyaataki Paaworo Ejeesoki

¹ Ijeekantakari Apooro Korintoki, riraga Paaworo ikinanaki tonkaarikipaeni, rareetapaaka Ejeesoki. Iñaapaakiri apaanipaeni aapatziyariri Jesoshi. ² Ikantapaakiri:

—Paerani paapatziyeeyantakaririni Jesoshi, ¿okithaatakaakimima Ishire Tajorentsi?

—Tee. Tee nokemakoneentziro roori.

³ —¿Itakakya pikaawoshitawentari?

—Nokaawoshitawentari Jowa.

⁴ Ari ikantziri Paaworo:

—Aririka ikenkithashiryaanakya atziri, rookaero kaari kameethatatsi rantziri, ari ikaawoshitakiri Jowa riyotantyaariri atziri tee ikoyi rapiitapi-intero kaari kameethatatsiri, inta ikowaki raapatziyaperotaari Tajorentsi.

Tema eejatzi ikantzitarini: "Paapatziyeeyaarini riraga impaetapaenani, rirotaki Jesoshi".

⁵ Ikemanteeyawakaworini iroka, ikaawoshitawenteeyanakarini Awinkatharite Jesoshi. ⁶ Paaworo rowakiniri rako itokipaeni aapatziyariri, roojatzi opokashitantanakariri Ishire Tajorentsi, iñaawaetanteeyanakawoni paashinipaeni paantentsi, kaari riyoteeyini. ⁷ Aamaashitya ikaateeyini 12 shirampari kaawoshitawenteeyakaririni Jesoshi.

⁸ Ari ryaatapiintzi Paaworo pankotsiki ipiyontartari joriyopaeni, ikaatzi 3 kashiri ikenkithatakaantayitakini. Tee añaari thañaakotyaarini. Osheki ikamantakotakiri Tajorentsi, tsika ikanta ikantakowenantzi. Roojatzi osheki riyotaawakagaeyakani. ⁹ Apanipaeni, tee añairo ikenkithashiryantaari, tee ikoyi ikemijante. Ikanteeyirini riraga atziripaeni:

—Tee okameethatzi iroka riyotaantziri Paaworo.

Roojatzi rookantanaari Paaworo, raanakiri aapatziyariripaeni Jesoshi. Ikenkithatakaapiintziri maawaeni kitejiri janta riyotaantapiintzinta Tzi-raano. ¹⁰ Okaatzi apite ojarentsi riyotaantapiintzi, rootaki ikemantakawori maawaeni aashiyajatzi iñaani Awinkatharite. Ikemaeyakironi: joriyopaeni, kaari joriyyotatsi, maawaeni.

¹¹ Itajonkantayitzini Paaworo, imatantawori kaari añaapiintzi. Rirotaki matakaeriri osheki Tajorentsi. ¹² Ipampitzitziri atziri iwañañoerote Paaworo, eejatzi ipewiryakotaga roojatzi raanakiro paashinikipaeni mantsiyatzzinkarikipaeninta inteenanta rootaki etsiyatakotakaakiriri. Eejatzi rowawijaakoteeri kyaantarirri kamaari. ¹³⁻¹⁴ Eeniyo janta joriyyo, kinakinayitatsirini, owawijaakotapiintawitariri kyaantarirri kamaari: riroteeyakini itomipaeni Esheewa, ikaateeyini 7. Esheewa rirotaki joriyyo, isheninkatakari jewawenantsirii ñaanakowenantsiripaeni. Ifeeyawitakarini Paaworo rowawijaakotziri kyaantarirri kamaari. Ikowaeyawitani ikimityaarimi, ikantashitantariri paashini kamaari:

—Eeniyo Jesoshitatsiri ikenkithatakotziri Paaworo. Rirotaki amitakotanari nowawijaakoteri irika kyaantzimiri. Pookaneeri, atama pijekantakari.

¹⁵ Rakanakiri kamaari:

—Noñiiri Jesoshi. Noñiiri Paaworo. Rooma eeroka, tee niyotzimi. ¿litaka nokemijanantemiri? ¹⁶ Roojatzi ijapokashitantanakariri kyaantarirri kamaari, japok, japok; rantawakiri riroripaeni ranaakoeyawakirini. Roojatzi ishiyamerikiyanakani, rookanakiro pankotsi. Osheki rowatsinaakiri.

¹⁷ Ikemakoeyakirini maawaeni ejeesojatzi: joriyyo, kaari joriyyotatsini, maawaeni. Ithaawaeyanakini eejatzi ikanteeyakini:

—Ikameethatzi Awinkatharite Jesoshi: imatakaeri aapatziyaperotariri rowawijaakotziri kyaantarirri kamaari. Omaanta kantakaaperotawori, tekatsi matakayerini.

¹⁸ Roojatzi ipokapaaki osheki aapatziyariri Jesoshi, ikanteeyapaakini:

—Eeniyo nantayitzironi kaari kameethatatsi, tee nokoyi napiitero, inta nokowaki rowameethatena Tajorentsi.

¹⁹ Osheki sheripiyyaratatsiri ramayitakironi jankinarentsi rashitayitarini: rootaki iyoteeriripaeni isheripiyyaratantari. Ipiyoteeyakironi, roojatzi itayimotantakari maawaeni atziri. Ikanteeyini:

—Tee nokoyi namatawiteeyeerini eejatzi natzritzinkaritepaeni.

Imonkaateeyakironi owinawo jankinarentsi, opineeyakani S/.11.000.000.

²⁰ Osheki ikinakayitanakironi iñaani Awinkatharite, eejatzi ijeeki osheki aapatziyeyaworini.

²¹ Roojatzi roshiretantakawo Paaworo riyaate Jerojareeki, roojatzi riyaatantanaka. Ikinanaki Masherooniyaki, eejatzi janta Akaayaki. Ikantitaka:

—Nitanakyaawo niyaate Jerojareeki, roojatzi niyaatanaki Oroomaki.

²² Rotyaantaki apite amitakotapiintziriri masherooniyajatzipaeni: riraga Temoteeyo, eejatzi Eraashito. Rirori Paaworo, ojamani ijeekanaki janta Aashiyaki.

Ikijeyanakan ejeesojatzi

²³ Tee iroñaaka eechonkiini ikantawakawentyaawo iroka akamantakotakiriri Awinkatharite. ²⁴ Ijeekinta wetsikapiintzirori peraata iitachari Rimiiteyo. Roshiyakawentapiintziro opango Aretemija ikemijantapiinteevantaworini atziripaeni. Rowaga Aretemija rootaki iitajorentsiseeyirini. Eeniro riraga amitakotziriri, wetsikapiintziniriri rowaga oshiyakaantsi opango Aretemija; ari ipinatapiintziriri osheki peraata, ragaeyantarini osheki koriki. Omaanta tee iroñaaka ramananteero aapatziyariri Jesoshi, roojatzi ikenkithashiryaantanaka Rimiiteyo. ²⁵ Rootaki ipiyoteeyantakaririni maawaeni atziripaeni, ikanteeyirini:

—Antapiinteeeyirorini iroka oshiyakaantsi agaeyantarini ayorikite osheki. ²⁶ Iroñaaka piñaakiri Paaworo, eejatzi pikemakotakiri: ramatawiteeyirini osheki atziri, ipaashiniteeyantaaririni asheninkapaeni. Ikantzi: “Riraga Tajorentsipero kaari iroka riwetsikayitzirini atziri”. Tee apatziro riyotaante jäka: rooteentsi ithotyeero Aashiyaki riyotaantayiteni. ²⁷ Itheenkaeyanakanenikari maawaeni atziri, eejatzi itheenkanakirokari maawaeni awetsikaeyakirini. Tema opinkathawoperotzi Aretemija: raa-patziyeyawitakawoni maawaeni aashiyajatzi, eejatzi maawaeni atziri. Ipinkathateeyawitawoni iroñaaka, omaanta raapatziyeyantaririni Paaworo, rookaeyaneeroni raapatziyawowa roori.

²⁸ Ikemanteeyawakaworini iroka, ikijeyanakan. Ikaemaeyanakini:

—Opinkathawoperotzi Aretemijaka, iroka pinkathariwenteeyiririni ejeesojatzi.

²⁹ Ikaemaeyanakini jeekatsiripaeni nampitsiki. Ishiyeyanakan maawaeni janta rantawaetapiinteevininta. Inoshikaeyanakirini Kaayo, Arishitaariko, jererere. Irira rirotaki masherooniyajatzti apite, tsipatapiintariri Paaworo. ³⁰ Ikwawita Paaworo royaatakowentanakirimpi janta, omaanta tee ishinetziri aapatziyariri Jesoshi. ³¹ Eeniro ijeeki eejatzi apaanipaeni jewatatsi, poñaachari Aashiyaki, nintaperotziriri Paaworo. Rotyaantziri iyemijantzinkarite kantappaakiriri:

—Eerowa poyaatziri janta rowamaemikari.

³² Ikaemaeyanakini piyoteencharipaeni, inashitayitakani ikantayitzirini. Ikaemashiteeyanakan. Omaanta tee riyoteeyini osheki atziri oetarika ipiyotawentari. ³³ Eenitatsi janta Arejaantero, rotyaantani joriyyo, rojatekakiri niyanki. Itzinaapaakiri rako rirori, riyatantyaari ikowaki ikenkithatakgaeyerinimi. ³⁴ Omaanta riyoteeyantakarini irira joriyyo, ojamantanaki ikaemapiinteyanakini maawaeni:

—Opinkathawoperotzi Aretemija, iroka pinkathawowentziriri ejeesojatzi.

Roojatzi ishirinkakotantanaka oorya. ³⁵ Romaeryagaeyakirini riraga jankinatapiintatsiri janta nampitsiki. Roojatzi ikanteeyirini:

—Natziritzinkaritepaeni. Tema aakateeyakini ūaperoeyirorini Aretemija, eejatzi ashentapiintziniro opango. Tema eejatzi ashentapiintziniro iroka oshiyakawori, pariyapaentsiri jenoki. Ayoteeyanakironi iroka, ³⁶ tekatsi

kantatsini tee kyaaryoopero iroka nokantakiri. Kameetha iroñaaka pimaeriteeyanakini. Eero pishintsitzi panteri irika shiramparipaeni.³⁷ Irika pamakiri, tektsi ikantero opanko, eejatzsi tee ikantzimatziro atajorentsite.³⁸ Eeniro eejatzsi irika Rimiiteyo, ikaateeyirini paashini antzirori peraata. Ikowakirika ikantakotante apaani, kameetha raaneeri janta kantakotantat-siriski, roojatzi ryotaawakagaeyani janta. Intsipaete ryaatananaki janta ikantakowentawakaya.³⁹ Eenitatsirika paashini pikowakiri piyoteri, ari pikanteri iinja riraga iyotaawakaachari, ipiyoteeyakanira.⁴⁰ Jaka iroñaaka apiyoteeyakani, akijathatawakagaeyakani. Ikanteri ikinanaki awotsiki.

⁴¹ Ikanantawori iroka, rotyaanteeyeerini maawaeni piyoteencharipaeni:
—Iroñaaka, pipitsimaryagaeyaneeni, piyaateeyeni pipankokipaeni.

20

Ryaatanaki Paaworo Jerojareeki

¹ Ari imaeeriiyanakini ejeesojatzsi. Roojatzi rirori Paaworo ikaemaeyirini aapatziyeyaririni Jesoshi, ryotaaperoeyirini. Roojatzi ryaatanee, rowaa-ganaa Masheroonyaki.² Janta osheki ikinakinayitanakini, osheki ryotaantayanakini. Roojatzi rareetantanaka Kireeshiyaki.³ Ikaatzsi 3 kashiri ijekapaaki. Rooteentsi rotetyaaawomi pitotsi ryaatantyaarimi Shiiryaki. Roojatzi ryotakotantakariri joriyyo rajaryaawitakari rowamaerimi. Roojatzi ikenkithashiryaantanaka:

—Nopiyaneeta janta Masheroonyaki.

⁴ Ari ryaatanaki, ikaateeyanakini Soopateri itomi Piilo rirotaki wereeyajatzi; Arishitaariko eejatzsi irira Sekoonto rirotaki tejawoonikajatzsi; Kaayo rirotaki teeriwijatzsi; Temoteeyo; Teekiko, eejatzsi Toroojimo rirotaki aashiyajatzsi, maawaeni.⁵ Reewateeyanakinani Toroowareki, royaageyakinani janta.⁶ Awijanaki kitejiri rowanteetapiintawori paa kaari tapiyacha, roojatzi nopoñaanaa Jiriposhiki, nokinakotanaki pitotsiki. Okaatzsi 5 Kitejiri nareetantaari Toroowareki, janta ijekinta oyeyakinanini. Roojatzi nojeekantapaaka okaatzsi 7 kitejiri.

⁷ Otominkotapaaki. Nopiyoteeyakani nakiyoteeyantawakaakanı owanawontsi nokenkithashiryaantaririni Jesoshi ikamawenteeyakaeni. Ikenkithatakagaeyakinani Paaworo. Roshiretakawo ryaate inkaamani, rootaki rojamanitantanakawori ikenkithathanaki, wero, wero. Roojatzi niyankiiteni tsiteniri.⁸ Ijeeki oshekini ootamentotsi janta nopiyoteeyakananı. Ro nopyoteeyantakarini shitamenkotsi irona jeñökiininta.⁹ Ijeekaki omooki riraga ewankari iitachari Eyoteeko. Ojamani ikenkithatakai Paaworo, rootaki aantapaakariri iwochokini. Roojatzi ipariyantanaka: ikinatenaki, sherooo, roojatzi jaawiki ompojateepaaka, teree, janta kipatsiki. Ari nayiitashiiyanakirini, itzinaawitapaakari; irira kamapaaki.¹⁰ Ari ranashitashitapaakari Paaworo rirori. Imaechopineetapaakiri, rawithakiperotapaakiri. Ikantzi:

—Eero powashiretakotari: irika añaagae.

Ari ipiriintanaa.

¹¹ Ari nateeteeyaneeni, ikagaapaakiro Paaworo paa, nowaeyakawoni nokenkithashiryaanakari Jesoshi riraga kamawentakaeri. Ikenkithatakagaeri, roojatzi okitejitantanaka. Rojojatzi ryaatantanaa.¹² Ragaetaneeri ewankari ipankoki, añaanee. Tee eechonkiini riweshireeyakanani.

¹³ Neewatakotanaki pitotsiki, nokinakotanaki nokowaki noonthagaeyari Paaworo Ashooki; tema irira ikinanaki awotsiki.¹⁴ Ari ifñaapaana Ashooki,

roojatzi notetantanaariri pitotsiki. Nowagaeyanaani Mitereeneki, nokantanaka, jakiririri. ¹⁵ Inkaamani nowaaganaa eejatzi. Nomontenampitanakawo Kiyo. Paashini kitejiri, roojatzi janta Saamoshiki. Roojatzi paashini kitejiri nareetapaaka Mireetoki. ¹⁶ Ikenkithashiryaka Paaworo rawijitanakyawo Ejeeso, eero rojamanitapae Aashiyaki. Ikowaperotaki rareetziteeya Jerojareek, roonthaantapaeyawori kitejiri oetachari Pen-tekoshiteshi.

Ikenkithatakayiri Paaworo ejeesojatzi

¹⁷ Rotyaantaki Ejeesoki, ikaemakaantakiri aataperoteenchari aapatziyariripaeni Jesoshi janta.

¹⁸ Ari rareeteeyapaakan ejeesojatzi, roojatzi ikanteeyantawakarini:
—Piyotakoperotakina tsika nokantari nojeekimotanteeyakimirini. Owakirani nareetaka Aashiyaki, aritaki nokantzitapaaka, roojatzitatsi iroñaaka. ¹⁹ Janta osheki nantawaetapiintziniri Awinkatharite, teekya ro nokantakaaperotya. Niraakotapiintakimi. Eejatzi okantzimoneentakina janta rajaryaawitakina nojoriyyotzinkaritepaeni rowamagaeyenanimi. ²⁰ Nothotyaakiro, tema aritaki nokanteeyakimironi maawaeni iroka kameethatatsiripaeni. Tee nomaeaeritashita. Niyotagaeyimin janta ipiyoteeyakaninta atziripaeni eejatzi janta pipankokipaeni. ²¹ Nokanteeyirini joriyo, kaari joriyyotatsiri, maawaeni: “Pikenkithashiryagaagaya piyoteeyantayaaririni Tajorentsi. Paapatziyari Nowinkatharite Jesokirishito”.

²² Ari iroñaaka niyaate Jerojareek, iyaatakaanakina Ishire Tajorentsi. Tee niyotzi tsikarika ikanteeten a janta. ²³ Apatziro niyotakiro iroka okantakini Ishire Tajorentsi. Maawaeni nampitsiki okantapiintana: “Kyaaryo rojoteetemi, rowashironkagaetemi”. ²⁴ Omaanta tee nokowaperotzi nokanteetyeeyaani nojeeki jaka kipatsiki, intakya nokowaperotaki nomateniri Awinkatharite Jesoshi oetarika ikowakaakinari. Eejatzi nokowaperotaki nothotyeeniri iroka nantawaetapiintziniriri. Okameethatzi iroka nokamantapiinteyimirini: “Ineshironkateeyakaeni Tajorentsi”. ²⁵ Niyotaki iroñaaka eero añaawakagaa eejatzi. Nokaateeyawitakimini, nokamantteyakimironi tsika ikantari Tajorentsi reewawanentzi. ²⁶ Rootaki iroñaaka nokamanantzimirori iroka. Aririka rowashironkagaantemi Tajorentsi, tee naaka owashironkaakaantzimini: tema nokamantzikimini paerani.

²⁷ Tee nothaayi, nothotyaakimiro maawaeni ikantayitzirini Tajorentsi.

Rootaki ikanteeyiririni Paaworo.

²⁸ Eeniropi iroka ikanteeyiririni eejatzi:

—Kyaaryoowa, paakowenteeyerini piyemijantzinkarite janta. Tema eerokateeyakini iyoyaani Ishire Tajorentsi, paminakowenteri maawaeni aapatziyariripaeni Jesoshi, petakoeyaarin. Tema riroteeyakini rowawijaakoeyakirini Jesoshi, ikamawenteeyakirini, apaatawenteeyakarini riraa. ²⁹ Iinja, niyaataaneerika, ipokashitemi amatawitemini: noshiyakaawentakiri katsimatasir. Eero ipeyakotzimi, ikowaki rowashironkaemi. Niyatapiro iroka. ³⁰ Eenitatsi jaka pikaa-teyawitanika kenkithataawitemini, omaanta eero otampatsikataperotzi riyotagaeyemini. Rookakaemirkari piyemijantzinkarite, royaatantyaariri rirori. ³¹ Kyaaryoowa, pikenkithashireperotero. Okaatakira 3 ojarentsi niyotaapiintakimi. Nokantatyeyaaani: tsiteniriki, kitejiriki. Eejatzi niraakopatiintakimi. ³² Nokantziri Awinkatharite: “Paminakowenteeyerini ejeesojatzi, eejatzi pamitakoteri raapatziyawo piñaani”. Aritaki omataka inaan aapatziyakaaperotakimi, owawijaakoeyakimini. Tema pikaa-teeyirini aapatziyeyakaririni Jesoshi riyoyagaeyakirini. ³³ Tee noñaawenatzitar

iyorikite paashini atziri. Tee noñaawenatzitari iithaari. ³⁴ Piyoteeyakini naakanya antawaetantacha, naantari oetarika koetyeemotanari, eejatzi netakoeyakarini notsipateeyarini. ³⁵ Nomayitakironi maawaeni iroka piyoteeyantyaarini eerori petakotanteeyaririni paashinipaeni. Pikimiteeyenani naari, pantawaetaperoteeyeni, petakotanteeyaaririni owashironkaachari. Pikekithashireero iñaani Awinkatharite Jesoshi, ikantzitarini: “Ro kameethaperotatsiri apashitantya. Tee apatziro okameethatzi aashityaawo oetarika ipashiteeteeri”.

³⁶ Rootaki ikanteeyakiririni Paaworo irira. Roojatzi rotziwerowanaka, ikateeyirini ejeesojatzi maawaeni, ikenkithatakagaeyirini Tajorentsi.

³⁷ Riragaeyanakanmaawaeni. Rawithakiteeyawaerini, riwethateeyawaerini. ³⁸ Rowashiretakoeyanakarini ikemakirira ikantaneeriri: “Eero piñagaana ejatzsi”. Rookaeyawaerini janta pitotsiki, raminawaeri riyaatee.

21

Eekiro rowaagatyaa Paaworo

¹ Roojatzinookaeyantanaarini aapatziyakaaperoeyaririni ejeesojatzi. Noteteeyanakanpitotsiki, tampatsika nokinakotanaki Kooshiki, nokantanaka jakiririri. Inkaamani nowaaganaa Roorashiki, roojatzi nowaagantanaa Paataraki. ² Noñaapaakiro janta pitotsi poñagaenchari Jeniishiyaki. Notetapaaka, nokinakotanaki. ³ Noñaantakanakowori Cheepere, nokinanampitanakiro nampateki. Nanaanakiro, roojatzi Shiiryaki, naatakatopaaka Tziiroki. Janta nampitsiki royiitanakiro marineero owaagawontsi. ⁴ Nokowayitapaakirini naari aapatziyariri Jesoshi. Noñaantapaakiriri, nojeekimotapaakiri ⁷ kitejiri. Iyotagaeyakirini Ishire Tajorentsi, ikanteeyantaririni Paaworo:

—Eero piyatzi Jerojareeki: rowashironkagaetawakimikari.

Omaanta tee ikemijantziri Paaworo. ⁵ Ari omonkaataa notetantanaari ejatzsi niyaateeyaneeni. Itsipateeyanakinani aapatziyariripaeni Jesoshi roojatzi othonkapaakanta nampitsi, janta othapýaaki, namaneeyakirini Tajorentsi. Roojatzi niwethatawakagaeyanaani. ⁶ Notetanaawo pitotsi, ari ipiyeeyanaani rirori ipankokipaeni.

⁷ Ari nopoñaanaka Tziiroki, nokinakotanaki, nowaaganaa ejatzsi Toremäeraki. Nareetapaakari ayemijantzinkarite niwethatapaakari. Apaani nomaaki. ⁸ Inkaamani nowaaganaa ejatzsi. Nareetapaakari Sesareeyaki, nareetapaakari Jiripi, riraga iyotaantatsiri. Aritaki ikaateeyirini riraga siete-tatsiri paerani, payitzirori owanawoni kamayiteentsirini oemini. Ari osheki nojeekimotapaakiri. ⁹ Eenitatsi rirori rishinto okaatzi 4, jeeekashitachari; okamananteeyini roori Iñaani Tajorentsi.

¹⁰ Osheki nomaanaki. Ari rareetapaaka kamanantzirorini iñaani Tajorentsi iitachari Akaawo, ipoñaanaka rirori Joreeyaki.

¹¹ Ipokashitapaakina, raapaakiro roojothakitarri Paaworo. Rirojatzi oojotashiteenchari iitziki, rakoki. Ikantzi:

—Aritaki okantzi Ishire Tajorentsi: “Eejatzsi ikimiteetakiri paata riraga ashitaworka roojothakiro. Roojoteri joriyopaeni, riraga jerojareejatzsi: shirik, shirik. Iperi kaari yotziri Tajorentsi, raanakiri”.

¹² Nokemantawakawori iroka, nokaateeyakirini maawaeni kemijantzinkaripaeni janta, nokanteeyawitarini Paaworo:

—Eero piyatzi Jerojareeki.

¹³ Rakanakina:

—¿Itaka piraantari? ¿Itaka pikantashiryakaantanari? Tema naaka aapatziyaperotariri Awinkatharite Jesoshi. Roojoteetenaata janta Jerojareeki, rowamagaetenaa: tee nothaawantari.

¹⁴ Tee ikemijantana, roojatzi nomaeeritantanaka. Nokanteeyini:
—Omawitya oetarika ikowakayimiri Awinkatharite.

Rareeteeyanakanji Jerojareeki

¹⁵ Roojatzi niwethateeyanaarini sesareeyajatzi, nokinanee tonkaariki, nyaatfantaari Jerojareeki. ¹⁶ Itsipateeyanakinani apaanipaeni aapatziyariri Jesoshi, rirotaki sesareeyajatzi. Raanakina janta ipankoki Manashoo, riraga cheeperejatzi: rirotaki itakaantawori aapatziyariri Jesoshi. Nomayimotapaakiri rirori. ¹⁷ Nareetantapaakari Jerojareeki, raakameethateeyawakinani ayemijantzinkarite, ikimoshirewentawakina. ¹⁸ Okitejitanaki rareetakayenari Paaworo Jantyaako, noyaatanakiri naari. Janta ipiyoteeyakaninta maawaeni aataperoteenchari aapatziyariripaeni Jesoshi. ¹⁹ Niwethatawakagaeyakani, roojatzi ithotaayakiniri Paaworo, ikenkithatakapaaakiri:

—Rotyaantakina Tajorentsi nokenkithatakagaeyirini oshekini paashinijattitatsiri atziri. Ikaateeyini osheki aapatziyeeeyakaririni Jesoshi.

²⁰ Ikemantawakawori, ikanteeeyini:

—Tajorentsi rirotaki kameethari.

Roojatzi ikanteeeyirini:

—Pamine, Paaworo, amonkaatawakagaeyakani aapatziyeeyarini Jeskirishito. Raapatziyeejakarini oshekiperoroña ajoriiyotzinkaritepaeni, omaanta eejatzi ikemijantaperoteeyakironi rojankinatzirini Moeseeshi.

²¹ Osheki ikemakoeyakironi pikantziriri ajoriiyotzinkaritepaeni, jeekimotziriri paashinijattitatsiri atziri: “Pookero rojankinarini Moeseeshi. Eero pitohowaeyirini pitomi. Pookaeyeeroni iroka ameteeyawitarini aari”. ²² ¿Tsika pikantyaari? Aritaki ikemakoeyakimini, areetapaakimini: ikijeeyawakimini. ²³ Pikemijantero iroka nokantemiri: eeniroka paashinijatzi shirampari, eenitatsi ikashiyakaakiriri Tajorentsi. ²⁴ Paaneeri maawaeni rirori Tajorentsipankoki, pikanteri Tajorentsi rowameethatanteyemirini. Pipinateniri irikapaeni oetarika, rameetantyaawori iishi. Roojatzi riyoteeyantanakyaarini ajoriiyotzinkaritepaeni tee kyaaryoopero iroka ikemakotakimir. Riyotanaki pimonkaatakiro Iwaperite Tajorentsi rojankinatakaakiriri paerani Moeseeshi. ²⁵ Omaanta riraga paashinijattitatsiri atziri, riraga aapatziyariri Jesoshi: nopakaantakiri rirori jankinarentsi. Eeniro iroka nokantakiriri: “Eero powayitarini iwatha rowaetakiriori riwetsikaetziniri, kaari Tajorentsi. Eero powakotawo riraa iwathakira. Pityaawo pookero riraa ari poyaawo iwathapero. Eero powari shirikachari. Eero piñaaminthatziro tsinaní kaari payi”. Romonkyagaagatakiri Paaworo.

²⁶ Ari ikemijantakiri Paaworo. Okitejitanaki raanakiri ewankaripaeni, ikanteejakirini rowameethatantyaariri, eejatzi ikyeeyapaakini Tajorentsipankoki. Ikantapaakiri janta:

—Okaate ⁷ kitejiri nomonkaatantakyaawori nanteyeyerini rowameethatantenari Tajorentsi. Roojatzi nowamayeniri piratsipaeni, notayeniri.

²⁷ Roowiteencha omonkaatyami 7 kitejiri. Iñeeyakirini janta Tajorentsipankoki joriiyopaeni, poñaachari Aashiyaki. Ikiakaakari piyoteenchari-paeni, roojatzi ragaeyakirini Paaworo, shepik. ²⁸ Ikaemaeyanakini:

—Nojoriiyotzinkarite, pamitakoeyenani. Rirotaki irika kinakinatatsiri maawaeniki nampsiti amatawiteeyiririni atziri; ikanteejakirini: “Tee

ikameethatzi joriiyopaeni. Tee okameethatzi rojankinarini Moeseeshi. Tee okameethatzi "Tajorentsipankoki". Rootaki ikanteeyiririni atziri. Paminety iroñaaka ramakiri eejatzu jaka paashinijatzitatsiri atziri, kaari okameethatantanaa iroñaaka iroka pankotsika kameethatawitachari.

Rootaki ikanteeyakiririni. ²⁹ Chapinki iñaawakiri Paaworo janta nampitsiki, itsipatawitaru Toroojimo: riraga ejeesojatzu. Iitashiteeyawakarini riro-taki ikyakaapaakiri Tajorentsipankoki, rootaki ikanantakari: "Ramakiri jaka paashinijatzitatsiri atziri".

³⁰ Ari ikijeeyanakan maawaeni nampitsiweri, ipiyoteeyanakan janta. Raakiri Paaworo shepik, inoshikanakiri inkokironta, jerererere. Rrojatzu rashitantanakawo Tajorentsipankoki, rootaki ikanantakari: "Ramakiri jaka paashinijatzitatsiri atziri".

—Ikijeeyanakan maawaeni jerojareejatzu.

³² Ishintsitzu raanakiri joraaro, eenitatsi kapitaanotatsiri, ishiyashiteeyanakanakarini. Iñaanteeyawakaririni atziri, ipakaanteeyanakanakaririni ipajeevirinira. ³³ Ari ipokapaaki komantaante, raapaakiri Paaworo. Rrojotakaantakiri. Ro roojotantapaakariri apite karenatha. Rojampikowentapaakiri riroripaeni:

—¿Ninka irika? ¿Oetaka rantakiri pikijeeyantakaririni?

³⁴ Ipaashinitayitanakironi ikantayitanakirini. Ikaemaeyanakini, tekatsi ikantya komantaante riyotakoteri, rootaki raakaanantanakariri janta ipankoki joraaro. ³⁵ Rareetapaakawo ateetamentotsinta, osheki rotatsinkaeyanakanakirini. Roojatzu rateetakaantapaakari joraaro.

³⁶ Royaatanakanakir osheki atziri ikaemaeyanakini:

—Powamayeri.

³⁷ Roowitapaenchu ikyakaapaakirimi Paaworo pankotsiki. Ikantziri riraga komantaante:

—¿Kameethama nokenkithatakayemi?

³⁸ Ikantziri:

—¿Piyotziroma ipaante kireeshiyajatzu? ¿Tema eeroka ejipitojatzu riraga kijakaakariri atziri chapinki? ¿Tema eeroka aaneeriri chapinki 4.000 owayiri janta okaankiyeenta tee oshookaperotzi oetarika?

³⁹ Rakanakiri:

—Tee. Naaka joriiyo. Nopoñaanaka Taarishoki, rowaga shiriishiyawero. Iyotakotzirori nonampi. Iroñaaka nokantem: pishinetena nokenkithatakayeri atziri.

⁴⁰ Ari ishinetakiri, ikantziri:

—Intsipaete, pikenkithatakayeri.

Roojatzu ikatziyantapaaka ateetamentotsiki. Roojatzu itzinayimotanakir atziri rako. Imaeriteeyanakini, roojatzu ikenkithatakagaeyantakarini. Ro ikenkithatakantariri ipaante ewereeyo, rootaki rashu joriiyopaeni.

22

Ikenkithatakakiri Paaworo joriiyopaeni

¹ Iroka ikanteeyiririni Paaworo:

—Nojoriiyotzinkarite. Iroñaaka naaka kantakotachani. Pikemijanteyawakinani.

² Ikemantawakariri iñaawaetantanakawo ewereeyo, eekiro osheki imae-ritoeyanakini. Ari ikantanaki:

³ —Naaka joriiyo. Ari ojeekakaakina nana janta Taarishoki, irona shiriishiyawero. Jaka nampitsikika ari nantaritaki. Ryotaakina

Kamariyeeri, ithotyaaperotakinawo iroka ikanteeyirini achariniiteni. Nokowaperotaki noshintsiteiri Tajorentsi oetarika nantziniriri, nokimitawitakimi eerori ironaaka. ⁴ Nokijaperotziri iyotaantzirori iroka owakiratsatsi, rootaki nowantayitaririni, noojotakaantayitakirini, eejatzi nomonkyaaagakaantayitakirini shirampari, tsinani, maawaeni. ⁵ Riyotana iwinkatharite ñaanakowenantsatsiri kyaaryootaki iroka nokantakimiri. Eejatzi ikimiteeyanaani maawaeni aataperoteenchari joriyopae: riraga iyotaawakaenchari, ryoteeyini. Riroteeyakini panawori jankinarentsi rojankinatziniri tamaashikojatz. Rotyaantakina nokijeeyantyaaririnimi aapatziyeyyaririni Jesoshi. Niyaatawitaka Tamaashikoki nayiterimi jeekatsiri janta, noojoterimi. Namakirimi jaka rowashironkaantyaaririmi ñaanakowenantsatsiri.

⁶ Nokinanaki awotsiki, nokaakintapaakawo Tamaashiko. Ari ikaataki tampatsika oorya. Omapokapaakina, amorekakotapaakina amorekatsiri, oponaaka jenokinta. ⁷ Notyaanaki kipatsiki, teree. Nokemakiri ikantakina: "Sawoori, Sawoori. ¿litaka pikijaktakinari?" ⁸ Nakanakiri: "¿Ninkamika Nowinkatharite?" Ikantakina: "Naaka Jesoshi, najareetejazzi: naaka pikijakiri". ⁹ Iñeeeyakironi notsipateeyarini iroka amorekatsiri, omaanta tee ikemaeyawakironi ikantakinari Jesoshi. ¹⁰ Nokantziri: "¿litaka pikowakaakinari nanteri?" Ikantana Awinkatharite: "Pikatziyanee, piyaate Tamaashikoki. Janta ikanteetemi oetarika panteri". ¹¹ Oshipakiryaakoperotanakina amorekatsiri, rootaki kaari nokokichaatantanaa. Ari ikathatanakina notsipataripaeni. Roojatzi rareetakaantakina Tamaashikoki.

¹² Ijeeki janta shirampari iitachari Ananiiyashi. Ikemijantaperotziro rojankinarini Moeseshi. Ifñaaperoyirini maawaeni joriyo, jeekatsiripaeni janta. ¹³ Ipokashitakina, rokaakintapaakina, ikantapaakina: "Sawoori, eerokataki noyemijantzinkarite. Paminanee". Roojatzi naminantanaa, kokichaatanaana. ¹⁴ Eejatzi ikantana: "Riyoyaakimi Tajorentsi piyotantyaawori ikowakaakimiri rirori. Riyoyaakimi pikemaperotantyaariri. Riyoyaakimi piñaawaetanyaawori rowaga Kameethaperotatsiri. Eejatzi ryoyaakimi pikemaperotantyaariri rirori. ¹⁵ Eejatzi pikenkithatakoteri. Pikanteri maawaeni atziri iroka piñaakiri eejatzi iroka pikemakiri. ¹⁶ ¿litaka pojamaninkantawori? Thame, pikaawoshitakotaari Tajorentsi. Eeniropi kaari kameethatatsi pantayitzirini, omaanta aririka pameentyaari Tajorentsi, rowameethateemi".

¹⁷ Ari roojatzi nopyiana Jerojareeki. Namanawitakari Tajorentsi janta Tajorentsipankoki, roojatzi okimiwitaka nomishiwaetatz, ¹⁸ tema noñaashitakari Awinkatharite. Ikantakina: "Pishintsite, pookaneero Jerojaree, pishiyanki. Eero ikemijanteetziro iroka pikenkithatakotakinari". ¹⁹ Nokantziri: "Nowinkatharite, ryoteeyakini nothotyaakiro maawaeni pankotsi ipiyoteeyantaririna joriyo, nagaeyakirini aapatziyemini. Nomonkyaaagakaantakiri, eejatzi nopajatataantakirini. ²⁰ Naaka owamaakaantakiriri Eshiteewani: riraga kantakotzimiri. Nokatziyaka okaakini, nokantziri: 'Kameetha ikame'. Naminakiniri owakiniriri imaatha". ²¹ Omaanta ikantakina: "Thame piyaate. Nokowaki notyaanteminteena, janta ijekinta paashinijatzitsatsiri atziri".

²² Ikemijanteeyawitakarini joriyopae, omaanta ikemaeyantawakaworini iroka, ikaemaeyanakini. Ikanteeyini:

—Pookaneeri. Tee okameethatzi rañee: powamayeri, ikameeta.

²³ Ikaemaeyanakini, ikijeeyanakani, rootaki raatonkoryagaeyanakawoni itzinaatzinaatakiro imaatha jenoki eejatzi kipatsipane romanapanetakiro jenoki. ²⁴ Iñaaateeyakaririni komantaante ikijeeyakani, roojatzi ikanantakari joraaro:

—Paanakiri, pikyaakaanakiri janta: pipajapajaateri ikanantemiri oetarika rantakiri ikijeeyantakaririni ijoriyyotzinkaritepaeni.

²⁵ Ari roojotawitakari ipajatantyaaririmi. Ari ijeeki janta kapitaanotatsiri, ikantziri Paaworo:

—Eenitatsi nowaperite nokimitantariri oroomajatzsi. Tekira piyotako-teeyanani eenitatsirika nantani, ḡarima pipajatakaantashitakina?

²⁶ Ikematziri, riyaatashitakiri komantaante. Ikantapaakiri:

—᠀litaka pantakayeriri? ¡Kyaaryoowa! Eenitatsi irira iwaperite roshiyantariri oroomajatzsi ikimitantanari.

²⁷ Ari ipokashitakiri komantaante, ikantziri:

—Pikantaperotenaata. ḡEnitatsima piwaperite pikimitantariri oroomajatzsi?

Ikantziri:

—Jee, eenitatsi.

²⁸ Ikantanaki komantaante:

—Osheki nopolawentakiro nowaperite nokimitantariri naaka oroomajatzsi.

Ikantzi Paaworo:

—Owakirani nokoñaataki ari otzimaki nowaperite nokimitantariri oroomajatzsi.

²⁹ Intsipaete rotyaantaneeri riraga pajaterinimi. Omaanta komantaante, iħaawanaki. Riyotaki roojotakaantashitakari kimitakariri oroomajatzsi: tee okameethatawita roojotakaantashityaarimi.

Raanakiri Paaworo janta jewawentziriri joriiyopaeni

³⁰ Ikwaki komantaante riytaperote oetarika ikantakotantariri joriiyopaeni Paaworo. Inkaamani roojoryaakoteeri. Ipiyotakaanteeyakirini jewawenantsiripaeni ħaanaakowenantatsiri, eeniro maawaeni jewawentziriri joriiyopaeni. Roojatzi roerinkakaantankari Paaworo, raanakiri janta.

23

¹ Raminaperotapaakiri maawaeni iyotaawakagaenchari. Ikantziri:

—Nojoriiyotzinkarite. Niyotzi iñaperotakina Tajorents. Nokantatyani kameetha nojeeki, roojatzi iroñaaka.

² Riraga Ananiyyashi iwinkatharite ħaanaakowenantatsiri, ikantziri tsipatariri janta:

—Pipajawaanteteri.

Ari, ipajawaanteteetakiri.

³ Ikantanaki Paaworo:

—Erokataki eero ka ikijekya Tajorents: eeniro pantani: osheki pamaṭawitantzi. Iroñaaka eeniro pijeeki jaka, pikowaki pimonkaateromi Iwaperite Tajorents, pikantakowenantenarimi. Omaanta pipajatakaantashitakina, tee pimonkaatziro Iwaperite Tajorents.

⁴ Ikantanaki katziyeenchari jaga:

—Rirokataki pikantakiri iwinkatharite ħaanaakowenantatsiripaeni.

⁵ Rakanakiri:

—Nojoriiyotzinkarite, tee niyotzi rirorika iwinkatharite ħaanaakowenantatsiri. Okantzi Iwaperite Tajorents: “Eero pikantzimatiziri jewawenantsirisa atziripaeni”. Niyotakimirika, eero nokantzirimi.

⁶ Opokimotapaakiri ikenkithashiryaanaka Paaworo janta rojatzinkaakarinta ñaanakowenantsatsiri, eeniro janta saroseeyopaeni eejatzi warijeeypoaeeni. Ikaemanaki:

—Nojoriyyotzinkarite. Naaka warijeeyo. Naaka itomi warijeeyo. Niyotaki ipiriinteeyeeni maawaeni kamaentsiripaeni, rootaki ikijantakinari iroñaaka irikapaeni.

⁷ Ikemanteeyawakaworini iroka ikantakiriri, ikijathatawakagaeyanakanani warijeeypoaeeni eejatzi saroseeyopaeni. Ikijawakagaeyanakanani. ⁸ Ikantapiinteeyini saroseeyopaeni: “Eero ipiriinta kamaentsiripaeni. Tee añiiri Tajorentsi ronampiri. Tee añiiro ashire aari”. Omaanta ikanteeyini warijeeyo: “Apiriinteeyaneneeni. Eenitatsi ronampiri Tajorentsi. Eenitatsi ashire maawaeni”. ⁹ Ari ikijathatawakagaeyanakanani. Ikatziyanaka iyotaantzirori Iwaperite Tajorentsi, rirotaki warijeeyo. Ikantaperotanaki:

—Tekatsi nokemakoteri irika rantakiro kaari kameethatatsiri. Aririka ryotaakiri Tajorentsi. Aririka ryotaakiri ronampiri.

¹⁰ Eekirowa ikijathatawakagaeyanakanani. Raamaanaka komantaante ari ichokiryagaetakiri Paaworo. Rottaantakiri joraaro:

—Piyaate, pagaateri.

Ari ranashiteeyanakanani, ryaatanaki niyanki, raapithateeyawaerini. Raaneeri janta ipankoki joraarpaena. ¹¹ Apaani imaaki, otsitenitanee eejatzi, ikoñaatzimotapaakiri Awinkatharite. Ikantapaakiri:

—Piweshiryaaanakya. Pikenkithatakotakina jakar Jerojareeki, eejatzi pikimiteeya iinja janta Oroomaki.

Raaneeri Paaworo Sesareeyaki

¹² Ari okitejitanaki, apaanipaeni joriyyopaeni, rajaryaagaeyawitakarini Paaworo rowamaerimi. Ikantawakagaeyakanani:

—Iroñaaka tekiraata owamayiri, eero oyitaa, eejatzi eero iritaa amiri. Aririka amatawitawakagaeyani, tema akowatzi rowashironkagae Tajorentsi.

¹³⁻¹⁴ Ikaateeyawitakani 40 shirampari ajaryaawitakariri rowamaerimi. Ryaatashiteeyakirini jewawenantsirsipaeni ñaanakowenantsirsipaeni eejatzi aataperoteencharipaeni. Ikantapaakiri:

—Tekiraata nowamaeri Paaworo, rooma eero nowanaa, eejatzi eero niranee. Eerorika nowamaeyirini, nokowaeyakini rowashironkayenaata Tajorentsi. ¹⁵ Pikaateeyerini maawaeni iyotaawakagaenchari, pikantakiteri riraga komantaante: “Pamakinari Paaworo, nokowaki niyotakotaperoteri, iitarika rantakiri”. Rootaki pikanteriri. Omaanta naakakya, niwetsikaeyitakyaani nowamaantawakyariri niyanki awotsi, tekiraata rareetya.

¹⁶ Eeniro otomi ritsiro Paaworo, ikemakowentakiri rikonkiri rajaryaagaetakari rowamagaeteri. Ari ryaatanaki janta ipankoki joraaro, ikamantathatapaakiri rikonkiri. ¹⁷ Roojatzi ikaemakaanantakari rirori apaani kapitaanotatsiri, ikantziri:

—Paanakiri irika ewankari janta ijeekinta komantaante. Eenitatsi ikanteriri.

¹⁸ Roojatzi raantanakari janta. Ikantapaakiri:

—Ikaemakina Paaworo, riraga omonkyagakiriri chapinki. Ikantakina: “Paanakiniri komantaante irika. Eenitatsi ikanteriri”.

¹⁹ Ari ikathatanakiri eekitziroeni jaga. Imanakaakari, rojampitakiri:

—¿Oetaka pikoyiri pikantenari?

²⁰ Ikantziri:

—Ikantawakaaka joriyyopaeni, ikowakoeyakimini paaneeniri Paaworo janta ryotaawakagaeyakaninta. Ikowaki ramatawitemi, ikante ikowaki

rojampitakowentaperoteri konki. ²¹ Omaanta, eero paapatziyari Jesoshi. Enenitasi shirampari, ikaateeyakini 40, ajaryaa kariri rowamaeri. Ikan-teeyakini: "Tekiraata owamayiri, eero oyita eejatzi eero irita amiri. Eerorika owamaeri akowaki rowashironkagaeyeenii Ta jorentsi". Iroñaaka riwetsikaeyakan. Royagaetakimi iroñaaka panteniri iroka ikowakotemiri.

²² Ari rotyaantziri komantaante riraga ewankari. Ikantawakiri:

—Eero pikantziri paashini atziri iroka pikantakinari.

—Ari.

²³ Roojatzi ikaemiri apite kapitaano. Ikantziri:

—Aririka oniyankiitetzimatanaki, piwetsikaeyerini 200 joraaro raanakiro ichekamentopaeni, 70 kyaakotyaarini kawayo, eejatzi 200 oerikeroni rojataamento. Riyaateeyini Sesareeyaki. ²⁴ Piwetsikeniri Paaworo kawayo, ikyakotanakyaari. Kameetha pagayaenakirini janta ijekinta jewatatsiri Jeerishi.

²⁵ Roojatzi rojankinatziniri jankinarentsi, ikimitakiro iroka:

²⁶ “¿Eeniromi Jeerishi? Nokoyi niwethatemi tsikarika pikanta pijeeiki. Naaka Kiraaworyo Riishiyashi ojankinatzimirori iroka. Osheki nopinkathatzimi. ²⁷ Piñaawakirira irika shirampari notyaantemiri.

Roowiteencha rowamaerimi chapinki joriipyopaeni. Ikanteetana enenitasi iwaperite ikimitantariri oroomajatzi, roojatzi nyaatashitantakariri, notsipateeyanakarini joraaro, nowawijaakoteeri. ²⁸ Nokowaki niyote oetaka ikantakotanteetariri, naanakiri janta riyotaawakagaeyakaninta. ²⁹ Nokemapaakiri, ikantawakaawenteeyawoni jankinarentsi rashiroripaeni. Omaanta tekatsi ikantakoeteri omonkyaa ganteetyaariri eejatzi rowamaanteetyaariri. ³⁰ Enenitasi kantapaakinari rajaryagaetakari rowamagaeteri, rootaki notyaantanakimiriri. Notyaantemiri iinja riraga kijakiriri riyaatashitemi ikantakoperoteri Paaworo”. Rootaki rojankinatziniri, roojatzi ipawakiri joraaro, ikantziri:

—Enenitasi iroka nowaaritate paanakiniri Jeerishi, eejatzi paanakiniri Paaworo.

³¹ Ari ikemijantakiri joraaro, raanakiri Paaworo. Tsiteniriki rareetaakari Anteepatzirishiki. ³² Okitejitanaki ipiyeeyanaani joraaro inampiki. Irira tsipataperotanakariri Paaworo riraga kyaakoeyanakaririni kawayo. ³³ Rareeteeyantapaakarini Sesareeyaki, ipapaakiri pinkathari jankinarentsi. Eejatzi riraga Paaworo, roñaagapaakiri. ³⁴ Ifaanatawakiro jankinarentsi, roojatzi rojampitantawakari:

—¿Oetaka piipatsite pipoñaantakari?

Rakanakiri Paaworo:

—Nopoñaanaka Shiriishiyaki.

³⁵ Ikantziri pinkathari:

—Inja ipokawakiita kantakotemini, ari nokemijantanakimi.

Roojatzi ikanantakari joraaro:

—Pashitakoteri janta ipankoki Erooreshi, paminaperoteriroña.

24

Ikantakowentziri Jeerishi riraga Paaworo

¹ Okaataki kitejiri apawakooni, ari riyaatanaki Ananiyyashi, riraga iwinkatharite ñaanakowenantsirsitsipatanakari apaanipaeni aataperoteenchari. Eeniropi eejatzi itsipatanakari ñaaawetakontatsiri, iitachari Teeretoro. Riyaatashitakiri pinkathari ikantakoyerini Paaworo. ² Ikaemaetakiri, roojatzi ikenkithatzi Teeretoro. Ikenkithatkaapaakiri Jeerishi, riweshiryappaakari eejatzi ikantakotashitakari Paaworo, ikantzi:

—Iroñaaka, nowinkatharite, nopaasonkiteeyimini. Kameetha pipinkathariwenteeyakinani, rootaki kameetha nojeekaeyantakarini jaka. Powameethateeyakinawoni oetarikapaeni jaka aepatsiteki, ³ pamitakoeyakinani rootaki nopaasonkitantakimiri maawaeni. ⁴ Iroñaaka eero nojamanitzimiro. Aritakikya pametawo pineshironkatantzi, eechonkiini nokowaki pikemijantawakina. ⁵ Noñaakiri irika Paaworo, osheki roñaashirenkantzi. Ikjikagaeyakarini joriiyopaeni maawaeni nampsikipaeniweri. Rivotaki jewatakaeriri kemijanteeyiririni riraga najareetejatzi. ⁶ Roowitaneecha ramashitantyaawomi Tajorentsipankoki kaari kitetatsi, roojatzi nagaeyantakaririni. Roowitaneecha nomonkaateromi rojankinateeyanarini Moeseshi, nokantakowenantyaaririmi iroka. ⁷ Omaanta rareetapaaka Riishiyashi riraga komantaante. Rotatsinkantayitapaakinarini, raapithatapaakinari. Rotyaantakina nopolkantakari jaka, noñaawaetakotantyaariri Paaworo. ⁸ Iroñaaka pojampiteri, piyotantyaari kyaaryorika iroka nokantakotakiriri.

⁹ Ikanteeyanakini joriiyopaeni:

—Kyaaryootaki iroka ikantakiri. Aritaki okantakari.

¹⁰ Ari riraga pinkathari ikantakiri Paaworo iñaawaete rirori, ikantzi:

—Niyotaki okaatzi iroñaaka osheki ojarentsi pipinkathariwenteeyirini natziritzinkaritepaeni, rootaki nokimoshiretananakari. Iroñaaka naaka kantakotaachani. ¹¹ Intsipaete, pojampitakowenteeyenani. Owakiratatsi okaatzi 12 kitejiri niyaatantakitari Jerojareeki. Niyaatakitzi nopinkathataktitziri Tajorentsi. ¹² Tekatsi ñeenani nokijathatawakayaani janta Tajorentsipankoki, eejatzi tee nokijathatawakayaani janta pankotsiki nopiyoteeyinta nampsiki, tekatsi. Eejatzi tee nopiyoteeyirini osheki atziri. ¹³ Tekatsi ikantya iroñaaka riytakaaperotemi iroka ikantakotashitakinari. ¹⁴ Iroñaaka nokamantaperotemi. Naapatziyari riraga Tajorentsi rivotaki raapatziyarini nochariniuteni paerani. Nokemijanteeyironi rojankinarini Moeseshi, eejatzi roori rojankinarini kamantanayitzirorini iñaani Tajorentsi. Kyaaryo, eeniro riytakakinari Jesoshi ayoteeyantyaarini aateeyanteyarin Jenokinta, omaanta ikantashiteeyakanri irikapaeni tee okameethatziaapatziyawo. ¹⁵ Nokimiteeyakarini rirori, niyotaki ipiriinteeyeerini Tajorentsi maawaeni kamawiteencharipaeni: kameethatatsiri, kaari kameethatatsi, maawaeni. ¹⁶ Rootaki nokowaperotantakari nowameethashiretzimotyaari Tajorentsi, eejatzi atziri. Tema iñeyakinani. Nokowaki nojeeke kameetha, niyotantyaari iñaaperotakina nokameethatzia. ¹⁷ Nojeebakwitaka janta intena osheki ojarentsi, iroñaaka nopiyaa. Namakiniri nosheninkapaeni ipakaantashitayitakaririni jeekatsiri inashitachariki nampsipaeni. Eejatzi nopashitapaaakar Tajorentsi oetarika. ¹⁸ Paminetya iroñaaka, iñaakina janta Tajorentsipankoki, nopinkathaperotziri Tajorentsi. Tekatsi nopiyotakayaari, eejatzi tekatsi nokijakayaari. ¹⁹ Ari ijekitaka janta joriiyopaeni poñaacharipaeni Aashiyaki, rivotaki kijakagaeyakaririni atziripaeni. Eenirorikami nantayitzirini, tema ari ipokakimi rirori ikantakowentenami. ²⁰ Omaanta ¿oetaka ikanteeyirini irikapaeni? ¿Oetaka riytakotanari janta riytawakagaeyakaninta? ¿Eenitatsima nantakiri? ²¹ Apatziro nokantakiri chapinki: “Niyotaki ipiriinteeyanneeni maawaeni kamawiteencharipaeni, rootaki pikantakowenantakinari iroñaaka”.

²² Riyotaperotzi riraga Jeerishi iroka akantakotziriri Tajorentsi. Ikan-tanaki:

—Aritaama iroñaaka. Iinja ipokawaeta komantaante Riishiyashi, ari nokantakowentempi.

²³ Iantziri kapitaano:

—Paaneeri Paaworo, pomonkyaagaeri: paminaperoteri, omaanta pishineteri oetarikapaeni ikoyiri. Eejatzi pishineteri tsipatapiintakariri retakotyari.

²⁴ Paashini kitejiri ipokapaaki Jeerishi. Itsipatapaakawo iina oetachari Toroshiiya. Irowa rootaki joriyyo. Ikaemakaantziri Paaworo ikemijanantyaariri. Ikenkithatakotziro tsika akantya aapatziyantyaariri Je-sokirishito. ²⁵ Eejatzi ikenkithatakotziro tsika akantyaari akameethashiretanee, eejatzi ajeeke kameetha. Eejatzi ikenkithatakotziri Tajorents, tsika ikantyaari iinja ikantakowenantyaariri maawaeni atziri. Ari ithaanawanaki Jeerishi. Ikantz:

—Iroñaaka piyaatee. Iinja tekatsirika nante, ari nokaemakaanteemi paashini.

²⁶ Ari oshekitaki ikaemakaantapiintakiri, iitashitaka Jeerishi ari ipashitaneyarimi koriki ishinetantyaaririm iyaatanteeyari. Ari ikenkithatakotaapiintakiri, omaanta tee ipiri koriki. ²⁷ Apite awijanaki ojarentsi. Ipoyaataari Jeerishi riraga Poorishiyo Jeeshito. Ikowaki ikimoshiretakayeri joriyyopaeni, rootaki kaari ishinetantaari Paaworo ishitowae.

25

Rawentaakari Paaworo Seesari

¹ Ari rareetapaaka Jeeshito janta ipinkathariwenantenta. Imaapaaki 3 Sesareeyaki, roojatzi rowaagantanaa Jerojareeki. ² Eeniro riraga jewanenantsiripaeni ūaanakowenantsirs, eeniro jewawentziriri joriyyo, iňawaetakoeyirini Paaworo. Ikantziri Jeeshito:

³ Pikimoshiretakayena. Pamakaantakinari Paaworo jaka Jerojareeki.

Ari rajaryaawitakari romapokawakirim niyanki awotsi, rowamaakirim.

⁴ Ikantz Jeeshito:

—Ijeekawakiita Sesareeyaki. Eero ojamanitzi nopyiee. ⁵ Ari eenirorika rantani, nokowaki itsipatanakina jewatatsiripaeni ikantakotantyaariri.

⁶ Ari aamaashitya ijeekaki janta 8 kitejiri, rooma teerika 10. Roojatzi ipiyantaa Sesareeyaki. Inkaamani ijeekaki janta iwinkatharimentoki. Ikaemakaantziri Paaworo. ⁷ Rareetapaaka, ari rojatekawakiri joriyyopaeni riraga poňaachari Jerojareeki. Osheki ikantakotaperotantyaariri Jeeshito.

⁸ Rirojatzi kantakowentaacha Paaworo, ikantz:

—Tekatsi nokantero Iwaperite Tajorents, raapatziyawo joriyyopaeni. Tekatsi nokantero Tajorentsipanko. Eejatzi okimitaaka, tekatsi nokantzima-teri Seesari.

⁹ Omaanta Jeeshito ikowaki ikimoshiryaa kagaeyerini joriyyopaeni. Ikantziri Paaworo:

—Pikemaki iroñaaka ikantakoeyakimini irikapaeni. ¿Pikoyima piyaate Jerojareeki? Janta ari nokantakowenteemiri.

¹⁰ Rakanaki Paaworo:

—Enitatisi nowaperite nokimitantariri naaka oroomajatz, ariwitakami jaka pikantakowentenami. Piyoperotaki tekatsi nokantziri joriyyopaeni.

¹¹ Nantakirorika kaari kameethatatsi, nokantzimatakiririka Tajorents, eeniro nantani rowamaanteetenari, ari. Kameethataki rowamagaete-naata. Omaanta aririka ikantakotashiteeyanan, tekatsi pikantya pishinetakowentena. Nokowaki potyaantena iroñaaka Seesariki: nawentayaari, ikantakowenantenari rirori. ¹² Ari ikenkithatakakiri Jeeshito riraga iy-otaawakaenchari. Roojatzi ikantziri Paaworo:

—Iroñaaka pikowaki notyaantem Seesariki. Aritaki notyaantem riroriki, ikantakowenantemiri.

Ikenkithatakaakiri Jeeshito Akiriipa

¹³ Ari okaataki apaanipaeni kitejiri imaaki. Areetapaaka Sesareeyaki jewawenantatsiri Akiriipa, itsipatawo Werenishe. Ipoki rareetari Jeeshito.

¹⁴ Ijeekapaaki osheki kitejiri, ari ikenkithatakotakiri Paaworo:

—Eeniro jaka shirampari romonkyaagakiri Jeerishi. ¹⁵ Niyaatantakari Jerojareeki, ikantakotakiri joriyyopaeni: riraga jewawenantatsirsipaeni ñaanakowenantsiri,aataperoteenchari joriyyopaeni, maawaeni. Ikowakotakina nokantakowentashityaari Paaworo: “Eeniro rantani”. ¹⁶ Omaanta nokantakiri: “Naaka oroomajatz. Tee nametawo noshinetakaantashityaari tekiraatarika ikantakoetziri. Ikemawakiroota irika pikantakoteriri eeroka-paeni. Rirojatzikya ñaawaetakotaacha”. ¹⁷ Roojatzi ipiyoteeyantakan jaka, ari tee nojamaninkiro. Inkaamani nojeekaki jaka nowinkatharimentoki, nokaemakaantakiri Paaworo. ¹⁸ Ari neewawitaka ikanteeeyini rantap-erotziro kaari kameethatatsi. Omaanta, tekatsi ikantakotaperooyerini. ¹⁹ Ikjithatawakaawentakawo iroka raamaashiteeyakarini rirori. Eejatzi ikjithatawakaawentakari Jesoshini. Ikamaki, omaanta ikantzi Paaworo: “Añaagae”. ²⁰ Tee niyotzi tsika nokanterori nojampitakowenantyaawori iroka ikantayitzirini. Nojampiwitakari ikowakirkira riyaate Jerojareeki, janta nokantakowenantyaaririmi. ²¹ Omaanta ikowanaki ikantakowenteri irira Seesari, riraga Awoshito. Ari nokantakiri joraaro ishenteri, roojatzi notyaanantyaariri janta Seesariki.

²² Ikantzi Akiriipa:

—Nokowaki nokemijanteri naaka.

Ikantziri:

—Aritaki, inkaamani pikemerri.

Ikenkithatakaakiri Paaworo Akiriipa

²³ Inkaamani riyaataki Akiriipa, eejatzi Werenishe. Ari rowaneenkaperoteeyanakan apite. Ikyaanaki janta ipiyotapiinteetanta. Ikaateeyakirini komantaaantepaeni, eejatzi pinkatharifatsirsipaeni: riraga jeekatsirsipaeni janta. Riraga Jeeshito, ikaemakaantakiri Paaworo. Ari ramapaakiri joraarpaeni. Ikantzi Jeeshito:

²⁴ —Pinkathariwenantatsiri Akiriipa. Maawaeni eeroka nokaateeyirini jaka. Eeniro irika. Ipokashiteeyakinani maawaeni joriyyopaeni: jerojareejatzi, eejatzi irika jeekatsirsipaeni jaka. Ikantakotawitari irika: “Tee okameethatzi eekiro ijeeki”. ²⁵ Omaanta tekatsi niyotakoteri nowamaantyaariri. Eeniro iroñaaka rawentaakari Seesari, ari iroñaaka nokoyi notyaanteri riroriki. ²⁶ Omaanta tee niyotzi oetarika nokantapero-teriri awinkatharite. Rootaki nokaemakaanantakimiri eeroka, ojampitakowenantyaariri. Roojatzikya ojeeke nojankinatakotantyaariri. ²⁷ Eeniro irika nomonkyaaagakiri. Tee okameethatzi notyaantashityaari, tekatsirika nokantakoteri.

26

¹ Riraga Akiriipa ikantziri Paaworo:

—Iroñaaka noshinetem eeroka ñaawaetakotaachani.

Roojatzi itzinaantanakawo rako Paaworo, rirotaki ñaawaetakotaacha apaniroeni:

² —Piñaakina, Pinkathariwenantatsiri Akiriipa. Iroñaaka nokantem oeta ikijawenantakinari nojoriyyotzinkarite. Nokimoshirewentakimi, ³ tema

piyotaperotziro maawaeni rametayitarini nojoriyyotzinkarite, eejatzi piyotzitawoni maawaeni ikantawakaawenteeyarini. Nokowaki pikemijantap-erotena, eero pijamashiryana.

⁴ Riyotakotziteeyakinani nojoriyyotzinkaritepaeni paerani eenironi newankaritapaeni. Nojeekini Jerojareeki, nokaateeyakirini nosheninka. Roojatzi iroñaaka riyotana. ⁵ Tema kemijantzinkarite warijeeyotsatsiri. Paerani nowarijeeowyitana naari, nokimitaperowitarini. Riyotaper-oeeyakinani nojoriyyotzinkaritepaeni, ikowakirikami ikanteeyemini. ⁶ Nokowaperotaki noñeeri ikashiyakaakariri Tajorentsi nochariniiteni, rootaki iroñaaka pikantakowenantakinari. ⁷ Pinkathari Akiripa, paerani ikoñaatantapaakarini nochariniiteni Jakooowoni itomi ikaatzi 12, ijomiyoteyinini. Iroñaaka ikowaeyakini maawaeni icharineeten iñeeri riraga Rotyaantanewo Tajorentsi, rootaki rantawaetantanariri irira iroñaaka. Ikantatyaaani raamagaeyawitakarini: kitejiriki, tsiteniriki. Iroñaaka nokantakiri ipokaperotaki, rootaki ikantakotantanari iroñaaka nojoriyyotzinkarite. ⁸ ¿Piitzima eero imatziro Tajorentsi ipiriinteri kamatsiripaeni? ¿Itaka pitheenkantariri?

⁹ Nokenkithashiryaaawitani naari paerani okameethatzi nokijeri riraga aapatziyeeyaririni Jesoshi riraga najareetejatzi. ¹⁰ Aritaki nomatakiro janta Jerojareeki. Nomonkyaaagayitawitakarini osheki riyoyaanewopaeni Tajorentsi. Rriotaki otyaantakinari jewawenantatsiripaeni ñaanakowenantatsiri. Nokowaeyawitani ikamaeyenimi aapatziyeeyaririni Jesoshi.

¹¹ Aritaki osheki nowashironkaapiintawitzitarini janta nampitsikipaeni. Nokijantakariri, rootaki noyaakyaatantakariri roojatzi paashiniki nampitsiki ijekinta paashinijatzitsatsiri atziri.

¹² Rootaki niyaatashitawitakariri tamaashikojatz, rotyaantana jewawenantatsiripaeni ñaanakowenantatsiri nayerimi. ¹³ Ari nokantanaka niyaatanaki awotsiki, itampatsikataki oorya. Ari noñaawakiro janta awotsiki shipakiryaatsiri opoñaanaka jenokinta, shipakiririri. Oshipakiryaaperotapaakiroña, anaakoperotakiri oorya. Inkitalpaakina, eejatzi riori nokaateeyakinira. ¹⁴ Notyagaeyanakini kipatsiki, tereei. Roojatzi nokemantakariri, ikenkithataakaana ipaantek ewereeyo. Icantakina: "Sawoori, Sawoori. ¿Itaka pikijantanari? Aririka nokenkithatakayemi, ¿itaka pikijashiryaaantanari? Tema eero ka kijashiteench apaniroeni". ¹⁵ Nakanakiri: "¿Ninkami, Nowinkatharite?"

Icantakina: "Naaka Jesoshi, piijaneentani. ¹⁶ Pipiriintanee, pikatziyanee. Nokowaki nopeyeemi etakoeyaaririni atziripaeni, kamanteeyeririni; rootaki nokenkithatakaantzimiri iroñaaka. Pikanteri atziri iroka piñaakirika, eejatzi okaatzi noñaayemiri iinja. ¹⁷ Otarika rantakayemiri pijoriyyotzinkaritepaeni, eejatzi paashinijatzitsatsiripaeni atziri, ari nowawijaakotemi: eero noshineteyirini rowashironkaeyemini. Ro notyaanantakimiri riyoteeyanteyarini. ¹⁸ Okimitzimotawitakari otsitenitzimotawitakari: tee riyoteeyanani, tema irira Jatanaashi amatawiteeyiririni. Piyaatashiteeyerini piyoteeyerini rameenantenari, roojatzi okimitzimotyaari ijeki kitejiriki. Roojatzi nowameethateeyanteyaririni, eero nokenkithashiryaaakoteeri kaari kameethatatsi ranteeyawitakarini; ikaateeyerini maawaeni aapatziyeyanarini, eejatzi nojeekakagaeyerini kameetha". ¹⁹ Rootaki noñaakiri eejatzi rootaki ikantakinari Jesoshi. Tee nopyiyathatari, inta nothotyaakiniri ikantakinari. ²⁰ Nitnakari riraga tamaashikojatz, nokamantakiri. Roojatzi janta Jerojareeki nokamanantaki. Eejatzi nothotyagaeyakirini janta Joreeyaki. Nokamanteeyakirini riraga kaari yotziri Tajorentsi, maawaeni.

Nokamantteeyakirini: “Pikenkithashireeyanakaani, eero pikimita paerani, inta pameenteeyaaarini Jesoshi. Kameetharoña pijeekaeyeeni, riyoteeyanteeyarini atziri kyaaryo paapatziyaperoeyakarini”. ²¹ Ari nokenkithatakotakiri Jesoshi, rootaki ragaeyantakinarini joriyyopaeni janta Tajorentsipankoki, ikowaki rowamaenami. ²² Ikantatyaaani Tajorentsi retakotana: paerani, roojatzi iroñaaka. Rootaki nomatantawori nokenkithatakagaeyirini pinkatharitatsiri, kaari pinkatharitatsini, maawaenai. Ari niyotaantapiintziro rojankinarini kamanantayitzirorini iñaani Tajorentsi, eejatzi rójankinarini Moeseeshi. Nokamantakotziri ikenkithatakotziniri paerani: monkaataka ikenkithatakotziniri, añaayitakironi. ²³ Tema rootaki ikantzitarini: “Ikemaatsityaawo Rotyaantanewo Tajorentsi, ikamae. Roojatzi reewawenteeyerini maawaenai kamaentsiripaenii, ipiriintanee. Ikanteeyerini joriyyo, eejatzi paashinijatzitsatsiri atziri: ‘Iroñaaka piyotaperoeyerini Tajorentsi’”.

²⁴ Aritaki okantari ikantakiriri Paaworo. Antawo ikaemanaki Jeeshito:

—Piñaawaetashitaka, pishinkiwentashitaka, piyojeempiyaaka.

²⁵ Rakanakiri:

—Tee noñaawaetashita, niyoperotaki. Kyaaryootakiroña iroka nokantakimiri. ²⁶ Irika Akiriipa riyoteeyironi iroka nokantakiri, rootaki kameetha nokenkithatakaperotakiriri. Tektsi nomaneri, niyoperotaki ithotyaakiro, riyotawakiro; tee omana. ²⁷ Pinkathariwenantatsiri Akiriipa, tema paapatziyakawo rojankinateeyakinirini kamanantayitzirorini iñaani Tajorentsi. Niyotaki paapatziyakawo.

²⁸ Rakanakiri:

—Roowiteencha paapatziyakayenarimi Jesokirishito.

²⁹ Rakanakiri:

—Roowiteenchami pikemijante, rooma ojamanitanakirika, tee niyotzi. Omaanta nokantakiri Tajorentsi pikimitanteenari naari. Eejatzi nokowakagaeyawitakarini ikimiteeyenanimi maawaenai kemaeyakinarini iroñaaka: apatziro tee nokowakayimi roojotanteemiro iroka karenatha.

³⁰ Ikatziyanaka pinkatharitatsiri: riraga Akiriipa, Jeeshito, eejatzi okimitalka Werenishe, okatziyanaka roori. Eejatzi ikimiteeyananaki maawaenai jeekimoteeyiririni, ikatziyeeyananaki. ³¹ Riyaateeyanakini, ikantawaka-gaeyananaki:

—Tektsi rante Paaworo ikamantyaari. Tektsi rantawitya, romonkyaa-gashiietakari.

³² Riraga Akiriipa ikantziri Jeeshito:

—Eeromi rawentaarimi Seesari, potyaanterimi ryaateetami.

27

Jataki Paaworo Oroomaki

¹ Eeniro janta iyapitaanote osheki joraaro, iitachari Jooriyo. Rirotaki iyapitaanote joraaropaenii iiteetziri rashii Awoshito.* Ikanteetziri:

—Eeniro iroñaaka antawo pitotsi, paaneeri Paaworo Itaaryaki, eeniro ironta paashini roojoteetziri.

Eejatzi ikanteetana:

—Pikowakirika poyaatanakiri Paaworo, potetyaawo ironta pitotsinta ikinantlyaari rirori. ² Ari noteteeyanakawoni pitotsi poñaachari Ataramishiyyaki, roowiteencha iyaate nampitsikipaenii janta othapyaakini Aashiya:

* ^{27:1} Awoshito okantakotziri apaantek aaka: jewaperowenantatsiri.

janta owapiintanta pitotsi. Ari nokinakoyitanakini, notsipatanakari Arishitaariko. Ipoñaanaka rirori Tejawoonikaki, rowaga Masherooniyawero.

³ Okitejitanaki nareetaka Shirooki. Riraga Jooriyo, ineshironkatakiri Paaworo: ishinetakiri ryaatzi rareetataapaentari iyemijantzinkaritepaeni janta, ari retakoeyawakarini.

⁴ Roojatzi nowaagantanaa eejatzi. Ro oepiyakoteenami tampyaa, rootaki nokinantanakari okaakini kipatsi ojeeki niyanyaanini inkaare antawopero othampishi owaero Cheepere. Tema nokinakotanaki jantakironta.

⁵ Nomontyaanaawo inkaare okaakintawo Shiriishiya eejatzi Pampiiriya. Nowaaganan, nareetapaaka Miiraki, rowaga Riishiyawero.

⁶ Ari iñaapaakiro kapitaano joraaropaeni pitotsi poñaachari Arejanteriyyaki: iyaatemi Itaaryaki, roojatzi noteteeyantanakawoni.

⁷ Okaatzi osheki kitejiri nokinakoeyanakini, eentsikiroeni. Opomeentsitzimotakinani, omaanta nokaakintapaakawo Jeniiro. Tee oshinetaana tampyaa, rootaki ninkitanakawori paashini kipatsi ojeeki niyanyaani antawopero inkaare. Nokinakotanaki jakakiroka othampishiki owaero Kereeeta, ojeekira nampitsi Jaramoone.

⁸ Opomeentsitzimotakina, omaanta ninkitanakiro rowaga othampishi. Roojatzi nareetanaka ironta iiteetziro Kameethari Othatapiinta Pitotsi. Okaakintakawo nampitsi oetachari Rasheeya.

⁹ Iroñaaka ojamanitanaki, tema kyaawontsitakotaki. Ari okoweenkata-perotanaki nokinakotanaki, rooteentsi otampyaate, osheki omoetonkani. Ikaminaawitakari Paaworo:

¹⁰ —Nojoriyyotzinkarite, niyotaki opomeentsitzimotakae aki-nakoeayanakini iroñaaka. Agaekari antawo tampyaa. Otsitsiyikari pitotsi, othonkakari owaagawontsi, eejatzi apiinkaeyinikari aari.

¹¹ Riraga kapitaano, tee ikemijantziri Paaworo, ikemijantaperotziri riraga jewatziriri marineero. Eejatzi ikemijantziri riraga ashitawori pitotsi. Ikan-teeyini rirori:

—Thame owaagaeyaneeyani.

¹² Rootaki opokantyaari antawo tampyaa, omaanta tee okameethatzimotziri nojeekaperoeyeni janta. Riraga oshekiteentsiri ikowaeyakini nowaagaeyaneeyaaani. Ikowawitaka nareetyaami Jeniishiyaki, ironta Kereeawero. Janta ojeekapiintzi pitotsi, okameethatzimotseyirini nojeekaeyenimi janta. Ikowaki janta royaawakirootami tampyaa, awijanakita kyaawontsi. Okameethatzi ithatakoteromi pitotsi Jeniishiyaki: tee añaaperotziro tampyaa janta.

¹³ Ari roojatzi kameetha otajonkakiro tampyaa: iyaatzi janta noshireeyawitakawoninta niyaatemi. Iitashiteeyawitani ari nareeteeyami Jeniishiyaki, roojatzi nowaagantanaa. Nokinakotanaki othapyaki othampishi Kereeeta.

¹⁴ Omaanta, tee ojamanitzi, ari omapokapaakina antawo tampyaa, ikanteetziro Noreeshite. Opoñaanaka kipatsiki,

¹⁵ otyaantaperotakiro pitotsi niyanyaani; tekatsi okantya iyaate okinapaakinta tampyaa. Ari noshinetakotanaka, eekiro otyaantaperotziro.

¹⁶ Nokinakotanaki janta oetachari Kaawora. Eejatzi opoñaanaka tampyaa otapothakyaaga. Opomeentsitzimoeyawitakinani, omaanta nomatakiro noojotakotakiro pitochaani: rowaga onoshikapiintziri opatakira.

¹⁷ Roojatzi raamaashitakawo ari otsiparyaanakya taawirapaeni riwetsikantawori antawo pitotsi roojatzi roojantakawori. Eejatzi ithaawaeyanakini ookakoeyenanimi kipatsiki, janta Shiiriteki, rootaki ragaeyantaaworini maawaeni tokoyatatsiri. Ishinetakiro pitotsi, ikantzi:

—Aanakiroota tampyaa, tekatsi akantero.

¹⁸ Okitejitanaki eekirokya otyaantakotaperoyakinani tampyaa. Ari rowiinkaeyakironi owaagawontsi, poog, poog, poog. ¹⁹ Awijanaki apite kitejiri. Okitejitanaki rowiinkashitakawo eejatzi owaagawo pitotsi, jookatha, maawaeni. ²⁰ Ari okaatanaki osheki kitejiri: tee ikoñaatee oorya, eejatzi ompokiro, tekatsi. Okantatyeeyaani tampyaa antawo otajonkaki, mooo. Noeteeyawitakani eero nawijkoteyeensi.

²¹ Awijanaki osheki kitejiri, tee nowaeya. Ikatziyanaka Paaworo, ikantaki: —Atziritzinkari, okameethatakimi pikemijantawakinami. Eeromi ookiromi Kereeta, eero otsitsiyimi pitotsi, eero othonkami maawaeni. ²² Omaanta piweshireeyanakyaani iroñaaka. Iinja otsitsiyanaki pitotsi, omaanta eero apiinkaeyini aaka. ²³ Rirotaki Tajorentsi aakowentakinari. Naapatziyari naaka eejatzi nopinkathaperotziri. Chapinki noñaakir ronampiri romapokapaakina. ²⁴ Ikantakina: “Paaworo, eero pithaayi. Aritaki pareetakyaari Seesari, riraga oroomajatz. Pikantakiri Tajorentsi ikaminthagaeyerini maawaeni pikaateeyakirini jaka: aritaki ikemijantakimi”. ²⁵ Iroñaaka piweshiryaanakya. Naapatziyakir Tajorentsi, niyotaki ari omonkaataky maawaeni ikantayitakinarini. ²⁶ Omaanta iinja ookakotakae tampyaa othampishiki, omaanta eero akamaeyini.

²⁷ Okaatanaki iroñaaka ¹⁴ kitejiri, iroñaaka otsitenitanaki. Nokinakotashitanaka inkaareki oetachari Ateerya. Oniyankiityaanaki, raamaaka marineero ari nokaakintakawo othaphyaakini. ²⁸ Ifñaantakawo, ojaanaatzirika. Okaatzi 37 meetero. Tee ojamanitzi ari rapiitakiro. Okaatzi iroñaaka 28 meetero niyotantakari merikyaatapaaki. ²⁹ Ithaawaeyanakini, ikantzi:

—Kyaaryoowa, ompojakotawokari mapi.
Janta opataki rowiinkakiro 4 othatakotantari pitotsi tenatatsiri, othatakotantakari niyanyaaki. Ikowaperotanaki okitejitee.

³⁰ Ikowaperotawitanaka riraga marineero rowawijaakotya, rowiinkeromi pitochaani ikinakontantyaarimi othaphyaaki. Ikowawita rookaeyenanimi naariipaeni. Ikowaeyawitakani ramatawiteeyenanimi, ikanteeyawitanani:

—Nowiinkeroota othatakotantari pitotsi, ironta othowakitziri. Ro naanteeyawori pitochaaniki, nowiinkero jaga, okijontantyaari antawo pitotsi.

Jaa, ikowaeyawitani rookaeyenanimi. ³¹ Riraga Paaworo ikantakiri kapttaano, eejatzi joraaropaeni:

—Eerorika kijokiro roiyero marineero pitotsi, tekatsi pikantya eerori pawijakoeyeensi. Eero pishinetziri rookaeyanakaeni.

³² Roojatzi ipejantakawo joraaro jookatha: iroka othatakotantawitaripitochaani. Rowiinkakiro, poog. ³³ Rooteentsi okitejitee, ikanteeyakirini Paaworo:

—Thame, powaeyawakyaaniita. Okaatzi iroñaaka ¹⁴ kitejiri pijekashitaka, tee powaeya. ³⁴ Iroñaaka nokantaperotakimi, powaeyani. Pishintsitantaneeeyari. Piyoperotanaki: tekatsi oyeminiroña.

³⁵ Ikanantawori iroka, ipaasonkitakiri Tajorentsi, noñeyakirini. Ikaatakiro paa, reewataki rowaka. ³⁶ Riweshireeyanaani maawaeni rowaeyanakan. ³⁷ Nokaateeyakini maawaeni otetawori pitotsi 276. ³⁸ Ikemaeyanakan, ari rowiinkaeyakironi maawaeni teriiko, roojatzi opiyonkatantanaa pitotsi.

³⁹ Ari okitejitaperotanee, tee riyoteeyeeroni kipatsi. Omaanta ifñaakiro othanhaa roojatzi janta kipatsiki, ojeekakinta impaneki. Ikowaeyawitakani raatakotapaakyaaami janta. ⁴⁰ Rookaero othatakotantawitarinta inkaareki. Ari ithataryagaero jookatha oojotantawitarini oomaro. Rowankitero tokoya, rowaga othowakitziri. Aakotanakina tampyaa, ikowaeyawitani

raatakotapaakyaami impanekiiteki. ⁴¹ Omaanta nawikakotapaaka niyanyaaki, ayeentapaaka eentaatzira. Awikaperotapaaka othowaki. Okijotaperotapaaki, tee eewotanee. Rowaga omoetonkaare okagaakiro opataki, watzireeii. ⁴² Ikowaeyawitani joraaro rowamagaeyerinimi maawaeni riraga romonkyaanewopaeni. Ikenkithashiryaanaka:

—Ramaatanakikari, ishiyapithatanakaekari.

⁴³ Omaanta ikowaki kapitaano rowawijaakoteri Paaworo. Tee ishinetakaantziri rowamagaeteri. Ikanteeyakirini maawaeni iyotatsiripaeni ramatzi:

—Peewaeyeni pijapokanaki, pamaateeyanakini roojatzi janta kipatsiki.

⁴⁴ Eerokapaeni kaari yotatsi pamaate, eenitatsi iroka okotaki taawira, ee-jatzi kagayiteentsirini: rootaki pamaatantanakyaari.

Aritaki okantakari, nawijakoeeyantaarini. Naateeyapaakani janta kipatsikinta.

28

Ijeekaeyapaakini Maarataki

¹ Naateeyantapaakarini, ineshironkataperoeyawakinani riraga jeekatsiri janta. Ikantawakina:

—Owaero iroka paashini othampishi Maarata: ojatekakiro inkaare antawo.

Ari roejawakinawo paamari, ikaemaeyakinani:

—Pipokanaki jaka, pakitsitapaeya paamarika.

Oparyaki inkani, okatsinkaetyaanaki. ³ Raayitapaakini Paaworo incheempeki, okaatsinatzii. Roejapakiro paamariki. Öjaawaperotanaki roojatzi ishitowanakanmaa manki, roojatzi ratsikawakotantapaakari rakoki, thatzik. ⁴ Iñeeyatziirini ithatantakari rakokira, ikantawakagaeyananaki:

—Aamaashitya rirotaki owamaantatsiri. Ikelawakiroota. Tee ipiinkatzirakya janta inkaareki, omaanta iñaashityawoota iroñaaka, roojatzi ikaman-takya.

⁵ Roojatzi rotékantanakari maanki paamariki, rookakiri, pokiree; tee ikemaatsitari. ⁶ Iitashiteeyawitakani ari raawaakanakirim; intsipaete ityaanakimi, ikamanaki. Ojamani raminashiiyakarini, joreririri. Iñaatziiiri ikenkithashiryaanakan eejatzi, ikanteeyini:

—Rirotaki tajorentsitsat-siri rootaki kaari ikamanta.

⁷ Eeniropokaakini rowaga iipatsite riraga pinkathariwentziriri jeekatsiripaeni. Iwaero Poowiryo. Raakameethateeyawakinani. Okaataki 3 kitejiri kameetha ineshironkaeyakinani. ⁸ Eeniropoowiryo iriri rirori imaamentokinta. Ijaawamerikitaki, eejatzi ishiwaaetaka. Rareetapaakari Paaworo irira, ramakiri Tajorentsitsi, eejatzi rowakiniri rako iitoki, roojatzi retsiyatakontaari. ⁹ Imatantakawori iroka, ipokashiteeyakirini maawaeni paashini mantsiyatatsiripaeni. Retsiyatakaoeyeerini. ¹⁰ Osheki iñaaperoeyakinani jeekatsiripaeni. Rootentsi niyaate, ipaeyawakinani oetarika koetyeemotakinari.

Rareetaka Paaworo Oroomaki

¹¹ Ari ikaatz 3 kashiri, roojatzi noteteeeyantanakani pitotsiki poñaachari Arejanteriyyaki. Opokantakari chapinki antawo tampyaa, eeniro ojeekaki pitotsi janta othampishiki antawo inkaare. Eeniropoowiryo iriri rirori okimitakaantayitakawoni atziri tsipantzi rowithaakotakiro janta opatakira pitotsi. Iwaero apaani Kaashitor, paashini iwaero Pooroshi.

¹² Nareetapaaka Shirakoosaki, okaatz 3 nomaanaki. ¹³ Nowaaganaa eejatzi, ninkitaneero janta othaphyaaki, roojatzi Reejyo. Okitejitanaki

opoñaanaka tampyaa rampateki oorya. Roojatzi okitejitanaki nareetantakawori Poteyooriki. ¹⁴ Noñaapaakiri ayemijantzinkaritepaeni. Ikowaki nojeekimotanakiri 7 kitejiri. Ari nowaaganaka, nareetantaka Oroomaki. ¹⁵ Ari ikemakoeyawakinani ayemijantzinkaritepaeni, roojatzi ipokashiteeyantakinani, itonkiyoteeyawakinani. Ojamani ipoñaayitanakan. Apaanipaeni itonkiyoteeyawakinani Jororepiyoki, eejatzi paashinipaeni janta *Tres* Taweerinashiki. Paaworo, iñaantawakariri, ipaasonkitakiri Tajorentsi eejatzi riweshiryaaanaka. ¹⁶ Nareetantakari Oroomaki, ishinetakiri Paaworo ijeekapaaki ipankoki rirori. Itsipatakari apaani joraaro, aminiriri.

¹⁷ Imaapaaki 3, roojatzi ikaemakaantakiri jewatayitziririni joriiyopaeni. Ipyoteeyantakarini, ikantakiri Paaworo:

—Nokanteeyemini, nojoriyyotzinkarite. Tee nokantzimatzi atziritzinkaritepaeni aari. Eejatzi tekatsi nokantakotziro iroka rameteeyawitarini atziripaenini paerani. ¹⁸ Omaanta roojoetakina janta Jerojareeki, ikantziri oroomajatz: “Payeri irika”. Rojampitakowentakina pinkathariwenantatsiri, roojatzi ikowawita romishitowakaantenami. Riyotaki tekatsi nanteri nokamantyaari. ¹⁹ Omaanta ipiyathatawakari joriiyopaeni, rootaki nawentaantakariri Seesari. Tekatsi nokantzimatzi natziritzinkaritepaeni. ²⁰ Rootaki nokaemakaanantakimir, nokenkithatakagaeyakimini. Paerani aamagaeyawitakarini Rotaqantanewo Tajorentsi ipokantyaari. Iroñaaka nokanteeyirini atziripaeni areetaka, rootaki roojotanteetakinari karenathaki.

²¹ Rakaeyanakirini:

—Tekatsi noñi jankinarentsi poñaachani Joreeyaki, kenkithatakotemini. Eejatzi tee ijeeki ajoriyyotzinkarite kantakotemini. ²² Omaanta nokowaeyakini pikantena oetarika pikenkithashiryaaayitzirini. Inashitaka iroka paapatziyari Jesoshi: niyotaki osheki ikijawenteeyakawoni janta maawaeni nampsikipaeni.

²³ Ari riyotakagaeyakirini tsika okaate kitejiri ikantawakawenteeyantyaaworini. Ari osheki riyaateeyanakini ipankoki. Ikantaperotawakiri tsika ikanta Tajorentsi reewawenantzi. Ritakawo amaetyaaka, roojatzi itsiteniityaakowentakiro. Ikowaki riyotakaaperotakiri rojankinatakotziri Moeseeshini, eejatzi maawaeni kamanantayitzirorini iñaani Tajorentsi: tema rojankinatakotakiri Jesoshi. ²⁴ Raapatziyakari apaanipaeni, itheenkakiri paashinipaeni. ²⁵ Ipyiyathatawakaanaka, roojatzi rinenteenaryaaawakaanaka. Tekira riyaatzini, ikantaki Paaworo:

—Kyaaryo iroka okantakiri Ishire Tajorentsi. Ojankinatakaakiri Iseeiyashini, kamanantzirorini iñaani Tajorentsi. Rojankinatakiniri rirori ajiroyyotzinkaritepaeni. ²⁶ Ikantzini:

“Piyaate janta joriiyopaeniki, pikantapaeri: ‘Eeniwitacha pikempita pikemantyaarimi, omaanta tee piyotawakiro. Eeniwitacha poki, pamianntari, omaanta tee pikokichaaperotzi’. ²⁷ Iroñaaka tee añairi atziri ikenkithashiryantari kameetha. Tee ikoyi ikemijantzi, tee ikoyi raminaperotero kyaaryooperotatsiri, ikowaperotakiro rantero kaari kameethatatsi, rootaki ikantashireeyantakarini: ‘Eero akemijantzi. Aminikari. Akemijantzikari. Ayotaperotzikari. Ak-enkithashiryakari. Owawijaakotakari’.”.

²⁸ Piyoteeyawakironi iroñaaka: rowawijaakotantzi Tajorentsi. Iroñaaka rotyaantziri aapatziyakariri Jesoshi riyotakagaeyerini paashinijatzitsatsiri atziri. Ikemijanteeyawakini irirapaeni.

²⁹ Ikemantawakawori ajoriiyotzinkaritepaeni iroka ikantakiriri, riyaateyanakini, ipiyapiyawaaantetawakagaeyanakan.

³⁰ Okaatzzi apite ojarentsi ijekaki Paaworo pankotsinentsiki, ipinatakiro. Raakameethateeyakirini maawaeni areeteeeyaririni. ³¹ Ikantatyaaani ikantakotapiintziri Tajorentsi, tsika ikantari rirori reewawenantz. Ikantakotapiintakiri Awinkatharite Jesokirishito, tee imaniro. Tekatsi thañaakotyaarini ikenkithatzi.

Naaka jankinatzimirori:

Rookashi

RIRAGA PAAWORO ROJANKINATZINIRI OROOMAJATZI

¹ Nokoyi niwethateeyemini, oroomajatzi, tsikarika pikanta pijeeki. Naaka Paaworo jankineeyimiroini iroka. Rotyaantakina Jesokirishito nantawaetziniri. Ikowakaakina nokamanteeyerini atziri tsika ikantari Tajorentsi rowawijaakontanzi. Tekatsi paashini ikowakaenari. ²⁻³ Tema paerani ikamanteeyakirini Tajorentsi riraga kamanantayitzirorini iñaani ipoñaakya jenokinta Itomi, ratziritapaaki, rowawijaakoeantyaaririni maawaeni kaari kameethatayitatsirini. Ikantakirini rirotaki icharineeteni Iraviiri riraga jewawenantatsiri maawaeni joriyyo paeraniperoroña. Roojatzti rojankinatakanakaririni Tajorentsi riraga kamanantayitzirorini iñaani, rootaki ojeekantakari iroñaaka Iwaperite Tajorentsi. ⁴ Roojatzti ipokantaka Jesokirishito jaka kipatsikika, rowamagaetawakiri, roojatzti ipiriinantanaa. Rootaki ayoteeyantakan eeniro itajorenka, rirotaki Itomi Tajorentsi, eejatzi okithaatakiri Ishire. Rootaki apinkathaperoeyantakaririni. ⁵ Naapatziyakari riraga Jesoshi, rootaki ikaminthantakinarini, eejatzi rotyaanantakanarini aapatziyakagaeayarini maawaeni paashinijatztatsiri atziri. ⁶ Eejatzi eeroripaeni, ikowakaakimi pishenkateeyaarini. ⁷ Osheki inintashireperotereeyakimini Pawa Tajorentsi janta Oroomaki, tema riyoyaakimi reentsitetantzimiri eejatzi maawaeni paashinipaeni aapatziyeyayarini. Iroñaaka nokowaki ikantyaani ineshironkaperoeyemini, eejatzi kameetha ijeekakagaeyemini. Eejatzi ikimitakagaeyemini Awinkatharite Jesokirishito.

Ikowaki Paaworo rareetyaari oroomajatzi

⁸ Iroñaaka nokamantemi: tsikarika nyaatayitakini nokemakotapi-intakimi pameentaperoeyakarini Jesokirishito. Ikemakoeyakimini maawaeni atziripäeni, jeekayitatsirini tsikarikapaeni, rootaki nopaasonkitantakariri Tajorentsi, tema naaka eejatzi aapatziyiariri Jesokirishito. ⁹ Riyotzi Tajorentsi namanapiintziri ramitakoeyemini. Nokyaaryoowentziniri nantawaetziniri, eejatzi nokantani nokenkithatakotziri Itomi: nokamanteeyirini atziri tsika ikanta rowawijaakontanzi. ¹⁰ Eejatzi nokantziri Tajorentsi: "Nokowaki, Pawa, pikowakayenarika, nareeteeyarini oroomajatzi". ¹¹ Osheki nokenkithashireeyakimini noñeemi: nokowaki omatakagaeyemini oetarikapaeni rowaga Ishire Tajorentsi, paapatziyaperotantyaariri Jesoshi. ¹² Eejatzi aririka añaawakagaeyaani aapatziyawakaaperoeyakani, ari aweshiryaaakaawakagaeyaani. ¹³ Nokowaki piyoteeyeroni, noyemijantzinkarite, osheki nokowapiintawitaka nyaatashiiyeeyemini, omaanta tee ikowakaana Tajorentsi nyaatashitemi. Nokowawita namitakoeyemini, nokimitaakiro namitakoeyakirini paashinijatztatsiri atziri janta paashinikipaeni nampitsi riyotaaperotakiri Tajorentsi ¹⁴ Nokowaperotaki nokenkithatakapiinteri kireeshiyajatz, riraga yotawitachari eejatzi paashinipaeni atziri; tema nokenkithatakapiinteri maawaeni riroripaeni: riraga yotawitachari eejatzi riraga kaari yotatsi. Tema rotyaantakina Tajorentsi nokenkithatakagaeyerini maawaeni. ¹⁵ Rootaki nokowaperotantakari nokenkithatakagaeyemini eerokapaeni jaga Oroomaki eejatzi.

Ikowaki Tajorentsi rowawijaakoteri maawaeni atziri

16 Tee nopashiwenta nokamanteeyirini atziri tsika ikanta Jesokirishito ikaminthagaeyakaeni. Itajonkawenteri Tajorentsi maawaeni aapatziyeeeyaririni, rowawijaakooyerini. Ritakari riyotaakiri joriyyopaeni, eejatzi iroñaaka riraga kaari joriyyotatsi. **17** Ñaakiro, aririka ameentaperotakyaari Jesoshi, iñaaperoeyakaeni Tajorentsi akameethatzsi. Tema paerani rojankinatakaakiri irira riraga Awakookoni: “Iñaaperooyerini Tajorentsi ikameethatzsi maawaeni ameentariri kameetha ijekanteeyaaari janta jenokinta”.

Ikijeri Tajorentsi maawaeni theenkantatsiri

18 Riraga Tajorentsi jeekatsiri jenokinta, riyotakagaeyakaeni ikijakiri maawaeni kaari aapatziyari, eejatzi maawaeni antapiintzirori kaari kameethatatsi, eejatzi riraga maawaeni kaari kowatsi raapatziyawo iroka kameethatatsiri.

19 Ikowakirikami riyoteeyenimi tsika ikantari Tajorentsi, aritaki riyoteeyakinimi. Tee opomeentsitzimotawitari, tema riyotagaeyaw-itakarini. **20** Paerani okoñaataki maawaeni riwetsikaeyakirini, ayoteeyantakarini eenitatsi Tajorentsi, eejatzi eenitatsi itajorenka. Koñaataperotaki. Tektsi ikanteeyaaani theenkantatsiri ikanteeyeni: “Tee niyotakotziri Tajorentsi”. **21** Tema riyoteeyawitarinri, omaanta tee ipinkathateeyirini. Ikaminthapiinteeyawitarinri riraga Tajorentsi, omaanta tee ipaasonkiteeyirini riroripaeni. Tee ikenkithashryaashagayani: ratsipetashitakawo ikenkithashryaashitakawo oetarikapaeni ikoyiri rirori; rootaki iroñaaka kaari añaantawo riyotantari. **22** Omawitya ikanteeyawitani: “Osheki niyotzi naaka”, omaanta tee riyotziri. **23** Ikameethaperotaki Tajorentsi, ikantani ijeki jenokinta. Omaanta tee ipinkathateeyirini atziripaeni, inta iitajorentsitashiteeyakarini tsimeripaeni, oretsi, maanki, maawaeni: eejatzi iitajorentsitashiteeyakawoni riwetsikanewopaeni ikimitakaantakari atziri eejatzi paashinipaeni oetarikapaeni.

Rowashironkagaeyirini Tajorentsi kaari aapatziyariri

24 Osheki ikowaeyakini atziri ikenkithashryaapiinteeeyakironi kaari kameethatatsi, iñaathatapiinteeyawoni tsinani; rootaki ikanantari Tajorentsi: “Ari ikantakaata, tee ikoyi ikemi, ranterooota”. **25** Ari paerani ryioperoeyawitarinri tsika ikanta Tajorentsi, omaanta ramatawiteeyaaani apaniroeni. Ipinkathashiteeyakawoni maawaeni riwetsikaeyirini Tajorentsi, iitajorentsitashitari. Omaantakya riraga wetsikaeyirorini, tee ipinkathateeyirini irira. Omaanta aaka thame añaaperooyerini rirori, akanteetatyeyaaani. Aritaki okantyaari. **26** Rootaki ishinetantariri Tajorentsi riraga kaari joriyyo ranteeyironi oetarika ikowaeyakirini. Tee okoyi tsinani aye oem, omaanta okowaki antatenkatawakaeyani okaateeyini otsinaninkaeteki. **27** Eejatzi ikimitzitaka riraga shirampari: tee ikoyi raye iina, omaanta ikowaki rantatenkatawakaeyani ishiramparinkaeteki. Oetarikapaeni ranteeyakirini, omaanta tee riyotzi ipashiwentakayaawo. Ari rowashironkaeyakirini Tajorentsi.

28 Ari tee ikowaeyini ipinkatheteeyerini Tajorentsi eejatzi ikenkithashryaakotyaaari rirori, rootaki ikanantakari Tajorentsi: “Ikantyaata. Ikenkithashireeyawoota kaari kameethatatsi, eejatzi eero ijekimaeta kameetha”. **29** Rantapiinteeeyakironi kaari kameethatayitsirini: ashi royiro tee ikameethateeyini, ishirontawo kaari rayi, oshirontari kaari ayi, iñaawenatzitakari atziri rashtayitarini, ikowaki rowashironkaayiterini paashinipaeni, ikowawitaka ikimitakotyaaari paashinipaeni rootaki ikijawakaantteeyakirini, rowamaawakagaeyakan, ikijathatatakawagaeyakan,

ramatawitantapiinteeeyini, ikatsimatawakagaeyakan, ikantakotantashita makaawaanteri riroripaeni,³⁰ itheeyakotawakagaeyakan, ikijejeriyakirini Tajorentsi, rakawaanteteeyakirini paashinipaeni, ikantakaaperoeyani, ikantashiteeyawitan, "Naakapero", ikowakowayitakini ranteeeyeroni paashinipaeni kaari kameethatayitatsini, ipiyatheeeyakarini ashiteeyaririni,³¹ tee afueyironi riyoteeyantarini, tee imonkaateeyironi oetarika ikanteeyawitarini, tee inintawakagaeyaani, tee riyotzi ipheyakoteniri paashinipaeni okaatzi rantziri, tema tee ineshironkatawakagaeyaani.³² Riyoteeyawitawoni ikantziri Tajorentsi: "Maawaeni antapiinteeeyirorini kaari kameethatatsi riyaateeyeni paamariki kaari tsiwakanitatsini", omaanta rothataashiteeyani ranteeeyeroni eejatzi inimotakiri paashinipaeni antzirori iroka kaari kameethatatsi.

2

Riraga joriyo eero rawijakotashiteeyaani omawitya rirotaki joriyo

¹ Naamaaka ijeki joriyo kantsatsi: "Naa, okantateekirira ikemawakiroota, tee ikameetheeyeni". Omaanta nokamantemi: kyaaryoowa, aririka pikantakoteri paashinipaeni atziri: "Eeniro rantani", eejatzi eerori eniro pantani, pikimiteeyakarini riraga pikantakotawitakarira.² Ayoteeyakini okameethatzi rowashironkagaeyirini Tajorentsi riraga antzirori kaari kameethatatsi. Tema riyotakotziri maawaeni atziri okaatzi rantziri. ³ Omaanta eerori, pikantzi: "Eeniro rantanipaeni irinta", eejatzi pikimiteeyakarini, pantapiinteeeyakironi eerori kaari kameethatatsi. ¿Piitashitama eerori eero rowashironkaeyimini Tajorentsi? Tema riyoperotakiro okaatzi rantziri maawaeni atziri. ⁴ Pamine, osheki ineshironkateeyakimini, ikaminthaaperoeyakimini, tee intsipaete roonimi: ojamani royaakoeyawitakimini pikenkithashireeyaneeyaanimi pookaeyeronomi kaari kameethatatsi panteeyirini. Omaanta, tee pookaeyerironi. ⁵ Tee pikenkithashiriio ikantziri Tajorentsi, tee pikoyi pikenkithashireeyaaani. Eekiro piyaatatz pantapiinteeeyironi kaari kameethatatsi, rootaki rowashironkawenantemiri rirori. Kyaaryo, iinja ikijaperoyerini maawaeni antzirori kaari kameethatatsi. Omaanta ayoteeyanakini ikameethaperotzi rirori, eero ikijashitari atziri, riyoperotakiri maawaeni, tsikarika ikanteeyani.

⁶ Rowashironkaeyerini maawaeni kaari kameethatatsi, omaanta ijekakagaeyerini kameetha janta jenokinta maawaeni kameethateeyatsirini. ⁷ Aririka akowaperote afagaeyerini Tajorentsi eejatzi akowaperote akameethaperotanaki, eejatzi akowaperote akanteetatyeyaaani ajeke jenokinta, thame akyaaryoowenteeyeroni maawaeni ikowakagaeyakaerini. Roojatzi ijekakagaeyeeni jenokinta, akanteetatyeyaaani ajeekimotapaeri. ⁸ Omaanta riraga kaari kameethatatsi, kaari kowatsi riyotero ikowakaawitariri Tajorentsi inta ikowashiteeyani rantapiintero kaari kameethatatsi, tema ikijaperoyerini rirori, rowashironkaaperooyerini. ⁹ Imonkaatawakagaeyaani joriyo eejatzi kaari joriyyotatsi: aririka ikantyaani rantero kaari kameethatatsi, ari rashironkagaeyaani, rowashironkaeyerini Tajorentsi. ¹⁰ Omaanta maawaeni antapiintzirori kameethatatsiri iñaapaeri Tajorentsi jenokinta, iñaaperotawaeri rirori, ijekakagaeyerini kameetha: joriyyopae, kaari joriyyotatsi, maawaeni. Amonkaatawakagaeyakaani. ¹¹ Riraga Tajorentsi tee rinashitakagaeyarini paashinijatzipaeni atziri: riyotzi akimitawakagaeyakan maawaeni.

¹² Riraga paashinijatzitatsiri atziri tee iñiilo rojankinarini Moeseeshi, omaanta eeniro rantayitzirini, eejatzi ryaate paamariki kaari tsikanitatsini. Omaanta eero ikantziri Tajorentsi: “*¿litaka kaari paapatziyantawo rojankinatzirini Moeseeshi?*” Omaanta riraga joriyyopaeni iyotawitawori rojankinarini, eeniro rantayitzirini, eejatzi ryaate riori paamariki kaari tsikanitatsini; ari rowashironkaaperoteri Tajorentsi, ikanteri: “Tee paapatziyaperotawoni iroka rojankinatzirini Moeseeshi”. ¹³ Eero iñaaperotashitari Tajorentsi ikameethatzi riraga kemashiteeyawitaworini iñaani, intakya iñaaperotaperoeyini ikameethatzi riraga aapatziyaperotawori iñaani: tema rootaki ikowakaakiriri. ¹⁴ Paminerri riraga paashinijatzitatsiri atziri, tsika ikanteeyani. Tee iñaawitawo Iwaperite Tajorentsi, omaanta apaanipaeni eeniro rantayitakironi okantayitzirini. Naakiro, riyotashitayitani ijeeki kameetha. ¹⁵ Aririka ijeeki kameetha, ayoteeyakini riyotawitawo riori okantziri Iwaperite Tajorentsi. Eeniro ikenkithashiryakari Tajorentsi rajankaneke: riyoteeyakini okameethatzirika ranteeyirini, rooma teerika. ¹⁶ Inja ikanteri Tajorentsi riraga Jesokirishito: “Eeroka yotzirori tsikarika okantari ranteeyakirini atziripaeni, pithotyakiro maawaeni ikenkithashireeyirini. Iroñaka eeroka kantakoterini tsikarika ryaateeyeni. Eeroka kantatsini aririka añaaperoteri ikameethatzi, aririka owashironkayeri”. Rootaki nokamanteyiririni naari, ikenkithashireeyantarini, rowawijaakoeyanteeyatarini.

Riraga joriyyo eejatzi kaminagaantsi Tajorentsi

¹⁷ Omaanta, eerokarika joriyyo, kyaaryoowa. Pikantzikari: “Niyotziro naaka rojankinarini Moeseeshi. Nosheninkataperotakari naaka Tajorentsi”. Pikantakaaperotakarira. ¹⁸ Piyoteeyironi ikowakagaeyakaerini Tajorentsi. Paerani piyotawitakawoni Iwaperite Tajorentsi, rootaki piyoteeyantawitakaworini kameethatayitatsirini. ¹⁹ Iroñaka piitashiteeyawitanu pimatero piyotakagaeyerini maawaeni kaari yoteeyatsini okaatzi ikowakaakimiri Tajorentsi. Kimiwitaka poorentakaoeyerini maawaeni kaari yoteeyatsini, okimiwitaka piyotagaeeyerini eentsipaeni. Kyaaryo piyoteeyawitawoni Iwaperite Tajorentsi, tema kameetha riyotaawitakimi, tee amatawitanzi. ²⁰ Pamine, piyotagaeyerini paashinipaeni, omaanta, *¿litaka kaari pitantawo piyoteeya* eerori? Tema okameethatawita piyotaawakagaeyaanimi eerori. Eeniro pikanteeyawitakaririni paashinipaeni: “Eero pikoshitzi”. Roojatzi pantzitanakawo eerori pikoshitzi. ²¹ Pikanteeyawitarini: “Eero piñaathatzimotawo piina paashini tsinani”. Roojatzi pantzitanakawo eerori, eeniro piñaathatzimotawo piina paashini tsinani. Pikanteeyawitarini: “Eero piütziro piwetsikani: ‘Rootaki Tajorentsi’. Kaarimachee”. Aririka poonari iitajorentsitsashitari, *¿litaka pikoshitantawori* ashi owaagawo ikemijantapiintetzinta? ²² Pikantakaaperoyakani, pikanteeyawitani: “Niyotziro naaka iñaani Tajorentsi”. Omaanta teerika pimonkaatayitzironi okantayitzirini, tema pitheenkakiri Tajorentsi. ²³ Eenitatsi iroka rojankinateetziniriri paejatziiteni: “Eeniro rantayitakirini ajoriyyotzinkarite kaari kameethatatsi, rootaki ikantzimateeyantakaririni Tajorentsi riraga kaari joriyyotatsi, ikanteeyini: “Tee ikameethatzi Tajorentsi, eero aapatziyari”.

Tee rinashitayitarini Tajorentsi joriyyopaeni

²⁵ Pamine, aririka pikemijantaperotero iñaani Tajorentsi, tee patsipetashitawo pijoriiyotzi, tema piyotakiri rirori. Omaanta teerika pikemijantaperotziro, patsipetashitakawo pijoriiyotashitawita. ²⁶ Aririka rantapiintero kameethatatsiri kaari joriyyotatsi, tema iñaaperoteri Tajorentsi rirori ikameethatzzi. Ikimitakaanteeyari joriyyo, aapatziyariri Tajorentsi rirori. ²⁷ Eerokarika joriyyo, piyotawitaworka rojankinarini Moeseshi; omaanta teerika pikemijantaperotziro, ¿okameethatzima? Teewee, tee okameethatzzi. Paminerri riraga kaari joriyyotatsi: tee iñaaneentziro Iwaperite Tajorentsi, omaanta aririka ijeki kameetha, rantakiro ikowakaakiriri Tajorentsi. Tema okameethaperotzi iroka. Eejatzi tema roñaagakiri paashinipaeni tee pikameethatzzi eerokapaeni. ²⁸ Kaari joriyyopero riraga kaari aapatziyarini Tajorentsi. Eejatzi tee okameethatzzi itotonawitakyaarika ishiramparitantari, teerika raapatziyari rirori. Ratsipetashitakawo itotonatziro. ²⁹ Omaanta riraga joriyyoperotatsiri rirotaki riraga kenkithashiryaaipiintziriri Tajorentsi rajankaneki rootaki okithataakaantariri Ishire Tajorentsi. Tee ro iñaaperotantariri itotonatzirowa ishiramparitantari, omaantakya iñaaperotantariri raapatziyakari. Eerorika iñaaperotziri atziri, omaantakya riraga Tajorentsi rirotaki náaperoterini.

3

¹ Naamaashitaka pikantzi: “¿Natsipetashitama nojoriyyotaki? ¿Natsipetashitama nototonatziro noshiramparitanari?” ² Tee patsipetawitawo pijoriiyotzi. Tema irira joriyyo riyotaakiri Tajorentsi iñaani. ³ Kyaaryo, tee raapatziyeyarin maawaeni, eenitatsi amatawiterinimi Tajorentsi. ¿Arima ramatawitakiri Tajorentsi riraga aapatziyariri? ⁴ Eero ramatawitziri. Omawitya ramatawitanteeyeeni maawaeni atziri, omaanta Tajorentsi tekatsi ikantya ramatawiteeyeeni rirori. Tema paerani rojankinatzini Iraviiri, ikantzi: “Kyaaryooperotaki, Tajorentsi, piñaani: tee pitheeyaa. Tekatsi ikantya atziri ipiyatheeyemini”. ⁵ Naamaashita eeniro ijeki kantashitachari: “Aririka nantero kaari kameethatatsi, roojatzi ryoteeyantanakyaani paashinipaeni ikameethaperotaki Tajorentsi, tee ikimitana naari. Roojatzi aririka ipinkatheeeyerini, ¿iitaka iroñaaka ikjawenantenawori Tajorentsi kaari kameethatatsi nantayitzirini? Tema rootaki ipinkathatantyaariri paashinipaeni”. (Iroñaaka nokenkithatziro kimitariri kaari aapatziyariri Tajorentsi.) ⁶ Tee okameethatzzi iroka raamaayiwitakarini. ¿Arima ramatawitakae Tajorentsi? Eero. Ikantzi rotyaanteri antapiintzirori kaari kameethatatsi paamariki kaari tsiwakanitatsini. Eeromi rantziromi iroka, eeromi imatzromi ikantakoneentawomi paashinipaeni atziri. ⁷ Ñaakiro, ¿okameethatzima notheeya niyotakaantyaariri atziri tee itheeya Tajorentsi, roojatzi ipinkathatantyaariri? Teewee. Aririkami okameethatemi notheeya, eeromi ikijawentanawomi Tajorentsi notheeya. Omaanta, tee okameethatzzi iroka ikantziri. ⁸ ¿Okameethatzima antapiintero kaari kameethatatsi ikimoshiryaantyaariri Tajorentsi? Teewee, eero antziro. Okameethatzzi rotyaanteri aaka Tajorentsi paamariki kaari tsiwakanitatsini kantashitayitaworini iroka, ñaa, okantateeteri iinja iñaashitateetyaawoota. Omaanta eeniro kantakotashitakinari: “Riyotaakiri Paaworo paashini atziri rantero kaari kameethatatsi”. Itheeyashita rirori.

Aakapaeni maawaeni anteeyakironi kaari kameethatatsi

⁹ Pamine, aakapaeni joriyyo. ¿Okameethatzima akante: “Tee ikameethateeyeni paashinipaeni atziri, omaantakya aaka kameethateentsiri?” Tee okameethatzzi akantero iroka. Tema amonkaatawakagaeyakani, eenitatsi

antanipaeni maawaeni: aaripaeni, eejatzi riraga paashinijatzitsiripaeni atziri. ¹⁰ Tema aritaki okantzi Iwaperite Tajorentsi: “Tee ijeeki kameethaneentatsini apaani. ¹¹ Tekatsi kowatsini riyoteri Tajorentsi, eejatzi tekatsi kowatsini riyotero ikowakaawitariri. ¹² Ipiyathateeyakarini Tajorentsi maawaeni, ranteeyironi maawaeni kaari kameethatatsi. Tekatsi antzirori kameethatatsiri, tekatsipero. ¹³ Tee okameethatzi iñaawaetashitayitarini. Osheki otheeyakaari ineni. Osheki ikijathateeyirini paashinipaeni, ikimiwitakar maanki koweenkatatsis atsikantaniri. ¹⁴ Osheki ikatsimatikiri paashinipaeni, ikijathatapiinteeyakirini. ¹⁵ Eejatzi rametakawo rowamaayitashitakarini atziri. ¹⁶ Tsikarika riyaatayitakini, rowashironkaayitakirini paashinipaeni. ¹⁷ Tee riyotziro ikamintaante, ineshironkatante, ijeekantyaari kameetha. ¹⁸ Tee ipinkathateeyirini Tajorentsi”. Rootaki rojakinatakini riri Tajorentsi maawaeni atziri paeraniperoroña.

¹⁹ Ayoteeyakini iroñaaka rashironkaaperota maawaeni yoteeyawitaworini rojakinarini Moeseeshi. Riyoteeyawitakawoni oetaka ikowakaakiriri Tajorentsi, tekatsi kanteeyatsini: “Tee niyotzi”. Tema rowashironkagaeyerini maawaeni atziri antzirori kaari kameethatatsi. ²⁰ Tekatsi ikante atziri: “Nanteyakironi maawaeni okantziri rojakinarini Moeseeshi, iroñaaka iñaaperotena Tajorentsi nokameethatzi”. Teewee, tee imatziro. Tema rootaki Rojakinarini Moeseeshi iyotagaeyakaerorini eniro antani.

Rowawijaakoeyakirini Tajorentsi maawaeni aapatziyariri Jesokirishito

²¹ Iroñaaka nokamantemi: riyotagaeyakaeni Tajorentsi tsika ikantya iñaaperotanteeri akameethatzi. Riraga Moeseeshini eejatzi riraga kamanantayitzirorini iñaani Tajorentsi rojakinatzitakaero ipoke Itomi Tajorentsi ikamawentakae rowawijaakotanteeri. Tee ro ikamanteeri amonkaatero Rojakinarini Moeseeshi, ²² omaanta ikamanteyakaeni aririka aapatziyakyaari Jesokirishito, iñaaperoeyakaeni Tajorentsi akameethatzi. Aritaki amonkaatawakagaeyakan, aakateeyakini joriyyo eejatzi paashinijatzitsiri atziri: ²³ tema eeniro anteeyakironi kaari kameethatatsi, maawaeni. Tee anteeyironi kameethatayitatsirini ikowakagaeyakaerini Tajorentsi. ²⁴ Ikamawentakae Jesokirishito rootaki aririka aapatziyeyakarini irira, rowawijaakoeyakaeni Tajorentsi, iñaaperoeyakaeni akameethatzi. Tema ineshironkateeyakaeni: tee ikenkithashireeyyeawoni eejatzi kaari kameethatatsi anteeyakirini. ²⁵⁻²⁶ Rotyaantakiri Itomi, ikamawentakae, apaatawenteeyakaeni riraa. Iroñaaka, aririka aapatziyakyaari, monkaataka, eero ikenkithashiryagaawo eejatzi anteeyakirini. Eejatzi paerani, tekiraatan iopkini jaka kipatsiki Jesoshi, tee rowashironkagaeyirini Tajorentsi riraga aapatziyariri. Riyotzitani iinja ikamawenteeyerini riraga Itomi. Rootaki ayoteeyantakarini ikameethaperotaki Tajorentsi eejatzi iñaaperoeyakirini maawaeni aapatziyeyearirini Jesoshi ikameethatzi.

Tekatsi akantya aari akantakaaperota, eero amatziro owawijaakoteeya apaniroeni

²⁷ Iroñaaka tekatsi akantya akantakaaperota. ¿litarikya? Tema tekatsi akantya owawijaakoteeya apaniroeni. ¿litaka kaari amatantawo? Tema aapatziro Tajorentsi rowameethatee aakapaeni riraga aapatziyariri Jesoshi. ²⁸ Naakiro, aririka aapatziyaari Jesoshi, rowameethatake Tajorentsi.

Tee ikanteeyeeni: "Pimonkaateeyeroni rojankinarini Moeseeshi pawijakoeyanteeyaaarini".²⁹ ¿Apaniroenima rowawijaakoeyirini Tajorentsi joriyo? Teewee, tema eejatzi rowawijaakoeyakirini paashinijatzitsirii atziri.³⁰ Apintzi Tajorentsi, ikaminthagaeyakaeni maawaeni. Riyotaki amonkaatawakagaeyakan. Aririka raapatziyaari joriyo, riraga Jesoshi rowawijaakoteri. Aririka raapatziyaari irira paashinijatzitsirii atziri, rowawijaakoteri eejatzi. Roojatzi iñaakiri riraga Tajorentsi ikameethatzi maawaeni.³¹ Aririka aapatziyakaari Jesoshi, ¿okameethatzima ookaero Iwaperite Tajorentsi? Teewee, eero ookaero. Aririka aapatziyakaari, rootaki anantyaawori okamanteeyakaerini.

4

Roshiyakaavenantzi Awaraamani

¹ Piyoteeyakini tsika ikantani achariniiteniperoni Awaraama. Iroñaaka nokamantemi: ² tee rowawijaakotaa apaniroeni. Rowawijaakotyaami apaniroeni, imateromi ikantakaaperotyaami, ikantemi: "Osheki nokameethatak, nawijakontantaari". Omaanta tema riyotaki Tajorentsi tee ikameethatzi Awaraamani. ³ ¿Oetaka okantziri Iwaperite Tajorentsi? Tema okantzi: "Raapatziyakaarini Awaraama Tajorentsi, rootaki iñaaperotantaririni ikameethatzi". ⁴ Noshiyakaawentemiri: eenirorika thamaetenirini iwaotorote, tema okameethatzi ipinateri. ¿Okameethatzima ikanteri: "Irika, korikika, nopalshitzimirira"? Tee okameethatzi: tema ipomeentsitakanari ithamaetziniri. ⁵ Omaanta riraga Tajorentsi, rinashita: eerorika antayitzironi kameeethatayitatsirini, omaanta ameentyaaririka Tajorentsi, aritaki rowameethateeyakaeni, iñaakae akameethatzi. Eero apomeentsiwentari apinateri. ⁶ Ñaakiro, tekatsi antaperote rowameethatanteeri Tajorentsi, omaanta riweshiryaaakagaeyeeni, aririka aapatziyaari ari iñaaperotakae akameethatzi. Tema rootaki ikantakirini Iraviiri:

⁷ "Ikimoshireeyakini maawaeni atziri riraga ikamintheeri Awinkatharite. Eero ikenkithashiryaanero eejatzi kaari kameeethatatsi rantayitzirini. ⁸ Kyaryo, ikimoshiryaaoperotanaki, riyotaki eero ikijawentziri riraga Awinkatharite rantayitzirini".

⁹ ¿Ninka ikenkithatakotziri Iraviiri? ¿Apaniroenima ajoriiyotzinkarite? Tema ikenkithatakotziri eejatzi maawaeni paashinijatzitsirii atziri. Tema ayoteeyakini raapatziyakarini Awaraamani, rootaki iñaaperotantarikari Tajorentsi ikameethatzi. ¹⁰ Omaanta ¿tsika okaatzika iñaaperotantarikari Tajorentsi ikameethatzi? Tema tekirani ijoriyyotzini, tekirani itotonatzironi ishiramparitantari. ¹¹ Ñaakiro, tekirani itotonatzironi rameenttarini Tajorentsi, rowameethatantariri. Roojatzikya itotonatzironi, ryoteeyantakarini atziripaeni ritakawo rameentakari Tajorentsi rootaki iñaaperotakiri irira ikameethatzi. Iroñaaka ayoteeyakini aritaki ikimiteeyaaarini rirori paashinijatzitsirii atziri: eero iitashita itotonatero iñaaperotantyariri Tajorentsi ikameethatzi, omaantakya rameentzitakarini irira. Tema riraga Awaraamani rirotaki itaperotakawori rameentakari rirori. ¹² Eejatzi ikimiteeyaaarini maawaeni atziritzinkarite aari, aririka rameentyaarai Tajorentsi. Eero iitashita aririka itotonatero, ari rawijakotere, omaanta okameethatzi rameentyaarai rawijakontateeayaari. Ikimityaari achariniiteni Awaraama, tekira itotonatzironi ishiramparitantari paerani rirori.

Enitatsi iroka ikashiyakaakaririni Tajorentsi Awaraamani

¹³ Ari rameentashitakari Awaraamani Tajorentsí, rootaki iñáaperotantakariri rirori ikameethatzi, roojatzí ikantakiri: "Nokowakaakimi iinja paawakiro okaatzí nokashiyakaakiriri maawaeni jeekatsiri kipatsiki". ¹⁴ Itaka ikanantaririni iroka? ¿imonkaatayitakironima rojankinarini Moeseeshi? Teewee, tekirani ojeekini. Ro ikanantakarini, rameentakarini.

¹⁴ Apatziroríkami iñáaperoterimi Tajorentsí riraga kowawitachari imonkaateromi rojankinarini Moeseeshi, tema ramatawitakirimi Awaraamani okaatzira ikantakiriri. Eero okameethataneemi rameentawitakarira. ¹⁵ Rowashironkagaeysterini Tajorentsí maawaeni kaari monkaaperotzirori rojankinarini Moeseeshi, ikijiri. Omaanta eerorikami otzimimi rojankinarini Moeseeshi, tekatsimi okantya ikijawenterimi Tajorentsí. ¹⁶ Aririka ameentyaari Tajorentsí, tema imonkaatakiro ikantakaeri. Kyaaryo, ineshironkaeyakirini maawaeni kimitteeyaririni Awaraamani. Tee apaniroeni ineshironkaeyerini joriyo, omaanta ineshironkaeyakirini maawaeni aapatziyariri. Tema rirotaki Awaraamani itakawori raapatziyari; aririka aapatziyari aari, akimiteeyaaarini irira.

¹⁷ Tema ikantakirini paerani Tajorentsí: "Eerokataki itaperotakaworini, impaetzikya ikimiteeyemini osheki paashinijatzitsatsiri atziri". Rirotaki Tajorentsí kijokiro rowakiri Awaraamani tema rameentakari. Eejatzí rowañagaeri kamayitawiteencharini, tema rirojatzí tzimakagaeyirorini maawaeni añeeyakirini.

¹⁸⁻²⁰ Riyotakotaka Awaraamani antyashiparitaki, rootzimateentsi ikame. Aamaashitya okaataki rojarentsite 100. Eejatzí riyotakiro iina antyashipawotaki, eejatzí tee iyotzi otzimeri eentsite. Tektsi reentsite omaanta ikashiyakaakari Tajorentsí: "Aritaki roshekikitaki picharineetaperooyaarini". Omaanta tee itheenkiri Tajorentsí, riraga Awaraama ikenkithashiryakiro ikantakiriri, riyoperotaki kyaaryo ikantakiriri, imonkaatero maawaeni. Tekirani ijeekini ichariniitenipaeni, raapatziyakari Tajorentsí eejatzí riweshiryawentakari, ikantzi: "Tema ikameethataki Tajorentsí". ²¹ Riyoperotzini eenitatsi itajorenka, tektsi pomeentsitzimotyaarini; riyoperotzini rantero maawaeni ikantakiriri. ²² Rootaki ikanantakari Tajorentsí: "Rameentakina Awaraama, rootaki noñaaperotantariri ikameethatzi".

²³⁻²⁴ Rootaki ikantakiririni Awaraamani, eejatzí iroñaaka ikanteeyakaerini aari; ayoteeyakini aririka ameentyaari Tajorentsí, iñáaperoyakaeni akameethatzi, ikimitakaanteeyakaeni tee antziro kaari kameethatatsi. Tema rirotaki piriinteeriri Awinkatharite Jesoshi. ²⁵ Eeniro anteeyakirini kaari kameethatatsi, rootaki ikamawenanteeyakaerini Jesoshi. Roojatzí ipiriintanaa eejatzí, rootaki ayoteeyantakarini maawaeni iñáaperoyakaeni akameethatzi maawaeni aapatziyariri rirori, okimitaka tee antapiintziro kaari kameethatatsi.

5

Iñáaperoyakaeni Tajorentsí akameethatzi, ayoteeyantakarini ajeeke jenokinta

¹ Ari ikamawenteeyakaeni Awinkatharite Jesokirishito, rowawi-jaakoeyantakaerini. Iroñaaka ameenteeyakawoni maawaeni ikantakaeri Tajorentsí, rootaki iñáaperoyantakaerini akameethatzi, okimitaka tee antziro kaari kameethatatsi; rootaki iroñaaka raakameethatanteeyakaerini maawaeni. ² Kyaaryo aapatziyakari Jesoshi, rootaki ineshironkatantakaeri Tajorentsí, ikantatyaaani. Osheki aweshiryawentakari, ayoteeyakini

añeeyeerini janta ipinkatharitaperotzinta. ³ Eejatzi, aririka akemaatsityaawo oetarikapaeni, kameetha aweshiryaaawentyaari Tajorentsi. Ayoteeyakini aririka akemaatsityaawo, iyotaakaero eshiwenantyaawori oetarikapaeni. ⁴⁻⁵ Eejatzi aririka eshiwentakiro, ramitakotakae Tajorentsi akyaryooowentakiro antawaetziniri rirori. Aririka akyaryooowentakiniri oetarikapaeni, ayotanaki ameentakawo ikantakaeri, eejatzi ayotanaki tee ramatawiteeyeeni. Tekatsi ikantee ramatawiteeyeeni, tema rotyaantakaero Ishire okithaatakaakae, rootaki iroñaaka inintaperoeyantakaerini kameetha. Aweshiryaaawentakari.

⁶ Ñaakiro, paerani ashironkaaperoeyakan, tekatsi akantya owawijaakotashitya aaka apaniroeni. Roojatzi omonkaatantakari kitejiri ikowakiri Tajorentsi, ipokaki Jesoshi. Tee apinkathatawitarini, omaanta ikamawenteeyakaeni. ⁷ Ari tekatsi añaapiinte paashini atziri kowatsini ikamawenteri paashinipaeni kameethatatsiri, rowawijaakotantyaariri. Omaanta eenitatsirika kameethaperotatsiri atziri, aamaashitya eenirorika apaanipaeni kamawentziriri rirori. ⁸ Omaantakya aaka tee akameethateyini, omaanta rotyaantakiri Tajorentsi Itomi riraga Jesokirishito ikamawenteeyakaeni. Tema rootaki ayoteeyantakarini ineshironkaperoeyakaeni, inintaperoeyakaeni. ⁹ Apaatawentakae rira, ikamawenteeyakaeni. Tema ameentakari rootaki iroñaaka iñaaperotantakaerri Tajorentsi akameethatzsi, okimitzimotawitakari tee antziro kaari kameethatatsi. Iinja, ikijeri Tajorentsi maawaeni antapiintzirori kaari kameethatatsi, inta aaka, aritaki rowawijaakoeyakan. ¹⁰ Paerani akiyawitarini Tajorentsi, omaanta ikamawenteeyakaeni Itomi, iroñaaka apinkathatakiri rirori; eejatzi irira, iñaaperotakae akameethatzsi. Iroñaaka eero rapiitero ikamae eejatzi Jesoshi, inta ikantyaani rañaaperotee, imatantawori itajonkawentapiinteyakaeni iroñaaka. ¹¹ Kaari apatziro iroka, inta eejatzi ayoteeyakini aapatziyakari Awinkatharite Jesokirishito, rootaki iñaaperoyantakaerini Tajorentsi akameethatzsi. Tema rootaki aweshiryaawenantariri iroñaaka.

Rantakiri Araani akamantyaari omaanta rantakiri Jesokirishito añaantyaari

¹² Paerani ritakaantakawo kaari kameethatatsi apaani atziri, riraga Araani; rootaki ikamantakari rimpaezti. Eejatzi akimiteeyakironi aaka eejatzi riraga maawaeni paashinipaeni atziri: anteeyakironi kaari kameethatatsi, ashi owaeyanakironi. Rootaki iroñaaka akamaniteeyantarini aari maawaeni: ashi oyiro akamaeyini maawaeni. ¹³ Paerani tekirani ojeekini rojankinarini Moeseeshi, rantapiinteyakironi atziri kaari kameethatatsi. Omaanta tekira riyotaperoeyironi kameetha oetaka ikowakagaeyakiririni Tajorentsi: ñaakiro, tekirani ojeekini rojankinarini Moeseeshi. ¹⁴ Omaanta eekiro riyataanakitzi ikamaeyanakini maawaeni atziri, ritakaantananakawo owakira tzimajaantaneentsiri, riraga Araani, roojatzi ijekantapaaka Moeseeshi. Omawitya tekiraata otzimi kaminagaantsi rashì Tajorentsi, tema riraga anteeyakirorini kaari kameethatatsi ikamaeyakini, omawitya rantakiro inashitapaeni kaari kameethatatsi. Tema owamagaeyakirini okaatzi ranteeeyakirini. Riraga Araani roshiyawitakari riraga pokapaentatsiri rimpaezti, ¹⁵ omaanta rinashitaka rirori eejatzi. Eeniro rantakiri Araani akamaeyantakarini aakapaeni. Omaanta ikaminthaaperoeyakaeni Tajorentsi, tee ikoyi ikijawentaperoteero antayitzirini, rootaki rotyaanantakariri pokapaentatsiri: riraga Jesokirishito. ¹⁶⁻¹⁷ Iroka rantakiri Araani owamagaeyakirini osheki atziri, omaanta iroka rantakiri Jesokirishito

owañagaeyakirini osheki atziri. Tema ikamawentakae maawaeni aaka, rootaki iroñaaka ineshironkataperoeyirini Tajorentsí rirori, tee ikenkithashiryakoteero anteeyakirini, omaanta iñaaperoteeyakaeni maawaeni aapatziyariri Jesokirishito akameethatzi. Rowañaagaeyakaeni maawaeni, akanteetatyeeyaani ajeekae jenokinta.

¹⁸ Rantakiro kaari kameethatatsi apaani shirampari: riraga Araani, rootaki maawaeni aakapaeni aateeyantyhaarini paamariki kaari tsikanitatsini. Omaanta eeniro rantakiri paashini shirampari, riraga Jesokirishito. Rootaki imatantawori Tajorentsí iñaaperotakae akameethatzi, ajeekaeyanteyearini jenokinta, akanteetatyeeyaani. ¹⁹ Tee ikemijantaperotziri Araani Tajorentsí okaatzi ikantawitakariri, rootaki kaari akameethateeyantani. Ikemijantaperotakiri Jesokirishito Iriri, rootaki imatanteyakaerini iñaaperoyakaeni akameethatzi. ²⁰ Rojankinatakaakiri paerani Tajorentsí Moeseeshi ayoteyantakarini tee okameethatzi iroka anteeyakirini. Tee akameethaneentzi eechonkiini, omaanta osheki ineshironkaeyakaeni Tajorentsí. ²¹ Ari tee akameethateeyini, rootaki akamaeyantakarini, omaanta aapatziyeyakarini Awinkatharite Jesokirishito, rootaki ineshironkatanteeyakaerini Tajorentsí. Tee ikijawenteero anteeyakirini, omaanta iñaaperoyakaeni akameethatzi rootaki akanteetatyeeyaani ajeekimotantapaeyaariri iinja janta jenokinta.

6

Aririka akaawoshitakoeyaarini Tajorentsí kimiteeyakani atsi-peeyakarini Jesoshi akamaeyakini eejatzi apriunteeyanaani

¹ Ayoteeyakini ikamawentakae Jesokirishito rookakowentakae eero omperatantanee eejatzi kaari kameethatatsi. ¿Oetaka anteeyerini iroñaaka? ¿Antapiinteeyeronima kaari kameethatatsi ineshironkantapiinteeyerini Tajorentsí? ² Eero. Eero antapiinteero eejatzi kaari kameethatatsi. Okimiwitaka akamaki, eero amatantawo antapiinteero kaari kameethatatsi eejatzi. ¿Litaka, ikanantari apaani kaminkari nantapiinteroota? Eero imatziro. ³ Aapatzyantakariri Jesokirishito eejatzi akaawoshitawenteeyakarini, kimitaka akaateeyakirini akamaeyakini. ¿Tema piyotziro? ⁴ Eejatzi okimitaka akaateeyakirini akitateeyakani, eejatzi okimitaka akaateeyakirini apriunteeyanaani. Iroñaaka ajeekaeyaneeni kameetha, akimiteeyakarini Jesokirishito: ikamaki, ikitateetakiri roojatzitajonkaperoteeri Ashitariri ipiriinantaariri eejatzi.

⁵ Iroñaaka akimiteeyakarini Jesoshi. Okimitaka akaateeyakirini akamaeyakini, eejatzi okimitaka akaateeyakirini apriunteeyanaani: añeyaneeni, omaanta inashiteeyanaani maawaeni aakapaeni. ⁶ Paerani osheki akowapiinteeyini antapiinteeyironi kaari kameethatatsi, omaanta okimitaka atspatakari Jesokirishito akentakoejakani koroshiki, akamaeyakini: ¿uitakama akowanteeeyari eejatzi apiitero kaari kameethatatsi? Paerani okimitaka aakateeyakini ratziritepaeni iwinkatharite kamaaripaeni, rantakaapiintakaero kaari kameethatatsi; omaanta iroñaaka okimiwitaka akamaki, tekatsi ikantya romperatee eejatzi. ⁷ Ñakiro, aririka ikame atziri, tekatsi omperateeyaaarini. Iroñaaka aaka, eero anteero kaari kameethatatsi. ⁸ Aririka akaateeyakirini Jesokirishito akamaeyakini, ayoteeyini akaateeyerini eejatzi ajeekimoteri janta ijeekinta rirori. ⁹ Ayoteeyakini ikamaki, eejatzi ipiriintanaa. Eero rapiiteero ikamae eejatzi: tekatsi ikanteyaa ikamae eejatzi. ¹⁰ Ikamantakari Jesoshi, ikamawentakiro kaari kameethatatsi anteeyakirini. Monkaataka:

eero ikamae eejatzi. Iroñaaka añaanee: kijokiro rowaeri iroñaaka Tajorentsi, ikanteetatyeyaaani. ¹¹ Eejatzi eeroripaeni, pikimiteeyakani pikamaperoeyakini, eero panantaawo kaari kameethatatsi; omaanta rañaakagaeyemini eejatzi Awinkatharite Jesokirishito tema ijekanaki pajankaneki, rootaki, piyoteeyantaaririni piweshiryaakazaari Tajorentsi.

¹² Tema okimiwitaka pikamaki: eero iroñaaka pantapiintero kaari kameethatatsi, eero pikenkithashiriiro roojatzi eero pantziro okowashitari piwatha. ¹³ Ari okimiwitaka pikamaki, eero pathaagakotaawo iroñaaka piwatha antakaapiintemiro kaari kameethatatsi. Eejatzi okimiwitaka rowañagaemi Tajorentsi, rootaki pishinetantyaariri rantakaayitemironi kameethatayitatsirini. ¹⁴ Eero iroñaaka panteero kaari kameethatatsi. Tekatsi okantya omperateemini pantero oetarikapaeni, tema ikamintha-gaeyakimini Tajorentsi, ineshironkateeyakimini.

Noshiyakaawentemiri apaani omperatearewo

¹⁵ ¿Itaka anteri iroñaaka? Ayoteeyakini tekatsi omperateeyeeni eejatzi ayoteeyakini ineshironkatapiinteyakaeni Tajorentsi. ¿Okameethatzima antashitapiintyaawo kaari kameethatatsi ineshironkatapiinteyakaerini? Teehee, tee okameethatzi. ¹⁶ ¿Ninkama pipinkathataperoteri? Aririka pipinkathateri iwinkatharite kamaariipaeni, rantakaapiintemiro kaari kameethatatsi, omaanta rootaki piyaatantyaari paamariki kaari tsiwakanitatsini. Omaanta aririka pipinkathateri Tajorentsi, eejatzi pikemijantaperoteri, rantakaapiintemiro kameethatayitatsirini, rootaki piyaatanteyari jenokinta Tajorentsi. ¹⁷⁻¹⁸ Kyaaryo paerani pipinkathatawitarini iwinkatharite kamaari, omaanta iroñaaka pipinkathateri Tajorentsi. Pikemijantaperoteero maawaeni riyotagaeyeeemirini irira, rootaki nopaasonkitantariri. Pantapiintawiton kaari kameethatatsi, omaanta oeyowakimi Ishire Tajorentsi, iroñaaka pantapiintero kameethatayitatsirini.

¹⁹ Nokamantemiro okimitawo iñaawaetzi atziripaeni, riraga theenkatsiri pikemeantyaaworini. Okimitaka paerani pipinkathawitarini iwinkatharite kamaari eejatzi eekiro piyaatatye panantaworini kaari kameethatatsi, okameethatzi iroñaaka pipinkathateeeyerini Tajorentsi eejatzi eekiro piyaatatye panteeyantyaaworini kameethatayitatsirini, pikameethaperoeyantyaarini. ²⁰ Paerani, pikemijantaperoyawitarini iwinkatharite kamaari pantawitakawo oetarikapaeni, tee pipinkathateeiyirini Tajorentsi. ²¹ Omaanta osheki iroñaaka pipashiwentakagaawo panteeyawitarini: ¿itaka ipinatemirimi kamaari? Panteeyawitanarini, rootaki piyaatantyaarimi paamariki kaari tsiwakanitatsini. ²² Iroñaaka tekatsi ikanty iwkatharite kamaari romperateeyeeemini eejatzi: tema iroñaaka pipinkathateeeyerini Tajorentsi, panteeniri okaatzi ikowakayemiri. Rowameethashireeyemini rirori, ijekakagaeyemini jenokinta pikanteetapaatyeyaaani. ²³ Pantapiinteyawitakawoni kaari kameethatatsi, piyaateeyantyaarinimi paamariki kaari tsiwakanitatsini. Omaanta paapatziyakari Awinkatharite Jesokirishito, rootaki ikaminthaantashitakimiri Tajorentsi, ijekakagaeyashitemini jenokinta, pikanteetapaatyeyaaani. Tema ikaminthaashiiyenee ikowashita.

Aririka aapatziaari Jesoshi tee omperateeyeeni rojankinarini Moeseeshi

¹ Noyemijantzinkarite, eerokateeyakini nojoriyyotzinkarite, nokenkithatakagaeyemini. Tema piyotzi aririka ikame asheninka, tekatsi ikanteeya raapatziyeeyaa wo ikantawitakaririni kaminagaantsi.

² Noshiyakaawentemiro iroka. Okantz Iwaperite Tajorentsi: "Aririka aye tsinani oemi, kijokiro owanakiri, roojatz ikamantaka. Tee okameethatzi ookashityaari". Omaanta aririka ikamaki, ojeekashitanaa, omatero roori antero oetarika okoyiri. ³ Omaanta eenirorika oemi, tee okameethatzi ofnaathatzimotaari paashini shirampari. Aririka ikamaki oemi, ari okameethatzi agae paashini oemi, iroñaakacya tee ofnaathatzimotari itaworini oemi. Tektsi thañeeyawoni ayeeta paashini. ⁴ Eejatz, noyemijantzinkarite, ikamaki Jesokirishito: eejatz okimiwitaka pikaateeyakirini, pikamaeyakini. Iroñaaka eero omperateemi rojankinarini Moeseeshi, tema okimiwitaka kamakimi. Omaanta rañaakagaeyeemini eejatz Tajorentsi panteeeyantyaaworini maawaeni ikowakagaeyakimirini. Okimiwitaka aakiri paashini oemi, riraga Jesokirishito. ⁵ Paerani aapatziyawitarini iwinkatharite kamaariipaeni. Akowapiintawitawoni antapiintero kaari kameethatayitatsini, rowaga ithañaapithatawitakaeri Tajorentsi. Aritaki akanteeyarini, antapiinteeyironi okaatz okowakiri awatha, rootaki aateeyantyaarinimi paamariki kaari tsiwakanitatsini. ⁶ Omaanta iroñaaka okimitaka akamaeyakini. Eero akenkithashiryagaeyaawoni ikanteeyirini joriyyopaeni, rameteeyarini riori. Iroñaaka tee antapiintziro okantzirini rojankinatzirini paerani okaatz okowaki awatha, intaka antapiinte okowakagaeyakaerini Ishire Tajorentsi.

Akyaryoowentero eero anantaperotawo kaari kameethatatsi

⁷ ¿Itaka nokanteeyimirini? ¿Nokantzimima tee okameethatzi rojankinarini Moeseeshi? Teehee, tee nokantzimi. Eeromi otzimimi, eero niyotziromi nantayitzirini kaari kameethatatsi. Eeromi okantzimi: "Eero piñaawenatawo rashitayitarini paashinipaeni", eero niyotziromi kaarira kameethatatsi. ⁸ Iyotaawitakina tee okameethatzi nokowashiryaaaperoeyironi oetarikapaeni, niyotawitawo; omaanta eekiro niyaatayee nokowashiryaaaperotanakiro oetarikapaeni. Eeromi otzimimi kaminagaantsi rashii Tajorentsi, eero niyotziromi tee okameethatzi nokowashiryaaawitakari. ⁹ Paerani, tekirani niyotzironi Kaminagaantsi rashii Tajorentsi, nokimoshiryaaashitawitakan. Omaanta roojatz iyotaantakina eeniro nantani, rootaki nowashiretantakari. Niyotanaki niyaatemi paamariki kaari tsiwakanitatsini. ¹⁰ Noetawitaka aririka nanteromi maawaeni okantziri Rojankinarini Moeseeshi nokanteetatyeyaaani nojeekeemi jenokinta, omaanta tektsi nokantya nomonkaatero. Iyotaakina iroñaaka eenitatsi nantani, rootaki niyaatantyaarimi paamariki kaari tsiwakanitatsini. ¹¹ Osheki nokenkithashiryaaakiro kaari kameethatatsi, amatawithawitakina, rootaki kaari nomonkaatantaworini okantziri Rojankinarini Moeseeshi. Roojatz niyotantanaka iyaatakaatyeyenami paamariki kaari tsiwakanitatsini. ¹² Naakiro, okameethaperotaki Rojankinarini Moeseeshi: rootaki iñaani Tajorentsi, okameethaperotaki.

Ikantziri iitaka antapiinantawori kaari kameethatatsi

¹³ Ari okameethatzi Rojankinarini Moeseeshi, omaanta ¿itaka niyaatantyaarimi paamariki kaari tsiwakanitatsini? ¿Rooma rojankinarini Moeseeshi jatakayenanimi? Kaari, omaanta jatakayenanimi nantakiro kaari kameethatatsi, rootaki niyaatantyaarimi. Tema iyotagaana rojankinarini Moeseeshi tee okameethatzi iroka nantawitakarini. ¹⁴ Okameethataki roori, tema Tajorentsi rirotaki jankinataantzirori; omaanta naaka, kantakaashitakawo tee nokameethatzi naaka. ¹⁵ Tee

niyotakota oeta awijimotakinari: nokowawita nojeeekemi kameetha, omaanta, tee nomatziro. Nantapiintakiro kaari nokowaperotawita nanteri. ¹⁶ Niyotaki tee okameethatzi iroka nantayitakirini, niyotaki okameethataki iroka iyotaantziri Rojankinarini Moeseeshi. ¹⁷ Tee nokowawita nanteromi oetarikapaeni, omaanta ashi noyiro tee nokameethatzi, rootaki nanantawori. ¹⁸ Niyotaki tee nokameethaperotzi nowathaki. Nokowaperotawitaka nanteromi kameethatayitsirini, omaanta tee nomatziro. ¹⁹ Tee nantapiintziro kameethatatsiri nokowawitari nanterimi, inta eekiro nantapiintanakitziro kaari kameethatatsi kaari nokowawita nanteri. ²⁰ ¿litaka nantashitantawori kaari nokowawita nantero? Rooma ashi noyiro tee nokameethatzi, rootaki nantashitantakawori.

²¹ Aritaki nokantatyaaani: nokowawitaka nojeeekemi kameetha, omaanta omapokakina eejatzitanee nantaneero kaari kameethatatsi. ²² Nokenkithashiryaauperotawitakawo najankaneki iñaani Tajorentsi, nokowaperotawitaka nanteromi kameetha ikowakaakinari. ²³ Osheki nokenkithashiryaaakotaka nowathakira eenitatis kaari shinetenani nantero kameethatatsiri. Osheki nokenkithashiryaaawitakar Tajorentsi, nokowawitaka nanteromi ikowakaakinari. Omaanta tee nomatziro nantero, omapokashitanaana nantaneero eejatzi kaari kameethatatsi. ²⁴⁻²⁵ Osheki nashironkaawitaka. Nokenkithashiryaaawitaka nanteromi ikantakinari Tajorentsi, omaanta ashi noyiro tee nokameethatzi. ¿Ninka amitakotenani eero nantapiinantawo eejatzi kaari kameethatatsi? Tema tee nokoyi niyaate paamariki kaari tsiwakanitatsini. Rirotaki Awinkatharite Jesokirishito amitakotenani. Rootaki ironaaka osheki nopaasonkitantariri Tajorentsi.

8

Amitakoeyakaeni Ishire Tajorentsi

¹ Rootaki aapatziyeyantaririni Jesokirishito kameetha, eejatzi kijokiro oyeri, eero rowashironkagaeyeeni. Tema eero ironaaka antapiinteyironi kaari kameethatatsi akoyiri aari. ² Paerani ashi noyironi nantapiintzironi kaari kameethatatsi, niyaatemi paamariki kaari tsiwakanitatsini. Omaanta naapatziyakari rirori, owawijaakotantaanari Ishire Tajorentsi, owañaashiryaaantaanari. Ojeekakagaena iinja janta jenokinta, nokanteeta-paatyeeyaani. ³ Ñaakiro, tektsi okantya owawijaakoeyeeni rojankinarini Moeseeshi: ashi oyiro tee akameethatzi. Tee amonkaateeyironi okantakaeri. Omaanta rowawijaakoeyakaeni Tajorentsi. Rotyaantakiri Itomni jaka kipatsiki, ratziritapaaki, ikimitaperotapaakae aari, omaanta tee rantziro kaari kameethatatsi. Ikamawentakae aka, ipaashinitakagae eero akimitantaa paerani. ⁴ Iroñaaka, aririka aapatziyawo Ishire Tajorentsi, ari amonkaatakiro okantakaeri Iwaperite Tajorentsi. Paerani ashi oyironi tee akameethatzi, tee amonkaatzironi okantakaeri.

⁵ Riraga kaari kameethateeyatsini ikenkithashiryaakopiantawo rantero kaari kameethatatsi. Omaanta riraga yotzirori Ishire Tajorentsi ikowaki rantero okowakaakiriri. ⁶ Aririka akenkithashireero akowashitayitarini aari, aate paamariki kaari tsiwakanitatsini. Aririka akenkithashireero okowakaakaeri Ishire, ari ajeekaki kameetha eejatzi kameetha akanteetayeyaani ajeekimooyerini Tajorentsi. ⁷ Aririka akenkithashiryaaakotero antayiteroni akowakiri aari, atheenkakiriri rirori: tee akoyi antayiteroni ikowakagaeyawitakaerini. Rootaki kaari amatantawo antero. ⁸ Tee imatziro ikimoshiryaaakayeri rirori maawaeni antapiintayitzirorini oetarikapaeni ikowashitakari.

Tsika ikanta riraga kameethatayitatsirini

⁹ Omaantakya eerokapaeni, tee pijeekaeyini iroñaaka okimitaaga okoyiri piwatha, inta okithaatakaapaakimiro eerori Ishire Tajorentsi, rootaki pijeekaeyantaarini kimitaka okowakaakimiri Ishire. Riraga kaari kithaatotawori Ishire, tee riyotziri Jesokirishito. ¹⁰ Osheki pantakiro kaari kameethatatsi, rootaki pikamaeyantyaarini piwatha, omaanta pisheninkatakaririka rirori, iñaperotakimi Tajorentsi pikameethatzi pishireki, pikanteetatyeyaaani pijeekimoteri. ¹¹ Tema rowaga Ishire opiriinteri Jesoshi. Iroñaaka aririka okithaatakaakimi roori, opiriinteyeyeemini eejatzi eerori, owañeyeyeemini pishireki eejatzi. Ro imatanteemiri pameentakawo. ¹² Iroñaaka, noyemijantzinkarite, atsipetashiwitakawo aapatziyawitakari iwinkatharite kamaari, eejatzi atsipetashitawitakawo antero kaari kameethatatsi. ¹³ Aririka pantapiintero iroka, piyaate paamariki kaari tsiwakanitatsini. Omaanta aririka paapatziyawo Ishire Tajorentsi, eero panteero eejatzi kaari kameethatatsi, roojatzikya pijeeke jenokinta, pikanteetapaatyeyaaani.

Itominteyakarini Tajorentsi aapatziyariri Jesoshi

¹⁴ Maawaeni atziri ikithaatakaakari Ishire Tajorentsi, riroteeyakini reentsitepaeni Tajorentsi. ¹⁵ Pamine, aririka okithaatakaakae roori, aakateeyakini itomipaeni rirori eejatzi rishinto. Tee akimitari romperanawo, eejatzi eero athaawantari. Eero akimitaa paerani athaawanteyawitarini iitarikapaeni. Tema kyaaryo, akanteeri Tajorentsi iroñaaka: "Pawa nashi". ¹⁶ Aririka ayotaki okithaatakaakae roori, eejatzi iyotagaeyakaeni, rootaki ayoteeyantakarini reentsiteeyakaeni Tajorentsi. ¹⁷ Aakateeyakinirika reentsitepaeni, ari ipaeyakaeni Tajorentsi maawaeni ikowakaakaeri ojeekimoeyeeni iinja, akomiteeyaarini Jesokirishito. Iroñaaka aririka akimitakoeyakaarini akemaatsityawa wo oetarikapaeni, aritaki iinja akimitakoeyakaarini, kameetha ajeekimoeyapaerini Tajorentsi, aweshiryaawenteeyaaarini.

Inja eero akenkithashiriiro oetarika akemaatsitawitakari iroñaaka

¹⁸ Inja kameetha ijekakaaperoeyeeni janta inampiki, kyaaryo ajeekaperote roojatzu eero akenkithashiriiro oetarikapaeni akemaatsitawitakari iroñaaka jaka. ¹⁹ Ayoteeyakini maawaeni riwetsikaeyakaeni Tajorentsi ijekakaaperoeyakaeni kameetha, eejatzi ipeyee iinja pinkatharitatsini. Raamagaeyaarini maawaeni ikantzi: "¿Tsika okaateka itajonkawenanteeyeerini maawaeni reentsitepaeni ayoteeyantaririni?"

²⁰⁻²¹ Ratsipetashitakawo ijekayitakini maawaeni riwetsikaeyakirini Tajorentsi: ikamapiinteyakini rirori tsimeripaeni, pankirentsipaeni, maawaeni; eero añaagaeri eejatzi iinja. Tekatsi ranteeyawityaani ikamaeyantakarini, omaanta ikamaeyantakarini rantakirini paerani Araani. Riyotaki Tajorentsi iinja eero okimitaa iroñaaka, inta rowameethaperoeyeerini eejatzi maawaeni ikaatzi jeekanteyaworini kipatsi, tema eejatzi ikimitagae aari iinja rowameethaperoeyeeni: tema aakateeyakini reentsitepaeni maawaeni. ²² Ayoteeyakini rowashironkaapiinteyakani maawaeni riwetsikani Tajorentsi, eejatzi ikamaeyini: ikantani, roojatzi iroñaaka. Tema ikimiteeyakawoni tsinani, rowashironkaapiinteyironi, tema atsikamoonthatziro tsinani aririka okoñaawaanite eentsite. ²³ Eero apatziro okaatzi riwetsikakiro Tajorentsi oyeero kitejiri rowameethatero, inta eejatzi aaripaeni aapatziyariri Jesoshi, ashironkagaeyawitakani, oyeero. Tema eeniro akemaatsiteeyakarini, omaanta eenitatsi Ishire Tajorentsi, ojeekantakae ajankaneki

amitakoeyakaeni. Omaanta akowaeyakini ikimitakaantaperoeyeen Tajorentsí aaka reentsitepaeni ipaashinitakagae aririka apiriinte. Roojatzi eero akemaatsitaawo oetarikapaen, eero akamae eejatzsi.²⁴ Aririka ayotaki imonkaatero Tajorentsí ikantakaeri, aapatziyakari awijakontantaari. Omaanta tekira ithonkiro, tekira imonkaateeyironi maawaeni ikantakaeri aari rootaki oyaakotantyaariri. Omonkaatakyaaarika, ḡarima oyaakoteero okaatzsi ikantakaeri? Eero.²⁵ Aririka ayotaperotaki imonkaateero ikantakaeri, kameetha eekiro aatatyee oyaakotero, eero akantashiryaa.

Amitakoeyakaeni Ishire Tajorentsí, okantziri Tajorentsí ramitakoeyeeni

²⁶ Tee ayoperoeyini aari, omaanta amitakoeyakaeni Ishire Tajorentsí. Tee ayoperoeyini amaneri Tajorentsí kameetha, omaanta iyotzi roori Ishire, okantakowenteeeyakaeni; kameetha okenkithatakaeri, eero amatziro akimityaawo.²⁷ Riyoperotakae Tajorentsí okaatzsi akenkithashiryaaari ajankaneki, eejatzsi riyotakiro oetarika okantziriri Ishire. Aririka okantakowentakae, iyotakiro maawaeni ikowakaakaeri Tajorentsí, rootaki amanantyaariri, tema rootaki Ishire kantakoteeni.

²⁸ Ayoteeyakini aririka anintaperotakiri Tajorentsí, eejatzsi aririka antapi-intakiro ikowakagaeyakaerini, roojatzi ikantyaani rirori itajonkakowenteeeyeeni. Aririka opomeentsitzimotawitakae, omaanta eero ishineteetowashironkaeya.²⁹ Paeraniperoroña riyotzitakaeni ari aapatziyakyaari rootaki ikantzitantakarini: “Ikameethatanaki aapatziyeyanarin, ikimiteeyaari Notyomi”. Tema irira rirotaki Jesokirishito. Rirotaki itomipero paeraniperoroña, ijeekitani; rimpaeeteeyakaeni aririka aapatziyeyarini irira ari reentsiteteeyakaeni aari, akimitaari paashini reentsite Tajorentsí.³⁰ Paerani ikantzitakan: “Neentsiteteeyarini”, roojatzi reentsitetaperoeyakaeni; eejatzsi iñaaperoeyakaeni akameethatzi ikimitakaantakae tee antziro kaari kameethatatsi. Eejatzsi ikantzitakan: “Inja kameetha ijeekimoeyenani jaka nonampikka”.

³¹ Tema okameethateeyakini iroka. Ņaakiro, itajonkawentaperoeyakaeni Tajorentsí: ḡninka iroňaaka owashironkagaeyeeni? Tekatsi.³² Tee ithaňneyeari Itomi, omaanta rotyaantakiri jaka kipatsiki ikamawenteeeyakaeni. Tema ayoteeyakini eejatzsi iinja ipapiunteeyeeni aaka maawaeni koetyemoeyakaerini.³³ Tema riyoyagaeyakaeni Tajorentsí, iňaakae akameethatzi ikimitakaantakae tee antziro kaari kameethatatsi: ḡninka iroňaaka kantatsini eeniro antani? Tekatsikya.³⁴ ḡNinkama kantakoteenika: “Eeniro pantani”? Tekatsi: tema ikamawenteeeyakaeni Jesokirishito rowawijaakoeyakaeni. Eejatzsi ipiriintanaa, ijeekimotapaeri Ashitariri rakoperoki, ikaatziri ipinkathariwenteeyakaeni, eejatzsi raminakowentakae.³⁵ ḡNinkama ookakaeyerinika Jesokirishito inintaperoeyakaeni? Tekatsiroña. Omawitya rowashironkagaeteerika, aririka opomeentsitzimoeyeenii oetarikapaen, rajaryagaeteerika rowashironkagaetee, aaperoterika atashe, tekatsirika akithaatyaari, athaawantayitarini oetarikapaen, rowamagaetaerika; omaanta ikantani Jesokirishito, inintaperoeyakaeni.³⁶ Okimita okantzitakarini rojankinateetakirini paeraniperoroña: “Naapatziyakimi Tajorentsí, rootaki rajaryaantapiintetakinari rowamagaetenra. Ikimitakaantena owisha: tema rowamaapiintetayitzirini maawaeni kitejiri rowantariri”.³⁷ Kyaaryo osheki inintaperoeyakaeni Jesokirishito, ikantani: itajonkawenteeeyakaeni, ranaakotakaakaeri maawaeni kowatsiri rowashironkaakae. Tema rootaki aweshiryawentaperoeyantakaririni.³⁸⁻³⁹ Kyaaryo, tekatsi ookakagaeyenarini ininteeeyakaeni: eero imatziro ronampiri Tajorentsí, kamaaripaen, pinkatharipaen, jenokijatzi, kipatsijatzi, maawaeni

riwetsikaeyakirini Tajorentsi, eero imatziro. Okantawitya aririka akamaki, eniroka añi, eero imateeeyironi iroñaaka, eejatzi eero imatziro iinja. Rooma aapatziyakari Awinkatharite Jesokirishito, iroñaaka inintaperoeyakaeni, eejatzi kijokiro rowaeyakaeni maawaeni.

9

Tajorentsi riyoyaakiri ninkarika ikowakaakiri irira

¹⁻³ Osheki nokenkithashiryaaakotakiri maawaeni nojoriyyotzinkarite. Kyaaryootaki iroka nokantakiri, riyotaki Jesokirishito tee notheeya. Eejatzi okithaataakaakina Ishire, iyotakaakina kyaaryo nokantaki. Netakoperotakari nojoriyyotzinkarite, tee raapatziyari Jesoshi. Aririkami nomateromi nowawijaakoterimi riroripaeni, niyaateetami paamariki kaari tsiwakanitatsini rawijakotanteeyarinimi; niyaaterikami janta, eero noñiirimi naaka Jesokirishito. Ñaakiro, osheki nokowaperowitaka rawijakoeyeenimi ⁴ icharineeteeyakarini Ishirayeeri.* Tema irira reentsiteteeyawitakarini Tajorentsi. Iffeeyakirini itajonkantaki, eejatzi ikemaeyawitakawoni ikantawitariri, ryoteeyawitakawoni Rojankinarini Moeseeshi, ryoteeyawitakan tsika ikantyaami raapatziyarimi, eeniro ikashiyakagaeyakiririni aririka ikemijantaperoteri, ⁵ riroteeyakini ichariniitenipaeni riraga itakaworini paeran, riroteeyakini ichariniiteni paerani Rotyaantanewo Tajorentsi. Tema rirotaki Tajorentsi, okameethatzti akanteatyeyaaani añaaperoeyerini eejatzi apinkathataperoeyerini maawaeni. Aritaki okantyaani.

⁶ Ryoteeyawitawoni Iwaperite Tajorentsi, omaanta tee raapatziyeyawoni. ¿litala kaari raapatziyeyantawoni? ¿Ramatawitakirima Tajorentsi? Teewee, tee ramatawitziri. Pamine, maawaeni icharineeteni Ishirayeeri tee ikimitaperoeyarini: rooma tee raapatziyeyearini Tajorentsi maawaeni, inta apaanipaeni. ⁷ Eejatzi tee ikimitaperoeyarini Awaraamani maawaeni icharineeteni. Tema ikantakirini paerani Tajorentsi: “Apatziro picharinitaperoeyaarini maawaeni icharineeteni riraga Ijaaka”. ⁸ Iroñaaka nokamantemiro iroka roshiyakawentziri. Tee reentsitetari Tajorentsi maawaeni icharineeteni Awaraamani. Apatziro isheninkaeyakarini riraga icharineeteni Ijaaka. ⁹ Tema ikantakirini Tajorentsi riraga Awaraama: “Awia-neentsirika apaani ojarentsi roojatzi otzimantakya Jaara otomi”. ¹⁰ Paashini ojarentsi ikoñaatak Ijaaka. Ikantaka rantaritaki, raaki iina, owaero Riweeka. Roojatzi omotzitakiri, rirotaki tsipantzi. ¹¹⁻¹³ Eenirowa rirori omotzitziri riniro, tekira rantziro kameethatatsiri eejatzi tekira rantziro kaari kameethatatsi, omaanta eeniro ikowakaetakariri Tajorentsi. Irira riyoyaakiri ikantzitakawoni rowaga Riweeka: “Riraga jewatatsini ikoñaatapaaki ipinkatheeteri riraga oyaatapaakyaaarini”. Tema rootaki okenkithatakotzitakaririni Iwaperite Tajorentsi: “Ikantzi Tajorentsi: ‘Nonintaperoteri Jakoowo osheki, omaanta riraga Isawoori eero nonintaperotziri osheki’”. Ñaakiro, ryotzitani Tajorentsi ikowakaetakaririni: roojatzi imatakan-takari.

Tsika ikantziriri Tajorentsi joriyyo eejatzi kaari joriyyotatsi

¹⁴ ¿Okameethatzima akante: “Tee okameethatzzi iroka rantziri Tajorentsi”? Teewee, eero akantzi. ¹⁵ Tema paerani ikantakirini Moeseeshi: “Tema naaka kantatsiri ninkarika noneshironkateri, eejatzi ninkarika netakotyaari”. ¹⁶ Tee riro atziri kantatsini, inta Tajorentsi. Riyotzi irira ninkarika

* ^{9:4} Ishirayeeri eejatzi Jakoowo rirotaki apitetachari iwaero apaani atziri.

ineshironkataperoteri. ¹⁷ Tema paerani ojankinatakani ikantziririni riraga iwinkatharite ejipitojatzi: “Nopeyemi pinkatharitatsini, riyoteeyantyaarini atziri osheki notajorentsitaki, eejatzi osheki ipinkathateeyantenaarini maawaeni jeekatsiripaeni kipatsiki”. ¹⁸ Naakiro, tema rirotaki Tajorentsi kantatsiri ninkarika ikowakaari ineshironkateri. Tema eejatzi rirotaki kantatsiri ninkarika kijoshiretatsiri rajankaneki. ¹⁹ Naamaashita iroñaaka pikantena: “¿Arima? Kyaaryorika pikantakiri, ¿iitaka ikijawenantenawori nantayitzirini? Tema nantayitakironi rantakaakinari rirori”.

²⁰ Pamine, eeroka atziri: tee okameethatzi pipiyathatyaaari Tajorentsi, osheki ipinkatharitzi irira. Noshiyakaawentemiro kowitzi. Okantzirma wetsikirori: “¿Iitaka kaari piwetsikantana naari kameetha?” ²¹ Rowaga wetsikirori tema rootaki kowakawori tsikarika okanterori kipatsi. Apaani owatha kowitzi. Tema okameethatzi owetsikakiri apaani rooperotatsiri, omaanta paashini tee opantaperotya. ²² Aririka ikowaki Tajorentsi, tema okameethatzi rowashironkaayiterini iinja. Tema okameethatzi ryotakagaeyerini atziri eeniro itajorenka. Omaanta tee rowashironkaagaeirini intsipaete riraga kaari kameethateeyatsini, omaanta imaaeritakotashitawo rantayitzirini, tema ikowakiri ikenkithashireeyami ikamintaantyaaririmi. ²³ Omaanta ikamintaaperotakiri riraga jatatsini jenokinta; ikowakaakiri ryoteeyeni osheki ikamintaantzi, eejatzi osheki ipinkatharitzi. ²⁴ Riyoyaakiri apaanipaeni joriyo ryoteeyantaaririni eejatzi ryoyaakiri apaanipaeni kaari joriyyotatsi. Aakateeyakini ryoyayitakirini, ayoteeyantaaririni. ²⁵ Tema paerani rojankinatakotzitakaeni riraga Osseeyashi, ikantzi:

“Ikantzi Tajorentsi: ‘Kaari naawita nosheninka, omaanta iroñaaka nosheninkataari. Kaari naawita nonintanewo, omaanta iroñaaka nonintaperoteeri’”. ²⁶ Eejatzi janta tsikarika Tajorentsi ikantakiri: “Kaari naawita nosheninka”, iinja ikenkithatakoteteeeri riraga peyaachani ikanteri: “Eerokapaeni reentsitepaeni Tajorentsi, riraga añaaperotatsiri”.

²⁷ Eejatzi eenitatsi iroka rojankinatakirini Iseeyashi. Ikenkithatakotakiri joriyyopaeni ikantzi: “Ikaateeyakini icharineeteni Ishirayeeri oshekiperoroña. Ikimitakawo opane impanekei roshekiperotaki. Omaanta eero roshekiperotzi awijakotaatsini. ²⁸ Iinja imonkaatero Tajorentsi maawaeni ikantakiri: romapokaaeyerini maawaeni theenkantatsiri, rowashironkaagaeirini. Ithotyaaperooyerini, maawaeni”.

²⁹ Tema eejatzi rojankinatakini rirori, ikantzitakan: “Eeromi ikamintheeyeenimi Tajorentsi, riraga antzirori oetarikapaeni, eeromi isheninkateeyeenimi, tema ari ithonkaeyeenimi maawaeni, akimiteeyaaarinimi riraga joroomajatzini eejatzi riraga komoorajatzini”.

Ikamtziri iitaka kaari raapatziyantari joriyyopaeni

³⁰ ¿Iitaka eejatzi nokamantemiri? Paerani riraga paashinijatzitsiria atziri tee ikowaeyawitani rowameethateri Tajorentsi, omaanta iroñaaka raapatziyeyarini rootaki iñaaperotantakariri ikameethatzi. ³¹ Omaanta riraga joriyyopaeni ikowaeyawitani rirori imonkaatayiteronimi ikantayitziririni Moeseeshi ikameethatantyaarimi, omaanta tee imateeyironi. ³²⁻³³ ¿Iitaka kaari iñaaperotantariri riroripaeni ikameethatzi Tajorentsi? Tee rameneeteyarini omaanta ikowaeyawitani rantero oetarikapaeni. Osheki ikompitakawo, tee ikowaeyini raapatziyari Jesoshi. Paerani rojankinateetzironi iroka: “Ikantakotakiniri Tajorentsi Rotyaantanewo: ‘Notyaantawityaanari joriyyopaeni notyomi, omaanta eero ryoteeyawakirini. Okimiwitaka

rantziwatyaawo mapi, ipariyantyaawo; tee riyoteeyirini rirotaki Notyaantanewo, rootaki rowashiretantlyaari. Omaanta eero rowashireta riraga aapatziyariri, inta riweshiryaaentaperooyaarini”.

10

¹ Noyemijantzinkarite janta Oroomaki, osheki nokowaperotaki rawijakaoeyenimi maawaeni nojoriyyotzinkarite, osheki namanapiintziri Tajorentsi: “Paapatziyakagaeyaarini nojoriyyotzinkaritepaeni rawijakotanteeyaari”. ² Niyotaki osheki ikowaeyawitani ikyaaryooowentenirimii Tajorentsi oetarikapaeni rantziniriri, ishintsiteniri maawaeni. Omaanta tee riyoteeyini oetarika ikowakaaperoeyakiririni. ³ Tee riyoteeyini tsika ikanteeri Tajorentsi iñaaperotanteeyaarini ikameethatzi. Ikowaeyawitani rowameethatashityaami apaniroeni, omaanta tee ikoyi raapatziyawo okaatzti ikantziro Tajorentsi iñaaperotantakariri ikameethatzi. ⁴ Pamine, ipokaki Jesokirishito, ikamawenteeyakaeni. Iroñaka, aririka aapatziyakaa rirori, ari iñaaperoeyeeni Tajorentsi akameethatzi. Atsipetashitakawo iroñaka antayiteroni ikantzirini Moeseeshi awijakotanteeyaarimi.

Tsika akantya awijakoeanteeyaaarini

⁵ Paerani riraga Moeseeshi ikenkithatakotakiri riraga kowatsiri rawijakotantyaawomi Rojankinarini Moeseeshi: “Eenitatsirka kowatsini imonkaayiteroni rawijakantyaaari, okameethatem iomonkaateeyeronomi maawaeni, ikanteetatyeyeaani. Eeromi ikompitawomi”. ⁶ Omaanta aririka aapatziyeyaaarini Jesoshi iñaaperotantariri Tajorentsi akameethatzi eero akantzi ajankaneki: “Pomeentsitaka awijakotanteeyari. Thame aatashiteri Jesokirishito janta jenokinta, aakiteri jaka rowawijaakotanteeri”. Eero akantashita; ⁷ eejatzi eero akantashita: “Thame aate tsikarika iyaatzi ishire kamaentsiripaeni inthomaenta kipatsi, apiriinantlyaari Jesokirishito, rowawijaakotanteeri”. Eero akantzi. Tema tzinaanaa paerani. ⁸ Aririka aapatziyakaa riragi awijakotee: eero antayitzironi pomeentsitayitacharini. Tema eeniro jaka iñaani Tajorentsi: kaari pomeentsitachani pikenkithatakotero eejatzi pameentyaawo. Rootaki iroka nokamanantapintziri: paapatziyari Jesoshi pawijkotanteeyarini. ⁹ Aririka pikamanteri paashinipaeni atziri pipinkathatakiri rirori, eejatzi aririka pikenkithashiryaa kiro pajankaneki ipiriinteeri Tajorentsi, aritaki pawijkotee. ¹⁰ Ñaakiro, aririka ameentyaari riraga Jesoshi ajankaneki iñaaperoeyeeni Ashitariri akameethatzi; eejatzi aririka akamanteri paashinipaeni atziri aapatziyakari rirori, aritaki awijakotee. ¹¹ Tema okantzini Iwaperite Tajorentsi: “Eero ipashiwenta riraga aapatziyariri Jesoshi, tema eero ramatawitziri”. ¹² Amonkaatawakagaeyakan: joriiyo eejatzi paashinijatzitsiri atziri, apintzi Awinkatharite. Ameenteeyakarini, rootaki ipinkathariwenanteyakaerini, ineshironkateeyantakaerini maawaeni. ¹³ Tema eejatzi okantzini Iwaperite Tajorentsi: “Rawijakoeenei maawaeni ameenteeyaririni Awinkatharite”.

Osheki itheenkanteeyini joriiyopaeni

¹⁴ Eerrika raapatziyari Tajorentsi atziri, ḡtsikama ikantyaaka rameenantyaariri? Eero imatziro. Eerrika ikemakotziri, ḡtsika ikantyaaka raapatziyantyaariri? Eero imatziro. Tekatsirika kenkithatakantatsini, ḡtsika ikantyaaka ikemakotantyaariri? Eero imatziro. ¹⁵ ḡArima imatakiro atziri riyaate ikenkithatero iñaani Tajorentsi tekatsirika otyaanterini irira? Eero imatziro. Tema okantzini Iwaperite

Tajorentsi: "Tema osheki aweshiryaaawentakari riraga pokatsiri kenkithatzirorini iñaani Tajorentsi, tema añaaperoeyakirini".¹⁶ Omaanta tee raapatziyeeyimini maawaeni. Tema rootaki ikantakirini paerani Iseyashi: "Nowinkatharite, nokamanteeyawitakarini, omaanta eenitatsi osheki kaari aapatziyeeyimirini".¹⁷ Eerorka ikamanteetee, eero amatziro aapatziyari Jesoshi. Tema ikamanteetakae ikamawentakae irira, rowawijaakotantakaeri.

¹⁸ Tema ikemaeyakini maawaeni joriyyopaeni. Kyaaryo, ikemaeyawitakawoni. Tema okantzini Iwaperite Tajorentsi: "Riyaataki kenkithatakaantatsiri maawaeni kipatsiki, ikemaeyakirini maawaeni jeekatsiripaeni".¹⁹ ¿Tee riyoteeyawakironi joriyyopaeni? Tema ikamantakirini paerani Moeseeshi: "Ikantzi Tajorentsi: 'Inja paamakotaari paashinijatzifatsiri atziri pimaninteeyawitakarini. Ro pikijantyaariri nowawijaakoeyeerinira' ".²⁰ Eejatzi rojankinatakini Iseyashi: "Ikantzi Tajorentsi: 'Tee ikowawitenaa riyotena riraga atziripaeni, omaanta riyoteeyakinani iroñaka: niyotakaaper-oeyakirini'.²¹ Omaanta riraga joriyyopaeni nokantapiintawitakari, omaanta ipiyathatakina, tee ikoyi raapatziyena' ". Rootaki rojankinatakinarini riraga Iseyashi.

11

Tsika ikantyaaka riraga joriyyopaeni

¹ Naamaashita pojampitena iroñaka: "¿Arima? ¿Eeroma iroñaka rookaeri Tajorentsi maawaeni joriyyopaeni, riraga reentsiteeyawitarini?" Eero. Tema naaka joriyyo. Nocharineeteeyakarini Awaraamani eejatzi Irijamiini.
²⁻³ Naakateeyakini joriyyo. Tema paerani riyoyagaeyakinani Tajorentsi, roojatzi iroñaka raakameethateeyantaanarini. Tema piyoteeyakini okantzini Iwaperite Tajorentsi. Okenkithatakotakirini Iriiyashi paerani, ikenkithatakaeri Tajorentsi, ikantziri: "Nowinkatharite, teewee ikameethateeyini irika nojoriyotzinkarite. Rowamaapiintayitakirini riraga kamanantayitzirorini piñaani. Rookakaayiteerini isheninka raapatziyeeyawitzimini. Iroñaka ikowaeyakini rowamaena naari. Apaniroeni naaka naapatziyimi".⁴ Tema piyoteeyakironi eejatzi rowaga rakanakiriri, ikantzirini: "Eenitatsi ikaatzi jeekatsiri 7.000 shirampari aapatziyaperotanari. Tee rotziwerowashitawo ipinkathatanteeyaworini rirori rowaga Waari itajorentsitemeyawitarini paashinipaeni".⁵ Eejatzi okimitaka iroñaka. Eenitatsi eejatzi apaanipaeni joriyyo riraga riyoaanewo Tajorentsi, ineshironkaeyakirini.⁶ Ñaakiro, ineshironkaeyakirini, tee ikantziri rantero oetarikapaeni. Ikanteririkami rantayiteronimi oetarikapaeni, tee ineshironkatziri.

⁷ Ari, ¿tsika okantari iroñaka? Ikowaeyawitakani iñaaperooyerinimi Tajorentsi, omaanta, tee. Iñaaperotayitakirini apaanipaeni: riraga riyoyayitakirini. Omaantakya paashinipaeni, tee ikowaeyini raapatziyaperoyaarini Tajorentsi inta romajontyaakiri rajankaneki.

⁸ Tema eejatzi okantzini Iwaperite Tajorentsi: "Ipeyapithatakirii Tajorentsi ikenkithashiryaantawitari. Iñaayitawitakawoni oetarikapaeni, ikemayitawitakawoni, omaanta tee riyotakotawakiro: tee raapatziyari Tajorentsi. Aritaki ikantteeyani, roojatzi iroñaka".⁹ Eejatzi ikantzini Iraviiiri: "Riweshiryaaawentawitakawo oetarikapaeni, omaanta ramatawiteeyaani apaniroeni. Roojatzi ikamaeyeni, ikemaatswienteeyaaioni rantayitzirini.¹⁰ Eero inija ojeeki riyotantari, eero riyoteeyini. Íkantyaani ashi royiro rashironkaeyakirini".

Tsika ikantaka joriyo ejatzi paashinijatzitatsiri atziri

¹¹ Ari itheenkaeyakini joriyyopaeni rootaki nojampitantzimiri: „Ikijaperoeyakirinima iroñaaka Tajorentsi rirori, eero ishinetantari rawijakotya? Teewee. Omaanta ranantakawori kaari kameethatatsi rowawijaakoeyantakaririni paashinijatzitatsiri atziri ikowantyaari joriyyopaeni ikimiteeyaaarini riroripaeni, raapatziyaari Jesoshi.

¹² Itheenkaeyakini, tee ikowaeyini raapatziyari irira, omaanta rawijakoeyeeni paashinijatzitatsiri atziri. Linja, aririka raapatziyaperoyearini joriyyopaeni rirori, tema eekiro ryaatatayee raapatziyaperoyearini ejatzi paashinijatzitatsiri atziri rawijakontanteeyaaarini.

¹³ Tee eerokapaeni joriyo. Piyoteeyini rotyaantakina Tajorentsi nokenkithatakagaeyakimini. Aririka notsipatyari nojoriyyotzinkarite nokantani nokenkithatakotero nantawaero ejatzi pawijakontanyaari osheki eerokapaeni.

¹⁴ Nokowaki nokenkithashiryaa kagaeyerini iñaani Tajorentsi nojoriyyotzinkarite ejatzi raamaawaeta kaari joriyo, rawijakotagaananteeyarini rirori. ¹⁵ Itheenkaeyakini iroñaaka, rootaki kaari iñaaperoeyantarini Tajorentsi ikameethatzi; omaanta eeroka iñaaperoeyakimini pikameethatzi. Omaanta iinja iñaaperoeyeerini rirori ikameethatzi, tema okameethaperotanaki. Ryaataeyenimi oshekiperi janta paamariki kaari tsiwakanitatsini, omaanta iinja ryaatatagaanteeyini osheki janta jenokinta, okimiwitaka ipiriinteerimi.

¹⁶ Pamine, iñaaperotakirini Tajorentsi Awaraamani ikameethatzi, rootaki riyoyaantakariri icharineetenipaeni ratziritantyaariri. Noshiyakaawentemiro ejatzi inchato: aririka okameethataki oparitha, tema ejatzi okameethataki owaempeki roori. Okimitaka ikameethatakini Awaraamani, ejatzi ikimityaari iinja icharineeteni ikameethateeyanakini.

¹⁷ Iroñaaka noshiyakaawentemiro eerokapaeni kaari joriyo rowaga inchato oetachari oriwo. Okameethataki oparitha, omaanta tee okithokitzi owaemperekiki. Rootaki ichekanteetawori, rookaeteero. Rayi paashini owaempeki, omaanta roori oriiwoniro. Riyontaakiro roori, rootaki tzimatsini okithoki. Ro oparitha shookakayeroni. Rowaga owaemperekini ichekaetziro oshiyakaawentziri joriyo; rowaga owakirari oriiwoniro riyontaakiro oshiyakaawentakimi eeroripaeni, tema eeroka kaari joriyo. ¹⁸ Iroñaaka eero pikantakaaperota eerori: “Nokameethatzi naaka, tee nokimitari riraga joriyo”. Naakiro, tee pijekashita apaniroeni, eero pimatziro apaniroeni, inta omatakaakimiro Ishire Tajorentsi, kimitaka oparitha oriwo amitakotakiro owaempeki oriiwoniro. Ari okanta riyotaakaero riraga joriyyopaeni ramitakotakae ejatzi riweshiryakaagayaakaena. ¹⁹ Naamaashita pikantzi: “Rookakiri Tajorentsi joriyo kim-itaka ichekanteetawori owaempeki oriwo rooma riyontaakinawo. Tema iroñaaka kijkokiro royena naaka”. ²⁰ Kyaaryo, omaanta itheenkakiri, rootaki rookantawitakariri. Paapatziyeyakarini Jesoshi eeroka, rootaki kijkokiro rowaeyantakimirini. Kyaaryoowa pikantakaaperotashitakarira, omaanta okameethatzi pipinkathataperoteri. ²¹ Pamine, rookakiri riraga Tajorentsi riraga theenkiriri, omawitya rirotaki riyoyaawitakari. Eejatzi eeroka, kyaaryoowa rookimikari aririka pitheenkirri.

²² Piyoteeyakini ikamintaantaki Tajorentsi, omaanta ejatzi rowashironkagaeyakirini riraga antzirori kaari kameethatatsi. Aririka pikantyaani paapatziyari, ari ikantyaani ikaminttheeyemini. Eerorika pikantyaani paapatziyaperotari, rookaneemi eerori. ²³ Eejatzi riroripaeni: aririka rookaero itheenkirira roojatzi raapatziyeyarini, ari iñaaperoeyerini Tajorentsi ikameethatzi, tema rirotaki Pinkatharipero. Okimiwitaka

riyontaakiro eejatzi oriiwoki. Tema rirotaki rirori kantakowenteririni tsikarika ikanteeyerini atziri. ²⁴ Paerani tee piyoteeyawitarini, omaanta iroñaka iñaaperoeyakirini pikameethatzsi. Aririka raapatziyari riraga iyoeyawitaririni, tema eejatzi iñaaperoeyeerini rirori ikameethatzsi.

²⁵ Noyemijantzinkarite, eenitatsi nokoyiri nokamantemiri kaari piyoteeyawitan. Ro nokamanantemiri tee nokoyi pikantakaaperotya. Pamine, itheenkaeyawitani riraga joriiyopaeni iroñaka, omaanta eero roojatzsi ikantatyaa. Aririka omonkaatakyra apatziyeevari Tajorentsi paashinijatztatsiri atziri, roojatzsi omonkaataanteeya eejatzi raapatziyanteeyaariri riraga Tajorentsi eejatzi joriiyopaeni. ²⁶ Kyaaryo rawijakoeyeeni iinja, maawaeni irira. Tema paerani okantzini Iwaperite Tajorentsi: "Ikantzi Tajorentsi: 'Ijoriyyotaki riraga owawijaakoeyeririni, raapatziyakagaeyaarini isheninka rookakagaeyerini itheenkantzi. ²⁷ Nomonkaatero iinja maawaeni nokantzitakaririni ichariniiti paerani: nowawijaakoeyerini, eero napiiteero nokijantari kaari kameethatasi ranteeyakirini".

²⁸ Iroñaka ikieeyakirini, eejatzi itheenkaeyakirini; rootaki iroñaka rowawijaakoeyantakimirini Tajorentsi eeroka. Omaanta inintzitarini riraga itakaantakaworini joriiyopaeni, rootaki eejatzi iroñaka inintaper-oeyantakaririni maawaeni. ²⁹ Tee ramatawitantz Tajorentsi: eero raapithateero oetarika ipaeyakaerini, eero rotsiparyaagaari riraga riyoyaakiri. ³⁰ Paerani tee paapatziyarini Tajorentsi, omaanta iroñaka itheenkaper-oeyakirini joriiyopaeni rirori, rootaki ikaminthagaeyantakimirini eeroka. ³¹ Iroñaka tee raapatziyari joriyyo, omaanta iinja raapatziyeevari eejatzi, ikimiteeyeemini eerori. Roojatzsi ikaminthaanteeyariri Tajorentsi, ikimitakaanteeyeemini eerori ikaminthagaeyakimini iroñaka. ³² Ikantzi Tajorentsi: "Eeniro rantanipaeni maawaeni atziri, omaanta nokowaki noneshironkaeyerini maawaeni, nowawijaakoeyerini".

Riraga Paaworo iñaaperooteri Tajorentsi

³³ Tema osheki ikameethaperotaki. Eenitatsi riyyotantari, osheki riyyotzi. Tee amatziro ayotziro ikenkithashiryaari rirori, tee ayotayitzironi rantayitzirini. ³⁴ Tema rootaki okantziri Iwaperite Tajorentsi: "¿Enitatsima yotzirori ikenkithashiryaari Awinkatharite? ¿Enitatsima yoteeriri ranantayitaworini oetarikapaeni? ³⁵ ¿Enitatsima perini Tajorentsi oetarikapaeni ipantyaariri okaatzi ikoyiri? Tektsi. Tema irira ipakae aaka maawaeni, oetarika". ³⁶ Ñaakiro, rirotaki irira wetsikirori maawaeni. Itajonkakiri maawaeni, ijeekaeyantakarini. Tema rirotaki ashiteeyaririni maawaeni jeekaeyatsirini. Thame iroñaka maawaeni apinkathataperoeyerini, akan-teetatyeyaa. Aritaki okantyaari.

12

Okaate rantayiterini aapatziyariri Jesoshi

¹ Noyemijantzinkarite, tema osheki ikaminthaaperoeyakaeni Tajorentsi. Rootaki nokowakaaperotantakimiri eero pantashitawo eerori oetarikapaeni, inta panteniri irira okaatzi ikowakayimir. Eenirowa pañi, kameetha pijeke riweshiryaawenamtemiri: rootaki ikowakagaeyakiririni maawaeni aapatziyariri Jesoshi. ² Eero pikimiteeyarini theenkantatsiri, omaanta paashini pikenkithashiryaagaeyapiinteni. Piyotaperoteri ikowakaakimir Tajorentsi: okameethaperotaki. Aririka pantapiintero iroka, monkaataka: iñaaperoeyemini Tajorentsi pikameethatzsi.

Eero pikantakaaperota

³ Ikantakina Tajorentsi: "Piyotagaeyerini oroomajatzi", roottaki nokamananteeyimiorini iroka. Eero pikantakaaperota, eero piitashita panaakoeyakirini paashinipaen pipinkatharitzi. Pikenkithashireeyaaani tsika pikantari, piyoteeyeni imatakaaperotakimirika Tajorentsi paapatziyakari Jesoshi. ⁴ Pamine tsika akanteeyarini: eenitatsi oki aminantari, akempita akemantari, apaante añaawaetantari, ako oerikantari, aetzi anashitantari, maawaeni. ⁵ Eejatzi akimiteeyakarini maawaeni aapatziyeyyaririni Jesokirishito: akaateeyakini osheki, ashinkatawakagaeyakani. Omaanta inashitayitakan anteeyakirini.

⁶ Tema osheki ineshironkaeyakaeni maawaeni. Imatakagaeyakaeni antayitakironi oetarikapaeni, omaanta inashitayitakan. Eero aperawentawo antayiteroni. Aririka imatakaakimiro pikenkithatakayeri atziri, paapatziyaperotaari kameetha pikenkithatakaantyaariri irira.

⁷ Aririka imatakaakimi petakotaari paashinipaeni, ari pantero petakotaari kameetha. Aririka imatakaakimi piyotaante, ari piyotaante kameetha. ⁸ Aririka imatakaakimi piweshiryaaakayaari paashinipaeni, ari kameetha piweshiryaakazaeyarini. Eejatzi aririka ikantemi pipashitatyaarini ashironkaenkari oetarikapaeni, pipaperoteri: eero pishampsitsizi. Aririka pamitakoteri paashinipaeni, eero piperatari, inta pishintsite pamitakoteri. Aririka pineshironkateri paashinipaeni, piweshireeyeyani.

⁹ Pinintaperoeyerini paashinipaeni kameetha, eero pikantashitari: "Nonintakimi", omaanta pinintaperoteri. Eero poejokirotawo kaari kameethatayitatsini, omaanta pikowaperote pantayiteroni kameethaperotatsiri. ¹⁰ Pinintaperotawakagaeyaaani maawaeni: tema pikimitawakagaeyakani, paapatziyeyyarini Jesoshi. Pikowaperoeyeni pipinkathatawakagaeyani paashinipaeni. ¹¹ Eero piperata, omaanta pikowaperoeyeni pishintsite panteniri Awinkatharite maawaeni ikowakagaeyemirini. ¹² Piyoteeyakini imatakimiro Tajorentsi maawaeni ikantakimiri: iroñaka piweshiryawentyaawo. Aririka opomeentsitzimotemi oetarikapaeni, pimaeritakotashitawo inta pikanteri Tajorentsi: "Pamitakotena". Tema okameethatzi pikantyaani pamaneri Tajorentsi. ¹³ Pipapiinteri piyemijantzinkarite koetyeemotariri. Paakameethatapiinteri ninkarika areetemini.

¹⁴ Pikanteri Tajorentsi ikamintheeyerini kijeeyakimirini, eero pipiyatari. ¹⁵ Aririka ikimoshiryaanaki atziri, pitsipatanakyaari pikimoshiryaaperotanaki eerori. Aririka rowashiretya atziri, aritaki pitsipatanakyaari powashiretya piweshiryaaantanakya. ¹⁶ Paakameethatawakagaeyaaani maawaeni atziripaeni. Eero pikantakaaperota inta paakameethateri owashironkaenkari paashinipaeni pineshironkateri. Eero pikantzi: "Naaka yotzinkariperero".

¹⁷ Aririka rantzimotemiro pisheninka kaari inimotzimi, eero pipiyatari. Kameetha piujeke riyoteeyantemirini atziri pikameethataki. ¹⁸ Eero pipiyawaantetari paashinipaeni. Pikowaperoeyeni paakameethateeyerini paashinipaeni, maawaeni. ¹⁹ Noyemijantzinkarite, osheki nonintaperoejakimini. Eero pipiyatari owashironkaawitemini. Rirokya Tajorentsi piyakowentemini. Tema paerani rojankinatakanakironi Iwaperiteki, ikantakini: "Naaka piyawenteemini, naaka owashironkagaeyeririni. Tema naaka Piwinkatharite. ²⁰ Aririka ayeri kijakimiri itashe, piperi rowanawo roya. Aririka imiritaki irira, pipakoteri imiri. Pantakirorika iroka, roojatzikya ipashiwanantanakya, eeroka rapiiteero ikijeemi eejatzi". ²¹ Eero pathaagawo kaari kameethatayitatsini antakayemiro oetarikapaeni,

omaantakya pikaminthayeri paashinipaeni, poñaayeri kameethatayitatsirini.

13

Okameethatzi apinkathateeyerini pinkathariwenteeyeerini

¹ Pathaagakoperooyaarini maawaeni jewatatsiripaeni: tema rirotaki Tajorentsi kowakaakiriri reewawenante. Eeromi ikowakaerimi, eeromachee reewawenantzimi. ² Riraga piyathatariri jewatatsiri, eejatzti ikimitakiri Tajorentsi, ipiyathatakari irira. Tema rirotaki kowakayiriri reewawenantzi. Linja rowashironkagaeyerini maawaeni piyathateeyakaririni. ³ Riraga jeekatsiri kameetha tee ithaawantari pinkathari, intakya riraga antapiintzirori kaari kameethatatsi. Eerrika pikoyi pithaawantyaari pinkathari, pijeeki kameetha; pijeekirika kameetha, tektsi ikantemi. ⁴ Kyaaryo, ikowakaakiriri Tajorentsi ipinkathariwenante pijeekaeyantyaarini kameetha. Omaanta teerika okameethatzi pantayitzirini, ari pithaawantakyaari. Tee ratsipetashita ipinkathariwenantzi. Ikowakaakiriri Tajorentsi rowashironkagaeyerini maawaeni antzirori kaari kameethatatsi. ⁵ Tee akoyi rowashironkagaeyerini Tajorentsi, omaanta akowaki antero inimotziriri, rootaki okameethatantari apinkathateri pinkatharipaeni.

⁶ Rootaki eejatzti pipagaanantariri pinkatharipaeni piyorikite. Pipinatakiri ranantyaawori ikowakayiriri Tajorentsi: ipinkathariwenteeyeaki-mini. ⁷ Pipinateeyeerini maawaeni okaatzira pireewitakiriri: pipaeri koriki, impoeshito oetarikapaeni. Pikemijantaperooyerini eejatzti pipinkathateeyerini.

Kameetha anintawakaaperooyaani, maawaeni

⁸ Eero pireewitayitzirini atziri oetarikapaeni, inta pinintaperotawakagaeyaani. Aririka anintawakagaeyaani, amonkaataitayiteroni rojankinatayitzirini Moeseeshi, maawaeni. ⁹ Ikaminaakini: "Eero piňaathatzimotawo piina paashini tsinani, eero piňaathatzimotari piimi paashini shirampari, eero powamaantzi, eero pikoshitzi, eero piňaawenatawo rashitayitarini paashini atziri". Osheki eejatzti ikantakirini. Eejatzti ikantakini: "Pikimitaaga eeroka pikaminthagaeyerini, pinintaperooyerini". Aririka anteeyakironi iroka, tema amonkaatakiro maawaeni ikantakirini Moeseeshi. ¹⁰ Aririka anintashireperoteri paashini atziri, tektsi akantya akiashireeri tema amonkaatakiro maawaeni ikantzirini Moeseeshi.

Eero ojamanitzi ipiyashitaate Awinkatharite

¹¹ Eero ojamanitzi ipiyashiteyeenii Awinkatharite ragaeyantaateerini atspateeyantyaaririni. Paerani aapatziyantakaririni, aetashiteeyawitakarini, ari ojamanitanaki ipiyanteeyeri. Iroňaaka aamagaeyakarini, rootaki okameethatantari ajeke kameetha. ¹² Aririka antapiintero kaari kameethatatsi, kimitaka ajeekaki tsiteniriki, amanantawori antayitzirini. Aririka ajeekaki kameetha, kimitaka ajeekaki kitejiriki, tee apashiwentakaawo antayitzirini. Ari iroňaaka oshiyawitakawo rooteentsi okitejitee, tema rootzimateentsirika ipokae Awinkatharite eejatzti. Eero antapiintziro iroňaaka kaari kameethatayitatsini, inta okameethatzi ajeekaeyenii kameetha. ¹³ Thame iroňaaka kameetha ajeekaeyenii. Eero antayiteeroni kaari kameethatayitatsini, eero ashinkiteeyaani, eero añaathatawo kaari ayi, eero oñaathatar kaari ayi, eero akijawakagaa, eero añaawenataperotzitari rowaagawo paashini atziri, ¹⁴ eero antayitzironi

kaari kameethatatsi akowayitzirini eejatzi akenkithashiryaaayitzirini. Omaantakya thameakanteri Awinkatharite Jesokirishito ramitakoeyeeni kameetha ajeekaeyantyaarini.

14

Okameethatzi raakameethatawakagaeyaani maawaeni atziri

¹ Ikowakirika paashinipaeni aapatziyariri Jesoshi ikaateeyemini piñaaperoeyerini Tajorents, ari paakameethateeyawakirini. Tekirarika riyotaperotayiteroni maawaeni ikowakagaeyakaerini Awinkatharite, omaanta eero pipiyawaantetakotari okaatzi riyotawitari rirori. ² Noshiyakaawentemiro. Eenitatsi kantsatsiri okameethatzi owaeyaarini iitarikapaeni: iwatha, shinki, chocokipaeni, maawaeni. Omaanta eenitatsi paashini kaari yotaperotatsi: iitawitachari tee okameethatzi oyaari iwatha. ³ Pometari eeroka powapiintari iwatha, eero pimanintaneentziri riraga kaari owari. Eejatzi, teerika powapiintyaari iwatha, eero pikantzi: "Tee ikameethatzi riraga owariri iwatha". Tema riroteeyakini itomipaeni Tajorents, iñaaperoeyakirini rirori ikameethatzi. ⁴ Tema rirotaki Tajorents Iwinkatharite. ¿Okameethatzima pikante eerori: "Tee ikameethatzi rirori, tee raapatziyaperotari Iwinkatharite"? Tema Tajorents kantawenterini rirori okameethatzipira rantayitakirini, eejatzi ramitakoteri rantayitakironi kameethatayitatsirini. ⁵ Eejatzi eenitatsi paashini kantayitatsirini: "Tee omonkaatawakagaeyani kitejiripaeni, inashitakagaeyawoni apaanipaeni kitejiri añaaperotaperontanyaariri Tajorents". Irira paashini ikantzi: "Okameethateeyini maawaeni kitejiripaeni añaaperotantanyaariri, tee inashitayitani". Ari okameethatzi piyoteeyeni oetarika pikoyiri eerori, omaanta eero pikantawakaawentawo kitejiripaeni. ⁶ Riraga kantsatsiri: "Ninashitakagaawo apaanipaeni kitejiri noñaaperotantaariri", temo ikowaki ipinkathateri Awinkatharite. ¿litaka athañaakotantyaariri? Riraga paashini, rowari iwatha, ipaasonkitziri Awinkatharite, eejatzi ipinkathatziri. ¿litaka athañaakotantyaariri? Eejatzi riraga kaari owari iwatha, ipaasonkitziri Awinkatharite eejatzi ipinkathatziri rirori. Tema eejatzi okameethatzi.

⁷ Tee ajeekawaetashita apaniroeni aaka iroñaaka anantyaawori akowayitzirini. Eero akantashita oetarika antayiterini iroñaaka, eejatzi tsikarika okaatak amantyaari. ⁸ Iroñaaka añeeeyateeni aari, kameetha apinkathateeeyirini Awinkatharite, anteniri rirori maawaeni ikowakagaeyakaerini. Rerotaki kowakagaeroni tsikarika okaatak ame, omaanta akantatyeeyaani apinkathateeeyirini. Ikantani ipinkathariwenteeyirini añaatsiri eejatzi kamaentsiri, maawaeni. ⁹ Ikowaki Jesokirishito ipinkathariwenteeyerini añaatsiripaeni eejatzi kamatsiripaeni, rootaki ikamantakari eejatzi ipiriinantaari. ¹⁰ ¿litaka pikantakotantakariri piyemijantzinkarite: "Tee ikameethatzi"? ¿litaka pikiiñaanikowenantayitakiririni? Eero pipeyakotziro iroka: iinja añaagaeririka Tajorents, roojatzi ijekanaki Jesokirishito iwkatharimentoki ikantanteeri okameethatzirkira anteeeyakirini aari. ¹¹ Iroka ikantzi Awinkatharite Iwaperiteki: "Nokantani nañaaperotzi naaka, kyaaryootaki iroka nokamantemiri. Linja rotziwerowashiteeyenani maawaeni atziri ipinkathateeeyenani. Ikanteeyenani: 'Eeroka Tajorentsipero'". ¹² Kyaaryo, añaagaeyerini eejatzi, ari akamantteeyerini maawaeni okaatzika antayitakirini jaka kipatsiki, roojatzi ikantakoeyantakarini okameethatzirkira antayitakirini.

Kyaaryoowa, pantakaerikari piyemijantzinkarite kaari kameethatatsi

¹³ Ari iroñaaka tee okameethatzi akantakotantariri ayemijantzinkarite oetarika, akante: "Tee okameethatzi rantayitzirini rirori". Kyaaryoowa, pipakaakaerikarira raapatziyari Jesoshi. ¹⁴ Riyotaakina Awinkatharite Jesoshi, rootaki niyotantakari okameethataki maawaeni rowaetaryitarini. Okameethatzi oyaari iwatha. Omaanta riraga iitashitachari: "Tee okameethatzi oyaari iwatha", ari okameethataki eero rowantari rirori; rooma tee okameethatzimotziri aririka rowakaari rirori.

¹⁵ Eejatzi eerori, aririka poyimotyaari piyemijantzinkarite ipinkakirira rirori, aritaki powashiretakaakyari: tee okameethatzi. Aritaki pikenkithashiryaaakaanakyaari, tee pinintaperotziri. Tema ikamawentakiri Jesokirishito rirori, iroñaaka eero pitheenkakaeri. ¹⁶ Piiteeyawitani okameethatayitakini pantayitakirini, omaanta kyaaryoowa, ikantzimawentzimirokari paashinipaeni. ¹⁷ Aririka apinkathatakiri Tajorentsi, eero akenkithashiryaaayitzironi owayitarini eejatzi irayitzirini; omaanta akemijantaperotero Ishire Tajorentsi akameethatantyari, ajeekantyaari kameetha, akimoshirewenteeyantyaaworini rowaga Ishire.

¹⁸ Aririka kameetha akemijantaperotakiro, ari kameetha antawaeteniri Jesokirishito. Roojatzi iñaperoeyeeni Tajorentsi eejatzi maawaeni atziripaeni akameethatzi.

¹⁹ Thame iroñaaka aakameethateeyerini ayemijantzinkarite, maawaeni; eejatzi ikimitee rirori, raakameethateeyeeni. Eejatzi ayotaawakagaeyaani kameetha aapatziyaperoeyantyaaririni. ²⁰ Piyoterika ari pookakaakiri atziri raapatziyari Jesoshi tema poyimotakari iwatha, okameethatzi eero poyimotari iwatha. Kyaaryo okameethatzi oyaari iitarikapaeni, omaanta tee okameethatzi ookakayeri atziri raapatziyari Jesoshi. ²¹ Tee okameethatzi pantero oetarikapaeni pookakaantyaaariri atziri raapatziyakari Jesoshi: eero powashitaro iwatha, eero pirashitawo pyaarentsì eejatzi kepishaari, oetarikapaeni, maawaeni. ²² Aririka piyotaki ishinetakimiro Tajorentsi oetarikapaeni, eero pikantakowenanteeyarini riraga kaari ametawo, eero pikantawakaawentawo. Aririka piyotaperotaki okameethataki pantayitakirini, tema ari pikimoshiryaaoperotanaki. ²³ Omaanta piiterika tee okameethatzi oetarikapaeni rantayitzirini piyemijantzinkarife, eero pantashitawo eerori, otzimikari pantani. Teerika piyotzi ikowakaakimiro Tajorentsi pantero, tee okameethatzi pantashityaawo.

15

*Pikenkithashiryaa kota yari piyemijantzinkarite, eero
pikenkithashiryaa kota shita apaniroeni eero ka*

¹ Ñakiro, aririka aapatziyapero taka yari Jesoshi eejatzi ayoteeyakini okameethatayitakini iroka nokenkithatakotakiri, omaanta okameethatzi akenkithashiryaa koeyaa riraga kaari shintsshireperotatsi, tekira riyoperotzironi kameetha Iwaperite Tajorentsi. Eero antashitawo akowakaayitarini aari, ² omaanta akenkithashiryaa koeyerini ayemijantzinkarite, ikimoshiree yantyaarini riroripaeni. Eejatzi amitakooyerini riyoperotantyari, raapatziyapero tanta yari. ³ Tema eejatzi riraga Jesokirishito, tee rantashitawo ikowakari irira. Tema rojankinatakotzitakan paerani: "Riraga Jesokirishito ikantziri Iriri: 'Ik-ijee yakinani maawaeni kijeeyakimirini eerori' ". ⁴ Rowaga Ishire Tajorentsi ojankinatakakiri paejatzii teni ayoteeyantyaaworini kameethatayitsirini antayiterini, eshiwenantyaawori pomeentsitzimoyiterini oetarikapaeni, aweshiryaa wenantyaariri Tajorentsi, eejatzi ayotaperotantyari iinja

ajeke kameetha janta inampiki. ⁵ Nokowaki Tajorentsi ramitakotapi-inteyakaeni eshiwenantakwori akemaatsitayitakarini oetarikapaeni, ejatzi riweshiryaa kagaeyaakaeni. Nokowaki iroñaaka ramitakoeyemini paakameethatawakagaeyaani. Rootaki ikowakagaeyakimirini Jesokirishito ejatzi. ⁶ Tema amonkaatutowakagaeyakaani akanteeyeni: "Tema ikameethataki Pawa Tajorentsi ejatzi Awinkatharite Jesokirishito". ⁷ Tema raakameethateeyakaeni irira. Iroñaaka pikimiteeyaaarini, paakameethatawakagaeyaani maawaeni, iñaaperoeyantyaaririni atziri Tajorentsi ikameethatzti.

⁸ Paerani ipokantakari Jesokirishito jika kipatsiki, retakoeeyakarini ijori-iyotzinkaritepaeni ryoteeyantakarini tee ramatawiteeyirini Tajorentsi. Ejatzi ryotakagaeyakirini imonkaateeyeroni maawaeni ikantakiririni ichariniiteni paeran. ⁹ Ejatzi ikowakaakiri ryoteeyeni paashinijatzitatisiri atziri ineshironkaeyakirini, ikanantyaari rirori: "Tema ikameethataki Tajorentsi". Rootaki okantzirini Iwaperite Tajorentsi: "Nokamanteeyerini paashinijatzitatsiri atziri: 'Ikameethataki Tajorentsi, thame omampaawenteeyaaarini' ". ¹⁰ Eenitasi paashini Iwaperite Tajorentsi kantatsiri: "Tee eeroka naawita joriyo, omaanta pikaateeyerini rirori piweshiryawenteeyaarini Tajorentsi". ¹¹ Paashini eejatzi rojankinataki, okantzi: "Maawaeni kaari joriyyotatsi ikanteeyeni: 'Tema ikameethatzti Tajorentsi'. Piñaaperoeyerini maawaeni". ¹² Ejatzi riraga Iseeyashi rojankinatzini: "Itzimini icharineeteni Isayii, ipoke ipinkathariwenteeyerini paashinijatzitatsiri atziri, ryoteeyakini rowawijaakooyerini". ¹³ Tema ayoteeyakini imonkaateeniro Tajorentsi maawaeni ikantakaeri. Pameenteeyakarini, rootaki nokwantakari roemoshirenkaeyemini, kameetha ijeekakagaeyemini. Roojatzi otajonkawenteeyemini Ishire Tajorentsi piyotaperotantyaari eero ramatawitzimi Tajorentsi, ithotyaakimiro maawaeni ikantakimiri.

Osheki ikowaki Paaworo ikenkithate

¹⁴ Iroñaaka, noyemijantzinkarite, niyotaki pikameethateeyakini, ejatzi piyoperoeyakironi iñaani Tajorentsi pimateeyantakaworini piyotaawakagaeyakawoni. ¹⁵ Iroñaaka osheki nojankinateeyakimironi, nokenkithashiretakaakimiro maawaeni iroka eero pipeyakotantawo. Kyaaryo, ineshironkatakina Tajorentsi, ¹⁶ rootaki rotyaanantakinari nokenkithatakagaeyerini riraga kaari joriyyotatsi. Nokamanteeyakirini atziri tsika ikanta Jesokirishito rowawijaakoeyantakaerini. Roojatzi owameethaperoeyakirini Ishire Tajorentsi maawaeni raapatziyari Jesoshi, roojatzi raakameethateeyakirini Tajorentsi. ¹⁷ Rootaki niweshiryawentantakimiri: ryoyaakina Jesokirishito nokamanteeyakimini tsika ikanta Tajorentsi. ¹⁸ Eero nokenkithatakotashitayitawoni oetarikapaeni, apatzirokyra nokenkithatakotero imatakaakinari. Riraga paashinijatzitatsiri atziri iñeeyakinani, ejatzi ikemaeyakinani, rootaki raapatziyantayitaaririni Jesokirishito. ¹⁹ Otajonkakaakina Ishire Tajorentsi, nomatayitantaworini oetarikapaeni kaari iñaapiintzi atziripaeni.

Ari nokenkithatakagaeyerakirini atziripaeni janta, nitanakawo nokinanaki Jerojareeki, tema nothotyaanakiro maawaeni nampitsikipaeni roojatzi narreetantaka janta Iriiriyaki. Nokamanteeyakirini tsika ikanta Jesokirishito rowawijaakotantzi. ²⁰ Nokwaperotaki nokenkithatakagaeyerini riraga kaari iyotakoeyiririni irira. Tee nokoyi napiitakotapaeri naari tsikarika paashini atziri ikenkithatakotakiri. ²¹ Tema okantz Iwaperite Tajorentsi: "Ikemero riraga kaari kemakowitawori; ryoteeri riraga kaari yotawitariri".

²² Ari osheki nokenkithatakagaeyakirini kaari yotatsi, rootaki kaari na-reetanta pijkeekira eerori. ²³ Omaanta nothotyaagaeyakironi nampitsi jaka, nokenkithatakagaeyakirini jeekayitatsirini, eejatzi osheki ojarentsi nokowawita noñeemimi, ²⁴ rootaki niyaatantyaari iinja pinampiki. Tsikarika okaate nojeekimoeyanakimini roojatzi nowijantanakya janta Eshipaañaki. Nokowaki eejatzi pamitakotena nowaganakya janta.

²⁵ Omaanta nitapaentyaawoota niyaatapaente Jerojareeki, nagaeyanakirini ayemijantzinkarite ²⁶ iyorikite ipakaantziriri riraga masheroonyajatzi eejatzi riraga akaayajatzi. Ipiyoteeyiniririni ashironkaenkari koriki. ²⁷ Aritaki ikowakaakawo ineshironkaeyerini joriyyopaeni janta Jerojareeki. Tee isheninkawitari, omaanta tema riroteeyakini itakariri ikamanteeyakirini tsika ikantyaari rawijakotanteeyaarini. Ikanteeyini: “Tema rirotaki aapatziyakagaeyakaerini joriyyopaeni, rootaki okameethatantari iroñaaka akaminthagaeyerini rirori. Apaeyerini koriki ramanaantyaawori koetyeemotakariri”. ²⁸ Aririka nopapaakiri koriki ipiyoteeyiniririni, ari niyaate pinampiki. Roojatzi nowaaganeeya, roojatzi Eshipaañaki. ²⁹ Niyotaki aririka nareetapaakimi nokenkithatakapaakimi pweshiryaaawtentaperotantyaariri Jesokirishito.

³⁰ Iroñaaka, noyemijantzinkarite, tema akimitawakagaeyakan aapatziyakari Awinkatharite Jesokirishito, eejatzi iyotagaeyakaen Ishire Tajorentsi anintaperotawakagaeyakan. Nokowaki iroñaaka pamaneri Tajorentsi pikantteyeyerini ramitakotena, ³¹ eero raantana riraga theenkantatsiri janta Joreeyaki. Eejatzi pikanteri ryotagaeyerini riraga jerojareejatzi ikimoshirewenantyaariri koriki ipakaantziriri iyemijantzinkarite. ³² Roojatzi aririka ikowakayena Tajorentsi, nareeteeyapaakimini, osheki nokimoshiretapaaki. Eejatzi osheki oemoshirenkawakagaeyaani maawaeni. ³³ Tema ijekakagaeyakaen kameetha Tajorentsi, maawaeni. Nokowaki kijokiro rowaeyanakimini. Aritaki okantyaari.

16

Riwethateeyarini oroomajatzi

¹ Iroñaaka nokamantemi; iinja iyaatashitemi oñeemi ayemijantzinkawote Jeewera. Opoñaaka Shinkereeyaki, osheki etakoeyakarini aapatziyariri Jesoshi janta. ² Nokoyi paakameethateeyawakironi, tema rootaki aapatziyariri Awinkatharite. Petakoeyaaawoni, pipayitawakironi maawaeni koetyeemotyaaworini. Tema etakoeyakarini osheki ayemijantzinkarite; eejatzi naari, etakotapiintakina. ³ Niwethatawo Pirishiira eejatzi riraga Akiirishi. Osheki ramitakoeyakinani rirori nantawaeteeyinirini Jesokirishito. ⁴ Paerani rooteentsi rowamagaetenami, omaanta owawijaakotakina Pirishiira eejatzi riraga Akiirishi. Owawijaakotantakinari, rooteentsi rowamagaeteromi roori, eejatzi oemi. Osheki nopaasonkiteeyakironi: naari eejatzi maawaeni ayemijantzinkarite jaga, riraga kaari joriyyoteeyatsini. ⁵ Niwethateeyarini maawaeni aapatziyariri Jesoshi piyotapiinteecharini jaga opankoki. Niwethatari eejatzi Epeneeto, nonintaperotakiri rirori. Paerani nokenkithatakantakariri riraga aashiayatzi, rirotaki jewateentsiri raapatziyanakari Jesokirishito.

⁶ Niwethatawo Mariyya, tema osheki etakoperoeyakimini roori. ⁷ Niwethateeyarini notsipaminthari Antorooniko eejatzi Jooniyashi. Paerani notsipateeyakarini romonkyaaagetakina omonkyaaagamentotsiki. Osheki iñaaperoeyakirini riraga rotyaantanewopaeni Jesokirishito.

Reewateeyakinani naari, raapatziyaperotakari Jesoshi paerani. ⁸ Niwethatari Ampiiriyashi, raapatziyakari riraga Awinkatharite, osheki nonintaperotakiri rirori. ⁹ Niwethatari Orowaano, osheki ikaateeyakinani nokenkithatakotakiri riraga Jesokirishito. Eejatzi rirori Eshitaakishi, niwethatari; osheki nonintaperotakiri. ¹⁰ Eejatzi niwethatari Apereeshi; riraga Jesokirishito osheki iñaaperotakiri ikameethatzi, tema osheki ikemaatsitawenziniri. Niwethatari Arishitooworo, eejatzi maawaeni jeekatsiri ipankoki. ¹¹ Niwethatari nojoriyyotzinkarite Erooriyo. Niwethateeyarini riraga aapatziyariri Awinkatharite riraga jeekatsiri ipankoki rashি Narishiisho.

¹² Niwethateeyawoni Terijena, eejatzi Terijoosha, tema roojatzi antawaetziniriri Awinkatharite. Eejatzi okimitaka Peereshira, niwethatawo. Osheki nonintaperotakiro. ¹³ Niwethatari Roojo, riraga aapatziyaririroña Awinkatharite. Eejatzi niwethatawo riniro, osheki etakotakina nokimitakaantakawo ro nana. ¹⁴ Niwethateeyarini Ashiinkirito, Jerekonte, Reemashi, Patoroowashi, Eeremeshi, eejatzi maawaeni ayemijantzinkarite tsipateeyaririni. ¹⁵ Eejatzi niwethateeyarini Jirooroko, Joorya, Neeryo, eejatzi ritsiro, rowaga Oriimpashi, eejatzi maawaeni aapatziyeeyaririni Jesoshi tsipateeyaririni, maawaeni. ¹⁶ Piwethatawakaya, paakameethaperotawakagaeyani. Riwethateeyimini maawaeni aapatziyeeyaririni Jesokirishito jeekatsiri paashinikipaeni nampitsi.

¹⁷ Iroñaaka nokantemi, noyemijantzinkarite: piyoteeyerini riraga iyota-gaeyiririni ayemijantzinkarite ikantawakagaeyani, eejatzi piyoteeyerini antakayiriri kaari kameethatatsi, eejatzi kantzimiri: "Tee okameethatzi paapatziyawo iroka riyotagaeyakimirini". Eero pitsipateeyarini, eero poy-aateeyirini. ¹⁸ Tee rantziniri rirori ikowakagaeyawitaririni Awinkatharite Jesokirishito, omaanta rantashiteeyawoni ikowayitzirini rirori. Kameetha iñaawaetawita, omaanta ikowaki ramatawiteeyerini kaari tzimatsini riyotan-tari.

¹⁹ Ryoteeyakimini atziri pikemijantaperotakiri Awinkatharite, rootaki niweshiryaa wenantakimiri. Omaanta nokowaki piyotaperoyeni pan-tero maawaeni kameethatayitatsirini; omaanta roori kaari kameethatatsi, eero pantaneentziro eechonkiini. ²⁰ Tema Tajorentsi jeekakagaeyimiri kameetha. Eero ojamanitzi ranaakotaperoteri Jatanaashi eero rantakaan-teemiro eejatzi kaari kameethatatsi. Nokowaki iroñaaka ineshironkaeyem-ini Awinkatharite Jesokirishito. ²¹ Riwethateeyimini Temoteeyo; itsipatak-in nantawaateeyiriniri Jesoshi. Eejatzi riwethateeyimini notsipaminthari Rooshio, Jasoo, eejatzi Soshiipatere. ²² Naaka Teereshiyo jankinatziniriri Paaworo iroka. Eejatzi naari, aapatziyariri Awinkatharite. Niwethateey-imini naari. ²³ Eejatzi riwethateeyakimini rirori Kaayo. Nojeekimotziri jika ipankoki. Eejatzi ipokapiintzi aapatziyariripaeni Jesoshi jika ipankoki, osheki raakameethateeyakinani, ineshironkaeyakinani. Riwethateeyimini Eraashito, riraga kempoyeeyiniririni iyorikite jeekatsiri jika. Eejatzi riwethateeyimini ayemijantzinkarite iitachari Kowaarto. ²⁴ Nokoyiri Awinkatharite Jesokirishito ineshironkateeyemini maawaeni eeroka. Ari-taki okantya.

Ikaatakiro rojankinari

²⁵ Thame iroñaaka apinkathateeyerini Tajorentsi. Rirotaki matakaakimiri pikemijantaperotantakariri, aririka ameentaperoyakaawoni iroka no-kenkithatakotakimiri Jesokirishito. Paeraniperorona tee ryoteeyini riraga itakaantaworini ari ipokaki rirori rowawijaakoeyeeni. Tee ikamantzirini

Tajorentsi, ²⁶ omaanta iroñaka riyotakagaeyakaeni. Rojankinataaakirini riraga kamanantayitzirorini iñaani paerani, eejatzti iroñaka rotyaanteeyakanani naari nokamantteeyakirini maawaeni atziripaeni: “Okameethatzi paa-patziyeeyarini Tajorentsi”. Tema okameethatzi aapatziyaperotyaari riori, tee ikamanitzi irira, ikantatyaaani rañi. ²⁷ Osheki riyoperotziroña apaniroeni riori. Thame, maawaeni aapatziyeeyarini Jesokirishito, akanteeyeni: “Tema ikameethaperotaki Tajorentsi”. Aritaki okantyaani.

Naaka ojankinatzimirori:

Paaworo

RITAKAWO PAAWORO ROJANKINATEEYAKINIRINI KORINTOJATZI

¹⁻² Nokoyi niwethateeyimini eerokapaeni, noyemijantzinkarite janta Korintoki, tsikarika pikanta pijeeki. Naaka Paaworo jankinateeyimirorini iroka. Tema riyoyaakina Tajorentsi, rootaki rotyaanantakinari Jesokirishito, ikowakaakina nokenkithatakoteri. Notsipatari jaka Jooshiteneshi nojankinateeyimironi maawaeni aapatziyeyaririni Jesoshi jaga. Paapatziyakari rirori, rootaki rowameethateeyantakimirini; iroñaaka pisheninkatakarai Tajorentsi. Pikimiteeyakarini maawaeni ameenteeyakaririni Awinkatharite, rootaki rowawijaakotantakariri. Tema iroñaaka ashenkinateeyakarini maawaeni aapatziyeyaririni rirori tsikarika ijekakaeyini. ³ Nokowaki ineshironkaeyemini Pawa Tajorentsi, ejatzti nokowaki kameetha ijekakagaeyemini. Ejatzti ikimiteeyemini rriraga Awinkatharite Jesokirishito.

Riwershinyaawenteeyarini Paaworo korintojatzi

⁴ Paapatziyakari Jesokirishito, rootaki ineshironkaeyantakimirini Tajorentsi, rootaki iroñaaka nokanantariri: "Ariwee, pimatatakagaeyakirini korintojatzi". ⁵ Osheki itajonkakowenteeyakimini rirori, kameetha ijekakagaeyakimini, riyotakaaperoeyakimironi oetarikapaeni ikowakagaeyakimiri. Ejatzti imatakamiro piyotagaeyakirini paashinipaeni atziri tsika ikantya rirori rawijakotanteeyaa. ⁶ Tema monkaataka nokanteeyakimiri paerani: kyaaryo ranteeyakimironi Jesokirishito maawaeni. ⁷ Tema rirotaki Awinkatharite: paamagaeyaari roojatzti ipokanteeyaa. Tema itajonkakowenteeyakimini pimatantakawori pantziniri oetarika ikowakagaeyakimiri, tekatsi koetyeemotemi eejatzti. ⁸ Ikanteetateyyaani ramitakotemi eekiro piyaatatayee pameentyaari rirori kijokiro poyer; roojatzti, aririka ipokae, ifnaaperoeyapaemini pikameethatz. Eero ikijawentapaemiro pantyatitarini. ⁹ Eero ramatawiteeyimini Tajorentsi, aritaki imatakamiro okaatzi ikashiyakaakimiri. Tema eero ka riyoyagaeyakimini pikempiyaminthatantyaariri Itomi Awinkatharite Jesokirishito.

Ikantziri: "Pinintaperotawakagaeya"

¹⁰ Noyemijantzinkarite, tema apinkathateeyirini Awinkatharite Jesokirishito. Rootaki iroñaaka nokantakowenanteeyantzimirini kameetha inimoeyakimini maawaeni, eerokya pikenkithashiryaantawo oetarikapaeni. Pikempiyaminthatawakagaeyani, eero pikantawakaawenteeyawoni oetarikapaeni. ¹¹ Rootaki nokanantzimiri iroka, tema ikamantapaakina okaateeyinira Koroe osheki pipiyapiyawaantetawakagaeyakanani. ¹² Eenitatsi kantashitacharipaeni: "Naapatziyari naari Paaworo". Eenitatsi paashini kantashitacharipaeni: "Riro naapatziyari Apooro". Paashini kantashitacharipaeni ikantzi: "Riro naapatziyari Sheejashi".* Paashini kantashitacharipaeni eejatzti ikantzi: "Naaka apatziro naapatziyari Jesokirishito". Rootaki nokanantzimiri: "Eero pipiyawaantetawakagaeyagaeyani". ¹³ ¿Itsiparyaakama Jesokirishito? Tee, rirotaki apaani. ¿Nokentakotawentakimima naaka? ¿Pikaawoshitakotakinama naaka? Teewee. ¹⁴ Iroñaaka nopaasonkitziri Tajorentsi tee nokaawoshitakoteeyimirini Tajorentsi. Inta apatziro nokaawoshitakotakiri Tajorentsi Kiriishipo,

* ^{1:12} Sheejashi rootaki inashita iwaero Peetero.

eejatzi Kaayo. ¹⁵ Tekatsi kantashitachani: "Pikaawoshitakotakari Paaworo". ¹⁶ Eejatzi nokaawoshitakotakiri Tajorentsi riraga Eshiteejana, eejatzi ikaateeyinira. Tee nokenkithashireeyari paashini nokaawoshitakotakiririka Tajorentsi.

Jesokirishito rivotaki iyothanitatsiri eejatzi itajorenka Tajorentsi

¹⁷ Tee rootaki rotyaanantenari Jesokirishito nokaawoshitakotanteri Tajorentsi, intaka rotyaanantanari nokamantakotziro kameethatatsiri. Nokamanantzirika, tee nokantakaaperothatakayaawomi noñaani. Nokantakaaperothatakayaawomi, eero okameethatzimi. Piitakaashiiyanikari ikowakaakimi Tajorentsi piyoteeyeni osheki pawijakotanteeyaaari. Omaanta rirotaki Jesokirishito kamawenteeyakaerini koroshiki, rootaki rowawijaakoeyantakaerini: rootaki iroka nokowakiri niyotakagaeyemini.

¹⁸ Aririka akamantawityaari riraga jatatsini paamariki kaari tsiwakanitatsini: "Ikamawentakimi Rotyaantanewo Tajorentsi koroshiki, ikowawita rowawijaakoeyeminimi", tema ishirontawenteeyakaen. Omaanta aaka, awijakoeyakaen, ayoteeyakironi iroka iñaani rootaki itajorenka Tajorentsi omatantawori owawijaakoeyakaen. ¹⁹ Aritaki rojankinateetzini: "Ikantzi Tajorentsi: 'Nothonkiteeri riyyotantawitari riraga yotayitawitacharini. Nopeyapithateeri kenkithashiryaaawitachari okaatzi ikenkithashiryaaawitari'".

²⁰ ¿Tsika ikantyaaka iroñaaaka yotzinkari? ¿Tsika ikantyaaka iroñaaaka iyotaantzirori Iwaperite Tajorentsi? ¿Tsika ikantyaaka eejatzi riraga yotawaakaachari? Tema itheenkakiro Tajorentsi maawaeni riyyoteeyawitarini atziripaeni. ²¹ Tema irira yotawitachari tee riyyoteeyirini Tajorentsi. Omaanta irira riyyotanetzi, rootaki ikowantari rowawijaakoeyerini maawaeni aapatziyawori okaatzi nokamantteeyakiririni: riraga ameenteeyakaririni. Omaanta riraga theenkantatsiri ishirontawentashitakina okaatzi nokamantawitakariri. ²² Tema ikowaki joriyyopaeni atajonkeniri oetarakapaeni riyyantyaari itsipatake Tajorentsi. Riraga kireeshiyajatzi ikowaki riyyotaashitawakaapiintyaawo oetarakapaeni. ²³ Omaanta nokamantziri atziri: "Ikamawentakae Jesokirishito koroshiki rowawijaakoeyantakaerini", rootaki ikijantakinari joriyo. Omaanta irira kaari joriyyotatsi, ishirontawenteeyakawoni okaatzi nokamantziriri. ²⁴ Omaanta ijeki riyyagaeyakirini Tajorentsi rowawijaakoteri: joriyyo, eejatzi kaari joriyyotatsi. Riyyotakagaeyakirini rirori eenitatsi itajorenka Jesokirishito, rowawijaakotantyaariri. Eejatzi eenitatsi iyothanetaantsi riyyotakaakae okaatzi ikowakaakaeri Iriri. ²⁵ ¿Itaka itheenkayantaririni atziri Tajorentsi? Tema irira anaakoperotantatsiri riyyotzi. Tema rirojatzi anaakoperotantatsiri ishintsitzi. Tee añiiri atziri kimyaaarini.

²⁶ Pikenkithashireeyakya, noyemijantzinkaritepaeni, tsika pikanteeyawitarini ikaemanteeyakimirini Tajorentsi. Osheki itheenkayakimini patziritzinkarite, ikanteeyini: "Tee riyyoti aapatziyariri Jesoshi". Kyaaryo, tee peewawenteeyirini, eejatzi tee pashaaganta, rootaki itheenkayantzimirini. ²⁷ Ishirontawenteeyawitakimini atziri, tee iñaaperoeyawitzimini, tema ikenkithashiryakotawitakimi tee piyotzi, omaanta riyyoyaakimi Tajorentsi rowawijaakoeyemini. Riyyotakaaperoeyemi, ipeyeeyemini jewawenantatsini. Roojatzikya ipashiwenanteeyanakyaani shirontawenteeyawitzimirini, theenkayawitzimirini. ²⁸ Riyyoyaaperotakiri Tajorentsi riraga kaari jewatatsiri, riraga pinkimayitawitaririni atziri, riraga theenkapiintawitariri: irira reentsitaperoeyarini rirori. Omaantakya riraga jewawenantawitachari

eejatzi yoteeyawitacharini rowashironkagaeyirini. ²⁹ Iroñaaka tekatsi ikantya atziri ikantakaaperotzimotaari Tajorents. ³⁰ Paapatziyakari Jesokirishito, rootaki rowañagaeyantakimirini Tajorents, ijeekakagaeyemini inampiki. Tema rirotaki Jesoshi riytakagaeyakaeni, owameethateeyakaerini, rinashitakaakae amatantyaari ashiperotyari riori, owawijaakoeyakaerini. ³¹ Tema aritaki rojankinateetzironi: "Eero akantakaaperota aaka, omaantakya añaaperoteri Awinkatharite ikameethaperotzi".

2

Tsika ikanta Paaworo ikenkithatakantapiintzi

¹ Ejatzi naaka, nareetantapaakimir, noyemijantzinkarite, nokenkithatakotapaakiri Tajorents. Tee nokantakaaperothatapaakawo noñaani, tee niyotaashitayitapaemironi niyotayitzirini naaka; apatziro niyotaapaemiro ikantziri riori. ² Eenironi notsipatzimi apatziro nokowaki nokenkithatakotapaakiri Jesokirishito, ikamawenteeyakaeni koroshiki. Tekatsi paashini nokenkithatakote. ³ Nopashiwentashiryaaawitapaaka, nothaawashiryaaawitapaaka, okimityaami nokinakashiryaaashityaaawomi. Nokenkithashiryaaakotakawo, aamashitya eero nomatziro kameetha naapatziyakaakimir Jesoshi eerokapaeni. ⁴ Pamine, nokenkithatakappaakimir ejatzi nokamantapaakimiro iñaani Tajorents, omaanta tee niyotaashitapaemiro niyotayitzirini naari. Iyotaakaaperotakimi Ishire Tajorents kyaaryootaki ini, ejatzi itajonkakowenteeyakimini piyontawori kyaaryo niyotaakimir. ⁵ Rowaga riyotagaeyawitzimirini atziri, tekatsi okantya owawijaakoeyantemini, omaanta itajonkakowentakimi Tajorents pawijakoeyantakarini.

⁶ Aririka niyotaapiintziri aapatziyaperotariri Jesoshi riraga yoperotzirori iñaani Tajorents, kyaaryo nothotyaakiniri irira niyotaaperoeeyirini, niyotaki ikemawakiro nokantakiriri. Omaanta tee niyotaashitari riyotayitzirini atziripaeni riraga kaari aapatziyariri Jesoshi ejatzi iwkatharitepaeni. Eero owawijaakoeyirini roori riyotaawakaashitayitarini oetarika riyotashitari riroripaeni. ⁷ Omaantakya nokenkithatakotziro riyotayitzirini Tajorents. Paerani imanawitakawo, tee ayoteeyawitawoni. Paeraniperoroña, tekirani riwetsikironi oetarikapaeni, ikantztani: "Nojeekakagaeyerini kameetha jaka nonampiki maawaeni riraga pinkathaperoeyenarini paata". ⁸ Tee riyoteeyironi paerani riraga jewatatsiri. Aririkami riyoteeyakironimi, eeromi ikentakotakaantzirimi Awinkatharite, riraga kameethaperotatsiri. ⁹ Rootaki rojankinataanteetakawori: "Eeniro riwetsikakiri Tajorents kaari iñaayitzini atziri, tee ikemakotziro, tee ikenkithashiri. Omaanta riwetsikiniri maawaeni nintaperotziriri ijeekantyaari kameetha".

¹⁰ Omaantakya riyotakagaeyakaerini Tajorents aaka, tema rootaki owaagakaerori Ishire. Iyotaaperoeyakaeroni maawaeni, tema othotyaakironi maawaeni ikenkithashiryaaakiri riori. ¹¹ ¿Ninkama yotzirori ikenkithashiryaaari atziritzinkari? Tema apatziro riyotziro riori. Eejatzi okimitaka, tekatsi yoteroni ikenkithashiryaaari Tajorents: apatziro iyotzi Ishire roori. ¹² Pamine, tee akemijantashitayitawoni riyotayitzirini atziripaeni, inta akemijantakiro Ishire Tajorents. Rootaki ayotantakawori ikowaki Tajorents ineshironkateeyeeni, ijeekakagaeyeeni kameetha. ¹³ ¿Pikemakiroma nokantakimir? Tee riyotziro atziripaeni, ejatzi tee riyotagaeteeroni, inta iyotagaeyakaerorini Ishire Tajorents. Iyotagaeyakaeni aakapaeni rowaga jeekantashiretariri,

ikemaeyantaworini irowa. ¹⁴ Riraga kaari ojeekantashireta Ishire Tajorentsi, tee ikemawakiro okantayitzirini, inta ishirontawentakawo. Tekatsi ikantya ikemero. Ro kaari ikemantawo, tee ojeekantashiretari roori. Apatziro ikemaeyironi iñaani Tajorentsi ojeekantashiretaperotari. ¹⁵ Ikemathateeyakironi riraga atziri ojeekashiretantari, omaanta riraga theenkantatsiri tee ojeekantari, rootaki kaari riyotantawo oetarika kameethatatsiri. ¹⁶ Pamine, rojankinatakoetziro Ishire Tajorentsi okantzi: ¿Enitatsima yotzirori ikenkithashiriiri Awinkatharite? ¿Enitatsima materoni riyooteeri Tajorentsi? Tee añiirikya. Omaanta aaka ojeekantakae roori, rootaki omatero iyotakagae oetarika ikowakaakaeri Jesoshi antero eejatzi ayotero. Omaanta niyotziro naaka ikenkithashiriiri rirori, tema riyotaakinawo.

3

Ikijawakagaeyakanı korintojatzi

¹ Eejatzi naaka, noyemijantzinkarite, tee nokantzimi kimitakimi kemi-jantaperotzirori Ishire Tajorentsi, inta nokantakimi kimitakimi kaari kemi-jantaperotzirori. Tema pikimitaka owakira paapatziyari Jesokirishito, pikimiteeyakarini eentsi. ² Rootaki niyotagaeyantzimirorini paeranı kaari opomeentsitantya. Noshiyakaawentzimiro: okimitzimotakina nrakaakimiro tenitsi; tee nopaeyimirini iwatha, tekira pimatziro powa. Rojatzi pikanta iroñaaka, tekira pimateeyironi. ³ Tekira pikemijantaperotziro Ishire Tajorentsi. Eeniro paamakotawakaeyawoni oetarikapaenı eejatzi pikijawakagaeyakanı, tee pikemijantaperotziro rowaga Ishire. Pikimitakotakari kaari aapatziyeeyaririni Jesoshi. ⁴ Aririka ikantzi apaani: “Naapatziyari Paaworo”, eejatzi ikantzi paashini: “Naapatziyari Apooro”. Tema pikimiteeyakarini kaari aapatziyariri Jesoshi.

⁵ Pamine, ¿tsika ikantaka Apooro? Eejatzi, ¿tsika nokantari naari pikantawakaawenantanari? Naakateeyakini apatziro atziri, omaanta riyooyakina Tajorentsi romperatena, rootaki naapatziyakaantakimiro. ⁶ Okimitzimotakina nopankitziro naari okithoki pajankanekı. Rowaga okithoki oshiyakaawentzirori iñaani Tajorentsi. Paapatziyimaetakawo. Iinja Apooro, kimítawitaka thamaetatsiri, eekiro riyaataki riyotaakimi iñaani Tajorentsi. Omaanta irira rirotaki aapatziyakaaperotakimiro kimitaka ishookakaayitzirorini okithoki. ⁷ Rootaki riraga pankitatsiri eejatzi riraga thamaetatsiri riyotaakiri eechonkiini; omaantaka irira Tajorentsi rirotaki shookakaayitzirorini. Tema raapatziyaki. ⁸ Eejatzi imonkaatawakaaka riraga pankitzirori eejatzi riraga thamaetatsiri. Rootaki imonkaatanteeyaanaririni riraga ashitawori pankirentsip ipinatanteeyaariri. ⁹ Eejatzi okimitaka, nomonkaatatakari Apooro nantzirini Tajorentsi ikowakaeyakinarini. Eerokapaenı poshiyeyakawoni rowani Tajorentsi. Eejatzi poshiyakawo ipanko riwetsikakiri.

¹⁰ Noshiyakaawenteri yotaperotatsiri wetsikirori pankotsi. Ikantakina nokatziyero otzinkampiaeni. Roojatzi paashini atziri wetsikakaakinawori pankotsi. Tema riyooyakina Tajorentsi eejatzi imatakaakina nityaawo nokenkithatakamiro eerokapaenı eejatzi oshekini paashini atziri iñaani Tajorentsi: naapatziyakaakari Jesokirishito. Iinja eekiro riyaatatye riyotaakimi Apooro iñaani Tajorentsi; eejatzi eenitatsi paashini owaagawakimiro. Omaanta okameethatzi aamayawo akompitakarikari ayotaakiriri paashini atziri iñaani Tajorentsi. ¹¹ Oztinkami pankotsi oshiyakari

Jesokirishito, irira oshiyakawori otzinkamipero. Tee añairi paashini oshiyawoni otzinkampanki. ¹² Riraga owaagawakirori, q̄itaka riwetsikantyaawori? Roorika ooro, roorika piraata, roorika mapi shipakiryaaatsiri, roorika inchato, roorika inchashi, roorika kompiroshi: akenkithashiryaakopero-tero oetarika kijoperotatsiri. ¹³ Ari okoñaatanaki iinja aririka ipokae Jeshosi riwetsikayitzirini okameethatatzirika. Okimitaka paamari otaaga inchapanki aawiiro, inchashi, kompiroshi, irira Tajorentsi ikantakowen-teri romperanawo oetarika rantakiniriri aririka rantakiro kameethatatsiri rooma rantakirorika kaari kameethatatsi. ¹⁴ Aririka okameethatap-erote anteeyenirini, oshiyakawo kijoperotatsiri awetsikantayitaworini; ar-itaki kameetha ipinateeyakaeni. ¹⁵ Teerika okameethatzi antayitakirini, okimityaawo awetsikantakawo kaari kijotatsini; otaanakya irowa os-hiyakaawentakae tee antaperotziniri Tajorentsi kameetha. Aririka aw-ijakotawitakya, omaanta tekatsi jeekimotaneeni apatziro aaka owawi-jakotyaya. Tekatsi okantya ipinate.

¹⁶ Tema aakateeyakini oshiyakawori Tajorentsipanko ijeekantari Tajorentsi. Tema eejatzi okimitaka ojeekanteeyakaeni Ishire. ¹⁷ Eerorika pikamintheeri ijeekantari rirori, eero eejatzi ikaminthayimi eerori. Okameethaperotzi ijeekantarira: tema ijeekantatziumi eerokapaeni pajankanek.

¹⁸ Eero pamatawitashita eeroka apaniroeni. Aririka pikaateeyirini iitawitachari riyoperotzi oetarikapaeni, aritaki pikantakaaperota tee okameethatzi iroka. Aririka pikantakaaperotyaawo piyotayitzirini, eero riyotakayimi Tajorentsi. Omaanta pikanteririka: “Tee niyotzi naaka, piyoteena”, aritaki riyotaaperotakimi. ¹⁹ Itheenkakiri Tajorentsi okaatzi riyotayitawitarini atziripaeni jaka kipatsiki. Tema aritaki rojankinatziteetani: “Riraga iyotayitawitaririni iitawitaka tekatsi ayerini, omaanta omapokapaakiri owashironkagaantsi owamaakiri. Eejatzi ikimiteeyakani maawaeni kantakaaperowenteeyaworini riyotayitzirini: romapokapaakiri Tajorentsi, rowashironkagaeyerini”. ²⁰ Eejatzi rojankinatziteetani: “Riyotzi Awinkatharite tee okameethatzi ikenkithashireeyakirini yoperotawitachari”. ²¹ Eero pikantakaaperotashitari atziri, tee okameethatzi. Riwetsikaeyakimirorin Tajorentsi maawaeni jeekayitatsirini piweshiryaaawenantyaawori roori. Rootaki nukanantzimiri: ²² “Rotyaantakina Tajorentsi namitakoeyantemirini, eejatzi rotyaantakiri Apooro eejatzi Peetero rirori, maawaeni ramitakoeyantemirini. Riwetsikaeyakironi maawaeni jeekayitatsirini kipatsiki, aweshiryaaawenantyaawori. Añaatsimirika piweshireeya, pikamakirika eejatzi piweshiryaaanakya. Piweshiryaaawentyaawo jeekayitatsirini iroñaaaka, eejatzi jeekayitatsirini iinja”. ²³ Tema pikempiyamintheeyakarini Jesokirishito, riweshiryaaawentakimi. Eejatzi okimitaka, irira ikempiyamintatakari Pawa Tajorentsi, rootaki eeroka pikempiyamintheeyakarini Pawa. Tema riweshiryaaawentakari rirori eejatzi eerokapaeni”.

4

Rantayitakirini Rotyaantanewo Tajorentsi

¹ Iroñaaaka piyoteeyakinani naaka romperanari Jesokirishito. Omaanta rotyaanteeeyakinani nokamantayitenirini atziripaeni iroka kaari riyotawitarini paerani: okaatzi rantakiri Tajorentsi. ² Aritaki okameethaperotaki nokyaaryooowentenirii oetarika ikowakaakinari, eero namatawitziri. Eejatzi okimitaka, maawaeni antziniriri Tajorentsi

okameethatzi ikyaaryoowenteniri okaatzi ikowakaakiriri. ³ Tee nokenkithashiryaaapiintawo oetarika pikantakotashiteeyanarini, eenitatsirika nantakiri; eejatzi tee nokenkithashiryaaapiintawo oetarika kantakotashiteeyenarini paashini atziripaeni. Eero nokantakota naaka, tee nokantzti: "Nokameethatzi". ⁴ Nokenkithashiryaaaka naari tekatsi nantani, omaanta eero nokantashita: "Kameetha nantakiro maawaeni". Intakya Awinkatharite rirotaki kantakowentenani rirori, okameethatakirkira oetarika nantakiri. ⁵ Rootaki iroñaaka nokamanantemirori: iroñaaka tee okameethatzi akantakotashityaari paashinipaeni: "Eenitatsi rantani"; iinjakya ari ayotaperoyeanakini. Aririka ipokae Awinkatharite, ikitejitatokatapaakiro maawaeni okaatzi manawitachari iroñaaka tsiteniriki. Roñaagaero oetarika akowaperoyeyirini maawaeni ajankaneki. Akameethatzirika ari ikanteeyeen Tajorentsi: "Kameethatakimi".

⁶ Pamine, noyemijantzinkarite, naaka kenkithatakotacha, eejatzi nokenkithatakotziri Apooro piyotanteeyenarini eero piñaakoweenkatashitantari atziri. Aririka pikante: "Nonintaperotziri irinta", paamawentyaawo pimanintzirikari paashini. ⁷ ¿Itakama pikantakaaperotakari kimitaka panaakotakiri paashini atziri? Tema Tajorentsi pashiteeyimiorini maawaeni jeekimoteeyemirini. Iroñaaka ¿itakama pikantakaaperotantari, kimitaka tee ipashitzimiro?

⁸ Pikimitakotawitakari ashaagantachari: piiashiteeyawitakani piyoperoyini; tee pikowaeyini riyotagaeyemini. Piashiteeyawitakani eeroka-paeni jewaperowenantsirii, pimanintakina naari. Pikimitakaantakina naaka patzrite. Jaa, nokowawitaka peewawenantaperoyeanakinimi, atsipatawakayaami eewawenanteeyenimi. ⁹ Ari nokaateeyakirini paashini-paeni rotyaantanewo Jesoshi, tema pikimitakaanteeyahitakinani onampirentsipaeni: pimaninteyakinani. Eejatzi okimitaka rajaryaagaetakina rowamagaetena; ramineeyakinani maawaeni: ronampiri Tajorentsi eejatzi atziripaeni. ¹⁰ Noñaaperotakiri Jesokirishito ikameethatzi, rootaki pikanteeyantanarini: "Tee piyotzi". Omaanta pikenkithashiryaaashitaka paapatziyeeyakarini kameetha rirori, rootaki pikantanar: "Niyoteeyakinimi naari". Pikanteeyashitani: "Tekatsi imatzimaetya riraga Paaworo, osheki amateeyakironi aaka". Osheki piñaaperotashita eeroka apaniroeni pikameethatzi, omaanta naaka pimaninteyakinani. ¹¹ Osheki aapiintakinani notashe, aapiintakinani nomiri, shipaakowaetakina nothaariki, ipajapajaapiinteetanani, nokinakinayitakini; roojatzi iroñaaka. Tekatsi nashi nopanko nojeekantyaari. ¹² Nokantatyaaani nopomeentsitapiintakawo nantawaetzi nakoki. Aririka ikijeetakina, nokantziri Tajorentsi: "Pikaminthayeri riraga kijakinari". Aririka ikijaperopiinteetena, eero nopyatari. ¹³ Aririka itheeyakoteetakina, kameetha nokenkithawae-takaawakiri. Kyaaryo, ipinkaetakina, ikimitakaanteetakina kaagashi, ikanteeti: "Tee ikameethatzi Paaworo".

¹⁴ Tee ro nojankinatantzimirori iroka nopashiwentakagaeyemini, omaanta nokimitakaantakimi eeroka neentsitepaeni nonintaperotziri; nokowaki nokaminthayemi, nokaminaantemiri kameetha. ¹⁵ Omawitya eenitatsi oshekiperoroña yotagaeyakimiorini iroka kameethatatsirii okantakotziri Jesokirishito, omaanta tee ijeeki osheki ashitzimirini. Pamine, nokamanteeyakimironi iroka kameethatatsiri paapatziyantakariri Jesokirishito, rootaki apaniroeni naaka nokimitakaanantakimiri eeroka notyomipaeni, nishintyopaeni. ¹⁶ Rootaki nokanantaperoyeyantzimirini: "Poshiyakotaperoyeyenawoni". ¹⁷ Rootaki notyaanantzimiriri Temoteeyo, nokimitakaantakari notyomi nonintaperotziri. Ikyaaryoowentakiniri Awinkatharite oetarika rantziniriri. Ikenkithashiryaaakayemiro

tsika okantari nokamantakotapiintziri Jesokirishito, tsikarika janta ipiyotawenteeyarini.

¹⁸ Apaanipaeni pikaateeyinira ikantakaaperoeyakan, tema iitakaashitawitaka eero niyaatashiteeyimini naari. ¹⁹ Omaanta ikowakaakinarika Awinkatharite, nokowaki intsipaete niyaatashiteeyemini. Eero naapatziyashitapaakawo ikantayitzirini riraga kontakaaperotachari, omaanta niyotapaaki naari eenirorika imatakaakiriri Tajorentsi. ²⁰ Aririka reewawentakae Tajorentsi, eero añaawaetashiwaetawo inta antaperoeyeroni kameetha okaatzi ikowakagaeri. Tema irira rirotaki amitakotakaerai. ²¹ ¿Oetaka pikowaeyakirini? ¿Pikowaeyakinima nareetemi nowashironkaemi? ¿Rooma pikowaeyirini nareetemi noneshironkaperoeyapaemini?

5

Itsipatayitakarini aapatziyariri Jesoshi kaari kameethatatsiri. Pookeri

¹ Ikamanteetakina pikaateeyakirini ayirori iyashiyani. Raayiteeroni shirampari rinirothori raawitarini iriri. Tekatsi kimityaarini: riraga kaari yoterini Tajorentsi eero rayiro raawitari iriri. ² Omaantakya eeroka pikantakaaperoeyakan kimitaka kameetha paapatziyari Jesoshi. ¿Itaka kaari powashiretakontari okaatzi rantakiri rirori? Roojatzi aririka pipiyotawenteeyarini Tajorentsi, piyotemi tee okameethatzi pishinetziri ipokajeempiyaashitapaea rirori. ³ Tee nokaateeyawitzimini, omaanta nokenkithashiryaaekoeyakimini. Okimitzimotakina aririka nojeekimoteeyawitakimini, nokantzimiri tee okameethatzi rayero iyashiyaniapaen. ⁴ Itajorentsiperotaki Awinkatharite Jesoshi, riro matakaakinawori nokantakowenantariri riraganki. Aririka pipiyoteeyani piyoteeyeni nokenkithashiryagaeyakimini naari. ⁵ Pishineteri Jatanaashi raanakiriita, rowashironkaeriita. Roojatzi aririka ikenkithashiryagaeya, ari rawijakotee paata ipokaerika Awinkatharite Jesokirishito.

⁶ ¿Itakama pikantakaaperotantari? Tee okameethatzi. Noshiyakaawen-temiro. Tema piyoteeyini ojeekirika tapiyakaawori paa eechonkiini, otsichaagantanakawo maawaeni paa, otapiyakagaeyakawoni maawaeni.

⁷ Pookeria riraga noshiyakaawentakimiri tapiyakaawori paa, pikimiteeyantyaaworini paa owakirori, kaari tapiyacha. Eerorika pookiri, poshiyakotanakarikari rirori. Naakiro, rowamagaetakiri Jesokirishito, roshiyakari owisha rowamaantapinteetariri rowaga kitejitsiris rawijantakari paerani ronampiri Tajorentsi janta Ejiipitoki. ⁸ Iroñaka, aririka aweshiryaaawentyaari Tajorentsi, thame akameethatanaki: eero amatawitantzi. Eero akija, eero antapiintziro kaari kameethatatsi.

⁹ Nojankinatantawori paerani, nokanteeyawitakimini eero pitsipatari mayempitzirori tsinani kaari rayi. Eejatzi eero pitsipatawo mayempitziriri shirampari kaari aysi. ¹⁰ Tee nokenkithatakotziri kaari aapatziyariri Jesoshi mayempitzirori kaari rayi, riraga kowaperotzirori tzimimotayitziririni atziripaeni, amatawitantatsiri ikoshite, kenkithatakaaawitawori riwetsikashitayitarini atziri. Tee nokantzimi: "Eero pitsipatari kaari aapatziyariri Jesoshi". Tekatsi pikanteeyani pookawakaya, tema pikantyaani piñaapiinteri ijeki jaka kipatsiki. ¹¹ Omaanta nojankinatakotziri riraga kantatsiri: "Naaka piyemijantzinkarite". Omaanta eeniro imayempitziro tsinani kaari rayi, eero kijokiro powaeyirini. Eejatzi pikimiteeyirini riraga kowaperotzirori rashitayitarini paashinipaeni, eejatzi kenkithatakashitawori riwetsikayitzirini atziri, ikowawita ipeyiromi iitajorentsite, theeyawaetashitachari atziri, eejatzi shinkitzinkari eejatzi amatawitziriri atziri ikoyi ikoshiteri.

Aritaki nokantakimi, eero pitsipatari rirori eejatzi eero poyimotari. ¹² ¿Arima pikantakotakiri tsika ikantyaaka kaari aapatziyarini Jesoshi? Eero. Omaanta pimateri irira pikantakowenantyaariri riraga piyemijantzinkarite. ¹³ Omaantakya Tajorentsi rirotaki kantakowenterini kaari aapatziyariri Jesoshi. Iroñaaka pookaeyeerini riraga kaari kameethatsiri pitsipateeyawitakarini: eero piitakashitari raapatziyakari Jesokirishito.

6

¹ Aririka pikjakiri piyemijantzinkarite, ¿okameethatzimotzimima pawentaapaakyaaari kaari aapatziyari Jesoshi ikantakotantemiri tsikarika pikanteeyaari? Teewee. ¿Tema okameethatem i pawentaapaakyaaarimi irira piyemijantzinkarite? ² Tema piyotzi riraga aapatziyariri Jesoshi rowameethatziri Tajorentsi imatero ikantakowenteeyantyaaririna maawaeni atziri, tsikarika ikanteeyaarini. Aririka pikantakowenteeyerini iinja maawaeni atziri, ¿ilitakaya kaari pimatantawo iroñaaka pikantakowenteeyerini piyemijantzinkarite? Tema aritaki pimatakiro pikantakowentawakaya. ³ Tema piyotzi akantakowenanteeyerini iinja ronampiri Tajorentsi rinawita tsikarika ikanteeyaarini. Akantakowenteeyerinrika rirori, ¿eeroma pimatziro pikantakowenteeyerini iroñaaka atzritzinkari eerori? ⁴ Eenitatsirika iroñaaka pikijawakaawentari, okameethatz i piiteri paashini piyemijantzinkarite, ninkarika, ikantakowenanteeyemirini tsikarika pikanteeyaarini. ⁵ Nokantero iroka pipashiwenantyaari. ¿Tekatsima aapatziyariri Jesoshi yoteroni ikantakoteri paashinipaeni tsikarika ikantyaari? ⁶ Omaanta tee apatziro pikjakiri piyemijantzinkarite, tema eejatzi pawentaakari kaari aapatziyariri Jesoshi. Pantzimotakiri kaari kameethatatsi.

⁷ Patsipetashiteeyakawoni pawenteeyakarini kantakowenantsiri riraga kaari aapatziyariri Jesoshi; tema tee ikowakaakimi Tajorentsi pantero iroka. Omaanta kameethatawitachari pimaeritakotero awijashitya: omawitya ikoshiteetemiita. ⁸ Omaanta eeroka tee pimaeritakotiro inta pantashiteeyakawoni: pamatawitantzi eejatzi pikoshitawakagaeeyakan tema ari paanakiri pawentaanikinta kaarinta aapatziyariri Tajorentsi. Osheki pantapiinteyakirini piyemijantzinkarite. ⁹⁻¹⁰ Riraga kaari kameethatatsi eero rareeta janta ipinkatharitzinta Tajorentsi. Tema piyotzi, eero pikompitawo. Eero riyaatzi janta ipinkatharitzinta riraga shirontawori tsinani kaari rayi, eejatzi riraga pinkathatzirori iitajorentsitashitari, eejatzi ñaathatzimotawori iina, eejatzi antatenkatawakaachari ishiramparinkaeteki, eejatzi koshintzi, eejatzi kowaperotzirori rashitayitarini rowaagwo paashinipaeni, eejatzi shinkitzinkari, eejatzi theeyawaetashitachari ratzirkinkaki, eejatzi amatawitziriri ratzirkinkaki ikoshitantariri. Tekatsikya ikanteeya rirori rareeteeya janta ipinkatharitzinta Tajorentsi. ¹¹ Aritaki pikmitayitawitarini. Omaanta rowameethateeyakimini Awinkatharite Jesokirishito, eejatzi Ishire Tajorentsi; rootaki iñaaperotantakimiri Tajorentsi pikameethatzi, reentsitetakimi.

¹² Ikanteetzi: "Okameethatz i nantero oetarikapaeni kaari ithañaakotee Jesoshi", omaanta aririka antashityaawo oetarikapaeni, tee amitakotee maawaeni: tema atsipetashitakaawo antero apaanipaeni. Tee akyoi ametaperotaawo kaari inimotziri paashinipaeni aapatziyariri Jesoshi. ¹³ Eeniro owanawo akemari. Eejatzi eeniro asheetomawo ojeekantari owanawo. Omaanta iinja eero añaagaero owaeyari eejatzi asheetomawo. Ipeyeero Tajorentsi, eero añaagaero jenokinta. Tema atsipetashitawo añaawenaperotawo oetarikapaeni. Tee ro

riwetsikantee amayempitero kaari ayi, intakya riwetsikantakaeri Awinkatharite akenkithashiryaaanteeyaaririni rirori. Eejatzi ikimita, ikenkithashiryaaapiinteyyakaeni aaka. ¹⁴ Eenitatsi itajorenka Tajorentsi, rootaki imatantawori ipiriinteeri Awinkatharite Jesoshi, ejatzi ikimitagae aripaenai: ipiriintanee iinja.

¹⁵ Awathapaeni aari rootaki rako Jesokirishito, ikempita, roki, iitzi, maawaeni. Tema piyotakiro iroka. Aakateeyakinirika iwatha rirori, ¿okameethatzima amayempitero tsinani ñaayitziririni paashinipaeni shirampari? Tema okimiwitaka amayempitakaakiri Jesoshi tsinani. Teewee, tee ari okantakotya: tee okameethatz. ¹⁶ Aririka imayempitziro shirampari tsinani, okimitzimotakari Tajorentsi raaperotakiro. Tema piyotziro. Rojankinateetzi, ikanteetziri: “Apite ikaatawitan shirampari eejatzi tsinani, omaanta aririka raawakakya apaani ikantanakya, tee okameethatz rookawakagaeya”. ¹⁷ Omaanta aririka akempiyaminthatakari Awinkatharite, tema apaani akanta ashireki.

¹⁸ Eeroka pimayempitziro kaari payi, eeroka pimayempitziri kaari payi. Oetarikapaeni paashini kaari kameethatatsi pantayitakirini, powashironkaakiri paashinipaeni pisheninka; omaanta riraga mayempitzirori paashinipaeni tsinani, rowashironkaakiro iwatha rirori apaniroeni. ¹⁹ Tema piyotzi ojeekantakawo piwatha Ishire Tajorentsi. Rotyaantakimiro Tajorentsi kijokiro owantakimiri. Tee eeroka iroñaaka jewawentashitachani, inta riraga Tajorentsi jewawentzimiri. ²⁰ Rowawijaakoetanteemiri osheki opomeentsitzimotawitakari: tema rotyaantakiri Itomi ikamawentakae, rapaatawentakaero rira ipinawenantakaerori kaari kameethatatsi antakiri. Iroñaaka, oetarikapaeni pantayitakirini, pantakiniri Tajorentsi, iñaaperotanteetyaariri irira ikameethatz.

7

Ikenkithatakotziri aatsini iina

¹ Ari chapinki pojakinatantakinari, eenitatsi pojampitakinari piyaaritateki: okameethatzirika payi piina, piimi. Iroñaaka nakemi. Kyaaryootaki okameethataperotzi eero payi piina. ² Omaanta aririka pijejerashitya, kyaaryooawa pimayempitzirokari tsinani kaari payi; eejatzi tsinani, kyaaryooawa omayempitzirikari shirampari kaari ayi. Rootaki okameethatantari paaperoteroota piina, eejatzi aaperoteriita tsinani oemi. ³ Okameethatzirishi shirampari imatero iina, eejatzi okimitya roori oshinetayaara oemi. ⁴ Iina eero eewawentziro owatha roori apaniroeni, inta eejatzi reewawentziro owatha oemi. Eejatzi ikimitya rirori oemi, eero reewawentziro iwatha rirori apaniroeni, inta eewawentziro iwatha iina eejatzi. ⁵ Eero pithañaapithatawo piina; eejatzi tsinani, eero pithañaapithatari piimi. Omaanta aririka pikantawakaya: “Eeroota añaaminthatawakaa ajejerashitawakya apanipaeni kitejiri; iyotyaata amaneri Tajorentsi”, ari kameetha okanta, omaanta aririka omonkaatapaeya roojatzi pimatanteeyaa wo eejatzi. Pamine, eerorika papiltziro rantakaemirokari Jatanaashi kaari kameethatatsi. ⁶ Tee nokantaperotawitzimi: “Paye piina”, omaanta pikowakirika paye, okameethatz. ⁷ Nokowawitaka pikimiteeyenanimi naari,* omaanta rinashitakagaeyakaeni Tajorentsi, tee amonkaatawakagaeyani. Irika apaani, eeniro imatakaakaeri. Irira paashini, inashita imatakagaeyakaerini rirori. ⁸ Riraga kaari aatsi iina, eejatzi kamaentsiri iina, nokamanteeyemini: kameetha pikimiteeyenani

* 7:7 Tekatsi Paaworo iina.

naari, pijkeekashitya. Eejatzi okimitya tsinani, kameetha ojeekashitya roori.⁹ Omaanta eerorika pimatziro pijkeekashitya, kameetha pagae ejatzi. Kameetha paye, tee okameethatzi pikowawaetashitya paye. Eejatzi okimita tsinani, tee okameethatzi okowawaetashitya ayeeta.

¹⁰ Iroñaka nokaminaaperoterotero aatsiri oemi. Tee naaka kaminaaperoteron inta Awinkatharite: tee okameethatzi pookaeri piimi. ¹¹ Aririka pookaeri, pijkeekashitaperoteeyaa. Eerorika pijkeekashita, papiiteeri pagaaerii ejatzi piimentawitarri. Eejatzi okimitaka, tee okameethatzi rookaero shirampari iina.

¹² Iroñaka nokamanteri paashinipaeni, tee riro Awinkatharite kamanterini: eenirorika ayemijantzinkarite iina kaari kemijantatsini, aririka okowaki aaperoteri, tee okameethatzi rookaero. ¹³ Eejatzi tsinani, rirorika piimi kaari kemijantzinkari, aririka ikowaki kijokiro rowaperotemi, tee okameethatzi ookaeri. ¹⁴ Ojeekirika tsinani aapatziyariri Jesoshi, ejatzi oemi tee raapatziyari Jesoshi, irira tee ikimitari theenkantsatsiri; rinashitakari Tajorentsi, ikantzi: "Riotaki oemi aapatziyanari. Riotaki iriri eentsitepaeni. Nokowaperoteeyakirini raapatziyeeyenani maawaenii". Eejatzi okimitaka iina aapatziyanari, teerika aapatziyari Jesoshi roori. Tee okimiteeyawoni theenkinkawo; rinashitakaakawo Tajorentsi, ikantzi: "Rootaki iina aapatziyanari. Rootaki riniro reentsitepaeni. Nokowakaaperotakiro aapatziyena, ejatzi nokowaperotakiri raapatziyeeyenani eentsitepaeni. Aririka rookiro aapatziyariri iina ejatzi rookakontakiri reentsite, eero riyotakoteeri eentsitepaeni Tajorentsi. Omaanta eerorika ashitariri rookiro iina, eeniro riyotaakotziri Tajorentsi". ¹⁵ Teerika okemijantzi iina ayemijantzinkarite, okowakirika ookaeri, ari okameethatzi ookaerii. Eejatzi oemi ayemijantzinkawote, teerika raapatziyari rirori: ikowaerika rookaero, ari okameethatzi rookaerooota. Tekatsi iroñaka kanterini shirampari ayemijantzinkarite kijokiro rowantyaawori rowaga kowatsiri ookaeri. Eejatzi okimityaari tsinani aapatziyariri Jesoshi aririka ikowaki oemi rookaero, tekatsi kanterini kijokiro owantyaawori. Tee ikoyi Tajorentsi akijawakagaeyaani. ¹⁶ Tsinani, aririka kijokiro moyiri piimi kaari aapatziyariri Jesoshi, tee piyotzi aririka powawijaakotakaanteeri. Eejatzi pikimtaa eerori, shirampari: aririka kijokiro moyero piina kaari aapatziyariri Jesoshi, tee piyotzi aririka powawijaakotakaanteero.

¹⁷ Aritaki riyoyagaeyakimini Tajorentsi. Kameetha panteeyenirini Awinkatharite oetarika ikowakaemiri eerori. Rootaki nokanteeyakiririni maawaenii aapatziyariri Jesoshi tsikarika ipiyoteeyakani.

¹⁸ Paerani riyoyagaeyakimini Tajorentsi. ¿Pitakawoma pitotonatziro pishiramparitantarri? Aritapaaki, pipeyakotero. Eeroka paashini, teerika pitotonatziro, eero pikoyi iroñaka pitotonatero, ataama.

¹⁹ Aririka pitothowawityaawo pishiramparitantarri, tekatsi okantemiiowawijaakotemi. Eejatzi okimita, teerika pitotonatziro, tekatsi okantemiiowawijaakotemi. Ro kameethaperotatsiri anteri akemijantaperotero ikanteeyeerini Tajorentsi. ²⁰ Tsikarika pikanteeyawitani paerani riyoantakimiri, aritaki pikantyaari. ²¹ Riyoyaantakimiri Tajorentsi, ¿eerokarika ipimanteetziri? Eero pikenkithashiryaashitapiintawo. Omaanta ishineteemirika pipinateeyaa amanantawitzimiri, okameethatzi pishitowanee.

²² Riyoyaantakimiri Awinkatharite, eerokarika pimantaarewo paerani pinawita, ari iroñaka okimitaaka riraga Jesoshi ipakaakowenteemi. Tema rowawijaakotzimi. Eerokarika kaaririka pimantaarewo pinawita riyoantakimiri, iroñaka okimitaka ramananteemi Jesokirishito, iroñaka ikantemii rirori oetarikapaeni

pantayiteniririni. ²³ Kimiwitaka ramanantakimi irira, osheki piwinawo. Rooma osheki ipomeentsitawentakimi rowawijaakotantakimiri. Eero pishinetziri atziri ikantzimi oetarika panteri, omaanta panteniri Tajorentsi oetarika ikowakaakimiri. ²⁴ Rootaki, noyemijantzinkarite, nokamanantzimirori iroka: tsikarika pikanteeyawitani paerani riyoantakimiri, aritaki pikantyaari; omaanta kijokiro powanakiri Tajorentsi.

²⁵ Iroñaaka nokenkithatakotero kaari shinetaariri shirampari, eejatzi kaari matzirori tsinani. Tekatsi ikantaperotena Awinkatharite, inta nokamantemi nokenkithashiryaaari naari. Ineshironkatakina, rootaki kaari namatawitantzimi. Piyoteeyironi iroka. ²⁶ Rooteentsi opomeentsitzimoteeyeeni, rootaki nokenkithashiryaaantakawori iroka. Tsikarika pikanteeyakan iroñaaka, aritaki pikantyaari. ²⁷ Paakirika piina, eero pookaero. Pijeekashitarika iroñaaka, eero pikoyi paye piina. ²⁸ Aririka paye piina, okameethatzi: tee pantziro kaari kameethatatsi. Eejatzi aririka aye oemi rowaga kaari shinetaariri shirampari, kameetha: tee antziro kaari kameethatatsi; omaanta osheki pikemaatsiteeyaani. Aririka payi, osheki opomeentsitzimotaperoeyakimini. Tee nokoyi opomeentsitzimotemi, rootaki nokanantzimiru: "Eero payi iroñaaka".

²⁹ Iroñaaka nokamantemi, noyemijantzinkarite: eero ojamanitzi ipiyanteeyaaari Awinkatharite. Kyaaryoowa, rookakaashiteetemirokari pantayitawitanaririni Awinkatharite ikowakaemiri. Eenirorika piina, omaanta pikyaaryooventeniri riraga Tajorentsi ikowakaakimiri.

³⁰ Aririka petakowaetya, aririka pikimoshirewaete; omaanta eero pikenkithashiriilo inta pikyaaryooventeniri Awinkatharite panteniri. Aririka pamanantayiteni oetarikapaeni, omaanta eero ojamanitzi pifiiro pamanantayitawitarini. ³¹ Eero ojamanitzi piwesiryaaawentawityawa jeekayitatsirini kipatsiki, roojatzi eero pimatziro piwesiryaaawentyawa. Kameetha pijeekawita iroñaaka, eeniro pameteeyakarini, omaanta inashitayitanakaani maawaeni añaayitzirinika kipatsiki; iinja opomeentsitzimoteeyemini.

³² Nokowaki eero pikenkithashiryaaapiintanakawo. Riraga jeekashitachari, ikenkithashiryaaapiintziro ikowayitzirini Awinkatharite, ikowaki ikimoshiryaaakayeri irira. ³³ Omaantakya riraga aatsiri iina, ikenkithashiryaaapiintziro maawaeni rantapiinteyirini atziri eejatzi okaatzi awijimotziriri jaka kipatsiki: ikowaki ikimoshiryaaakayero iina, ³⁴ osheki ikenkithashiryaaayitakawoni oetarikapaeni. Rowaga tsinani jeekashitachari eejatzi kaari shinetaariri shirampari: osheki okenkithashiryaaagayeroni ikowayitzirini Awinkatharite, okamantakiri: "Oetarika pikowakaenari, ari nomatakimiro. Oetarika pikowakayenari nokenkithashireyaari, ari nokenkithashireero". Omaanta rowaga aatsiri oemi okenkithashiryaaatziro maawaeni rantapiinteyirini atziri, okowaki okimoshiryaaakayeri oemi. ³⁵ Rootaki nokamanteeyantzimirorini iroka, nokowaki namitakoeyemini, tee nokoyi nopomeentsitakaemi. Nokowaki kameetha pijeekaeveni, eejatzi piyoteeyini panteeyenirini Awinkatharite oetarikapaeni ikowakayemiri.

³⁶ Pamine, eenitatsirika pishinto kaari shinetaariri shirampari, aririka pifiakiro antawotaki, pikoyi iroñaaka paakayero oemi; ari kameethataki. Ayeeta, eero añairo pantani. ³⁷ Aririka pikowaperote pithañeeyawo ari kameethataperotaki, eero pikemijantashitari riraga ashiryaaayitemirini, omaanta pantero pikowaperotziri eerori, oetarika pikenkithashiryaaari, okameethatzi. ³⁸ Naakiro, aririka paakayero pishinto, okameethatzi;

omaanta aririka pithañeeyawo, okameethaperotzi. ³⁹ Aririka aye tsinani oemi, ari kijokiro owanakiri, roojatzi ikamakotaki. Aririka ikamaki, ari oshinetaantsiteya agae paashini oemi okowaperotzirika. Omaanta apatziro agae aapatziyariri Awinkatharite. ⁴⁰ Aririka okanteetatyeyaaani ojeekashitya, nokenkithashiryaka okimoshireperotanaki. Ari naamaaka riyotaakinawo Ishire Tajorentsi iroka nokamantakimiri.

8

Iwatha rowamagaetzinirori riwetsikashitayitarini iitajorentsitsashitari

¹ Iroñaaka nakemi tsika pikanteriri iwatha rowayitzinirorini riwetsikashitayitarini iitajorentsitsashitayitarini pojampitakinaga chapinki. Itakayitawitakanati atziripaeni ryotaperotzi tsika ikanteriri iwatha. Omaanta, aririka ayotashitya, akantakaaperotakari. Tee ikowakaaperotee Tajorentsi ayowaetashtitya, inta ikowakaaperotakae anintashireperotawakaeyani ayotaperotawakaantyaari ajeekanteyari kameetha. ² Eenitatsirika iitakaawitachari ryotzi okaatzi kameethatatsiri rantero, apaniroeni ramatawita: tee ryotaperoyini. ³ Omaanta aririka anintaperoteri Tajorentsi ryotagaeyeeni irira. ⁴ Pojampitakowentakiri iwatha rowaetakinirori iitajorentsitsashitari riwetsikayitzirini. Ari ayoteeeyini tee otajorentsitsi riwetsikashiteetari. Apatziro ijeki apaani Tajorentsipero, tekatsi paashini. ⁵ Eenitatsi jeekayitatsirini janta jeñokinira eejatzi jaka kipatsiki iitajorentsitsashitayitarini atziri. Eenitatsi osheki iitajorentsitsashitayitarini, osheki iwinkatharitepaeni. ⁶ Ayoteeeyakini aaka apintzi Tajorentsi, riraga Pawa. Tema rajaryaakawo riwetsikoro maawaeni añaayitakirinka eejatzi aakapaeni. Eenitatsi eejatzi apintzi Awinkatharite: riraga Jesokirishito, wetsikaeyakirorini maawaeni jeekayitatsirini eejatzi aaka.

⁷ Omaanta eeniro ayemijantzinkarite kaari yoteeyirorini iroka nokamantakimiri. Paerani rameteeyawoni apaanipaeni ikenkithatakawitawoni riwetsikashitayitarini atziripaeni. Aririka rowakarini iwatha rowamagaetzinironi, iitawitakarini ashiperi riraga iitajorentsitsashitayitarini. Tee ryotawita; aririka rowashityaari iroñaaka iwatha rowamagaetzinirori riwetsikaetziri, osheki ikenkithashiryaaanakya, iitakawita tee okameethatzi royaari. Roshiyakaawitakawo rantakiro kaari kameethatatsi. ⁸ Aririka oyaari iwatha, eero ikijawenteeri Tajorentsi. Oyaaririka, tekatsi ikantee. Atzityaaririka, eero rowameethashireetee. ⁹ Kameetha poyaari, omaanta kyaaryoowa pantakaerikari kaari kameethatatsi riraga kaari yotatsi. Omaanta pishineteri royaariita iitarkapaeni ikoyiri. ¹⁰ Ifneemirika kaari yotatsi powaka janta opankoki iitajorentsitsashitayitarini, ikantzikari: "Riyotzi rirori. Nokimityaariita noyaari naari iwatha rowamagaetzinirori iitajorentsitsashiteetari". Rootaki rowantakawori omawitya ikenkithashiryakotawori: "Tee okameethatzi noyaawo". Rootaki ipakaaganantakawori royaateri Jesokirishito. ¹¹ Piyotaperotzi okameethatantari poyaari. Omaanta rirori, tee ryotzi. Aririka rowashityaari, osheki ikenkithashiryaaanakya: "Teerika okameethatzi nantakirika, eeniro iroñaaka nantani". Aririka rookaero royaatzirira Jesoshi rootaki riyaatantyaari paamariki kaari tsiwakanitatsini. Omaanta rirotaki piyemijantzinkarite, ikamawentakiri Jesokirishito. ¹² Tee okameethatzi pantakiri. Tema ikantakae riraga Jesoshi: "Pinintaperoyerini pisheninka, eero pantakayiri kaari kameethatatsi". Aririka pantakiro iroka, tema pantzimotakiri Jesokirishito. ¹³ Rootaki nokanantzimiri: aririka nowakyaaari iwatha, nantakaakiri

noyemijantzinkarite kaari kameethatatsi, eerowa napiiteeri nowari iwatha eejatzi. Nantakaerikari kaari kameethatatsi.

9

Ikantziri Paaworo: "Pikimiteeyenani naari"

¹ Tema ishinetakina Tajorentsii oetarikapaeni. Tema rotyaantakina. Tema noñaaperotakiri Awinkatharite Jesokirishito. Tema rirotaki matakaakinawori naapatziyakaantakimiri. ² Teerika riyoteeyini paashinipaeni rotyaantakina Jesoshi, omaanta eerokapaeni piyoper-oyekinani rotyaantakina. Tema eerokapaeni naapatziyakagaeyakimirini Jesoshi rowawijaakotantemiri. Rootaki piyotantari rotyaantakina Awinkatharite. ³ Eenitatsi theenkakinari, ikantakowenantakinar, ikantzi: "Tee rotyaantzimi Tajorentsi". Ari eenitatsi iroka nokantawakiriri: ⁴ "Tema okameethataki pamitakotena: pipena noyaari eejatzi nomiri. ⁵ Aririka nokinayitanakini nokenkithatakayaayiterini atziri; eenitatsirikami noena aapatziyariri Jesoshi, tema okameethatzimi notsipatanakyawomi. Aritaki rantapiinteyakironi paashinipaeni rotyaantanewo Jesoshi, eejatzi rirentzipaeni, eejatzi Peetero. Eejatzi okameethatzti ipakiromi owanawo eejatzi omiri. ⁶ ¿Apaniroenima naaka eejatzi Werenawee nopomeentsi twentyaawo nopolinato nowanawo?

⁷ Noshiyakaawentemiro: tema ipinakowentapiinteeetziri joraaro. Aririka apomeentsi twentyaawo apankitziro oowa, tema ari athotagaantero. Aririka ashentapiinti apirapaeni, tema irapiintziro iteni". Rootaki nokantakiriri riraga theenkakinari. ⁸ Nokenkithatakotakiro añaapiinteyakirini, omaanta ¿oetaka okantziri rojankinatzirini Moeseshi? ⁹ Ajaatyta iroka okantziri: "Eero poojopatziri tooro ayiteetziri iyatharekitho aatzikakitzirori teriiko ishaagantyaawori, omaanta pishinetziri roya". ¿Apaniroenima waaka ikenkithashiryaaoktari Tajorentsi? Tee. ¹⁰ Tema eejatzi aakapaeni os-hiyakaawentakae rojankinarin. Iyotagaeyakaeni oetarika anteeyakirini. Aririka atziri ikiyaapanetakiro kipatsi ipankitantlyawori, ikowaki irira raagaantayiteeroni okithoki paata. Eejatzi ikimita riraga shaagakitzirori, ikowaki raagaantayiteeroni okithoki rirori. ¹¹ Pamine, oshiyakaawentaka nopankitakimiro pishireki iñaani Tajorentsi. ¿Opomeentsitzimotzimima iroñaaka pipagaantena noyaari, nokithaayari, oetarikapaeni? ¹² Aririka pipagaantashitayityaarini paashinipaeni, tema okameethatzimi pipagaantakinami naari. Omaanta tekatsi pipena. Paapatziyakawoni paerani iroka kameethatatsiri nokamantakotziriri Jesokirishito. Osheki opomeentsitzimotzimina, omaanta tee nokoyi nookakayemiro paapatziyakarini, rootaki kaari nokowakotantzimini oetarikapaeni. ¹³ Pamine. Riraga antawaetatsiri Tajorentsipankoki ari ipoñaakaapiintawo rowanawo janta, royaari. Eejatzi riraga taakiniriri Tajorentsi piratsipaeni janta aritaariki, rowagaantakaga rirori iwatha ipashiteetariri Tajorentsi rootaki ipantakariri rirori koetyeemotariri. Tema piyotziro aritaki okantakota. ¹⁴ Eejatzi okimita roori, ikantziri Awinkatharite: "Irira kemijantawakiriri okameethatzti ipashityaari koetyeemotariri riraga kenkithatzirori iroka kameethatatsiri". ¹⁵ Okameethawita naagaantemimi oetarikapaeni, omaanta tekatsi nayitemi.

Eejatzi tee ro nojankinatantzimiro pipantenari oetarikapaeni. Nokimoshiretaki tekatsi nokowakotemini; aririkami aakinani notashe, eero eejatzi nokantzimimi: "Pipena noyaari". Ayenaata, nokameeta. Erokya nokowakotantzimi oetarikapaeni. ¹⁶ Aririka nokamantakotero iroka kameethatatsiri rotyaantari atziri ikamawentakiri Jesoshi, tekatsi

nokantya nokantakaaperotya. Tekatsi nokantya nomaeerite, eenitatsi nokenkithashiryaari: "Eerrika nantero, tee nantziniri Nowinkatharite ikowakaawitakinari rootaki rowashironkaantenari".¹⁷ Naakami kowashitachanimi niyotaante, tema ari ipinatenami Tajorentsi. Omaanta tee naaka nokowawita, tema rirotaki omperotakinari.¹⁸ ¿Iroñaaka oetaka ipinatenari? Okameethatawitani nokowakoteeyemini, omaanta tee nokoyi pipinatena. Apatziro niweshiryaawenteeyananakimini naapatziyakagaeyakimirini Jesoshi.

¹⁹ Ipineetenarikami, nopeyakyaami ratzirite pinatenanimi, ikantapiintenami oetarikapaeni nantapiinteniririm. Omaanta nopomeentsiwen-tashiteeyakarini osheki atziri naapatziyakaantariri Jesoshi. ²⁰ Aririka nokaateeyakirini joriyo, nokimiteeyakarini rirori naapatziyakaantariri Jesoshi. Tema irira rirotaki aapatziyawori rojankinarini Moeseshi, rootaki nokimitantakariri rirori, naapatziyakaantariri. Omaanta tee noñaaperotizo iroñaaka rojankinarini Moeseshi, tee nopomeentsitawentawo. ²¹ Omaanta aririka nokaateeyakirini paashinijatzitsiri atziri riraga kaari aapatziyawori rojankinarini Moeseshi, nokimiteeyakarini rirori, naapatziyakaantariri Jesokirishito. Tee nokamanteevirini ikantawitari Tajorentsi paera-niperoroña; inta nokemijantakaaperoteeri ikantziri Jesokirishito. ²² Eejatzzi, aririka nokaateeyakirini kaari maperotzirori raapatziyawo kameetha, nokimitakowitakari rirori, naapatziyakaantaperotakari. Aritaki nokimiteeyawitakarini maawaeni atziripaeni naapatziyakaanteeeyantakaririni Jesoshi apaanipaeni. ²³ Rootaki nokimitapiinanteeyaaririni riroripaeni raapatziyeyantyaaworini iroka kameethatatsiri niyotagaeyakiririni. Eejatzzi naari niweshiryaawentyaawo iroka kameethatatsiri kenkitharentsi amitakoterini atziri.

²⁴ Pamine, tema piyoteeyini ishiyeeyananaki osheki shirampari riyotanteeyarini ninkarika anaakotanteentsini. Ranaakotantaki apaani riraga shiyaperoteenchari, ari ipaetziri iieteziri pereemyo riweshiryaantyaari kameetha. Eejatzzi pikimityaari eerori, pishiyaperotanaki paantyaawori pereemyo. Aririka pishintsiwenteniri ikowakaakimiri Tajorentsi, aritaki paakiro weshiryaakayemini. ²⁵ Rirojatzi aamakowentacha maawaeni kowawitachari ranaakotante aririka ishiye. Rootaki ikaminthaantari rirojatzi imatantyaawori ishiyaperote raantyaawori amantheerentsi. Intsipate opathyai irowa, omaanta iroka amantheerentsi ayeri aka, eero opathaantzi roori, rootaki okameethatantari ashintsitashiperotero aantyaawori kaari pathanitatsi. ²⁶ Eejatzzi naaka tee notzipitzipitayitanakini noshyanaka, omaantakya noshyanaka nomatantawori nanaakotante. Paashini noshiyakaawentemiri kapojawakaachari. Ikapojawakaaperotaka riyotantyaari ninkarika anaakotantsini. Okimiwitaka eejatzzi nokapojaperotziri paashini, tee nokapojashitari; tee nantashitawo naaka oetarikapaeni inta nokyaaryoowentziniri Tajorentsi ikowakaakinari, ²⁷ noshintsitaperotakiniri; nomperata naaka. Osheki nokenkithatakagaeyirini paashinipaeni, tee nokoyi ikantena Tajorentsi paata: "Tee pantaperotanawo nokowakaawitzimiri".

10

Ikenkithatakoyitzirini joriyyopaeni paerani

¹ Iroñaaka, noyemijantzinkarite, nokamantemi piyotantyaari tsika ikanteeyarini joriyyopaeni janta okaankiiyeenta paerani. Otsimankapitheeyakirini menkori ijeekantakawowa Tajorentsi: eejatzzi oteenkaryaaaganaki inkaare antawo, niyanki ranashitanteeyananakawoni

piryaapathatanaki. ² Janta jaawiki menkori, janta inkaareki riyotagaeyakirini Tajorentsi riyoteeyantakarini raapatziyaperoeyakarini paerani Moeseeshi. Tema okimiwitaka ikaawoshitakotakiri Tajorentsi eeniro royaatziri Moeseeshi. ³ Rowapiinteeyakawoni rowanawo ipapiinteeyakiririni Tajorentsi. ⁴ Rirapiinteeyakironi iñaa ipapiintziriri, rowaga shitowaatatsiri mapiki. Rowakiniri Tajorentsi rowaga mapi, oshiyakaawentakiri Jesokirishito, oyaateeyananakiririni. ⁵ Omaanta tee inimotziri Tajorentsi. Tee riweshiryaawenteeyarini osheki riraga atziripaeni, rootaki ikamaeyantakarini janta okaankiityeenta.

⁶ Pikenkithashiryaagaeyeroni iroka piyoteeyantyaarini ikowakaemiri Tajorentsi. Kyaaryoowa, pikimiteeyarinikari joriiyopaeni: pikoyirokari kaari kameethatatsi. ⁷ Eero paapatziyawo iitajorentsitsashiteetari jaka kipatsikika. Tema imatagaantakiro paerani. Ojankinatakani: "Ijeekaeyanakini atziri, rowaeyakanee ejatzi ishinkiteeyakani. Roojatzi ikatziyanteeyanakan, romampagaeyanakan, ejatzi ishironteeyanakawoni tsinanipaeni". ⁸ Kyaaryoowa, akimitakoeyarinikarira aakapaeni: paeran iñaaaminthateeyakironi kaari iina, rootaki ikamanteeyakarini 23.000 atziri apaani kitejiriki. ⁹ Iñaantagaantakari Awinkatharite, riyotantyaari aririka ikijantakyari rantakiri, rootaki rotyaanantakanariri osheki maanki. Roojatzi ratsikanteeeyakaririni, ikamayitakini. Kyaaryoowa, oshiyakotarikarira aakapaeni, añaanttarikari Tajorentsi. ¹⁰ Ejatzi apaanipaeni ikiñaanikowentakiri irira, rootaki rowamaagaanteeyantakaririni riraga ronampiri Tajorentsi. Kyaaryoowa, akimitteeeyarinikari aaka, akiñaanikowenteri.

¹¹ Ro imatantayitakaworini iroka, akenkithashiryaantanakyaari. Rojankinateetzironi, ayoteeyantakarini iroñaka. Rootawiteencha omonkaateeya ipokanteeyari Jesokirishito. ¹² Iroñaka aririka pikante: "Nokantatyeeyaani naaka nokyaaryoowentero naapatziyari", nokantzimi naari: "Paamawentyaaga, pantzirokari kaari kameethatatsi". ¹³ Eeniro akenkithashireeyironi antero kaari kameethatatsi: ashi owaeyironi maawaeni atziri antziro. Omaanta aririka ameentyaari Tajorentsi, ramitakoeyeeni eero anantawo. Ikyaryoowentakae ramitakoperoeyeeni erokya anantawo kaari kameethatatsi akenkithashiryaawitakari.

¹⁴ Rootaki, nonintaperotanewo, nokamanantemirori iroka: "Eerokya pipinkathatziro riwetsikashiteetari iitajorentsitsashitari". ¹⁵ Eeniro piyotantari, iroñaka pikenkithashireeyeroni iroka nokantzimiri. ¹⁶ Aririka akanteri Tajorentsi: "Ariwee, Pawa, eeroka panawori iroka niriri", tema akimitawakaapiinteeyakani, aweshiryaaawenteeyawoni riraa Jesokirishito raa-paataawentakae. Ejatzi aririka akagaapiintziro paa, tema akimitawakaapiinteeyakani, aweshiryaaawenteeyawoni iwatha, akenkithashireeyirini ikamawenteeyakaeni. ¹⁷ Ari okaatzi owapiinteeyarini paa apaani. Ejatzi okimitawita, osheki akaateeyawitani omaanta amonkaatawakagaeyakani, asheninkateeyakarini Jesokirishito: tema apaani ikanta.

¹⁸ Pikenkithashireeyeroni rameteeyakarini joriiyopaeni. Riraga ñaanakowenantatsiri aririka itaakiniri Tajorentsi ipira paashini atziri janta aritaariki, tema itsipatakarira irira ipinkathateeeyakirini rirori, tema ari rowakaakyaari iwatha. ¹⁹ Eenitatsi iroka nojampitemiri: "¿Tajorentsima iroka riwetsikaetzirika?" Kaari. Tema ratsipetashitawo rowapiintziniro iwatha. ²⁰ Eenitatsi iroka nokamantaperotemiri. Eeniro rowakiniri kaari aapatziyariri Jesoshi ipira. Omaanta kaari Tajorentsi rowakiniri, inta kamaari. Tee nokowakayimi pitsipatyari riroripaeni ipinkathateeeyakirini kamaari. ²¹ Aririka pirawenteri Awinkatharite, eero pimatziro pirawenteri

kamaari eejatzi. Aririka powawentyaari Awinkatharite, eero pimatziro powawentyaari kamaari eejatzi. ²² ¿Arima pikowaki ikijimi Awinkatharite? ¿Panaakoeyrinima pishintsitaperotzi? Teewee. Tee panaakoeyirini eejatzi rowashironkaantyaari Tajorentsi ninkarika ameentakotaarini kamaari.

²³ Ikanteetzi: “Okameethatzi nantero oetarika kaari ithañaakotee Jesoshi”, omaanta aririka antashityaawo oetarikapaeni, eero oshintsitakae maawaeni, tema atsipetagaantashityaawo. Kyaaryo amatakiro akoyiri, omaanta eerorika amitakoyerini paashinipaeni atziri ishntsitakayeri rajankaneki, ari tee okameethatatzti antashityaitawityaarini. ²⁴ Eero pikenkithashiryakotapiintziro pikowayitawitarini eerori, omaanta pikenkithashiryakotapiinteri ikowayitziri paashinipaeni, eejatzi ikaatzti amitakoteri. ²⁵ Aririka ipimantayitzini iwatha, poyaari. Eero pojampitakowentziri: “¿Tsika ipoñaaka irika? ¿Rooma rowamagaetzinirori iitajorentsiteetziri?” Aririka pamananteri iwatha, eero pojampitakowentziri, piitzikari aririka poyaari eero pikameethashiryaanaki. ²⁶ Okantzini Iwaperite Tajorentsi: “Irira Awinkatharite ashitayitaworini kipatsi eejatzi maawaeni jeekontakteeyaworini”.

²⁷ Aririka ikaememi kaari aapatziyariri Jesoshi rowakayemi ipankoki. Aririka pikowaki piyaate, powaeyaarinikya maawaeni ipaeyawakimirini. Eero pojampitakowentziri iwatha, eero piitziri aririka poyaari, eero pikameethashiryaanaki. ²⁸⁻²⁹ Omaanta ikanteetemirika: “Eenitatsi irika iwatha, rowaetzinirori iitajorentsitashitari”. Aririka eenitatsi jaga eejatzi piyemijantzinkarite kaari shintsiperotatsi rajankaneki, ari pikenkithashireeri irira iiteri tee okameethatzi royaari, eero powari eerori eejatzi. Omawitya eeroka piyotawitaka tekatsi ikantemi iwatha, omaanta pikaminthayeri riraga kaari yotatsi.

Naamaashitaka eenitatsi kantsini: “Ishinetana Tajorentsi noyaari oetarikapaeni, ¿iitarikya ithañaakotashitantanariri riraga kaari yotatsi?

³⁰ Aririka owapiinteeyarini, akantapiinteeyirini: ‘Ariwee, Pawa, eeroka panaariri nowayitarini’ ”. Aririka apaasonkiteri, ¿iitarikya ikiñaanikowenanteeriri oyaaririka?

³¹ Ari nokamantemi. Aririka powaeyani, eejatzi aririka pireeyeni; omaanta oetarikapaeni pantayiterini, panteniri Tajorentsi ikowakaemiri, riweshiryaawenantemiri. Roojatzikya ikanteeyeni atziri: “Tema ikameethatzi Tajorentsi. Kameetha ijekakagaeyirini aapatziyariri Jesoshi”. ³² Eero pantakayiri kaari kameethatatsi riraga joriyyo, riraga kaari joriyyotatsi, eejatzi aapatziyeeyaririni Tajorentsi. ³³ Oetarikapaeni nantayitzirini, nokoyi namitakoyerini atziri. Tee naaka etakotachani apaniroeni, inta netakotapiinteeyarini paashinipaeni atziri. Ro nomatapiinteeyantanaririni rawijakoeyantakaarini.

11

Antayitzirini tsinani kemijantayitatsirini

¹ Poshiyakotenawo, nokimitaka naari nomonkaatakari Jesokirishito.

² Pikenkithashiryaaapiintakina, eejatzi pikenkithashireero maawaeni niyotapiintakimirini, rootaki noñaaperotantakimir. ³ Eenitatsi iroka, piyotero: riraga Jesokirishito kanteeyiririni atziri oetarika ranteeeyerini; riraga shirampari kanteeyirorini iina; eejatzi riraga Tajorentsi kantziriri Jesokirishito. ⁴ Pamine riraga shirampari, aririka ramaneri Tajorentsi, eejatzi aririka ikamanante iñaani, tee rametawo ipashikayinaty. Aririka ipashikayinataky, tema itheenkatziiri Jesokirishito. ⁵ Omaanta tsinani,

aririka amaneri Tajorentsi, eejatzi aririka okamanante iñaani, opashikapi-intaka. Teerika opashikapiinta, otheenkatziri oemi: okimitzimotakawo ameetakiro oeshi, kimitaka tsinani mayempiro. ⁶ Teerika okoyi tsinani opashikayinaty ari okameethatzi ameetero oeshi. Omaanta aririka opashi-wentakayaawo ameeta, kameetha opashikayinaty.

⁷ Riroma shirampari, eero ipashikayinata: tema ikimiwitakari Tajorentsi, eejatzi ipinkathatziri. Rooma tsinani, oñaaperotziri oemi. ⁸ Paeraniperorona ritakari Tajorentsi riwetsikakiri shirampari. Rootaki imeriki shirampari riwetsikakiniriri tsinani; omaanta omeriki tsinani, tee riwetsikaetziri shirampari. ⁹ Riraga shirampari tee riwetsikawenteetakiniro tsinani, inta rowaga tsinani riwetsikawenteetakiniri shirampari.

¹⁰ Okameethatzi opashikayinaty tsinani riyotanteeyaaarini ronampiri Tajorentsi oñaaperotziri oemi. ¹¹ Pamine, tee ojeekashita tsinani, tee ijeeakashita shirampari. Ikowaki Awinkatharite akoetyaawakagaeyani. ¹² Irowa imeriki shirampari riwetsikakiro tsinani, eejatzi iroñaaka okoñaatapiintziri tsinani otomi. Omaanta Tajorentsi wetsikaeyiririni maawaeni. ¹³ ¿Oetaka pikenkithashireeyarini eeroripaeni? Aririka amaneri tsinani Tajorentsi, ¿kameethama opashikaryaayinaty? ¹⁴ Aakapaeni shirampari, iroñaaka tee ametawo aeshithanthamaeshiteeyini. Aritak apashiwentakya. ¹⁵ Omaanta tsinani, tema añaaperoteeyironi oeshithanthamaeshitzo oeshi: rootaki opashikayinatantari. ¹⁶ ¿Eenitatsima kowatsiri ipiyapiyawaaantetena? Nokamantemi: nameetakawo iroka nokamtakimiri, eejatzi rameeteeyakawoni maawaeni aapatzieeyakaririni Tajorentsi.

Riyotaantziro rowawentapiinteeyarini Jesoshi

¹⁷ Eenitatsi paashini nokamantemiri. Tee noñaaperotziro iroka panteeyirini aririka pipiyoteeyani: tee okameethatzi, tee pamitakotawakaaneenta. ¹⁸ Nityaawo nokamantemiro iroka. Ikamanteetana aririka pipiyoteeyani pipinkathatantapiinttariri Tajorentsi, pipiyawaantetawakagaeyanakaani, tema pikenkithashiryatziro inashitachari. Naamaashita kyaaryo ikamantagaanteetakina. ¹⁹ Pipiyawaantetawakagaeyanakaani piyoteeyantakaririni ninkarika kyaaryoowentaperotzirori raapatziyari Jesoshi. ²⁰ Aririka pipiyoteeyani pikenkithashiryakoteri Awinkatharite, powaeyawitani, tema tee powakoeyarini Awinkatharite kameetha. ²¹ Aririka powapiinteeyani, paganteeyanakanri powanawo eerori, powapithateeyawakaani paashinipaeni. Tee poyaawakagaeyani powantyaari maawaeni. Itasheyaki apaanipaeni, ishinkitaka paashinipaeni. ²² ¿Oetakama jaga panteeyirini? Tema eeniro pipanko powantyaari, pirantyaari. ¿Pitheenkakirma riraga pokashitziriri raapatziyari Tajorentsi? ¿Pishirontawentarima riraga kaariashaagantacha? ¿Tsikama nokantemika? ¿Arima noñaaperotemi? Teewee.

²³⁻²⁵ Irira Awinkatharite iyotaanawori iroka nowaagakimiri. Paerani, tsiteniriki raakaanteeyakirini, raakiro Awinkatharite Jesoshi paa. Ikantziri Iriri: "Ariwee, Pawa, eero ka panawori iroka noyaari", roojatzi ika-gaakiro. Ikantzi: "Eenitatsi iroka paa oshiyawori nowatha: aririka powapiintyaawo, pikenkithashiryapiinteeyenani. Tema naaka kamawenteeyakimiri". Ari rowaeyakawoni. Roojatzi raakiro eejatzi riramento. Ikanteeyirini: "Eenitatsi iroka awishooawaantsi oowa, aririka pirapiinteeyeroni, pikenkithashireeyenani, piyoperoteeyeni apaatawenteeyemini niraaw pawijakaoeyanteeyarin. Aririka nokamawentem, piyotanaki eero namatawitzimi, nomatemiro maawaeni nokamtakimiri". Roojatzi

ranashitantanaka tsiteniriki, roojatzi raanteetakari. ²⁶ Aripaete powapi-inteeyawoni, pirapiinteeeyeroni, piyotaantapiintyaariri atziri ikamawenteeyakaeni Awinkatharite. Pimatapiinteeeyeroni, roojatzi ipokanteeyari.

²⁷ Aririka powawentyaari, aririka pirawenteri, pikenkithashiryaaokoteri: eero pantashitawo. Eeniro rantani riraga antashitawori: itheenkakiro iwatha Awinkatharite, itheenkakiro riraa. ²⁸ Pityaawo piyotakotya eero, eenirorika pantani. Piyotakotyaarika tekatsi pantani, ari poyaawo, eejatzi pirero. Eenirorika pantani ari pityaawo pookaero kaari kameethatatsi pantziri eejatzi pamaneri Tajorentsi ipveyakotemiro pantani, eejatzi pijieki kameetha roojatzi pimatero powawentyaari Jesoshi, pirawenteri. ²⁹ Tee okameethatzi owashiwaetyaawo, eejatzi irashiwaetyaawo. Teerika akenkithashiryaaoperotziri Awinkatharite, tema owashiwaetakawo, irawaatashitakawo: eeniro ojeeki antani; ari rowashironkaae Tajorentsi. ³⁰ Rootaki pimantsiyagaanantayitakarini osheki, eejatzi kaari pishintsitantayitani. Rootaki eejatzi ikamagaantayitantakarini piyemijantzinkaritepaeni. ³¹ Aririka ayotakotakya eenirorika antani, okameethatzi akenkithashireeyaa, eero akumitagaa paerani, ookaero kaari kameethatatsi antakiri; roojatzi ameentanteeyaaariri Jesokirishito, eero rowashironkagae Tajorentsi. ³² Tema eejatzi okameethatzi ikantakowentee Awinkatharite, eejatzi rowashironkae, okantyaatakyaa eeroaatanta paamariki kaari tsiwakanitatsini. Tee ikowakagaeyeeni atsipateeyaaarini maawaeni riraga theenkantatsiri.

³³ Iroñaaka noyemijantzinkarite, aririka pipiyoteeyani powawenteeyarini Awinkatharite, poyaawakawakyaata. ³⁴ Aririka pitasheyaperotaki, pityaawo poya janta pipankoki. Eero pipiyotashiteeyani pikemantyaawori pitashe: eenirorika pantani. Aririka nareetemi nothotyaapaemiro, niyotaayitemironi paashini.

12

Ikenkithatakotziro omatakagaeyakaerini Ishire Tajorentsi

¹ Iroñaaka, noyemijantzinkaritepaeni, niyoteeyemironi maawaeni omatakagaeyakimirini Ishire Tajorentsi. Tee nokoyi pikompiteeyawoni, inta nokowaki piyoteeyawakironi. ² Piyoteeyini paerani tee paapatziyeyawitarini Jesoshi inta pikemijantashitayitawitawoni piwetsikashitayitarini, piitajorentsitsitashitawitari. Tema omajontziteeyakini roori. Pamatawitashitaka eero ka apaniroeni. ³ Nokowaki piyoteeyawakironi iroka. Aririka oñaawaetakaakiri Ishire Tajorentsi atziri, eero ikantzi: "Tee ikameethatzi Jesoshi". Eejatzi okimitaka, eeromi piyoteerimi, eero pikantzimi: "Irira Jesoshi rirotaki nowinkatharite".

⁴ Inashitayitakani omatakagaeyakaerini antawaetziniri Tajorentsi, omaanta apaani Ishire Tajorentsi. ⁵ Inashitayitakani iroka anteeyenirini Awinkatharite, omaanta apaani ikanta irira. ⁶ Inashitayitakani anteeyakinirini Pawa Tajorentsi, omaanta rirotaki irira riyoyaakaero oetarika antayiterini eejatzi ramitakotakae amonkaatero maawaeni. ⁷ Iyotagaeyakaeni Ishire amitakotawakaantyaari kameetha ajeekimotantyaariri Tajorentsi. ⁸ Iyotakaayitakirini apaanipaeni kameetha ikaminaantakariri paashinipaeni; riro paashinipaeni iyotaakaerikameetha riyotaantakaerori paashinipaeni. Okaatzi iyotakaayitziririni apaani: rowaga Ishire Tajorentsi. ⁹ Eejatzi omatakaayitzirini paashinipaeni rameentaperoyakawoni ikantayitzirini Tajorentsi; paashinipaeni omatakaakiri retsiyatatakotayitzirini mantsiyaripaeni. ¹⁰ Eejatzi matakayitziririni paashinipaeni itajonkantayitzini. Paashinipaeni

omatakaakiri ikenkithatakotziro kameetha Iñaani Tajorentsi. Paashinipaeni iyotakaakiri riyotayiterini kenkithatakaantsiri: rirotakirika kenkithatakaeriri kamaari, rooma kaaririka. Paashini, omatakaayitakirini iñaawaacheepookitashitawo paashinijatopaeni paantentsi kaari riyotzi rirori. Paashini eejatzi omatakaayitakirini riyotanakiro kameetha okaatzi iñaawaeteri rirori eejatzi rowaagakaeniro. ¹¹ Inashitayitakan iyotagaeyakaerini, omaanta apatziro apaani iyotagaeyiririni: rootaki Ishire Tajorentsi. Otarika okowakaayitziririni, rootaki iyotaayitziririni, omatakaantakariri.

¹² Pamine: apaani okantawita awatha, omaanta eeniro aetzi, ako, aeki, akempita, maawaeni. Osheki okantawita, omaanta apaani okantawita awatha. Eejatzi ikimita riraga Jesokirishito. ¹³ Apaani okantawita Ishire Tajorentsi. Opokapaoka ojeekanantapaakawori ashire, rootaki asheninkatawakaanteeyantakaririni, okimitakagaeyakaenii apaani akanta. Akaateeyirini joriyyo, paashinipaeni kaari joriyyotatsi; omawitya apaani-paeni pimantaari rinawita, paashinipaeni kaari ipimanteetzi. Kijokiro owaeyakaenii Ishire Tajorentsi: apaani okanta.

¹⁴ Noshiyakaawentemiro. Apaani okantawita awatha, omaanta eenitatsi anashitantari, oerikantari, aminantari, akemantari, osheki inashitapaeni.

¹⁵ Tee okantzi aetzi: "Tee naaka rako, tee naaka iwatha rirori". Kyaaryo aetzi rootaki awatha, tee inashita. ¹⁶ Tee okantzi akempita: "Tee

naaka roki, tee naaka iwatha rirori". Ñaakiro, tema rootaki akempita awatha, tee inashita. ¹⁷ Iyotyaarikami awatha rootaki aminantyaarimi, ñarima amatakiromi akemantyaawomi? Iyotyaarikami akemantyaarimi, ñarima amatakiromi akemaenkatanthaarimi? ¹⁸ Omaanta kameetha riwetsikayitakironi Tajorentsi awatha: akemantyaari, aminantyaari, akatziyatiyawaetantyaari, maawaeni. Otarika ikoyiri, imatakiro.

¹⁹ Iyotakaarikami oki ojeekakimi, ñtsika akantyaakami? ²⁰ Kyaaryo, apaani okanta awatha, omaanta eenitatsi aetzi, oki, akempita, ako, maawaeni.

²¹ Tektsi okantya oki okantero ako: "Tee pikameethatzi". Eejatzi aeto, tee okantziro aetzi: "Tee nokoyimi". Teewee, tee okantziro.

²² Eenitatsi jeekantayiteerini awathakipaeni otarikapaeni, omaanta apaanipaeni tektsi ishintsini aetakaashiwitawo ojeekashita, omaanta okameethaperotaki ojeekayitzini. ²³ Eejatzi ikimita, eenitatsi apaanipaeni apashiwentakaakari, omaanta okameethatzi ojeeki. Akithaatatakotyaawo kameetha tee akoyiro iñaagaete. ²⁴ Tee akithaatatakotawo kaari apashiwentaka. Omaanta kameetha riwetsikayitakironi maawaeni awatha riraga Tajorentsi. Okameethatzi ojeekaeyeni rowaga kaari añaaperotawita.

²⁵ Imatakiro iroka amitakotawakagaeyantyaarini aetzi, oki, maawaeni. Tektsi okanteeyani okijawakagaeyani. ²⁶ Aririka okatsitsaki eechonkiini apaani, ari akemaatsitanakyaawo maawaeni awathaki. Tekatsirika oyeroni awatha eechonkiini tema kameetha akimoshirewenteeyakironi maawaeni awatha.

²⁷ Aakateeyakini oshiyakawori iwatha Awinkatharite Jesokirishito. Aakateeyakini eejatzi oshiyakawori iitzi, rako, roki, ikempita, otarika. ²⁸ Iroñaaka akaateeyakirini osheki aapatziyeyeririni Jesoshi. Reewawentakae irira rotyaantagaantakae apaanipaeni ikenkithate. Paashinipaeni rotyaantakiri ikamanantayitzirorini iñaani. Paashinipaeni rotyaantzi riyotaantzi. Roojatzi paashinipaeni rotyaantayitakirini itajonkantzi, paashini retsiyatakotayitzirini mantsiyatzinkari, paashinipaeni ramitakotziri paashini atziri, paashinipaeni rotyaantakiri ikantayitzirini aapatziyariri Jesoshi otarika rantayiterini, eejatzi paashini

iñaaawaetashitayitawoni paashinijatopaeni paantentsi. ²⁹ ¿Rotyaanteeyakaenima akenkithate maawaeni? Teewee. ¿Akamananteeyinima iñani Tajorentsi maawaeni? ¿Ayotaanteeyinima maawaeni? ¿Atajonkanteeyinima maawaeni? Teewee. ³⁰ ¿Etsiyatakoeyirinima maawaeni akaa mantsiyariipaeni? ¿Amateeyakironima maawaeni ayotayitakironi paashinipaeni paantentsi? ¿Amateeyakironima maawaeni owaagakiniri ashenkina iroka ikantziriri riori? Teewee. ³¹ Omaanta kameetha pikowakotaperoteri Tajorentsi imatakayemiro rooperotatsiri antawaerontsi.

Kameetha anintaperotawakagaeyaani

Omaanta iroñaaka niyotaaperotemiro kameethaperotatsiri.

13

¹ Aririka amatero añaawaetashiwayaawo paashinipaeni paantentsi, eejatzi aririka amatero akemero ipaante ronampiri Tajorentsi, omaanta eerorika anintaperoyeririni paashinipaeni, tema atsipetashiteeyakawoni, ayotashitayitawitakawoni añaawaetzti. Akimitawokari kampana, okantashita, toon, toon, toon. Akimitarikari tampoo ikantašhita, teen, teen, teen. ² Aririka ayotzitayityaawoni kaari iñeetzi, aririka ayotzitakityaawo maawaeni imanayitawiteeni Tajorentsi, aririka amatayitakironi maawaeni ryiotayitzirini atziri Iwaperite Tajorentsi, eejatzi aririka akyaryoowentaperoteri aapatziyaperotyaari Tajorentsi, rootaki amatantyayawori oshirinkayiteroni ochempipaeni: omaanta eerorika anintaperotziri paashinipaeni, atsipetashiteeyakayaawoni ayotashitawitakawo maawaeni, tee iñaperotana Tajorentsi nokameethatzti. ³ Aririka apashitayityaarini ashironkaenkari maawaeni jeekimoteeri, aririka akyaryoowentaperoteri kameetha Tajorentsi akenkithatakoteri, rootaki ikijanteeri atziri, itaawenanteerori; omaanta eerorika anintaperotziriri paashinipaeni, atsipetashiteeyakayaawoni maawaeni, tee iñaperotane Tajorentsi akameethatzti.

⁴ Aririka anintaperoyeririni paashinipaeni, tema amaeritakotashityaawo oetarika awijatsini, akaminthayeri paashinipaeni, eero akiplashiryaaneentashitari rriraga ashagantzinkari eejatzi rriraga jewatatsiri tema pikowawitaka poshiyaari, eero ajagaakotawo, eero akantakaaperota. ⁵ Aririka anintaperoteri paashinipaeni eero akantakaaperota, eero oñaashirenkiri paashinipaeni, eero antashitawo akowaperotziri akaa, inta anteniri ikowakagaeri riori; eero akijiri intsipaete, eero akenkithashiryaapiuntziro kaari kameethatatsi rantayiteetzirini owashironkaakae. ⁶ Aririka anintaperoteri paashinipaeni, eero akimoshirewenziro kaari kameethatatsi ranteeetziri intakya akimoshiryawentero kyaaryooperotatsiri, ⁷ akantani akempoyeeri, akantani kameetha ameentaperotyaari, akantani akenkithashiryaakotari ari rantakiro kameethatatsiri, omaanta amaeritakotashityaari oetarikapaeni ranteri.

⁸ Aririka anintaperoteri paashinipaeni, eero apakaero; omaanta eero akantatyaaani akenkithatero iñani Tajorentsi, eero akantatyaaani añaawaetashityaawo paashinipaeni paantentsi. Eero akantatyaaani ayotashitayityaawo oetarikapaeni, omaantakya akanteetatyeyaaani anintaperotawakagaeyani. ⁹ Tee ayotaperotawitani iroñaaka, akamanantakoteri apatziro okaatzi ayotakotakiriri. ¹⁰ Iinja ipokapaakirika kameethaperotatsiri, eero akowaero iroka kameethatayitawitacharini iroñaaka. Tema ari ayotakiro maawaeni. ¹¹ Paerani eenironi eentsitawitani añaawaetashiywaeta, ayotashitayitarini aari eechonkiini, ayotzi

akenkithashiryaawita eechonkiini. Omaanta iroñaaka antaritapaakika, ookanakiro antzirowa akimiwitakari eentsipaeni. ¹² Iroñaaka kimitaka aminaataktakiri Tajorentsi ñaarontsiki, tee ikoñaataperotzi. Iinja aminapootaperotapaeri jenokinta. Iroñaaka ayoteeyawitarini eechonkiini, iinja ayotaperoeyapaerini, okimitaka riyoperotakae iroñaaka. ¹³ Iroñaaka akantatyani ameenteeyakarini Tajorentsi, ayoteeyakini eero ramatawitee rootaki ayotantari ari aate iinja jenokinta, anintaperotawakagaeyakan. Omaanta kameethaperoteentsiri anintaperotawakagaeyakan.

14

Iñaaetaashitayitaworini paashinipaeni paantentsi

¹ Pikowaperoeyeni pinintaperooyerini paashinipaeni. Ejatzti pikowaperotero pantero maawaeni omatakaakaeri Ishire Tajorentsi, pikamananteeyaaaririni paashinipaeni iñaani Tajorentsi. ² Eenitatsi atziri omapokashitakari iñaawaetashitanakawo paashinipaeni paantentsi. Tee ikemawakiri atziri omaantakya Tajorentsi. Tekatsi atziri kemawakironi ikantziriri. Omanawitaka iroka oñaawaetakayiri Ishire. ³ Omaanta riraga iyotaantzirori iñaani Tajorentsi, iyotaakiri atziri ishindsightakaakiri rajankaneki, ikimoshiretakaakiri, riweshiryaakaakari. ⁴ Riraga ñaawaetashitawori paashinipaeni paantentsi kaari riyotzi, ishindsightiretaki apaniroeni, omaanta riraga kenkithatakotzirori Tajorentsi rashiki ipaante rirori riyotagaeyakirini maawaeni iyemijantzinkarite, ishindsightiretaki irira. ⁵ Nokowawita maawaeni eeroka piñaawaetero paashinipaeni paantentsi, omaantakya nokowaperotaki pikamanantero iñaani Tajorentsi pashiki pipaante. Riraga kenkithatakotzirori iñaani Tajorentsi ranaakotzirori riraga ñaawaetashitawori paashinipaeni paantentsi; tema ramitakotakiri paashinipaeni atziri riyoperotziri Tajorentsi. Omaanta enirorika owaayiniriri iñaani riraga ñaawaetashitawori paashini paantentsi, okameethatzi eejatzti.

⁶ Pamine, noyemijantzinkarite, noñaanatashitapaemirika paashinijatoki paantentsi tema natsipetashitapaakyawomi eero piyotawakiromi oetarika nokantemiri. Nokowapiintaki namitakoeyemini, tema rootaki nokamanantzimirori okaatzi kaari piyotzi apaanteki ashi, rootaki niyotakaantakimirori piyotakotantyaariri kameetha Tajorentsi. Tema nokamantzimiro iñaani irira. Tema niyotaakimi. ⁷ Noshiyakaawentemiro. Tee aña kiina, tee oshiyari atziri. Omaanta ari omatashtakyaawo opaemate aririka ijonkateetero. Aririka apatziro ijonkatashityaawo toot, toot, toot, tee ayotakotziro oetarika mampaantsi okanterimi. ⁸ Pamine, itziwooteetziri joraaro riyotantyaari rooteentsi romanatay, tziiii, tziiii, tziiii. Eerorka opoemaenkatzi kameetha, ¿arima riyoteeyakini omanatachani riwetsikan-teeyarini romanatantyaari? Eero. ⁹ Ejatzti pikimiteeyakawoni. Aririka iñaawaetashitawityaawo kaari ikematheetzi wero, wero, ¿tsika okantyaaka ikemanteetawakyaaworini pikanterimi? Okameethatzi piñaawaetantyaawo ashi apaante akemathatakyaariri asheninkapaeni okaatzi pikanteriri. Tema ari patsipetashitakyaawo piñaawaetashitya. ¹⁰ Jaka kipatsikika eenitatsi osheki paantentsipaeni. Inashitayitakani, omaanta tee ikompiteeyawoni riraga ashitawori ipaante. ¹¹ Omaanta teerika akemaperotziro ipaante ñaawaetatsiri, kaari asheninka. ¹² Tema pikowaeyakini omatakagaeyemini Ishire Tajorentsi, ari okameethatzi pikowaperotaki iroñaaka omatakayemi pamitakoteri piyemijantzinkarite riyotantyaariri Tajorentsi kameetha.

¹³ Rootaki nokamanantzimirori iroka: aririka piñaawaetero paantentsi kaari riyoehti, okameethatzi pikanteri Tajorentsi ramitakotemi

pimatantyaawori powaayeniri piyemijantzinkarite apaante ashi pikantakiriri. ¹⁴ Aririka noñaawatantyaari Tajorentsi paantentsi kaari noñaawaetantari, nokenkithatakaawitakari riori noshireki, omaanta tee niyotziro noñaawaetashitaka. Ejatzti tee namitakotziri paashini atziri. ¹⁵ ¿ilitaka nanteri naari? Aririka namaneri Tajorentsi okameethatzin noñaawaetantyaawo paanteentsi noshireki kaari niyotzi; omaanta ejatzti okameethatzin namaneri nopaanteki nomatantyaari nokenkithashryaakotero okaatzi nokantziri. Aririka nomampaawentyaari Tajorentsi, rooma nomampaantyaaworika paanteentsi noshireki kaari niyotzi, omaanta okameethatzin eejatzti nomampaawentyaari nopaanteki okaatzi niyotziri. ¹⁶ Pamine, aririka piñaaperoteri Tajorentsi, omaanta pinashitakyaaworika pipaante, ¿tsika ikantyaaka ikemathatantyaawori riagara owakirar tsiplateeyakimirini? Eero riyotawakiro oetarikapaeni pikanterimi. ¹⁷ Aririka pipaasonkiteri Tajorentsi paashinijatotsiriki paantentsi, ejatzti itsipatzimirkira paashinipaeni atziri, teerika riyotziro iroka paashini paantentsi ejatzti teerika ikemimi kameetha, tekatsi pikantya piyotayeri riropipaeni. Tee ikemawaantetzimi.

¹⁸ Nanaakoeyakimini noñaawaetantashitakawo paanteentsi nojeechia apaniroeni, kaari niyotzi, rootaki nopaasonkitantariri Tajorentsi. ¹⁹ Omaanta aririka apiyotawenteeyarinri Tajorentsi, nokowaperotaki noñaawaetantyaawo niyotaperotakiri, niyotaantyaariri paashinipaeni. Aririka noñaawaetantashityaawomi osheki ñagaantsi paantentsi kaari piyotzi, eero amitakotzimi. Natsipetashitakyaawomi, wero, wero. Okameethatzin noñaawaetero apaanipaeni ñagaantsi pikemaeyakirini.

²⁰ Iroñaka, noyemijantzinkarite, eero poshiyakotari eentsi: pikenkithashryaaperotanakya. Eerokya pikenkithashiriiro kaari kameethatatsi: intakya pikimiteeyarinri owakira koñaatatsi, tee ikenkithashiriiro kaari kameethatatsi. Omaanta aririka pikenkithashryaaperotanakya, kameetha pikimityaari antaripaeni, eenitatsi riyotantari. ²¹ Eeniro iroka okantzirini Iwaperite Tajorentsi: "Ikantzi Awinkatharite: 'Nokantawitakari joriyyopaeni, omaanta tee ikemijantana. Iinja notyaanteniri paashinipaeni atziri, inashitayitaworini ipaante, ikamantawityaari, omaanta ejatzti riori, eero ikemijantawakiri'".

²² Rootaki nakanantzimiroi iroka: iñaawaetashiteetakawo paashinijato paantentsi riyotantyaariri kaari aapatziyari Jesoshi. Tee iñaanatashitanari aapatziyariri Jesoshi riyotaanttariri. Omaanta okameethatzin akamanteri aapatziyariri Jesoshi okaatzi riyotaakaera riraga Tajorentsi eerorika oetarika ikowakaakaera antero. Omaanta eero akamanteri kaari aapatziyariri Jesoshi iroñaka: rooma eerooota aapatziyawo.

²³ Pamine, nokamantemiro: pipiyotawenteeyaaririnika Tajorentsi, aririka piñaawaetantashiteeyakyaawoni paantentsi kaari piyotzi: wero, wero, wero; eero ikemiro maawaeni. Aririka ikyapaaki paashini atziri, kaari aapatziyariri Jesoshi; tema ari ikantapaaki: "¡Sha! Pamineritya irika, ithawarentsitaki". ²⁴ Omaanta aririka piyotaante apaanteki, ari ikemapaaakiro kaari aapatziyariri Jesoshi aririka ipoki. Ikemapaaakimirkira, riyotantyaari tee ikameethatzin, eeniro rantani. Okenkithashryaakayeri maawaeni ikemaeyapaakirini. ²⁵ Ikenkithashryaaneero maawaeni imanawitakari rajankaneki. Roojatzti rotziwerowashitantanakari Tajorentsi, ipinkathatantyaariri. Ikantemi: "Kyaaryo, itsipataperoeyakimini Tajorentsi".

²⁶ Ñakiro, noyemijantzinkarite. Aririka pipiyoteeyani, kameetha pomampaaya apaanipaeni, riyotaante paashini, ikenkithatakaante paashini, paashini iñaawaetantashitakawo paantentsi kaari riyotzi, paashini rowaagaeyakinirini aapatziyariri Jesoshi ikantakiriri. Omaanta, oetarikapaeni panteeyerini, pantero piyotanteeyaaririni piyemijantzinkarite. ²⁷ Eenitatsirika ñaawaetashityawoni paantentsi kaari riyotzi, kameetha iñaawaete aririka ikaate apite, eerorika 3: eerokya osheki. Eero itsipatawakagaeyani iñaawaetantanyaawo. Rityaawo apaani, rimpetaapaaki paashini. Omaanta okameethatzi ijeki rowaagaeyakinirini pisheninka ikantakiriri. ²⁸ Teerika añairi owaagaeyakirorini ikantziri, okameethatzi imaeerite, eero iñaawaetantashitawo paantentsi kaari riyotzi piyoteeyeencharini, omaanta kameetha iñaawaetashirete rajankaneki, ejatzti iñaanateri Tajorentsi rajankaneki.

²⁹ Okameethatzi riyotaantero Iñaani Tajorentsi, ikaatzi kamanantayitzirini iñaani Tajorentsi apite, eerorika 3. Omaantakya paashinipaeni, ikenkithashiryakotaperoeyeroni ikamantayitakiririni okameethatzipirika.

³⁰ Aririka riyoteeri Tajorentsi paashini jeekatsiri kaari riyoteeyawitani paashinipaeni, okameethatzi imaeerite. Aririka ithonkatapaakiro riraga jewatatsiri ikenkithatzi, roojatzi rirori imatantanakyaawo riyotaante. ³¹ Okameethatzi riyotaantero iñaani Tajorentsi apaani, roojatzi rimpetae paashini, roojatzi riyoteeyantanyaarini maawaeni kowatsiri, riweshiryanteeyaaarini maawaeni. ³² Riraga kamanantayitzirorini iñaani Tajorentsi, kameetha imaeerite, aririka ritakyaawo iñaanataki paashini. Tema imatziro atziri imaeeritawakiita roojatzi ithonkantapaakyaawo itakawori roojatzi iñaawaetantanakya paashini. ³³ Tee ikoyi Tajorentsi akishiyeenkatya añaawaete eero akemaperotantawakawo iyenkithari, inta ikowaki amaeriteeyanakini kameetha, ákemanteeyawakyaaworini.

Aririka ipiyotawentapiintari Tajorentsi maawaeni rowameethateeyirini, ameteeyakani ³⁴ tsinani omaeriteeyakini. Tee oshinetaantsita. Kameetha okemijante, tema aritaki okantzi Iwaperite Tajorentsi. ³⁵ Okoyirika iyote oetarikapaeni, kameetha ojampiteri oemi janta opankoki. Tee okameethatzi ofñaawaete pipiyotawenteeyarinirika Tajorentsi. ³⁶ Pamine, tee eerokapaeni itawori piyotanteeyironi iñaani Tajorentsi. ¿Piitakima apaniroeni piyotziro eerokapaeni? ³⁷ ¿Pikaateeyirinima kamanantzirorini iñaani Tajorentsi? ¿Pikaateeyirinima aapatziyaperotawori Ishire Tajorentsi? Okameethatzi riyotawakiro iroka nojankinatzimiri rootaki kaminagaantsi rashii Awinkatharite. ³⁸ Eerorika raapatziyawo pisheninka iroka, eero paapatziyeeyarini rirori. ³⁹ Rootaki, noyemijantzinkarite, pikowaperotanteeyarini pikamanteri paashinipaeni iñaani Tajorentsi. Omaanta eero pithañaapithatari iñaawaetantanyaawo paantentsi kaari riyotzi. ⁴⁰ Omaanta powameethatero oetarikapaeni pantayitzirini. Tee okameethatzi piñaawaeteeyini: pimaeriteeyini maawaeni, pikemijanteri apatziro apaani iñaawaetsatsini.

15

Ikenkithatakotakiri Jesoshi ipiriinantakari, ejatzti apiriinantyaari aari

¹ Iroñaaka noyemijantzinkarite, nokenkithashiryakagaemiro ejatzti nokamantzitakimiri: tema okameethataki paapatziyitawakawoni; roojatzi iroñaaka pikanta piyotaperotzi kyaaryooperoakti, tee otheeyantsita. ² Rootaki owawijaakoeyemirini, aririka pikantatyeeayani

paapatziyantyaawo, omaanta eerorika eekiro piyaatatyee paapatziyawo eero owawijaaakotzimi.

³ Nityaawo nokamantakimiro iroka rooperotatsiri ikamantziteetakinari: eeniro anteeyakirini kaari kameethatatsi, rootaki ikamawenanteeyakaerini Jesokirishito. Imonkaatakiro okamantakotzitaririni Iwaperite Tajorentsi. ⁴ Romonkyaagaetakiri omooki. Okaataki 3 kitejiri ipiriinantanaari eejatzzi. Imonkaatakiro eejatzzi okamantakotzitaririni Iwaperite Tajorentsi. ⁵ Roñaagakari Peetero, eejatzzi roñaayitapaari riraga riyotaanewopaeni. ⁶ Roojatzi roñaagaeyaarini osheki ayemijantzinkarite, ipiyotawakagaeyani. Ranaakotakiri 500 ñagaeyakiririni. Ijeekaeyanakini iroñaaka osheki ñaakiriri riori, omaanta ikamagaantaki apaanipaeni. ⁷ Roojatzi roñaagantari Jantyaako, eejatzzi roñaagaeyaariini maawaeni rotyaantaneewopaeni. ⁸ Riweyaantanaana naari roñaagana, omaanta tee nokimitari paashinipaeni rotyaantanewo, tee nojeeekakaakiri Jesoshi eejatzzi paashini riyotanewo jaka kipatsiki.

⁹ Rotyaantakina, omaanta tee nokimitari paashinipaeni rotyaantanewo, tee nokameethatzi; tema nokijawitarini maawaeni aapatziyariri Jesoshi. ¹⁰ Ineshironkatakina Tajorentsi, rootaki nokimitantariri iroñaaka. Tee ratsipetashitawo ineshironkatakina. Ipomeentsiwentaari Tajorentsi paashinipaeni riraga rotyaantakiri, omaanta nanaakoeyakirini naaka, nopomeentsiwentaperotakari nantawaeteniri. Tee nantashityaawo naari, omaanta ineshironkatakina, nomatantakawori. ¹¹ Aririka nokenkithatakagaeyemini, riorika paashini rotyaantanewo kenkithatakagaeyemirini: tee opaashinitzi. Aritaki omonkaatawakaakya nokamanteyimirini: aririka paapatziyawo, aritaki pawijakotee.

Ipiriinte kamaentsirsipaeni

¹² Pamine, nokamanteyakimini: "Ikamaki Jesokirishito, ipiriintanaa eejatzzi". Paapatziyeeyawakinani. ¿ilitarikya pikantagaanantakari eero ipiriinta kamaayiteentsirini? ¹³ Eeromi ipiriintaami kamaentsiri, eeromi ipiriintaami riraga Jesokirishito. ¹⁴ Eerorikami ipiriintemi, natsipetashitakawomi nokamanantayitzini, patsipetashitakawomi eerori aapatziyeyarini Jesoshi. ¹⁵ Eejatzzi piyotakimi notheeyakotakari Tajorentsi. Ñaakiro, tema nokmantakotakiri: "Ipiriinteri Jesokirishito", omaanta eeromi ipiriintaami kamayiteentsirini, eeromi ipiriinterimi riori. ¹⁶ Eeromi ipiriintaami kamaentsiri, eeromi ipiriintaami Jesokirishito. ¹⁷ Eeromi ipiriintaami, patsipetashiteeyakaawonimi paapatziyeyakarini; eeniromi ojeekimotemimi kaari kameethatatsi, ¹⁸ eejatzzi ikantyaami riyaatapiintemi paamariki kaari tsiwananitatsini kamaeyatsirini, eejatzzimi riraga aapatziyeeyawitaririni Jesokirishito. ¹⁹ Eejatzzi aaka, eeromi apiriintaami, atsipetashitakawomi aapatziyawitakari iroñaaka Jesokirishito, owashironkaaperotakyaami, anaakoeeyakirinimi maawaeni atziri ashironkagaeyacharinimi.

²⁰ Omaanta ipiriintaperotanaa Jesokirishito, reewaeyakirini maawaeni paashini kamaeyatsirini eero ikamae eejatzzi. ²¹ Eeniro rantakiri riraga Araani, rootaki akamaeyantakarini iroñaaka. Eejatzzi ikimitakari, eeniro rantakiri riraga paashini shirampari, riraga Jesokirishito, rootaki apiriinteeyantyaarini iroñaaka. ²² Asheninkateeyakarini Araani, rootaki akamaeyantakarini. Eejatzzi okimitaka, asheninkateeyakarini Jesokirishito

iroñaaka, rootaki rowañaanteyeyerini. ²³ Reewaeyakaeni rirori. Roojatzi aririka ipokae, ipiriinteyaneeni maawaeni aapatziyeyayarini. Aritaki okantyaari: aririka omonkaataky, apiriinteyaneeni maawaeni. ²⁴ Ikantziri Jesoshi ashitariri:

—Ari okaatapaaki. Tema nothonkakiri kamaripaeni, jewatatsiripaeni irira, nantatsiripaeni, theenkantatsiripaeni eejatzti ponampiripaeni naawita piyathatakimir paerani, maawaeni. Iroñaaka Pawa, pipinkathariwenteri eeroka maawaeni jeekaeyatsirini. ²⁵ Ipinkathariwenante Jesokirishito jaka kipatsiki roojatzi ithonkaeyantyaaririni maawaeni kijeeyawitakaririni. ²⁶ Roojatzi eero ikamae eejatzti atziri. ²⁷ Okantzini Iwaperite Tajorentsi: “Itakiri Tajorentsi Jesokirishito jewawentzirori maawaeni jeekaeyatsirini”. Tema okantzi: “Maawaeni jeekaeyatsirini”, omaanta eero ipinkathariwenantzi Iriri: tema rirotaki iitakiriri pinkathariwenantatsini. ²⁸ Inja aritaki ranaakooyerini Jesokirishito maawaeni jeekaeyatsirini, ipinkathariwenteeyerini maawaeni. Apatziro irira Iriri, tekatsi ikantyi ipinkathariwenteri. Ikanteri: “Pawa, eeroka noñaaperotzimi, panaakoeyanani maawaeni pipinkathariperotaki eeroka”. Kyaaryo, Tajorentsipero irira, pinkathariwenanterotatsiri rirori.

²⁹ Pamine, eenitatsi kaawoshitawentariri kamaentsiri. Eeromi ipiriintaami kamaentsiri, tema ratsipetashityawomi ranteromi. ³⁰ Eejatzti, eeromi apiriintaami, tema natsipetashityawomi nopomeentsiwentapi-intawo nokenkithatzi. ³¹ Paapatziyeeyakarini Awinkatharite Jesokirishito, rootaki niweshiryaaawenanteeyakimirini: kyaaryo iroka nokantakimir. Eejatzti okimitaka, kyaaryo iroka nokamantemiri: tee niyotzi tsika okaateka rowamaawenteetenawo nokenkithatzi. Maawaeni kitejiri eenitatsi kowawitachari rowamaawenteenawo. ³² Janta Ejeesoki ikijaperotakina jeekatsiri, osheki opomeentsitaka. Pamine, eeromi apiriintaami, tema natsipetashitakyaawom. Eero apiriintaami, eero akenkithashiretzirimi Tajorentsi: thame owaeyani, thame ashinkiteeyani; roojatzi akamantakya, ari okaatzi. ³³ Eero pishinetziri theenkantatsiri ramatawitemi. Tema kyaaryo ikanteetzi: “Eero kijokiro moyiri theenkantatsiri: rantakaemirokari kaari kameethatatsi”. ³⁴ Pikenkithashireyya, eero papiiteero eejatzti kaari kameethatatsi. Pikaatapiinteeyirini kaari yoteeyirini Tajorentsi: ¿iitarika kaari pipashiwenanta?

Owakirari iwatha

³⁵ Aririka rojampitee theenkantatsiri: “¿Tsika ikanteeyaka ipiriinanta-neeyaaari kamaentsiri? ¿Tsika okantyaaka iwatha, aririka ipiriinte?” ³⁶ Tee ikenkithashiryaa rirori. Eerorika opankita okithoki kipatsiki, roojatzi okamantakya, eero oshooki. ³⁷ Aririka apankitero okithoki, tee apankitakotziro owatha, owaato, oshi, maawaeni: athatyeero apankitziro okithoki. Aririka apankitero teriiko, aririka paashini okithoki, ³⁸ omaanta Tajorentsi ijekakaakiro owatha, owaato, oshi, maawaeni: imatakiro ikowakaakirori. Teriiko okithokitakaero okithokipero roori. Kaniri ojeeki owathapero roori. Eejatzti okimiteeyakani maawaeni shookayitatsirini. ³⁹ Tee imonkaatawaka-gaeyani iwatha maawaeni añayatatsiripaeni. Eeniro atziri rashii rirori iwatha, rinashita rirori tsimeri. Rinashita eejatzti shiwankitzinkari. Rinashita eejatzti shimapena. ⁴⁰ Eeniro jeekatsiri kipatsiki, eejatzti jeekatsiri jenokinta. Ikameethateeyakini, omaanta inashitayitakani, tee imonkaatawaka-gaeyani. ⁴¹ Ishipakiri oorya. Rinashita riraga kashiri, ikitamaashitatzi rirori. Rinashita eejatzti riraga ompokiro, ikitapookitzi. Eejatzti rinashiteeyakani ompokiropaeni: apaani kitejagaakiwitachari, omaanta paashini, tee.

⁴² Eejatzi oshiyakari aari, aririka apiriintanee: eero akimitaa iroñaaka. Ikiteete, ari apathagaeyanakini. Apiriinterika, eero apathaanee ee-jatzi. ⁴³ Kitateencharika, tee okameethatzi. Apiriinterika, eero apiteero apathagae. Iroñaaka tee ashintsitzi, rooma apiriinterika, ash-intsitaperotanee. ⁴⁴ Iroka awatha ikitateetziri, tema ametakawo kipatsi ajeekaeyantawoni. Aririka apiriintanee inashitanakya awatha, amet-tapaakyawori ajeekaeyapaeni janta jenokinta. ⁴⁵ Okantzi Iwaperite Tajorentsi: “Añaatsiri naawitani riraga jewateentsiri paerani shirampari, ri-raga Araani”. Omaanta impaetapaentsiri, riraga Rotyaantanewo Tajorentsi, rirotaki owañaantaperotatsiri, eenitatsi itajorenka irira. ⁴⁶ Tema itawo iroñaaka iroka awatha ajeekantakari jaka kipatsiki; iinja ojeekae awatha owakirataatsini, jeekatsiri jenokinta roori. ⁴⁷ Riwetsikaetakiri kipatsi ri-raga jewateentsiri atziri iileteetziri Araani, rootaki kipatsi iwatha. Omaanta riraga apitetapaentsiri rinashita, ipoñaaka jenokinta. Tema rirotaki riraga Rotyaantanewo Tajorentsi. ⁴⁸ Ijeekawitani kipatsiki Araani, eejatzi akimi-teyakarini maawaeni jeekatsiri jaka kipatsiki. Ijeeki jenokinta paashini, eejatzi akimiteeyaarini maawaeni jatatsini jenokinta. ⁴⁹ Eejatzi okimikata: oshiyanteeyakawoni aaka iroñaaka iwatha riraga kipatsijatzi, iinja oshiyapaakyawo iwatha riraga Rotyaantanewo Tajorentsi riraga jenokijatzi.

⁵⁰ Rootaki, noyemijantzinkarite, nokamanantzimirori iroka: tekatsi okantya iroka awathaka iyaate janta ipinkatharitzinta Tajorentsi, tema ari opathagae. Tekatsi okantya iyaate janta teenta ipathagaeyininta jeekatsiri. ⁵¹ Pamine, nokamantemiro iroka manawitachari: eero akamaeyini maawaeni, omaanta apaashinitteyakanakini maawaeni. ⁵² Itziwoottanteetanakya ayoteeyantyaarini monkaataka. Intsipaete kimiwitaka amachoockanakitzi apaani aaka añaatsiri apaashinitanaki. Eejatzi intsipaete ipiriinteeyakanakirini Tajorentsi maawaeni apatziyaririni Jesoshi riraga kamayawiteencharini; eero ikamae eejatzi. Ari ipaashinitanaki irirapaeni eejatzi. ⁵³ Ashi oyiro apathagaeyini, omaanta eero apathagaeyeenii eejatzi. Ashi oyiro akamaeyini, omaanta eero akamaeyeenii eejatzi. ⁵⁴ Opathagaeyanakini iroka awathaka maawaeni, omaanta eenitatsi awatha kaari pathaanitatsini. Akamaeyanakini maawaeni, rooma iinja, eero akamaeyeenii eejatzi. Roojatzi omonkaataky iroka rojankinateetziri:

“Ariwee. Eero apiitaa akamaeyeenii eejatzi. ⁵⁵ Eero akenkithashiryaaaga akame. Kameethawee. Iroñaaka eero athaawanteeyawoni akame”.

⁵⁶ Aririka antayiteroni kaari kameethatssi, ari athaawantakyaawo akame. Eenitatsi eejatzi rojankinarini Moeseeshi, kamantakaeri: “Eeniro pantani”. ⁵⁷ Rootakikya rowawijaakooeyantakaerini Awinkatharite Jeskirkishito. Ariwee. Kameetharini Tajorentsi. Eero athaawanteeyawoni akame. ⁵⁸ Rootaki, noyemijantzinkarite nonintaperotziri, nokamanantemirori iroka: pikyaaryoowenteniri Awinkatharite oetarikapaeni panteniriri, eero piperashiryaa, pikantatyeyaaani pikyaaryoowentero. Rootaki kaari pipakaantyaawo. Piyoteeyakini eero patsipetashitawo pipomeentsi-wentyaari.

16

Apatziyariri Jesoshi ipiyotziniri jerojareejatzi iyorikite

¹ Iroñaaka nokenkithatakoteri koriki pipiyotenirii ayemijantzinkarite ashironkagaeyacharini janta Jerojareeki. Iroka nokamanantzimir, nokamantakiri eejatzi aapatziyariri Jesoshi janta Karaashiyaki.

² Maawaeni tominko okameethatzi pipiyotapiinteniri jerojareejatzi

piyorikite, pikempoyeniri. Tsika ikaate piyorikite, pikempoyaagaanteniri. Pityaawo pipiyotzityaanari iroñaaka, opomeentsitzimotzimikari aririka nareetapaakya. ³ Eejatzi nokowaki piyoiitya aaneenirini. Aririka nareetapaayea, nojankinateniri jerojareejatzi, riyotantawakyaariri. Roojatzi otyaanantyaariri Jerojareeki. ⁴ Pikowaeyenirika niyaate naari, ari notsipateeyanakyaarini.

⁵ Inja niyaate noñeyemini, omaanta nityaawo niyaatapaente Masherooniyaki. ⁶ Aririka ojamani nojeekimoteeyemini, aririka nokya-wontsitakotaki. Roojatzi pikaminthagaeyawakinani, tsikarika niyaate eejatzi. ⁷ Aririka noñaapaakimi, tee nokoyi noshinttsitanaki nawijanakimi. Nokowaki ojamani nojeekimotanakimi, ishinetenarika Awinkatharite. ⁸ Omaanta nojeekanakiita jakaa Ejeesoki, roojatzi omonkaatantyaari kitejitsatsiri owaero Pentekoshiteshi. ⁹ Ikowakagaeyakinani osheki nokenkithatakagaeyanakirini. Osheki raapatziyeyearini Jesokirishito. Omawitya ijeeki eejatzi osheki kijeyakininarini.

Riwethateeyakarini iyemijantzinkaritepaeni

¹⁰ Rareetapaemirika Temoteeyo, pineshironkaeyawakirini. Tema ikimitakina naari, osheki rantawaetziniri Awinkatharite. ¹¹ Eero pitheenkawakiri. Aririka omonkaatapaakya ipiye jaka, eejatzi kameetha pineshironkatawaeri, kameetha rareetztanteeyaa jaka. Noyayitakirini, eejatzi paashinipaeni ayemijantzinkarite. ¹² Eejatzi nokantawitakari ayemijantzinkarite Apooro. Nokantaperotawitakari ryaatemi iñeemimi, itsipatyaarimi paashinipaeni aapatziyariri Jesoshi. Tee ikoyi ryaate iroñaaka. Aririka inja ryaatanakai.

¹³ Kyaaryoowa, ramatawiteetzimikari. Pikyaaryoowenteeyeroni paapatziyaperoeyarini Jesoshi. Eero pithaawanteeyani. Pishintsiteniri Tajorentsi maawaeni. ¹⁴ Thame anintaperoyerini atziripaeni, oetarikapaeni anteniriri. ¹⁵ Piyoteeyirini, noyemijantzinkarite, riraga Eshiteejana eejatzi ikaateeyinira irira reewateeyirini akaajatzi raapatziyeyearini Jesoshi. Ikyaaoyowentakiro ikaminthagaeyirini maawaeni ayemijantzinkarite rowameethatziri Tajorentsi. Tekatsi kanterini, riyotashitaka ikamintaawakagaeyakan. ¹⁶ Ipomeentsitaka ramitakaperoteyimini, oetarikapaeni rantayitzimirini. Nokowaki paapatziyeyawakyaarini rirori, eejatzi paapatziyeyawakyaarini maawaeni kimiteeyakaririni. ¹⁷ Niweshiryaaawentawakari riraga areeteeyacharini riraga Eshiteejana, Jorotonato, eejatzi Akaeko. Eeniroteeyatsini jaka, okimitzimotakina eerokateeyakinirika tsipateeyakinarini jaka. ¹⁸ Ikimoshiryaaakaakimi pajankaneki chapinki, iroñaaka ikimoshiryaaakaapakina naari najankaneki. Rootaki okameethatantari piñaaperoeyawakirini rirori.

¹⁹ Riwethataperoeyakimini maawaeni piyotawenttaririni Tajorentsi jaka Aashiyaki. Eejatzi riwethateeyimini Akiirishi eejatzi roori Pirishiira, eejatzi maawaeni piyotapiinteeyacharini janta ipankoki. Tema riyoteeyakini aapatziyeyaririni Awinkatharite. ²⁰ Riwethateeyakimini maawaeni ayemijantzinkarite kameetha.* Aririka piwethatawakaakya, ari kameetha paakameethatawakagaeyaani. ²¹ Naaka Paaworo wethateeyimirini. Naaka jankinateeyimorini iroka nakoki. ²² Riyaateeta paamariki kaari tsiwakanitatsini maawaeni kaari ninterini Awinkatharite. Pishintsite, Nowinkatharite, pipokae. ²³ Nokowaki kameetha ineshironkaeyemini

* **16:20** Rametari joriyopaei paeraniperororoñia ithowootawakaeya aririka riwethatawakaeya.

Awinkatharite Jesoshi. ²⁴ Tema eeroka aapatziyeyyaririni Jesokirishito,
rootaki iroñaaaka nonintaperoeyantzimirini. Aritaki okantyaari.

Naaka jankinateeyimiroini iroka:

Paaworo

RIRAGA PAAWORO RAPIITEENIRI ROJANKINATEENIRI KORINTOJATZI

¹ Naaka Paaworo nojankinateeyimironi eerokapaeni korintojatzi. Nokoyi niwethatemi eerokapaeni tsikarika pikanta pijeeki. Paerani rotyaantakina Pawa Tajorentsi noshiyakaawenteri Jesokirishito, nokenkithatakayeri maawaeni atziri. Nojankinateeyimini maawaeni aapatziyariri Jesoshi jaga Korintoki eejatzi jaga maawaeni kipatsiki owaero Akaaya. Iroñaaka notsipatari jakaa ayemijantzinkarite Temoteeyo. ² Maawaeni kitejiriki namaniri Pawa Tajorentsi, nokantziri:

—Pineshironkaeyerini aapatziyariri Jesoshi janta Korintoki eejatzi pamitakoteri ijeekanteeyarin kameetha. Eejatzi ikimitteyemini riraga Awinkatharite Jesokirishito.

Ashironkayaarika ari ishintsitakaakae Tajorentsi ajankaneki

³ Thame añaaperoteri Tajorentsi, riraga Ashitariri Awinkatharite Jesokirishito. Rirotaki neshironkateeyakaerini eejatzi weshiryakaagaeyeerini. ⁴ Aririka ashironkaeyawityaani tema ari riweshiryakaagaeyakaeni. Pamine, itakawori riweshiryaaakagaeyakaeni aari, roojatzi ayoteeyantakarini aweshiryaaakagaeyaarini riraga paashinipaeni ayemijantzinkarite, aririka rashironkaeya riori. ⁵ Kyaaryo, aritaki okanta akemaatsitakyaawo ikimitaakaga paerani Jesokirishito, aritaki riweshiryaaakanakae Pawa Tajorentsi. ⁶ Ro nokemaatsitaktakawori riweshiryawantemiri riori, eejatzi rowawijaakotantemiri. Aririka riweshiryawentakina naaka eejatzi erooka ari riweshiryawenteetakimi, tema piyotakotakina riweshiryawentakina irira. Ari pikantya eeroka pikemaatsitayitaawonirika, ari riweshiryakaakimi rootaki peshiwenantyaawori oetarikapaeni. ⁷ Rootaki niyotantari eerokapaeni eekiro piyaatatyye pameentyaari Jesokirishito. Tema niyoperotaki aririka pikimiteyeyenani pikemaatsityaawo eerori oetarikapaeni, eejatzi pikimiteyeyenani piwesiryaaawenteeyaaarini Tajorentsi.

⁸ Nokowaki piyoteeyeni, noyemijantzinkaritepaeni, osheki nokemaatsi taperotayitakawoni janta Aashiyaki, tema nokenkithatakantakariri Jesokirishito. Osheki nashironkaaka, tee eechonkiini. Nokenkithashiryaaawitaka aritaki nokamaki. ⁹ Kyaaryo nokamemi; omaanta ishinetziro Tajorentsi riyotaakina tee okameethatzi ameentyaawo ashintsini aakapaeni inta ameentyaawo ishintsini riori, riraga piriinterir kamaentsiripaeni. ¹⁰ Ari rowawijaakotakina riraga Tajorentsi, kaari nokamanta; eejatzi eekiro riyaatatyye rowawijaakotena irira, roojatzi ikowaki nokame. Niyotzi ikantyaani rowawijaakotapiintena, ¹¹ aririka pamaneeyerini Tajorentsi ramitakotena. Roojatzi, aririka riyoteeyeni paashinipaeni ikemijantakimi riori, rowawijaakotakina, osheki riweshiryaaawenteeyaaarini irira eejatzi ipaasonkiteri.

Pimatero pameentyaawo nokantzimiri

¹² Niyotaki iroka: tema ramitakotakina riraga Tajorentsi, ineshironkatakina, rootaki nokyaaryoowenantanariri nantziniriri. Tee niyotashita oetarika nantziniriri, omaanta riyotaakina riori okameethatantari nantayitakinirini. Niyotaki piñaaperotakiro okameethataki nantayitakinirini, eejatzi ikimitaka paashinipaeni atziri, rootaki nokimoshiryaaantakari. ¹³⁻¹⁴ Tee opomeentsita

piñaanatero maawaeni nojankinatzimiri, eejatzi tee opomeentsita piyoteeyeroni. Niyotaki iroñaaka eechonkiini pikemaperotawakiro nokamantakimiri paerani, eejatzi eechonkiini paapatziyawitakina. Nokowaki eekiro piyaatatayee piyotero paashini nojankinatzimiri roojatzi piyoperoeyawakironi kameetharini. Aririka ipiyee Awinkatharite Jesoshi, niweshiryaawenteeeyemini, omaanta nokowaki pikemaperotero nokamantzitakimiri piwesiryaawenteeeyantenarini iroñaaka. ¹⁵⁻¹⁶ Ari niyotaki piwesiryaawentawitakina, piñaaperotawitakina, rootaki nokenkithashiryaantawitakari napiitaatemi nareetaatemi. Niteeyeminimi noñagaeyaneemini, roojatzi nowaaganakyaami janta Masheroonyaki. Roojatzi noñaapaemimi eejatzi, roojatzikya nowaaganakyaami Joreeyaki. Apite aweshiryaawentawakagaeyaanimi. ¹⁷ ¿Arima nokowaki namatawitemi? ¿Nokimitakarima amatawitantatsiri kantashitachari: "Ari", eejatzi kantashitachari: "Eero"? Tee nokimitari. Tee nokoyi naaka namatawitemi.

¹⁸ Tema imonkaatziro Tajorentsi ikantziri, tee ramatawitantzi. Eejatzi naaka, nomonkaatziro ikowakaakinari, rootaki kaari nokanantapiintzimi: "Ari nantero", roojatzi nokantashitzimi: "Eero nantziro". ¹⁹ Ari nokaatakiri Shiireshi, eejatzi Temoteeyo nokamanteeyakimini tsika ikantari Jesokirishito, riraga Itomi Tajorentsi. Tee ikantzi rirori: "Ari nantero", roojatzi ikantashita: "Eero nantziro". Apatziro ikantapiintzimi: "Ari nomataktiro", roojatzi rantziro. ²⁰ Kyaaryo ranteeyakaeroni maawaeni ikashiyakaakaeri Tajorentsi aakapaenii atzirypaeni. Tema ikamawentakae rowawijaakotanteeri. Rootaki akanteeyantaririni maawaeni atziri ikameethataki, ipinkathateeyantyaaririni rirori. Aritaki okantyaari. ²¹ Aapatziyeyakarini Jesokirishito, rootaki itajonkawenantakaeri Tajorentsi asheninkatawakagaeyantakarini. Eejatzi riyooyeeyananii naaka nokenkithateeyakoterini. ²² Tema rotyaantakiro Ishire ojeekantakae ajankaneki. Iroñaaka ayoteeyakini itomintakae, rishintontakae, rootaki kaari rookaeyanteeni.

Ikamanteeri iitaka kaari riyaatanta iñaagaeri

²³ Rootaki kaari niyaatanta noñeemi paerani, tee nokoyi nokenkithatakawentemiro pantayitawitakarini: tee nokoyi nowashiretakagaeyemini. Riyotzi Tajorentsi tee notheeya. ²⁴ Tee nokoyi nokantapiinteyemini pikemijantaperoeyenani naari, tema pikemijantaperoeyakirini Tajorentsi. Omaanta nokowaki namitakoeyemini: niweshiryaakagaeyemini maawaeni.

2

¹ Nokenkithashiryaaka: "Iroñaaka eero niyaatzi noñeri riraga korintojatzi. Napiitakagaarikari nowashiretakagaeyaarini, eejatzi nowashiretakotarikari naari". ² Aririka nowashiretakayemi, tema eejatzi naari ari nowashiretakoeyemini. Roojatzi tekatsi janta weshiryaakagaeyenani naari. Aririka noñeyeemini piweshireeyani, ari niweshiryaaneeya naari. Rooma eerorika piweshireeyaa naari. ³ Rootaki paerani nojankinatzimiro, nokaminaantakimiri: "Pookero iroka kaari kameethatatsi pantayitzirini". Tema tee nokowaki nopolantyaari nowashiretakoeyemini, omaanta okameethatzi niweshiryaakagaeyemini. Nokenkithashiryaakagotzimi eerokapaenii pikemijantaperoeyenani okaatzi nojankinatzimiri rootaki atsipatawakaantaari akimoshireeyeni. ⁴ Paerani nojankinatelyantakimiro, osheki nowashiretakotakimi eerokapaenii, tema osheki niraakoeyaki-

mini. Tee nojankinatakimo nowashiretakaantemiri, omaanta nokowakini piyoteeyenani osheki nonintaperoeyakimini.

Ipeyakotziri Paaworo riraga antawitaworini kaari kameethatatsi

⁵ Kyaaryo nowashiretakotawitakari riraga kantzimatanari, omaanta tee apatziro naaka rowashiretakaawitakina inta eejatzi eeroka rowashireperotakayimi. Tee nokoyi nokantakoteri osheki, tema tee nokoyi nokantakowaetashityaari. ⁶ Ari powashironkaeyakirini rirori, rootaki rookantaawori rantawitakarini, iroñaaka monkaatapaaka. ⁷ Iroñaaka eero pikijiri eejatzi, omaanta pikaminthagaeyerini: pipeyakoteniri okaatzi rantawitakari. Eerorka pipeyakotziniri ari ikantashireperotakya, ikenkithashiryia: "Eero ipeyakotantanawo Tajorentsi eejatzi okaatzi nanantawitakawori". ⁸ Nokowaki iroñaaka piyotakayeri kyaaryo pinintaperoeyakirini, pipeyakoteniri okaatzi rantawitakari. ⁹ Paerani nojankinatzimiro nokantzimi: "Powashironkaeri riraga antzirori kaari kameethatatsi". Nokantashitzimi iroka noñaantashitzimi. Nokowaki niyote kyaaryorika pikemijantaperotakina. ¹⁰ Niytaki ari pipeyakoteeniri okaatzi rantakiri; eejatzi naari omawitakya oetarika rantawitakari nopeyakotantakawori. Okaatzi nopeyakotakayeniriri tema nopeyakowentemiri eeroka. Riyotzi Jesokirishito kyaaryo nopeyakotakiri pimatanteeyaaaworini pikimitaawakaeyani iroñaaka. ¹¹ Tema tee akoyi rantakagaeyeeroni Jatanaashi kaari kameethatatsi. Ayotaki osheki ikowawita ramatawiteeyeenimi.

Ikamantakae Paaworo ittaka ipaasonkitantariri Tajorentsi

¹² Ari chapinki nareetaka Toroowashiki, nokamantteeyakirini jeekatsiripaeni tsika ikanta Jesokirishito rowawijaakontantzi. Osheki ramitakotakina Awinkatharite, osheki raakameethateeyakinanai jeekatsiripaeni, eejatzi nokenkithatakotantakariri Jesoshi osheki raapatziyakari rirori. ¹³ Omawitakya osheki atziri janta raapatziyakari Jesoshi, osheki nokowawitapaakari noyemijantzinkarite Teeto, omaanta tee noñiiiri. Tema nokowawitaka nokemijantakotemi eerokapaeni. Osheki nokenkithashiryaaikimi, rootaki kaari nojeekaperotanta janta roojatzni nowaagaantanaari Masheroonyaki.

¹⁴ Ari nokantani naari nopaasonkitapiintziri Tajorentsi. Tema intentapiintee tsikarika aateeyini. Naapatziyeeyarini Jesokirishito, rootaki itajonkakowenteeyantakinarini, imatakagaeyantakinaworini maawaeni ikowakagaeyakinarini. Iroñaaka niyotakaakirini maawaeni jeekatsiripaeni ryotakotantyaariri rirori. ¹⁵ Akimiwitakawo aaka kajankapaneri itagaetziniriri Jesokirishito inimotantyaariri Tajorentsi. Tema othotyaanakiro okajankaekatanaki maawaeni ikemaeyantyaaworini riraga awijakotsini eejatzi riraga theenkantatsiri. ¹⁶ Niyatagaeyawitarini iñaani Tajorentsi omaanta apaanipaeni itheenkaeyakironi, rootaki okantakowenantyaariri riyaatantyaari paamariki kaari tsiwakanitatsini. Rowaga kamantaantsi oshiyakariri riroripaeni kaminkari shitzitatsiri. Riraga paashinipaeni niyatagaeyakirini, ari raapatziyawo rirori, rootaki riyaatanteyaaarini jenokinta, ikantyaani ijeki. Rowaga kamantaantsi oshiyakariri riroripaeni kajankatatsiri kameetha. Osheki nokenkithashiryaaiperotakirowee: noshinetzirikari riyaaateeyeni paamariki kaari tsiwakanitatsini. Eeromi ramitakotanami Tajorentsi, eero nomatziromi naapatziyakagaeyaarinimi paashinipaeni. ¹⁷ Eeniro osheki iyotaantashiteeyawitaworini iñaani Tajorentsi raantyaari koriki. Tee nokimitari naaka. Rotyaantakina Tajorentsi niyotaantero iñaani,

riyotaki nokowaperotaki niyotaantero kameetha. Eejatzi ramitakotakina Jesokirishito.

3

Ikenkithatakotziri riyotakayeriri atziri kameetha riyotaantzi

¹ Nojankinatantawori iroka, ¿piitashitama napiitaatatyemiro eejatzi najagaashitaata? Tema eero. Tee nokoyi paashini atziri rojankinatakotena naaka nokameethatzি roojatzı rotyaantemı eero. Eejatzi tee nokoyi pojankinatakotena nokameethatzı potyaanantyaari paashini atziri. ² Riyaateeyanakimini riraga amatawitantatsiri ipakimi kaarita rojankinatatzı paashini atziri, okantzi: "Irika atziri kameetha riyotaantzi iñaani Tajorentsi", omaanta otheeyashita. Omaanta naaka omawitya tektsi kaarita rojankinatakotenari paashinipaenı atziri nopenmirı eero, piyotzi kameetha niyotaantzi iñaani Tajorentsi. Tema paapatziyakawo rootaki ipaashinitantakimiri Tajorentsi, iroñaaaka pijeeki kameetha, rootaki riyotantakawori paashinipaenı atziri kyaaryooperotaki okaatzi niyotaakimiri. ³ Poñaaganteeyarini paashini atziri kyaaryo paapatziyari Jesoshi, tema pijeeki kameetha. Tema pikimitakawo iyaaritate rojankinatzı Jesokirishito, ikantzi: "Riraga Paaworo riyotaantziro noñaani kameetharini". Tema niyotaakotakimiri Jesokirishito rootaki pijeeantyaari kameetha iroñaaaka. Iroka kaarita kaari rojankinatantawo tziintaki paperiki, inta owameethashiretakimi Ishire Tajorentsi omatakaakimi pijeeki kameetha. Paeraniperoroña riraga Tajorentsi rojankinatakiro iñaani mapiki omaanta opeyakotakya roori. Iroka kaarita iroñaaaka tee okimita iroka ojankinateenchari paeranı mapiki, inta antawaetakayirini Ishire Tajorentsi ojankinatakiro pajankaneki erokapaeeni; tema okanteetatyeyaaani ojeeki. Omawitya rojankinatakiro itakawori iñaani Tajorentsi mapiki.

⁴ Niyotaki kyaaryootaki okaatzi niyotaakimiri. Nameentakari Jesokirishito rootaki ramitakotantanari Tajorentsi nantayitakironi nokantakimirika. ⁵ Kyaaryo, tee nomatziro nantashitanari apaniroeni ikowakaakinari, omaanta rirotaki rirori matakaakinawori. ⁶ Rirotaki irira riyotakanari owakirani inimotawakaantsi: okantana tsika ikanta iroñaaaka rowawijaakotantzi. Kaari nokenkithatakaoeyirini rojankinarini Moeseeshi, inta nokantakoeyirini antzirori Ishire rajankanekipaenı atziri. Tema okantakoeyirini rojankinarini Moeseeshi eeniro rantani atziripaenı, rootaki ryaatantyaari paamariki kaari tswakanitatsini, omaanta rowaga Ishire Tajorentsi añaakaakiri atziripaenı ikantyaani ijeki.

Okameethatzı iroka owakirari ikashiyakaakaeri Tajorentsi

⁷ Paeraniperoroña achariniiteni Moeseeshi rameentaperotakari Tajorentsi. Rootaki ikantakiri irira itonkaashitanakiri itonkiyotawakari ikenkithatakayeri janta Shinayiiki. Ro rojankinatzimotantakariri rirori mapimaanka okaatzi ikowakaakiriri atziri. Eejatzi ikantakiri Tajorentsi: "Maawaeni kaari monkaatziro okantziri rojankinarini, ari riyaateeyakini paamariki kaari tswakanitatsini". Iñaantakariri Moeseeshi Tajorentsi ishipakiryapaakiro irira rowaga ipoo, shipakiririri. Roojatzı roerinkantapaa ikenkithatakantyaariri ijoriiyotzinkarite iñaani Tajorentsi. Roojatzı iñaanteeyawaaririni rirori oshipakiryaka ipoo, omaanta tee imateeyironi eekiro ryaatatyee raminapooteyeerini, tema osheki ishipakiryaaaki: omaanta shipakiryanta eentsikiroeni opeyimata. ⁸ Riyotaantakariri riraga Moeseeshi atziripaenı ikantziri Tajorentsi ari oshipakiryaanaki rootaki oñaaganteeyarini atziri eechonkiini itajorenka

Tajorentsi. Omaanta iroñaaka ayotaki itajonkawentero irira osheki aririka niyoteeyerini atziri iñaani owakirari, okantakotziro Ishire.⁹ Riraga Tajorentsi roñaaganteeyeni eechonkiini itajorenka ishipakiryaaantapaaki ipoo Moeseshi riyotaantakariri iñaani rowaga kantakowentakiriri maawaeni atziri ryaate paamariki kaari tsiwakanitatsini. Ari roñaagaperotanteeyawoni itajorenka aririka ayotakagaeyerini atziri tsika ikantari Tajorentsi iñaaperoteri rirori ikameethatzsi ejaztzi ipeyakoteni okaatzi rantakiri.¹⁰ Kyaaryo okameethatzsi rowaga iñaani riyotaantzirini Moeseshi eenironi ishipakiryaaaki ipoo omaanta iroñaaka tee oshintsitzi itawori iñaani Tajorentsi. Tema iroñaaka osheki anaakotakiro owakirari iñaani okantakotziro Ishire Tajorentsi.¹¹ Okameethatawitaka okaatzi riraga Tajorentsi rojankinatakaakiriri Moeseshi tema otsipatakari oshintsitzini, omaanta eero okanteetyaani ojeeki. Iroñaaka riyotaakae kameetha Jesoshi owakirari iñaani Tajorentsi, anaakotakiro itakawori ñaagantsi paerani, osheki oshintsitzi roojatzti okanteetyaani ojeeki.

¹² Tema ayotaki eero othonka roori ayotagaeyirini atziripaeni ejaztzi eero ipoyaataa rootaki kaari apashiwenana ayotagaeyantakaririni atziri.¹³ Tee akimiteeyarini Moeseshini, ipashikapootaka rirori riyotaantakiro iñaani Tajorentsi: tee ikoyi iñeeeyerini ijöriiyotzinkarite opeyanneya ishipakiryaaapootawitaka.¹⁴ Omawitya ishipakiryaaakiro ipoo Moeseshi tee ikoyi raapatziyeeyawoni iñaani Tajorentsi riroripaeni, rootaki kaari ishinefantari irira raapatziyaperotaari. Ikantani iñaanatapiintawito rojankinarini Moeseshi roojatzsi iroñaaka, omaanta tee riyotakotziro. Okimiwitwa ipashikawo ikenkithashiryantaari, ipakaero riyotaantziri rowaga owakirari iñaani Tajorentsi okantakotziro Jesokirishito opoyaatakawo rowaga rojankinarini Moeseshi. Tekira ipashikaryaakaantziro riyotaantziri. Apatziro Jesokirishito matzirori ipashikaryaakaakaero aapatziyantyaariri.¹⁵ Kyaaryo, roojatzsi ikanteeyani iroñaaka. Aririka iñaanatero rojankinarini Moeseshi, tee riyotakotziro: tekatsi ikantya ikemantyaawori.¹⁶ Omaanta aririka rameentyaari Awinkatharite, riyotakayeri eero ramatawitanta rirojatzsi; omaanta riyotaperotanaki Jesokirishito rirotaki owawijaakotantatsiri rotyaantakiri Tajorentsi.¹⁷ Eenitatsi Awinkatharite Ishire, iyotagaeyakaeni eero apomeentisentawo rojankinarini Moeseshi.¹⁸ Iroñaaka tekatsi amatawiteeyeerini, inta eenitatsi ayoteeyirini. Ayoteeyakini ikameethaperotaki Awinkatharite. Otajonkawenteeyakaeni Ishire akimiteeyantyaariri. Iroñaaka akimiteeyawitakarini eechonkiini. Akantani apaashinitapiintanaki. Iinja akimitaperoeyapaeyaarini, akameethaperoeyapaeni.

4

Kameetha ikenkithatakotziro Paaworo iñaani Tajorentsi

¹ Tema ikaminthagaeyakinani Tajorentsi ipeyakotakinawo nantawitakari, rootaki rotyaanantanari nokenkithatakayeri atziripaeni. Rootaki iroñaaka eero nokantashiretashita ejaztzi eero nopakagaero niyoteeri paashinipaeni atziri.² Omaanta tee nokoyi namatawiteri, eero napiitero nantero oetarika kaari kameethatatsi nopashiwentaotanakawokari aririka riyotanaki rirori: tee ikameethatzsi riraga paashini amatawiteeyiririni. Tee nopaashinitziro iñaani Tajorentsi, ejaztzi tee nokamantashitari atziri okameethatayitakini ikowayitzirini rirori: namatawitzirkari. Omaanta kyaaryo niyotagaeyakirini. Piyoteeyakini, ejaztzi riyotaki Tajorentsi kyaaryo iroka nokantakimiri.³ Eenitatsirika

kaari yotatsini tsika ikantyaari rawijakotanteeyaari, riroteeyakini jatatsini janta paamariki kaari tsiwakanitatsini. Tema tee ikoyi raapatziyawo iñaani Tajorentsi. ⁴ Ramatawitakiri Jatanaashi kaari aapatziyariri Jesoshi. Tema rirotaki iwinkatharite maawaeni theenkantsiri. Tee ikowakayiri riyoteeyeni osheki ipinkatharitzi Jesokirishito, eejatzi rirotaki irira Tajorentsipero. ⁵ Tee naaka kenkithatakotacha naari, inta riraga Awinkatharite Jesokirishito nokenkithatakotziri. Naapatziyakari rirori, rootaki nokowantakari netakoeyemini. ⁶ Paeraniperoroña riwetsikantawori Tajorentsi kipatsi otsitenitawitani, omaanta ikantzi: "Okitejitanaki". Roojatzi okitejitantanaka, rootaki iroñaaka amineeyantarini oetarikapaeni. Okimiwitaka iroka iroñaaka rirotakagaeyakinani iñaani Tajorentsi tsika ikantakotari Jesokirishito. Okimiwitaka iroka iroñaaka otamoreka najankaneki iyotaakina nojeekantari kameetha. Tema iroka iñaani iyotaakotakinari Tajorentsi osheki inintaperotakae eejatzi osheki ikameethatz, tektsi rantani, eejatzi osheki ipinkatharitzi kimitaka roñaagakaero Jesokirishito. Okimiwitaka iroka iroñaaka rirotakagaeyakaeroni tsika ikantari Jesokirishito, ayotantakari osheki ipinkatharitaki irira.

Irira Tajorentsi rirotaki matakaakaeri akenkithatz

⁷ Ayotantariri Tajorentsi eejatzi Jesokirishito kimitaka eenitatsi powaagawo pinaperotachari. Omaanta iroka pinaperotachari ojeeki awathaki. Tema roori osheki ashipeyawathatz. Riraga Tajorentsi ikowakaakaero ashipeyawathate riyotanteeyaarini atziripaeni rotyaantakiro Ishire omatakaakina nokenkithatakoteri riraga Jesoshi. Eejatzi ikowaki riyotanteeyaari riroripaeni eero amataakaa aaka apaniroeni. ⁸ Nokantzimi iroka tema rowashironkaetakina riraga kijakinripaeni. Omaanta tee ishinetziri Tajorentsi rookakaenawo nokenkithatakotziri Jesoshi. Tee niyotaperoyini oetarika nanteri omaanta niyotzi ikantani Tajorentsi ramitakoeyanani. ⁹ Osheki ikiyeetakina, omaanta riraga Tajorentsi tee rookana; ipajapajaatapiunteetakina, omaanta tee ishinetziri rowamaena. ¹⁰ Okimitaka paerani ijeeki osheki kowapiintawiteenchari rowamaakaanteri Jesoshi, ari iroñaaka ijeeki osheki kowapiintawitachari rowamaakaantenami naari; tema niyotaakiri atziripaeni iñaani Tajorentsi. Apaniroeni Jesoshi rowawijaakotapiintakina, riyoteeyantakarini paashinipaeni atziri rirotaki Añaatsiri eejatzi ishindsightakina nokenkithatakotantyawori iñaani. ¹¹ Kyaaryo, eeniro nañi omaanta oshekitakira nokamapiintakoterimi Jesoshi. Ro nokemaatsitantiakawori iñaaperotanteri paashin atziri rirori rirotaki matakagaeyakinaworini eekiro niyaatyee niyotaakoteri. ¹² Nokenkithatz, rootaki nokemaatsitantakawori osheki rooteentsi nokamimi, omaanta paapatziyeyakarini Jesoshi eerokapaeni, rootaki pijeeckaeyantaarini kameetha, tema riro jeekakaakimiri Jesoshi.

¹³ Tema rojankinatzini paerani riraga ayemijantzinkariteni: "Naapatziyakari Tajorentsi, rootaki nokenkithatakantari atziri iñaani rirori". Eejatzi nokimiteeyakarini naari: naapatziyakari Jesoshi, rootaki eekiro niyaatyee nokenkithatakotakiri irira. ¹⁴ Ayoteeyakini eeniro riraga piriinteriri Awinkatharite Jesoshi. Inja ipiriintaperoeyeeni aari eejatzi, eekiro aatakotatyee atsipateeyaaarini Jesoshi. ¹⁵ Osheki nokemaatsitawenteeeyakimini, piyoteeyantyaarini ikamintheeeyemini Tajorentsi. Rootaki paapatziyantakariri Jesoshi pipaasonkiteeyerini eerokapaeni, pikantteeyeni:

"Tema ikameethatzi Tajorentsi". Rootaki raapatziyakaantakariri rirori atziripaeni, roojatzi iñaaperotantyaariri riraga Tajorentsi ikameethatzi.

Eero akantashiretashita

¹⁶ Iroñaakakya, osheki nokemaatsiwentakari nokenkithatakiro Iñaani Tajorentsi rootaki eenitatsi osheki paashini atziri iñaaperotantariri rirori rootaki kaari nokantashiretanta ejatzi tee nopakaero nokenkithatakotziri Jesoshi. Osheki amakoteeyapaakini, kimitaka antyaashipariteeyanakity-eeni, akamaeyanakini; omaanta eero akenkithashireeyironi. Tema ikantani riraga Tajorentsi riweshiryaakazaeyakaeni maawaeni kitejiriki. ¹⁷ Iroñaaka rowashironkagaeyakinani theenkantsatsiri, omaanta tee natsipetashitzimaetawo nashironkaaka. Eechonkiini noñaakiro iroñaaka, omaanta riyyotzi Tajorentsi, roojatzi iinja kameetha ijeekakagaeyenani janta inampiki. Nokanteetatyeyaaani nojeeke kameetha, eero okimitaa jaka. ¹⁸ Rootaki eero nokenkithashireperoeeyironi pomeentsitayitacharini ejatzi jeekayitatsirini noñeeyerini jaka kipatsiki. Ari iinja opeyeyaaani maawaeni afeeyakirini jaka. Omaanta nokenkithashiryaaaperotero kaari noñaapiintzi iroñaaka: rowaga jeekaeyatsirini jenokinta. Eero opeyaa roori.

5

Ikenkithatakotziro akimoshireeyantaarini

¹ Tema ayotzi awatha jaka kipatsiki oshiyawitawo pankotsi kaari kijotatsi intsiapate ojoweyanaki. Eero ajeekantawo osheki ojarentsi. Omaanta ayoteeyakini aririka akamaeyeni jaka, aapatzieeyearirika Jesoshi, ari ajeekaeyini jenokinta. Eenitatsi janta awatha kameethari jeekanitatsini riwetsikakaeniri Tajorentsi, kaari irira atziri wetsikakaeroni. Akanteeta-paatyeeyaani ajeekie janta. ² Iroñaaka jaka kipatsiki osheki nashironkaapi-intaka roojatzi osheki nokowakiri Tajorentsi ipenawo nowatha owakirari janta jenokinta. ³ Roojatzi eero apatziro ojeeki ashire, omaanta ojeeki ejatzi awatha owakirari. ⁴ Eniro ajeeki jaka osheki ratekaperotzi: tee akowaeyawitani ookaero iroka awatha, omaanta akowaperotaki awatha owakirataatsini. Akowaki apaashinitanee ojeekantyaari awatha owakirari kaari thonkanitachani. ⁵ Rirotaki Tajorentsi reentsitetakae ipantakaerori owakirari awatha. Omaanta ejatzi iroñaaka rotyaantakinawo Ishire niyoperoyantarin kyaaryo iinja itajonkawentena, ipoyaatantakinawori nowatha owakirari. ⁶ Rootaki niyoperoyantanakarini riraga Tajorentsi imonkaatero iroka. Ayoteeyakini eeniro nojeekaeyini jaka kipatsiki, tekiraata atsipataperotyaari Awinkatharite. ⁷ Tekira noñeeyerini irira, omaanta nameentaperotari rirori, niyoteeyantakarini noñeeri iinja. ⁸ Omaanta ayotakoeyakirini Tajorentsi iinja ipakaero awatha owakirari kimitaka ikantzitakaeri. Tema aweshiryaaawentakawo okero awatha kipatsijato aatantyaari jenokinta ajeekantyaari awatha owakirari atsipatantapaeyaariri Awinkatharite Jesoshi. Aweshiryaaawenteyawitarini irira jaka kipatsiki, omaanta osheki akowawitaka atsipataperotyaari janta jenokinta, anampitaperotyaawo. ⁹ Rootaki nantziri naaka eeniroka nojeeki jaka, nokowaperotaki nomonkaateeyeroni okaatzi ikowakaakinari riweshiryaaawenanteeyenarini. Ejatzi, aaterika janta jenokinta atsipatee-yari, akowaki oemoshirenkantteeyaariri. ¹⁰ Iinja ikantakowenanteeyeeni Jesokirishito. Aririka iroñaaka antayiteroni kameethatatsiri, ipinateeyeeni; aririka antayiteroni iroñaaka kaari kameethatatsi ejatzi oetarika akowashitari aaka, eero ipinateeyeeni aritaki apashiwentakya.

Ikenkithatakotaa rirojatzi Paaworo

¹¹ Kyaaryo niyotzi Jesokirishito iinja ikantakowenanteeyeeni, rootaki osheki nopinkathateeyantakaririni, rootaki naapatziyakaanteeyakaririni atziri. Riyotzi Tajorentsi nopinkathataperotakiri, rootaki eekiro niyataatyee nokenkithatakayemiro kyaaryooperotatsiri; eejatzti nokenkithashireeaya piyotakoeyakinani nokenkithatakayimiro kyaaryooperotatsiri.

¹² Tee nokoyi noñaanatakota naaka nokameethaperotzi. Omaanta tee nokoyi eejatzti pipashiwentakotena. Riraga kantzimatakina, osheki ikantakaaperotaka rirori, ikantakaaperotawentayitakawoni rantayitzirini, omaanta tee ikameethashiretzi. Ikantzimatakina rirori, omaanta nokowaki piyote nokenkithatziro kyaaryooperotatsiri, rootaki pimatantyaawori pikanteri: "Kaari. Riraga Paaworo riyotaakae rowaga kameethaperotatsiri". ¹³ Aririka pikenkithashireeya noshinkiwentaty, tema eero nopakaero niyotaantziro iñaani Tajorentsi, tema ikowakaakina nantero pikenkithashireeya: ro nanantawori ikowakaakina rirori niyotaantakiro iñaani. Aririka pikenkithashireeya ayoperotaty, antero kameethatatsiri okameethatzti, tema antero kameethatatsiri amitakotantemiri.

¹⁴⁻¹⁵ Osheki inintaperotakina Jesokirishito, ikaminthaaperotakina. Niyotaki ikamawenteeyakaeni maawaeni: iroñaaka okimiwitaka akamaeyakini maawaeni, eero antapiinantaawo eejatzti kaari kameethatatsi. Eejatzti ikowakaakae eero antawentaa aaka apaniroeni, omaanta anteniri rirori ikowakaakaeri: tema ikamawenteeyakaeni, ipiriintanaa eejatzti.

¹⁶ Paerani noetawitakari Jesoshi rirotaki atziri, tee niyotawitarini rirotaki Tajorentsi. Omaanta iroñaaka niyoperotakiri, niyotaki tsika ikanta. Eejatzti riraga ayemijantzinkarite, eero atheenkiri: tema iñaaperoeyakirini Tajorentsi ikameethatzti. ¹⁷ Ninkarika aapatziyaarini Jesokirishito, ari rinashitakaakyari rirori; eero ikenkithashiryaapiintawo ikimitaaga paerani eejatzti eero rantapiintziro rantawitarini, omaanta ipaashinitanee. ¹⁸ Rirotaki itakawori Tajorentsi rotyaantakiri Jesokirishito ikamawenteeyakaeni, rowameethateeyakaeni, rootaki imatantyaawori iñaaperotantakaeri rirori akameethatzti. Iroñaaka ikowaki akamanteri paashinipaeni atziri raapatziyari Jesoshi imatantyaariri Tajorentsi raakameethatantyaariri rirori. ¹⁹ Naakiro, rotyaantakiri Jesokirishito rowameethateeyeeni aaka, iñaaperoeyanteerini akameethatzti. Eero ikenkithashiriio eejatzti kaari kameethatatsi anteeyawitarini. Iroñaaka rotyaanteyakaeni aari akamantteeyerini paashinipaeni atziri, aririka raapatziyari Jesoshi, ari reentsitetakaari rirori maawaeni. ²⁰ Kyaaryo, rotyaantakina Tajorentsi nopyawenantyaariri Jesokirishito: nokaman-teemiro iñaani Tajorentsi. Rootaki niyotaantemirori okaatzi rantakiri Jesoshi okimiwitaka riyotaakini Tajorentsi. Eejatzti riraga Jesokirishito ikowakaakini paapatziyari iñaaperotantemiri rirori pikameethatzti. ²¹ Tekatsi rante rirori kaari kameethatatsi, omaanta rotyaantakiri Iriri ikamawenteeyakaeni. Tema rowashironkaawentashitakawo okaatzi antayitzirini. Rootaki imatantyaawori roeyowapithateero antani eejatzti iñaaperotee kimitaka tekatsi antani. Okimitzimotawitakari rantakiro rirori kaari kameethatatsi. Rootaki iroñaaka rowameethanteyeerini Tajorentsi, iñaakae akameethatzti.

6

Tsika ikantapiinta Paaworo

¹ Iroñaaka nantziniri Tajorentsi ikowakaakinari, rootaki nokanantz-imiri: "Ikaminthaaperoeyakimini; tema paapatziyari Jesokirishito eejatzti pinetheeri ipeyakotemiro pantani. Rootaki nokanantzimiri: 'Eero iroñaaka

pitheenki: eero papiitziro pantapiintero kaari kameethatatsi' ". ² Eenitatsi iroka ikantziri riraga Tajorentsi Iwaperiteki:

"Pikantakina, rootaki nokemijanantakimiri; monkaataka kitejiri pawijakotantaari, rootaki namitakotantakimiri".

Iroñaaka ejatzi naari nokamantemi: monkaataka iroñaaka kitejiri okameethatzhi paapatziyari Jesoshi, pawijakontanyaari.

³ Tekatsi nokantya pikijantenari; omaanta kameetha niyotagaeyakimini piyoteeyantakarini pawijakoeyeeni. ⁴ Nokantani nopankinatanari

Tajorentsi iñaani, nokyaaryooentakiro, piyoteeyantakarini kyaaryo nopinkathataperotakiri. Nokantani nopankinatanari iñaani, omaanta osheki nokemaatsitawentakari, nashironkaapiintaka, maawaeni.

⁵ Ipajapajaatakina joraaro, romonkyaaapiintakina. Ikijapiinteeeyakinani atziripaeni. Osheki opomeentsitzimotakina nokenkithatakagaeiyini atziripaeni. Nokakitapiintzi tsiteniriki. Nokemapiintakiro notashe.

⁶ Omaanta kameetha nojeeki, niyotaantaperotakiro iñaani Tajorentsi, osheki nomaeeritakotashitakawo ikijakina kaari kemijantsi, nokaminthaakiri paashinipaeni. Amitakotapiintakina Ishire Tajorentsi, noneshironkaperotantakariri paashinipaeni, ⁷ Kyaaryootaki iroka niyotaantapiintziri, tee notheeya. Itajonkakowentapiintakina Tajorentsi, rookakowentakina, ejatzi imatakaakina naapatziyakaakariri paashinipaeni atziri ikameethatantaari. ⁸ Eekiro niyaatatayee nopankinatanari Tajorentsi iñaani omawitya eenitatsirika pinkathatakina, eenitatsirika shirontawentakinar, eenitatsirika ñaaperotakinar, eenitatsirika ookathatakina. Naakapaeni riropotrotsari omaanta ikantakotana notheeyashita. ⁹ Tee riyoteeyanani atziripaeni, omaanta riyotakina Tajorentsi. Rajareeyawitakinani atziri rowamaenam, omaanta eeniro nañi. Osheki ipajapajaateetakina, omaanta tee nokami. ¹⁰ Nowashiretakoeyakarini ajoriiyotzinkaritepaeni, omaanta niweshiryaaawentakari Tajorentsi. Nashironkaawitaka naari, omaanta niyotagaeyakirini atziripaeni kameetha riweshiryaaawenantaariri rirori.

Tekatsi nowaagawo omaanta ipashitakina maawaeni koetyeemotakinari.

Osheki ikamintheeyakirini Paaworo riraga korintojatzi

¹¹ Noyemijantzinkarite, nokamantaperoeyakimini maawaeni nokenkithashiryaaka, ejatzi maawaeni nantziro ejatzi nokamantzimi iitarika nanantawori: tekatsi nomanapithatem. ¹² Rootaki iroñaaka eekiro niyaatatayee nonintaperotakimi eerokapaeni, omaanta kimitaka eeroka tee pinintaperoeyinani kimitaka paerani. ¹³ Ari nokimitakaanteeyakimini notyomipaeni, nishintyopaeni: osheki nonintaperoeyakimini. Ejatzi nokowaki poshiyakotenawo, pinintaperoeyenani naakapaeni ejatzi.

Eero kijokiro moyiri riraga kantashitachari raapatziyarimi Jesoshi

¹⁴ Eero kijokiro moyiri riraga kaari aapatziyariri Jesoshi. Pamine, aririka akameethatagi, ñakimitakarima riraga kaari kameethatatsi? ñamonkaateeeyakarinima? Teewee. Okimitaka kitejiri ejatzi tsiteniri: tee omonkaatawakaaya, inashita roori. Riraga aapatziyaperotariri Jesoshi tee imatziro ijeki kameetha aririka itsipatakari aapatziyaperotariri Jatanaashi. ¹⁵ Riraga Jesokirishito eero inimotziro oetarika rantziri Jatanaashi. Rootaki riraga ameentariri rirori eero imatziro itsipatapiintari atziri jamashiryaakariri Jesoshi. ¹⁶ ñomonkaatawakaakama Tajorentsipankoki ejatzi opanko tsikarika ojeeki roshiyakaawentziriri iitajorentsite atziri? Teewee. Pamine, kijokiro rowaeyakaeni Tajorentsi, riraga ñaaperotatsiri, tema paerani rojankinateetzironi iñaani rirori okantzi:

"Ikantzi Tajorentsi: 'Kijokiro nowaeyanakirini maawaeni aapatziyanari, eero nookaeyirini. Notajonkawenteeyerini, ejatzti ipinkathateeeyenani'".

17 Ejatzzi rojankinateetzironi:

"Pitsipareeri riraga antzirori kaari kameethatatsi. Eero kijokiro powaeirini, eero pantayitzironi kaari kameethatatsi kimitariri rirori. Apatziro pijeekanaki piwesiryaaawentena naaka. Roojatzi naakameethaperoeyemini maawaeni eeroka nashi neentsitepaeni.

18 Notominteeeyemini, nishintoteeyemini, pikanteeyenani: 'Pawa'. Rootaki ikantakiririni Awinkatharite, riraga Tajorentsipero riraga antzirori oetarika".

7

1 Ari, nonintanewopaeni, ayoteeyakironi iroka ikashiyakaakaeri Tajorentsi. Eero iroñaaka antayitzironi kaari kameethatatsi, ejatzzi eero akenkithashiryaaotawo antero, apakagaerikari ameentarira Tajorentsi. Thame akyaaryooenteeyenirini ikowakagaeri. Ejatzzi okameethatzi athaawantyari antero oetarika kaari ikowakaakaeri.

Paaworo ikenkithatakotakiri raapatziyakari korintojatzi

2 Nokowaki kameetha pameenteeyenani ejatzzi pinintaperoeyanani. Piyoteeyakini tee nowashironkagaeyimini, tee nantakagaeyimironi kaari kameethatatsi, tee namatawiteeyimini. **3** Tee nokantzimi: "Eeniro pantani", teewee. Tema nokamantakimi osheki nonintaperoeyakimini. Nokantani nokenkithashiryeevakimini jaka kipatsiki, ejatzzi aririka nokamae, nokantyaani nokenkithashiryeevapaemini janta Jenokinta. **4** Niyotaki pinintaperoeyakinani ejatzzi pipinkathateeyakinani rootaki niweshiryaaawenantakimiri, nokimoshirewenantakimiri. Nokantziri osheki atziri: "Riraga korintojatzi osheki raapatziyari Jesoshi". Omawitakya osheki rowashironkaetakina, niweshiryaaawentaperoeyakimini.

5 Paerani, rareetantakari Masheroonyaki, tee nomatziro nomakoryaapae: rowashironkaapiinteetakina. Tsikarika niyataaki osheki ikowaki rookakayenawomi niyotaakiri atziri. Riraga kaari aapatziyariri Jesoshi ikijawakina osheki. Nokenkithashiryaakopiiuntaka najankaneki.

6 Omaanta riraga Tajorentsi tema riweshiryaaakaapiinteeyarininikarika kantashiretakiriri. Ejatzzi naari, riweshiryaaakaakina rirori rareetantakinari Teeto. Rotyaantakinari rirori, rootaki nokimoshiryaaantakari. **7** Ari niweshiryaaawentakari irira itsipatakin. Ejatzzi ikamantapaakina paakameethateeyawakirini chapinki, ejatzzi riweshiryaaawentakimi. Ikamantakinna pompeteeyakinani, ejatzzi pikenkithashiryaanaka: eero papiiteero iroka pantawitarini paerani. Ejatzzi ikamantakinna pinintaperoeyakinani. Nokemantawakariri ikamantapaakina, osheki nokimoshiretanaki. **8-9** Nojankinatantakimiori paerani, nokenkithashiryaaakagaeyakimini. Piñaanatantakawori nowaaritate, ari powashiretakoeyawitakanri. Omaanta roojatzi pookakiro pantawitarri, ejatzzi pikantziri Tajorentsi ipeyakotemiro okaatzi pantakiro. Rootaki tee natsipetawoni nojankinateeyakimironi. Tema ikowakimi Tajorentsi powashiretakotya pantakirowa. Paerani nokenkithashiryeyanakimini, omaanta iroñaaka akimoshireeyakini. **10** Aririka kameetha rowashiretakotya atziri okaatzi rantakiri kimitaka ikowakiri Tajorentsi, ari ikantziri irira ipeyakoteniri okaatzi rantawitakari. Aritaki ipeyakotakinri rantawitakari ejatzzi rowawijaakoteri, eero ikanteetatyeeyaani ikemaatsitantlyawori janta paamariki kaari tsiwakanitatsini. Roojatzi eero rowashiretantaanaa paashini. Omaanta riraga atziripaeni omawitya

rowashiretakotyaawo okaatzi rantayitzirini, tee ikoyi inetheeri Tajorentsi ipeyakoteniri roori. Tema tee ikoyi ijeki kameetha kimitaka ikowakaakiriri Tajorentsi. Rootaki ryaatantyari paamariki kaari tsiwakanitatsini. Ikantatyeyaaani itsipareeri Tajorentsi. ¹¹ Omaanta eerokapaaeni pinethaakiririra ipeyakotemiro kaari kameethatatsi pantakiri. Iroñaaka piyotakotaa okaatzi pantakiri. Pikantakiri paashinipaeni ipakaero kaari kameethatatsi. Pikantakina iroñaaka rantakiro rirori. Tema pithaawantari Tajorentsi rowashironkaemikari. Poyaakoperotana napiiantaatemiri nareetaatemi niyotantyaari pikowaperotaki pikemijantaperoteri Tajorentsi. Pikowaki powashironkaeri antzirori kaari kameethatatsi. Rootaki poñaagantakariri eeroka tekatsi pantani. ¹² Nojankinatantakimiroi paerani kaari apatziro nokowakaakimipamitakoteri riraganki antakotziriri iriri kaari kameethatatsi, inta eejatzi iriri, pamitakoteri. Omaanta nokowakaaperotakimi piyoteeyakinipintaperoeyakinani. Tema rootaki ikowakaakimiri eejatzi Tajorentsi.

¹³ Ari iroñaaka niweshiryaaawenteeyakimini, eejatzi niweshiryaaawentawaari Teeto. Osheki ikimoshiryapaaki, ikamantapaana: "Kameetha ijekakagaeyawakinani korintojatzi". ¹⁴ Chapinki tekiraatani ryaatashitemi, nokamantawakiri: "Ikameethateeyakini korintojatzi, kameetha raakameethatawakimi". Ari rareetantakimiri riyo tak kyaaryo nokantakiriri, tee notheeya. Eejatzi okimitaka, tee namatawiteeyimini eerokapaaeni. ¹⁵ Iroñaaka eenironi ikenkithashiryakotemi, osheki inintaperoeyakimini: riyo tak pikemijantaperoyerawakirini eejatzi pipinkathateeyawakirini. ¹⁶ Eejatzi naari, niweshiryaaawenteeyakimini: niyotaki pantapiintakiro ikowakaakimiri Tajorentsi.

8

Osheki ikaminthaantzi riraga masherooniyajatzi

¹ Iroñaaka, noyemijantzinkarite, nokowaki nokamantemi osheki ikamintheeyakirini Tajorentsi maawaeni ayemijantzinkarite jaka Masherooniyaki. Rootaki ikowantakari rantero okaatzi ikowakaakiriri Tajorentsi. ² Osheki rowashironkagaeyawitakarini ayemijantzinkaritepaeni jaka omaanta osheki riweshiryaaawenteeyakirini Tajorentsi. Eejatzi tee rashaagantaperotawita, omaanta osheki koriki ipiyoteeyinirina aapatziyariri Jesoshì janta Jerojareeki, rotyaantakiri. Riyoteeyakini rashironkagaeyakanai ayemijantzinkarite janta. ³ Noñaakiri rootaki nokanantakotakimiri tee eechonkiini rotyaantziri inta osheki. Tee riyoteeyini ithañeeyaari iyorikite. Tekatsi kanterini: "Pikaminthayeri ayemijantzinkarite omaanta naaka tee nomatziro". Rirotaki yotashitakawo apaniroeni ikamintheeri. ⁴ Inethaaperoeyakinani, ikantzi: "Nokowaki namitakooyerineri noyemijantzinkarite". ⁵ Ari niyotawitaka iperi koriki, omaanta romapokakina ikanteeyakinani: "Nantenri Tajorentsi oetarika ikowakaanari, eejatzi nantemiro oetarika pikantakinari. Pikamantena oetarika ikowakaakinari Tajorentsi". ⁶ Ari chapinki itanakawori Teeto ikantakimi: "Pipiyoteniri jerojareejatzi piyorkite". Ari kameetha piyoteeyakirini. Iroñaaka notyaanteemiri rirori eejatzi ikanteemipiyyotaperoeyeenirini eejatzi piyorkite, roojatzi potyaanteri ayemijantzinkarite janta Jerojareeki. Pikaminthaaperoeyerineri piyemijantzinkarite. ⁷ Osheki panaakoeyakirini paashinipaeni piyemijantzinkarite: panaakotakiri pameentaperoeyarinai Tajorentsi, pikenkithataperoeyini, piyoperoeyini, pikyaaryooventaperoetziniri

Awinkatharite ikowakaemiri, eejatzi pinintaperoeyakinani. Iroñaaka nokwaki panaakooyerini pineshironkataperoeyerini ashironkaenkari.

⁸ Tee nokoyi nomperatemi pipaeyerini ashironkaenkari, omaanta aririka pipaperoteri, piyotakagaeyerini paashinipaeni kyaaryo pinintaperoeyakirini piyemijantzinkarite. ⁹ Tema eejatzi osheki intashireeyakaeni Awinkatharite Jesokirishito. Osheki rashaagantaka janta jenokinta, eejatzi oshekiperi ipinkatharitzini, omaanta ipokantakari jika kipatsiki, rookanakiro maawaeni kameethatatsiripaeni jenokinta. Rashironkaawitapaaka: tekatsi jeekimotaneerini, itheenkaeyakirini atziri. Rashironkaawentakae aari, okantyaata kameetha ijekakagaeyeeni janta jenokinta.

¹⁰ Ari iroka nokaminaakimiri oetaka kameethatatsiri pipantyaariri piperi piyorikite. Paerani tema eeroka itaperotakawori pikowakiro pipagaanteri piyorikite eejatzi itaperotakawori pipiyotapaakiri. ¹¹ Pikowaeyakini petakotaari jerojareejatzi: iroñaaka, eenitatsirika piyorikite pipagaanteriya, ajaatya, pithonkeriya pipagaanantyaariri kameetha piyotteri, potyaanantyaariri. Pipagaantashiyiityaarini kameetha. ¹² Aririka pipashityaari Tajorentsi pikowashitantari pipagaantashitariri kameetha, aritaki riweshtiryaaawentakyaawo oetrika pipashitariri. Tekatsirika powaa-gawo eero ikijantzimiro rirori eerorika pipashitariri.

¹³ Tee nokoyi opomeentsitzimoeyemini pipantyaariri paashinipaeni eejatzi eero opomeentsitzimoeyearini paashinipaeni. Nokowaki pimonkaatawakaeyani. ¹⁴ Omaanta eenitatsi iroñaaka osheki pashaa-ganteeyakan, okameethatzsi pikaminthayeri riraga ashironkaenkari. Linja aririka rashaagantaka rirori, eejatzi aririka pashironkagaeyakyaani eerori, roojatzikya ipiyatemi ikamintheeyemini eerori. Okameethatzsi pimonkaatawakaya. ¹⁵ Tema okantzini Iwaperite Tajorentsi: "Riraga piyotaperotawitakawori manaa, tee otzimimoteeri eejatzi tzimagaantapaetsiri. Omaantakya riraga aatsiri eechonkiini, tee rashironkaa rirori. Aritaki imonkaatawakagaeyakan maawaeni".

Rootaki thame amitakotantyaariri riraga ashironkaenkari.

Rotyaanteeri Teeto iñagaeri eejatzi korintojatzi

¹⁶ Ari ikimitakina Teeto, osheki intintaperoeyakimini, rootaki nopaasonkitantakariri Tajorentsi. ¹⁷ Nokantakiri: "Piyaatashiteeri eejatzi korintojatzi, piñeeri". Omaanta tee apaniroeni naari nokowakayeri, rirojatzi kowashitaperotachari iñagaemi eejatzi. ¹⁸ Notyaantemiri paashini ayemijantzinkarite itsipatanakyaari. Osheki ikenkithatapiintziro iñaani Tajorentsi, rootaki iñaaperoyantakaririni maawaeni aapatziyariri Jesoshi. Eejatzi eerori, pikemakoeayakirini. ¹⁹ Eejatzi riyoyeeyakirini ayemijantzinkarite jika itsipatanakina naari janta Jerojareeki, ramitakotena naaneeniri ashironkaenkari koriki. Osheki ikamintheeyakirini ayemijantzinkarite, rootaki ikanantyaari riraga jerojareejatzi: "Ikameethataki Tajorentsi". Eejatzi riyoteeyanakini osheki akaminthagaeyakirini. ²⁰ Ari ikaataki osheki koriki potyaanteniriri, osheki pikamintheeyakirini. Rootaki nokowantakari eenifatsi tsipatenani naaneeniri; tekatsi nokantya ikanteetanakari: "Pikoshitakiri". ²¹ Tee apaniroeni nokoyi iñaaperotena Tajorentsi nokameethatzsi, eejatzi nokoyi iñaaperoyenani atziripaeni nokameethatzsi.

²² Eejatzi piñaawaeri paashini ayemijantzinkarite notyaanteri. Niyotakiri, ikyaaaryooawentakiro rantziniri Tajorentsi. Nokmantakiri osheki pameenteeyakarini Jesoshi eejatzi osheki pikaminthaanteeeyakini, rootaki

ikowaperotantakari ryaate iñeemi. ²³ Riraga Teeto, kijokiro rowapiintakina, ramitakopiintakinia netakoeyakimini. Eejatzi riraga itsipateeyaaarini iñeemi, rirotaki rotyaantanewopaenai ayemijantzinkaritepaeni jaka. Rirotaki kameethaperotatsiri aapatziyaperotariri Jesokirishito. ²⁴ Ari osheki nokantapiinteeeyakirini aapatziyariri Jesoshi jaka: “Ikameethateeyakini korintojatzi”. Rootaki nokowantari pipagaanteri ayemijantzinkaritepaeni janta Jerojareeki piyorkite ryotantyaawori kyaaryo pinintaperoeeyakirini riori.

9

¹⁻² Tekatsi okantya nojankinatantemirori: “Pikaminthaantyaariri piyemijantzinkarite”. Tema piyoperotakari pikamintheeyakirini. Niyotaki tee pithañeeyarini piyorkite, rootaki nokamanantariri masherooniyajatzi: “Okaataki iroñaaka apaani ojarentsi ikowantakari korintojatzi eejatzi paashinipaeni atziri janta kipatis owaero Akaaya rotyaanteniri jerojareejatzi koriki”. Riyotakoeyakimini, rootaki ikowaperoyantakarini ikimitteeyemini, retakoeyatyaaaririni rioripaeni. ³⁻⁴ Ari nokanteeyakirini: “Ikowaki korintojatzi rotyaanteniri jerojareejatzi iyorikite”. Iroñaaka notyaanteri rioripaeni reewatanakina, ikantemi pipiyotaperotantyaariri. Nimpaeetanee naari noñeyemini, aririka itsipatanakina paashinipaeni masherooniyajatzi. Aririka iñaapaakimi pipiyotakiniri jerojareejatzi piyorkite, ryoteeyapaakini kyaaryo nokantakiriri, eejatzi eero nopalshiwenta naari. ⁵ Ari nokantakiri irika ayemijantzinkaritepaeni reewatanakina, pipiyoteeyantyaaririni piyorkite. Eerokapaenikantashitachari paeran: “Netakoyaari ashironkaenkari”, tee naaka kantaperotemini. Rootaki okameethatantari piperi kameetha.

Tajorentsi ramitakotemi oetarika aririka pamitakoteri paashini atziri oetarikapaeni

⁶ Pikenkithashiryaaakotero iroka: aririka pipiyoteri piyorkite, pikimiwitakari pankwaetatsiri: aririka ipankitero osheki okithoki, rowiitero iinja osheki. Omaanta ipankiterorika eechonkiini, ari eechonkiini raye. Eejatzi eroka, aririka piperi paashini eechonkiini piyorkite eejatzi Tajorentsi apatziro ramitakotemi eechonkiini; omaanta aririka piperi osheki ari osheki ramitakotemi. ⁷ Rootaki pikenkithashiryaaakoeyeroni kameetha, piyoteeyakini tsika ikaate koriki pikowakiri piperiri. Aritaki ikaataki piperiri. Eero pithañashiretari, eejatzi eero ishintsitzimi paashinipaeni. Tema Tajorentsi inintashireperotakiri riraga pashitariri weshiryaaawentariri. Tema ikoyi pimonkaatero iroka. ⁸ Aririka kameetha piperi piyorkite, tema ryotzi Tajorentsi eejatzi ikaminthaaperotakimi kameetha. Aritaki ipakimiro maawaeni koetyeemotakimiri, ipaperotemiro ojeekantyaari, rootaki pimatantyaawori pikaminthaantyaariri eejatzi paashinipaeni. ⁹ Tema aritaki okantzini Iwaperite Tajorentsi:

“Riraga oyaatziriri Tajorentsi ipashitagaantari rowaagawo owashironkaenkari. Tee ratsipetashita ikamintheeyirini irirapaeni, eerokya ipeyakotziro Tajorentsi ikaminthaantzi. Tema Tajorentsi imatakaakiri eekiro ryaatatye ipashitari paashinipaeni”.

¹⁰ Riraga Tajorentsi ipapiintziri pankwaetatsiri okithoki ipanki-tantyaawori, eejatzi ipapiinteeeyakaeni owaeyerini. Tema eejatzi roshekitanakimiro tzimimoeyemirini ojeekantyaari pikamintha-gaeyantyaaririni ashironkaenkari. ¹¹ Eekiro ryaataakaatyeeemi Tajorentsi petakotaperotantyaariri paashinipaeni. Roojatzi ipaasonkiteeyerini riori, iñaaperotaperoeysterini.

¹² Aririka etakotantya aari, apaperoteri aapatziyariri Jesoshi riraga ashironkaenkari koetyeemotakariri. Omaanta eejatzi ayotagaeyerini ipaasonkiteeyerini Tajorentsi. ¹³ Aririka pikaminthagaeyerini piyemijantzinkarite, riyoteeyanakini rirori kyaaryo eeroka rirofaki aapatziyaperoyearirini Jesokirishito kimitaka pikantzi. Eejatzi riyoteeyanakini tee pi-thaÑeevari piyorikite, omaanta osheki petakotantaka, roojatzi iñaaaperoeyerini Tajorentsi. ¹⁴ Osheki ikenkithashireeyakimini, eejatzi osheki ramanapi-intziri Tajorentsi ramitakoeyemini. Riyoteeyakini oshekiperio ineshironkateeyakimini Tajorentsi. ¹⁵ Thame apaasonkiteeyerini irira okaatzi ipashitakaeri, tema ikaminthaaaperoeyakaeniwee: rotyaantakaeri Itomi Jesoshi ikamawentakae rowawijaakotanteeri. Tee amatziro athotyeero ayotero tsika okaatzika ipashitakaeri.

10

Ikamantakowentaa rirojatzi Paaworo

¹⁻² Ari itsipateeyemini janta kijakinari paeni, itheeyakotana, ikantzimi: “Tee ikameethatz Paaworo: tee rantziro ikowakaakiriri Tajorentsi. Aririka itsipateeyakimini ithaawantzimi, tee ishincheenkaperotzimiro ipaante. Omaanta aririka ijekki intena ipakaantakimi iyaaritate, ari ish-incheenkaperotzimiro”. Omaanta tema ineshironkaeyakaeni Jesokirishito, tee ishincheenkatee: eejatzi naaka, nokoyi nokimityaari rirori. Nokantemi eerokapaeni jewawentziriri maawaeni aapatziyariri janta: “Pookeri irirapaeni kantzimi: ‘Tee rantziro Paaworo ikowakaawitariri Tajorentsi, omaanta rantashitakawo ikwayitzirini rirori’”. Teerika imaeritzi rirori, paminawakinakya niyaatashiteri, eero nothaawantapaakari, inta nokijathatapaakiri. Omaanta tee nokoyi nokijathetheeyapaemini eero, inta nokowaki akameethatawakagaeyaani maawaeni. ³ Jaka kipatsikika eenitatsi kamaari kijeeyakaerini: tekatsi akanty omanateri; tee ikimiteeyarini atziripaeni omanateeyantyaaririni. ⁴ Ikimitaka joraaropaeni romanatziri kijakiriri inashitzinkawokipaeni tonkamentotsi, eejatzi aakapaeni omanatantyaari kijanteerori iñaani Tajorentsi inashitzinkawokipaeni oshiyawoni tonkamentotsi. Tema riraga Tajorentsi rirotaki tajonkakowenteeyakaerini amatantyaariri apiyateeyantyaaririni riroripaeni, eejatzi anaakotakiri. ⁵ Eenitatsi riraga piyathatakari Tajorentsi, eejatzi kantziriri atziri: “Eero paapatziyari Jesoshi”. Omaanta itajonkakowenteeyakaeni Tajorentsi amaeritakaantyaariri maawaeni piyatheeyawitakaririni, eejatzi ameentakaaperotyaaariri; eejatzi akempoyaakiro okaatzi akenkithashiryantari amatantyaawori akemijantaperoteri Jesoshi. ⁶ Eejatzi janta pinampiki niyotaki pikemijantaperoyakinan, omaanta naamaashitaka itzimagaantaki apaanipaeni piyathatakina. Omaantakya riraga piyathatakina, nokanteri Tajorentsi rowashironkagaeyerini.

Naaka rotyaantanewo Jesokirishito

⁷ Eeniropi kaweyakinari, eejatzi theenkakinari. Iitawitakina tee naaka rotyaantanewo Jesokirishito. Ikantakotashitaka rirojatzi: “Naaka rotyaantanewo Jesokirishito”, omaanta nokantemi naaka: “Naakapero rotyaantanewo”. ⁸ Nokantapiintakimi rotyaantakina, omaanta kyaaryootaki iroka nokantzimiri. Ikowakaakina Awinkatharite naapatziyakaaperoeyemirini: tee ikowakaana notheenkakagaeyerini. Nantziniri ikantakinari, rootaki kaari nopashiwenanta. ⁹ Tee nojankinatakotziro paashini, tema tee nokoyi nothaawakagaeyerini nowaaritateki. ¹⁰ Eenitatsi kantayitzimirini: “Ichereemotakiri Paaworo

rojankinatantzimiri: ikijathatashtakimi. Aririka ipoke jaka, piñaawakiri tekatsi pipinkathatantawakyaariri. Tee riyotzi ikenkithatakaaper-oeyemini”. ¹¹ Pikamanteri riori: “Aririka rareeteeyemini Paaworo, ikamantaperotapaemiro iroka rojankinateeyimirini. Eero rinashitapaawo ipante”.

Tee okameethatzi ajagaaperotya

¹² Ari iñaaperoeyashitaani ikameethatzi rirojatzi riraga theenkaeyanarini. ¹³ Iitaka nokowantyaari nokomiteeyarini irirapaeni? Ikanteeyakini: “Nomonkaatawakagaeyakan naaka, nokameethaperoeyakini”. Kyaaryo, imonkaatawakagaeyakan, omaanta tee riyoteeyini, tee añiilo riyoteeyantarini. ¹⁴ Tee nokoyi noñaaperotashitya naaka: apatziro nokowaki nantakiniri Tajorentsi maawaeni ikowakaakinari. Niyotaki ikowakaakina naapatziyakaaperoeyemirini eerori. ¹⁵ Tee nantziro kaari ikowakaana, omaanta tema naaka rirotaki itaperotakawori nokenkithatakagaeyakimini paerani. Naakakya itaperotakawori kamanteeyakimirini: “Aririka paapatziyeeyarini Jesokirishito, ari rowawijaakoeyeemini”. ¹⁶ Tee nokoyi nokantashitya nantakiro naaka rantakiri riori: tema rinashitayitakan. Nokowaki eekiro piyaateeyatyeeni eerori paapatziyaperoeyanakyaarini Jesoshi. Roojatzi nokamanteeya naari, ¹⁷ nokenkithatakagaeyerini paashinipaeni atziri eejatzi, riraga kaari riyoteeyirorini. Eero nimpaztiri paashinipaeni kenkithatakantaatsiri, eero nokantashita naaka aapatziyakagaeyaririni riraga raapatziyakaakari riori. ¹⁸ Tee okameethatzi ajagaaperotya antakiri aari, omaanta okameethatzi aweshiryaaawentyaawo imatakagaeyakaerini Awinkatharite. ¹⁹ Tee ikameethatzi iñaaperotashitachari rirojatzi ikameethatzi, omaantakya riraga atziri iñaantakari roojatzi ikanantakari Awinkatharite ikameethatzi.

11

Riraga Paaworo ikenkithatakotaa rirojatzi eejatzi kijakiriri

¹ Nokowaki nokenkithatakoteeya naaka eejatzi. Teerika añiilo niyotan-tari, omaanta eero pijamaneentana. ² Omaanta niyotzi eeniro pimaeritakotana. Naamaakotapiintzimi kimitaka Tajorentsi ikenkithashiryaakopi-intzimi eeroka, tema nokowaki paapatziyaperotyaari apatziro Jesokirishito. Noshiryaakawentemiro, tema ikowaperotapiintzi shirampari rayero kaari shinetaariri shirampari. Aririka oshinetaakyari paashini shirampari ari imanintanakiro, rookaero. Eejatzi nokimitaka naari, nokowaki naapatziyakaaperotemiri Jesoshi iñaaperotantemiri Tajorentsi pikameethatzi, eero rookantzimi. ³ Paerani riraga Jatanaashi ikyaatapaakari maanki ramatawitantakaworini Eewa. Tema rantakaakiro opiyathatantakariri Tajorentsi.

Iroñaaka nothaawakaakimi poshiyawokari Eewa: ramatawiteeyi-minikari. Eero pishinetziri ikompitayemiro okaatzi pikenkithashiryaari, inta eekiro piyaataty eikenkithashiryaakoperotyaari Jesokirishito. ⁴ Tee pikenkithashiryaaneenta. Inashita iroka ikenkithatakotakiri Jesoshi. Nokowakaakimi iyotagaeyemini Ishire Tajorentsi, omaanta ikowakaakimi riori ryotagaeyakotemirini kamaari. Nokamanteeyakimini paapatziyari Jesoshi pawijakoeyanteeyaarini, rinashita ryotagaeyakimirini riori amatawiteeyimirini. ⁵ Iitaka pikemijantashiteeyawakarini maawaeni jatashiteeyimirini. Inashita iroka ikenkithatakotakiri Jesoshi. Nokowakaakimi iyotagaeyemini Ishire Tajorentsi, omaanta ikowakaakimi riori ryotagaeyakotemirini kamaari. Nokamanteeyakimini paapatziyari Jesoshi pawijakoeyanteeyaarini, rinashita ryotagaeyakimirini riori amatawiteeyimirini. ⁶ Iitaka pikemijantashiteeyantaririni? Riraga amatawitantatsiri ikantakaaperotaka ikenkithashireeya ranaakotakina ikenkithatakotziri Tajorentsi. Omaanta tee nokenkithashiryaakotziri naaka ranaakotakina. Itheenkaeyawitanani riori, omaanta iitaka nokowantyaari

nopinkathateri rirori? ⁶ Raamaawitakina tee nokenkithatz kameetha, omaanta niyotayitzironi kameetharini iñaani Tajorentsi. Piyoteeyakinani niyotayitzirini kameetha.

⁷ Pamine, paerani owakira naapatziyakaantakimirri, tekatsi nokowakoneenteeyemini, inta nantawaetzi nojeekantyaari rootaki nomatantyaawori nokenkithatakotakimirri Jesoshi ari pawijakantateeyari. ⁸ Eejatzi naaki iyorikite ipakinari paashinipaeni aapatziyariri Jesoshi, rootaki kaari nonethaakotantzimiri piyorikite nomatantawori niyotaanteeyakimini eerokapaeni. ⁹ Nojeekimoeyantakimirri, nashironkaawitaka, omaanta tee nokamantzimi. Roojatzi ipoñaaka Masheroonyaki ayemijantzinkaritepaeni, ipapaakinari eejatzi koriki. Rootaki tee nokowakoeyimini koriki eejatzi tekatsipero nokowakoeyemini eerori iinja. ¹⁰ Iroka nokashiyakaakimirri rootaki kyaaryooperotatsiri kimitaka kyaaryooperotatsiri iñaani Jesokirishito rootaki iroñaaka nokamantteeyeririni maawaeni akaayajatzi tekatsi nokowakoeyemirrini.

¹¹ ¿litaka nokamanantyaari? ¿Piitzima tee nonintashireeyimini? Riyotzi Tajorentsi kyaaryo nonintashiryaa peroeyakimini osheki. ¹² Omaanta nokowaki niyotakaaperoeyemini tee nokimitari riraga paashinipaeni iyotagaeyawitzimirini, amatawiteeyimirini. Pipinatziri, rootaki riytagaeyantakimirri rirori. Omaanta naaka, tekatsi nokowakotemi. ¹³ Tee rotyaantziri riraga Tajorentsi. Ramatawiteeyakimini. Roshiyakaantashitaka rirotaki rotyantanewo Jesokirishito. ¹⁴ Aritaki ikanta, ramatawitantz, ikimitakari Jatanaashi, ramatawitantz rirori. Roshiyakaantashitakari rirori ronampiri Tajorentsi. ¹⁵ Aritaki ikantari aapatziyariri kamaari: ikowaki roshiyakaantashitaka aapatziyariri Tajorentsi. Tema ikenkithatakotashitakari atziri ijekantyaari kameetha. ¡Ashironkaamatsiterini! Iinja Tajorentsi rowashironkaeri rotyaanteri paamariki kaari tsiwakanitatsini.

Riraga Paaworo ranaakoeyirini kijakiriri riyoaperotzi

¹⁶ Napiiteemiro: eero piitashitana tee afiiro niyotantari. Omaanta pitashitenarika kaari yotatsi, pikemina nokantemi: kimitaka pikemijantakiri riraga amatawitantatsiri. ¹⁷ Tee ikamantana Awinkatharite nokenkithatakota, tee ikowakaana nokantakaaperotashitya, kimitaka riraga amatawitantatsiri. ¹⁸ Omaanta ikantakaaperoeyani riraga kijeevakinarini: iroñaaka nokimitawityaari naari, nokantakaaperotya. ¹⁹ Tema piiteyawitakawoni eenitatsi piyotantari. Rootaki pikemijananteeyaririni riraga amatawitantatsiri paapatziyawo theeyaantsi riyoakimirri. ²⁰ Omaantakya riraga amatawiteeyimirini, tee pitheenkiri rirori. Osheki romperateeyakimini, raapitheeyakimirini piyorikite, ikantakaaperotzimoeyakimini, eejatzi ipajapooteeyakimini eejatzi ikaweyeeyakimini. ¿litakaya? ²¹ Pikowaki eerokapaeni nokimiteri irikapaeni kaari yotzinkari; omaanta kyaaryo tee niyotzi nokimityaari.

Ari riraga amatawitantatsiri eeniro osheki ikantakaaperotawentawoni okaatzi rantakiri: iroñaaka nokimiwityaari, noñaawaetakotero okaatzi awijimotakinari. ²² Ikantakaaperowentakawo ijoriyyotaki. Tema naakakya joriyyo. Isheninkatakari Ishirayeeri, riraga riyoyaanewo Tajorentsi. Eejatzi nokimitakari naari. Ikantzi: "Nosheninkatakari Awaraamani". Eejatzi naari, nosheninkatakari irira. ²³ Ikantashitawita: "Nantziniri Jesokirishito ikowakaakinari". Omaanta naaka osheki nanaakotakiri. Osheki nokyaaryoowentakiro nantziniri Jesokirishito ikowakaakinari, rootaki romonkyaa-ganteetaipiintawitakinari omonkyaaagamentotsiki, ipajapajaatantapiintee-

takinari, omaanta riroripaeni, kaari. Osheki nokamapiintawitaka. ²⁴ Riraga nojoriiyotzinkarite ipajapajaatapiintakina, tak, tak, tak, okaataki 39 ipajatakina. Paashini kitejiri eejatzi 39 ipajapajaataana, tak, tak, tak. Eejatzi ikimitaana paashini kitejiri, okaataki kitejiri apawakooni ipajapajaatakin. ²⁵ Paashini kitejiri rompojantapiintakina wo inchashithaki, tak, tak, tak. Okaatzi apite rapiiteetakina. Eejatzi paashini kitejiriki rompojantaanawo mapi, pok, pok, pok. Eejatzi nokinakowitaa pitotsiki antawokiroña inkaare. Ari otsitsiyanaki, roowiteencha nopiinkemi. Roojatzi eejatzi nokimitapiintaka napiitaki 2 inashitaka kitejiri, nopiinkemi. Apaani kitejiri nothataaga inchapankikira niyankaanikira inkaare, opoñaaga pitotsi; roojatzi nokitejitatotaki. ²⁶ Osheki nokinakinayitanakini nokenkithantan-takari. Osheki nopiinkemi eniki. Osheki ikoshitapiintakina koshitansatsiri, rowashironkaapiintakina. Rowamaenami nojoriiyotzinkarite ee-jatzi paashinijatzitatsiripaeni atziri. Rowamaenami jeekatsiri nampitsiki. Notzimpinawitaka antamiki ari opomeentsitzimotakina osheki janta. Roowiteencha nopiinkemi antawokiroña inkaare. Rowamaenami atziri itheeyashita ikantzi: "Naaka aapatziyariri Jesoshi". Omaanta tee. ²⁷ Osheki opomeentsitzimotakina, osheki nashironkaapiintaka. Osheki tee nomatziro nomaye tsiteniriki. Nokemapiintakiro notashe eejatzi nomiri. Osheki kitejiri tee otzimi noyaari. Nokemakiro nowatsinkari, tekatsi nopewiryakotari.

²⁸ Kyaaryo nokemaatsitawo maawaeni iroka, eejatzi nokantani nokenkithashiryaapiintakiri ayemijantzinkarite, nokowakaaperotakiri raapatziyaari Tajorentsi kameetha. ²⁹ Aririka rowashiretaka ayemijantzinkarite, nowashiretakotakari naari. Eenitatsirika ayemijantzinkarite rantakagaetakiri kaari kameethatatsi, ari noshiyari Tajorentsi nokijawentakirori okaatzi rantzi riraga antakaakiriri ayemijantzinkarite kaari kameethatatsiri. Eejatzi nopashiwentakotyari antakirori.

³⁰ Nokamantereyakimironi iroka piyoteeyantyaarini eero nokantakaap-eraota okaatzi nantakiri, tema tee naaka antashityaawoni oetarikapaeni, omaanta riraga Tajorentsi matakanawori maawaeni. ³¹ Riyotaki rirori tee notheeya. Rivotaki Iriri Awinkatharite Jesokirishito, thame akantee-tatyeyyaani añaaperoteeyerini maawaeni. ³² Paerani ipinkathariwenantzini riraga Areetashi. Rotyaantziri amitakotantsiri ipinkathariwenantzini janta Tamaashikoki. Irira rirotaki otyaantziriri joraarpaeni jaga ashitakokira rinkiteeyakironi maawaeni nampitsi ragaetanteenarimi. Ikwakowaeyaw-itakinani joraarpaeni, ³³ omaanta raanakina ayemijantzinkarite janta shi-rikoki inkitzirori nampitsi. Rateetakaanakina roojatzi omoo, impaetzti royi-takotaana kipatsiki kantziriki. Rootaki nomatantawori noshiyapithatakari pinkathari aakaantenanimi.

12

Koñaatzi iñaaakiri Paaworo kimitaka jataki jenoki

¹ Pamine, tee okameethawita nokenkithatakotapiintya naaka nokameethatz, omaanta nokowaki nokamantemi noñaakiri naari. Eejatzi nokamantemiro ikamantakinari Jesokirishito. ²⁻³ Okaataki iroñaaka 14 ojarentsi raanakina Awinkatharite janta jenokinta, janta oshekinta okameethetyaaperotzi. Iyaatakirkira nowatha, tee niyotzi: apatzirorika iyaataki noshire. Riyotzi Tajorentsi rirori. ⁴ Tekatsi nokantya nokamantemiro maawaeni nokemakiri janta. Aririkami nomawitakyaawomi, eero ikowakaanawo Tajorentsi nokamantemiro. ⁵ Osheki niweshiryaawentayitakawoni noñaayitakirini, omaanta

tekatsi nokantya nokantakaaperotyaawo. Omaanta nokamantemi tee nomatziro nokameethatzi naari apaniroeni. Tekatsi nomate nanteniri Tajorentsi ikowakaakinari apaniroeni: rirotaki Tajorentsi matakaanawori oetarikapaeni, rootaki niweshiryaaawenantakariri. ⁶ Niweshiryaaawentakyaawomi nantakiri naari, eeromi otzimimi niyotantari, eejatzi notheeyami. Ñaakiro, tekatsi nante apaniroeni. Tee nokoyi nokamantemiro nantayitzinirinika naari. Eenitatsi piñaakotakinari eejatzi pikemakotakinari: monkaataka, eero nokantzimiro paashini.

⁷ Eenitatsi osheki riyotakaakinari Tajorentsi, omaanta tee ikowakaana nokantakaaperotyaawo. Rootaki ishinetantakariri Jatanaashi rowashironkaakina, nokemaatsitantakawori nomantsiyataki. ⁸ Okaataki 3 nonethaawitakari Awinkatharite nokantziri: "Petsiyatakotena", ⁹ omaanta ikantakina: "Noneshironkatemi, monkaataka. Eero netsiyatakotzimi, omaanta eero nookimi: notajonkakowentemi pimatantyaawori pantero oetarika nokowakaakimiri". Iroñaaka niweshiryaaawentakawo iroka nokemaatsitakari: niyotaki iroñaaka itajonkakowentakina Jesokirishito. ¹⁰ Rirotaki niweshiryaaawentaperotakari. Tee noshintsitzi, ishirontawenteeyakinani paashinipaeni, nokemaatsitayitakawon oetarikapaeni, ikijectapiintakina, nashironkaapiintaka, omaanta niweshiryaaawentakari Jesokirishito. Tema riyotzi tee noshintsitzi, eenitatsi osheki tee nomatziro nantero, omaanta imatakaakina nantero.

Kameetha ijekaki Paaworo janta Korintoki

¹¹ Ñaakiro, osheki nokenkithatakota naaka. Okameethatemi piñaaperotenami nokameethatzi, pikenkithatakotenami kyaaryooperotatsiri, omaanta, tee. Rootaki nokenkithatakotaari naaka kyaaryooperotatsiri. Tee nokameethatzi naari, tekatsi nantaperote apaniroeni. Omaanta tee ranaakoeyanan riraga iyotagaeyawitzimirini piñaaperoeyawitarini ikameethatzi. ¹² Okameethawita pikenkithashiryaakoperoetenami naari. Paerani, eeniro notsipateeyimini, ari piñaakoeyakinani omatakaakina Ishire Tajorentsi notajonkantayitakini, nantayitakironi kaari piñaapiintzi. Tema iroka niyotakaaperoeyakimini kyaaryo rotyaataperotakina Jesoshi. ¹³ Nokamintheeyakimini, maawaeni. Nokimitakaanteeyakimini maawaeni aapatziyariri Jesoshi janta paashinikipaeni nampitsi. Apatziro eeroka, tee nokanteeyemini: "Pipena koetyeemotakinari". Tekatsikya nantziri oetarika pitheenkantanari.

¹⁴ Rooteentsi niyaate noñaantaatemiri eejatzi. Okaate 3 nareetaatemi. Eero opomeentsitzimoeyimini, tekatsi nokowakoeyemini. Apatziro nokowaki pinintaperoeyenani eejatzi pipinkathatena. Nokimitakagaeyakimini neentsitepaeni. Eentsitepaeni tee ipapiintee koetyeemoteeri, omaanta aaka apapiintziri koetyeemotariri rirori. ¹⁵ Nokañaashitawo maawaeni nantakiri paapatziyaperoeyantyaririni. Oshekiperi nonintaperoeyawitakimini eeroka, omaanta eerori, tee pipiyatana pineshironkatena.

¹⁶ Ari ikanteyimini kijakinari: "Kyaaryo, tekatsi ikowakoeyemini Paaworo, omaanta eenitatsi riyotantari rirori. Naamaaka ramatawiteeyakimini, raapithatantzimirori oetarikapaeni". ¹⁷ ¿Eenitatsima raapithatakimirri riraga notyaantakimirri? Tekatsi. ¹⁸ Chapinki notyaantakimirri Teeto eejatzi notyaantakiri paashini ayemijantzinkarite. ¿Eenitatsima rayitakimirri rirori? Tema ikimitakina naari: tekatsi ikowakoeyemini.

Osheki ikenkithashiryaka Paaworo

¹⁹ ¿Piitashiteeyawitakan apatziro nokowaki noñaawaetakota naaka kyaaryooperotatsiri? Pikompitakawo iroka pikenkithashireeya. Naapatziyakari

Jesokirishito, rootaki nokowantakari naapatziyakagaeyemirini. ²⁰ Osheki nokenkithashiryaaka iroñaaka. Naamaashitya aririka noñeeyapaakimini eero noñaaperotaperoyapaemini. Eejatzi naamaashitya eero piñaaperotawakina naari. Naamaashitya noñaapaakimi aririka pipiyapiyawaantetawakaaka, aririka piñaawenashiryaakotawakaya aririka tee pimonkaatawakaaka, aririka pikijathawatwakaaka, aririka pinashiiyaawoni pikenkithashiryaari, aririka pikantzimatwakagaeyakan, aririka pithawetakotawakagaeyakan, aririka pikantakaaperoeyakan, aririka osheki pikantashiwaetylakan, maawaeni; tee pijeekaeyini kameetha. ²¹ Naamaashitya aririka nareetaemi eejatzi nowashiretakotapaemi. Ro nowashiretakotantemiri, riyotaakina Tajorentsí tee okameethatzí panteyakirini. Nopashiwentakayaari riraga kaari ookironi kaari kameethatatsí rantapiintayitakirini: riraga mayempiyitzirorini tsinani, riraga shirontawentawori iina, riraga ayirori iyashiyani, maawaeni.

13

Ikowaki Paaworo ikemijantakaaperoeyerini korintojatzi

¹ Ari okaataki apite noñaantaatzimiri paerani, iroñaaka nareetaatemí eejatzi. Ari okantzíni Iwaperite Tajorentsí: “Eenitatsirika apite eerorika 3, ūnakoterini atziri rantakiro kaari kameethatatsí, piyoperotaki kyaaryo rantaperotakiro, rootaki okameethatantyaari powashironkaeri”. ² Paerani eenironi nareetantakimiri apitetapaentsiri nokamineeyawitakarini ipakagaero riraga antzirori kaari kameethatatsí, eejatzi iroñaaka nojankineeyakinirini ipakaanteeyaworini ninkarika eekiro ryaatatayee rantero kaari kameethatatsí. Tema iroka apitetapaentsiri nokaminaantziri. Aririka napiitero nareetaatemí tema rootaki tres-tapaentsiri rootaki nowashironkaantapaakyariri eerorika ipakaero rantziri. ³ Rootaki piyoteeyantanakyaariní kyaaryo naaka rotyaantanewo Jesokirishito eejatzi nokamanteeyimironi iñaani. Tee íthaawakagaeyimini irira, omaanta osheki ipinkathariwenteeyakimini, itajorentsitaperotaki. ⁴ Ikentakotanteetakaririni paerani Jesoshi, tee ishintsitawita, omaanta itajonkakowentakiri Tajorentsí rañaantaari. Eenitatsí iroñaaka osheki itajorenka. Tee noshintsiteeyini naari, nokimiwitakari Jesokirishito paerani janta koroshiki. Omaanta itajonkawentakina, rootaki iroñaaka nomatantawori nanteniri oetarikapaeni ikowakaakinari namitakotantemiri.

⁵ Okameethatzí piyotakoeyani eerokapaeni kyaaryorika paapatziyaperoeyakarini Jesokirishito, eejatzi kameetha pikemijantaperoyakirini. Tema piyotzi okithaatkaakimi Ishire itajonkawenteeyakimini. Teerika okithaatkaakimi, tee kyaaryo paapatziyari Jesokirishito. ⁶ Niyotzi aririka pikenkithashiryaakoperotyaawo okaatzí nokantzimiri eejatzi nantziro, ari piyotero kyaaryo riyoakina Tajorentsí nokenkithatakanemiri eerokapaeni iñaani. ⁷ Namanapiintziri Tajorentsí ramitakoeyemini eero pantziro kaari kameethatatsí. Tee nokoyi nowashironkaemi. Eejatzi tee nokowawita piñaaperotashitena, omaanta nokowaperotaki pijeeki kameetha omawitya paashini atziri ikenkithashiryaakotena natsipetashitakawo nantakiri. ⁸ Aririka pantero kyaaryooperotatsiri, eero nowashironkaemi. Tema eero nomatziro nantziro kaari ikantanari Tajorentsí. Omaanta aritaki apatziro namitakotakiri aapatziyariri Jesoshi. ⁹ Nokimoshirewentzimi aririka pameentaperotakaryaari Jesoshi eejatzi pikemijantaperoteri. Aririka pameentaperotyaari monkaatka, eero okantzimoneentana pitheenkanarika, tema tekatsi okantya nowashironkaemi, omawitya ikenkithashireeya amatawitantatsiri nothaawaneentatzi. Omaanta

aritaki namaniri Tajorentsi ramitakoeuemini paapatziyaperoyerarini.
10 Rootaki noshintsithateeyantzimirini nojankinatakimiro iroñaaka, roojatzi aririka nareeteeyemini tekatsikya noshintsithatawentapaemiri eejatzi. Ikowakaakina Tajorentsi nopinkathariwenante, omaanta tee nokoyi nowashironkaeyantemirini, omaanta namitakoeuemini paapatziyaperotantyaariri.

Riwethateeeyanaarini

11 Noweyaantaneemiro, noyemijantzinkarite, niwethateeeyaneemini, nokowaki piweshiryaaawenteeyaarini Jesokirishito. Pikenkithashireeyani, eero papiiteero eejatzi kaari kameethatatsi. Piweshiryaaakaawakagaeyaani, paakameethatawakagaeyaani, roojatzi kijokiro rowaemi Tajorentsi. Tema osheki inintaperoeyakaeni, kameetha ijeekekagaeyaakaeni.

12 Piwethatawakaeya, paakameethataperotawakagaeyaani.
13 Riwethateeeyimini maawaeni ayemijantzinkarite jaka. **14** Nokowaki iroñaaka ineshironkaeyemini Awinkatharite Jesokirishito, inintashireeyaki-minni Pawa Tajorentsi, eejatzi ikithaatakaakimiro Ishire pijeekeanteeyaarini kameetha.

Ari okaatzti

Naaka nojankinateeyimirini:

Paaworo

RIRAGA PAAWORO ROJANKINATZINIRI KARAASHIYAJATZI

1-2 Nokoyi nowethatemi noyemijantzinkarite tsikarika pikanta pijkeki janta Karaashiyaki. Naaka jakaa Paaworo jankinatzimiori iroka. Tee naaka rotyaantanewo atziri, tee ikantana atziri: “Pikenkithatakoteri Jesoshi”, inta otyaantakinari rirotaki Jesokirishito, nokenkithatakapi-intziriri atziri. Eejatzni Ashitariri rotyaantakina: riraga piriinteeriri. Nokaateeyakirini jakaa aapatziyariipaeni, notaanteeyakimironi iroka jankinarentsi eerokapaeni. **3** Nokantapiintziri Pawa Tajorentsi: “Pineshironkaeyerini karaashiyajatzi, pijkeekakagaeyerini kameetha”; eejatzni rirori nokantapiintziri Awinkatharite Jesokirishito. **4** Tema rirotaki shinetaashiteencha paerani ikentakotanteetakariri, rootaki ikowakaakiriri Pawa Tajorentsi. Tee akameethawitani, rootaki ikentakowenantakaeri, rowawijaakoeyanteerini, maawaeni: eero akimitagaa paerani. **5** Thame añaaperotaperooyerini Tajorentsi akanteetatyeyaaani. Aritaki okantyaari.

Ijeki apaani owawijaakotantsiri: riraga Jesokirishito

6-7 Nokenkithashiryaakotakimi, tsikarika pikanteeyakarini. Riyoyaay-itakimini Tajorentsi, rootaki ineshironkatantakimiri Jesokirishito. Appatziro irira rirotaki owawijaakotzimiri. Rooma eeroka paapatziyakari irira. Omaanta iroñaa ka netakoperotakimi, intsipaete pipeyakotakiro iroka niyotaawitakimiri. Paapatziyimaetakari paashinipaeni janta, ikompitakagaeyakimironi. Ikowaki rantakagaeyemironi paashini eejatzni, ikantawitzimi: “Eero imatziro Jesokirishito rowawijaakotemi apaniroeni, inta eejatzni pimonkaatero rametayitarini joriyyopaeni”. Omaanta kyaaryo nokamanteeyawitakimini tsika pikantyaaka pawijakotanteeyari. Eerorika paapatziyana, eero pawijkakotee. **8** Omaanta aririka naaka nopaashiniteromi iroka nokamantzitakimiri, okameethatemi rowashironkaenami Tajorentsi, rotyaantenami paamariki kaari tsiwakanitatsini. Eejatzni ikimitya riraga ronampiri Tajorentsi, aririka ipaashiniteromi, okameethatemi eejatzni rowashironkagaeyerinimi Tajorentsi. **9** Aritaki nokamantzitakimiri, iroñaa ka napiiteemiro: eenitatsirika paashiniteroni nokamantzitakimiri, aritaki rowashironkaakirri Tajorentsi. **10** ¿Ninka nokowakiri nokimoshiryaakayeri? ¿Rioma atziripaeni? Kaari, tema rirotaki Tajorentsi. ¿Rioma atziri nokowaki niweshiryaakayaari? Kaari. Nokowakirkami niweshiryaakayaari atziri, tekatsi nokantyaami nantenirimi Jesokirishito.

11 Iroñaa, noyemijantzinkarite, piyoteeyakini nokamanteeyakimini tsika akanteeyari awijakoeyantyaarini. Tee riro atziri ashityaawoni iñaani kameethatatsiri. **12** Kaari atziri iyotakaanawori iroka, tee riro iyotakaanawori atziri, inta Jesokirishito iyotakaanawori maawaeni. Thame aapatziyawo apatziro iroka.

Tsika ikantaka Paaworo ipeyantaari rotyaantanewo Jesoshi

13-14 Piyoteeyakini tsika nokantawitani paerani: naaka joriyyo, nanaakoeyakirini maawaeni noshiramparinkaki: nomonkaataper-otawitawoni maawaeni rametapiinteyarini nojoriiyotzinkaritepaeni. Kyaaryo, nomataperotawitawoni maawaeni rameteeyarini nocharinii teni paerani, rootaki nokijantawitaririni maawaeni ameenteeyaririni Jesoshi. Najaryaagaeyawitakarini. Nokowawitani nookakagaeyerinimi ameenteeyaririni rirori. **15** Omaanta paerani, tekirani nokoñaatapaakini,

riyotzitakinani Tajorentsi. Ineshironkatzitakinani, rootaki riyoyaantaanari rowawijaakotaana. ¹⁶ Riyotakaakinari itomi, rootaki niyotantariri tsika ikanta. Eeroka kaari nojoriyotzinkarite, omaanta ikowakaakina nokamanteyanteemirini tsika ikantteyakaerini rowawijaakotanteeyakaerini. Tee nojampitashitar paashinipaeni atziri: “¿Oetaka nokamanteriri atziri?” ¹⁷ Tema rotyaantakina Tajorentsi rirotaki irira nokenkithatakotziri. Tee nyaatzi Jerojareeki nojampiteri paashini rotyaantanewo Jesoshi: ritakari rotyaantakiri riraga Tajorentsi, inta nyaataki Araawyaki. Roojatzi nopyianaa ejatzi Tamaashikoki.

¹⁸ Ari 3 ojarentsi nojeekanaki, roojatzi nyaatanaki Jerojareeki, noñaantapaakariri Peetero. Okaataki kitejiri 15 nojeekimotapaakiri. ¹⁹ Ejatzi noñaakiri Jantyaako, riraga rirentzi Awinkatharite. Tee noñiiri paashinipaeni rotyaantanewo Jesoshi. ²⁰ Iñaakina Tajorentsi, riyotaki tee notheeya. Kyaaryootaki iroka nojankinatakimir. ²¹ Roojatzi nokinayitanakini janta iipatsitekinta shiiryajatzipaeni ejatzi shiriishiyajatzipaeni. ²² Tekirani riyoteeyananri riraga aapatziyariri Jesokirishito janta Joreeyaki, ²³ omaanta ikemakotashitakina naapatziyari Jesokirishito. Ikantteyakini: “Ikijeyawiteeni maawaeni, ikowawitan ipakaakaerimi raapatziyakarira Jesoshi omaanta ironaaka ikamanteeyerini atziri: ‘Paapatziyeyarini Jesokirishito’”. ²⁴ Riwhesiryawentakina maawaeni aapatziyariri janta, ikantteyini: “Tema ikameethatzi Tajorentsi, rowawijaakotakiri Paaworo”.

2

Ipiyanaa ejatzi Paaworo Jerojareeki

¹ Ari awijanaki okaataki 14 ojarentsi, roojatzi nopyiantanaa ejatzi Jerojareeki. Notsipatanakari Werenawee ejatzi naaneeri riraga Teeto. ² Tekatsi kaemakaantenani; omaanta riyotakaakina Tajorentsi okameethatzni nyaatenta. Nitakawo tee nyaatashiiyirini maawaeni aapatziyaripaeni Jesoshi janta, inta nyaatashiiyakirini riraga jewawentziriri ayemijantzinkarite. Nokantziri: “Nokmantaperotakiri paashinijatzitsiri atziripaeni: ‘Rirotaki Jesoshi apatziro imatakiro rowawijaakotee’”. Nojampiteeyirini: “¿Okameethatzima iroka nokmantapiunteeyiririni riroripaeni? ¿Natsipetashitawoma?” Ikantteyanani: “Jee, kameetha; tee patsipetashitawo”. ³ Ejatzi Teeto, omawitya kaari joriyo, tee ikantteyelerini: “Pitotonaty pishiramarpartantari”. ⁴ Omaanta ijeki paashinipaeni joriyo kantawitachari: “Naaka piyemijantzinkarite”, omaanta kaari. Tee raapatziyaperotari Jesokirishito. Ikenkithashiryawita: “Kameetha Jesoshi, omaanta okameethaperotzi ejatzi amonkaateeyeroni rameteeyarini achariniiteni”. Itsipateeyakarini aapatziyariri Jesoshi tsikarikapaeni iñaaperotzirinta Tajorentsi. Omaanta ro itsipatantakariri, ikowaki riyote nomonkaateeyironirika rameteeyarini ajoriyotzinkaritepaeni, ikowaeyawitani itotonatakagaeyaarinimi. Tee riyotzi awijakoeyakaeni maawaeni aapatziyariri Jesokirishito, tee romperateeyeeni Jesokirishito amateeyeroni rameteeyakarini joriyyopaeni. ⁵ Omaanta naaka, tee inimotana. Tee naapatziyakoneentari eechonkiini ikantziri. Nokowaperoeyakini piyotaperotero apatziro riraga Jesoshi rirotaki owawijaakotantatsiri.

⁶ Pamine, riraga jewawentziriri aapatziyariri Jesoshi rirotaki paerani riyotaanewo Jesoshi, itsipatapiintari. Rootaki riroripaeni iyoteemir iroñaaka iñaaperotantakariri. Omaanta riraga jewawentziriri aapatziyaripaeni Jesoshi tee inimotziri okaatz riyotaantziri riraga joriyyopaeni, inta inimotakiri niyotaantziri naaka. Rooma nokenkithawaetaantakitariri, tekatsi

paashini ikantawakinari. Tee ikantana: "Ipeyeeyani paashinijatzitsiri atziri joriyyo rawijakontateeeyari".

⁷ Tekatsi romperatena, omaanta ikantaki: "Kyaaryo, rotyaantakiri Tajorentsi Paaworo ikenkithatakaeri paashinijatzitsiri atziri, ikamanteeeyirini tsika ikantyaaka rawijakontateeeyaari. Ikimitaaka rotyaantakiri Peetero ikamanteeyirimi ajoriyyotzinkaritepero aari".

⁸ Kyaaryo, riraga Tajorentsi imatakaakiri Peetero ikenkithatakagaeyirini ijoriyyotzinkaritepaeni. Omaanta naakanya, imatakaakina nokenkithatakagaeyirini paashinijatzitsiri atziri. ⁹ Ñaakiro, reewatakaantzi Jantyaako, Peetero eejatzi Jowa. Ari riyoteeyakini rirori itajonkakowentaana Tajorentsi. Iñaaperoeyawakinani, eejatzi iñaaperoeyawakirini Werenawee; ikanteeyakinani: "Kyaaryo, akimitawakagaeyakan. Okimitaka nokenkithatakagaeyirini naari ajoriyyotzinkarite, piyaateeyeni eero ka pikenkithatakagaeyerini paashinijatzitsiri atziri". ¹⁰ Apatziro eejatzi ikantakina: "Pikaminthagaeyerini owashironkaenkari". Tema aritaki nametakawo nokaminthaapiintziri.

Rantziri Peetero janta Antyokiiyaki

¹¹ Ikanta ipokantakari Peetero Antyokiiyaki, eeniro ikompitakawo, rootaki nukanantakariri. Iroñaaka nokaman temiro tsika okantari.

¹² Rareetantapaakari rirori, rowakotapiintawitakari kaari joriyyotatsi, rootaki rowantakariri riraga kaari rowayitani joriyyo. Okameethatzi iroka, omaanta roojatzi rareeteeyantapaakani rotyaantanewo Jantyaako. Riraga Peetero ithaawantakari riraga kantsatsiri okameethatzi amonkaateeyeroni rojankinarini Moeseeshi owawijaakotanteeri, rootaki itsiparyaantanakariri riraga rowakoeyawitakarinira. Omaanta iroka rantakiri, tee okameethatzi. ¹³ Roojatzi iñaakoeyakirini riraga paashinipaeni joriyyo rantakiri Peetero eejatzi ikimiteeyakanani: itsiparyaanteeyanakaririni iyemijantzinkarite, ipashiwentakagaeyakarini itsipateeyaneeyarini. Riyotakagaeyawitakarini paashinipaeni ayemijantzinkarite tee okameethatzi riraga joriyyopaeni rakiyoteri paashinijatzitsiri atziri, eejatzi ikimiteeyakarini Werenawee.

¹⁴ Noñaantapaakariri naaka Peetero eejatzi paashini joriyyopaeni tee itsipateeyarini paashinijatzitsiri atziri, niyotaki tee imonkaatziro iroka kyaaryootatsiri akamanteeyiririni atziri: "Rowawijaakotashiteeyeeni apatziro Jesokirishito, tee ikanteeyeeni amonkaatero rametayitarini ajoriyyotzinkarite awijakontanta". Roojatzi ipiyoteeyantakarini maawaeni ameenteeyaririni Jesoshi, nokantzimotakiri irira riraga Peetero: "Tema eero ka joriyyo, omaanta chapinki tee pikimitaperotari ajoriyyotzinkaritepero, inta pikimitakari paashinijatzitsiri atziri. Piyotaki apatziro Jesoshi rowawijaakotakimi; omaanta iroñaaka tee powanaawo maawaeni owanawontsi ikimitaga kaari joriyyotatsi rowayitawoni maawaeni; inta powakawo rametayitarini achariniiti. Kimitaka pikenkithashiryaaakagaeyakarini tee riro Jesoshi apatziro rowawijaakontantzi. Pikenkithashiryaaakagaeyakarini okameethatzi eejatzi imonkaatero maawaeni rametayitarini joriyyopaeni. Tee okameethatzi iroka.

¹⁵ Pamine, aakataki joriyyo, ashi oyiro ajoriyyoeyini. Tee akimitari paashinijatzitsiri atziri: tee riyoteeyirini paerani riraga Tajorentsi. ¹⁶ Riraga joriyyotatsiri ikantawita: 'Aririka amonkaateeyeroni maawaeni rametayitarini ajoriyyotzinkaritepaeni, ari iñaaperotee Tajorentsi akameethatzi'. Omaanta ayotakiro kaari iroka, inta iñaaperotanteeri akameethatzi aririka ameenteeyari Jesokirishito, eero ikenkithashiryaaawo eejatzi kaari kameethatatsi anteeyakirini. Tema aaka ameenteeyakarini Jesoshi, aapatziyakari, rootaki iñaaperoeyantakaerini Tajorentsi

akameethatzi, ikimitakaantakae tee anteeyironi kaari kameethatatsi. Tee ikenkithashiriiro amonkaatakirorika rametayitarini ajoriyyotzinkarite. Tee iñaaperotashitari ikameethatzi riraga monkaateeyerorinimi maawaeni rametayitarini achariniiteni". Rootaki nokantakiriri Peetero eejatzi maawaeni nojoriyyotzinkarite. Kyaaryo, aririka amonkaatawityawomi rametayitarini ajoriyyotzinkarite, eero omatee owawijaakottee. Apatziro rowawijaakotanzi Jesoshi.

Eero owawijaakotee rojankinarini Moeseeshi

¹⁷ Pamine, ¿iitaka ameenanteeyakiririni Jesokirishito? Tema akowaki rowameethashireteeyeeni, rootaki apakaantawori akowawitari amonkaateromi rametayitarini achariniiteni rootaki awijakotanteeyaaari. Rootakima ¿rantakagaayaakerini Jesokirishito kaari kameethatatsi? Kaari, tee rantakagaero. ¹⁸ Kyaaryo apakaantawori amonkaatawityaarimi rametayitarini achariniiteni, tee antziro kaari kameethatatsi. Omaanta nokantemirkami iroñaaka: "Thame amonkaatero rametayitarini achariniiteni owawijaakotanteeri", tema nantakiro kaari kameethatatsi nopakaantawitawori nomonkaatawityaarimi rametayitarini achariniiteni.

¹⁹ Ñaakiro, nomonkaatakirorikami rowaga ametayitarini aaka joriyyopaeni achariniiteni niyotanaki tee okameethatzi nameenteeyawo roori iñaaperotanteenari naari Tajorentsi nokameethatzi. Rootaki nopakaantawori, inta iroñaaka nameentaari apatziro Jesokirishito.

²⁰ Ikentakotaka Jesokirishito koroshiki, ikamaki. Iroñaaka kimiwitaka notsipatakari naari koroshiki, nokamaki. Kyaaryo, eenirona nañi, omaanta tee naaka añaashitachani apaniroeni, omaanta kijokiro rowana Jesokirishito. Iroñaaka tee nantziro nokowakaari naari, inta nantziro ikowakaakinari Jesoshi. Rirotaki Itomi Tajorentsi naapatziyakari. Initashireperotakina, eejatzi ikamawentakina. ²¹ Tee ratsipetashitawo Tajorentsi ineshironkaeyakaeni. Omaanta, pikenkithashiryaakari aririka pimonkaateeyakironimi rametayitarini nojoriyyotzinkarite ari pawijakoeyakini. Pameentakyaaworkami rowaga rametayitarini tekatsi pikantyaami paapatziyari Jesokirishito. Eerorikami paapatziyari, tema ratsipetashitakawo ikamawenteeyakimini.

3

Aririka aapatziyaari Jesoshi, tema akithaatakotakawo Ishire

¹ Iroñaaka, karaashiyajatzi, tee añaaro piyotantari. ¿Ninkama amataawiteeyimirini? Paerani nokamanteeyakimini ikentakotawenteeyakaeni Jesokirishito rowawijaakotantakaeri. Piyotaperoeyawitakawoni, iroñaaka pikompitanaawo. ² Apaani nojampiteeyemini: rowaga Ishire Tajorentsi, ¿iitaka ikithataakaantakimiori? ¿Rootakima pimonkaateeyantakaworini rametayitarini nojoriyyotzinkarite ikithataakaantakimiori? Kaari. Tema ro ikithataakaantakimiori paapatziyakawo nokamantzikimiri. Tema pameentakari Jesokirishito. ³ Paapatziyantakariri paerani, ¿tsika pikantakari pawijakoeyanteeyarini? Tema ro Ishire Tajorentsi. ¿ilitateetaka jaga pikowantakari iroñaaka pimonkaateeyeroni rametayitarini nojoriyyotzinkarite? ¿Arima omatakagaayaeyakimini ikowakagaeyakimiri Tajorentsi? Eero. ⁴ Osheki pikemaatsitawentakari Jesokirishito. ¿Patsipetashitawoma? ⁵ Pamine: tema rotyaantakimiro Tajorentsi Ishire. Tema itajonkakowentapiintakimi. ¿iitaka itajonkakowenantakimiri? ¿Rooma pimonkaatapiintakiro rametayitarini nojoriyyotzinkarite? Kaari. Tema pameentakari, rootaki itajonkakowenantakimiri.

Rameentakari Awaraama Tajorentsi, rootaki iñaaperotantakariri ikameethatzi

⁶ Tema eejatzni pikimitakari Awaraamani. Rameentakawoni paeraniperoroña maawaeni ikantakiriri Tajorentsi, rootaki iñaaperotantakariri ikameethatzi, kimiwitaka tee rantziro kaari kameethatatsi.

⁷ Iroñaka ñinka sheninkaperotaariri Awaraamani? Tema riraga kimitaperotaariri: riraga ameentaperotariri Tajorentsi. ⁸ Paeraniperoroña ikenkithashiryakotzitakarini aririka paashinijatzitsiri atziri rameenteeyaaari, aritaki iñaaperotakiri Tajorentsi rirori ikameethatzi. Rootaki ikamantzitakaririni iroka kameethatatsiri: “Eeroka pamitakotena iinja notajonkakowenanteeyaaaririni jeekaeysatsirini maawaeni kipatsikipaeni. Inja rirotaki pisheninkani owawijaakotantsiri”.

⁹ Aritaki ikanta, itajonkakowenanteeyakarini maawaeni ameenteeeyakaririni Jesokirishito, ikimitakaanteeyakarini Awaraama rameentakari Tajorentsi.

¹⁰ Rootaki ayontawori iroka: maawaeni kowatsiri imonkaateeyeronim maawaeni rojankinatakirini Moeseeshi rawijakotanteeyarimi, aritaki ikantakotzitakarini Tajorentsi paerani. Rooma rootaki ikantakotzitantakaririni: tekatsi materoni imonkaatero, rootaki rowashironkaanteeyaririni, rotyaanteeyerini paamariki kaari tsiwakanitatsini. Ñaakiro, okantzi Iwaperite Tajorentsi: “Rowashironkaeyerini Tajorentsi riraga kaari monkaataperotapiinteyiyorini maawaeni rojankinayitzirini Moeseeshi”.

¹¹ Ñaakiro, tekatsi akantero amonkaateeyeroni maawaeni rowaga jankinarentsi. Rootaki kaari iñaaperotanteeyerini Tajorentsi akameethatzi, omaanta ikantakae irira: “Aririka pameenteena, ari noñaaperoeyakimini pikameethatzi, roojatzi pikanteetatyeyaaani pañagaeyaneeni”. ¹² Eejatzni rowaga rojankinarini Moeseeshi tee iyotagaeyeeni ameenteeeyari Tajorentsi awijakotanteeyari, apatziro rowaga iyotagaeyakaeni akantatyeyaaani amonkaataperoteromi maawaeni okantayiteerini, awijakotanteeyaaari.

Rantakaeniri Jesokirishito

¹³ Kyaaryo rowawijaakotakae Jesokirishito rootaki kaari rowashironkaantee Tajorentsi omawitya tee amonkaatawito rojankinarini Moeseeshi. Omaanta Tajorentsi rowashironkaantakari antani Jesoshi janta koroshiki ikamawentakae aaka rowawijaakotantakari. Tema okantzitani Iwaperite Tajorentsi: “Riraga kentakotachani inchatoki, rowashironkaanteetakari rantani. Ari ikantakaantziro pinkathari”. ¹⁴ Ari ikamawenteeyakaeni Jesokirishito riraga icharineeteni Awaraamani. Ikamawenteeyakaeni maawaeni joriiyotsatsi eejatzni kaari joriiyotsatsi, rowawijaakoeyantaaririni maawaeni ameenteeeyaririni. Eejatzni Ishire Tajorentsi, tema akithaatzitakari maawaeni ameenteeeyaririni Jesokirishito. Rootaki ikashiyakaetakaririni Awaraamani paerani.

Ikashiyakaetakarini Tajorentsi Awaraamani

¹⁵ Pikenkithashireero, noyemijantzinkarite, iroka ameteeyakarini. Aririka akowaki akashiyakaerai ajoriiyotzinkarite aperi oetaríkapaaeni, ojankinateniri akashiyakaakiriri, riyoperotantyaawori. Eejatzni ojankinatero awaero. Tekatsikya paashini ikantya atziri rowashineero iwaero, eero imatziro ramatawiteri riraga akashiyakaakariri oetaríkapaaeni. ¹⁶ Eejatzni riraga Tajorentsi, ikantziri Awaraama: “Aririka paapatziyena ari nowawijaakoteemi”. Eejatzni ikantakiri: “Notyaanteri picharineteeyaaari iinja, rowawijaakoeyeerini maawaeni ameenteeeyaaaririni”. Pamine, tee ikantzirini: “Notyaanteeyerini osheki owawijaakoeyemini”. ¡Eero! Irira ikenkithatakotakiri apaniroeni

icharineteeyari paata owawijaakotantatsini: riraga Jesokirishito. ¹⁷ Ñaakiro, ikantakirini Tajorentsi Awaraama paeraniperorooña. Ikanantakaririni, tekirani ojeekeni rojankinarini Moeseeshi. Ari okaataki ojarentsi 430, roojatzsi rojankinataakaantakari Tajorentsi Moeseeshi. Tee ipaashinitziro iroka ikamantzitakaririni riraga Awaraama, tee ramatawitziri. ¹⁸ Aririkami imonkaateromi Awaraama rojankinarini Moeseeshi, rootaki rowawijaakotantakyaaririmi Tajorentsi, eeromi ikashiyakayirimi rowawijaakoterimi. Omaanta rirotaki kowashitacha rowawijaakotashitari. Tee ro rowawijaakotantakariri Tajorentsi Awaraama imonkaatakiro rojankinarini Moeseeshi. Rooma tekatsi.

¹⁹ ¿Oetaka ojeekantakari rojankinarini Moeseeshi? Iyotakagaeyakaeni eeniro antani, rootaki akowaeyantakarini owawijaakoeyeeni. Ipokaki Rotaantaneo Tajorentsi, iroñaaka tee akowaero rojankinarini Moeseeshi. Tema rirotaki Jesokirishito icharineni Awaraama: riraga ikamantzitarini paeran Tajorentsi: "Notyaantemiri iinja owawijaakotemini". Eejatzi nokamantemiro iroka: riraga Tajorentsi ikantziri ronampiri: "Pikamanteri Moeseeshi noñaani". Ari ikantakiri. Roojatzsi riraga Moeseeshi ikamanteeyakirini atziripaeni iñaani Tajorentsi. ²⁰ Omaantakya ikenkithatakap-erotakiri Tajorentsi Awaraama, tekatsi kamanterini. Apatziro ikamtakiri apaniroeni. ²¹ Paerani ikantziri Tajorentsi Awaraama: "Aririka paapatziyena, aritaki nowawijaakotakimi". Roojatzsi rojankinataakaerir Moeseeshi, otzimantakari rojankinari. ¿Inashitama iroka rojankinataakaerir Moeseeshi? Teewee. Iroñaaka ayoteeyini tee owawijaakoeyeeni rojankinarini Moeseeshi, tekatsi okantee owameethashireperoeyeeni rootaki kaari imatantawori Tajorentsi iñaaperotee akameethatzi. ²² Omaanta iyotakagaeyakaeni rowaga rojankinarini Moeseeshi eeniro antanipaeni maawaeni. Tee amateeyironi ikowakaakaerir Tajorentsi. Omaanta eeniro ikanteeyakaerini maawaeni aaka aapatziyariri: rootaki akowantari ameen-teeyaari Jesokirishito, aritaki rowawijaakoeyakaeni.

²³ Paerani, osheki omperateeyawitakaeni rojankinarini Moeseeshi, okimitakari waairrya, aririka romonkyaaagakae omonkyaaagamentotsiki. Okimitakaantakae okempoyeeyakaeni roojatzsi ipokantteeyaaari riraga aapatziyeyearini. ²⁴ Eejatzi rojankinarini Moeseeshi oshiyakari iyotaantatsiri: iyotakagaeyakaeni eeniro antani, akowanteeyakarini ameenteeyaaarini Jesokirishito, rowameethashiryaanteeri, iñaakae akameethatzi, ikimitaakaanttee tee antziro kaari kameethatatsi. ²⁵ Iroñaaka ayoteeyakirini Jesokirishito, ameentakari. Aritapaaki. Tee okempoyee iroñaaka rojankinarini Moeseeshi: tema monkaataka.

Aakapaeni aapatziyariri, akimiteeyakarini Awaraamani

²⁶ Ameenteeyakarini Jesokirishito, rootaki itominanteeyakaerini Tajorentsi. ²⁷ Pamine, eejatzi akaawoshitakotawentari Tajorentsi riyoteeyantakaerini atziri ameentakari Jesokirishito, eejatzi asheninkateeyakarini Tajorentsi. ²⁸ Iroñaaka akaateeyakirini joriyyotatsiri, kaari joriyyotatsi, eejatzi akaateeyakirini pimantaari, kaari pimantacha, shirampari, tsinani, maawaeni: amonkaatawakagaeyakan ameenteeyakarini Jesokirishito. ²⁹ Eejatzi okimitaka, aririka asheninkateeyakarini Jesokirishito, eejatzi asheninkateeyakarini Awaraamani. Tema Jesokirishito rirotaki icharineni. Paerani riraga Tajorentsi ikashiyakaayitakarini itajonkakowenteeyakaeni aaka, ikimitaakirira itajonkakowentakiri Awaraamani.

4

Tsika akantawitani paerani, tekirani ipokini Jesokirishito

¹ Piyotakotziri rametayitakarini ashaagantachari. Eeniropi itomi, ikowaki iperi maawaeni rashitayitarini. Eejatzi ikantziri isheninka: "Aririka nokamaki paata, pikempoyaawakiniri notyomyaaniki maawaeni nashitayitarini. Aririka rantarite, ari pipaeri maawaeni". Ikamantakari iriri, iroñaka rirotaki ashitanawori itomi maawaeni, omaanta eeniro reentsitzi, ari ikimitakotakarini omperanarentsi. ² Eenitasi kempoyiriri, eejatzi kempoiiniriri rashitayitarini. Aririka omonkaatapaeya ikantakiriri iririni, aritaki ishinetagaeri ragaero rashaagawo. ³ Aritaki akimitawitani paerani aari, tekirani ipokini Jesokirishito. Okempoyaawiteeni rojankinarini Moeseeshi, iyotagaeyawiteeni antapiinteeeyironi pomeentsitayitacharini. Akemijantashitayitawonni ikantayitzirini atziri, rootaki omperateeyantakaerini oshiyakari omperanarentsi ikemijantaperotapiintziri omperatariri. ⁴ Roojatzi areetantapaaka kitejiri riyoyaantakawori Tajorentsi omonkaaperotantakari ikantzitakarini rirori, rootaki rotyaanantakarini itomi, ikoñaatantapakawo tsinani, joriyyo rinawitapaaka. Oztimaye ikemijantaperotapaakiro rirori rojankinarini Moeseeshi. ⁵ Rootaki rotyaanantakariri Pawa Itomi ikamawentakae rapaatawentakaero riraa eero omperatanee rojankinarini Moeseeshi. Akimiwitarini pimantaari, omaanta rowawijaakoeyakaeni, rootaki iroñaka itomintaperoeyantakaerini Tajorentsi.

⁶ Rootaki ayotantariri aakateeyakini itomipaeni, aritaki ikanta Tajorentsi eejatzi Itomi rotyaanteeyakaeroni Ishire okithaatakaakae. Rootaki iroñaka akanteeyantaaririni: "Eeroka Pawa". ⁷ Tee aakapaeni iroñaka pimantaari, inta iroñaka aakateeyakini itomipaeni Tajorentsi. Ineshironkaeyakaeni, eeniro ikashiyakagaeyakaerini maawaeni.

Aririka apomeentsi twentyaawo rojankinatziniriri Moeseeshi, akimitakari pimantaari

⁸ Paerani, eerokapaeni tee piyoteeyawitarini Tajorentsipero, piitajorentsiteeyawitarini riwetsikanipaeni atziri, rootaki omperateeyawitakimirini. Omaanta tekatsi okanteyya otajorentsite. ⁹ Omaanta iroñaka piyoteeyakirini Tajorentsipero, eejatzi riyotaperotakimi eerori, reentsiteeyakimini. Eejatzi iñlaaperotakimi pikameethatzi. ¿litaka pikowaeyantakarini pikimiteeyaa paerani? ¿Eeniropi pikenkithashiryakawo okameethatzi pimonkaateromi rametayitarini joriyyopaeni aritaki owameethashiretakimi? ¿litaka paapatziyashitantlyaariri kaari tajorentsitsati? Eero imatziro rowawijaakotemi. ¿Pikowakima pikimiteeyaa eejatzi pimantaari? ¹⁰ Eerokapaeni rirotaki paashinijatzitatsiri atziri omaanta pikimtaari joriyyopaeni: pinashitaakaapiintayitawoni kitejiripaeni, kashiripaeni, ojarentsipaeni, oetarikapaeni. Ro pinashitakaapiintayitantaworini piitashitawitaka ari rowameethatakimi. ¹¹ Osheki nokantashiryaka iroñaka. ¿Natsipetashitakawoma nopyomeentsitawentakimi niyotagaeyawitakimini?

¹² Iroñaka, noyemijantzinkarite, osheki nokowaperotakaakimikya pikimiteeyenani: eero pipomeentsitawentaawo rojankinarini Moeseeshi. Tema nookaero naari, iroñaka nokimiteeyeemini eerori, tee pipomeentsitawentawoni paerani, tee piyotawitawoni. Niyaatashitantakitzimiri paerani, tee pitheenkaeyawakinani inta paakameethateeyawakinani.

¹³ Eejatzi piyoteeyakini nokamanantapaakimirini tsika pikantyaaka pawijakotantyaari, omawitya noshipetawathawitya naaka.

¹⁴ Pipinkimatawakinarikami noshipetawathawaetantarini. Rooma tee pipinkimatawakina, kameethapero paakameethaperotawakina kimitaka riro paakameethaperotawaki ronampiri Tajorentsi, eejatzi kimitaka riro paakameethaperotawaki Jesokirishito. ¹⁵ Omaanta iroñaaka pitheenkimatakina. Pipeyakotakiro paerani pikimoshirewentawakina. Nokamantakoeyakimini paerani pikaminthaaperoyakinani. Nokantemirkami: “Pipenawo poki”, ari pipakinawomi, aririka pimateromi. Niytaki osheki pinintaperoeyakinani. ¹⁶ Ari piyotaki kyaaryooperotaki iroka nokenkithatakagaeyakimirini. Inta eekiro nokenkithatakagaeyanakitziimironi iroka kyaaryooperotatsiri, ¿iroñaakama pikijantenawo?

¹⁷ Kyaaryo: ikowaki riweshiryaakayemi riraga amatawitzimiri, omaanta eero ramitakoperotzimi. Ikowaki pitheenkaeyenani naari, paapatziyangtaariri riori. ¹⁸ Pamine, nokowaki naaka namitakoperotemi maawaeni kitejiri: aririka notsipatemi, eejatzi aririka notsipayaaneemi, nokowaki niyotaakotemiri Jesoshi, eejatzi nokowaki namitakotemi. ¹⁹ Nokimitteyakimini eeroka neentsite. Okimitaganki tsinani aririka okoñaawanite otomi, osheki okemaatsiperotanakawo katsiri. Ari okimitzimowitakina naari, oshekiperi nokemaatsitawenteeyakimini najankanekira, roojatzi pamaintaperotantakyaariri apatziro Jesokirishito, maawaeni pajankaneki. ²⁰ Nokowaperotawitakaroña nojeekimotanakimimi, kameetha nokenkithatakaaaneemimi. Tee niyotakotzimi oetarika nokantemiri ojeekantanakyaari piyoperantanyaari.

Iroñaaka nokenkithatakotero Akaara eejatzi Jaara

²¹ Aririka piitawitaka pimonkaatakiro rojankinarini Moeseeshi pawijakotanteeyari, pikamantena: ¿piyotaperotziroma okantziri rojankinarini? ²² Okantzi eenitatsi Awaraama itomi apite. Apaani ashí omperanawo iina ramanantziro. Riraga paashini ashí iinapero, tee ramanantziro irowa. ²³ Riraga otomi omperanawo ikimitaperoeyakarini paashinipaeni eentsipaeni. Omaanta inashita rirotaki otomi iinapero. Ikantzitakawoni Tajorentsi: “Aritaki itzimaki pitomi paata”. Ari monkaataka ikantakirori, tzimaki iroñaaka. ²⁴⁻²⁵ Eeniro oshiyakaawentakiri iroka tsinani apite. Owaero omperanawo Akaara. Oshiyakaawentakiri roori pomeentsiwentawori rojankinarini Moeseeshi. Rojankinatakiro irira ikantakiriri Tajorentsi janta tonkaariki jeekatsiri janta Araawyaki, oetachari Shinayii. Otomi rowaga omperanawo, ikimitakawo riniro: rirotaki omperanari riori, eeniro omperatariri. Eejatzi oshiyakaawentakiri omperanawo joriiyopaeni jeekayitatsirini iroñaaka Jerojareeki: ratsipetashitakawo ipomeentsiwenteeyakawoni rojankinarini Moeseeshi, maawaeni. ²⁶ Omaanta eeniro paashini tsinani, rowaga Jaara iinapero Awaraama. Okimitakawo aniro. Oshiyakaawentakiri roori jeekayitatsini iinja paashiniki Jerojaree, jeekatsiri iroñaaka jantajenokinta. Akateyakini jeekatsini iinja janta, anampiteeyawoni. Tee aakapaeni omperanawo; tee apomeentsiperowentawo. ²⁷ Rootaki rojankinatakotakirini Iseeyashi: “Pijeekashitawitaka omaanta piweshiryaanakya. Tekira itzimi pitomi, omaanta pikimoshireperotanaki, roshekiperotanaki pijaripaeni, eero roshekiperotzi ojaripaeni omperatzimiri”.

²⁸ Iroñaaka, noyemijantzinkarite, aaka asheninkateeyakarini Jesokirishito riraga icharineni iinja Ijaaka, riraga itomi ikashiyakaakariri Tajorentsi Awaraama. Rootaki acharineteeyantakaririni eejatzi ikashiyaka-gaeyakaerini riori. ²⁹ Paerani, otomi omperanawo ikijapiintakiri rirentzi: riraga Ijaaka otomi Jaara iinapero Awaraama. Riraga Ijaaka

rirotaki ikashiyakaakiri Tajorentsi. Iroñaaka eejatzi okimitaaka, riraga kowatsiri amonkaateeyeroni rojankinarini Moeseeshi ikijapiinteyakaenai aari: tema aakateeyakini ameentakariri Jesoshi riraga icharineeteni Awaraama.³⁰ Eniro iroka okantziri rojankinatziniri Moeseeshi: "Ikantziri Tajorentsi Awaraama: 'Potyaanteero rowaga pomperanawo eejatzi otomi. Riraga otomi, eero ikimitaperotari otomi piinapero. Riraga Ijaaka rashitaperoteeyawo maawaeni jeekimoteeyimirini' ".³¹ Ñaakiro, noyemijantzinkarite, iñaaperotakae Tajorentsi rootaki tee ajawoteeyawoni rowaga omperanawo. Roori oshiyakaawentakiro rojankinarini Moeseeshi; rootaki kaari apomeentsiwenantawo rojankinarini Moeseeshi. Omaantakya ojariipaeni rowaga Jaara rirotaki ikashiyakagaeyakiririni Tajorentsi Awaraama. Iroñaaka akimiteeyakarini riroripaeni rootaki asheninkateeyantaririni icharineteeyarini Awaraama: riraga Jesokirishito.

5

Piyoyagaantya: teerika inimotzimi pipeyeeya joriyo, ari paapatziyari Jesokirishito

¹ Tema paerani rowawijaakotakae Jesokirishito, rootaki iroñaaka okameethatantari oyaataperoeyerini. Tee ikoyi akimiteeyari pimantaari. Eero pikoyi romperateetemi pantayiteroni oetarikapaenai pawijakotanteeyari. ² Pikemijantaperotena. Naakatakikya naaka kamantzimirori iroka. Aririka pitotonatakaantya pishiramparitantari, ¿piitzima ari owawijaakotakimi? Eero, patsipetashitakawo pitotonatakaanti. Apatziro pameentaperoteryaari Jesokirishito, pawijakotantyari.

³ Nokamanteemi eejatzi: aririka pitotonatakaantya pawijakotanteeyari, okameethatzi pimonkaateeyeronimi maawaeni rojankinarini Moeseeshi, pithotyeero maawaeni. Eerorika pimonkaateeyironi maawaeni, eero pawijakotzi. ⁴ Aririka pikoyi pimonkaateeyeroni rojankinarini Moeseeshi iñaaperotantemiri Tajorentsi, tee pikoyi ineshironkatemi. Pitheenkakiri Jesokirishito. ⁵ Omaanta naaka naapatziyari irira noyaataperoeyakirinikya. Niyotaki eerokapaenai tee kijokiro powaeyirini rirori. Omaanta aririka ashinetero Ishire Tajorentsi iyotagaeyeeni aapatziyari Jesoshi, ayoteeyakini imonkaatero riraga Tajorentsi maawaeni ikantakaeri. Aritakikya ayoteeyakini rowameethataperoeyeeni.

⁶ Aririka akempiyaaminthatakyaaari Jesokirishito, ayoperotaki eero rojampitee Iriri: "¿Pitononatama?" Eero ikenkithashiryakotee. Omaanta ikenkithashiryakotakae aririka ameentaperotakyaarikya Itomi aritaki anintaperoeyakirini paashinipaeni atziri. Rootaki ikowakaakaeri Tajorentsi.

⁷ Paerani kameetha paapatziyeyawitarini. Paapatziyaperoteeyawitakawoni kyaaryootayitatsirini. ¿Ninkama ookakaakimiroi paapatziyawitakari?⁸ Tee rookakaemiro Tajorentsi. Rirotaki kowakaakimiroi poyaatero kyaaryooperotatsiri. ⁹ Aririka owetsikya paa ari owaetakya tapiyakaawori apatziro owaetakya eechonkiini, othotyaanakiro maawaenai otsichaagantakawo. Eejatzi okimita roori, paapatziyakowitzakarira eechonkiini ikantziri amatawitatantsiri, ari ikenkithashiryaanakyaami atziri eekiro piyaatanakityeemi pameñaaperotanakyaawomi. Roojatzi pimataperotanteeyaaami pipaashiniperoteero oetarika pikenkithashiryaaityyaarini. ¹⁰ Omaanta naaka nameentakari Tajorentsi, niyotaki ikenkithashiryakaaperoeyemini, eekiro piyaatatye pikimiteeyantenerini. Omaanta iinja rowashironkaeri Tajorentsi, riraga kowatsiri ikompitakaayitemironi, omawitya rirorika

atziri jewatatsiri. ¹¹ Noyemijantzinkaritepaeni, eenitatsi theeyakotakinari ikantakotakina nokamantziri atziri imonkaatero rojankinarin Moeseeshi. Nokantemirikami: "Pitononatyaw pawijakotanteeyaaarini", eero nokamantzimimi: "Ikamawentakae Rotyaantanewo Tajorentsi koroshiki rowawijaakoeyakaeni". Roojatzti eeromi ikijanami joriyyopaeni. Ikijaneenantakinawo osheki nokenkithatakotakirira Jesoshi ikamawentakae koroshiki omaanta rametayitarini nochariniiteni eero apomeentsitawentawo. ¹² Eenitatsi riraga kantawitzimiri pitotonatyaw, osheki roñaashirenkakina. Nokenkithashiryawaawita naari rirotaki oeyoyeroni iyatharekitho, aririka iyoteemi tee okameethatzi ikantzimiri.

Aririka pinintaperotawakagaeyaani, ari monkaataka

¹³ Iroñaaka, noyemijantzinkarite, nokamantem. Ikowayitakimini Tajorentsi rowawijaakoeyemini, tee ikowaperotakayimi pipomeentsi-wentyaawo rojankinarin Moeseeshi. Rowawijaakoeyakimini, omaanta tee ishinetzimi pantero oetrika kaari kameethatayitatsini pikoyiri eeroka. Ikowaki pinintaperotawakagaeyaani maawaeni, eejatzpi kamintaawakagaeyaani. ¹⁴ Eeniroy iroka rojankinatzirini Moeseeshi: "Kimitakae eeroka pikamintaawagaaatya apaniroeni, eejatzpi pikimiteeyerini paashinipaeni, pikamintaaperoeyerini, pinintaperoeyerini". Aririka amateeyakironi iroka; kameetha. Monkaataka. ¹⁵ Noshiyakaawentemiro iroka: aririka pikijawakagaeyaani, pikantzimatakiririka paashini atziri pitheeyakotaaririka kimitaka patsikawakagaeyatyaaani, eejatzpi pitzimpithaawakagaeyaani. Kyaaryoowa, pithonkawakagaeyanikarira: pookakaawakagaeyaawoni paapatziyarira Jesoshi.

Akowaeyawitarini aari, eejatzpi okowakagaeyakaerini Ishire Tajorentsi

¹⁶ Nokamtaperotemi: pikantero Ishire Tajorentsi iyoteeyemini oetrikapaeni panteri eejatzpi pimonkaaperotero maawaeni. Eerokya pantero kaari kameethatatsi pikowaeyawitarini eerori. ¹⁷ Eenitatsi kaari kameethatatsi pikowaeyirini panteeyerini eerori, eejatzpi eenitatsi okowakaawitakimi Ishire Tajorentsi antakayemi. Tee omonkaatawakagaeyaani. Inashitayitakan, rootaki kaari pimateeyantawoni pantero kameethatayitatsirini okowakaawitakimi Ishire. ¹⁸ Aririka aapatziyawo Ishire Tajorentsi oetrika antakagaeri, eero akenkithashiriiryo amonkaatero rojankinarin Moeseeshi.

¹⁹ Ayoteeyakironi kaari kameethatatsi rantapiinteevirini kaari aapatziyaperotawori Ishire Tajorentsi, shirampari iñaaminthatziro kaari rayi, oñaaminthatziri tsinani kaari ayi, rantaminthatawakagaeyaani: ranteeeyakironiwee, tee ipashiwentakaaneetawo. ²⁰ Eejatzpi iitajorentst-tashitayitakawoni oetrikapaeni, imatsitantzi, roonawakaeyakan, ikijathatawakagaeyakan, raamaakotawakaeyani, intsipaaete ikijeeyani, ininatawakaeyani, riyoshiiteeyani tee ikoyi itsipateeyarini paashinipaeni, aapatziro itsipateeyarini oshiyariri. ²¹ Eejatzpi iñaawenatzityitakarini rowaagawo paashinipaeni atziri, ishinkiteeyani, osheki rowaperoteeyani, eejatzpi maawaeni paashinipaeni kimitayitaworini. Paerani nokamanantzimiri: "Kyaaryoowa. Aririka pantapiintero maawaeni irokapaeni, eero pimatziro piyaatee janta reewaperowenantzinta Tajorentsi". Iroñaaka napiiteemiro: "Kyaaryoowa. Piyaateekari paamariki kaari tsiwakanitatsini".

²² Omaanta aapatziyaantakawori Ishire Tajorentsi rootaki anteeyantakaworini inashitacharipaeni: tema iyoteeyakaeni anintashireperotawakagaeyakan; akimoshireeyakini; eero akenkithashiryaaipiintaneero oetrikapaeni tema aritaki itsipaperotakae Tajorentsi; eero ajamashiryaashitari;

kaari akijathatantawakaantya; akaminthaaawakaeyakan; akameethataki, eero amatawitantz, ²³ kaari akantakaaperotantya, aamaakowentyaawo awatha aaka apaniroeni eero antayitzironi kaari kameethatatsi akowawitari anterimi. Tema inimotakiri rojankinarini Moeseeshi maawaeni iroka. ²⁴ Riraga kentakoecharin koroshiki ikamaeyakan, tekatsi rantee eejatz. Aapatziyantakariri Jesokirishito, kimitaka ari akaatakiri akentakotaka, makae; tekatsi akanteeya akowaeyeen anteero kaari kameethatatsi.

Enitatisi iroka paashini riyotaayitziririni Paaworo

²⁵ Omaanta okimitzimotakae owañaagae eejatz Ishire Tajorentsi, iyotakagaeyakaeni. Thame anteeyeroni oetarikapaeni iyotagaeyeerini. ²⁶ Eero akantakaaperota, eero akijaneenziri paashinipaeni, eero akowashiriitziri rashitayitarini rashitayitarini riori.

6

¹ Noyemijantzinkaritepaeni, aririka piñeeri piyemijantzinkarite rantziro kaari kameethatatsi, pikantero Ishire Tajorentsi iyoteemi pikaminthaantyaariri. Kyaaryoowa, pikijirikari, eentsikiroeni pikanteri pikijakaarikari. Kyaaryoowa pantzirokari eerori kaari kameethatatsi. ² Pikaminthaawakagaeyani eejatz pamitakotawakagaeyani. Aririka pantero iroka, aritak pimonkaatakiro okaatzi riyotaakiri Jesokirishito. ³ Enitatsirika asheninka kantakaaperotachari, ramataswitsahitaka apaniroeni. Tee ikameethatzi riori. ⁴ Pikenkithashiryakotya: piyontanyaari okameethatzirika pantayitzirini. Aririka okameethatzi pantayitzirini, pikimoshiryaanaki. Eero pikantakaaperota, eero pitheenkiri paashinipaeni, ⁵ tema eenitatsi anteyirini maawaeni.

⁶ Okameethatzi apagaanteeyerini okaatzi tzimimoteeri riraga yotagaeyeerorini inaani Tajorentsi eero okoetyeemotantariri riori. Tee akoyi ikoetyaayiteroni oetarikapaeni. ⁷ Kyaaryoowa, eero pamatawiteeyaani eureka, tee ikowakagae Tajorentsi atheenkayerini. Noshiyakaawentemiro: oetarikapaeni apankitayitzirini, aayiteeroni okithokipaeni roori. Rooma atheenkakiririka Tajorentsi, eero raanee jenokinta. ⁸ Oshiyakawo iroka aririka antapiintero kaari kameethatatsi akowaeyawitarini, ari aate paamariki kaari tsiwakanitatsini. Aririka antapiintero okowakaakaeri Ishire Tajorentsi, ari akanteetayeeyaani ajeke jenokinta. ⁹ Eero apakayiro antapiintero oetarika okowakaakaeri Ishire Tajorentsi, rooma ari ipineeyakaeni iinja Tajorentsi. ¹⁰ Ari thame akaminthagaeyerini paashinipaeni atziri, eekiroaatatyekiri akaminthaaperoeyerini ayemijantzinkaritepaeni.

Ari riweyyaakiro rojankinari

¹¹ Piñaakiro, antawo nojankinatakiro naaka iroka. ¹² Riraga kowawitachari itotonatero ishiramparitantari, ikowaki riraga ijoriiyotzinkarite inaaperoeyerini. Tee ikowaperotzi ikijeeyerini. Ikantemimi: “Ikamawentakimi Jesokirishito koroshiki rowawijaakoeyeemini”, ari ikijeeyerinimi ijoriiyotzinkarite. ¹³ Maawaeni riraga totonatachari tee imonkaatzironi rojankinarini Moeseeshi, omaanta ikowawitaka pitotonaty eerori ikantakaaperotantyaariri. Ikantakaaperowentemimi, ikanterimi ijoriiyotzinkarite: “Naakiro, nototonatakaakari. Ikemijanteeyakinani”. ¹⁴ Omaanta tee okameethatzi nokantakaaperotya naaka, omaanta nokowaki niweshiryaaawentyaari riraga Awinkatharite Jesokirishito, riraga kentakowentakaerori kaari kameethatatsi antziri. ¹⁵ Eero rawijakotashita maawaeni totonatachari, eejatz eero rawijakotashita kaari totonatacha.

Omaanta aririka ipaashinitakaagae Tajorentsi aapatziyanteeyaririni Jesokirishito, ari owawijaakoteeya. ¹⁶ Aririka pikemijantaperotakiro iroka, ari isheninkatakimi Tajorentsi, eejatzi nokowaki kameetha ijeekekakayemi, eejatzi nokowaki ineshironkatemi eerokapaeni eejatzi nojoriiyotzinkaritepaeni, riraga aapatziyariri Jesoshi.

¹⁷ Iroñaaka roojatzi paata tee nokoyi nokemakoteemi eejatzi pookaero kyaaryooperotatsiri. Naaka antawaetziniriri Jesoshi, rootaki ikijantakinari theenkantatsiri, rootaki nopirotantayitakarini nowathakipaeni.

¹⁸ Iroñaaka, noyemijantzinkarite, nokowaki ineshironkaeyeemi eejatzi Awinkatharite Jesokirishito. Tema aritaki ikantapiinteyemini.

Ari okaatz.

Naaka jankinatzimirori iroka:

Paaworo

RIRAGA PAAWORO ROJANKINATEEYINIRINI EJESOJATZI

¹ Nokoyi niwethatemi eerokapaeni, ejeesojatzi, tsikarika pikanta pijkeeki. Naaka Paaworo jankinatzimiroi iroka. Rotyaantakina Jesokirishito no-kenkithatakoteri, tema rootaki ikowakaakinari Tajorentsi. Iroñaaka nojankinateeyakimironi maawaeni aapatziyariri Jesoshi jaga Ejeesoki: eerokapaeni reentsiteteeyakarini Pawa Tajorentsi. ² Nokowaperotaki iroñaaka ineshironkateeyemini Pawa Tajorentsi, eejatzi kameetha ijekakagaeyemini. Eejatzi ikimitakari riraga Awinkatharite Jesokirishito.

Ikowakaakae Tajorentsi ayoteeyerini

³ Thame akanteeyerini atziri tema ikameethaperotaki Tajorentsi riraga Ashitariri Awinkatharite Jesokirishito. Aapatziyakari irira, iroñaaka ikantakae Tajorentsi: "Ari pijkeekimotena paata janta jenoki". Tema eejatzi iroñaaka osheki ineshironkatake, itajonkawentakae aweshiryaaawentaperoeyakarini, kimitaka ajeekimotakiri jenokinta. ⁴ Paerani tekirani riwetsikironi kipatsi, riyoyagaeyakaeni, riyotzitakanri rirori aritaki rowawijaakotakae Jesokirishito. Ikenkithashiryaaka: "Nowameethaaperoeyerini maawaeni aapatziyarini Notyomi". Iroñaaka iñaaperoeyakaeni akameethateeyeeeni ikimitakaanteeyakaeni tee antziro kaari kameethatatsi. ⁵ Inintaperotashiteeyakaeni rootaki rotyaanantakariri Jesokirishito ikamawenantakaeri. Rooma aritaki ikantzitakanri paeraniperoño: "Notomintayiteeyarini riraga aapatziyeyakaririni Jesoshi". Rootaki ikowakagaeyakaerini maawaeni.

⁶ Iroñaaka ashenkateeyakarini Itomi inintashireperotziri, rootaki ineshironkateeyantakaerini. Icaminthaaaperoeyakaeni osheki. Roojatzi akantani akanteeyerini atziri: "Ikameethaperotaki Tajorentsi". Eejatzi thame akanteeyerini Tajorentsi: "Eeroka pikameethaperotaki".

⁷⁻⁸ Ineshironkaperaperoeyakaeni maawaeni, inintashireperoeyakaeni osheki. Rotyaantakirii Itomi ikamawenteeyakaeni rapaatawenteeyakaeni riraa. Icaminthaaaperoeyakaeni iroñaaka tee ikenkithashiryaakotero eejatzi kaari kameethatatsi anteeyawitakarini. Tema aritaki rowawijaakotakae. Riyotakagaeyakaeni, otzimantakari ayoteeyantarini.

⁹ Eejatzi riyotakaakaero iitarika rotyaanantakariri Jesokirishito: tee ayotawitawoni paerani. Aritaki, paerani riyoyayitakarini rotyaanteri rowawijaakotanteeri. ¹⁰ Eenitatsi iroka ikowakagaeyakaerini maawaeni: iinja reewawenantaperotanaki Jesokirishito. Aririka omonkaatakyia iroka kitejiri, ari ipiyoteeyakaeni maawaeni: jenokijatzi eejatzi maawaeni kipatsijatzi. Roojatzi reewawenanteeyakaeni, maawaeni.

¹¹ Maawaeniroña okaatzika awijayiteentsirini iroñaaka, aritaki ikenkithashiryaakarini Pawa Tajorentsi paerani, tekirani riwetsikironi kipatsi. Imonkaatakiro iroñaaka ikantzitakarini paerani. Tema ikashiyakayitakaerini rotyaanteeniri Itomi Jesokirishito jaawikika ijekashiretanteeyapaakaerini. Ari okantzimaetaka iroñaaka imonkaatakiro. ¹² Naakapaeni joriyyo jewateeyatsirini naapatziyaperoeyakarini Jesokirishito. Rootaki nokowantakari noñaaperoeyerini Tajorentsi, eejatzi nokanteeyerini atziri: "Ikameethaperotaki Tajorentsi".

¹³ Eejatzi eeroripaeni pikemakoeyakirini Jesokirishito pikemaki ipokashitakaeni rowawijaakoeyakaeni. Kyaaryoopoperotaki paapatziyakari. Paerani ikanteeyakaeni Tajorentsi: "Aririka paapatziyakarya Notyomi,

okithatakaanakimi noshire". Kyaaryo iroñaaka kijokiro owakimi rootaki piyotantakari pisheninkatakari Jesokirishito. ¹⁴ Aririka kijokiro owanakae, ayotanaki kyaaryoopero ithotyaagaero Tajorentsii maawaeni ikantzitakaeri. Eero ramatawitee. Tema kyaaryoperotaki ragaeyaneeni jenokinta atsipateeyantapaeyaaririni rirori. Tema ikameethaperotaki. Thame akanteeyerini maawaeni atziri: "Ikameethaperotaki Tajorentsii".

Ipaasonkitziri Paaworo Tajorentsii

¹⁵ Nokemakoeyakimini eeroka, paapatziyaperoeyakarini Awinkatharite Jesoshi, eejatzi pinintashireperoeyakirini piyemijantzinkaritepaeni. ¹⁶ Nokantatyaaani nopaasonkitakowenteeeyimini eerokapaeni, eejatzi namanirii Tajorentsii eekiro ryaatatzii ramitakoeyemini. ¹⁷ Namanapiintziri riraga Ashitariri Awinkatharite Jesokirishito. Tema ikameethaperotaki. Nokantziri: "Piyotakaaperooyerini ejeesojatzi, piyotakagaeyerini tsikarika pikanta eerori. ¹⁸ Nokowaki eejatzi riyotakaaperoeyemini, piyotantyaari tsika ikanteeeyani paata: tema okameethaperotakiroña janta jenokinta". Tema rashiteeyakaeni, rootaki nokowantakari piyoteeyeni okameethaperotaki maawaeni ikashiyakagaeyakaerini. ¹⁹ Oshekiperi itajorentsiperotaki, tee opeyaneenta itajorenka. Itajonkawenteeyakaeni aakapaeni maawaeni aapatziyariri. Paerani iyotakagaeyakaeni itajorentsitaperotaki, ²⁰ tema ipiriinteri Jesokirishito. Raaneeri janta jenokinta, eejatzi ijekakagaeri janta rakoperoki ikaatapaeri reewawenantapae. ²¹ Ikantakiri: "Notyomi, nokowaki peewawentaperooyerini maawaeni jewaperoeyawitacharini: jewawenantsatsiri, aataperoteenchari, eewatatacantayiwitacharini, maawaeni jewatatsiri kamaariapaeni, jewataperotatsiri nonampiripaeni, maawaeni. Peewawentaperooyerini maawaeni jeekaeyatsirini iroñaaka, eejatzi peewawentaperooyerini maawaeni impaetayitatsini ikoñaatee paata". Ari ranaakoeyakirini maawaeni, reewaperowenantziroña. ²² Eejatzi ikantakiri: "Notyomi, eeroka antakaantayiterorini tsikarika okantayityaarini oetarikapaeni, eejatzi peewaperowenteeyerini maawaeni aapatziyeyemirini. ²³ Iñaaperoeyemini rirori. Tema pikimitakina naari, pitajorentsitaperotaki kameetha, pikantyaani pitajonkawenteeyakirini maawaeni aapatziyeyakimirini".

2

Itajonkawenteeyakirini Tajorentsii aapatziyeyakaririni Jesoshi

¹ Paerani, eerori, tee piyotawitarini Tajorentsii, pantapiintawitawoni kaari kameethatatsi, rootaki iroñaaka piyatantyaarimi paamariki kaari tsiwakanitatsini: omaanta rowawijaakoeyakimini Tajorentsii rootaki piyatantteeyari jenokinta pañaaperotapae janta eero pikamanitee. ² Kyaaryo pikimiteeyawitarini paerani paashinipaeni theenkantsatsiri, paapatziyawitarini Jatanaashi, riraga iwinkatharite maawaenipaeni kamaari. Rivotaki jewawenteeyiriri maawaeni piyathatayitaririni Tajorentsii, rantakaanteeyantaririni kaari kameethatatsi. ³ Tema paerani akimitawitarini riraga theenkantsatsiri antapiintawitawoni kaari kameethatatsi akowawitawoni. Ari akantatyaaani antapiintawitawoni oetarikapaeni akowawitarini, oetarikapaeni akenkithashireeyawitarini. Rootaki ikijawenantawitakaerori Tajorentsii okaatzi antakiri, eejatzi kimitaka iroñaaka ikijantari riraga kaari aapatziyariri Jesoshi okaatzi rantziri. ⁴⁻⁵ Paerani antapiintawitawoni kaari kameethatatsi ashi owaeyironi: tee ayotawitarini Tajorentsii, eejatzi aateeyenimi paamariki kaari tsiwakanitatsini. Omaanta ashi royiroyi rirori

ineshironkaperoeyakaeni osheki inintashireperoeyakaeni. Paerani rowañaagaeri itomi ikantatyaa iroñaaka rafñi. Iroñaaka eejatzi rowawijaakoeyakaeni aari, akanteetatyeeyaani ajeekimoteeyerini jenokinta. Tema ineshironkaperotakae, rootaki rowawijaakoeyanteerini.

⁶ Ikamawitaka Jesokirishito, rowañaagaeri Tajorentsi eejatzi aari akimitawitakari, ipaashinitakaakae Tajorentsi, eejatzi ayotaki akaateeyerineri paata janta jenokinta. ⁷ Ikanteetatyeeyaani riyotakagaeyeni, oshekiperi ineshironkataperoeyakaeni, ikamintahaaperotakae: ashi royo. Rootaki ikamintheeyantakaerini ashenkatakari Jesokirishito. ⁸ Aapatziyaperotakari rootaki rowawijaakotantakaeri Tajorentsi. Tema osheki ineshironkataperoeyakaeni. Tekatsi akanteeyaa owawijaakotashiteya aaka, inta riro apaniroeni owawijaakotashiteyakaerini. ⁹ Aakarikami owawijaakotashitachanimi, tema ari akantakaaperotakyaami. ¹⁰ Omaanta iroñaaka rowashiñaashiretakae Tajorentsi rooma aapatziyakari Jesokirishito. Ikowakaakae antayitenirini okaatzi kameethayitatsirini. Paerani tekiranitazimini aari, eenitatsi ikowakagaeyakaerini antayiterini ikowakaakae akantatyeeyaani anteeeyironi eero apakayiro.

Amonkaatawakagaeya

¹¹ Tee eero kapaaeni joriyyo. Ipinkaeyakimini rirori, ikantzi: “Tee riyoteeyirini paashinijatzitsiri atziri Tajorentsi, tee itotonatziro rirori ishiramparitantari”. Iiteeyawitakanri rivotaki totonatachani, tema riyotziri riraga Tajorentsi. ¹² Pikenkithashireeyeroni tsika pikanteeyarini paerani: tee paapatziyeeyawitarini Jesokirishito, tee pisheninkateeyarini joriiyopaeni, tee piyoteeyawitawaní ikantayitzirini Tajorentsi, eejatzi tee piyotawitarini ikashiyakagaeyakaerini. Tee piyotawitarini rirori eejatzi tee piyotawitani ikowakini ineshironkateeyemini. ¹³ Kyaaryooperotaki, paerani tee piyoteeyawitarini Tajorentsi, okimitzimotawitakimi pijekaki inteenapero. Omaanta ikamawenteeyakimini Jesokirishito, apaatawenteeyakimini riraa. Iroñaaka paapatziyeeyakarini, pisheninkateeyakarini. Rootaki piyotantaariri Tajorentsi, kijokiro powanteyakaririni. ¹⁴ Paerani naaka eejatzi maawaeni nojoriiyotzinkarite nokjawitakimini: naari eejatzi rirori maawaeni pisheninkapaeni eejatzi pikijeyawitanani naari. Omaanta rowawijaakoeyakaeni Jesokirishito ipeyakoteero akijawakaeyawitakanri, kameetha iroñaaka ijekakagaeyakaeni. Kijokiro owawakaeyakanri: akimitawakagaeyakanri maawaeni, tee apaashinitzi. ¹⁵ Ikamawentakae, eero apomeentsi wenantawo rojankinarini Moeseeshi, tekatsi okaminagaeyeni. Paerani inashitakaawitakaeni tee ashenkatakawakaawitani omaanta iroñaaka ashenkatakawakaeyakanri Jesokirishito. Eejatzi ashenkatakawakaeyakanri maawaeni, kaari akijawakaanta, ¹⁶ aakameethatawakaeyananri maawaeni. Rootaki aakameethatawakaanteeyanarini, ashenkatakari riraga kentotawentakaeri koroshiki. Iroñaaka añaaperoeyirini Tajorentsi maawaeni: nosheninkapaeni eejatzi pisheninkapaeni eerori.

¹⁷ Naakapaeni joriyyo: niyoteeyawitakanri tsika ikantari Tajorentsi, niyotawitawo iñaani, omaanta tee naapatziyeeyarini. Omaanta eero kapaaeni tee piyoteeyawitariniroña, kimitaka pijekakini eero ka intena. Omaanta ipokantakari Jesokirishito, ikamanteeyakaeni maawaeni tsika akanteeyari ashenkatakawakaanteeyarini, akimitawakaanteeyarini: tema ajeeki kameetha. ¹⁸ Osheki imatakaeniri rirori, rootaki amateeyantakaworini akenkithatakagaeyakirini Tajorentsi. Eejatzi Ishire iyoteeyakaeni akenkithatakanteyaririni. ¹⁹ Paerani tee piyotawitarini rirori, tee pisheninkatakawitarini. Omaanta iroñaaka, osheki pipaashinishiretanaki;

ari pikimitakoteeyakarini paashinipaeni aapatziyakariri Jesokirishito, piyoteeyakirini Tajorentsi, pisheninkateeyakarini. ²⁰⁻²² Iroñaaka noshiyakaawentemiro. Aririka akoye awetsike pankotsi, tema ityaawo amine tsikarika okameethaphathatzi kipatsi, roojatzi aminantakya otzinkamipanke kameetharipaeni, kijoperotatsiri eejatzi osheki inashitayitakyaani inchapankipaeni aayiterini owashiterori achempokyaatantyaawori apango. Aririka athonkakiro pankotsi roojatzi ajeekantakya. Eejatzi akimiwitakawo aari, aririka aapatziyakyaari Jesokirishito. Ritakae riraga Rotyaantanewo Tajorentsi riyotaakaero iñaani Tajorentsi, eejatzi riraga kamanantayitzirorini iñaani Tajorentsi riyota-gaeyakaeni tsika ikantari Jesokirishito: ikameethaperotaki, imatakiro rowawaiaakoeyakaena. Tema rirotaki iroñaaka Awinkatharite. Roojatzi roshekitantanaka maawaeni aapatziyariri, eejatzi otajonkawenteeyakaeni Ishire Tajorentsi akimitawakaanteeyantaarini: tema asheninkateeyakarini Jesokirishito, maawaeni. Iroñaaka rashitakae Tajorentsi, kijokiro rowaeyakaeni.

3

Rantayitzirini Paaworo

¹ Tee eerokapaeni joriyo, omaanta nonintashireperoeyakimini. Nokaminthagaeyakimini, nokantakimi: "Aririka paapatziyeeyarini Jesokirishito, ari rowawaiaakoeyakimini", rootaki romonkyaanteetakinari omonkyagamentotsiki. ² Tema ineshironkatakina Tajorentsi, rootaki nomatantawori nokenkithatakagaeyakimini. ³ Riyotaakina kaari ryoteeyini paashinipaeni, kameetha riyotaaperotakina. Aritaki nojankinateeyakimironi, nokamanantakimirori ikantakinari. ⁴ Aririka piñaanatakiro iroka nojankinatakimirri piyoperoeyawakironi iroka niyotaakotakiri Jesokirishito, kaari riyotawitani paerani. ⁵ Tee riyotawitawoni riraga itakaantaworini, omaanta Ishire Tajorentsi iyotakaakina naakapaeni rotyaanantewo Jesokirishito riraga kameethashiretzinkari eejatzi riraga kamanantayitzirorini iñaani Tajorentsi. ⁶ Tee eerokapaeni joriyo, omaanta iyotakaakina aririka paapatziyeeyarini Jesokirishito, ari pawijakoeyeeni. Pimonkaateeyakarini nosheninkapaeni naari: aritaki ikashiyakayitakaerini Tajorentsi rotyaanteri owawijaakoteeni aakapaeni maawaeni. Rootaki iroñaaka asheninkatawakaanteeyantaarini. Rooma aritaki paapatziyeeyaarini Jesokirishito eerokapaeni rootaki amonkaatawakaantakariroña.

⁷ Rootaki iroka nokenkithatakotapiintakiri. Ineshironkatakina Tajorentsi, eejatzi itajonkawentakina nomatantakawori nokenkithatzi. ⁸⁻⁹ Ñaakiro, naapatziyawitari Jesoshi; omaanta tee nokimitari paashinipaeni aapatziyariri: tektsi nomine naari. Omaanta ineshironkatakashitakina Tajorentsi, riraga wetsikaeyiririni maawaeni jeekatsiripaeni, rotyaanakina nokamanteyakirini paashinijatzitsiri atziri tsika ikantari Jesokirishito ikaminthaaeperoeyakaeni. Tee ayotakotawitari paerani, omaanta iroñaaka iyotagaeyakaeni Ishire. Eejatzi rotyaanakina nokanteeyakimini ikowaki rowawijaakoeyemini eeroka, eejatzi maawaeni paashinipaeni atziri. Aritaki paeraniperoroña ikowakini rowawi-jaakoeyemini, omaanta tee riyotziteetani paerani rowawijaakoeyemini, owakira riytakagaeyakaeni. ¹⁰ Iroñaaka ikowaki riytakagaeyerini maawaeni riraga jenokiweri: riraga kantakaantayitatsirini eejatzi riraga jewawenantayitatsirini kamaripaeni. Riyoteeyanakini jenokiweri osheki itajonkawenteeyakirini Tajorentsi aapatziyariripaeni Jesokirishito, roojatzi riyoteeyanakirini eeniro riyotantafariroña rirori, ashi royiro

riyoperotziroña. ¹¹ Aritaki ikoyitakani paerani riyoteeyeni maawaeni jenokijatzi roojatzi iroñaa. Eeniropi imatayitakaerini Awinkatharite Jesokirishito, riyotantakari riraga jenokijatzi oshekiniperoroña riyotzi Tajorentsi. Rootaki ikowakaakiriri. ¹² Aapatziyakari Jesokirishito, rootaki ayotantakari okameethataki akenkithatakayeri Tajorentsi, ari ikemakae. Eero athaawantari. ¹³ Piyoteeyakini niyotagaeyakimini, rootaki osheki rowashironkaanteetakinari, omaanta eero powashiretakoeyashitanani, inta pikimoshireeyanakini.

Paaworo ramanakoventeri Tajorentsi ejeesojatzi

¹⁴ Osheki riyotzi Tajorentsi, osheki imatakenir, rootaki notziwerowan-tanaka noñaaperotantanakariri, eejatzi nokenkithatakapiinantanakariri. ¹⁵ Rirotaki ashitakaeri aakapaen, maawaeni aapatziyayitaririni Jesoshi. Ajeekaeyini aaka jak akipatsikika, eenitatsi ijeki paashini jenokinta, omaanta ashenkateeyakarini.

¹⁶ Ikameethaperotaki Pawa, itajorentsitaperotaki kameetha, rootaki nokanantakariri ikantero Ishire otajonkawentem, oshintsitakaantemiri eejatzi iyotaaperotemi kameetha pajankane. ¹⁷ Nokantakiri raap-attziyakaantaperoeyemirini pikenkithashiryaapiinantlyaariri Jesokirishito riraga kijokiro owakimiri. Eejatzi nokowaki pikenkithashireero tsika ikanta Tajorentsi inintaperoeyakimini, paapatziyaperotanteeyaririni. ¹⁸ Aririka paapatziyaperotakya, pikimityaari paashinipaen, aapatziyariri, piyoperotaty osheki inintaperoeyakaen, Jesokirishito, tee eechonkiin inintee. Ashi royiro inintaperoeyakaen, ikantatayaani. ¹⁹ Nokowaki piyoteeyini inintashireperoeyakaen, omaanta tee ayoteeyini iitarika inintashireeyan-takaerini. Aririka piyoteeyakini inintashireperoeyakimini, nokowaki eejatzi pikenkithashiryaaperoteeyanakirini Tajorentsi eejatzi nokowaki imatakaaperoteeyemini maawaeni ikowakagaeyakimirini.

Thame añaaperoeyerini Tajorentsi

²⁰ Ari itajonkawentaperoyakaen, Tajorentsi, osheki retakoeyakaen, rowanakaeniro maawaeni koetyeemoyitakaerini. Tekatsi akantya atho-tyeero akenkithashireeyironi maawaeni imatakaayitakaerini. ²¹ Thame maawaeni aapatziyeyearirini Jesokirishito añaaperooyerini Tajorentsi; akan-tapiinteeyerini atziripaen, ikameethaperotzi, akanteetatyeyaa. Aritaki okantyaari.

4

Thame akimitawakagaeyani

¹ Naapatziyakari Awinkatharite, rootaki romonkyaanteetakinari jak omonkyagamagamentotsikika. Iroñaa nokanteeeyemini kameetha pi-jekaeeyeni; riyoagaeyakimini rirori iroñaa pantenir maawaeni ikowakagaeyakimirini. ² Eero pikantakaaperoteeyani, pikaminthaanteeyeni, eero pijamashiryaashitari pisheninkapaen, inta eekiro peshiwentafyeeri, pamawetawakagaeyaa, pinintashireperotawakagaeyaa, eero pikijiri. ³ Pikanteeyeroni Ishire Tajorentsi iyotagaeyemini pikimitawakaanteeyarini kameetha paakameethatawakaanteeyarini. ⁴ Maawaeni aapatziyariri Jesokirishito ashenkateeyakarini, eejatzi eenitatsi Ishire Tajorentsi apaani, rowaga kijokiro owaeyakaerini. Amonkaatawakagaeyakan: riyoagaeyakaen, Tajorentsi, ayotaki imatakeniro ikantakaeri, rootaki aweshiryaawenantaperotakariri. ⁵ Apaani ikanta Awinkatharite añaaperoeyakirini, amonkaatawakagaeyakan: aapatziyeyakarini akapaen, eejatzi amonkaatawakagaeyakan akaawoshitawenteeyakarini

Tajorentsi. ⁶ Apaani ikanta Pawa Tajorentsi: riraga ashitaperoteeri maawaeni. Ipinkathariwenteeyakaeni aka, itajonkawentaperoeyakaeni eejatzi ojeekashiretantakae ajankaneki Ishire.

Inashitayitakani imatakaayitakaerini Jesokirishito

⁷ Ineshironkateeyakaeni Jesokirishito, eejatzi imatakagaeyakaerini maawaeni amitakoeyantyaaririni aapatziyaripaeni. ⁸ Kyaaryo Iwaperite Tajorentsi okenkithatakotzitarini, okantzitakan: "Roenokaeyaarika Jesokirishito iinja jenokinta, ranaakoeyerini maawaeni kamaari kijeeyawitakaririni; omaanta atziripaeni imatakagaeyerini oetarikapaeni".

⁹ ¿litaka okanantari: "Ari roenokaeya Jesokirishito"? Aritaki ipoñaaka paeran jenokinta roojatzi ipokantaka jaka kipatsiki eejatzi ipiyane.

¹⁰ Riraga ayitapaentatsiri jika kipatsiki jatee eejatzi janta jenokinta. Janta ipinkathariwenteeyapaeni eejatzi itajonkawenteyakaeni maawaeniroña.

¹¹ Gee, kyaaryooperotaki imatakaperoyakirini aapatziyeyakaririni ranteeeyakironi oetarikapaeni ikowakagaeyakiririni: apaanipaeni rivotaki rotyaantanewo Jesoshi, paashinipaeni rivotaki kamanantayitzirorini iñaani Tajorentsi, paashinipaeni rivotaki kenkithatakaantzirori Iwaperite Tajorentsi, paashinipaeni rivotaki jewawentziriri aapatziyariri Jesokirishito, paashinipaeni rivotaki iyotaantatsiripaeni, maawaeni. ¹² Ari imatakagaeyakaeni aari eejatzi rirori maawaeni aapatziyeyayaririni rootaki amateeyantakaworini antziniri. Eejatzi imatakagaeyakaeni aapatziyakaperoyakarini maawaeni aapatziyeyayitaririni Jesokirishito. ¹³ Ari ikantatyeyeayaani imatakagaeyeeroni roojatzi amonkaatawakaantyaari aapatziyaperotyari, eejatzi ayotaperotanteeyayaririni rirori.

¹⁴ Paeran akimiwitarini eentsi, intsipaete aapatziyashiiyawitakarini amatawiteeyawitakaerini, tee ayoperotawitani. Omaanta tee ikowakagaero Tajorentsi akimityaari eentsi, ikowakaaperotakae otzimaperote ayotantari. ¹⁵ Ikowaperotaki iroñaaka akaminthaaerooyerini paashinipaeni kameetha. Akamanteeyerini iñaani: tema kyaaryooperotaki. Ikowakaaperotakae maawaeni aka eekiro aatayee akimitaperoeyanakaarini Jesokirishito: riraga Awinkatharite. ¹⁶ Aapatziyeyakarini, rootaki asheninkatawakaanteyaaarini. Eejatzi riyotagaeyakaeni amitakotawakaanteyakarini, eejatzi riyotagaeyakaeni amateeyantakanaririni maawaeni ikowakagaeyakaerini. Eejatzi riyotagaeyakaeni anintaperotawakaanteyakarini.

Eero pikimitagaa pikimitaaga paeran

¹⁷ Iroñaaka nokamanteemiro ikantakiri Awinkatharite, nokan-taperotemiro ikowakaaperotakimiri. Tee ikowakagaeyimini pikimityaari kaari aapatziyariri Jesoshi: ratsipetashiteeyakawoni rirori rantayitakironi oetarikapaeni, tee ikenkithashireeya. ¹⁸ Tee riyoperotziri Tajorentsi. Tee inintashireperoeyini ikenkithashireeri, tee ikowaeyini riyoteri, rootaki kaari imatantawori irira rowañaaperoyerini ijekimotanteeyaririni janta jenokinta. ¹⁹ Rantapiintashitakawo kaari kameethatatsi, tee ipashiwenteeyani ishirontawo tsinanipaeni, shirampari rantatenkatziri ikaateeyini ishiramparinkaeyini, tsinanipaeni antatenkatawakaagaeyani, rotsinampaawakaeyani, maawaeni. ²⁰ Riraga Jesokirishito, tee riro yotayemironi pikimityaari riraga kaari aapatziyariri.

²¹ Tema pikemakotakiri Jesoshi: kyaaryo niyotagaeyakimini tsika ikantari. ²² Ari iroñaaka eero pikimitagaa paeran. Ashi poyironi tee pikameethaperotzini. Pinintaperotzironi pantayiteroni kaari kameethatatsi, rootaki pamatawitantakarini apaniroeni. ²³ Eero

papiiteero pikenkithashiryaagaero pantawitarini paerani, omaanta pikenkithashiryaagaero kameethatatsiri. ²⁴ Pipaashininitaperoeyanakini: eero pantashitawo kaari kameethatatsi, omaanta pikimitaperotyari Tajorentsi, tema ikameethaperotaki kameetha.

Ikanteeyirini Paaworo oetarika rantayiterini

²⁵ Iroñaaka eero pitheeya eejatzi, omaanta kameetha piñaawaetantyaawo oetarika pikanteriri paashinipaeni atziri. Tema ashenkatakari Jesokirishito, eejatzi ashenkatawakagaeyakan, maawaen. ²⁶ Aririka pikijashiryaakyaa eero pantaperotziro kaari kameethatatsi. Eejatzi aririka pikijashiryaakyaa intsipaete pipitsimaryaanee eejatzi, eero pojamaninkiro, ²⁷ okantyaatakyaa eerokya rantakaantzimiro kamaari kaari kameethatatsi. ²⁸ Pikoshiwitarika paerani, iroñaaka eero papiiteero pikoshitee; inta pantawaete paantyaari eerori oetarika koetyeemotakimiri, eejatzi pikaminthayiteerini ashironkaayitacharini.

²⁹ Eero piñaawaetantawo kaari kameethatatsi inta piñaawaetero ūagantsi rooperotatsiri. Kameetha piyotaawakaya, piweshiryaakagaeyarini piyemijantzinkarite. ³⁰ Teerika pijekki kameetha, owashiretaka Ishire Tajorentsi. Eero powashiretakawo: tema rootaki kempoyagaeyakimirini. Okantyaani okempoyagaeyakimini roojatzi pareetanteeyaaari janta jenokinta. Pawijakotantaperotapaeyaaari kameetha. ³¹ Aritapaaki iroñaaka pikija, eero pitsimaenkata, eero pikatsimatantz, eero pimashireyantzitz, eero pikijeeri paashinipaeni. Eero pikijathapiinantz, eero pikantzimatantanashita. Eero pashiminthatawo pitheeyakotashityaari paashini atziri pikowantyaari powashiretakayaari. ³² Inta pikaminthagaeyerini, pineshironkaeyerini. Tema paapatziyakari Jesokirishito, iroñaaka tee ikijantzimiro eerori Tajorentsi pantayiwitakarini omaanta ikaminthaaperoeyakimini eejatzi pikimiteeyirini rirori pisheninkapaeni, eero pikijantari rantay-itakirini, omaanta pikamintheeyerini.

5

¹ Tema eeroka reentsitepaeni Tajorentsi inintashireperotzimi. Ari iroñaaka pikimitakoeyaarini. ² Inintashireperoeyakimini Jesokirishito, rirotaki shinetaشiteencha apaniroeni ikentakotanteetakariri, ikamawenteeyakimini. Inimoperotakiri Tajorentsi iroka rantakiri Itomi. Kimitaka inintashireperoeyakimini Jesokirishito, eejatzi pikimiteri eerori pisheninka, pintintashireperoeyerini.

³ Eero pishirontawo tsinani kaari payi, eero pishirontari shirampari kaari payi, eero powashiyathatakotawo, eero powashiyathatakotayitawoni oetarikapaeni kaari kameethatatsi, eero piñaawenatakotari rashitayitarini paashinipaeni atziri oetarika tzimimotayitziririni: tee okameethatzi aapatziyariri Jesoshi rowashiyakotantya. ⁴ Eero powashiyathatakotawo tsinani, eero powashiyathatakotari shirampari. Okameethatzi pipashiwen-takayaawo maawaen kaari kameethatatsi. Omaanta okameethaperotzi apaasonkiteri Tajorentsi: tema ikaminthaaperoeyakaeni. ⁵ Iroka nokantemiri, piyotaperotawakiro: eero riyaatzi jenokinta riraga shirontapi-intawori tsinani kaari rayi, eejatzi eero iyaatzi jenokinta tsinani shirontapiintari kaari ayi, eejatzi eero riyaatzi owashiyathatakopiintaworini kaari kameethatatsi, eejatzi ūawenatakotzitapiintariri rowaagawo paashinipaeni atziri. Riraga kowaperotzirori rashaagantya ikimitakaantakiro

rootaki itajorentsite intaperotantawori. Ņaakiro, irikapaeni tee raapatziyari Jesoshi, rootaki kaari ryaatanteeyani riroripaeni janta ijeekaperotzinta Jesokirishito eejatzi Tajorentsi. ⁶ Enenitasi kowawitachari ramatawitemi: osheki iňaanatashitemimi wero, wero, wero; ikantashitawiteeyemini okameethatzi pantero iroka kaari kameethatatsi, omaanta eero pikemijantaperotziri. Ari rowashironkagaeyakirini Tajorentsi maawaeni kaari kemijantaperotziri. ⁷ Eerokapaeni eero poshiyakotari ikimitaaga rirori.

Pijeekaeyeni kitejiriki

⁸ Paerani kimitaka pijeekini tsiteniriki: tema pantapiintzironi kaari kameethatatsi. Omaanta rowameethateemi Jesokirishito, kimitaka ijeekakagaemi kitejiriki. Iroňaaka kameetha pijeekae, kimitaka jeekaemi kitejiriki. ⁹ Aririka ajeekaki kitejiriki, akaminthaante, ajeeki kameetha, kameetha aňaawaete oetarika kyaaryooperotatsiri. ¹⁰ Piyoperoeyeroni ikowakaakimiri Awinkatharite, ari panteeeyeroni. ¹¹ Eero pantziro rantayitzirini maawaeni jeekatsiripaeni tsiteniriki, piyotakagaeyerini tee okameethatzi iroka ranteeyakirini rirori. ¹² Nopashiwentakaakawo nokenkithatakotziro ranteeyirini, rowaga imanakowitzakari. ¹³ Aririka piyotakaakiri tee okameethatzi ranteeyakirini, okoňaatzimotanakri maawaeni ranteeyakirini. Roojatzi riyotakontantanakya tee okameethaperotzirrantziri. Roojatzi aririka ikowanee ikameethate, kimitanakya ijeekanee rirori kitejiriki. ¹⁴ Rootaki ikananteetari: "Aririka pimaaki, pipiriintanee. Aririka pikamaki, pipiriintee eejatzi. Riyotakaaperotemi Jesokirishito, ijeekakagaemi kitejiriki".

¹⁵ Pikenkithashiryaauperotero oetarikapaeni pantayiterini: eero pikimiteri kaari yotatsi, omaantakya okameethaperotzi ojeekaperote piyotantari. ¹⁶ Oshekiperoroňa rantayitakironi atziri kaari kameethaperotatsi. Omawitya opomeentsitzimotemirika, pikyaaryoowentero pantero kameethatayitsirini. ¹⁷ Eero pantashitayitawoni oetarikapaeni, inta pityaawo pikenkithashiryaauperotya. Piyoteeyeroni oetarikapaeni ikowakaakimiri Awinkatharite: roojatzi ari pimateeyeroni ikowakaemiri. ¹⁸ Eero pishinkita, rooma eero piyotaneero oeta panteri: inta pikemijantaperotero Ishire Tajorentsi maawaeni oetariki iyotaanteeyantemirini. ¹⁹ Osheki pikantapiinteri pishenkina: "Tema ikameethataki Awinkatharite", eejatzi pomampaawentapiinteeyarin Tajorentsi, piweshiryawentyaari maawaeni pajankaneki. ²⁰ Paapatziyakari Awinkatharite Jesokirishito, rootaki itajonkakowenantakimiri Pawa Tajorentsi. Iroňaaka pipaasonkitapiinteri.

Okameethatzi ikaminthaaperotero shirampari iina, eejatzi okameethatzi oňaaperoteri tsinani oemí

²¹ Aririka pipinkathaperoteri Jesokirishito, pipinkathatawakagaeyani eerokapaeni maawaeni shirampari eejatzi tsinani, eejatzi paapatziyawakagaeyani.

²² Tsinani, ¿paapatziyaperotarima Awinkatharite? Ari, eejatzi pikimiteri piimi, paapatziyaperotyaari rirori. ²³ Ikimitaka Jesokirishito reewawenanteeyirini aapatziyaripaeni, eejatzi ikimitya shirampari, reewawentero iina. Tema osheki ikamintheeyakaeni Jesokirishito, rootaki rowawijaakoeyantakaerini. ²⁴ Maawaeni aapatziyeeyaririni Jesokirishito ipinkathateeyanakirini, ari okimiteeyani eejatzi maawaeni tsinanipaeni tzimayitatsirini oemí, otzimatye aapatziyaperotyaari.

²⁵ Ikimitaaka Jesokirishito inintashireperoeyakaeni, eeroka shiramparipaeni, kameetha pinintashireperotero piina. Ņaakiro, inintaperoeyakaeni Jesokirishito, ikamawenteeyakaeni, ²⁶ rootaki rowameethatanteeyakaerini. Aririka aapatziyeeyawoni iñaani Tajorentsi ejatzi akaawoshitawenteeyarini irira, ari rowameethaperoeyakaeni Jesokirishito akyaryoowenanteeyaworini maawaeni ikowákagaeyakaerini. ²⁷ Ikowaki iñaaperoeyeeni aaka akameethatzi, ejatzi riraga maawaeni paashinipaeni aapatziyariri Jesoshi; eero ojeekimoneentee kaari kameethatatsi. Ikowaki akameethataperotanaki, eero ojeekantaneenta eechonkiini kaari kameethatatsi. Ņaakiro, osheki inintashireperoeyakaeni. ²⁸ Eejatzi, eeroka shirampari, pinintashireperoeyeroni piina. Pikimitaaga pineshironkata eeroka, pineshironkatero piina. Riraga neshironkatzirori iina rirojatzi neshironkatacha apaniroeni. ²⁹ Tee iñaagaetzi apaani atziri kijashitachani iwatha, inta ikaminthaa rirori. Eejatzi, ikimitakae Jesokirishito aaka, aririka aapatziyeeyarini, ³⁰ tema ikaminthaaakae, isheninkateeyakaeni, kijokiro rowaeyakaeni. ³¹ Ayoteeyakini shirampari eejatzi iina apaani ikantana: rooma okantzi Iwaperite Tajorentsi: "Aririka raaki shirampari iina, rookanakiri iriri, eejatzi riniro, kijokiro rowanakiro iina. Riraga shirampari eejatzi iina tema kimitanaka apaani iwatha rirori: kijokiro rowawakaanaka, tee okameethaperotzi rookawakagaeya". ³² Opomeentsiwitaka akemiro iroka, omaanta oshiyakari Jesokirishito eejatzi maawaeni aapatziyeeyakaririni, apaani akanteeyakan: ashenkatawakagaeyakan, atsipatakawakagaeyakan. ³³ Ari napiiteemiro: kimitaka ineshironkataaga rirori shirampari, kameethaperotatsiri ineshironkatero iina, ikanteetatyeyaan. Ejatzi okameethaperotzi oñaaperoteri tsinani oemi ikameethatzi.

6

Tsika akanteri eentsitepaeni ayotayeri

¹ Eentsipaeni, paapatziyakaririka Awinkatharite, eejatzi ikowakaakimi pikemijantaperoteeyerini piri eejatzi piniro. Rootaki inimoperotziriri Tajorentsi. ²⁻³ Eenitatsi ikaminaakiriri Tajorentsi paeraniperoroña itakaantakaworini, ikantakiri: "Piñaapinkataperoteri piri eejatzi piniro, rootaki kameetha nojeekekantemiri: ojamani pijeeki eeroka jaka kipatsiki". ⁴ Shirampari, eero pijamaneentari peentsitepaeni, pikijakarikari eejatzi pikantashiryakaaneeentarikari inta piyotagaeyerini kameetha ikantayitzirini Awinkatharite, eejatzi piyotagaeyerini ipinkathateri rirori.

Ronampiripaeni eejatzi omperatatsiri

⁵ Ninkarika antawaetakayimiri, pikemijantaperoteri eejatzi pipinkathateri. Kimitaka pantakiniri Jesokirishito maawaeni ikowakaakimiri, panteniri antawaetakayimiri maawaeni ikowakaakimiri rirori. ⁶ Eero pamatawitziri. Kameetha pantawaete aririka rotyaantem iapaniroeni. Erorika raminimi pikantatyeyaan pantawaeteniri kameetha: tema eejatzi kimitaka pantawaetatziniri Jesokirishito. Pikowaperotanakikya pantawaeteniri Tajorentsi maawaeni ikowakaakimiri. ⁷ Tee riro pantawaetaperotziniri apatziro atziri, inta eejatzi pantawaetatziniri riraga Awinkatharite. ⁸ Tema ayoteeyakini irira Awinkatharite pinateni okaatzira antayitakirini kameethatayitsirini, omawitakya aakarika omperataarewo teerika romperaete. ⁹ Eejatzi eerori antawaetakayiriri atziri: pikaminthagaeyerini maawaeni pantawaetaanewopaeni eejatzi poejeekanewopaeni, tema nokantakiri

ikemijantemi. Eero pikijapiintziri. Eero pipeyakoeyironi: eerokateeyakini ipinkathariwenteeyakirini Jesokirishito, eejatzi ipinkathariwenteeyakirini rirori pantawaetakaanewopaeni: pimonkaatawakaeyakan.

Aapatziyariri Jesokirishito roshiyakari joraaro

¹⁰ Noweyaantemi nokantemi: noyemijantzinkarite, pikanteri Awinkatharite reewawenteeeyemini eejatzi ramitakoeyemini pishintsishire-tantyaari. ¹¹ Ikimitaaganki joraaro rawentaawo iithaari kijotatsiri eero raawaantari ikentziri rowayirite, ari pikimiteeyaani iroñaaka eerori pameenteeyarini Tajorentsi, eero rotsinampaantzimi iwinkatharite kamaari riraga amatawitantaneri. ¹² Tee riro owayirita atziri koñaatziro, omaanta owayiritakari kaari iñagaetzi: riraga iwinkatharite kamaariipaeni, jewawentziriri kamaariipaeni, jewawenteeyeririni maawaeni theenkantsiri, oshekiperoroña kamaari. Ikijeeyakaeni riroripaeni maawaeni. ¹³ Ikimitaaga joraaro rameentawo iithaari kijotatsiri, eejatzi eerori ari pikimitya pameentyaari Tajorentsi potsinampaantyaariri kamaari. Rowashironkaemikari inta eero imatantaperotzimi, panaakoteeyirini pithotyayeniri Tajorentsi maawaeni ikowakagaeyakimirini; eero pipakaero paapatziyaperotakarira. ¹⁴ Paapatziyaperotyaari kameetha Jesoshi, pikenkithashireeyironi kyaaryooperotatsiri eero rowashironkaantzimi kamaari: poshiyakowitzakari ikimita joraaro rameentawo ishirikathakiro eero ikenantari riraga rowayirite. Pikameethaperote eerokya imatantzimi kamaari: pikimikitakotaari joraaro, rameentawo rotzikaayitawoni kijori. ¹⁵ Ikimitaaga joraaro ijapatotaka kameetha raatzikantayitarini, tsikarika riyaatayitzini, ari pikimiteeyaani eerori piwetsikashiretya kameetha, pikinakinayitantlyaarini piyotayeri atziri tsika ikanteeyaa rawijakotanteeyaaarini. ¹⁶ Eejatzi eenitatsi joraaro rotzikaari, roepiyantawori chekopi jathowatatsiri kaari ikenanteetari. Eejatzi eerori, pameentaperotyaari Tajorentsi, eerokya raawaantzimi iwinkatharite kamaari rantakayemiro kaari kameethatatsi. ¹⁷ Eejatzi, joraaro ramatheetakawo iitoki kijotatsiri rootaki aakowentziriri; eejatzi pikimitya eerori, paapatziyeeyaarini Tajorentsi pawijkotanteeyaaarini, eerokya imatantzimi kamaari rantakayitemironi kaari kameethatatsi. Eejatzi eenitatsi ithatzinkamento kimiwityawoni jawiri. Rootaki ithatzinkantariri rowayiritepaeni kaari imatantari ipiyatyari: eejatzi okimita Iwaperite Tajorentsi oshiyakawo iroka thatzinkamentotsi, tema rootaki apiyakowenantyaari eero imatantee kamaari. Rooma Ishire Tajorentsi rootaki amitakoteeri iyotayitakaeni amatantyaawori apiyathatantyaari kamaari oetarika ikowakaawiteeri rantakagaerimi.

¹⁸ Eero pipakayiro pikenkithataapiinteri Tajorentsi. Pikanteri oetarika-paeni okowakayimiri Ishire. Pikamanteri koetyeemotayitakimirini. Eero piperawentwo pamanakoeyaarini piyemijantzinkaritepaeni. ¹⁹ Eejatzi pikanteri ramitakotena naari, eero nopashiwenanta nokenkithatakagaeyerini atziri. Nokamanteeyerini kaari riyoteeyawitani paeran: rowawijaakooyerini Tajorentsi maawaeni aapatziyayiteeyaaaririni. ²⁰ Niyotaapiintakiri atziri, rootaki romonkyaaganteetakinari jaka omonkyagamentotsiki. Pikanteri ramitakotenaata kameetha nokantapiinteri atziri, eero nomanantawo. Tema rootaki ikowakaakinari Tajorentsi.

²¹ Aririka rareetakya Teekiko, ikantapaakimi tsikarika nokantakari, eejatzi ikamantemi oetarika rantayitakirini. Rirotaki ayemijantzinkarite, nonintaperotziri, ikyaaryoowentaperotziniri Awinkatharite maawaeni ikowakaakiriri. ²² Rootaki notyaanantakariri, nokowaperotaki piyoteeyini

tsikarika nokantaka. Eejatzi nokowaki riweshiryaakagaeyemini.
²³ Iroñaaka, noyemijantzinkarite, nokowaki kameetha ijeekakaeyemini Pawa Tajorentsí, nokowaki riyotagaeyemini paapatziyaperotanteeyaririni eejatzi pinintaperooyerini pisheninka. Eejatzi nokowaki ikimitakayemi riraga Awinkatharite Jesokirishito. ²⁴ Aririka pikantyaani pinintaperoteri Awinkatharite Jesokirishito, nokowaki ineshironkateeyemini Tajorentsí, maawaeni.

Naaka jankinateeyimirorini:

Paaworo

RIRAGA PAAWORO ROJANKINATZINIRI JIRIPOSHIJATZI

¹ Nokoyi nowethateeyemini eerokapaeni jiriposhijatzi tsikarika pikanta pjeeki. Naaka Paaworo jankinateeyakimironi, notsipatakari jaka Temoteeyo. Naaka antawaetziniriri Jesokirishito ikowakaakinari. Nojankinateeyimironi maawaeni noyemijantzinkarite: jewawentziriripaeni, amitakoeyiririni aapatziyariripaeni eejatzi maawaeni aapatziyariripaeni Jesoshi. ² Nokowaki eekiro ryaataatyee ineshironkateeyemini Pawa Tajorentsi, eejatzi kameetha ijeekakagaeyemini. Eejatzi nokowaki ikimitakagaeyemini Awinkatharite Jesokirishito.

Ipaasonkitziri Paaworo Tajorentsi

³ Aririka nokenkithashireeyemini, nopaasonkitapiintziri Tajorentsi. Nopaasonkitakowentzimi eerokapaeni. ⁴ Aritaki nokantatyaa namanapiintziri Tajorentsi, nokantapiintziri: "Pikaminthagaeyerini jiriposhijatzi, pamitakooyerini", eejatzi niweshiryaawenteeeyakimini. ⁵ Pikantatyaa pamitakotapiinteeeyakinani akamanantakiro iñaani Tajorentsi, akamanteeyirini atziri tsika ikanteeyarini rawijkotanteeyari. Rootaki nopaasonkitawenantzimiri. ⁶ Okameethataki iroka pantapiinteeeyakirini, tema riro Tajorentsi matakaakimironi. Niyotaki ikantatyeeyaani, imatakapintemiro, roojatzi ipokanteeyari riraga Jesokirishito. Aririka ipokapae rirori, ari monkaatapaaka maawaeni panteeeyakirini. ⁷ Tema okameethataki noñaaperoeyakimini, aritaki osheki nonintashireeyakimini. Enirona nojeekaki jaka omonkyaaagamentotsiki, nokenkithatakotziri Jesokirishito, eejatzi aririka roeyowaena, eejatzi nokenkithatakoteri. Nokamantapiintziri riraga pinkathariwenantatsiripaeni oetaka nokenkithatakotantariri Jesokirishito; eejatzi nokamantziri okyaaryooperotaki iñaani Tajorentsi. Omaanta pikantani eerori pikaminthaaperoeyakinani, pamanakotapiinteeeyakinani ineshironkatantenari Tajorentsi. ⁸ Riyotaki irira osheki nonintaperoeyakimini. Osheki inintaperoeyakaeni Jesokirishito, eejatzi naari nokimitakari irira osheki nonintaperoeyakimini.

⁹ Eejatzi namaniri Tajorentsi ramitakoeyemini, tema nokowaki eekiro piyaatatye pinintaperooyerini paashinipaeni. Eejatzi nokantziri riyotagaeyemini rirori piyotaperoeyantyaaririni, eejatzi otzimimoeyantemirini piyotantyaari: eekiro piyaateeyanakityeeni. ¹⁰ Nokowaki piyoteeyeni pantero kameethatatsiri, eerokya pantashitawo kaari kameethatatsi. Nokowaki pikameethaperoeyanakini, eero ojeeki pantani; pikanteetatyeeyaani, roojatzi ipokanteeyari Jesokirishito. ¹¹ Tema rowameethataperoeyakimini, iroñaaka nokowaki kameetha pijekaeyeni, ramitakoeyemini rirori. Roojatzi maawaeni atziri iñaaperooyerini Tajorentsi, ikanteeyeni: "Tema ikameethaperotaki Tajorentsi".

Ijeeki Paaworo omonkyaaagamentotsiki, omaanta oshekyaanaka iñaani Tajorentsi

¹²⁻¹³ Nokamantemi, noyemijantzinkarite: romonkyaaagaetakina, omaanta tee natsipetashitawo nojeeki jaka omonkyaaagamentotsiki. Nokantani nokamanteeyirini atziripaeni tsika ikantyaari rawijakoeyanteeyaarini. Ike-maeyakina maawaeni joraaropaeni: riraga shenteeyirorimi ipanko jew-awenantsiri oroomajatz. Eejatzi paashinijatzitsiri atziri, ikemaeyakanani. Riyoteeyakini tekatsi nante, omaanta romonkyaaagashiteetakina; apatziro nokenkithatakowitari Jesokirishito. Eeromi nojeeekimi jaka, eeromi ryoteeyeenimi tsika ikantyaari rawijakotanteeyaa. ¹⁴ Iñaapaakina ayemijantzinkarite tsika nokantari jaka, rootaki riweshiryaaawenteeantakaririni Awinkatharite. Iroñaka tee ithaawaeyini, omaanta ikowaperoeyanakini ikamanteeyerini maawaeni atziri iñaani Tajorentsi.

¹⁵ Eenirosheki kenkithatakotziriri Jesokirishito. Iñaakina apaanipaeni osheki naapatziyakagaeyakarini atziripaeni, rootaki ikowantanakari ranaakoeyenani raapatziyakagaeyaaranini atziripaeni. Omaanta eeniro paashinipaeni kamintthaakerotakinari, kameetha ikenkithatakantakiro iñaani Tajorentsi. ¹⁶ Osheki intashireeyakinani rirorpae, rootaki ryotakotantakariri Jesokirishito. Riyoteeyakini nojeeki jaka omonkyaaagamentotsiki nokamanteeyantyaaririni jewatatsiripaeni iitarika nokenkithatakantariri Jesokirishito, nokamanteeyerini tsika ikantyaari rawijakotanteeyari. ¹⁷ Riraga kijakinari, tee ikowakayiri atziri raapatziyeeeyenani, omaanta rirotaki kowaentsiri ranaakotena raapatziyakagaeyarini atziripaeni. Tee rantawaetaperotziniri Jesokirishito, omaanta ikowashita rowashironkayenami jaka omonkyaaagamentotsiki.

¹⁸ Ari, omawitya ikijawitena. Apaanipaeni ikijaneentakina, riraga paashinipaeni ikamintthaakina, omaanta ikenkithatakaoeyakirini Jesokirishito, rootaki niweshiryaaantakari naari.

Nokantyaani niweshiryaaoperotanakya. ¹⁹ Tema pamanakoteeyakinani rootaki ramitakotantakinari, eejatzi amitakotakina Ishire Tajorentsi, rootaki niyotantakari ijekakaakina kameetha, nokimitakotantyaariri rirori. Rootaki noemoshiryaaantariri. ²⁰ Tee nokoyi nopashiwentya, omaanta nokowaperotaki naari kameetha naapatziyaperotyaari Jesokirishito; nokowaki nokimiteeya paerani, tee nothaayi. Omawitya rowamagaetenrika rooma eerorika rowamagaetana, omaanta oetarikapaeni nanteniriri, nokowaperotaki ikanteeyeni atziri: "Tema ikameethaperotaki Jesokirishito".

²¹ Eerorika rowamagaetana iroñaka, roojatzi nokantyaani naapatziyaperotyaari Jesokirishito. Aririka nokame, okameethaperotaki eejatzi: tema ari noñaaperotapaeri janta jenokinta; rootaki nokowaperotakiri. ²² Eerorika nokami, roojatzi nokantyaani nanteniriri Awinkatharite oetarikapaeni ikowakaakinari. Tema okameethataki. Eejatzi, aririka nokame okameethataki. Tee niyotzi oetarika nokowaperoteri. ²³ Nokowaperotawitakawo apite. Nokowaki nokame, niyaatashitanteeyaariri Jesokirishito, kijokiro nowantapaeyaariri. Tema okameethaperotaki. ²⁴ Omaanta eejatzi okameethaperotaki roojatzirika nañe, nokantyaani namitakoeyantemirini eerori. ²⁵ Niyotaki iroñaka eero rowamagaetana, eero niyaatzita jenokinta. Nojeekimoteeyanakiminiita kipatsikika namitakoeyemini paapatziyaperoeyaarini Jesoshi, eejatzi piweshiryaaawenteeyaarini riraga paapatziyakari. ²⁶ Aririka niyaatashiiyeemini eejatzi, piweshiryaaawentawaena, eejatzi piyoteeyanakini ikameethaperotaki Jesokirishito.

²⁷ Eenitatsi iroka nokowakaakimiri pikenkithashiryaaoperoteri: paapatziyakari Jesokirishito pawijakotantaari, iroñaaka ikowaki kameetha pijeekaeyeni, pantapiinteeeyeroni maawaeni ikowakaakimiri. Aririka niyaatashiteeyemini nokowaki noñeeypaemini eekiro piyaatatzi pikyaaryoowenteeyironi paapatziyeeyakawoni maawaeni. Eerorika niyaatashiiyimini, omaanta nokowaki nokemakoeyemini eekiro piyaatatzi pikempiyaamintawakagaeyani, pipomeentsiwentawo pikamanteeyerini atziri: “Aririka paapatziyaari Jesokirishito, ari rowawijaakotemi”. ²⁸ Eero pithaawanteeyarini riraga kijeeyawitakimirini: ari ikenkithashireeyanakyaani: “¿litaka kaari ithaawanantana?” Ari riyooteeyanakini rirori ryaateeyeni paamariki kaari tsikanitatsini, riyooteeyeni eejatzsi rowawijaakotakimini Tajorentsi. ²⁹ Ikaminthagaeyakimini Tajorentsi, ikowakagaeyakimini paapatiyeeyarini pikantyani kijokiro poyeri Jesokirishito. Omaanta ikowakagaeyakimini iroka omawitya pikemaentsitawenteeyaarini. ³⁰ Aritaki amonkaatawakagaeyakan apomeentsiwentakarini Jesokirishito. Paerani piñeyakinani nopomeentsitawentakarini niyotaakoeyakimirini. Iroñaaka eejatzsi pikemakoeyakinani, osheki nopomeentsitawentakarini niyotagaeyakirini paashinipaeni atziri.

2

Eero pikaminthaashita eeroka apaniroeni, omaanta pikaminthagaeyerini paashinipaeni

¹ Tema riweshiryaaawenteeyimini Jesokirishito. Inintaperoyakimini, retakoejakimini, roemoshirenkaeyakaeni. Tema pikithaatakotakawo Ishire Tajorentsi. Tema piyoteeyini ineshironkatake Jesoshi eejatzsi ikamintaakae. ² Rootaki iroñaaka nokanantzimiri: “Kameetha pijeekaeyeni, paakameethatawakagaeyani, pinintaperotawakagaeyani. Kameetha omonkaatawakagaeyani oetarikapaenii pikowaeyerini eejatzsi oetarikapaenii pikenkithashireeyerini. Aririka panteeyeroni iroka, ari nokimoshirewenteeyanakimini”. ³ Oetarikapaenii panteeyerini, eero pikajawakaanteeyawoni, eero pikantakaaperoeyani. Eero pikenkithashireeyani pikameethaperotzi, eero pikenkithashireeyani panaakoeyakirini paashinipaeni, inta pikenkithashiryaaakoeyaarrière: “Ikameethaperoeyinii paashinipaeni, ranaakoeyakinani ikameethatzi”.

⁴ Okameethatawitaa pikaminthaya eeroka apaniroeni, omaanta okameethaperotzi eejatzsi pikaminthagaeyerini paashinipaeni.

⁵ Pikitakoeyaarrière Jesokirishito: tee ikenkithashiryaaakota ikamintthaya rirori, omaanta ikenkithashiryaaakoeyakaeni ikaminthagae aaka.

⁶⁻⁷ Paeraniperoroña rirotaki Tajorentsipero, omaanta ikantakiri Iriri: “Pawa, niyotzi akimitawakagaeyakanii, atajorentsitaperoyakimii aaka, omaanta nokowaki nopeyapaeyaa atziri, nantemiro maawaeni pikowakaak-inari”. Roojatzsi rookantanakawo reewawenantzi, itajorentsitantari. Roojatzsi ijeekantapaakari paerani kipatsikika, ratziritaperotapaaki:

⁸ ikimitteeyapaakaeni aaka. Tee reewawenantawitapaaka, omaanta iñaaperotakiri Iriri. Rirotaki kowashiteencha ikentakoteetantakariri koroshiki, ikamawenteeyakaeni. Rootaki ikowakaakiriri Iriri. ⁹ Omaanta paata ragaeri jenoki, kameetha ijeekakagaerikya Ashitariri. Rapiitawaeri iitawaeri Tajoretsipero: ranaakoeyapaerini maawaeni jeekaeyatsirini.

¹⁰ Ikowaki Tajorentsi apinkatheteeyerini Jesoshi maawaeni: riraga jenokijatzi, aakapaenii kipatsijatzi, riraga jeekatsiri inthomaenta kipatsi, maawaeni. Eekiro aatatyte apinkathatperoeyeriñiroña rirori. ¹¹ Eejatzsi

akantaperoeyeni: “Riotaki Jesokirishito Awinkatharite”, rootaki añaaperotaperoeyantyaririni kameetha riraga Pawa Tajorentsii.

¹² Ari, nonintaperotanewopae, pikantani paapatziyaperotapi-inteyakawoni okaatzi niyotaakimiri. Notsipatantawitakimirini paapatziyaperoeyakawoni. Iroñaaka tee notsipateeyemini, omaanta nokowaki paapatziyaperoeyaaawoni eejatzi. Tema rowawijaakoeyakimini Tajorentsii: iroñaaka pipinkathataperoeyerini, pantaperotenirii kameetha maawaeni ikowakagaeyakimirini. ¹³ Tema rirotaki kowakaashiryaapi-intakimirori pikowantapiintakari pantenirii ikowakaakimiri. Rootaki imatakaantakimirori.

¹⁴ Pantaperoeyeroni maawaeni ikowakaakimiri: eero piñaawaepookitzi oetarika pantayiterini, eero pipiyawaantetari oetarika ikantemiri. ¹⁵ Aririka pantenirii Tajorentsii maawaeni ikowakaakimiri, eero ojeeki pantani, omaanta pikameethashiryaanaki. Tema itominteeyakimini, rishintoeyakimini. Rowameethataperoeyakimini. Jaga pinampiki pikaateeyakirini osheki theenkantsiri: tee ikameethatzii irirapaeni, tee riyotziri Tajorentsii. Kimitaka ootamentotsi ootaka aminantari, ari pikimitya eerori, kameetha pijeekaeyeni piyotakagaeyantyaaririni riraga theenkantsiri kyaaryo paapatziyeeyakarini Tajorentsii. ¹⁶ Napiitemiro nokantemi: kimitaka pootakawo ootamentotsi paminantari tsiteniriki, eejatzi piyotagaayerini maawaeni jeekimoeyimirinira jaga Iñaani Tajorentsii iñaantapaeaaworini rirori jenoki, ikanteetatyeyaaani rañapae janta. Ari pimateeyeroni iroka; roojatzi ipokanteeyari Jesokirishito, nokimoshirewenteeyakimini. Niyotanaki tee natsipetashitawo niyotagaeyakimini. ¹⁷ Iroñaaka paapatziyeeyakarini Jesoshi. Tema naaka aapatziyakaakimiri, rootaki ikowanteetakari rowamagaetenaa. Aririka rowamagaetenaa iroñaaka, niyotaki eekiro piyaatatye pipinkathataperotanakiri Tajorentsii. Rootaki nokimoshiretantakari, eejatzi nokowaki pikimoshirewentena eerori. ¹⁸ Kyaaryo, okameethatzii pikimoshireeyanakini, akimitawakagaeyantyaarini, akimoshireper-oyantyaarini, maawaeni.

Rotyaantziri Paaworo Temoteeyo

¹⁹ Aririka ikowakayena Awinkatharite Jesoshi, nokowaki intsipaete notyaantemiri Temoteeyo. Aririka ipiyee eejatzi jaka, ikamantapaena tsika pikanteeyarini, nokimoshirentanyaari. ²⁰ Tekatsi paashini kimityaarini rirori: osheki ikowaperotaki ikaminthagaeyemini kameetha pijeekaeyantyaarini. ²¹ Eeniro paashinipaeni: ikenkithashireeyakironi oetarikapaeni ikowayitzirini rirori, tee ikenkithashiryaperotero ikoyiri Jesokirishito. ²² Omaanta piyoteeyakini ikameethatakii Temoteeyo, ikyaaoyowentziro ramitakotakina nokenkithatakantakirii atziri: nokamanteeeyirini tsika ikantyaaari rawijakontanyaari. Osheki ramitakotakina, ikimitakaantakina naaka ashitariri. ²³ Rootaki nokowantakari notyaantemiri. Aririka niyotaperotaki rowamagaetenaa, rooma eerorika, ari intsipaete notyaanteri Temoteeyo ikamantapaemi. ²⁴ Eejatzi nameentakari Awinkatharite ishinetana nyaatashiiyemini. Eero ojamanitzi, ari nareeteeyapaemini.

Ikenkithatakotziri Epajororiito

²⁵ Chapinki potyaantakinari ayemijantzinkarite Epajororiito, osheki petakotakina. Ikaatakina, nantawaeteeyinirini Awinkatharite. Ikimitaaaganki joraaropaeni ikyaaoyowentzinirii iyapitaanote oetarikapaeni rantziniriri, ari nokimitaaka naaka eejatzi Epajororiito nokyaaryooowentzinirii Awinkatharite maawaeni nantziriri; tee

noperatawentawo ikowakaakinari. ²⁶ Osheki ikoetyeyakimini. Pikemakoeyawitakarini mantsiyataki, osheki powashiretakotawitakari. Iroñaaka ikenkithashiryaa kimi, tee ikoyi powashiretakotaari. ²⁷ Kyaaryo, imantsiyaperowitaka, roowiteencha ikamemi, omaanta ineshironkataeri Tajorentsi, retsiyatatakoteeri. Eejatzi naari, ineshironkataana, tee ikowakaana ikamimotena. Riyotzi nashironkaawitaka, tee ikowakaana nowashiretakotaari. ²⁸ Iroñaaka nokowaperotaki notyaanteemiri. Aririka piñeeyawaaerini, pikimoshirewenteeyawaerini, roojatzi eero nowashiretakontaneemi. ²⁹ Rootaki paakameethatantawaeyaariri, pikimoshirewentawaeri; tema rirotaki aapatziyariri Awinkatharite. Piñaaperotawaeri eejatzi piñaaperooyerini maawaeni kimitariri rirori. ³⁰ Tema rantawaetziniri Jesokirishito, rootaki imantsiyatantakari, roowiteencha ikamemi. Osheki retakotapiintakina: ikimitakimi petakotapiinteeyenanimi eeroka, pijkeekirkami jaka. Tee ikenkithashiryaa kota rirori, rootaki ikamantyaarimi.

3

Paamayarira riraga kowatsiri ipeyakagaeyemini joriiyo

¹ Eejatzi, noyemijantzinkarite, nokanteeyemini: pikimoshirewenteeyerini Awinkatharite. Eero nojamaneentawo napiitemiro rowaga nojankinatakimiri, tema okameethatzzi pikemapiintero.

² Paamayarira riraga kowatsiri ipeyakagaeyemini oyaatzirori rametayitarini joriiyopaeni: tee ikameethatzzi. Paamayarira, rowashironkaemikari, ikowawita itotonatakaemimi pishiramparitantari pawijakonteeeyari.

³ Atsipetashita atotonatziro, eero owameethatee, eero owawijaakotee. Omaanta Ishire Tajorentsi iyotagaeyakaeni apinkathaperoeyirini Tajorentsi, rootaki rowameethateeyanteerini, rowawijaakoeyanteerini. Aweshiryaaawenteeyakarini Jesokirishito, ayoteeyakini tekatsi akantya owawijaakotashitya aka. ⁴ Aririkami amateromi owawijaakotyaami aka, tema naaka owawijaakotashitachanimi.

Osheki nomatayitawitakani, nanaakoteeyawitakarini paashinipaeni. ⁵ Owakira nokoñaatapaakini, 7 nomaakotapaaki, ari itotonateetakiro noshiramparitantari. Naaka icharineeteni Ishirayeerini. Eejatzi nocharinetakari Irijamiini. Tema naakapero joriiyo. Nomonkaataperotakiro rojankinarini Moeseeshi, tema naakawitaka warijeeyo. ⁶ Nokowaperotawitanika osheki naapatziyarimi Tajorentsi, rootaki nokijeyantakaririni riraga aapatziyeyaririni Jesoshi nowamaayitakini apaanipaeni. Kameetha nomonkaatapiro rojankinarini Moeseeshi, tekatsi kantenani: “Eenitatsi pantani”.

⁷⁻⁸ Niweshiryaaawentawitawoni maawaeni nantziniriri paerani, nokantakaaperotawitani, nokantashiretaki, “Okameethatzzi iroka nantakiniriri Tajorentsi”. Omaanta iroñaaka noyaateeri Jesokirishito, rootaki niyotantari natsipetashitawitakawoni paerani. Iroñaaka tee nokenkithashiryagaero maawaeni nantawitarini paerani. Omaantakya iroñaaka naapatziyarri Jesokirishito rootaki nookantaawori nantawitarini, nokimitakaantaa woookirowanki kaagashi. Omaanta iroñaaka naapatziyari Jesokirishito, nopenkathateeri. Nokoyi niyotaperoteri irira eejatzi nokoyi nanteniri oetarika ikowakaakinari. ⁹ Nokowaki nosheninkataperotakyaari. Tee

nokameethatashitya naari: nomonkaatayitawoni rojankinarini Moe-seeshi, omaanta tee owameethatena. Omaantakya naapatziyakari Jesokirishito, rootaki rowameethatantakinari rirori. Aritaki rowameethateyirini Tajorentsi maawaeni aapatziyeyayaririni.¹⁰ Nokowaki niyotaperoterikyarona Jesokirishito. Ikimitagaerira Tajorentsi ipiriunteeri, nokowaki itajonkakowentapiintena naari. Eejatzi, okimitaka osheki ikemaatsitawenteeyakaeni, nokowaki nokemaatsitawentyaari naari; okimitaka ikamawenteeyakaeni, nokowaki nantawaeteniri naari omawitakya rowamaawenteetenawo.¹¹ Roojatzi aririka ipiriinteyeyaneeni kamakotakirorira raapatziyakarira Jesoshi, nokowaperotaki nopiriintanee naari, notsipataperotantapaeyaariri Tajorentsi.

Ikamantakotaa rirojatzi Paaworo

¹² Tekiraata nomonkaatayitzironi iroka nokenkithatakotakiri, tekiraata nokameethaperotzi okimitaka ikowakaakinari Jesokirishito. Omaanta nokowaperotaki nomonkaataperotayiteneirini, tema rowawijaakotaana irira nomonkaatantyaawori.¹³ Naakiro, noyemijantzinkarite: tee nokantzimi nomonkaataperotayitakironi maawaeni nokowakiri nomonkaateri. Iroñaaka tee nokenkithashiryagaero maawaeni nantayititarini paerani, omaantakya apatziro nokenkithashiryaperotziro maawaeni nanteniriri Jesokirishito, eejatzi nokowaperotaki osheki kijokiro nowanakiri rirori.¹⁴ Naapatziyakari, rootaki ikowantakinari Tajorentsi nyaate jenokinta, nojeekimotapaeri rirori. Iroñaaka nokyaaryooowentziniri nantawaetaperotziniri, ipinatantenari iinja janta jenokinta.¹⁵ Nokowaki pikimiteeyenani, maawaeni aapatziyaperoeyaririni Jesoshi. Teerika pikimiteeyanani, riyotakagaeyemini Tajorentsi tekiraata omonkaatya paapatziyaperoeyarini.¹⁶ Omaanta pikyaaryooowentero pimonkaataperotero maawaeni piyotakiri. Tema aritaki riyotakaakimiro.

Ikowaki Paaworo akimiteeyaaarini rirori

¹⁷ Noyemijantzinkarite, pikimiteeyenani. Eejatzi pamineeyerini paashinipaeni, ikimiteeyakinarinika. Roojatzi pikimiteeyenani maawaeni: paapatziyaperoeyarini Rotyaantanewo Tajorentsi.¹⁸⁻¹⁹ Paerani nokamantakimi eeniro osheki kijakiriri Jesokirishito: riraga kentakotawentakaeri koroshiki. Iroñaaka napiiteemiro: kyaaryo ikaatzi osheki kijakiriri. Tee iñaaperoeyerini Tajorentsi, omaanta riweshiryaawentashitawoni kaari kameethatatsi eejatzi rowayitarini: ikimitakaantakawo itajorentsitsashitakawo iwatha okaatzira okowashitari. Okameethatemi ipashiwenteeyanimi, omaanta ikantakaaperotashiteeyakani. Apatziro ikenkithashireeyironi tsika ikanteeyani jaka kipatsiki. Iinja riyaateeyanakini paamariki kaari tsiwakanitatsini. Niraakoeyakarini naari. Eero poshiyari rirori.²⁰ Omaanta aaka akowaki anampitaperotyaawo jenokinta. Iroñaaka oyaatziiri owawijaakoeyeerini riraga Awinkatharite Jesokirishito. Ikinantapaakyaawo menkorri ragaeyantaneerini aakapaeni jenokinta.²¹ Ashi royiro itajonkantzi, imatayitzironi iitarikapaeni ikowakiri. Itajonkakowentapaakae aari, ipaashinitapaakaeniro awatha, akimitanteeyaaariri rirori. Iroñaaka ash oyiro apathagaeyini, akamaeyini; omaanta iinja akimiteeyaaarini rirori, okameethaperotanakikya awatha: eero apathagaeyeeni, eero akamae eejatzi.

powaeyerini Awinkatharite, poyaataperooyerini. Kyaaryo, osheki nonintaperoeyakimini. ² Iroñaaka nokamantero Ewoorya eejatzi Shiinteki eero okijawakaa. Kameetha okanteri Awinkatharite ramitakotero aakameethatwakagaeya. ³ Iroñaaka nokamantemi, nojoriiyotzinkarite, tema paerani atsipatawakaaka antawaetziniri Awinkatharite: iroñaaka nokowaki pamitakotero rowaga tsinani aakameethatwakagaeya eejatzi. Paerani opomeentsiwentawitonni okamanteeyawitarinii atziri tsika ikantyaari rowawijaakotanteeyaa: okaateeyawitakinani, eejatzi rirori Kiriimiintzi, eejatzi paashini amitakoeyanarini. Ojankinateeyakanii iwaeropaeni riraga amitakoeyanarini janta jenokinta, rojankinatakotaka maawaeni iwaero jeekatsini jenokinta iñaanamentoki Tajorentsi.

Pikimoshirewenteri Tajorentsi

⁴ Pikanteetatyeyaaani pikimoshirewenteeyerini Awinkatharite. Napiiteemiro: pikimoshirewentaperooyerini, maawaeni. ⁵ Nokowaki riyoteeyeni atziri pikamintaantaperooyerini. Eero pipeyakotziro: rooteentsi ipokae Awinkatharite. ⁶ Eero pikenkithashiryakopiintziro oetarika awijimotemini. Pikanteetatyeyaaani pamaneri Tajorentsi, pikanteri oetarika pikoyiri. Oetarikapaeni koetyeemotzimir, ari pikamanteri. Eejatzi pipaa-sonkitapiinteeyerini.

⁷ Roojatzi Tajorentsi ijeekakagaeyemini kameetha ikimoshire-takaaperoeyemini osheki. Ranaakotaperoeyakaeni aari, tee amatziro ajeekakagaeyerini kameetha paashinipaeni, tee ayotziro. Aririka paapatzyaari Jesokirishito, ikantyaani Tajorentsi ijeekakagaeyemini kameetha, riweshiryaaakagaeyemini. ⁸ Noyemijantzinkarite, eeniro paashini nokamantemiri. Okameethatzi pikenkithashiryakaooyeroni okaatzi kyaaryooperotayitatsirini, okaatzi añaaperotayiterini kameethayitatsirini; maawaeni okaatzi kameethatatsiri. Kyaaryo, pikantatyeyaaani eero pikenkithashiryakopiantwo pantero kaari kameethatatsi, inta pikenkithashiryakoperoeyaaarini maawaeni okaatzi inimotziriri Tajorentsi; eejatzi okaatzi kameethatatsiri inimoeyiririni maawaeni atziri. Kyaaryo okameethatzi ashi poyiro pikenkithashiryakotero oetarika kameethatatsiri eejatzi oetarika añaaperoteeyerini okameethatzi. ⁹ Pantapiinteyeroni maawaeni niyotagaeyakimirini, maawaeni nokamanteeyakimirini, maawaeni pikemaeyawakinarini. Oetarikapaeni piñaakirini nantakiri naari, ari panteeeyeroni erorri. Rootaki kijokiro rowantemiri Tajorentsi: ijeekakagaeyemini kameetha.

Riraga jiriposhijatzi osheki ineshironkaeyakirini Paaworo

¹⁰ Paerani pikenkithashiryaaawiteeyakinani, roojatzi pipeyakotawitaanani; omaanta niyotaki iroñaaka pikenkithashireeyaanani eejatzi, pikaminthagaeyakinani, rootaki nokimoshireperotantakari. Tema ikameethataki Awinkatharite. Tee pipeyakotaperotana, omaanta tee pimatawitawoni pikaminthagaeyenani. ¹¹ Tee nokamantawitzimi eeniro koetyeemotakinari oetarikapaeni: tee. Tee otzimaperotawita tzimimotanari, omaanta iroñaaka nametakawo nokimoshiretashita, omawitya tekatsirika tzimimotenani. ¹² Nametakawo nojeekashita tee nashaagantya osheki, eejatzi nametakawo aririka nashitayityaawoni oetarikapaeni. Niyatayitakironi maawaeni: niyotaki nokemakawo nowanawo, eejatzi niyotakiro tsika okanta notasheyi. Niyatakiro nashaagantaka, eejatzi niyotakiro nashironkaaka. ¹³ Tema kijokiro rowana Rotyaantanewo Tajorentsi, imatakaakin, rootaki nomatantawori oetarikapaeni ikowakaakinari. ¹⁴ Omaanta pineshironkaeyakinani.

Piyoteeyakini nowashironkaawitaka, rootaki pikaminthagaeyantakinarini. Tema kameethataki okaatzi pantakiri.

¹⁵ Eejatzi piyoteeyini tsika okantani paerani, owakiraani nokenkithataaktakimirini jaga pinampiki, netakoperoeyakimini. Niyaatantaari eejatzi, nopoñaanaa Masherooniyaki, niyaatayitakinii paashinipaeniki nampitsi. Apatziro eerokapaeni petakoeyawakinani, pipashiteyawakinawoni koetyeemotakinari. Tee ikimiteeyemini riraga aapatziyeeyaririni janta paashinikipaeni nampitsi. ¹⁶ Eejatzi, nojeeekantakarini janta Tejawoonikaki, potyaanteeyäkinarini okaatzi koetyeemotakinarini. Eejatzi paashini pipakaantaana. ¹⁷ Tee nokowakaawitzimi pipapiintena oetarikapaeni, omaanta nokowaperotaki pimatayiteroni kameethatatsiri, kameetha ipinatperoeyantemirini Tajorentsi.

¹⁸ Ipapaakinawo Epajororiito maawaeni pipakaantakinari. Okameethap-erotzi iroka pantakiri, okimitaka riro pipakiri Tajorentsi maawaeni. Iñaaperotakiro, riweshiryaawentakimi. Iroñaaka ojeekimotaperotakina oetarikapaeni, tekatsi paashini koetyeemotenani; monkaataka. ¹⁹ Pameentaperotakari Jesokirishito, rootaki retakoeyantemirini Tajorentsi, ipaeyemini maawaeni koetyeemoeyakimirini. Ashaagantzinkari rirori, tee imashithatz. Tema reewawanantaperotzi, ikameethaperotzi.

²⁰ Thame añaaperoyerini Pawa Tajorentsi, akanteetatyeyaaani. Aritaki akantaperoeyaani.

Riweyantakawo Paaworo rojankinari

²¹ Nowethateeyemini, eejatzi nowethateeyarini maawaeni riraga aapatziyariri Jesokirishito. Riwethateeyakimini eejatzi maawaeni ayemijantzinkarite jaka. ²² Eejatzi riwethateeyakimini maawaeni aapatziyariri: riraga ratziritepaeni Seesari, maawaeni. ²³ Nokowaki ineshironkaperoeyemini Awinkatharite Jesokirishito. Piweshiryaawenteeyaarini, maawaeni.

Naaka jankinatzimirori iroka:

Paaworo

ROJANKINATZINIRI PAAWORO KOROJAASHIJATZI

1-2 ¿Eeniromi, noyemijantzinkarite, maawaeni aapatziyariri Jesokirishito janta Korojaashikinta? Naaka Paaworo nojankinatzimiro. Naaka Rotyaantaneleo Jesokirishito, rootaki nokenkithatakanztzimiro, rootaki ikowakaakinari Tajorentsi. Notsipatakari jika ayemijantzinkarite Temoteeyo. Nojankinatzimiro maawaeni aapatziyaperotariri Tajorentsi jaga pinampiki. Nokowaki ineshironkatapiintemi eejatzi riweshiryaakayemi Pawa Tajorentsi, eejatzi rirori Awinkatharite Jesokirishito.

Ipaasonkitakowentziri Paaworo korojaashijatzi

3-5 Paerani pikemakironi iñaani Jesoshi paapatziyakawo, rootaki paw-ijakontari. Kyaaryo iroka pikemakiri. Eejatzi piyoteeyawakironi kameetha ijekakayemi riraga Tajorentsi janta jenokinta. Rootaki paapatziyantaperotakarite Awinkatharite, eejatzi osheki pineshironkaperotziri maawaeni ayemijantzinkarite. Nokemakotakimi, rootaki maawaeni kitejiri namanantapiintariri Tajorentsi, nokantapiintziri imatakapaiintemiro kameethatatsiri, eejatzi noñaaperotziri Tajorentsi, riraga ashitariri Awinkatharite Jesokirishito. Eerokateeyakini nopaasonkitakowentziri.
6 Pikemakiro iyaatakotayitanakini iñaani Tajorentsi maawaeni nampitskipaeni. Raapatziyeeyakarini Jesokirishito oshekini riroripaeni. Pike-mantakawori eerori, piyotaperotawakiro kyaaryo ineshironkatakeae riraga Tajorentsi. Paapatziyawakawo rootaki kaari pikimitanta paerani, omaanta eekiro, eekiro piyotakiro pantero ikowakiri rirori. Eejatzi ikimitakimi paashinipaeni kemaperotakirori ipaashiniperoteeyeeni. **7** Riroma Epaajagashi rirotaki kenkithatakkimirini paerani. Ikimtana, ikantani ikyaaaryooowentziniri Jesokirishito. Kameetha ikyaaaryooowentziniri, rootaki notyaanantariri ikenkithatakanztzimiro. **8** Ikamantapaakina omataakimiro Ishire Tajorentsi, rootaki pineshironkaperotantakariri paashinipaeni atziri.

9 Rootaki namanapiintariri Tajorentsi: “Pimatakayeri pikowakaakiriri maawaeni noyemijantzinkarite janta Korojaashiki”.

Roojatzi nokantani nokantapiintziri Tajorentsi: “Piyotakayeri korojaashijatzi maawaeni pikowakaakiriri kameetha raapatziyantaperotemiro”. Eejatzi nokantziri: “Nokowaki Pishire iyotaaperoteri maawaeni, iyotakaap-eroteri, kameetha ikemantaperotyaawori pikantziri”. **10** Eejatzi nokantziri imatakayemiro apatziro pikenkithashiryaapiintero pantero kameethatatsiri, piweshiryaakaaperotantyaawori, eejatzi panantyaawori maawaeni kameethatatsiri. Riroma rirotaki Awinkatharite, rootaki okameethatantari antenri iroka, iñaaperotanteeri. Nokantziri imatakayemiro apatziro pantero kameethatatsiri, rootaki imatakayemiro piyotantyaawiri, eekiro, eekiro piyoperoteri. **11** Riroma rirotaki Tajorentsipero, ikameethaperotaki, imataperotero oetarika ikoyiri, rootaki nakananttariri imatakantemirori pimatantapiintyaawori maawaeni kameethatatsiri, eero pijamashiryaawo inta pikimoshirewentanakiri Tajorentsi. Rooma aririka rowashironkaawitemi atziri, rirotaki matakayemironi Tajorentsi eero pipiyatantaripi-jiri. **12** Rooma rirotaki owameethatakaeri, riwetsikashiryaakae aatantyari

janta ikashiyaakaakaenta. Rooma ari akaateeyapaakirini maawaeni ayemijantzinkarite janta okitejiperotzinta, kameetha ajeekapae. Rootaki akanantakariri Tajorentsi: "Ariwee, Pawa".

Ikenkithatakotakirijesokirishito

¹³ Paerani reewawenantawitakaerini iwinkatharite kamaaripaeni rootaki akimitantawitakaririni ajeekawitani janta otsiteniperotzinta. Omaanta rowawijaakotakae Tajorentsi, rootaki iroñaaka reewawenantaera Itomi, riraga inintaperotanewo rirori. ¹⁴ Ikamawentakae riraga Itomi, rapaatawentakae riraa rowawijaakotantakaeri. Ineshironkaperotakae Iriri, iroñaaka eero ikenkithashiryaa koteero kaari kameethatatsi antawitakari paerani.

¹⁵ Kaari ikoñaanitzi Pawa Tajorentsi, omaanta ipokapaaki jaawikika Itomi, ikoñaatapaaki kipatsikika, rantaritapaaki jaka. Omaanta ikimitaperotari Ashitariri. Tekirani ojeekini kipatsi eejatzi maawaeni oetarikapaeni añaayitzirini, ari ijeekitani janta Jenokinta rirori. ¹⁶ Rirotaki wetsikakiriri maawaeni: Jenokijatzi, kipatsijatzi, koñaatatsiri, kaari koñaatatsi, maawaeni. Aritaki riwetsikakiriri maawaeni rinashitayitakanri ronampiri Tajorentsi. Rirotaki Jesokirishito wetsikakiriri maawaeni. Tee riwetsikashitari, inta riwetsikantayitakaririni maawaeni iñaaperoteri. ¹⁷ Rirotaki Jesokirishito itaperotakaworikya ijeekitani paerani. Ikantakiri maawaeni riwetsikani: "Aritaki pikanteeyaani". ¹⁸ Rirotaki Jesokirishito iyopero-tatsiri reewatawentakae aaka, eejatzi maawaeni paashinipaeni aapatziyariri. Tekatsimi rirori, eeromi ayotzirim Tajorentsi, eeromi aapatziyarimi, eeromi awijakoteemi. Ipiriinteeri Itomi riraga Tajorentsi paerani, eero ikamae eejatzi. Rirotaki Jesoshi itakawori ipiriinta. Riro impae-tatsini kaminkari ipiriintee aririka omonkaatapaaka ipokantaatyari Jessoji jaka kipatsiki. Kyaaryo ipinkathariperowenantziroña maawaeni, ¹⁹ itajorentsiperotakiroña. Rootaki ikowakaakiriri Ashitariri. ²⁰ Paerani eenitatsini kaari kameethatatsi rantawitarini maawaeni atziri, rootaki kaari riweshiryaantawita riraga Tajorentsi, omaanta rotyaantakiri Itomi ikamawentakae koroshiki, rapaatawentakae riraa. Ikamawenantaera kameetha atspatanteeyaa rirori, rootaki roemoshirenkan-takaeri. Rowameethatakae eejatzi ikoyi rowameethatheri maawaeni kipatsijatzi eejatzi Jenokijatzi. Iroñaaka iñaaperotakae akameethatzi, eejatzi añaaperoteri rirori.

Ikenkithatakoterikorojaashijatzi

²¹ Ari, paerani tee pikenkithashiryaa piintzirini Tajorentsi, pikijawitarini. Pikenkithashiryaa witawoni kaari kameethatatsi, eejatzi pantapiintawitawoni. ²² Omaanta ipokapaaki Jesokirishito kipatsikika, ikoñaatapaaki ikimitakotawitapaakae aaka. Roojatzi ikamawentakae koroshiki rowameethatantakaeri, rootaki iroñaaka pñaaperotantariri Tajorentsi ikameethatzi, eejatzi iñaakimi eerori pikameethaperotaki, ikimitakaantakimi tee pantziro kaari kameethatatsi. ²³ Omaanta ikowaki akantatyeyaaani aapatziyawo iñaani. Eekiro aatatyee aapatziyaperotanakyaawo. Piyotaperote kyaaryoopero atsipataperotyaari Tajorentsi paata Jenokinta. Eero pipakayiro paapatziyawo iñaani. Ñaakiro, othoyaaka okamantakotaka iñaani Tajorentsi maawaeni nampitsiki. Eejatzi naari nokenkithatakotakiro, notsipatakari paashinipaeni kenkithatakanantatsiri.

Riyoteeri Paaworo kaari riyotawitani paerani

²⁴ Osheki ikemaatsitakawo Jesokirishito rowawijaakotantakariri maawaeni aapatziyariri, iroñaaka ikimitakaantakae aaka inampijatzipero, rooma aapatziyakari. Iroñaaka okimitaka maawaeni aapatziyariri ikemaatsitawentyaari paashinipaeni rawijakotantyaari, eejatzi naaka nokemaatsitawentzimi, niyotaantzimiri paapatziyaari rirori, rootaki nokimoshiryantaari. Monkaataka iroñaaka. ²⁵ Ikantana Tajorents: "Pineshironkateri maawaeni piyemijantzinkarite, eejatzi piyotaaperoteri nokoyiri". Ari iroñaaka niyotaakimiro. ²⁶ Niyotaakimiro maawaeni kaari riyatowitani paerani ronampiripaeni Tajorents, eejatzi kaari riyoteeyawitani atziripaeni. Iroñaaka riytakaakaero aaka eejatzi maawaeni paashinipaeni aapatziyariri. ²⁷ Iroñaaka ikowaperotaki piyotero imataakimiro; okameethaperotziroña. Eeroka kaari joriiyotsi, omaanta ikamawenteeyakimi eeroka eejatzi rootaki kijokiro rowaperotanzimiri Jesokirishito pishireki, rootaki piyotantari kameetha pijeekimotaperoteri Tajorents iinja. ²⁸ Rivotaki Jesokirishito nokenkithatakotziri. Nokantziri maawaeni atziri: "Kyaaryoowa, pantzirokari kaari kameethatatsi". Eejatzi niyotaaperotziri irinta riyataperotantyaariri riraga Jesokirishito, raapatziyaperotantyaariri kameetha. Eejatzi eeroka, aririka piyoperoteri, paapatziyaperotyaariri, ari pikimitaperotyaari Tajorents pikameethaperotanaki. ²⁹ Rootaki nopomeentsiwenantzimiori, kaari noperawenantzimi. Eejatzi rootaki niyotaantakariri maawaeni. Imatakaakina riraga Jesokirishito, rivotaki shintsitakaakinari, itajonkawentakina nomatantakawori.

2

¹ Nokowaki piyote nokantani nopomeentsitawentzimi nokenkithatakayiri Tajorents. Nokantapiintziri imatakayemiro kameethatatsiri, eejatzi nokimitakowentziri ayemijantzinkarite janta Raworisheeyaki. Eejatzi nopomeentsitawentziniri maawaeni kaari ñaana, nokantapiintziri Tajorents imatakayeri rirori kameethatatsiri.

² Nokantapiintziri eejatzi imatakayemiro piweshiryantaari, pineshironkatawakaantyaari. Eejatzi nokowaki imatakayemiro pikemaperotero maawaeni rantawentzimiri Jesokirishito. Rootaki nokowakiri piyoperoteri Jesokirishito. ³ Paerani tee riyatowitarini atziri irira, omaanta iroñaaka riyoteeri rirori. Jee, nokowaki piyoperoteri kameetha. Rootaki nokanantakimiri.

⁴ Omaanta eenitatsi paashini atziripaeni rinashita riyotaantzi. Kyaaryoowa, ramatawiteetzimikari, rootaki niyotaantzimiori maawaeni iroka. ⁵ Kyaaryo, tee notsipatawitzimi, omaanta osheki nokenkithashiryakimi. Niweshiryaaawentakimi kameetha pijeeki. Kyaaryo, pineshironkatawakaaka, eejatzi eekiro piyaatatzi paapatziyaperotari Jesokirishito, rootaki niweshiryantaari.

Kijokiro poyeri Jesokirishito

⁶ Rooma paerani paapatziyakari Awinkatharite Jesokirishito, rootaki rowawijaakotantakimiri. Rootaki iroñaaka, eekiro piyaatatzi paapatziyaantariri apatziro irira: maawaeni kitejiriki panteniri oetarikapaeni ikowakaakimiri. ⁷ Noshiyakaawentemiro: rowaga pankirents, aririka oparithaperotaki inthomaeki kipatsi, rootaki oshookantari kameetha, eejatzi oshintsitaktakari. Eejatzi pikimitanakya eerori, kijokiro poyeri Jesokirishito. Apatziro pikenkithashireeri, ari imatakayemiro kameethatatsiri, eejatzi ishintshiretakayemi. Pikantatyeyaaani pikemijantaperoteri, rooma rootaki riyotagaetakimiri.

Aritaki pikantya, eekiro piyaatatyepipaasonkiteeyerini Jesokirishito, tema ineshironkaperotakae.

⁸ Omaanta eenitatsi paashini atziripaeni inashita riyotaantzi. Kyaary-
owa, riyotaantziro theeyaantsi, rowaga maawaeni ikenkithashiryari
rirori ejatz maawaeni riyotashitawitari: rootaki riyotaanteeyawitarini
ichariniiteni, itaperotakaworini ijeekini. Ramatawitzimikari. Eero paap-
atziyari. Tee riyotagaero ikantaperotziri Jesokirishito: tema tee ikowakay-
imiro paapatziyari.

⁹ Inta okameethatzi paapatziyari irira. Paerani ikimitakae awatha aaka,
omaanta itajorentsiperotakiroña, ashi royo. ¹⁰ Ejatz eorori, aririka
kijokiro poyer, paapatziyari, ikantyaani itajonkawentapiintemi, eero
powashironkaantaroña, inta ipashitzimiro maawaeni koetyeemotzimiri.
Ipinkathariperowenantziroña, ranaakoperotziri maawaeni paashinipaeni
jewatawitachari. ¹¹ Paerani ikantzini Tajorentsi itotonateeyani
ishiramparitantari joriyyopaeni, rootaki riyotantakari atziri raapatziyakari
Tajorentsi. Omaanta iroñaaka aririka paapatziyari Jesokirishito,
inashita ikowakayimiri. Kaari pitotonatantyaawo. Iroñaaka kimiwitaka
pitotonatakiro, omaanta rowameethatakimi pishireki pipakaantaawori
kaari kameethatatsi pantzirini, iroñaaka eero pikoyiro pantapiintero.

¹² Eeroka ikaawoshitanteetakimiri, kimiwitaka itsipatakimi Jesoshi,
pikamaki ejatz kimiwitaka romonkeetakimi omookinta. Tema Tajorentsi
ipiriinteeri Jesoshi, ejatz eeroka kimiwitaka ipiriinteemi. Tema
paapatziyakari riraga Tajorentsiper, riraga piriunteeriri Jesokirishito,
rootaki ipaashinitakaanteemiri. Iroñaaka tekatsi pikanteeyaa pantero
kaari kameethatatsi, rooma kimiwitaka pikamakitzi. ¹³ Paerani
okimitzimotakimi tee pañi, tee pikenkithashireerini Tajorentsi; inta
pantapiintawitawoni kaari kameethatatsi. Tee piyotawitarini riraga
Tajorentsi. Iroñaakakya ineshironkatakimi, tee ikenkithashiryagaero
kaari kameethatatsi pantawitarini. Rowameethatantakimiri panteero
kameethatatsiri, pikimitakari Jesokirishito. ¹⁴ Paerani osheki apomeentsi-
wentawitakawoni rojankinarini Moeseeshi awijakotantyaarimi, omaanta
tee amonkaatzironi. Ayotaki eenitatsini kaari kameethatatsi antzirini,
rootaki aatantyaarimi paamarikinti akemaatsityawom. Omaanta
ikamawentakae Jesokirishito koroshiki, rowawijaakotakae. Iroñaaka
eero apomeentsitawentawo ironta jankinarentsi awijakotantyaari.
¹⁵ Paerani, ikamantari Jesokirishito koroshiki, riyotakaakae tekatsi ikantee
rowashironkae riraga iwinkatharite maawaeni kamaari ejatz maawaeni
pinkathatziriri riraga paashinipaeni kaari iñagaetz. Ithañaakowentakae
Jesokirishito, eero ishinetziri irintapaeninta ranaakotee.

Eero pikenkithashiryawo riyotaawitzimiri atziripaeni

¹⁶ Tee okameethatzi ikijantemiro atziripaeni oetarika powayitarini
ejatz pimirityitzirini. Eenitatsi osheki kitejitalsiri rinashitakayitakarini
joriyyopaeni imakoryaanteeyarini. Rantzironi: maawaeni ojarentsi,
maawaeni kashiri ejatz maawaeni saawaro. Teerika pimonkaatziro
eerori, eero pishinetziri ikijawentemiro. ¹⁷ Paerani ikantani
rametapiinteyawoni joriyyopaeni, ikenkithashiryantariri Tajorentsi,
omaanta iroñaaka rareetaka Jesokirishito. Riroperotaki apinkatheeyerini.
Monkaataka, ari okaatz: eero iroñaaka apiitapiintero rameteeyarini
joriyyopaeni. ¹⁸ Kyaaryoowa, eero pishinetziri riroripaeni ramatawitemi.
Inashita oetarika riyotaantziri. Ikowakaemikari pikimityaari rirori,
ikantzimikari: "Pipinkathateri ronampiri Tajorentsi pawijakotantyaari.
Noñaakiro kaari iñaapiintziri paashinipaeni, ¿piñaakiroma eerori?"

Ikantakaaperotashita. Eero pikenkithashiryaawo ikantawitzimiri, itheeyashita. ¹⁹ Tee raapatziyaperotari riraga Jesokirishito, omaanta irira rirotaki Jewateeni. Aakakya, aririka akenkithashireeri irira apaniroeni, kameetha aapatziyaari. Riyotakaakae, imataakaae kijokiro owakiri ayemijantzinkarite antaperotantyaawori ikowakaakaeri Tajorentsi.

²⁰ Ikamaki Jesokirishito, eejatzi okimiwitaka itsipatakimi pikamaki eerori. Iroñaaka eero pikenkithashiryaawo riyotaawitzimiri atziripaeni, eero owawijaakotzimi. ¿litaka patsipetashitantawori pantashiwitakawo ikantzimiri irintapaen? ²¹ Tee okameethatzi ikantawitzimiri: “Aririka pikowaki pawijkote, eero pipampitziro okaatzi ithaawakari Tajorentsi, eero powari kaari ishinetzi Tajorentsi, eero poteeyiro ithaawakagaetari”. ²² Tee rootaki ikantziri Tajorentsi. Rooma riyotashitakawo atziripaeni iroka, riyotaashitzimiro. Pamine, riwetsikakaero Tajorentsi maawaeni owanawontsi owaeyarini. Aririka owaeyawo, ari okaatzi, thonkapaaka. Tekatsi okantziro ashire. ²³ Aririka atzityawa owanawontsi aetakaashitakari ayotzi, aetakaashitakari aapatziyaperotakari Tajorentsi, aetakaashitakari tee akantakaaperota, aetakaashitakari ashironkaawentakari Tajorentsi. Omaanta atsipetashitakawo atzita. Aririka atzityityaawoni owanawontsi, akantatyaaani akoyiro kaari kameethatatsi, tee akoyi amaejantero, eejatzi akantakaaperotaka.

3

Ikanteri: “Kameetha pijee”

¹ Paerani tee piyoteeyawityaarini Tajorentsi, piyaateeyenimi paamariki kaari tsiwakanitatsini; omaanta ikamawenteeyakimini Jesokirishito, rowawijaakoeyakimini. Roojatzti ipiriinanta; rootaki iroñaaka piyotantariri Tajorentsi, eero piyaateeyeeni päämariki, inta piyaateeyeeni jenokinta: janta ijekinta Jesokirishito rakoperoki Ashitariri, itsipatapaari ipinkathariperotzi. Iroñaaka eekiro piyaatatyé pikowaperotanaki pijeekaeyeni janta, pitsipateeyantapaeyaarini. ² Rootaki kaari apatziro pikenkithashiryaantapiintawo tsika pikantyari jaka jaawikika, inta pikenkithashiryaakotaperotyaawo jenokinta, rowaga tsika ikanta Tajorentsi, eejatzi oetarika ikowakayimiri. ³ Okimitaka pikamaki, eero iroñaaka pikenkithashiryaayiteroni jeekatsiri kipatsikipaeni, eero pikimitaa paerani. Omaanta räñaakaagaaemi Tajorentsi, pijekantapaeyaari jenokinta. Ikempoyaaperotakimi, ikimitakaantakimi riraga Jesokirishito. ⁴ Inja ipiye kipatsikika Jesokirishito, riraga añaakaeyakagaerini. Kameetha ipinkathariperotapaaki, akaateeyapaerini apinkatharitapae aakapaeni.

Eero papiitziro kaari kameethatatsi pantawitarini paerani

⁵ Iroñaaka kimiwitaka kamakimi omaanta rowañaagaemi Tajorentsi, rootaki kaariroña papiitanteeyaaawo kaari kameethatatsi pantawitarini paerani. Eeroka shirampari, eero pishirontawo tsinani kaari payi. Eeroka tsinani, eero pishirontari kaari piimi. Shirampari, eero pantatenkatawakaa pishiramparinkaki, pikimitakaantyaari riro tsinani. Tsinani, eero pantatenkatawakaa pitsinaninkaki. Eero pikowaperotziro pantero iroka, eejatzi oetarikapaeni kaari kameethatatsi. Eero piñaawenatapiintawo pipiyotaperotero pashaagawo maawaeni kitejiri. Aririka pikenkithashiryaapiintero pipiyotero, pikimitakaantakawo rootaki pitajorentsite. ⁶ Osheki rantayitzironi atziri irokapaeni, rootaki rowashironkaantyaariri Tajorentsi inja. ⁷ Paerani pantapiintawitawoni, ashi poyironi. ⁸ Iroñaaka pipakaeroroña iroka: eero pikijawakaa, eero

pimanintawakaa, eero powariperotawakaa, eero pikantzimatawakaa, eero powashiyakothatanta,⁹ eero pamatawitawakagaeyani, kameetha pijeeki; rooma iroñaaka tee pikimitagaeya paerani, eero papiiteero pantawitakari, kameetha pijeeki.¹⁰ Paashinishiretayiteemini, tema rowameethateemii Tajorentsi. Iroñaaka pikameethashireperotanaki, pikimiteeyaaarini riraga Wetsikanakimiri paerani. Eejatzia maawaeni kitejiri tema rirotaki amitakotzimiri pantero kameethatatsiri, eekiro piyaatayte piyotaperoteri kameetha.¹¹ Tee ikenkithashiryaaakotero Tajorentsi tsika akantari: omawitya rirorika joriiyotsatsiri, kaari joriiyotsatsiri, totonatachari ishiramparitantari, kaari totonatziro, poñaachari paashiniki kipatsi, yotzinkari, kaari yotzinkari, pimantaarewo, kaari pimantaarewo, omaanta ikenkithashiryaaakoteeri aapatziyakaririka Jesokirishito riraga Awinkatharite.

Tsika akantyaaka ajeekae aakapaeni aapatziyariri Jesoshi

¹² Pamine, ineshironkaperotakimi Tajorentsi. Rowameethatakimi pishireki, rooma riyyoakimi reentsitzimi. Rootaki ikowakaakimiri ashi poyeroy petakotantya, pikaminthaante, eero pikantakaaperota, pitsinampashirete, eero peshiwentziro.¹³ Poyaakotawakagaeyani: eero pipiyatakotari kijawitemiri, inta pipeyakoteniri eejatzia pineshironkateri. Rooma ipeyakotzimiro Awinkatharite kaari kameethatatsi pantziri. Eejatzia pikimiteri atziripaeni eerori pipeyakoteniri oetarika rantzimotawitemiri.¹⁴ Iroka kameethaperotatsiri pantaperoteri: eekiro pinintashireperotawakagaeyanakyaani maawaeni. Ñaakiro, aririka anintashireperotawakaaya, aritaki aakameethatawakagaeyanakyaani maawaeni.

¹⁵ Piweshiryaaawenteeyarini riraga Jesokirishito. Rootaki riyyoantakimiri Tajorentsi piweshiryaaawentyaari rirori. Roojatzia pikantyaani pipaasonkitapiinteri.¹⁶ Pikantyaani pikenkithashiryaaoperotantyaawori inaani Jesokirishito. Pikanteri riytakayemi kameetha piyotaawakagaeyantyaarini ikowakaakimiri Tajorentsi. Eejatzia pikantawakagaani: "Thame aweshiryaaawenteeyari Tajorentsi". Ikantheeyakimini Tajorentsi, iroñaaka pipaasonkiteeyirini. Pomampaawenteeyarini irira maawaeni pajankaneki, pomampaawetaya okantziri Iwaperite. Pomampaawentyaari Tajorentsi, eejatzia pomampaakotyaawo Ishire Tajorentsi iyotashiretakaakimiri.¹⁷ Tee akowaeyeni ipashiwentakagaeyeenii Awinkatharite Jesoshi, rootaki nokowakaantakimiri powameethatayiteroni maawaeni oetarika panteri. Okameethatzi akenkithashiryaaapiinteri, apaasonkiteeyantyaaririni Tajorentsi.

Ikantziri tsika akanterika atziripaeni

¹⁸ Eeroka tsinani, pikemijantaperoteri piimi, rootaki ikowakaakimiri Awinkatharite.¹⁹ Eeroka shirampari, pineshironkaperoteri piina, eerokya pikijathatziro.²⁰ Eejatzia eeroka eentsi, pikemijantaperoteri piri oetarikapaeni ikantemiri. Eejatzia pikimitero piniro, pikemijantaperoteri oetarikapaeni okantemiri. Tema rootaki inimotziriri Awinkatharite.²¹ Eenitatsirika pashi peentsitepaeni, kameetha pikemijantakayeri. Omaanta eero pikijathatapiintziri, pikantakaashiryaaakaneentarikari.²² Pimantaari, pikemijantaperoteri riraga amanantzimiri, oetarikapaeni ikantzimiri. Eero pamatawitziri: omawitya eerorika raminimi, omaanta kameetha pantawaeteniri. Pipinkathatziririka Awinkatharite, ari pikyaaryoowenteniri rirori kameetha piwaatorote.²³ Oetarikapaeni panteniriri, pikyaaryoowenteniri. Pikimitakaantyaari riro Awinkatharite

pikyaaryoowentziniri, tee riro atziri. ²⁴ Piyoperotaki pikyaaryoowenteniri Awinkatharite Jesokirishito, rirotaki pinatemini iinja, rañaaperotakagaemi janta Tajorentsikinta. ²⁵ Omaanta riraga antapiintzirori kaari kameethatatsi, ari rowashironkaakiri Tajorentsi. Oetarikapaeni anteeyakirini, eenitatsi ikanteeri aaka iinja, tekatsi akantya amatawiteri.

4

¹ Eeroka antawaetaakaantatsiri, pineshironkateri patzirite, kameetha pipinateri. Eero powashironkaashitari, kameetha pijeeki. Rooma piyotzi ijeki janta jenokinta Piwinkatharite, rirotaki maawaeni pantziri.

Pikenkithatakapinteri Tajorentsi

² Pikanyaani pamanapiinteri Tajorentsi, maawaeni kitejiri. Pikenkithashiryakoperotaari oetarika ikantziri, eejatzi ikoyiri, eejatzi pikantapiinteri: "Ariwee Pawa, paasonki", rooma ikameethaperotaki.

³ Rooma nokamantapiintziri atziripaeni tsika ikantyaari rawijakotanteeyaari, rootaki romonkyaanteetakinari jaka omonkyaaagamentotsiki. Pamaneri Tajorentsi ramitakoeyenani nokamanteeyerini paashinipaeni atziri tsika ikantakaeri Jesokirishito rowawijaakotantakaeri.

⁴ Pikanteri imatakayenawo kameetha nothotyeeniri atziripaeni, ikemaperotantyaawori. ⁵ Eejatzi aririka pitsipatyaaari kaari aapatziyari Jesoshi, nokowaki kameetha pijeeki, eero pipashiwenta. Eejatzi kameetha piyotagaeyerini, eero piperashiryawo. ⁶ Aririka pikenkithatakayeri, pineshironkateri, kameetha ikemaperotantemiri. Eero poñaashirenkiri piñaañaatziri. Aririka rojampitemi oetarika, piyote kameetha tsika pikanteri pakeri ikowantaperotaari rirori raapatziyari Jesoshi.

Ikenkithatakotziri Teekiko

⁷⁻⁸ Iroñaaka notyaantemiri Teekiko, ayemijantzinkarite nonintashireperotziri. Ikitimakina, ikyaryoowentziniri Awinkatharite oetarikapaeni rantziri. Ikamantapaakimi tsikarika nokanta nojeekaki. Rootaki notyaanantyaariri, piyotantyaari tsikarika nokanteyayarini jaka, eejatzi nokowaki riweshiryakayemi. ⁹ Itsipatanakyaaari irira Oneeshimo, poñaachari piipatsiteki. Rirotaki ayemijantzinkarite: ikyaryoowentziniri Awinkatharite oetarikapaeni rantziniriri. Nonintaperotziri. Ari ikaate apite kamantapaakimini maawaeni oetarika awijeentsiri jaka.

Riweyaantari riwethatyaari korojaashijatzi

¹⁰ Eeniyo jaka eejatzi Arishitaariko, riwethatzimi. Ikaatakina nokyaaryoowentziniri Awinkatharite, rootaki romonkyaanteetakariri eejatzi naaka. Eejatzi riwethatzimi Marikoshi, riraga rirrentzithori Werenawee. (Tema irika Marikoshi rirotaki nokamantakotakiri paerani. Nokantakimi: "Aririka rareetakya pinampiki, paakameethatawakiri".) ¹¹ Eenitatsi jaka eejatzi Jesoshi, iitachari eejatzi Jooshito, riwethatzimi. Rirotaki joriyyopaeni omaanta ikaateyakinani nokenkithatakotziri Tajorentsi tsika ikantari reewawenantee. Eejatzi osheki riweshiryakaakina. Paashinipaeni joriyyotatsiri tee ramitakotana. ¹² Eeniyo Epaajagashi riwethatzimi eejatzi. Poñaachari pinampiki. Rirotaki kyaaryoowentziniriri Jesokirishito eejatzi. Ikantani ramanapiintziri Tajorentsi imatakayemi pikimityaari, pikameethatantyaari, eejatzi pimatantyaawori maawaeni ikowakaakimiri.

¹³ Nokantemi: kyaaryo, ikyaryoowentziniri rirori. Eejatzi ikyaryoowentziniri riraga raworisheeyajatzi, eejatzi riraga iyeraaporeshijatzi.

¹⁴ Eejatzi riwethatzimi Rookashi, riraga aawinantsatsiri noneshironkaperotziri. Eejatzi riwethatzimi irira Teemashi.

¹⁵ Niwethatari maawaeni ayemijantzinkarite janta Raworisheeyaki, ejatzi niwethatawo Niijowa, ejatzi niwethatari maawaeni kemijantapintzirori iñaani Tajorentsi janta opankoki. ¹⁶ Piñaanatawakiniri nojankinari maawaeni ayemijantzinkarite eerokakinta. Roojatzi pikanteri riraga raworisheeyajatzi iñaanatawakiniri maawaeni iyemijantzinkarite rirori. Ejatzi piñaanatawakiro nojankinatziniriri irinta. ¹⁷ Iroka pikanteriri Arikipo: “Pimonkaateniri maawaeni ikowakaakimiri Awinkatharite, eero piperawentawo”.

¹⁸ Naaka Paaworo nojankinatakimo nakoki: “Nowethatzimi”. Eenirona nojeeki jaka omonkyaaagamentotsikika, eero pipeyakotziro. Nokowaki ineshironkatemi Tajorentsi.

Ari okaatzi.

Naaka jankinateeyimironi:

Paaworo

RITAKANARI PAAWORO ROJANKINATZINIRI TEJAWOONIKAJATZI

¹ Nokoyi niwethatemi eerokapaeni, noyemijantzinkarite, maawaeni aapatziyariri Jesokirishito janta Tejawoonikakinta. Naaka jakaa Paaworo, not-sipatari Shiireshi eejatzi Temoteeyo nojankinatzimiro iroka. Tema eeroka sheninkateeyakaririmi Pawa Tajorentsii eejatzi Awinkatharite Jesokirishito. Nokowaki ineshironkatapiinteeeyemini eejatzi kameetha ijekakagaeyemini.

Riraga tejawoonikajatz osheki rameentari Jesoshi

² Nokantatyeyeaani nopaasonkitziri Tajorentsi: nopaasonkitawenteeyimini eejatzi nokantani namaniri ramitakoeyemini.

³ Nokenkithashiryaaapiintzimi osheki paapatziyeyakarini Pawa, rootaki panantanakanariri maawaeni ikowakaakimiri. Eejatzi nokenkithashiryaaakimi pineshironkateeyirini, rootaki pamitakotantariri paashinipaeni atziri, pikyaaryoowentziro, eejatzi pinintashiryaaawakaaka. Eejatzi nokenkithashiryaaakimi pikyaaryoowentziro pameentakari Awinkatharite Jesokirishito, paamaantaperotariri ipiye.

⁴ Noyemijantzinkarite, ikantani ineshironkatakimi Tajorentsii. Niyotaki riyyoyeeyakimini, rootaki reentsitetanteeyakimiri. ⁵ Piyoteeyakini paerani nokamanteyakimini tsika pikantyaari pawijakotanteeyarini, tee nokantashitzimi. Iyotaakimi Ishire Tajorentsii kyaaryooperotakikya nokantakimiri. Eejatzi piyotzi okameethataki maawaeni nanteeyakirini, rootaki piyotantakari kyaaryooperotakikya okaatzi nokantakiri.

⁶ Otarika piñaakotakinari nantakiri naari, aritaki pikimitanteeyakinarini eerori, paapatziyawo ikantziri Awinkatharite Jesoshi. Pikemaperotantari ikantziri irira, pameentakari roojatzi pikimitakari. Osheki rowashironkaakimi kaari aapatziyari, omaanta eekiro piweshiryaaanakity; kaari pikantashiretzi, iweshiryaaakaakimi Ishire Tajorentsii. ⁷ Kameetha pijekaki, rootaki ikowantakari ikimitemi maawaeni ayemijantzinkarite janta kipatsikipaeni owaero Masherooniya eejatzi Akaaya.

⁸ Aritaki powaaganakiro ikantziri Awinkatharite. Tee apaniroeni ikemakotakimi riraga masherooniyajatzi eejatzi Akaayajatzi, inta ikemakotakimi maawaeni paashinipaeni atziri paapatziyaperotakari Tajorentsii. Iroñaka tee nokamtanziri naari, rooma riytakotakimi paapatziyari Jesoshi, ⁹ eejatzi ikenkithatakotashiteeyakimini. Riyoteeyakini maawaeni atziri paerani niyaatantashiteeyakimirini, niyotaakotakimiri rirori kameetha. Riyotaki pookaeyakironi maawaeni piwetsikashitawitari piitajorentsiiwitari, roojatzi pameentakari Tajorentsiperi, riraga Añaaperotatsiri. Iroñaka paapatziyeyaarini apatziro irinta: pikyaaryoowentziniri ikowakaakimiri.

¹⁰ Eejatzi ikenkithatakotashitakimi pikantyaani paamayari riraga Itomi Tajorentsii. Arimachee ipokae, ipoñaaanya jenokinta. Ikamaki paerani, ijekakai 3 kiteziri omookinta. Roojatzi ipiriinteeri Tajorentsii, rañaakagaeri, roojatzi roenokantanaa jenokinta, eejatzi ipiye iinja. Ari rowashironkagaeyerini iinja maawaeni kaari aapatziyari, omaanta eero athaawantara, tema rowawijaakotakae riraga Jesoshi maawaeni aari, riraga aapatziyaperotariri.

Oetaka rantziri riraga Paaworo Tejawoonikaki

1 Piyotaki, noyemijantzinkaritepaeni, aririka nareetanteeyakimirini niyoteemi, tee natsipetashitawo. **2** Piyotaki paerani tekirani niyaatzini pinampiki, ikijayitakinani janta Jiriposhiki, osheki nokemaatsitashitakawo eejatzi ishironteetawentakinani inji, inji, inji. Omaanta ramitakotakina Tajorentsi imatakaakinawo rootaki kaari nothaawanta inta niyota-gaeyakimini maawaeni ikantziri Jesokirishito. Eejatzi osheki ipiyathatakina janta pinampikinta, omaanta omatakaakina Ishire niyotaakotakimiri riraga Jesokirishito. **3** Eejatzi piyotaki kameetha nokenkithatakaakimiro ikantziri Tajorentsi, tee nokompitawo. Tee namatawitzimi, inta niyotaakimi kameetha: tee notheeya. **4** Omaanta iñaantakina rirori nokemijantaperotziririka. Tema iñaakina nantakiro, rootaki rotyaanantakinari nokamanantzimiri. Tee nokowashitawitari iñaaperotena atziri, inta appatziro nokoyiri Tajorentsi iñaaperotena nokameethashiretzi. Rooma riyotzi irintapaeni maawaeni oetarika akenkithashiryaari. **5** Eejatzi piyotzi tee nokoyi kameetha niweshiryaashiteyemini namatawitatemiri, tee nokantashitzimi: “Pikameethaperoeyakini”. Tee nokowashita piyorkite. Riyotzi Tajorentsi nokantzimiri kyaaryooperotatsiri. **6** Tee nokowashita pñaaperotena eeroka, eejatzi tee nokowaki pñaaperotena paashinipaeni atziri. Omawitya naaka rotyaantanewo Jesoshi, **7** rootaki okameethatantawitari nokantemimi: “Piñaaperotena”. Omaanta tee nokowaki. Tee nokimitari peewatzinkarite. Okimitaka aririka othoteeri tsinani eentsite oteni, oneshirronkatantariri, eejatzi nokimitakaapaakimi, noneshironkatakimi eeroka-paeni. **8** Osheki nonintaperoeyapaakimini, rootaki niweshiryaantapaakari nokamanantapaakimirori okaatzi ikantziri Tajorentsi. Eejatzi nokyaaryowentzimi námítakotakimi paapatziyaperotari Jesoshi. Iroñaaka oetarikapaeni nantayitakirini, nokantani nokenkithashiryaapiintzimi.

9 Pikenkithashireeya, noyemijantzinkarite, nojeekeantzimotakimiri osheki nantawaetakiroña kitejiriki eejatzi tsiteniriki, oshekini nomaakotaperotakiwee. Tee nokoyi nonetheemi koetyeemotanari, rootaki nantawaetantari nopolatantyaawori koetyeemotanari. Tee nokoyi pipomeentiswentedawo eerori pipashitayitenan oetarika. Nantawaetaki eenironi nokamanteeyakimironi ikantziri Tajorentsi. **10** Piñeyakinani naapatziyaperotakari Jesoshi, nomonkaatakiro ikowakaakinari rirori. Rootaki kameetha nojeekeantakari, tekatsi kaari kameethatatsi nantziri, tekatsi nantani. Eejatzi iñaakina irira, kameetha nojeekeantakimi eeroka noyemijantzinkarite. **11-12** Iroka noshiyakaawentemiri: tema kameetha ryoteeri shirampari reentsitepaeni. Piyoteeyakinini nokimitakaanteeyakimini neentsitepaení, nokanteeyakimini paapatziyari Jesoshi, niweshiryaakagaeyakimini, eejatzi niyotaakimi kameetha pijeekeyeni ikimosfiryawenantemiri Tajorentsi. Tema ikowakaakinimi pathagakotyaa rirori reewawanentemiri. Eejatzi iinja pijeekeantyaaariri janta ipankokinta, janta ishipakiryaakoeyininta maawaeni. **13** Paerani, nokenkithatakaantapaakimirini, paapatziyaperotawakawo ikantziri Tajorentsi. Tee piitashitawakawo ro nashi nokantziri, inta piyotakiro rooperotatsiri ikantziri irira. Tema kyaaryoopero ikantziri eejatzi paapatziyeyakawoni, rootaki opaashinitakaantakimiri, owameethashiryaantakimiri pishireki. Rootaki nokanantakariri Tajorentsi: “Ariwee, raapatziyawo tejawoonikajatzi pikantziri”. Aritaki nokantani nokantapiintziri.

¹⁴ Ari, noyemijantzinkarite, pikimiteeyakarini riraga aapatziyariri Jesokirishito janta Joreeyaki. Ikijejerayakirini ijoriyyotzinkarite ayemijantzinkarite janta, eejatzi ikimiteeyakimini kaari aapatziyariri rirori jaga pinampiki, ikijejerayakimini. ¹⁵ Rowamaakaanteeyakirini joriyyo Awinkatharite Jesoshi, eejatzi itakaworini ichariniiteni paerani rowamagaeyakirini kamanantayitzirorini iñaani Tajorentsi. Eejatzi rirotaki riraga joriyyopaeni janta ikimitakina naari, ikikákina. Gee, rookakina romishiyakina, tee ikowakaana nonampijatzityaari. Tee okameethatzi rantziri, tee inimotziri Tajorentsi: tema ikijejerayakirini rirori maawaeni kaari joriyyotatsi. ¹⁶ Gee, osheki ithañaakotapiintawitakina nokenkithatakayemi eeroripaeni, rooma eeroka kaari joriyyotatsi. Tee ikowagaeyawitzimini paapatziyawo ikantziri Jesokirishito rowawijaakotantemiri Tajorentsi. Eekiro ryaatatzi rantziro kaari kameethatatsi, omaanta iroñaaka iki{j}iri irira, kyaaryo rowashironkagaeyerini.

Ikowaki riraga Paaworo rapiiteri iñaakiteri tejawoonikajatzi

¹⁷ Noyemijantzinkaritepaeni, osheki nokowaki añaawakaya. Tee akaatawakaawita, tee añaawakaaga, omaanta osheki nokoetyagaemi, nokenkithashiryaaapiintzimi. Pijeeki inteenanta omaanta iroñaaka osheki nokowakiroña napiitemi nareetaatemi. ¹⁸ Nokowaeyawitakaní nareeteeyeeminima, eejatzi nokowapiintawitaka naari niyaatashitemimi apaniroeni, omaanta rotzikaakina iwinkatharite kamaariipaeni. ¹⁹ Iinja ipokae Awinkatharite Jesokirishito. Riyotaki irira niyotagaeyakimini paapatziyaaari. Aririka ipokae, nokmoshirewenteeyemini eerori, tsipateeyakinariroña akaateri aririka ikantena: “Kameetha pikenkithatakotakina eeroka piyotakaakiri raapatziyana riraga maawaeni irika tejawoonikajatzi”. ²⁰ Kyaaryo, niweshtiryaawentaperoyakimini eeroka iroñaaka, nokmoshireperowenteeyakimini.

3

¹ Osheki nokenkithashiryaaawitakimi, omaanta teksti nokanta nareetakimi naari. Naamaaka okameethatzi nojeeki apaniroeni jakaa nampitsiki oetachari Ateenashi, ² notyaanantakimiriri riraga Temoteeyo. Tema rirotaki ayemijantzinkarite; ikimitakae akenkithatakotziri ikantziri Jesokirishito riraga Owawijaakotantatsiri. Ari rareetapaakimi rirori, ramitakotapaakimi paapatziyaperotyaari Jesoshi, eejatzi riweshiryaakagaea-paakimini. ³ Nokowakaakimiri eeroka eero pikantashiretanaka aririka ikijakimi atziri. Piyotzi aapatziyari Awinkatharite, rootaki akemaatsiwenantariri iroñaaka. ⁴ Paerani nareetantakimirini janta, nokamantakimini: “Aririka paapatziyari Jesoshi, rowashironkayemi theenkantatsiri”. Aritaki piyotaki iroñaaka monkaataka nokamantakimirini paerani. ⁵ Rootaki kaari nojamanitantaka nokemakotakimi, ari notyaantakimiriri Temoteeyo iñaantakimirini janta Tejawoonikakinta niyotantyari eekirorika piyaatatzia paapatziyari Jesoshi. Naamaakkowitakimi iñaantawitapaakari iwinkatharite kamaariipaeni rantakaakimiro kaari kameethatatsi. Aririka pikemijanterimi irinta, natsipetashitakawomi nokantawitakimi niyotakaakimini paerani aapatziyari Jesoshi.

⁶ Ari iroñaaka ipiyapaa jaka riraga Temoteeyo. Iñaapaakimi, ikamantakotapaakimi kameetha paapatziyaperotari Jesoshi, eejatzi kameetha piñeshironkaperotawakaapaa. Eejatzi ikantapaakina pikowakina piñaaperotana. Eejatzi naari, osheki nokowaki noñeemi eerori. ⁷ Eniro nowashironkaaka jaka, ikijejerayakirini. Omaanta niyotaki, noyemijantzinkarite, pikantatyeyaaani paapatziyari Jesoshi, rootaki piweshiryaakaantakinari. ⁸ Iroñaaka

nokimoshirewentakimi, kameetha nojeeki tema niyoteeyakini kyaaryo paapatziyari Awinkatharite Jesoshi.⁹ Oshekiperonokimoshirewentakimiroña, rootaki nopaasonkitantakarir Pawa Tajorentsi eejatzi Awinkatharite Jesokirishito. Tema raminakoeyakaeni maawaeni.¹⁰ Namanapiintziri riraga Tajorentsi kitejiriki eejatzi niyankipaetenitseriki. Nokantani nokantziri: "Nokowaki potyaantena napiiteeri noñeeri tejawoonikajatzi". Rootaki nokanantari rotyaatkina eekiro niyotanteemiri paapatziyaperotantyaariri, eerokya pitheenkashiryaanta.¹¹ Nokowaki riraga Pawa Tajorentsi eejatzi Awinkatharite Jesokirishito rareetakayena janta pinampiki.¹² Nokowaki imatakayemi kameetha pineshironkaperotawakaya, eejatzi pineshironkaperoteri paashinipaeni. Nokowaki pimonkaatena, noneshironkaperotakimi eerori.¹³ Nokantawentakimiri nokowaki rowameethashiryaaperotemi, pikimitantyaariri riraga Pawa Tajorentsi. Iinja ipokae Awinkatharite Jesoshi, itsipatyaari maawaenii aapatziyariri, riraga rowameethashireeyakirini. Aririka ipokae, nokowaki iñaaperotemi riraga Tajorentsi pikameethatzi: tema irira rirotaki Pawa Atajorentsite.

4

Okaatzi inimotziriri Tajorentsi

¹ Iroñaaka, noyemijantzinkaritepaeni, nokowaki panteeyeroni iroka nokantemiri: rootaki ikowakaemiri Awinkatharite Jesoshi. Niyotaakimi paerani tsika pikantya pijeeki kameetha, piweshiryaakaantakyaariri Tajorentsi. Tema pantapiintakiro paerani; iroñaaka eekiro piyaataperotatyee pantero kameetha.² Piyotakiro nokaminaakimiri, rootaki riyoatakinari naari Awinkatharite Jesoshi niyotaantakimiri eeroka.³ Ikowaperotaki Tajorentsi pikameethaperoeyeni. Eejatzi ikowaperotaki eeroka shiramparipaeni eero pishirontawo tsinani kaari piina. Eejatzi tsinanipaeni, eerokya pishirontari shirampari kaari piimi.⁴ Inta ikowaki kameetha piyote eerori paaperotero pashi piinapero, kijokiro powaperotero, pineshironkaperotero.⁵ Eero pikimitari kaari aapatziyari Tajorentsi. Tema osheki iñaaminthatziro tsinanipaeni.⁶ Omaanta paapatziyaperotyaawo ikoyiri Tajorentsi, eero pishirontakotari iina paashini atziri. Aririka pantero, aritaki rowashironkaaperotakimi Awinkatharite. Tema nokamantaperotzitakimiro paerani.⁷ Ñaakiro, ikowakaakae riraga Tajorentsi antero kameethatatsiri, tee ikowakaagae antero oetarika kaari kameethatatsi.

⁸ ¿litaka kaari raapatziyaperotantawo iroka nokantakimiri? Tee naaka ipiyathata inta ipiyathatakari riraga Tajorentsi, riroma rirotaki otyaantzimiroi Ishire kameethatatsiri.⁹ Pinintashiryaawakagaeyakan: tema rirotaki Tajorentsi iyotakimiroi pinintashiryaawakaantari maawaeni. Tekatsi okantya nojankinateemimi eejatzi: "Pinintashireeyerini piyemijantzinkarite", tema natsipetyawomi. Tema pikantani pinintashiryaawakagaeyakan.¹⁰ Jee, niyotaki pineshironkatziri maawaeni masheroonyajatzi, riraga ayemijantzinkarite, omaanta iroñaaka nokantemii eekiro piyaatatyee pineshironkaperotawakayaroña.¹¹ Pikowakowataki pijeeki kameetha: eero pashiiri paashinipaeni. Eero pakita eerori inta pikenkithashiryaakotya pashi eerori. Pantawaetapiinte eerori paantyaari koetyeemotzimiri. Tema nokaminaakimironi paerani.¹² Aririka pantero iroka, ari iñaaperotemi maawaeni kaari aapatziyariri Jesoshi, eejatzi eero okoetyeemotzimi oetarikapaeni.

Ipiriintaneerini kamaentsiri rañaagae, aririka ipokae Jesokirishito

¹³ Iroñaaka, noyemijantzinkarite, nokowaki nokantemiro tsikarika ikan-teeya riraga ayemijantzinkarite iinja, riraga kamaentsiripaeni. Nokowaki piyoperotero eero piraakoperotantari osheki. Ari papiiteri piñaagaeri. Eero pikimitari kaari iyotatsini ari ipiriinteeri Tajorentsi aapatziyariri rañagae. ¹⁴ Ayotaki ikamaki Jesoshi, eejatzi rañagae. Eejatzi ari ikim-itakaari maawaeni aapatziyariri, riraga kamaeyawiteencharini: aritaki ipiriintaneeri Tajorentsi, aririka ipokae Jesoshi itsipateeyapaeyeran. ¹⁵⁻¹⁷ Rootaki nokamantzimiri iroka riyotaakina Awinkatharite. Iinja aririka ipiye, rotyaanteri Tajorentsi apaani jewatakaakiriri ronampirepaeni ikaemeri paashinipaeni: "Iroñaaka puyaate pipiyoteri maawaeni aapatziyariri Awinkatharite". Roojatzi itziwootantakyaawo itziwoore riraga jewatakaakiriri ronampirepaeni, eejatzi ikaempaaki. Roojatzi ishaawinkantapaakyaari rirori Awinkatharite, ipoñaakya jenokinta. Tekirrika akami aaka, eero eewatziri kamayiteentsirini aate jeñlokiini. Ipiri-intawakyaata rañagae riraga aapatziyariri Jesokirishito. Roojatzikya aate, atsipatanakyaari kamawiteenchari. Ragaetanee janta menkoriki, atonkiyotawakyaari Awinkatharite janta. Impaete akanteetatyeyaaani kijokiroowanakiri. ¹⁸ Pikanteri maawaeni ayemijantzinkarite okaatzika nokamantzimiri rootaki piweshiryaaantakanakyaari maawaeni.

5

¹ Ari, noyemijantzinkarite, tee nokoyi nojankinatemiro tsikarika okaate ipokantyaari Jesoshi, tema tee ayotzi. ² Riraga koshitantsiri: aririka ipokapaaki ikoshite, ramawenatawo tsiteniriki eero añaantari. Eejatzi ikim-itapaakya Awinkatharite, romapokashitapaakae tsikarika ikaate ipiyan-teeyari: tema piyoteeyakironi iroka, rootaki nokamantkimiri paerani. ³ Aririka ikante atziri: "Iroñaaka kameetha ajeeki, tekatsi antenani", roojatzi romapokapaakiri rowashironkaapakiri Tajorentsi, eero imatziro ishiyaapithatari. Ikimityaawo tsinani motzitatsiri, omapokapaakiro atsikamoonthatapaakiro, tekatsi okantya oshiyapithatyawo atsikamoonthatakirowa.

⁴ Omaanta eeroka noyemijantzinkarite, piyotaki tee okimitzimotzimi pijeeki tsiteniriki romapokantapaakimiri Awinkatharite. Aririka ipokae, omawitya romapokapaakimi, eero roshiyakaantapaakimi koshitantsiri romapokapaakimi. ⁵ Aritaki piyotaki, okimitzimotzimi eeniro pijeeki kitejiriki pantziro kameethatatsiri, rooma eeroka reentsite Tajorentsi. Tee akimitari kaari yotziriri Tajorentsi. Okimitzimotari irirapaeni ijeki tsiteniriki rantziro kaari kameethatatsi. ⁶ Okimitaka imaaakotapiintziri Awinkatharite riraga kaari aapatziyariri, tee ikenkithashiryaaakotapiintari, okimitzimotakari imaaikitzi tsiteniriki. ⁷ Tema imaaapiinteetzi tsiteniriki, ishinkitapiinteeta tsiteniriki. ⁸ Omaanta aapatziyari Jesoshi rootaki akinakinapiinte kitejiriki, eero antziro kaari kameethatatsi, eero ashinkita. Aririka romanatapiintya joraaro paerani, ikithaanakyaawo kijokiperotatsiri, eejatzi iitoki. Rameentakawo, eero rojanaryaakotantari rojataamentoki owamaerinimi. Thame akimiwityaari irintapaeni omaanta thame ameentyaari Tajorentsi, rowakowenteeta: aapatziyari, anintashireperoteri, tema ayotaki aritaki rowawijaakotakae, rootaki kaari raawaantee aaka riraga kamaari. ⁹ Tee ikoyi Tajorentsi rowashironkae aari, inta ikowaki rowawijaakotee aririka aapatziyari Awinkatharite Jesokirishito. ¹⁰ Ikamawteeyakaeni maawaeni, añaatsiri eejatzi kamaentsiri, atsipateeyantyaaririni rirori maawaeni. ¹¹ Rootaki

nokananteemiri: piyotaawakagaeyani maawaeni piweshiryaantyaari, piyoperotantyaari. Rooma aritaki panteeyakironi iroñaaka.

Oetaka ikowakaakiriri Paaworo ranteri aapatziyariri Jesoshi

¹² Noyemijantzinkarite, pipinkathateeyerini maawaeni iyotakaakimiri paapatziyari Jesoshi, rooma ikyaaryooowentzimiro maawaeni. Riroma rirotaki Awinkatharitaro otyaantakiriri, rootaki reewawenantakimiri ejaztzi riyotaagaantakimiri. ¹³ Kameetha rantawaetaapiintzi, rootaki okameethathan-tari pinaaperoteri, pineshironkaperoteri. Eejatzi nokowaki kameetha paakameethateri paashinipaeni, eero pikijawakaa. ¹⁴ Eejatzi nokantaper-otemi, noyemijantzinkarite, nokowaki pikanteri perantzi rantawaete, eero iperata. Riraga owashiretzinkari piweshiryaakayaari. Pikenkithatakayeri kaari aapatziyariri Jesokirishito. Eentsikiroeni piyoteeri maawaeni, eero pikijathatziri. ¹⁵ Aririka rowashironkaemi ikijemi eero pipiyatari, inta maawaeni pikantyaani pineshironkatawakaapiintya ejaztzi pineshironkat-apiinteri maawaeni paashini atziri. ¹⁶ Pikantyaani pikimoshirewenteri Tajorentsi. ¹⁷ Eekiro piyatatyee pamanapiinteri irira. ¹⁸ Oetarika ikan-teetemiri, pikanteri: “Ariwee, Pawa, rowashironkaetenata inta eero ka nokimoshirewentzimi”. Rootaki ikowakaakimiri riraga Tajorentsi, tema eero aapatziyariri Jesokirishito.

¹⁹ Eero pithañaawo Ishire Tajorentsi yoteemi, eero pipiyathatawo. ²⁰ Eero pitheenkiro iñaani Tajorentsi ikamanteetemirika. ²¹ Omaanta piñaantaperotawakyaawo maawaeni riyoemimini paashinipaeni. Aririka okameethaperote, ari paapatziyawakyaawo. ²² Pithañaapithatuyaawo maawaeni kaari kameethatatsi.

Riwethateeyanaarini Paaworo

²³ Ashi royro riweshiryaakaakae Tajorentsi. Nokowaki rowameethashiryaaperoeyemini. Nokowaki ramitakotemi powameethatero maawaeni oetarika pikenkithashiryaapiinteri, ejaztzi imatakayemiro powameethatero maawaeni oetarika pantapiintziri. Kameetha ikempoyeemi roojatzi ipokantyaari Awinkatharite Jesokirishito. ²⁴ Paerani riyoakimi riraga Tajorentsi. Iroñaaka eero ramatawiteeyemini, aritaki rantakiro maawaeni ikanteeyakimirini, rowameethatemi. ²⁵ Noyemijantzinkarite, nokowaki pamanapiunteeyerini Tajorentsi imatakayena naari okaatzi ikowakaakinari. ²⁶ Kameetha pikanteri maawaeni ayemijantzinkarite janta niwethataro. ²⁷ Eejatzi nokowakaakimi piñaanateniri maawaeni ayemijantzinkarite iroka nojankinatakimirika; rootaki ikowakaakimiri Jesokirishito. ²⁸ Nokowaki ikanteetatyeyaaani ineshironkateeyemini irira Awinkatharite Jesokirishito.

Ari okaatzi iroka nojankinatakimirika:

Paaworo

RAPIITAKIRO ROJANKINATZINIRI PAAWORO TEJAWOONIKAJATZI

¹ Nokoyi niwethatemi, noyemijantzinkarite, maawaeni aapatziyariri Jesokirishito janta Tejawoonikakinta, tsikarika pikanta pijkeeksi. Naaka jaka Paaworo, nokaatakiri Shūrashi eejatzi Temoteeyo nojankinatzimiro. Rooma eeroka aapatziyariri Pawa Tajorentsii eejatzi paapatziyari Awinkatharite Jesokirishito. ² Nokowaki ineshironkapiinteeeyemini eejatzi ijekakagaeyemini kameetha irirapaeni.

Ipaasonkitakotakiri Tajorentsi tejawoonikajatz

³ Okameethatzi nopaasonkitakowentapiintzimi, noyemijantzinkarite. Nokantapiintziri Tajorentsii: “Ariwee, Pawa, eekiro ryaatatatyee raapatziyaperoyanakimini riraga tejawoonikajatzii eejatzi eekiro ryaatatzi roshekyaanaka ineshironkaperotawakaanaka”. ⁴ Kyaaryo, aririka nopyoyteeyirini paashinipaeni aapatziyariri Jesoshi nokantziri: “Pikantyaani paapatziyari Jesoshi. Osheki ikijectzimi eejatzi osheki rowashironkaetakimi, omaanta tee pipakayiro paapatziyari irira”. ⁵ Ñaakiro, kameetha reewatawenzimini Tajorentsii. Omaanta ishinetanteeyakimirini pikemaatsitakawo maawaeni iroka, pikameethashiryaantyaarikya pitsipateeyantyaaririni janta ipankokinta.

⁶ Ikameethataperotaki Tajorentsii: aritaki ipiyakowentakimi Tajorentsii riraga owashironkagaeyakimirini, aritakikya iñaashityaawoota iroñaa. ⁷⁻⁸ Iroñaa rowashironkaanteetawitakimiri, omaanta iinja aririka ipokae Awinkatharite Jesoshi, pikaatena naari ijekakaakae kameetha, roojatzi eerokya akemaatsitakawo. Iinja romapokapae rirori, ipoñaanakya jenokinta, itsipatapaakyari ronampiripaeni shintsitaperotatsiri. Ishipakiryaapaaki, ikimitapaakyawo paamari. Kameetha itsipatee ijekakaakae omaanta rowashironkaapaakiri riraga maawaeni kaari kowatsiri riyoteri Tajorentsii, eejatzi maawaeni kaari aapatziyawori ikantawitariri. ⁹ Ikanteetayeyaaani ikemaatsitakayaari irirapaeni riraga Tajorentsii janta paamarikinta kaari tsiwakanitatsinikinta. Eeroroña iñiiri riraga Awinkatharite. Kyaaryo, eero iñiiri reewaperote, eero iñiiri itajonkaperotantayiteni. ¹⁰ Aririka ipokae Awinkatharite, maawaeni aapatziyariri ikimoshirewentawakiri iñaaperotawakiri rirotaki riroperori. Eejatzi pikaateeyerini eerori, rooma paapatziyeyawakawoni paerani maawaeni nokantakimiri. ¹¹ Ari riyoakimi Tajorentsii, rootaki nokantani namanakotapiinteeeyemirini. Nokantziri imatakayemiro pikameethatantyaari rootaki iñaaperotantemirini pikameethatzi. Eejatzi nokantapiintziri imatakayemiro maawaeni kameethatatsiri ikowakaakimiri pikyaaryoowenteniri. Eejatzi nokantapiintziri itajonkawentemii pimataperotantyaawori ikantakimiri, tema paapatziyaperotakari. ¹² Roojatzi aririka iñaawaemi atziri pikameethatanaki, iñaaperotantyaariri riraga Awinkatharite Jesokirishito. Riyotzi atziri eeroka aapatziyariri, rootaki iñaaperotantemirini. Rooma osheki ineshironkatake Tajorentsii eejatzi Itomi.

¹ Ari piyotaki, noyemijantzinkarite, ipiyapae Awinkatharite Jesokirishito. Ipokaerika arimache ipiyotakaapaakae aakapaeni akaatantyaariri. Iroñaaka nokoyi nokantem: ² eero powashiretakota, eejatzi eero pithaayi. Aririka ikanteetemi: "Iyotaakina Ishire Tajorents, pokaki Awinkatharite", eero paapatziyawo. Aririka ikanteetemi: "Noñaakiri naari". Aririka ikanteetemi: "Noñaakiro rojankinari Paaworo okantzi areetapaaka Jesokirishito", eero paapatziyawo. Tema ikantashita. ³ Ramatawiteetzimikari. Eero paapatziyaneentawo ikantemirika. Tekira omonkaata ipokantyaari riraga Jesoshi. Tekirani ipoki, rityaawo oshekini atziri ikijeri riraga Tajorents, ipiyathathyaa. Roojatzi ipokantapaakya irinta shirampari riraga jataperotatsini paamariki kaari tsiwakanitatsini, riraga jewatziriri maawaeni piyathatariri Tajorents. ⁴ Ari ikoyi rirori ipakaakayeri maawaeni aapatziyariri Jesoshi, eejatzi ipiyathatakari Tajorents, ikantzi:

—Naaka jewawentziriri maawaeni aapatziyariri Jesoshi. Naaka osheki notajorentsitaki, kameetha pipinkathatena naaka. Tema naaka Tajorentsipero.

⁵ Tema pikenkithashiriilo paerani nareetantakimirini nokantakimironi maawaeni iroka. ⁶ Iroñaaka piyotaki ipokemi riraga piyathaperotariri Tajorents, omaanta iroñaaka eenitatsi thañaakariri rirori, rootaki kaari omonkaatanta kitejiri riywentyaari. ⁷ Eeniro rantawitakari iroñaaka riraga piyathatapiintariri Tajorents, omaanta imanakiro rantziri. Tema tee okameethatzi okaatzi rantziri. Omaanta eenitatsi thañaakariri iroñaaka rowaga Ishire Tajorents, rootaki kaari riywonta rirori. Aririka omonkaatyat kitejiri ipokantyaari, ari ishinetakiri iroñaaka riraga thañaakariri, ⁸⁻¹¹ roojatzi ipokaperotantapaaka rirori. Ramitakotakiri riraga Jatanaashi rareetantari rirori, roshiyakotapaaka yaari irira. Eenitatsi ishindsighta, osheki ramatawitante aririka itajorentsijeempiyaawitapaakya. Ikowaki atziri rotsikaneyawakyaariniroña. Rantapiintero kaari kameethatatsi ramatawiperotantyaariri maawaeni jatatsini paamariki kaari tsiwakanitatsini. Kyaaryo, tee ikowaki riyotero rooperotatsiri owawijaakoterinimi. Aritaki ishinetakiri Tajorents ramatawiteri raapatziyaho theeyaantsi. Aririka ipiyee riraga Jesokirishito ishipakiryakotapaakiri, roojatzi rowamaantapaaka yaari itajonkapakiri itajorenkaki. ¹² Roojatzi rowashironkaeri Tajorents maawaeni kaari aapatziyawori kyaaryooperotatsiri riraga weshiryaaawentawori kaari kameethatatsiri.

Eekiro piyaataye pameentyaari Jesokirishito

¹³ Omaanta ineshironkatzimi riraga Pawa Tajorents. Kyaaryo noyemijantzinkarite, paeraniperorona riyoakimi rowawijaakotantakimiri. Owameethataperoeyakimi Ishire, eejatzi paapatziyakawo kyaaryooperotatsiri, rootaki rowawijaakotantakimiri, rootaki nokantanapiintariri: "Ariwee, powawijaakotakiri tejawoonikajatzi rootaki ikameethatantakari". ¹⁴ Nokamanantakimirori ikantziri Tajorents, pikemaperotakiro ikowantakimiri rowawijaakotantemiri. Ikowakimi pikimityaari Awinkatharite Jesokirishito, pikaateri peewawanante. ¹⁵ Ari, noyemijantzinkarite, pikantyaani paapatziyaperotyaari Jesoshi. Eero pipeyakotziro maawaeni niyotaakimiri paerani nareetantakimiri. Eejatzi eero pipeyakotziro maawaeni nojankinatakimiri. ¹⁶ Osheki ineshironkatakae Awinkatharite Jesokirishito eejatzi Pawa Tajorents. Ikantyaani riweshtiryaaakaakae. Aririka owashironkaya omaanta ineshironkatakae rootaki ayotantakari imatakaakaero maawaeni

ikantakaeri. ¹⁷ Nokowaki riweshiryaa kagaeyemini pajankaneki. Eejatzi nokowaki imatakagaeyemironi eekiro piyaatatzı pantapiinteeeyeroni oetarika kameethatatsiri ejatzi pikanteeyeroni oetarika kameethatatsiri.

3

Paashini ikowakaakiriri Paaworo aapatziyariri Jesoshi Tejawoonikaki

¹ Noweyaantemiro, noyemijantzinkarite, nokoyi pamanakoeyenani Awinkathariteki imatakayenawo nokyaaryoo wenantyaawori nokamanteri paashinipaeni ikantziri, eejatzi ipinkathantyaaariri maawaeni kemawakirori, ikimitemi eerori. ² Eejatzi pikanteri rirori rowawijaakowentenari irintapaeni kijapiintanari riraga kowatsiri rowashironkaena. Jee, kaari maawaeni atziri kowatsiri rameentyaari Tajorentsi. ³ Omaanta eero ramatawitzimi Awinkatharite, kameetha pameentyaari. Ishintsakayemi pajankaneki pijekantyaari kameetha, eejatzi raakowentemı, eero ishinetziri iwinkatharite kamaaripaeni rantakayemiro oetarikapaeni. ⁴ Pameenteeyarini Awinkatharite ramitakoteeyemironi pantapiintero maawaeni nokaminaakimirı paerani. Aritaki pikantyaani pikemijantaperotena. ⁵ Nokowaki Awinkatharite Jesokirishito imatakayemiro piyoperotero inintashireperotzimi Tajorentsi eejatzi piyote ikantyaani ikyaa ryoo entzinziri irira maawaeni ikowakaakiriri. Nokowaki imatakayemiro pikimityaari.

⁶ Iroñaaka, noyemijantzinkarite, ikowakaakina riraga Awinkatharite Jesokirishito nokaminaaperotemı iroka ikowakaakimirı: aririka iperataky piyemijantzinkarite, eero pikimitari. Tee nokimitari naari, piñaakina tee noperata naaka. ⁷ Piyotaki okameethatzzimotzimi pikimitena naari. Paerani nareetantakimirı, tee noperata. ⁸ Aririka pipakinawo nowari, nopolnatakimirı. Arimache noshintsitzı nantawaeta piyotaki ktejirikipaeni eejatzi tsitenirikipaeni. Nokyaaryoo entakiro nantawaetaeki eenitatsi koetyeemotakinari: temı tee nokoyi opomeentsitzimotemı eerori. ⁹ Okameethatzzitaka nokowakotemimi oetarikapaeni, omaanta nokoyi niyotayemiro okameethatzzı pantawaeta piyotaki, eero piperata. ¹⁰ Nareetantakimirı nokaminaaperotakimi aririka eenitatsi kaari antawaetatsiri, eero pipiri royaari. ¹¹ Nokemakotakiri ari pikaatakiri perantzi. Tee rantawaetzi, inta ikinashita iñaawaeta shita, wero, wero, wero. Tee okameethatzzı iroka. ¹² Tema iñaakae Awinkatharite Jesokirishito, rootaki nokaminatzimirori iroka. Pikantaperoteri rirori imaerite, kameetha rantawaete rowantyaari.

¹³ Noyemijantzinkarite, eero piperatawo pantapiintero kameethatatsiri. ¹⁴ Piyotaki piyemijantzinkarite riraga kaari kemijantaperoteroni iroka nojankinatzimirı. Eero pitsipatari, rootaki ipashivenantana nyaaari. ¹⁵ Omaanta eero pikijiri, inta kameetha piyotaaperoteri, temı rirotaki piyemijantzinkarite. ¹⁶ Tema kameetha ijeeki Awinkatharite, iroñaaka nokowaki ijekakagaeyenı kameetha maawaeni ktejiriki, tsikarika piyekae yini. Nokowaki kijokiro rowapiinteeeyeremini.

¹⁷ Naaka Paaworo wethatzimirı. Nojankinatzimiro iroka nakoki: "Ni-wethattemi", kaari paashini atziri. Aritaki nametakawo, aririka nojankinatzinziri ayemijantzinkarite, nojankinatzinziri naaka nowaero: kaari paashini atziri. ¹⁸ Nokowaki ineshironkatapiintemı Awinkatharite Jesokirishito.

Ari okaatzi iroka nojankinatakimiri:

RITAKANARI PAAWORO ROJANKINATZINIRI TEMOTEEOYO

1-2 Nokoyi niwethatemi, Temoteeyo, tsikarika pikanta pijeeki. Naaka Paaworo jankinatzimiori iroka; rotyaantakina Awinkatharite Jesokirishito no-kenkithatzi, eejatzi rotyaantakina Pawa Tajorents. Rirotaki rirori matzirori rowawijaakoeyeeni, tema ayoperoeyini tekatsi paashini owawijaakotatatsini. Naapatziyakaakimini paerani, rootaki noshiyakaanantakimiri notyomipero. Nokowaki ineshironkatemi Pawa, ikaminthayemi, eejatzi kameetha ijekakayemi. Eejatzi nokowaki ikimitakayemi Jesokirishito.

Kyaaryoowa, ramatawitzimikari yotaawitantachari rojankinarini Moe-seeshi

3 Niyaatantakari Masherooniyaki, nokaminaaperotanakimi: "Pijekawakiita jaka Ejeesoki". Nokowakaakimi pikanteeyerini amatawitatatsiri: "Eero piyotaantziro theeyaantsi". **4** Pikanteeyerini ayemijantzinkarite: "Eero pikemijantashitawo ikenkithatashtayitarini". Pikanteri eejatzi: "Eero paapatziyari ikenkithatakotashitayitarini maawaeni paejatotsiri. Patsipetashitawokari paamaashitayitaawoni oetarikapaen. Tekatsi okantemi irokapaen iyotagaeyemini. Eeniro ikowakaakaeri Tajorents: aririka aapatziyaari, ari riyotagaeyakaeroni".

5 ¿Oetaka nokaminaantzimiori iroka? Rootaki nokamanantzimiori nokowaki pikameethashiretanee, nokowaki pijeeki kameetha, eerokya poshiyakaawaetashita pantero, inta kameetha paapatziyaperotanakarini Jesoshi. Aririka panteeeyakironi iroka, aritaki pimatakiro eejatzi pinintaperoeyaperoterini kameetha paashinipaen. **6** Eenitatsi apaanipaen kompitayitakaworini, ikenkithatakotashitayitawoni rriraga kaari riyotayitzini, ratsipetashitakawo ikantawitakariri. **7** Ikowayitawitani riyotaanteromi ikantakaantzimiri Moeseshi, omaanta tee riyoperotziro ikantawitari. Tee riyoperotziro oetarika iñaawaetashita, wero, wero: roshiyakari tsirotsi.

Ikenkithatakotziro kaminagaantsi rashii Tajorents

8 Ayoteeyini okameethatzi kaminagaantsi rashii Tajorents, omaanta akompitawokari. **9** Piyoperotawakiro iroka nokamantemiri: aakateeyakini rowameethatani Tajorents, tee aaka rojankinateeten, inta rojankinateetziniri kaari kemijantaperotzirori kaminagaantsi, rriraga piyathatariri, kaari aapatziyari Tajorents, antapiintzirori kaari kameethatatsi, kaari kameethatatsiri, kaari pinkathaterini Tajorents, owamayitziririni ashitariri, owamaantashitachari, **10** mayempirite eejatzi mayempirote, antatenkatawakaenkari ishiramparinkaeteki, antatenkatawakaenkawo otsinaninkaeteki, noshikantatsiri, theeri, theeyawaetashitachari, maawaeni. Eejatzi rojankinatziniri maawaeni kijayitziririni rriraga iyotaantayitzirorini kameethatatsiri. Tema riro Tajorents jankinatakaakiririni Moeseshini. **11** Kameetha iroka niyotaantziri. Rotyaantakina Tajorents nokamantakoteri irira, riyotzi nomatakiniri ikantakinari. Kameetha iroka nokamantakotziriri: tema ikameethataperotzi irira.

Ikaminthaaikiri Tajorentsii rriraga Paaworo

12 Riyoyaakina Awinkatharite Jesokirishito nanteniri oetarikapaen ikowakaakinari. Rirotaki nomonkaateniri maawaeni: riyotaki

eero namatawitziri. Eejatzi imatakaakinawo nantayitzinirini, rootaki nokanantariri: “Ariwee, pimatakaakinawo”. ¹³ Paerani nokantzimatawitarini, nokantakaaperotzimowitarini, eejatzi nokijeyawitarini maawaeni aapatziyariri. ¹⁴ Omaanta tekirani niyotawitarini Jesokirishito, tekirani naapatziyawitarini. Tee niyotawitani oetarika nantayitzirini, rootaki ikamintaantakinari. Ineshironkaperotakina osheki Awinkatharite: riyotaakina naapatziyari Jesokirishito, eejatzi riyotaakina nonintaperotziri. ¹⁵ Kyaaryootaki iroka nokamantemiri, kameetha paapatziyawakyaawo. Ipokapaaki jaka kipatsikika Jesokirishito rowawijaakoeyakirini kaari kameethateeyatsirini. Nanaakoeyakimini maawaeni, tee nokameethatawitani. ¹⁶ Rootaki ikamintaantakinari, ritakina naari reshiwentanakina, tee ikijana, omawitya naaka antzirori osheki kaari kameethatatsi. Rootaki ayotantakari eejatzi ikimiteeyerini rirori maawaeni aapatziyariri iinja: ineshironkaeyerini, ikanteetatyeeyan ijeekaperoperyantyaarini janta jenokinta. ¹⁷ Ikanteetatyeeyaani Atajorentsireewawenteeyakaeni aari. Tekatsi ikantya ikame. Ashi royiro imana. Apaniroeni itajorentsiperotzi. Thame akanteetatyeeyaani afñaaperotaperoeyanakirini, akamantapiinteyanakirini atziri ikameethataperotzi. Aritaki okantyaari.

Enitatsi iroka ikantayitzirini Paaworo Temoteeyo

¹⁸ Piyotaki, Temoteeyo, noshiyakaantakimi notyomi. Paapatziyaper-otyaawo iroka nonintakayemiri. Tema paerani Tajorentsikaminaakirini ayemijantzinkarite: “Osheki rantenawo Temoteeyo nokowakaakiriri. Roojatzi rowaagaeyantakaerorini aari”. Iroñaka pantero ikamantakotakimiri. Piyotzi riraga joraaropaeni ishntsiwentziniri iyapitaanote oetarika ikantziriri. Iroñaka, pikimityaari eerori, pishntsiwenteniri Awinkatharite oetarikapaeni panteniriri, ¹⁹ pameentaperotanakyaari. Aririka piyotzi okameethatzi pantero oetarikapaeni, ari pantero. Enitatsi riraga yotawitachari rantziro kameethatatsi oetarikapaeni, omaanta rantashitakawo kaari kameethatatsi, rootaki rookantawori raapatziyari Jesoshi. ²⁰ Aritaki rantakiro Imeneeyo eejatzi Arejaantero: rookaero raapatziyari rirori. Tee okameethatzi iroka, rootaki nokanantakariri rirori: “Rowashironkayemiita Jatanaashi; roojatzi piyotantyaari paashini ajoriyyotzinkarite eero pikantzimatzi riraga Tajorentsi”.

2

Riyotaakotziri tsika akantya apinkathatantyaariri Tajorentsi

¹ Nityaawo nokamantemiro iroka: pamaneri Tajorentsik, pikanteri ramitakoeyerini maawaeni atziri, eejatzi pipaasonkitakowenteri. ² Eejatzi pikanteri ramitakoeyerini jewaperowenantsiripaeni eejatzi maawaeni paashini iwinkatharitzinkarite, kameetha ajeekaeyantyaarini, eero afñaantawo ashiiryaagaena. Eejatzi kameetha antaperotero aapatziyeyarini Tajorentsik, afñaaperoyerini eejatzi akimityaari irira. ³ Okameethatzi amanapiinteri Tajorentsik, tema rirotaki owawijaakoeyakaerini, tema rootaki ikowakaakaer. ⁴ Ikowaperotaki rirori awijakoeyeni maawaeni, eejatzi ikowaki ayoteeyeroni kyaaryootatsiri, maawaeni. ⁵ Maawaeni ajeekaeyini aari jaka kipatsikika. Omaanta apintzi Pawa Tajorentsik, ijeeki janta jenokinta. Tee afñiiri. Eejatzi eenitatsi apatziro apaani shirampari owaagapiinteerori iñaani: riraga Jesokirishito. Eejatzi apatziro irira rowaagakiniri Tajorentsik afñaani aari, asheninkatantakariri. ⁶ Riraga Jesokirishito rirotaki kowashiteenchari, ikantzi: “Nokowaki

nokamawenteeyerini maawaeni atziri nopolinawenteniri kaari kameethatatsiri rantziri nowawijaakoeyantyaaririni". Ari imatakaeniro ayoteeyantakaririni. ⁷ Iitakina kenkithateroni iñaani, eejatzi rotyaatkina niyotagaeyerini maawaeni paashinijatzitsiri atziri raapatziyawo iroka kyaaryootatsiri. Tee notheeya, kyaaryootaki iroka nokantzimiri.

Tsika akantyaari akenkithatakayeri Tajorentsi

⁸ Ari nokowaki amaneeyerini Tajorentsi, maawaeni. Aririka amaneri, kameetha ajeekaeyeni: tee okameethatzi akijeri paashinipaeni, tee okameethatzi atheenkeri Tajorentsi. ⁹ Eejatzi nokowaki okithaatya tsinani kameetha, omaanta tee riro okithaatshityaari shiramparipaeni iñaawenatantyaawori eejatzi tee okameethatzi okenkithashiryakaarikari shirampari kaari kameethatatsi. Tee okameethatzi otzipiyakaantero oeshi iñaawenatanteetyaawori, eejatzi tee okameethatzi owaneenkashityaawo ooro, eejatzi peraata. Eejatzi tee okameethatzi okantakaaperotakayaawo oethaari pinaperotachari: iñaawenatawokari. ¹⁰ Omaanta okameethatzi oneshironkatante paashinipaeni: ari okameethatawitari anteyeronimi maawaeni aapatziyaaariri Tajorentsi. ¹¹⁻¹³ Ritakari Tajorentsi riwetsikakiri Araani paerani, roojatzi roori riwetsikakiro Eewa. Okameethatzi okemijantaperoteri tsinani shirampari eejatzi omaerite, eejatzi tee okameethatzi omperatyaa oemi, omaanta okameethatzi omaerite. ¹⁴ Tee ramatawitziri Jatanaashi Araani, omaanta ramatawitakiro tsinani, rootaki anantakawori kaari kameethatatsi: tee okemijantaperotziri Tajorentsi. ¹⁵ Omaanta aririka okaminthayeri tsinani otomipaeni, okantateeyaaani aapatziyari Tajorentsi, onintaperoeyerini osheninkapaeni, kameetha ojeeke, kameetha okenkithashiryaa, ari owawijaakotakya.

3

Tsika ikantyaari riraga jewawentziriri iyemijantzinkarite

¹ Kyaaryo iroka ikanteetziri: "Aririka ikowaki shirampari reewatakagaeyerini iyemijantzinkarite, tema okameethatzi iroka ikowakiri". ² Aririka ii teetziri amitakooyeririni iyemijantzinkarite, tee okameethatzi ojeeke rantani. Kameetha raye iina apaani, tee okameethatzi ishinkitya, kameetha ikenkithashiryaanakya, ikameethashirete, kameetha ineshironkatawakiri areetyaarini, kameetha riyotaperote riyotaante. ³ Tee okameethatzi rirapiintero kepisshaaperotatsiri, tee okameethatzi ikijya; omaanta kameetha ikamintaante, kameetha ijeki, tee okameethatzi ikowaperoteri koriki. ⁴ Kameetha riyotaapiintero iina, kameetha riyotaapiunteeyerini reentsitepaeni raapatziyanteyyaririni irirapaeni, eerokya ipiyathateeyantaririni, kameetha ijekanteeyarini. ⁵ Eerorika imatziro raapatziyakayaari reentsitepaeni, eejatzi iina: Ɂtsika ikantyaaka riyotaantyaari maawaeni riraga aapatziyeyaririni Tajorentsi? ⁶ Tee okameethatzi reewatakaante owakira aapatziyariri Jesoshi: aririka ikantakaaperotakya. Ikimitarikari iwinkatharite kamaari, ikantakaaperotaka paerani, rootaki roepiyantaariri jaawiki Tajorentsi. ⁷ Kameetha riyoteeyerini riraga kaari aapatziyeyaririni, ikanteeyeni: "Ikameethatzi riraga jewatakagaeyiririni aapatziyariri Jesoshi". Rootaki eero imatantari ikantzmiateeyerini, eejatzi eero imatantari kamaari rantakayeri kaari kameethatatsi.

Ikenkithatakotziri amitakotziriri iyemijantzinkarite

⁸ Riraga amitakotapiintziriri iyemijantzinkarite: kameetha roshiyari riraga jewawentziriri iyemijantzinkarite, ikameethashiryaaanaki.

Tee okameethatzi ramatawitante. Eejatzi tee okameethatzi rirero osheki pyaarentsi. Eejatzi tee okameethatzi ikenkithashireeri koriki raapithatashitakari paashini atziri. ⁹ Kameetha ikyaaryoowentero ikemijantaperotero maawaeni riyotaayitziririni Tajorentsi, eejatzi okameethatzi riyote tekatsi rantani. ¹⁰ Pityaawo paminaperoteri, piyotaperoteri ikameethataperotzirika. Aririka piyoteeyakini ikameethataperotzi, ari pikanteri ramitakoeyerini maawaeni aapatziyariri Jesoshi. ¹¹ Eejatzi okimityaari iina, okameethashiretanaki: okenkithashiryaa kameetha, tee okameethatzi okantzimatante, tee okameethatzi oshinkitya, tee okameethatzi amatawitante. ¹² Riraga amitakotantsiri iyemijantzinkarite, kameetha raye iina apaani. Kameetha riyote raapatziyakaaperotyaari itomipaeni: iñaaperoteri irirapaeni iriri. Eejatzi kameetha riyote raapatziyakagaeyarini maawaeni jeekimoteeyiririni. ¹³ Aririka kameetha ramitakoeyerini iyemijantzinkarite, ari iñaaperoteri, eejatzi imatero ikenkithatakoperoteri Jesokirishito, eero ithaayi. Tema riyotzi kameetha raapatziyari irira.

Ikenkithatakotziri aapatziyeyearirini Jesoshi

¹⁴⁻¹⁵ Nokowawitaka intsipaete nareetztatapaemimi, omaanta eerorika no-matziro. Rootaki nojankinatantzimiro iroka: nokowaki piyote tsika akanteeyakan. Riyogaayekaen Tajorentsi: tema aakateeyakini aapatziyeyaririni. Añaatsiri. Ayoteeyironi iroka kyaaryootaperotatsiri: kameetha akyaryoowentero owaagayiteroni. ¹⁶ Kyaaryo, tee ayotashita tsika ikantari Tajorentsi, omaanta riyotakagaeyakaeni Jesokirishito. Irira rirotaki Tajorentsi, omaanta ratziritapaaki. Rowaga Ishire, rootaki iyotakagaeyeerini itajorentsitaki. Riraga ronampiripaeni Tajorentsi ram-inakowenteeeyakirini Jesokirishito. Akamantakoeyakirini aari mawaeni kipatsikipaeni, raapatziyanteeyakaririni jeekatsiripaeni. Roenokaeri Iriri eejatzi jenokinta, kameetha ijekapakaeyka.

4

Kyaaryoowa, riyotagaetzimirokari theeyaantsi

¹ Eenitatsi iroka okamantaperoeyeeni Ishire Tajorentsi. Iinja, rootzimateensi ipokanteeyari Jesokirishito, ijeeki ookaeyerorini iroka kyaaryooperaotsiri aapatziyeyaririni. Raapatziyari amatawiteeyeririni, riraga owaagayitzirorini riyotaayitziririni kamaariipaeni. ² Ramatawitante riraga atziri, omaanta ikimitakaantyaami aapatziyariri Jesoshi. Tekatsi ikantya riyote tee okameethatzi iroka ikantayitzirini. ³ Ithañaapiintyaari shirampari raye iina, eejatzi ithañaakyawo tsinani aye oemi. Eejatzi ithañaapithatakaero owaeyarini owanawontsi riwetsikakaero Tajorentsi. Aapatziyeyarini irira, ayoteeyini kyaaryootaki riyotagaeyakaerini rirori. Aritaki ikowaki apaa-sonkitakoteri oyaari, roojatzi owantyaari. ⁴ Okameethateeyakini maawaeni riwetsikakiri Tajorentsi. Aririka apaasonkiteri, kameetha owaeyarini, eero apinkiri. ⁵ Rowameethatantakaeniriri Tajorentsi owaeyarini. Aririka apaa-sonkiteri, eejatzi akenkithashireero iñaani, okameethatzi owapiinteeyarini maawaeni.

Pikyaaryoowenteriri Tajorentsi maawaeni ikantayitzimirini

⁶ Aririka powaagaeyenirini ayemijantzinkarite iroka nokantzimiri, okameethatzi. Tema paapatziyapiintakawo, iyotaaperotakimi. Aririka piyotagaeyerini paashinipaeni nokamtizimiri, ari ikantemi Jesokirishito: "Kameetha iroka pantakinari". ⁷ Eero paapatziyawo iroka ikenkithatashtari theeyachari: tee okameethatzi

pienkithashiryaapiintero. Omaantakya pikyaaryooowentero paapatziyaperotaari Tajorentsi. ⁸ Okameethatawita pikinawaete eejatzi pithamaete, oshintstaperotanteeyarini piwatha; omaanta okameethataperotziroña pikyaaryooowenteriri Tajorentsi oetarikapaeni panteniriri. Eero patsipetawo roori: kameetha pijeeki iroñaaka, eejatzi kameetha pijeeke injia janta jenokinta. ⁹ Kyaaryooperotaki iroka nokamantakimiri. Okameethataki raapatziyeeyawoni maawaeni atziri. ¹⁰ Apomeentsitawentakari atziri, akemaatsitawentakari raapatziyeevantyaaririni. Añaatsiri Tajorentsi, ayoteeyini eero ramatawitee: rivotaki owawijaakoeyiririni maawaeni atziri. Kyaaryo, rowawijaakotaperoeyirini maawaeni aapatziyeeyaririni Jesokirishito.

¹¹ Pikaminaagaeyerini atziri ranteeyeroni iroka nokantzimiri, piyotaaperooyerini. ¹² Eeroka ewankaritatsiri, omaanta eero pishinetayitzirini itheenkawatemiro pewankaritzi. Inta oetarikapaeni pantayitakiniririni Tajorentsi, kameetha panteeyeroni, ikimitantemiri piyemijantzinkarite: piñaawaete kameetha, pijeeke kameetha, pinintaperooyerini paashinipaeni, paapatziyari Tajorentsi kameetha, powameethatero maawaeni pikenkithashiryaayitarini. ¹³ Inja noñagaatemi. Iroñaaka piñaanatapiinteniri ayemijantzinkarite Iwaperite Tajorentsi, pikenkithatapiintero iñaani Tajorentsi, piyotaapiinteri. Pikanteetatyeeyaani, roojatzi nareetantapaemi. ¹⁴ Paerani ikamantakotantakimiri, eejatzi ikanantariri jewatakaantatsiri Tajorentsi ramitakotemi, eejatzi roerikayinatakimini, rootaki omatakaantakimiri Ishire Tajorentsi. Iroñaaka eero piperawentawo iroka omatakaakimiri. ¹⁵ Pantapiintero iroka imatakaakimiri, riyotaperoeyanteeyarinii maawaeni atziri pantaperotakiro. ¹⁶ Pikenkithashiryaaperotero oetarika pantayiterini, eejatzi oetarika piyotaayiterini: pikyaaryooowenteeyeroni. Aririka panteeyeroni iroka, ari powawijaakotakaanteeyerini maawaeni kemaeyemirini, eejatzi pawijkotee eerori.

5

Tsika pikanteriri paashinipaeni pisheninka

¹ Eero pikijathatziri antyashipari; inta kameetha pikenkithawaetakayeri, pikimitakaantyaari rivotaki piri eerori, kameetha pikaminthayeri. Eejatzi ewankaripaeni, pikimitakaantyaari parentzi. ² Rowaga antyashipawo, pikimitakaantero piniro. Eejatzi ewankawopaeni, pikimitakaantero pitsiro: eero pikenkithashiryaakotawo piñaawenashiryaawo ewankawopaeni. ³ Aririka ojeekashiteeya kamatsiri oemi, teerika ijeki paashini neshironkateeroni, pineshironkaterokyaa eroka. ⁴ Omaanta ijekirika otomi, ishinto, riorika ojari, kameetha ineshironkatero rirori. Rootaki ikoyiri Tajorentsi kameetha ayoteeyeni akaminthayeri ashenkapero aari. Kameetha apaeysterini ashiteeyerini koetyemoeyakaririni. Tema paerani ipaeyakaeni maawaeni koetyemoeyakaerini aari. ⁵ Aririka ojeekashitaperotaa kamatsiri oemi, tee ijeki paashini neshironkateroni, ari okameethatziaapaniroeni okenkithashiryaaperotziri Tajorentsi rirori. Okantani: tsiteniriki, kitejiriki, amanapiintziri Tajorentsi, okantapiintziri oetarika okowayitzirini. ⁶ Omaanta eeniro paashini, inashita roori: okowaki okimoshiryaashitya. Añaawitaka, omaanta eero oñaagaeri Tajorentsi, rootaki iyaatantyaari paamariki kaari tsiwakanitatsini. ⁷ Pikaminaagaeyerini maawaeni aapatziyariri Jesoshi ranteeyeroniita iroka nokantzimiri, okantyaata eero ojeekanta rantani.

⁸ Okameethatzi aneshironkaeyerini paashinipaeni ashinko, eejatzi ashinkapero aari aneshironkateroteri. Eerorika aneshironkatziri, eero akantzi: "Naapatziyakari Tajorentsi naari". Teehee. Tee ikameethatzi theenkantatsiri, omaanta riyowita ineshironkatziri isheninkapero. Eejatzi aaka teerika aneshironkatziri ashinkapero aari, osheki tee akameethaperotzi, anaakoperoyakirini aaka riraga theenkawitachari.

⁹ Aririka omonkaatakiro kamatsiri oemi 60 ojarentsite, ari pikantero etakoeyarini maawaeni ayemijantzinkarite. Okameethataki eejatzi aawitani apaani oemini, tee aminapithatziri paashini shirampari.

¹⁰ Okameethatzi piñaakoteeyakironi antayitakironi kameethatayitatsirini: etakoeyakarini otomipaeni, oneshironkaeyakirini areeteeyacharini, amitakoeyakirini maawaeni aapatziyeyayaririni Tajorentsi, okaminthagaeyakirini ashironkaenkari, okyaaryoowentakiro antayitakironi kameethatayitatsirini. Aririka piñaakoeyakironi antayitakironi iroka kameethatayitatsirini, ari okameethatzi pikantero etakoeyarini aapatziyeyayaririni Jesoshi ashironkagaeyacharini. ¹¹ Omaanta eero pikantziro rowaga kamatsiri oemi kaari antyashipawotatsi. Okoyirkari shirampari antashityaari. Okoyirkari agae eejatzi, ookaerokari aapatziyari Jesokirishito. ¹² Eewawitaka okantawitakari: "Nokemijantaperotemi", omaanta roojatzi amatawitakiri. Rootaki rowashironkaantyaawori. ¹³ Eejatzi operatakari, okinakinayitzinkari pankotsikipaeni, okenkithawaetashitakari, wero, wero, otheeyantyaari. Okimitari tsiroti. Okantakotashitarikari paashinipaeni, oñaawaetantawokari kaari kameethatatsi.

¹⁴ Rootaki nokowantakari agae eejatzi kamatsiri oemi tekiraatarika antyashipawote. Kameetha ijeki eentsitepaeni. Kameetha onkotsiteniri oemi royaari, eejatzi eentsite. Kameetha ontyeero iithaari rashirori, okiweniri iithaaripaeni, maawaeni. Aririka kameetha ojeek, tekatsikya ikantya atziri ikantzimaeyeroni. ¹⁵ Eejatzi rantayitakironi Jatanaashi apanipaeni: rookakagaero aapatziyawitakarira Jesokirishito. ¹⁶ Ojeekirika osheninkapero kamatsiri oemi, kameetha iyotashitya okaminthayero roori. Tee okameethatzi okanteri aapatziyariri Jesoshi: "Pikaminthagaeyeronyka eero". Eenitatsi paashini kamatsiri oemi, jeekatsiri apaniroeni: tekatsi osheninkapero kaminthayeroni. Irowakya roori, kameetha ikaminthagaeyeroni riraga aapatziyeyayaririni Jesoshi.

Tsika akanteeyerini riraga jewatakagaeyeerini

¹⁷ Kameetharika reewatakaantzi riraga jewatakagaeyiririni aapatziyariri Jesoshi, okameethatzi iñaaperoteri ikameethatzi, eejatzi ipinataperoteri. Kameetha ikemijantaperoteri eejatzi. Aririka ipomeentsiwentakawo rioripaeni ikenkithatzi eejatzi riyotaantzi, okameethatzi riraga aapatziyariri Jesoshi iñaaperooyerini, eejatzi ipinataperoteri. ¹⁸ Aritaki okantzi Iwaperite Tajorentsi: "Eero oojopatziri riraga waaka aatzikakitzirori teriiko, pishinetri roya. Tema raatzikakitzimiro paantyaawori okithoki". Eejatzi okantzi: "Okameethatzi ipinateeteri riraga antawaetatsiri".

¹⁹ Eero pikemijantashitari apaani kantakotashityaarini jewatakagaeyimirini, paapatziyawokari theeyaantsi. Omaanta ikaatakirika iñaaperoterini 2, eerorika 3, ari paapatziyawo iroka ikamantemiri. ²⁰ Kyaaryoorika ojeek, rantaperotakari, ari pikantzmoteri janta ipiyotapiinteeyaninta aapatziyeyayaririni Jesoshi: "Eero papiitero eejatzi iroka pantakiri". Kameetha riyoteeyeroni maawaeni aapatziyariri Jesoshi iroka pikanteriri, ikenkithashireeyantyaarini, riyoteeyantyaarini eero ranantawo rirori kaari kameethatatsi. ²¹ Ayoteeyakini ikaateeyakaeni Atajorentsire, eejatzi

Jesokirishito. Eejatzi ikaateeyakaeni ronampirepaeni rirori. Rootaki nokantzimotantzimiriri eekiro piyaatatyye pikanteri maawaeni antzirori kaari kameethatatsi: "Tee okameethatzi". Eero pipinkathatashtari jewawentzimiriri eerori. Omaanta okameethatzi piyoteeri ikoyiri Tajorentsii kimitaka piyoteeri maawaeni atziri.

²² Eero pishintsiwentziri intsipaete apaani shirampari reewawenteri aapatziyariri Jesoshi, eero patsipetashitawo poyiniri pako iitoki. Peewate piyotaperoteri. Eerorika piyotaperotziri aririka paata rantakiro kaari kameethatatsi: eejatzi eerori eeniro pantani. Kyaaryoowa pantzirokaria kaari kameethatatsi.

²³ Eero apatziro piriro iñaa, omaanta pirero eejatzi awishooawaantsi oowa eechonkiini. (Iroka awishooawaantsi rootaki inashitachari pyaarents.) Eechonkiini okaate apaani tajo, kaari osheki. Owameethateemiroota pisheetomawoki pikatsitzira. Aapiintakimi pimakoni, omaanta oshintsiwathatakaneeemi aririka pirapiintero eechonkiini awishooawaantsi oowa, ari etsiyatakoteemi. ²⁴ Okoñaataki kaari kameethatatsi rantayitzirini apaanipaeni atziri; riyoteeyakini ikantakoteri Tajorentsi: "Eeniro rantani". Eenitatsi paashini manawitakawori rantayitzirini, omaanta iinja okoñaate eejatzi maawaeni rantayitzirini rirori. ²⁵ Eejatzi, aririka antayitakironi kameethatayitatsirini, okoñaataki apaanipaeni, iñaakoteeyakaeroni atziri. Omaanta tekira okoñaate maawaeni kameethatatsiri anteeyakirini: iinja okoñaaperotaki maawaeni. Aritaki okantyaapa.

6

Enitatsi iroka ikanteeyiririni pimantaari

¹ Maawaeni riraga omperateetari pikemijantaperoteri kameetha riraga omperatzimiri, eejatzi piñaaperotaperoteri rirori kameetha. Okantyaatakyatекатси ikanteeteri ikantzmateri Tajorentsi, eejatzi tekatsi ikantawenteetero: "Tee okameethatzi iroka riyoteeriri aapatziyariri Jesoshi". ² Aririka raapatziyari Jesoshi riraga omperatzimiri, tee okameethatzi pikante eero: "Iroñaaka eerokataki noyemijantzinkarite, amonkaatawakaaka. Eero iroñaaka noñaaperotzimi". Omaanta okameethaperotzi pantawaetaperoteniri: tema rirotaki piyemijantzinkarite pantawaetziniri, rirotaki inintaperotanewo riraga Tajorentsii. Rootaki, Temoteeyo, piyotagaeyeririni maawaeni aapatziyariri pikanteeyerini maawaeni ranteeyeroni.

Ikenkithatakotziri iyotaantzirori theeyaantsi

³ Eenitatsi paashini atziri kinakaashitakawori ryotaantzi, tee omonkaatawo iroka niyoteeriri. Tee raapatziyawo rowaga kyaaryooperotatsiri ryotaawitariri Awinkatharite Jesokirishito. Eejatzi tee raapatziyawo iroka iyotagaeyakaerini ajeekantyaari kameetha, eero anantaneentaawo kaari kameethatatsi. ⁴ Osheki ikantakaaperota, omaanta tee añiilo ryotantari. Tee riyoperotziro. Rojampitakowentashitakawo oetarikapaeni. Iñaawaetashiwaetaka, wero, wero. Rootaki ikijashiryaaantakariri paashinipaeni, ikijathatawakaaka, ikantzimatawakaaka, raamaakotawakaaka rantakiro kaari kameethatatsi. ⁵ Ikijawakagaeyakanri riraga kenkithashiriirori kaari kameethatatsi, tee ikenkithashiriiryo kyaaryootatsiri. Ikemijantashijeempiyaaka, ikenkithashiryaaawitaka ari rayemi oetarikapaeni.

⁶ Omaanta aririka akemijantaperoteri Tajorentsi, eejatzi aweshiryaaawentyaari, ari ajeekaperoeyanakini kameetha.

⁷ Akoñaatantapaakari paerani, tekatsi akoñaatakapaaaki. Eejatzi okimiteeya, aririka akamae, tekatsi aanee eejatzi. ⁸ Omaanta aweshiryaaawentyaaririka

Tajorentsi eejatzi eenitatsirika owaeyarini eejatzi akithaateeyarini aritapaaki, eero eekiro akowanakitye paashini.⁹ Omaantakya riraga kowatsiri rashaagantya rantashitayitakawoni oetarikapaenii roshekyaantyaawori rowaagawo. Omapokashitapaakari rantakiro oetarikapaenii. Tee ikenkithashireeya kameetha, ikowashitakawo kaari kameethatayitatsirini, roojatzi ikamakirika, ryaate paamariki kaari tsiwakanitatsimi.¹⁰ Aririka akowaperotaki ashitayityaawoni oetarikapaenii, aritaki antakiro kaari kameethatatsi. Osheki aapatziyawitacharini rookaero raapatziyari. ¿Oetaka rookantawori? Tema ikowaki rashitayityaawoni oetarikapaenii, omaanta roojatzi osheki rowashireperotanakyaaroña.

Pikyaaryowenteniri Tajorentsi pantawaeteniri

¹¹ Omaanta eeroka, pikyaaryowentziniri Tajorentsi oetarika ikantzimiri. Kyaaryowa, piñaawenatawokari eerori oetarikapaenii. Pikowaperote pikameethataperotanaki eeroka. Pikowaperote pameentaperotyaari Tajorentsi, omawitakya pomeentsitzimotayitemirini eekiro piyaatataye pikyaaryowenteniri maawaeni ikowakaakimiri panteniriri; pinintaper-ooyeriniroña paashinipaenii, eekiro piyaatataye panteniri oetarikapaenii, eejatzi eentsikiroeni pantero oetarikapaenii, eero pithaakyawentziro.¹² Aririka opomeentsitzimotawitemi paapatziyaperotyaari Tajorentsi iroñaa, omaanta okameethataperotzi pantakiro. Pikyaaryowenteniri ikowakagaeyimirini. Eero pipeyakotziro iroka: pikanteetatyeyaanii pañee jenokinta. Riyoyaakimi Tajorentsi rowañaanteemiri janta. Tema rootaki pikantakiri eerori, ikaateeyakini osheki kemaeyawakimirini. Kyaaryootaki pikantakiriri.¹³ Tema riro Tajorentsi owañagaeyeerini jenokinta, maawaeni. Eejatzi paerani Jesokirishito, tee ithaawakari Poonshiyo Peraato, rirotaki owamaakaantakiriri. Ikantziri: "Kyaaryo, naaka jewawenantatsiri". Iroñaa ikaateeyakaenii Tajorentsi eejatzi Jesokirishito, raminakowenteyakaenii.¹⁴ Rootaki nokanantemirori iroka: pithotyaakiro maawaeni nokaminaakimiri, eero pikompitawo. Pikantatyeyaanii, pantaperotero roojatzi ipokanteyeyari Áwinkatharite Jesokirishito.¹⁵ Riyotzi Pawa Tajorentsi tsika okaate ipokanteyeyari, rirotaki kantatsini. Irira apintzi ikanta, tajorentsiperotatsiri, reewatawenteyirini maawaeni jewatawentawitariri atziri, reewatakagaeyirini maawaeni jewatakagaeyawitaririni atziripaenii. Thame añaaperoteri.¹⁶ Apaniroeni irira eero ithonka, eero ikami. Janta ijekinta ojeeki kitejiriroña, tekatsi akantya aatashiteri ontsirokyaa. Tekatsi ñeerini Tajorentsi. Tekatsi akantya añaagaeyerini. Okameethatzi apinkathataperoeyananakirini maawaeni. Ikantatyaaani reewatawenantzi irira, ashi royiro. Aritaki ikanta.

Eejatzi iroka ikantziriri ashaagantzinkari

¹⁷ Pikanteri ashaagantzinkari eero ikantakaaperota. Eejatzi pikanteri eero riweshiryaaawentawo rashitayitarini, tema ari opeyeeya iinja. Inta riweshiryaaawentyaari Tajorentsi. Ipapiinteeyakaenii maawaeni koety-eemoteeyakaerini akimoshireeyantarini.¹⁸ Riraga ashaagantzinkari eenitatsi osheki rowaagawo. Pikamanteri iroñaa ikaateeyakinerini ikaateeyini ijekaeaeyini, osheki ineshironkateri. Tee okameethatzi ishampsitsite. Omaanta kameetha ikamintaante.¹⁹ Aririka imatayitakironi iroka, kameetha. Ipinateri Tajorentsi iinja janta jenokinta, janta ikanteetatyeyaanii rañaaperotapae kameetha.

Riweyaantakawo rojankinari

20 Iroñaaaka, Temoteeyo, eeniro ikantakimiri Tajorentsi panteniriri. Ari pimonkaateniri, eero pamatawitziri. Eero paapatziyashitawo oetarikapaeni ikantashitari, wero, wero, wero. Ikenkithashiryaashitawo iyotaantsi; omaanta kaari iroka. **21** Eenitatsi iyotaantayitawitaworini oetarikapaeni, iitakaawita riyotzi, omaanta tee riyotzi. Rootaki kaari raapatziyantaperotari Jesoshi iroñaaaka.

Ari, nokowaki ineshironkateeyemini Tajorentsi.
Naaka jankinatzimirori iroka:

Paaworo

RAPIITEENIRI PAAWORO ROJANKINATEENIRI TEMOTEEOYO

1-2 Nokoyi niwethatemi, Temoteeyo, tsikarika pikanta pijeeki. Naaka Paa-woro jankinateemirori iroka. Rotyaantakina Jesokirishito nokamanteeyerini maawaeni atziri aririka raapatziyeyearini rirori, ari rowañaagaeyerini jakä kipatsikika eejatzi jantajenokinta. Rootaki ikowakaakinari Tajorentsí. Notyomi, nonintaperotzimi. Nokowaki ineshironkatemi Pawa Tajorentsí, eejatzi Awinkatharite Jesokirishito. Eejatzi nokowaki ikaminthaa-perotemi, ijeekekayemi kameetha.

Ipaasonkitakowentziri Paaworo Temoteeyo

3 Tema paerani rantawaetzinirini riraga nochariniitenipaeni. Iroñaaka eejatzi naari nantawaetziniri. Tema namanakotapiintzimiri Tajorentsí maawaeni kitejiriki, eejatzi tsiteniriki. Otarikapaenii nanteniriri irinta, nokowaperotaki niweshiryakayaari. **4** Paerani, nookantanakimirranki, powashiretanaka, piraaka. Osheki iroñaaka nokoetyaakimi. Nokowawita noñeemimi eejatzi, niweshiryawentaperoteemimi.

5 Nokenkithashireteemi, kameetharini paapatziyaperotakari Jesoshi, pikantatyaa-ni. Pikimitakawo pijawo Roera, eejatzi piniro Eyonishe: aapatziyaperoeyarini roori. Niyotzi eeniro paapatziyari Jesoshi, rootaki nopaasonkitakowenantzimiri.

Eero pipashiwentakaawo paapatziyakayaari atziri

6 Paapatziyakari Tajorentsí, rootaki nokanantemiri: paerani, nowantakimirori nako, eejatzi nokanantakariri rirori ramitakotemi, eenitatsi imatakaakimiri. Iroñaaka pantaperotero maawaeni imatakaakimiri. **7** Irinta Pawa Tajorentsí ipakaero Ishire. Roori tee okowakagae athaaye. Tee ari opoñeeya thaawaantsi Ishireki Tajorentsí, inta omatakaakaero otarikapaenii ikowakaakaeri. Eejatzi omatakaakaae anintaperoeyerini Tajorentsí eejatzi maawaeni atziri; eejatzi omatakaakaae aamakowentya apaniroeni. **8** Rootaki kaari pipashiwentakaantyaaawo pikenkithatakoteri Awinkatharite. Eejatzi, eero pipashiwentakaana; nojeekekakika omonkyaaagamentotsiki: nokenkithatakotakirira rirori, rootaki romonkyaaaganteetakinari iroñaaka. Osheki nokemaatsitawentakari Jesokirishito, kameetha pikimtena eerori. Aritaki imatakayemiro Tajorentsí maawaeni ikowakaakimiri. **9** Paerani, tekirani riwetsikironi iroka kipatsika, riyotzitakaeni aapatziyari Jesokirishito. Riyoyagaeyitakaeni kameetha ajeekaeyantyaaarini. Tee akameethatawitani paerani, omaanta eenitatsi ikowakaakaeri. Ineshironkatashiteyakaeni, rowawijaakoeyakaeni.

10 Ipokapaaki kipatsikika rirori, riraga owawijaakoeyakaeni. Iroñaaka ayotaperoyakironi maawaeni rantakaeniri Tajorentsí. Eero iroñaaka athaayi akame. Iñaani iyotakaakaero aririka akame, eero aatzi paamariki kaari tsiwakanitatsini. Kameetha iroka ikamanteyeyerini: rowañaaperoyakaeni, akanteetatyeyaa-ajeekimoeyerini inampiki.

11 Rotyaantakina rirori nokamanteeyerini atziri iroka kameethatatsiri, eejatzi niyotagaeyerini. **12** Rootaki nokemaatsitantakawori maawaeni jakä omonkyaaagamentotsikika. Omaanta tee nopashiwenta. Niyotaperotziri riraga naapatziyari: niyotaki eero ramatawitana, rootaki nokanantakariri: "Pikempoyeena". Niyotaperotzi ikempoyeena roojatzi ipokanteyeyari.

¹³ Kyaaryooperotaki maawaeni niyotaakimirini, tee namatawitzimi. Pimonkaatero maawaeni nokantakimirini. Paapatziyari Jesokirishito, pinintashireperoteri. Pikyaaryooowentero pikenkithatakotero iñaani.
¹⁴ Okithaatakaakimi Ishire Tajorentsi. Omatakaakimiri pikempoyerio iñaani kameetha ejatzi pikenkithatero.

Tsika ikanteeyirinika Paaworo

¹⁵ Piyotzi rookaeyakinani aashiyajatzi: Jijeero, Eromoojeneshi, maawaeni. ¹⁶ Nokowaki ineshironkateri Awinkatharite Oneshijjoro, eejatzi isheninka rirori. Retakotapiintakina rirori, tee ipashiwenta rareetaatana jika omonkyaaagamentotsikika. ¹⁷ Inta rareetantakari jika Oroomaki, ikowakowayitakinani, roojatzi iñaantapaakinari jika. ¹⁸ Piyoperotzi eejatzi osheki ramitakotakina janta Ejeesoki. Iinja, ipokaerika Awinkatharite, aritaki ineshironkatapaeri.

2

Ikantziri: "Pikanteetatyeyaanipantawaeteniri Tajorentsi"

¹ Iroñaaka, notyomi, tema ineshironkatakimi Jesokirishito, rootaki nokamantzimiri pitontashirete maawaeni pantayitenirini. ² Eenitatsi pike-makinari, tema pikaateeyakirini osheki paashini kemaeyakinari. Ari piyoyeeri apaanipaeni atziri ikyaaryoowenteniri riyoteeri paashinipaeni atziri, rowaagaeniri eejatzi paashinipaeni iroka niyotaakimirini. Rowaa-gaeniri eejatzi paashinipaeni iroka niyotaakimirini. ³ Riraga joraaropaeni kameethari ikemaatsitawentapiintari iwinkatharite. Pikimityari eerori, eero pithaayi pikemaatsitawentyaari Awinkatharite Jesokirishito. ⁴ Eejatzi tee riyomparitapiinta joraaro, tee ipankiwaetzti, inta apatziro ikyaaryoowentziniri iyapitaanote ikowantakariri. ⁵ Eejatzi riraga peroootat-siri peroota ikemijantaperotziri riraga showirinkakontatsiri. Eerrika ikemijantaperotziri, eero ipashiteetari irika ipapiintziriri anaakontatsiri. ⁶ Eejatzi riraga pankwaetsatsiri, aririka ithamaetakotaperotero iwankiri, ari rowitero osheki okithoki iinja. Tee ratsipetashitawo ithamaetakotziro. ⁷ Pikenkithashiryaaoperotero iroka noshiyakaawentzimiri, ari riyotakaaper-otemiro Awinkatharite.

Pikenkithashireeri Jesokirishito

⁸ Pikenkithashireeri eejatzi Jesokirishito, riraga icharineetenii iinja Iravii; rowamaetawitakari, omaanta ipiriintanaa eejatzi. Rootaki iroka nokamantapiinteyirinii atziri, rowawijaakoeyanteeyaaarini.

⁹ Nokantani nokenkithatakagaeyirini atziripaeni iroka, rootaki noñaashitantakawori iroñaaka. Roojotanteetakinawo kareenatha, ikimitakaanteetakina naaka owamaantaniri. Omaanta tekatsi ikanteetero roojotero iñaani Tajorentsi: tema owaaganaka roori. ¹⁰ ¿ilitaka nokemaatsiwentakira maawaeni iroka? Riro nokemaatsiwentari maawaeni atziri riyoyaakiri Tajorentsi, ikanteetatyeyaanii ijekantyaari kameetha janta jenokinta. Rirotaki Jesokirishito owawijaakoterini.

¹¹ Kyaaryootaki iroka ikantziteetarini:

"Eerrika akimitaga paerani aritaki akimitakotawitakari atsipatakari Rotyaantanewo Tajorentsi, janta koroshiki akamaeyakini. Rootaki atsipatantapaeyaariri janta jenokinta, ajeekimotapaeri. ¹² Aritaki iroñaaka apomeentsiwentakanari antayitakinirini oetarikapaeni, rootaki eejatzi akaateeyerini eewawenanteyini. Aririka akanteri atziri: 'Tee niyotziri Jesokirishito', eejatzi ikantakotee paata rirori: 'Pawa, tee niyotziri tsikarika itzimi irira'. ¹³ Aririka

akenkithashireeya amatawiteri, akantashityaarika: ‘Naapatziyari’, omaanta roojatzirika akimita paerani, eero amatawitziri Jesokirishito eejatzti eero ramatawitee rirori. Imonkaataperotero maawaeni ikantziri”.

Rootaki iinja rotyaanantyaariri kaari aapatziyarini janta paamariki kaari tsiwakanitatsini.

¹⁴ Tema ikaateeyakaeni Awinkatharite. Pikantapiinteri riraga aapatziyariri Jesoshi janta eero ipiyapiyawaaantetari oetarikapaenri riyotaayitawitaririni. Ratsipetashitakawo ipiyawaantetakari Iroka, ikompitakaarkari riraga kemaeyeririni. ¹⁵ Pantaperotayitenirini Tajorentsi, ikanantemiri: “Kameetha maawaeni pantakinari”, roojatzi eero añiiro pipashiwenantyaari. Piyotaperotziro iñaani Tajorentsi, ironaaka piyotaantero kameetha; tema kameethari iyotaantzi roori. ¹⁶ Eero paapatziyawo okaatzi ikantashityaari kaari aapatziyariri Tajorentsi ikinakaashitanakawo, tema kaari rooperotatsini eejatzti kaari amitakoteeni, eero piñaawaetziro: pookakaaperotzirkari atziri aapatziyaririmpi Tajorentsi. ¹⁷ Iroka kantashitaantsi oshiyakawo pathaawontsi. Aririka aakae, othonkanakae maawaeni awathakipaenri, apathaayitanakini. Ratsipetakawo ikantawakaantawo riraga Imeneeyo eejatzi Jireeto. ¹⁸ Ikompiteeyakawoni kyaaryootayitatsirini. Ikantatzi: “Monkaataka. Ipiriinteeyawitaani paashinipaenri, omaanta eero apiriinteeyaani aaka”. Rootaki ipakaagaanantanakawori raapatziyari Jesoshi kemaeyakiririni. Omaanta ipiriinteeru awatha Jesoshi aririka ipiyee. ¹⁹ Piyotero iroka okantziri iñaani Tajorentsi: “Riyotaperotziri Tajorentsi maawaeni aapatziyeyeyaririni”. Eejatzi okantzi “Eenitatsirika aapatziyariri Jesoshi tema rookero kaari kameethatatsi rantayitzirini”. Aritaki okantakiri. Iñaani Tajorentsi oshiyakawo antawo mapi: tee opaashinitapiintee.

²⁰ Janta ipankoki ashaagantzinkari eenitatsi osheki iwiratote. Eenitatsi pinaperotachari, riwetsikaetziro ooro eejatzi piraata. Eenitatsi kaari pinatacha, riwetsikaetziro inchato eejatzi tsirepathari. Rowaga pinatachari, riweshiryaaawentakawo: ikowaki raminiteri maawaeni atziri. Rowaga kaari pinatacha aririka owantakyaawo ookanteeyawo roojatzi kaagashiki. ²¹ Aririka powameethateeyo eeroka, pookakirorika kaari kameethatatsi pantapiinteeeyirini, ari pikimtyaawo pirato pinaperotachari; riweshiryaaawentemti Awinkatharite, ikowaki iñaagaemi maawaeni. Tema iroñaaka pimatakiniri oetarika ikowakaakimiri.

²² Eerowa pikenkithashiriilo kaari kameethatayitatsirini rantayitzirini ewankaripaenri. Intakya pikowaperotanaki pikameethatanee, pameenta-perotaneeyaaari, pinintaperoteri paashinipaenri, pijeeke kameetha, pitsipateeyaaarini paashinipaenri kameethatayitatsirini: maawaeni riraga aapatziyaperotakariri Awinkatharite ijeekaperotzi kameetha. ²³ Omaanta eero pikantawakaawentashitawo kaari ayotaperoyini: pikijawakaantawokari. ²⁴ Aaka aapatziyari Awinkatharite rootaki kaari okameethatantya akijejeririni paashini atziri; inta kameetha akaminthayeri paashinipaenri, kameetha ayoteeri, eero ajamaneentari, ²⁵ kameetha ayoteeri riraga kaari aapatziyeyawoni kyaaryooperotatsiri. Kameetharika ayoteeri, roojatzi apaaniipaenri ikenkithashiryaaanakya, rookaero kaari kameethatayitatsirini ikemijanantyaawori kyaaryootatsiri. Ramitakoteri Tajorentsi. ²⁶ Ramatawitawitakari kamaari: ojeekawita ikowakaawitakariri, rootaki ranantawitakanariri rirori: omaanta ayotagaeri eentsikiroeni aritaki rowawijaakoteri Tajorentsi, aririka raapatziyeyarini.

3

Tsika ikantyaaka amatawitantatsiri, iinja

¹ Piyotero iroka: iinja, rootentsirika omonkaatakyा kitejitsiri ipokanteeyari Jesoshi, osheki opomeentsitzimotaari aapatziyariri Jesoshi. ² Rirojatzi riraga atziri rirotaki nintaperotaachani apaniroeni, ikowaperoteri koriki, ikantakaaperotya, ishirontawentyaari paashinipaeni, ikantzimateri Tajorentsi, ipiyathatyaaari ashitariri, eero ipaasonkitziri neshironkaterini, eero ikenkithashiriiri Tajorentsi. ³ Eero riyotziro ikaminthayeri paashinipaeni, eero riyotzi ipeyakotziniri atziri rantziri, ikantzimatante, eero ipashiwentakaawo rantayiteroni tsinanipaeni, ikijanakya, itheenkayiterini kameethatayitatsirini, ⁴ ramatawitayiterini isheninkaperopaeni, rantashitayityawoni oetarikapaeni, eero ikenkithashiryा, ikantakaaperotanakya, ikowanaki ikimoshirewaetanyaari, eero ikoyi riyoteri Tajorentsi. ⁵ Raapatziyajeempiyaashityaari Tajorentsi, omaanta tee ipinkathatziri. Eero pikimitakotari eerori eejatzi eero pitsipateeyarini. ⁶ Ikyaapankoteri paashinipaeni atziri, ramatawitapaero tsinanipaeni. Tee okenkithashireperota, rootaki imatantyaawori ramatawitapaero. Osheki antayitanakironi kaari kameethatatsi, okowaperotanaki antayiteroni. ⁷ Osheki okemijantashitayitakarini paashini iyotaawitawori omaanta tee riyotaaperotziro kyaaryootatsiri ikantziri Tajorentsi. ⁸ Paerani riraga Jaaneshi eejatzi Jaampireshi ipiyathatakarni Moeseeshi, tee ikowakayiri joriyyopaeni raapatziyakagaeyaaarin. Eejatzi ikimitakari iroñaka riraga amatawitantatsiri: tee ikowakagaerini atziri raapatziyaperotawo kyaaryootaperotatsiri. Tee okameethatzi iroka ikenkithashiryaaayitakirini, ikemijantajeempiyaashitaka. ⁹ Eero ikantatyaaani imatero iroka. Tema paerani riyotakoeyirini riraga piyathatakarni Moeseeshi. Eejatzi iinja riyoteeyanakini atziri kyaaryo ramatawitantaki riraga amatawitantatsiri.

Pikemijantaperotero kyaaryooperotatsiri

¹⁰ Omaanta piyotakotaperotakina. Piyotakiro niyotaayitzimirini. Piyotakiro nantayitzirini. Piyotakiro nokowakir nomatayiterini naari nantayiterini. Piyotaki eejatzi nameentaperotakari Tajorentsi, nokyaaryooowentziniri maawaeni, nonintaperotakiri, tee nojamaneentawo nopomeentsitawentakari. ¹¹ Eejatzi piyotzi ikijantapiinteetakinawo naäpatziyari Jesoshi. Piyotaki eejatzi nokemaatsitapiintakawo janta Antyokiyyaki, Ikooñoki, eejatzi Riishitaraki. Osheki ikijeeyakinani jeekeayatsirini janta. Omaanta rowawijaakotapiintakina Awinkatharite. ¹² Kyaaryo, ikijeetziri maawaeni aka aapatziyariri Jesokirishito, aririka akowaperotaki raapatziyaperotyaari. ¹³ Eekiro ryaatatayee ramatawitaperotante riraga kaari kameethatatsi, eejatzi iyotaantzirori theeyaantsi. Eejatzi riraga kamaari ramatawiteri rirori. ¹⁴ Omaanta eerokhya, paapatziyakanakyaawo iñaani Tajorentsi eeniro pikaatzini. Roojatzi paapatziyantariri Jesokirishito ari rowawijaakotakimi. Tema piyotaki tee namatawitzimi. ¹⁵ Paerani, eeniro pikaatzini, riyotagaetakimiro iñaani Tajorentsi. Tema okameethaperotaki. Rootaki iyotaakimirori paapatziyakari Jesokirishito, pawijakotantaari. ¹⁶ Rirotaki Tajorentsi jankinatakaantakirori Iwaperite, maawaeni. Iyotagaeyakaeroni kyaaryootaperotatsiri, teerika okameethatzi antakiri, okamantakae. Iyotagaeyakaeni tsika akantyaari akameethatanteeyari, eejatzi iyotagaeyakaeni akameethaperoeeyakaeni kameetha. ¹⁷ Rootaki ojeekantakari Iwaperite Tajorentsi, akameethataperotanteeeyari. Tekatsi

akantya akompitantyaawori, omaanta ayotaperotero antaperooyeroni maawaeni ikowakaakaeri Tajorentsi.

4

Riweshiryaakaakari Paaworo Temoteeyo

¹ Inja ipokae Jesokirishito ipinkatharitapaaki. Aririka ipokae, ari roñaagayitapaakaeroni rantayitzirini maawaeni añeeyatsirini eejatzi maawaeni kamaeyeentsirini. Ikamanteeyeeni tsika ikanteeyeeni. Ayoteeyini ikaateeyakaeni iroñaaka, eejatzi ikaateeyakaeni Pawa Tajorentsi, rootaki iroñaaka, nokamanantzimirori pantero iroka. ² Pikenkithatapiintero iñaani Tajorentsi maawaeni kitejiriki. Tsikarika ikaateri oorya, tsikarika pijkeki, eerokya pimaeritz, omaanta pikenkithatakayeri maawaeni atziri. Teerika okameethatz iroka rantakiri, ari pikanteri, eejatzi pikanteri eero rantziro. Pikanteeyerini kameetha ijeekaeyeni. Eentsikiroeni piyotaaperooyerini paashinipaeni, eerokya pikijathatziri. ³ Inja, aririka kameetha ayotagaeyawityaarini atziri iñaani Tajorentsi, omaanta eerorika ikemijanteeyironi. ⁴ Eero ikoyiro iñaani Tajorentsi rowaga kyaaryooperotatsiri, omaanta ikowaperote ikemashityaawo riyotagaeteri theeyaantsi ikenkithatashitayitarini atziri. ⁵ Omaanta eerokakya, paamawentya: pikimitarikari. Aririka pipomeentsitawentyaari Awinkatharite, eero petakoshiryaashita. Opatziyakayaari paashinipaeni. Pimataperotakiniri Tajorentsi maawaeni ikowakaakimiri.

Ikenkithashireeri Paaworo

⁶ Ro nokamanantzimirori iroka, rooteentsi rowamagaetena, rooteentsi niyaate naari jenokinta. ⁷ Nopomeentsiwentaperotakanari Awinkatharite, nomatakiniri maawaeni ikowakaakinari, tee namatawitziri. ⁸ Inja, ipokaerika Awinkatharite, ipashitayitenawoni kameethatayitsirini. Eero ipanawo apaniroeni naari, omaanta eejatzi ipaeyerini maawaeni aamagaeyakaririni. Tema kameetha ikantakowenteeyakaeni maawaeni. Riraga antapiintzirori kaari kameethatatsi riraga kaari aapatziyari Jesoshi ari rowashironkaeri. Omaanta naaka eejatzi maawaeni paashini aapatziyaperotariri eejatzi maawaeni paashini nintashireperotziriri riraga kantziriri: "Nokoyi ipiyeo intsipaete", kyaaryo ipinateeyenani kameetha.

Paashini ikamanteeriri eejatzi

⁹ Pishintsite pipoke piñeena. ¹⁰ Riraga Teemashi, ikowaki riweshiryaawentyaawo jeekayitatsirini kipatsikika. Rookanakina, ryaatanaki Tejawoonikaki. Riraga Keresheente, ryaatanaki Karaashiyaki, riraga Teeto ryaatanaki Taramaashiyaki. ¹¹ Apaniroeni Rookashi itsipatakina. Aririka pipoke, pamakinari Marikoshi, osheki nokowaki ramitakotena. ¹² Eejatzi ryaatanaki riraga Teekiko. Notyaantakiri rirori Ejeesoki. ¹³ Eejatzi pamakinawo noethaari nowanakirowa Toroowareki, ojeeki janta ipankoki Kaaripo. Eejatzi pamakinawo maawaeni Iwaperite Tajorentsi, eejatzi nowaperitepaeni. ¹⁴ Rowashironkaaperotakina Arejaantero, riraga wetsikapiintzirori asheero. Tema itheeyakotana eejatzi okaatzi niyotaakiri atziri. Inja rowashironkaeri Awinkatharite. ¹⁵ Paamayarira eerori, rowashironkaemikari. Osheki ikijawentakinawo nokanteeyakiririni.

¹⁶ Ritantakari reewawenantzi rojampitakowentana, tee ijeki kantakowentenani, ishiyapithateeyanakinani. Tee nokoyi rowashironkaeri Awinkatharite. ¹⁷ Omaantakya irira, kijokiro rowana. Itajonkawentakina, nomatantawori nokenkithatakagaeyirini paashinijatzitsatsiri atziri,

maawaeni. Tema Jatanaashi rantakaakiri rowashironkaetenamira, omaanta rowawijaakotakina Awinkatharite. ¹⁸ Aririka rowashironkaetakina eejatzi, niyotaki ari rowawijaakoteena eejatzi; ijeekekayena jenokinta, janta reewawanantaperotzinta rirori. Thame añaaperotaperooyerini, aritaki akanteetatyeyaan.

¹⁹ Niwethatawo Pirishiira, eejatzi rirori Akiirishi. Eejatzi niwethatari maawaeni isheninka Oneshijoro. ²⁰ Eeniropi Eraashito, ijeki janta Koriintoki. Nawijantakawori Mireetoki, noñaaaneeri Toroojimo: imantsiyataki. ²¹ Pishintsite pipoke, tekiraata okyaawontsitanaki. Riwethateeyemini Eyowooro, Poreente, Riino, Kiraaworya, eejatzi maawaeni ayemijantzinkarite.

²² Nokowaki ikaminthayemi Awinkatharite, ineshironkataperotemi. Naaka jankinatzimirori iroka:

Paaworo

RIRAGA PAAWORO ROJANKINATZINIRI TEETO

¹ Nokoyi niwethatemi eeroka Teeto tsikarika pikanta pijeeki. Naaka Paaworo nojankinatzimiro iroka. Riyoyakina Tajorentsi nanteniri oetarika ikowakaakinari. Rootaki rotyaanantakinari Jesokirishito niyotakaaperoteri maawaeni atziri kyaaryooperotatsiri, ikyaaryoowenantyaawori rameentaperotaari Jesoshi eejatzi rantero oetarika ikowakaakiriri Tajorentsi. ² Paerani, tekiranri riwetsikironi kipatsi, ikantzitakanri Tajorentsi: "Nañaakaaperoteri maawaeni nokoyiri, nojeekakayeri jaka jenokinta". Tee riyotziro ramatawitantzi, rootaki ayotantari akanteetatyeyaaani añaagae janta Tajorentsikinta. ³ Iroñaaka monkaataka kitejiri riyoteeyantyaaworini maawaeni atziri ikantzirri Tajorentsi, riraga Owawijaakotakaeri. Rootaki rotyaanantakinari nokamantteyerini atziripaeni. ⁴ Paerani niyotakaapiintzimi paapatziyari Jesoshi, rootaki, Teeto, iroñaaka nokimitakaantfakimiri niyomipero eejatzi nojankinatzimiro iroka. Nokowaki ineshironkatapiintemi riraga Tajorentsi, riweshiryaa kayemi, eejatzi ikimitakayemi Jesokirishito, riraga Owawijaakotakaeri.

Tsika ikantyaari jewatatsiri reewawenantyaariri aapatziyariri Jesoshi

⁵ Paerani nookanakimi janta Kereetaki pithonkantyaawori oetarikapaeni okaatzira tekiraga antakagaeyerini. Eejatzi nokantakimi: "Aririka pikinakinayitakini janta maawaeni nampsitskipaeni, piyoyayiteeni aataperoteenchari aapatziyeyearirini Jesoshi raapatziyakaantaperotaariri iyemijantzinkarite". ⁶ Iroñaaka nokamanttemi. Okameethatzi riraga aataperoteenchari iyemijantzinkarite eero reewatakantashita, rooma teerika ijeeki kameetha. Inta okameethatzi ijeeki kameetha, eejatzi apatziro rayi apaani iina, eejatzi okameethatzi maawaeni reentsite raapatziyari Jesoshi: ijeeki kameetha, eero ipiyathatari iriri, rootaki tekatsikya ikantakotashiteyaari oetarikapaeni. ⁷ Naakiro, aririka ikowaki rantawaeteniri Tajorentsi amitakoeyerini iyemijantzinkarite, tema okameethatzi rameentaperotari rirori. Tee okameethatzi ipiyawaantetantya, ikijya intspaeete, ishinkitya, rantawakaapiintya paashinipaeni. Tee okameethatzi ramatawiteri paashinipaeni raapithatantyaariri iyorkite eejatzi rowaagawo. ⁸ Omaantakya okameethatzi raakameethatante roemaante ipankoki areeteetyaaririka; inintaperoteri maawaeni okaatzi kameethatatsiri; ikenkithashiryaanakya kameetha oetarika ranteri eejatzi ifñaawaete; kameetha ikantya; ikameethashiryaaoperote; eejatzi riyote raamawentya apaniroeni eero ranantawo kaari kameethatatsi. ⁹ Kameetha ikyaaryoowentero raapatziyaperotaawo ikantzirri Tajorentsi, tema kyaaryooperotaki rootaki amatantyaawori ameentyaawo. Rootaki rowaga ayotaakiriri aka, imatantyaawori riyotaantaperotero paashinipaeni kyaaryootsatsiri. Eejatzi imatantyaawori riyotayeri riraga theenkantatsiripaeni.

Pomaereeri kereetajatzi riraga kowawitachari owameethaterinimi aapatziyariri Jesoshi

¹⁰ Eenitatsi janta oshekini theenkakirori iňaani Jesoshi. Ipiyathatakari kenkithatacantatsiri, rirotaki ſaaétaſhiwaetachari, eejatzi rirotaki am-awitantatsiri maawaeni. Tema ikanteeyani riraga kantashiteyaw-itaririni aapatziyariri Jesoshi: "Pikimitakoperoeyaarini kameetha joriyo". ¹¹ Nokowaki pomaereeri maawaeni irinta. Rooma tee okameethatz iroka riyotaantzirika, eejatzi tee okameethatz rantakirika; osheki rookaka-jeempiyaakari aapatziyawitakariri Jesoshi. Tee ikowanee raapatziyanee-yari. Ramatawitakiri. Apatziro ikowashitakawo rayitashityaari riraga aapatziyariri Jesoshi iyorkite. ¹² Paerani eenironi apaani kamanantatsiri riraga kereetajatz kenkithataakiriri isheninka, ikantakiri paashinipaeni atziri: "Riraga kereetajatz ashi rowaeyironi ramatawitantzi, kijaperotzinkari perantzi eejatzi owaagatzinkari". ¹³ Kyaaryootaki ikantakiri. Rootaki pikaminaantaperotyalariri riraganki theenkantatsiripaeni eero ranantawo inta raapatziaperotantyaawori kyaaryooperotatsiri. ¹⁴ Tee okameethatz raapatziyawo kenkitharents ikenkithashiryaaſhitayitarini joriyyotatsiri, eejatzi tee okameethatz raapatziyawo ikantashitari riraga theenkirori kyaaryooperotatsiri. ¹⁵ Aririka akameethashirete, tema ari antakiro kameethatatsiri. Omaanta irintapaeni teerika ikameethashiretsi, riraga theenkantatsiri aritaki rantakiro kaari kameethatatsiri. Kyaaryo eero imatziro ikenkithashiryawo kameethatatsiri. ¹⁶ Ikantawita iriranki: "Niyotziri Tajorentsi", omaanta tee ijeki kameetha. Rootaki ayotantakari itheeyashita, tee riyoztiri. Tee ikameethatziwee rirori, ipiyathatanta, tee riyoztiri rantero kameethatatsiri.

2

Ikaminagaeyakirini riraga Teeto tsika ikanteeyarini aapatziyariri Jesoshi

¹ Eerokakya, kameetha piyotaantaperote kyaaryooperotatsiri. ² Piyoteeri maawaeni shirampari aatzimateencharira ikenkithashiryaaſkotero okaatzi kameethatatsiri ranteri roojatzi rantero imatantyaawori paashinipaeni iňaapirkathantyaariri, raamawentya apaniroeni, eero ishinkita, kameetha ijeki, ikenkithashireeya kameetha, rameentaperotyari Jesoshi, ineshironkaperoteri maawaeni atziri eejatzi eekiro riyaatatyee ikyaaryooventioniri Tajorentsi maawaeni ikowakagaeyakirini, omawitya opomeentsitz-imotyaari. ³ Eejatzi pikimitzityawo maawaeni tsinani aatzimateencharira piyotayero kameetha ojeeki, kameetha aapatziyari Jesoshi. Tee okameethatz okantzimatante, eejatzi tee okameethatz omiritapiintero shinchaari, oetarikapaeni. Kameetha ojeeki iyotaantawakyariri paashinipaeni aapatziyariri Jesoshi okaatzi kameethaperotatsiri. ⁴ Anterorika iroka omatero iyotero maawaeni ewankawo oneshironkaperoteri oemi eejatzi eentsitepaeni. ⁵ Eejatzi iyotero maawaeni ewankawo tsinani aamawentya apaniroeni eejatzi okameethashireperote. Eejatzi iyotero kameetha onkotsiwaete, oshirikawaete, okiwawaete, maawaeni; oneshironkatante, okemijantaperoteri oemi. Roojatzi tekatsikya ikanteetero itheenkaetero iňaani Tajorentsi.

⁶ Eejatzi piyoteeri maawaeni ewankari raamawentya apaniroeni, ijekantyaari kameetha. ⁷ Eejatzi eeroka kameetha pantaperotzityaari maawaeni iroka imatantyaawori maawaeni paashini atziri riyotero tsika ikantya ijekantyaari kameetha. Kameetha piyotaantaperote eerori, tema piyoperotzi raminakotzimi Tajorentsi. ⁸ Kameetha pikenkithawaetkayeri atziri eero itheenkanteetzimi. Roojatzi ipashiwenantanakya kowawitachari ithawetakotemimi, tekatsi okantya ithawetakotemimi. ⁹ Piyotaaperoteri pimantaarewo ikemijantaperoteri

amanantziriri, rantaperoteniri maawaeni ikanteriri. Tee okameethatzi ipiyawaantetyaari,¹⁰ tee okameethatzi ikoshite. Inta kameetha ijekae riyotantanakyaari riraga amanantzirira eero ramatawitanereer. Iñaakiririka kameetha ijekae roojazti ikanantanakya atziri: "Tema osheki okameethaperotaki iñaani Tajorentsi ikenkithatakoteetakiri".

Tsika ayotantakari ineshironkatake Tajorentsi

¹¹ Okameethatzi piyoteeri maawaeni ayemijantzinkarite ijeki kameetha kimitawori iroka nokamantzimiri. Tema ayoteeyakini ineshironkatake Tajorentsi, rooma rotyaantakiri Itomi jaka kipatsikika rowawijaakotee aakapaenii maawaeni atziri.¹² Kyaaryo ineshironkatake. Iroka iyotakae ookaero kaari kameethatatsi akowashitaka aaka antero, ejatzti ookaero maawaeni rametayitarini theenkantatsiri. Ayotaki okameethatasi maawaeni kitejiri aamawentya apaniroeni, akameethate, ameentaperotaari Tajorentsi.¹³ Eejatzti iyotakae maawaeni aamagaeyarin iroñaka Tajorentsi: riraga Awinkatharite Jesokirishito. Tema rirotaki Owawijaakotakaeri aaka maawaeni. Ayoteeyakini eero ramatawitee, aritaki ipokae, rootaki akimoshiryaantari. Ari afieeyawaerini ipinkatharitapaaki.¹⁴ Antapiinteyawitakawoni kaari kameethatatsi, omaanta ikamawentakae, rowawijaakoeyantakaerini rowameethatantakaeri, asheninkataperoeyantaaririni. Rootaki akowaperotantakari antapiintereo kameethatatsiripaeni.¹⁵ Pikamantaperoteeyerini maawaeni atziri iroka nokantakimirika. Rooma ikowakaakimiroky Tajorentsi. Ikowakaantakimirori pithaamentakaashireeyari maawaeni atziri raapatziyaperotantyaariri Tajorentsi. Teerika okameethatzi rantziri, kameetha pikamineeri. Eero pishinetayiri itheenkemi.

3

Eejatzpi paashini ikanteri kameetha ikemijanantyaari aapatziyariri Jesoshi

¹ Pikenkithashiryaakayaari maawaeni aapatziyariri Jesoshi ipinkathateeyerini maawaeni ikaatzti jewatakaanantatsiripaeni, pinkatharipaeni, ikemijantaperoteeyerini. Ikowaperoeyironi riroripaeni rantero maawaeni okaatzti kameethatatsiri.² Pikanteeyerini eero ikantzimatzi paashinipaeni atziri, inta kameetha raakameethateri maawaeni. Eero ikijantzi inta kameetha ikaminthaeta, ifaaperoteri maawaeni atziri ikameethatzi.³ Paerani aari tee akenkithashiryaawitawoni ejatzti apiyahatalitakarini Tajorentsi, aateeyenimi paamariki kaari tsiwakanitatsini. Amatawitantawitani, antapiintashitawitawoni maawaeni akowashitawitawoni. Akantani akowawita akemaatsitakaawityaari paashini atziri, antapiintawitawoni kaari kameethatatsi, akowapiinteyawitakani akimitakoeyaarini paashinipaeni; tema oonawakaapiinteyawitani.⁴ Omaanta riyotakaakae Tajorentsi, riraga Owawijaakotakaeri. Riyotakaakae, ineshironkatake, ejatzti inintaperotakae.⁵ Rowawijaakotashitakae. Tee anteeyawitawoni kameethatatsiripaeni, omaanta ineshironkatasitakae. Rowawijaakotantakaeri, rowameethatatake, ipaashinitakaakae owameethashiretakae Ishire, rootaki kaari akimitanta paerani, ajeekantari kameetha iroñaka.⁶ Aapatziyakari Jesokirishito, riraga Owawijaakotakaeri, rootaki rotyaantaperotantakaerori Tajorentsi Ishire, tee ithañeeyawa.⁷ Tema ashi royiro ineshironkatantzi rootaki rowameethatantakaeri. Tema paerani kashiyakaakari atziripaeni aapatziyariri aritaki ijekae janta jenokinta. Ayotaki eero ramatawitee. Tema aapatziyari, rootaki iñaatantakaeri Tajorentsi akameethatzi, rootaki ayotantakari akanteetatyeyaaani ajeeki kameetha janta jenokinta.

⁸ Kyaaryooperotaki iroka nokantakimiri. Nokowaki pikanteri maawaeni ameentariri Tajorentsi rantero maawaeni iroka pikamantaperoteri. Rootaki ikenkithashiryaaaktantyaaawori rantapiintero kameethatatsiri. Okameethaperotaki maawaeni iroka, eero ratsipetashitawo rantero.

⁹ Omaanta eero pojampitakowentziro kaari riyotaperotzi, eejatzi eero paapatziyashitawo ikenkithatakotashitari riraga itakaantaworini. Eero piñaanatawakaanteeyawoni rojankinarini Moeseshi, eero pikijathatawakaantawo. Patsipetashitawokari, eero amitakotzimi.

¹⁰ Eenitatsirika amatawiterini aapatziyariri Jesoshi ikijawakaanteeyaaarini, pikamineeri eero ramatawitantzi. Eerorika raapatziyimi, apawo papiitaperoteri. Rooma eerorika raapatziyimi, pookeri, eero pishinetziri riyoteeri riraga aapatziyariri Jesoshi. ¹¹ Raapatziyawo theeyaantsi irinta. Tee okameethatzi rantziri. Rirojatzi yotakotaacha eeniro rantani.

Riweyaantakawo ikantakiriri Paaworo Teeto

¹² Notyaantemiri Aretemashi, rooma eerorika irira, notyaantemiri Teekiko. Aririka piñaawakiri, pishintsitanaki piyaatanaki Nikooporishiki, aritaki piñaawakina janta. Aritaki noshiretakawo nokyaawontsitakote paata janta. ¹³ Pamitakoteri irira Sheenashi, eejatzi Apooro. Riraga Sheenashi riyotziro ikantziri pinkatharipaeni. Pipawakiri maawaeni koetyeemotziriri aririka itharyaanakya. Tee okameethatzi ikoetyaawaete. ¹⁴ Kameetha riyoteeyeni maawaeni ayemijantzinkarite ineshironkatante. Okameethatzi ramitakoteri riraga ashironkaenkari. Okameethatzi rantero maawaeni kameethatatsiri. ¹⁵ Riwethateeyimini maawaeni aapatziyariri Jesoshi jaka. Niwethatari maawaeni aapatziyariri Jesoshi jaga, riraga nintaperoeyanini. Nokowaki Tajorentsi ineshironkatemi maawaeni.

Ari okaatzi

Naaka jankinatzimirori:

Paaworo

ROJANKINATZINIRIRI PAAWORO JIRIMOONI

¹ Nokoyi niwethatemi eeroka Jirimooni, tsikarika pikanta pijkeeki. Naaka Paaworo nojankinatzimiro. Nojeeki iroñaaka jaka omonkyaagamentotsikika, omaanta nanteniri Jesokirishito oetarika ikowakaanari. Notsipatakari ayemijantzinkarite Temoteeyo nojankinatzimiro iroka. Nonintaperotakimi. Pikimitakina, antziniriri Tajorentsi oetarikapaeni. ² Iroñaaka niwethathyawo Aapiya, ayemijantzinkawote. Eejatzi niwethatari Arikipo, nokimitakaantakiri nojoraarotzinkarite. Riroma joraarropaeni ikyaaryoowentapiintziniri iyapitanote maawaeni ikowakaakiriri. Okimitaka, eejatzi rrifaga Arikipto, imonkaatakina, nokyaaryooowentziniri Tajorentsi maawaeni ikowakaakinari. Eejatzi niwethathyari maawaeni ayemijantzinkarite piyotapiintachari pipankoki. ³ Nokowaki ineshironkatapiinteeuemini Pawa Tajorentsi, kameetha ijeekakagaeyemini. Eejatzi ikimitakagaeyemini Awinkatharite Jesokirishito.

Riweshiryaaawentari riraga Paaworo Jirimooni

⁴⁻⁵ Ikamanteetapiintakina pikantani paapatziyari Awinkatharite Jesoshi, eejatzi pinintashireeyirini maawaeni aapatziyari rowameethatanewo Tajorentsi. Rootaki namanapiinrantariri Atajorentsite: “Ariwee Pawa, pimataakiri Jirimooni, eekiro piyaatatye pamitakoperoteriroña”. ⁶ Eejatzi namaniri ramitakotemi eekiro piyaatatye paapatziyari Jesoshi eejatzi ramitakotemi piyotero maawaeni kameethaperotatsiri ipakaeri rrifaga aapatziyantariri. Rootaki pimatantari pamitakoteri maawaeni aapatziyari iñaaperotantariri Tajorentsi. ⁷ Iroñaaka niyotaki, nonintaperotanewo, pineshironkatziri paashinipaeni aapatziyariri Jesoshi rowameethatziri Tajorentsi, eejatzi piweshiryaaakaakari, rootaki nokmoshiryaaawenantakimiri, eejatzi niweshiryaaawenantakimiri.

Ikantakowentziri Oneeshimo

⁸ Niyotzi naaka rotyaantanewo Jesokirishito; ishinetakina nomperatemiro oetarika okameethatzi panteri, ⁹ omaanta anintaperotawakaaka eejatzi niyotzi pinintaperotakiri ayemijantzinkarite, rootaki kaari nokowanta nokantemi: “Ajaa, iroka pantayiterini”. Rooma nantyashiparitaki iroñaaka, eejatzi apatziro nantziro ikowakaakinari Jesokirishito. Ņaakiro, nokenkithatakotziri Jesokirishito, rootaki romonkyaagaentakinari omonkyaagamentotsikika. Rootaki nokowantari eeroka pikemijantena. ¹⁰ Eenitatisi jaka atziri niyotakaakiriri Jesoshi, nokimitakaantakiri notyomi iroñaaka. Iwaero Oneeshimo: rirotaki irika nokantakowenteri. ¹¹ Paerani pitawitanakari omaanta tee ikemijantaperotzimi inta ishiyaapithatakimi. Omaanta iroñaaka kameetha ikemijantaperotemi eerori ramitakotemi, eejatzi ineshironkatena naari.

¹² Notyaanteri iroñaaka ipiyashitaneemi, irika nonintaperotakiriroña. ¹³ Nokowaperowitaka kijokiro rowanakinami jaka, ramitakoperotenami omonkyaagamentotsikika, okimityaami arimi pijkeekemi jaka, pineshironkatenami eerori, rooma nokenkithatziro ikantziri Tajorentsi, rootaki nojeekantakari jaka iroñaaka. ¹⁴ Omaanta tee niyotzi oetarika pikoyiri eerori. Tee nokoyi nokantaperotemi potyaanteri patzirite ramitakotena; eeroka kantatsini. ¹⁵ Aririka rrifaga Tajorentsi ishinetakiri Oneeshimo ishiyapithawitakimi eeroka eechonkiini aritaki raapatziyari rirori roojatzi ipiyashitatemiri ikantani ijeekakaakimi. ¹⁶ Paerani pamanantanewo

rinawitani. Omaanta iroñaaka kaari apatziro pamanantanewo inta irira rirotaki eejatzzi piyemijantzinkarite, riraga anintashiretanewo. Osheki non-intaperotakiri naari, iroñaaka pinintaperotawaeri eerori. Okameethatzi pineshironkateri, tema atziri, omaanta okameethaperotaki pineshironkap-eroteriroña, rirotaki piyemijantzinkarite. ¹⁷ Pamine, pikenkithashiryaaka aka atsipataminthawakaaka antawaetziniri Awinkatharite. Ari, iroñaaka nokowaki pineshironkatawaeri riraga Oneeshimo, pikimitakaantenami pineshironkatawaenami naakami areetapaenchanimi.

¹⁸ Aririka ikoshitakimi, eejatzzi aririka rireewitakimi, ari pikowakotenawo naari maawaeni. ¹⁹ Naakakya nojankinatzimiro iroka nashi nako, kaari paashini atziri. Nopinatemiri oetarikapaeni rireewitakimiri. Omaanta pikenkithashireero osheki noneshironkatakimi paerani; piyotzi eeromi nojeeekimi, eero pawijkotzimi. ²⁰ Rooma, noneshironkatanewo, paapatziyari Jesoshi Awinkatharite, iroñaaka nokowaki pineshironkatena naari. Rooma pikimitakina naaka paapatziyari Jesokirishito, iroñaaka nokowaki piweshiryaakayena. Pimonkaaterorika iroka nokantzimiri, ari niweshiryaanakya.

²¹ Niyotaki aritaki pikemijantaperotakina rootaki nojankinatan-takimirori. Niyotaki ari pantakinawo maawaeni nokantakimiri, aritaki pantawaetakiro eejatzzi paashini osheki kaari nokantzimiri. ²² Eejatzzi nokowaki piwetsikenawo tsikarika nojeeekantapaakyaaari. Niyotaki pikantani pamaniri Tajorentsi roemishitowanteenari, rootaki niyotantakari ari noñaapaemi.

²³ Eeniro ikaatakina Epaajagashi jaka omonkyaaagamentotsikika. Ikim-itakina ikenkithatakotziri Jesokirishito, rootaki romonkyagaetantakinari eejatzzi; riwethatzimi rirori. ²⁴ Eejatzzi riwethatzimi Marikoshi, Arishi-taariko, Teemashi, Rookashi, maawaeni. Ikaatakina nokyaaryoowentziniri Tajorentsi oetarikapaeni. ²⁵ Nokowaki eekiro riyaatatyey ineshironkatemi Awinkatharite Jesokirishito.

Ari okaatzzi.

Naaka jankinatzimirori:

Paaworo

ROJANKINEETZINIRI IJORIYOTZINKARITE

Tajorentsi rotyaantakiri Itomi ikenkithatkoteri

¹ Paeraniperoroña riraga Tajorentsi riyotagaeyapiintakirini riraga kamanantayitzirorini iñaani rirori. Apaanipaeni iñaaperotziri Tajorentsi, irira paashinipaeni ikemashitakari iñaanatziri, irira paashinipaeni iñiiri ronam-piri, irira paashinipaeni eejatzi imishitakaakiri. Eekiro, eekiro riyota-gaeeyakirini oetarika ikowakaakaeri aakapaen. Roojatzi riroripaen, eekiro, eekiro ikamantanakitziri riraga achariniitenipaen paeran.

² Omaanta iroñaakakya, riyotaaperoeyakaen itomipero riraga Tajorentsi. Tema iitziri irira jewawentziriri maawaeni atziri eejatzi maawaeni oetarika añaayitzirinika. Ari ikantakiri paeraniperoroña: "Notyomi, eero ka wetsikeroni kipatsi, jenokinta, maawaeni okaatzi akowakaakari; pikanteeyeririni maawaeni". Roojatzi imonkaatantakawo ikantakiriri.

³ Roshiyaperotakari Iriri, ishipakiryaaperotaki, rootaki roñaagakinari Tajorentsi rrioperori. Tema ranaakoeyirini atziri ipinkatharitzi. Aririka ikowanaki imatayitakironi oetarikapaen, tema ari itajonkayitanakironi. Ari imateeyakironi maawaeni ikanteeyirini: apatziro ikantaki, matanaka oetarikapaen. Paerani aaka atziri antayitakironi kaari kameethatatsi, rootaki kaari akameethatantawitani. Omaanta ipokapaaki rirori ikamawenteeyakaen rowameethatanteeyakaerini. Ipiyantanaa eejatzi janta jenokinta, ijeekapae rakoperoki Tajorentsi, itsipatapaari Iriri ipinkathariteeyini.

Ranaakotakiri Itomi ronampiripaen Tajorentsi, ipinkatharitaperotzi

⁴ Rirojatzi Itomi Tajorentsi anaakoeyirini ronampiripaen irira, ipinkatharitaperotzi; tema ikantziri Tajorentsi: "Notyomi". Isheninkataperotakari. ⁵ ¡Pikenkithashiryaaky! ¿Ikantzirima Tajorentsi ronampiri: "Eero ka notyomi, iroñaaka notomintakimi"? Tee itomintari ronampiri, intakya riraga Jesoshi. ¿Ikantzirima ronampiripaen: "Naaka piritaperotyari, Naaka notomintakimi"? Tee ikantziri. ⁶ Eejatzi ayotzi ranaakotakiri Itomi riragapaen ronampiri, tema eejatzi paeran, ipokantakari Itomi rapintsite kipatsikika, ikantzi: "Nokowakagaeyakirini maawaeni nonampiripaen ipinkatheeyerini Notyomi". ⁷ Eejatzi ayotzi ranaakotakiri Itomi irirapaen, tema ikantakotziri Iwaperiteki: "Notyaaantapiintziri nonampiripaen ikamanantyaariri atziri noñaani omaanta eero ijeekimoeyirini tema roshiyakawo tampyaa eejatzi paamari". ⁸ Omaanta ikantakotakiri Itomi: "Osheki pipinkatharitzi, osheki pitajorentsitsi: pikanteetatyeeyaani. Okameethaperotaki piñaani, okyaryooperotaki. ⁹ Osheki pikowakagaeyakirini atziri ijeeki kameetha; tee pikowakaaneentziri rantero kaari kameethatatsi. Rootaki niweshiryaakaaperotantakimiri naaka, panaakoeyakirini maawaeni paashinipaen piweshiryaaperotanaka eero". ¹⁰ Eejatzi ikantzi:

"Eero ka Nowinkatharite, aririka owakira piwetsikimatziro oetarika, tema pitakawo piwetsikakiro kipatsi roojatzi piwetsikitakawo roori jenoki eejatzi oetarikapaen. ¹¹⁻¹² Inja ari roori othonkaeyeeyani omaanta eero ka pikanteetatyeeyaani pijeeki. Oshiyakaawentero maathaantsi antyashipawote eejatzi okaatzi añaayitakirinika ari antyashipawoperotanaki, roojatzi opeyimotantanakimi. Okimitaaganki maathaantsi aririka antyashipawote rookaetziro raanteeyarinii owakirari. Omaanta eero,

eero pipaashinitzi, eero pipeya". ¹³ ḥikantzirima Tajorentsi apaani ronampiri: "Pijeke nakoperoki roojatzi ipinkatharieeyantemirini kijeeyawitzimirini"? Tee ikantziri, omaanta ikantziri itomi. ¹⁴ Tema riraga ronampiripaeni antayitzinririni ikowakagaeyakiririni: tema raminakowenteeyakaeni maawaeni aakapaeni owawiaakotaachanipa.

2

Okameethatzi akemijantaperoeyerini Itomi Tajorentsi

¹ Ikowakaaperoeyakaeni Tajorentsi akenkithashiryaaoperotero maawaeni ikanteeyakaerini Itomi: tema okyaaryooperotaki, tee okameethatzi apeyakotyaawo ikantakaeri, rootakikya anantyaawori kaarira ikowakagaeri. ² Paeraniperoroña ronampiripaeni Tajorentsi ramitakotakiri irira ikamantagaantakiniri Moeseeshi ikaminaakiriri riraga Tajorentsi ewereeyopaeni: rowaga ojankinataakaakirori riraga Moeseeshi. Tema okyaaryooperotaki maawaeni ikamanteeyakiririni ronampiripaeni. Ayotziro tema rowashironkagaeyakirini Tajorentsi maawaeni ronampiripaeni kaari kemijantaperoeyawakirorini: ari iñaashitakawowee. ³ Omaanta iroñaaka osheki ipomeentsiwenteeeyakaeni Itomi rirori rowawijaakoeyantakaerini. Aririka atheenkaeyerini, ḥpiitzima eero rowashironkagaeyeeni Iriri? Ritakawo Awinkatharite riyotagaeyakirini riyotaanewopaeni tsika ikanteeyaan rawijakotanteeyaaarini; roojatzikya rowaagaeyakaeroni aaka riraga kemaeyakiririni. ⁴ Eejatzi riraga Tajorentsi riyotakaakirir atziripaeni kyaaryooperotatsiri okaatzi riyotaakiriri Jesoshi: tema imatakaakirir itajonkantayitakini; eejatzi roori Ishire omatakagaeyirini aapatziyariri oetarikapaeni, kaari amatziri aari. Ari añeeeyakirini rirori okaatzi rantayitakirini, rootaki ayoteeyantakarini kyaaryootaki ikantziri Itomi Tajorentsi.

Iinja ipinkathateeyerini maawaeni atziri Jesoshi

⁵ Ari iroñaaka nokenkithatakotero paashini kipatsi ironta jenokijato: rowaga ojeekaeyantapaeyaari iinja. Eero janta ipinkathariwenteeyeeni ronampiripaeni Tajorentsi, inta Itomi. ⁶ Ayotzi kyaaryootaki iroka, tema paerani ikantzimini irira Iraviiri: "Tee nokimitzimi eeroka, tee nota-jorentzitzu naari. ḥitaka pikenkithashiryaaantanari? Tekatsi okantya pikenkithashiryaakontakteenari. Tekatsi okantya paminakowiritaananteneri. ⁷ Tema piwetsikakiri ponampiripaeni eejatzi atziripaeni. Omawitya ponampiripaeni ranaakotakae aaka atziripaeni eechonkiini, piitakina naakapaeni atziri jewawentziriri maawaeni piratsipaeni eejatzi tema piwetsikakina oshiyakimiri eeroka. ⁸ Tema pikantziri: 'Eerokapaeni atziri pinkathariwenteeyeririni maawaeni jeekayitatsirini: maawaeni añaayitakirini'".

Aritaki ikantaki Iraviiri paeraniperoroña. Omaanta tekira omonkaata maawaeni. ⁹ Omaanta ayoteeyakini paerani ipoñaanaka Jesoshi jenokinta, ratziritapaaki kipatsikika. Tee ipinkatharitaperotapae, tee imonkaata-paeyaari ronampiri Tajorentsi ipinkatharitzit. Osheki rowashironkaetaw-itakari, ikamawenteeyakaeni, rootaki kaari aateeyantyaani paamariki kaari tsiwakanitatsini. Irira rirotaki otyaantakiriri Tajorentsi ayoteeyantakarini osheki ineshironkaeyakaeni. Iroñaaka kameetha ijekapae jenokinta, ipinkatharitaperotapae eejatzi. Tema rirotaki pinkathariwenteeyeririni maawaeni: iitrikapaeni.

Ikamantakae itaka ikamantakari Jesoshi

¹⁰ Ari riraga Tajorentsi riwetsikaeyakaeni maawaeni, eejatzi riwetsikakironi maawaeni okaatzi añeeyakirini. Tema ikowaki itajonkawenteeyeeni rootaki ajeekaeyantakarini iroñaaka. Eejatzi okameethatzhi rowameethatakiri Itomi kameetha, tema osheki ikemaaatsitawentakae ikamawenantakaeri. Rootaki okameethatantari apinkathateeyerini, tema rirotaki awijakoeyanteeyaaarini; tema aritaki ikowaki itominteeyakaeni Tajorentsi, ikowaki ragaaeyeeni jenokinta. ¹¹ Ari rowameethateeyakaeni Jesoshi, iroñaaka atspitateeyarini akanteeyirini Iriri: "Pawa". Rootaki kaari ipashiwentakaantee Jesoshi ikanteeyeeni: "Yeeyi", eejatzi: "Choeni". ¹² Tema okantzi Iwaperite Tajorentsi:

"Ikantziri Jesokirishito Iriri: 'Nokamantteeyerini yeeypaeni eejatzi choenipaeni tsika pikanta; notspitateeyaaarini nomampaawenteeyemini'".

¹³ Okantzi paashini Iwaperite Tajorentsi:

"Kameetha eekiro niyaatatayee nameentyaari Pawa".

Iroka paashini okantzi:

"Pawa, piñaakina jaka, nokaateeyirini pitomipaeni, eejatzi pishintopaeni. Rootaki potyaanantakinari nosheninkatanteeyakaririni".

¹⁴ Aakateeyakini atziri itomipaeni Tajorentsi, rishintopaeni; kamaniri aneeyakini. Ari ikimiteeyapaakaeni Jesoshi ratziritapaaki, ikamawenanteeyapaakaerini. Kyaaryo ikamawenteeyakaeni ithonkanteeyaririni iwinkatharite kamaari, riraga kowawitachari rowamagaeyeenimi eejatzi ragaaeyanakaenimi paamariki kaari tsiwakanitatsini. ¹⁵ Paerani athaawaanteeyawitawoni akamaeyenimi, akantatyani; omaanta iroñaaka ameentaperoeyakarini riraga Jesoshi rootaki kaari athaawanteeyanaani, omaanta eekiro aatatyee aweshiryaaawenteeyanaarini. Tema ari aate jenoki atspatantapaeyaari Tajorentsi. ¹⁶ Tee irira ipokashiteri Jesoshi ronampiripaeni Tajorentsi, intaky aaka maawaeni icharineeteni Awaraama ipokashiteeyakaeni. ¹⁷ Rootaki ratziritantapaakari, rirentziteeyantapaakaerini; ikimiteeyantapaakaerini aari, rootaki rirotantakari ineshironkaeyakaeni eejatzi ikantakiri Tajorentsi ineshironkaeyeeni riori. Tema roshiyakari iwinkatharite ñaanakowenantsiripaeni. Eejatzi imateeyakironi maawaeni ikowakagaeyakiririni riori, ikamaki rowameethateeyantakaerini maawaeni aaka antzirori kaari kameethatatsi. Rootaki iroñaaka kimiwitaka iwinkatharite ñaanakowenantsiri imateri ikanteri Pawa ineshironkaeyeeni. Roojatzi iroñaaka iñaaperotanteeyakaerini riori akameethatzi. Eejatzi raakameethatee aaka janta jenokinta. ¹⁸ Osheki ikemaaatsitakawo riori; eejatzi iñaantawitakari riraga iwinkatharite kamaaripaeni, rantakayerimi kaari kameethatatsi. Iroñaaka aaripaeni, aririka akemaaatsitayityaawoni oetarikapaeni, eejatzi aririka iñaantawitakae kamaari, rirotzi riraga Jesoshi tsika okantari. Rootaki rirotantakari ramitakotanteeri aakapaeni. Ari imatero ishintsitakagae ajankaneki amatantyaaawori eero akantawo kaari kameethatatsi.

3

Jesokirishito ranaakotakiri Moeseeshini ipinkatharitzi

¹ Rootaki iroñaaka, noyemijantzinkarite, nokamanantemiri tee pikimiteeyaaarini riraga kaari aapatziaariri Jesoshi: riyoyagaeyaki-mini eeroka Tajorentsi pitsipatantaneeyaaarini janta jenokinta. Pikenkithashireeyanakirini Jesoshi, tsika ikanta: rirotaki rotyaantaneowo Tajorentsi, ikamantteeyereroni maawaeni ikowakaakaeri irira. Eejatzi rirotaki kimitariri riraga iwinkatharite ñaanakowenantsiripaeni paerani: rowagaeniri rirori akowakotziriri aari. ² Paerani riraga Tajorentsi ikantakiri Moeseeshi: "Kameetha piyotagaeyerini

pisheninkapaeni, piyotakagaeyerini maawaeni nokowakagaeyakiririni". Ari ikyaryoowentakirini Moeseeshi riyotagaeyakirini isheninkapaeni. Eejatzi rriraga Jesoshi ikyaryoowentaperotakiniriroñ Tajorentsí maawaeni ikantakiriri.³ Tema añaaperotaperotziri rriraga wetsikirori ipanko: tee añaaperotaperotziro pankotsi. Tema irira riyotatziiro riwetsikiro: tee iyota pankotsi apaniroeni owetsikya. Eejatzi okameethatzi añaaperotaperoteri Jesoshi, osheki ipinkatharitzi; eero añaaperotaperotziri Moeseeshi, tee ipinkatharitaperotzi.⁴ Eenitatsi wetsikirori pankotsipaeni maawaeni, omaanta omaperotatyá riwetsikaeyakirini Tajorentsí maawaeni añaeyakirini.⁵ Ñaakiro, rriraga Moeseeshi kameetha ikyaryoowentziniri riori maawaeni ikowakaayitakiririni, omaanta ikimitakari ronampiri janta ipankoki. Ritawitakawo riyotagaeyakaeroni eechonkiini, rimpaeztzi Jesoshi riyotaaperotapaakaero maawaeni.

Ikjakiri Tajorentsí theenkiriri eejatzi piyaathatariri

⁶ Omaanta Jesokirishito ikyaryoowentaperotziniri Tajorentsí maawaeni ikowakaakiriri. Tema raminakowiritantakae akaa maawaeni aapatziyariri ikimitaaganki apaani atziri raminakowiritaanteri isheninkaperopaeni. Aririka akantyaáni aapatziyeeyarini rirori, tema ayoteeyakini ashéñinkateeyakarini; rootaki ayotakoeyantakaririni raanteeyaneerini janta jenokinta iinja.⁷ Eekiro piyaatatye pikennkithashiryaa koteri iroka ojankinataakaakiririni Ishire Tajorentsí rriraga Iravíiri:

"Iroñaka pikemaeyawakironi ikantziri Tajorentsí.⁸ Eero pipiyathatapiintari pikimitaarikari rriraga icharineetenipaeni Ishirayeerini janta okaankiitziinta rapiitapiintakiri ipiyathatakari rriraga Tajorentsí. Aritaki iñaantapiintakari osheki rantapiintakiro kaari kameethatatsi riyotantakariri irira rowashironkaeririka.⁹ Ikantzini rriraga Tajorentsí: 'Kyaaryo ipiyathateeeyawitakinani naari pichariniutenipaeni paeraní. Okaataki 40 ojarentsi natsipetashitakawo notajonkakowentapiintziri'.¹⁰ Tema ipiyathateeeyakinani, iñaanteeyakinani, rootaki nokijeeyan-takaririni naari, nokantakotakirini: 'Osheki itheenkakina, tee ikenkithashiryaaana rajanganekí. Tee ikowaeyimi riyoteeyeni oetarika nokowakagaeyakiririni'.¹¹ Tema nokijeeeyakirini, rootaki nokantaperotakotantakariri: 'Eero rareeteeyani janta Kanaanaki, eejatzi eero rareeteeyani jika okameetheetziika'".

Rootaki rojankinatziniriri paeraní Iravíiri.

¹² Kyaaryoowa, noyemijantzinkarite, eero pikimitari riroripaeni pitheenkirikari Tajorentsí: tee okameethatzi. Rañaatzi rirori, ashi roiyironi. Omaanta aririka pitheenkeri, ari pipeyakoteeri: eero pikennkithashiryaa-neeri eejatzi.¹³ Okameethatzi iroñaka eerokya pitheenkiri rirori inta pamitakotawakagaeyani eejatzi poemoshirenkwakaanteeyawoni eejatzi maawaeni kitejiri paapatziyakáaperotyaari Jesokirishito: iinja eerokya pimatziro. Eerokya paapatziyeeyarini iroñaka, roojatzí pikanyaani papiitapiintero kaari kameethatatsi, pametyaawo: osheki pamatawitakya apaniroeni, eerokya pikoyi paapatziyari.¹⁴ Aririka eekiro aatayee ameentyaari Jesokirishito roojatzí akamantakya, aritaki ayoteeyanakini akaateeyerini aateeyanakini jenokinta: eero ramatawitee.¹⁵ Omaanta pikennkithashireero rojankinatziniri Iravíiri: "Iroñaka pikemaeyawakironi ikantziri Tajorentsí. Eero pimajontzishiretti pajanganekí, eero poshiyari achariniutenipaeni paeraní ipiyathateeeyakarini rirori".

¹⁶ ¡Pikenkithashireero! Paerani riraga ejipitojatzi osheki rowashironkagaeyakirini maawaeni achariniitenipaen i paerani. Ari ikanteeyirini Moeseeshi: "Thame, nagaeyaneemini paashiniki kipatsi, kameethaka ajeekaaeyanteeyarini". Ikanteeyini: "Kameetha, thame aateeyeni maawaeni". Omaanta tema riroteeyakini piyathateeeyakaririni Moeseeshi eejatzi Tajorentsi. ¹⁷ Rootaki ijamatantakariri Tajorentsi. Okaataki 40 ojarentsi ijamatotakari. Osheki ranteeeyakironi rirori kaari kameethatatsi, rootaki ishinetantakariri ikamaeyakini janta okaankiteronkiitziinta. ¹⁸ Okameethatzi pikenkithashiryakoteri ninkarika ikantakotziri Tajorentsi: "Eero pareeteeyan janta okameetheetyeenta". Tema rirotaki achariniitenipaen i paerani riraga piyathatakari Tajorentsi. ¹⁹ Ñaakiro, itheenkaeyakirini, tee raapatziyari rootaki kaari rareeteeyantani rirori janta okameetheetyeenta.

4

Ikowaki Tajorentsi areeteeyaani janta okameetheetyeenta

¹ Pamine, ikanteeyakaen i Tajorentsi: "Aririka paapatziyeyenani pijekimoeyenani jaka nonampiki, jaka okameetheetziika". Omaanta kyaaryoowa, pikimitarikari riraga paejatziiteni kaari areetachani. ² Okameethaperotzini rowaga ikashiyakaawitakaririni Tajorentsi, eejatzi okameethatzi iroka ikashiyakagaeyakaerini aari. Omaanta tee raapatziyeeyarini riroripaen i, rootaki ratsipetashitaktawori okaatzi ikamantawitakariri.

³ Aririka aapatziyaperotakyaari Tajorentsi, ari areetaperotakya janta okameetheetziinta, omaanta eero rareeta riraga kaari aapatziyari. Tema ikantakirini Tajorentsi: "Nokijakiri, rootaki nokantaperotantariri: 'Tee paapatziyana, rootaki kaari pareetanta janta okameetheetziinta' ". Paerani, tekiran i riwetsikironi kipatsi, riwetsikawitanari ijekantyaarimi, omaanta tee rareeteeyani. ⁴ Ayoteeyakini riwetsikaeyawitakawoni maawaeni, monkaataka. Tema okantzi Iwaperite Tajorentsi: "Okaataki 6 kitejiri riwetsikaeyantakaworini Tajorentsi maawaeni; monkaataka. Roojatzi, kitejiri 7 ipakaakiro riwetsikantakawori, ari okaatzi: makoryaapaaki". ⁵ Ari riwetsikawitanari, omaanta tee raapatziyeeyarini riroripaen i, rootaki ikanantari eejatzi Tajorentsi: "Eerokya rareeteeyani jaka okameetheetyaaperotzika".

⁶ Ari okameethataki iroka ikantakiririni Tajorentsi, omaanta eero rareeteeyani riraga paejatziiteni ikantakirini: ñaakiro, tee raapatziyeeyarini. Omaanta ijekagaantee areetagaantaachani. ⁷ Rootaki riyooyantakawori Tajorentsi paashini kitejiri, ikantzi: "Iroñaakaya nokowakagaeyakirini atziri raapatziyeeyenani rareeteeyanteyarini jenokinta". Rootaki rojankinataantakaririni Iravii: "Iroñaaka, aririka pikemawakiri Tajorentsi ikenkithatakayakirini, eero pimajontzhiretti, eero pitheenkiri". ⁸ Arimi rareetakaayaarimi Joshoe isheninkapaen i janta okameetheetziinta, ¿Arima roojatzi rojankinataakirimi Tajorentsi Iravii: "Inja rareeteeyanaani aapatziyeyanarini janta okameetheetziinta"? ⁹ Rootaki ayoteeyantakarini iinja aateeyeeni maawaeni aapatziyariri Jesoshi janta okameetheetziinta amakoryaapae, eero janta apomeentsitapaa antawaetapae. ¹⁰ Paerani ithonkantakawori Tajorentsi riwetsikayitakironi, ipakaakiro, tekatsi ranee eejatzi. Eejatzi aaripaen i, aririka aateeyeeni rirorikinta, akimiteeyapaeyaarini, amakoreeyapaen i, tekatsi anteeyapaen i.

¹¹ Thame akowaperoeyeeroni areeteeyaani janta: eero apiyathatari, eero atheenkiri akimitarikari paejatziiteni. Eerorika aapatziyaperotari,

eero areetaari. ¹² Kyaaryoowa, eero pikantashita paapatziyari Tajorentsi. Añaatsiri irira, osheki itajorentsitzi; imataperotakiro maawaeni ikanteeyirini. Tekatsi pomeentsitzimotaarini irira, eejatzi Iwaperite oshiyakawo añi: temaa okyaantakae ajankaneki inashitantlyaawori okaatz iakenkithashiryaari kimitaka jawiri apitetachari othoyempitzi aririka okyaantakae inthomaenta awatha. Temaa okyaantakae Inaani ajankaneki eejatzi ashireki kimitaka jawiri okyaantakae aepatha eejatzi atonkiki. Temaa rirotaki oshiyakaawentacha Tajorentsi: riyotzi tsika okantari akenkithashiryaantari, riyotziro eejatzi ashire; riyotziroña tsika akantari. ¹³ Tekatsi materini omanapithaterini: iñaaperoyakaeni maawaeni; tsikarika ajeekaeyini, iñeeyakaeni. Ithotyaayitzironi kipatsi; rirotaki aminakowenteeyeerorini antakirorika kameethatatsiri, rooma teerika.

Jesokirishito ikimitawitakari iwinkatharite ñaanakowenantatsiri

¹⁴ Ari riyaatee Jesoshi janta jenokinta, itsipatapaari Iriri, riraga Tajorentsi. Iroñaaka ikantziri irira: “Pikaminthagaeyerimi aapatziyeeyanarini”, ikimitawitakari riraga iwinkatharite ñaanakowenantatsiripaeni, rootaki okameethatantari akanteetatyeyaaani aapatziyeyarini. ¹⁵ Ratziritapaakini paerani, ikemaatsitayitakawoni oetarikapaeni, eejatzi riraga iwinkathariteni kamaaripaeni ikoyi rantakayerimi kaari kameethatatsi, omaanta tekatsi rantzi. Riyotzitantakaerori omaanta rirori maawaeni akemaatsitayitarini eejatzi tsika ikantakaeri kamaari. Riyotzi opomeentsitzimoeyakaeni, omaanta imatziro ramitakoperoeyakaeni. ¹⁶ Eero iroñaaka athaawantari amaneri Tajorentsi: ayoteeyakini ineshironkaeyakaeni, ikaminthaperoeyakaeni. Eero ishineteewowashironkagaeyaaani.

5

Ikowakaakiriri Tajorentsi riraga iwinkatharite ñaanakowenantatsiri

¹ Ari riyooyakiri atziri Tajorentsi iitakiri iwinkatharite ñaanakowenantatsiri, ikowakaapiintziri ramanakoeyaaarini atziri. Irira taakiniriri Tajorentsi oetarika ipaeyeririni. Ranteeyironi kaari kameethatatsi, rootaki maawaeni ojarentsi rowantanariri ñaanakowenantatsiri Tajorentsi apaani piratsi kameethari, itaakiniri. Roojatzi raakameethatanteeyaaariri maawaeni aapatziyariri rirori, ikimitakaanteeyakarini tee ranteeyironi kaari kameethatatsi. ² Ari ikimiteeyakaeni aari, rirotaki atziri; tee imatziro ijeki kameetha, omaanta rantziro rirori kaari kameethatatsi. Rootaki rirotantakari ikaminthagaeyakirini paashinipaeni aririka rantero kaari kameethatatsi. ³ Omaanta otzimatye rirori rowamayeniri Tajorentsi rowishate, ipeyakotenirii okaatzi rantziri, ari ikimitari paashinipaeni atziri antzirori kaari kameethatatsi riraga amakiriri rowishate rowamayeniri Tajorentsi ipeyakotenirii rantani. ⁴ Tee rirojatzi iitashitachani iwinkatharite ñaanakowenantatsiri, omaanta iitziri Tajorentsi; okimitaka paerani iitakiri Aawooni ñaanakowenantayitatsirini.

⁵ Eejatzi ikimitaka Jesokirishito: tee rirojatzi peyashitachani kimityaarini iwinkatharite ñaanakowenantatsiri, omaanta iitakiri Pawa Tajorentsi. Temaa ikantziri paerani: “Eeroka notyomi, iroñaaka kitejiri notomintakimi”.

⁶ Paashini eejatzi ikantziri Iwaperiteki: “Pikanteetatyeyaaani piñaanakowenantanaki, pikimityaari rirori Merekishereeki”.

⁷ Paerani, ratziritantapaentarini Jesoshi, osheki ramanapiintziri Iriri, iraaperotaka, eejatzi itacheronkawaantetanaki ikantziri: “Pawa, aririka nokame niyotaki pimateena pipiriinteeena”. Ari osheki ipinkathatakiri

Tajorentsi, rootaki imatakaantakariri irira ikowakaeriri. ⁸ Kyaaryo, itomni Tajorentsi rini, omaanta paerani ikemijantaperotakiri ashitariri, rootaki ikemaatsitantakawori oetarikapaeni. Iroñaaka aririka aapatziyari aaka eejatzi akemaatsiwentyaari oetarika, riyotziro rirori tsika okantari. ⁹ Ari imataperotakiro maawaeni ikowakaeriri Iriri, ikemijantaperotakiri: rootaki imatantawori eejatzi rowawijaakoeyirini maawaeni aapatziyaper-oeyaririni rirori. Iroñaaka eero aateeyini paamariki kaari tsiwakanitatsini, inta aateeyeni jenokinta, akanteetatyeyaaani ajeekaeyapaeni. ¹⁰ Rirotaki roshiyakaawentakiri Tajorentsi iwinikatharite ñaanakowenantsiri, ikantzi: "Irira notyomi kimitaka Merekishereeki rirori".

Tekira pikemijantaperotziro rowaga rojankinatzirizi

¹¹ Nokowawitaka nothotyeemiromi tsika ikantaka Jesoshi roshiyantakariri Merekishereeki, niyotaaperoeyemironimi. Eenitatsi piyotantawitari, omaanta tee pikemijantawakina kameetha, tema eentsikiroeni pinoshikawentyaawo. ¹² Okameethatemi piyotagaeyerinimi iroñaaka paashinipaeni, omaanta eenitatsi pikowaeyini iyotagaeyemirini. Pikowaeyini napliteemiro kaari pomeentsitasi. Pikimitakari eentsi: kowatsimi pithote, tee paawiyo patsikero poyaari. ¹³ Kyaaryo, pikimiteyakarini eentsi, kowatsimi pithote: tekira piyotaperoteyironi ññaani Tajorentsi iyotagaeyerini tsika akantyaari akameethateyanteyearini. ¹⁴ Piyotaperoterimi Tajorentsi, pikowaeyenimi poyaari patsikaperoterimi. Piyotakimi iitaka kameethatatsiri anteeyakirini, eejatzi piyotakiromi kaari kameethatatsi eero pantziromi.

6

Ikamantzirijankinatzirori iitaka rojankinatantanariri

¹ Eero napiitapiintemiro iroka niyotaakotapiintziriri Jesokirishito: tee opomeentsita. Eero iroñaaka pikantaana: "Papiitapiinteenawo". Okameethatzi eekiro piyaateeyatyenee piyotaperotanakiro maawaeni ikowakagaeyakimirini Tajorentsi. Nokantzimini paerani: "Eero pantashiyitawoni oetarikapaeni, eero owawijaakotzimi: tektsi pikantya powawijaakoteeya apaniroeni eeroka. Okameethatzi paapatziyari Jesokirishito pawijakotanteeyarini. ² Pikaawoshitawenteeyarini riyoteeyantyaarini atziri paapatziyari Jesoshi. Aririka pikanteri Tajorentsi ramitakoteri piyemijantzinkarite, pipampiteyeyerini. Aririka akamaeyeni apiriinteyaneeni eejatzi, roojatzi ikantakowenteeyeeni rirori". Ari eero napiiteemiro iroka piyotzitarini, ³ omaanta roori aririka ikowakayena Tajorentsi, niyoteemiro owakirari, kaari pikemapiintzi.

⁴⁻⁶ Pamine. Eeniro asheninka kemawitaworini ññaani Tajorentsi, riweshiyaawentawitakari Tajorentsi, amitakotawitakari Ishire roori. Riyotawitaka okameethatzi ññaani Tajorentsi; riyotawitaka iinja ipinkathariwenteeyeeni Jesokirishito. Omaanta rookaero raapatziyawitarira. Aririka rookaero raapatziyarira Itomi Tajorentsi, okimitaka ikowaki rapiiteerimi eejatzi ikentakotakaanteeri koroshiki. Itheenkakiri, ikowaki itheenkakagaeyerini paashinipaeni atziri, ishirontawenteeyantyaaririni Jesokirishito. Ari tektsi ikanteeya raapatziyaperotanteeyaariri riraga kemijantawitacharini. Kyaaryoowa, poshiyarikarira eerori. ⁷ Aririka kameetha opariyi inkani kipatsikira kaankipatharentsiki ari onintziro pankirentsii oshooki kameetha, rootaki rowaeyarini riraga pankitzirori. Tema rirotaki Tajorentsi owameethatzirori kipatsi. Kimitawori iroka pankirentsii rirotaki oshiyakaawentachari aapatziyariri Jesoshi. ⁸ Omaanta aririka añaakiro

owantsiki tsirompimashi eejatzi paashinipaeni kitochee, tema pikantzi: "Tee okameethatzsi, thame akiyakoeyeroni, atagaeyeroni maawaeni". Kyaaryoowa, pikimitawokari eerori, omaanta okameethatzsi pikimityaawo kameethari kipatsi.

Iweshiryakaakari riraga rojankinatziniri

⁹ Ari nokantawitakimi: "Pitheenkikari", eejatzi nokantzimi: "Pikimitawokari kipatsi oshookantari tsirompimashi". Omaanta, nosheninka, noninteeeyakimini. Niyotakimi kameetha pijeekaeyakini, eejatzi rowawijaakoeyemini Tajorentsi. ¹⁰ Tema ikameethataki, eero ipeyakotawo maawaeni pantziniriri: riyotzi pikyaaryooentakiro ikowakaemiri, riyotzi pikaminthagaeyirini piyemijantzinkarite, pikantani. ¹¹ Nokowakaaperoeyakimini pikyaaryooenteeeyeroni pinintashireeyerini paashinipaeni, pikantyaani, roojatzi omonkaatantyaari ipinatantemiri Tajorentsi. ¹² Eero piperashiryawo ikowakaemiri Tajorentsi, inta pikimiteeyarimi riraga paashinipaeni aapatziyaperotariri Jesoshi, kyaaryooentzinziriri maawaeni ikowakagaeyiririni rirori. Kyaaryo ineeeyeroni maawaeni ikashiyakagaeyakiririni.

¹³ Pamine, aririka akowaki ayotakaaperoteri paashinipaeni ashenkina kyaaryo ani akantakiriri, akantziri: "Riyotzi Tajorentsi kyaaryo ini iroka nokantzimiri. Ranaakoeyakaeni rirori, ipinkatharitaperotzi. Aririka namatawitemi, rowashironkaenaata". Eenitatsi iroñaaka ikantakaeri Tajorentsi, omaanta tekatsi anaakoterini rirori, tekatsi owashironkaerini rirori. Apatziro ikantziri Awaraama: "Kyaaryo iroka nokamtantemiri, tema naaka Tajorentsi: eero nopaashinitayitzironi noñaani". ¹⁴ Roojatzi ikantziri: "Kyaaryo, notajonkakowtentemi, osheki netakotzimi; eejatzi noshekyaa kiriki picharineeteni". ¹⁵ Riraga Awaraama eekiro riyaatatz royaakotziri Tajorentsi imonkaatero okaatzi ikashiyakaakariri roojatzi inaanakawo maawaeni. ¹⁶ Tema aririka akowaki ayotakaaperoteri paashinipaeni ashenkina kyaaryo rini akantakiriri, akantziri: "Riyotzi Tajorentsi kyaaryootaki iroka nokantzimiri. Ranaakoeyakaeni rirori ipinkatharitaperotzi. Aririka namatawitemi, rowashironkaenaata rirori". Aririka ayotaki ipinkathataperotaki Tajorentsi, ari ameentaperoteeyawo ikantakaeri. ¹⁷ Eenitatsi ikashiyakagaeyitakaririni Tajorentsi riraga paejatziiteni. Ikowakini riyoteeyeni eero ramatawiteeyirini, rootatzi ikantaperotantariri: "Kyaaryo iroka nokamtantemiri, tema naaka Tajorentsi: eero nopaashinitayitzironi noñaani". ¹⁸ Ari okyaaryooperotaki inaanai Tajorentsi: tee riyotzi ittheeya. Omaanta eejatzi ikantzini: "Kyaaryo iroka nokamtantemiri", ayotaperoeeyantakarini eerokya ramatawitantzi. Iroñaaka, aririka ameentyaari rowawijaakoeyakaeni, ayotaperotaki imatakaero iroka ikantakaeri: rowawijaakoperoeeyeni. ¹⁹ Aririka ayotteeyakini awijakotakae, tema aweshiryaaoperotaka. Noshiyakaawentemiro: okimitaganki antawo pitotsi eenitatsi otenakirori jatatsiri inthomaenta inaa areetakawo jaawikinta kipatsi, tema rameenteetawo eero omatantawo tamppyaan onoshikero pitotsi mapimashiki ochereeteki. Eejatzi aaka oshiyakawo, tema ameentapiintari Jesoshi riraga areetakariri ijekinta Tajorentsi. Ikimitaga iwinkatharite ñaanakowenantatsiri ikyaapaaki jantakironta Tajorentsinaakiki, tema ayotaki aaka aritaki aate jenokinta atsipatapaeyaari Tajorentsi. ²⁰ Reewateeyanakaeni Jesoshi, ikamantakowentakae: ikimitakari riraga Merekishereeki, riraga iwinkathariteni ñaanakowenantatsiri paerani. Tema ikantani inaanakowenantzi.

Merekishereeki rirotaki ūaanakowenantatsiri ranaakoeyakirini maawaeni isheninkani Rewii

¹ Ari iroñaka nokenkithatakoteri riraga Merekishereeki: paerani ipinkathariwenteeyakirini riraga jareemijatzi. Eejatzzi Tajorentsi, riraga jeekatsiri jenokinta, iitakiri ūaanakowenantatsiri. Ari ijekki paashiniki nampitsi Awaraama. Ragaeyanakirini isheninkapaeni, riyaateeyanakini romanateeyirini riraga rowayirite riraga noshikiriri itominthori: osheki rineeyawitani, omaanta ithonkaeyakirini maawaeni iijanipaeni, iwinkatharitepaeni, maawaeni. Ari ipiyanaa rirori, roepiyeeri itominthori, eejatzzi ramayiteeroni rowaagawoni riraga rowayirite. Ipiyantaari, itonkiyotawakari Merekishereeki, ikantziri Tajorentsi: "Pitajonkakowenteri Awaraamaka kameetha ijekantyaari". ² Roojatzzi raagaantee Awaraama owaagawontsi, ipagaantakiri rirori, ikantziri: "Iroka rashī Tajorentsi". Otzimirika 10, ari ipakiri apaani. Akantziri Merekishereeki añaanekei: "Kameethatatsiri". Ipinkathariwenteeyirini jareemijatzi. Akantziri Jareemi añaanekei: "Kameetha ajeekaeyini". ³ Rowaga Iwaperite Tajorentsi tee okenkithatakotziri iriri Merekishereeki. Tee okenkithatakotziro riniro, icharini, eejatzzi icharineetenipaeni. Tee okenkithatakotziro itzimantakari eejatzzi ikamantakari. Okimiwitaka ikantani ijekini, rootaki roshiyantakariri Itomi Tajorentsi; ikantani rirori iñaanakowenantaperotanaki, ikantapiintziri Tajorentsi: "Pitajonkawenteri maawaeni aapatzianari".

⁴ Ņaakiro, osheki ipinkatharitzini Merekishereeki. Itakaanteeyakaririni paerani Awaraama, omaanta ipinkathatziri, eejatzzi ipagaantakiri rowaagawoni rowayiritepaeni. ⁵ Pamine, roojatzikya ijekki isheninkani Awaraamani: riraga Rewii. Rojankinatakaakiri Tajorentsi Moeseshi, rowaga kaminagaantsi: "Ikowaki Tajorentsi iiiterikya isheninkani Rewii ūaanakowenantsatsi. Nokowaki maawaeni ijoriyyotzinkarite ipagaanteri rirori rowaagawo, ipira, maawaeni: ikaaterika 10, ari iperi apaani". Ņaakiro, isheninkani Awaraama rineeyini: isheninkani Rewii eejatzzi maawaeni ijoriyyotzinkarite. Isheninkatawakagaeyakan. ⁶ Omaanta paerani riraga Merekishereeki tee isheninkatyaaarini Rewii, rinashita rirori; omaanta raawakiro Awaraamani rowaagawo ipagaantakiriri rirori, roojatzzi ikantawaeri riraga ikashiyakaakiri Tajorentsi: "Nokoyi itajonkawentemi Tajorentsi". ⁷ Ņaakiro, riraga Merekishereeki anaakotantatsiri ipinkatharitzi, rootaki ikanantariri Tajorentsi: "Pawa, pitajonkakowenteri Awaraamaka kameetha ijekantyaari". ⁸ Jaka ashenkina iñeeeyini riraga isheninkani Rewii, imonkaateeyakaeni aaripaeni, akamaeyini, omaanta raapiintakiri maawaeni apaeyakiririni. Omaanta paerani riraga Merekishereeki, rinashita: okimiwitaka tee ikami omaanta rirori, tee okantzi Iwaperite Tajorentsi: "Kamaki". ⁹⁻¹⁰ Paerani, ipagaantakariri Awaraama owaagawontsi, tekirani ijekeni Rewii: rimpaeete ijekki rirori. Omaanta arimi ijekityaami, ipagaanterimi eejatzzi rirori: tema ikimityarimi riraga jewatatsiri ijekki. Eejatzzi ikimiteeyerinimi maawaeni isheninkapaenini Rewii: maawaeni ūaanakowenantatsiri. Aritakimi ipinkathateeyerinimi Merekishereeki maawaeni. Ņaakiro, ajiroyyotzinkarite ipinkathateeyakirini ūaanakowenantsiripaeni, rootaki ipagaanteeyantakaririni oetarikapaeni, omaanta riraga ūaanakowenantsiripaeni ipinkathataperoeyakirini Merekishereeki: tema ranaakotantaki rirori iñaanakowenantaperotaki, ipinkatharitaperotaki.

Jesoshi rirotaki ñaanakowentantsiri kimitaariri Merekishereeki

¹¹ Ari ijeekaeyawitani riraga isheninkani Rewii: riraga Aawooni eejatzi maawaeni isheninkani rirori, iñaanakowenanteeyakini; eejatzi eniwitacha rojankinateeyinirini Moeseshi, iyotagaeyirini oetarikapaeni anteeeyirini. Omaanta tekatsi ikantee riroripaeni rowameethateeyeeni, rowawijaakoeyeeni; rootaki rotyaanantakariri Tajorentsii paashini ñaanakowenantsiri, kimitaariri riraga Merekishereeki. ¹² Ari rinashita riraga ñaanakowenantsiri, eejatzi iroñaaka rinashita ikowakagaeyakaerini Tajorentsii. ¹³⁻¹⁴ Eeniwitacha ñaanakowenantsiripaeni sheninkaeyakaririni Rewii, eejatzi rojankinateeyakinirini Moeseshi, ryotagaeyirini oetarika ranteeeyakirini. Omaanta riraga owakirari ñaanakowenantsiri tee isheninkatari Rewii, omaanta rirori isheninkatakari Joraa. Tee iñaanakowenantayitzini paashinipaeni isheninkani Joraa: tee rojankinateeyinirini Moeseshi, tee ikantziri omaanta rirori iitakya ñaanakowenantsiri. ¹⁵ Iroñaaka ijeeki riraga kimitariri Merekishereeki, rinashita rirori, ayotantakari rinashita ikowakaeriri Tajorentsii. ¹⁶ Tee isheninkatari Aawooni iitantakariri ñaanakowenantsiri; omaanta itajorentsitaki eejatzi ikanteetatyaaani rañi, rootaki iitantakari ñaanakowenantsiri. ¹⁷ Tema ikantzirini Tajorentsii paerani: "Pikanteetatyeeyaani piñaanakowenantanaki, pikimityaari riraga Merekishereeki". ¹⁸ Eeniwitachani iroka rojankinatziniriri isheninkani Aawooni kaminagaantsi, omaanta tee ikoyi Tajorentsii apomeentsiwentyaawo iroñaaka. Atsipetyawomi, tekatsi okanteeyeeni owawijaakoeyeeni. ¹⁹ Amonkaateeyeronimi maawaeni, eero owameethateeyeenimi. Omaanta riraga Jesokirishito aritaki imatakae ragaeyanakaeni janta Tajorentsiki. Tee atsipetashitawo aapatziyeyakirini rirori.

Ikantzi Tajorentsii: "Kyaaryo, ikanteetatyeeyaani Jesokirishito iñaanakowenantaperotanaki"

²⁰ Tee ikantashita Tajorentsii, ikantaperotzi: "Kyaaryo iroka nokamantemiri, tema naaka Tajorentsii. Ikanteetatyeeyaani Jesokirishito iñaanakowenantaperotanaki". ²¹ Tee ikimitari riraga isheninkapaeni Aawooni. Omaanta ikantziri Jesokirishito: "Kyaaryo iroka nokamantemiri, tema naaka Tajorentsii. Tee nokantashita, eero namatawitzimi. Eerokataki ñaanakowenantsiri, pikanteetatyeeyaani". ²² Rootaki ayoteeyantakarini ranaakotantaki Jesoshi iñaanakowenantaperotaki, imateeyakaeni rowawi-jaakoeyakaeni. ²³ Ari ikaateeyawitani osheki ñaanakowenantawitachari, omaanta kamapiinteeeyakini, rookapiinteeeyakironi iñaanakowenantawitani. ²⁴ Omaanta riraga Jesokirishito, ikantani ijeeki: rootaki imatantawori iñaanakowenantzi, ikantani. ²⁵ Imateeyakirini aapatziyeyeyaririni: rowawi-jaakoperoyakirini maawaeni kowaperotsirsii raaneeri Tajorentsiki. Ikan-tani rañi, rootaki imatantawori ikamantakowenteeyakaeni.

²⁶ Kyaaryo, okameethaperotzi iñaanakowentaperowente; tema Tajorentsii rini, tee afiilo rantani, tee rantziro kaari kameethatatsi; tee ikimiteeyarini riraga kaari kameethateeyatsini ijeekimoeyawitapaentarinii. Iroñaaka ijeeki kameetha janta jenokinta. ²⁷ Riraga iwinkatharitepaeni ñaanakowenantsiri, maawaeni kitejiri rowamaapiintziniri Tajorentsii ipirapaeni, itaapiintziniri. Ro rowamaapiintanariri, osheki ikenkithashiryakiro kaari kameethatatsi ranteeeyirini eejatzi ranteeeyirini rirori ijoriiyotzinkarite. Tekatsi rowamaapiinti riraga Jesokirishito, omaanta apatziro ikamawenteeyakaeni: monkaataka, eero rapiiteero eejatzi. ²⁸ Ari paerani rojankinatzini Moeseshi, ikantzi: "Iiteeyanakyaani

isheninkani Aawooni ñaanakowenantatsiri". Atziri rineeyini rirori, ranteeeyironi kaari kameethatatsi. Omaanta roojatzti ikantzii Tajorentsii: "Kyaaryo iroka nokamantemiri, tema naaka Tajorentsii: ikanteetatyeeyaani Jesokirishito iñaanakowenantanaki". Rirotaki Jesokirishito Itomi rirori, tee rantziro kaari kameethatatsi, omaanta ikantatyaaani ikameethaperotaki.

8

Iñaanakowenantaperotanaki Jesokirishito janta jenokinta

¹ Piyotawakiro iroka nokamantemiri: rirotaki Jesokirishito ñaanakowenteeyakaerini. Ijeekimotziri Tajorentsii janta jenokinta, janta rakoperoki; ikaatziri ipinkathariteeyini. ² Riraga isheninkani Aawooni ikenkithatakoapiintziri Tajorentsii janta pankotsiki riwetsikiri atziri, iitakiro Tajorentsipanko. Omaanta riraga Jesokirishito ijeekaperotzi janta Tajorentsiki: tee riro wetsikeroni atziri, omaanta Awinkatharite wetsikakirori ipango janta. ³ Riraga iwinkatharite ñaanakowenantsiri ipapiintziri Tajorentsii oetarakapaaeni; rowamaakirini piratsi, shemi; itaakiniri. Omaanta Jesokirishito, tee rowamaeniri piratsi; rirojatzti kowaentsi rowamagaetantakariri. Roojatzti riyaatashitakiri Tajorentsii, ikantapaakiri: "Naaka kamawenteyakiririni asheninka, owawijaakoeyakiririni". ⁴ Ijeekemi iroñaaka jaka kipatsikika, eeromi iñaanakowenantzimi; ñaakiro, tee isheninkatari Aawooni: riroteeyakini isheninkani Aawooni thotyaakirori rojankinatziniri Moeseeshi. ⁵ Rantawaetapiintzi janta ikanteetzirinta: "Ipankomawo Tajorentsii", omaanta tee janta ijeekaperote Tajorentsii. Apatziro oshiyakawentziro inampipero janta jenokinta. Paerani, riwetsikantawori Moeseeshi, ikantziri Tajorentsii: "Janta tonkaariki iitachari Shinayii niyotaaperotakimiro tsika pikanterori pankotsi: pimonkaataperotero nokantakimiri". ⁶ Okameethatawitaka rowaga rojankinatziniri paerani Moeseeshi, iñaanatakowenantaperoeyakaririni Aawooni eejatzi isheninkani, eejatzi ramitakoeyawitakarini ajoriiyotzinkarite. Omaanta iroka owakirari inimotaakiri iroñaaka Tajorentsii okameethaperotaki, osheki anaakotakiro rojankinatziniri Moeseeshi. Eejatzi ikimitaka, osheki imataperotakaeniro Jesokirishito, osheki ranaakotakiri Aawooni.

⁷ Okameethaperotakimi rojankinatziniri paerani Moeseeshi, eeromi ikantzirimpi paashini Tajorentsii. ⁸ Omaanta ikantzini Tajorentsii paerani: "Tekira omonkaata, tee okameethaperotzi iroka rojankinatziniri Moeseeshi Aawooni". Rootaki rojankinataktakariri paashinipaeni aapatziyaririni paerani: "Ikantzi Awinkatharite: 'Inja ojeeki paashini nokamanteyeririni maawaeni joriyyopaeni, inashitanakya. ⁹ Eero okimitaawo rowaga nokantakiriri riraga itakaantakaworini. Paeran ijeekawitani maawaeni joriyyopaeni Ejiipitoki, omaanta nagaeyanakirini paashiniki kipatsi. Rojankinatawitakawo Moeseeshi nokowagaeyawitakarini, omaanta tee raapatziyeyananani. Rootaki kaari namitakoeyantaarini. ¹⁰ Iroñaaka eenitatisi nokamanteyeririni maawaeni joriyyopaeni. Inja niyotakaaperoeyakirini maawaeni nokanteyeririni, ikenkithashireperoeyeroni, eero ipeyakoeyawoni. Ipinkathataperoeyakinani, eejatzi notajonkakowenteeyerini naari. ¹¹ Eero ratsipetashiteyawoni riyotaawakagaeyeyaani, eero ikantawakagaeyani: "Nosheninka, piyoteri Nowinkatharite". Aritaki riyotashiteeyenani maawaeni: pinkatharitatsiri, kaari pinkatharitatsi, maawaeni ryoteeyenani. ¹² Noneshironkaaperoeyerini maawaeni antzirori kaari kameethatatsi ari nopeyakoteeniri, eero nokenkithashiryakotero eejatzi

rantayitzirini' ". Rootaki ikantzitakari paerani Tajorentsi. ¹³ Ņaakiro, ikantzini: "Eenitatsi paashini nokamanteeyeririni atziri, eero okimitaawo nokantzirini paerani". Ari iroka ikantziri iroňaaka, rootaki poyaataawori ikantzirini paerani.

9

Ikenkithatakotziro ipankomawo Tajorentsi rantawaetantari ūaanakowenantatsiripaeni

¹ Paerani ikantteeyirini Tajorentsi itakaantaworini tsika ikantteeyani ipinkathatanteeyaaririni, eejatzti ikantziri tsika okantaari ipankomawo Tajorentsi rantawaetantyaari ūaanakowenantatsiripaeni. ² Ari riwetsikaeyakironi ipankomawo, imonkaatakironi ikantziririni Tajorentsi. Janta rityaawo Tajorentsinki rantawaetapiintzinta ūaanakowenantatsiripaeni. Iiteetziro Tajorentsinki Kameethari. Eenitatsi janta rowantariri ootamentotsi, eejatzti eenitatsi meeja. Janta meejaki rowapiintziro paa, okaataki 12, akenkithashireeyantaworini ipapiinteeyakaeni Tajorentsi owaeyarini. ³ Jantakironta otzikaawo ari ojeeki Tajorentsinki inampiperotari. Tektsi kyaapiintatsini. Iiteetziro Tajorentsinki Kameethaperotatsiri. ⁴ Ontsiryaatakawo otzikaawo rowaga itaapiintawori kajankapaneri, riwetsikaetziri ooro. Eenitatsi jaga Tajorentsinki rowaga kimitawori tsiwoonaki, ro ipashikantawori ooro. Jaga inthomaenta, eenitatsi kowitzi riwetsikaetziri ooro, inthomaenta iroka roteteetziro manaa. Eejatzti eenitatsi inthomaenta ikotzi Aawooni, rowaga shookashitachari paerani oshi. Eejatzti eenitatsi inthomaenta rowaga mapi rojankinatakaeririni Tajorentsi Moeseeshi. ⁵ Janta otatawoki kimitawori tsiwoonaki roshiyakaawentakiri apite jewatatsiri ronampiripaeni Tajorentsi iiteetziri keroowe. Roshiyakaantaka eeniro ijekkaki Tajorentsi. Ramineeyakironi otatawo kimitawori tsiwoonaki janta rowapiintziro maawaeni ojarentsi iwinkatharite ūaanakowenantatsiri riraa piratsi. Okimitaka ikenkithashireeyirini kamawenteeyeerini, neshironkaeyeerini. Eero iroňaaka nothotyaaperotziro nokamantemiro tsika okantayitarini.

⁶ Ari riwetsikaeyakironi paerani, imonkaatakiro ikantziriri Tajorentsi Moeseeshi. Roojatzti ikyaaapiinteeyini ūaanakowenantatsiripaeni, rantawaetapiinteeeyinirini Tajorentsi. ⁷ Omaanta tee riyaatapiinteeeyini otzikaawoki jantakironta. Apaani ryaatzi maawaeni ojarentsi riraga iwinkatharite ūaanakowenantatsiri. Reewataki rowamaeniri Tajorentsi piratsi, roojatzikya ikyaanaki apaniroeni, raaneero riraa, ipitenkakiro janta otatawoki kimitawori tsiwoonaki; ikantziri Tajorentsi: "Pawa, pikaminthagaeyenani, eero pikijawenteeyanawoni nantteeyakirini eejatzti ranteeyakirini nosheninkapaeni; eero pikenkithashiryakoeyaanawoni eejatzti". ⁸ Ņaakiro, eenitatsi otzikaawo, otzikagaeyakiririni paashinipaeni ūaanakowenantatsiri eejatzti maawaeni joriiyopaeni. Tektsi ikantteeyani riyaateeyeni janta ijekkantaperotariki Tajorentsi. Rootaki oshiyakaawenanteeyakaerini Ishire irira, ayoteeyantakarini riraga isheninkari Rewii eejatzti paashinipaeni tektsi ikantteeyeeni rareetakagaeyeenani janta Tajorentsikinta.

⁹ Okameethatzi akenkithashireeyeroni iroňaaka ayoteeyantyaarini: maawaeni ipapiinteeyakirini Tajorentsi, eejatzti maawaeni rowapiintziniri eejatzti itaapiintziniri, tee owameethateeyirini riraga papiintawitariri eejatzti taapiintawitanariri. Apatziro roshiyakaawentziro. ¹⁰ Paerani ryotaashiteeyakarini oetarika rantashiteeyarini; oetarika rowagaeyerini, eejatzti oetarika imiriteeyirini; ryotaashiteeyakarini tsika ikantyaari ikiwapiintya, ikitetantyaari. Rootaki ikowakagaeyawitakaririni Tajorentsi atziri paerani. Omaanta ari okaatzini, monkaataka. Ipokapaaki iroňaaka

Jesokirishito aamagaeyarini. Iroñaaka inashita ikowakagaeyakaerini Tajorentsi aari, owakirari, kameethaperotatsiri.

Riraa Jesokirishito

¹¹ Ipokapaaki Jesokirishito roshiyawitapaari iwinkatharite ñaanakowenantatsiri, omaanta okameethaperotaki iroka rantapaakiri rirori. Rantawaetzini paashinipaeni ñaanakowenantatsiri janta pankotsiki riwetsikiri atziri; omaanta rirori, ryaataperotaki janta ipankoperoki Tajorentsi: kameethaperotaki roori jantajenokinta. ¹² Jaka kipatsiki rriraga iwinkatharite ñaanakowenantatsiri ryaatapiintzi maawaeni ojarentsi, raapiintziro riraa chiiwo eejatzi waakaaniki janta ipankomawoki Tajorentsi inthomaenta, rowaga ikanteetawitari inampitaperotari Tajorentsi. Omaanta Jesokirishito ikamawenteeyakaeni, roojatzi ryaatee jantajenokinta ijeekaperotzinta Tajorentsi. Roshiyakaawentakiro raaneero riraa: kaari riraa piratsi, omaanta riraapero rirori. Ikantziri Tajorentsi: “Ñakiro, nokamawenteeyakirini maawaeni atziri nowawijaakotantaariri, ikanteetatyeyaaani ijeekanteeyarini jaka anampikika”. Eero ratsipetashitawo rirori ipiyapiinte, apaani ikanta, ari okaatzi. ¹³ Ari paerani aririka rantzironi asheninka kaari kameethatatsi, rowamaakiri ñaanakowenantatsiri waaka, rirorika chiiwo, rirorika waakaaniki janta ipankomawoki Tajorentsi. Roojatzi rriraga ñaanakowenantsiri raakiro riraa, itsikirijantawakari rriraga antzirori kaari kameethatatsi. Eejatzi itaakiri iwatha, roojatzi itsikirijantawakari shirampari itsimenkitote piratsi. Roojatzi ikanteeyirini isheninka: “Ikameethatee eejatzi irika. Okameethatzi ikaateeyeerini eejatzi aapatziyariri Tajorentsi”. ¹⁴ Omaantakya rriraga Jesokirishito ikameethaperotaki rirori, okantani ojeeki Ishire amitakotziriri. Rootaki ikanantariri Tajorentsi: “Pawa, nokowaperotaki nokamawenteeyakerini atziripaeni, nowawijaakoeyantyaaririni”. Ari apaatawenteeyakaeni riraapero rirori, tee ro riraa piratsi: ikamawenteeyakaeni, iroñaaka eero atsipetaawo akenkithashiriiro kaari kameethatatsi, rowaga jatakagaenimi paamariki kaari tsiwakanitatsini, omaanta anteniri Tajorentsi maawaeni ikowakagaeyakaerini. Roojatzi akanteetatyeyaaani ajeekimoeyerini jantajenokinta.

¹⁵ Ari paerani apatziro ayoteeyakironi rojankinarini Moeseeshi, eejatzi antapiinteeyakironi kaari kameethatatsi, aateeyantyaarinimi paamariki kaari tsiwakanitatsini; omaanta ikamawenteeyakaeni Jesokirishito, rowawijaakoeyantakaerini. Tema irira rirotaki ñaanatakowentakaeri owakirari inimotawakaantsi Tajorentsi. Iroñaaka inashita ikanteeyakaerini rirori: “Okameethatzi maawaeni nokashiyakagaeyakiririni aapatziyeeyanarini niyoyagaeyakirini. Ikanteetatyeyaaani riweshtiryaaawenteeyaaawoni”.

Riyotagaeyakaeni iitaka ikamawenteeyantakaerini Jesoshi

¹⁶⁻¹⁷ Ari pikenkithashireero rameteeyakarini asheninkapaeni. Eenitatsirika rowaagawopaeni, rojankinatz paperiki: “Aririka nokame nokowaki rashitayiteeyawoni nosheninkapaeni”. Ari rojankinatakiro iwaeropaeni ashitayiteeyawoni rowaagawopaeni. Roojatzi, aririka ikamaki, ryoteyyanakini irira ninkarika ashiteeyawoni. Eerotzitarika ikami rriraga jankinatzirori, eerotzita ragaeyironi owaagawontsi. Omaanta ikamakirika, monkaataka: roojatzikya ragaeyeroni. ¹⁸ Eejatzi okimitakani paerani: eenitatsi ikantziririni Tajorentsi asheninkani paerani. Tekatsi ikantya Tajorentsi ikame, omaanta ikamapiinteeyakini tsimeri omonkaatantakari ikantziririni. ¹⁹ Paerani ikamantziri Moeseeshi irira maawaeni ikaminagaeyakiririni ajoriyyotzinkariteni,

roojatzi rojankinatantawori. Roojatzi ikamanteeyirini isheninka ikantziriri Tajorentsi; eejatzi rowamagaeyakirini waakaaniki eejatzi chiiwo, raawakiro riraa, itsipataawakiro iñaa. Roojatzi raakiro iwitz iowisha kityonkawitziri eejatzi piyonkashinkanari, rowiinkakiro iñaaki, ijeetantariri isheninkapaeni. Eejatzi itsikirijakiro roori iroka rojankinatakaakiriri Tajorentsi. ²⁰ Aririka itsikirijeeyakirini, ikanteeyirini isheninka: "Ari nokamanteeyakimironi maawaeni owakirari ikamantakinari Tajorentsi. Ikantzi: 'Aririka pikemijantaperoteeyenani, notajonkakowenteeyemini'. Eejatzi eerori pikanteeyini: 'Kameetha'. Rootaki notsikirijanantakimirori iroñaaka riraa". ²¹ Roojatzi itsikirijakiro eejatzi ipankomawo ipinkathateeyantaririni, eejatzi itsikirijeeyakironi maawaeni jeekayitatsirini inthomaenta. ²² Ari rojankinatzini Moeseshi: "Rootaki riraa piratis owameethateeyirorini oetarikapaeni; eejatzi eerorika ijeeki kamawenteririni atziri, apaatawenziriri riraa, eero rawijakotee".

Ikenkithatakotziro ittaka ikamawenantaakaeri Jesokirishito

²³ Ari eenitatsi oshiyakaawentziri iroka pankotsi eejatzi maawaeni jeekaeyatsirini inthomaenta. Okameethatzi itsikirijeeyakironi rowameethatantakawori. Omaanta ojeeki jenokinta iroka roshiyakaawenteeyakirini, ijeeki eejatzi anaakotzirori riraa piratsi, owameethaperotzirori maawaeni jeekaeyatsirini jenokinta: ²⁴ rirotaki Jesokirishito. Riraga ñaanakowenantsatsiripaeni ryaatapiintzi janta ipankomawoki riwetsikaeyirini atziri, roshiyakaawenteetziro: "Inampitari Tajorentsi". Omaanta riraga Jesokirishito jataperotee jenokinta ijeekimotapaeri Tajorentsi, ikantakowenteeyakaeni. ²⁵ Riraga iwinkatharite ñaanakowenantsiri ryaatapiintzi janta ipankomawoki Tajorentsi, raapiintziro maawaeni ojarentsi riraa piratsi: tee rayiro riraa rashii rirori. Omaanta riraga Jesokirishito eero rapiiteero ikamawentee. ²⁶ Aririkami raapiinteromi riraa Tajorentski, okameethatemti ikamapiintemi, paerani: riwetsikantawori kipatsi, rityawomi ikamapiintemi, roojatzi iroñaakami. Omaanta monkaataka paerani ikamantakari: apaani ikamaki, rowawijaakoeyakaeni. ²⁷ Ayoteeyakini apaani akamaeyakini, ari okaatzi; tee apiitapiintziro akame. Aririka akamae, roojatzi ikantakowenanteeyakaeni Tajorentsi, akameethatakirkira. ²⁸ Ari osheki aneeyawitani, omaanta apaani ikamawenteeyakaeni Jesokirishito; imonkaatakiro, eero ikamae eejatzi. Ari ipokae eejatzi iñija ipiyoteeyapaakaeni, raantaneeri jenokinta maawaeni aamagaeyaririni.

10

Tektsi okanteeyeeni rojankinarinji Moeseshi owameethateeyeeni

¹ Pamine, maawaeni rojankinatakotakirini paerani Moeseshi oshiyakaawentakiri riraga pokapaentsirini, kameethaperotatsiri. Rareetapaenta, osheki itajonkawenteeyakaeni. Ikantziri Moeseshi Aawooni: "Powamaapiinteniri Tajorentsi piratis maawaeni ojarentsi". Ari ikantani isheninkani rowamaapiinteeyawitarini, omaanta tektsi okanteri owawijaakoeyerini riraga aapatziyaworini rojankinatzirini Moeseshi. ² Arimi owawijaakoeyerinimi irika rowapiintziri, tema ari ipakaakiromi rowamaapiintziniri. Eejatzi arimi rowawijaakoteeyaaami rirojatzi, eero ikenkithashireeyeronimi eejatzi rantayitzirini. ³ Omaanta rowamaapiinteeyawitarini ipira maawaeni ojarentsi, roojatzi ikanta okenkithashiryakaapiintari rantayitzirini. ⁴ Tektsi okanteri riraa waaka eejatzi chiiwo owameethateeyerini antzirori kaari kameethatasi. ⁵ Ipokantakari kipatsiki paerani Jesokirishito, tema ikantziri Tajorentsi:

“Pawa, tee piñaaperotziro riraa piratsi, tee owameethateeyirini anteeyirorini kaari kameethatatsi. Rootaki piwetsikantanawori nowatha nokamawenteeyantyaaririni maawaeni atziri, nowameethateeyantyaaririni. ⁶ Tee piñaaperotziri ikameethatzi maawaeni itaapiinteeyawitzimiri atziri, eejatzti maawaeni rowamaapiinteeyawitzimiri ⁷ powameethateeyantyaaririnimi.

⁷ Rootaki nokanantzimiri: ‘Pamine, Pawa, nopolaki jaka nanantemirori maawaeni pikowakaakinari. Nomonkaatero maawaeni rojankinatakotziteetakinarini paerani’.

⁸ Pikenkithashiryaaperotero iroka ikantzirini Jesoshi: “Tee pikoyi, Pawa, rowamaemiri atziri piratsi, itaapiinteeyemirini. Tee piñaaperotawentari riraga pawitzimiriri maawaeni rojankinatakotzirini Moeseeshi”. ⁹ Roojatzi ikantziri: “Pamine, Pawa, pokakina nanantemirori maawaeni pikowakaakinari”. Ikanantawori iroka, ikantzi: “Eeniwitacha maawaeni rantayitawitarini isheninkani Rewii. Eenitatsi owakirataatsini”. ¹⁰ Apaani ikamawenteeyakaeni Jesokirishito, eero rapiitaa ikamae eejatzti, imonkaatakiro. Rowameethaperoeyakaeni, eejatzti maawaeni riraga aapatziyeyaririni, ikimitakagaeyakaeni tee antziro kaari kameethatatsi.

Tee rowawijaakotantzi piratsi inta Jesoshi owawijaakotantatsiri

¹¹ Maawaeni kitejiri rantawaetapiintaki maawaeni ñiaanakowenantsirsipaeni, rowamaapiintziniri Tajorentsí piratsi, itaapiintziniri, omaanta tee owameethateeyirini maawaeni antzirori kaari kameethatatsi. ¹² Omaanta apaani ikamawenteeyakaeni Jesokirishito, rowameethateeyantakaerini, monkaataka. Roojatzi ijeekapae janta rakoperoki Iriri, ¹³ royaakiri imatantyaawori ikantakiririni: “Inja nothonkaeyerini maawaeni kijeyakimirini”. ¹⁴ Apaani ikamawenteeyakaeni maawaeni: tema riyoyagaeyakaeni Tajorentsí, rowameethaperoeyakaeni. ¹⁵ Eejatzti iyotaaperoeyakaeni Ishire Tajorentsí imonkaatakiro Jesokirishito maawaeni ikowakagaeyakiririni Iriri rowawijaakotantakaeri. Tema rowaga Ishire ojankinatakayiriri paejatzitiensi okaatzi ikantakiriri Pawa Tajorentsí.

¹⁶ “Tema ritakari ikantzi: ‘Tema Naaka Iwinkatharite joriiyopaeni, rootaki inimotaakina pimonkaateninami nojankinatakakiririni Moeseeshi pwajakotantanaka. Omaanta tee pimateeyironi nokantakiriri Moeseeshi. Roojatzi inimotaantanari owakirari. Tema iinja nokenkithashiryaakagaeyeemironi maawaeni nokowakagaeyakimirini pajankaneki, nothotyaakagaeyemironi, piyoperoeyantyaaworini maawaeni’”. ¹⁷ Roojatzi eejatzti ojankinatakakiri: “Ikantzi Tajorentsí: ‘Eero nokenkithashiryaakotziteeri eejatzti kaari kameethatayitatsini ranteeyakirini’”.

¹⁸ Pamine, aririka ikaminthagaeyirini Tajorentsí antzirori kaari kameethatatsi, eejatzti teerika ikenkithashiryaakoteeri eejatzti rantakiri, eero ikowae eejatzti kamawenterini rowameethatantyaariri. Ñaakiro, ñiaaperoeyakaeni iroñaaka akameethatzi.

Ikamanteeyakaeni itaka ikowakagaeyakaerini aari

¹⁹ Noyemijantzinkarite, ikamawenteeyakaeni Jesokirishito, rapaatawenteeyakaeroni riraa rowawijaakotantakaeri. Iroñaaka ayoteeyakini ñiaaperoeyakaeni Tajorentsí akameethatzi rootaki kaari athaawanantari, inta akenkithatakapinteeeyerini Pawa. ²⁰ Paerani eenironi ojeekini ipankomawoki otzikaawo, rowaga kaari riyaatapiinteeyangtani atziri janta Tajorentsínakiki: tema otzikagaeeyakirini. Omaanta ikamawenteeyakaeni

Jesokirishito, kaari otzimantaa iroñaaka otzikagaenii. Añaanee eejatzi, rootaki okameethatantari iroñaaka akenkithatakapoointeri Tajorentsi. ²¹ Iñaanakowenantaperotakae riraga Jesoshi, ipinkathariwentaperoyakaenii aari, eejatzi maawaenii paashinipaeni aapatziyeyayaririni rirori. ²² Rapaatawenteeyakaeroni riraa, eejatzi akaawoshitawenteeyakarini. Rootaki iroñaaka kaari athaawanantari Tajorentsi, ayoteeyakini eero roepiyee, omaanta raakameethaperoeyeenii. ²³ Thame eekiro aatatyeeyaa aapatziyawo rowaga kyaaryooperotatsiri. Tema ayoteeyakini imatakaeniro maawaenii ikanteeyakaerini, eero ramatawiteeyeenii: rootaki okameethatantari akamanteeyerini paashinipaeni atziri iroka aapatziyakarika.

²⁴ Thame iroñaaka oemoshirenkaeyerini paashinipaeni: anintawakagaeyani eejatzi akaminthayerini. ²⁵ Eenitatsi ayemijantzinkarite kaari pokapiunttsi ikemijante: eero pikimiteeyarini eerori, omaanta pipiyotapiinteeyaaani pomoshirenkawakagaeyantyaarini maawaenii. Tema ayoteeyini eero ojamanteri ipokanteeyari Jesokirishito, rootaki okameethatantari aweshiryaaawenteeyaaarini eejatzi aweshiryaaaka-gaeaarini paashinipaeni.

²⁶ Pamine, aririka ayoteeyakini ikamawenteeyakaenii Jesokirishito, rootaki rowawijaakotantakaeri, okameethataki ameentyaawo, akemijantaperoyeyerini: temaa rootaki ikantziriri Tajorentsi, okyaaryooperotaki. Tee okameethatziroña atheenkiri, tee añiiri paashini owawijaakoteeni. ²⁷ Aritaki iinja ikijeeyanakirini Tajorentsi maawaenii theenkiri, rowashironkaaperoyeyerini. Tema rotyaanteeyeerini maawaenii paamariki kaari tsiwakanitatsini. ²⁸ Riraga ajiroyyotzinkariteni rowamaapiinteeyakirini kaari pinkathatzirori rojankinarini Moeseshi. Eenitatsirika apite kantatsiri, aririka ikaatzii 3: "Eeniro rantani, noñeyakirini", ari rowamagaeyakirini isheninka. Tee ineshironkatzimaetari. ²⁹ Aririka itheenkeri atziri Itomi Tajorentsi, eejatzi ikanterika: "Ratsipetashita ikamaki Jesokirishito, ratsipetashita rapaatakiro riraa, eero rowawijaakotee"; eejatzi ikantzimaterorika Ishire Tajorentsi, rowaga kaminthagaeyeyerini: "Piitzima eero rowashironkaeri Tajorentsi? Aritaki rowashironkaaperotakari kameetha: ikemawakiroota, kaari raapatziyantari. ³⁰ Tema ayoteeyini ikantzi: "Naaka aritaki nopyiakowenteeyaaari, nowashironkagaeyerini naaka". Eejatzi ikantzi: "Kyaaryo nokantakowenteeyerini maawaenii atziri ikameethatakirkira, tema naaka pinkathariwenteeyiririni". ³¹ Aririka itheenkante atziripaeni, ikijakiri Tajorentsi, riraga añaaperotatsiri: okameethatzi ithaawantaperoyeaarini kameetha, rowashironkaerikari.

Pikaaryoowentero paapatziyari Jesokirishito, eero pithaayi poyaatantyaariri

³² Pikenkithashireeyaani tsika okantari paerani, owakira pikemakotakirini Jesokirishito. Ikjajawenteeyakimironi pisheninka pikemijantzi, omaanta eekiro piyaatatzia paapatziyari rirori. ³³ Apaanipaeni ishirontawenteeyakimini, rowashironkagaeyakimini. Tema iñeeyakimini osheki atziri. Omaanta paashinipaeni pitsipateeyapaakarini piyemijantzinkaritepaeni riraga owashironkaenkari. ³⁴ Petakotapiintakiri riraga omonkyaaagarewopaeni. Eejatzi aririka ikoshitakimini powaagawo, pikimoshireeyakini, pikantzini: "Rayeroota. Iinja ojeekaperotayiteeni kameethatayitatsirini janta jenokinta, eero añaapae koshiteeni janta. Akanteetatyeyaaani ajeekaeyeni janta okameetheetyaaperotzinta". ³⁵ Eero pipeyakotziro pikimoshirewenziri, eekiro piyaatatyee

pikimoshireeyanakini. Kyaaryo, ipinatemti Tajorentsi. ³⁶ Okameethatzzi pikantyaani pikyaaryoowentero maawaeni ikowakaemiri Tajorentsi, roojatzi imatantakimirori ikantakimirori. ³⁷ Tema okantzini Iwaperite Tajorentsi: "Rooteentsi ipokae Awinkatharite, eero ojamanitzi, tema ikantzi: 'Ari nopolkae. ³⁸ Okameethatzzi ikemijantaperoeyenani rriraga nowameethatziri. Omaanta rookaerorika ikemijantzi, eero niweshiryawentaaari' ". ³⁹ Tee atspitateeyarini aari rriraga ookaeyirorini ikemijantzi: rriyateeyenri riori paamariki kaari tsiwakanitatsini. Akemijanteeyini aaka, aateeyeni jenokinta.

11

Ranteeyinirini aapatziyariri Tajorentsi paerani

¹ Paapatziyari Jesoshi piyotaperotantakari imataperotemiro maawaeni ikantakimirori. Eenitatsi osheki kaarira afneeeyini, omaanta aapatziyari Jesoshi, rootaki ayotantakariri afneeeyerini iinja maawaeni ikashiyakagaeyakaerini. ² Raapatziyari Tajorentsi rriraga paejatziiteni rootaki iñaaperotantariri Tajorentsi ikameethatzzi. ³ Aapatziyari aaka, rootaki ayoteeyantakarini iñaawaetakira Tajorentsi rootaki ojeekantakari kipatsi, jenokinta, eejatzzi maawaeni jeekantawori. Iñaawaetaki, jeekanaki: tekatsi raashitero riwetsikantawori. ⁴ Raapatziyarini Tajorentsi Aweerini, rootaki iñaaperotzitantakariri Tajorentsi okameethatzzi ipashitakariri; omaantakya rriraga Kayene, tee raapatziyari, rootaki kaari iñaaperotantawo okameethatzzi ipashiwitakiririni riori. Iñaaperotakira Tajorentsi Aweerini ikameethatzzi, rootaki iñaaperotzitantakariri ipakiriri. Ikamakini riori paerani, omaanta okameethatzzi akimiteeyaaarini: aapatziyeeyaarini iñaaperoeyanteerini Tajorentsi akameethatzzi. ⁵ Raapatziyari Tajorentsi Enoko, kaari ikamanta. Añaatsi rini, raaneeri Tajorentsi jenokinta. Tekatsi neerini eejatzzi: kyaaryo, raaperotaneeri jenokinta. Tekirani raayirini, ikantzini: "Kyaaryo, noñaaperotakiri Enoko ikameethatzzi". ⁶ Eerorika aapatziyari, eero iñaaperoeyeeni akameethatzzi. Eenitatsirika kowatsiri rareetyaari Tajorentsi, okameethatzzi raapatziyaperotaari, eejatzzi riyotaperotanaki ipinateri kowaperotatsiri riyoteri.

⁷ Eejatzzi raapatziyari Tajorentsi Noeni. Ikantzirini riori: "Inja opoke osheki inkani, inkaaretanaki maawaeni. Piwetsikero antawo pitotsi pawijakotanteyarini". Ari ikemijantaperotakira. Ojarentsitaperotawitan, omaanta rantaki pitotsi, rawijakotantaari, eejatzzi rawijakoeyantaarini maawaeni jeekimoeyiririni ipankoki. Tee raapatziyeeyarini paashini-paeni isheninka, rootaki ikantakotantakari, rowashironkaeyantakaririni Tajorentsi. Omaantakya rriraga Noeni rowameethatziri: tema raapatziyari riori. ⁸ Eejatzzi riori Awaraamani, raapatziyarini Tajorentsi. Ikantzirini riori: "Nokowaki piyatae paashiniki kipatsi, janta inteeena: aritaki pijeka-pae. Nopemiro pashitaperotaari eerori; eejatzzi noperi pitomi, piccharini, maawaeni. Thame piyatae, nokoyi noñaayemiro". Ari riyaatanaki, omaanta tee riyotzi tsikarika riyatae. ⁹ Rareetantakari, iñaapaakiri paashini atziri jeekatsiripaeni. Okimiwitaka kaari iipatsite, tee ijekaperotzi, omaanta ikinayitakini; omaanta ikantani raapatziyari Tajorentsi. Eejatzzi ikimiteeyakanitomni Ijaaka eejatzzi icharini Jakoowo: tee ijekaperotzi, tee riwetsikaeyini kameethari ipanko, ¹⁰ omaanta ikenkithashireeyironi paashini inampi, kaari riwetsiki atziri. Riyoteeyakini iinja ragaeyaneerini Tajorentsi janta inampiki, riwetsikakiri riori. ¹¹ Aapatziyari Tajorentsi Jaarani: antyashipawo ini, tee itzimi otomi. Roojatzi antyashipawoperotantanaka. Ikantakiro Tajorentsi: "Inja itzime pitomi", roojatzi aapatziyantananakari.

Okantzi: "Eero ramatawitana Tajorents". Roojatzi itzimantaka. ¹² Eejatzi antyaashipariperowitakan Awaraama, oshekitarotaki rojarentsite. Tee itzimawita apaani itomi, omaanta roojatzi iroñaka itzimakaantakawo iina otomi. Iroñaka ikaateyini isheninkapaeni oshekiper, eero amatziri ayoteeyerini tsikarika ikaateyini: ikimiteeyakarini ompokiropae, eero amatziri ayoteeyerini tsikarika ikaateyini. Eejatzi ikimiteeyakawoni opane impaneki janta othapyaaki inkaare, oshekiper.

¹³ Ari ikamaeyakini riroripaeni aapatziyariri Tajorents: ijeekaeyawitani Kanaanaki, omaanta tee iñaaperoeyironi maawaeni ikantakiririni Tajorents. Inta riyooteeyakini iñaagaero iinja. Ikanteeyini: "Tee nonampitaperotawo kipatsika, tee nojeekaperotzi jaka". ¹⁴ Rootaki ayoteeyantakarini ikowaeyakini rareeteeyaani paashiniki nampitsi inampiperotantapaeyaawori. ¹⁵ Ikowaeyeenimi ipiyeyeyaneenimi janta Ejiipitoki ipoñaakanta, ari riyaateeyeenimi. ¹⁶ Omaanta ikowaeyakini riyaateeyeni okameetheetyenta nampitsi: rowaga jeekatsiri jenokinta. Rootaki riweshiryaaawenantakariri Tajorents riori: tee ipashiwentakaematar, itomintaperoeyakarini. Eejatzi riwetsikaeyenirini ijeekaeyantyaarini.

¹⁷ Ari ewankaritapaaki Ijaaka, roojatzi iñaantakari Tajorents Awaraama, riyatantyaari kyaaryorika ikemijantaperotziri. Ikantziri: "Powamayenari pitomi papintzite, pitayenari". Ikemantakariri, ikantziri: "Ari, niyaate nowamaeri". ¹⁸ Paerani ikantzirini Tajorents Awaraaman: "Iroñaka eenitatisi pitomi papintzite, piitakiri Ijaaka. Rirotaki ashitayiteeyaaririni picharineetayiteeyaarini, maawaeni. Tektsi paashini ashityaarini". ¹⁹ Ikenithashiryaka: "Ikantana Tajorents: 'Rirotaki ashiteeyaaririni picharineetayiteeyaarini, maawaeni', tekira itzime riori. Omaanta iroñaka ikantakina: 'Powamaeri'. Niyotaki aririka nowamaeri, ari ipiriinteri". Riyaatanaki, rooteentsi rowamaerimi, omaanta ikantziri Tajorents: "Eero powamaeri, omaanta noñaantatzii. Iroñaka niyotaki pipinkathataperotakina". Ari okimitzimotawitakari Awaraama ipirilinteeniri itomi, añaanee ejatzi.

²⁰ Eejatzi rameentakari Tajorents Ijaakani, rootaki ikantakowenantariri Jakoowoni eejatzi Isawoorini. Ikantziri Tajorents: "Pitajonkakowenteri notyomi apite". Rootaki itajonkakowenantaririni osheki. ²¹ Eejatzi ikimitani Jakoowó, rameentakari Tajorents. Rooteentsi ikame, omaanta ipiriinan-tanakawo iktzí amitakoterini; roeyotashitakari Tajorents, ikantziri: "Pitajonkakowenteeyerini itomipaeni Josee". ²² Eejatzi riorini Josee, rameentakari Tajorents. Paerani ijeekini Ejiipitoki, eejatzi maawaeni isheninka, omaanta riyotaki ragaeyaneerini riraga Tajorents joriyyopaeni janta iipatsiteki. Roofaki ikanantariri isheninka: "Rooteentsi nokame. Iinja, aririka piyaateeyaneeni aepatsiteki aari, pagaeeyaneeronikya notonki, pikitatero janta".

²³ Paerani ikanteeyawitarini riraga iwinkatharite ejiiptoajazi: "Nosheninka, piñaakiri roshekiiyanakin joriyyopaeni: tee okameethatzi. Piyaateeyini powinkaeyerini maawaeni itomipaeni, owakira tzimayitalsirini". Ari riraga iriri Moeseshi rameentakari Tajorents, eejatzi riniro: ipinkathateeyirini Tajorents, rootaki ikanantari: "Eero apinkathatziri riraga iwinkatharite ejiiptoajazi. Ikameethataki atomi, eero ashinetziri rowiinkiteeri". Ari imanapithatakiri, kaari rowamaantyaari. ²⁴ Ari roojatzi oñaakiri Moeseshi rishinto pinkathari. Okenithashiryaka: "Eero nowamaeri, inta nokimitakaantyaari notyomi, ijeeki nopankoki". Roojatzi rantaritanaki. Rameentakari Tajorents, rootaki ikanantari: "Tee nokoyi nosheninkatyari ejiiptoajazi, naaka

joriyyo". ²⁵ Riyotaki raapatziyeyarini Tajorentsi joriyyopaeni, rootaki rowashironkagaeyantakaririni rirori ejipitojatzi. Ikimoshireeyawitakan irirapaeni, omaanta tee okameethatz i rantakiri, rootaki kaari ikowanta Moeseeshi isheninkateeyaarini. ²⁶ Tee ikoyiri iyorkite ejipitojatzi ijeekimowitakari, omaanta ikowaperotaki raapatziyari Jesokirishito, ikemaatsitawentakari rirori. Riyotakini iinja ipinateri Tajorentsi.

²⁷ Rameentakari Tajorentsi, riyotaki tee ikoñatzi irira, omaanta riyotaki kijokiro royiri; rootaki kaari ithawanantari pinkathari, eejatzi ishiyapitheeyakarini ejipitojatzi, ragaeyanakirini maawaeni ijoriyyotzinkarite. ²⁸ Eejatzi rameentakari Tajorentsi, riraga kantziriri: "Iroñaka tsiteniriki notyaanteri nonampiri rowamaeri itomipaeni theenkaeyanarini, riraga jewatatsiri ikoñatzi. Omaanta aririka powamaeri owisha, pitziritero pipanko riraa pikyaapiintzira, rawijantyaari riraga owamaantatsiri, eerokya rowamaeri pitomipaeni". Ari raapatziyakari Moeseeshi, eejatzi raapatziyakagaeyakarini ijoriyyotzinkarite, kaari ikamaeyantyaani itomipaeni. Ro aetantawori kitejiri: "Rawijantaririni ronampiri Tajorentsi".

²⁹ Eejatzi raapatziyeyini maawaeni joriyyopaeni. Ishiyapitheeyakarini riraga ijoraarotepaeni ejipitojatzi. Royaateeyawitanakarini irirapaeni, raaawaerimi. Enitatisi otzikaeyakiririni joriyyopaeni antaworoña inkaare, tektsi ikineeyaneeni. Riyotaki Tajorentsi raapatziyeyarini, rootaki iteenkaryaatantakawori inkaare, okipatsitañaki niyanki. Intsipaete rawijeeyanakini intatsikeronta maawaeni joriyyopaeni. Royaateeyawitapaakarini ejipitojatzi, omaanta roepiyaagaero Tajorentsi inkaare, agaeyakirini joraaropaeni.

³⁰ Eejatzi rameentakari Tajorentsi joriyyopaeni janta Jerikooki. Rotantonakantanteeyakawoni mapipaeni inkinaakitakirori pankotsipaeni, rotzikagaeyakirini joriyyopaeni. Omaanta ikantziri Tajorentsi: "Pishonkaeyanakyaawoni nampitsi. Apaani kitejiri, apaani pitapoteeyawo; paashini eejatzi, paashini eejatzi, roojatzi 7 kitejiri". Ari monkaataapaaka kitejiri 7, roojatzi opariyantanaka otantonagaakitachari. Rowamagaeyakitzirini theenkiriri Tajorentsi. ³¹ Ojeeki janta tsinani, oetachari Raawa. Paerani osheki oshinetaayitarini shiramparipaeni kaari ayi. Aapatziyari Tajorentsi roori, rootaki amitakontantariri rotyaanewopaení Joshoe raminero nampitsi. Tee okami roori janta Jerikooki, tee okimitari paashinipaeni theenkaeyantatsirini.

³² ¿litaka paashini nokenkithatakoteri? Oshekitanaki iroñaka nojank-inari, omaanta ijeeki oshekiperi paashinipaeni ameentariri Tajorentsi: Jeryoo, Waraaka, Shaansho, Jete, Iraviiri, Samoeri, eejatzi paashinipaeni kamanantayitzirorini iñaani Tajorentsi. Eero iroñaka nothonkimiro nokamantzimiro maawaeni rantayitzirini. ³³ Rameenteeyarini Tajorentsi paashinipaeni, rootaki ranaakoeyantawakaririni rowayiritepaeni. Rameenteeyarini paashinipaeni rootaki imatantawori kameetha ipinkathariwenteeyirini isheninka, eejatzi imatantakanariri Tajorentsi ikantakiriri. Rookawitakari manitzimashiki, omaanta rameentakari Tajorentsi, rootaki kaari rowantari. ³⁴ Paashini rookawiitari paamariki, omaanta tee itaga. Ithatyagaeterimi paashinipaeni, omaanta rowawijaakotagaantakiri Tajorentsi. Imantsiyatagaantaki, omaanta retsiyatifikotagaantakiri, ishinsitakaagaantakiri. Imatakaagaantakiri omanatachari. Romishiyagaantakiri omanaterinimi aapatziyariri Tajorentsi. ³⁵ Ameentariri tsinanipaeni, rootaki ipiriinantaari oemini, eejatzi otomipaenini.

Omaanta omawitya ameentariri rowashironkaagaanteetakiri paashinipaeni aapatziyariri Tajorentsi, rowatsinagaanteetakiri; ikantziri: "Aririka pookaero paapatziyari rirori, ari kameetha nopakagaemi". Omaanta ikantziri: "Eero nookiro naapatziyari. Inja kameetha ijeekakayena Tajorentsi".³⁶ Ari ishirontawentagaantakari, ipajapajaatagaantakiri, tak, tak, tak; roojotagaantakiri kareenathaki, romonkyagaantakiri,³⁷ itsitokagaantaki mapiki, pog, pog, pog. Itotakiri ithakiryakiri, thatzik. Ithatyaagaantakiri ithatyamentoki, petzik. Paashinipaeni tee ikithaata kameetha, omaanta roori ikithaatashitakari imashi owisha eejatzi imashi chiiwo; okoetyeemotakari oetarikapaeni, ikijectakiri, rowashironkaetakiri.³⁸ Ikinayitanakini teenta ijeeki atziri eejatzi tonkaariki. Imanapithayitakarini kijakiriri janta omooki impeeta. Ikameethaperoyakini, omaanta tee raakameethatziri riraga theenkantsiri.³⁹ Ari rameenteeyarini Tajorentsi rootaki ifñaaperotantakariri Tajorentsi ikameethatziri; omaanta tee iñaaperoyeroni maawaeni ikashiyakaakaririni.⁴⁰ Okameethaperotaki ikowakagaeyakaerini Tajorentsi: tee ikowakagaeyirini riraga paejatzüteni reewateeyeeni iñeeoyeroni, omaanta ikowaki amonkaatawakagaeyeyaani añeeoyeroni maawaeni.

12

Ikantziri: "Pikyaaryoowenteniri Tajorentsi ikowakaemiri, eero piperashiryawo"

¹ Ari osheki raapatziyeyakarini maawaeni irikapaeni no-kenkithatakaoeyakirini. Iroñaaka okimitaka ipiyotashiiyakaeni, raminakoeyakaeni riyoteeyantyaarini oetarika anteeeyerini aari. Noshiyakaawentemiro: tema rameteeyawoni ewankaripaeni ishiyeeyani riyotantyaara ninkarika anaakotantatsini. Aririka ishiyeeyanakini, rooka-gaantanakiro iithaariipaeni ishiyaperotantyaari. Aka oshiyakaawentacha kaari anantyaawo kaari kameethatatsi amatantyaawori anteeyeroni maawaeni ikowakagaeyeerini Tajorentsi, akyaryoowentero.² Akantyaani akenkithashireeyerini Jesoshi, riraga owawijaakoeyakaerini paerani, eejatzi rirotaki agaeyaneerini iinja jenokinta. Osheki ikemaatsitawenteeyakaeni koroshiki paerani, osheki rowashironkagaeyakirini rirori. Omaanta riyotaki ijeekakagaeyeeni kameetha janta jenokinta, rootaki ikemaatsitawenantakaeri. Iroñaaka ijeeki rirori janta rakoperoki Tajorentsi, ikaateeyakirini ipinkathariwenteeyakaeni.³ Osheki paerani ikiyeeyakirini theenkantsiri, osheki rowashironkagaeyakirini. Iroñaaka okameethatzti pikenkithashiryaperooyerini, eejatzi eero powashireta, eero pijamashiryawo.

Rowashironkaakiri Tajorentsi aapatziyariri Jesoshi antzirori kaari kameethatatsi

⁴ Aririka ikanteeyawiteeni antzirori kaari kameethateeyatsirini: "Thame ashinkitya. Thame antero oetarika akowakiri". Kyaaryo niyotakimi pikanterika: "Eero nantziro. Eejatzi eeroka, pookaero pantayitzirini". Omaanta tekira ikijantaperoetzimiro. Tekira rowamaanteetzimiro, tekira rowashironkaawentzimiro roojatzi pikamantakya.⁵ ¿Pipeyakotakiroma itomintakimi Tajorentsi? Pikenkithashiryagaero eejatzi iroka kaminaakiriri paejatzüteni: "Notyomi, aririka nowashironkagaemi, eero pikijana, tema naaka Piwinkatharite. Eejatzi aririka nowashironkayemi, eero pikantashiryashaashita.⁶ Aririka rantero nonintanewo kaari kameethatatsi, ari nowashironkaakiriri. Nokowaki niyotakaantyaariri tee okameethatzti

rapiitapiintero. Aririka nowashironkayemi piyotantyaari notomintaperotakim".

⁷ Aririka rowashironkaeyemini Tajorentsi, eero pikantashiryaashita. Inintashireteeyakimini, itominteeeyakimini, rootaki rowashironkaantakimiri. Tema ameteeyawoni aari owashironkaapiinteeeyirini atomipaeni.

⁸ Maawaeni shirampari rowashironkagaeyakirini itomipaeni. Eerorka rowashironkaemi Tajorentsi, tee eero ka itomi, rishintoe: tee pisheninkatari.

⁹ Rowashironkagaeyakaeni ashiteeeyerini, omaanta tema apinkathateeyakirini. Tema eejatzi okameethatzia apinkathateeyerini Tajorentsi ashiteeeyerini, akanteetatyeyaaani ajeekantyaari janta jenokinta.

¹⁰ Riraga ashiteeeyerini rowashironkagaeyakaeni eejatzi riyotagaeyakaeni ayoteeyantakarini ajeekaeyini kameetha jaka kipatsiki: eero ojamanitzi, ari akamaki. Omaanta tee riyoteeyini maawaeni, raamaashitawitaniriori; ikijashitee. Omaantakya riraga Tajorentsi, tee raamaashitawitaniriori, riyoperoyakaeni kameetha: kameetha rowashironkagaeyakaeni, kameetha riyotaaperoeyakaeni. Rootaki atsipatantereyaririni rirori akanteetatyeyaaani akameethaperoeyapaeni. ¹¹ Aririka rowashironkagae, tema owashirewitanaka, tee akimoshiryaawitanaa. Omaanta roojatzi akenkithashirya, ayotaki riyotagaeyakaeni akimoshireeyanakini eejatzi akameethatanaki.

Piwershiryaaawenteeyaarini Tajorentsi

¹² Pikititeeyawitakan pimakoteeyatiini. Pipiriintanee, pishintsitanee: piwershireeyanakaani. ¹³ Pikyaaryooowentero ikowakaemiri Tajorentsi. Piwershryaakagaeyaarini piyemijantzinkarite owashireeyawitacharini ikemijantaperoeyantyaarini rirori. ¹⁴ Pikowaperoeyeni paakameethateeyerini maawaeni paashinipaeni atziri, eero pikijiri. Eejatzi pikowaperotaki pijeeki kameetha: eerorka pijeeki kameetha, eero pimatziro pikemijantakagaeyerini paashinipaeni, eero riyoteeyirini Awinkatharite. ¹⁵ Pamitakotawakagaeyaani, piyotaawakagaeyaani, riyoteeyantyaarini maawaeni asheninkapaeni ineshironkaeyakirini Tajorentsi. Kyaaryoowa pikijashireeyirinikari pisheninka, tee okameethatzia. Aririka pikijawakagaeyaani, eero pijeekaeyini kameetha, eejatzi pookaeyeeronikari paapatziyari. ¹⁶⁻¹⁷ Piyoteeyakini iitaka rantakirini Isawoori. Rirotaki itomi Ijaaka; Isawoori rirotaki jewatatsiri ikoñatzi; riraga Jakoovo, impaetatsiri. Ari rameteeyawoni ashiteeyaririni ikantakowentaperotziri jewatatsiri ikoñatzi itomi, itajonkakowenantaariri Tajorentsi. Eejatzi ikantziri: "Eeroka poyaateenani, ashitayiteeyawoni tzimimotayitanarini". Eejatzi ikimiterimi rirori Ijaaka, ikaminthaaperoterimi Isawoori. Omaanta paashini kitejiri osheki ikemakiro riraga Isawoori itashe, roojatzi iñaakiri rirentzi eenitatsi osheki rowari. Ikantziri: "Yeeyi, pipena noyaari: aaperotakina notashe". Ikantziri: "Aririka ikantakowentakina naaka Pawa, eejatzi ikantena nopyaateeyari, ari nopalimiro poyaari". Ikantziri: "Ari, eero karitya. ¿litaka nokowantyaari naaka ikantakowentena iinja? Rooteentsi nokame". Ari ipakiri rowari.

Tema piyotzi eerokapaeni, roojatzi ikenkithashiryaawitanaa Isawoori, raawitanakanari rowanawo iriri, ikantawitapaakari: "Pawa, nokowaperotaki pikanteri Tajorentsi nopyaateemi eejatzi itajonkawentena". Rakawakiri: "Eero. Nokantakowentakiri iroñaka parentzi. Eero iroñaka napiitziro nokantakowentzimi". Tee ikoyi Isawoori itajonkakowenteri Tajorentsi paerani, tema itheenkakiri. Eero pikimitaari iroñaka eerori.

Kameetha ikaminthagaeyakaeni Tajorentsi iroñaaaka: eero akimitari paejatziiteni, riraga thaawanteeyakaririni

¹⁸ Tee piñeeyironi iñeeeyakirini paejatziiteni janta tonkaariki Shinayiiki, ithaawaeyantakarini. Ikamanantakariri Tajorentsi Moeseeshi maawaeni ikowakagaeyakiririni, iñaakiro omapokanaka ootashitaka paamari, otsteniityaanaki eejatzti, iñaakiro antawo tampyaa. ¹⁹ Ikemaeyakironi isheninka eejatzti ishuntsitzi itziwootzi eejatzti ikemaeyantakaririni Tajorentsi, ithaawanteeyakarini osheki, ikanteeyini: “Eero pifaaaneyanan eejatzti, osheki nothaawanteeyakimini. Nokamikari”. ²⁰ Ikantzi Tajorentsi: “Tee nokoyi ipoke jaka tonkaariki atziri eejatzti ipira. Ipokerika jaka ipira, pompojeri, powamaeri”. Ari ithaawaeyanakini osheki maawaeni atziri. ²¹ Eejatzti riraga Moeseeshi, ithaawaeyanakini maawaeni iñeeeyakirini; ikantzi: “Osheki nothaawanaki, rootaki nometatantanakari”. ²² Omaanta erokapaeni, tee piyaateeyini Shinayiiki, rootaki kaari pithaawaeyantani. Omaanta okimitakowo piyaateeyakini janta paashiniki tonkaari, iitachari Shiyoo, rowaga jeekatsiri janta Jerojareeki: oshiyakawori inampi Tajorentsi. Naakiro, kimitaka piyaataperotaki paashiniki Jerojaree, rowaga jenokijato: pareeteeyakarini Tajorentsi, ikaminthaperoeyakimini, rootaki kaari pithaawaeyantani. Eenitatsi janta oshekiperonampiripaeni, ipiyotawenteeyakarini, romampaawenteeyakarini, maawaeni. ²³ Janta ijéeki maawaeni aapatziyariri Jesoshi itominteeeyakarini Tajorentsi, maawaeni jeekaperotatsini janta: eeniro ojankinataka iroñaaaka iwaero, maawaeni. Rirotaki rirori, riraga kantakowenteeyakaerini aakpaeni maawaeni, antakirorika kameetha rooma teerika antziro. Eenitatsi eejatzti maawaeni riraga aapatziyeeyaririni paerani; rowameethateeyakirini Tajorentsi, kameetha ijekaeyini iroñaaaka jenokinta. ²⁴ Eejatzti okimitaka pareetaka Jesoshiki, riraga iyotagaeyeerini maawaeni ikanteeyakirini Tajorentsi. Paerani rowamaakiri Kayeeni rirentzi Aweeri, rootaki rowashironkaantakariri rirori. Rowamagaetakiri eejatzti Jesoshi, rapaatawenteeyakaeni riraa. Anaakoperotantanaki rashì Jesoshi tema rootaki ayontakari ari imatero rowawijaakotee ikaminthagaeyantakaerini Tajorentsi.

²⁵ Paapatziyeeyarinira riraga kenkithatakagaeyimirini, kyaaryoowa pipiyathatarikarira. Paerani ipiyatheeyakarini asheninkani Moeseeshi. Isheninka rinawita, omaanta tee raapatziyari, rootaki rowashironkaanteeeyakaririni Tajorentsi. Kaari atziri kowatsini ikenkithatakayemi iroñaaaka, omaanta riraga Tajorentsi. Osheki ranaaktantaki ipinkatharitzi. Eerorika paapatziyari Jesoshi tema ari rowashironkaaperoeyemini osheki. ²⁶ Paerani janta Shinayiiki ikenkithatakantakariri Tajorentsi Moeseeshi, omoyeka kipatsi. Omaanta ikantzirini rirori: “Inja noweyaantawakyaawo nomoyekero eejatzti kipatsi, omaanta eejatzti nomoyekakoteri jenokijatzi maawaeni”. ²⁷ Ikantzini: “Ari noweyaantawakyaawo nomoyekero eejatzti”. Aritaki ithonkiro maawaeni onikaeyacharini, maawaeni kaari kijotaperotatsi. Otzimagaantanaki kaari onikachani. ²⁸ Ari iinja ajeekaeyanteeyawoni janta paashiniki kipatsi, rowaga kaari thonkanitachani: janta ipinkathariwentaperoeyeeni. Rootaki okameethatantari apaasonkitaperoeyerini, akyaaryoowenteniri maawaeni ikowakaakaeri; thame apinkathataperoeyerini maawaeni. ²⁹ Tema roshiyakawo Tajorentsi paamari taantanero. Okameethatzi ithaawantaperoeyaaarinmaawaeni kaari pinkathatziriri rirori: tema ari ithonkaperoeyakirini maawaeni theenkaeyiririni.

13

Riweyaantakari ikaminaakiri

¹ Ari, pinintashiryawakaaperoeyaani: pikimitakaanteri paashinipaeni irira piyemijantzinkarite, eekiro piyaatatyee pinintashireperoteri. ² Aririka rareetemi kaari piñaapiintzi, paakameethatawakiri. Eeniro aakameethatawakiriri kaari iñaapiintzi, iitawitari isheninka riraga raakameethatziri: jaa, ronampiripaenimache Tajorentsi rineeyini. ³ Pikaminthagaeyerini maawaeni ayemijantzinkarite, riraga romonkyaa-gaetziripaeni: kimitakimi pijkeekakitzi janta omonkyaaagamentotsiki, tema ari pikowakimi ikaminthagaeyeminimi eerori. Pikaminthagaeyerini maawaeni rowashironkagaetzirini: tema pisheninkaeyakarini. ⁴ Okameethatzzi aye aena; okameethatzzi rowaga tsinani aye oemi. Okameethatzzi imatero shirampari iina; okameethatzzi oshinetayaari tsinani oemi. Omaanta rowashironkagaeyerini Tajorentsi maawaeni kaari kinatawori iina eejatzi roori tsinani kaari kinatariri oemi. Eejatzi riori ewankari aritaki rowashironkaeyakirini Tajorentsi ñaathatayitaworini tsinani kaari rayi. Eejatzi okimitya roori tsinani eero oñaathatari shirampari kaari ayi. ⁵ Eero pikoyi poshekeeri piyorikite, omaanta piweshiryawentyaawo tzimimoeyimirini. Tema ikantzi Tajorentsi: "Eero noshinetzimi pashironkaya, kijokiro nowaeyemini". ⁶ Rootaki okameethatantari akantapiinteeyeni: "Niyotaki ramitakotapiintakina Awinkatharite, eero nokenkithashiryaaapiinta. Tekatsi ikantena atziri rowashironkayena".

⁷ Pikenkithashiryaperoteri tsika ikantari riraga aapatziyakagaeyimirini: riraga iyotagaeyimirorini iñaani Tajorentsi. Pikenkithashiryaperoteri maawaeni imatakagaeyakimirini, roojatzi pikimiteeyaarini riori, paapatziyaperoeyaarini Tajorentsi. ⁸ Tee ipashinitapiintzi Jesokirishito, roojatzi ikanta: paerani, iroñaaka, roojatzi iinja.

⁹ Eero paapatziyawo Riyotaantashitayitarini atziripaeni. Tema okameethatzzi akemijantero iyotagaeyeerini Tajorentsi, riraga neshironkaeyeerini. Eenitatsi kantawenteeyeyerorini oetarika owaeyaarinimi, omaanta ratsipetashitakawo: tee owameethateeyerini rioripaeni, eejatzi eero owameethateeyeeni aari. ¹⁰ Ikamawenteeyakaeni Jesokirishito, awijakoeanyaarini; omaantakya riori riraga kantziriri ñaanakowenantsiripaeni: "Pitayeniri nopira nawijakotanteeyarini", ratsipetashiteeyakawoni, eero rawijakote. ¹¹ Riraga iwinkatharitepaeni ñaanakowenantsiri rowamaapiintziniri piratsi eejatzi raapiintziro riraa janta ipankoki Tajorentsi. Ikantziri: "Eeniro rantani nosheninka, rootaki nowamaanttariri piratsi piyotantyaari ikowaki pikaminthayeri. Eenitatsi iroka riraa". Roojatzi ragaeyanakironi iwatha piratsi janta inteeena, itaakiri. ¹² Eejatzi ikimitakaantakiri Jesoshi, ragaeyanakirini inteeena rowamaantakariri: tee ari rowamaeri nampsitsiki. Omaanta ikamaki rowameethateeyantakaerini.

¹³ Aririka ishirontawentee theenkantatsiri, aririka rowashironkagaeyeenii, omaanta okameethatzzi akantyaani aapatziyari Jesoshi. Tema ishirontawenteeyakarini riori, rowashironkagaeyakirini.

¹⁴ Kaari anampipero iroka kipatsi, omaantakya akowaeyakini anampitaperoteeyawo janta jenokinta. ¹⁵ Aririka aapatziyari Jesokirishito, okameethatzzi akamantapiinteeyerini paashinipaeni: "Osheki ikameethatagi Tajorentsi, osheki nopinkathatziri". ¹⁶ Pikantyaani pantayiteroni kameethatayitatsirini eejatzi pikaminthagaeyerini paashinipaeni: rootaki ikowakagaeyakimirini Tajorentsi.

¹⁷ Pikemijantaperooyerini riraga kenkithatakagaeyimiorini iñaani Tajorentsi, pipinkathateeyerini. Okameethatzi riyotagaeyemini rirori kameetha, pikameethashireeyanteeyarini. Linja rojampitawakira Tajorentsi: “litaka piyotaakiriri riraga kemijanteevakimirini? ¿Kameethama raapatziyakimi?” Ari ikamanteri. Tema kameetha rakeri: “Jee. Kameetha raapatziyakina”. Omaanta eerorika paapatziyari ikanteri: “Tee raapatziyana”, roojatzi rowashironkaantakimi Tajorentsi. ¹⁸ Tee niyotzi eenirorika nantani, nokenkithashiryaa tee añiilo; omaanta nokowaki pamanakotena eero otzimanta nantani. ¹⁹ Eejatzi pamanakotena intsipaete nareetztanteemiri eejatzi, añaawakaanteeyaaarini. ²⁰ Eejatzi nokanteri ramitakoeyemini eerori. Niyotaki ikemijantena Tajorentsi, tema itajonkakowenteeyakaeni: ikowaki ijeekakagaeyeenii kameetha. Paerani eejatzi ipiriintaneeri Awinkatharite Jesokirishito: riraga kantakowenteeyakaerini, aminakowenteeyakaerini. Raminakowenteeyakaeni, ikitimitakari ashitariri rowishate, raminakowiritaantziri riroripaeni. Ikamawenteeyakaeni, apaatawenteeyakaeni riraa, ayoteeyantakarini kyaaryo ikantakaeri Tajorentsi: “Nowawijaakoeyemini, nojeekekayemi jaka nonampikika, pikanteetatyeyaaani”. ²¹ Iroñaaka nokantakiri: “Powameethataperooyerini nosheninka, pimatakayeri kameethatayiatsirini ranteeeyantemirorini maawaeni pikowakagaeyakiririni: tema raapatziyeyakarini Jesokirishito”. Eejatzi nokanteeyimini eerokapaeni: “Pipinkathataperooyerini Jesokirishito, pikanteetatyeyaaani. Aritaki okantyaari”.

Ithonkapaaakiniri rojankinatziniriri

²² Noyemijantzinkarite, tee oshekitzi iroka nojankinateeyimirini: pikenkithashiryaaaperooyeroni. ²³ Piyoteeyakini romonkyaagaetakiri ayemijantzinkarite Temoteeyo omonkyaaagamentotsiki, omaanta shitowanee iroñaaka. Aririka intsipaete rareetya jaka, notsipataneeyaari jaga pinampiki, noñeeyapaemini. ²⁴ Niwethateeeyakarini maawaeni kenkithatakaantatsiri eejatzi maawaeni ayemijantzinkarite. Riwethateeeyimini maawaeni itaaryajatzi, riraga aapatziyariri Jesoshi. ²⁵ Nokowaki ineshironkaeyemini Tajorentsi, maawaeni. Aritaki okantyaari. Ari okaatzi.

JANTYAAKO ROJANKINATZINIRI IJORIYYOTZINKARITEPAENI JATAYITANEENTSIRINI

¹ Nokoyi niwethatemi eerokapaeni nojoriiyotzinkarite tsikarika pikanta pjeeki. Naaka Jantyaako, roojatzsi nokanta nokemijantaperotakiro ikowakaakinari Tajorentsi eejatzi nokemijantaperotakiro ikowakaakinari Jewaperowentakaeri, riraga Jesokirishito. Nojankinateeyemini eerokapaeni noyemijantzinkarite jatayitaneentsirini inteenaperoki paashinikipaeni kipatsi.

Opomeentsitzimotakimirika oetarika, pameentaperotyaari Tajorentsi

² Iroñaaka noyemijantzinkarite, nokamantemi: omawitya opomeentsitzimotakimi oetarikapaeni, eero pikijashitarri Tajorentsi, inta okameethatzi pikimoshireperotanaki. ³ Tema piyotaki aririka eero pathaagakotawo kaari kameethatatsi oñaantawitakimirika, ari piyotaperotanaki eekiro piyaatattye pameentanakyari rirori roojatzsi ari pikyaaryooventaperotanakiro maawaeni ikowakaakimiri, omawitya pikemaatsitawentyaawo. Roojatzsi pishintshireperotantanakya. ⁴ Eekiro piyaatattye kameetha pishintshireperoeyananakinikya pikyaaryoowenantyaanariri irira ikowakaakimiri, rootaki pikameethashireperotantanakyaari piwetsikashireperoteeyaani, pimateeyantyaaworini pantero maawaeni ikowagaayakimiri.

⁵ Tekirarika piyotaperotziro ikowakaemiri Tajorentsi, pamaneri ryoteemi. Aritaki ikemaperotakimi, tema ipapiinteeyakimini okaatzi pamanakotziriri, aritaki ipakimi kameetha yotanitaantsi, eero ithañaapithatzimiro. Rootaki pimatantyaawori okaatzi ikowakaakimiri.

⁶ Omaanta aririka pamaneri, kameetha pikenkithashiryaaoperotya, pikante: "Kyaaryooperotaki niyotaki ikemakina Tajorentsi, aritaki imatakinawo okaatzi nokowakotziriri". Eero pitheenkashiretzikya pajankanekira. Eerorika pikenkithashiryaaoperota pajankaneki kyaaryoopero ipakimi Tajorentsi, pikimiwitakawo rowaga otamakaari janta antawokinta inkaare. Aririka otampyaate tamypaa ookaagakiro otamakaari janta eejatzi opiyaaganana. Eejatzi okimita, aririka pikoyi ikemijantemai Tajorentsi pikantakiriri, omaanta pikenkithashiryaaarika: "Teerika ikemana aamashitya eerorika ipana". Kyaaryo eero ipimi, tema pitheenkatziziri.

⁷⁻⁸ Riraga kantashitachari: "Naaka nokemijantaperotakiri Tajorentsi", omaanta tee imonkaatziro ikowakaakiriri, žpiitashitama ari ikemaperotakimi Tajorentsi pikantashiwaetyaaririka, teerika pikantaperotziro irira kyaaryoopero pajankaneki? Eero ikemaperotzimaetzimi, tema tee paapatziyaperotari. Rootaki kaari iňaantzimi rirori pikameethatzi, rootaki kaari ramitakontzimi, eero ipashitzimi oetarikapaeni pikowakowitariri. Pikenkithashiryaaawaetashitakawo oetarikapaeni. Tee kameetha pikenkithashiryaaoperota paapatziyari rirori.

⁹ Okameethatzi pikimoshireperotanaki, noyemijantzinkaritepaeni, kaari ashaagantacharipaeni, rooma reentsitetakimi Tajorentsi iňaaperotakimi pikameethatzi. ¹⁰ Eejatzi eeroka, noyemijantzinkarite ashaagantzinkaripaeni, okameethatzi piweshiryaaawentaperotanakyawo riyotakimiri Jesokirishito; eero piweshiryaaawentashitawo pashaar-gawopaeni, tema pikimiwitakawo oteyaki inchashi, tee okijotzi; eechonkiini owaneenkata, intspaeet okami. ¹¹ Paminero inchashiinta.

Oteyakitanaki owaneenkaperowitaka. Aririka ijenokitapaaki oorya ijaawaperotanakirika, intsipaete ojampiteyatanaiki roojatzi opariteyatantanakya oteyaki, eero añaawaero othatanaa. Ari ikanta rirori ashaagantzinkari, eero ojamani ijeki, intsipaete ikamae, rookawentanakyaawo maawaeni tzimimowitariri.

12 Aririka ipokimotemirika kowatsiri rantakayemiro kaari kameethatatsi omaanta tee pathaagakotawakari okaatzi rantakayemirimi, inta eekiro piyaatatyye pijeki kameetha, pikyaaryooentaperotakiniririka Tajorentsi ikowakaakimiri, ari kameetha ikimoshiryaaakaakimi rirori eejatzi ijekakaantemiri iinja janta jenokinta. Ashi poyiro pikanteetapaatyeyaaani pijeekeperotapae janta. Omawitya opomeentsitzimotakae oetarikapaeni, aririka eshiwentanakiro tema iñaaperotakae Tajorentsi akameethatzi.

Eero athaagakotawo ūaantaantsi

13 Aririka pikenkithashireeyaawo pantero kaari kameethatatsi, eero pikantashita: "Ikowakaakinawo Tajorentsi". Tee ikowakaeri Tajorentsi atziri rantero kaari kameethatatsi. **14** Aririka akenkithashireero antero kaari kameethatatsi, rootaki akowantyaari antero. **15** Eekirorika aattyey akowashireero antero aritaki antakiro. Eekirorika aattyey antero kaari kameethatatsi rootaki apeyakotanteeyaaari Tajorentsi rootaki akamantari janta paamariki kaari tsiwakanitatsini. **16** Ramatawiteemikari kamaari, noyemijantzinkaritepaeni nonintashiretanewopaeni, omaanta eero pishinetaari ramatawitemi. **17** Riraga jeekatsiri jenokinta rioperori, ikaminthaaperotakae. Opoña maawaeni kameethatatsirijanta Tajorentsi. Tema irira Pawapero rirotaki wetsikiriri kashiri eejatzi ompokiropaeni eejatzi oorya kitejitakotantatsiri. Tee ipaashinitzi rirori, tee roepithokiro oetarika ikantziri, ashi royiro ifiaawaetzi ikenkithashiryaa kameetha. **18** Ipakae ifiaani rowaga kyaaryooperotatsiri. Aapatziyawori rootaki ikowantakari Tajorentsi ashenenikatyari tema rootaki reentsitetantakaeri. Tema rowawijaaktakae, iroñaa ka ashi oyiro akameethatantakari. Eejatzi eekiro riyatatyey reentsityaaari oshekiniroña paashinipaeni atziri, ashi royiro ikameethatantanakyaari.

Paapatziyaperotyaawo okantziri Iwaperite Tajorentsi

19 Noyemijantzinkaritepaeni, tema eeroka nonintashiretanewopaeni, rootaki nokanantakimiri iroka eero pipeyakotizo: eero intsipaete piñaawaetashita oetarikapaeni pikenkithashiryaaari eeroka; inta okameethatzi pikowanaki pikemaperotero Iñaani Tajorentsi. Eejatzi eero pikijita intsipaete. **20** Pikijyaarika, ¿piitashitama inimotakiri Tajorentsi? Tee inimotziri, eejatzi eero amitakotzimi pikameethashiryaantyaaari. **21** Rootaki nokanantakimiri: eero pompetawo kaari kameethatatsi pantawitakari, eero papiiteero panteero. Eejatzi eero pikenkithashiryaaanaawo kaari kameethatatsi. Pookaperotero maawaeni pikameethashiryaaantaperotaneeyari. Paapatziyawo kameetha okantziri Iwaperite Tajorentsi, rootaki omatanteemiri owawijaakoteemi. **22** Pikemajantaperotero Iwaperite Tajorentsi okantzimiri: eerokya apatziro pikemashitawo, panterorika iroka pamatawitashita apaniroeni eeroka. Tee okameethatzi pikemashityaawo, inta pantaperotero. **23-24** Ninkarika kemashitakawori Iwaperite Tajorentsi ikimiwitakari aminapoowitzchari ūaontonsikira, raminapoowitzkawo ipoo riyotantyaari tsikarika ikantaka, omaanta aririka ryaatanee tee ikenkithashiryaanero, ipeyakotanakiro tsikarika okanta ipoo. Ari ikimita riraga kemashitawakawori Iwaperite Tajorentsi, ikemawitakawo tsikarika ikantari, omaanta aririka ryaatanee tee ikenkithashiryaanero, ipeyakotanakiro, ratsipetashitakawo ikemawitakawo, rooma tee

ikemijantaperotziro. ²⁵ Rowaga Iwaperite Tajorentsi okameethaperotaki. Rootaki okameethatantari eekiro aatayee añaanatapiintero oetarika okantziri. Aririka añaanatapiintero maawaeni kitejiriki, eero apeyakotantawo okaatzi okantziri inta eekiro aatayee antero rootaki ramitakotanteeri Tajorentsi maawaeni okaatzi antziri. Itajonkawentee, rootaki akimoshiretantari. ²⁶ Eenitatsirika atziri iitakaawitachari raapatziyakari rirori ikante: "Naaka kemijantzinkaripero", omaanta eeniro ikijathatapiintziri paashinipaeni atziri, tema ramatawitashitaka apaniroeni. Tee ikyaryoowentaperotziro ikantziriri Tajorentsi, inta ratsipetashitakawo, raapatziyajeempiyaakawo. Tema ikowakaakae riraga Tajorentsi eero ashintsithatziri asheninkapaeni. ²⁷ Aapatziyaaperotakyaaririka aritaki aneshironkatakiri ookaarewo, riraga ookawentayitanakaririni rinironi eejatzirika iririni, eejatzi okamapithatantakaririni rimirio eejatzi ashitariri. Eejatzi aapatziyaperotakyaaririka aritaki aneshironkatakiro roori kamaentsirini oemi. Eejatzi eero apiyakotawo akenkithashiryagaero kaari kameethatatsi. Tema rootaki ikowakagaeyakaerini Tajorentsi.

2

Kameetha pinintaperotawakagaeyaani maawaeni

¹ Rooma iroñaka, noyemijantzinkaritepaeni, paapatziyakari Awinkatharite Jesokirishito, riraga anaakoperotakaeri maperori ikameethaperotaki. Rootaki nokanantakimiri kameetha pinintaperotawakaeya maawaeni. Tee apatziro ikowakaemiro pikaminthaapiintashityaari ashaagantachari, omaanta eejatzi ikowakaakimi pikaminthaytyaari riraga kaari ashaagantachari. Eero pimanintashiriiri paashinipaeni atziri. ² Noshiyakaawentemiro. Aririka pipiyoteeyani ipokapakirika apite atziri, apaani kithaatawori iithaari rooperori pinaperotachari eejatzi ikyantakari raniyote rakoki pinaperotachari, omaanta paashini owashironkaenkari, antyashipawopookitaki imaatha; ³⁻⁴ aririka eeroka pipashiwentakaawakyaaaririka owashironkaenkari eerorika poejeekawakiri kameetha, pimanintawakiririka pikantashitakyaaririka: "Ari pikatziyapae jaga". Teerika paakameethawakiri kameetha, omaanta pikantakotashitakari pipinkathawakiri riraga ashaagantachari kameetha poejeekantyaari jeekamentotsi kameethari, ikyaryooperotakima paapatziyaperotakari Tajorentsi? Tee. Tee okameethatzi iroka, rooma tee paakameethaperotawakiri owashironkaenkari kameetha. Pantakiro kaari kameethatatsi, rooma pimanintawakiri owashironkaenkari pajankanekira.

⁵ Pikemaperotawakina, noyemijantzinkaritepaeni. Tema riyyaaperotakiri Tajorentsi riraga kaari ashaagantachari raapatziyaperotantyaariri rirori, kameetha ijeekanteeyaaari iinja janta okameethaperotzinta. Tema rootaki ikantzitakarini: "Nojeekakagaeyerini jaka nonampiki maawaeni nintaperotanari". ⁶ Omaanta eeroripaeni pimaninteeeyakirini riraga kaari ashaagantacharipaeni, apatziro pipinkathashitakari ashaagantacharipaeni. Riroma rirowitaka irintapaeraoki kameetha. Tema eejatzi rirotaki aapiinteeeyimirini romonkyaaakaantemi omonkyaaagamentotsikinta. ⁷ ¿Kaarma irintapaeni kantzimatapiintziriri Jesokirishito? Jee, kyaaryo, omaanta tema irira ikameethaperotaki, rirotaki kaminthagaeyakimirini. Tema tee okameethatzi pimaninteeyerini paashinipaeni atziri.

⁸ Eenitatsi rojankinatakotziteetakaririni ikantakirini Jesoshi. Ikantakini: "Pikaminthaaperoteri maawaeni atziri. Pikimitaaga pikaminthaaperotaaga eerokakya, eejatzi pikimiteri riraga paashinipaeni atziri pikaminthaaperoteri". Pimonkaaperotakirorika iroka,

kameethaperotaki. ⁹ Omaanta teerika pikaminthaaperotziri maawaeni atziri inta apaanipaeni pimanintakiri, ari pantakiro kaari kameethatatsi, tee pimonkaatziro ikantakiri Tajorentsi. ¹⁰ Pimonkaatakirorikami maawaeni okantziri rojankinarin Moeseshi omaanta eenitatsirika apaani kaari pimonkaatzti, tema eejatzi pantakiro kaari kameethatatsi, kimitaka iroñaaka tee pimonkaataaneentziro eechonkiini apaani.

¹¹ Rirojatziita Tajorentsi kantatsiri: “Eero piñaaminthatziro tsinani kaari payi, eero piñaaminthatziri shirampari kaari payi”. Eejatzi ikantzi: “Eero powamaantzi”. Teerika piñaathatowo tsinani, teerika piñaathatari shirampari, omaanta powamaakiririka atziri, teekya pimonkaatziro ikantakiri Tajorentsi, eeniro pantakiro kaari kameethatatsi, tema pipiyathatakari rirori. ¹² Kyaaryo ikantakowentemini iinja Jesokirishito, pimonkaaterorika okaatzi ikowakaakimiri. Rootaki kameetha pipinkathatantyaariri Tajorentsi, apatziro pikenkithashireeyawo kameethatatsiri, eejatzi powameethapiintero maawaeni pantziri. ¹³ Teerika pineshironkapiintziri paashinipaeni atziri eero ineshironkatzimi eeroka Tajorentsi. Omaanta pineshironkaperotakiririka paashinipaeni, tekatsi pikantya pithaawantyaari Tajorentsi aririka iinja areetapaakya kitejitsatsiri ikantakowenanteeyaaaririni maawaeni atziri ninkarika kameethateentsiri.

Kyaaryooperotakirika aapatziyaperotakyaari Tajorentsi aritaki amatakiro ikowakaakaeri

¹⁴ Pamine, noyemijantzinkaritepaeni, eenitatsirika kantashiwaetachari: “Naaka aapatziyaperotariri Tajorentsi”, omaanta teerika rantziro ikantziri Tajorentsi, ¿kyaaryooperotakima raapatziyaperotakari? Tee raapatziyaperotari. ¿Aritakima rowawijaakotakiri Tajorentsi kantashiwaetachari: “Naaka aapatziyariri Jesoshi?” Eero. ¹⁵ Oshiyakaawentero aririka piyotawitakya iroñaaka okoetyeemotakari piyemijantzinkarite, tee otzimimotziri iithaari eejatzi rowanawo. ¹⁶ Eerorika pineshironkatziri, piñaawitakarira pikantashitawakyaaaririka: “Piyaatera kameetha, ari itajonkawentakimi Tajorentsi paata paanteeyari piithaari pikithaatyari eejatzi aritaki ipakimi powanawo paata poyaari”. ¿Piitakaawitakama kameetha paapatziyaperotakari Tajorentsi? Tee paapatziyaperotari. Omaanta pantakiro kaari kameethatatsi: rooma tee pineshironkatawakiri thonkatakotachari. ¹⁷ Ñakiro, riraga maawaeni kantawaetashitachari: “Nameentakari Jesokirishito”, teerika rantziro ikantziri Tajorentsi, tee kyaaryo rameentaperotari, ratsipetashitakawo ikantzi: “Nameentakari Jesokirishito”, tema tee ineshironkaperotziri owashironkaenkari.

¹⁸ Eejatzi eenitatsirika kantemini: “Paapatziyashiwaetakari Tajorentsi eerori, omaanta naari nantakiro ikowakaakinari”. Kyaaryootaki ikantzi. Eerorika pimonkaatziro ikowakaakimiri riraga Tajorentsi, ¿tsika okantyaaka poñaagayitantenarini tsikarika pikantaka paapatziyaperotantakariri Tajorentsi? Omaanta naari nomonkaatakiro ikantziri rootaki piyotantakari kyaaryo naapatziyaperotakari.

¹⁹ Pikenkithashireeyari eenitatsi apintzi Tajorentsi. Ari okameethatati, omaanta eejatzi riraga kamaariipaeni ryotzi eenitatsi apintzi Tajorentsi, rootaki ithaawantaperotakari rompetataka kamaari, tonki, tonki, tonki.

²⁰ Omaanta eerori kemijantashiwitachari, ¿tekirama piyoperotziro iroka? Riraga kaari monkaatzirori ikowakaawitariri Tajorentsi raapatziyajeempiyaashitakari ratsipetashitakawo, tema tee rantziro okaatzi ikantawitari. Teerika imonkaaperotziro ratsipetashiperotakawo raapatziyawitari. ²¹ Pikenkithashireeri Awaraamani, achariniiteperoni paeranperoroña. Ikantzi Tajorentsi: “Kameethaperotaki rirori tema

raapatziyaperotakina, imonkaataperotakiro nokowakaakirir". Rootaki ikowantawitakyaarimi rowamayerimi itomi iitachari Ijaaka. Tema ikantawitakari: "Piwetsikero aritaari janta eejatzi powamayenari pitomi Ijaaka". Ikemijantaperotakiri rirori: rooteentsimi rowamayerimi itomipero roejawenantyaaririm, omaanta roojatzi ikanantanaari riraga Tajorentsi: "Eero powamaeri. Iroñaka niyoperotakini pikemijantaperotakina, rooma pimonkaatakiro maawaeni nokantakimiri". Rootaki iñaaperotantakariri ikameethatzi, okimitaaka tee rantziro kaari kameethatatsi, tema ikemijantaperotakiri rirori. ²² Naakiro, Awaraamani tee apatziro ikemashitari Tajorentsi ikantakiriri, inta ikenkithashireperotantakawori, maperori imonkaaperotakiniri ikowakaakiriri. Rootaki ayotantakariri kyaaryo raapatziyaperotakari, tema imonkaaperotakiniri kameetha Tajorentsi. ²³ Rootaki omonkaatantakari jankinarents paerani Iwaperiteki Tajorentsi okantzi: "Awaraama raapatziyaperotakari Tajorentsi rootaki ikanantakari: 'Iroñaka rivotaki Awaraama notsipaminthatanewopero. Noñaaperotakiri ikameethatzi, rooma okimitaaka tee rantziro kaari kameethatatsi' ". ²⁴ Naakiro, apatzirorika akemashitaworika ikantziri Tajorentsi akemijantashitaririka eero iñaaperotee akameethatzi. Ari ikantakowentee eenitatsi kaari kameethatatsi antakiri. Omaanta eejatzi amonkaaperoterorika ikowakaakaeri, ari kameetha aapatziyantaperotariri, aritaki kameetha iñaaperotee akameethatzi, eejatzi ikantakowentee kimitaka teksti antakiri kaari kameethatatsi. ²⁵ Eejatzi okimitaaka paeraniperoroña roorini Raawa. Metakawo oñaaminthatiapiintawitakarini shiramparipaeni, ipinatanteeyakaworini janta Jerikooki. Omaanta okemakotakirini Tajorentsi, iroñaka okowanaki aapatziyaperotyaari, rootaki okaminthaanteeyawakaririni rotyaantanewopaeni Josphoe tee aakaantziri inta omanawakiri. Roojatzi oñaagantawakari paashini awotsi ikinantanakyari riroripaeni ishiyapithatantanakariri kijakiriri. Tema amitakoeyawakirini rootaki oñaagantakariri Tajorentsi okemijantaperotakiri kameetha iroñaka. Rootaki iñaaperotantakawori Tajorentsi okameethatzi, kimitaka tee antziro kaari kameethatatsi. ²⁶ Piyoperotaki eerorika añi tema kamaperotakae, eejatzi okimiwitaka iroka, eerorika amonkaatziro ikowakaawitakaeri Tajorentsi, tee aapatziyaperotari.

3

Eerorika pimonkaatziro oetarika piyotaantakiri paashinipaeni, ari iki-jawentawakimiro Tajorentsi

¹ Pamine, noyemijantzinkaritepaeni, tee okameethatzi osheki eerokapaeni pikowaki piyoteeri paashini atziri poshiyantenari naaka. Tema ayotaki eerorika amonkaatziro ayotaapiintakiriri paashinipaeni, eejatzi eerorika ayotagaeyirini kameetha, roojatzi omonkaatantapaakya kitejiri ikantakowenteeri Tajorentsi antakirorika kameetha rooma teerika antziro. Tema aritaki ikantakae: "Pamine, osheki piyotaapiintawitakari paashinipaeni. ¿litaka kaari pimonkaatantawo eerori piyotaawitakariri? Okameethatemi pityaawomi eerori pimonkaatero pikantakiriri". Okameethatawita pimonkaatero piyotaawitakariri.

² Maawaeni aaka antapiintziro kaari kameethatatsi. Omaanta eenitatsirika kaari ñaawaeteroni kaari kameethatatsi, tema rirotaki kameethaperotzinkari, riyoperotakiro rantapiintakiro kameethatatsiri, oetarika rantayitakirini. ³ Pamine, pikenkithashiryakotyaari antari kawayo: osheki ishintsini, omaanta amatakiri atzimpatakotziri jookathaki ipaanteki, kameetha ikemijanantyaawori inoshikakomento omawitya

okantaka owaanini ijookathate. ⁴ Eejatzi okimitaka rowaga antawo pitotsi. Antawo inawita, omaanta awayaakiro oshintsinka tampyaa otyaantakiro. Omaanta ontsiritziroriaro raawayantakawo owaanini komarontsi rontsirintakawo raanakiro tsikarika ikowakawo riyaate.

⁵ Eejatzi okimita roori aneni: owaanini okantawita; omaanta osheki antakagaeri oetarikapaeni: rootaki ayotaantyaariri atziri. Tema rootaki apaante akijantariri paashini atziri. Okimitakawo paamari aririka atayiro owantsi. Othonkaperotakiro maawaenai otaanakiro okaatzira owantsi. Omaanta okaatzini paamari itantakawori. ⁶ Iroka apaanteka okimitakawo paamari. Ötzinkamitakawo kaari kameethatatsi. Tema rirotaki riraga Jatanaashi iyotaakaerori añaawaetantawori kaari kameethatatsi. Echonkiini akantawakaaneentakya oetarikapaeni amatakiro owaariperotawakaeyakan.

⁷ Amatakiro aakapaeni ametakaari piratsipaeni: riraga tsimeripaeni, maankipaeni, shimapena, maawaenai. Eejatzi amatakiro aspiratakari rametantakaeri kameetha. ⁸ Omaanta tekatsi materoni ojantzikaeroni ipaante. Rooma kaari imateetziro rojantzikagaetziro. Rootaki kaari amatantawitawo apaniroeni añaawaetapiintero kameethatatsiri. Eejatzi okimitakawo koñaapi, aririka irakiro aritaki owamaakae. Ari okimitaka roori apaante antakaerorika kaari kameethatatsi owashironkaakae, eejatzi owashironkaantakari paashinipaeni atziri. ⁹ Añaaperotantapiintakari Pawa Tajorentsi iroka apaanteka akimoshirewentakiri, omaanta eejatzi rootaki akantzimatantapiintakari atziripaeni omawitya riwetsikakae Tajorentsi maawaenai aaka akimiwitakari rirori. ¹⁰ Apinto apaante añaawaetantawori kameethatatsiri eejatzi añaawaetantzitawori roori kaari kameethatatsi. Eejatzi rootaki akimoshirewenantakari Tajorentsi, eejatzi akijathatantariri atziripaeni. Noyemijantzinkaritepaeni, tee ari okantakotyari; okaanteekaata. ¹¹⁻¹² Noshiyakaawentemiro. ¿Arima omatakiro iyowaatee iñaa apaani omookira otsipatyawo kameethatatsiri eejatzi kachotatsiri? Eero omatziro. Eejatzi ¿arima ochochokitanaki ashetoonaa iyeerakira eejatzi ochochokitanaki iyeera oowakira? Eero. Eejatzi akimitya aaka akyaaootanakirika akameethashiretanaki, apatziro añaawaetapiintanakiro apaantekei kameethatatsiri; eero atsipatayiro añaawaetztawo kaari kameethatatsi.

Ikenkithatakotakiro iyotaantsi

¹³ Eenitatsirika apaanipaeni eerokapaeni yotzinkari, pikemaperotakirorika tsikarika pikantya pikameethate, ari kameetha pijeeki; eero pikantakaaperota eerokakya inta pinintashireperoteri kameetha paashinipaeni. Rootaki riyotantyaari paashinipaeni kyaaryo eeroka yoperotzinkari. ¹⁴ Omaanta pikijashireperotakiririka paashinipaeni, pikowashitakarika panaakoteri piyotzi, eero pikantakaaperotakya tema piyotaki tee okameethatzi pitheeya pikantanteraari: "Naaka yotzinkari". ¹⁵ Kaari Tajorentsi iyotaayimirori panantyaawori kaari kameethatatsi, rooma opoñaaka oetarikapaeni pikenkithashiryaaari pajankanekiria: aririka pikenkithashirepiintakiro oetarikapaeni kaari kameethatatsi, rootaki panantyaawori. Rirotaki iwinkatharite kamaaripaeni kenkithashiryaaakaakimirori pikenkithashiryaaantawori pantero kaari kameethatatsi. ¹⁶ Ñaakiro, aririka piñaawenatakotakari eejatzi aririka pikijashiryaaawakaya pikantzimashiryaaawakaaka, rootaki pikijantapiintawakaakari eejatzi panantapiintakawori kaari kameethatatsi rootaki eero pijeeke kameetha. ¹⁷ Omaanta rirotaki Tajorentsi ipantakimirori iyothanitaantsi, ikowakaakimi pikameethashireperotanaki, eejatzi ikowakaakimi aritapaaki pikija,

eejatzi petakoperotyaari paashinipaeni, pathaagakotaari. Oetarika ikantemiri, eejatzi ikowakaakimi ashi moyiro pineshironkapiinteri maawaeni, eejatzi kameetha pamitakoperoyerini paashinipaeni, eero pimaninteyirini apaanipaeni inta pinintaperoteeyerini maawaeni, eejatzi eero pamatawitantzi. ¹⁸ Noshiyakaawentemiro: apankiterika oetarikapaeni aritaki owiiteero apankitakiri. Eejatzi okimita iroka aririka kameetha aneshironkateri paashinipaeni atziri aritaki ajeekanaki kameetha maawaeni.

4

 litaka kaari pikowanta pikaminthaapiinante?

¹  Tsika opo aaka pikijawakaapiinteeeyantarini? Tema opo aaka inthomaeki pajankaneki pikowashiryaantaworini oetarikapaeni, rootaki pikijawakagaeyantakarini roojatzi pikowantyaariky powamaawakaeyantyaarini. ² Pikowaeyawitakawoni rashaagawopaeni paashinipaeni teera pimatziro payi pikowaeyawitakarini, rootaki pikijawakaanteeeyakarini eejatzi powamaawakaanteeeyakarini. Pikowaeyawitakawoni pikimitakotaarimi paashinipaeni tzimimotayitzirini. Omaanta tee pagaeiyironi rootaki pikijawakaantapiintakari. Rootaki kaari paantaatawo pikowawitakari, tema tee pikantaperotziri Pawa Tajorentsi ramitakotemi pi eero tzimimowitemiri pikowawitari.

³ Pikantaperowitakari, omaanta rootaki kaari pi aantawo pashitari paaperotantfawo, tee okameethatzi pikantaperowitariri. Apatziro pikowashiwitaka pikamintheeya eerokakya. ⁴ Pikimiwitakawo tsinani kaari kinatari oemii, inta osheki o aathatzimotari oemii paashinipaeni shirampari.  Tema piyotzi pikimoshirewentakirorika rantziri kaari kemijantatsi kimitaka poonakari Tajorentsi? Rootaki nokanantakimiri iitarika kowatsiri ikimoshirewentero okaatzi rantziri kaari kemijantatsi, rirotaki oonakariri Tajorentsi tee raapatziyaperotari. ⁵ Tee okantashita rojankinatakoetakiriri Tajorentsi okantaki: “Riraga Tajorentsi rotyaantakaeniro Ishire jeekantakaerika iro aaka ajankaneki, osheki oneshironkaperotakae kameetha. Okowakaaperotakae apatziro akimitakotaari rirori”. ⁶ Omaanta Tajorentsi ikaminthaaperotakae, ramitakotakae ashintishiretantanakari. Rootaki okanantakari Iwaperite Tajorentsi: “Roonari Tajorentsi riraga kantakaaperotachari, omaanta ineshironkaperotziri riraga athaagakotariri oetarika ikowakaakari”. ⁷ Rootaki pathaagakotaariri Tajorentsi maawaeni ikowakaemiri panteri, omaanta iwinkatharite kamaaripaeni pipiyathatyari oetarika ikowakaawitemiri rantakayemiri. Aririka pipiyathatyari aritaki rookaneemi. ⁸ Pikenkithashiryaapiinterikya Tajorentsi pameentyaari. Irira kijokiro rowantemiri. Pantawitakawoni kaari kameethatatsi; iro aaka pookaero maawaeni iroka eejatzi pijekanteevari kameetha. Osheki pitheenkakirini Tajorentsi; pikanteri iro aaka: “Pawa, nantakiro kaari kameethatatsi, niyotzi tee okameethatzi, tee nokoyi napitiero, pipeyakotenawo. Powameethashiretena, pikenkithashiryaakagaenawo kameethatatsiri”. ⁹ Pikenkithashiryaakoperoteeya oetarika pantakiri, powashiretakota, rooma tee okameethaperotzi maawaeni pantapiintakiri. Pishirontawenteeyakawoni kaari kameethatatsi, omaanta okameethatzi powashiretakota; pikimoshirewentshitawo kaari kameethatatsi, omaanta okameethatzi powashiretakoperotanakya. ¹⁰ Eero pikantakaaperota inta pikanteri Awinkatharite: “Pineshironkatena, tee nomatziro naari nowameethatya, inta eeroka materoni pamitakotena”. Pikantaperoteririka iroka ari ineshironkatemi i  aaperotemi pikameethatzi.

Eero pikantakowentziniri paashini atziri

¹¹ Eero pikantzimatawakagaeyani, noyemijantzinkaritepaeni. Pikantzimateririka atziri pikanterika: "Eeniro pantani", tee paapatziyawo ikantakiri Jesoshi: "Pinintaperotawakagaeyani", omaanta pikimitashitakari pinkathariwenantsatsiri pikantakowentashiteeyakarini piyemijantzinkaritepaeni. Omaanta tee ikowakayimiro Tajorentsi pantero iroka. Tema pitheenkakiro okaatzi ikantakiri Jesoshi; tee pimonkaatziro. ¹² Omaanta apaniroeni riraga Tajorentsipero rirotaki kantatsini oetarika kameethatatsiri anteri; eejatzi apañiroeni irira rirotaki kantakowenterini paashinipaeni rantzirorika kaari kameethatatsi rowashironkaantyaariri. Tekatsi paashini kantatsini. Irira apaniroeni matakitirori rowawijaakotakayeri aapatziyakariri Jesoshi, eejatzi apatziro rirori kantakotantentsiri kaari aapatziyariri Jesoshi rotyaanteri paamariki kaari tsiwakanitatsini. Rootaki *ziitaka* pikantakotantakariri eerori paashinipaeni powashironkaantakariri? Tema tee ikowakayimi eeroka pantero.

Kyaaryoowa, tee piyotzi oeta awijimotemini inkaamani

¹³ Pikemaeyawakinani, eerokapaeni kantashiteyawitacharini: "Iroñaaka erorika inkaamani aate janta nampitsikinta, ajeekakite janta apaani ojarentsi ayompariwaetakityaata, ayeeta oshekini koriki". ¹⁴ Omaanta tee okameethatzi pikantashitya iroka: tema tee piyotzimaetawo oetarika awijaneentsini inkaamani. Tema pikimiwitakawo menkoreenkaki, eechonkiini omenkoritzi omaanta tee ojamanitzi othatyeetyaanaki. Eejatzi aka maawaeni ari akimitaka, eechonkiini añaawitakya, omaanta eero ojamanitzi tsikarika okaate akamantyaari. ¹⁵ Ñaakiro, tee okameethatzi pikimitakaantashitya eeroka añaashitacha apaniroeni, tee pikenkithashiryaakokarti Tajorentsi, omaantakya kameethatatsiri pikante: "Ikowakaakaerika Tajorentsi eeniro ajeeki jäka kipatsikika, aritaki antayitakironi oetarika-paeni akowayitzirini".

¹⁶ Omaanta eekiro pikantakaaperothatasitanaka eejatzi piñaaperotashitaka eeroka apaniroeni. Iroka pantakirika tee okameethatzi. ¹⁷ Ninkarika yotawitakyaawoni kameethatatsiri ikowakaakiriri Tajorentsi omaanta tee imatzimaetawo, eeniro rantzimaetawo kaari kameethatatsi.

5

Ikantakiri ashaagantachari

¹ Iroñaaka pikemero okaatzi nokantakotakiri riraga ashaagan-tacharipaeni, riraga kaari aapatziyariri Jesoshi. Tema okameethatzi ikenkithashiryagaagaeya, eejatzi riraakotya, tema rantakiro kaari kamethatatsi. Aririka omonkaatapaakya kitejiri ikantakowenantyaariri Tajorentsi. Eerorika ipakaero rantziri, aritaki ikemaaatsitakyaawo paamari. ² Maawaeni okaatzi tzimimotziriri opathaawaetashitya, eejatzi ari ithonkiteeyeerini jankori iithaariipaeni. ³ Osheki ipinaperowitaka tzimimotayitakiririni, ikimita roorote eejatzi ipiraataate ipitsimentakitaawaetashitakari. Aririka ipitsimentakiytanakini roojatzi riyotantanakya ratsipetashitakari ikempoyaawitakari. Rootaki okantakotziri iroka: tee ramitakotanteeyayarini ashironkaenkaripaeni tzimimoeyawitaririni; rootaki riyaatanteeyayaari paamariki kaari tsi-wakanitatsini. ⁴ Pamine, ramatawiteeyakirini ratziritepaeni, tee ipinatziri rootaki ikiñaanikowenanteeyakaworini rantawaero, raantzitashiteeyakarini. Rootaki ipiyotantakawori osheki rowaagawo eejatzi iyorikite. Riraga Tajorentsi riyotakiro maawaeni iroka okaatzika rantakagaeyakiririni:

tee ineshironkateeyirini; rootaki paata rowashironkaantyaariri. Rirotaki Iwinkatharite maawaeni ronampiripaeni jenokinta.

⁵ Ikenkithashiryaaakotashitaka irira apaniroeni, tee ikenkithashiryaaakotari paashinipaeni atziri, iwashiryaawentashitawakawo rashaagawopaeni ikowakiri jaka kipatsiki. Noshiyakaawentawakimiro: eenitatsirkira atziri iwaakate ikoyiri rowamaeri intsipaete, tekirarika rowamaeri, eekiro rowakaatyaaari osheki paashito kameetha. Ikantaka iwathatapaaki. Riraga waaka kameetha rowa, tee ikenkithashiryaaakota tsika okaatzi ikamantyaari. Roojatzi romapokashitakari rowamaakiri. Ari ikimitaka riraga Tajorentsi rantziri rirori: tee ikenkithashiryaaakotari irira ashaagantzinkari eejatzi paashini atziri. Roojatzi romapokantaapakyaari rirori rowashironkayeri, rotyaanteri paamariki kaari tsiwakanitatsini.

⁶ Rowashironkaaperotantakariri kameethatzinkari: tee ipashitzimaetari koetyeemoeyakaririni, rootaki ikamantakari; omaanta tee ikijawitari. Rootaki imaperotantyaariri rowashironkaantyaariri rirori Tajorentsi.

Peshiwentero paamayaari Jesoshi pikenkithatakaapiinteri

⁷ Omaanta eeroka noyemijantzinkarite maawaeni, omawitya rowashironkaetemi eekiro piyatatyee paamawentyaari Awinkatharite roojatzi ipokanteeya. Pikimitakotaari irira pankiwaetatsiri.

Piñaakiri, ojamani royaakotziro aririka opariyaantsitapaaki inkaani ipankiwaetantyaari pankirentsii. Eejatzi rapiütero royaakotawaeroota inkani okithokitantanakyaari kameetha. Roojatzi okithokitantanakya osheki, tema ari riwashiryaawentanakyaawo ashitawori iwankiri. ⁸ Eejatzi pikimitya eeroripaeni, eero pipakaero poyaakotziri Awinkatharite inta pishintishiretanaki paapatziyaperotyaari eero rojamanitzi ipokanteeyaaari. ⁹ Kaakite Tajorentsi riraga Kantakowenteeni, rooteentsi iñaapaakae. Rootaki nokanantakimiri kyaaryooowa rowashironkaetzimikarira. Eero pikinānikowntawakaawo ikantakowenzimirokari eerori. Ikantzimikari: “Eenitatisi kaari kameethatatsi pantziri, tee okameethatzti”.

¹⁰ Pikenkithashireeri riraga kamanantayitzirorini iñaani Tajorentsi paeraniperoroña. Ikijectakirini rowashironkaetakirini opomeentsitzimotakarini ikenkithatakotzirini Tajorentsi omaanta ikyaryooventakiniri tee rookiro raapatziyaperotari. Eejatzi pikimitya eeroripaeni pikimitakotaari, aririka rowashironkagaetemi omaanta pikyaaryooventaperoteniri rirori, eero pookiro paapatziyari. ¹¹ Ayotaki iroñaaka maawaeni kyaaryooventaperotakiniriri Tajorentsi kameethatatsiri omawitakya ikijectakimirika, aritaki ikimoshirewentakiri irira. Tema iñaakiri ikameethaperotaki. Tema pikemakotakiri Jooponi paejatziuteni ikyaryooventaperotakiniri Tajorentsi oetarika, tee ipakaero raapatziyari omawitya rowashironkaetakiri. Eekiro raapatziyaperotanakityaari. Roojatzi riraga Tajorentsi, iñaaperotakiri ikameethatzti: imaperotanakiri ikaminthaaperotanakiriroña. Rootaki roshekyaantariri iroñaaka rashitayitaarini, anaakotakiro ritawitakari rashitawitakarini paerani. Piyotanaki ashi royiro Tajorentsi ikowaperotakikya retakoperotanta eejatzi ineshironkaperotantzi. Rootaki okameethatantari pikyaaryooventero oetarika pomeentsitzimotemini: pikimityaari Joopo.

¹² Pamine, noyemijantzinkaritepaeni, pikemaperotena. Oetarika pikenkithatakoteri eero pitheeya, piñaawaetero kyaaryooperotatsiri. Aririka pitheeya, erowa pikantashita: “Riyotzi Tajorentsi tee namatawitzimi”. Eejatzi eero piñaawaetakotashitawo jenokinta, pikantashitantakari: “Namatawitakimirika okameethatzti rowashironkaena Jeekatsiri jenokinta”. Eejatzi okimitaaka kipatsi, eero piñaawaetakotashitawo pikantashitantakari:

"Namatawitakimirika kameetha rowashironkayenaata ashitawori kipatsi". Piñaawaete kameetha, eero piñaawaetashita. Pikanterika: "Jee, aritaki", pantaperotero pikantakiri. Eejatzi pikanterika: "Eero", eero pantziro. Eerowa pamatawitantzi: aririka pamatawitantaki, rootaki rowashironkaantemiri Tajorentsi.

Oetarika pomeentsitzimoteeyimirini, pikenkithatakaapiinteri Tajorentsi

¹³ Eenirorika opomeentsitzimotakimi kameetha pamanapiinteri Tajorentsi ramitakontantemiri. Riraga kimoshiretatsiri okameethatz romampaakowentyaari Tajorentsi pipaasonkitantyaarir. ¹⁴ Eenitatsirika mantsiyatzzinkari, kameetha ikaemakaanteri aataperoteencharipaeni aapatziyariri Jesoshi ramanakotyaari Tajorentsi retsiyatakotantyaariri eejatzi itziritapaakiri eechonkiini iyeenka ikante: "Ari nokowaki retsiyatakotakagaemi Awinkatharite". ¹⁵ Ramaneririka rirori Tajorentsi riyoperotakirika kyaaryoopero irira ikemaperotakir, aritaki retsiyatakotakiri mantsiyari, eejatzi aritaki ineshironkatakiri ipeyakoteeniri kaari kameethatatsi rantawitakari. ¹⁶ Rootaki nokananteyimirini: aririka antakiro kaari kameethatatsi, akamantawakagaeya oetarika antzimatowakagaeyakarini, eejatzi pamaneeyerini Tajorentsi: "Petakoeyenani, netsiyatakotanteeyaari. Riraga atziri rowameethatanewo Tajorentsi, oetarika ikanteriri, aritaki kameetha raapatziyakyaari ramitakoteri tema ari imonkaateero maawaeni ikantakiriri". ¹⁷ Paeraniperoroña Iriiyashi ikimitakae aaka. Ramanaperotakari Tajorentsi: "Eero powariyeero iroñaaaka inkaani. Pikenkithashiryaakaantyaariri atziripaeni". Okaatzi 3 ojarentsi eejatzi 6 kashiri tee opariyanee inkaani jaka kipatsikika. ¹⁸ Ñaakiro, roojatzi eejatzi ramaneeri: "Iroñaaaka papiiteero powariyeero inkaani", roojatzi opariyantanaa inkani, shookaeyaneeni eejatzi iwankiripaeni maawaeni atziri jaka kipatsikika. Tema apiitanaa okithokitanee. Rootaki thame amanaperoteri Tajorentsi.

¹⁹⁻²⁰ Piyoperotero, noyemijantzinkarite maawaeni, eenitatsirika aapatziyawori kyaaryoperotatsiri rookawitaworika, raapatziyawitakari Tajorentsi, aririka ramitakoteeri paashini atziri ikameethataneerika raapatziyeyawonirika, aritaki rawijakotee. Eero ryaatzi paamariki kaari tsiwakanitatsini, eejatzi Tajorentsi ineshironkateeri ipeyakoteeniri rantawitakari kaari kameethatatsi.

Ari okaatzi.

Naaka jankinatzimirori:

Jantyaako

RITAKAWO PEETERO ROJANKINATZINIRIRI IYEMIJANTZINKARITE

¹ Naaka Peetero jankinateeyimironi iroka. Naaka rotyaantanewo Jesokirishito nokenkithatakotziri. Nojankinateeyimironi maawaeni nojoriyotzinkarite, riraga aapatziyeeyaririni Jesoshi, tsiparyaayitanentsirini janta paashinikipaeni kipatsi owaero Poonto, Karaashiya, Kaparooshiya, Aashiya, Witziinya, maawaeni. ² Paerani riyyogaeyakimini Pawa Tajorentsi, tema riyyotzitakotakimini paapatziyeeyaririni Itomi. Rootaki ikowantakari itominteeeyemini. Eejatzi owameethashireperotakimi Ishire paapatziyaperoeyantakaririni rirori: ikamawenteeyawakimini, rapaatawenteeyakimini riraa rowawijaakotantakimiri. Nokowaki ineshironkaperoeyemini, eejatzi kameetha ijekakaaperoeyemini.

Thame apaasonkiteeyerini Tajorentsi, tema ineshironkaperoeyakaeni

³ Thame akamanteeyerini atziripaeni: "Ikameethaperotaki Tajorentsi: riraga Iriri Awinkatharite Jesokirishito". Ineshironkaperoeyakaeni, rashiteeyakaeni: okimiwitaka owakira añaagae eejatzi, rootaki ashengkatantakariri. Ipiriinteri Itomi, rootaki ayoteeyantakarini apiriinteeyanenai aaka, akanteetatyeyaaani añaagaeypaeni janta jenokinta. ⁴ Eniro riwetsikaeyakimironi pijekaeyantapaeyaaroni janta jenokinta. Okanteetatyeyaaani ashi oyiro ojeeki, okameethaperotaki, eero othonkanita, eero opathagae, eero opaashinitzi, eniro ikempoyaakimiro janta. ⁵ Paapatziyeeyawakarini Tajorentsi, rootaki itajonkakowenantakimiri; ikempoyeeyakimini itajorenkaki roojatzi ipokanteeyaa Jesoshi. Roojatzi piñeeyeroni maawaeni riwetsikaeyakimiri.

⁶ Kyaaryo, aririka opomeentsitzimoyeyemini oetarikapaeni iroñaaka, omaanta eero ojamanitzi roojatzi piñeeyeroni pinampi janta jenokinta. Aririka pikenkithashiryakotyawa iroka, tema pikimoshirewentaperotziro osheki. ⁷ Pamine, riraga wetsikirori ooro iwyaaganaka paamariki, roojatzi rookantakyawori ipachaarite. Roojatzi ijekanaki apaniroeni ooro kameethaperotaki. Eejatzi ikimitaka irika, riraga Tajorentsi iñaantapiinteeyakaeni riyyantyaari aapatziyaperoetakaririka. Rootaki opomeentsitzimotanteeri oetarikapaeni eejatzi eekiro aatatyameentaperotakari Jesokirishito eejatzi eekiro aatatyae ajeeki kameetha aritaki iñaaperotakae akameethatzi, tema aapatziyaperoetakari. Roojatzi, aririka ipokake, ikanteeyapakaeni: "Noñaaperoeyakimini pikameethatzi: pikaateeyenani janta jenokinta, pitsipateeyenani apinkathariperoeyini". Naakiro, riraga ooro, osheki ipinawitaka, omaanta ari ipeyeeya; rooma aaka aapatziyakari, eero apeya. ⁸ Iroñaaka tekira piñeeyerini, omaanta pinintaperoeyakirini, paapatziyeeyawakarini, pikimoshirewentaperoeyakirini osheki. Tee pimateeyeroni pikantteri paashini atziri tsika okaatzika pikimoshirewentaperotziri rirori. ⁹ Pameenteeyakarini, rootaki rowawijaakotantakimiri, pisheninkatanteeyawakaririni.

¹⁰ Paerani riraga kamanantayitzirorini iñaani Tajorentsi ikowaeyawitakani riyyotemi tsika akantyaari awijakotanteeyaaroni. Rojankinatakotawitakarini Tajorentsi rowawijaakotantzi, riyyoteeyawitakani ineshironkatantzi, omaanta tekira riyoperotzini kameetha. ¹¹ Enenitatisi iyotagaeyakiririni Ishire Jesokirishito, omaanta tee riyyotakoperoeyawakironi. Iyotaakirini, okantzi: "Osheki ikemaatsityawa

Rotyaantanewo Tajorentsi, eejatzi ikame; roojatzi ipinkatharitanteeyaari". Ikenkithashireeyakan: "¿Ninkama okantakotziri? ¿Tsika okaateka ipinkatharitanteeyaari?" ¹² Omaanta ikamantakirini Tajorentsi: "Eero piñiiri eerori, omaantakya riraga ñiiriri rirotaki impaetatsini ijeki iinja". Tema aaka iroñaaka ikenkithatakotzitakae. Iroñaaka otyaantakina Ishire nokenkithatakagaeyakimini, nokamantteeyakimini rowawijaakontantzi Jesoshi, riraga Rotyaantanewo. Tema ikowaperoeyawitakan ronampiripaeni rirori rirotaperotero tsika akantyaari awijakotantyaari.

Pikameethataperoeyanakini

¹³ Rootaki iroñaaka pikenkithashiryanteeyarini, kameetha pijeekaeyeni. Piyoteeyeni aririka ipokae Jesokirishito añaeyawaerini, eejatzi osheki ineshironkateeyapaakaeni; ari pikimoshirewenteeyawakirini. ¹⁴ Tema irira Tajorentsi ashiteeyimirini. Iroñaaka paapatziaperoeyarini. Paerani tee piyoteeyawitarini, rootaki panantawitaworini kaari kameethatatsi. Iroñaakkaya piyoteeri: eero papiiteero pikimitaa paerani. ¹⁵ Ikameethaperotaki riraga iyoyagaeyakimiri rowawijaakoteemi: iroñaaka pikimitakoeyaarini rirori pikameethate, powameethatayitaperoteroni maawaenai pantayiterini. ¹⁶ Tema paerani rojankinateetakironi iroka ikantzitakarini Tajorentsi: "Nokameethaperotaki naari, rootaki nokowakaantakimiri eerori, pikameethaperotanaki".

¹⁷ Ari iroñaaka piriteeyakarini: okameethatzi piyoteeyeni riyo teeyakimini maawaenai pantziri, ithotyeeyakimini. Rirotaki kantakowentemini, ikenkithashireeyeroni tsikarika okantari maawaenai panteeyakirini. Okameethatzirika, ari imatero iñaaperotemi pikameethatzi. Rooma teerika okameethatzi pantayitzirini, rowashironkaemi. Rootaki okameethatantari iroñaaka pipinkathateeyerini, kameetha pijeekaeyeni roojatzi pareetanteeyarini jenokinta.

¹⁸ Tema paerani patsipetashitawitakawoni pantashitayitawitakawoni rameteeyarini ajoriiyotzinkariteni, omaanta rowawijaakoeyakimini Tajorentsi. Tee ipinakowenantzimiro thonkanitachari ikimita koriki eejatzi ooro rowawijaakontakimiri. ¹⁹ Intaky rotyaantakiri Itomi, riraga inintaperotanewoka. Ikamawentakimi rirori, apaatawentakimi riraa pawijkoteeyantaarini. Rameteeyawoni ajoriiyotzinkarite rantakirorika kaari kameethatatsi, rowamayiniri Tajorentsi owisha kameethaperotatsiri, itaakiniri eero ikenkithashiryantana wo rantakiri. Apatziro rowamaakiniri kameethaperotatsiri owisha. Eejatzi ikimitaka riraga Jesokirishito, osheki ikameethaperotaki: tekatsi rantani.

²⁰ Paeraniperoroña, tekirani ojeekini kipatsi, ikantzitakarini Tajorentsi: "Notymi, iinja notyaantemai eeroka kipatsiki, powawijaakoeyerini atziripaeni". Ari iroñaaka ipokantapaakari rowawijaakotapaakae.

²¹ Kyaaryo ipokaki, ikamawenteyakaeni, roojatzi ipiriinteeri Tajorentsi, raaneeri eejatzi janta okameetheeteeyenta. Omaanta eeniro ijeki jaka osheki riyotaakotakaeri Iriri. Rootaki iroñaaka piyoteeyantakarini kyaaryo ineshironkaperoeyakimini, eejatzi pameenteeyakarini, piyoteeyakini rirotaki jeekakagaemini janta jenokinta.

²² Ari pikemijantaperotakiro maawaenai kyaaryootatsiri riyo gaeyakimiri Tajorentsi, tema okameethaperotaki maawaenai ikantaki. Iroñaaka rowameethashireeyakimini, eejatzi ikowakagaeyakimini pinintaperooyerini maawaenai piyemijantzinkarite. Pikyaaryoo wentero, pinintawakaaperooyaani kameetha. ²³ Rooma paerani otzimimi piniro, ari iroñaaka pikimiteeyakarini ashitzimiri, pikamaeyeni eerori. Omaanta paapatziaperootakawo iñaani Tajorentsi, kaari thonkanitachani.

Rootaki rashiteeyantakimirini, rootaki pikimiteeyantaaririni rirori: pikanteetatyeeyaani pijeeki jenokinta.²⁴ Tema okantzi Iwaperite: "Eero akanteetatyaaani aña jika kipatsiki, akimitau inchashi intsipaete ojampiye. Eejatzi maawaeni okaatzi akenkithashiryawitari rooper-otayitsirini, eejatzi okaatzi antayitzirini, ari othonkaeja.

Okimitakawo oteyaki inchashi, intsipaete ojampiyashitzi, opariyanaki, opathaanaki.²⁵ Omaanta okantyaani ojeeke iñaani Awinkatharite: eero opeya roori".

Rootaki iñaani niyotagaeyakimirini: ineshironkateeyakaeni Tajorents, rowawijaakoeyakaeni. Tema okameethataki.

2

¹ Rootaki iroñaaka pookanteeyawori maawaeni kaari kameethatatsi: eero pikijantzi, eero pamatawitantzi, eero pikenkithashireeya pikameethatzi teerika pimonkaatziro okaatzi pikantziri, eero pikjakoneentari paashini atziri teerika pimonkaatari, eero pitheeyawentashitari paashini powakaanantyaariri ñagaantsipaeni.² Riraga owakira koñaatapaentsi eentsi apatziro ithotapiintziro oteni riniro, rootaki ikimotatantari intsipaete. Eejatzi iroñaaka eerori, pikowaperoteri Iwaperite Awinkatharite: piñaanatapiintero, pikenkithashiryaaipiintyaawo, piyoperotantyaariri kameetha rirori, oshintsiperotantyaari pishire, eekiro piyatatyee pameentyaari Pawa Tajorentsi roojatzi raanteemi jenokinta.³ Tema piyoteeyakini ineshironkaperoyakimini Awinkatharite.

⁴ Aririka awetsike pankotsi mapipango, eenitatsi apaani mapi rooperori anaakotakiro maawaeni paashinipaeni, tema okijotakayero mapipaeni pankotsiki. Eerorika otzimi iroka mapi rooperori, eero okijotzi pankotsi. Riraga Rotyaantanewo Tajorentsi rirotaki oshiyakawori mapi rooperori, rooma ashi royiro rirori rañaaperotzi. Imanintaperowitakari atziripaeni, omaanta Tajorentsi iñaaperotaperotakiri ikameethatzi. Eeromi itzimimi, eero awijkotem. ⁵ Eejatzi eerokapaeni pikimitawo mapipaeni riwetsikantawori mapipango omaanta rowañaakimi Jesokirishito pipiyotawenantaawori, tema pikimitakawo pankotsi tsikarika ojeeki Ishire, tema ojeekishiretzimi pajankanekei. Eejatzi pikimitakotakari kantakaanantsiripaeni paeraniperorona ranantawori okaatzi ikowakaakiri janta ipankomawoki Tajorentsi, tsikarika ipinkathateetakiri irira. Eerokapaeni pikimityaari riroripaeni, pantapiinteniri Tajorentsi maawaeni okaatzi ikowakaakimiri. Roojatzi kameetha riweshiryawentem ikaatzi pantziniriri. Tema paapatziyari riraga Jesokirishito.⁶ Rootaki ikantzitakarini Tajorentsi Iwaperiteki, ikantzi:

"Pamine, notyaanteniri joriyyopaeni Notyaantanewo, riraga osheki noñaaperotakiri ikameethatzi. Niyoyaakiri rowawijaakoeyerini maawaeni aapatziyeyaririni, eero ratsipetashiteeyawoni irirapaeni".

⁷ Eerokapaeni aapatziyeyakaririni Rotyaantanewo Tajorentsi, tema piñaaperoeyakirini ikameethatzi. Omaantaka maawaeni kaari aapatziyari, tee iñaaperotziri ikameethatzi. Okenkithatakotzitakarini Iwaperite Tajorentsi, okantzi:

"Riraga wetsikawitawori pankotsi imanintakiro mapi, ikantzi: 'Tee ikameethatzi'. Omaanta riraga Tajorentsi iñaaperotakiro. Ñaakiro, imantieeyawakirini joriyyo Rotyaantanewo rirori, omaanta riraga Tajorentsi iñaaperotakiri ikameethaperotzi".

⁸ Eejatzi okantzi Iwaperite:

"Riraga Rotyaantanewo Tajorentsi roshiyakawo mapi rantziwataakaakari atziri ipariyantakari. Kyaaryo, tee riyoteeyawakirini, ikompi-teeyawakarini".

Ñaakiro, iroka oshiyakaawentakiri: ro kaari riyoteeyantarini, tee ikemijantaperotziro ikantawitakariri rirori, rootaki ranantyaawori ikantakiri paerani: rowashironkaeyantyaaririni.⁹ Omaanta riyoyaaperoeyakimini rowawijaakoeyantakimirini. Pantawaeteeeyinirini riraga pinkatharipero. Rowameethateeyakimini, pisheninkateeyaperotakarini Tajorentsi. Paerani tee piyoteeyawitani, okimitaka pijeeekawitani tsiteniriki; omaanta riyoyagaeyakimini, riytakaaperoeyakimini, kimitaka pijeekae kitejiriki iroñaaka. Ikowakaakimiro pikamanteeyerini atziri: "Okameethaperotaki ranteeyakaenirini Tajorentsi".¹⁰ Paerani tee pikameethawityaani, omaanta iroñaaka pisheninkateeyakarini. Paerani tee piyoteeyawityaani ineshironkatawitakimi, iroñaaka piyoteeyeni, piweshiryaawenteeyakarini.

Kameetha pijeekimoteri paashinipaeni atziri

¹¹ Nonintaperotanewopaeni, tee pisheninkaperoeyawitarini riraga pijeekimoyakirini jaga, tema pinampitaperotaawo jenokinta. Eero pantashitayitawoni kaari kameethatatsi rantayitzirini paashinipaeni atziri. Aririka pantayiteroni, eero pikameethashiretzi.¹² Ikantashiteeyawitziminirika paashinipaeni atziri: "Tee ikameethateyeni joriyyopaeni", omaanta kameethapero pijeekimoyerini, riyoteeyantyaarini kyaaryo paapatziyeeeyakarini Tajorentsi. Aririka inaakimi pijeeki kameetha, roojatzi raapatziyeeyantyaaririni rirori, eejatzi aririka ipokapae Jesokirishito, ikanteeyeni: "Tema ikameethaperotaki Tajorentsi".

Pikemijantaperoteeyerini pinkathariwenteeyiririni atziripaeni

¹³ Aririka pikemijantaperotakiri Awinkatharite, okameethatzi pikemijantaperoteeyerini eejatzi riraga pinkathariwenteeyimirini jaka kipatsiki. Pikemijantaperoteeyerini riragapaeni pinkathariwenteeyiririni maawaeni jeekatsiripaeni,¹⁴ eejatzi pikemijantaperoteeyerini maawaeni rotyaannewopaeni rirori. Rotyaantakiri rowashironkaeyerini kaari kameethatatsi ijekkaeyeni. Omaantakya riraga kameethatatsiri ijeki, eero ikoshekari inta kameetha inaaperoteri.¹⁵ Eenitatsi kaari yotziri Tajorentsi, ikantizimatzi aapatziyariri Jesoshi. Rootaki ikowantakari Tajorentsi kameetha pijeekimoteteeyerini ikenkithashireeyantyaarini rirori, imaariiyantyaarini.¹⁶ Iroñaaka tekatsi omperatemini, rootaki nokantanzimiri: "Pantero oetarikapaeni kameethatatsiri. Eero pikantzi: 'Nantero oetarika nokowakiri naari iroñaaka; tekatsi omperatenanani'. Tee okameethatzi pikante iroka. Okameethatzi pikemijantaperoteri ashitaperotzimiri, riraga Tajorentsi".¹⁷ Paakameethateeyerini maawaeni paashinipaeni atziri, pinintaperoteeyerini ayemijantzinkarite, pipinkathateeyerini Tajorentsi, eejatzi pipinkathateeyerini riraga pinkathariwenteeyiririni atziripaeni.

Riyotagaeyirini onampirentsipaeni

¹⁸ Onampirents, pikemijantaperoteeyerini riraga omperatzimiri, pipinkathateeyerini. Eero apaniroeni pipinkathatashitari kamintaakimiri, eejatzi neshironkatzimiri; omaanta pipinkathatzityaari eejatzi omperatzimiri, eejatzi kijimiri.¹⁹ Pamine, aririka ikiwashitakimi omperatzimiri, tema riyotakiro Tajorentsi; eejatzi rowashironkaashitakimirika, riyotakiro eejatzi. Eero pipiyawaantetari rirori. Rowashironkaashiteetakimirika eejatzi tee pipiyawaantetari

tema pikenkithashiryaatyaaawo ikowakayemiri rirori pantero, aritaki iinja ikantemi: "Pantakiro kameetha".²⁰ Pamine, aririka pamatawiteri omperatzimiri, aririka ipajatawentemiro, eerorika pipiyawaantetari ;kameethatakima pamatawitakirira? Tee. Tema eero iñaaperotzimi Tajorentsi pikameethatzti. Omaanta aririka ipajatashitemi riraga omperatzimiri, eejatzi teerika pipiyawaantetari, ari iñaaperotakimi rirori pikameethatzti.²¹ Rootaki ikowakaakimiri: eero pipiyawaantetari riraga kijashitzimiri. Pikenkithashireeri riraga Jesokirishito: osheki ikemaatsiwentakimi, ikowaki pikimitakotyaari.²² Tema okantakotziri Iwaperite Tajorentsi: "Tekatsi rante rirori kaari kameethatatsi, eejatzi tee ramatawitantzi".

²³ Tee ipiyawaantetari riraga kijathatziriri, eejatzi tee ikijathatziri riraga owashironkagaeyiririni. Intakya ikenkithashiryaakiri Iriri Tajorentsi, riraga kantakowentziriri kameetha. Rootaki rameenantariri.²⁴ Rirotaki irira janta koroshiki ikamawenteeyakaeroni okaatzi kaari kameethatatsiri anteeyirini, eerokya ikenkithashiryaantaawo eejatzi Tajorentsi. Iroñaakaka, eero antapiinteero eejatzi kaari kameethatatsi, inta antapiinteero kameethatatsiri. Osheki ikemaatsitawenteeyakaeni, eero ashironkanta aaka.²⁵ Piyoteeyakini riraga owisha tee añiiro riyotantari: osheki ikinashitayitaani tsikarikapaeni. Eerorika ijeeki shenterini ari ipeyaagaantakya. Aritaki pikimitteeyawitarini owisha, tee piyoteeyawitani. Omaanta iroñaaka eenitatsi Shenteeyimirini, ikempoyaaperoeyakimini.

3

Riraga shirampari eejatzi iina, okameethatzti raakameethatawakaya

¹⁻² Tsinani, paapatziyari piimi. Tekirarika raapatziyari riraga Jeshoshi, omaanta okameethatzti iñaakimi paapatziyaperotakari irira eejatzi kameetha pijeeki. Roojatzikya iñaaperotemi, eejatzi aririka pimateri paapatziyakayaari.³ Eero apatziro pikowashitaperotya powameethatero piishi, powaneenkatty, pikithaata kameethaperotatsiri, oetarikapaeni.⁴ Omaantakya pikowaperote pikameethashiryaanaki pajankaneki, pineshironkathateri piimi. Rootaki ikowakaaperotakimiri Tajorentsi.⁵ Aritaki okimiteeyani paejatoeteni aapatziyariri Tajorentsi: kameetha ojeekini, aapatziyari oemi.⁶ Rowaga Jaarani okemijantaperotzirini Awaraamani,* oetziri nowinkatharite. Aririka pijeeke kameetha, pikimitakotakawo roori, tekatsikya pikantya pithaawantyaari piimi: tema tekatsi ikjawentemi.

⁷ Eejatzi eerori, shiramparipaeni: tee omonkaatzimi piina, tee oshintsi-taperotzi, rootaki nokantzimiri pineshironkatero, piñaapinkathaperotero. Tema pimonkaatawakagaeyakan, ineshironkateeyakimini Tajorentsi pijekaeyantyaarini iinja janta jenokinta. Eerorika pikamintheero piina, eero rakimiro Tajorentsi aririka pamanawityaari.

Inja rowashironkagaeteri antzirori kameethatatsiri

⁸ Eejatzi nokanteyemini maawaeni: pikimitawakagaeyaani, petakotawakagaeyaani, pinintaperooyerini piyemijantzinkarite, pineshironkatawakagaeyaani, eero pikantakaaperoeyaani.⁹ Teerika okameethatzti rantzimotakimiri paashini atziri, eero pipiyatari; aririka ikijathatemi, eero pipiyatari, inta pikanteri Tajorentsi ikaminthayeeeri. Tema riyyogaeayakimini irira: ikowaki ikamintheeyemini.¹⁰ Pikenkithashireeya, okantzirini Iwaperite Tajorentsi:

* **3:6** Paminero OWAKIRANI ITAJAANTANEENCHA OETARIKAPAENI kapiitoropaeni 12 roojatzi 22.

"Pikowakirika pikimoshiryaanaki eejatzi pijkeeki kameetha, eero pikijathatziri paashini atziri, eero pamatawitantzi.

¹¹ Eero pantayitzironi kaari kameethatayitatsirini, inta pantayiterini kameethatayitatsirini. Pikowaperotanaki pijkeeki kameetha.

¹² Tema raminapiinteeeyirini Awinkatharite maawaeni aapatziyeyearirini ishenteeyirini. Ikemapiintziri aririka ramaneri. Omaanta eero ineshironkateeri antapiintzirori kaari kameethatatsi, inta ipinkimateri".

Pantapiintero kameethatatsiri omawitya pikemaatsitawentyaawo

¹³ Pikowaperoterika pantapiintero kameethatatsiri, ḡeenitatsima kowatsiri rowashironkayemi? ḡTekatsi! ¹⁴ Omawitya eenitatsirika kijashitemini, omaanta itajonkakowentemi Tajorentsii. Eero pitħawawtari, eero pikantashiryaa, inta pikimoshirete, ¹⁵ tema pipinkathataperoteri Jesokirishito pajankanek. Aririka rojampiteetemi: "Litaka paapatziyantakariri Jesokirishito?" Kameetha pakanakiri, eero pikijathatziri. Pikamanteri iitaka piyoperotantakari raaneemi jenokinta. ¹⁶ Eerokya pantziro kaari kameethatatsi inta pantero maawaeni ikowakaakimiri rirori. Roojatzi riraga kijakimiri Riyotanaki rirotaki irira owameethatzimiri. Roojatzi ipashiwenantanakya, tema Riyotanaki tee okameethatz ikanzimatakimiri. ¹⁷ Aririka ishinetziri Tajorentsii rowashironkagaetemi, iñāaperotzimi pikameethatzi aririka pikemaatsitawentyaawo kameethatayitatsirini pantayitzirini. Omaantakya tekatsi ikantya iñāaperotemi pikameethatzi aririka pashironkaawentyaawo kaari kameethatayitatsini pantayitzirini.

Rantayitakirini Jesokirishito

¹⁸ Ċaakiro, paerani tee akameethateeyini aari, osheki antayitakironi kaari kameethatatsi, omaantakya ikameethaperotaki riraga Jesokirishito, tekatsi rantani. Ikamawenteeyakaeni rowawijaakoeyakaeni; ikowaki añeyanteeyaririni Tajorentsii. Ikamaperowitaka; omaanta ipriiunteeeri Ashitariri. ¹⁹ Ikamantakari, ryaatashiretpaentzi janta paamariki kaari tsiwakanitatsini janta rowakirinta Tajorentsii kamaaripaeni eejatzi ishirepaeni theenkantatsirini. Ari ikenkithatakapaaentziri. ²⁰ Paerani, tee raapatziyeyarini Tajorentsii riraga atziripaeni eenironi ijeekini Noeni. Riwetsikantakaworini irira ipito, ikamapiinteeyawitakarini atziri paerani: "Paapatziyeyarini Tajorentsii", omaanta tee ikowaeyini raapatziyeyarini. Riraga Tajorentsii reshiwentawitakari royaakoeyawitakarini ikenkithashiryawakyaata ipakaawakiroota okaatzi kaari kameethatatsi rantakiro. Omaanta tee ikowaeyini ikenkithashireeya. Roojatzi rotyaanantakanari rirori antwo inkani, oonkanaka maawaeni, othonkaeyakirini, kamanaki. Omaanta ikaatzi 8 awijakotaatsiri pitotsiki. ²¹ Ari roshiyeyakarini riraga kaawoshitawenteeyaririni Tajorentsii. Aririka akaawoshitawentyaari, teera akaawoshiwaetashita, omaanta oshiyakaawentziro ikamawenteeyakaeni Jesokirishito, eejatzi ipriiintanaa, rowawijaakoeyakaeni. Eejatzi oshiyakaawentziro ameentakari Tajorentsii rowameethashireeyantakaerini. ²² Ari iroñaka jatee Jesokirishito janta jenokinta, ijeekimotapaeri Tajorentsii rakoperoki: ikaatapaeri ipinkathariwenteeyapaeni. Eejatzi osheki ipinkathateeyirini ronampiripaeni, paashinipaeni pinkatharitawitachari, maawaeni. Eejatzi imatziro romperatari kamaaripaeni riraga owashironkaachani iinja.

4

¹ Ari piyoteeyakini osheki ikemaatsitakawo Jesokirishito, tee ikantzi: "Tee nokoyi nokemaatsityaawo". Eejatzi eerokapaeni, pikimitakotyaari irira. Eero pikantzi: "Tee nokoyi nokemaatsityaawo". Pamine, aririka pikemaatsityaawo oetarikapaeni, eero pikowanee pantapiinteero kaari kameethatatsi ² okaatzi ikowaeyirini atziripaeni. Omaantakya pikowap-erotanaki panteniri Tajorentsi okaatzi ikowakayemiri roojatzi pikam-takya. ³ Paerani pantawitawoni rantapiintayitzirini riraga theenkantatsiri: monkaataka, eero papiiteero eejatzi. Rantapiintayitzirini riroripaeni os-heki inashitapaeni kaari kameethatatsi, ikenkithashiryaaotapiintawo ishi-rontayitawoni kaari rayi, ishinkitapiinta, imayempitawakaapiinteeyan, ikijawakagaeyakan, ipinkathatashitakawo iitajorentsitsashitawo, rantakiro osheki kaari kameethatatsi. ⁴ Tee riyoteeyini rirori, ikantzi: "¿litaka kaari ikimitantana aapatziyariri Jesoshi?" Rotsikanateeyakimini, tee riytakoeyironi iñaakimira pipaashiniteeyakini, rootaki ikantzimateeyan-takimirini teera pikimitakotari. ⁵ Omaanta iinja ipokae Jesokirishito ikan-takowenteeyerini maawaeni atziri: añaagaeysirini eejatzi kamatsiripaeni. Rojampiteeyerini theenkantatsiri: "¿litaka pikijantakariri aapatziyanari? Tee okameethatzi". Eero rakiri: osheki ipashiwentanakya. ⁶ Paerani ikenkithatakayiteetakarini jeekawitacharini, ikamanteeyakirini: "Aririka paapatziyari Jesoshi pikanteetatyeyaan, pijeeki janta jenokinta". Rootaki ikamaeyantakan: tema ranteeyakironi kaari kameethatatsi, rootaki ika-maeyantakarini, ikimiteeyakarini maawaeni atziri. Omaanta iinja ipiriin-teeri Tajorentsi maawaeni aapatziyariri, ijekakagaeyerini janta inampiki. Ikantya ikimiteeyaarini Tajorentsi: eero ikamaeyeeni eejatzi.

Thame aneshironkateri ayemijantzinkarite

⁷ Pamine, rooteentsi omonkaataka ikantakowenanteeyeerini Tajorentsi. Kameethapero pijeekaeyeni, pikyaaryooowentero pamanapiinteeeyerini riraga Tajorentsi. ⁸ Pikantani pikowaperoeyeni pinintaperotawakagaeyaani. Aririka pinintawakagaeyaani, tema eero pikenkithashiriilo kaari kameethatatsi rantayitzirini paashinipaeni, inta pineshironkawakagaeyaani, pipeyakoteniri rantziri. ⁹ Pikantyaani pineshironkaeyawakirini kameetha maawaeni areetemini. Eero pikantaakitziri riroripaeni. ¹⁰ Tema enitatsi omataakimiri Ishire Tajorentsi, rootaki iroñaka pimatantyaawori petakontantyaariri atziripaeni. ¡Pantaperoter! Piyotakagaeyerini rirori ikamintheeyerini Tajorentsi. ¹¹ Aririka piyoteeri atziri, pikyaaryooowentero pikamanteeniri iñaani Tajorentsi. Aririka petakotyaari atziri, pikanteri Tajorentsi ramitakotemi, aritaki imataakimiro. Rootaki riraga paashinipaeni atziri riytakotantzimiri paapatziyaperotari Jesokirishito, roojatzi ikanteeyeni: "Tema ikameethaperotaki Tajorentsi". Okameethatzi iroñaka añaaperoeyerini maawaeni, apinkathateeyerini: akanteetatyeyaan. Aritaki okantyaari.

Aririka pikemaatsitawentyaari Jesokirishito, pikimoshiryaanaki

¹² Nonintaperotanewopaeni, niyotaki osheki rowashironkaetakimi. Eero potsikanatawentawo, pikenkithashiryaaashita: "¿ilitarika awijantanakari iroka?" Aritaki okantyaari. Rooma rowashironkaetakiri eejatzi paashini-paeni aapatziyeyearirini Jesoshi. ¹³ Tema eejatzi rowashironkaetakiri riraga Jesokirishito, iroñaka pikimiteeyakarini: pikimoshireeyanakini. Iinja ipinkatharitapaaki rirori, roojatzi pikimoshirewentaperotantyaariri. ¹⁴ Aririka itheenkanteetemiro paapatziyarira rirori, pikimoshiryaanaki:

tema aritaki itajonkakowentakimi Tajorentsi. Okithaatayemi Ishire, rowaga kameethaperotatsiri. ¹⁵ Omaanta eero powamaantzi, eero pikoshitzi, eero pantayitzironi paashini kaari kameethatatsi, eero pimatzitawo eerori piñaawaetzi iñaanatawakaeyaarika paashinipaeni atziri rashityawaawo rirori. Aririka ikijawenteetemi irokapaeni, ari pikemaatsitaperotakyaawo osheki. ¹⁶ Omaanta aririka paapatziyaperotyari Jesokirishito, rootakirika ikijanteetemiri, eero pipashiwenta; inta pikante: "Tema ikameethataki Tajorentsi, ishinetakina nokemaatsitawentyaari Jesokirishito".

¹⁷ Pamine, rooteentsi ikantakowenteeyeeni Tajorentsi: riteeyeeni maawaenai aari itominteeeyarini, roojatzikya rirori theenkayiririni. Aririka iroñaaaka rowashironkaakae anantawori kaari kameethatatsi, tema ikowanaki ajeke kameetha. Aririka ikenkithashiryaajankanetakaakaero antakiri eejatzi owashiyaanteero, tema iinja aate jenokinta. Omaanta riraga kaari aapatziyeyaririni Jesoshi, tema osheki rowashironkaaperoeyerini iinja. ¹⁸ Tema okantzi Iwaperite Tajorentsi:

"Ari rowawijaakoeyakirini Tajorentsi riraga aapatziyeyaririni, omaantakya irira jateyawitakan paamariki kaari tsiwakanitatsini. Omaantakya riraga theenkiriri Tajorentsi, rantapiintziro kaari kameethatatsi, ¿oetaka awijimoterini irirapaeni?" Tema ari rashironkaaperoeyakaani rirori paamariki kaari tsiwakanitatsini".

¹⁹ Aririka panteniri Tajorentsi ikowakaakimiri, rootaki pikemaatsitawenantakariri, okameethataki. Pikyaaryooowentero pantayiteroni kameethatayitatsirini. Pikanteri Tajorentsi: "Pikempoyeena". Tema rirotaki wet-sikakimiri, ikempoyaaperotemi, eero ramatawitzimi.

5

Peetero riyotaatziiri aataperoteenchari iyemijantzinkarite eejatzi ewankaripaeni

¹ Rootaki iroñaaaka nojankinatantanariri aataperoteenchari aapatziyariri Jesoshi. Tema eejatzi naaka aataperoteenchari. Paerani noñaaperotakiri Jesokirishito ikemaatsitaka osheki. Eejatzi iinja, aririka ipokae Awinkatharite ipinkatharienataape, notsipatyari nopinkathariwenante. Ari iroñaaaka eenitatisi nokoyiri nokamantteeyemirini: ² riraga shentziriri rowishate raminakowentziri riroripaeni. Eejatzi eerori, pikimityaari rirori, pam-inakowiritaantapiinteri piyemijantzinkarite, irirapaeni ikimitakari rowishatepaeni Tajorentsi. Paapatziyakaaperoeyaaarini Jesoshi. Omaanta pantero pikowashitar, tekatsi omperatemini. Tema ari okanta ikowakaakimiri Tajorentsi. Tee ro pikenkithataantapiinteeyaaarini payitantlyaari iyorikite, omaanta pikowaperotantyaari kameetha paminakowiritaanteri. ³ Eero pishintsitheeyirini kimitakami pinkatharipero, omaanta kameetha pijeeki, ikimiteeyantemirini rirori. ⁴ Iinja ipokaerika Jesoshi, riraga iwinkatharite shentziriri rowishate, ragaeyaneeni, ijeekakagaeyapaeni janta jenokinta. Akanteetatyeyaaani ajeekaeyeni janta okameethaperotinta.

⁵ Eejatzi ewankaripaeni, nokamantemi: pipinkathateeyerini maawaenai aataperoteencharipaeni. Eero pikantakaaperoeyani, omaanta kameetha pineshironkatawakaeyaani. Tema okantzi Iwaperite Tajorentsi: "Riraga Tajorentsi ikijiri riraga kantakaaperotzinkari, omaanta ineshironkateeyakirini kaari kantakaaperoteyachani". ⁶ Pipinkattheeyerini rirori: tema itajorentsitaperotaki, ipinkathariperotaki; roojatzi ipokaerika Jesokirishito ipinkathariwentakae. ⁷ Pikanteri

Tajorentsi oetarikapaeni pikenkithashiryaakopiintari, eejatzi eero pikenkithashiryaakotawo paashini oetarikapaeni, inta pameentyaari Tajorentsi. Tema raminakoventakimi. ⁸ Paamawentya apaniroeni, paamayarira iwinkatharite kamaaripaeni. Osheki ikinakinayitanakini, ikowaki ithonkaeyerinimi aapatziyeeyaririni Jesoshi, maawaeni. Tema ithawetakotantariri aakapaeni: ikowanaki rookakagaero aapatziyari, apeyakoteri. Ikimitakari antari manitzi aririka itasheyaperotaki: raminiri iwathatsite royaari. ⁹ Pameentaperotaari Awinkatharite potsinampaantyaariri iwinkatharite kamaaripaeni eero rantakaantzimiro kaari kameethatatsi. Kyaaryo eeniro pikemaatsitayityaarini, omaanta tee apatziro pikemaatsitya eeroka apaniroeni, eejatzi ikimiteeyakimini rirori ayemijantzinkarite janta paashinikipaeni kipatsi. ¹⁰ Eero ojamanitaperotzi pikemaatsitya: riyotzi Tajorentsi pipinkathatakira riraga Jesokirishito, roojatzi ragaeyanakimini jantajenokinta. Pikanteetatyeyaaani pijkeekapae janta okameetheetyaaperotzinta ashi royo ineshironkatantzi: eekiro riyaatatyeyaaani rowameethataperoyemini, riweshiryaakagaeyemini, ishintishireeyemini pajankaneki, eero pikantashiryaapaa eejatzi. ¹¹ Thame maawaeni apinkathataperoyerini, akanteetatyeyaaani. Tema osheki ikameethaperotaki. Aritaki okantyari.

¹² Ari nojankinatakimi eechonkiini nokamanantakimiri osheki ineshironkaperoyakimini Tajorentsi, kyaaryo nokantakimiri. Iroñaaka paapatziyaperotaari irira, piweshiryaawentyaari. Eeniro irika Shiriwaano,* rirotaki aaneemironi iroka nojankinari. Osheki noñaaperotziri: rirotaki ayemijantzinkarite, ikyaaryooowentziro raapatziyaperotakari Jesoshi. ¹³ Riwethateeyakimini maawaeni ayemijantzinkarite jaka Wawirooniysi,† tema rirojatzi riyoaaanewopaeni Awinkatharite raapatziyeeyarini. Eejatzi riwethateeyimini niyotaanewo Marikoshi. Tema kimitaka rirotaki notyomi. ¹⁴ Paakameethawakagaeyaani maawaeni, pineshironkatawakagaeyaani. Nokantziri Tajorentsi: "Pineshironkateeyerini maawaeni aapatziyariri Pitomni, kameetha pijkeekakagaeyerini".

Naaka jankinatzimiori:

Peetero

* **5:12** Shiriwaano apite okanta iwaero, paashini okantzi Shiirashi. † **5:13** Riraga aapatziyariri Jesoshi iitziro nampitsi owaero Orooma paashini owaero Wawirooniya.

RAPIITEENIRI PEETERO ROJANKINATZINIRIRI IYEMIJANTZINKARITE

¹ Naaka Shimo Peetero jankinatzimirori eerokapaeni noyemijantzinkaritepaeni. Naaka rotyaantanewo Jesokirishito, nantziniri riori oetarika ikowakaakinari. Tema amonkaatawakagaeyakanameenteeyakarini Jesokirishito, riraga Owawijaakoeyakaerini. Tema rirotaki Tajorentsi. Rirotaki kameethaperotatsiri. ² Ari piyoteeyakirini, rootaki nokanantariri osheki ineshironkateeyemini eejatzi kameetha ijeekakagaeyemini.

Pikañaaperotya ashi poyiro pikameethatzi

³ Ari roñaagakaero Tajorentsi rirotaki kameethaperotatsiri eejatzi eenitatsi itajorenka, ikaemashiryanteeyakaerini aapatziaari. Aririka aapatziaari aritaki itajonkawenteeyakaeni akanteefatyeyaaani ajeeki eejatzi oshiyakotaari riori akameethashiryanteeyakaerini. ⁴ Osheki itajonkawenteeyakaeni akimoshirewenteeyantaaririni, rantakaeniro maawaeni ikan-takaeri. Ikashiyakae ramitakoeyeeni eero akowantawo antero kaari kameethatatsi jaka kipatsiki. Eejatzi ramitakoeyeeni akimitteeyantaaririni riori. Tee akimitari iroñaaka riraga theenkantatsiri.

⁵ Tema rantakaeniro Tajorentsi maawaeni iroka, rootaki okameethatan-tari akañaaperotya kameetha ameentyaari Jesoshi. Aririka ameentyaari, roojatzi ari okameethatzi akameethatanaki. Aririka akameethataki, okameethatzi eejatzi ayoperotanaki oetarika ikowakaakaeri. ⁶ Aririka aytaki oetarika ikowakaakaeri, okameethatzi eejatzi aamakowentya apaniroeni anantyaawori. Aririka aamakowentanakya, okameethatzi akyaryoowentero ikowakaakaeri. Aririka akyaryoowentero ikowakaakaeri, okameethatzi eejatzi oshiyakotaari Tajorentsi, antapiintziro okaatzi kameethatatsiri. ⁷ Aririka oshiyakotaari Tajorentsi, antapiintziro okaatzi kameethatatsiri, okameethatzi eejatzi anintaperoeyanakirini maawaeni ayemijantzinkarite, eejatzi okameethatzi aneshironkateeyanakirini maawaeni atziri. ⁸ Aririka pantaperoeyanakironi maawaeni iroka, ari osheki pantakiniri Awinkatharie Jesokirishito, eejatzi piyotaperotanakiri. ⁹ Riraga kaari anterori irokapaeni ikimiwitakamampowakaitatsiri. Tema ipeyakotari osheki ranteeyawitakawoni kaari kameethatatsi paerani, omaanta Awinkatharite ineshironkaperotakiri, rowameethashiryakiri, ari tee ikenkithashiriilo eejatzi kaari kameethatatsi rantzimatavitakariri.

¹⁰ Iroñaaka, noyemijantzinkarite, eero pikimitari riroripaeni inta pikayaryoowentaperotero panteniri Tajorentsi maawaeni ikowakagaeyakimirini. Tema pikowaki piyote ikaemakimi Tajorentsi eejatzi riyoakimi. Aririka pantapiintakiro maawaeni iroka, eero pipakagaero paapatziyari Jesoshi. ¹¹ Okantyaatakyraaantaneemiri janta jenokinta, janta ikantani ipinkathariwenantzi Awinkatharite Jesokirishito: riraga owawijaakoeyakaerini.

Eero pipeyakotziro iroka nokantakimiri

¹² Tee owakira pikemaeyakironi iroka nokantakimiri: piyotziteeyawoni, eejatzi pimatayitakironi kameetha. Omaanta okameethatzi eekiro niyaatatyepi napiiteemiro eejatzi nokenkithashiryakagaemiro.

¹³⁻¹⁴ Riyotakaakina Awinkatharite Jesokirishito eero ojamanitzi

nokamantyaari. Omaanta okameethatz iokenkithashiryaakagaeyemironi roojatzi nokamantaka. ¹⁵ Roojatzi nokamantaka, eero pipeyakotantawo, inta pikantyaani pikenkithashiryaapiintyaawo.

Kameetha iyotagaeyakaeni inaan Tajorentsi

¹⁶ Tema nokamanteeyakimini iinja ipokae ejatzi Awinkatharite Jesokirishito, osheki ipinkatharentsitaapaaki. Kyaaryo iroka nokantakimiri, tee nokamantashiteeyemironi naamaashiteeyakarini. Tema naakapaenii ñaaperoeyakiririni Jesoshi paerani ishipakiryaaki eejatzi itajonkantayitakini. ¹⁷⁻¹⁸ Paerani riyaatantakari Jesoshi tonkaariki, noyaatanakiri naaka eejatzi paashini apite riyotaanewo; noñaaperoeyakirini ishipakiryaanaki, eejatzi nokemaeyawakirini Pawa Tajorentsi, riraga kameethaperotatsiri. Ikkantzi: "Rirotaki irika notyomi nonintaperotziri, osheki noñaaperotakiri ikameethatz".

¹⁹ Eejatzi eenitatsi iroñaaka rojankinatziteeyanarini riraga kamanantayitzirorini inaan Tajorentsi paerani: okyaaryooperotatz. Okameethatz i pikenkithashiryaaperoeyeroni okaatzi rojankinatz; tema iyotaatziimi piyote okyaaryooperotzirika okaatzi riyotaantziri paashinipaenii atziri. Okimitakawo oorenty tsiteniriki: eerorika oorenta, eero aminashita. Ari okameethatz i pikantyaani pikenkithashireeyeroni Jankinarentsiperi, roojatzi kitejiriki ipokantyaari Jesoshi; roojatzi riyotakaaperoeyemini Tajorentsi, okimitzimoeyemini okitejitaropetz. ²⁰⁻²¹ Nokowaki piyoperoyerona iroka: rowaga rojankinarini riraga kamanantayitzirorini inaan Tajorentsi okameethaperotaki. Tee riyotawitani irirapaenii, riraga paejatziieni, kaari ashitawori rojankinari rirori; omaanta iyotagaeyakirini Ishire Tajorentsi, rootaki rojankinatantakawori iroka.

2

Ikenkithatakotziri amatawitantatsiri

¹ Eeniwitacha paerani kamanantawitachari ikaateeyinira ijoriyyotzinkaritepaeni, omaanta ramatawitaanteeyirini; roojatzi ijeeki iroñaaka amatawiteeyemirini eerori. Riytagaeyemironi theeyaantsi, itheeyakotyari Tajorentsi. Tema ayoteeyakini ikamawenteeyakaeni Jesoshi aateeyantyaarinii jenokinta, omaanta ikante riraga amatawitantatsiri: "Eero apinkathatziri Jesoshi". Rootaki kaari ojamanitanta rowashironkaaperoteri Tajorentsi. ² Eenitatsi osheki eerokapaenii rirotaki oyaaterini: pikimityari, tema pantayitzironi kaari kameethatatsi; rootaki itheenkanteetyaawori Ñagantsiperi kenkithatakotziriri Jesokirishito. ³ Osheki ramatawiteeyemini riroripaenii, riyotaashitayitemironi oetarikapaenii rayitantemiriri piyorikite. Paerani ikantzi Tajorentsi: "Aritaki nowashironkaaperoeyakirini riraga amatawiteeyeririni aapatziyanari". Kyaaryo, eero ojamanitzi riyaateeyeni paamariki kaari tsiwakanitatsini.

⁴ Paerani riraga ronampiripaenii Tajorentsi ipiyathateeyakarini, rantayitakironi kaari kameethatatsi. Rootaki rowashironkagaeyantakaririni, rookaeyakirini janta jaawiki janta otsitenitaperotzinta. Aritaki ijeekanaki riroripaenii janta, roojatzi ikantakowenantyaariri Jesokirishito iinja. ⁵ Pamine, rowamagaeyakirini Tajorentsi riraga atziripaenii paeraniperoroña. Tee ipinkathateeyirini rirori, rootaki rotyaanantakanariri oonkawo agaeyakirini. Tekatsi paashini rowawijaakote, apatziro Noe, itomi 3 eejatzi iinapaenii, ikaateeyini 8. Tema rirotaki kenkithatakagaeyawitakaririni atziripaenii, ikanteeyawitakarini okameethatz i pookero kaari kameethatatsi, pantero kameethatatsini.

6 Eejatzi paeraniperoroña itagaeyakirini Tajorentsi maawaeni joroomajatzzi, eejatzi maawaeni komoorajatzzi; itagaeyakironi ipankopaeni, rowaagawo, maawaeni. Ootaka maawaeni. Okameethatzzi iroñaaaka akenkithashiryakoperotyaawo rantakiri Tajorentsi, ayoteeyantyaarini ari rowashironkagaeyakirini iinja maawaeni kaari pinkathatziriri.

7-8 Ari ikameethashiryakini Rooteni; ijeekawitani janta Joroomaki, omaanta osheki rowashiretakotakari ijeekimoteeyakirini, iñaakiri, ikemiri ranteeyakironi oshekiperi kaari kameethatatsi. Osheki ikenkithashiryakotakari maawaeni kitejiri ikantzi: “ξιτακα καρι ραπατζιεεγανταρινι Ταγορεντσι? Ραπατζιαριμι αρι ιιεκιμι καμεεθα”. Omaanta iñaakiri Tajorentsi ikameethaperotaki riraga Roote rootaki kaari itaatari inta rowawijaakotakiri. 9 Ņaakiro, riyotaperotzi Tajorentsi rowawijaakoeyirini pinkathateeyiririni, omaanta kaari ikimitantari theenkantatsiri. Kyaaryo, rowashironkaeyeerini irirapaeni iroñaaaka eejatzi ipokaerika ikantakowenanteeyaaririni, aritaki rotyaantakiri paamariki kaari tsiwakanitatsini. 10 Aritaki rowashironkagaeyakirini maawaeni kowatsiri rantero kaari kameethatatsi antashitayitaworini ikowayitzirini riori, omaanta rowashironkaaperoeyakirini riraga ūamintthatashitawori kaari rayi eejatzi riraga atziri rantatenkatawakaeyaani ishiramparinakki eejatzi rowashironkaaperoeyakironi rowaga ūamintthatashitariri kaari ayi eejatzi rowaga tsinani antatenkatawakagaeyaani otsinanakki. Eejatzi rowashironkaaperoeyakirini riraga theenkiriri Awinkatharite eejatzi theenkiriri maawaeni jewatatsiri.

Tema osheki ikantakaaperotaty riraga amatawitantatsiri, ikantzimatatsiiri jewatatsiripaeni eejatzi ronampiripaeni Tajorentsi.

11 Omaanta ijeekaeyini ronampiripaeni janta Awinkathariteki, omawitya oshekiperi ishuntsitzi, tee ipiyatakotari riraga kantzimateeyiririni.

12 Riraga amatawitantsirsipaeni ikimiteeyakarini tsimeripaeni, tekatsi riyote. Riraga tsimeri ijeekashiteeyaani inimoteeyakirini, roojatzi ikenteri atziri, chek, rowamayeri. Ikimiwitakari riraga theenkantatsiri ikantzimatashitayitawoni kaari riyotzi, rootaki ithonkantyaariri Tajorentsi. 13 Kyaaryo iinja rashironkagaeyakaanyaani riori, tema ikantzimatatakiri paashinipaeni eejatzi ramatawitakiri. Riweshiryaaawentashitayitawoni rantero kaari kameethatatsi kitejiriki, omawitya iñaakiri paashinipaeni atziri. Kyaaryo rantzimoteemiro kaari kameethatatsi itsipatantakimiri rootakir itheonkantakimiri atziripaeni. Tee okameethatzi ranteeyirini riori, omaanta rantakagaeyakimironi kaari kameethatatsi pikimiteeyantyaaririni eerori. 14 Tema iñaawenaperoteyawoni ishirontawo tsinanipaeni, ikantani rantapiintziro kaari kameethatatsi; tekatsi ikantero rookaero, ashi royo. Rantakagaeyakirini kaari kenkithashireeroni kameetha kaari kameethatatsi. Ashi royo iñaawenaperoteyawoni ashaagawontsi. Kyaaryo riraga Tajorentsi

rotyaanantyaariri riori paamariki kaari tsiwakanitatsini. 15 Paerani ikemijantaperotaki kyaaryooperotatsi omaanta iroñaaaka rookakiro, rantashitayitawoni oetarikapaeni ikowakiri. Ikenkithashiryakwoni rantakiri Waraamini, itomini Weyori. Ikenkithashiryakwoni paerani iñaani Tajorentsi, omaanta iñaawenaperotakawo ashaagawontsi. Ikwawitakani ipeyiri ashaagantzinkari. Rootaki ikimoshiretakariri ipinatanteetariri ranantyaawori kaari kameethatatsi. 16 Tee raapatziyaperotari Tajorentsi omaanta royaatakiri kowaentsiri ipinateri ashaagawontsi. Ari romapokashitakari iwoorote iñaanatakiri, kimitaka rirotakimi atziri. Tee riyotzi Waraami riro ūawaetaakaakiriri Tajorentsi. Ikkijaperotakiri rompojantakariri, ipiyawaantetantakariri, roojatzi iñaakiri ronampiri

Tajorentsi rootaki osheki rotsikanatantanakariri, eejatzi osheki ikenkithashiryaanaka: tee ikenkithashiryaawitanaawo eejatzi ashaagawontsi.

¹⁷ Aririka pikeekakotero iñaa iyowaatantyaari tema pikowaperotaki ojeeki iñaa. Omaanta aririka opiryataki, tema tee okameethatzi, tekatsi paye iñaa. Ari riraga amatawitantatsiri roshiyakawo piiyanarite piryaaateentsiri iñaa: tee ikameethatzi. Osheki iñaawaetashita, wero, wero, wero, omaanta tekatsi ramitakotemi. Eejatzi ikimitawitakawo menkori, aririka piñaakiro amakiro tampyaa, pikenkithashireeya: "Opariyathee inkani". Omaanta kimitawitaka amatawiwitakimi, teemaeta opariye. Eeniro ijekaperotantyaari rirori janta otsitenaperotzinta riwetsikakiniriri Tajorentsi. Tema rootaki paamariki kaari tsiwantsinatatsi.

¹⁸ Osheki ikantakaaperota eejatzi ikantapiintzi: "Ñaakiro, nantashitayitakawoni oetarikapaeni nokowayitzirini". Ari ramatawitayitzirini osheki owakira aapatziyawitakariri Jesoshi: owakira rookawitakawo kaari kameethatatsi rantayitzirini, omaanta rantakagaeri eejatzi. ¹⁹ Ikanteeyirini: "Tema irira Tajorentsi owawijaakotzimiri, tee pimatziro powawijaakotya apaniroeni. ¿litaka kaari panantawo oetarika pikowayitzirini? Tema ineshironkatakimikya, eero ikijawentzimiro. Thame pikimitena naari". Rootaki ikantayitawitarini, omaanta osheki ramatawitantzi. Tee imatziro rirori rantero oetarika ikowaki inta rantapiintziro kaari kameethatatsi. Tema piyotzi aririka ranaakoteetakaee oetarika eero amatziro apaniroeni ookaero iroka. ²⁰ Pamine, paerani riraga amatawitantatsiripaeni rantapiinteyawitawoni kaari kameethatatsi ranteeyironi maawaeni theenkantatsiri. Roojatzi ryotaakoteetakiri Awinkatharite Jesokirishito riraga Owawijaakotakaeri, ari ipakaawitakawo rantziro kaari kameethatatsiri. Roojatzi ipiyashitantaawo rantziri paerani. Iroñaaka tekatsi ikantya ipakantyaawori eejatzi rantayitzironi, rootaki osheki rowashironkaaperotantyaari. ²¹ Ñaakiro, okameethawita eero ryotzimi riroripaeni ijeki kameetha. Tema iroñaaka tee ikoyi rantero okaatzi ikaminaakiriri Tajorentsi, omawitya okameethaperotaki; rootaki tekatsi okantya rawijakotantyaari. ²² Ikanteetzini: "Riraga otsitzi roepiyeero iyamaankani, rowaawo". Eejatzi ikanteetzini: "Atsipetashitakari akiweri chaancho, tema eejatzi ipiyanee rantaatapaero jampowatha". Kyaaryootaki ikanteetziri. Aritaki ikimiteeyarini rirori riraga iyotakowitariri Jesoshi omaanta kaari aapatziyariri, ipiyakoteeyaaawo kaari kameethatatsi.

3

Ikenkithatakotziri Jesoshi ipokanteeyaaari ikantawenteri atziri

¹⁻² Ari, noyemijantzinkarite, piyoteeyini nonintaperoeyakimini. Paeraninente nitantakimiroi nojankinatakamiro, nokenkithashiryaakaakimiro rojankinatziniriri riraga kamanantayitzirorini iñaani Tajorentsi kameethashiretatsiri paerani. Eejatzi nokenkithashiryaakaakimiro maawaeni ikaminaakaeri Awinkatharite, riraga owawijaakotakaeri. Roojatzi rotyaanteeyakinanri aapatziyakagaeyemirini. Iroñaaka napiiteemiro nojankinateemiro pikenkithashiryaakoperotantyaawori maawaeni okaatzi kameethatatsiri.

³ Okameethatzi piyoteeyeni eerotzitarika ipokira Awinkatharite, ijekera osheki theenkantatsiri, rantashitayijeempiyaawoni oetarikapaeni ikowayitzirini rirori. Ishirontawenteeyarini Awinkatharite, ⁴ ikanteeyeni: "¿lantima Jesokirishito ari ipokae? Injii, injii, injii. ¿litaka iroñaaka? Tema kamaki

paerani. Eero ipokae. Paerani raamaawitakarini riraga itakaantaworini aapatziyariri roojatzi ikamaki, omaanta tee iñiiri, roojatzi iroñaaka. Paejatotaki paerani. „Piitzima eeroaka ari piñaagaeri? Injii, injii, injii. Roojatzi okantani kipatsi, tee opaashinitzi”. Rootaki ikanteeeyirini theenkantatsiri.

⁵ Riyotaki itheeyashita, omaanta tee ikoyi ikenkithashireero rantayitakirini Tajorentsi. Paerani ikantaki rirori: „Otzimeeta jenoki, eejatzi otzimeeta kipatsi”, roojatzi otzimantakari. Ari riwetsikakiro kipatsi, shi-towanaki niyanki inkaareki, iroñaaka otapotakawo inkaare. ⁶ Aritaki okantakari paerani, omaanta roojatzi rowashironkagaeyakirini riraga atziri eejatzi piratsipaeni ikaateeyinira ijeekantakarira Noe paerani. Rootaki rowashironkaanteeyakaririni, tee ijeekaeyini kameetha. Ari opariyaki antawo inkani, oonkanaka maawaeni kipatsi, eejatzi ithonkaeyanakan ieenkantatsiri. ⁷ Eejatzi ikantzi Tajorentsi: „Inja notayero jenoki eejatzi kipatsi, eejatzi notaakooyerini maawaeni jeekantawori”. Tema paerani ikantzini: „Niwetsikero kipatsi”, roojatzi otzimantakari. Iroñaaka ikantzi: „Inja notagaero kipatsi”, tema eejatzi rantero. Kyaaryo tekiraata omonkaatyta itaanteeyaaawori, omaanta iinja itagaero, eejatzi itaakooyerini maawaen ieenkantatsiri, rowashironkagaeyerini.

⁸ Iroñaaka, nonintanewopaeni, pikenkithashiryaaakooyeroni iroka: aetakaawitawo 1000 ojarentsi paeraniperoroña. Omaanta tee iitziro riraga Tajorentsi. Iñaakiro tee ojamanitzi, okimitzimotakari apaani kitejiri. Aeteeyironi tee ojamanitzi apaani kitejiri, omaantakya irira iñaakiro ojamani, okimitzimotakari 1000 ojarentsi. ⁹ Ñaakiro, aetakaawiteeyakawoni opaeranitaki, tekira imonkaatziro ikantakaeri: tekira ipokae Awinkatharite. Omaanta tee iitziro rirori opaeranitzi. Eero ramatawitee, omaanta ojamani royeeyirini theenkantatsiri, ikowaki ikenkithashiryaaoperoteeyaa, retakotantanakya okaatzi kaari kameethatatsi rantakiro eejatzi rookero. Ikowakiri maawaeni atziri eero riyaatanta paamariki kaari tsiwakanitatsini. ¹⁰ Omaanta kyaaryo iinja romapokaperotapae Awinkatharite, ipokaerika. Okimitaaganki tee ayotzi tsika ikaatzika ipoki koshintzi eejatzi tee ayotzi tsika ikaatzika ipokae Jesoshi. Antawo otonkanaki jenoki, toon: othonkaperotanakya, thopereee. Itaaperotanakya ompokiro, oorya, kashiri, maawaeni. Eejatzi kipatsi, otaanakya; eejatzi otaakotaperoeyanakyaani maawaeni riwetsikakiri Tajorentsi jaka kipatsiki eejatzi itaakoeyanakyaani maawaeni atziri: jeeeii.

¹¹ Ari iroñaaka ayoteeyanakini othonkaeya maawaeni añeyirini, rootaki okameethatantari akenkithashiryaanakya, aapatziyaperotyaari Tajorentsi, kameetha ajeekaperote. ¹² Kameetha aamagaeyaarini Jesokirishito ipokae, kameetha eejatzi anteeyenirini maawaeni ikowakaakaeri ishindsightanteeyaaari ipokae. Aririka omonkaataky, otaanakya jenoki eejatzi jenokijatopaeni othonkaeyanakyaani, maawaeni, thopereee. ¹³ Omaanta eenitatsi paashini ikantakaeri, ayotaki eero ramatawitee. Tema ikantzi: „Niwetsikae paashini jenoki owakirari, eejatzi kipatsi owakirari. Okameethaperotee roori, eero ijeekae antayiteeroni kaari kameethatatsi”.

Riweyaantapaakari rojankinari

¹⁴ Rootaki nonintaperotanewopaeni, paamagaeyantaworini ikantakaeri. Pikañaaperotya pijkeeki kameetha pikimitya Tajorentsi, eejatzi paakameethatawakagaeyaani; roojatzi aririka ipokae, iñaaperotapaakimi pikameethaperotaki, tektsi pantani. ¹⁵⁻¹⁶ Eejatzi pikenkithatakotero iroka: kyaaryo, tekira ipokae Awinkatharite, omaanta royaageyakirini paashinipaeni atziri raapatziyeyearini rirori rawijakoeyanteeyaarini. Rootaki rojankinateeyakimirini Paaworo rirori, riraga anintaperoeeyirini.

Osheki riyotaakiri Tajorentsi irira. Roojatzi rirori ikamantakotakaero iroka maawaeni rojankinari. Eenitatsi pomeentsitagaanteenchari rojankinayitzirini. Iroñaaka riraga kaari iyotatsi, riraga kaari aapatziyaperotariri Jesoshi, ikinakaashitakawo iñaani Paaworo, tee rothatayiro ikamantakoter. Eejatzi ikinakaashitayitakawoni paashini iñaani Tajorentsi, rootaki rowashironkaeyantyaaririni iinja.

¹⁷ Ari, nonintaperotanewopaeni, nokamantakimi tsika okantyaari iinja. Nokamantteyakimini ijeki riraga kaari kameethatayitatsini, piyathateyyaaririni Tajorentsi, riyotaantero theeyaantsi. Kyaaryoowa, paapatziyarikari, ikompitakaemikari. ¹⁸ Eekiro piyaatatye paapatziyaperotyaari Awinkatharite Jesokirishito, riraga owawijaakoeyakaerini, piyoperotantakariri. Thame iroñaaka eejatzi apinkathataperoeyerini, akanteetatyeyaaani. Aritaki okantyaari.

Naaka jankinatzimirori:

Peetero

RITAKANARI ROJANKINATZINIRI JOWA RIYOTAANEWOPAENI

Riraga iyotakoperotakagaeyakaeririni Tajorentsi riyoteeyakaeni tsika akantyaari ajeekantyaari jenokinta

¹⁻² Nokoyi niwethatemi eerokapaeni tsikarika pikanta pijeeki. Naaka Jowa jankinatzimiori iroka. Iroñaaka nojankinatakotakiri itaperotakawori ijeki. Paeraniperoroña, tekirani otzimini kipatsi, roojatzi ijeekitani riraga Jesoshi. Itsipatakarini ashitariri, riraga Pawa Tajorentsi, roojatzi ipokantapaaka jaka kipatsikika. Rirotaki iyotakoperotakagaeyakaeririni Ashitariri. Ikanta riyotagaeyakinani tsika akanteeyarini ajeekashiryaanteeyari jenokinta. Naaka maawaeni riyotaanewo nokemapiinteeeyakirini, noñaapiinteeeyirini, naminapiinteeeyakirini, nopampitapiinteeeyakirini: iroñaaka nokamanteeyemini tsika ikantari, eejatzi nokamanteeyemini tsika akantya añaaperotanteeyaririni janta jenokinta. ³ Irira noñaaperotakiri, nokemaperotakiri, rirotaki nokenkithatakotziri. Iroñaaka nokamantaperotemi tsika pikantya pikempiyaaminthatantenari kijokiro powanakina naaripaeni. Eejatzi akempinyaamminthantanyaaririi Asheeteri, eejatzi Itomi, riraga Jesokirishito.

⁴ Nojankinatzimiro iroka akimoshireperotanteeyarini kameetha.

Roshiyaperotakawo Tajorentsi kitejiri

⁵ Iroñaaka nokamantemiro ikamantakinari rirori. Maawaeni okaatzi rantziri Tajorentsi okameethatatz, rootaki roshiyaperotantakawori kitejiri koñeetyaaki kameetha: tee ikemakaaneentawo rantziro kaari kameethatatsi, rootaki kaari itsitenitaneeantari rirori. ⁶ Akanterika: “Nokimitakari: tema kijokiro nowakiri”, omaanta eenirorika antapiintziro kaari kameethatatsi, okimitaka eeniro akinaki tsiteniriki: atheeyashitaka amatawitashitakari paashinipaeni. ⁷ Omaanta Tajorentsi ikameethaperotaki, ikimitakawo ikinanaki rirori kitejiriki. Eejatzi aari, aririka kameetha ajeeki, okimitaka ajeekaki kitejiriki, akimitakotakari ikimitaaga rirori: akameethatawakagaeyakan. Ikamawentakae Jesoshi, riraga itomi Tajorentsi rowawijaakontakaeri: okimitaka rapaatawentakae riraa okitetanteeri kaari kameethatatsi antziri. Rootaki ifñaaperotanteeri Tajorentsi aaka kimitaka tekatsi antani. ⁸ Akanterika: “Tee nantziro kaari kameethatatsi”, aaka amatawitaacha apaniroeni, tekiraata ayotaperotziroota kyaaryooperotatsiri. ⁹ Tee ramatawitee Tajorentsi, ikameethaperotaki eejatzi ikyaaryoowentziro okaatzi ikantakaeri. Aririka athawetakotya akanteri: “Nantakiro iroka kaari kameethatatsi, eero napiiteero, eero pikijawentanawo inta pipeyakotenawo”, aritaki imatakiro: kyaaryo ikaminthaaakae, rowameethatatake, tema apaatawentakae riraa Jesoshi paerani okitetakaakae. ¹⁰ Akanteririkami Tajorentsi: “Tee nantziro kaari kameethatatsi”, kimitaka akimitakaantakari rirotaki theeri Tajorentsi. Tema ikantzi Iwaperiteki: “Maawaeni atziri rantziro kaari kameethatatsi”. Akanteririkami Tajorentsi: “Tee añiiro nantani”, rooma tekiraata ayoperotziro kameetha kyaaryooperotatsiri okantziri ifñaani. Tema athañaakawo okaatzi ikantakaeri.

2

¹ Iroñaaka, niyotaanewopaeni, nojankinateeyemironi eero panantawo kaari kameethatatsi. Enitatsi Pawakinta ñaanatakowenteeyakaerini, riraga

Jesokirishito, ikameethaperotaki. Aririka antero kaari kameethatatsi, ari iñaanatakowentakae. Ikanteri Ashitariri: "Pikaminthayeri riraga aapatziyani; tema nokamawentakiri".² Eenitatsi anteeyakirini maawaeni, rootaki ikamawenantaakaeri rirori koroshiki ikowashitaka. Tee apatziro ikamawenteeyirini anampijatzipaeni aaka, inta eejatzi ikamawenteeyakirini rirori maawaeni atziri, rowameethatanteeyakaerini Tajorentsi, eejatzi rirori-paeni maawaeni aapatziyariri Jesoshi. Roojatzi aapatziyaririka irira, eero ikijawenteero Tajorentsi kaari kameethatatsi anteeyakirini, eero rowashironkagae.

Aapatziyaperotariri Tajorentsi, rirotaki iyotziriri

³ Aririka akemijantaperotapiintero ikaminaakaeri Tajorentsi, ayoperoeyakini ashenkatakari. ⁴ Enitatsi kantashitachari ikantzi: "Nosheninkatakari Tajorentsi", omaanta tee imonkaatziro rantziniri ikaminaawitariri, rirotaki theeyinkari, riro amatawitaacha apaniroeni.
⁵ Omaanta aririka antaperotakiniri ikaminaakaeri Tajorentsi, aakaperotaki nintaperotakiriri. Rootaki ayotawakaantakari akititakari.
⁶ Akanterika: "Kijokiro nowakiri Tajorentsi", kameetha akanteetatyeyaaani akimitakotaari, ajeeki kameetha ikimitaaga Jesokirishito ijekawitanipaaerani.

⁷ Nonintaperotanewopaeni, kaari owakirari iroka nokaminaakimi, inta paerani pikemakiro. Paerani pitakawoni paapatziyakarini Jesoshi riraga Tajorentsi ikaminagaeyakaeroni. ⁸ Tee ayotawitani, okimitzimotawitakaeni ajeekaki tsiteniriki, omaanta ipokashiteyakaeni riraga Jesokirishito ryotakaakae, iroñaaaka okimitzimotanakae ajeekae kitejiriki. Rootaki napisitantzimirori. Ikyaryoowentakiro Jesokirishito inintaperoteyakaeni. Eejatzi eerori ari pikimitya pikaryaoyowentero pinintaperoteyeri paashinipaeni. ⁹ Aririka akantashitya: "Nokinaki kitejiriki, niyoperotziri Tajorentsi", omaanta eenirorika oonari ayemijantzinkarite, tekiraata ajeeki kitejiriki, inta eeniro akimita paerani akinaki tsiteniriki. ¹⁰ Omaanta aririka anintaperoteri ayemijantzinkaritepaeni, tema eekiro aatatyee ajeeki kitejiriki, akimitakari Tajorentsi, eejatzi eero antapiintziro kaari kameethatatsi.
¹¹ Omaanta ooñaririka rirori, kimitaka akinaki tsiteniriki, eeniro antapintziro kaari kameethatatsi. Tee ayotzi tsikarika akinanaki, kimitaka ot-sitenitzimotakae, rootaki kaari añaantawo oetarika.

Eero pikowaperotziro rantapiintziri theenkantatsiri

¹² Nonintanewopaeni, eeniro panteeyawitakarini, omaanta rowawijaakoeyakimini Jesoshi. Tema ipeyakotakimiro Tajorentsi okaatzi pantawitakari. Rootaki iroñaaaka nojankinatantzimirori iroka. ¹³ Eerripaeni yotziriri kameetha Tajorentsi oshiyariri shirampari pishintsishiretaki tema piyoteeyakirini Jesokirishito riraga itaperotawori ijekki, rootaki nojankinatantzimirori iroka. Eerripaeni antziniriri Tajorentsi oetarikapaeni, poshiyakari ewankaripaeni, tema panaakotakiri Jatanaashi tee pantziniri ikowakaawitakimiri, rootaki nojankinatantzimirori iroka. ¹⁴ Kyaaryo nojankinatzimiro eerripaeni kimitakimi neentsitepaeni, niyotaakimiro paapatziyari Jesoshi rootaki piyoteeyakirini ashitakaeri. Eerripaeni antaripaeni, piyotakiri riraga itaperotawori ijekaperotzi, rootaki nojankinatantzimirori iroka. Eerripaeni ewankari, pishintsiteeyanakini, pikaryaoyowentaperotakiro ikantziri Tajorentsi, eejatzi tee paapatziyanaari Jatanaashi, rootaki nojankinatantzimirori iroka.

¹⁵ Eero pikowaperotziro pantero rantapiintziri theenkantatsiri. Eero pikowaperotziro oetarikapaeni tee okameethatzzi ikowaperotziro jeekayitatsirini kipatsiki. Aririka pikowaperotero, eero pimatziro pinintaperoteri Tajorentsi. ¹⁶ Riraga kowaperotachari ijeeki kimirir theenkantatsiri eejatzi kowashitachari rashitari oetarikapaeni tema ari ikanteeyani jak: ikenkithashiryagaeyakironi oetarika ikowaperotakiri ranteri. Ikowaperotakiro oetarika iñaakiri, ikantakaaperotawo rashitawitaripaeni. Tee riro yoteeroni Pawa Tajorentsi, inta yotagaerori theenkantatsiri tsika ikanta ikenkithashiryaaantari. ¹⁷ Opeyaneeya jeekayitatsirini kipatsiki, eejatzi opeyaneeya maawaeni ikowaeyawitarini theenkantatsirini. Omaanta aririka anteniri Tajorentsi ikowakaakaeri, akanteetatyeeyaani ajeekae janta jenokinta Pawaki.

Kijaneentakiriri Rotyaantanewo Tajorentsi

¹⁸ Niyoataanewo, rooteentsi ipokae Jesokirishito riraga Rotyaantanewo Tajorentsi, eero ojamanitzi. Pikemakotakiri riraga paashini pokatsini, riraga amatawitantashitachari, kantatsini: “Tee ratziritapaaki Rotyaantanewo Tajorentsi. Tee ipoñeeya jenokinta Jesoshi. Kaari irira Rotyaantanewo Tajorentsi”. Irika iieteziri Kijaneentakiriri Rotyaantanewo Tajorentsi: ^{*} omaanta nokantemi, areeteeyakani osheki riroripaeni. Eenitatsi iroñaaka osheki amatawitantatsiri itheenkiri Jesoshi, rootaki ayoteeyantakarini eero ojamanitzi ipiyaperotanteeyarini Rotyaantanewo Tajorentsi jaka kipatsikika. ¹⁹ Paerani ikaateeyawiteeni riraga amatawitantatsiri, ikemijantawitani rirori, omaanta iroñaaka rotsiparyaanee. Tee ikimitaperotee. Ikimitaperotakaerikami, kijokiro rowanakaemi, omaanta rotsiparyagaeyakaeni. Iroñaaka riyotaperotanakiri maawaeni atziri tee ikimitee aaka, tee raapatziyaperotari Jesoshi. ²⁰ Omaantakya eero ka, rotyaanteyakimironi Tajorentsi Ishire, okithaatakaapaakimi. Iyotaaperotakimiro, rootaki pinashitanteeyakaworini eero ka kyaaryooperotatsiri eejatzi kaari kyaaryooperotsati. Tee pikimitari riraga kaari yoteroni kyaaryootatsiri: tee riyoti irinta. ²¹ Piyoteeyakironi kyaaryootatsiri, rootaki nojankinatantzimiroi iroka. Piyotaki amatawitantatsiri: eero ipoña Tajorentsiki, tema rowaga iñaani Tajorentsi rootaki kyaaryooperotatsiri. ²² Theeyaperotachari riraga Kijaneentakiriri Rotyaantanewo Tajorentsi riraga kantashitachari: “Riraga Jesoshi, kaari Rotyaantanewo Tajorentsi”. Tema itheenkakiri Ashitakaeri eejatzi itheenkakiri Itomi. ²³ Riraga theenkakiriri Itomi Tajorentsi, tee riyotziri Ashitariri eejatzi. Omaanta riraga kantaperotatsiri: “Jesoshi rirotaki Itomi Tajorentsi”, tema rirotaki yoperotziriri ashitariri. ²⁴ Pikanteetatyeeyaani pikenkithashireero pajankaneki iroka kyaaryooperotatsiri pikemakiri paerani. Aririka pikenkithashiryaaoperotakiro, aritaki kijokiro powanakiri Itomi Tajorentsi, eejatzi Ashitariri. ²⁵ Ajaa, iroka ikashiyakaakaeri: “Okanteetatyeeyaani ojeeki pishire”.

²⁶ Ari nojankinatakotakiri riraga amatawiteminimi, nokantemi: “Kyaaryoowa, ramatawitzimikarira”. ²⁷ Omaanta rotyaantakimiro Tajorentsi Ishire, okithaatakaapaakimi. Rootaki kaari pikowanta paashini yoteemini. Okithaatantakaakimiri, omatakayemiro othotyeemiro maawaeni iyotaaperotemiro. Kameetha iyotayemi, tee ottheeyaniita. Rooma iyotaakae kijokiro oyeri Jesokirishito: ari kijokiro poyer, pikantyaani.

* ^{2:18} Ipaante paashini Peru-jatzi okantzi “Kijaneentakiriri Rotyaantanewo Tajorentsi”: “Anti-cristo” eejatzi “enemigo de Cristo”.

Reentsitetakae Tajorentsi

²⁸ Iroñaaka, niyotaanewo, pikempiyaminthatakari Jesokirishito. Iinja ipokapae. Aririka pikantyaani pikempiyaminthatakari, ari piweshiryaaentawakyaari, eero pipashiwentakaawakari aririka ipokae.

²⁹ Aritaki ayotaki ikameethataki Tajorentsi. Aririka eekiro riyaatayee rantero kameethaperotatsiri riraga atziri, aritaki ayotanakiri rirori reentsitetakari Tajorentsi.

3

¹ Tee amatziro athotyeero tsika okaatzika inintaperotakae Pawa Tajorentsi. Tema ikantakae rirori: "Eerokateeyakini notyomipaeni, nishintyopaeni". Kyaaryo ikantzi. Ñaakiro, osheki inintaperotakae. Omaanta tee riyotziri theenkantatsiri tsikarika ikanta, rootaki kaari riyotantee akaa rashii reentsite. ² Iroñaaka, nonintaperotanewopaeni, eero ka itomipaeni Tajorentsi, rishintopae. Tekira ayotzi tsikarika akantaperotyaari iinja. Aririka ipiyapae jaka kipatsikika Jesoshi, añaawaaeri tsikarika ikantaperota. Roojatzikya akimitaperotanakyaaari aaka. ³ Ayoteeyirini rirorika piyaacha, rootaki akowantakari iroñaaka akameethatanaki: akimityaari rirori, ikameethataki. ⁴ Omaanta aririka eekiro aatatyee antero kaari kameethatatsi, tee aapatziyaperotawo ikaminaawitakaeri Tajorentsi. Tee okameethatzi apiyathathyawo ikaminaawitakaeri. ⁵ Rooma piyotaki ipokapaaki riraga Jesoshi paerani jaka kipatsikika imatakaakae eero anantawo kaari kameethatatsi. Piyotaki eejatzi tee ikemakaaneentawo rantziro rirori kaari kameethatatsi. ⁶ Rootaki aririka kijokiro owanakiri, eero antapiintziro aari kaari kameethatatsi. Omaanta riraga antapiintzironi kaari kameethatatsi tekira raapatziyari rirori eejatzi tee riyotziri tsikarika ikanta.

⁷ Rootaki nokantemiri niyotaanewopaeni, eero pishinetziri paashini rantakayemiro kaari kameethatatsi. Aririka eekiro aatatyee antapiintero kameethatatsiri, tema akameethataki: amonkaatakari Jesokirishito, ikameethataki. ⁸ Omaanta riraga antapiintzirori kaari kameethatatsi, reentsitetakari iwinkatharite kamaripaeni: rooma rirotaki itaperotakawori antzirori kaari kameethatatsi. Rootaki ipokantapaakari Itomi Tajorentsi. Ro ipokashitaperotziri rookakayeri maawaeni rantayitzirini iwinkatharite kamaari. ⁹ Aririka reentsitetakae Tajorentsi, eero antapiintziro kaari kameethatatsi. Reentsitetakae, rootaki okithataakaantakaeri Ishire, akimitakari riraga Tajorentsi. Rootaki kaari antapiinantawo kaari kameethatatsi. ¹⁰ Rootaki ayotantakari ashenginkatafakari Tajorentsi. Riraga kaari antzirori kameethatatsiri, tee isheninkatari Tajorentsi. Eejatzi ikimita riraga kaari nintaperotziri iyemijantzinkarite eejatzi paashinipaeni atziri, tee isheninkatari Tajorentsi, rootaki ayotantariri reentsitetakari iwinkatharite kamaari. ¹¹ Ajaa, iroka ritakimiri Tajorentsi ikantakimiri paerani owakira paapatziyantakariri: "Okameethatzi anintashireperotawakagaeyaani". ¹² Eero oshiyakotari Kayeeni, riraga jeekatsiri paeraniperoroña: reentsitetakari iwinkatharite kamaari. Tema roonakari rirentzi rootaki rowamaantakariri irira. ¿lita rowamaantakariri? Ashi royiro tee ikameethatzi, omaanta iñaakotakirira rirentzi kameethataki okaatzi rantakiri, rootaki rowamaantakariri.

Pinintaperoteri piyemijantzinkaritepaeni

¹³ Noyemijantzinkarite, ikijemirika theenkantatsiri, eero pikenkithashiryaaashita, "¿lita ikijantakinari?" Rooma ashii royiro theenkantatsiri ikijantzi. ¹⁴ Anintaperotakiri ayemijantzinkarite, rootaki

omawitya paerani tee ayotawitarini Tajorentsi akamashirewitaka, iroñaaka aapatziyari rootaki owañaashiretantakaeri Ishire. Ayoperotziro iroka tema rootaki anintaperotantakariri ayemijantzinkarite. Riraga kaari nintashireperotziri aapatziyariri Jesoshi, eekiro ryaatatyte ikamashireperotzi. ¹⁵ Riraga oonakariri atziri, aritaki ikenkithashiryaa kotsiziri Tajorentsi, rirotaki owamaantatsiri. Piyotaki eero ishinetziri Tajorentsi owamaantatsiri ikanteetatyeyeaani itsipatyaari inta rotyaanteri paamaariki. ¹⁶ Riraga Jesokirishito riro kowashiteencha ikamawentakae, rootaki ayotantakariri inintaperotakae. Eejatzi akimitya aari. Okameethatzi apashityaari ayemijantzinkarite oetarika koetyeemotariri omawitya roojatzi akamantakya. ¹⁷ Añaawitaririka rashironkaaka osheki ayemijantzinkarite, teerika akoyi akaminthayeri, ḡanintaperotzirima Tajorentsi akimita akantzi? Teewee. ¹⁸ Nonintanewopaeni, tee okameethatzi akantashitya: “Nonintaperotziri maawaeni”. Inta okameethatzi aneshironkaperoteri, eejatzi anintaperoteri amitakoperoteri maawaeni.

¹⁹ Rootaki ayoperotantakari oyaataperotakiri Tajorentsi, tee añiyo antani. Rootaki iñaaperotanteeri rirori akameethaperote. ²⁰ Omawitya ajankaneki okantakotakae: “Eenitatsi pantani”, tema Tajorentsi ranaakotakiro ajankane: riyotzitakaero maawaeni, oetarikapaeni. ²¹ Eejatzi, nonintaperotanewo, aririka athawetakotya eejatzi ipeyakotenawo Tajorentsi kaari kameethatatsi antakiri, ayotziro eejatzi okameethatzi akenkithataapiinteri Tajorentsi. ²² Aririka akemijantaperoteri ikaminaakaeri, eejatzi amateniri ikowakaakaeri, ayotaki aririka akowakoteririka, aritaki ikemakae; tema ari ipashitakaero. ²³ Ajaa, iroka ikaminaakaeri: “Paapatziyaari notyomi Jesokirishito. Pimonkaateniri ikantakimiri rirori: ‘Pinintaperotawakaeyani’”. ²⁴ Aririka aapatziyaperotyaawo ikantakaeri, akempiyaminthataari. Rotyaantakaeniro Ishire okithaatakaakae, rootaki ayotantakari akempiyaminthatakari.

4

Piyotaperoteri maawaeni iyotaantzirori kameethatatsiri eejatzi kaari kameethatatsi

¹ Nonintaperotanewopaeni, eero paapatziyayitarini intsipaete maawaeni iyotaawitemini: ramatawitzimikari. Aririka ikantemi: “Rotyaantakina Tajorentsi”, omaanta pityaawo pojampiteri oetarika riyotagaemiri, piyotantyaariri kyaaryorika rotyaantakiri Tajorentsi. Jaka kipatsikika eenitatsi osheki kowatsiri ramatawitanite. ² Ajaa, iroka piyotantyaariri otyaan-tanewopaeni Ishire Tajorentsi: ikanteeyemini rirori: “Ipoñaaka Jesoshi riraga Itomi Tajorentsi jenokinta ipokapaaki jaka kipatsikika ratziriperotapaaki”. ³ Omaanta tee otyaantziri Ishire Tajorentsi kowatsiri ramatawitemi riraga kaari kantatsini: “Jesoshi rirotaki Itomi Tajorentsi, ratziriperotapaaki”. Omaanta rirotaki theenkiriri irira, tema ikimikari riraga Kijaneentakiriri Rotyaantanewo Tajorentsi. Tema pike-makiri irira ikanteetzi: “Ipoke iinja”. Omaanta nokantemi: “Pokaki ki-jakiriripaeni iroñaaka”. ⁴ Niyotaanewopaeni, reentsitetakimi Tajorentsi, kijokiro rowakimi. Tema ipinkathariwenantzi irira ranaakotakiri maawaeni kowawitachari ramatawitemimi. Imatakaakimi, rootaki kaari paapatziyaperotaari Jatanaashi, riraga theeyachari jeekatsirika jaka. ⁵ Rooma

reentsitetakari irira riraga amatawitantatsiri, rootaki ikenkithashiryaa-takawori ikoyiri atziri. Ikemijantawakiri atziri rirori.⁶ Omaantakya naaka-paeni nosheninkatakari Tajorentsi, rotyaanteeyakinani niyotaantyiariri atziripaeni kyaaryooperotatsiri. Raapatziyakae maawaeni iyotziriri rirori, rootaki ayotantariri okithaatakaakari Ishire Tajorentsi: rowaga yoteeriri kyaaryooperotatsiri. Riraga kaari iyoterini Tajorentsi, tee ikemijantana, rootaki ayotantakariri rirotaki amatawitantaniri.

Thame anintaperotawakaya

⁷ Nonintaperotanewopaeni, thame anintaperotawakaya. Rirotaki Tajorentsi itaperotakawori riyotaakae anintaperotawakaantyari. Aririka anintaperoteri paashinipaeni, aakaperotaki reentsitepero Tajorentsi,⁸ riraga kaari nintashireperotziri aapatziyariri Jesoshi, tee reentsitetari Tajorentsi: reentsitetyaaririkami, aritaki ikimitakyaarimi rirori, tema ashi royoiro inintaperotantzi.⁹ Rootaki ayotantakari inintaperotakae, rotyaantakiri Itomi rapintzite kipatsikika ikamawentakae rowawijaakotantakaeri, akanteetatyeyaaani ajeekimotantyaaari.¹⁰ ¿Ninka nintaperotantatsiri? Tee aaka anintaperotziri Tajorentsi, inta inintaperoyakaeni rirori. Rotyaantakaeri Itomi, ikamawentakae, rowawijaakotantakaeri ikowashitaka. Iroñaaka tee ikenkithashiryagaero Tajorentsi antawitari, inta ipeyakoteero eero rowashironkagae: tema riraga Itomi ipinawentakaero okaatzi antani janta koroshiki.

¹¹ Ñaakiro, nonintaperotanewo, inintaperotakaeroña Tajorentsi. Rootaki okameethatantari anintaperotawakaya aakapaeni.

¹² Tektsi ñeerinai Tajorentsi, omaanta aririka anintaperotawakaeya, kijokiro rowanakae irira, imatakaakae akimitakari, rootaki eekhiro aatayte anintaperotantanakariri.¹³ Rotyaantakaero Ishire, ikithaatakaero, omatakaakae akimityaari rirori. Rootaki ayotantakari akempiyaminthatari.¹⁴ Rotyaantakiri ashitakaeri Itomi jika kipatsikika rowawijaakotantakaerori maawaeni atziri kaari kameethatatsi antakiri. Noñeyakirini, rootaki iroñaaka nokamantakotantakariri.¹⁵ Akanterika: "Rirotaki Jesoshi Itomi Tajorentsi", kijokiro rowanakae Tajorentsi. Eejatzi akimitya aari, kijokiro owanakiri: rootaki akimitawakagaeyantyaarin maawaeni.¹⁶ Ari ayoperotaki inintaperotakae, tema aapatziyakawo. Ashi royoiro inintaperotantzi. Aririka ashi oyiro anintaperotawakaya aari, akempiyaminthatari Tajorentsi, eejatzi ijekakaakae kameetha akimitakari rirori.¹⁷ Paata aririka akamae, eero athaawantawaari Tajorentsi. Aririka aweshiryawentyaari, ayotanaki anintaperotakari aari, aritaki amonkaatakari riraga Jesokirishito.¹⁸ Aririka ayoperotaki anintaperotakiriroña kameetha eejatzi akemijantaperoteri rirori, ¿iitakakya athaawanantyaaari? Ayoterirkami ari rowashironkakae, tema aritaki athaawantakyaarimi. Riraga thaawanttariri Tajorentsi, tekiraata inintaperotziri eejatzi tekiraata ikemijantaperotziri: rootaki ithaawanantakariri.¹⁹ Ritakae Tajorentsi inintaperotakae, thame anintaperoteri aari iroñaaka.²⁰ Ikanterika atziri: "Nonintashireperotziri Tajorentsi", omaanta ikijiririka atziri roonaririka, rirotaki theeri. Teerika inintaperotziri atziri, tektsi ikanteri inintaperoteri Tajorentsi. Ñaakiro, eerika imatziro inintaperoteri atziri iñaapiintziri, ¿tsika ikantyaaka inintaperotantyaaari Tajorentsi? Kaari iñeetzi rirori.²¹ Ajaa, iroka ikaminaakaeri irira: "Aririka anintaperoteri Tajorentsi, eejatzi akimiteri atziripaeni, anintaperoteri rirori".

5

Okaataki 3 rirotakaakaeri Jesoshi rirotaki Rotyaantanewo Tajorentsi

¹ Aririka ayotakiri Jesoshi rirotaki Rotyaantanewo Tajorentsi aaka reentsite Tajorentsi. Tema owañaakaero ashire rowaga Ishire rirori. Aririka anintaperoteri ashitariri, anintaperotzityaari eejatzi maawaeni reentsitepaeni, riraga owañaakir ishirepaeni. ² Aririka, akemijantaperoteri ikantakaerai Tajorentsi, amonkaatakari anintaperoteri, rootaki ayotantyaari anintaperotziri maawaeni reentsitetayitarini. ³ Anintaperotziririka riraga Tajorentsi, akemijantaperoteri ikaminaakaeri. Tee opomeentsitaperota anteniri ikantakaeri. ⁴ Aririka rashitakae riraga Tajorentsi, eero oyaatziri theenkantsatsiri. Ameentaperotakari Jesoshi, rootaki anaakotantakariri riraga theenkantsatsiri: kaari oyaatantari. ⁵ ¿Ninka kaari oyaatziriri theenkantsatsiri? Tema rirotaki iyoperotakiriri Jesoshi, kantsatsiri: "Jesoshi rirotaki Itomipero Tajorentsi".

⁶ Paerani, ipokantapaakari Jesokirishito kipatsikika, ikaawoshitawentakari Tajorentsi iñaaki, eejatzi ikamawentakae, ayotantakari irira rirotaki Rotyaantanewo Tajorentsi. Tee apatziro ikaawoshitawentakari Tajorentsi eejatzi ikamawentakae: rapaatawentakae riraa. Eejatzi iyotaakae Ishire Tajorentsi tsika ikantari. Kyaaryoopero iyotaakae. ⁷ Janta jenokinta okaatzti 3 kantakotziriri irira Jesoshi rirotaki Rotyaantanewo Tajorentsi: riraga Iriri, rowaga Iwaperite Tajorentsi, eejatzi rowaga Ishire. ⁸ Eejatzi jika kipatsiki eenitatsi 3 kantakotziriri: rowaga Ishire, ikaawoshitawentakari Tajorentsi, eejatzi riraa rapaatawentakae ikamawentakari. Omonkaatawakaaka, iyotakaakae tsika ikantari riraga Jesoshi. ⁹ Rooma aapatziyakawo ikantakaeri atziri, omaanta ranaakotakiri Tajorentsi atziri, kyaaryo ikanantaki rirori. Ikantakoperotakiri Itomi. ¹⁰ Aririka aapatziyaperotakyaari Itomi, akenkithashireperotakiri, eejatzi anteniri ikowakaakaeri. Riraga kaari aapatziyari Tajorentsi, tee ikenkithashiriio ikantakotziriri Tajorentsi Itomi: itheenkakiri rirori, tee rantziniri ikowakaakiriri, inta iitziri rirori theeyinkari. ¹¹ Aapatziyakari aaka Itomi, rootaki ijekakaanteeri Tajorentsi aaka jika ironaaka eejatzi iinja janta jenokinta, akanteetatyeeyaani. ¹² Aritaki akanteetatyeeyaani añaagae maawaeni ayoperotziri Itomi eejatzi akempiyaminthatari. Riraga kaari iyoperotziri, kaari owañi ishire rootaki tekatsi ikantya rareetya janta jenokinta.

Pamanapiinteri Tajorentsi

¹³ Paapatziyakari Itomi Tajorentsi, ironaaka nojankinatzimiro piyotantyaari pikanteetatyeeyaani añaagae pishire ironaaka eejatzi iinja janta jenokinta. ¹⁴ Eero apashiwenta akenkithatakayeri: eenitatsi ikowakaakaeri antapiinteniriri. Aririka anethayeri oetarika ikowakaakaeri tema ayotaki aritaki ikemijantakae. ¹⁵ Ayotaki oetarika akanteriri, ikemijantakae. Eejatzi ayotaki aritaki imatakaakaero iroka akantakiriri. ¹⁶ Aririka piñeeri piyemijantzinkarite rantziro kaari kameethatatsi, omaanta teerika itheenkiri Tajorentsi, pamanakowentyaari ramitakontanteeri rookantyaawori kaari kameethatatsi rantziri ijekantyaari kameetha. Eenitatsi rantakiri paashini theenkantaperotatsiri: aririka piñaakotakiri, piyotanaki riyaate rirori paamariki kaari tsiwakanitatsini. Tee nokantzimi pamanakowentyaari irinta. ¹⁷ Tee okameethaperotzi antero kaari kameethatatsi, omaanta eero aetakaashita maawaeni antzirori kaari kameethatatsi riyaate paamariki kaari tsiwakanitatsini.

¹⁸ Ayotaki aririka rashitakae Tajorentsi, tee antapiintziro kaari kameethatatsi. Rookakowentakae Itomi, tekatsi ikantee Jatanaashi rowashironkaeri. ¹⁹ Ayotaki ashenkatakari Tajorentsi. Omaanta maawaeni theenkantatsiri, ipinkathariwentakiri iwinkatharite kamaaripaeni. ²⁰ Ayotaki ipokaki paerani Itomi Tajorentsi, rirotaki iyotakaakaeri, ayoperotantariri riraga Tajorentsipero. Tema eejatzsi Jesoshi rirotaki Tajorentsipero. Rowaañagaeyakaeni, akanteetapaatyeeyaani añaagaeyapaeni janta jenokinta. Tema akempiyaminthari Tajorentsi eejatzsi Itomi. ²¹ Kyaaryo Jesoshi rirotaki Tajorentsipero. Rootaki niyotaanewo, kyaaryoowa pikemijantaperotzirokari iitajorentsitashitayarini.

Ari okaatzsi.

Naaka jankinatzimiori:

Jowa

RAPIITAKIRO JOWA ROJANKINATZINIRI RIYOTAANEWO

1-2 Nokoyi niwethatemi, choeni, tsikarika pikanta pijeeki. Eejatzi niwethatyari peentsitepaeni. Naaka jewawentziriri ayemijantzinkarite jaka. Niyotaki, choeni, riyoyaakimi Tajorentsi eeroka eejatzi peentsitepaeni piyotantakariri. Kyaaryo, nonintaperoeyakimini. Tee apatziro naari nonintaperoeyakimini, eejatzi ikimiteeyakani maawaeni ayemijantzinkarite: intintaperotakimi. Osheki aapatziyakawo ikantziri Tajorentsi, aritaki akan-teetateeyeaani, tema kyaaryooperotaki okamanteeyakaerini. **3** Osheki intaperoeyakaen Pawa Tajorentsi, eejatzi Itomi, riraga Awinkatharite Jesokirishito, kyaaryo rootaki iroka riyotagaeyakaerini. Eejatzi ikantteetatyeyaani ineshironkatee, rowawijaakotakae, ijeekakagae kameetha.

Enitatsi iinja oshekini theeyakowentyaarini Jesokirishito

4 Noñaayitakirini apaanipaeni peentsite osheki niweshiryaaawentakari. Tema kameetha ijeekayitzini, ikemijantaperotakiro kyaaryootatsiri riyotagaeyakaerini Ashiteeri Tajorentsi, eejatzi rantziniri rirori maawaeni ikowakagaeyakaerini. **5** Iroñaaka, choeni, nokowaki nokenkithashryaakagaemiro ritakaeri Tajorentsi riyotaakaeri paerani: okameethatzi anintaperotawakaeya, maawaeni. Tee naaka ityaawoni nyoteemiro iroka. **6** Aririka anintaperoteri Tajorentsi, amonkaateniri maawaeni ikowakaakaeri. Rootaki ikowakagaeyakaerini ashi oyiro anintaperotawakagaeyaani, maawaeni, akyaaaryooowentero. Tema rootaki ikantteeyakaerini paeran.

7 Enitatsi iroñaaka oshekini amatawitantsiri, riyotaantziro theeyaantsi, ikanteeyini tee ipoñeeya Jesokirishito jenokinta, tee ratziritaperotapaaki jaka kipatsiki. Kaari irira Rotyaantanewo Tajorentsi inta irira atziripero. Riraga kanteentsiri iroka rivotaki theeyakowentari Jesokirishito, ikijaneentakiri; tee ikoyi raapatziyaari. **8** Paamayaarira: ramatawitzimikari. Kameetha pikyaaryooowentero pantapiinteniri Tajorentsi ikowakaakimiri; aririka pikantyaani, eero patsipetashitawo, ari ijeekakagaeyemini janta jenokinta. Omaanta paamayaarira riraga kowatsiri ramatawitemi: aririka poyaatawitaneyyaari, patsipetashityaawo maawaeni pantawitakanariri Tajorentsi, eero ijeekakayimi janta jenokinta. **9** Kyaaryoowa, pookirikarira Jesokirishito: eerorik eekiro piyaatataye paapatziyeeyawoni riyotaakaeri rirori, tekira piyoperotziri Tajorentsi. Rooma aririka pikantyaani pikenkithashireero riyotaakaeri, piyotziri irira eejatzi Ashitariri: kijokiro rowakimi Ashitakaeri eejatzi Itomi. **10** Riyaatashitemirika atziri riyoteemi, okameethatzi piyotawakirri kameetharika riyotaakopaintziri riraga Jesokirishito. Teerika okameethatzi iroka ikowawitari riyoteemirimi, eero paakameethatawakiri: eero pijeekakayiri pipankoki, eerokya pikemijantziri. **11** Aririka paakameethatawakiri, aritaki pikaatakiri eerori piyotaantziro theeyaantsi. Tee okameethatziroña.

Riweyaantakawo rojankinari

12 Eenitatsi paashini oshekini nokowaki nokantemirimi, omaanta tee nokoyi nothotaayemiro nojankinatemiro. Nokowaki nopoki nareetemi. Aririka

añaawakagaeyaani, nothotyeemiro nokamantemi maawaeni. Eejatzi aki-moshireeyantanakyaarini maawaeni.¹³ Eeniro jaka eentsitepaeni pirento. Tema riyoyaakiri Tajorentsi. Riwethateeyakimini rirori. Ari okaatzl.

Naaka jankinatzimirori:

Jowa

RAPIITZINIRI EEJATZI ROJANKINATZINIRI JOWA RIYOTAANEWO

¹ Nokoyi niwethatemi, Kaayo, tsikarika pikanta pijeeki. Naaka Jowa, jew-awentziriri ayemijantzinkarite jaka. Kyaaryo, osheki nonintaperotakimi.

Kameetha pineshironkateri ayemijantzinkarite

² Nokamantemi, nonintaperotanewo, namanapiintakiri Tajorentsi, nokantakowentapiintakimi: nokantziri itajonkakowentem kameetha pijeekantyaari, eero agaemi mantsiyarentsi. Nirotaki paapatziyap-erotakari, eejatzi nokantakowentzimi pishintsiwathataperotantyaari eejatzi pishintshireperotantyaari. ³ Enenitatsi areetapaenchari ayemijantzinkarite, ikamantapaakina pikyaaryooowentziro pijeeki kameetha pantapiintziro kyaaryooperotatsiri, eejatzi paapatziyaperotakari Tajorentsi, rootaki nokimoshirewenantakimiri. ⁴ Nokimoshireperotaki nokemakotantakariri niyotaanewo ikempoyaaperotakiro kameetha okaatzi niyotaakiriri paerani. Tema rootaki kyaaryooperotatsiri. Kijokiro rowakiro okantziri iñaani Tajorentsi.

⁵ Nonintaperotanewo, pikyaaryooowentaperotakiro pikaminthagaeyakirini ayemijantzinkarite, pithotyaakiri: riraga poñaacharipaeni paashinikipaeni nampitsi, omawitya kaari piyotzi. Okameethataki.

⁶ Ikamantakina naaka eejatzi maawaeni ayemijantzinkarite jaka, osheki pinintaperoeyawakirini. Aririka rareetemi eejatzi pipankoki, okameethataki pamitakoteri; aririka ryaatanee, pipaeyawakirini koetyeemotariri: rootaki ikowakaakimiri Tajorentsi. ⁷ Ikinakinayitanakini ikenkithatakopiintziri Jesokirishito, tektsi raawakinirini riraga kaari aapatziyariri, ⁸ rootaki okameethatantari etakoeyaarini aaka, amitakooyerini imatantyaawori ikenkithatero rowaga kyaaryooperotatsiri ikantziri Tajorentsi: rootaki akimitantawakaantyaari antakiniri Tajorentsi.

⁹ Enenitatsi nojankinatawitakanariri maawaeni ayemijantzinkarite janta, omaanta riraga Riyooterijeshi tee ikoyi raapatziyawakyaawo eejatzi tee ikoyi ipinkathatena. Ikowaperotaki rirotakita jewawenterini kemijantzinkaripaeni janta. ¹⁰ Nareetanteeyemirini nokenkithatakagaeya-paakimini tsikarika ikantari: itheeyakotakina, ikantzimatakina. Eejatzi, rareetantawitakariri ayemijantzinkarite janta, tee raakameethatawakiriri. Eejatzi ikijakiri riraga aakameethatawakiriri areetachari, eejatzi tee ikowakagaeyirini itsipatyari janta ipiyotapiintaga aapatziyariri Jesoshi.

¹¹ Nonintaperotanewo, tee okameethatziroña iroka rantayitakirini riraganki: eero poshiyakotari. Inta poshiyakotyaari antzirori kameethaperotayitatsirini. Riraga antapiintayitzirorini kameethatatsiri, riyyotziri Tajorentsi; riraga antapiintayitzirorini kaari kameethatatsi, tee riyyotziri. ¹² Kyaaryo, ikameethaperotaki Rimiiteyo. Rooma iñaaperoeyakirini maawaeni aapatziyariri Jesoshi jaka ikameethatzi, eejatzi naari noñaaperotakiri ikameethatzi. Piyoperotzi okaatzi noñaawaetapiintziri rootaki kyaaryooperotatsiri.

Riveyaantakawo rojankinari

¹³ Enenitatsi osheki nokowawitakari nokamantemirimi, omaanta tee nokoyi nojankinatemiro maawaeni. ¹⁴ Nirotaki rooteentsi noñeemi: añaawakagaeyaarika paata janta, ari nothotyeemiro, nokamantemiro maawaeni. ¹⁵ Nokowaki Tajorentsi ijekakayemi kameetha.

Riwethateeyakimini maawaeni ayemijantzinkaritepaeni jaka.
ayemijantzinkaritepaeni janta, niwethateeyarini, maawaeni.
Naaka jankinatzimirori:

Eejatzi

Jowa

RIRAGA JOORASHI ROJANKINATZINIRIRI IYEMIJANTZINKARITE

¹ Nokoyi niwethatemi, noyemijantzinkarite, tsikarika pikanta pijkeeki. Naaka Joorashi jankinatzimirori iroka, naaka pankinatanariri Jesokirishito; naaka rirentzi Jantyaako. Kyaaryo niyotakimi riyyoyeeyakimini Pawa Tajorentsí, rootaki paapatziyeeeyantaririni, eejatzi osheki intaperoeyakimini rirori. Ikempoyaawenteeyakimini, piñaanteeyaaaririni iinja Jesokirishito. ² Nokowaki osheki ineshironkateeyemini, kameetha ijeekakagaeyemini. Eejatzi nokowaki paakameethatawakagaeyaani maawaeni, osheki pinintawakagaeyani.

Paamayaarira kowatsiri ramatawitemi

³ Piyoteeyakini osheki nonintaperoeyakimini. Tema rowawi-jaakoeyakaeni Tajorentsí. Inkaaganki nokenkithashiryaaawitakawo nokamantemiromi tsika ikantakaeka rirori rowawijaakotantakaeri: itajonkawenteeyakaeni, ikaminthaakae, maawaeni; omaanta iroñaka eero nokamantzimiro iroka. Tema eenitatsi paashini nokoyi nokamantemiri. Iroñaka nokantzimi: nokowakaakimi piyyaaryoowentero paapatziyaperotaawo riyotagaeyakaerini Tajorentsí paerani, rooma tee opaashinitzi. Iroñaka eero paapatziyari riraga paashinipaeni kowaeyawitacharini ramatawiteeyemini. ⁴ Eenitatsi riraga kantatsiri: "Naapatziyari Jesoshi", omaanta ramatawitantzi. Riyotzi ineshironkaeyakaeni Tajorentsí, rowawijaakoeyakaeni. Omaanta eejatzi ikantashiteeyakimini riraganki: "Okameethatzi anteeyeroni oetarika akowaeyirini, eero ikejue rirori", omaanta ramatawitashitzimi. Tee ipinkathatziri Awinkatharite Jesokirishito, rootaki riyaatantyaari iinja paamariki kaari tsiwakanitatsini. Tema aritaki okantzi Iwaperite Tajorentsí.

⁵ Eeniyo piyoperoeyakirini, omaanta nokoyi nokenkithashiryaa-agaemiro eejatzi. Paerani osheki rashironkaeyakani maawaeni joriyyopaeni janta Ejjipitoki, omaanta rowawijaakoeyakirini Tajorentsí, ragaeyaneerini paashiniki kipatsi. Omaanta joriyyopaeni rirotaki theenkiriri Tajorentsí, rootaki rowamaantakaririni maawaeni riroripaeni.

⁶ Eejatzi paeraniperoroña ijeekawitaní jenokinta ronampiripaeni Tajorentsí, ikameethaperowitani, omaanta ipiyathatantakariri irira. Iroñaka tee ijeekanee janta okameetheetyaaperotzinta, inta rookaeri janta jaawiki, otsiteniperotakinta. Rotsiparyaaaperotanakari rirori. Aritaki ijeekaki janta roojotakitya kareenatháki, roojatzi iinja aririka omonkaatapaakya kitejittatsiri ikantakowenantyaariri, rotyaanantyaariri paamariki kaari tsiwakanitatsini. ⁷ Eejatzi ikimiwitteeyakani riraga joroomajatzini eejatzi komoorajatzini, eejatzi maawaeni isheninkapaeni, osheki ranteeyakironi kaari kameethatatsi. Ithawinateeyakawoni iyashiyaniipaeni, ipiyaankashitawakagaeyakani; shirampari rantatenkatawakagaeyani ishiramparinkaeteki eejatzi omatzitanakawo tsinani roori. Rootaki rowashironkaanteeyakaririni Tajorentsí, maawaeni; rootaki ayotantakari ari ikemaatsítakyaawo paamari kaari tsiwakanitatsini, tema ro rowashironkagaeyantyaaririni maawaeni antapiintzirori kaari kameethatatsi: ikanteetatyeyaaani ikemaatsityaawo paamari.

⁸ Omaanta tee ikenkithashireeyani riraga amatawitantatsiri. Ikantatyaaani ithawinatawo iyashiyani, rantatenkatawakaaka ishiramparinkaeteki eejatzi; itheenkakiri Iwinkatharite riraga Tajorentsi, ishirontawenteeyakarini; ikantzimateeyakirini riraga kameethari ronampiripaeni Tajorentsi. Tema maawaeni iroka owaaperotakiri ishireki.

⁹ Paeraniperoroña ikanteetzini: ikamantakarini Moeseeshi, ikowawita Jatanaashi raanakirimi janta iwatha paamarikinta kaari tsiwakanitatsini. Eejatzi ikimitaka Miyiri, apaani jewatatsiri ronampiripaeni Tajorentsi: ikowakirimi raanakirimi rirori jenokinta. Iñaanatawakaanteeyakarini. Riraga Miyiri riyotaki tee okameethatzi ikantakowenantaariri Jatanaashi, eejatzi tee okameethatzi itheeyakowentyaari, rootaki kaari rakakotantariri. Apatziro ikantziri: "Irira Tajorentsi piyatemini". Rootaki ikantakiriri.

¹⁰ Noyemijantzinkarite, riraga kowatsiripaeni ramatawiteeyemini tee riyotziro ijeeki kameetha, rootaki ikantzimatanteeri aaka aririka ajeeki kameetha. Tee añiiro riyotantari, ikimiteeyakarini tsimeri: rantashiteeyawoni oetarika ikoyiri. Rootaki rowashironkaeyantyaaririni Tajorentsi, rashironkaeyakaani. ¹¹ ¡Ashironkaamatsiterini! Ikimiteeyakarini riraga Kayeeni, riraga owamaakiririni rirentzini. Ikimiteeyakarini riraga Waraamini: ipinateetakiri koriki, rootaki ranantakawori kaari kameethatatsi. Ikimiteeyakarini eejatzi riraga Koree eejatzi isheninkapaeni: ipiyathatakara paerani Moeseeshi. Tema rootaki rowashironkaantzifikaririni Tajorentsi. Maawaeni amatawitantatsiri eejatzi ikimiteeri inja rowashironkaeteri. ¹² Pamine, aririka pipiyotapiunteeyaani powaeaiana, pikowaeyawitani pinitashireper-oeyawakagaeyaanimi, pikaminthaawakagaeyaanimi. Omaanta ikaateeyapaakimini riragankipaeni, rootaki kaari pantaperotantawo kameethari. Tee riyotzi rirori ipashiwentya, osheki rowaagatashita, tee ikenkithashiri paashinipaeni. Irirapaeni roshiyari shentziriri rowishate kaari owaakaari kameetha rowishatepaeni inta apaniroeni rowaagata rirori. Osheki iñaawaetashwaeta wero, wero, wero, omaanta tee ramitakoeyemini. Ikimitashitakawo menkoru amatawiteeyemini: amirorika antawo tamypaa, piitakaashitawitakawo opariyatyeemi inkani, omaanta eero opariyi. Ikimitakawo inchato kaari tzimatsi okithoki, tee okameethatzi akapatero; inta okameethatzi atoyeru, apiyoteero, atayero. ¹³ Tema piñaapiinteeyironi othappyakaani opitsishimoretzi, tee kameetha okantya: ari ikimiteeyani riroripaeni, tee okameethatzi rantayitzirini, okameethatemi ipashiwentakagaeyawonimi. Roshiyakaantawitakariru ompokiro iyotakaemirimi tsika pikine, omaanta ramatawiteeyakimini. Tema itzimpinatasitaka, riyaatzi otsitenitzinta. Kimitaka irika ompokiro, riraga amatawitantatsiripaeni riyaateeyanakini rirori janta otsitenitaperotzinta rowaga paamariki kaari tsiwakanitatsini, ikanteetatyeyaaani ashi royironi ijekki janta. ¹⁴ Paeraniperoroña ikenkithatakotakirini Enoko, riraga icharineeteni Araani, ikantzini: "Ñaakiro, inja ipokae Awinkatharite, ikaateeyerini oshekiperoroña ronampiri, riraga kameethaperotatsiripaeni.

¹⁵ Ikantakotakaanteeyapaakirini maawaeni kaari kameethatatsini. Riyoteeyerini maawaeni theenkaeyiririni: ipiyatheeyawitakarini, kantzimaeyawitakaririni maawaeni, rootaki rowashironkagaeyantyaaririni". ¹⁶ Ari ikijashireeyanakan, iñaawaepookiteeyanakini, ikantzimaeyanakirini atziri, ikowaperotakiro rantapiintero kaari kameethatatsi, osheki rajagaatya, tema ikowaki iñaaperotantyaariri ikameethatzi atziripaeni imatantyaariri ramatawitantyaariri.

¹⁷ Omaanta, noyemijantzinkarite, osheki nonintaperoeyakimini, rootaki nokowakaantzimirori pikenkithashiryaaperotero ikantayitzimirini rotyaantanewopaeni Awinkatharite Jesokirishito. ¹⁸ Tema ikamanteeyakimini: "Inja piñaaperoeyawakirini theenkantaperotatsiri rantashiteeyawoni oetarikapaeni ikoyiri rirori". ¹⁹ Riroteeyakini amatawiteeyiririni paashinipaeni, rootaki ikijawakaanteeyarini; eejatzi rinashiteeyantaririni osheki itheenkanteeyini, tee okithaatakaari Ishire Tajorentsi.

²⁰ Omaanta eeroka, nonintaperotanewopaeni, paapatziyaperoeyaarini Tajorentsi tema kameethaperotaki, rootaki pimataperoeyantyaaworini pijeeki kameetha. Pikowaperotero Ishire iyotaaperoeyemini pamaneri rirori. ²¹ Pikowaperoeyeni pikenkithashiryaakopiinteri Tajorentsi. Piyoteeyakini ineshironkateeyimini Awinkatharite Jesokirishito, ragaeyemini janta jenokinta, pikanteetatyeeyaani pijeekimoteeyapaerini. ²² Pikaminthaaaperooyerini riraga kaari yoteeyiririni Tajorentsi: piyotaaperooyerini. ²³ Pawijakotakayeri paashini atziri, taachanimi janta paamariki kaari tsiwakanitatsini. Kyaaryoowa, pikimitarikari riraga paapatziyakagaeyakarinira. Eero pantzimaetawo okaatzira rantziri rirori.

Thaamentaantsi

²⁴ Athaamentawentyaari irika matzirori ikempoyaawentee eero otzimaneenanta kaari kameethatatsi. Athaamentawentyaari irika ikimoshire-takaanee atsipatyaaari. ²⁵ Athaamentawentyaari apintzi Tajorentsi, owawijaakoteeri. Irira eenitatsi rowaneenkawo, pinkathari iiteetziri, omaperotaty eenitatsi itajorenka, pinkatharipero rini, rirotaki itawori ijeki, tekirani otzimini kipatsi, roojatzi ikanta iroñaaka ijeki, ashi rowatyeeroni ikanteetatyeeyan ijeekanakya. Aritaki okantyaari.

Naaka jankinatzimirori:

Joorashi

ROÑAAGAYITAKIRINI JESOSHI JOWA OETARIKAPAENI AWIJATSINÍ IINJA OTHONKANTAPAAKYAARI KIPATSI

Itanakawo Jowa rojankinari

¹ Ritaperotakawo Tajorentsi ikamantakiri Jesokirishito oetaka awijatsini iinja, roojatzi rowaagantakanariri irira ronampiri, roojatzi roñaagantakinawo naari. Naaka Jowa riraga antziniriri Jesoshi okaatzi ikowakaakinari. Tema koñaatziro noñaakiri oetaka rootzimateentei awijanaki. Iroñaaka nowagaeyemironi eerori. ² Naaka Jowa, jankinatzimiori maawaeni noñaakiri eejatzi maawaeni nokemakiri. Tema ikantana ronampiri okaatzi ikantakiri riraga Jesokirishito eejatzi okaatzi ikantakiri Pawa Tajorentsi. ³ Okameethatzi iñaanateeyeroni maawaeni atziri iroka ñaanamentotsi eejatzi okameethatzi ikemero maawaeni atziri okaatzi okantziri. Omaanta eero ikemashitawo, inta ikenkithashiryaaakotyaawo ikimoshirewentero. Pamine, eero ojamanitzi awijanaki maawaeni iroka nokenkithatakotzimiri.

Rojankinateeyakinirini aapatziyariri Jesoshi janta 7 nampitsiki

⁴ Naaka Jowa jankinatzirori iroka. Nojankinateeyakinirini jeekatsiri-paeni jaka piipatsitekika owaero Aashiya,* riraga aapatziyeeyaririni Jesoshi jaga 7 nampitsiki. Nokoyi niwethatemi eerokapaenit tsikarika pikanta pijeeki. Eenitatsi rirori, roojatzi ikanta: paerani ijekita, roojatzi iroñaaka, roojatzi ikantyaani ijekini iinja. Nokamantakiri: "Pineshironkateeyerini noyemijantzinkarite janta Aashiyaki, kameetha pijeekekagaeyerini". Eejatzi ikaatakira 7 ronampiri Tajorentsi rowaga amitakotapiinteeyeerini, inewootakiri iwinkatharimentoki tema ikowaki eejatzi ineshironkatzimi Tajorentsi eejatzi ijekakaakimi kameetha. ⁵ Eejatzi nokamantakiri Jesokirishito: tema kameetha ikamanteyakaeroni aari ikantakiriri Tajorentsi. Rirotaki itawori ipiriintanaa, eero ikamae eejatzi, tema eejatzi ipinkathariwenteeyakirini pinkatharitawitachari jaka kipatsikika.

¡O! ¡Thame añaaperoteri Jesoshi!

¡Osheki inintashireperotanteeri; tema ikamawentakae raapithatantakaerori kaari kameethatatsi antakiro!

⁶ ¡Tema iiteeysakaeni amitakotantaniri aririka reewawenteeyeeni!
Eejatzi iiteeysakaeni amanakotariri paashinipaeni atziri riyotanteriri Tajorentsi.

¡O! ¡Thame añaaperoteri! ¡Tema akowaki intsipaete reewawenteri irira maawaeni atziri! ¡Tema akowaki ikanteetatyeyaaani reewawenante!
Eejatzi akowaki rantero intsipaete. Aritaki okantyaari.

⁷ ¡Pamine! Kyaaryo ikinapae menkoriki riraga Jesoshi. Aritaki añeeyawaaerini aaka maawaeni jaka kipatsiki. Eejatzi iñeeyawaaerini kentakoeyawitakaririni paerani. Rootaki ithaawanteeyawakyaarini maawaeni theenkaeyiririni, riragaeyanakyaani, jmm, jmm. Kyaaryo, aritaki okantyaari intsipaete.

⁸ Tee ipaashinitapiintzi Awinkatharite, ikanteetatyaaani itajorentsitaki, roojatzi ikantani: paerani, eejatzi iroñaaka, eejatzi ikantyaani iinja.

* ^{1:4} Paerani ijekanaki Jowa Aashiya ari iroñaaka iiheetziro Toorokiya.

Ikantzi: "Naaka itzitaworini nojeeekini, roojatzi nokantani nojeeekini, nota-jorentsiperotzi".

Ritakari iñaakiri Jowa

9 Ari, noyemijantzinkarite, akimitawakagaeyakan: aapatziyeyakarini Jesoshi, rootaki rowashironkaapiinteeeyantakaeri theenkantatsiri. Ipinkathariwenteeyakaeni Jesoshi, rootaki amateeyantakaworini eshiwentakiro akemaatsitawentyaari irira. Nokenkithatziro iñaani Tajorentsi, tema nokenkithatakotakiri Jesoshi, rootaki rookanteetakinari jaka othampishiki iiteetziri Paatzimosh.

10 Apaani tominkoki omatakaakina Ishire Tajorentsi nokenkithashiryaa-perotanakiri Tajorentsi, roojatzi nokemantakariri ikenkithatakakina. Iñaanatakina, ikimitakari iwaemanka tziwoorentsi: koñeenkataki iñaani, **11** ikantakina:

—Pojankinatero maawaeni noñaagayitemirini, roojatzi pipakaanteri aapatziyeyeanarini janta Ejeesoki, Eshimiirinaki, Peerikamoki, Tziyateeraki, Jaarireshiki, Jirareerejyaki, eejatzi Raworisheeyaki. Okaatzinta nampitsi 7.

12-13 Nopithokashitanakari riraga kenkithatakakinari; ari noñaakotakiri ijeekantari itamorekatheeta, ikaataki 7, riwetsikaetziro ooro. Niyanki noñaakiri rojatekaka kimitariri atziri. Rirotaki Jesoshi, riraga poñagaenchari jenokinta paerani, ikoñaatapaaki jaka kipatsikika. Ikithaatakawo eepirothatzzi iithaari rooperori, kimitawori ikithayitarini pinkathari; ojeekaki ichopineeki kimiwitawori ishirikathakiro, riwetsikaetziro ooro.

14 Okitamaeshitaperotaki iishi, okimitakawo ampeeranki eejatzi kitamaari menkor: kitamaariroña. Okimitaka roki amoreki kiraamenkyaanikitaki. Tema ryotziro maawaeni, oetarikapaeni akenkithashiryayitzirini.

15 Oshipakiryaaki iitzi kareenatha. Ishincheenkatzi iñaawaetzi, ikimitakawo antawo opareenkayi osheki ojootzi, jooo. **16** Kimitaka roerikakiri rakoperoki 7 ompokiro; okontetapaaki ipaantekira ithatyamento, othoyempitzi apite omitzikaaki; oshipakiryaaperotaki ipoo, ikimitakari oorya, ishipakiryaaperotaki, shipakiririri. **17** Noñaantakariri, okimiwitaka nokamanaki noteymotanakiri iitziki, teree. Tema nothaawantanakityaari. Roojatzi ipampitantakina rakoperoki, ikantakina:

—Eero pithawantana. Naaka Jesoshi riraga itaperotanakawori maawaeni, tema najaryaakawo maawaeni paerani tekiraní niwetsikiro kipatsi. Eejatzi naaka oweyaantawori maawaeni, tema aritaki nomonkaatakiro okaatzi najaryaakari. **18** Ashi noyiro nañaaperotzi. Nokamaperowitapaenta, omaanta añagaana eejatzi; iroñaaka nokanteetatyeyaaani nañe. Eero nokamae eejatzi. Naaka kantatsini tsika okaate ikame atziri; naaka kantatsini ninkarika jatatsini jenokinta eejatzi ninkarika jatatsini paamariki kaari tsiwakanitatsini.

19 Iroñaaka pojankinatero iroka piñaakiri, rowaga awijatsini iinja.

20 Iroñaaka nokamantemiro kantakotachari kaari piyotzi inkaaganki. Piñaakiri 7 ompokiro noerikakiri nakoperoki: roshiyakari riraga jewawentziriri aapatziyeyeanarini janta 7 nampitsiki. Iroñaaka piyotaki nopinkathariwenteeyakirini. Eejatzi rowaga ojeekantari itamorekatheeta: oshiyakaawentakiri maawaeni aapatziyeyeanarini janta nampitsikinta. Iroñaaka piyotaki kijokiro nowaeyakirini.

—Noyempyaaminthari, nokowakimi pojankinateniriri riraga jewawentziriri aapatziyeeyanarini janta Ejeesoki iroka noñaani pikantziri: “Iroñaaka nokamantemiro naaka riraga oerikakiriri 7 ompokiro rakoperokira: riraga anashitachari janta ojeekantari itamorekatheeta, kaatatsiri 7. ² Nokantzimi: ‘Niyotakiro pantayitakirini, niyotakiro pipomeentsiwentakinawo nokowakaakimiri, tee pijamaneentawo. Niyotakimi tee pishinetziri piyemijantzinkarite rantapiintero kaari kameethatatsi. Eeniro jatashitawitzimirি kantashitawitachari: “Naaka Rotyaantanewo Jesokirishito”, omaanta piyotawakiri ikowawita ramatawiterimi aapatziyanari: niyotaki tee pishinetziri ikenkithatakayemi. ³ Niyotaki osheki pikemaatsitawentakinawo, omaanta tee pijamaneentawo, pantayitakinarinari. ⁴ Omaanta eeniro pookakiri apaani: paerani pinintaperotawitakinawo; omaanta iroñaakaroña tee pinintaperotanaana. ⁵ Pikenkithashiryaaagaeyaani tsika pikantari paerani owakiran paapatziyantakinari; tee pikimiteeyaaani iroñaaka. Pikenkithashireeyeyaani, petakotya, eejatzi pikimitanteeyaaari pikimitaaga paerani, owakira paapatziyeeyakinani. Pikenkithashiryaaaperoteeyaa, pinintaperotanteenari eejatzi. Eerorika pinintaperotaana, eero añaawaeri aapatziyeeyanarini jaga pinampiki.

⁶ Omaanta eenitatsi noñaaperotantakinmiri: poonawo rantayitakirini oyateeyiririn Nikoraashi, rantashitayitakawoni kaari rayi. Eejatzi naari, nonaperotawo ranteeyirini.

⁷ Aririka pikoyi piyoperotero aritaki pikemaperotawakiro iroka nokamtanzimi. Paerani ojeekaki Ereeki inchato owañaantatsiri: aririkami royaawomi paeranijatzi, ikanteetatyeyaanimi rañeemi. Iroñaaka eeniro kimitawitawori janta okameetheetyaaperotzinta, janta Tajorentsiki. Aririka kameetha pijeekeayeni eejatzi eekiro piyaatatyee pantapiintakinawo nokowakaemiri, okimitakya powakyawo iroka chochoki jenokinta owañaaperoeyemirini: kyaaryo pikanteetatyeyaaani pijeekeayeni janta jenokinta’.

Rootaki rojankinatakaakinari Jesoshi.

Rojankinateeyinirini aapatziyariri Jesoshi janta Eshimiirinaki

⁸ Eejatzi ikantakina Jesoshi:

—Eenitatsi iroka pojankinateeyeniririni riraga jewawentziriri aapatziyeeyanarini janta Eshimiirinaki: “Iroñaaka nokamantemiro naaka riraga Itaperotakawori maawaeni, tema najaryaakawo maawaeni paerani tekirani niwetsikironi kipatsi. Eejatzi naaka riraga Oweyaantawori maawaeni, tema ari nomonkaatero okaatzi najaryaakari. Nokamaki paerani, roojatzi nopiriintanana. ⁹ Nokantzimi: ‘Niyotakiro pantayitakirini, niyotakiro osheki pikemaatsitawentakinawo, niyotakiro pashironkaawentakinawo tekatsi tzimimotemini; omaanta eero pipeyakotawo nopinataperotemi janta jenokinta. Niyotaki osheki ikantzimateeyakimini riraga kimityaarinimi aapatziyeeyanarini. Ikanteeyawitani: “Naapatziyari Jesoshi”. Omaantakya, tee raapatziyeeyanani, inta raapatziyari rirori Jatanaashi. ¹⁰ Kyaaryo, rooteentsi osheki pikemaatsityaawo, omaanta eero pithaayi. Riraga iwinkatharite kamaari romonkyaagakan temi apaaniapaeni eero ka omonkyaagamensotsiki, ikowaki rookakayemiro paapatziyawitakinaga. Ojamanineenta-paente osheki pikemaatsitayityaawoni oetarikapaeni. Ojamanineenta-paente pikyaaryooventenawo maawaeni nokamantakimiri, roojatzi pikamanyaari; roojatzi nopinataperotemi, eejatzi pikanteetatyeyaaani pañe janta nonampiki. ¹¹ Aririka pikoyi piyoperotero, iroñaaka powakempitap-erotawakayaawo okaatzi nokamantemiri roojatzi panantakyaawo. Aririka kameetha pijeeke eejatzi pantapiintenawo nokowakaemiri, eero piyatzaati

eerori paamariki kaari tsiwakanitatsini. Tema iroka oshiyawori pikame apite”.

Rootaki rojankinatakaakinari Jesoshi.

Rojankinateeyakinirini aapatziyariri Jeshoijanta Peerikamoki

¹² Eejatzi ikantakina Jesoshi:

—Pojankinateniri iroka riraga jewawentziriri aapatziyeeyanarini janta Peerikamoki eekiro iñaanateniri aapatziyeeyanarini janta ikantzi: “Iroñaaka nokamantemiro naaka riraga ashitawori nothatyaamento, thoyempitatsiri omeniki eejatzi omitzikaaki. ¹³ Nokantzimi: ‘Niyotakiro maawaeni pantayitakirini, niyotaki jaga pijkeekira ijeeki eejatzi osheki pinkathatzirir Jatanaashi: kyaaryo ijeekimoyeimini rirori. Niyotaki paapatziyaperotakina, tee pookana. Paerani ijeekakini pinampiki Antzipashi: riraga kenkithatakotanari, tema ikyaaryoowenantakinawo maawaeni nokowakaakiriri. Piñaakoeyakirini rowamagaetakiri, omaanta tee pookaeyironi paapatziyeeyanani. ¹⁴ Omaanta eenitatsi pantayitakirini kaari inimotana. Noshiyakaawentemiro: paeraniperoroña riraga Waraami eeniro riyotaakiririni Waraaka riraga iwinkathariteni mowawajatzi riraga kijanai icharineetenipaeni Ishirayeeri tsika ikantyaaka rantakaantyaariri irirapaeni kaari kameethatatsi. Roojatzirirapaeni rantakagaeyakirini rowakari iwatha ashi riwetsikayitzirini atziri itajorentsitsashitari; eejatzi ishirontapiinteeeyakawoni kaari iina. Eeniyo iroñaaka pikaateeyakirini jaga oshiyakaririni riraga Waraami: irirapaeni rantakaagaantakimi rowakari iwatha ashi riwetsikani atziri itajorentsitsashitari; eejatzi pishirontashitayitakawoni kaari payi. ¹⁵ Eejatzi eeniro itsipateeyimini oyaateeyiririni Nikoraashi. Tee okameethatzi ranteeeyakirini irirapaeni: rantakagaeyimironikir rantayitzirini rirori. ¹⁶ Rootaki pikenkithashiryaaanteeyaneeyarini, eero pikimitaa chapinki. Eerorika pookaeyironi pantayitzirini, niyatashiteeyiminkari nompojeeayaakiminkari. Nothatzinkaeyakitziuminikari nothatyaamentoki rowaga thoyempitatsiri apite: nothonkaeyeminikari thatzik, thatzik. ¹⁷ Powakempitaperotawakya kameetha iroka nokamantzimiri. Aririka kameetha pijkeekí eejatzi pantapiintakinawo nokowakaemiri, ari nopakimi poyaari kaari iñagaetzi, kimitawori nopashiteeyakarini paejatzilteni manaa. Eejatzi nopenmi kitamaari mapi, jankinateenchari mapiki piwaero owakirari: piyotero eerori piwaero, omaanta eero riyotziro paashinipaeni’.

Rootaki rojankinatakaakinari riraga Jesoshi.

Rojankinateeyinirini aapatziyariri janta Tziyateeraki

¹⁸ Eejatzi ikantakina Jesoshi:

—Pojankinateniri iroka jewawentziriri maawaeni aapatziyanari janta Tziyateeraki: “Iroñaaka nokamantemiro naaka Itomi Tajorentsi: okimitakawo noki paamari amorekaanikitzi, eejatzi oshipakiryaaki noetz, okimitakawo kijokitatsiri poreryaanikitatsiri. ¹⁹ Nokantzimi: ‘Niyotakiro pantayitakirini. Niyotaki pinintaperotawakagaeyakan, paapatziyeeyanani, petakoeyakarini atziripaeni, pikyaaryooowentakinawo maawaeni nokowakagaeyakimirini. Eekiro piyaateeyatziini pantaperoeyanakironi. ²⁰ Omaanta eeniro apaani pantziro kaari inimotana: peshiwentakiro rowaga Jesaweera iyotagaeyakimironi aapatziyanari ishironteeyawoni kaari iina eejatzi iyotagaeyakimirini aapatziyanari oshironteeyarini kaari oemi, eejatzi raapatziyeeyakawoni riwetsikashitayitarini atziri. Okantawita: “Nokenkithatakotapiintziri Tajorentsi”, omaanta amatawitatpiinteeeyakirini aapatziyeeyanarini. ²¹ Noyaakotawitakawo

okenkithashiryagaeyaami; omaanta tee okoyi okenkithashireeya, tee okoyi opakayiteeroni oshirontayitarini kaari oemi. ²² Iroñaaka nokamantem: aritaki nomantsiyatakaakiro; eejatzi eerorika ikenkithashiryaa riraga aapatziyeyaworini, nowashironkaaperoyerini rirori kameetha eejatzi. ²³ Kyaaryo nowamagaeyerini maawaeni oyaateeyirorini Jesaweeda, nothonkaeyerini maawaeni. Roojatzi riyyoteeyantanakaani maawaeni aapatziyeyyanarini niyotzitakiri ikenkithashireeyirini atziri eejatzi niyotakiro maawaeni ikowaeyakirini rajankaneki. Okameethatzirika panteeyakirini, aritaki nokaminthaaperoyeremini; omaanta teerika okameethatziri, aritaki nowashironkagaeyakimini. ²⁴ Omaantakya paashinipaeni eeroka kaari aapatziyawoni Jesaweeda, eejatzi kaari antziniri Jatanaashi ikantawitariri, tekatsi nokanteeyemini; ²⁵ omaanta pikantyaani paapatziyena roojatzi nopolanteeyaa. ²⁶ Aririka pikyaaryooentakinawo maawaeni nokowakaakimiri roojatzi nareetanteeyaa, ari noetakimini pinkathariwenteeyiririni osheki atziri. ²⁷ Nokimitaka naari, ikowakaakina Pawa nopolinkatharitantakari, eejatzi nokantem erori pipinkatharitaperotantanakaani. Aririka opariye chomo, thonkapaaka otzimpookapaaki maawaeni, eejatzi pikimitya erori: pithonkaeyeerini maawaeni kaari aapatziyeyyanarini, thoperee. ²⁸ Pipinkatharitaperotanaki, osheki nowaneenkatem, pikimityaari kamori. ²⁹ Powakempitaperotawakyawo iroka nokamantzimiri”.

Rootaki rojankinatakaakinari Jesoshi.

3

Rojankinateeyinirini aapatziyariri Jesoshi janta Jaarireshiki

¹ Roojatzi eejatzi ikantakina Jesoshi:

—Pojankinateniririjewawentziririaapatziyeyyanarini janta Jaarireshiki: paerani ikantakiri atziripaeni: “Riraga jaarireshijatzi ikemijantaperotziri kameetha Jesoshi”. Omaanta iroñaaka noñeemi naari, rooteentsi pipakayimateromi paapatziyana. ¡Pikemena, naaka piwinkatharite! Eenitatsi irika 7 jewawenterini ronampiri Tajorentsi ikemijantaperotana. Eejatzi eenitatsi nakokira noerikakiri ompokiro ikaatzi 7. Tema irira oshiyawori 7 kenkithatakantaantani noñaani janta 7 nampitsiki. Nokantzimi: ikenkithashiryaa atziri poyaataperotana, omaanta niyotakimi pajankaneki, tee paapatziyaperotana. ² Kyaaryoowa, pitheenkaperotanakarira, piyaateekari paamariki kaari tsiwakanitatsini. Tee inimotziri Tajorentsi pantayitakirini. ¡Pikakishiretel! Paapatziyena kameetha, pantenawo nokowakaakimiri. ³ Pikenkithashiryaaoperotaneero noñaani pikemakiri paerani: pikemijantaperoteri, pikenkithashiryaañeeya, pookaero pantziri. Eerorika paapatziyaperotaana, niyaatashitemi, nowashironkaemi. Tee piyoteeyini tsika okaate niyaatashitemiri: nokimityaari koshintziranki, eero piyotzi tsika okaate ipokashitatemiri ikoshitatemiri. ⁴ Osheki pitheenkanteeyini, omaanta eeniro apaanipaeni aapatziyanari janta kameetha ijeekaeyini rirori. Panteyakironi kaari kameethatatsi noshiyakaantakimiro poepatsitzirowanki piithaari; omaantakya riraga aapatziyanari kameetha, tee roepatsitziro iithaari; noñaakiro okitetaki, okitamaamawoperotaki. Kyaaryo ikameethataki noñaaperotantakariri ikameethatziri. Jjeekimotena rirori, ikithaatawo kitamaamawoperotatsiri. ⁵ Maawaeni eekiro ryaatatayee ranteeeyakironi nokowakagaeyakiririni ikithaatawo rowaga kitamaaperotatsiriroña. Eeniro ojankinataka iwaeropaeni maawaeni riroriipaeni noñaanamentoki tsikarika rojankinatakotapiintzirira nonampiri iwaeropaeni atziri ikanteetatayeyaaani ijeeki

jenokinta. Eero noshepowakotziri iwaeropaeni. Eejatzi nokamanteri Pawa: "Rirotaki irika aapatziyanari". Roojatzi nokamanteeyeririni maawaeni ronampiripaeni. ⁶ Powakempitaperotawakyaawo iroñaaka nokanteeylimirini, froñlaakaka pantero.

Rootaki rojakinatakaakinari Jesoshi.

Rojankinateeyakinirini aapatziyariri Jesoshi janta Jirareerejyaki

⁷ Eejatzi ikantakina Jesoshi:

—Pojankinateniriri jewawentziriri aapatziyeyyanarini janta Jirareerejyaki: "Iroñaaka nokamantemiro naaka Jesoshi nokyaaryooowentziniri okaatzi nokantziri, eejatzi riraga kyaaryooperotatsiri. Naaka icharineeteni Iraviiri, naaka riraga Rotyaantanewo Tajorentsi, nopolinkathari-wentaperotee. Naaka rirotaki yoyaanakirini ninkarika jatatsini jenokinta eejatzi ninkarika jatatsini paamariki kaari tsiwakanitatsini. Nokanterika: 'Itsipatena irika', tekatsi ookakayerini. Nokanterika: 'Eero itsipatana riori', tekatsi amimotenarini janta nonampikinta.

⁸ Nokantzimi: 'Niyotakiro pantayitakirini. Paerani nokowakaayitakimini: "Pikenkithatero noñaani, namitakotemi". Ari pantzitakinawo, roojatzi iroñaaka pantakinawo: tekatsi ikanteetemi romaryaagaaetemi. Tee poshekiteeyini, eejatzi tee pipolinkathariteeyawityaani, omaanta pikyaaryooowenteeyakinawoni nokanteeeyakimirini. Pikanteeyakirini atziri: "Naapatziyari Jesokirishito", tee pipashiwentakayina. ⁹ Eenitatsi atziri aapatziyariri Jatanaashi, rootaki ikijantakimiri, omaanta ikantawaetashita: "Naaka joriyyo, tema naapatziyari Tajorentsi". Omaanta tee raapatziyana, itheeyashita. Iinja nareetakagaeyaarini eeroriki rotziwerowashitantanpaemiri, ipolinkathatantanpaemiri: riyoteeyanakini osheki nonintaperoeyakimini.

¹⁰ Rowashironkagaeyawitakimini, omaanta pikyaaryooowentakiro nokantakimiri, tee pijamashiryawo. Rootaki notzikakowenantakimiri iinja pipomeentsitakotanakya maawaeni kipatsiki. Opomeentsitzimoeyakaarini maawaeni atziri; omaanta, kyaaryo naakowenteeyemini.

¹¹ ¡Pamine, sha! Eero ojamanitzi nareetanteemiri. Pikantyaani paapatziyeyenani, roojatzi tekatsi thañaawakimini piyaatanaki jenokinta; pijekapae janta, pikanteetatyeyaaani.

¹² Aririka eekiro piyaatatayee pantakinawo maawaeni nokowakagaeyakimirini, ari nojeekakaaperotemijanta ijeekinta Tajorentsi: eero pipiyya eejatzi. Nojataakotemi pipankaki iwaero Tajorentsi riyotanteetyaari pisheninkatakari. Eejatzi nojataakotemi owaero inampi Tajorentsi: rowaga Jerojaree owakirari poñaachani jenokinta. Okantyaani riyotanteetyaari pinampitawo eerori. Eejatzi nojataakotemi nowaero naari, owakirari, riyotanteetyaari asheninkatawakagaeyakan.

¹³ Powakempitaperotawakya iroñaaka nokamantzimiri eejatzi pantero".

Rootaki rojakinatakaakinari Jesoshi.

Rojankinateeyinirini aapatziyariri Jesoshi janta Raworisheeyaki

¹⁴ Eejatzi ikantakina Jesoshi:

—Pojankinateeyeniririni jewawentziriri aapatziyeyyanarini janta Raworisheeyaki: "Iroñaaka nokamantemiro naaka riraga Kyaaryooperotatsiri, owaagakimirori okaatzi ikantakinari Tajorentsi. ¡Pikemina! Nokantapi-intzimi kyaaryooperotatsiri. Naaka itaperotakawori niwetsikantakawori maawaeni oetarikapaeni: nantakiro maawaeni ikantakinari Tajorentsi.

15 Nokantzimi: ‘Niyotakiro maawaeni pantayitakirini. Pikyaaryoowente-nawomi nokowakaemiri, noshiyakaantemimi iñaa jaawari; pitheenkaper-otenami, noshiyakaantemimi iñaa katsinkaari. Noshiya tee pitheenkaper-otana omaanta eero poyaataperotana kameetha aanantakimirori jaawa-neentatsiri. Tema niyotaki tee pikyaaryoowentanawo nokowakaemiri, omaanta tee pitheenkaperotana; rootaki noshiyakaanantakimirori jaawa-neentatsiri. Naaka nokoyi eeroka eerorika pikoyi pijaawaperote, ari pikatsinkaate; eejatzi okimitaka, eerorika pikoyi paapatziyaperotena, ari pitheenkaperoteeta: eero pitsipateero. Noepiyaatzirokari jaawaneen-tatsiri. **16** Tee nokoyi nirero jaawaneentatsiri: neewatakiro, ojeekiita okaanteekaata. Eejatzi eerori, tee noñaaperotzimi. Otzimathee pantapi-intero kameethatatsiri eejatzi poñaayenawo kameetha poyaataperotena. ¡Noepiyimikari! **17** Pikanteeyawitani: “Naakapaeni ashaagantzinkaripaeni osheki nantayitakini, tekatsi koetyeemoteenani naaka”. Pikompitakawo: tee piyotzi ashironkaakimi; pashironkaaperotaka, tekatsi tzimimotem-ini, pikimitaka pikaankimerikitaki. Tee piyoperotziri Tajorentsi: okimi-witaka tee piñi. **18** Iroñaaka nokantemi: pamanantenari ooro kameethap-erotsiri, otzimimotantemiri pashaagananteeyaari kyaaryoopero. Eejatzi pamanantenawo kithaarentsi kitamaari pikithaatanteeyaari riyotan-teitemiri kyaaryo nowameethateemi. Pamanantenawo eejatzi aawinta-wontsi pikaakiteeyaari pokiki, paminanteeyaari. Ñaakiro, kimitaririka irika, pamanantenari naaka aritaki nowameethatemi pajankaneki pikimitan-teeyaariria oropero ari niyotakaaperoyakimirini Tajorentsi.

19 Maawaeni ikaati nonintaperotziri atziri, nokaminayeri eejatzi nowashironkaeri, riyotantyaaari tee okameethatzi ranteero kaari kameethatatsi. Iroñaaka eero pitheenkante, omaanta pikenkithashiryagaaya, eero pikimita paerani: pikowaperote piyoperotena naaka. **20** Pamine, okimitaka nokatziyapaaka omookira ashitakontsi nokaemimi, nokoyi notsipatemi. Aririka pikemawakina roojatzi piwethatantawakina, roojatzi nokyaantapaakyaaari, nojeekimotantapaakimi eejatzi nakiyotapaakimi. Nokowaperotaki atsipatawakagaeyaani. **21** Tema nantakiniri Pawa maawaeni ikowakaak-inari, rootaki nojeekimotantakariri, notsipatari nopinkathariwenantzi. Iroñaaka ari pikimitakya eerori: aririka pikyaaryoowentakinawo maawaeni nokowakagaeyakimirini, ari atsipatawakagaeyakyaani apinkathariwenanteeyeni. **22** Powakempitaperotawakyaawo okaatzi nokamanteyimirini roojatzi pantero’”.

Rootaki rojankinatakaakinari Jesoshi.

4

Jeekimoeyiririni jenokinta iñaaperoeyakirini Tajorentsi

1 Roojatzi koñaatziro noñaakiri eejatzi, noñaaperotakiro jenokinta, inthomaenta; okimitaka ashitaryaaka ashitakontsi. Roojatzi nokemantaari eejatzi riraga nokemakiri inkaaganki, aririka iñaawaete roshiyawitakari tziwoorentsi. Ikantakina:

Pipokanaki jaka jenokika. Noñaayemiro oetarika awijatsini iinja.

2-3 Rootaki omatakaakinawo Ishire niyaatantakari jenokinta. Janta noñaapaakiri ishipakiryaaki ikimitakawo mapi iporeryaataki kityonkari eejatzi natsiryathari. Niyontakariri riro Tajorentsi. Iyotaakina Ishire. Eejatzi noñaakiri ijekaki iwinkatharimentoki. Ari rinkinagaakitakiro kimitaka oye inta apaani ikanta natsiryathari. Ari ikanta ishipakiri. Omaanta Tajorentsi osheki ishipakiri, morek, morek, tharek, tharek, morek,

tharek. ⁴ Eejatzi inkitakiro ijeekantari osheki paashini jeekamentotsi, okaatz 24. Janta ijeekaeyakini 24 aataperoteenchari, pinkathariteeyatsirini. Ikithaaeteeyawoni iithaari kitamaamawori, ramantheeteeyakani. Ro riwetsikatziri ramantheeri ooro. ⁵ Opoñaaka iwinkatharimentoki Tajorentsi kimitawori oñaawaepookitziranki, eejatzi tariito. Eejatzi inewootakawo ootamentotsi amorekaki, okaataki 7: oshiyakaawentaka 7 ronampiri kameethari. ⁶ Eejatzi inewootakawo iwinkatharimentoki owin-tienityeera omaanta shipakiryaaki okimitakawo jiriniki koñaarini.

Eejatzi rinkitheetakiro iwinkatharimentoki Tajorentsi 4 ronampiri kameethari omampaawaetapiintzinkari. Janta ichopineetakiri apaani ronampiri kameethari, eeniro paashini itapitaki, eeniro paashini rakoperoki, eeniro paashini rampateki. Eenitatsi rokipaeni rirori maawaen iわtakipae. ⁷ Roshiyakari apaani manitzi; irira paashini roshiyakari waaka; irira paashini roshiyakari ipoo shirampari; irira paashini roshiyakari pakitha raanaki. ⁸ Eenitatsi irira ishiwankipaeni okaatz 6; osheki rokipaeni ojeekayitakini maawaeni iwathaki. Ikantatyaaani romampaawenteeyearini Tajorentsi: kitejiriki, tsiteniriki; tee roshitayiro. Iroka ikantziroka romampagaeyani:

“Osheki pikameethataki, osheki pikameethataki, osheki pikameethataki eeroka Nowinkatharite Tajorentsi;

osheki pitajorentsitaki, tekatsi pomeentsitzimotemini.

Pikantani pijeeki: paeraniperorōña, roojatzi iroñaaka, eejatzi iinja”.

⁹ Roojatzi rapiitiapiintziri iñaaperotantariri riraga Tajorentsi riraga ikantani ijeeki:

“Ikameethaperotzi Tajorentsi, osheki nopolkathatziri.

Osheki nopaasonkitziri riraga pinkathariwentakinari.

Ikantani rañi, eero ikamanitzi”.

¹⁰ Aririka ikemapiinteeyawakirini riraga 24 aataperoteenchari, rotziwerowashitapiinteeyakarini Tajorentsi riraga añaaperotatsiri ikanteetatyeyaaani, ipinkathateeyakirini. Ragaeyakironi ramatheerepaeni royyiteeyakirin iitziki, romampaawenteeyakarini:

¹¹ “Pikameethaperotaki, Nowinkatharite, osheki pitajorentsitaki.

Okameethatz noñaaperoeyemini, nopolkathateeyemini.

Niyotaki tekatsi pomeentsitzimotemini: tema piwetsikakiro maawaeni jeekaeysirsirini.

Pikowakini paeran ojeekini oetarikapaeni, rootaki ojeekantakari iroñaaka”.

5

Jesoshi oshiyariri rowishate Tajorentsi

¹ Ari koñaatziro noñaakiro eejatzi, noñaakiro rakoperoki Tajorentsi rap-neeteetakiro Iwaperite, ojankinataka inthomaenta eejatzi jakakiroka. Ari apineekaka eejatzi ontsirekaka kameetha, okaataki 7. ² Eejatzi noñaakiri ronampiri Tajorentsi, shintsitaperotatsiri, itacheronkawaantetapaaki ikantawita:

—¿Ninka kameethaperotatsiri imantanyaawori ryontareero iroka jank-inarentsika, rapineereero?

³ Ari namineeyawitanakani, tekatsi akirini. Tekatsi materoni rapi-neereero. Tee imatziro jenokijatzi, kipatsijatzi, jeekatsiri tsikarikapaeni. Tekatsikya. ⁴ Tekatsi apaani kameethaperotatsini, mataperoterorini rap-neereero, rootaki netakoperotantanakari: kyaaryo niraakoperotanakari, tekatsi kamantenawoni oeta okantakotayitzirini jankinarents. ⁵ Roojatzi ikantakina apaani aataperoteenchari:

—Eero piraaga. Eenitatsi apineeryagaeroni: riraga icharineeteni Joraani; ikimiwitakari chaanari, osheki ishintsitzi. Eejatzi rirotaki icharinetakarini Iraviiri, tema osheki ipinkatharitzi. Imatakiniri Tajorentsi maawaeni ikowakagaeyakiririni, rootaki imatanteeyaworini Riyontaryagaero eejatzi rapineereero Iwaperite.

⁶ Roojatzi naminaktziri Tajorentsi janta iwinkatharimentoki, eejatzi ikaatzi ronampiri kameethari 4, eejatzi riraga 24 aataperoteenchari. Eejatzi noñaakiri rojatekaka niyanki inewootziri Tajorentsi riraga Jesoshi iiteetziri Rowishate. Noñaakiri rakoki imoontawaetaka eejatzi iitziki rowamaanteetakariri paerani. Eenitatsi ichee 7, eejatzi roki 7: oshiyakaawentziro riraga 7 ronampiri Tajorentsi jewawenantsatsiri rotyaantakiri ihotyaakiro raminiri maawaeni atziri jaka kipatsikika.

⁷ Ari riyatashitakiri Tajorentsi roerikakiro rakoperoki Iwaperite, apineekachari. ⁸ Roojatzi roerikantapaakawo, riraga 4 ronampiri omampaawaetapiintachari eejatzi riraga aataperoteencharipaeni rotziwerowashiteeyakarini riraga Rowishate Tajorentsi. Roerikaeyakironi kimitawitawori aaripa; roerikaeyakironi eejatzi kimitawitawori pajo, riwetsikaetziri ooro: ojeekaki inthomaenta kajankapaneri. Iroka kajankapanerika oshiyakawo amanaantsipaeni aapatziyeyayaririni Tajorentsi. ⁹ Roojatzi romampaawenteeyantakarini Rowishate Tajorentsi mampaantsi owakirari. Romampaawentakari iroka:

“Pikameethaperotaki poerikero Iwaperite apineekachari piyontareero; Tema paerani rowamagaetakimi, papaatawenteeyakinawoni piraanakapaeni maawaeni atziripaeni, pipinawentakinawo okaatzi nanteyirini.

Powawijaakoeyantakinarini nojeekimoyeantyaaririni Tajorentsi, maawaeni.

Powawijaakoeyakirini jeekayitatsirini maawaeni inashitzinkaripaeni atziri, inashitayitaworini maawaeni ipaantepaeni.

Kyaaryo, powawijaakoeyakinani poñaayitacharini maawaeni nampitskipaeni, tsikarika nojeeckayitzini.

¹⁰ Pipeyeeyakinani pinkathariteeyatsirini, eejatzi pipeyeeyakinani ñaanakowenantapiinteeeyiririni atziripaeni iroñaaka: rootaki iinja nopinkatharivenanteeyaaarini maawaeni paashinipaeni jeekatsiripaeni kipatsiki, tema namanakowenanteeyaaaririni ramitakooyerini Piri.

Rootaki pimatantawori paglero eeroka Iwaperite Tajorentsi, eejatzi pimatantawori piyontaryakiro rowaga ontsirekakaga”.

¹¹ Roojatzi naminantanaa eejatzi; noñeyakirini riraga osheki ronampiri-paeni Tajorentsi: tee apaanipaeni ikanta, oshekiperoroña kameetha. Eejatzi noñeyakirini eejatzi riraga 4 ronampiri kameethari eejatzi riraga 24 aataperoteenchari. ¹² Ishincheenkataki romampaawenteeyakarini:

“Osheki ikameethaperotaki Jesoshi iiteetziri Rowishate Tajorentsi rowamagaetawitakari, riyoteeyakini maawaeni jeekaeyatsirini osheki itajorentsitaki rirori, rashiteeyakawoni maawaeni oetarikapaeni, osheki riyyotziro oetarikapaeni, maawaeni imatayitakironi oetarikapaeni. Thame maawaeni apinkathateeeyerini, añaaperoeyerini, aweshiryawenteeyaaarini”.

¹³ Eejatzi nokemaeyakirini maawaeni jeekatsiripaeni jenokinta, eejatzi kipatsiki, eejatzi maawaeni kamaeyawiteencharini: riraga kitatawiteenchari kipatsiki, eejatzi piinkawitachari; romampaawenteeyakarini maawaeni kameetha:

"Thame maawaeni aweshiryaawenteeyaarini Tajorentsi jeekatsiri iwinkatharimentoki eejatzi Rowishate, apinkathateeyerini, añaaperoeyerini, akanteetatyeeyaani.

Tema itajorentsitaperotaki, ikanteetatyeeyaani".

¹⁴ Roojatzi ikanantaka riraga 4 ronampiri omampaawaetapiintachari: "Aritaki okantyaari".

Eejatzi rotziwerowashiteeyakarini riraga aataperoteencharipaeni ipinkathateeyakirini maawaeni.

6

Riyontaryagaero Iwaperite Tajorentsi

¹ Ari okaataki 7 ontsirekaenchari Iwaperite Tajorentsi. Noñaakotakiri Jessoši iiheetziri eejatzi Rowishate Tajorentsi riyontaryaakiro itanakawori apineetachari, roojatzi nokemantakari apaani ronampiri omampaawaetapiintachari, tacheronkawaanteri iñaawaetzi, ikimiwitawo oñaawaepookitziranki, toog, toog. Ikantzi:

—;Pipoke jaka!

² Roojatzi noñaantawakariri jewatapaentsiri: ikyakotapaakari kawayo kitamaari, roerikapaakiro iwyani. Ramantheeteetakiri; jataki raminiri rowayirite romanateri, ikowaki ranaakooyerini, romanateri ithonkeri rowamayeri.

³ Roojatzi riyontaryaantakawo rowaga apitetapaentsiri, roojatzi ikanantaka paashini ronampiri:

—;Pipoke jaka!

⁴ Eejatzi ikinapaaki paashini kawayo, kityonkaperotatsiri. Ikanteetakiri: —Iroñaa ka ishineteetakimi piyoteeri atziri romanatawakagaeyaani, rowamaawakagaeyaani.

Ari ipaatkiri antawo ithatyamento.

⁵ Roojatzi riraga Rowishate Tajorentsi riyontaryagaero rowaga tres-tapaentsiri roojatzi nokemantakari paashini tacheronkawaanteri ikantzi:

—;Pipoke jaka!

Roojatzi noñaantawakari ikinapaaki chenkari kawayo, roerikapaakiro kiyakotariri rotenakamento, rotenakantyaawori oetarikapaeni. ⁶ Roojatzi nokemantakari ronampiri omampaawaetapiintachari ojatekaenchari niyanki, ikantzi:

—Tee añaaperotziro osheki teriiko eejatzi shinki, rootaki pinaperotachari. Omaanta oyenkoa oriwoo eejatzi awishoowaantsi oowa, eero peewanatawo inta pikempoyeero kameetha.

⁷ Roojatzi riyontaryagaero paashini, okaatapaaki iroñaaaka 4, roojatzi nokemantakari paashini ronampiri omampaawaetapiintachari ikantziri:

—Pipokanaki jaka.

⁸ Eejatzi noñaawakiri paashini kawayo, kiteriwitziri; iita iwaero riraga kyaakotapaariri: Owamaantatsiri. Royaatapaeri itapiiki oshiyakaawentziriri kamaentsiripaeni. Tema ishineteetakiri rowamaeyakirini oshekiperotaki atziri jaka kipatsiki: apaanipaeni kamaentsiri itonkakiri rowayirite; paashinipaeni kamaentsiri aakiri itashe; paashinipaeni aakiri mantsiyarentsi; paashinipaeni rowamaeri koweenkatatsiri piratsi.

⁹ Roojatzi riraga Rowishate Tajorentsi riyontaryaantakawo paashini, okaatapaaki iroñaaaka apawakooni; roojatzi noñaantakawo aritaari itaapi-inantawori kajankapaneri. Okimitaka noñaakiri janta eenitatsi osheki aapatziyeeyaririni rirori, kamaeyawiteencharini. Paerani ikenkitheeyawitan iñaani Tajorentsi, riyotaapiinteeyawitarini atziri tsika ikantari rirori,

rootaki rowamaanteetakariri. ¹⁰ Itacheronkawaantetakiri ipaante ikan-teeyini:

—Nowinkatharite, eeroka pinkathariwenteeyiririni maawaeni jeekatsiripaeni. Osheki pikameethaperotaki, pitajorentsitaperotaki. Niyotaki otampatsikataperotzi piñaani, kaari pamatawitantz. ¿Tsika okaate pikjakowenanteenari? ¿Tsika okaate powashironkaanteeyantyaaririni riraga jeekatsiripaeni kipatsikinta, owamagaeyakinarini? Tee nokoyi nojamanite.

¹¹ Raapatziyeeyakarini riroripaeni Jesoshi rootaki ipaeyantakaririni kithaarentsi kitamaaperotatsiri. Ikantziri:

—Pimakoryaawakiitia. Tekira omonkaata nowashironkaaper-oeyantyaaririni owamagaeyakimirini. Eenitati ijeeki paashinipaeni piyemijantzinkarite rowamagaeteri. Paapatziyeeyakinani, rootaki rowamaanteetakimiri; raapatziyeeyakinani paashinipaeni, rootaki rowamaanteetyaariri rirori. Aririka omonkaatapaakya nokoyiri, aritaki nowashironkagaeyakirini maawaeni owamaantatsiri.

¹² Roojatzi riyontaryaantakawo paashini, okaataki iroñaaka 6. Noñaanakiro omoyekaperotanaka kipatsi, antawo omoyekaka, moye, moye, moye. Itsiteniperotanaki oorya, ikimitanakawo tsimenkito; omaanta riraga kashiri, ikityonkataperotanaki, ikimitanakawo irantsi, kityonkatanaki kameetha. ¹³ Eejatzi ipariyeeyanakini osheki ompokiropaeni kipatsiki: ikimitakawo okithoki atsimiriki rowaga irakatsiri, aririka opoki antawo tampyaa, roojatzi omoyekakotapaakyaawori. ¹⁴ Opeyanaka jenoki, okimitakawo apineetzirowanki paperi. Opeyaka maawaeni kipatsi: tonkaariipaeni, othampishipaeni, owinteniuuyaanakirapae ni maawaeni; ari okaatapaaki. ¹⁵ Eejatzi noñaakiri iwinkatharitepaeni atziri, eejatzi iwinkatharitepaeni joraarropaeni, ashaagantzinkaripaeni, shintsitayitatsirinipaeni, iwaatorotepaeni atziri, eejatzi ratziritepaeni, maawaeni atziri: ishiyeeyanakani omooki impeeta. Romaneeyapaakani mapinaki janta tonkaariki. ¹⁶ Ikantziri:

—Thame amaña omooki mapinaki, eero iñaantee Tajorentsi rootaki ashiyaapithatantyaawori rowashironkaaperotakae riraga rowishate Tajorentsi. Tema ikijaperotakae osheki iroñaaka. ¡Oeeii! ¡Kijaka Tajorentsi! ¡Rooteentsi rowamagae! ¹⁷ Iroñaaka ikijaperoyakinani maawaeni; iroñaaka ithonkayenani naakapaeni.

7

Rojataakoeyakirini osheki icharineeteni Ishirayeerini

¹ Roojatzi noñaantakari ronampiripaeni Tajorentsi ikaataki 4, ikatziy-eeyakani rinkitakiro kipatsi, janta othapikitapaakinta. Raatzinkakaaper-otakiro shintsitsatsiri tampyaa eero otampyaaperotanta osheki kipatsiki, inkaareki, inchatomashiki, tsikarikapaeni. ² Roojatzi noñaantakari paashini ronampiri Tajorentsi, ipoñaaka janta ikinapaenta oorya, ramakiro riwithaa-mento riwithaakotantyaaririi atziripaeni. Ikaemakoeypaakirini paashini 4 ronampiri, ishineteteztiri thonkaeyerorini kipatsi eejatzi inkaare iinja.

³ Ikantakiri:

—Eeroota pithonkitawo kipatsi, inkaare, inchato, maawaeni iroñaaka. Itawakyariifa ojataakotawakiriita ipankakira joriyyopaeni antziniriri Tajorentsi ikowakaakiriri.

⁴ Ari nokemakowentakiri tsika ikaateeyini ojataakoeyeencharini: ikaateeyini 144.000 joriyyopaeni antziniriri Tajorentsi ikowakaakiriri. Maawaeni ikaateeyakirini icharineetenipaeni inashitayitacharini itomipaeni Ishirayeeri. ⁵ Ari rojataakoeyakirini ipankaki:

ikaateeyakini icharineeteni Joraa 12.000,
 ikaateeyakini icharineeteni Roweeni 12.000,
 ikaateeyakini icharineeteni Kaara 12.000,
⁶ ikaateeyakini icharineeteni Asheeri 12.000,
 ikaateeyakini icharineeteni Nejatarii 12.000,
 ikaateeyakini icharineeteni Manaseeshi 12.000,
⁷ ikaateeyakini icharineeteni Shimiyo 12.000,
 ikaateeyakini icharineeteni Rewii 12.000,
 ikaateeyakini icharineeteni Ijakaari 12.000,
⁸ ikaateeyakini icharineeteni Shaporooni 12.000,
 ikaateeyakini icharineeteni Josee 12.000,
 ikaateeyakini icharineeteni Irijamiini 12.000.
 Ari rojataakoeyakirini ipankaki, maawaeni.

Osheki kithaatkawori kitamaari

⁹ Roojatzi naminantanaka eejatzi, noñeyakirini osheki kameethari atziri, ipiyoteeyakan: tekatsi akantya ayoteeyerini tsikarika ikaateeyini. Rinashiteeyakani atziripaeni, inashiteeyakani iñaanipaeni, maawaeni. Ikatziyashiteeyapaakarini inewooteeyakirini Tajorentsí, eejatzi inewooteeyakirini janta ijeekinta Rowishate Tajorentsí. Ikamawentakiri irira, rootaki ikithaateeyantakaworini kitamaari iithaari. Roerikaeyakironi kompiroshi rakoki, ¹⁰ Itacheronkawaantetaki maawaeni ikanteyakini:

—Rirotaki owawijaakoeyakaerini riraga Pawa Tajorentsí jeekatsiri iwinkatharimentoki, eejatzi riraga Rowishate riori.

¹¹ Ari ijeeki okaakini Tajorentsí riraga 24 aataperoteenchari eejatzi riraga 4 ronampiri omampaawaetapiintachari. Rinkiteeyakirini irirapaeni oshekinipaeni kameetha ronampiripaeni Tajorentsí, ari iroñaaka rotziwerowashiteeyakarini ipinkathateeyakirini, ¹² ikanteeyini:
 “Aritaki okantyaari.

Jee, eejatzi naakapaeni noñaaperotzimi. Tema osheki piyotzi, notajorentsí, osheki pitajorentsí.

Thame maawaeni aweshiryawentapiinteyeaarini, noñaaperotapiinteyeyerini, nopaasonkitapiinteyeyerini, nopinkathatapiinteyeyerini; aritaki nokanteetatyeyeaani naakapaeni.
 Aritaki okantyaari”.

¹³ Roojatzi rojampitantakina apaani aataperoteenchari:

—¿Tee piyotziri ninka riraga kithaateeyakaworini kitamaari? ¿Tee piyotziri tsika ipoñeyakan?

¹⁴ Nokantakiri:

—Taanitya, tee niyotzi. Pikamantena: naamashita piyotzirika eeroka.

Ikantawakina:

—Riroteeyakini aapatziyeyakaririni Jesoshi ashirokaawenteeeyakaririni osheki ikemaatsitawenteeeyakarini riori, omaanta tee ipakaero raapatziyari Jesoshi riraga apaatawentakari riraa rowawijaakotantakariri. Ñakiro, raapatziyaperotakari irira rootaki rowameethatantakariri rajankaneki.

¹⁵ Rootaki,

ipiyotawenantakariri Tajorentsí, iñaaperoeyantakaririni jaka inampitari.

Ikantani iñaaperoeyaakirini: kitejiriki eejatzi tsiteniriki.

Ari kijokiro rowaeyakirini Tajorentsí rirori, rookakowenteeyerini, maawaeni.

¹⁶ Rootaki kaari agaeyantyaaririni eejatzi itashe, eejatzi kaari agaeyantyaaririni imiri.

Kaari itagaeyantyaaririni eejatzi oorya,

eejatzi kaari oñaashirenkantyaari eejatzi majawiri.

¹⁷ Riraga Rowishate ikatziya inewootziri okaakini itsipatari Tajorentsi: rirotaki shenteeyeririni maawaeni kithateeeyakaworini kitamaari, papiinteeeyiririni maawaeni koetyeemoeyakaririni. Roemoshirenkaeyakirini, eero riraaga eejatzi.

8

¹ Roojatzi riyontaryaantakawo weyantapaakawori ontsirekaenchari, rowaga siete-tapaentsiri. Ari imaeriteeyanakini maawaeni jeekatsiripaen i janta jenokinta. Ojamani imaeritaperotapaentzi kameetha.

Itziwooteeyini itayitakawori ronampiri Tajorentsi, kaatatsiri paashini-jatzi

² Roojatzi koñaatziro noñaakiri eejatzi: tema noñaakiri 7 ronampiri Tajorentsi, ikatziyeeyanakanai Tajorentskira newootziriri. Ipaetakiri 7 tziwoorents. ³ Eejatzi paashini ronampiri, ikatziyimotapaakawo aritaari riwetsikaetziri ooro, itaapiintzironta kajankapaneri. Roerikakotakiro iyajankarimentoteki riwetsikaetziri eejatzi ooro. Ari itaakiniri Tajorentsi kajankapaneri. Iroka oshiyakaawentakiro amanaantsipaen aapatziyeyaririni Tajorentsi. ⁴ Ari areetakari owachaarite Tajorentski, okajankaenkatapaaki, otsipatatakawo amanaantsipaen aapatziyariripaen. Tema osheki iñaaperotakiro okameethatz. ⁵ Okaankinakitanantanakari riraga onampirentsi raakiro iyajankarimentonaki royaankamenkitakiro ojeekantari kajankapaneri, roojatzi rookantakawori kipatsikira. Roojatzi omapokantanaka oñaanaki tziriririri; aamorenkanaki, morek, morek; eejatzi rookathatanaka tariito, toog, toog; eejatzi antawo omoyekanaka kipatsi, moye, moye, moye.

Rowaga tziwoorentsipaeni

⁶ Roojatzi riwetsikanteeyanakanai ronampiri Tajorentsi ikaatzi 7 itziwootantyaari.

⁷ Itziwootaki jewateentsiri, tziii, tziii, tziii; roojatzi opariyantanaka kipatsiki jiriniki, eejatzi otsipatanakawo paamari. Eejatzi noñaakiro osheki iraantsi. Otaagaantaka jeekayitatsirini kipatsiki, otaagaantaka inchatopaen; taaperotaka roori inchashi, thonkanaka maawaeni.

⁸ Roojatzi itziwootaki apitetapaentsiri onampirentsi, tziii, tziii, tziii; roojatzi noñaantakawori oshiyawori antawo tonkaari, tagaenchari: rookaetakiro inkaareki, thapok. Opeyagaantaka inkaare iraantsi. ⁹ Ikamagaantanaki jeekatsirii inkaareki, eejatzi othonkagaantanaka antawo pitotsipaen.

¹⁰ Roojatzi itziwootantanaka tres-tapaentsiri, tziii, tziii, tziii; roojatzi noñaawakari oshiyariri antari ompokiro ipariyanaki, amorekanaki, moreriririri. Iparyapaaki iñaaki eejatzi iñaa. ¹¹ Opeyagaantaka okepishaatanaki rootaki iitanteetariri kimitawitariri ompokiro: owaero Kepishiri. Ikamaeyanakini osheki atziri ireeyawitakaworini iñaa.

¹² Roojatzi itziwootantanaka cuatro-tapaentsiri, tziii, tziii, tziii; roojatzi itsiwakagaantayitanakini itsimankantanaka oorya eejatzi kashiri. Eejatzi itsiwakaagaantayitanakini riraga ompokiropaen. Tema tee ikoñeetyaaperotanee kitejiriki eejatzi tsiteniriki. ¹³ Ari naminanee eejatzi, noñaakiri antari pakitha rewotaka jenoki. Eejatzi nokemakiri, itacheronkawaantetaki iñaawaetzi, ikantzi:

—¡Ashironkaamatsitemiini! Osheki rashironkaaperoeyanakyaani kameetha jeekatsiripaen kipatsiki. Rootentsi itziwooteeyeni

riraga paashinipaeni ronampiri Tajorentsi, kaatatsiri 3, roojatzi rashironkaantaperoeyanakyaani maawaeni atziripaeni.

9

Itziwootzi impaetapaentsiri 3

¹ Ari itziwootaki paashini ronampiri Tajorentsi, riraga apawakoonita-paentsiri, tziii, tziii, tziii. Roojatzi noñaantakariri ronampiri Tajorentsi ipoñaanaka jenoki, ipokapaaki kipatsiki. Ipaetakiri iyaawiryaantyawori omoo jatatsiri inthomaenta kameetha, tee añiiro tsika okaatapaaki, ² roojatzi jantoo. Roojatzi riyaawiryaaantapaakawo, itaaparyaapaakiro, iywooenkatapaaki osheki owachaarite. Iyaataki jenoki roojatzi otzikaantapaakari oorya janta jenoki roojatzi otsitenitantanaka. ³ Eejatzi noñaakiri kimitariri tsitsiri, ikinantapaakawo kachaari, ithotyaapaakiro kipatsi, imataakaakiri Tajorentsi ikentantzi, kimitaka kitoniro. ⁴ Ikantziri ronampiri Tajorentsi:

—Eero powaaneentawo inchashipaeni, eejatzi inchatopaeni. Omaanta riraga kaari ojataakoeyacharini ipankakira ari pimateri pikenteri.

⁵ Nokowaki pikemaatsitakagaeyaarinii maawaeni kaari aapatziyeeyaririni Tajorentsi, ikaate 5 kashiri, omaanta eero powamagaeyirini.

Ikenanteeeyakaririni, osheki ikatsitaki, ikimitakari kitoniro ikentakiri. ⁶ Ikaatakika irika 5 kashiri ikemaatsitakari atziri ikentakiri oshiyawitariri kitoniro ari ikowaeyawitanakyaani atziripaeni ikamaeyenimi; omaanta eero imatziro ikami. Ikowaeyawitanakyaani rowamaashiteeyaanimi apaniroeni, omaanta eero añaawaero ikamanitanee.

⁷ Ari naminaperotakiri oshiyariri tsitsiri: roshiyakari kawayo, ikyakotarira joraaro raantawakaantari paashinipaeni ipashikayitakawoni kijokitatsiri, eero awyaantari okyaantyari ojataamentotsi eejatzi chekopi. Ramantheetakawo iitoki oshiyawori ooro. Rowaga ipoopaeni oshiyakawo apoo aari. ⁸ Iwitzi okimitakawo oeshi tsinani, eepeteesha. Raeki okimitakawo raeke manitzi, antawoparaeki. ⁹ Ichopineeki oshiyakawo kijokitatsiri, aririka raanaki, shintsi raanaki, roshiyakari tariito ipoemaenkatziranki, tog tziriririri. ¹⁰ Ishitha oshiyakawo ishitha kitoniro, eenitatsi ichee. Aririka ikentakiri atziri, osheki ikemaatsitaperotaari, tema iroñaaka ikaate apawakooni kashiri ishineteetziri ikentakiri atziripaeni. ¹¹ Eenitatsi iwinkatharite tsitsiripaeni: rirotaki ronampiri Tajorentsi aminakaantzirori antawo omoona. Iita iñaaniki joriiyo Awaatoni; omaanta iñaaniki kireeshiyajatzi iita Aporyooni. Akantziri añaanekei aari: Thonkantneri.

¹² Aritaki ikantakari riraga jewateentsiri owashironkagaeyakiririni kipatsijazipaeni. Omaanta tekiraata eenitatis apite yotapaenchari.

¹³ Roojatzi itziwootantaka riraga kaatapaentsiri seis-tapaentsiri tziii, tziii, tziii; roojatzi nokemantakari paashini ñaawaetatsiri. Ari opoñaaka iñaami jaga itaapiinantworiki kajankapaneri, riwetsikaetziri ooro. Ojeekimotakiri ichopineekira Tajorentsi. ¹⁴ Ikantziri tziwooteentsiri:

—Piyaate janta antawokiroña eni: rowaga iitachari Eyojaraate roeyowateri riraga 4 ronampiri Tajorentsi oyaakiriri janta. Aritaki monkaatapaaka kitejiri rowamaantyaariri atziripaeni.

¹⁵ Ari riyaataki, roeyowatziri ronampiripaeni, ikantziri: “Tema ikantzi Tajorentsi paerani: ‘Niyotakiro tsika okaate pithonkatagaanantyaariri atziripaeni. Niyotakiro tsika okaate omonkaatantyaari ojarentsi, kashiri, kitejiri, eejatzi tsika ikaate oorya’”. Iroñaakaroña omonkaataka; rootaki powamaantyaariri. ¹⁶ Riraga ronampiri reewateeyakirini oshekiperoroña joraaropaeni, ikaateeyini 200.000.000. Niyotakiro, ikantakinari.

¹⁷ Eejatzi noñeyakirini iyawayote. Ipashikachopineetawo kijotatsiri kiraatatsiri, oshiyakawo paamari, rowaga amorekaperotatsiri. Iito kawayopaeni oshiyakawo iitopaenii manitzi. Opoñaaka ipaanteki osheki paamari, eenitatsi kachaareenkatsatsiri osheki, eenitatsi amorekaperotatsiri. ¹⁸ Rooteeyakini rowamagaananteyakaririni oshekiperi atziripaeni: rowaga paamari, kachaareenkatsatsiri, eejatzi jankaenkatsatsiri poñaachari ipaantekipaeni kawayo. ¹⁹ Rootaki rowamaantariri kawayo atziri: ipaante eejatzi ishitha. Ro ishitha oshiyakariri maanki, eenitatsi iito, rätsikantakariri atziri.

²⁰ Ari ijeekagaantaki atziri, omaanta tee ikenkithashireeyani: tee ikoyi raapatziyari Tajorentsi. Ikantani rantapiintziro kaari kameethatatsi, ipinkathatapiinteeeyirini kamaari, eejatzi ipinkathatashiteeyawoni riwetsikayitzirini: oorotayitatsirini, peraatatayitatsirini, paashini ashirötayitatsirini, mapitatsiri, inchatotayitatsirini, maawaeni. Iitajorentsitsashitayitawoni, omaanta tekatsi okantya amini, okemi, eejatzi tee anashita. ²¹ Ikantani rowamaantzi, imatsitantzi, ishirontawo kaari rayi, ikoshitzi. Tee ikenkithashiriimaeta.

10

Ronampiri Tajorentsi eejatzi Iwaperite Tajorentsi owaanini

¹ Roojatzi eekiro niyaatatza koñaatziro noñaakiri, tema noñaakiri paashini ronampiri Tajorentsi, shintsitaperotatsiri. Ipoñaaka jenokinta, oshonkakiri menkori, eenitatsi oye iitoki jeñokiini. Ipooni oshiyakari oorya, ipori oshiyakawo paamari. ² Roerikiro Iwaperite Tajorentsi, apineeyaaachari. Iitzipero raatzikaatero inkaare, omaanta roori rampate raatzikero kipatsi. ³ Ishintszitsi ikaemapaaiki, ikimitakari manitzi rajootziranki, joon, joon. Roojatzi itacheronkawaantetawaki ikaataki 7, kimitaka tariito. ⁴ Nokemantakariri ikimitaka itariitotanaki; rooteentsi nojankinatem okaatzi ikantziri, omaanta nokemakiri ikantakina jenokijatzti:

—Eero pikantziri paashinipaeni okaatzi ikantzirira tariitoteentsirira, pimanakotawakiro iroñaaka.

⁵ Ari noñagaeri eejatzi ronampiri Tajorentsi, riraga aatzikirori inkaare eejatzi kipatsi: rowaankiro rakopero jenokinta, ⁶ ikantzi:

—Eenitatsi Tajorentsi añaaperotatsiri, ikantani rañi, eero ikami. Riwetsikakiro jenoki eejatzi maawaeni jeekanteeyaworini; riwetsikakiro kipatsi eejatzi maawaeni jeekanteeyaworini; riwetsikakiro inkaare eejatzi maawaeni jeekanteeyaworini. Riyotzi rirori tee notheeya. Rooteentsi imonkaatero maawaeni okaatzi rantayitzirini. ⁷ Roojatzi itziwootee riraga ronampiri Tajorentsi, riraga *siete*-tapaentsiri. Ari okoñaatapaaki manawitachari paerani: iroka riyoteeriri Tajorentsi aapatziyaririni paerani, kimitaka ikantxitakari riraga kamanantayitzirorini inñaani Tajorentsi paeraniperoroña.

⁸ Roojatzi nokemakiri eejatzi jenokijatzti kenkithatakakinari inkaaganki. Ikantana:

—Piayaate, paawakiro Iwaperite Tajorentsi roerikiri nonampiri aatzikirori inkaare eejatzi kipatsi.

⁹ Roojatzi niyaatatshitantakariri, nokantapaakiri:

—Pipenawo Iwaperite Tajorentsi.

Ikantawakina:

—Ajaaty, payero, poyaawo; aririka powakyaawo, ari pikemakiro opochaatzi, kimitaka iyaa pitsi. Omaanta ari opiyashiryaafoonthatakimi.

10 Ari naawakiro nakoki, nowakowo. Nokemawakiro oPOCHATAWITA-paaka. OPOCHAWITAKA nopaanteki kimitaka iyaa pitsi, omaanta roojatzi opiyamoonthatapaaakina. **11** Roojatzi ikantakina:

—Iroñaaka eekiro piyaatatayee pikenkithatakoyiterini rowashironkaeri Tajorentsi maawaeni antapiintzirori kaari kameethatatsi. Pikamanteri maawaeni paashinipaeni atziri: inashiyitacharini ipaantepaeni, inashitachari pinkatharipaeni, kipatsipaeni, maawaeni.

11

Ikenkithatakotziri apite kenkithatakaantatsiri

1 Roojatzi ipantakinawo Tajorentsi inchaki, oshiyawori kotzikiirontsi, roojatzi ikanantakina:

—Ajaa, iroka monkaatamentotsika. Piyaate iroñaaka pimonkaatakitero Tajorentsipanko; eejatzi pimonkaatakitero itaapiinanteetawori kajankapaneri, eejatzi piyotakiteri tsikarika ikaateeyini maawaeni pinkathateeeyanarini janta. **2** Omaanta eerowa pimonkaatziro janta inkokironta: ik-inapiintzinta kaari yotatsiri Tajorentsi. Ikaatagi 42 kashiri* ikinayitanakini paashinijatzitatsiri atziri janta nonampiki: rowaga Jerojaree. Osheki rowashironkagaeyerini jeekatsripaeni janta tema ari ikemaatsitakaakyaa. **3** Notyaanteri apite kenkithatakotenani, nomatakaakiri ikenkithatapiinte ikaate 42 kashiri. Ikithaatakawo ontyaachari iwitzikaawira, tema retakoshiryaakari anteeyirorini kaari kameethatatsiri. Ikan-tapiinteyeyerini atziri: “Pikenkithashireeyanakyaani. Pookaera kaari kameethatatsi pantziri, roojatzi paapatziyeyearini Jesoshi, pijeekaeyeni kameetha”.

4 Ikenkithatakotzitakarini paerani Jakariiyashini riraga apitetatsiri os-hiyakaworka oriwo. Eejatzi oshiyakaworka ijeekantari itamorekathetea jeekatsiri janta Awinkathariteki. Tema rirotaki pinkathariwenteeyiririni maawaeni atziri. **5** Enitatsirika kowawitachari rowashironkaerimi riraga apitetatsirira, apatziro ipoñaanakya roeyowanakiro paamari ipaanteki oth-onkaperoeyerini, otagaeyanakirini maawaeni, pokirireei. **6** Osheki imatak-agaejerini Tajorentsi. Ikenkithatapiinte, omaanta ikowakirika eero opariyi inkani, eero ipariyakayiro, roojatzi ikaatantyaawori ikenkithate. Eejatzi, ikowakirika, ipeyeero iñaa iraantsi. Eejatzi ikowakirika, rowashironkaapi-inteeyerini maawaeni jeekaeyatsirini, inashitayitacharini mantsiyarentsi-paeni.

7 Aririka imonkaatakiro ikenkithate, eejatzi ipoñaakya omooki inthomaenta piratsittatsiri koweenkatatsiri rirori. Ikijapaeri kenkithatatsirini, ranaakotapaeri, rowamaapaeri, shemi. **8** Romaryagaeyashitarini kamaeyatsirini janta Jerojareeki niyanki. Roshiyakaantakiro Tajorentsi Jerojareera, Jorooma eejatzi Ejipiito; ro roshiyakanantawori, osheki rantapiinteyironi jerojareejatzi kaari kameethatatsi. Tema aritaki ikenkithatapaaeri Jesoshi jaga. **9** Okaate 3 kitejiri romaryagaeyaanii nampitsiki niyanki, roojatzi itampatsikatanteyayarini oorya eejatzi. Maawaeni atziripaeni kipatsiki ramineeyerini kamayiteentsirini, inashitayitakaanyaani amineeyiririni: ipoñaayitakaanyaani paashinikipaeni nampitsi, inashitayitakaanyaani iñaanipaeni. Eero ishinetakaantziri ikitateeteri. **10** Ikomoshirewenteeyanakirini maawaeni jeekaeyatsirini kipatsiki ikamakira riraga apite kamanantayitawitorini iñaa Tajorentsi: ipashitawakagaeyakawoni oetarikapaeni. Ikanteeyeni:

* **11:2** Iroka 42 kashiri omonkaatka 1.260 kitejiri.

—Thame akimoshireeyeni. Kamaki riraga kenkithatakowitaririni Tajorentsi: eero imateero roñaashirenkae ejatzi.

¹¹ Omaanta iakaatapaaki tampatsika oorya itajonkaeri Tajorentsi, rowañaagaeyeerini apite, ikatziyeeeyanaani. Roojatzi ithaaawanteeyan-tanakarini maawaeni ñeeyawakiririni. ¹² Roojatzi ikemantakari Tajorentsi, ishuntsitakiro ipaante ikantzi:

—Pipokae jaka Jenokika.

Ari riyaateeyaneeni Jenokinta, rojatekantaneeyawo menkori shipakiryaaperotatsiri; iñeeyawaerini maawaeni kijeyawitakaririni. ¹³ Roojatzi omoyekantanaka kipatsika, otyaagaantanaki pankotsipaeni. Ikamaeyakini atziri 7.000. Osheki ithaaewayanakini paashinipaeni jeekagaantaneentsiri roojatzi iñaaaperoeyantanakarini Tajorentsi, ikanteeyanakini:

—Tema osheki ipinkatharitzi Tajorentsi, itajorentsitaperotzi.

¹⁴ Omonkaatapaaka apitetapaentsiri rowashironkagaeyakirini Tajorentsi atziripaeni. Omaanta iyotapaaka apaani, rowaga tres-tapaentsiri.

Itziwootaki weyantapaakawori

¹⁵ Roojatzi itziwootantaka riraga paashini ronampiri Tajorentsi, riraga siete-tapaentsiri: tziii, tziii, tziii. Nokemaeyakirini jeekatsiripaeni Jenokinta, ishuntsiwaantetakiro ipaante, ikanteeyini:

—Pikemaperote iroñaaka.

Tema iroñaakaroña ipinkathariwenteeyerini Awinkatharite maawaeni kipatsijatzi,

ikaateri Rötyaantanewo ipinkathariwenanteeyeni, ikanteetatyeyaaani.

¹⁶ Roojatzi riraga 24 aataperoteenchari apatziro ipoñaaka iwinkatharimentoki, roojatzi rotziwerowashiteeyantakaririni Tajorentsi: osheki ipinkathateeyakirini. ¹⁷ Romampaawenteeyakarini, ikantzi:

—Nopaasonkitemi Nowinkatharite, eerokapero Tajorentsiperotatsiri: osheki pishintsitaki, osheki pipinkatharitaki.

Tee pipaashinitzi, pikantani pitajorentsitaki.

Eejatzi pipinkatharitaperotaki, iroñaaka pipinkathariwenteeyerini maawaeni atziri;

eero pookaero, roojatzi pikantyaani.

Rootaki nopaasonkitanteeyimirini.

¹⁸ Ikijectywakimini atziripaeni maawaeni kipatsi, omaanta iroñaakaroña monkaataka pipiyateeyantyaarini.

Pipiriunteeyeerini kamaeyawiteencharini, maawaeni pikantakotantyaarini: pipineeyerini maawaeni antzimirori pikowakagaeyakiririni, maawaeni kamantanayitzirorini piñaani, aapatziyeeeyimirini, maawaeni.

Pipinkathateeyerini, pinkatharitawitacharini kipatsiki, kaari pinkatharitawitachani, maawaeni.

Kameetha pijeekekakagaeyerini pinampiki.

Omaantakya riraga kijeyawitakimirini, kaari kameethateeyatsini, powashironkagaeyerini, pookaeyerini rirori paamariki kaari tsiwakanitatsini.

¹⁹ Roojatzi ashitaryaantanaka ipanko ijekantari Tajorentsi janta Jenokinta, noñaakiro inthomaenta oshiyawitawori tsiwoo, rowaga ojeekantari rojankinari Tajorentsi inthomaenta paerani. Tema ikashiyakaakariri irira ikenkithatakagaeyerini joriiyopaeni jaga. Eejatzi noñaakiro aamorenki, morek, morek; eejatzi ishuntsitzi tariito, tyaaag, tyaaag, eejatzi omoyekanaka kipatsi, moye, moye; eejatzi opariyaperotaki osheki jiriniki, chekiriririri.

12

Tsinani eejatzi maankitatsiri

¹ Roojatzi koñaatziro noñaaperotakiro paashini. Noñaakiro apaani tsinani, kimitaka okithaatakawo oethaari oshipakiryaaki kimitaka oorya, aatzikakiri kashiri oetziki eejatzi amantheetakotakari 12 ompokiro oetoki. Tema notsikanatakawo noñiilo. ² Omotzitaki, rooteentsi otzimakote, atsikamoonthatakiro, okaemawaetaki:

—¡Akayawee! ¡Akayawee, nokamaatyeyewe!

³ Romapokashitapaaka jenoki, ipokapaaki iwinkatharite kamaaripaeni roshiyapaakari antari maanki, kityonkamanthari. Okaatzi iito 7, eejatzi ichee 10. Ramantheetayitakan iitokipaeni. ⁴ Inoshikagaanantakarini isitha osheki ompokiropaeni; ari rookapirothatiitakotakiri kipatsiki. Ikatziyapaaka janta ojeebakira tsinani, royaawentapaakawo otzimeri otomi, rowantawakyaari. ⁵ Roojatzi okoñaatantakari otomi, riraga pinkathariwentaperooyeririni maawaeni atziri; tekatsi piyathatyaaarini iinja. Omaanta eentsitera raapithatanakiro Tajorentsi raanakiri jenokinta, ijeekakaapaakiri iwinkatharimentoki. ⁶ Oshiyanaka tsinani janta okaankiityeenta tekatsinta atziri ipanko riwetsikakinronta Tajorentsi ojeekantyaari. Ari roejeekawakiro kameetha janta, okaatzi 42 kashiri.

Ikoshekawakaeyakanjenokijatzi janta jenokinta

⁷ Eekiro niyaatzi koñaatziro noñaaperotakiro. Noñaakiri ikoshekawaka-gaeyani janta jenokinta. Riraga Miyiiri, ikaateeyakirini paashinipaeni ronampiri Tajorentsi, ikoshekaeyakarini riraga Jatanaashi oshiyawenttariri maanki eejatzi iyamaaritepaeni rirori; ikoshekawakagaeyakan. ⁸ Omaanta riraga maanki tee rotsinampaeri ronampiripaeni Tajorentsi. Rootaki iroñaaka roemishitowntaariri jenokinta maanki eejatzi ikaateeyinira, iroñaaka Tajorentsi tee ikowaeeyirini ipiyimoteeyaaarini jenokinta riraga Jatanaashi eejatzi iyamaaritepaeni ijeekantyaari. ⁹ Kyaaryo, rookaperoeyakirini riraga maanki iiteetziri Jatanaashi jaka kipatsiki, eejatzi maawaeni iyamaaritepaeni ikaatzi akakotayitawitaririni. Riraga maanki rirotaki amatawitakirori Eewa paerani. Rirotaki iwinkatharite kamaari-paeni. Osheki ramatawitapiinteeeyakirini atziripaeni roojatzi iroñaaka.

¹⁰ Roojatzi nokemantakari jenokijatzi, tacheronkawaanteri ipaante, ikantzi:

“Iroñaaka rowawijaakotaperoeyakirini Tajorentsi neentsiteteeyakarini, itajonkakowenteeyakirini, ipinkathariwenteeyakirini; eejatzi Itomi riraga Rotyaantanewo ipinkathariwenteeyakirini. Kameethataki.

Ikantani paerani ithawetakoeyakirini Jatanaashi, riraga maawaeni kemi-jantzinkaripaeni, ikowapiintawitaka rowashironkagaeyerinimi, rootaki ikantani ithawetakotantariri kitejiriki, tsiteniriki janta Tajorentsiki. Iroñaakkaya eero imateero Jatanaashi eejatzi.

¹¹ Irirapaeni raapatziyeeyarini Jesoshi ikamawenteeyakironi kaari kameethatatsi rantakiri, rootaki imatantakawori raakowtentawakiri tema ipinawentakiro Jesoshi riraa okaatzi rantakiri rowawijaakotanteeri. Tema roñaagakiri royaaperotziri Rowishate Tajorentsi. Tee ishiyapithatari atziri kowatsiri rowamayerimi: tema royaaperotakiri rirori.

¹² Iroñaaka akimoshireeyakini aakapaeni maawaeni jeekatsiripaeni jaka jenokinta; akantyaani akimoshireperoeyanakini. Omaanta ashironkaamatsitemiini kipatsi eejatzi inkaare. Tema ijeekanaki Jatanaashi eejatzi iyamaarite jaga jaawikira iroñaaka. Rashironkaaperoeyanakyaani maawaeni kipatsijatzi. Osheki

ikijaperota Jatanaashi, riyotzi eero ojamanitzi ijeeki kipatsiki, osheki rowashironkagaeyanakyaani jeekatsiripaeni jaga".

Riraga maanki ikijakiro tsinani

¹³ Ari rowariyeetakiri riraga maanki Jatanaashitatsiri kipatsiki jaka, osheki ikijappaakiro tsinani koñaatakiriri otomi. ¹⁴ Omaanta itajonkakiro Tajorentsi otzimantakari oshiwanki apite, okimitakawo ishiwanki antari pakitha. Roojatzi aapithatanakiri iwinkatharite kamaaripaeni, iyaataki inteeena tekatsinta atziri ipanko, riwetsikakaantakironta Tajorentsi. Ari janta retakoetawakawo ipaetakiro owanawo, ikaataki 42 kashiri ojeebakaki janta. Tee imateero riraga Jatanaashi riyaatashiteero janta. ¹⁵ Roojatzi riraga maanki Jatanaashitatsiri osheki roemishitowaatakiro iñaa ipaanteckira. Ikowawita roonkakayaawomi kipatsi opiinkantyaarimi tsinani. Ikowawita ithonkaeyeronimi. ¹⁶ Omaanta ramitakotakiro ronampiri Tajorentsi, tema rirotaki ashitaryaakinirori kipatsi okyaagantaneeyaari maawaeni iñaa kipatsiki. ¹⁷ Eekiro riyaatatzsi ikijanakiro tsinani. Tee imatziro roori, rootaki riyaatashitariri paashinipaeni eentsitepaeni: maawaeni riraga antziniriri Tajorentsi ikaminaakiriri, rowaga riyotaakiriri Jesoshi; tema ikowawita riraga Jatanaashi ithonkaeyeronimi riroripaeni. ¹⁸ Roojatzi noñaakirri riraga Jatanaashi ikatziyapaaka ocheraaki inkaare antawo royeeri pokatsini.

13

Koweenkatatsiri riyoyi antawoki inkaare

¹ Roojatzi nokatziyaka naaka Jowa impanekiki, janta othappyaaki antawo inkaare. Eekiro niyaatatzi koñaatziro noñaakiri. Tema noñaakiri piratsitatsiri koweenkatatsiri riyowapaakira inkaarekira. Eenitatsi ichee okaatzi 10, eejatzsi eenitatsi iitopakaen ikaatzi 7. Jaga icheekipaenira ramantheetakawo amantheerentsi, kimitawori rashii eewawenantatsiri. Eejatzsi rojankinatakotaka iwaero iitokipaeni; omaanta tee okameethatzsi, tema itheenkakiri Tajorentsi: iitawaetashitaka kimitaka rirotaki inashitzinkari tajorentsi. ² Ari roshiyapaakirri manitzi. Omaanta iitzi oshiyakawo iitzi maeni; eejatzsi ipaante oshiyakariri ipaante chaanari. Ikantawakiri maanki:

—Iroñaaka nokowaki nomatakayemi, pikimitanenari: osheki pimatayitakironi, osheki pipinkatharitanaki, osheki pikantakaantayiterini paashinipaeni.

³ Amashitaperowitaka kameetha iitoki apaani, naamaashitaka roowiteencha owamayerimi amashitakirri. Rotsikanateeyanakarini maawaeni kipatsijatzi, ikanteeeyini:

—¿litakaya kaari ikamanta? Ooo, paminerotya iito, ¿litakaya kaari owa-maantari?

Kyaaryo, etsiyatakote, rootaki rotsikanateeyantaperotanakaririni riroripaeni eejatzsi ipinkathatanakiri, royaatanakiri.

⁴ Roojatzi ipinkathateeyakirini maanki, ikanteeeyini:

—Piñaakiri, osheki imatakaakiri koweenkatatsiri.

Eejatzsi ipinkathateeyakirini koweenkatatsiri, ikanteeeyini:

—Piñaakiri, osheki ishindsightsinka, tekatsi materini ipiyatyari.

⁵ Roojatzi riraga maanki ikantziri koweenkatatsiri:

—Iroñaaka pikjanakiri Tajorentsi pipinkatharitaperotanaki.

Ari osheki rajagaaperotaka, osheki ikantzimatakiri Tajorentsi. Omaanta eero iñaashintsitziri irira inta ishinetakiri ikantzimatakiri 42 kashiri. ⁶ Ari ikantzimatakiri rirori, ikantzimatakiro inampi, eejatzsi ikantzimateeyakirini jeekatsiripaeni janta. ⁷ Eejatzsi ikantakiri maanki:

—Pikijeeyerini maawaeni aapatziyeeyaririni Tajorentsi, powashironka-gaeyerini. Eejatzi pipinkathariwenteeyerini jeekatsiripaeni kipatsikipaeni, paashinityitzirorini ipaantepaeni.

⁸ Aritaki ipinkathateeyerini maawaeni atziripaeni. Apatzirokya riraga aapatziyaririni Jesoshi, eero ipinkathatziri. Aritaki, tekirani riwetsikironi kipatsi, riyotzitakarini Tajorentsi maawaeni aapatziyeeyaririni. Aritaki rojankinatakironi iwaeropaeni iñaanamentoki rashì Jesoshi iiteetziri ee-jatzi Rowishate Tajorentsi tema riyotzitayitakarini irira kamawenteeyeririni atziripaeni. ⁹ Powakempitaperotawakaawo iroñaaka iroka nokanteeyakimirini. ¹⁰ Ikantzi Jesoshi:

—Aapatziyanaripaeni, omawitya rooteentsi pikemaatsiperotatyä osheki, pishintsishiretaki apaniroeni, eekiro piyaatantatyäri poyaataperotena naaka. Aririka ragaetemi ee-jatzi romonkyaagaetemi: omonkyaaagamentotsiki, eekiro piyaatatyee pishintsishiretaki eeroka apaniroeni. Ikowakirika rowamaemi, eekiro piyaatatyee pishintsishiretaki. ¡Naminakowentemi!

Paashini koweenkatatsiri ryowapaaki kipatsiki

¹¹ Roojatzi noñaakiri paashini piratsitsatsiri koweenkatatsiri, ipoñaaka rirori kipatsiki inthomaenta. Ikimitawitakari owisha, eenitatsi ichee owaanini apite; ikoweenkatzi iñaawaetzi kimitaka riraga maanki Jatanaashitatsiri. ¹² Osheki ipinkatharitaki, ikimitakari paashini koweenkatatsiri, riraga amashiwitachari iitoki. Iitziri irira riraga apitetapaentsiri amitakotantaniri. Eejatzi ikanteeyirini maawaeni jeekatsiripaeni:

—Pipinkathateeyerinira riraga amashiwitachari iitoki.

Ari ipinkathateeyawakirini. ¹³ Osheki itajonkantayitakini riraga apitetapaentsiri. Ímatayitakironi kaari iñaapiinteeyini asheninkapaeni. Iñeeyakirini atziri rowariyakiro paamari: opoñaaka jenokinta, roojatzi kipatsiki. ¹⁴ Osheki imatayitakironi, rootaki ramatawiteeyantakaririni osheki atziri, ikimitakaantakiri rirotaki itajorentsile. Aririka itsipatakari riraga jewatziriri, osheki imatayitakironi. Eejatzi ikanteeyakirini atziri:

—Ajaatya, poshiyakaawenteeyenarini irika jewatakinari, irika ithatyaagaetawitakari apaani iitoki. Thatzik. ¡Pamineeteeri! Tee ikamateetzi. Ichekuitakarira pirotee.

¹⁵ Ari ikemijantaperoeyakirini, riwetsikaeyakironi oshiyakaantsi. Okimitaka imatakaakiri Jatanaashi itajonkakiro, añaantakari, ee-jatzi oñaaawaetantakari. Roojatzi ikanteeyakirini atziripaeni:

—Pipinkathateeyeroni iroka awetsikaeyakirini: rootaki atajorentsile.

Ari ipinkathateeyawitakawoni. Omaantaka maawaeni kaari pinkathatzirori, rowamaakaanteeyakirini. ¹⁶ Eejatzi rojataakotakaantakiri atziripaeni, maawaeni. Rojataakoeyakan rakoperoki, rooma aririka ipankaki, maawaeni: pinkathariteeyatsirini, kaari pinkatharitatsiripaeni, ashaaganteeeyacharini, kaari ashaaganteeeyachani; riraga ramananteetziri ee-jatzi riraga kaari ramananteetzili: rojataakoeyakan maawaeni. ¹⁷ Ro rojataakoeyakiririni iwaero koweenkatatsiri, aamaashitya paashinipaeni rojataakoeyakirini inoomerote. Ikanteeyirini:

—Eerorka rojataakoeyani atziripaeni, eero noshinetziri ramanantayiteni oetarikapaeni ee-jatzi eero noshinetziri ipimantayiteni oetarikapaeni.

¹⁸ Noyemijantzinkaritepaeni, okameethatzí iroñaaka pikenkithashryaakotero inoomerote koweenkatatsiri. Rootaki inoomerote atziri, tema okaataki 666. Eerokarika yotzinkari, ari piyotakiro oetarika oshiyakaawentachari.

14

Jowa iñaaakiri Rowishate Tajorentsi eejatzi omampaawaetawenteeyaririni

¹ Eekiro niyaatatatzı koñaatziro noñaakiri, tema noñaakiri riraga Jesoshi iiteetziri Rowishate Tajorentsi, ikatziyaka owinteniiyeera ichopineekira Tajorentsi iiachari Shiyoo: ojeekaki Shiyoo Jerojareeki. Ikaateeyakirini maawaeni aapatziyeeyaririni, ojataakotacharipaeni ipankaki iwaerokira Rowishate eejatzi Iriri. Ikaateeyakini 144.000. ² Roojatzi nokemaeyirini eejatzi jenokijatzi, ishuntsitzı ipaante; ikimitakawo antaworõña opareenkäri, eejatzi antawo ookathata. Riroteeyakini piyompiteeyirorini omampaakayaawori oshiyawori piyompirentsı. ³ Eenitatsi janta Tajorentsiki, janta ijeekinta aataperoteencharipaeni eejatzi riraga 4 ronampiri omampaawaetapiintachari. Roojatzi romampaawaeteeyantanakawoni mampaantsi owakirari; okameetheenkataki, omaanta tekatsi paashini materonı riyotero mampaantsi: apaniroeni riraga kaateentsiri 144.000 atziri owawijaakoeyeencharini. ⁴ Irikapaeni tee ranteeyironi kaari kameethatatsi. Tema ikempoyaaka ikiteshiretsı, tema tee išhirontawo tsinani kaari rayi; inta ikantani royaateeyakirini Rowishate, tsikarika riyaatayitakini. Apatziro ipinkathateeeyakirini Tajorentsi eejatzi Rowishate. ⁵ Tee itheeyeyani, eejatzi ikameethateeeyakini, tee ranteeyeeroni kaari kameethatatsi.

Rooteentsi rowashironkaeyerini Tajorentsi kaari aapatziyari

⁶ Roojatzi noñaakiri paashini ronampiri Tajorentsi, raayitanakini jeñokiinira. Ikenkithatakagaeyakirini maawaeni jeekatsiripaeni kipatsiki, tsikarika ojeekayitzini inampipaeni, eejatzi tsikarika okantayitarini ipaantepaeni. Ikananteeyakirini tsika ikantyaari Tajorentsi rowawijaakoeyanteeyaaririni. Rootaki ikantapiinteeeyiririni Tajorentsi maawaeni atziri paerani, tee ipaashinitziro. ⁷ Itacheronkawaantetzi ikantzi:

—Pipinkatheeeyerini Tajorentsi, pikanteeyerini pisheninka: “Ikameethataki Tajorentsi”. Pamine, rootzimateentsi omonkaataky rowashironkaeyerini maawaeni kaari aapatziyeeyaririni Tajorentsi. Pipinkathatperoeyerini: tema rirotaki wetsikirori jenoki eejatzi kipatsi, inkaarepaeni eejatzi ñaatenipaeni, maawaeni.

⁸ Royaatanakiri paashini ronampiri Tajorentsi, ikantzi rirori:

—Paerani riraga jeekawitacharini Wawirooniyaki rantakaapi-inteeyakirini paashinipaeni atziri kaari kameethatatsi, omaanta rootzimateentsi ithonkimaeyerini Tajorentsi wawirooniyajatzi. Eero imatakagaeyeerini eejatzi oefarikapaeni.

⁹ Roojatzi royaateeri paashini ronampiri Tajorentsi eejatzi: riraga tres-tapaentsiri. Itacheronkawaantetapaakiri, ikantapaakiri rirori:

—Kyaaryoowa, pipinkathatzirkari riraga koweenkatatsiri, eejatzi rowaga oshiyakaantsi. Eejatzi pishinetarikari rojataakotemi pipankaki, eerorika pakoki. ¹⁰ Aririka pipinkathateri koweenkatatsiri eejatzi pishinetyaaririka rojataakotemi, ari ikijakimi Tajorentsi; ikijaperotemi, eero ikamintheemaetzimi. Pikemaatsitaperotakyaawo paamari otsipatakyawo opane shimashiretatsiri tema rootaki tacheronkaetyaaperotatsiri. Tema iñeyemini maawaeni ronampiri Tajorentsi, riraga kameethaperotatsiri, eejatzi riraga Rowishate rirori. ¹¹ Pikanteetatyeyaaani pikemaatsityawo paamari; eero otsiwakanitzı, okantatyeyaaani eekiro okachaareenkatanakitye: kitejiriki, tsiteniriki, eero othonkanita. Aritaki ikemaatsiteeyawoni maawaeni pinkathatziriri koweenkatatsiri eejatzi oshiyakaantsi, eejatzi maawaeni

ojataakoeyaworini iwaero. ¹² Rootaki riraga reentsitepaeni Tajorentsi okameethatz eentsikiroeni royaawentya imatantawori ikemijantaperotziri okaatz i kaminaakiriri Tajorentsi eejatzi ikyaaaryoowenantyaawori royaatantyariri Jesoshi.

¹³ Roojatzi nokemakiro eejatzi Ishire Tajorentsi janta jenokinta, okantakina:

—Enitatsi iroka pojankinateri: “Ikimoshiretakayeri Tajorentsi maawaeni kamatsiripaeni, raapatziyakaririka Iwinkatharite, roojatzi ikamantakya. Kyaaryo, ikimoshiryaakaaperotyaaari Tajorentsi, tema riyotziro maawaeni ranteeeyakinirini kipatsiki. Iroñaaka ijekakagaeaeyakirini kameetha, imakoryaakaaperoeyeerini. Eejatzi ipinateri Tajorentsi tema ikyaaaryoowentziniri rantziniri irira ikowakaakiriri roojatzi ikamantakya”.

Noñaakiri ronampiri Tajorentsi rowamaatziiri atziri

¹⁴ Roojatzi eekiro niyaatatz koñaatziro noñaakiri, tema noñaakiro menkori, okitamaamawotaperotaki. Eejatzi noñaakiri kimitakariri atziri, ijekaki menkoriki. Ramantheetakawo wetsikachari ooro. Eejatzi roerikakiro oshiyawitawori jawiri tzipiro, othoyempitaperotaki, ithatzinkakotantyaa-wori raroosote jampateentsirira. ¹⁵ Roojatzi noñaakiri paashini ronampiri Tajorentsi, ipoñaaka Tajorentsipankoki. Itacheronkawaantetzi ikaemakotakiri riraga jeekatsiri menkoriki:

—Ikantzi Tajorentsi: “Monkaataka iroñaaka: poshiyakaantakiro pi-thatzinkakotero pankirents, ari pikantakiri iroñaaka powamaeri maawaeni kaari kameethatatsi jeekatsirika kipatsiki”.

¹⁶ Riraga jeekawiteencharira menkoriki, ari ithatzinkakotakiro, thatzik, tema rowamagaeri maawaeni kaari kameethatatsiri.

¹⁷ Roojatzi ipoñaantanaka paashini ronampiri Tajorentsipankoki janta jenokinta. Eejatzi ramaki rirori oshiyawitawori jawiri tzipiro.

¹⁸ Eejatzi ipoñaaka paashini ronampiri Tajorentsipankoki, tema rirotaki aminawentzirori paamari janta itaapiintzironta kajankapaneri. Itacheronkawaantetzi ikaemakotakiri isheninka oerikirori ijawirite:

—Pimonkaatakayaawo jaawiki eejatzi eeroka, powamayeri atziripaeni kaari kameethatatsi kimitaka pipejirowanki otha oowa irakaanto.

¹⁹ Roojatzi kimitaka ipejantawori maawaeni ooropaeni janta kipatsiki, riraga ronampiri imonkaatakayaawo maawaeni kipatsi rowamaantyaariri atziripaeni kaari kameethatatsi. Intsipaete ipejeeyerini. Roojatzi ipiyoteeyantakyaarini raatzikatzikaantyaariri. Kimitaka iroka ari okanta rowamaantyaariri Tajorentsi riraga kaari kameethatatsiri. Tema iroñaaka yomaatapaaka rowashironkaantyaariri Tajorentsi riroripaeni.

²⁰ Ari raatzikatzikaateri janta owantsiki, tee ojeeki nampitsikira. Ari opoñaanakya osheki iraantsi raatzikatzikaatakirira, oonkanakya kipatsiki; jenokyaatanaki, areetakawo ipaanteki kawayo. Othotyaanakiro iraantsi 300 kiroometero ojanthatzi.

15

Tajorentsi rotyaantakiri 7 ronampiri rowashironkagaeyerini atziri

¹ Roojatzi koñaatziro noñaaperotakiro paashini: tema noñaakiro janta jenokinta paashini awijatsini iinja, kaari añaapiintzi. Roñaagakinawo Tajorentsi maawaeni iroka ayotantyaari tsika okantyaari iinja. Osheki nokenkithashiryaakiro, osheki notsikanatawakawo. Noñaakiri 7 ronampiri Tajorentsi, owashironkagaeyeroteririni atziri. Riroteeyakini weyeeroni maawaeni owashironkayeririni atziri; omonkaatapaakya ikijanakya

Tajorentsi. ² Noñaakiro eejatzi inkaare koñaaganto, oshipakiryaaki oshiyakawo otsipatawo paamari. Noñeeeyakirini janta ikatziyeeyakan kaari pinkatheeyirini riraga koweenkatatsiri, eenitatsi eejatzi roshiyakaantawo riori; riroteeyakini maawaeni kaari ojataakotacha iwaero eejatzi inoomerote. Ari roerikaeyakironi kimitawitawori iwiyompirkiki ipashitakariri Tajorentsi. ³ Romampaawaaeteeyakawoni kimitawitawori romampaani Moeseshi, riraga antawaetzinirini Tajorentsi paerani. Tema romampaawenteeyakarini riraga Rowishate Tajorentsi. Iroka okantzi mampaantsi:

“Nowinkatharite, tema eeroka Tajorentsi, osheki pimatayitakironi.

Osheki pitajonkantayitakini, notsikanatakawo pantayitakirini.

Okameethaperotayitakini pantayitakirini, tee pamatawitantzti.

Kyaaryo, pipinkathariwenteeyakirini jeekatsiripaeni maawaeni nampitskipaeni, pikantani. Eejatzi maawaeni pantzi okameethatzti.

⁴ Tema, Nowinkatharite, okameethatzzi nopinkathateeyemini naakapaeni maawaeni jeekatsiripaeni tsikarika.

Okameethatzzi nokamanteeyerini atziri: ‘Kameethari Tajorentsi’; tema kyaaryo, pikameethataki.

Ipoñeeyanakyani atziri maawaeni nampitskipaeni ipinkathateeyantemirini.

Tema riyoteeyanakini okameethataki panteeyakirini”.

⁵ Roojatzi naminanee eejatzi, noñaakiro ashitaryaanaka ipankomawo Tajorentsi, ironta jeekatsirinta jenokinta. Noñaaperotakiro janta inthomaeperokinta ijeekinta riori. ⁶ Riyowanee Tajorentsipankoki riraga ⁷ ronampiri, riraga owashironkagaeyaperoteririni atziri.

Ikithaateeyakawoni kithaarentsi okitamaamawotaperotaki. Ichopineeki eenitatsi oshiyawori ishirikathakitarri, riwetsikaetziro ooro. Tema riyoyaakiri riraga Tajorentsi riroripaeni rowashironkaeri atziripaeni.

⁷ Eejatzi eenitatsi apaani ronampiri omampaawaaetapiintachari ipakoeyawakirini paashini ronampiripaeni apaaniipaeri pajo. Iyeekitaki pajokipaeni owwa, owashironkaantyhaariri atziri. Oshiyakaawentakiri ikijeri Tajorentsi iinja theenkaeyiririni. Tema ikantatyaaani rañi riori, eero ikamanitee. ⁸ Kachaarenkatanaki Tajorentsipanko inthomaenta, ikantakaakawo ipinkatharitzira eejatzi itajorenka. Tekatsi ikanteetero ikyagaeyeroni, roojatzi imonkaatantyaawori ronampiri ikantakiriri Tajorentsi.

16

Tsika okantari tzimatsiri pajoki

¹ Roojatzi nokemakiro Ishire Tajorentsi iñaawaetaki janta ipankoki Tajorentsi. Itacheronkawaantetzi ikantziri riraga ⁷ ronampiri:

—Iroñaakaroña piyaateeeyeni pijakotero kipatsiki rowaga ⁷ pajokitzirira, rootaki oshiyakawori ikijaka Tajorentsi.

² Roojatzi ryaatantaka riraga jewatatsiri ronampiri. Ijakotakiro kipatsiki owwa, roojatzi ijoeteeeyantanakan maawaeni ojataakoeyaworini iwaero koweenkatatsiri, eejatzi maawaeni pinkathatzirori oshiyakaantsi. O, osheki ijoetayitanakini; opathayitanakini, ishitziyitanakini.

³ Roojatzi ryaataksi apitetapaentsiri ronampiri, ijakotziro owwa janta antawokiroña inkaarepaeni. Opeyanaka, okimitakawo riraani kamaentsirini. Ikamaeyakini jeekaeyawitacharini inkaareki: shimapaeni, omanipaeni, koshoshikopaeni, maawaeni.

⁴ Roojatzi ryaataki *tres-tapaentsiri* ronampiri Tajorentsi, ijakotziro pajokira janta enikipaeni eejatzi ñaatenikipaeni. Opeyeeyanakaniraantsi.

⁵ Roojatzi ikantziri ronampiri Tajorentsi riraga jewawentzirori iñaa:

—Tajorentsi, osheki pikameethataki; pikantani pijeeaki: paerani, roojatzi iroñaaka. Okameethataki powashironkagaeyerini maawaeni irintappaeni, iñaashiteetyaawoota; ⁶ tema riroteeyakini owamagaeyiririni aapatziy-eeyimirini eejatzi kamanantayitzirorini piñaani. Iroñaaka pipiyatakowentaari, powamagaeyakirini. Iñaashitawo rirori, tema riyoteeyakini rivotaki owamaantatsiri.

⁷ Eejatzi ijeki paashini janta itaapiintzironta kajankapaneri. Ikantzi rirori:

—Kyaaryo, Nowinkatharite, eeroka Tajorentsi matayitzirorini maawaeni. Tema okameethataki powashironkagaeyerini, ikemawakiroota: piyotakiro powashironkaawentziriri.

⁸ Roojatzi ryaataki paashini ronampiri eejatzi, riraga *cuatro-tapaentsiri*. Ijakotziro pajokitzirira janta ooryaaki, imatantakariri itagaeyakirini atziripaeni. ⁹ Ari itagaeyakirini, roojatzi ikijatheeeyantakaririni Tajorentsi: riraga otyaantziriri owashironkagaeyiririni. Tee ikenkithashireeyani. Tee ikowaeyini rookaero kaari kameethatatsi rantayitzirini, eejatzi tee ikowaeyini ipinkatheeeyerini Tajorentsi.

¹⁰ Roojatzi riraga apawakoonitapaentsiri ronampiri, ijakotziro pajokitzirira janta iwinkatharimentoki koweenkatatsiri. Roojatzi otsitenitantanaka janta ipinkatharitzinta. Osheki oshinkotakiri atziri, tema osheki ikenkithashiryaaapiinteeyanakironi, roojatzi ratsikanenetantanaka. ¹¹ Eekiro ryaatataye ikijatheeeyakirini Tajorentsi, ikijawentawo ijoepaeni eejatzi maawaeni ikemaatsitaytakarini. Osheki ikantzimatakiri. Omaanta tee ikenkithashiryaaani, tee ikowaeyini rookaero kaari kameethatatsi ranteeeyakirini.

¹² Roojatzi riraga paashini ronampiri riraga *seis-tapaentsiri* ijakotziro iwajonekira janta antawokiroña eni oetachari Eyojaraate, roojatzi opiryaat-aperotantanaka. Iroñaaka tekatsi otzikaawakirini riraga pinkatharipaeni jewateeyiririni maawaeni ijoraarotepaeni. Ipoñeeyanakaani janta ikinapaenta oorya. Tema riyotzi Tajorentsi ikowaki riraga jewawenantatsiri-paeni nampitsikipaeni janta ikowaki ipoke ranantawakaantyaari joraaro rirori rootaki rowiryatantakawori enini rawijantanakaari kameetha. ¹³ Roojatzi noñaakiri eejatzi riraga maanki, riraga koweenkatatsiri, eejatzi riraga amatawitantatsiri; tema irira ipoñeeyakanipaantekipaeni 3 kamari, roshiyapaakari pirinto. ¹⁴ Kyaaryo, ikamaaritaperotaki; itajonkanta-jeempiyaawitaka, imataitakironi kaari añaapiinteeyini. Riyaatashiteeyirini maawaeni pinkatharipaeni maawaeni kipatsi, rajaryagaeyakarini:

—Thame atsipatawakagaeyani, amitakotawakagaeyeyaani omanateeyerini maawaeni oyaateeyiririni Tajorentsi, athonkaeyerini maawaeni.

Aririka ipokapae irira, riraga matzirori maawaeni, romanatawakagaeyeyaani riroripaeni. Ikemakoeyeroni maawaeni atziripaeni rantayita-paakirini Tajorentsi. ¹⁵ Ikantapaaki:

—Pamine, nokimitaka koshitantatsiri romapokiri rirori, eejatzi naari, nomapokaeyapaakimini. Tee piyoteeyini tsikarika okaate nopokanteeyaari. Nokimoshiretakagaeyerini maawaeni aamagaeyanarini, kimitaka ijaakitkitzi irirapaeni. Nokowaki ikameethateeyanakini, eero rantapiintziro kaari kameethatatsi. Ikimitakaantya ikithaata kameetha, tekatsi ñaamerikiterini eero ipashiwenanta.

¹⁶ Omaanta riraga kamaaripaeni ipiyoteeyakirini riraga maawaeni jewanenantsiri eejatzi ijoraarotepaeni janta owinteniiyeenta ikantziro ipaanteeki joriyo Arimakeroni.

¹⁷ Roojatzi riraga ronampiri seis-tapaentsiri: riraga kaatapaentsiri ijakotziro iwajonekira janta tamanyaaki, roojatzi nokemantakari jeekatsiri janta Tajorentsipankoki, jeekatsiri iwinkatharimentoki. Itacheronkawaantetaki, ikantaki:

—Monkaatapaaka, aritapaaki.

¹⁸ Roojatzi osheki aamorenki, morek, morek; roojatzi itonkantanaka tariito, toog, toog, tereeii, tziiririri. Eejatzi antawo omoyekaka kipatsi. Tee añaatapiintawo kimityaaawoni iroka, paeraninki roojatzi iroñaaka. Antawo omoyekaka: moye, moye, moye. ¹⁹ Roojatzi okotaantanaganaka nampitsikipaeni eejatzi maawaeni pankotsipaeni oparyaanantakanaka janta Wawiroomiyaki, eejatzi maawaeni paashinipaenki nampitsi, othonkaeyakan maawaeni, kaatapaaki. Ikenkithashiryaakiro Tajorentsi maawaeni ranteeeyakinirini wawiroomiyajatzi, rootaki ikijaperoeyantakaririni, rowashironkaaperoeyakirini. ²⁰ Opeyeeyananakan maawaeni othampishaapaeni; eejatzi otzishipaeni, opeyeeyananakan peyaka. ²¹ Ajaatyta eejatzi opariyaki jiriniki, omaanta antawopero ini. Okaatzi otenataki 45 kiilo: tenaperotaki. Opoñaaka jenokinta, opariyaki atziriki, osheki othonkaeyakirini. Osheki iňhaawanteeyakawoni riori, roojatzi ikijathateeeyantakaririni Tajorentsi.

17

Jowa iňaakiro antawo nampitsi Wawiroomiya

¹ Roojatzi koňaatziro noňaaperotakiri ronampiri Tajorentsi oteyirori pajo inkaaganki, tema ipokashitakina ikantakina:

—Pipokanaki jaka: noňaayemiro tsika ikantakowenantyaariri Tajorentsi rowaga anteeyiririni shiramparipaeni, jeekatsiri enikipaeni, eejatzi ñaatenikipaeni. Rowashironkayero. Tema oshiyakawo rowaga antawo nampitsi owaero Wawiroomiya. ² Ranteeeyakironi iwinkatharitepaeni paashinipaeni atziri. Iyotagaeyakirini maawaeni atziri rantapiintziro kaari rayi. Okimitakaakari oshinkitakaakari rootaki antakaantakariri oetarika okowakaari roori.

³ Roojatzi raanakina janta okaankiityeenta tekatsinta atziri ipanko, eeniro janta oňaagakinawo Ishire Tajorentsi. Koňaatziro noňaapaakiro tsinani, okyaakotakari koweenkatatsiri, kityonkatatsiri: eenitatsi 7 iito, eenitatsi ichee 10. Rojataakoetakirira maawaeni iwathaki: okantzimatzi Tajorentsi ojataakorentsira. ⁴ Okithaatkawo tsinani kamoshinetatsiri eejatzi kityonkari. Rowaneenkatakaakawo ooro, eenitatsi mapipaeni shipakiriinkawo eejatzi inashita mapipaeni kitamaakiri. Oerikanakitziro omirimento, riwetsikaetzri ooro; yekitapaka kaari kameethatayitatsini, oshiyakaawentziro antakagaeyirini atziri raapatziyashitawo riwetsikani atziri eejatzi iyotagaeyirini imayempitantzi. ⁵ Ojataakotaka opankaki: eenitatsi okantakotziri, omaanta tekira okoňaaperotzi. Okantzi ojankinatakaga: “Antawopero Wawiroomiya, tema iyotagaeyironi tsinaniipaeni omatakayitarini kaari ayi. Eejatzi iyotagaeyirini osheki atziri raapatziyashitawo riwetsikashitayitarini eejatzi rantero oetarika kaari kameethatayitatsirini”. ⁶ Roojatzi niyatapiro kimitaka oshinkitaka tsinani. Ro oshinkitakari riraani aapatziyawitaririni Jesoshi owamagaeyakiririni.

Osheki notsikanatanakawo, naminaperotakiro, joreririri. ⁷ Omaanta rojampitana riraga ronampiri Tajorentsi:

—¿litakaka potsikanatantanakawori? Nokamantemiro kaari piyotzitziro, eejatzi nokamantemiro kaari piyotzitziri riraga koweenkatatsiri okyakotakari. ⁸ Ijeekawitani riraganki, tee añaari iroñaaka, tema ijeeki omooki inthomaenta, jatatsiri jantoo. Iinja ragaeri eejatzi Tajorentsi, rotyaanantyaariri paamariki kaari tsiwakanitatsini: janta ikanteetatyeyaaani rashironkaya. Ijeekawitani, ipeyaka, ijeekae eejatzi; aririka iñeeyawakirini theenkaeyatsirini, rotsikanatawakawoni. Paerani, owakira riwetsikakiro Tajorentsi kipatsi, rojankinatakiro iwaeropaeni maawaeni jatatsininta jenokinta, omaanta tee rojankinatziro iwaeropaeni riraga theenkantatsiri.

⁹ Pamine, pikenkithashiryaaperoteri iroka noshiyakaantemiri piyotantyaawori: rowaga iitopaeni okaatzi ⁷ oshiyakaawentziro 7 tonkaarpaei ojeekinta tsinani. ¹⁰ Eejatzi oshiyakaawentziri 7 jewawenantsirsipaeni. Ikamanaki apawakooni, ijeeki iroñaaka apaani, iinja ijeeki riraga kaatapaentsiri. Eero ojamanitzi ipinkathariwenante riraga kaatapaentsirsira. ¹¹ Riraga koweenkatatsiri kityonkari, rirotaki apaani pinkatharitawitachari nokantakimiri: "Ikamaki". Omaanta ipiriintanee eejatzi, ipinkathariwenante eejatzi riraga *ocho-tapaentsiri*, roojatzi rotyaanantakaari Tajorentsi paamariki kaari tsiwakanitatsini.

¹² Eejatzi rowaga ¹⁰ ichee piñeeyakirini, oshiyakaantziri ¹⁰ paashinipaeni jewawenantsatsiri iinja. Ikaateeyerini koweenkatatsiri, ipinkathariteeyawitanakyaani, eero ojamanitzi ipinkathariwenante.

¹³ Ikimitawakagaeyeyaaani jewawenantsirsipaeni, ikanteeyerini koweenkatatsiri: "Nokenkithatakaaperoyemini eerori, nanteeyemironi oetarika pikowakaagaeyenarini". ¹⁴ Roojatzi ikijeeyerini irirapaeni Jesokirishito riraga Rowishire Tajorentsi, eejatzi oyaateeyirini: romanateeyawityaarini, ikowaeyawityaani ithonkaeyerinimi. Omaanta ipiyeeyaarini Jesoshi, ithonkaeyerini riori. Irira apintzi ikanaka, tajorentsiperotatsiri, reewatawenteeyirini maawaeni jewatawentawitariri atziri, reewatakagaeyirini maawaeni jewatakagaeyawitaririni atziripaeni. Riyoyagaeyakirini maawaeni aapatziyeyearirini, ipaashinitakagaeyeerini, ari kijokiro rowaeyaneerini riori, maawaeni.

¹⁵ Eejatzi ikantakina ronampiri Tajorentsi:

—Eejatzi piñaakiro enipaeni eejatzi ñaatenipaeni ojeekantari tsinani. Oshiyakaantakiri irowapaeni maawaeni atziripaeni, riraga jeekatsirsipaeni tsikarika, tsikarika okantayitarini ipaantepaeni, maawaeni. ¹⁶ Riraga koweenkatatsiri eejatzi riraga ¹⁰ jewawenantsirsipaeni ikijeeyakironi tsinani: rowaga matakapiañtariri kaari ayi. Rotzioreero maawaeni nampitsi, ikoshitero oetarika jeekatsirira, itayero maawaeni pankotsi. Eero ojeekaneentzi oetarika kameethatatsiri. ¹⁷ Riraga Tajorentsi ikenkithashiryaakayaari ikijeeyeroni roori, imonkaatantyaawori okaatzi ikoyiri Tajorentsi. Rootaki ikananteeyerini riraga jewawenantsirsipaeni: "Thame apinkathateeeyerini riraga koweenkatatsiri kityonkatatsiri, anteniri oetarikapaeni ikowakagaeyeerini". Aritaki ikanteeyerorini iroka omonkaatantyaari ikoyiri Tajorentsi. ¹⁸ Iroka tsinani piñaakiri oshiyakaanteeyakirini maawaeni jeekatsirsipaeni nampitsikinta: riraga anaakoeyiririni paashinipaeni atziri ipinkatharitzi.

Aritaki ikantayitanani ronampiri Tajorentsi okaatzi okantakotya iñaayitzirini.

¹ Roojatzi koñaatziro noñaakiri. Tema noñaawakiri ipokapaaki paashini ronampiri Tajorentsi, ipoñaanaka jenokinta. Osheki ipinkatharitapaaki, ishipakiryapaaki, ikitejitaperotapaakiro kipatsi, rochookyapaakina ee-jatzi nothaawantanakari. ² Itacheronkawaantetapaaki ikaemapaaki:

“Rooteentsi ithonkaeyani maawaeni jeekaeyawitacharini Wawirooniyaki; osheki inashiwitani, osheki ipinkatharitawitani, rooteentsi ithonkaeyani.

Irira jeekapaentsiri kamaaripaeni inampityaawo, eejatzi mamawoniro, thoowoniro, peyariipaeni, maawaeni. Roshiyeeyakawoni rowaga tsinani, matakapiinttariri kaari ayi.

³ Tee okameethatawitani ojeeke, eejatzi iyotagaeyakirini maawaeni paashinipaeni atziri ikimiteeyantakaworini riori.

Ranteeyakironi pinkatharipaeni; osheki raagaantki riraga pimantzirori owetsikani, kyaaryo maawaeni rantayitakironi osheki kaari kameethatayitsini. Tema amanantaperotaka osheki”.

⁴ Roojatzi nokemakiro Ishire Tajorentsi janta jenokinta, okantzi: “Aapatziyeyaririni Jesoshi pishitowaeyaneeni, rowaga nampsiki: pilkim-itawokari, pantzirokari eerori kaari kameethatayifatsini antziri roori. Pikaateeyironikari, nowashironkagaeyiminikari.

⁵ Riyotzi Tajorentsi osheki rantapiintziro kaari kameethatatsi. Eekiro riyaatatyne ikenkithashiryaakotero okaatzi rantziri, eejatzi royaakotziro kitejiri rowashironkaeri. Rooteentsi monkaatapaaka. Intsipaete rowashironkagaeri”.

⁶ Roojatzi ikantziri apaani ronampiri Tajorentsi inashiyitacharinipaeni: “Paerani osheki owashironkagaeyakirini paashinipaeni roori, iroñaaka pipiyeeyaaawoni, eekiro piyaateeyatyenei powashironkaaperoey-erini. Tee okameethatzi anteeyakirini”.

⁷⁻⁸ Iroka tsinani okenkithashiryaaka osheki okameethaperotaki roori. Tekatsi kimityaawoni. Osheki amanantakiro oethaari rooperori ee-jatzi othatanepaeni owaneenkayitantyaarini”.

Ajagaakwo ajankaneki okantzi: “Tema naaka kimitawori jewawenan-tatsiri. Osheki nokimoshiretaka. Eero netakotzimaetawo. Eekiro niyaatatyee niweshiryaaawentyaawo”.

“Rootaki iroñaaka powashironkaantyaawori kameetha. Ari aashitakyya-wopa otashe; pimantsiyatatakaakiro; pikemaatsitakaakyaaawo katsiri; ari piccheraajagaakitanaki eejatzi ari pomiraakiro.

¡Omapokapaakya pitaya! Tema ishntsiperotaki Tajorentsi riraga kantakotan-tatsiri. Rootaki ikantakotziri ronampiri Tajorentsi”.

⁹ Riraga pinkatharipaeni antayitzirorini kaari kameethatatsi eejatzi ithonkatashitakawo tsinani iyorikite, ifeeyeroni otaaya, eejatzi ifeeyerori owachaarite; roojatzi riraakoeyaantyaaawoni, rowashiretakotyaawo.

¹⁰ Inteena ikatziyeeyananakani; ithaawaeyananakini, raamaashitya rowashironkagaeyironi Tajorentsi riori. Ikanteyeni:

“O, wawirooniyajatzi, pashironkagaeyakanwiee. O, antawo pinampi, os-heki pikaateeyawitani jeekaeyawitacharini.

Romapokapaakimi Tajorentsi, intspaaete ithonkaeyakimini, maawaeni”.

¹¹ Ari riraakoeyakimini pimanteeysirsini maawaeni kipatsi, rowashiretakoeyakimini. Paerani osheki piñaawenashiryagaeyawitawoni oetarikapaeni ipayitawitzimirini, omaanta eero iroñaaka pamanantee eejatzi. ¹² Tekatsi ikantya ipimantemiro ooro, piraata, shipakiryaaatsiri mapi, kitamaakiri mapi, riino kitamaari, kityonkamawori, jentamawori, kiraamawori. Tekatsi ikantya ipimantemiro taawirakota inchato kajankakotari, ajawaka raeki kitamaacheekiri riwetsikaetziro oetarika

kameetha, pinatachari inchato riwetsikaetziri oetarika, kijotayitatsirini, pinatachari mapi. ¹³ Eejatzi tekatsi ikantya ipimantemiro majankapaneri eejatzi pochapaneri, tsipataapanetachari rowari, kajankapaneri, kajankaayitsirini, awishoowaantsi oowa, oyeenka oriwo, opane teriko, teriikopaeni, waakapaeni, owishapaeni, kawayopaeni, shiyakomentotsipaeni, eejatzi atziripaeni; kyaaryo, ipimantayitzirini atziri.

14 Ikanteete:

“Eero powawo eejatzi chochoki pinintawitari; tee okowanee pipaante owaneeya; paerani eeniro powaneenkatawitan. ¿Tsika pimaathaaganki kityonkamaworiranki iroñaaka? Tekatsi, taaka. ¿Arima pamanante paashini? Eero. Thonkakimi eeroka”.

¹⁵ Riraga pimantapiintawitaworini maawaeni iroka owaagawontsi raan-tapiintawitaririni osheki koriki; omaanta iroñaaka ikatziyeeyanakini intena, ithawaayaeyanakini, raamaashitya eejatzi rowashironkagaeyerini Tajorentsi riori. Riraanakya eejatzi ishenkatanakya. ¹⁶ Ikante: “¡Ashironkaamatsitemiini, wawirooniyyajatzi!

Pashironkaakawee. Antawo naawita pinampi, osheki pikaatawitan jeekaeyawitacharini. Pikitthaateeyawitakawoni riino jentamawori, kityonkaniriromawori, eejatzi kiraamawori, powaneenkaeyawitawoni oro, mapi shipakiryaatsiri, eejatzi kitamaakiri mapi.

¹⁷ Romapokakimi Tajorentsi, ithonkitakimiro maawaeni, thonkapaaka”.

Eejatzi maawaeni marineero eejatzi ashiteeyaworini pitotsi aapiintzirori owaagawontsi ikatziyakoeyakaani ipitoki intena. ¹⁸ Inteena raminakoeyeroni owachaarite, teyariririri, roojatzi riragaeyantanakyaani. Ikanteeyeni:

“O, okameethatawitan nampsinta, tekatsi kimityaawoni”.

¹⁹ Osheki rowashireteeyanakyaani, rootaki imeritantanakyaari eejatzi roeyotantanakyaari iitoki. Osheki riraakoeyakaawoni eejatzi rowashiretakotakaawo, ikaemaeyanakini:

“¡Ashironkaamatsitemiini! Pashironkagaeyatyeyaaaniwee wawirooniyyajatzi, antawo naawita pinampi, osheki pikaateeyawitani. Osheki iyaatapi-intzini antawo pitotsi janta, ipimantziro ashitawori osheki owaagawontsi, raantari osheki koriki.

Omaanta omapokanakya othonkanakya pinampi, maawaeni”.

Ikimoshireeyanakini aapatziyeeyaririni Jesoshi

²⁰ Roojatzi nokemakiri ronampiri Tajorentsi, ikanteetzi:

“Pikimoshireeyanakini, maawaeni jenokijatzi: aapatziyeeyaririni Tajorentsi, rotyaantanewopaeni Jesokirishito, kamanantawitacharini, maawaeni.

Paerani osheki owashironkagaeyakimini, rootaki ipiyatakowenantakimiri Tajorentsi”.

²¹ Roojatzi noñaakiri ronampiri Tajorentsi, shintsiperotatsiri. Raakiro antawo mapi, rookakiro antawokiroña inkaare, poog. Ikantzi:

“Nowiinkakiro mapi, peyaperotaka; tekatsi ñeeroni eejatzi. Eejatzi ikimiteero Wawirooniya, ithonkaeteero roori, thonkapaaka; tekatsi ñeeroni eejatzi.

²² Eeniro akemapiintawitari chapinki piyompiwaetawitacharini, omampaawaeteeyawitacharini, showitawaetawitacharini, tziwootawaetawitacharini; omaanta iinja tekatsi kemaerini.

Eeniro naawita chapinki wetsikayitaworini oetarikapaeni, omaanta iroñaaka tekatsi.

Tee akemaeri iroñaaka toonkirori rowaetari, tok, tok, tok.

²³ Eero otziwootaa eejatzi itziwoomento; eero ijeekae eejatzi aatsnii iina.

Paerani riyotakoeyakirini riraga pimantayitsirini janta Wawiroomiyaki, osheki ipiyotakiri iyorikite. Riraga jeekatsiripaeni ramataw-iteeyakirini jeekatsiri paashinipaeniki kipatsi,

²⁴ eejatzi rowamaakaanteeyakirini maawaeni kamanantayitzirorini iñaani Tajorentsi, eejatzi maawaeni aapatziyaririni Tajorentsi, eejatzi paashinipaenii owamagaetsiri jäka kipatsiki; rootaki ithonkanteeyemirini Tajorentsi maawaeni eerokapaenii wawiroomiyajatzi".

19

¹ Roojatzi eekiro niyaatatzi koñaztiro noñaaperotakiro. Tema noke-maeyakirini oshekiniroña jenokijatzi, ishintsitzi romampaawaeteeyani: "Ariwee, ikameethaperotaki Tajorentsi: rirotaki owawijaakoeyeerini.

Thame apinkathataperoeyerini, tema itajorentsiperotaki.

² Okameethataki rowashironkaero matakaapiintariri kaari ayi, riyotakiro rantayitzirini, tekatsi ikomptyaawo.

Osheki iyotagaeyakirini paashinipaenii atziri imatayitzironi kaari rayi, rootaki rowashironkaantakawori; tema oñaashitakawowee roori.

Eejatzi osheki owashironkagaeyakirini aapatziyeyaririni Jesoshi, rootaki ipiyatakowenantakariga".

³ Roojatzi rapiiteeyeroni riroripaeni:

"¡Ikameethataki Tajorentsi!

Tema taaperotaka, okanteetatyeyaanii okatziyeenkatanaki kachaari, eero opeya".

⁴ Ari ijeekaki Tajorentsi janta iwinkatharimentoki. Rotzi-herowashiteeyakarini riraga ²⁴ aataperoteenchari eejatzi riraga ⁴ ronampiri omampaawaetapiintachari osheki ipinkathateeyakirini. Ikanteeyini:

"¡Aritaki okantyaari! ¡Apinkathateeyirini Tajorentsi, tema ikameethaperotaki!"

⁵ Roojatzi nokemakiro Ishire Tajorentsi, opoñaaka okaakini Tajorentsiki, okantzi roori:

"Maawaeni antawaateeeyiniririni Tajorentsi piñaaperoeyerini iroñaaka, eejatzi pipinkathateeyerini.

Pinkatharipaeni, piñaaperoeyerini;

eejatzi eero, maawaeni kaari pinkatharitawitachari, piñaaperoeyerini eero eejatzi".

⁶ Roojatzi nokemaeyakirini osheki jenokijatzi, itacheronkawaantetzi iñaawaeteeyini, ikimiteeyakawoni osheki opareenkayi antawaatatsiri ee-jatzi ikimiteeyakarini antari tariito. Ikanteeyini:

"¡Maawaeni atziri, thame añaaperoteri Jeyowaa!

Tema ikameethaperotaki irira: tema ipinkathariwenteeyakaeni Awinkatharite, osheki itajorenka.

⁷ Thame aweshiryawenteeyaaarini, akimoshirewenteeyerini maawaeni.

Thame apinkathateeyirini maawaeni.

Iroñaaka omonkaataka kitejiri raantyaawori Rowishate Tajorentsi iina. ¡Pamine sha! Tema wetsikaka roori kameethaanikitaki tema iñaakiro rirori ayeroni okameethataki.

⁸ Okithaatkawo riinomawo kameethari, jentamawori, kitamaaperotatsiri; tee okipatsineentzi, kiteri. Tema ipashitakawo Tajorentsi.

Rowaga riinomawo kameethari roshiyakaawentakae Tajorentsi iñaakae akameethatzi tema aakapaeni reentsite rirori anteeyakironi kameethatayitatsirini ikowakaakaeri”.

⁹ Roojatzi ikantakina ronampiri Tajorentsi:

—Pojankinatera iroka: “Rooteentsi raye Rowishate Tajorentsi iina. Tema ikaemaeyerini osheki atziri rakiyoteeyerini. Okameethatzirkami maawaeni atziri ikowakimi rakiyoteeyerinimi rootaki raapatziyeeyantyaaririnimi riroripaeni. Omaanta apatziro ikaemeri riraga aapatziyariri riraga ayirorira. Ikimoshirewenteri riroripaeni”.

Roojatzi ikantakina:

—Iroka nokamantakimir, rootaki ikantaperotakinari Tajorentsi. Kyaary-ooperotsiri ini.

¹⁰ Ari notziwerowashitawitakari ronampiri, nopinkathaterimi, omaanta ikantakina:

—Eero pipinkathatana. Tema akimitawakagaeyakan: naari, eejatzi eerori, eejatzi maawaeni piyemijantzinkarite kenkithatakotapiintziriri Jesoshi. Aritaki akimitawakagaeyakan anteeyinirini ikowakagaeyakaerini. Eero pipinkathatana, omaantakya riraga Tajorentsi pipinkathate.

Riraga kenkithatakotziriri Tajorentsi, riroteeyakini kenkithatakotziriri eejatzi Jesoshi.

Riraga kyaakotariri kawayo kitamaari. Romanatawakagaeyakan janta Arimakirooni

¹¹ Roojatzi koñaatziro noñaakiri eejatzi: tema noñaakiro jenokinta inthomaenta, eejatzi noñaakiri kawayo kitamaaperotatsiri. Noñaakiri Jesoshi ikyakotakari, iiteetziri: Monkaatzirori Okaatzi Ikantziri; eejatzi iiteetziri: Kyaaryooperotsiri. Ikameethataki: tee rowashironakashitari atziri, tee rowamaashitari. Riyotzi oetarai rantziri, tee ikijashitari. ¹² Roki okimitakawo paamari amoreki, ramantheetakawo osheki amantheerentsi. Rojataakotaka ipankaki iwaero, omaanta tekatsi yoteroni; apaniroeni ryotziro rirori. ¹³ Otsikirijakoteetakiri imaathakira iraantsiki; eejatzi iiteetziri: Iyoperotakotakaaneeriri Tajorentsi. ¹⁴ Rimpaaeteeyapaakirini osheki joraaro jenokijatzi, ikyakoeyakarini kawayo, rirotaki kitamaari eejatzi; ikitheeyawoni riinomawo kameethari, okitamaamawotaperotaki, tee opitsizi. ¹⁵ Ojeeki ipaanteki jewateeyiririni ithatyamento, thoyempitaperotatsiri ipejeevyantyaaririni kaari pinkatheeyiririni. Ipinkathariwentaperoyerini, eerowa ikaminthayiri eechonkiini. Riraga wetsikirori awishooawaanti oowa rawishoowantakawori owwa. Aritaki ikimitakiriri riraga kyaakotakariri kitamaaperotatsiri raatzikaperoyerakirini atziri, riroteeyantyaarini rirori ikijaperoeyakirini Tajorentsi, riraga Shintsitaperotatsiri. ¹⁶ Ojankinataka iithaariki jewateeyiririni, eejatzi iporiki, okantzi: “Irira pinkathariwenteeyiririni maawaeni jewawenantatsiripaeni, anaakoeyiririni maawaeni jeeakakaanteeyantatsirini”.

¹⁷ Roojatzi noñaakiri apaani ronampiri Tajorentsi katziyenchari ooryaaki. Itacheronkawaantetaki ikaemaeyakirini maawaeni tzijopaeni:

—Pipoke, powaeyani. Powaeyaarini iwatha ipaeyemirini Tajorentsi; enitatisi osheki powaeyaarini. ¹⁸ Poyaari iwatha pinkathari, iwatha kapitaanotatsiri, iwatha shirampariperotatsiri, iwatha kawayo eejatzi riraga kyaakowitariri. Poyaari iwatha maawaeni atziri: pimantarewo eejatzi amanantawitariri, pinkatharitsiri eejatzi kaari pinkatharitsati.

19-20 Roojatzti noñeeyakirini riraga koweenkatatsiri eejatzi maawaeni riraga pinkathariipaeni kipatsiki, ipiyoteeyakirini ijoraarotepaeni, maawaeni. Eejatzi royaatakiri koweenkatatsiri riraga atziri, kantawitachari: "Nokamantemi tsika ikantari Tajorentsi". Osheki itajorentsijeempiyawitakan, ramatawiteeyantakaririni kaari aapatziyeeyaririni Tajorentsi ipinkathaneeri riraga koweenkatatsiri eejatzi roshiyakaawero. Rojataakoeyakani ipankaki riraga kaari aapatziyariri Jesoshi. Ari riyaatashteeeyawitakarini romanateeyerinimi riraga kyaakotakariri iyawayote eejatzi joraaropaeni riori. Omaanta raawakiri apite: riraga koweenkatatsiri eejatzi riraga amatawitantatsiri. Rookakiri janta antawoki inkaare, eeniro rañi. Tema rootaki paamariki kaari tsiwakanitatsini. **21** Omaanta paashinipaeni, ipejeeyakirini riraga kyaakotachari, ipejeeyakirini maawaeni, thatzik, thatzik. Ro ipejantakariri ithatyaaamento ipaantekira. Ari rowaeyakawoni tzijopaeni iwatha, ikemaperotakawo.

20

Ikenkithatakotziro 1000 ojarentsi

1 Roojatzti eekiro niyaatatzi koñaaperotakiro. Tema noñaawakiri rayiitapaaki paashini ronampiri Tajorentsi, ipoñaanaka jenokinta. Roerikiro iyaawiryaaantawori omoo kipatsi, jatatsiri jantoo. Eejatzi ramapaakiro antawo kareenatha. **2** Raapaakiri riraga maanki, jeekitachari paerani. Rirotaki kamaari riraga iwinkatharite maawaeni paashinipaeni kamaari. Tema iileteetziri Jatanaashi. Ari roojotaperotapaakiri kareenathaki, shirik, shirik; okaataki 1000 ojarentsi roojoryaakotanteeyeririni eejatzi iinja. Tema ojamaniperotaki ramatawitakiri irira atziripaeni. **3** Roojatzti rookakiri omooki, rashitakotakiri, riyaawitakotakiri. Tekatsi ikanteeya eejatzi ramatawieeyeririni atziripaeni, okaataki 1000 ojarentsi. Omaanta roojatzti riyowanee, eero ojamaniperotzi ramatawitantee eejatzi.

4 Roojatzti noñeeyakirini osheki jeekatsiripaeni iwinkatharimentokipaeni: riyoteeyakini ikantziri Tajorentsi: "Pikantakowenteeyerini maawaeni atziri". Paerani tee ipinkathateeyeririni riraga koweenkatatsiri eejatzi roshiyakaawero. Eejatzi tee rojataakota ipankaki eejatzi rakoki iwaero koweenkatatsiri. Ikenkithatakoyakirini Jesoshi eejatzi riyotaanteeyerironi iñaani Tajorentsi, rootaki ipejanteetakariri ikentsiki. Iroñaaka ipiriinteeyanerini Tajorentsi, ikaateeyerini Jesokirishito okaataki 1000 ojarentsi ipinkathariwenanteeyeni. **5** Irika itanaawori ipiriintanaa; omaanta tekira ipiriinteeyanenii paashinipaeni. Aririka awijanaki 1000 ojarentsi, ari ipiriinteeyanenii riroripaeni.

6 Osheki ikimoshireeyanakini riraga jewataperoeyatsirini ipiriinteeyanenii: rowameethaperoteri Tajorentsi. Riyotanaki eero riyaatzti paamariki kaari tsiwakanitatsini, omaanta ipinkatheeeyerini Tajorentsi eejatzi Jesokirishito eejatzi rantawaeteniri kimitaka ñaanakowenantatsiri. Tema okaataki 1000 ojarentsi ikaateeyerini ipinkathariteeyanakini.

Ikaatantyaawori romanatawakaya

7 Aririka omonkaatapaakya 1000 ojarentsi, ari rashitaryaakoteteetakiri Jatanaashi, roemishitowaeteeri eejatzi. **8** Roojatzti riyaatanaki riori maawaeni nampitsikipaeni, ithotyaanakiro kipatsi, ramatawieeyerini maawaeni atziri ipiyoteeyantyaaririni jeekatsiripaeni romanatanteeyaaririni aapatziyeeyaririni Jesoshi. Ikanteetziri riraga oyaateeyeririni Jatanaashi: Kogo, eejatzi Makogo. Ikaateeyanakini osheki kameetha. Okimitaka tee amatziro ayotero tsika okaatzi opane impaneki, eejatzi eero amatziro ayotero tsikarika ikaateeyini

riroripaeni. ⁹ Ikineeyanakini janta opankaeteetziinta, rinkiteeyanakirini maawaeni aapatzieeyayaririni Jesoshi, aritaki itapoteeyapaakawoni Jerojaree: rowaga nampitsi aninteeeyakironi. Romanateeeyapaakirinimi aapatzieeyayaririni, omaanta omapokanakya opoñaanakya jenokinta antawo paamari, othonkaeyapaerini; otagaeyapaakirini, pomeei. ¹⁰ Roojatzi ragaeteri iwinkatharite kamaariipaeni, riraga amatawiteeyiririni atziri, rookanteetyaariri janta antawoki inkaare. Tema paamariki kaari tsiwakanitatsini. Janta ikaateeyerini riraga koweenkatatsiri eejatzi riraga amatawitantatsiri, kantawitachari: "Nokenkithatakotziri Tajorentsi". Ari osheki ikemaatsiteyawoni: kitejiriki, tsiteniriki; ikanteetatyeyaaani.

Iñaaakiro janta kitamaawoki jeekamentotsiki

¹¹ Roojatzi noñaakiro antawo iwinkatharimento, okitamaamawotaki; eejatzi noñaakiri riraga Tajorentsi riraga jeekantawori. Opeyaperotanaka kipatsi eejatzi jenoki, peyanaka. ¹²⁻¹⁵ Eejatzi noñaakiri maawaeni piinkaeyawitacharini inkaareki. Ipiriinteeeyanaani tsitsiyawiteenchari eejatzi maawaeni jateeyatsirini jaawiki. Kyaaryo, noñeeyakirini: pinkatharitawitacharini eejatzi kaari pinkatharitawitachani, ikatziyimoteeyakawoni iwinkatharimento Tajorentsi. Roojatzi roepithokakiro paajinapaeni osheki Iwaperite rirori. Ojankineeyakan jankinarentsipaeni maawaeni ranteeeyinirini atziripaeni. Aririka rantaneentero eechonkiini kaari kameethatatsi ari omawitya rotyaanteri rirori irira janta paamariki kaari tsiwakanitatsiri eero ikemaatsitaperotawo katsiri. Omaanta riraga antzirori osheki kaari kameethatatsi osheki ikemaatsitaperotyaawo katsiri. Eenitati paashini iñaanamento rashì rirori eejatzi, roepithokakiro paajinapaeni ojankinataka iwaeropaeni maawaeni aapatziyariri Jesoshi. Riraga kaari jankinatakotacha rookaeteri janta antawoki paamari: janta rookaeteri Tajorentsi maawaeni theenkantatsiri eejatzi maawaeni kamaari. Liteetziro paamari Inampi Ashironkaaperotachari: riraga kaari ñaayiterini Tajorentsi. Oshekiperi ikemaatsiperotakawo katsiri janta ikowaki ikamae omaanta tee imatziro, eekiro riyaatatz ikeamaatsitaperotyaawo.

21

Ikenkithatakotakiro Jerojaree owakirari

¹ Roojatzi koñaatziro noñaakir: tema noñaakiro paashini jenoki eejatzi paashini kipatsi, owakirari. Aritaki opeyaperotanaka rowaga itakawori, eejatzi opeyaka inkaare, tekatsikya iroñaaka. ² Eejatzi noñaakiro rowaga Jerojaree owakirari, rowaga kameethaperotatsiri inampi Tajorentsi; opoñaanaka jenokinta, ayitapaaki kipatsiki. Osheki owaneenkayitakani, okimitakawo tsinani, rootentsirika aye oemi, owaneenkataka. ³ Nokemakiri jenokijatzi, jeekatsiri okaakini iwinkatharimentoki Tajorentsi. Itacheronkawaantetzi, ikantzi:

—Pamineeyeni: riyaataki Tajorentsi jaawiki ijekimoeyerini atziri. Kijokiro rowaeyerini, isheninkaeyantyaaririni. Eero rookaeyirini. Rirori-paeni ipinkathateri apatziro rirori. ⁴ Riweshiryaaakagaeyarini, eero ishinetziri atziri riragaeyeyani eejatzi; eero ikamaeyeeni. Eero riraakotaari eejatzi kamaentsirini, eero ishenkataa, eero ikemaatsitaawo oetarikapaeni. Aritaki othonkyaari maawaeni irokapaeni. Tekatsi.

⁵ Roojatzi ikantzi Tajorentsi:

—Pamine, nowakiratakagaero maawaeni.

Eejatzi ikantakina:

—Pojankinatero iroka: kyaaryootaki okaatzi nokantakimiri, tee namatawitzimi. Pimatero pameentyawo.

6 Eejatzi ikantakina:

—Monkaataka, nomatakiro. Naaka itakaantawori maawaeni, eejatzi naaka weyeeroni maawaeni. Iroñaaka eenitatsirika miritatsini, nopashityaari rireri iñaa owañaantatsiri; eero nokowakotziri: aritaki nopashiteeyaarini maawaeni koetyeemoeyakaririni. ⁷ Eekirorika ryaataatyee ranteeyenawoni maawaeni nokowakagaeyiririni, nopaperoyerini maawaeni koetyeemoeyakaririni. Notajonkakowentapiinteeyerini, rootaki riyotantanari naaka rashì Pawa Tajorentsi eejatzi neentsitetaperooyaarini. ⁸ Omaantakya riraga thaantzi, tema ari intsipaete ipakaanakiro raapatziyari Tajorentsi aririka opomeentsitzimotakyaari. Riroripaeni eejatzi riraga theenkantatsiri, antayitzirorini kaari kameethatayitatsini, owamaantatsiri atziri, mayempitzirori kaari rayi, matsitantatsiri, pinkathatashtayitaworini riwetsikayitzirini atziri iitajorentsitsashitari, eejatzi maawaeni amatawitantatsiri, nookaeyerini antawoki paamari kaari tsiwakanitatsini. Rootaki noshiyakaanantakariri rapiiteeya ikamaeyeeni.

⁹ Roojatzi ipokashitakina apaani ronampiri, riraga ikaateeyirini inkaaganki ⁷ oerikakirori iwajoni yeekitawitachari owaa owashironka-gaeyakiririni atziri. Ikantakina:

—Pipoke, noñaayemiro owakira aatsiri oemi: rootaki iina Rowishate Tajorentsi.

¹⁰ Intentashiretanakina janta antawoperoki otzishi, roñaagapaakinawo Jero-jaree: rowaga kameethaperotatsiri nampitsi. Opoñaanaka Tajorentsi janta jenokinta, ayitapaaki. ¹¹ Ishipakiryaakaakiro nampitsi, okimitaka shipakiryaaperotatsiri mapi kimitaka ishiwanki shiyentzi chamaero. ¹² Eenitatsi nampitsiki otantotsi inkitzirori, jatatsiri jenoki. Eenitatsi otantotsi 12 omoopaeni okaatzi, ikyaatapiintawo nampitsi; eenitatsi janta 12 ronampiri Tajorentsi shenteeyirorini. Ojankinataka omookipaeni apaani iwaero riraga 12 itomini Ishirayeeri. ¹³ Okaatzi 3 omoopaeni janta ikina-paenta oorya, okaatzi eejatzi 3 omoopaeni janta itziroryaanente oorya, eejatzi ojeeki omerikikipaeni omoopaeni: eenitatsi 3 jakakiroka, eenitatsi 3 jantakironta. ¹⁴ Ojeeki jaawiki antawo mapipaeni kaatatsiri 12, rowantawitori oshenkappaeni mapi. Ojankinataka antawoki mapipaeni apaani iwaero riraga 12 rotyaantanewopaei Rowishate Tajorentsi.

¹⁵ Ari roerikakiro ronampiri Tajorentsi imonkaatantawori nampitsi, ri-wetsikaetziro ooro. Ari imonkaatakiro nampitsi eejatzi otantotsi, eejatzi omo roori, ikyanteeyapiintarini. ¹⁶ Eenitatsi 4 otantotsi omonkaatawaka-gaeyakanı maawaeni. Eejatzi okimitaka jenoki omonkaatawakaaka. Okaataki 2.200 kirometero maawaeni. ¹⁷ Imonkaatakiro tsika okaatzi oton-taperotaki. Tema okaataki 65 meetero. Ari nojankinatakimiro ikantakinari riraga ronampiri Tajorentsi.

¹⁸ Ro riwetsikantawori otantotsi mapi shipakiryaayiperotatsirini, kim-itawori ishiwanki shiyentzi chamaero. Omaanta roori nampitsi, ro ri-wetsikayitzirini ooro, omaanta okitetakiperotanee maawaeni. ¹⁹ Jaga otantotsiki eeniro shipakiryaatsiri rootaki kamaapookitatsiri antawo mapi shawitzinirira nokamantakotakiri inkaaganki. Owaneenkayitakawoni shipakiryaayitatsirini mapi, pinataperotayitacharini: itanakawori eeni-tatsi kamaapookitatsiri kimitaka ishiwanki shiyentzi chamaero; apita-paentsiri mapi shipakiryaatsiri rootaki kamaapookitatsiri kimitaka cheetzi; rowaga tres-tapaentsiri mapi shipakiryaatsiri kimitaka oteyaki tenteritoki;

rowaga *cuatro*-tapaentsiri mapi shipakiryaatsiri kamaapookitatsiri kimitaka chokiyó; ²⁰ rowaga *cinco*-tapaentsiri mapi shipakiryaatsiri rootaki thapatonkeerikitachari kitamaari eejatzi kimitaka maankicheetzi; rowaga *seis*-tapaentsiri mapi shipakiryaatsiri rootaki kimitaka maankicheetzi; rowaga *siete*-tapaentsiri mapi shipakiryaatsiri rootaki kamaapookitatsiri kimitaka shimashiri; rowaga *ocho*-tapaentsiri mapi shipakiryaatsiri kimitaka iithoki kenthori; rowaga *nueve*-tapaentsiri kimitaka paryaantzi irakaanto; rowaga *diez*-tapaentsiri mapi shipakiryaatsiri kimitaka paryaantzi eeriki; rowaga *once*-tapaentsiri mapi shipakiryaatsiri rootaki kamaapookitatsiri kimitaka kenthoryaaniki; rowaga *doce*-tapaentsiri mapi shipakiryaatsiri rootaki kamaapookitatsiri kimitaka tsirapateya. Okaataki rinashitayitarini mapipaeni 12. ²¹ Rowaga ashitakontsi janta ikyapiinrantaworikinta otantotsi riwetsikaetayitzironi mapi kitamaakiri. Ro riwetsikaetziri ashitakontsi apaani mapi. Eejatzi maawaeni awotsi janta nampitsiki riwetsikaetziro ooro, riyoshiitashitaka ooro, tekatsi itsipateerori; eejatzi okitamaataperotaki.

²² Tee noñiilo nampitsiki ipanko Tajorentsi ipinkathateeyantyaaririni jeekatsiripaeni. Aritaki ithotyakiro Tajorentsi eejatzi Rowishate nampitsi, aapatziyeyakarini jeekatsiripaeni tsikarikapaeni. Tema rirotaki Awinkatharite matayitzirorini maawaeni. ²³ Tee ijeeki oorya roorenantyaawori nampitsi, eejatzi tekatsi kashiri kitamashiteroni: tekatsi ikowaeyantyaaririni. Tema ijeeki Tajorentsi, osheki ishipakiri okitejitanteri nampitsi. Eejatzi ikimita Rowishate, roorentakoeyakaeni. ²⁴ Roojatzi maawaeni atziri ikemijantaperotero okaatzi rametari atziri jaga owakirari Jerojaree, rowaga ikoyiri Tajorentsi. Maawaeni jewawenantatsiri kipatsiki ipokapae jaga ipinkathateri Tajorentsi eejatzi ipashiyitakyaarini oetarikapaeni kameethatatsiri. ²⁵ Aakapaeni joriyyopaeni ametapiinteyakani ashitapiintziro anampi tsiteniriki, omaanta janta tee rashitapiintziro: tema okantani okitejitzi, tee tsitenitzimaeta. ²⁶ Kyaaryo, ipokaeyakini maawaeni atziripaeni ipinkathateeyakirini Tajorentsi, ikanteeyini: "Tema ikameethataki Tajorentsi". Eejatzi ramayitakironi ipashityaariri pinaperotachari, rovaga owaneenkataka. ²⁷ Eero okyaaopae janta kaari kiteshiretayitatsirini oetarikapaeni. Eejatzi eero rareetanta antayitzirorini kaari kameethatayitatsini, tsikarika okantayitarini; eejatzi eero rareefanta amatawitantatsiri. Omaantakya riraga areeteeyachani rirotaki jankinatakoeyacharini iwaeropaeni janta iñaanamentoki rashí Rowishate Tajorentsi. Riroteeyakini jeekatsini Tajorentski, ikanteetatyeeyaani.

22

¹ Roojatzi roñaagakinawo ronampiri Tajorentsi antaworoña eni, jaankanaanikitatsiri, ikanteetziro: iñaa owañaantatsiri. Oshiyakaawentzirori tsika ijeekakaantee akanteetatyeyaaani. Opoñaaka iwinkatharimentoki Tajorentsi eejatzi Rowishate, yowaatapaaki, shaaag. ² Okinaatanaki nampitsiki niyanki. Ojeeki othapikipaeni inchatopaeni, owañaantatsiri. Oshiyakaawentzirori tsika ijeekakaantee akanteetatyeyaaani. Tema okithokitapiintzi maawaeni kashiri. Rowaga chochoki owañaaperotakaeri. Eejatzi oshi oshiyakawo aawintawontsi etsiyatakoeyiririni maawaeni atziri katsitsatsiri rajankaneki. ³ Eero añaaro janta nampitsiki kaari iñaaperotziri Tajorentsi kameethatayitatsini; tema janta ijeeki rirori eejatzi Rowishate. Ipinkatheeeyerini maawaeni atziri janta, tema riroteeyakini aapatziyeyiaririni Jesoshi. ⁴ Iñaapooteeyerini maawaeni, eejatzi rojatakoeyakyaawoni ipankaki iwaero, maawaeni.

⁵ Eero otsitenitee eejatzi, eero akowaeyirini ootamentatsi eejatzi oorya. Rirotaki kiteitakayeroni riraga Awinkatharite Tajorentsi. Akateeyerini rirori maawaeni, kimiteeyakaeni pinkatharipaeni. Tema akanteetatyeyaaani ajeeki kameetha.

Ari ithonkapaakiro Jowa rojankinari

⁶ Roojatzi ikantakina riraga ronampiri Tajorentsi:

—Kyaaryootaki iroka noñaagaeyakimirinika, tema pimatziro pameenantyaaworini. Iroñaaka nothonkakiro noñaayemiri okaatzi awijanaki iinja, tema awijanaki intsipaete. Rirotaki riraga Tajorentsi ikanteetatyeyaaani riytakaakiri riraga kamanantayitzirorini iñaani otyaantakinari niyotaantakimiri eerokapaeni okaatzi awijaneentsini paata.

⁷ Ikantzi Jesoshi:

—¡Paminetya sha! Kaakitakina. Okimoshiryaakayeri maawaeni atziri eekiro ryaatatyyee raapatziyawo okaatzi nojankinatakaakiriri Jowa iroka ñaanamentotsikika.

⁸ Nowaero naari Jowa. Naaka kemakirori eejatzi ñaakirori maawaeni iroka nojankinatakotakirika. Irira oñaagakinawori ronampiri Tajorentsi. Roñaagantakinawori, notziwerowashitawitakari, nopinkathatantakariri,

⁹ omaanta ikantakina:

—Eero pipinkathatana, akimitawakagaeyakan: tema aaka-teyakini antawaeetyeiniririni Tajorentsi. Naari, eerori, eejatzi piyemijantzinkaritepaeni, riraga kamanantayitzirorini iñaani Tajorentsi, eejatzi maawaeni aapatziyeyaworini iroka pojankinatziri: akimitawakagaeyakan. Eero pipinkathatana naari, omaantakya riraga Tajorentsi pipinkathaperoteri.

¹⁰ Roojatzi eejatzi ikantakina:

—Eero pimaniro iroka pojankinatakiri, rooteentsi omonkaataky.

¹¹ Eerotzitarika omonkaata nokantakimiri, ikantyaani rapiitapiintero kaari kameethatatsi ranteeyirini, eekiro ryaatatyyee. Eejatzi ikimityaari riraga kameethatatsiri: eekiro rowaagatyero rantayitzirini rirori. Riraga aapatziyaperotariri Jesoshi ikanteetatyeyaaani imataperoteniri Tajorentsi maawaeni ikowakaeriri.

¹² Ikantzi Jesoshi:

—Eero ojamanitaperotzi roojatzi nopolanteeyari. ¡Kaakitakina! Aririka nareeteeyapaakimini, tema nopolanteeyapaerini maawaeni anteeyakimaworini nokowakaeriri. ¹³ Naaka itakaantawori maawaeni, eejatzi naaka weyeeroni maawaeni. Nitaperotakawoni nojeeekini, eejatzi iroñaaka nokanteetatyeyaaani nojeeki. ¹⁴ Noemoshirenkaeyerini maawaeni aapatziyariri Jesoshi. Noshiyakaawentemiri eerokapaeni. Tema kimitawitaka pikawaeyironi piithaariipaeni pikameethatantarri. Tema iroñaaka noshinetemi powaeyaawoni okithoki inchato owañaantatsiri, eejatzi noshineteeymini pijkeekaeyenon nonampiki: pikyagaeyapaeroni omoo ikyaapiinteeyatarini. ¹⁵ Omaanta janta nampsitski tee ishineteetziri ijeki theenkantatsiri, matsitantatsiri, mayempitzirorini kaari rayi, owamaeriri atziri, pinkathatzirori riwetsikashitayitarini atziri, kowatsiri ramatawitya rirojatzi, amatawiteeyiririni paashinipaeni, maawaeni. Eero rareeteeyawoni riroripaeni nonampiki. ¡Eerowa! ¹⁶ Naaka Jesoshi. Notyaantakimiri nonampiri, ikamantakimiro noñaani powagaeyantyaanaririni maawaeni aapatziyeyyanarini. Naaka wetskiriri Iraviiirini, eejatzi naaka icharineeteni. Noshiyakari kamori okitejitzimataneerika.

¹⁷ Ishire Tajorentsi eejatzi roori iinathori Rowishate Tajorentsi, okanteeyirini: “Thame paapatziyari Nowinkatharite”. Thame

maawaeni kemaeyirorini, pikimiteeyaaawoni, pikanteeyeni: "Thame paapatziyari Nowinkatharite". Eejatzi eerori, tsikarika pijeeakaeyini: noshiyakaawentemiro. Aririka pikemakiro pimiri, pameentyaari Nowinkatharite. Ninkarika kowaentsini rire, pameenteeyarini: tema ipakimi iñaa owañaantatsiri, tekatsi ikowakoeyemini. ¹⁸ Eeniroka nokamantteeyeririni maawaeni ñaanateroni iroka jankinarentsika. Monkaataka: ari okaatzi. Tekatsikya pojankinatee eejatzi iroka ñaanamentotsika. Aririka pojankinawaetashitakyaawo oetarikapaeni, piyotaashityaaririmi inashitachari, aritaki rowashironkaaperotemi Tajorentsii: rowashironkaaperotemi okimita rowashironkaaperoeeyakirini maawaeni atziri Iwaperitekika. ¹⁹ Eejatzi okimitaka, kyaaryoowa pipeyeerokari jankinarentsika. Aririka pipeyeero oetarikapaeni, eero ishineteemi Tajorentsi poyaawo okithoki inchato owañaantatsiri; eejatzi eero piñiiro inampi Tajorentsii, iroka okenkithatakotzirika. ²⁰ Jesoshi riraga iyotaakinawori iroka, ikantzi:

—Kyaaryo, eero ojamanitzi nopyanteeyaari.

Nokantzi naaka:

—Aritaki okantyaari. Pipokae Nowinkatharite Jesoshi. ²¹ Nokowaki Awinkatharite Jesoshi ineshironkaperoeeyemini maawaeni aapatziyariri. Aritaki ikantapiintyaani.

Naaka jankinatzirori:

Jowa